


Ilajtulisi Yancuic  
toTata Jesucristo



New Testament in Nahuatl, Michoacán (MX:nc1:Nahuatl,  
Michoacán)

# **Ilajtulisli Yancuic to Tata Jesucristo**

## **New Testament in Nahuatl, Michoacán (MX:ncl:Nahuatl, Michoacán)**

copyright © 1998 Wycliffe Bible Translators, Inc.

Language: Nahuatl, Michoacán

Translation by: Wycliffe Bible Translators, Inc.

Náhuatl, Michoacán [ncl], Mexico

### **Copyright Information**

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Nahuatl, Michoacán

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
da3cba3e-3a5e-5fce-927d-24a57a332bf9

## Contents

SAN MATEO . . . . .	1
SAN MARCOS . . . . .	81
SAN LUCAS . . . . .	127
SAN JUAN . . . . .	212
HECHOS . . . . .	273
ROMANOS . . . . .	348
1 CORINTIOS . . . . .	391
2 CORINTIOS . . . . .	430
GÁLATAS . . . . .	454
EFESIOS . . . . .	470
FILIPENSES . . . . .	485
COLOSENSES . . . . .	495
1 TESALONICENSES . . . . .	505
2 TESALONICENSES . . . . .	513
1 TIMOTEO . . . . .	518
2 TIMOTEO . . . . .	530
TITO . . . . .	538
FILEMÓN . . . . .	543
HEBREOS . . . . .	545
SANTIAGO . . . . .	574
1 PEDRO . . . . .	584
2 PEDRO . . . . .	595
1 JUAN . . . . .	602
2 JUAN . . . . .	611
3 JUAN . . . . .	613
JUDAS . . . . .	615
APOCALIPSIS . . . . .	619

## Ilamachitlisli cuali Jesucristo hual quijcuiluc San Mateo

### *Jesucristo itajtzitzián* (Lc. 3:23-38)

<sup>1</sup> Nicán unca lajcuiluli itajtzitzián Jesucristo. Yihual yec imiahuil David hual yec imiahuil Abrahám.

<sup>2</sup> Abraham yec itajtzin Isaac, Isaac yec itajtzin Jacob, Jacob yec inmintajtzin Judá huan icnián.

<sup>3</sup> Judá yec inmintajtzin Fares huan Zara, huan Tamar yec inmintajtzin. Fares yec itajtzin Esrom, Esrom yec itajtzin Aram.

<sup>4</sup> Aram yec itajtzin Aminadab, Aminadab yec itajtzin Naasón, Naasón yec itajtzin Salmón.

<sup>5</sup> Salmón yec itajtzin Booz, huan inantzin Booz yec Rahab. Booz yec itajtzin Obed huan Obed inantzin yec Rut. Obed yec itajtzin Isaí.

<sup>6</sup> Isaí yec itajtzin David in hué. David monamictic ca se sihual hual mocahuac ihuían pampa polehuic ilahuical itocaya Urías. Cuaquinon David huan in sihual quípialoaya se xolol hual quitocayaltic Salomón.

<sup>7</sup> Salomón yec itajtzin Roboam, Roboam yec itajtzin Abías, Abías yec itajtzin Asa.

<sup>8</sup> Asa yec itajtzin Josafat, Josafat yec itajtzin Joram, Joram yec itajtzin Uzías.

<sup>9</sup> Uzías yec itajtzin Jotam, Jotam yec itajtzin Acáz, Acáz yec itajtzin Ezequías.

<sup>10</sup> Ezequías yec itajtzin Manasés, Manasés yec itajtzin Amón, Amón yec itajtzin Josías.

<sup>11</sup> Josías yec inmintajtzin Jeconías huan icnián hual yulinijme quiman in babilontecos quinhuicaloaya in judíos lailpili pa in lali Babilonia.

<sup>12</sup> Quiman quinhuicaje pa Babilonia, Jeconías quipiác se ixolol motocaya Salatiel, Salatiel yec itajtzin Zorobabel.

<sup>13</sup> Zorobabel yec itajtzin Abiud, Abiud yec itajtzin Eliaquim, Eliaquim yec itajtzin Azor.

<sup>14</sup> Azor yec itajtzin Sadoc, Sadoc yec itajtzin Aquim, Aquim yec itajtzin Eliud.

<sup>15</sup> Eliud yec itajtzin Eleazar, Eleazar yec itajtzin Matán, Matán yec itajtzin Jacob.

<sup>16</sup> Jacob yec itajtzin José hual yec ilahuical María. María yec inantzin Jesús in hual quitocayaltico Cristo.

<sup>17</sup> Yoje, quiman lacatic David, ca inon lacatijtihualaje catorce imiahuimes Abrahám. Cuaquín lacatijtihualaje catorce imiahuimes David quiman quinhuicaje pa Babilonia. Huan quiman lacatic Cristo yoje lacatijtihualaje oc sequin catorce imiahuimes David hual pehuaje lacatijtihualaje quiman quinhuicaje pa Babilonia.

### *In quinami lacatic Cristo* (Lc. 2:1-7)

<sup>18</sup> Axcán, yoje unca quinami lacatic Jesucristo. María, se sihual yancuic hual yahuiaya ye inantzin, yahuiaya monamicti ca José. Huan ayamo yuliloaya quinami ilahuical ca isihua quiman quitaje pampa yahuiaya quipía se xolol María pan ipampa in Espiritu Santo.

<sup>19</sup> José hual yahuiaya ye ilahuical yec se lalac cuali huan yultiahuiaya quichihuilitataya moxtin in hual cuali. Huan amo quinequiaya pa moxtin quipinahuiljtinemilosquiaya María. Pampín quijtu pa iyolo pampa yahuiaya quicahua huan amo yahuiaya quimachilti inon amaqui.

<sup>20</sup> Huan quinami quijtutaya pa iyolo yihual in hual yahuiaya quichía, xiquita, cochic José. Cuaquín nesci capa yihual se ca ilanahuatinijmes Dios pin cielo (ilhuicac), quitac quitemictataya, quilijtataya:

—José, tel imiahuil David, amo xiquijtu pa moyolo pampa amo unca cuali pa ticanas María pa yes mosihua, (pampa in Espíritu Santo quilalilic ca laijtic María in hual quilacatiltis).

<sup>21</sup> Huan yahui quipía se xolol lalac. Tictocayaltis Jesús, pampa yihual quinquixtilis inminlajlaculisli yehuanten hual cate iyaxca.

Yoje quilic ilanahuatini in cielo.

<sup>22</sup> Huan mochiac mochi inon pa yoje panusquiaya mochi hual quijtu in Tata pan ipampa ilajtuni hual quijtu, quil:

<sup>23</sup> Xiquitacan.

Cayas se sihual yancuic hual amo quiman cataya ca se lalac.

Ma yojque, quipías se ixolol.

Quilacatiltis huan quitocayaltisqui Emanuel.

In lajtol quinequi quijtúa: Dios unca ca yehuanten.

<sup>24</sup> Ejsac José, quichíac quinami quilic in Tata ilanahuatini pin cielo. Canac María pa yes isihua.

<sup>25</sup> Yuliloaya pin se cali yehuanten omenten. Ma yoje, José amo yulic ca yihual quinami ilahuical pa innojen tonalijmes hual ayamo lacatic ixolol María. Quiman lacatic in xolol, José quitocayaltic Jesús.

## 2

### *Huejueyenten hual chantiloaya huejca hualalo pa quimolancuacuetzilisi Jesús*

<sup>1</sup> Lacatic Jesús pin caltilan Belén pin lalticpan Judea. Lacatic pa innojen tonalijmes quiman Herodes yec inminhué in judíos. Huan ajsije pa in caltilan hué Jerusalén lacames hual quimatiloaya niman míac. Chantiloaya pa se lali huejca hual unca capa quisa in tonali.

<sup>2</sup> Quilajlanije:

—¿Capa unca yihual hual lacatic, yihual hual inminhué in judíos? Ticmatilo pampa lacatic, pampa tiqitaje yihual ilucero (isilalin) nepa capa quisa in tonali. Ca in ticmatilo pampa lacatic, huan tihualaje pa ticmolancuacuetzilisi —quilije.

<sup>3</sup> Quiman quimatic Herodes in hué in hual quijtuloaya innojen lacames huejueyenten, yajmo huil mosehuiaya yihual huan noje yajmo huil mosehuiloaya niman míac ca yehuanten pa Jerusalén.

<sup>4</sup> Cuaquín quilic pa monechicusi moxtin in tiopistas huejué huan in lamaxtinijmes hual quimaxtiloaya in lajtol hual quinnextilo in judíos quinami quimolancuacuetzililo Dios. Monechicuje, quinlajlanic Herodes capa yahuiaya lacati in Cristo. (Cristo quinequi quijtúa in se hual unca laxahuilili pa itzontecon. Yoje quichihuililo se lalac quiman yahuiilo quitemachilo pa yes inminhué yehuanten.)

<sup>5</sup> Yehuanten quinanquilije:

—Lacatis pin caltilan Belén pin lalticpan Judea, yoje quijcuiluc Dios ilajtuni. Quijtúa, quil:

<sup>6</sup> Tehual, Belén, pin lali Judea, quimatisi momajtsi mopampa tehual. Mas que tiunca se caltilan tipichin, ma yoje yajmo mitzitasi quinami in niman tipichin, pampa quisas nepa pa tehual se hual yes mohué. Yihual huelitis ca yehuanten ilacames Israel hual cate noyaxca. Yoje quijtúa Dios ilajtol pan ipampa Dios ilajtuni.

<sup>7</sup> Cuaquinon Herodes latilanic pa hualalosquiaya in huéjueyenten, quinahuatic pa yoje amaqui quimatisquiaya quiman hualaje. Huan quinlajlanic ca míac lajtomes jan quiman nesic in lucero (silalin), huan yehuanten quilije quiman nesic.

<sup>8</sup> Cuaquinon quinmilic:

—Xiacan, xictemucan cuali pa anquitas in xolol. Xictemucan yoje quinami anquimati anlatemúa. Quiman anquitas, xinechmachiltican pa yojque nehual nías nicmolancuacuetzilis noje —quinmilic.

Cuaquinon quintilanic pa Belén.

<sup>9</sup> Canaje ojli in huéjueyenten quiman quicaquije in hual quinmilic in hué. Cuaquinon nesic in lucero (silalin) hual quitaje quiman cataloaya pa inminlali hual unca capa quisa in tonali. Quinlaicanan in silalin, uyajtiac huan ajsic moquetzac ca pani pin cali capa cataya in xolol.

<sup>10</sup> Quiman quitaje in silalin, quipiaje niman míac paquilisli.

<sup>11</sup> Calaquije pin cali calijtic huan quinmitaje in xolol ca María inantzin. Cuaquinon quimolancuacuetzilije huan quimahuisuje in xolol. Huan quilapuje inminxotopajmes capa quihualcatihualaje len ipatiyaa míac. Quimacaje oro huan ajuialisli huan je altzindi hual ajuíac, itoca mirra.

<sup>12</sup> Cuaquinon pan ipampa lajtemiquilisli Dios quinmilic pa camo mocuepasi capa Herodes. Pampín canaje oc se ojli pa mocuepasi pa inminlali.

### *Cholulo José huan María huan in xolol pa Egipto*

<sup>13</sup> Huan quiman quisaje in huejueyenten, nesic ilanahuatini toTata pin cielo ca José. Nesic pan ipampa lajtemiquilisli, quilic:

—Ximoquetza, xiquinhuica in xolol huan inantzin, xicholucan pa in lali Egipto. Xichantican umpa huan quiman panusi tonalijmes nimitzilis pa anmocuepas. Xicholucan, pampa Herodes axan yahui quitemúa in xolol pa quimictis.

<sup>14</sup> Cuaquinon pa in layúa moquetzac José, quinhuicac in xolol huan inantzin, quisaje cantiaje ojli pa in lali Egipto.

<sup>15</sup> Huan umpa cataloaya pa mochi tonalijmes hual yuliaya Herodes. Yojque panuc pa mochiasquiaya len quijtuc toTata pan ipampa ilajtuni. Quijtuc, quil: “Nicnotzac noxolol pa quisas nepa Egipto.”

### *Herodes quinmictía in xolomes hual yuliloaya pa Belén*

<sup>16</sup> Cuaquinon, cualanic niman míac Herodes quiman quimatic quinami quihuitzquilije in huejueyenten. Pampín latilanic pa quinmictilosquiaya mochi in xolomes lacames hual cataloaya pa Belén huan mochi in calimes hual cataloaya itenco Belén. Quinmictije mochi in xolomes lacames hual lamije lacatije huan moxtin oc sequin xolomes hual lacatije huan ayamo ajsije quipiaje ome xixihuil huan moxtin hual lacatije huan axan ajsije quipiaje ome xixihuil. Latilanic pa quinmictilosquiaya jan innojen xolomes, pampa in huejueyenten quilije pampa pehuac nesic in silalin quipiaya quinami ome xixihuimes.

<sup>17</sup> Yoje lamac mochíac len quijtuc Dios ilajtol pan ipampa ilajtuni Jeremías, quijtuc, quil:

<sup>18</sup> Pin caltilan Rama icnotialoaya.

Mocaquiaya lajtol ca niman miac icnotilisli, chocalisli,

quincocuhuaya inminyolo,

Raquél quinchocuquijitaya ixolomes, huan amo quinequiaya molacahualti, pampa polehuije ixolomes.

<sup>19</sup> Quiman miquic Herodes, xiquita, nesic capa José pin lali Egipto se ilanahuatini in Tata pin cielo. Nesic pan ipampa lajtemiquilisli, quilic:

<sup>20</sup> —Ximoquetza, xiquinhuica in xolol huan inantzin huan ximocuepacan pa in lali Israel. Axan miquije yehuanten hual quinequiloaya quimictilo in xolol.

<sup>21</sup> Yojque, moquetzac José, quinmanac in xolol huan inantzin in xolol huan mocuetiaje pa in lali Israel.

<sup>22</sup> Pa ojli, quimatic pampa Arquelao huelitijtataya pin lalticpan Judea capa huelitini itajtzin Herodes. Pampín momajtic José pa mocuepas ca umpic. Cuaquín Dios quilic pan ipampa lajtemiquilisli pampa nepa cayasquiaya polehuilisli, huan pampín uyajtiaje José huan María ca ixolol pa in lalticpan Galilea.

<sup>23</sup> Ajsije umpa, uyaje chantije pa se caltilan itoca Nazaret, pa yojque mochiasquiaya len quijtuc Dios pan ipampa ilajtuni. Quijtuc, quil: “Quitocayaltisi nazaretco.”

### 3

*Juan Lacuayatequini quinlaquetzilia Dios ilajtol nepa capa amaqi chantiya*

(*Mr. 1:1-8; Lc. 3:1-9, 15-17; Jn. 1:19-28*)

<sup>1</sup> Panuje miac xixihuimes. Huan ajsije in tonalijmes quiman hualac Juan Lacuayatequini quinnoztataya moxtin hual quisaje pa quicaquisi. Quinnotzaya quinmilijtataya Dios ilajtol. Quinnotzaya nepa pa se ilajco in lalticpan Judea capa in lali amo cataya cuali pa quitocasquiaya se icuajmili.

<sup>2</sup> Huan quinmiliaya:

—Xicpalacan anmoyolo, ximolalilican pa anlajnamiquis pa anmoyolo quinami Dios laijnamiquía, pampa amo huejcahuas ajsis in tonali quiman huelitia Dios.

<sup>3</sup> In Juan Lacuayatequini yec in lalac hual aqui quijtuc inahuac yihual Isaías ilajtuni Dios. In Isaías quijcuiluc se amal pa yina, huan pa iamal yojque quijtuc:

Mocaqui ilajtol se hual lanoztica nepa pa in lali capa amo unca cuali pa quitocasquiaya se icuajmili.

Huan in se quijtutica, quil:

“Xicchipahuacan anmoyolo pa calaquis in Tata, xiclapulican jan quinami anquilapulía ojlimes quiman hualas capa amhuan-ten se hual unca hué.”

<sup>4</sup> Huan quiipiaya yihual Juan ilaquen lachihuali ca itojmiyo camello, huan ilacuejtiloni cataya lachihuali ca cuilaxli. Quincuaya chapulimes huan néculi hual moita pa caujlan.

<sup>5</sup> Hualaloaya capa yihual pa quicaquillosquiaya yehuanten hual chantiloaya pa Jerusalén. Huan quistihualaloaya lacames huan sihuames mochi cajcapa pin lalticpan Judea. Huan quistihualaloaya mochi in lali hual cataya pa itejtenco in atenco hué itoca Jordán.

<sup>6</sup> Huan quincuayatequiaya Juan pin atenco hué Jordán, quiman moyolcuiteje inminlajlaculisli inminlajxpan moxtin, quijtuticate pampa yajmo yahuiloya yulilo quichijtcate laijlaculisli.

<sup>7</sup> Ma yoje, quinmitac Juan míac lacames hual quitocaloaya in ome lamaxtilisli calica quimolancuacuetzililoaya Dios in judíos, motocaloaya fariseos huan saduceos. Hualaloaya pa yihual quincuayatequisquiaya. Huan quinmilitic:

—¡Ah, amhuanten ixolomes Satanás! Anunca quinami cuhuames choluticate pa se cuajmili chichinajtica. Huan ¿aquí anmitzilic pampa anunca pin ipolehuilisli icualanilisli Dios hual ajsitihuala? ¿Aquinojen anmitzilije pa ancholusquiaya?

<sup>8</sup> Amo annimitzcuayatequis sinda amo anyahui anpehua anyuli yoje pa lanextilis pampa anquipalac anmoyolo huan axan anlajnamiquía quinami Dios quinequi.

<sup>9</sup> Huan amo xiquijtucan pa anmolajitic amhuanten: “Tehuanten ticcate imiahuimes totajtzin Abraham hual pa yina techpehualtic tehuanten in judíos. Pampín amo timomajtilo pampa Dios cualanía.” Amo xiquijtucan yoje, pampa annimitzilía Dios huil quinchía miahuimes pa Abraham lachihuali ca innojen tixcalimes nican.

<sup>10</sup> Axan unca quinami Dios quilalijtica in hacha pa ilalhuayol se cuahuil. Amhuanten anquinami cuahuimes hual amo laquilo cuali. Yoje, mochi cuahuil hual amo laqui cuali yes lamayahuili huan yes lalasalí pin tixuxli. Yoje mochi lacal hual amo quichía cuali cayas quinami se ca innojen cuahuimes hual amo laquilo cuali.

<sup>11</sup> Nehual neli annimitzcuayatequía ca al pa yoje lanextilis pampa anquinpalac anmoyolo pa anpehuas anlajnamiquis quinami Dios. Ma yoje, yihual hual yahui huala quiman nilantica notequipanulisli unca niman hué. Nehual amo quiman niyes yoje hué. Pampín amo unca noyaxca pa niyes itequipanujquil niman tipichin. Yihual anmitztilanis in Espíritu Santo. Inon ilacuayatequilisli yihual. Yes quinami tixuxli hual amo lachichinus. Calaquis lajitic anmoyolo, anmitzpujpuhuas anmitzquixtilijtica len yes amo cuali.

<sup>12</sup> Yihual cayas quinami se hual quitzejtzelujtica layoli pa yoje quisas chipác. Quema, quichipahuas niman cuali yehuanten hual Dios quinlajtultic. Cayas quinami se hual quinechicúa in layoli pa capa cajcoquilo, huan quichichinus in xiníul pin tixuxli hual amo quiman huil mosehuis. Yehuanten hual Dios quinlajtultic cate quinami in layoli, huan yehuanten hual amo quinlajtultic cate quinami in xiníul.

*Juan quicuayatequía Jesús*  
(Mr 1:9-11; Lc 3:21-22)

<sup>13</sup> Cuaquinon ajsitihualac Jesús, quisac pin lalticpan Galilea. Ajsiaya pa atenco hué Jordán capa cataya Juan. Quinequiaya pa Juan quicuayatequisquiaya.

<sup>14</sup> Juan pehuac quilic Jesús pampa amo canaya cuali pa yihual quicuayatequisquiaya Jesús, Juan quilic:

—Monequi pa tehual tichcuayatequis nel. ¿Leca tihuác ca nel pa nimitzcuayatequisquiá?

<sup>15</sup> Jesús quinanquilic:

—Ma ye jan yoje axan, pampa unca cuali pa yoje ticchihuasi mochi hual Dios techilía pa ticchihuasi.

Cuaquinon Juan quimacahuilic pa hualasquiaya pa yihual quicuayatequisquiaya.

<sup>16</sup> Huan Jesús, quiman cataya lacuayatequili, quisac jan ajnaxcan nepa pin al. Huan jan ajnaxcan in cielo (ilhuicac) molapuc ca paní capa Jesús huan



yihual quitac Dios iEspíritu (iIjyecal Cualí) temujtihualaya. Nestihualaya quinami se huilol. Ajsic huan moquetzac pani capa yihual Jesús.

<sup>17</sup> Huan ca inon mocaquic se lajtol pin cielo hual quijtuc:

—In unca noxolol hual niclasojla míac. Ca yihual nimopaquiltitica niman míac.

## 4

### *Satanás quitilanilía Jesús iyolo*

(Mr. 1:12-13; Lc. 4:1-13)

<sup>1</sup> Cuaquinon in Espíritu Santo quilaicanac Jesús pa panquisasquiaya ca capic amaqui chantiaya. Quilaicanac nepa pa yojque in lili quitilanilísquiaya Jesús iyolo.

<sup>2</sup> Mosahuac Jesús cuarenta tonalijmes huan cuarenta layuajmes, huan quiman panuc inon, yihual mayanaya.

<sup>3</sup> Hualac capa Jesús in lili hual quintilanilía lacames inminyolo, quilic:

—Sinda tehual tiunca Dios ixolol, cuaquín xiquinmili in tixcalimes pa mochihuasi len huil tijcuas.

<sup>4</sup> Jesús quinanquilic:

—Unca lajcuiluli: “Lacames amo yulisi jan pan ipampa in hual quicualo san. Yulisi pan ipampa mochi lajtol hual quijtúa Dios.”

<sup>5</sup> Cuaquinon in lili quihuicac Jesús pa Jerusalén hual unca Dios ilasojli caltilan hué, quilejcultic niman ca paní in tiopan hué.

<sup>6</sup> Huan quilía:

—Sinda ti'ixolol Dios, cuaquín ximolasa pa latzindan, pampa unca lajcuiluli:

Yihual Dios quinmili ilanahuatinijmes pin cielo pa mitzlachilisi.

Huan ca inmajmajuan mitzpalehuisi tehual pa camo timotecuilis se mocxían pan se tixcali.

<sup>7</sup> —Huan noje unca lajcuiluli —quilic Jesús —: “Amo timocalactis capa cuajnesi tipolehuis san pa tiqitas sinda Dios moTata mitzquixtilis pin polehuilisi.”

<sup>8</sup> Huan oc sejpa quihuicac Jesús in lili pa pani se loma (tepel) niman cuajtic. Quinextilic Jesús mochi in lalimes pin lalticpan capa huelitilo in huejueyenten, huan quinextilic mochi hual unca cuajcualtichin pin lalimes.

<sup>9</sup> Huan in lili quilic:

—Mochi innojen nimitzmacas tehual sinda tichmolancuacuetzilis pa tichmahuisus ca lamajtilisi.

<sup>10</sup> Cuaquinon Jesús quilic:

—Xiquisa, Satanás, pampa unca lajcuiluli inon: “Tichmolancuacuetzilis pa tichmahuisus ca lamajtilisi moTata Dios. Jan Yihual san ticchiuilis mochi hual monequi pa tichmolancuacuetzilis.”

<sup>11</sup> Cuaquinon in lili quicahuac Jesús. Huan axan hualaje ilanahuatinijmes in cielo, pehualoaya quichihuililo mochi hual monequiaya pa quipías Jesús.

### *Jesús pehua quichía itequipanulisi*

(Mr. 1:14-15; Lc. 4:14-15)

<sup>12</sup> Axan, quiman quimatic Jesús pampa quitzacuaje Juan Lacuayatequini pin calijtic, uyac pa ichan pin caltilan Nazaret hual unca pin lalticpan Galilea.

<sup>13</sup> Cuaquín ca je nadita quicahuac ichan nepa Nazaret, uyac chantic pin caltilan itocaya Capernaum hual cataya pa itenco in al huejcalan Galilea. Noje cataya inmintejtenco in lalimes itocaloaya Zabulón huan Neftalí.

<sup>14</sup> Uyac chantic Jesús nepa pa yoje mochías len quiqcuiluc Isaías hual pa yina yec Dios ilajtuni. Quijtúa pa iamal:

<sup>15</sup> Pin lali itoca Zabulón, huan pin lali Neftalí, pan ojli hual laicana pa in al huejcalan, ca yojque itenco (analco) in atenco hué Jordán, unca pin lali Galilea capa chantilo yehuanten hual amo judíos.

<sup>16</sup> Yehuanten hual chantilo capa amaqui quimati quinami Dios quinequi pa yulis se,

axan yehuanten quimatilo cuali quinami Dios quinequi pa yulisi, axan quipialo lahuilisi pa inminyolo laijtic.

Quema, yehuanten hual chantilo capa amo quimatilo Dios ilajtol melahuac huan yoje mocaualo moxilujticate capa Dios,

axan quimatilo aqú unca Dios huan quimatilo quinami huil quipialo in yulilisi hual yihual quinequi pa quipiasqui.

<sup>17</sup> Cuaquín pejtiahuiaya nahuati Jesús inminyampa yehuanten, quinmilitinemiaya:

—Xicpalacan anmoyolo huan xipehuacan xilajnamiquican quinami Dios quinequi, pa yajmo anmoijlacus. Unca pampa axan ajsic in tonali quiman Dios ilahuelilitlisi pin cielo yahui caya lanextili nican pan laticpan.

### *Jesús quinnotza in micheros*

(Mr. 1:16-20; Lc. 5:1-11)

<sup>18</sup> Nejnemiaya Jesús inahuac in al huejcalan Galilea. Quinmitac ome lacames, se motocaya Simón hual noje quitocayaltioaya Pedro. In oc se motocaya Andrés, yihual icni Simón. Yehuanten quilastataloaya se latzojuini palahuac pa in al huejcalan, pampa yehuanten yeje micheros.

<sup>19</sup> Huan Jesús quinmilitic:

—Anquinmantica michimes. Xichtocacan nehual pa anmochías nomonex-tilinijmes. Annimitznextilis quinami anquinmanas lacames pa nechnelto-casi.

<sup>20</sup> Huan jan axcan quincajcahuaje inminlatzojuini huan quitocaje.

<sup>21</sup> Cuaquín uyac Jesús jan nadita huejquta capa cataya. Quinmitac oc se-quin ome lacames. Se yec icni in oc se. Se motocaya Jacobo huan in oc se icni motocaya Juan, yehuanten ixolomes Zebedeo. Huan Zebedeo inmintajtzin cataloaya pan se barquito laijtic, quinchiqhualoaya inminlatzojuinjmes. Jesús quinnotzac Jacobo huan Juan.

<sup>22</sup> Jan ajnaxcan yehuanten quincahuaje in barco huan inmintajtzin, huan quitocaje Jesús.

### *Jesús quinmaxtía míac lacalera*

(Lc. 6:17-19)

<sup>23</sup> Uyajtíac Jesús pa mochi in laticpan Galilea, lamaxtitataya pa in-mintiopajmes yehuanten pa Galilea. Quimachititaya in lamachilitlisi cuali, in unca quinami Dios huelitía. Huan quinpajtinemiaya mochi inmincocolisli yehuanten, huan mochi in hual quincocuhuaya.

<sup>24</sup> Yoje quimatije in hual quichihuaya yihual moxtin yehuanten pin lali Siria hual unca pa quiahuac Jesús ilali. Huan yehuanten quihualiquilije moxtin in cocoxquimes hual quincocuhualoaya míac cocolisli, míac ca yehuanten mococuhualoaya niman míac. Quihualiquilije yehuanten hual quinpialoaya ijyecames hual quincocoltioaya huan quihualiquilije yehuanten hual cataloaya laticocojquimes huan yehuanten hual amo huil moliniloaya. Huan quinpajtic Jesús.

<sup>25</sup> Yoje quitocaje niman míac lacalera hual chantiloaya pin lalticpan Galilea huan pin lali capa cataloaya in diez (majlacli) caltilan hual quitocayaltiloaya Decápolis. Quitocaje míac hual chantiloaya pin caltilan hué Jerusalén huan pin lalticpan Judea huan pin lali pa yojque itenco (ananco) in atenco hué Jordán.

## 5

### *Jesús quinmaxtía imonextilinijmes pan loma (tepetzindi)*

<sup>1</sup> Yoje, quiman quinmitac Jesús in niman míac lacalera, panquisac pan se loma (tepetzindi). Molalic nepa, huan hualaje capa yihual imonextilinijmes.

<sup>2</sup> Pehuac quinmaxtic, quinmilic:

### *Jesús quinmilía aquinojen cate yehuanten hual yulilo quipixticate paquilisli (Lc. 6:20-23)*

<sup>3</sup> —Quipialo paquilisli yehuanten hual quimatilo pampa amo quipialo nindeno calica huil quipaquiltio Dios. Quema, yulilo ca paquilisli, pampa lacames quinami yehuanten cayasi capa yes Dios huelitía.

<sup>4</sup> Quipialo paquilisli yehuanten hual quincocúa inminyolo pampa unca mochi amo cuali pin lalticpan. Quema, yulilo ca paquilisli, pampa yehuanten Dios quinlacahualtis.

<sup>5</sup> Quipialo paquilisli yehuanten hual amo motolinilo pa canasi inminyaxca, pampa yehuanten Dios quinmacas in lalticpan pa yes inminyaxca capa huelitisi.

<sup>6</sup> Quipialo paquilisli yehuanten hual quinequilo ca mochi inminyolo pa yesi cuali huan pa quichihuasi len unca cuali, pampa Dios quinhuelitits pa yoje yesi.

<sup>7</sup> Quipialo paquilisli yehuanten hual quimatilo laicnililo, pampa yehuanten quinmicnilis Dios.

<sup>8</sup> Quipialo paquilisli yehuanten hual cate chipahuac pa inminyolo, mochi ca se lajtulisli ca Dios huan ca mochi hual Yihual quinequi. Quema, yulilo ca paquilisli, pampa yehuanten quitasi Dios.

<sup>9</sup> Quipialo paquilisli yehuanten hual quinnextililo oc sequin quinami huil cayasi jan sejpa se ca oc se, yajmo moanticate. Quema, yulilo ca paquilisli, pampa Dios quinmilis pampa yehuanten Dios ixolomes, pampa quichihualo quinami Yihual quichía.

<sup>10</sup> Quipialo paquilisli yehuanten hual lacames quitojtocalo pa quinchihuilisli amo cuali pampa yulilo quichijticate in hual Dios quinequi. Quema, yulilo ca paquilisli pampa lacames hual yulilo quinami yehuanten cayasi capa yes Dios huelitía.

<sup>11</sup> Anquipía paquilisli quiman anmitzcocolilo huan anmitztojtocalo huan islacatilo quijtuticate míac amo cuali anmonahuac amhuanten pampa anechneltoca nehual. Quema, anyuli ca paquilisli.

<sup>12</sup> Xipaquican, xicipacan niman míac paquilisli, pampa pin cielo anyahui ancana niman míac hual cuali. Anquimati pampa yoje quitojtocanjime Dios ilajtunijmes hual yulinijme pa yina quiman ayamo anlacatic amhuanten, huan unca neli yehuanten canaje laxlahuilisli.

### *Jesús technextilía quinami cate istal huan lahuilisli pa in lalticpan*

(Mr. 9:50; Lc. 14:34-35)

<sup>13</sup> Amhuanten anunca quinami istal hual quilalilo pin nacal pa quitechcunis pa quitzacuilis pa como moiylacus. Jan yoje amhuanten Dios anmitzalic pa anquintechnicunis pa ilacames pin lalticpan pa yoje anquintzacuilis pa

como moijlacusi. Huan sinda in istal mochías pataca, cuaquín ¿quinami mochías istal oc sepa? Amo huil, yajmo unca cuali pa nindeno. Quilasalo pa quiahuac huan in lacames quitelicsalo.

<sup>14</sup> Jan amhuanten san anunca quinami in lahuilisli hual quilahuilía inminyolo yehuanten pin lalticpan. Jan yoje amhuanten anquinlahuilía inminyolo quinami anquinmaxtía Dios ilajtol. Huan anquinlahuilía inminyolo pampa yojqe anyulis quinami Dios quinequi. Quinami se caltilan hual unca pani pan se loma (tepel) amo huil molatía, jan yoje in lahuilisli amo huil molatía.

<sup>15</sup> Huan amo quialaltilo lacames se tapalquita huan cuaquinon quiallilo itzindan se chiquihuil hué. Quiallilo pa pani, huan quinlahuis moxtin hual cate calijtic.

<sup>16</sup> Ximomacahuiltican pa quimatisi lacames pampa anyuli quinami Dios ilajtol quinextilía pa yulis se. Yoje anquinextilis pampa anmitzlahuilic Dios anmoyolo. Yoje quiman quitasi quinami anyuli anquichijtica len unca cuali, cuaquín laquetzasi cuali inahuac anmoTajtzin hual unca pin cielo (ilhuicac).

### *Jesús quinmaxtía quinami huejcahuas ilajtol Dios*

<sup>17</sup> Amo xiquijtucan pampa nihualaya pan lalticpan pa niclamis Dios ilajtol huan in hual quimaxtije Dios ilajtunijmes. No, amo nihualaya pa niclamis, nihualaya pa annimitznextilis neli len quinequilo quijtulo.

<sup>18</sup> Annimitzilía melahuac inon: Amo yes laquixtili se lajtol ca ilajtomes niman tijtipichin pa ilajtol Dios sinda ayamo mochíac mochi hual quijtúa pampa yahui mochía. Quema, cayas yoje pa mochi in xixihuimes hual huejcahuasi in cielo huan in lalticpan.

<sup>19</sup> Yoje, aquí yes amo quinequis quichías len quijtúa se ilajtol Dios jan sinda unca se ilajtol niman tipichin, huan sinda quinmaxtis oc sequin pa como quichihuasi len quijtúa in lajtol, cuaquín in se yes niman tipichin capa Dios huelitía. Huan aquí yes quichías len quijtúa mochi ilajtol Dios huan quinmaxtis oc sequin pa yoje quichihuasi, cuaquín in se yes hué capa Dios huelitía.

<sup>20</sup> Xicchiuacan yoje, pampa annimitzilía amhuanten amo quiman an-cayas capa Dios huelitía sinda jan anyuli anquichijtica san quinami in fariseos huan yehuanten hual quimaxtilo in lajtol. Ca inminlachihualisli quijtulo pampa inon Dios quinmita amo quipixticate laijlaculisli. Huan inminlachihualisli amo quinpaléhuis pa yoje Dios quinmitas.

### *Jesús quinmaxtía quinami quita cualanilisli (Lc. 12:57-59)*

<sup>21</sup> Anquicaqui quiman anmitzmomaxtililo quinami Dios pa yina quinmilic totajtzitzian: “Amo tilamictis. Huan aquí yes quimictis oc se, yihual quihuicasqui ilaixpan in la'ajuani pa quitexpahuisi huan pa quitilanis pa yes lamictili.”

<sup>22</sup> Ma yoje, nehual annimitzilía pampa aquí yes cualanis ca icni, cuaquín yihual quihuicasi ilaixpan in la'ajuani hué pa quitexpahuisi huan pa quitilanis capa yes lamictili. Huan aquí yes quilis icni: “Amo timonotza nindeno”, yihual quihuicasi ilaixpan in la'ajuani hué pa quitexpahuisi huan pa quitilanis pa yes lacociltili. Huan aquí yes quilis icni: “Tehual ti'elehuis, ma Dios mitzpolehuilti”, yihual unca pa in ojli hual laicanas pa capa amo mocahua pa chichinahuis.

<sup>23</sup> 'Yoje, se tonali ticualicas mohuendi pa capa quilalilo ilaixpan Dios. Nepa jan axcan tiqijnamiquis quinami mocni amo mitziztica cuali pampa yihual quijtúa tel ticchiuilic o tiqulic len amo cuali.

<sup>24</sup> Pampín ayamo xiclalili Dios mohuendi. Xipehua xicchía inon: Xiaj-tiquisa pa anmochías jan sejpa huan mocni. Cuaquín ximocuepa, xiclali ilaixpan Dios mohuendi.

<sup>25</sup> 'Ximochijtiquisacan ca se lajtulisli ca aqui yes mitzhuicas ilaixpan in la'ajuani pampa tiqihuiquilía len tomin. Quema, ximochijtiquisacan ca se lajtulisli quiman anunca ca yihual pan ojli. Ma camo ye pa yihual mitztemaca pa in la'ajuani, huan in la'ajuani mitztemacas in laquitzquini huan yihual mijtzacuas pin calijtic.

<sup>26</sup> Annimitzilía neli, amo quiman tiquisas umpa sinda ayamo tilamis ticlaxlahuis, mas que unca in tomin niman tipichin.

*Jesús quimaxtía quinami quinmita yehuanten hual canaloc oc sequin sihuames hual amo inminyaxca*

<sup>27</sup> 'Anquicaquic quiman anmitzmomaxtililo quinami Dios quinmilic totajtzitzián pa yina: "Amo ticanas oc se sihual hual ca yihual amo timonamic-tic."

<sup>28</sup> Ma yoje, nehual annimitzilía pampa aqui yes quiztías se sihual pa yoje pehuas quinequis miac pa monilus ca yihual, yoje yihual canac in sihual pa iyolo.

<sup>29</sup> 'Huan sinda quiztía moixtololon pa moma cuali len hual mitzlaijlacultía, cuaquín xijquixti huan xiclasa huejca. Sinda san polehuiaya se nadita mocuerpo, neli inon amo yesquiaya polehuilisli hué pa tehual quinami cataya sinda yesquiaya lalasalí mochi mocuerpo (monacayo) pin tixuxli hual amo quiman mosehuis.

<sup>30</sup> Huan sinda mojmosta quichijtía momajma cuali len hual mitzlaijlacultía, cuaquín xijcotona huan xiclasa huejca. Sinda polehuiaya jan se nadita mocuerpo, neli inon amo yesquiaya polehuilisli hué pa tehual quinami cataya sinda yesquiaya lalasalí mochi mocuerpo pa capa amo mocahua pa chichinahuis.

*Jesús quimaxtía quinami quinmita lacames hual quincajcahualo inminsihuahuan*

(Mt. 19:9; Mr. 10:11-12; Lc. 16:18)

<sup>31</sup> 'Quijtulo pampa aqui yes quicajcahua isihua, cuaquín ma quimaca se amal hual lanextilis pampa in sihual unca lacajcahuali.

<sup>32</sup> Ma yoje, nehual annimitzilía pampa sinda aqui yes quicajcahuas isihua, yoje yihual quichihualtis isihua pa monilus ca se lalac amo iyaxca sinda monamic-tic oc sejpa in sihual. Yoje, ma camo quijcuani se lalac isihua. Ma yoje, sinda isihua moniluc ca oc se lalac, cuaquinon unca iyaxca ilahuical pa quicajcahuas isihua.

*Jesús quimaxtía inahuac len tiqulis Dios ca lajtol hual amo mopala*

<sup>33</sup> 'Noje, anquicaquic quiman anmitzmomaxtililo quinami Dios quinmilic totajtzitzián pa yina: "Amo tiqulis ilaixpan Dios len hual unca islacatilisli. Len yes tiqulis ilaixpan toTata pampa ticchiuilis, cuaquinon ticpías pa ticchiuilis."

<sup>34</sup> Ma yoje, nehual annimitzilía amo xiquili nindeno ca lajtol hual amo mopala ilaixpan Dios. Amo xiquili len tía ticchía pan ipampa in cielo, pampa in cielo unca capa Dios huelitía.

<sup>35</sup> Amo xiquili pan ipampa in lalticpan, pampa in lalticpan unca quinami se icpali capa Dios quinsehuía icxihuajmes. Amo xiquili pan ipampa in caltilan hué Jerusalén, pampa inon icaltilan hué in Niman Hué hual unca Dios.

<sup>36</sup> Amo xiquili pan ipampa motzontecon, pampa amo huil ticchías jan se motzondi iztac o liltic.

<sup>37</sup> San quiman anlananquilia, jan monequi pa anquilis “quema” o “amo”. Xiquilican yoje, pampa len yes oc se lajtol pa in omenten unca lajtol hual anmitzilía in lili.

*Jesús lamaxtía quinami quinmita lacames hual quinlacuepililo oc sequin (Lc. 6:29-30)*

<sup>38</sup> Anquicaquic quinami quijtulo: “Sinda se quiquixtilis iixtololon oc se, cuaquín jan yoje quicocoltisi quiquixtilijtica iixtololon in se. Huan sinda se quihuitequis oc se pa icamac huan yoje quisas ilan in oc se, cuaquinon jan yoje quicocoltisi in se quiquixtilijtica noje ilan.”

<sup>39</sup> Ma yoje, nehual annimitzilía inon: Amo xiquihuica pan lahueliltilisli se hual mijchihuilia amo cuali. Niquijtúa aqui yes mijchihuilis len amo cuali, xicmacahuili pa mijchihuilis oc sejpa in amo cuali.

<sup>40</sup> Huan sinda se quinequi mitzhuicas ilaixpan in la'ajuani pa mitzquixtís mocotón, cuaquín xicmacahuili pa mitzquixtís molaquen noje.

<sup>41</sup> Huan aqui yes mijchihualtis len, cuaquín xicchihuili len mijchihualtía. Huan quema, amo xicchihuili jan inon san pa in hual mijchihualtis pa ticchihuís, xicchihuili oc sejpa yoje míac.

<sup>42</sup> Xicmaca yihual hual mitztemachía len. Huan amo xiquili pampa no yihual hual quinequi molanehuía len ticpía.

*Jesús techmaxtía pampa monequi pa tiquinlasojlasi tolacocolinjmes (Lc. 6:27-28, 32-36)*

<sup>43</sup> Anquicaquic quinami quijtunijme: “Ticlasojlas molasojli huan tijcocolis molacocolini.”

<sup>44</sup> Ma yoje, nehual annimitzilía inon: Xiquinlasojlaca anmolacocolinjmes. Xiquinmilican len cuali yehuanten hual anmitzililo len amo cuali, xiquinchihuilican cuali yehuanten hual amo anmitzixtocalo, huan xiclañlanican Dios pa yehuanten hual anmitztenhualo ca islacatilisli huan anmijchi-huililo len amo cuali huan anmitztojtocalo.

<sup>45</sup> Xicchihuacan yoje pa yoje anyes ixolomes anmoTajtzin hual unca pin cielo. Unca pampa yihual quichía pa quisas itonali pa lacames amo cuajcuali huan pa lacames cuajcuali. Noje quinquiahuilía pani yehuanten hual quichihualo cuali huan yehuanten hual quichihualo amo cuali.

<sup>46</sup> Sinda anquinlasojla jan yehuanten hual anmitzlasojlalo, ¿len laxlahuilisli ancanas? Nindeno. Quichihualo yoje yehuanten in judíos hual quilañlanilo ilapixcalisli tomin pa in romanos hual huelitilo pan amhuanten.

<sup>47</sup> Huan sinda anquinchiuilía quinami lajlasojli jan yehuanten san hual cate ca amhuanten, cuaquín jan anquichijtica san quinami oc sequin lacames san. Noje yehuanten hual amo judíos quichihualo yoje. Quema, yehuanten hual amo quiximatilo Dios quichihualo yoje.

<sup>48</sup> Yoje, amhuanten xiyén (xiyecan) quinami anmoTajtzin hual unca pin cielo. Yihual quinlasojla moxtin huan quinequi quinchihuilia cuali moxtin.

<sup>1</sup> Ximolachilijtiacan pa camo anquinchías innojen cuajcuali inminyampa in lacames jan pa yoje yehuanten anmitzitas anquinchijtica. Sinda anquichía yoje, amo anmitzmacas laxlahuilisli anmoTajtzin hual unca pin cielo (pa ilhuicac).

<sup>2</sup> Yoje, quiman yes ticmacas len yehuanten hual amo quipialo míac, amo xilamachilitinemi pa yoje moxtin quimatisi in cuali hual ticchijtica. Yoje quichihualo yehuanten hual quinequilo nesilo quinami lacames hual quimolancuacuetzililo pa quimahuisusi Dios míac. Ma yoje cate lacua-juamananijmes. Nesilo yoje cuali huan neli cate amo cuali. Quema, lamachilitinemi pin tiopajmes huan pa ojlimes pa yoje lacames laquetzasi cuali pampa yehuanten quinchihualo in cuali. Annimitzilía neli, yehuanten amo quipiási oc se laxlahuilisli pa in laquetzalisli cuali hual quijtusi lacames inminahuac yehuanten. Amo canasi Dios ilaxlahuilisli.

<sup>3</sup> Tehual quiman ticmacas len yehuanten hual amo quipialo míac, amo ximomacahuilti pa quimatis molasojli niman cuali.

<sup>4</sup> Xicchía yoje pa yoje amaqi quimatis pampa ticmacac len yehuanten hual amo quipialo. Huan moTajtzin pin cielo quita mochi hual amo quimatilo lacames, huan yihual mitzmacas molaxlahuilisli.

*Jesús technextilia quinami monequi pa ticlajlanisi Dios*

*(Lc. 11:2-4)*

<sup>5</sup> Huan quiman ticlajlanis Dios, amo tiyes quinami yehuanten hual quinequilo nesilo quinami niman lamahuisujquimes ilaixpan Dios. Yehuanten quixtocalo míac pa quilajlanisi Dios moqueztcate calijtic pin tiopajmes huan pa inmintenco in ojlimes, pa yoje lacames quinmitasi. Annimitzilía neli, yehuanten axan canaje inminlaxlahuilisli. Inminlaxlahuilisli unca in laquetzalisli cuali yehuanten hual quinmitalo quijtulo quiman quichihualo cuali. Amo canasi Dios ilaxlahuilisli.

<sup>6</sup> Tehual, quiman yes ticlajlanis Dios, xía ca capic ticayas mohuían. Xicla-jlani moTajtzin pin cielo hual unca ca tehual quiman tiunca mohuían. Huan moTajtzin pin cielo quicaqui huan quita len ticchijtica, mas que lacames amo quicaquilo huan quitalo. Huan yihual mitzmacas molaxlahuilisli.

<sup>7</sup> Huan quiman yes anquilajlanis Dios, amo xiquijtutinemican oc sejpa huan oc sejpa lajtomes hual amo tiquinpalalo. Yoje quichihualo yehuanten hual amo quineltocalo Dios. Yehuanten quijtulo pampa inmindioses quincaquisi pampa quinmilijtcate in lajtomes míac.

<sup>8</sup> Amo xiyén quinami yehuanten, pampa quimati Dios anmoTajtzin len monequi pa anquipías quiman ayamo anquilajlanic.

<sup>9</sup> Yoje, monequi pa anquilajlanis Dios ca lajtomes quinami innojen: ToTajtzin hual tiunca pin cielo, ma momajtican moxtin pampa motoca unca hué.

<sup>10</sup> Ma ajsi in tonali quiman tihuelitis pa mochi cajcapa, ma mochihua quinami ticnequi pin lalticpan, quinami yoje unca pin cielo.

<sup>11</sup> Xitechmaca pa tijcuasi hual monequi pa tijcuasi mojmosta.

<sup>12</sup> Huan xicpupuhua len yes amo cuali timijchihuilije, quiman tehuanten ticpupuhuae yehuanten hual tejchihuilije len amo cuali.

<sup>13</sup> Huan amo xilamacahuilti pa techajsis len hual tejchihuilis pa timoijlacusi. Quema, xitechmacahuili pa camo techmatoca in se hual amo unca cuali, in lili,

pampa unca moyaxca pa tihuelitis huan unca moyaxca mochi lahuelilitisli, huan unca moyaxca in laixpelalisli cualtichin huan in lahueyilisli. Amo mocahuas pa yes yoje.

Yojque ma ye.

14 'Sinda anquinpujpuhuas in lacames hual anmijchihuilije amo cuali, cuaquín anmoTajtzin pin cielo noje anmitzpujpuhuas.

15 Huan sinda amo anquinpujpuhuas in lacames hual anmijchihuilije amo cuali, cuaquín amo quinpujpuhuas anmoTajtzin pin cielo in amo cuali hual anquichíac.

*Jesús quimaxtía quinami monequi pa mosahuasi lacames*

16 Huan amo inon san. Quiman yes anmosahuas, amo xiyén quinami yehuanten hual quinequilo nesilo niman lamahuisujquimes hual quimolan-cuacuetzililo Dios míac. Quichihualo pa nesisi inmixco ca míac icnotil-islí. Nesilo quinami quincocojtica míac inminyolo, pa yoje monextilisi inminyampa in oc sequin pampa mosajtcate. Annimitzilia neli, yehuanten inminlaxlahuilisli unca quiman lacames quinmitalo mosajtcate, huan amo canasi Dios ilaxlahuilisli hual yihual temaca.

17 Huan tehual, quiman timosajtica, ximotzicahuasti huan ximoixpaca quinami ticchía mojmosta.

18 Yoje amo timonextilisi ca oc sequin lacames pampa timosajtica. Ma yoje, quiman timosahuas, mas que amo mitziztcate lacames, Dios moTajtzin mitzitas. Huan Dios moTajtzin hual quita len ticchía quiman tiunca mohuían mitzmacas molaxlahuilisli.

*Jesús techilía quinami monequi pa ticajcoquisi len ipati míac*

(Lc. 12:33-34)

19 'Amo xiyulican anmajcoquilijtica innojen hual ipatilo míac nican pan lalticpan. Nican pan lalticpan quinmijlaculo in oculimes, noje palanilo huan moaxixalo. Noje lahuajuanalo in laixtequinijmes pa calaquisi capa cate pa yoje quinmixtequilisi.

20 Quema, ximajcoquilijtiacan pin cielo len Dios quijtúa pampa monotza míac. Mochi in cuali hual anquichía pan lalticpan Dios quijnamiquía huan anmitzajcoquilía anmolaxlahuilisli pin cielo. Nepa amo quinmijlaculisi in oculimes, amo palanisi, amo moaxixasi, huan amo lahuajuanasi pa calaquisi pa quinmixtequilisi.

21 Quema, ximajcoquilican pin cielo len Dios quita ipati míac, pampa capa yes anquipías la'ajcoquilli len amhuanten anquijtúa pampa ipati míac, yoje anyulis anquijnamictica capa unca.

*Jesús techilía quinami unca in lahuilisli laijtic tocuerpo*

(Lc. 11:34-36)

22 'Pan ipampa iixtololon se, yihual quita in lahuilisli, huan ca iixtololon huil lachía pa quichía mochi. Yoje, sinda unca cuali moixtololon, cuaquín huil ticchía cuali mochi pampa tiunca mochi pin lahuilisli. Huan jan yoje moyolo mitzlahuía molajitic. Sinda unca cuali moyolo, ticmatis len yes Dios quita pampa monotza pa quichías se huan yoje ticchías.

23 Huan sinda unca cocoxqui moixtololon, cuaquín unca quinami unca pin laticumac mocuerpo (monacayo). Huan jan yoje sinda moyolo amo mitzlahuía molajitic, amo ticmatis len yes Dios quita pampa monequi pa yulis quichijtica se. Cuaquín tiunca pin laticumactilisi hual unca niman amo cuali. Yojque, iniman amo cuali yes molaticumactilisi sinda amo unca cuali moixtololon!

*Jesús techilía quinami Dios quita tomin*

(Lc. 16:13)

24 'Se tequipanujquil amo huil quintequipanuilia ome itecojuan. Unca pampa yihual quicocolis in se huan quilasojlas in oc se, o quitequipanuilis



cuali in se huan quixijxicus in oc se. Huan amhuanten jan yoje amo huil anquitequipanuilis Dios sinda anyuli anmotequipanuiljtica san pa yoje anmonechiculis mías tomin.

*Jesús techilá quinami Dios quinmolachilá ixolomes*  
(Lc. 12:22-31)

<sup>25</sup> Yoje, annimitzilá inon: Amo ximomajtican quiman anquijnamiquía quinami anyahui anyuli nican pan lalticpan. Amo ximomajtican inahuac quinami ancanas len anquicuas o ancunis. Noje amo ximomajtican inahuac len yes monequi pa anmocuerpo, quinami ancanas len calica anmolaquentis. Dios anmitzmacac anmoyulilisi. Pampín neli unca yihual anmitzmacas len anquicuas huan ancunis pa yoje anyultías. Huan yihual anmitzmacac anmocuerpo, huan unca neli yihual anmitzmacas tzotzomajli calica anmolaquentis.

<sup>26</sup> Xiquinmitacan in tutomes hual palanilo pin iyjecal. Amo latocalo, amo lapixcalo, amo quisajsacalo nindeno pa capic cajcoquilis. Ma yoje quinlacualtía anmoTajtzin hual unca pin cielo. Huan amhuanten anmonotza mías. Yehuanten amo yoje mías monotzalo.

<sup>27</sup> Huan amo unca se capa amhuanten hual huil huejcahua pa yultías oc sequin tonalijmes jan pampa lajtúa pa iyolo pampa yahui motolinía pa yultías oc se nadita.

<sup>28</sup> Huan ¿leca anmomajtía inahuac quinami ancanas anmotzotzomajli? Xiquinmitacan in xuchimes pin cuajlan quinami moscaltilo. Amo tequipanulo huan amo tzahualo.

<sup>29</sup> Ma yoje, annimitzilá pampa in hué Salomón ca mochi itomin amo molaquentic cualtichin quinami nesilo in xuchimes.

<sup>30</sup> Pampín, sinda Dios quichía cualtichin in sacal hual moscaltitica pin cuajlan, huan mosta cuajnesi huaquis huan quilasasi pin tixuxli, cuaquín niman neli unca yihual anmitzlaquentis amhuanten, mas que amo anquilalía mías laneltocalisli ca yihual.

<sup>31</sup> Yoje, amo ximomajtican, amo xiquijtucan: “¿Len tijcuasi? Huan ¿len ticunisi? Huan ¿ca len timolaquentisi?”

<sup>32</sup> Yehuanten hual amo quineltocalo Dios yultialo quitemujticate quinami quípiasi mochi innojen. Amhuanten, amo ximomajtican, pampa anmoTajtzin hual unca pin cielo quimati pampa monequi pa anquipías mochi innojen.

<sup>33</sup> Yoje, pampa anquimati Dios quimati len monequi pa anquipías, xicnequican pa Dios huelitis pan amhuanten. Quema, xicnequican inon, amo yoje mías xicnequican mochi innojen oc sequin. Huan noje, mas que anquinequi mochi innojen, monequi niman mías pa anyulis amo laijlaculi quinami yihual Dios quinequi huan quinami yihual anmitzhueliltía pa anyulis. Huan mochi innojen hual monequi pa anquipías, Dios anmitzmacas noje.

<sup>34</sup> Yoje, amo ximomajtican inahuac len yahui panúa mosta, pampa quiman ajsis mosta, cuaquín cayas len amo cuali hual unca iyaxca in tonali san. Huan Dios quichías pa quisas quinami yihual quinequi. San in amo cuali hual panúa pan se tonali miactzini pa in tonali.

## 7

*Jesús quijtúa pampa monequi pa camo tilatenehuasi*  
(Lc. 6:37-38, 41-42)

1 'Ximocahuacan pa anquinequis anlatenehuas inahuac in hual quijtulo huan quichihualo oc sequín. Yoje amhuanten amo anyes latenehuali.

2 Sinda anlatenejtías pampa in hual quijtulo huan quichihualo oc sequín, cuaquín anyes latenehuali jan quinami anquintenehuac oc sequín. Cayas ca amhuanten jan quinami lacames molamachihuililo. Ca in lamachihualoni calica anlamachihuilía, Dios anmitzlamachihuilis amhuanten.

3 Huan ¿leca timoiñnamiquiltía inahuac mocni ilaijlaculisli tipichin, huan amo timoiñnamiquiltía inahuac molaijlaculisli niman hué? Tiunca quinami se hual quita se lapotocli pa iixtololon oc se, huan amo tiquita in cuahuil niman hué hual unca pa tel moixtololon.

4 Pampín, amo unca moyaxca pa tiquilis mocni: "Ma nimitzpalehui pa timocahuas pa ticchías molaijlaculisli." ¡Xiquita! Tel ticchijtica se laijlaculisli niman tetzcuinuc.

5 ¡Lacuajcuamanani tehuat! Ticnequi pa tinesis cuali inminlaixpan oc sequín, huan ma yoje amo tiunca cuali. Ximonextili pa tilajtus melahuac pa moyolo inminahuac oc sequín. Ximocahua pa ticchías molaijlaculisli hueyote, cuaquín ticmatis quinami huil ticpalehuis mocni pa mocahuas pa quichías ilaijlaculisli tipichin.

6 'Amo xilaqueztician ca ilajtol Dios inminlaixpan lacames hual motzacuililo pa camo quicaquis pampa quixixiculo Dios ilajtol. Yesquiaya quinami anquimaca pelojmes pa quicuasi len iyaxca Dios, huan yesquiaya quinami anquinlaca inminlaixpan in cuchis tixcalitos hual ipatilo míac. Quintelicalosquiaya in yulijquimes huan momalinalosquiaya pa anmitzco-tonalosquiaya.

*Jesús quijtúa pampa monequi pa tiyulisi ticlajlanticate Dios*  
(Lc. 11:9-13; 6:31)

7 'Xiyultiacan anquajlantica Dios, huan yihual anmitzmacas len anquitemachis. Xiyultiacan anquitemujtica len Dios quipía pa anmitzmacas, huan anquitas. Xiyultiacan anquinoztica Dios huan yihual anmitzlapulis quinami in lalapujquimes pin cielo pa yoje anmitzcaquis len anquilajlantica.

8 Unca pampa aqui yes yultías quitemachijtica Dios, yihual canas in hual quitemachis. Huan aqui yes hual yultías quitemujtica len Dios quipía pa quimacas yihual, yihual quitas. Huan aqui yes yultías quinoztica, Dios quilapulis.

9 'Amo unca se lalac ca amhuanten hual quimacas ixól se tixcali sinda ixól quitemachis len quicuas.

10 Huan sinda ixól quitemachis se michin, itajtzin amo quimacas se cuhual.

11 Yoje, mas que amhuanten anuncia amo cuali, ma yoje anquimati anquinmaca anmoxolomes innojen hual cuajcuali. Huan noje niman míac quimati quichía yoje anmoTajtzin hual unca pin cielo. Amhuanten amo quiman anquimati anquinmaca innojen cuajcuali quinami yihual quimati. Huan unca neli yihual quinmacas innojen cuajcuali yehuanten hual quitemachilo.

12 Yoje, mochi len yes anquinequisquiaya pa anmijchihuililosquiaya lacames, jan yoje amhuanten xiquinchihuilican yehuanten. Sinda anquichía yoje, cuaquín yoje anquineltoctía mochi hual quijtúa Dios ilajtol huan mochi hual quijcuiluje Dios ilajtunijmes.

*Jesús quimaxtía quinami calaqui se pa iojli*  
(Lc. 13:24)

13 'Quiman ancanas Dios iojli, cuaquín unca quinami ancalctica pa se lalapujquil pitzahuac, pampa pan Dios iojli yihual anmijzacuilía pa camo

anyulis quinami yehuanten hual amo cate pan iojli. Ma yoje, xicalaquican pa in lalapujquil pitzác. Sinda ancanas in ojli hual anmitzlaicana pa quihuac in ojli capa Dios unca, cuaquin in unca quinami se ojli palahuac. Unca palahuac capa calaquilo lacames pa canasi in ojli. Huan cate míac hual calaquilo umpa huan polehuisi, amo quiman quipiasi Dios iyulilisli.

<sup>14</sup> Pampín, xicanacan Dios iojli. Se cana Dios iojli quinami calaqui se pa se lalapujquil pitzác, huan Dios iojli unca quinami pitzahuac pa canas. Ma yoje anmitzlaicana capa anquipías Dios iyulilisli. Huan amo cate míac hual quitalo Dios iojli pa canasi.

*Jesús quimaxtía quinami tiquiximatilo se cuahuil*  
(Lc. 6:43-44)

<sup>15</sup> Ximolachilican pa como anmitzcujcuamanasi coyomes hual molaquentilo quinami borregos. Quichihualo yoje pa huil calaquisi capa cate in borregos pa quinmictisi. Jan yoje cate sequin lacames. Nesilo capa amhuanten huan lajtulo quinami cataloaya Dios ilajtunijmes, huan amo cate ilajtunijmes mejmelahuac. Jan quinequilo anmijchihuililo amo cuali.

<sup>16</sup> Anquimatis pampa yehuanten cate islacatinijmes pampa quichihualo inon. Unca quinami anquimati len cuahuil pampa laqui ilaquilyo. Ma annimitzilia se lanextilisli: Amo quitequilo uvas pan huitzcuajtitzindis huan amo quitequilo higos pan ipacholimes huizlimes.

<sup>17</sup> Jan yoje laqui mochi cuahuil cuali ilaquilyo cuali. Se cuahuil amo cuali laqui ilaquilyo amo cuali.

<sup>18</sup> Se cuahuil cuali amo huil laqui ca ilaquilyo amo cuali. Huan se cuahuil amo cuali amo huil laqui ca ilaquilyo cuali.

<sup>19</sup> Mochi cuahuil hual amo laqui ca ilaquilyo cuali quicotonalo pa quimayahuisi, huan quilasalo pan tixuxli.

<sup>20</sup> Yoje, anquimatis quinami cate lacames pan ipampa inon hual quichihualo, jan quinami anquimatis calía cuahuil unca pan ipampa ilaquilyo.

*Innojen cate yehuanten hual amo cayasi capa Dios huelitía*  
(Lc. 13:25-27)

<sup>21</sup> 'Amo cate yehuanten hual jan yultialo nechilijtcate: "Tata, Tata", hual quipiasi inmintequipanulisli ca Dios capa huelitía. Amo cate noyaxca san pampa nechnotzalo. Quema, quipiasi inmintequipanulisli capa Dios huelitía jan yehuanten san hual quichihualo len quinequi noTajtzin hual unca pin cielo.

<sup>22</sup> Pa in tonali quiman Dios latexpahuía, cuaquin nechilisi míac, quil: "Tata, Tata, ¿amo tiquinlaquetzilije lacames molajtol, tiquinmilijtataloaya pampa ticipialoaya molahuelilitilisli pa tiquinlaquetzililosquiaya? Huan ¿amo tiquinquixtililoaya in iyjecames amo cuajcuali yehuanten? ¿Amo timjtajtzililoaya ca motoca pa yoje tiquinquixtililosquiaya? Huan ¿amo tiquinchiuaje míac lachihualisli hual quinlachialtije lacames ca lamajtilisli? Tiquinchiuaje pan ipampa ilahuelilitilisli motoca."

<sup>23</sup> Cuaquinon niquinmilis ca lajtol hual quicaquisi cuali, niquinmilis: "Amo quiman annimitziximatic. Xiquisacan nolaixpan nehual, amhuanten hual mojmosta amo anquichía quinami quijtúa nolajtol."

*Se lalac hual quimati huan se hual amo quimati*  
(Mr. 1:22; Lc. 6:47-49)

<sup>24</sup> Yoje, niquilis len hual lanextilis quinami unca se lalac hual quicaquis in hual niquijtúa huan quichías quinami niquijtúa. Unca quinami se lalac hual quimati, se lalac hual quichíac icali pani in tel hué.

<sup>25</sup> Huan huetziaya chicahuac in quiahuil huan lejcuc míac in al pin atenco hué. Toyajtataya, huan ijyecaya chicahuac. Quihuitequiaya in cali in ijyecal, huan ma yoje amo xitinic in cali, pampa in lalac quichíac pani in tel hué.

<sup>26</sup> Huan aquí yes quicaquis in nolamaxtilisli huan ma yoje amo quichía quinami quijtúa unca quinami se lalac hual amo quimati. In lalac quichíac icalí pan xalípan.

<sup>27</sup> Huetziaya chicahuac in quiahuil huan lejcuc in al pin atenco hué. Toyajtataya, huan ijyecaya chicahuac. Quihuitequiaya in cali in ijyecal huan xitinic in cali huan ¡cataya xitinilisli tetzcuinuc quiman huetzi!

<sup>28</sup> Huan quiman laquisac quijtuc Jesús in lamaxtilisli, moitaje ca lamajtilisli niman míac in lalacera pampa quinmaxtiaya innojen.

<sup>29</sup> Cataya pampa yihual quinmaxtiaya quinami se hual quiplá lahueliltlisli pa lamaxtis yoje. Yehuanten amo quijtuloaya pampa yahuiaya lamaxti yoje. Amo lamaxtiaya quinami yehuanten hual quimaxtiloaya inminlajtol in judíos. Yihual quinmaxtiaya ca lahueliltlisli.

## 8

### *Nican quijtúa quinami Jesús lapajtiaya*

(Mr. 1:40-45; Lc. 5:12-16)

<sup>1</sup> Temuc Jesús nepa pin tepetzindi (loma), quitocaloaya niman míac lacames huan sihuames.

<sup>2</sup> Huan hualac ca yihual se lalac quiplaya se cocolisli pan icuilaxli, in cocolisli itoca lepra. Hualac capa Jesús in lalac ca in lepra huan quimolan-cuacuetzilizic, quilic:

—Tata, sinda jan ticnequis, huil tichpajtis.

<sup>3</sup> Huan quixilanic Jesús imajma, quimatocac, quilic:

—Nicnequi nimitzpajtía, xipajti.

Huan jan ajnaxcan pajtic in lepra.

<sup>4</sup> Cuaquín Jesús quilic:

—Ximoiztía pa camo tiquilis amaqui. San xía ximonextili in tiopista, huan xicuica ca tehual in huendi hual Moisés quijtuc pin lajtol pa ticmacas. In huendi quinnextilis moxtin pampa tipajtic.

### *Jesús quiplajti se tequipanujquil hual iteco quixtocaya míac*

(Lc. 7:1-10)

<sup>5</sup> Jesús calaquic pin caltilan Capernaum. Cuaquinon hualac capa yihual se ilaicanani in guaches romanos. In laicanani quilajlanic Jesús ca icnotilisli, quilic:

<sup>6</sup> —Tata, unca pa nochan se xól hual unca notequipanujquil, yihual lastica pan lapexli. Amo huil molini, unca niman cocoxqui.

<sup>7</sup> Cuaquín Jesús quilic:

—Nihualas pa nicpajtis.

<sup>8</sup> Quinanquilic in laicanani:

—Tata, amo nimonotza pa tehual tihuás pa nochan. Jan xiquili in lajtol san, huan pajtis notequipanujquil.

<sup>9</sup> Nehual noje nilacal hual nictequipanuilía oc se hué hual nechilía len monequi pa nicchías. Huan nehual niquinplá guaches hual quiplalo pa quichihuasi len niquinmilía. Niquilía se: “Xía”, huan yahui. Niquilía oc se: “Xihuá”, huan huala. Niquilía notequipanujquil: “Xicchía inon”, huan quichía. Pampín nicmati yihual pajtis pampa tel ticplá lahueliltlisli pa lapajtis jan ca molajtol san.

<sup>10</sup> Quicaquic inon Jesús, mocahuac quinmiztica yehuanten nepa, lachíac molapolultitaya, cuaquín quinmilic yehuanten hual quitocatihualaloaya:

—Annimitzilí neli, amo quiman níquitac jan se ca moxtin amhuanten israelitos hual laneltoca quinami in lacal romano.

<sup>11</sup> Huan annimitzilí inon: Cayasi pa mochi in laticpan míac quinami in laicanani hual hualasi huan cayasi ca Dios quiman huelitía. Quipiasi míac paquilisli. Quema, quinxiluilis Dios in cuali hual quinmacas yehuanten huan Abraham huan Isaac huan Jacob.

<sup>12</sup> Ma yoje, Abraham imiahuimes hual amo laneltocalo amo quiyasi in-minlaxilulisli capa Dios huelitía. Quema, quijtulo pampa cayasi ca Abraham huan Isaac huan Jacob pampa unca inminyaxca Abraham imiahuimes. Ma yoje, amo cayasi nepa. Cayasi latzacuali pa quiahuac, hual amo cayas capa Dios huelitía. Mocahuasi capa laticumac. Nepa mocaquis chocalisli huan quincuaicuasi inminlames pampa moitasi capa unca lacocoltilisli.

<sup>13</sup> Cuaquinon Jesús quilic in laicanani:

—Xía cuaquín. Huan quinami ticeltocac, cayas jan yoje.

Huan pajtic itequipanujquil jan ajnaxcan in tonali.

*Jesús quipajtia Pedro isihua inantzin*

*(Mr. 1:29-31; Lc. 4:38-39)*

<sup>14</sup> Hualac Jesús pa ichan Pedro. Nepa quitac Pedro isihua inantzin lastataya pan lapexli, totoniaya chichahuac.

<sup>15</sup> Cuaquín quimatocac imajma in sidual huan yajmo quiapiaya totonalisli. Huan moquetzac in sidual, pehuac quinyucxiltilic len quicuasi.

*Jesús quinpajtia míac cocoxquimes*

*(Mr. 1:32-34; Lc. 4:40-41)*

<sup>16</sup> Quiman tiolactitiahuiaya, quihualiquilije Jesús míac hual quinpialoaya ijyecames amo cuajcuali hual quinmantiaje mojmosta. Jesús quinquixtilic in ijyecames jan quinmilijtica pa quisasi. Quema, quinpajtic moxtin hual cataloaya cocoxquimes.

<sup>17</sup> Yojque mochíac len quijcuiluc pa yina Isaías ilajtuni Dios. In Isaías quijcuiluc quinami Cristo yahuiaya lapajti quiman hualaya pan laticpan, quijtuc: “Yihual techijcuanilic tocolisli huan quinpajtic tococoxquimes.”

*Sequin quijtulo pampa quinequilo quitocalo Jesús*

*(Lc. 9:57-62)*

<sup>18</sup> Axan quiman quinmitac Jesús niman míac hual quiyahualujtataloaya inahuac yihual, quinmilic imonextiliniymes pa panulosquiaya ca yoje itenco (analco) in al huejcalan.

<sup>19</sup> Huan hualac capa Jesús se ilamaxtini in judíos inminlajtól lajcuiluli hual quineltocalo in judíos. Quilic:

—Lamaxtini, nimitztocas ca capic yes tías, nicnequi nimochías se momonextilini tehual.

<sup>20</sup> Huan Jesús quilic:

—Quipialo in zorras inmincojcoyungui capa chantilo. Quipialo in tutomes capa mosehuilo. Ma yoje, nehual ilacal in cielo amo nicpia capa noyaxca pan laticpan, huan yoje yes ca tel sinda tichtocas.

<sup>21</sup> Huan oc se imonextilini quilic:

—Tata, xichmacahuilti pa nel nías pa niclaltocas notajtzin. Cuaquín nimitztocas.

<sup>22</sup> Huan Jesús quilic:

—Xichtoca pa timochías nomonextilini. Oc sequin amo quitalo pampa unca len hué quinami Dios huelitía. Yehuanten quinami micticate pa inminyolo. Ma quinlaltocacan yehuanten innojen mijquimes.

*Jesús quinsehuía in ijyecal huan in al huejcalan hual majcoquiaya*  
(Mr. 4:35-41; Lc. 8:22-25)

<sup>23</sup> Cuaquín calaquic se barco huan quitocaje imonextiliniymes.

<sup>24</sup> Nejnentiayahuiaya in barco pa al, huan jan ajnaxcan hualajtiquisac je ijyecal chicahuac ca quiahuil pan in al huejcalan. Majcoctataya in al huan ca nadita yahuiaya mojsima in barco ca in al hual calaquia lajtic pin barco. Ma yoje, coxtataya Jesús.

<sup>25</sup> Pampín uyajtiquisaje ca yihual imonextiliniymes, quejxiltije, quilije:

—¡Tata! ¡Xitechquixtili pa topolehuilisli! ¡Tialo timoatoctilo!

<sup>26</sup> Huan quinmilic:

—¿Leca anmomajtía? ¿Amo anquipía san se nadita laneltocalisli ca nehual? Cuaquinon moquetzac huan quinmilic chicahuac in ijyecal huan in al hué pa mosehuisi huan mosehuije jan ajnaxcan.

<sup>27</sup> Huan moitaje ca lamajtilisli in lacames, quijtuje:

—¿Len lacal inon? ¡Quineltocalo in ijyecal huan in al huejcalan!

*Jesús quinpajtía ome lacames hual quinpioaloaya míac ijyecames ej'elehuis*  
(Mr. 5:1-20; Lc. 8:26-39)

<sup>28</sup> Huan ajsije ca yoje itenco (analco) capa cataya inminlali yehuanten itocaloaya gadaratecos. Nepa pin lali quinamiquije ome lacames hual quinpioaloaya ijyecames amo cuajcuali hual amo mocahualoaya pa quinmanalosquiaya. Quisaloaya in omenten capa quinlalpachulo mijquimes, cataloaya niman ej'elehuis. Pampín moxtin momajtije pa panusquiaya ca umpic.

<sup>29</sup> Huan jan axcan tzajtije chicahuac, quilije:

—¡Jesús, tehual Dios ixolol! ¿Len ticpía pa tiquitas ca tehuanten? ¿Tihualca ca níc pa titechcocoltisquiaya? ¡Ayamo ajsic in tonali pa ticayasi lacocoltili!

<sup>30</sup> Huejquta capa yehuanten moitilije míac cuchis (coyamimes) lacuajtine-miloaya.

<sup>31</sup> Yoje in ijyecames quilajlanije Jesús ca mochi inminyolo, quilije:

—Sinda titechtojoquillis, xitechmacahuilti pa ticalaquisi lajtic innojen míac coyamimes.

<sup>32</sup> Huan Jesús quinmilic:

—Xiquisacan pa lajtic innojen lacames huan xiacan.

Cuaquín quisaje pa lajtic yehuanten, calactiaje pa innojen coyamimes lajtic. Huan ¡xiquitacan! Mochi in coyamilera molalujtiquisaje pa se temuán (temuayan) huan molasaje pin al huejcalan, moatoctije.

<sup>33</sup> Huan yehuanten hual quinlachililoaya in coyamilera choluje. Uyaje pa in caltilan, quinpuhuilije mochi in hual quinpanuc in omenten hual in ijyecames amo cuajcuali quinmananijme.

<sup>34</sup> Huan quisaje moxtin yehuanten pin caltilan pa monamiquilosquiaya ca Jesús. Nepa quitaje huan quitemachije ca mochi inminyolo pa quisasquiaya pa inminlali.

## 9

*Jesús quipajtía se lacal amo huil molinic*  
(Mr. 2:1-12; Lc. 5:17-26)

<sup>1</sup> Cuaquín calaquic Jesús pan in barco, quipanajtíac in al huejcalan, ajsic pa icali yihual.

<sup>2</sup> Huan quita, sequin lacames quihualiquilije se local cocoxquil, amo huil moliniaya. Quimantihualaje lastataya pan len quinami lapipixtiloni. Huan Jesús quitac quinami quineltocaloaya pampa yihual huil quipajtic in local. Yoje, quilic in local hual amo huil moliniaya, quilic:

—Amo ximomajti, Nito, nicpujpúa molajlaculisli.

<sup>3</sup> Huan xiquita, sequin ilamaxtinijmes inminlajtol in judíos hual quinnex-tíla quinami quimolancuacuetzililo Dios quijtuje lajtíc yehuanten inminyolo:

—In local quihuejuecaltitica Dios. Mochía quinami Dios pampa quijtúa inon.

<sup>4</sup> Jesús quimatic len quijtuloaya lajtíc inminyolo huan quinmilic:

—¿Pa len anquijtutic in amo cuali lajtíc anmoyolo?

<sup>5</sup> Sinda san niquilía in local pampa nicpujpuhua ilajlaculisli, amaqui yoje quimatisquiaya sinda neli nicpía Dios ilahuelilitlisli. Ma yoje, sinda niquilía pa moquetzas pa nejnemis, cuaquín moxtin quimatilosquiaya pampa nicpía Dios ilahuelilitlisli sinda in local moquetzasquiaya huan nejnemisquiaya.

<sup>6</sup> Yoje, axan anyahui anquimati pampa nehual ilacal in cielo nicpía lahuelilitlisli pan lalticpan pa nicpujpuhuilis se ilajlaculisli.

Cuaquinon mocuepac quitac Jesús in local hual amo huil moliniaya, quilic:

—Ximoquetza, xicana molapipixtiloni huan xía pa mochan.

<sup>7</sup> Cuaquín moquetzac huan uyac pa ichan.

<sup>8</sup> Huan quiman quitaje inon in lalacera, momajtije huan quijtuje lajtomés huejué pa Dios hual quinmacac lacames lahuelilitlisli hué quinami in hual quipiaya Jesús.

### *Jesús quinotza Mateo*

*(Mr. 2:13-17; Lc. 5:27-32)*

<sup>9</sup> Cuaquín yajtíac Jesús pa iojli in caltilan capa cataya, quitac se local motocaya Mateo. Molaliaya tequipanujtataya pin cali capa laxlahuiloaya ilapixcalisli tomin pa in lahuelilitlisli romano. Jesús quilic:

—Xichtoca pa timochías nomonextilini.

Huan moquetzac Mateo, quitocac.

<sup>10</sup> Cataya se tonali molajjtataya Jesús pin cali pa lacuas, huan quita, hualaje huan molalije ca yihual huan imonextiliniijmes míac lacames hual cantiahuiloaya ilapixcalisli tomin pa in lahuelilitlisli romano. Noje hualaje míac judíos hual amo quineltocaloaya cuali in lajtol hual quijtúa quinami monequi pa quimolancuacuetzilisi Dios in judíos.

<sup>11</sup> Quiman quitaje inon yehuanten hual quineltocaloaya inminlamaxtilisli in fariseos, quinmilije Jesús imonextiliniijmes:

—¿Leca lacua anmolamaxtini ca yehuanten hual techanililo ilapixcalisli tomin huan ca yehuanten hual amo quineltocalo cuali in lajtol hual technextíla quinami ticmolancuacuetzililo Dios?

<sup>12</sup> Quiman quicaquic Jesús inon, quinmilic:

—Yehuanten hual amo cate cocoxqui amo quinequilo lapajtini. Quema, quinequilo lapajtini pa quinpalehuis yehuanten hual cate cocoxqui. Huan jan yoje cate yehuanten hual quijtulo lajtíc inminyolo pampa amo cate laijlaculi. Amo quinequilo pa niquinpalehuis. Cate quinami lacames hual quijtulo pampa amo cocoxqui. Amo quinequilo pa quinpalehuis se lapajtini. Huan lacames hual laijlaculi cate quinami yehuanten hual cocoxqui, quinequilo pa niquinpalehuis.

<sup>13</sup> Ma yoje, amhuanten, xiacan ximonextilican len quinequi quijtúa Dios quiman quijtúa: “Nicnequi pa quimatisi laicnilisi yehuanten hual nechnel-focalo. Amo nicnequi pa jan nechlalilisi huendis nolaixpan san.” Nehual nihaulaya pa niquinnotzas in lacames laijlaculi pa quipalasi inminyolo pa pehuasi laijnamiqisi quinami Dios laijnamiqúa. Amo nihaulaya pa niquinnotzas yehuanten hual pa inminyolo amo cate laijlaculi.

*¿Leca amo mosahualo imonextiliniymes Jesús?*

*(Mr. 2:18-22; Lc. 5:33-39)*

<sup>14</sup> Cuaquinon hualaje capa Jesús in lacames hual quitocaloaya Juan Lacuayatequini, quilije:

—¿Leca timosahualo míac tehuanten huan yehuanten hual quitocalo inminlamaxtilisli in fariseos? Tehual momonextiliniymes amo quiman mosahualo.

<sup>15</sup> Huan Jesús quinmilic:

—Amo huil mosahualo ilasojlimes se lalac hual monamictía quiman cate ca yihual. Huan nehual niunca quinami in lalac hual monamictía. Ma yoje, ajsisi tonalijmes quiman quinquixtilisi in lalac hual monamictía hual nel niunca quinami yihual. Quinquixtilisi ilasojlimes, huan cuaquín yehuanten mosahuasi.

<sup>16</sup> Amaqui quilalía se tzotzomajli yancuic pan se tzotzomajli hual unca cacaxlito pa quitzomas ca in yancuic, pampa in tzotzomajli yancuic hual quilalía ipan mocololúa huan quitzayana in tzotzomajli hual cacaxlito.

<sup>17</sup> Huan lacames amo quiman quilalilo iayo uva yancuic pa cuilaxlimes hual cate cacaxli. Sinda yoje quichihualo, xopunis in cuilaxlimes, tzayanisi huan toyahuis iayo uva huan moijlacusi in cuilaxlimes. Quilalilo iayo uva yancuic pa cuilaxlimes yajyancuic, huan iayo uva huan in cuilaxlimes amo moijlaculo. Huan jan yoje nolamaxtilisli yancuic amo moajxiltía cuali ca in lamaxtilisli hual mochi ichicahualisli umpa quicahuac. Yoje unca inminlamaxtilisli in fariseos.

*Se sihual quimatoca Jesús inahuas huan pajtía huan Jesús quiyuliltía oc sejpa ixolol sihual Jairo*

*(Mr. 5:21-43; Lc. 8:40-56)*

<sup>18</sup> Ayamo laquisac quinmilic Jesús innojen lajtomes, huan xiquita, hualac se ipiscal in tiopan, quimolancuacuetzilic, quilic:

—Noxól sihual san quipía nadita lamic polehuic. Ma yoje xihuala xiclalili moma ipan huan yulis oc sejpa.

<sup>19</sup> Cuaquín moquetzac Jesús, pehuac quitocac, huan noje quitocaje imonextiliniymes.

<sup>20</sup> Huan xiquita, hualac itepotzcon Jesús se sihual, ajsitihualaya pa Jesús pampa quinpiac doce xixihuil cataya cocoxquil ca esli hual quisaya pa icuero. Quimatocac ilatemijmiluli Jesús inahuas.

<sup>21</sup> Quimatocac pampa quijtutataya laijtic yihual: “Sinda jan nicmatocas inahuas, yoje nipajtis.”

<sup>22</sup> Huan momalinac Jesús huan quitac in sihual, quilic:

—Xicaya ca paquilisli, Tuinon. Tipajtic pampa tilaneltocac.

Huan in sihual mochi pajtic jan ajnaxcan.

<sup>23</sup> Cuaquín ajsic Jesús, calaquic calijtic ichan ipiscal in tiopan. Quinmitac in latzotzonanijmes huan in lalalera xahuantataloaya.

<sup>24</sup> Huan quinmilic:

—Ximohuicacan, pampa amo polehuic in xól, jan coxtica san.

Yehuanten quihuizquilije.



<sup>25</sup> Ma yoje Jesús quinquixtic in lalalera, calaquic, quiquitquic ima in xolol sihual huan yihual yulic oc sejpa.

<sup>26</sup> Cuaquín mosemanac ilamachiltisli in hual quipanuc in xolol sihual, huan yoje quimatic moxtin pa mochi in lali itenco.

### *Jesús quinpajtía ome pachacames*

<sup>27</sup> Quisac umpa Jesús, quitocaje ome pachacames, quitzajtzilijtaloaya, quililoaya:

—Tehual David imiahuil, ¡xitechicnili!

<sup>28</sup> Huan quiman calaquic calijtic, hualaje capa yihual in pachacames, huan Jesús quinmilic:

—¿Anquineltoqa pampa nehual huil annimijchihuilia in hual annechtemachijtica?

Quilije:

—Quema, Tata.

<sup>29</sup> Cuaquinon quinmatoquilic inmixtololojmes, quinmilitataya:

—Quinami anquineltoqa, yoje ma ye pa amhuanten.

<sup>30</sup> Yoje pajtije inmixtololojmes, huil lachialoaya. Huan Jesús quinmilic chichahuac:

—Amo xiquilican inon amaqui.

<sup>31</sup> Ma yoje, yehuanten, quiman quisaje, quimachiltinemiloaya in hual quinchihuilic Jesús. Lamachiltaloaya pa mochi in lali hual cataya itenco nepa.

### *Jesús quipajtía se hual amo huil lajtuya*

<sup>32</sup> Quiman quistataloaya in lacames hual axan huil lachialoaya, quihualiquilije Jesús oc sequin lacames se lalal hual amo huil lajtuya. Se ijyecal elehuis quijlacahuaya ilajtol, amo quimacahuiltiaya pa lajtusquiaya.

<sup>33</sup> Huan quiman Jesús quiquixtilic in ijyecal in lalal, cuaquinon huil lajtuya. Yoje moitaloaya ca lamajtilisli in lacames, quililoaya:

—Amo quiman panuje lachihualisli quinami innojen pin tolali Israel.

<sup>34</sup> Ma yoje, yehuanten hual quineltocaloaya inminlamaxtilisli in fariseos quijtutinemiloaya:

—Yihual quinquixtilía in ijyecames pan ipampa ilapalehuilisli Satanás hual huelitía ca in ijyecames amo cuajcuali.

### *Jesús quinmicnilita in lalalera*

<sup>35</sup> Huan Jesús yajtinemiaya pa mochi caltilan huejué huan mochi caltilan tijtipichin. Lamaxtitataya pa inmintiopajmes huan quimachiltitaya in lamachiltisli cuali pa quimatilosquiaya quinami Dios huelitía. Huan noje yajtiahuiaya quinpajtitataya moxtin hual quipialoaya cocolisli huan len yes hual quincocojtataya.

<sup>36</sup> Huan quiman quinmitaya in lacames, nesiloaya siajtataloaya pampa quipialoaya miac cocolisli huan lastataloaya pan lali pampa niman siahuiloaya. Huan quinmicniliaya Jesús niman miac pampa cataloaya quinami borregos hual amo quipialoaya aqui quinlachilisquiaya. Quema, nesiloaya quinami lacames hual amo huil canaloaya len monequiaya pa quipialosquiaya.

<sup>37</sup> Cuaquinon Jesús quinmilic yehuanten hual quinmaxtiaya, quinmilic:

—Cate miac pin lalticpan hual quinequilosquiaya monechiculo capa Dios huelitía. Yehuanten cate quinami se lapixcalisli hué capa amo cate miac tequipanujquimes pa lapixcasi.

<sup>38</sup> Dios Yihual iteco in lapixcalisli. Xictemachican Dios pa quintilanis lapixcanijmes pa quinnehicusi yehuanten pa in lapixcalisli, niqijutitica yehuanten hual quinequisi yesi lanechiculi capa Dios huelitía.

## 10

*Jesús quinlajultía in doce (majlali huanome) lacames pa yesi ilanahuatinijmes*

(Mr. 3:13-19; Lc. 6:12-16)

<sup>1</sup> Huan quinnotzac Jesús pa hualalosquiaya capa yihual doce imonextilinijmes, quinmacac lahuelilitlisli pa quinquixtilisi ijyecames amo cuajcuali in lacames. Quinmacac lahuelilitlisli pa quinpajtililosquiaya len yes cocolisli huan len yes hual quincocoltiaya yehuanten.

<sup>2</sup> Huan nican unca quinami motocaloaya in doce ilanahuatinijmes: Pehua ca in se hual motocaya Simón hual unca Pedro, oc se motocaya Andrés, yihual icni Pedro. Cuaquinon cataya se motocaya Jacobo ixolol Zebedeo huan oc se motocaya Juan, yihual icni Jacobo.

<sup>3</sup> Cuaquinon cataloaya Felipe huan Bartolomé huan Tomás huan Mateo. Yihual Mateo yec se hual la'anilini ilapixcalisli tomin pa in lahuelilitlisli romano. Huan cataya Jacobo ixolol Alfeo, cataya Lebeo hual noje motocaya Tadeo,

<sup>4</sup> cataya Simón hual catani ca in cananistas hual quinequiloaya huelitilo pa Israel, huan cataya Judas Iscariote hual quitemacac Jesús pa yehuanten hual yahuiloaya quimictilo.

*Jesús quintilanía ilanahuatinijmes pa lamachiltitnemisi*

(Mr. 6:7-13; Lc. 9:1-6)

<sup>5</sup> Innojen doce lacames Jesús quintilanic quinami ilanahuatinijmes. Quinpehualtilic inmintequipanulisli quinmilijtica:

—Amo xiacan capa chantilo yehuanten hual amo judíos. Huan amo xicalaquican pa se inmincaltilan samaritecos.

<sup>6</sup> San nicnequi pa anyas capa cate yehuanten pa ilali Israel, in judíos hual monequi pa yesi laquixtili pin polehuilisli ca capic quinhuica inminlajlaculisli. Yehuanten cate quinami borregos mopolujticate.

<sup>7</sup> Xilamachiltitiacan capa yes anyajtía, xiquinmilican: “Ajsitihuala in tonali quiman Dios lanextilis pampa yihual huelitía”, xiquinmilican.

<sup>8</sup> Xiquinpajtitiacan in cocoxquimes, xiquinyulilititiacan in mijquimes, xiquinpajtitiacan yehuanten hual mococolo ca in cocolisli lepra, xiquinquixtilijtiacan yehuanten hual ijyecames amo cuajcuali quincocolticitate. Annimitzmaca in lahuelilitlisli pa anquichías mochi inon, huan amo annimitzljalanaiya laxlahuilisli nindeno. Pampín ma como annimitzlxlahuican nindeno yehuanten hual anquinpalehuis.

<sup>9</sup> Xiacan jan quinami anuncia axan, amo xihuejcahuacan anquichixtica pa huil ancanas tomin pa anquihuicas.

<sup>10</sup> Amo xiquinhuicacan anmoxotopajmes, xicuicacan jan se cotón mochi sejse ca amhuanten, xiquinhuicacan san ome anmolacsames, huan amo xiquihuicacan se cuál pa anmopalehuis quiman annejnemi. Amo monequi pa anquinpías innojen. Annitzmacasi len anquinequi capa yes anajsis, pampa se tequipanujquil monotza pa canas inon hual quicua.

<sup>11</sup> Huan quiman ancalaquis calía yes caltilan hué o caltilan tipichin, xilajlanican sinda unca se nepa hual moxtin lachialo ca lasojlalisli, hual quinequis pa annitzmosehuiltis pa ichan. Quiman anquimati aqui yes

anmitzmosehuiltis, cuaquín xiacan pa ichan nepa. Ximocahuacan pa anchantis nepa mochi tonalijmes hual anunca pa in caltilan.

<sup>12</sup> Huan quiman ancalaquis se cali calijtic, xiquinpialtican yehuanten hual nepa chantilo.

<sup>13</sup> Sinda yehuanten pa in cali quinequisi anmitzmosehuiltisi amhuanten huan quinellocasi anmolamachiltisli, cuaquín ma mocahua ca yehuanten anmomosehuilisi calica anquinpialtic. Huan sinda yehuanten pa in cali amo quinequisi anmitzmosehuiltisi amhuanten huan amo quinellocasi anmolamachiltisli, cuaquín ma mocuepa pa amhuanten anmomosehuilisi calica anquinpialtic yehuanten. Yoje huil anquinmacas oc sequin anmomosehuilisi.

<sup>14</sup> Huan aquí yes amo quinequis anmitzmosehuiltis huan amo quinequis quicaquis anmolamachiltisli, cuaquín quiman anquisas pa in cali o in caltilan, xiquintzejteluicican capa yehuanten in lalmoluncal hual salijtica pa anmolacsames. In yes lanextilisli pa yehuanten. Yoje quimatisi pampa Dios quinmita quinami lacames hual amo quinequilo quinellocalo ilamachiltisli. Pampín Dios amo quinmanilis pa yesi ilacames.

<sup>15</sup> Annimitzilía neli pampa yehuanten hual chantilo pa in caltilan panusi miac lacocoltisli. Yehuanten hual chantinime pin caltilan hué itocani Sodoma huan pin caltilan Gomorra, amo panusi yoje miac lacocoltisli pan tonali quiman quinmotexpahuilis Dios yehuanten hual chantilo pin lalticpan hual amo quinellocalo.

### *Jesús quinmilía quinami quintojtocasi ilanahuatinijmes*

<sup>16</sup> ¡Xiquitacan! Nehual annimitzilantica, huan amhuanten lacames hual amo huil anmonapatía. Anunca quinami borregos hual in coyomes quinyahualujticate pa quinmictisi. Pampín, xiyén (xiyecan) lacames hual quimatilo motzacuulilo pa como mocahuasi capa lacames hual cate quinami in coyomes hual anmijchihuilisi len amo cuali. Quema, xiyén quinami in cuhuames hual quimatilo moixcuelo pa moquixtisi pin miqulisi. Noje xiyén quinami in huilomes hual amo quiman quichihuililosquiaya amaqui len amo cuali.

<sup>17</sup> Ma yoje, ximolachilican pampa lacames molalisi anmopan. Anmitztemacasi ca in la'ajuanijmes pa anmitzljalanisi chicahuac. Anmitzhuitequisi pa inmintiopajmes.

<sup>18</sup> Anmijchihuilisi inon pampa annechneltoca. Noje pampa inon anmitzhuilanasi inminlaixpan hueyenten huan lacames niman hué hual hueltilo. Quiman anunca inminyampa yehuanten anquinlaquetzilis pa quicaquisi nolamaxtilisi. Huan inminyampa yehuanten hual amo judíos anquinlaquetzilis pa quicaquisi nolamaxtilisi.

<sup>19</sup> Huan quiman anmitztemacasi pa anmitzljalanisi in la'ajuanijmes, cuaquín amo ximomajtican pampa amo anquimati quinami anlananquilis huan ca len lajtol anquijtus, pampa Dios anmitzmacas jan ajnaxcan lajtomes hual anquinmilis.

<sup>20</sup> Amo cayas amhuanten hual anlajtus. Cayas iEspíritu anmoTajtzin pin cielo hual lajtúa pan anmopampa.

<sup>21</sup> 'Se lacal quitemacas icni pa quimictisi, pampa icni nechneltoca. Pampa inon noje itajtzin se xól quitemacas ixól pa quimictisi pampa ixól nechneltoca. Huan in xolomes molalisi inminpan inmintajtzitzián huan inminantzitzián, huan in xolomes latlanisi pa quinmictisi.

<sup>22</sup> Huan moxtin lacames anmitzcocolisi pampa anmotocayaltis ca notoca. Ma yoje, aquí yes mopepenialtis pa mochicahualtis pa panus innojen pa

mochi tonalijmes hual huejcahuas huan mojmosta yultía nechnehtocatica, cuaquín yihual cayas laquixtili capa unca pin polehuilisli. Huan quiplás ichan capa Dios huelitía.

<sup>23</sup> Quiman anmitztojtocalo pa se caltilan, cuaquín xicholucan pa anajsis pa oc se caltilan. Yoje anpanujtinemis pa mochi caltilan pin lali Israel, anquinmilijtica Dios ilamachiltlisli cuali. Ma yoje, annimitzilia neli, ayamen anlaquisas anpanujtinemis pa mochi innojen caltilan quiman nehual ilacal in cielo nihualas oc sejpa.

<sup>24</sup> 'Se monextilini amo ajsis yes hué sinda ilamaxtini amo unca yoje hué. Huan se tequipanujquil amo ajsis yes hué sinda amo unca yoje hué iteco.

<sup>25</sup> Ma mocahua ca paquilisli se monextilini sinda ajsis yes jan quinami ilamaxtini. Noje ma mocahua ca paquilisli se tequipanujquil sinda ajsis yes jan quinami iteco. Nel nechtocayaltilo Beelzebul (in itoca inminteco in iyjecames amo cuajcuali, yihual in lili). Sinda nechtocayaltilo Beelzebul, cuaquín neli yalo quintocayaltilo niman tetzcuinuc amhuanten hual anchanti ca nehual.

*Jesús quinmilía aqui yihual hual monequi pa timomajtisi*

*(Lc. 12:2-7)*

<sup>26</sup> 'Ma yoje, amo ximomajtican inminpampa yehuanten, pampa len yes amo cuali hual anmijchihuililo, Dios quimati, huan moxtin pin lalticpan quimatisi. Amo unca nindeno laltili hual amo moitas, huan amo unca nindeno hual amo quimatilo hual amo yes lamachiltli.

<sup>27</sup> Yoje, len annimitzilis quiman ticate tohuían, inon xiquinlaquetzilian inminyampa in oc sequin lacames. Quema, len yes anquicaquis annimitzilis nel ixtacayito, inon xiquinmachiltitinemican moxtin pa yoje huil quimatisi pa mochi lalticpan.

<sup>28</sup> Amo ximomajtican pampa yehuanten huil quimictilo se icuerpo huan ma yoje amo huil quimictilo se iyulilisli. Monequi pa anmomajtis niman míac ilaixpan Dios hual huil quijlacúa se icuerpo huan iyulilisli capa amo mocahuas pa quincocoltis yehuanten hual amo quineltocalo. In unca in coyunquil capa chichinahuía.

<sup>29</sup> 'Anquimati pampa jan quilaxlahuilo se naditita san pa ome tutotzitzindis. Huan mas que amo ipatilo, ma yoje amo unca se capa yehuanten hual huetzis pan lali huan miquis sinda amo quimacahuiltis anmoTajtzin pin cielo.

<sup>30</sup> Huan amhuanten anmitzpuhuilía Dios mochi in tzondis pa anmotzon-tecon.

<sup>31</sup> Pampín, amo ximomajtican. Dios anmitzita quinami anmonotza niman míac. Amo yoje míac monotzalo míac tutotzitzindis.

*Yehuanten hual quineltocalo huan quinmililo oc sequin pampa quineltocalo*

*(Lc. 12:8-9)*

<sup>32</sup> 'Aqui yes hual quijtus neli inminyampa lacames pampa yihual nechnehtoca, cuaquín nehual noje niqijtus iyampa noTajtzin hual unca pin cielo pampa nehual niqiximati in se.

<sup>33</sup> Ma yoje, aqui yes quijtus inminyampa lacames pampa amo nechnehtoca, cuaquín nehual noje niqijtus iyampa noTajtzin hual unca pin cielo pampa in se amo unca noyaxca.

*Jesús quijtúa pampa lacames amo cayasi jan sejpa ipampa ilamaxtilisli*

*(Lc. 12:51-53; 14:26-27)*

<sup>34</sup> 'Amo xiquijtucan laijtíc amhuanten pampa quiman nel nihualaya pan lalticpan yahuiaya caya mosehuilisli pan lalticpan pan nopampa. Amo nihualaya pa nichíás mosehuilisli. Amo nicualicatihualaya mosehuilisli, pampa pan nehual nopampa yehuanten hual amo nechnehtocalo majcoquisi pa moanasi.

<sup>35</sup> Quema, nihualaya pa nicchihuilis pa se lalacal yes lacocolini ca itajtzin, in xól síhual pa yes lacocolini ca inantzin huan isihua ixól pa yes lacocolini ca inantzin ilahuical.

<sup>36</sup> Yoje, se lalacal ilacocolinijmes yesi yehuanten hual chantilo ca yihual pa se cali.

<sup>37</sup> Se lalacal quinlasojlas itajtzin huan inantzin. Ma yoje, monequi pa nechlasojlas nel niman míac, amo san yoje quinami quinlasojlas itajtzin huan inantzin. Sinda amo yoje, cuaquín amo monotza pa yes nomonextilini. Huan se lalacal neli quilasojlas ixól lalacal huan ixól síhual. Ma yoje, monequi pa nechlasojlas niman miac, amo san yoje quinami quinlasojlas yehuanten. Sinda amo yoje, amo monotza pa yes nomonextilini.

<sup>38</sup> Huan aquí yes amo quineltocas nolamaxtilisli amo monotza pa yes nomonextilini. Huan aquí yes amo quinequis mopepenialtis pa mochicahuáltis pa panus mochi lacocoltilisli hual Dios quimacahuáltia pa panus, cuaquín yihual amo monotza pa yes nomonextilini. Quema, quipías pa mochicahuáltis pa panus in hual quicocoltía mas que cuajnesi Dios quimacahuáltis pa miquis pan se cuahuil quinami nel.

<sup>39</sup> Aquí yes quinequi niman míac pa yultías pan lalticpan huan amo san yoje quinequi quineltoca Dios, cuaquín yihual amo quiman yulis capa Dios. Huan sinda Dios quinequi pa se quipolos iyulilisli pa yoje Dios canas lahueyilisli pampa inon, huan sinda in se amo motzacuilis pa miquis yoje, cuaquín yihual quipías yulilisli capa unca Dios.

*Jesús quijtúa pampa ilacames quipiasi laxlahuilisli*

*(Mr. 9:41)*

<sup>40</sup> 'Aquí yes anmitzitas quinami ilasojlimes huan anmitzixtocas pampa anquipía nolamaxtilisli, cuaquín yihual noje nechiztica nel quinami ilasojli pampa quixtoca nolamaxtilisli. Huan aquí yes nechiztica quinami ilasojli noje quixtica quinami ilasojli yihual hual nechtilanic.

<sup>41</sup> Aquí yes quitas quinami se ilasojli se ilajtuni Dios jan pampa unca Dios ilajtuni, cuaquín Dios quimacas in laxlahuilisli hual yes quinami inon hual canas Dios ilajtuni. Huan aquí quitas quinami ilasojli se lalacal hual amo mocahua pa yultías quinami Dios quinequi pa yulis, huan quitas quinami ilasojli jan pampa yuli quinami Dios quinequi pa yulis, cuaquinon Dios quimacas yihual se laxlahuilisli jan quinami in laxlahuilisli hual canas in lalacal hual yultía quinami Dios quinequi pa yulis.

<sup>42</sup> Cuajnesi cayas se hual quichihuilis se nomonextilini niman tipichin jan len lachihualisli tipichin. Cuajnesi jan quimacas se tecomal al iztic san, huan jan quimacas pampa yihual hual cuni in al unca nomonextilini. Annimitzilía neli, yihual neli quipías ilaxlahuilisli.

## 11

*Juan quintilania lacames pa quilajlanisi Jesús*

*(Lc. 7:18-35)*

<sup>1</sup> Quiman laquisac quintilanic Jesús in doce imonextilini, uyac yihual cajcapa pa lamaxtis huan pa lamachiltis pa inmincaltlan huejué yehuanten pin lalticpan Galilea.

<sup>2</sup> Huan cataya latzacuali calijtic Juan Lacuayatequini. Nepa yihual quimachiltilije in hual quichijtataya Cristo. Pampín quintilanic Juan ome imonextiliniymes pa yehuanten quilajlanilosquiaya Cristo pa yoje yihual Juan quimatisquiaya mochi inahuac yihual.

<sup>3</sup> Huan imonextiliniymes quilije:

—Juan Lacuayatequini quinnotzaya quinmilijtataya lacames pampa Dios yahuiaya quitilani se pan lalticpan. Axan quinequi quimati Juan sinda tehual tiunca in se. Sinda amo, cuaquín quinequi quimati da monequi pa ticchiasi pa hualas oc se.

<sup>4</sup> Jesús quinnanquiloc:

—Xiacan huan ximachiltican Juan oc sejpa innojen hual anquinmiztica huan anquincactica.

<sup>5</sup> Anquita huan anquicaqui quinami lachialo in pachacames. Nejnemilo yehuanten hual amo huil hejnemiloaya. Pajtilo yehuanten hual quipialo in cocolisli lepra, huan lacaquilo in panatames. Yulilo oc sejpa yehuanten hual miqijje. Huan yehuanten hual amo quipialo nindeno quicaquilo in lamachiltisli cuali pampa axan quinlamachiltiticate.

<sup>6</sup> Huan yulis ca míac paquilisli yihual aqui yes amo mocahuas pa quixtocas pa iyolo huan quineltocas in hual nicmaxtia.

<sup>7</sup> Cuaquín, quiman mohuicaloaya in omenten imonextiliniymes Juan, Cristo pehuac quinlaquetziloc in míac lalalera inahuac Juan, quinmilic:

—In tonalijmes hual anyahuini ca capic amaqui chantiaya pa anquicaquis huan anquitas Juan, ¿quinami len lalal anquijtuaya pampa anyahuiaaya anquita? ¿Anquijtuaya pampa in Juan yesquiaya quinami lalal hual quipala in hual quijtua quinami quihuixujtica se lajtol pa oc se lajtol, quinami se acal hual in iyecal quihuixúa? No, yíal Juan amo lalal quinami inon.

<sup>8</sup> Cuaquinon, ¿quinami len lalal anquijtuaya pampa anyahuiaaya anquita? ¿Anquijtuaya pampa Juan yesquiaya lalal hual molaquentiaya ca tzotzomajli cualtichin? No, yíal amo lalal quinami inon. Xiquitacan, yehuanten hual molaquentilo ca tzotzomajli cualtichin chantilo pa inmincalimes cuacualtichin in huejueyenten.

<sup>9</sup> Axan, ¿pa len anyahuini ca umpic pa anquitasquiaya? ¿Anyahuini pa anquitasquiaya se ilajtuni Dios? Quema, annimitzilia yihual se ilajtuni Dios. Huan annimitzilia yihual amo unca jan Dios ilajtuni san.

<sup>10</sup> Noje yihual unca in se hual aqui lajtúa Dios pan ipampa ilajtol lajcuiluli capa quijtua, quil:

Xiquitacan, nictilantica nolanahuatini pa annimtzlaicanas, huan yihual quin-nahuatilis lacames pa quimatisi pampa tihualas.

Yihual yes quinami se hual quichijchías mo'ojli quiman tehual ayamo tiajsi-aya.

<sup>11</sup> Annimitzilia neli, ca moxtin hual lacatije pan lalticpan, amo quiman cataya lalal hual yec yoje hué quinami Juan Lacuayatequini. Ma yoje, Juan Lacuayatequini amo ajsi pa yes yoje hué quinami yihual hual unca in niman tipichin capa Dios huelitia.

<sup>12</sup> 'Pa innojen tonalijmes quiman Juan Lacuayatequini pehuac lamachiltic, huan pan tonalijmes hual ajsitihualaloaya pa axan, lacames hual latequihuilu motolinilo pa cayasi capa Dios huelitia.

<sup>13</sup> Pa in tonalijmes huan nesci Juan lamachiltica, cataloaya ilamaxtilisli Dios ilajtuniymes huan in lajtol hual Dios quilajcuilultilic Moisés. Innojen lajtomes quijtuniyme len yahuiaya panu.

<sup>14</sup> Axan, sinda anquinequi anquineltoca inminlamaxtilisli, cuaquinon Juan Lacuayatequini unca in Elías hual Dios ilajtol quijtúa pampa yahuiaya huala pa anmitznextilis aquí yes in Cristo.

<sup>15</sup> Aquí yes quipía inacas pa lacaquis, ma quicaqui inon ca mochi ilacaquilisli.

<sup>16</sup> Yehuanten hual yulticate axan amo quixtocaloaya Juan ilamaxtilisli huan amo quixtocalo nolamaxtilisli nehual. Amo unca nindeno calica mopaquiltisi. Cate quinami xolomes yehuaticate nepa pin lajcotiyan capa lanamacalo huan capa monechiculo xolomes pa mahuiltisi. Sequin xolomes quinnotzalo in oc sequin, quinmililo:

<sup>17</sup> “Antimitzmahuiltilije quinami cataya monamictilisli huan amhuanten amo anquinequic anmahuiltic ca tehuanten. Huan antimitzmahuiltilije quinami cataya latzotzonalisli pa se mijquil huan amo anquinequic anmahuiltic.”

<sup>18</sup> Jesús quinmilijtiac:

—Juan hualac capa amhuanten amo lacuajtataya quinami anlacua amhuanten, huan amo cunic alcohol huan iayo uva coc. Huan amhuanten anquiqtúa pampa quipía se ijyecal amo cuali hual huelitúa laijt yihual.

<sup>19</sup> Nehual ilacal in cielo nihualac capa lacames nilacuajtica huan nicuntica jan quinami in oc sequin, huan amhuanten anquiqtúa: “Xiquitacan in lacal lacuani huan lahuanani, inminlasojli yehuanten hual anmitzanililo ilapixcalisli tomin pa in lahuellitilisli romano. Huan noje yihual inminlasojli yehuanten hual amo quichihualo quinami monequi pa se quimolancuacuetzilis Dios, quinami quijtúa tolajtol.” Anquinami in xolomes hual amo quinequilo mahuiltilo. Ma yoje tiyulilo Juan huan nehual quinami inon pampa ticpialo Dios ilajmatilisli. Huan yehuanten hual quineltocalo tolamaxtilisli quimatilo pampa neli unca Dios ilajmatilisli calica tiyulilo. Huan yehuanten quichihualo quinami tiquinnextililo.

### *Sequin caltilan capa yehuanten amo quineltocaje Jesús (Lc. 10:13-15)*

<sup>20</sup> Cuaquinon pehuac Jesús quinmajua yehuanten pa sequin caltilan huejué. Yehuanten cataloaya capa yihual quinchíac innojen míac ilachihualisli hual lanextilije pampa Dios neli quitilanic yihual pa in lalticpan. Laquetzac yoje pampa yehuanten amo mopalaje inminyolo pa pehualosquiaya laijnamiquilo quinami Dios, quilic:

<sup>21</sup> —¡Dios anmitztilanis pa anpanus lacocoltilisli, amhuanten pa Corazín huan Betsaida! Unca pampa niquinchíac míac lachihualisli huejué capa amhuanten. Huan sinda innojen lachihualisli cataloaya lachihuali ca yehuanten hual yulinijme pa yina pa innojen caltilan huejué Tiro huan Sidón, quiapiaya míac tonalijmes yehuanten mopalaloaya inminyolo pa laijnamiquilosquiaya quinami laijnamiquía Dios. Huan pa lanextililosquiaya quinami mopalaloaya inminyolo, molaquentiloaya ca tzotzomajli huahuastíc huan mofaliloaya pan tinextilan.

<sup>22</sup> Noje annimitzilía pampa yehuanten pa Tiro huan Sidón Dios amo quintilanis pa panusi míac lacocoltilisli quinami anyahui anpanúa amhuanten. Anmitztilanis pa anpanus lacocoltilisli pan tonali quiman yihual quintojtocas ilaixpan yihual yehuanten pin lalticpan hual amo quineltocalo.

<sup>23</sup> Huan amhuanten pa Capernaúm, anquiqtúa pampa anyahui anquichía pa anmocaltilan yes hué quinami oc sequin caltilan huejué. Ma yoje, amo yahui caya yoje. Anmocaltilan xitinis huan yajmo nesis. In quipanus pampa anunca niman elehuis, amo yoje elehuis catanijme yehuanten pa Sodoma.

Sinda yehuanten pa Sodoma hual yulinijme pa yina quinmitaloaya in lachi-hualisli huejué hual amhuanten anquinmitac, cuaquin Sodoma mocajti-hualaya axan, pampa ilacames quipalaloaya inminyolo pa pehualosquiaya lajtulo pa inminyolo quinami Dios quinequi.

<sup>24</sup> Huan annimitzilia pampa yehuanten pa Sodoma Dios amo quintilanis pa panusi lacocoltisli chicahuac quinami anpanus amhuanten pa in tonali quiman quintojtocas ilaixpan yihual moxtin pin lalticpan hual amo quinel-tocalo.

*Jesús quinmilia moxtin pa hualasi ca yihual pa mosehuisi*  
(Lc. 10:21-22)

<sup>25</sup> Quinami pa in tonali, Jesús laquetzac ca Dios, quulic:

—Nimijsehuía, Tata, tehual iTeco in cielo huan in lalticpan. Nimijsehuía pampa tiquintzacuilic pa camo quimatisi innojen yehuanten hual quijitulo pampa quimatilo míac monahuac tehual huan ma yoje amo quimatilo. Jan quipialo in ilajmatilisli in lalticpan. Quema, tiquintzacuilic pa camo quimatisi yehuanten. Ma yoje, tiquinnextilic yehuanten hual amo quipialo ilajmatilisli in lalticpan, huan cate yehuanten hual quinequilo míac pa monextilisli pan nopampa nehual.

<sup>26</sup> Quema, Tata, pampa yoje tiquitac cuali pa camo quimatisi len quinequi quijtúa molajtol yehuanten hual quijitulo pampa quimatilo. Huan quema, tiquitac cuali pa quimatisi len quinequi quijtúa molajtol yehuanten hual amo quimatilo.

<sup>27</sup> Cuaquinon Jesús quinmilic:

—NoTajtzin nechlalic nehual pa niquinnextilisquiaya yehuanten pin lalticpan mochi quinami yihual unca. Nehual niunca ixól huan amaqui pin lalticpan quimati quinami niunca, amo quimati pa len nihualaya pan lalticpan. Jan noTajtzin san quimati inon. Noje amaqui pan lalticpan quimati quinami unca noTajtzin, huan amo quiximati. Jan nehual hual niunca ixól nicmati mochi quinami yihual unca, huan jan nehual san niquiximati yihual. Huan yihual san quiximatis noTajtzin aquí yes nehual nicnequis nicnextilis.

<sup>28</sup> Xihualacan ca nehual anmoxtin hual anmitzmacalo tequil huan anunca anlamantica ca mochi in lajtomes hual amo anmitzpalehuilo anmitzquix-tililo anmolajlaculisli huan annoicnotilisli. Quema, xihualacan ca nehual, annimitzmosehuiltis.

<sup>29</sup> Ximonextilican quinami anmochías nomonextilinjmes. Yes quinami ancataya lailpili ca nehual pa yoje tiomenten quinami tilamantiasi, quinami lamantialo yulijquimes. Anmoitas ca mosehuilisli pa anmoyulilisli pampa nehual amo nilamaxtia chicahuac. Nehual amo nilatequihuía chicahuac, jan sejpa niunca.

<sup>30</sup> Xihualacan ca nehual, pampa notequipanulisli amo quiman anmitzlamilis anmochicahualisli huan nolamaxtilisli unca quinami lamamani hual amo etic.

## 12

*Jesús imonextilinjmes canaló trigo pan tonali chicome*  
(Mr. 2:23-28; Lc. 6:1-5)

<sup>1</sup> Panuc inon, cataya pan in tonali quiman amo tequipanulo judíos, uyac Jesús panujtataya capa cataloaya in cuajmilimes ca trigo. Huan mayantataloaya imonextilinjmes. Pampin pehuaje quincapehuaje imiahuimes trigo huan quicuaaje in trigo.

<sup>2</sup> Quitaje inon sequin fariseos, huan quilije:



—Xiquita. Quichijtcate momonextiliniymes len amo cuali. Tolajtol hual technextilía quinami ticmolancuacuetzililo Dios amo quimacahuilítia pa quichihuasi pan tonalijmes quiman amo titequipanulo.

<sup>3</sup> Huan Jesús quinmilic:

—¿Amo quiman anmomaxtic pin iamal Dios ilajtol capa quijtúa in hual quichíac David? Mayantataloaya yihual huan yehuanten hual cataloaya ca yihual.

<sup>4</sup> ¿Amo anmomaxtic quinami calaquic pin tiopan huan quicuac in pan hual quilalilo in tiopistas ilaixpan Dios? Huan in lajtol quijtúa pampa jan unca inminyaxca in tiopistas san pa quicuasi in pan. Ma yoje quicuaeje David huan yehuanten hual cataloaya ca yihual.

<sup>5</sup> Huan amo inon san. ¿Amo anmomaxtic pa iamal ilajtol hual anmitznex-tilía quinami anquimolancuacuetzilía Dios? Pan tonali siete (chicome) quiman monequi pa como antequipanus, ma yoje tequipanulo pin tiopan in tiopistas huan amo quipialo laijlaculisli.

<sup>6</sup> Pampín, nehual annimitzilía pampa nel niunca nican huan nicpía lahuelilitlisli hual amo quipialo yehuanten hual tequipanulo pin tiopan. Huan sinda ilajtol in tonali chicome amo quintzacuilía pa tequipanusí pin tiopan in tiopistas, cuaquin amo nejtzacuilía nel.

<sup>7</sup> Dios quijtúa, quil: “Nicnequi niman míac pa quimatasi laicnilisi lacames. Amo yoje míac nicnequi pa nechmacasi huendis.” Sinda anquimatiaya len quinequi quijtúa Dios quiman quijtúa inon, cuaquinon amo anejsehuiaya anquinmotexpahuili yehuanten hual amo quichihualoaya nindeno amo cuali.

<sup>8</sup> Nehual ilacal in cielo nicpía lahuelilitlisli niman hué hual amo quipía ilajtol in tiopan. Pampín noje nicpía mochi lahuelilitlisli pa niqulis len huil quichía se pan tonali quiman amo antequipanúa.

*Quipajtía Jesús se lalac imajma*  
(Mr. 3:1-6; Lc. 6:6-11)

<sup>9</sup> Huan quiman mohuicaya, calaquic pa inmintioipan capa momaxtiloaya Dios ilajtol.

<sup>10</sup> Nepa quitac se lalac ca se imajma patzajquil. Quilajlanije Jesús len quijtúaya inahuac yihual, quilije:

—¿Tolajtol hual techilía quinami ticmolancuacuetzililo Dios quimacahuilítia pa quipajtis se pan tonali quiman amo titequipanulo?

Inon quilajlanije pa yoje huil quimotexpahuililosquiaya ca se laijlaculisli.

<sup>11</sup> Huan Jesús quinmilic:

—Mochi lalac ca amhuanten sinda quiapiaya se borrego hual huetzic pa se coyunquil pan tonali quiman amo antequipanúa, jan axcan quiquixtiaya in borrego.

<sup>12</sup> Huan se lalac monotza niman míac, amo monotza yoje míac se borrego. Pampín, quema, in lajtol quimacahuilítia pa se quichías len cuali pan tonali quiman amo antequipanúa.

<sup>13</sup> Cuaquinon Jesús quilic in lalac:

—Xicxilani momajma.

Huan quixilanic imajma in lalac huan jan ajnaxcan pajtic mochi, jan quinami in oc se imajma.

<sup>14</sup> Cuaquinon quisaje yehuanten in fariseos, monechicuje pa molaquet-zililosquiaya quinami huil quimictilosquiaya Jesús. Quinequiloaya quim-ictilo pampa Jesús amo quineltocaya inminlajtol hual quijtúaya quinami yehuanten quinequiloaya pa lacames quimolancuacuetzililosquiaya Dios.

*Dios ilajtunijmes pa yina quiqcuiluc pampa yahuiaya huala Jesús*

15 Ma yoje, quimatic Jesús inon, huan mohuicac, amo mocahuac nepa. Niman míac lacames quitocaloaya huan quinpajtic moxtin.

16 Huan Jesús quinmilic chichahuac pa camo quilaquetzilijtinemilosquiaya quinami yihual quinpajtiaya pa yoje amo quimatilosquiaya moxtin in hual yihual quichijtataya.

17 Inon Jesús quinmilic pa yoje mochiasquiaya len quijtuc Dios inahuac yihual pa yina pan ipampa ilajtuni Isaías. Yihual Isaías quiqcuiluc quijtutataya pa iamal, quil:

18 Xiquitacan notequipanujquil.

Nicljaltultic pa yesquiaya notequipanujquil.

Niclasojla huan pa noyolo nicpía míac paquilisli ca yihual.

Niclalis noEspíritu (noIjyecal Cual) lajitic yihual, huan yihual quihueliltis.

Huan notequipanujquil quinmachiltis yehuanten hual amo judíos quinami huil quipiasí Dios ilapujpuhualisli pa inminlajlaculisli.

19 Yihual amo mochihualtis pa lacames quicaquisi.

Yihual amo lanojnotzas chichahuac pin ojlimes capa cate in niman míac lacalera.

20 Yihual quinpajtis huan quinmanas pa yesi ilacames yehuanten hual quimatilo pampa amo quipialo nindeno calica mopalehuisi.

Jan yihual notequipanujquil san huil quinpalehuía yehuanten hual quimonextililo yoje.

In lacames cate quinami acal laxamanili, quinami se icpal tomahuac hual pupucatica se nadita pan se tapalquita pa lahuis.

Quema, lacames quinami innojen yihual notequipanujquil quinmanas pa yesi iyaxca huan yihual quinsulahuas moxtin ilacocolinjmes.

Quichías inon quiman quintojtocas ilaixpan yihual yehuanten hual amo quineltoalo huan cuaquín quilalis ilahueliltisli pan lalticpan calica quichihuilis sejse jan yoje quinami quichihuilía oc se.

21 Huan quiman yehuanten hual amo judíos quicaquisi itoca, quimatisi len huil quinchihuilía yehuanten.

Pampa inon quilalisi inminlaneltoalisli ca yihual notequipanujquil.

*Quijtulo pampa Jesús quipía Satanás pa iyolo*

(Mr. 3:20-30; Lc. 11:14-23; 12:10)

22 Cuaquinon quihualiquilije se hual se ijyecal amo cuali quichihualtiaya. In ijyecal quipachacaltic in lacal, noje quichihuilic pa camo huil lajtuc. Jesús quipajtic huan yoje in lacal huil lachiaya huan lajtuaya.

23 Moxtin moitaloaya ca lamajtilisli huan moililoaya:

—¿Cuajnesi yihual yes David imiahuil hual Dios techilic pampa yahuiaya huala pan lalticpan?

24 Quiman quicaquiye inon in fariseos, quilije:

—In se quinquixtilía in ijyecames amo cuajcuali hual quinchihualtificate jan pan ipampa ilahueliltisli Beelzebú. Yihual Satanás hual huelitía pan mochi in ijyecames amo cuajcuali.

25 Jesús quimatic len quijtutataloaya lajitic inminyolo huan quinmilic:

—Sinda se lahueliltisli moana ca yihual ihuían, cuaquín moijlacus in lahueliltisli. Huan sinda yehuanten pa se caltian o yehuanten hual chantilo pa se cali moanalo ca yehuanten inminhuían, cuaquín yajmo yahuil huejcahualo.

<sup>26</sup> Huan sinda Satanás moquixtis yihual ihuían pa capa huelitijtica, yihual moana ipan yihual ihuían. Yoje, yajmo huejcahuas ilahueliltilisli sinda yoje quichías.

<sup>27</sup> Huan sinda pan ipampa Beelzebú ilahueliltilisli nehual niqinquixtilía lacames in ijyecames, cuaquín ¿pan ipampa aqui ilahueliltilisli quinquixtililo ijyecames anmomonextilinijmes? Noje yes pan ipampa ilahueliltilisli Beelzebú. Huan sinda amhuanten anquijtúa inon, cuaquín anmomonextilinijmes yalo anmitzmotexpahuililo, pampa anquijjutica yehuanten quinquixtililo ijyecames pan ipampa Beelzebú.

<sup>28</sup> Axan, sinda nehual niqinquixtilía in ijyecames lacames pan ipampa Dios iEspíritu ilahueliltilisli, huan yoje nicchía, cuaquinon axan hualac Dios ca amhuanten pa huelitis.

<sup>29</sup> 'Sinda se quinequi calaqui pa calijtic icali se lalac chicahuac pa quixtequilis len quipía, monequi pa quipehualtis quilpilitica in lalac chicahuac. Cuaquín huil quixtequilis len quipía pa icali. Huan jan yoje niunca quinami niquilpic Satanás huan ijyecames amo cuajcuali hual pan yehuanten yihual huelitía. Axan huil niqinquixtilía moxtin lacames innojen ijyecames.

<sup>30</sup> Aquí yes amo unca ca se lajtulisli ca nehual, cuaquín yihual unca nolacocolini. Huan aquí yes amo nechpalehuis pa niquinnechicus lacames pa yoje momacahuiltisi pa Dios huelitis pan yehuanten, cuaquín yihual quinquisemana in lacames pa como monechicusi pa yesi ca nehual.

<sup>31</sup> 'Pampín, annimitzilía Dios quinquipuhuas mochi inminlajlaculisli hual quichihualo lacames. Ma yoje, Dios amo quiman quinquipuhuas yehuanten hual quihuejuecaltilo in Espíritu Santo.

<sup>32</sup> Huan aquí yes quijtúa len amo cuali nonahuac nehual ilacal in cielo, Dios huil quinquipuhuas. Ma yoje, aquí yes quijtúa len amo cuali inahuac in Espíritu Santo, cuaquín Dios amo quiman quinquipuhuas pa mochi in tonalijmes huejcahuas in lalticpan, huan amo quinquipuhuas quiman lamis in lalticpan.

*Jesús quijtúa pampa se quiximati se cuahuil pan ipampa ilaquilyo  
(Lc. 6:43-45)*

<sup>33</sup> 'Quiximatilo se cuahuil pan ipampa ilaquilyo. Anquijtúa se cuahuil unca cuali quiman ilaquilyo unca cuali. Anquijtúa se cuahuil amo unca cuali sinda ilaquilyo amo unca cuali. Quiman nel niqinquixtilía in ijyecames amo cuajcuali, nichijtica len cuali huan yoje monequi pa anquimatis pampa nel nicuali.

<sup>34</sup> ¡Amhuanten Satanás ilacames! Amo anquijtúa len cuali pampa amhuanten amo anunca cuali. Lajtúa se lalac pampa in míac lajtulisli cate pa iyolo.

<sup>35</sup> Se lalac cuali lajtúa pampa in míac cuali unca pa iyolo. Huan se lalac amo cuali lajtúa pampa in míac amo cuali unca pa iyolo.

<sup>36</sup> Huan annimitzilía pampa quinnmixcomacas Dios in lacames ca mochi lajtlo laijlaculi hual quijtulo. Quema, pa in tonali quiman Dios quinqtojtocas ilaixpan yihual yehuanten pin lalticpan hual amo quineltovalo, yehuanten quimachiltisi mochi hual quichihuaje.

<sup>37</sup> Dios anmitztojtocas ilaixpan yihual pampa anlajtúa elehuis. Sinda cataloaya cuajcuali anmolajtomes anmitzquixtis anmolajlaculisli huan sinda amo cuajcuali anmolajtomes, anmitzcahuilis anmolajlaculisli.

*Yehuanten hual amo cuali amo mocahualo pa quinequisi quitasi lanextilisli  
pin cielo  
(Mr. 8:12; Lc. 11:29-32)*

<sup>38</sup> Cuaquinon sequin ilamaxtinijmes ilajtol hual quinnextilía quinami quimolancuacuetzililo Dios in judíos huan sequin fariseos quilije:

–Lamaxtini, ticnequilo timitzitalo ticchías len hual lanextilis pampa neli ticpía Dios ilahueliltilisli.

<sup>39</sup> Jesús quinnanquilic:

–Yehuanten hual yulticate axan cate amo cuali huan quicajcahualo Dios. Jan lacemes quinami yehuanten quitemulo pa quitasi len hual lanextilía pampa se quipía Dios ilahueliltilisli. Huan Dios amo quinmacas lacemes quinami innojen se lanextilisli. San quinmacas ilanextilisli Jonás, hual yec Dios ilajtuni.

<sup>40</sup> Yihual Jonás cataya laijtic iyolo in michin niman hué pa ye tonalijmes huan ye layuajmes. Huan len quinami inon nechpanus nehual ilacal in cielo. Nehual nicayas lalalili laijtic in lali quiman nimiquis. Nimocahuas nepa ye tonalijmes huan ye layuajmes.

<sup>41</sup> Pan tonali hual Dios quintojtocas ilaixpan yihual yehuanten hual amo quinelocalo, cuaquín moquetzasi in lacemes hual yulinijme pin caltilan hué Nínive quiman Dios quinlaxpahuilis yehuanten hual yulticate axcan. Huan yehuanten hual yulinijme pa Nínive quinmotexpahuilisi yehuanten hual yulticate axan. Quinmotexpahuilisi pampa yehuanten pa Nínive quipalaje inminyolo pa pehualosquiaya lajtulo pa inminyolo quinami Dios. Cataya quiman quinnotzac Jonás quinmilijtataya ilajtol Dios. Huan xiquitacan. Nican unca se niman hué. Jonás amo yec hué quinami in se. Ma yoje yehuanten hual yulticate axan amo quinequilo nechcaquilo.

<sup>42</sup> Huan pan tonali hual Dios quintojtocas ilaixpan yihual yehuanten hual yulticate axan, cuaquín moquetzas in hué sihual hual yulini pin lali Sebá hual unca pin sur. Huan yihual quinmotexpahuilis yehuanten hual yulticate axan. Quinmotexpahuilis pampa yihual hualac niman huejca pa quicaquis nican in hué Salomón ilajmatilisli. Huan xiquitacan, unca nican se niman hué. Salomón amo yec hué quinami in se. Ma yoje amo quinequilo nechcaquilo yehuanten hual yulticate axan.

*Jesús lajtúa quinami se ijyecal amo cuali mocuepa  
(Lc. 11:24-26)*

<sup>43</sup> Quisa se ijyecal amo cuali hual quichihualtía laijtic se lalac, cuaquín nejnentinemis pa capa unca lali huaquí. Quitemujtinemi capa huil mosehuis, huan amo quita capa mosehuis.

<sup>44</sup> Cuaquín quilía: “Nehual nimocuepas pa nochan hual unca icuerpo in se pa capa niquisac.” Huan quiman ajsi, quita icuerpo in se axan quinami se cali capa amo unca nindeno huan unca quinami laxpanali huan lachijchihuali jan cuali.

<sup>45</sup> Cuaquín yahui yihual huan quinmana oc sequin chicome ijyecames niman ej'elehuis. Yihual amo ajsic yec elehuis quinami yehuanten. Cuaquinon hualalo, calaquilo icuerpo in se huan nepa chantilo. Yoje in se capa calaquije moita niman temajquil. Amo yoje temajquil cataya quiman jan cataya se ijyecal san laijtic icuerpo. Jan yoje quinpanus in lacemes ej'elehuis hual yulticate axan.

*Jesús inantzín huan icnían: ¿Aquinojen cate?  
(Mr. 3:31-35; Lc. 8:19-21)*

<sup>46</sup> Ayamo mocahuac quinlaquetzilic yehuanten quiman hualaje inantzín huan icnían huan mocahuaje moquetzataloaya pa itenco in lalacera, quinecataloaya laquetzalo ca yihual.

<sup>47</sup> Cuaquinon se quilic:

—Quita. Moqueztecate pa quiahuac monantzin huan mocnían, quinecticate laquetzalo ca tehual.

<sup>48</sup> Huan Jesús quinanquilic yihual hual quilic inon, quilic:

—Ma nimitzili aquinojen yehuanten hual niqijtúa cate nonantzin huan nocnían.

<sup>49</sup> Huan quixilanic imajma ca imonextiliniymes huan quilic:

—Quita. Innojen nonantzin huan nocnían.

<sup>50</sup> Aquí yes quichías len quinequi noTajtzin hual unca pin cielo, in se unca nocni lacal huan nocni sihual huan nonantzin.

## 13

*Jesús lamaxtía ca ilapuhualisli in latocani*

(Mr. 4:1-9; Lc. 8:4-8)

<sup>1</sup> Pa in tonali quisac Jesús pin cali huan molalic pa itenco in al huejcalan.

<sup>2</sup> Huan monechicuje capa yihual niman míac lacalera. Pampa inon lejcu pan se barquito, molaliaya, huan mochi in míac lacames mocahuaje moqueztecate pa itenco in al huejcalan.

<sup>3</sup> Huan Jesús quinlaquetzilic míac pan ipampa sequin lapuhualisli calica quinextiliaya ilamaxtilisli. Quinmilic:

—Quisac se lacal latocani pa latocas.

<sup>4</sup> Huan quiman latocatiahuiaya, sequin in latocli quixintiahuiaya pa itenco in ojlti. Huan temujtihualaje in tutomes, quincuaje.

<sup>5</sup> Xintiahuiaya in lacal, sequin in latocli calaquije pin lali canahuac capa quipiaya tel itzindan. Jan ajnaxcan ixuaje pampa amo cataya telahuac in lali.

<sup>6</sup> Quisac in tonali laixpelatataya chichahuac. Quinchichinuc in pacholimes huan huaquije pampa amo quipialoaya lalhuayojmes.

<sup>7</sup> Quixintiahuiaya sequin in latocli pin huiztilan, huan moscaltitiquisaje in huizlimes, quintzacuilije in pacholimes hual ixuaje capa xiniaya in latocli.

<sup>8</sup> Cuaquinon, quixintiahuiaya oc sequin latocli pan lali cuali, huan quiman ixuaje, laquije cien pa sejse latocli, ca oc sequin laquije sesenta, ca oc sequin laquije treinta pa sejse latocli hual yec latocali.

<sup>9</sup> Aquí yes quipía inacas pa lacaquis, ma caya jan sejpa pa quicaquis.

*Jesús quinmilía leca lamaxtía ca lapuhualisli*

(Mr. 4:10-12; Lc. 8:9-10)

<sup>10</sup> Ajsije capa yihual imonextiliniymes, quilije:

—¿Leca tiquinlaquetzilía ca lapuhualisli pa tiquinmaxtis?

Quinnanquilic:

<sup>11</sup> —Niquinlaquetzilía yoje pampa amo quimacahuiltía Dios pa yehuanten quimatisi ilajtulisli iyolo huan ilachihualisli hual quiman pehuac in lalticpan huan pa axan quinlatilic moxtin. Axan quinlamachiltijtica jan sequin san. Huan amhuanten anunca yehuanten hual Dios quinlamachiltijtica ilachihualisli huan ilajtulisli hual anmitznextilis quinami yahui huelitía.

<sup>12</sup> Unca pampa aquí yes quipía lajmatilisli hual lanextilía quinami Dios huelitía, yihual yajtía quipixtica mojmosta oc se nadita in lajmatilisli. Huan aquí yes amo quipía lajmatilisli hual quinextilía quinami Dios huelitía, yoje Dios quichihuilis pa yajmo huil quimatis quinami Dios huelitía.

<sup>13</sup> Pampín niquinlaquetzilía pan ipampa lapuhualisli hual quinlatililo nolamaxtilisli, pampa yehuanten, mas que huil lachía, amo quinequilo

monextililo len quinequi quijtúa nel nolamaxtilisli. Huan mas que lacaquilo amo quinequilo quimatilo nolamaxtilisli.

<sup>14</sup> Huan pan inminpampa yehuanten, yoje mochiytica len Dios ilajtuni Isaías quijtuc inminahuac yehuanten. Quijtuc quinami yahuilooaya yelo, quijtuc, quil:

Mas que anlacaqui, amo anquimati len quinequi quijtúa.

Huan mas que anlachía ca annoixtololojmes, ma yoje amo anquimatis pa annoyolo len quinequi quijtúa.

<sup>15</sup> Unca pampa inminlajmatilisli inminyolo yehuanten yajmo quinpalehuía pa quimatisi len quinequi quijtúa.

Huan inminacajmes yajmo lacaquilo cuali pa quimatisi pa inminyolo len quinequilo quijtulo nolajtomes.

Unca quinami motzacuilijque inmixtololojmes pa yoje amo quitalosquiaya pa quimatilosquiaya.

Quema, quichihualo mochi len huil quichihualo pa yoje amo quimatisi pa inminyolo len quinequi quijtúa nolajtol.

Quichihualo yoje pa camo yelosquiaya lapatili pa inminyolo, huan pa yoje nehual amo niquinpajtilisquiaya inminlajlaculisli.

Yoje quijtuc Isaías quiman quijcuiluc ilajtol Dios.

<sup>16</sup> Ma yoje, ¡quinami anquipías paquilisli pampa anquita innojen hual niquinchía huan anquimati len nicnequi niquijtúa! Huan anquicaqui innojen lajtomes hual niquinmijtúa huan anquimati len quinequilo quijtulo.

<sup>17</sup> Neli annimitzilia inon. Cataniyme míac ilajtunijmes Dios huan míac oc sequin ilacames Dios hual quinequinijme míac quitalo innojen hual amhuanten anquinmiztica. Ma yoje, amo quiman quinmitaje. Quinequinijme míac quincaguilo innojen lajtomes hual amhuanten anquincactica, huan amo quiman quincaquije.

*Jesús quinmilía len quinequi quijtúa ilapuhualisli in latocani*

(Mr. 4:13-20; Lc. 8:11-15)

<sup>18</sup> Xilacaquican axan, huan annimitznextilis len quinequi quijtúa ilapuhualisli in latocani.

<sup>19</sup> Quiman yes quicaquis se in lajtol hual lanextilía quinami Dios huelitía, huan amo quimati len quinequi quijtúa, cuaquín hualas in lili huan quilchualtía in lajtol hual quicaquic. In local unca quinami in lali pa itenco in ojltio capa quixintiahuiaya in latocli.

<sup>20</sup> Huan in lali canahuac capa quixintiahuiaya capa cataya tel itzindan, in quinami se hual quicaqui ilajtol Dios huan quineltocha ca paquilisli.

<sup>21</sup> Ma yoje, yihual quinami in latocli hual amo quipía lali telahuac pampa unca tel itzindan. Amo calaqui pin lali míac, huan ca in se amo calaqui in lajtol míac laijtic iyolo. Yoje, yihual quineltocha ilajtol Dios pa se nadita. Huan quiman péa panúa len lacocoltilisli pampa quineltocha ilajtol Dios, quiman quitojtochalo pampa quineltocha, cuaquín jan axcan mocahua pa quineltochas.

<sup>22</sup> Huan in lali capa catá huiztilan capa quixintiahuiaya in latocli unca quinami se hual quicaqui ilajtol Dios, huan ma yoje momaca míac tequil inahuac quinami yahui yuli pan lalticpan. Noje amo mocahua pa quijnamiquis quinami huil monechiculis míac tomin. Huan jan quinami in huizli quintzacuilía in pacholimes yajyancuic, jan yoje in se ilaijnamiquillisli quitzacuilia Dios ilajtol pa camo mocahuas laijtic iyolo. Yoje yajmo quipalehuía ilajtol Dios.

<sup>23</sup> Huan in lali cuali capa quixintiahuiaya in latocli unca quinami se hual quicaqui Dios ilajtol huan quimati len quinequi quijtúa. Huan Dios ilajtol yajtia quijnamiquiltijtica miac. Quichihuilis quinami pacholi hual quilaquiltia cien ilaquilyo ca se latocli. O quichihuilis quinami pacholi hual quilaquiltia sesenta ilaquilyo ca se latocli o quinami se pacholi hual quilaquiltia treinta ilaquilyo ca se latocli. Quema, Dios quichia miac pan ipampa in se.

*In trigo huan in latocli amo cuali*

<sup>24</sup> Quinpuhuilic oc se lapuhualisli calica yahuiaya quinnextili lamaxtilisli, quinmilic:

—Dios huelitia yoje pan lalticpan. Unca quinami se lalac hual quitocac trigo ca latocli cuali pa icuajmili.

<sup>25</sup> Huan coxtataloaya itequipanujquimes, hualac ilacocolini, quitocac latocli amo cuali ca in trigo latocali, cuaquin uyac.

<sup>26</sup> Quiman ixuaje inminpacholimes in trigo huan quilalilije miahuil, noje nesije inminpacholimes in latocli amo cuali, hual nesiloaya quinami trigo huan ma yoje amo quiपालोया imiahuil trigo.

<sup>27</sup> Cuaquin hualaje itequipanujquimes in teco capa yihual, quilije: “Xiq-uita, Tata, ¿amo tictocac latocli cuali pa mocuajmili? ¿Leca quiplia in pacholimes amo cuali?”

<sup>28</sup> Quinmilic: “Quichiac inon se nolacocolini.” Quilije itequipanujquimes: “¿Ticnequi pa tiasí pin cuajmili pa tiquincapunasi in pacholimes amo cua-cuali?”

<sup>29</sup> Yihual quinmilic: “No, amo xicchiuacan yoje, amo sangá anquinca-punas noje inminpacholimes in trigo quiman anquincapuntica inminpa-cholijmes in latocli amo cuali.

<sup>30</sup> Ma moscaltitiacan in omenten huan quiman ajsis in lapixcalisli, cuaquilon niquinmilis in lapixcanijmes pa pehuasi quitequisi in pacholimes amo cuajcuali. Quinmontusi huan quilpisi ca miac pa quichich-inusi. Huan inminpacholimes in trigo quinmontusi huan quilpisi ca miac huan quilalisi pa nochan.”

*Ilatocli in mostaza*

*(Mr. 4:30-32; Lc. 13:18-19)*

<sup>31</sup> Quinmilic oc se lapuhualisli calica quinnextilic lamaxtilisli, quinmilic:

—In unca quinami panúa capa Dios huelitia. Unca quinami se lalac hual canac se ilatocli in mostaza huan quitocac pa icuajmili.

<sup>32</sup> In latocli unca niman tipichin, amo yoje mochi oc sequin latoclimes hual quitocalo lacames. Ma yoje, quiman moscaltis, unca niman hué, amo yoje hué mochi in oc sequin pacholimes. Mochias hué quinami se cuahuil, huan hualalo in tutomes hual palanilo, mosehuilo pani iramas (iitzmolinquimes).

*Ilapuhualisli in laxocoyaltili*

*(Lc. 13:20-21)*

<sup>33</sup> Quinlaquetzilic oc se lapuhualisli calica quinnextilic lamaxtilisli, quinmilic:

—Yoje unca quinami panúa capa Dios huelitia. Unca quinami se sihual hual canac laxocoyajquil huan quilalic pa se lamachihualoni harina, huan cuaquin moteposahuac mochi in textli.

*Jesús quinmilía in lapuhualisli pa lamaxtia*

*(Mr. 4:33-34)*

<sup>34</sup> Mochi innojen lajtomes quinmilic Jesús in míac lalacera pan inminpampa lapuhualisli calica quinnexilic ilamaxtilisli. Quema, jan ca lapuhualisli quinami innojen Jesús quinlaquetzilic yehuanten, amo quinlaquetzilic ca oc se laquetzalisli.

<sup>35</sup> Yoje quinlaquetziliaya pa mochías len Dios ilajtuni quijcuiluc, quijtuc, quil:

Niclapus nocamac pa nilaquetzas pan ipampa lapuhualisli calica nilamaxtis.

Niquinmilis innojen hual quiman nicchíac in lalticpan pa axan, amo nicmacahuiltiaya pa quimatasi lacames.

Yoje quijtúa pin amal hual quijcuiluc Dios ilajtuni.

*¿Len quinequi quijtúa ilapuhualisli in latocli amo cuali?*

<sup>36</sup> Cuaquinon Jesús quinmilic in míac lacames pa mohuicalosquiaya huan yihual calaquic pa calijtic. Huan hualaje capa yihual imonextilinijmes, quilije:

—Xitechili len quinequi quijtúa ilapuhualisli molamaxtilisli in latocli amo cuali hual nesic quinami trigo mas que amo yec trigo.

<sup>37</sup> Quinnanquilic:

—Yihual hual quixinic in latocli unca nehual ilacal in cielo.

<sup>38</sup> In cuajmili pin lapuhualisli unca quinami in lalticpan. In latocli cuali unca quinami in lacames hual pan yehuanten Dios huelitijtica. Huan in latocli amo cuali hual nesi quinami trigo quiman ixua, huan ma yoje amo unca, in unca quinami yehuanten capa Satanás huelitijtica.

<sup>39</sup> In lacocolini hual quixinic in latocli amo cuali unca quinami in lili Satanás. In lapixcalisli unca quinami quiman lamis in lalticpan hual axan unca. Innojen lapixcanijmes cate quinami Dios ilanahuatinijmes pin cielo.

<sup>40</sup> Huan quinami yehuanten quinnehiculo inminpacholimes in latocli amo cuali huan quichichinulo pin tixuxli, inon unca quinami quiman lamis in lalticpan.

<sup>41</sup> Nel ilacal in cielo niquintilanis pa temuán nolanahuatinijmes pin cielo. Huan yehuanten quinnehicusi moxtin hual cate capa Dios huelitía, moxtin hual quinmijlaculo oc sequin ilaixpan Dios. Quema, huan quinnehicusi yehuanten hual yulilo quichijtcate amo cuali.

<sup>42</sup> Quinlasasi ca capic panusi lacocoltilisli hual quincocoltis quinami tixuxli. Nepa choca huan lacuajcualo ca inminlames pampa quincocúa niman míac.

<sup>43</sup> Cuaquín quinpanus len niman cuali Dios ilacames hual yihual quinmitas amo quipixtcate laijlaculisli nindeno. Quema, Dios ilacames nesis ca mochi Dios ilaixpelalisli cualtichin capa Dios inminTajtzin huelitía. ¡Ma quicaqui inon aquí yes huil lacaqui!

*In hual cataya lalatili hual ipati niman míac*

<sup>44</sup> Dios ilahuelilitisli unca quinami len hual ipati niman míac huan unca lalatili pin se cuajmili. Quiman se lalac quita capa unca lalalpachuli, mocuepa quilatía. Cuaquín yahui pa quinamacas mochi hual quipía pa yoje huil mocuhuilis in cuajmili. Mocuhuilis quipixtica míac paquilisli pampa quitac in hual ipati niman míac.

*Se tixcalito hual ipati niman míac*

<sup>45</sup> Noje, sinda se quinequi caya capa huelitía Dios, yihual unca quinami se lanamacani hual yajtinemi quintemujtica tixcalitos hual ipatilo míac pa mocuhuilis.



<sup>46</sup> Huan quiman in lanamacani quita se tixcalito hual ipati niman m'iac, cuaquín yahui, quinamaca mochi hual quip'ia huan mocuahuil'ia in tixcalito ca in tomin hual quilaxlahuiloaya pa mochi hual quinnamaquiltic.

*In latzojuini hué ca michimes*

<sup>47</sup> 'Ca oc se lapuhualisli, Dios ilahueliltilisli huil moita quinami se latzojuini niman hué pa michimes hual quilasalo pan al huejcalan huan quinmana michimes huejué huan tijtipichin.

<sup>48</sup> Tentica in latzojuini ca michimes, quitilanaló pa itenco in al huejcalan. Molalilo, quinnehiculo in michimes cuajcuali, quinlalijtcate pa chiquihuimes. Huan quinlasalo in michimes amo cuajcuali.

<sup>49</sup> Inon unca quinami yes quiman lamis in lalticpan. Hualasi Dios ilanahuatinijmes pin cielo huan quinxilus yehuanten hual amo yulilo cuali pa camo cayasi ca yehuanten hual yulilo quinami Dios quinequi.

<sup>50</sup> Huan quinlasasi yehuanten hual yulilo amo cuali ca capic amo quiman laquisasi panusi lacocoltilisli, quincocoltis quinami tixuxli. Nepa moxtin chocasi huan lacuajcuasi inminlames pampa quincocúa niman m'iac.

*Jesús lamaxt'ia ca in hual yajyancuic huan in hual moviejojt'ic hual ipatilo m'iac*

<sup>51</sup> Jesús quinm'ic:

—¿Axan anquimati len quinequije quijtuje mochi innojen?

Quilijque:

—Quema, Tata.

<sup>52</sup> Cuaquinon quinm'ic:

—Dios ilajtol hual quijtuc pa yina unca Dios ilajtol hual moviejojt'ic. Huan in lajtol hual lanextil'ia quinami Dios huelit'ia unca ilajtol yancuic. Sinda anquimati len quinequilo quijtulo mochi innojen, yoje huil anquimatis quinami unca ca se hual quimaxt'ia ilajtol Dios huan noje unca lamaxt'ili pa quimatis quinami Dios huelit'ia axan. Se hual unca quinami in lalcal quimati lamaxt'ia ca lajtol hual quijtuje pa yina huan ca lajtol yancuic. Yihual quinami se hual quip'ia cali hué capa quip'ia la'ajcoquili innojen lachihuali pa yina huan innojen hual yajyancuic hual ipatilo m'iac. Huan in lalcal quimati quinquixt'ia innojen quiman quinequi quintequipanúa. Huan jan yoje yihual hual quimati Dios ilajtol hual quijtuc pa yina huan ilajtol yancuic quimati quitequipanúa quiman quinequi lamaxt'ia.

*Jesús yahui paxalúa pa Nazaret*

(Mr. 6:1-6; Lc. 4:16-30)

<sup>53</sup> Quiman panuc inon huan lamic quinlaquetzilic Jesús innojen lapuhualisli calica lamaxtitataya, mohuicac, canac ojli.

<sup>54</sup> Ajsic pa yihual ilali capa moscaltic quiman yec xolol. Pehuac quinmaxtic pa inmintiopan capa momaxtilo in judíos. Huan moitaloaya ca lamajtilisli pampa in hual quimaxtiaya, quילוaya:

—¿Capa canac in lalcal in lajmatilisli? ¿Quinami huil quinch'ia mochi innojen hual techlachialtilo ca lamajtilisli?

<sup>55</sup> Yihual jan ixól in carpintero san. Huan inantzin itoca María, huan motocalo icn'ian Santiago huan José huan Simón huan Judas.

<sup>56</sup> Huan icn'ian sihuames chantilo moxtin ca tehuanten. ¿Capa quinmanac in lalcal mochi innojen hual huil quinch'ia?

<sup>57</sup> Huan amo quixtocaloaya, quixixxiculoaya Jesús. Pampín yihual quinm'ic:

—Ca capic yes yahuis se ilajtuni Dios, quimatilo momajtilo ilaixpan yihual. Ma yoje, quiman unca capa yehuanten pa icaltilan huan pin cali capa chantilo icnían, amo quimatilo momajtilo ilaixpan.

<sup>58</sup> Huan pampa yehuanten amo quineftocaloaya, Jesús amo quinchíac míac lachihualisli huejué nepa.

## 14

### *Herodes quimictía Juan Lacuayatequini*

*(Mr. 6:14-29; Lc. 9:7-9)*

<sup>1</sup> Pa innojen tonalijmes, quicaquic Herodes quinami molaquetzililoaya moxtin inahuac mochi hual quichihuaya Jesús. In Herodes huelitiaya pin lalticpan Galilea.

<sup>2</sup> Quinmilic yehuanten hual quitequipanuililoaya, quil:

—Niquijtúa in Jesús neli yes Juan Lacuayatequini. Mas que miquic Juan, axan yultica oc sejsa. Huan pampa yultica oc sejsa, quipía lahueliltisli pa quinchías mochi innojen hual quinmolachialtilo lacames ca lamajtilisli.

<sup>3</sup> Yojque quijtuc Herodes, pampa quiman ayamo quimatic Herodes in hual Jesús quinchihuaya, latilanic pa quiquitziilosquiaya Juan pa quilpilosquiaya ca teposli huan pa quitzacualosquiaya pin calijtic. Herodes quichihuilic yojque pa quipaquiltisquiaya Herodías. In Herodías yec isihua Felipe hual yec icni Herodes.

<sup>4</sup> Huan Herodes latilanic pa Juan yes latzacuali pin calijtic pampa Juan quilic:

—Amo unca moyaxca pa anyulis huan yihual, pampa yihual isihua mocni.

<sup>5</sup> Yoje, mas que Herodes quinequiaya latilani pa quimictilosquiaya Juan, yihual momajtic pampa cualanilosquiaya in lalalera. Yehuanten quimatiloaya Juan yec ilajtuni Dios.

<sup>6</sup> Ma yoje, pa in tonali quiman quipialoaya fiesta (ilhuil) pa Herodes pa quijnamiquilosquiaya quiman lacatic, cuaquín Herodías ixolol sihual mijtotic inminlaixpan yehuanten hual quinnotzaje pa hualasi pa in fiesta. Huan Herodes quixtocac quinami mijtotic.

<sup>7</sup> Pampa inon quimacac ilajtol pampa quimacasquiaya len yes quilajlanisquiaya.

<sup>8</sup> Herodías inantzin in xolol sihual quilic ixolol quiman lamic mijtotic pa quilajlanisquiaya Herodes pa quimacasquiaya itzontecon Juan Lacuayatequini pan se xicali. Yojque quichíac in muachita quinami quilic inantzin.

<sup>9</sup> Cuaquín in hué Herodes icnotic míac. Ma yoje latilanic pa quihualiquililosquiaya. Quichíac yojque pampa quimacac ilajtol. Huan yehuanten hual quinnotzaje pa in fiesta quicaquije quiman quimacac ilajtol.

<sup>10</sup> Yoje, quitilanic se guache pa quicotonilisquiaya iquixlan Juan capa cataya latzacuali calijtic.

<sup>11</sup> Huan quihualiquilic itzontecon pan se xicali, huan quimacac in muachita huan yihual quihuiquilic inantzin.

<sup>12</sup> Cuaquín hualaje pin calijtic Juan imonextiliniijmes, canaje in mijquil huan quialtocaje. Cuaquínon uyaje quipuhuilije Jesús len panuc.

### *Jesús quinlacualtía macuili mil lacames*

*(Mr. 6:30-44; Lc. 9:10-17; Jn. 6:1-14)*

<sup>13</sup> Quiman Jesús quimatic inon, yihual mohuicac pan se barquito, uyajtiac pa capa amaqui chantiaya. Huan quiman quimatije in lalalera ca capic uyac Jesús, cuaquín quitocaje nejnentiyahuiloaya pa ojli.

<sup>14</sup> Huan quisac Jesús pin barquito, quinmitac lalalera, je lanechiculislí hué. Quinmicnilic yehuanten huan quinpajtic in cocoxquimes hual ca yehuanten cataloaya.

<sup>15</sup> Hualaje pin barquito ca Jesús imonextiliniymes. Quiman tiolactic, yehuanten hualaje ca yihual, quilije:

—Nican ticate capa amaqui chanti, huan axan panuc in semilhuil, monequi pa tilacuasi. Xiquinmili in lalalera pa mohuicasi, yoje huil yasi pa in calimes pa mocuhuilisi len quicuasi.

<sup>16</sup> Jesús quinmilic:

—Amo monequi pa mohuicasi. Amhuanten xiquinmacacan len quicuasi.

<sup>17</sup> Quilije:

—Nican ticpialo jan macuili panes pa quincuasi huan ome michimes san.

<sup>18</sup> Quinmilic:

—Xichualiquilican nican.

<sup>19</sup> Cuaquinon quinmilic in lalalera pa molalilosquiaya pani pin ixlán (ixlahuayan) capa cataya míac sacal. Quinmanac innojen macuili panes chicuenta tzopimes huan innojen ome michimes, lachíac pa in cielo (ilhuicac), quisehuic Dios. Cuaquín quinlapanac in panes, quinmacac imonextiliniymes, huan yehuanten quinxiluilije mochi seise innojen míac lacames.

<sup>20</sup> Moxtin lacuaje huan pachihuije. Quinpejpenaje mochi in lajlajco hual mocahuaje huan quintemiltije doce (majlaclihuanome) chiquihumes.

<sup>21</sup> Cataloaya cinco (macuili) mil lacames hual lacuaje huan amo quinpuhuaje in sihuames huan xolotzitzindis hual noje lacuaje huan pachihuije.

*Jesús nejnemi pani in al*  
(Mr. 6:45-52; Jn. 6:16-21)

<sup>22</sup> Jan ajnaxcan, Jesús quinmilic imonextiliniymes pa lejculosquiaya pan in barquito pa quipanahuísi quilaicanticate yihual ca yoje itenco (analco) in al huejcalan. Huan yihual yahuiaya mocahua pa quinmilisquiaya in míac lacames pa mohuicalosquiaya.

<sup>23</sup> Quiman quinmilic pa mohuicalosquiaya, yihual panquisac se loma (tepetzindi) ihuían pa quilajlanisquiaya Dios. Huan quiman layuajtic, nepa mocahuac ihuían.

<sup>24</sup> In barquito axan cataya lajco pin al huejcalan, majcoquiaya in al huan quihuixuaya in barquito, pampa iyecatataya inminpan yehuanten.

<sup>25</sup> Huan pa cualcan, uyac Jesús capa yehuanten cataloaya, nejnentiahuiaya pani in al.

<sup>26</sup> Quiman quitaje imonextiliniymes Jesús nejnentiahuiaya pani pin al, momajtije niman míac, tzajtziye:

—¡Unca se temajquil! —huan tzajtziye ca momajtilisli.

<sup>27</sup> Jan axcan Jesús quinnotzac, quinmilic:

—¡Amo xicmacajsican! ¡Nehual niunca, amo ximomajtican!

<sup>28</sup> Cuaquín Pedro quinanquilic:

—Tata, sinda tehual tiunca, xichili pa nehual nihuala capa tehual pani pin al.

<sup>29</sup> Huan Jesús quilic:

—Xihuala.

Cuaquinon quisac Pedro pin barquito, nejnemic pani pin al pa yasquiaya capa Jesús.

<sup>30</sup> Ma yoje, pehuaya quita quinami chichahuac iyecatataya, huan quimacajsic, pehuac moijsimac. Jan axcan quitzajtzilic Jesús, quilic:

—¡Tata, xichquixti, nipolejtica!

<sup>31</sup> Huan jan axcan quixilanic Jesús imajma, quiquitzquic huan quilic:  
—¡Amo tichneltoca jan nadita san! ¿Leca ticmahuiliaya pampa tiahuiaya timoatocti?

<sup>32</sup> Quiman lejuje pin barquito laijitc, mosehuic in iyyecal.

<sup>33</sup> Huan yehuanten hual cataloaya pin barquito quimolancuacuetzilije Jesús, quilije:

—Neli tehual tiDios iXól.

*Jesús quinpajtía yehuanten de Genesaret*  
(Mr. 6:53-56)

<sup>34</sup> Quiman quipanahuije in al huejcalan, ajsije pa in lali itoca Genesaret.

<sup>35</sup> Huan quiman quitaje yehuanten hual yuliloaya nepa, quiximatije, huan lanahuatije pa mochi itenco in lali pampa axan cataya nepa Jesús. Huan quihualiquilije moxtin in cocoxquimes.

<sup>36</sup> Quilajlanije pa quinmacahuiltisquiaya pa in cocoxquimes jan quimatalosquiaya ilatemijmiluli inahuas. Huan pajtije moxtin hual quimato-  
caje.

## 15

*Jesús quinmilía in hual quichihualo yehuanten hual Dios amo quita cuali*  
(Mr. 7:1-23)

<sup>1</sup> Cuaquinon hualaje capa Jesús sequin ilamaxtinijmes in lajtol hual quin-  
nextía quinami quimolancuacuetzililo Dios in judíos. Hualaje ca in fariseos,  
chantiloaya pa Jerusalén, quilije:

<sup>2</sup> —¿Leca tiquinmaxtía momonextilinijmes pa como quineltocasi in laj-  
tomes hual techmacaje totajtztzian? In lajtol hual techmacaje yehuanten pa  
yina quijtúa pa se quinpacas imajmajuan pa yoje quinquixtilisi imajmajuan  
ilajlaculisi. Monequi pa quinpacas quiman yalo lacuálo. Huan momonex-  
tilinijmes amo quichihualo yoje.

<sup>3</sup> Jesús quinnanquilic:

—Huan amhuanten, ¿leca anyultía amo anquineltocatica len Dios an-  
mitzilic pa anquichías? Yihual amo anquineltoca, huan ma yoje, anquinel-  
toca in lajtomes hual anmitzmacaje anmotajtztzian pa yina.

<sup>4</sup> Dios anmitzilic: “Xicmatican ximomajtican inminlaixpan motajtzin  
huan monantzín.” Huan: “Aquí yes quilis amo cuali itajtzin o inantzín,  
cuaquinon ma quitilanican pa yehuanten hual quipialo lahuelilitilisi pa yes  
lamictili.”

<sup>5-6</sup> Huan amhuanten anquijtúa pampa se lalac amo quipía pa quinpalehuis  
itajtzin huan inantzín, mas que yoje quimati momajtía se inminlaixpan  
yehuanten. No, in lajtol hual anmitzmacaje pa yina anmotajtztzian quijtúa  
pampa sinda se lalac quichías huendi ca mochi hual quipía pa yoje yes iyaxca  
in tiopan quiman miquis in lalac, cuaquín amo huil quinpalehuis itajtzin  
huan inantzín ca itomin pampa axcan unca huendi. Ma yoje in lalac huil  
mopalehuía ca itomin hual monechiculía yoje. San amo huil quimaca oc se  
hual quinequi pa se quipalehuis, mas que cuajnesi yesi itajtztzian. Yoje,  
quiman anquineltoca inminlajtomes anmotajtztzian pa yina, anquijlacúa  
len Dios quijtuc pa anquichías.

<sup>7</sup> Amhuanten anyuli anislatatijtica. Anquinequi pa annesis cuali in-  
minlaixpan oc sequin, huan pa anmoyolo anquijtúa len amo cuali. Isaías  
ilajtuni Dios quijtuc melahuac anmonahuac amhuanten. Pa yina quijcuiluc  
quinami ancayas amhuanten hual anyuli axan, quijtuc, quil:

<sup>8</sup> In lacames lajtulo quinami neli nechlasojlalo, mas que amo nechlasojlalo. Nejchihuilía lamajtilisli jan ca len quijtulo.

Ma yoje, pa inminyolo amo nechlasojlalo huan amo nejchihuililo lamajtilisli.

<sup>9</sup> Quiman nechmolancuacuetzililo, yoje islacatilo.

Amo quinpalehuía inminyolo pa yesi cuali.

Yehuanten inminlamaxtilisli unca len jan lacames san quijtulo mas que yehuanten quijtulo pampa unca len quijtúa Dios.

Yoje quijtuc Isaías.

<sup>10</sup> Cuaquinon Jesús quinnotzac in lalacera pa hualalosquiaya capa yihual huan quinmilic:

—Xijcaquican inon huan xicmatican len quinequi quijtúa.

<sup>11</sup> Dios amo quita se lalac amo cuali pampa calaqui len pa icamac se. Quita amo cuali se lalac pampa in hual quisa pa icamac.

<sup>12</sup> Cuaquinon hualaje imonextilinjmes, quilije:

—¿Ticmati pampa niman amo quixtocaje in fariseos quiman quicaquije in hual tiquiqtuc?

<sup>13</sup> Jesús quinnanquilic:

—Yes lacapunali mochi pacholi hual amo quitocac noTajtzin hual unca pin cielo. In fariseos ca inminlamaxtilisli cate quinami pacholimes hual amo quintocac noTajtzin.

<sup>14</sup> Xiquincahuacan. Yehuanten cate quinami pachacames hual quinalcanalo oc sequin pachacames. Huan sinda se pachacal quilaicana oc se pachacal, in omenten huetzisi pin coyunquil.

<sup>15</sup> Cuaquinon Pedro quilic:

—Xitechili tehuanten len quinequi quijtúa in lamaxtilisli hual unca pin lapuhualisli.

<sup>16</sup> Huan Jesús quinmilic:

—¿Amhuanten noje ayamo anquipía lajmatilisli pa anquimatis len quinequi quijtúa nolapuhualisli?

<sup>17</sup> ¿Ayamo anquimati pampa len yes hual quilalía se pa icamac pa quicuas panúa pa iyolo huan cuaquin quisa quiman yas pa sacatilan?

<sup>18</sup> Ma yoje, innojen hual quisalo pa se icamac, niquiqtúa, in lajtomes hual quiqtúa se, innojen quisalo pa iyolo. Huan unca pampa inon hual quiqtúa se lalac hual Dios quita amo cuali.

<sup>19</sup> Unca pampa pa se iyolo quisalo lajtulisli amo cuajcuali. In lajtulisli quichías pa se canas isihua oc se. Quichías pa se quinmanas sihuames amo pa monamictis. Quichías pa laixtequis. Quichías pa quiqtus len amo unca melahuac inahuac oc se quiman quilajlanilo. Quichías pa quinlatilis in hual unca melahuac pa como quimatisi yehuanten hual lalajlanilo. Quinchías pa quinhuejuecaltis Dios huan lacames.

<sup>20</sup> Innojen cate hual Dios amo quitas cuali ca se lalac hual quinchía. Quijilacusi sinda quichía innojen se lalac. Dios amo yahui quiqtúa pampa se lalac amo unca cuali sinda amo mopaquilis imajmajuan yoje quinami quiqtúa anmolajtol. Amo moiqlacus sinda amo quichía inon.

*Se sihual pa oc se lali quilajlanía Jesús pa quipalehuis*

*(Mr. 7:24-30)*

<sup>21</sup> Cuaquinon mohuicaya Jesús, uyac pa in lali itenco in caltilan hué motocaya Tiro huan in caltilan hué Sidón.

<sup>22</sup> Huan cataya se sihual cananita quistihualac umpa, pehuac quitzajtzilic, quilic:

—¡Tata, tehual ti'imiahuil David, xinechicnili! Noxolol sihual niman mococua pampa se ijyecal amo cuali quichihualtítica.

<sup>23</sup> Jesús amo quinanquíllic ca se lajtol. Huan hualaje imonextilinjmes, quitemachije Jesús, quilije:

—Xicchihuili len mitztemachijtica huan xiquili ma mohuica, pampa techocatihuala.

<sup>24</sup> Huan yihual quinanquíllic:

—NoTajtzin Dios jan nechtilanic san pa niquinlaquetzilis ilajtol yehuanten hual cate judíos hual amo quipialo nolajtol. Pampín moxiluje pa camo mocahuasi pan iojli Dios.

<sup>25</sup> Cuaquinon hualac in sihual ca yihual huan quimolancuacuetzilic, quilic:

—¡Tata, xinechpalehui!

<sup>26</sup> Jesús quinanquíllic:

—Nihualaya pan lalticpan pa niquinpalehuis yehuanten pa Israel san, huan amo yesquiaya cuali sinda nicpalehuisquiaya se hual amo unca judío. Inon yesquiaya quinami nel niquinmanilisquiaya in xolomes in hual yalo quicualo huan niquinmacasquiaya in pelotzitzindis pa quicualosquiaya.

<sup>27</sup> Cuaquín in sihual quilic:

—Tiquijtúa neli, Tata. Ma yoje quincualo in pelotzitzindis in lajquitos tipichitos hual huetzilo capa lacuajtcate inmintecojuan, huan sinda unca yoje ca in pelotzitzindis, ¿amo huil tinechpalehuis jan nadita san?

<sup>28</sup> Cuaquín Jesús quinanquíllic:

—¡Ah, tuincito, ticmati tilaneltoqa niman mía! Jan quinami tichtemachic ma caya ca tehual.

Huan ixolol in sihual pajtic jan ajnaxcan.

### *Jesús quinpajtía mía lacames*

<sup>29</sup> Mohuicac Jesús, quisac pa umpa, panujtíac pa itenco in al huejcalan Galilea, cuaquín panquisac pan se loma (tepetzindi), nepa molaliaya.

<sup>30</sup> Huan hualaje capa yihual niman mía lalalera, quinhuicatataloaya ca yehuanten lacames hual quinlacoculoaya inmichihuajmes huan amo huil nejnemiloaya, lacames laculululi hual amo huil nejnemiloaya, huan pachacames huan yehuanten hual amo huil lajtuloaya huan mía oc sequin hual mococuloaya. Quinhualaloaya, quinlalije ilaixpan Jesús, huan yihual quinpajtic.

<sup>31</sup> Yoje moitaloaya ca lamajtilisli in mía lalalera, pampa quinmitaloaya lajtuticate yehuanten hual amo huil lajtuloaya quiman ajsije. Quinmitaloaya yehuanten hual ajsije laculululi huan axan mohuicaloaya ca inminmajmajuan huan inmichihuajmes jan cuali san. Quinmitaloaya nejnenticcate yehuanten hual ajsije quinlacocujtataloaya inmichihuajmes. Quinmitaloaya axan lachixticate yehuanten hual ajsije pachacal. Pampín moililoaya yehuanten quinami unca hué iDios Israel huan moililoaya pampa quiapiaya in lahuellitlisli hué.

### *Jesús quinlacualtía nahui mil lacames*

(Mr. 8:1-10)

<sup>32</sup> Cuaquinon quinnotzac imonextilinjmes pa hualasi ca yihual, quinmilic inminhuán:

—Nechcocúa noyolo mía pampa in lalalera axan cate ca nehual ye tonalijmes huan amo quipialo len quicuasi. Huan amo nicnequi niquintilanía pa mohuicasi ca mayandi, amo san gá huetzisi pan ojli.

<sup>33</sup> Quilije imonextilinjmes:

—Huan ¿capa tiquinmanasi yoje m'iac pa quicuasi pa yoje tiquinpachi-huultisi se lanechiculisli hué quinami inon?

<sup>34</sup> Jesús quinlajlanic:

—¿Quichi innojen panes chicuenta tzopimes anquipia pa quicuasi? Quilijque:

—Chicome. Huan ticpialo nadita michimes.

<sup>35</sup> Cuaquín Jesús quinmilic in lalacera pa molalisi pan lali.

<sup>36</sup> Quinmanac in chicome panes chicuenta tzopimes huan in michimes, guisehuic Dios huan quinlapanac, quinmacac imonextilinijs, huan imonextilinijs quinhuilijque in lalacera.

<sup>37</sup> Yojque quicuae moxtin huan pachihuije. Huan imonextilinijs quintemiltije chicome (siete) chiquihuimes huejué ca in lajlajco hual amo quincuae.

<sup>38</sup> Huan yehuanten hual lacuae cataloaya nahui mil lacames huan ma yoje amo quinpahuaje in sihuames ca inminxolotzitzindis hual noje lacuae.

<sup>39</sup> Cuaquinon Jesús quinmilic yehuanten pa mohucasi. Huan umpa canac se barquito huan yihual huan imonextilinijs quipanahuije in al huejcalan, ajsije pa in lali capa cataya in caltilan motocaya Magadán.

## 16

### *Quilajlanilo pa Jesús quinnextilis len hual quinmahuisultis ca lamajtilisli (Mr. 8:11-13; Lc. 12:54-56)*

<sup>1</sup> Hualaje capa yihual yehuanten hual quitocaje inminlamaxtilisli in fariseos huan inminlamaxtilisli in saduceos. Quitemuajtaloaya quinami quichihuililosquiaya Jesús pa quinnextilis quinami yihual quipiaya Dios ilahuelilitisli. Quitemachije pa quinchihuilis se ilanextilisli in lahuelilitisli.

<sup>2</sup> Huan Jesús quinnanquilic:

—Quiman tiolactia, anquijtua: “Mosta lapuhuis, pampa in cielo unca chichiltic quinami in tixuxli.”

<sup>3</sup> Lanesi, huan anquijtua: “Axan quiahuis pampa chichiltic unca in cielo, laticumactia.” ¡Lacuajcuamananijs amhuanten! Anquimati len quinequi quijtua quinami nesilo in cielos (ilhuicac), huan amo huil anquimati len quinequilo quijtulo innojen hual panujticate nican pan lalticpan quiman nehual niunca nican. Innojen cate ilanextilisli innojen tonalijs.

<sup>4</sup> Lacames amo cuajcuali hual amo cate cuajcuali pa inminyolo ca Dios, yehuanten quitemulo se lanextilisli. Ma yoje, quipiasi san ilanextilisli Jonás ilajtuni Dios.

Cuaquín quincahuac, uyac.

### *Inminlaxocoyajquil in fariseos hual quitequipanulo (Mr. 8:14-21)*

<sup>5</sup> Quiman uyaje imonextilinijs pa yojque itenco (analco) in al huejcalan, quilcahuaje quihuicaje pan.

<sup>6</sup> Huan quinmilic Jesús:

—Xicpiacan ca lailalisli in laxocoyajquil hual quipialo in fariseos huan saduceos.

<sup>7</sup> Cuaquín molaquetzilije yehuanten, quijtuje:

—Unca pampa amo ticualicaje len pa tijcuasi. Pampín techilijtica inon.

<sup>8</sup> Quiman quimatic Jesús len quijtuloaya, quinmilic:

—¿Leca anmolaquetzilijtica amhuanten? ¿Amo anlaneltoaca nadita san? ¿Leca anmolaquetzilijtica ca amhuanten pampa amo anquipia pan?

<sup>9</sup> ¿Ayamo anquimati huan ayamo anquijnamiquía in macuili panes calica niquinlacualtic in macuili mil lacames? ¿Quichi chiquihuimes anquintemiltic ca in lajquitos hual quincahuaje?

<sup>10</sup> Huan ¿amo anquijnamiquía in chicome panes calica niquinlacualtic in nahui mil lacames huan quichi chiquihuimes huejué anquintemiltic ca in lajquitos?

<sup>11</sup> ¿Quinami amo anquimati pampa amo annimitzlaquetziliz de len tijcuasi? Nicnequiaya niqijtu xicpiacan laitalisli inahuac inminlaxocoyajquil in fariseos huan in saduceos.

<sup>12</sup> Cuaquinon quimatije len quinequiaya quijtu. Amo quinmilic pa quipialosquiaya laitalisli pa ilaxocuyajquil in pan. Quinmilic pa quipialosquiaya laitalisli pa inminlamaxtilisli amo cuali in fariseos huan in saduceos.

*Pedro quijtúa pampa Jesús unca in Cristo*

*(Mr. 8:27-30; Lc. 9:18-21)*

<sup>13</sup> Quiman ajsic Jesús pa itenco in caltilan Cesarea de Filipo, quinlajlanic inonextilinijmes, quinmilic:

—¿Aqui quijtulo lacames pampa nehual ilacal in cielo niunca?

<sup>14</sup> Huan quilije:

—Sequin quijtulo pampa tJuan Lacuayatequini, oc sequin quijtulo tehual Elías, oc sequin quijtulo pampa tehual tijeremías o se ca ilajtunijmes Dios hual yultica oc sejpa.

<sup>15</sup> Quinmilic:

—Huan amhuanten, ¿aqui anquijtúa pampa nehual niunca?

<sup>16</sup> Quinanquilic Pedro, quilic:

—Tehual tiunca in Cristo ixolol Dios hual yuli.

<sup>17</sup> Quinanquilic Jesús quilic:

—Dios mijchiuilic cuali tehual, Simón ixól Jonás, pampa amo mitzlamachiltije inon lacames hual jan lacatije nacal huan esli. Cataya noTajtzin hual unca pin cielo hual mitzlamachiltic.

<sup>18</sup> Huan nimitzilía pampa tehual tiPedro hual tiunca quinami se tixcali hué. Huan pan ipampa in tixcali hué, nehual niqinmiactis yehuanten hual nechneftocaló pa yesi nolacames. Huan mas que miquisi, ma yoje in miqulislis amo quiman huil quinsulahua yehuanten.

<sup>19</sup> Huan nimitzmacas pa yes moyaxca pa tiquinlapulis pa calaquisi capa unca ilahuelilitisli in cielo nican pan lalticpan. Len yes amo ticmacahuiltis pan lalticpan, in amo unca lamacahuiltisli pin cielo. Huan len yes ticmacahuiltis pan lalticpan, in unca lamacahuiltisli pin cielo.

<sup>20</sup> Cuaquinon quinmilic chicahuac in monextilinijmes pa camo quilisi amaqui pampa yihual in Cristo.

*Jesús quinmachiltía pampa yalo quimictilo*

*(Mr. 8:31-9:1; Lc. 9:22-27)*

<sup>21</sup> Cuaquinon pehuac quinmilic Jesús quinami quiapiaya pa yahuis pa Jerusalén pa panus míac lacocoltilisli hual yahuiiloaya quichihuilito in abuelojmes huan in tiopistas huejué huan in lamaxtinijmes. Cuaquinon yahuiiloaya quimictilo. Huan quiman panuloaya ye tonalijmes, quil, yihual yahuiaya yuli oc sejpa.

<sup>22</sup> Cuaquin Pedro canac, quihuicac ca yihual inahuac, pehuac la'ajuac, quilic:

—Ma camo quimacahuilti inon Dios, Tata. Ma camo quiman mitzpanu inon.

<sup>23</sup> Huan momalinac Jesús, quilic Pedro:



—¡Xiquisa nonác nehual ca yoje, Satanás!, pampa tichcuejsutica. Amo tilajtutica pa moyolo quinami Dios lajtúa. Jan tilajtúa pa moyolo quinami lacames san.

<sup>24</sup> Cuaquinon Jesús quinmilic imonextiliniymes:

—Sinda se quinequi nechtoca pa yes nomonextilini, ma mocahua pa quichías san in hual quinequi quichía. Ma nechtoca nehual, huan ma momacahuiltili pa miquis quinami nehual nimiquis.

<sup>25</sup> Yihual polehuis aquí yes quinequi mopilía iyulilisli. Huan aquí yes quipolus iyulilisli pampa unca se nolacal quinami moxtin nolacames, yihual mopilis iyulilisli.

<sup>26</sup> ¿Len quipías se lalac cantica mochi hual unca pin lalticpan sinda yoje quipolus iyulilisli? Huan sinda quipolus iyulilisli, amo huil canas oc sejpa mas que quilaxlahuis míac pa canas.

<sup>27</sup> Nehual ilacal in cielo nihualas ca ilaixpelalisli cualtichin huan ichicahualisli hué noTajtzin, ca ilanahuatinijmes pin cielo nihualas. Cuaquín niclaxlahuis mochi sejse pa mochi quichihualoaya pan lalticpan.

<sup>28</sup> Neli annimitzilía pampa sequin hual nican moqueztcate yulisi pa nechitasi nehual ilacal in cielo nihualajtica ca nolahuellitlisli cualtichin, yoje ninesis quiman nihuelitis. Quema, ayamo miqisi, huan nechitasi yoje nihualajtica.

## 17

### *Jesús mopala inminlaixpan in yeyenten imonextiliniymes*

(Mr. 9:2-13; Lc. 9:28-36)

<sup>1</sup> Huan quiman panuje seis (chicuase) tonalijmes, Jesús quinhuicac Pedro huan Jacobo huan Juan icni Jacobo, uyaje inminhuían. Panquisaje se loma (tepel) niman cuajtíc.

<sup>2</sup> Huan nepa mopalac inminlaixpan, pehuaya nesi ca oc se lanextilisli. Laixpelaya iixco quinami in tonali, huan inahuas mochiac iztac laixpelataya.

<sup>3</sup> Huan ¡xiquita!, moitilije ca yihual Moisés huan Elías laquezatataloaya ca yihual.

<sup>4</sup> Cuaquinon Pedro quilic Jesús, quil:

—Tata, junca cuali pampa ticcate nican! Sinda ticnequi, ma tiquinchiuacan ye calitos ca cuahuimes huan isacayo, se pa tehual huan se pa Moisés huan se pa Elías.

<sup>5</sup> Ayamo lamiaya laquetza Pedro huan quitaloaya quinpachujtataya se mextemil laixpelajquil huan quicaquije se lajtol quistataya pin mextemil hual quiqtuaya:

—In noxolol nolasojli, hual ca yihual nicpía paquilisli. Xijcaquican yihual.

<sup>6</sup> Quicaquije inon in monextiliniymes, huan huetzije pa inmixco pan lali huan quimacajsiloyaya míac.

<sup>7</sup> Cuaquinon ajsic Jesús, huan quinmatocac, quinmilitataya:

—Ximoquetzacan huan amo xicmacajsicán.

<sup>8</sup> Quinlapuje inmixtololojmes, amo quitaje amaqi, jan Jesús ihuían san.

<sup>9</sup> Quiman temujtiahuiloyaya pan in loma cuajtíc, quinmilic Jesús, quil:

—Amo xiquilican amaqi hual Dios anmitzitalic nepa. Quiman niyulis oc sejpa, nehual ilacal in cielo, cuaquín xiquinmilican.

<sup>10</sup> Cuaquinon imonextiliniymes quilajlanije Jesús, quilije:

—¿Leca quiqtulo in lamaxtinijmes pampa quipías pa hualas Elías, huan cuaquín hualas in Cristo?

11 Jesús quinnanquilic:

—Neli hualas Elías quilaicantica huan quimelahuas mochi.

12 Ma yoje, annimitzilia pampa hualac Elías huan amo quinequije quis-lacuje. San quichihuilije len quinequije. Huan noje nejchihuilisi yojque nehual ilacal in cielo. Nejchihuilisi pa nipanun lacocoltisli.

13 Cuaquinon quimatije imonextilinjmes pampa quinnmiliaya Jesús pampa in Elías hual yihual quinlaquetziliaya yec Juan Lacuayatequini.

*Jesús quipajtía se xolol hual se ijyecal quicocoltiaya*

(Mr. 9:14-29; Lc. 9:37-43)

14 Quiman ajsije ca capic cataloaya in míac lacames, ajsic se lalac ca Jesús, quimolancuacuetzilic huan quilic:

15 —Tata, xichicnilili noxól. Mococúa míac pampa in ijyecal quiquitzquía. Itequi quiquitzquía huan sejpga huan oc sejpga míac huetzic pin tixuxli huan pa al.

16 Niqhualiquilic momonextilinjmes huan amo huil quipajtije.

17 Jesús lananquilic:

—¡Ay, lacames hual amo laneltocalo huan lacuilmatilo! ¿Quiman yajmo nicayas ca amhuanten? ¿Quiman yajmo monequi pa nimopeñialtis pa huil niyultías ca amhuanten? Xichualiquilican nican in xolol.

18 Cuaquinon Jesús cajuac huan quitojtocac in ijyecal, quinahuatlic pa quisasquiaya. Yoje quisac huan mocahuac lapajtili in xolol jan axcan.

19 Quiman panuc inon, hualaje ca Jesús ihuían imonextilinjmes, quila-jlanije:

—¿Leca amo huil tijquixtilije tehuanten in ijyecal amo cuali?

20 Quinnanquilic:

—Cataya pampa amo anquilalía míac laneltocalisli ca Dios. Annimitzilia neli, sinda anquipiaya laneltocalisli nadita quinami unca tipichin se ilatocli mostaza, cuaquín anquiliaya in loma (tepel) hué: “Ximijcuani capa tianca nepa huan xía ca umpic”, cuaquín mijcuaniaya in loma. Yoje amo unca nindeno hual amo huil anquichía sinda anquilalía anmolaneltocalisli ca Dios.

21 Ma yoje, ijyecames amo cuajcuali quinami innojen huil quiquixtilía se jan sinda se quitemachía Dios huan mosahua.

*Jesús quinmachiltía oc sejpga quinami yahui miqui*

(Mr. 9:30-32; Lc. 9:43-45)

22 Yajtiahuloaya inminhuían pa in laticpan Galilea. Huan Jesús quinmilic quinami lacames yahuloaya quitemacalo yihual ilacal in cielo, yahuloaya quitemacalo ca lacames hual yahuloaya quimictilo.

23 Huan quiman panuje ye tonalijmes quiman lamije quimictije, quil, yihual yahuiaya yuli oc sejpga. Quicaquije inon, icnotiaje niman míac imonextilinjmes.

*Jesús quilajlanic Pedro inahuac ilapixcalisli in tomin pa in tiopan*

24 Ajsije Jesús huan imonextilinjmes pa Capernaum, hualaje yehuanten hual quitemachiloaya ilapixcalisli in tomin pa in tiopan. Hualaje quitaje Pedro, quilajlanije:

—¿Amo quilaxlahuía molamaxtini in tomin pa in tiopan?

25 Pedro quilic:

—Jo quema.

Cuaquinon quiman calaquic Pedro calijtic, Jesús pehuac quilaquetzilic, quilic:

—¿Quinami tiqijitúa, Simón? ¿Aquinojen quinlajlanilo ilapixcalisli in tomin in huejueyenten pin lalticpan? ¿Inminxolomes o yehuanten hual amo chantilo pa inmincali?

<sup>26</sup> Pedro quinanquilic:

—Yehuanten hual amo chantilo pa inmincali.

Huan Jesús quilic:

—Cuaquinon, inminxolomes amo quipialo pa laxlahuisi.

<sup>27</sup> Ma yoje, amo ticnequilo tijcualantilo amaqui. Pampín, xía pa in al huejcalan huan xiclase se laquixtini. In michin hual jan ajnaxcan leycus, inon xijquixti. Xiclapu icamac huan nepa laijtíc tiquitas se tomin hual yes pa quichi monequis pa ilapixcalisli in tomin. Xicuica huan xiquinmaca pa titechlaxlahuilis tehual huan nehual.

## 18

*¿Aqui unca in se hual yes in hué ca in monextiliniymes?*

*(Mr. 9:33-37; Lc. 9:46-48)*

<sup>1</sup> Pa nepa in tonali hualaje imonextiliniymes capa Jesús quilijtcate:

—¿Aqui cayas in hué pa ilahuelilitlisli in cielos hual quinlaicanas moxtin in oc sequin?

<sup>2</sup> Cuaquín Jesús quinotzac pa hualas se xolol, quialic lajco capa yehuanten.

<sup>3</sup> Quinmilic:

—Annimitzilía neli, sinda amo anquipala anmoyolo huan anmochía quinami xolomes, amo quiman ancayas capa unca ilahuelilitlisli in cielo.

<sup>4</sup> Aquí yes hual mochía tipichin pa ilajnamiquilisli quinami in xól, yoje in se yes hué. Huan in oc sequin hual amo mochihualo tijtipichin amo cayasi yoje hué pa ilahuelilitlisli in cielos.

<sup>5</sup> Huan aquí yes quinamiquía ca lasojlalisli se xól quinami in xól huan quinamiquía pampa quimatí momajtía pampa nicpía lahuelilitlisli, cuaquín yoje nechnamiquía nehual.

*Unca laijlaculisli sinda se quilaicana oc se pa quichías laijlaculisli*

*(Mr. 9:42-48; Lc. 17:1-2)*

<sup>6</sup> Huan sinda se quilaicanas pa quichías laijlaculisli se xolol hual nechnel-toca, cuaquín cataya cuali sinda cataya lapiluli pa iquixlan se melapili hué huan cataya la'atoctili lajco pin al huejcalan.

<sup>7</sup> ¡Cayas míac lacocoltisli pa yehuanten hual quinlaicana oc sequin pa quichihuasi laijlaculisli! Amo quiman mocahuas pa cayasi lacames quinami yehuanten. Ma yoje, ¡quichi yahui panúa lacocoltisli in se hual quilaicanas oc se pa quichías laijlaculisli!

<sup>8</sup> Pampín, sinda mijchihualtía amo cuali momajma o mocxían, ximoc-tonili, xiclase pa camo cayas capa tehual. Sinda tipehuaya ticpía in yulilisli hual amo quiman lamis ca jan se momajma san o jan se mocxían san, ma yoje, cuali cataya pa tehual. Sinda Dios mitzlasaya pin coyunquil milintica ca tixuxli hual amo quiman sehuis, inon neli cataya niman amo cuali pa tehual, mas que tiquinpiaya ome momajmajuan huan ome mocxían.

<sup>9</sup> Huan sinda mijchihualtía laijlaculisli moixtololon, ximoquixtili huan xiclase pa camo cayas capa tehual. Sinda tipehuaya ticpía in yulilisli hual amo quiman lamis ca jan se moixtololon san, ma yoje, pa tehual inon cataya niman cuali. Cataya niman amo cuali sinda ca ome moixtololojmes Dios mitzlasaya pin coyunquil milintica ca tixuxli hual amo quiman sehuis.

*In borrego hual mopoluc*

(Lc. 15:3-7)

<sup>10</sup> Ximolachilcan cuali pa camo quiman anquitzías se ca in tijtipichin quinami se hual amo monotza, pampa annimitzilía Dios noTajtzin quin-lalic miac ilanahuatinijmes pin cielo pa quinmiztialo. Huan yehuanten in lanahuatinijmes mochi tonali quizticate iixco Dios pin cielo pa quimachiltisi mochi in amo cuali hual quinpanus innojen xolomes.

<sup>11</sup> Nehual ilacal in cielo, nihualaya pan lalticpan pa nijquixtis pin polehuilisi aqui yes hual mopoluc.

<sup>12</sup> ¿Len anquijtúa inahuac inon? Sinda se lacal quinpiá cien borregos huan se ca innojen mopolúa, cuaquín ¿amo quincahuas in noventainueve pin latzacuali huan yas quitemus in se hual mopoluc? Quema.

<sup>13</sup> Huan sinda quipanúa quita in borrego, annimitzilía neli yihual cayas ca miac paquillisli ca in borrego. Amo yoje miac paquillisli quipías ca in noventainueve hual amo mopoluje.

<sup>14</sup> Yoje anmoTajtzin pin cielo noje amo quinequi pa se ca in tijtipichin quipolus iojli Dios.

*Monequi pa se quipujpuhuas ilaijlaculisli icni*

(Lc. 17:3)

<sup>15</sup> Sinda mijchihuiliá len amo cuali mocni, xía ca yihual mohuían huan ximachilti quinami mijchihuilic amo cuali. Sinda mitzcaqui, yoje ticpatilic iyolo mocni.

<sup>16</sup> Huan sinda amo quinequi mitzcaqui, xiquinhuica ca tehual oc se o cuajnesi ome oc sequin, pa yoje pan ipampa inminlajtol ome o ye lacames mocahuas neli in hual ticmotexpahuiliá.

<sup>17</sup> Huan sinda amo quinequi quinquacu yehuanten, cuaquín xiquinmili moxtin capa monechículo moxtin in laneltocanijmes. Huan sinda noje amo quinequi quinquacu in laneltocanijmes, ma ye ca tehual quinami se hual amo quineltoca Dios o quinami se ca yehuanten hual canaló ilapixcalisli in tomin pa in lahuelilitisli romano.

<sup>18</sup> Annimitzilía neli, len yes amo anquimacahuiltis pa mochihuas pin lalticpan, inon amo unca lamacahuiltisli pin cielo. Huan len yes anquimacahuiltis pin lalticpan unca lamacahuiltisli pin cielo.

<sup>19</sup> Oc sejpa, annimitzilía neli pampa sinda ome ca amhuanten pin lalticpan anajsis ca se lajtulisli ca len yes anquinequi anquilajlanis noTajtzin pin cielo, cuaquín yihual anmitzmacas.

<sup>20</sup> Inon quichías, pampa capa ome o ye cate lanechiculi pampa nechtemacaje ca nehual quilalijticate ca nehual inminlaneltocalisli, cuaquín nepa niunca lajco capa yehuanten.

<sup>21</sup> Cuaquinon hualac Pedro, quilic:

—Tata, unca nocni nejchihuiliá amo cuali sejpa huan oc sejpa, ¿pa quichi innojen lachihualisli amo cuajcuali monequi pa nicpujpuhuas, pa chicome (siete)? Huan sinda nejchihuilis len amo cuali oc sejpa, cuaquín ¿amo nicpujpuhuas?

<sup>22</sup> Quilic Jesús:

—Amo nimitzilía pa chicome. Nimitzilía sinda pa chicome setenta huala, xicpujpuhua. Nicnequi niquijtúa, amo xiquijnamiqui quichi lapujpuhualisli ticpujpuhuac.

*Jesús quinmilia len quipanuc se hual amo quinequiaya lapujpuhua*

<sup>23</sup> Pampa inon, ilahuelilitisli in cielo unca quinami se lacal hué hual quinequiaya quimati quichi quihuiquililoaya itequipanujquimes.

<sup>24</sup> Yoje, pehuac quitemuc huan canac se hual quihuiquilic míac millones.

<sup>25</sup> Huan amo quipíac len calica quilaxlahuiaya. Cuaquinon latilanic iteco pa quinamacasí isihua huan ixolomes huan mochi hual quiapiaya. Pan pampa inon quilaxlahuiaya.

<sup>26</sup> Cuaquín itequipanujquil huetzic lancuacuetzataba, quitemachic: “Xicpía laicnihilisli ca nehual, xijchía huan nimitzlahuis mochi.”

<sup>27</sup> Huan quicnilic iteco in tequipanujquil, quipujpuhuac inon hual quihuiquilitataya.

<sup>28</sup> Cuaquín quisac in tequipanujquil huan ca se nadita quitac oc se itequipanujquil iteco hual quihuiquilic in tequipanujquil dos cientos. Cuaquín quiquitzquic, quitolpatzcac, quilic: “¡Xichlahui len tichhuiquilía!”

<sup>29</sup> Molancuacuetzac inahuac icni tequipanujquil, quitemachic ca mochi iyolo, quilic: “¡Xichicnili, huan nimitzlahuis!”

<sup>30</sup> Ma yoje, amo quineguic in se, san quihucac quitzacuac pin calijtic pa mocahuasquiaya nepa sinda amo quilaxlahuisquiaya len quihuiquiliaya.

<sup>31</sup> Cuaquín, quiman quitaje inon, in oc sequin tequipanujquimes icnotiloaya míac, quincocuc inminyolo. Pampín quimachiltije in teco mochi hual panuc.

<sup>32</sup> Cuaquín latilanic in teco pa hualas in tequipanujquil, quilic: “¡Tequipanujquil elehuis! Nimitzpujpuhuac ca mochi in hual tichhuiquilic pampa tichtemachic ca mochi moyolo.

<sup>33</sup> ¿Amo monequiaya pa tehual tiquicniliaya mocni tequipanujquil quinami nehual nimitzicnilic?”

<sup>34</sup> Huan cualanic míac iteco, quitemacac ca in lacames pin calijtic hual quincocoltilo yehuanten hual cate latzacuali. Nepa mocahuasquiaya in tequipanujquil sinda amo lamiaya quilaxlahui mochi hual quihuiquiliaya.

<sup>35</sup> Huan Jesús lamic quinmilic:

—Yoje anmijchihuilis noje noTajtzin pin cielo sinda se amo quipujpuhuas icni ca mochi iyolo.

## 19

### *Lacames hual quincajcahualo inminsihuahuan*

(Mr. 10:1-12; Lc. 16:18)

<sup>1</sup> Lamic quijtuc Jesús innojen lajtomes, quisac pa Galilea huan mohuicac pa itenco in lalticpan Judea hual unca ca yojque (analco) in atenco hué Jordán.

<sup>2</sup> Quitocaje míac lalalera huan nepa quinpajtiaya.

<sup>3</sup> Huan hualaje capa yihual sequin fariseos pa quilalilisi se lajtol calica huil quimotexpahuililoaya, quilije:

—¿Quimacahuiltía tolajtol pa moxilus se lalal ca isihua pampa amo quixtoaca len yes ca isihua?

<sup>4</sup> Jesús quinnanquilic:

—¿Amo quiman anmoxactic pa Dios ilajtol lajcuiluli pampa quiman Dios lamic quipehualtic mochi (pa ipehuayan), quijtúa “quinchíac lalal huan sihual”?

<sup>5</sup> Noje quijtúa: “Pampa inon, quincajcahua se lalal itajtzin huan inantzin huan cayas ca isihua huan in omenten cayasi se san.”

<sup>6</sup> Yoje yajmo cate ome, jan se san. Pampín, in omenten hual Dios quinchíac se san ma camo quinxilucan lacames.

<sup>7</sup> Cuaquinon quilajlanije:

—Cuaquín ¿leca quinmilic Moisés pa quinmacasi se amal pa monextilis pampa cate laxiluli inminsihuahuan?

<sup>8</sup> Jesús quinmilic:

—Cataya pampa amo anquinequi anmonextilía anquichía in hual unca cuali. Pampín Moisés anmitzmacahuilic pa anmoxilusquiaya ca anmosihuahuan. Ma yoje amo cataya yoje quiman Dios quipehualtic mochi.

<sup>9</sup> Annimitzilía sinda se lalac moxilúa ca isihua pampa isihua quichíac len yes hual ilahuical amo quixtocac, huan sinda monamictía ca oc se sihual, cuaquín in lalac moijlacúa pampa canac oc se sihual. Ma yoje, sinda isihua uyac moniluc ca oc se lalac, cuaquín in lajtol quimacahuilía pa moxiluc ca yihual. Huan se lalac hual monamictía ca se sihual laxiluli, yoje in lalac cana se sihual hual amo iyaxca.

<sup>10</sup> Cuaquinon imonextiliniymes quilije:

—Sinda unca yoje in hual huil quipanúa se lalac ca isihua, cuaquín cuali unca pa camo monamictis se.

<sup>11</sup> Quinmilic Jesús:

—Amo cate moxtin hual huil quineltocalo in lajtol, jan yehuanten san hual Dios quinpalahuía pa quineltocasi.

<sup>12</sup> Sequin lacames amo quiman huil quinpialo inminsihuahuan, pampa yoje lacatije. Ca oc sequin, cataloaya lacames hual quinchihuilije yoje. Ca oc sequin, mochihuaje yoje pampa quinequiloaya quitequipanuililo Dios ca ilahuelitlisli in cielo. Aquí yes huil quineltoca in lajtol, ma quineltoca.

*Jesús quintuchihua in xolomes*

*(Mr 10:13-16; Lc. 18:15-17)*

<sup>13</sup> Cuaquinon sequin quihualiquilije xolomes pa quinlalilis imajmajuan inminpan huan quintemachilis Dios. Ma yoje, pehuaje quinmajuaje imonextiliniymes yehuanten hual quinhuacaje in xolomes.

<sup>14</sup> Cuaquín Jesús quinmilic:

—Xiquinmacahuilican pa hualasi ca nehual in xolomes huan amo xiquintzacuilican, pampa ilahuelitlisli in cielos unca pan ipampa yehuanten hual cate quinami xolomes.

<sup>15</sup> Huan quinlalilic imajmajuan inminpan, cuaquinon uyac, canac ojli.

*Se lalac hual quipiaya míac laquetza ca Jesús*

*(Mr 10:17-31; Lc. 18:18-30)*

<sup>16</sup> Huan xiquita, hualac se capa yihual cataya, quilic:

—Lamaxtini cuali, ¿len cuali nicchías pa nicpías yulilislis hual amo quiman lamis?

<sup>17</sup> Quilic Jesús:

—¿leca tichtocayaltía cuali? Se san unca in cuali. Yihual unca Dios. Ma yoje, sinda ticnequi ticpía in yulilislis, xiquinneltoca ilajtomes Dios.

<sup>18</sup> Quilic in se:

—¿Calía?

Quilic Jesús:

—Sequin cate: Amo tilamictis, amo ticanas sihual hual amo moyaxca, amo tilaxtequis.

<sup>19</sup> Amo tiquilis len islacatilislis inahuac oc se, xicmati ximomajti inminlaixpan motajtzin huan monantzín, huan ticlasojlas yihual hual unca monahuac quinami timolasojla.

<sup>20</sup> In lalac yancuic quilic:

—Mochi innojen niyulic niquinneltocatica. ¿Len ayamo nicchíac?

<sup>21</sup> Jesús quilic:

—Sinda ticnequis tiyes se hual quimati quichía mochi hual Dios quinequi, cuaquín xía xicnamaca len ticpía huan xiquinmaca yehuanten hual amo quipialo. Yoje ticpiás len hual ipati pin cielo. Cuaquín xichtocatihuala.

<sup>22</sup> Quicaquic in lajtol in lacal yancuic, quicocuc iyolo. Icnotitíac, pampa yec se lacal hual quipiaya míac hual iyaxca.

<sup>23</sup> Cuaquinon Jesús quinmilic imonextiliniymes:

—Annimitzilía neli pampa san ca niman míac chicachualisli huil calaquisi capa unca ilahuelitlisli in cielo yehuanten hual quipialo míac.

<sup>24</sup> Oc sejpa annimitzilía pampa amo cataya lachihualisli hué pa se camello quipanahuis iixtololon se lajtzomaloni quinami cataya pa calaquis capa Dios huelitía se lacal hual quipía míac hual iyaxca.

<sup>25</sup> Quicaquije inon imonextiliniymes, moitaloaya ca míac lamajtilisli, quilije:

—Sinda unca yoje ca se lacal hual quipía míac, cuaquín ¿aquí huil yes laquixtili pa ipolehuilisli ilaijlaculisli?

<sup>26</sup> Jesús quinmitaya huan quinmilic:

—Quinami quitalo lacames, in amo huil panúa. Ma yoje, ca Dios mochi huil panúa.

<sup>27</sup> Cuaquinon quinanquiloc Pedro, quiloc:

—Xiquita. Tehuanten tijcaycahuaje mochi huan timitztocape. ¿Len ticpiasi pampa ticchihuaje inon?

<sup>28</sup> Jesús quinnanquiloc:

—Neli annimitzilía inon amhuanten hual annechtocac. Pan in tonali quiman nihuelitis pan lalticpan nehual ilacal in cielo, nimolalis pan noicpali capa nihuelitis, noicpali hué huan cualtichin, huan amhuanten anmolalis pan doce icpalimes cuajcualtichin pa anquinmilis len quipiasi inminmi-ahuimes in doce lacames hual quipehualtije moxtin yehuanten hual iyaxca in lali Israel.

<sup>29</sup> Huan moxtin hual quincaycahuaje inminchan, o inmicnían lacames huan sihuames o inmintajtzitzián o inminantzitzian o inminxolomes o inminlalimes, yehuanten quipiasi míac. Quema, Dios quinmacas niman míac moxtin hual quincaycahuaje innojen pampa nechlasojlaloaya míac. Huan amo yoje míac quinlasojlaloaya innojen hual quincaycahuac. Huan innojen hual quincaycahuaje amo quiman huil ajsiloaya cayalo yoje míac quinami in míac hual Dios quinmacas. Huan noje quipiasi in yulilisli hual amo quiman lamis. Quipiasi quinami inminlaxilulisli inon hual iyaxca Dios.

<sup>30</sup> Ma yoje, míac ca yehuanten hual axan monetzalo niman míac yajmo monetzasi míac. Huan míac hual axan amo monetzalo cayasi yehuanten hual monetzasi niman míac.

## 20

### *Ilajnamiquiltisli in tequipanujquimes*

<sup>1</sup> Ilahuelitlisli in cielo unca quinami se lacal quipiaya cuajmili huejué. Quisac cualcan pa quinlaquehuasi tequipanujquimes pa tequipanulosoquiaya pa iuvatilan.

<sup>2</sup> Mochihuaje ca se lajtulisli pa quichi yahuiaya quinlaxlahui. Cataya je denario tomin pa se tonali. Cuaquín quintilanic pa iuvatilan.

<sup>3</sup> Uyac pa chichahui horas pa huajtzinco, quinmitac oc sequin lacames moquezataloaya pin lajcotiyan, amo quichijtaloaya nindenó.

<sup>4</sup> Quinmilic yehuanten: “Xiaca amhuanten noje pa novatilan, huan len yes cuali annimitzlahlauhí.” Huan uyaje yehuanten.

<sup>5</sup> Huan oc sejpa quisac pa lacualispan huan oc sejpa pa ye horas pa tiolac in teco huan yoje quinlaquehuac lacames.

<sup>6</sup> Huan quinami macuili horas pa tiolac uyac pa in lajcotiyan huan oc sejpa quinmitac lacames moqueztataloaya huan quinmilic: “¿Leca anmoqueztica nican pa mochi in semilhuil anlatzejtica?”

<sup>7</sup> Quilije: “Unca pampa amaqui techlaquehuac.” Quinmilic: “Xiaca amhuanten noje pa novatilan.”

<sup>8</sup> Pehuac layuajtic, huan quilic iteco in uvatilan ilaicnani itequipanujquimes: “Xi quinnotza pa hualasi in tequipanujquimes huan xiquinlahlauhí inmintomin. Xipehua ca yehuanten hual hualaje pa macuili horas pa tiolac huan xilami ca aquinojen hualaje quiman pehuaya in semilhuil.”

<sup>9</sup> Hualaje yehuanten hual pehualoaya tequipanulo pa macuili horas pa tiolac, quinmacaje mochi seje je tomin denario.

<sup>10</sup> Hualaje yehuanten hual tequipanuloaya de quiman pehuaya in semilhuil quijtuticate pampa yahuiaya quinlahlauhí oc se tomin ca in denario. Ma yoje, yehuanten noje quinmacac mochi seje itomin denario.

<sup>11</sup> Huan quiman canaje, cualanije pampa quinlahlauhí yoje in teco.

<sup>12</sup> Quijtuloaya: “Innojen hual hualaje niman pa tiolac jan tequipanuje se hora san huan tiquinlahlauhí se denario quinami tehuanten. Huan xiquita. Tehuanten titequipanuloaya mochi semilhuil quiman tonaya.”

<sup>13</sup> Huan in teco quinanquilic se hual cataya ca innojen, quilic: “Nito, amo nimijchihuilijtica len hual amo cuali. ¿Amo timochihuaje ca se lajtulisli pa nimitzlahlauhíscuaya se tomin denario?”

<sup>14</sup> Xicana in hual moyaxca huan ximohuica. Nicnequi niclahlauhí aqui hual hualac pa macuili pa tiolac jan quinami nimitzlahlauhía tehuac.

<sup>15</sup> ¿Amo unca noyaxca pa nicchías quinami nicnequi ca len unca noyaxca? O ¿amo tiquita cuali pampa nehual nicchijtica len cuali?”

<sup>16</sup> Yoje aquinojen hual huejcahualo hualalo yesi quinami yehuanten hual pehualo huan yehuanten hual pehualo yesi quinami yehuanten hual huejcahualo hualalo, jan quinami yehuanten hual huejué cayasi quinami yehuanten hual tijtipichin. Unca pampa cate míac yehuanten hual cate lanotzali pa tequipanusi, huan cate naditas hual cate lajtultili.

*Oc sejpa Jesús quinmachiltia pampa yahui miqui*

*(Mr. 10:32-34; Lc. 18:31-34)*

<sup>17</sup> Quiman canaya Jesús ojli pa Jerusalén, quinnotzac quinhuicac inhuán in doce imonextilinjmes nepa pan ojli huan quinmilic:

<sup>18</sup> —Xiquitacan. Tialo pa Jerusalén huan nehual ilacal in cielo nechtemacasi in tiopistas huejué huan in lamaxtinijmes, nechtilanisi pa nechmictisi.

<sup>19</sup> Nechtemacasi ca yehuanten hual amo judíos, huan nechhuejuecaltisi huan nechpilusi pan se cuahuil. Huan quiman panusi ye tonalijmes niyulis oc sejpa.

*Jacobo huan Juan inminantzin quitemachía Jesús pa quinchihuilis len cuali*

*(Mr. 10:35-45)*

<sup>20</sup> Cuaquinon hualac capa yihual inantzin ixolomes Zebedeo, hualac ca ixolomes. In sihal quimolancuacuetzilic quitemachic pa quinchihuilisquiaya len cuali.

<sup>21</sup> Huan Jesús quilic:

—Huan ¿len ticnectica?



Quilic yihual:

—Quiman tipehuas tihuelitis, xicmacahuiliti pa innojen omenten noxolomes molalisi se pa momajma cuali huan se pa momajma amo cuali pa huelitisi ca teshual.

<sup>22</sup> Jesús quinanquilic:

—Amo anquimati len anquitemachijtica. ¿Huil anmopepenialtía pa anpanus inon hual nehual nicpías pa nipanus? Yes quinami ancunisquiaya len niman chichic pa míac tonalijmes. Huan pa amhuanten anyes nolanahuatiniijmes anquipías pa anpanus lacocoltilisli hual cayasi quinami se lacuayatequilisli ca tixuxlí. ¿Huil anmopepenialtía pa anpanus inon?

Quinanquilije:

—Huil timochicahuilito pa tipanusi inon, timopepenialtisi.

<sup>23</sup> Quinmilic Jesús:

—Neli anpanus lacocoltilisli quinami launilisli chichic huan quinami lacuayatequilisli pa tixuxlí. Ma yoje, pa anmolalis pa noma cuali huan pa noma amo cuali, inon amo unca noyaxca pa annimitzmacas. NoTajtzin quichijchiac innojen pa sequin hual yihual quinlajultic pa quipiasí, huan quinlalis yehuanten nepa.

<sup>24</sup> Quiman quicaquije inon innojen diez (majlacli) imonextiliniijmes, cualanije ca in omenten icnían.

<sup>25</sup> Ma yoje, Jesús quinnotzac moxtin, quinmilic:

—Anquimati quinami in huejueyenten hual huelitilo pan yehuanten pa mochi lalimes, huelitilo chichahuac. Huan yehuanten hual huelitilo mojmosta quinequilo quinnextililo in lacames quinami quipialo lahuelilitisli.

<sup>26</sup> Amo cayas yoje ca amhuanten, cayas quinami inon: Aquí yes quinequi mochía hué ca amhuanten, monequi pa yihual quintequipanuilis moxtin oc sequin.

<sup>27</sup> Huan aquí yes quinequi caya in hué ca amhuanten pa anmitzlaicanas, yihual quipías pa yes in se hual mochías quinami tequipanujquil lailpili pa moxtin. Yihual amo motzacuilis pa quichías in tequipanulisli hual moxtin quixixiculo pa quichihuasi.

<sup>28</sup> Quipías pa mochías jan quinami nehual ilacal in cielo. Amo nihualaya pan lalticpan pa nechtequipanuulisli nehual lacames. Nihualaya pa niquintequipanuulisli yehuanten huan pa nimotemacas pa nimiquis. Yoje niclaxlahuis pa inminlamacahualisli míac lacames pa camo polehuisi pampa quinchihuaya laijlaculisli.

*Jesús quinpajtía ome pachacames*

*(Mr. 10:46-52; Lc. 18:35-43)*

<sup>29</sup> Quistiahuiloaya yehuanten pin cailtan Jericó, quitocaloaya Jesús míac lalacera.

<sup>30</sup> Huan xiquitacan, pa itenco in ojli cataloaya yehuatataloaya ome pachacames, quicaquiloaya pampa panuaya Jesús. Pampín tzajtzije, quilije:

—¡Tata, ti'ixól David, xitechicnili!

<sup>31</sup> Huan in lalacera quinmajuac pa camo nahuatisi. Ma yoje, yehuanten quitzajtzilije chichahuac, quilije:

—¡Tata, ti'ixól David, xitechicnili!

<sup>32</sup> Pampín, moquetzac Jesús, quinnotzac, quinmilic:

—¿Len anquinequi pa annimijchihuulis?

<sup>33</sup> Quilije:

—Tata, xiquinpajti toixtololomes pa huil tilachiasi.

<sup>34</sup> Quipíac Jesús laicnililisi pa yehuanten, huan quinmatoquilic inmixtololojmes. Jan ajnaxcan lachiaje huan pehualoaya quitocalo Jesús.

## 21

### *Jesús calaqui pa Jerusalén*

(Mr. 11:1-11; Lc. 19:28-40; Jn. 12:12-19)

<sup>1</sup> Ajsitihualaloaya yehuanten pa Jerusalén huan hualaloaya pa Betfagé pa in tepetzindi (loma) itoca Olivos. Cuaquinon quintilanic Jesús ome imonextilinijmes.

<sup>2</sup> Quinmilic:

—Xíacan pin caltilan hual anmolaixpan, huan jan ajnaxcan anquitas se burra ilpitica huan ixól ca yihual. Xictomacan huan xichhualiquilican.

<sup>3</sup> Huan sinda se anmitzilía len, xiquilican: “Monequi pa in Tata quinpiás yehuanten huan ca nadita yahui quincuepa.”

<sup>4</sup> Inon panuc pa mochías len quijtúa ilajtól Dios ilajtuni hual quijcuiluc:

<sup>5</sup> Xiquilican yehuanten pin caltilan Sión:

“Xiquitacan, huala anmoHué capa amhuanten, yihual hual momacahuiltía, yihual lejcutica pan se burra, paní ixolol se burra hual quila-mamilito.”

<sup>6</sup> Cuaquinon uyaje imonextilinijmes, quichihuaje quinami Jesús quinmilic.

<sup>7</sup> Quinhuicaje in burra ca ixolol, huan quilalije inminpan inminlaquemes, huan quilejcultije Jesús huan ipan molalic.

<sup>8</sup> Huan in lalacera quinsuhuaje inminlaquemes pan in ojli. Oc sequin quincotonaje inminiztmolinquijmes (ramas) cuahuimes, quinxintiaje pan ojli.

<sup>9</sup> Quilaicanaje huan quitocaje in míac lalacera tzajztiahuilooaya huan quijtutiahuilooaya:

—¡Ma yuli pa techquixtis pin polehuilisi yihual ixolol David! ¡Ma quilican lajtomes hué inahuac yihual hual hualaya ca ilahuelilitilisi Dios! ¡Ma techquixti pin polehuilisi yihual hual hualac, quisac pin niman cuajtic pin cielo!

<sup>10</sup> Yoje calaquic Jesús pin Jerusalén, huan moxtin yehuanten pin caltilan hué molinije huan majcoquije, quilije:

—¿Aquí in se?

<sup>11</sup> Huan in lalacera quinmililoaya:

—In se ilajtuni Dios itoca Jesús hual moscaltic pin caltilan Nazaret pin lalticpan Galilea.

### *Jesús quichipahua in tiopan hué*

(Mr. 11:15-19; Lc. 19:45-48; Jn. 2:13-22)

<sup>12</sup> Calaquic Jesús pin tiopan hué huan quinquixtic pa quiahuac moxtin hual lanamactataloaya huan lacujtataloaya pin tiopan hué calijtic. Quintzincuepac innojen capa lacames quipatilooaya in tomin. Noje quintzincuepilic inmicpalimes yehuanten hual quinnamacaloaya huilomes.

<sup>13</sup> Quinmiliaya:

—Unca lajcuiluli pa ilajtól Dios: “Quitocayaltisqui nocali se cali capa quilajlanilo Dios.” Huan amhuanten anquichihuac quinami se cueva (ostul) capa chantilo laxtequinijmes.

<sup>14</sup> Nepa pin tiopan hué hualaloaya capa yihual pachacames huan yehuanten hual amo huil nejnemiloaya, huan yihual quinpajtic.

<sup>15</sup> Yoje quitaloaya in tiopistas huan in lamaxtinijmes innojen hual quinlachiaftiloaya moxtin ca lamajtilisli. Noje quicaquiloaya quinami in xolomes tzajtziloaya calijtic in tiopan hué, quijtutataloaya: “¡Ma yuli pa techquixtis pin polehuilisli ixól in Hué David!” Pampín cualanije in tiopistas huan in lamaxtinijmes.

<sup>16</sup> Quilije Jesús:

—¿Tijcaquí len quijtuticate innojen?

Huan Jesús quinmilic:

—Jo quema. ¿Amo quiman anmomaxtic in hual unca lajcuiluli pa ilajtol Dios hual quijtúa inon? Yoje quijtúa:

Quisalo lajtomes huejué pa tehual pa inmincamac xolomes tipichinchitos huan xolomes hual ayamo mocahuajque pa chichisi.

Huan inminlajtomes yehuanten amo quipialo laijlaculisli.

O Dios, tiquinhuellitc pa quichihuasqui inon.

<sup>17</sup> Cuaquinon quincahuac Jesús huan quisac nepa Jerusalén, uyac pa in caltilan Betania, nepa panuc in layúa.

*Jesús cajua se amacual hual amo sulajtica*

*(Mr. 11:12-14, 20-26)*

<sup>18</sup> Huan niman pa huajtzinco, mocuepaya pa Jerusalén huan mayantataya.

<sup>19</sup> Quitac se amacual tipichin inahuac in ojli huan uyac capa cataya. Huan amo quitac ilaquilyo nindeno ipan, jan quitac isacayo san. Cuaquinon quilic in cuahuil:

—Ma yajmo quiman caya laquilyo mopan.

Huan jan ajnaxcan huaquic in amacual tipichin nepa capa cataya.

<sup>20</sup> Quitaje inon imonextilinijmes huan moitaje ca lamajtilisli, quilije:

—¿Quinami huaquic jan axcan in amacual tipichin nican capa cataya?

<sup>21</sup> Quinnanquilic Jesús, quinmilic:

—Neli annimitzilía, sinda anquineltoca huan sinda amo anquimahuilía pa anmoyolo cuajnesi amo panus in hual anquitemachis pa Dios anmitzmacas, cuaquín anquichihuís in amacual tipichin inon jan quinami nel nicchihuíc. Huan amo in san. Noje huil anquilis in loma: “Ximoejua, ximolasa pa al huejcalan”, huan yoje quipanus.

<sup>22</sup> Huan mochi hual anquitemachis Dios anquipías sinda anquitemachía anquineltocatica pampa yihual anmitzmacas.

*Jesús quipía lahuelilitlisli*

*(Mr. 11:27-33; Lc. 20:1-8)*

<sup>23</sup> Cuaquinon calaquic Jesús pin tiopan hué, hualaje capa yihual quiman lamaxtitataya in tiopistas huejué huan inminabuelojmes hueyenten in judíos, quilije:

—¿Ca aquí ilahuelilitlisli tiquinchijtica innojen? Huan ¿aquí mitzmacac in lahuelilitlisli?

<sup>24</sup> Jesús quinnanquilic:

—Annimitzlajlanis nehual noje se lajtol, huan sinda annechnanquilis, cuaquín nehual noje annimitzilía ca aquí ilahuelilitlisli niquinchijtica innojen.

<sup>25</sup> ¿Aquí quitilanic Juan Lacuayatequini pa yihual lacuayatequisquiaya? ¿Quitilanic Dios, o quitilanije lacames?

Cuaquinon molaquetzilije yehuanten, moilijtataloaya:

—Sinda tiquiqtulo cataya Dios, cuaquín techilis: “Cuaquín ¿leca amo anquineltocac?”

26 Huan sinda tiqijtusí cataloaya lacames, timomajtía inminlaixpan in míac lacames, pampa moxtin quineltocalo pampa Juan yec se ilajtuni Dios.

27 Yoje quinanquilije Jesús:

—Amo ticmatilo.

Huan Jesús quinmilic:

—Huan nehual noje amo annimitzilís ca aquí ilahuelilitilísli niquinchijtica innojen.

*Jesús quinpahuíla quinami ome xolomes quitequipanuilije inmintajtzin*

28 Huan quinmilic:

—¿Quinami anquita inon? Quimpiaya se lalac ome ixolomes huan quilic se: “Noxól, xía xitequipanu axan pin uvatilan.”

29 Huan ixól quinanquilic: “Amo nicnequi.” Ma yoje, ca nadita mopatilic iyolo, uyac tequipanuc.

30 Cuaquín uyac quitac in oc se ixól huan quilic pa yas tequipanus, huan yihual quinanquilic: “Jo quema, Tata, nías.” Ma yoje, amo uyac.

31 ¿Calía ca in omenten quichihuaya quinami quinequiaya itajtzin?

Quilije:

—In xól hual quipatilic iyolo huan uyac tequipanuc.

Cuaquinon Jesús quinmilic:

—Annimitzilía neli pampa yehuanten hual canaló ilapixcalisli tomin pa in lahuelilitilísli romano, huan in sihuames amo cuajcualí calaquisi capa Dios huelitía huan amhuanten amo.

32 Yoje cayas, pampa hualac Juan pa anmitznexilisquiaya amhuanten quinami ancanas se ojli melahuac huan cuali. Huan amhuanten amo anquineltoac. Ma yoje, quineltocaje yehuanten hual canaló ilapixcalisli tomin huan in sihuames amo cuajcualí. Huan amhuanten, mas que anquitac in, ma yoje amo anmopatilic anmoyolo pa anquineltoacasquiaya.

*Jesús quinpahuíla in hual quichihuaje in tequipanujquimes ej'elehuis*

(Mr 12:1-12; Lc 20:9-19)

33 Xijcaquican oc se lapuhualisli hual annimitzmaxtis. Cataya se lalac hué hual quiapiaya míac, quitocac se uvatilan. Quitzacuac itenco, quihuajuanac coyunquil pin tel capa quitelicsalo in uvas, huan quichíac se caltzindi cuajtic capa huil quitalo sinda calaquilo yulijquimes putzames.

Cuaquín quilaquehualtilic sequin tequipanujquimes lachianijmes huan uyac pa oc se lali.

34 Ajsic in tonalijmes quiman yucsiaya in laquilyo. Quintilanic sequin itequipanujquimes pa canalesquiaya in hual iyaxca in laquilyo.

35 Cuaquín in tequipanujquimes lachianijmes quinqitziqije itequipanujquimes in teco, huan se quihuitequije, oc se quimictije huan oc se quilaxilije tixcalimes.

36 Oc sepa quintilaníc in teco oc sequin míac itequipanujquimes, amo ajsiloaya cayalo yoje míac yehuanten hual yihual pehuac quintilaníc. Ma yoje, quinchihuilije in tequipanujquimes jan yoje quinami ca yehuanten hual pehuac quintilaníc.

37 Cuaquín quintilaníc ixól, ca yihual laquisac, quijtuc: “Quimatisi momajtisi ilaixpan noxól!”

38 Ma yoje, quiman quitaje ixól in tequipanujquimes lachianijmes, moilije: “In se unca hual canas in hual iyaxca in teco. Ma tián, ma ticmictican. Yoje cayas toyaxca in uvatilan.”

39 Yoje quihuicaje, quilasaje pa quihuac in uvatilan, quimictije.

<sup>40</sup> Cuaquinon Jesús quinlajlanic:

—Quiman hualas iteco in uvatilan, ¿len quinchihuilis innojen tequipanujquimes lachianijmes?

<sup>41</sup> Quilije:

—Quinmictis in lacames ej'elehuis yoje tetzcuinuc huan quintemacas in uvatilan oc sequin tequipanujquimes lachianijmes hual quitemacasi in laquilyo pa in tonalijmes quiman yucsis.

<sup>42</sup> Jesús quinmiloc:

—Huan ¿amo quiman anmomaxtic pa Dios ilajtol lajcuiluli? Quijtúa: In tel hual quijtuye amo monotza nindeno yehuanten hual quichijtataloaya in cali, axan mochíac pa in cali itel niman cuali, in tel capa quipehualtisque mochi in cali. Panuc yoje pampa toTeco quichíac, huan quiman tiquitajque, timoitajque ca lamajtilisli.

<sup>43</sup> Pampín, annimitzilía pampa anmitzquixtilis Dios ilahuelilitlisli amhuanten huan quintemacas yehuanten hual yulisi quichijticate quinami Dios quinequi.

<sup>44</sup> Aquí huetzis ipan in tel quilajlapanas yihual. Huan sinda in tel huetzis ipan aquí yes, yoje quitesis huan yihual mochías lalpotocli. Nehual niquinami in tel. Ca inon niquijsúa pampa sinda se quinequi quijlacúa nolahuelilitlisli, in se polehuis.

<sup>45</sup> Quicaquije in tiopistas huejué huan in fariseos innojen lapuhualisli hual quinmiloc Jesús. Quimatiloaya pampa Jesús quinmiliaya pampa yehuanten cataloaya quinami innojen lacames ej'elehuis pa innojen lapuhualisli.

<sup>46</sup> Pampín quitemuje quinami quiquitzquilosquiaya. Ma yoje, momajtiloaya quiquitzquilo pampa in míac lalcalera nepa cataloaya. yehuanten quineltocaloaya pampa Jesús yec se ilajtuni Dios, huan pampín amo quinmacahuiltilosquiaya pa quiquitzquilosquiaya.

## 22

### *Se monamictisli hual míac quixixiculoaya (Lc. 14:15-24)*

<sup>1</sup> Huan Jesús pehuac quinlaquetziloc oc sejsa, quinlaquetziloc ca lapuhualisli calica quinmaxtiaya, quinmiloc:

<sup>2</sup> —Ilahuelilitlisli in cielo unca quinami se hué hual quichíac se lacualisli pampa ixól monamictiaya.

<sup>3</sup> Huan quintilanic itequipanujquimes pa quinnotzalosquiaya pa hualasi yehuanten hual quinnotzac pan lacualisli. Huan amo quinequiloaya.

<sup>4</sup> Oc sejsa quintilanic oc sequin tequipanujquimes, quinmiloc: “Xiquinmilican yehuanten yoje: Axan nicpía lachijchihuali mochi pa anquicuas. Nilatilanic pa quinmictisi notoros huan noborregos tojtomahuac. Mochi unca lachijchihuali. Xihualacan pa in lacualisli.”

<sup>5</sup> Ma yoje, yehuanten hual quinnotzac amo quinequiloaya quinquilo huan uyaje se pa icuajmili, oc se pa ilanamacaloyan pa lanamaquiltis.

<sup>6</sup> Huan in oc sequin quinqitziye itequipanujquimes in hué, quinchihuilije amo cuali huan noje quinmictije.

<sup>7</sup> Cuaquín cualanic míac in hué huan quintilanic iguaches hual quinmictije innojen lamictinijmes huan quichichinuje inmicaltilan yehuanten.

<sup>8</sup> Cuaquinon quinmiloc itequipanujquimes: “In lacualisli unca lachijchihuali. Ma yoje, yehuanten hual niquinnotzac pa hualasi amo monotzaloaya.

<sup>9</sup> Xiacan pa in lajcotiyan capa quisalo in ojlimes huan xiquinnotzacan moxtin hual anquinmitas pa hualasi pan lacualisli.”

<sup>10</sup> Quisaje in tequipanujquimes pan ojlimes, quinechicuje moxtin hual quinmitaje, yehuanten hual amo cuajcuali huan hual cuajcuali. Yoje tentataya in cali ca yehuanten hual quinnotzaje pa hualasi.

<sup>11</sup> Cuaquinon calaquic in hué, quinmitac moxtin yehuanten huan nepa quitac se hual amo molaquentic ca inahuas in monamictilisli.

<sup>12</sup> Quilic: “Nito, ¿quinami ticalaquic nican huan amo ticpiaya in nahuas pa in monamictilisli?” Huan amo huil quinanquiliaya.

<sup>13</sup> Cuaquín in hué quinmilic itequipanujquimes: “Xiquilpilican imajmajuan huan icxihuajmes, xiclasacan pa quiahuac capa laticumac. Nepa moxtin chocasi chichahuac huan quincuaajcuasi inminlames.”

<sup>14</sup> Pampa míac cate lanotzali huan jan naditas san cate lalajtultili pa cayasi Dios ilacames.

*Jesús quijtúa quinami quilaxlahuilo ilapixcalisli tomin*

*(Mr. 12:13-17; Lc. 20:20-26)*

<sup>15</sup> Cuaquinon uyaje in fariseos huan molaquetziliye pa quimatilosquiaya quinami huil quicuaajcuamanalosquiaya Jesús pa quijtusquiaya len lajtol calica huil quimotexpahuililosquiaya.

<sup>16</sup> Yoje quintilaniye sequin hual quintocaloaya yehuanten huan sequin hual cataloaya ca in herodistas, quilije:

—Lamaxtini, ticmatilo pampa tehual tiquijtúa len unca melahuac huan ticmaxtía iojli Dios ca melahualisli. Ticmatilo pampa amo tictemúa quinami ticipaquiltis amaqui ca len tiquilía, huan inon unca pampa tiquita se lacal jan quinami tiquita oc se.

<sup>17</sup> Axcan, xitechili quinami tiquita inon. ¿Unca cuali ilaixpan Dios pa ticlaxlahuisi ilapixcalisli in tomin pa in hué romano César?

<sup>18</sup> Quimatic Jesús quinami yehuanten quinequiloaya quimotexpahuililo huan quinmilic:

—Amhuanten lacuaajcuamananijmes, anquinequi annesi quinami lacames cuajcuali, huan ma yoje nicmati pampa anquijtutica amo cuali laijtica amhuanten. ¿Leca annehlalilía in calica anquinequi annechmotexpahuilía?

<sup>19</sup> Xichnextili in tomin pa lapixcalisli.

Quihualiquilije in tomin.

<sup>20</sup> Jesús quitaya huan quinmilic:

—¿Aqui iyaxca in layapali huan in lajcuilulisli?

<sup>21</sup> Quinanquilije:

—Iyaxca César in hué.

Cuaquinon quinmilic:

—Xicmacacan César in hual iyaxca, huan xicmacacan Dios in hual iyaxca yihual.

<sup>22</sup> Quicaquije inon, mocahuaje moiztataloaya ca lamajtilisli. Cuaquinon quicahuaje huan uyaje.

*Quilajlanilo Jesús quinami yulilo oc sejpa*

*(Mr. 12:18-27; Lc. 20:27-40)*

<sup>23</sup> Cataya in tonali hualaje capa Jesús sequin saduceos. yehuanten quijtulo pampa amo yulilo oc sejpa yehuanten hual miquije. Pampa inon, quilajlanije:

<sup>24</sup> —Lamaxtini, quijtuc Moisés sinda miqui se huan amo quinpiaya xolomes, cuaquín monequi pa monamictis icni ca isihua ihuían icni pa yoje quinpiasi xolomes hual quihuicasi itoca in se hual miquic.

<sup>25</sup> Axcan, cataloaya siete (chicome) icnían hual yuliloaya capa tehuanten. Monamictic inmicni hué huan miquic amo quinpixtataya xolomes. Pampín icni canac isihua ihuían icni.

<sup>26</sup> Quimpanuc yehuanten jan quinami ca in se, amo quinpiaje xolomes. Huan noje quinpanuc ca in oc sequin icnían, ca moxtin in chicome, huan amo quinpiaje xolomes.

<sup>27</sup> Huan quiman lamije miquije moxtin in chicome, cuaquín miquic noje in sihual.

<sup>28</sup> Axcan, quiman yulisi oc seppa, ¿aquí ca in chicome icnían yes ilahuical in sihual? Pampa moxtin canaje.

<sup>29</sup> Jesús quinnanquilic:

—Anmoixpolúa pampa amo anquimati ilajtol Dios hual unca lajcuiluli, huan amo anquimati ilahuelilitlisli Dios.

<sup>30</sup> Quiman yulisi oc seppa yehuanten hual miquije, amo monamictilo huan amo temacasi pa monamictisi.

<sup>31</sup> Cayasi quinami Dios ilanahuatinijmes hual cate pin cielo.

<sup>32</sup> Huan inon hual quinmatoca yehuanten hual miquije, neli unca pampa yulisi oc seppa. ¿Amo quiman anmomaxtic len yihual Dios anmitzilic? Yoje quijtuc: “Nehual niunca iDios Abrahám huan iDios Isaac huan iDios Jacob.” Dios amo inminDios in mijquimes. Yihual inminDios yehuanten hual yulticate. Pampín yulticate mas que miquije.

<sup>33</sup> Quicaquije inon in míac lacames, huan molapolultije ca Jesús ilamaxtilisli.

*Dios ilajtol hué hual amo unca oc se ilajtol yoje hué*

*(Mr. 12:28-34)*

<sup>34</sup> Quimatije in fariseos quinami Jesús quinsulahuac in saduceos pa yajmo huil monapatisi ca inminlajtomes. Pampín monechicuje capa yihual.

<sup>35</sup> Huan se ca yehuanten hual yec ilamaxtini in lajtol quilajlanic len pa quimatis sinda neli quinnanquilisquiaya quinami quijtúa Dios ilajtol, quilic:

<sup>36</sup> —Lamaxtini, ¿calía unca ilajtol Dios niman hué?

<sup>37</sup> Jesús quilic:

—“Ticlasojlas in Tata moDios ca mochi moyolo huan ca mochi moyulilisli huan ca mochi molajnamiquilisli.”

<sup>38</sup> In unca in lajtol niman hué huan quipehualtía mochi Dios ilajtomes.

<sup>39</sup> In oc se unca quinami in calica quipehualtic: “Ticlasojlas mochi oc se hual unca monahuac quinami timolasojla tehual.”

<sup>40</sup> Aquí hual quichía in ome lajtomes, noje quichijtica mochi hual quijtulo Dios ilajtomes huan Dios ilajtunijmes.

*¿Unca Cristo ixolol David?*

*(Mr. 12:35-37; Lc. 20:41-44)*

<sup>41</sup> In fariseos ayamo mohuicaje.

<sup>42</sup> Cuaquín Jesús quinlajlanic:

—¿Quinami anquita inon hual quijtúa quinami unca in Cristo? ¿Aquí ixól yihual?

Yehuanten quilije:

—Yihual ixól David.

<sup>43</sup> Cuaquinon quinmilic Jesús:

—Cuaquinon, ¿quinami unca yoje sinda David quitocayaltic Tata quiman quijcuiluc pan ipampa in Espíritu Santo innojen lajtomes? Quijtúa:

<sup>44</sup> In Tata quilic noTata:

“Ximolali inahuac noma cuali,  
huan niquinsulahuas molacocolinjmes huan yesi quinami se icpali pa  
itzindan mocxihuajmes.”

<sup>45</sup> Axan, sinda David quitocayaltic “noTata”, cuaquín ¿quinami huil yes ixolol David?

<sup>46</sup> Huan amaqui huil quinanquilic se lajtol. Huan pa in tonali huan pa mochi tonaliñmes hual ajsitiahuloaya, momajtiloaya moxtin pa quila-llanilosquiaya len.

## 23

*Jesús quinmotexpahuilía in fariseos huan ilamaxtinijmes in lajtol*  
(Mr. 12:38-40; Lc. 11:37-54; 20:45-47)

<sup>1</sup> Cuaquinson quinlaquetzilic Jesús in lalacera huan imonextilinjmes, quinmilic:

<sup>2</sup> –Hueltilo in lamaxtinijmes huan in fariseos ca Moisés ilahuelilitilisi huan ca in hual iyaxca Moisés.

<sup>3</sup> Pampín, mochi hual anmitzililo, in xicchihuacan huan xiquinneltocacan. Ma yoje, amo xilachihuacan quinami yehuanten lachihualo, pampa quijtulo len quipía pa quichías se, mas que yehuanten amo quichihualo.

<sup>4</sup> Hueltilo quinami quinmilpilijticate lamamanijquimes ej'etic huan unca quinami quinlamamiltilo pani inminhuajcomes lacames. Huan yehuanten amo quinequilo quinmijcuanilía nadita in lamamanijquimes ej'etic, amo quinmatocalosquiaya ca se ixerixa yehuanten.

<sup>5</sup> Huan mochi in hual quichihualo, san quichihualo pa quinmitasi cuali lacames. Yoje quinchihualo palahuac in latzacualinjmes tijtipichin hual quiptixticate laijt ilajcuilulisi Dios ilajtol, huan quinpilulo pa pani inmin-laixpan huan pa inminmajmajuan. Huan quihuejcanaltilo niman xilanquil inminc palmes inminahuas calica molaquentilo, amo cate yoje xilanquil innojen hual in oc sequin quipialo.

<sup>6</sup> Huan quixtocalo molalilo capa lacualo pin fiestas pani in icpalimes hual cate pa in huejueyenten. Huan quixtocalo in icpalimes pa in huejueyenten pin tiopajmes.

<sup>7</sup> Quixtocalo pa moxtin quinpialtisi ca míac lamajtilisi quinnozticate “Rabí” pan ojlimes huan pin lajcotiyan hué lajco pin caltilan.

<sup>8</sup> Axan, amhuanten, amo xiquinmacahuiltican pa lacames anmitznotzasi Rabí Lamaxtini, pampa anquipía se anmolamaxtini hual nehual niunca, Cristo. Huan amhuanten anmoxtin anunca anmocnián se ca oc se.

<sup>9</sup> Huan amo xicnotzacan amaqui pan lalticpan anmotajtzin, pampa se san unca anmoTajtzin, yihual pin cielo.

<sup>10</sup> Huan monegui pa como anquimacahuiltis pa amaqui anmitznotzas “noteco”, pampa se san unca anmoteco, yihual Cristo.

<sup>11</sup> Yihual hual quitequipanuilía in oc sequin yes in hué capa amhuanten.

<sup>12</sup> Pampín, aquí yes quijtúa pa iyolo pampa yihual hué, yihual yes lachihuali tipichin. Huan aquí yes quijtúa pa iyolo pampa unca tipichin yes lachihuali hué.

<sup>13</sup> ¡Quichi anpanus lacocoltilisi amhuanten ilamaxtinijmes in lajtol huan fariseos hual anyuli anquincujcuamantica lacames! Anquichihuilía pa quijtusi pa inminyolo pampa amhuanten anunca lacames niman cuali, huan neli anunca lacujcuamananjmes. Unca pampa anquitzacuilía lacames hual canticate in ojli capa quitasi ilahuelilitilisi in cielo. Amhuanten



amo anquinequi ancana in ojli huan amo anquinmacahuiltía pa canasi yehuanten hual quinequilo canaló.

<sup>14</sup> ¡Quichi anpanus lacocoltilisli amhuanten, ilamaxtinijmes in lajtol huan fariseos, amhuanten lacuajcuamananijmes! Unca pampa anquinquixtilía in calimes in sihuames hual inminlahuicalhuan polehuije. Cuaquín anquichía oración ca miac lajtomes pa anquinmonextilis lacames pampa anunca niman cuali, huan ma yoje anunca lacuajcuamananijmes. Pampín, Dios anmitzmacas lacocoltilisli niman chichahuac hual amo yoje quinmacas oc sequin.

<sup>15</sup> ¡Quichi anpanus lacocoltilisli amhuanten, ilamaxtinijmes in lajtol huan fariseos, lacuajcuamananijmes! Unca pampa anquipanahuía in al huejcalan huan anyahui pa miac lalimes pa anquitemus se pa anquineltoaltis anmolamaxtilisli. Huan quiman anquitas se hual quinequi, cuaquín anquijlacúa ca anmolamaxtilisli. Huan yoje anquichía pa monequis pa panus in lacocoltilisli hual ome ca amhuanten anpanus.

<sup>16</sup> ¡Quichi anpanus lacocoltilisli amhuanten, telaicana nijmes pachacames! Amhuanten anquijtúa: “Aqui yes quilis ilaixpan Dios len yahui quichía, huan quijtúa ca lajtol hual amo mopala pan ipampa in tiopan hué, cuaquín amo quipía pa quichías in hual quilic. Ma yoje, aqui yes quilis ilaixpan Dios ca lajtol hual amo mopala pampa yahui quichía len, huan quilía pan ipampa in oro calijtic in tiopan hué, cuaquín yihual quipías pa quichías.”

<sup>17</sup> ¡Amo anquimati anlajnamiquía, anunca pachacames, amhuanten! ¿Calía ca innojen monotza ca Dios? ¿Unca in oro, o unca in tiopan hué capa Dios mochihuilia lachipahuali in oro pa huil quitas quinami iyaxca? ¡Anquimati unca in tiopan hué hual monotza ca Dios!

<sup>18</sup> Huan noje amhuanten anquijtúa: “Aqui yes quijtúa ilaixpan Dios pampa yahui quichía len, huan ca lajtol hual amo mopala quijtúa pan ipampa inon capa quilalilo in huendi, cuaquín amo quipías pa quichías. Ma yoje, sinda se quijtúa ilaixpan Dios ca lajtol hual amo mopala pampa yahui quichía len, huan quilía pan ipampa in huendi pa pani capa quilalilo, cuaquín yihual quipía pa quichías.”

<sup>19</sup> ¡Amo anquimati anlajnamiquía, anunca pachacames, amhuanten! ¿Calía ca innojen monotza ca Dios? ¿Unca in huendi, o unca inon capa quilalilo capa Dios mochihuilia lachipahuali in huendi pa huil quitas quinami iyaxca? ¡Anquimati unca in capa quilalilo hual monotza ca Dios!

<sup>20</sup> Yoje, aqui yes quijtús len ilaixpan Dios ca lajtol hual amo mopala, huan quijtúa pan ipampa inon capa quilalilo in huendi, cuaquín amo jan quijtutica pan ipampa inon capa quilalilo in huendi san. Quijtutica pan ipampa capa quilalilo huan pa mochi huendi hual unca pa pani inon.

<sup>21</sup> Huan aqui yes quijtúa len ilaixpan Dios ca lajtol hual amo mopala, huan quijtúa pan ipampa in tiopan hué, yihual amo quijtutica jan pan ipampa in tiopan hué san. Noje quijtutica pan ipampa Dios hual yuli calijtic in tiopan hué.

<sup>22</sup> Noje aqui yes quijtúa len ca lajtol hual amo mopala pan ipampa in cielo, yoje yihual quijtutica pan ipampa in icpali cualtichin capa Dios huelitía huan jan yoje quijtutica pan ipampa Dios hual molalía ipan.

<sup>23</sup> ¡Quichi anpanus lacocoltilisli amhuanten, ilamaxtinijmes in lajtol huan fariseos, amhuanten lacuajcuamananijmes! Amhuanten anquimaca Dios se ca mochi diez inminlajlajco menta huan eneldo huan cominos hual anquipixca, huan amo anquinequi anquinmijnmiquía in lajtomes hual niman

monotzalo ca Dios. Cate innojen lajtomes hual anmitznexutilo quinami monequi pa anyuli anquichijtica len hual Dios quita cuali pa moxtin. Huan cate innojen lajtomes hual anmitznexutilo quinami monequi pa anquimatis analcnilia huan quinami monequi pa anquimatis anquilalia anmolanelto-calisi ca Dios. Cate innojen hual monequi pa anquimatis anquichias. Huan noje monequi pa camo anmocahuas pa anquichias len quililo in oc sequin lajtomes tijtipichin.

<sup>24</sup> ¡Amhuanten telaicananijmes pachacames! Anunca quinami se hual quitzejtzelúa pa quisas se muyol pin al huan quitolúa se camello, pampa ca mías lachialisli anlaquisa anquichijtica in lajtomes tijtipichin huan amo anquinequi anquijnamiquia in lajtomes huejué.

<sup>25</sup> ¡Quichi anpanus lacocoltilisli amhuanten, ilamaxtinijmes in lajtol huan fariseos, lacuajcuamananijmes! Unca quinami ancaltia pa quiahuac in tecomal huan in nixcumil. Ma yoje, pa laijtic cate catzahuac, quinami amhuanten laijtic anmoyolo aunca catzahuac. Anunca catzahuac pampa ancanac mochi hual anquinequic mías. Amo cataya anmoyaxca huan ma yoje anquimixtequilec oc sequin pa ancanas.

<sup>26</sup> Fariseo pachacal, monequi pa tipehuas timochipajtica molaijtíc quinami quichipahualo ilaijtíc in tecomal huan in nixcumil huan cuaquin ancayas chipahuac pa quiahuac.

<sup>27</sup> ¡Quichi anpanus lacocoltilisli amhuanten ilamaxtinijmes in lajtol huan fariseos lacuajcuamananijmes!, pampa amhuanten anquinami in caltzindis layapali iztac hual quichihualo capa quinlalpachulo in mijquimes. Nesilo cualtichin pa quiahuac, huan ma yoje laijtic tenticate ca inminumimes mijquimes huan ca mochi catzahualisli.

<sup>28</sup> Yoje nuso annesi amhuanten noje quinami cuali huan cualtichin huan melahuac pa ammoquiahuac. Ma yoje, laijtic amhuanten antentica ca ilacua-jcuamanalisli anmoyolo huan amo anquinequi anquinelto-ca Dios ilajtol, amhuanten e'elehuís.

<sup>29</sup> ¡Quichi anpanus lacocoltilisli amhuanten ilamaxtinijmes in lajtol huan fariseos lacuajcuamananijmes! Pampa anquinchia in caltzindis capa quinlalpachuje Dios ilajtunijmes, huan anquichijchia cuajcualtichin inminlaj-namiquiltinijmes in lacames cuajcuali.

<sup>30</sup> Cuaquin anquijtúa: “Sinda tiyuliloaya quiman yuliloaya totajtztzian, amo tiquinpalehuiloaya quiman quinmictinijme Dios ilajtunijmes.”

<sup>31</sup> Ca inon anquijtutica nuso pampa amhuanten nojen aunca inminmi-ahumes yehuanten hual quinmictije Dios ilajtunijmes.

<sup>32</sup> Axan ¡xilaquistiacan anquichijtica len pehuaje quichihuaje annotajtz-itzian!

<sup>33</sup> ¡Cuhuames! ¡Amhuanten inminxolomes cuhuames! ¡Quinami huil ammo-quistis pin lacocoltilisli capa cayasi yehuanten hual amo iyaxca Dios!

<sup>34</sup> Pampin, xiquitacan. Annimitztilanilis Dios ilajtunijmes huan lacames hual quimatilo huan lamaxtinijmes. Sequin anquinmictis, sequin anquin-pilus pan cuahuimes. Oc sequin anquinhuitequis pa annotiopames huan oc sequin anquintojtocas pa quisasi pa se caltilan huan pa oc se.

<sup>35</sup> In anmitzpanus pa yoje Dios anmitzmotexpahuilis amhuanten. Anmitz-motexpahuilis pa mochi lacames inminesli latoyahuili, quema, inminesli moxtin lacames cuajcuali hual cataloaya lamictili pan mochi in lalticpan quiman pehuac in lalticpan huan pa axan. Inon unca quiman Abel yec lamictili pa quiman anquimictic Zacarias hual yec ixolol Baraquias. Yihual anquimictic lajco pin tiopan hue huan inon capa quilalilo in huendis.

<sup>36</sup> Neli annimitzilía, Dios quinmotexpahuilis inminpampa moxtin yehuanten hual cate lamictili. Quema, Dios anmitzmotexpahuilis amhuanten hual anyultica axan.

*Jesús quinchoquilía yehuanten hual chantilo pa Jerusalén*

(Lc. 13:34-35)

<sup>37</sup> ¡Jerusalén, Jerusalén! Yehuanten lajitic tehual, Jerusalén, yehuanten quinmictilo Dios ilajtunijmes huan quinlaxililo tixcalimes yehuanten hual Dios quintilanilía. ¡Quichi míac nicnequic niquinnechicuc yehuanten pa Jerusalén quinami quinnechicúa se lapachuani iparachitos itzindan inastacapajmes huan amo quinequije!

<sup>38</sup> Xiquitacan. Cayasi lacajcahuali chantiticate yehuanten pin caltilan huan Dios amo cayas ca yehuanten.

<sup>39</sup> Pampa annimitzilía neli, yajmo annechitas axan pa quiman. San annechitas quiman ajsis in tonali quiman anquijtus: “Ma Dios quipía yihual hual huala ca ilahueliltisli, ichicahualisli in Tata.”

## 24

*Jesús quinmilía pampa in tiopan hué yes laxitinili*

(Mr. 13:1-2; Lc. 21:5-6)

<sup>1</sup> Quisac Jesús pin tiopan hué, uyajtíac huan ajsitiaje capa yihual imonextiliniymes. Pehuaje quilaquetzilije quinami cataloaya lachijchihuali cualtichin mochi icalimes in tiopan hué.

<sup>2</sup> Huan Jesús quinnanquiloc:

—¿Anquinmita mochi innojen? Neli annimitzilía, amo mocahuas nican se tel pan oc se tel hual amo quimayahuisi, mochi quixitinsi.

*Jesús quinmaxtía quinami quimatisi quiman ajsitihuala in tonali quiman lamis in lalticpan*

(Mr. 13:3-23; Lc. 21:7-24; 17:22-24)

<sup>3</sup> Cuaquín uyaje pani in loma (tepetzindi) itoca Olivos. Nepa molalic Jesús, hualaje capa yihual imonextiliniymes inminhuían, quilije:

—Xitechili, ¿quiman cayasi innojen? Huan ¿len yes in lanextilisli calica ticmatasi quiman tihualas pa tihuelitis, in lanextilisli calica ticmatasi quiman lamis in lalticpan hual unca axan?

<sup>4</sup> Jesús quinnanquiloc:

—Ximolachilican pa camo anmitzcuaajcuamanas amaqui.

<sup>5</sup> Hualasi míac quijtuticate pampa quipialo nolahueliltisli, huan quijtus: “Nehual niCristo”, huan quincuaajcuamanasi míac lacames.

<sup>6</sup> Anmitzlamachiltisi lacames pampa cate moanalisi cajcapa pin lalticpan, moanalisi hual panujticate huan moanalisi hual yalo pehualó. Amo ximomajtican, innojen quipialo pa panusi huan ayamo lamis in lalticpan.

<sup>7</sup> Se lahueliltisli moanas ca oc se lahueliltisli. Yehuanten pa se lali moanasi ca yehuanten pa oc se lali. Cayas mayandi cajcapa huan miquisi míac. Cayas cocolisli, huan laulinis chicahuac cajcapa.

<sup>8</sup> Mochi innojen yesi jan quinami pehuasi in míac cocolisli hual yalo panulo lacames. Unca quinami mococúa se sihual quiman pehua lacati ixól.

<sup>9</sup> Cuaquinon anmitztemacasi pa anmitzhuejuecaltisi huan anmitzmictisi. Huan moxtin anmitzcocolisi pampa annechneltoca.

<sup>10</sup> Pan innojen tonalijmes míac lacames mijcuansi pa yajmo quitocasi iojli Dios, yajmo quinellocasi. Huan motemacasi se huan oc se pa yesi latojtocali. Mococolisi se huan oc se.

11 Huan nesilo cajcapa míac hual quijtusi pampa yehuanten cate Dios ilajtunijmes. Ma yoje, islacatisi, huan yehuanten quincuaajcuamanasi míac lacames.

12 Huan cayasi yoje míac lacames hual yultialo quichijtcate amo cuali. Pampín, míac mocahuasi pa quinlasojlasi oc sequin quinami lalasojlaniyme.

13 Ma yoje, aquí yes mopepenialtis huan mochicahualtis pa panus mochi in amo cuali, yihual Dios quiquixtilis pin polehuilisi.

14 Huan momachiltisi ilamachiltisilisi cuali nolahueliltisilisi pa capa yes chantilo lacames pin lalticpan, pa quimatisi pa mochi lalimes. Cuaquín lantihualas mochi pan lalticpan. Díos laquisas ca in hual quichijtica cá in lalticpan.

15 'Pa yina, Daniel ilajtuni Dios quijsuiluc pa iamal, quijsuiluc pampa yahuiaya nesi in hual niman tetzcuinuc hual lacatzahua huan laijlacúa. (Ma quimati len quinequi quijtúa inon mochi sejse hual momaxtitica.) Huan quiman anquitas inon yehuatica pin tiopan hué capa jan unca iyaxca Dios pa cayas, capa in niman chipahuac pin tiopan hué,

16 cuaquín ma cholú aquí cayas pa Judea, ma cholú pan lomas (tepemes).

17 Huan aquí cayas paní pa icalí, ma camo temu pa quiquixtis len pa icalijtic.

18 Huan aquí cayas pa icuajmili, ma camo mocuepa pa canas inahuas.

19 ¡Quichi panusi lacocoltisilisi yehuanten hual yalo quipialo xolomes huan yehuanten hual lachichiltijtcate innojen tonalijmes!

20 Xictemachican Dios pa como anquipías pa ancholus quiman cayasi tonalijmes hual sehua, o pa como panus pan tonali quiman anmosehuía.

21 Unca pampa lacames yalo panulo lacocoltisilisi pa in tonalijmes quinami amo quiman panunijme quiman pehuac in lalticpan niman pa yina huan pa mochi in tonalijmes hual lantihualaje ca axan. Huan amo quiman cayas yoje oc seppa quiman panusi innojen tonalijmes.

22 Huan sinda Dios amo quilaliaya pa como huejcahualosquiaya innojen tonalijmes, cuaquín amaquí mocahuaya yultica. Ma yoje, amo cayas yoje. Díos quilalic pa como huejcahualosquiaya innojen tonalijmes pampa quinlasojla yehuanten hual quinlajtultic pa yesi ilacames.

23 'Cuaquín, sinda se anmitzilía: "Xiquitacan, nican unca in Cristo", o "Xiquitacan, nepa unca", amo xicneltocacan.

24 Pampa nesisi lacuaajcuamananijmes hual quijtusi islacatijtcate pampa cate cristos yehuanten huan nesisi lajtunijmes hual quijtusi pampa anmitzilijtcate ilajtomes Díos, huan ma yoje islacatijtcate. Quinchihuasi hual pampa innojen in lacames moitasi momajtticcate. Quinchihuasi pampa quinequisi quincuaajcuamanasi, sinda huil, yehuanten hual Díos quinlajtultic pa yesi ilacames.

25 Xiquitacan. Axan annimitzilic inon quiman ayamo panuc. Pampín sinda anmitzilisi:

26 "Xiquitacan. Cristo unca nepa capa amaquí chanti", cuaquín amo xiquisacan amhuanten ca umpic. O sinda anmitzilis: "Xiquitacan. Cristo unca nican niman calijtic", amo xiquinneltocacan.

27 Pampa jan quinami pelanía pejtica capa quisa in tonali huan lami capa calaquí in tonali, yoje yes quiman nel nihualas, nel ilacal in cielo.

28 Capa cayas in mijquil, nepa monechicusi in tzopilojmes.

*Jesús quinmilía quinami cayas quiman hualas*  
(Mr. 13:24-37; Lc. 21:25-33; 17:26-30,34-36)

29 'Jan axcan quiman lamisi panusi innojen tonalijmes capa panulo m'iac lacocoltilisli, cuaquín laticumactis in tonali huan in mesli amo quinequis lahuis. Hueztiyasi in luceros (silalimes) pin cielo huan molinisi in ijyecames amo cuajcuali pin ijyecal hual huelitilo ca lacames amo cuajcuali pan lalticpan, quipolusi inminchichualisli.

30 Cuaquinon moitas pin cielo in lanextilisli hual lamachiltis pampa huala nel ilacal in cielo. Pampín moxtin pin lalticpan chocasi quiman quitasi hualajtica ca lahuelilitisli chicahuac huan laixpelalisli cualtichin, hualajtica pin mextemimes.

31 Quintilanis ilanahuatinijmes pin cielo ca lancaquetzalisli chicahuac, xahuantica chicahuac ca ilancaquetzaloni. Quinnechicusi yehuanten hual Dios quinlajultic pa yesi iyaxca. Quinnechicusi quinixtilijticate pa mochi cajcapa pin lalticpan, pa se itenco in lalticpan capa pehua in cielo ca capic unca in oc se itenco in lalticpan capa lami in cielo.

32 'Ximonextilis in lajtol inahuac in amacúal tipichin calica annim-itznextilis len nicnequi niqijytúa: Quiman mochiá sejselic iramitas (iitz-molinquimes) huan ixua isacayo, cuaquín anquimatis pampa amo huejcahuas pa ajsis xupanda.

33 Yoje, amhuanten noje quiman anquitas mochi innojen, cuaquín anquimatis pampa ajsitihuala inon hual yahui panúa, quinami se hual tijcaquía jan pa quiahuac in lalapujquil.

34 Annimitzilía neli, mochi inon panus quiman ayamo lamisi yehuanten pin lali hual yulticate nepa.

35 Mocahuasi pa yesi in cielo huan in lalticpan. Ma yoje, nolajtomes amo quiman mocahuasi pa yesi, amo quiman motzacuasi pa camo mochihuasi.

36 'Ma yoje, amaqui quimati calía tonali huan hora quiman mochihuasi innojen. Amo quimatilo in lanahuatinijmes pin cielo, amo nicmati nehual hual Dios ixól. San Dios noTajtzin quimati.

37 'Jan quinami cataya quiman yulini Noé pan lalticpan pa yina, yoje cayas quiman nía nihuala nehual ilacal in cielo.

38 Pa innojen tonalijmes quiman Dios ayamo quinmatocctic moxtin, lacames yulinijme lacuajtataloaya huan launtataloaya huan monamictitataloaya huan quinmacatataloaya inminxolomes sihuames pa monamictilosquiaya, yoje yulinijme. Cuaquín ajsic in tonali capa calaquic Noé pin arca.

39 Huan amo moijnamiquiltije len yahuiaya panu. Cuaquín huetzic in al hual catani pa pani pin cielo huan lejcuc in al hual catani itzindan in lali huan quinhuicac quinmatocctitataya moxtin. Yoje cayas noje quiman nihualas nehual, ilacal in cielo.

40 Pa in tonali, cayasi ome lacames pan cuajmili, se yes lahuicali huan in oc se yes lacahuali.

41 Ome sihuames cayasi in omenten testicate pan melal, se yes lahuicali, oc se lacahuali.

42 'Pampín, ximolachilican pa mojmosta anmoijnamiquiltitías, pampa amo anquimati calía tonali yahui huala in Tata.

43 Xicmatican inon: Sinda quimatiaya iteco in cali quiman yahuiaya huala in laxtequini, cuaquín lachiaya huan amo quimacahuiltiaya quichía coyunquil pa calaquisquiaya quixtequili len iyaxca hual cataya calijtic.

44 Pampín, amhuanten noje xicayacan xilachixtiacan, pampa nehual ilacal in cielo nía nihuala quiman amo anquijnamicctica inon hual annimitzilic.

*Ome tequipanujquimes, se hual amo quineltoca huan oc se hual quineltoca iteco*

*(Lc. 12:41-48)*

<sup>45</sup> Sinda se teco quipía se tequipanujquil hual quimati huan quineltoca, cuaquín quicahuilis pa quilachilis pan mochi icali huan pa quinmacas moxtin len quicuasi pa quiman monequi pa lacuasi.

<sup>46</sup> Quipías paquilisli in tequipanujquil hual quichijtica yoje quiman mocuepa iteco pa ichan huan quita itequipanujquil quitequipanuilitica yoje.

<sup>47</sup> Neli annimitzilía in teco quicahuilis itequipanujquil pa quilachilis pan mochi hual quipía pampa iteco yoje quimati yihual itequipanujquil quimati quitequipanuilia cuali.

<sup>48</sup> Huan sinda itequipanujquil mochías amo cuali, yihual pehua quijtúa laijtic yihual: “Huejcahua pa hualas noteco.”

<sup>49</sup> Yoje pehua quihuitequía icnían tequipanujquimes huan pehua lacua huan lahuana ca in lahanquimes.

<sup>50</sup> Cuaquín hualas iteco pan se tonali quiman amo cayas quichixtica, se tonali hual amo quimatiaya.

<sup>51</sup> Huan iteco quinmacas lacocoltilisli chicahuac. Quitilanis pa quipías in hual quipiasí yehuanten hual yuliloaya lacuajcuamantataya inminlaixpan moxtin. Cuaquín chocas huan quincuaajcuas ilames.

## 25

### *In majlaci sihuames yajyancuic*

<sup>1</sup> Cuaquín huil quijtúa se pampa ilahueliltilisli in cielo unca quinami diez sihuames yajyancuic hual quihuicaje chahuac huan inmintapalquitas pa lalahuisi huan uyaje pa se monamictilisli pa quisalosquiaya quinamiquilo in lalac hual monamictiaya.

<sup>2</sup> Cinco (macuili) ca in sihuames yajyancuic amo quimatiloaya huan in oc sequin macuili quimatiloaya.

<sup>3</sup> Yehuanten hual amo quimatiloaya amo quihuicaje ca yehuanten oc sequin tapalquitas ca chahuac, san in hual cataya laijtic inmintapalquitas.

<sup>4</sup> Yehuanten hual quimatiloaya quihuicaloaya chahuac pa inmintapalquitas pa quiman quinequiaya.

<sup>5</sup> Huan quinami huejcahuac hualac in lalac hual monamictiaya, quipiaje cochilisli in sihuames yajyancuic huan cochije.

<sup>6</sup> Cuaquín quinami pa lajco layúa mocaquic tzajtzije, quijtuje: “¡Axan huala in lalac! ¡Xiquisacan xicnamiquican!”

<sup>7</sup> Moxtin in sihuames ejsaje huan moquetzaje pa quichijchihuasi inmintapalquitas.

<sup>8</sup> Huan yehuanten hual amo quimatiloaya quinmilije yehuanten hual quimatiloaya, quil: “Xitechmacacan nadita anmochahuac pampa mosejticate totapalquitas”, quil.

<sup>9</sup> Huan in sihuames hual quimatiloaya quinnanquilije: “Amo huil, pampa cuaquín amo techajsis tehuanten huan amhuanten. Monequi pa anyahuis capa in lanamacanijmes huan ximocuhuilican chahuac.”

<sup>10</sup> Quiman uyaje in macuili hual amo quimatiloaya pa quimocuhuilisi, cuaquín ajsic yihual hual monamictiaya. Calaquije ca yihual yehuanten hual quipialoaya chahuac, calaquije pan monamictilisli, cuaquinon cataya latzacuali in lalapujquil.

<sup>11</sup> Panuc nadita, ajsije innojen oc sequin sihuames yajyancuic pan lalapunquil quinoztataloaya: “¡Tata, Tata, xitechlapuli!”

<sup>12</sup> Huan yihual quinnanquilic: “Neli, annimitzilía da amo annimitziximati.”

<sup>13</sup> Cuaquinon Jesús quinmilic:

–Xilachixtiacan, pampa amo anquimati in tonali huan in hora quiman nihualas nehual ilacal in cielo.

*Se lapuhualisli hual lanextilía quinami sequin quimiactije pocuinijmes tomin*

*(Lc. 19:11-27)*

<sup>14</sup> Ilahuelilitilisi in cielo unca jan quinami se lalac hual yahui pa oc se lali, huan quiman ayamo quisac, quinnotza itequipanujquimes, quintemacac itomin pa quilachilisi.

<sup>15</sup> ‘Se ca yehuanten yihual quimacac quinami macuili mil tomin, ca oc se quimacac ome mil, huan ca oc se quimacac se mil. Cuaquin mohuicac pa oc se lali.

<sup>16</sup> In tequipanujquil hual quipíac macuili mil lacuhuac huan lanamacac ca in tomin, huan monechiculic oc sequin macuili mil.

<sup>17</sup> Jan yoje monechiculic oc sequin ome mil in se hual quipíac ome mil tomin.

<sup>18</sup> Huan in se hual quipíac se mil uyac lahuajuanac huan quilatic itomin iteco pin lali.

<sup>19</sup> ‘Cuaquin, quiman panuje míac tonalijmes, mocuepac inminteco innojen tequipanujquimes huan ca yehuanten pehuac laquetzac inahuac itomin.

<sup>20</sup> Hualac ca yihual in se hual quipíac in macuili mil tomin, quihualicac ca yihual oc sequin macuili mil tomin, quilic: “Tata, tichtemacac macuili mil tomin huan xiquita, nimitznechiculic oc sequin macuili.”

<sup>21</sup> Quinanquilic iteco: “Ticchíac cuali, tel tiunca se tequipanujquil cuali hual nicmati huil ticchía mochi cuali. Ticchihuac cuali ca nadita. Pampín nimitzmacas lahuelilitilisi ca míac. Axan tía tiquitas quichi paquilisli huil nimitzmaca. Xicalaqui capa nehual.”

<sup>22</sup> Cuaquin hualac in se hual quipíac in ome mil tomin, quilic: “Tata, tichtemacac ome mil tomin. Xiquita, nimitznechiculic oc sequin ome mil.”

<sup>23</sup> Iteco quinanquilic: “Ticchíac cuali, tel tiunca se tequipanujquil hual nicmati huil ticchía mochi cuali. Ticchíac cuali ca nadita. Pampín nimitzmacas lahuelilitilisi ca míac. Axan tía tiquita quichi paquilisli huil nimitzmaca. Xicalaqui capa nehual.”

<sup>24</sup> Quiman hualac pa iteco in se hual quipíac in se mil tomin, quilic: “Tata, nimitziximati quinami tiunca se lalac chicahuac pa moyolo. Tilapixca capa amo tilatocac huan tilapejpena capa amo tilaxinic.

<sup>25</sup> Huan nimomajtic, pampín niclatic pin lali motomin. Xiquita, nican ticpía len moyaxca.”

<sup>26</sup> Iteco quinanquilic: “Elehuis tequipanujquil tehual, tilatzehui. ¿Ticmati nuso pampa nilapixca capa amo nilatocac huan nilapejpena capa amo nilaxinic?”

<sup>27</sup> Pampín ticpiaya pa tictemacasquiaya notomin yehuanten hual quilanehuilo tomin. Cuaquin quiman nihualaya, nicpiaya notomin ca imiactilisi.”

<sup>28</sup> Cuaquin quinmilic yehuanten hual nepa cataloaya: “Xijquixtilican in mil tomin huan ximacacan yihual hual quipía in diez mil tomin.”

<sup>29</sup> Pampa aqui quipía, yihual quimacasi noje oc sequin huan quipías niman míac pa cajcoquis. Aquí hual amo quipía, quiquixtilisi in nadita hual quipía.

<sup>30</sup> Huan in tequipanujquil hual amo monotza, xiclasacan pa quiahuac capa laticumac. Nepa chocasi huan quincuaajcuasi inminlames.

*Quijtúa quinami Dios quinmotexpahuilis yehuanten hual yulilo pa mochi lalimes*

<sup>31</sup> Quiman nihualas nehual ilacal in cielo, nihualas quinami se hué, huan Dios ilanahuatinijmes pin cielo nechyahualusi. Cuaquin nimolalis pan noicpali hual laixpelas cualtichin.

<sup>32</sup> Umpa quinnechicusi nolaixpan moxtin yehuanten hual yulinijme pa mochi inminlalimes. Niqunxiluilis sequin huan oc sequin quinami in lachiani quinxiluilía iborregos pa camo cayasi ca ichivos.

<sup>33</sup> Quinlalía in borregos pa ima cuali huan quinlalía in chivos pan ima amo cuali.

<sup>34</sup> Cuaquin niqunmilis yehuanten hual cate pan noma cuali: “Xihualacan nican amhuanten hual anquipaquiltía noTajtzin, xicpiacan pa anmoyaxca in hual anmijchihuilic Dios quiman quipehualtic mochi.

<sup>35</sup> Inon anquipías pampa quiman nimayantataya, annehlacualtic, niamicataya huan annehlauniltic, nicataya se hual amo annehximatiaya huan annehnamiquic quinami se ca amhuanten.

<sup>36</sup> Nicataya nacatil huan annehlaquentic, nicataya cocoxquil huan annehpaxaluilic, nicataya latzacuali pin calijtic, huan anhualac capa nehual pa annehpalehuis.”

<sup>37</sup> Cuaquin quinanquilisi yehuanten hual quipialo cuali inminyolo, quilisi: “Tata, ¿quiman timitzitaje timayantataya huan timitzlacualtije? ¿Quiman timitzitaje tiamictataya huan timitzlauniltije?”

<sup>38</sup> ¿Quiman timitzitaje quinami se hual amo timitziximatiloaya huan timitznamiquije quinami ticataya se ca tehuanten, o nacatil huan timitzlaquentije?”

<sup>39</sup> Huan ¿quiman ticataya cocoxquil, o latzacuali pin calijtic huan timitzpaxalulije?”

<sup>40</sup> Niqunmilis huan niqunmilis: “Neli annimitzilía pampa mochi hual anquichihuilic se ca innojen nocnán, mas que yec in niman tipichin ca yehuanten, yoje cataya quinami annehchihuilijfataya nehual.”

<sup>41</sup> Cuaquin niqunmilis yehuanten hual cate pa noma amo cuali: “Xiquisacan capa nehual ca yoje, amhuanten ejelehuis, ximijcuanican pa yajmo ancayas nican, pa anyas pin tixuxli hual amo quiman sehuis, tixuxli lalaltili pa in lili huan ilanahuatinijmes.

<sup>42</sup> Pampa nimayantataya huan amo annehlacualtic, niamicataya huan amo annehlauniltic.

<sup>43</sup> Nicataya se hual amo annehximatiaya huan amo annehnamiquic quinami se ca amhuanten. Nicataya nacatil, huan amo annehlaquentic. Nicataya cocoxquil huan latzacuali pin calijtic huan amo annehpaxaluilic.”

<sup>44</sup> Cuaquin nechnanquilisi yehuanten noje, quilisi: “Tata, ¿quiman timitzitaje timayantataya o tiamictataya o quinami se hual amo timitziximatiloaya o nacatil o cocoxqui o latzacuali pin calijtic huan amo timitzpalehujije?”

<sup>45</sup> Huan nehual quinami hué niqunmilis: “Neli annimitzilía pampa mochi hual amo anquichihuilic se ca innojen nocnán, mas que yec in niman tipichin, yoje amo annehchihuilic nehual.”

<sup>46</sup> Cuaquin innojen yasi pa in lacocoltilisli hual amo quiman lamis, huan yehuanten hual quipiaje inminyolo cuali yasi capa amo quiman mocahuasi pa yulisi cuali.



## 26

*Quitemulo quinami huil quiquitzquisi Jesús*  
(Mr. 14:1-2; Lc. 22:1-2; Jn. 11:45-53)

<sup>1</sup> Yoje, quiman Jesús lamíc quinmilic mochi inon, quinmilic imonextilini-jmes:

<sup>2</sup> —Anquimati pampa ajsis in ilacualisli pascuas axan ca ome tonalijmes. Cuaquin nechtemacasi pa nechpilusi pan se cuahuil nehual ilacal in cielo.

<sup>3</sup> Cuaquinon pan innojen tonalijmes monechicuje in tiopistas huejué huan abuelojmes inminhueyenten in judíos huan ilamaxtinijmes in lajtol. Monechicuje pa ilajcotiyan icali cualtichin Caifás, yihual ihué in tiopistas.

<sup>4</sup> Nepa molaquetzililoaya quinami yahuilloaya quiquitzquilo Jesús ca lacuajcuamanalisli pa quitilanisi pa quimictisi.

<sup>5</sup> Ma yoje, quijtuloaya:

—Ma camo ticchiuacan quiman panujtica in fiesta pa camo majcoquisi in lacalera pa moanasi ca tehuanten.

*Se sihual quixahuilía Jesús*  
(Mr. 14:3-9; Jn. 12:1-8)

<sup>6</sup> Jesús cataya pa icali Simón hual quipiani in cocolisli itoca lepra huan pampín quitocayaltinijme in Leproso.

<sup>7</sup> Huan ajsic capa Jesús se sihual quihualicatataya se tapalcal lachihuali ca alabastro. In tapalcal tentataya ca chahuac hual ajuíac huan ipatiaya míac. Jesús cataya pan lacualisli huan in sihual quitoyahuac in chahuac pa itzontecon Jesús.

<sup>8</sup> Quitaje inon imonextilini-jmes, cualaniloaya, pehualoaya quijtulo:

—¿Pa len quipoluc yoje in chahuac?

<sup>9</sup> Pampa huil quinamacaloaya in chahuac pa míac tomin huan huil quinmacaloaya yehuanten hual amo quipialo míac, yoje pa quinpale-huilosquiaya.

<sup>10</sup> Quiman Jesús quimatic len quijtuloaya, quinmilic:

—¿Leca anquimaca tequil in sihual? Nejchihuilic len cuali nehual.

<sup>11</sup> Mojmosta anquinpía ca amhuanten yehuanten hual amo quipialo míac. Nehual amo anyahui annehpía mojmosta.

<sup>12</sup> Quiman yihual nechtoyahuilic in chahuac hual ajuíac pan nocuerpo, yoje nejchijchihuilic nocuerpo pa quiman nechlalpachusi.

<sup>13</sup> Annimitzilía neli, capa yes quinnahuatilo in nolamachiltilisli cuali pa mochi in lalticpan, cuaquin quinnahuatisi noje inon hual nejchihuilic yihual nehual, pa yoje moxtin quijnamiquisi inon hual nejchihuilic.

*Judas huan in tiopistas huejué quichihualo inminlajtulisli*  
(Mr. 14:10-11; Lc. 22:3-6)

<sup>14</sup> Cuaquinon uyac in se imonextilini hual motocaya Judas Iscariote, uyac capa in tiopistas huejué.

<sup>15</sup> Quinmilic:

—¿Quichi annechlaxlahuis sinda annimitztemaca yihual?

Huan mocahuaje pa quilaxlahuisi ca plata, ca treinta (sempuhualihuan-majlacli) tomin.

<sup>16</sup> Huan jan axcan quitemujtinemiaya quiman cuali huil quintemacas Jesús ca yehuanten.

*Jesús quinnextilía quinami tiquijnamiquisi*  
(Mr. 14:12-25; Lc. 22:7-23; Jn. 13:21-30; 1Co. 11:23-26)

17 Pan tonali quiman pehuac in fiesta (ilhuil) quiman quicualo in pan hual amo quipía laxocoyajquil, hualaje capa Jesús imonextiliniymes, quilije:

—¿Capa ticnequí pa ticyucxiltisi in nacal pa huil tijcuas iborreguito in pascua?

18 Quinmilic:

—Xiajtiacan pin caltilan pa icali in lalac huan xiquilican: “Quijtúa in Lamaxtini: Amo huejcahua pa nechajsis quiman nipanús nolacocoltilisli. Pampín nía nijcua iborreguito in pascua ca nomonextiliniymes pa mochan.”

19 Quichihuaje quinami quinmilic Jesús, huan quiyucxiltije iborreguito in pascua.

20 Quiman layuajtic, Jesús cataya pan lacualisli ca in doce (majlaci-huanome) imonextiliniymes.

21 Huan quiman lacuajtataloaya, quinmilic:

—Annimitzilía neli pampa se ca amhuanten yahui nechtemaca ca nolacocoliniymes.

22 Huan icnotiloaya niman míac, pehualoaya quililo mochi sejse:

—¿Amo unca nehual, Tata?

23 Huan quinnanquilic Jesús:

—Yihual hual huan nehual tijcalactilo tomajma pin xicali ca altzindi chichic, yihual in se hual nechtemacas.

24 Nehual ilacal in cielo, nía nicana in ojli hual Dios nechlalilic quinami unca lajcuiluli pin iamal ilajtol. Ma yoje, ¡quichi panús lacocoltilisli in lalac hual nechtemaca ca nolacocoliniymes nehual ilacal in cielo! Cataya cuali pa in lalac sinda amo lacatiaya.

25 Quinanquilic Judas in hual quitemacasquiaya, quilic:

—¿Amo unca nehual, Lamaxtini?

Jesús quinanquilitic:

—Tehual tiquijituc.

26 Lacuajtataloaya yehuanten, Jesús canac in pan pa imajmajuan, quisehuic Dios, huan quilapanac. Cuaquinon quinmacac imonextiliniymes, quinmilic:

—Xicanacan huan xijcuacan. In nocuerpo.

27 Cuaquinon canac in tapalquita pa imajmajuan, quisehuic Dios, cuaquín quinmacac, quinmilitica:

—Xicunican anmoxtin iayo uva coc pin tapalquita.

28 Inon noesli hual quichía pa yes cuali Dios ilajtulisli yancuic ca amhuanten. Amo lamis in lajtulisli. Noesli toyahuis pa míac pa quinquixtilis yehuanten inminlajlaculisli, Dios quinpujpuhuas.

29 Huan annimitzilía pampa yajmo nicunis in iayo uva coc. Ma yoje, quiman noTajtzin ilahuelilitisli pin cielo pehua monextía pan lalticpan, cuaquín pa in tonali nicunis yancuic ca amhuanten.

*Jesús quilía Pedro pampa yahui quijtúa pampa amo quiximati  
(Mr. 14:26-31; Lc. 22:31-34; Jn. 13:36-38)*

30 Cuaquín quicantaruje (quicuicaje) innojen lajtomes huejué pa Dios, huan umpa uyaje pa in loma (tepetzindi) hual itoca Olivos.

31 Cuaquinon Jesús quinmilic:

—Anmoxtin anyahui annehcajcahua axan in layúa, pampa anpinahuas pa annehpiás nehual pa annolamaxtini. Yahui caya yoje pampa Dios ilajtol lajcuiluli quijtúa: “Nicmictis in lachiani hual quinmita in borregos, huan in borregos yesi lasemanali ca cipac yes.”

<sup>32</sup> Ma yoje, quiman niyultica oc sejpa, nía annimitzlaicana amhuanten pa Galilea.

<sup>33</sup> Cuaquinon Pedro quilic:

—Mas que moxtin mitzcajchualo pampa pinahuasi mitzpiasi pa inminlaxmaxtini, nehual amo quiman nimitzcajchahuas.

<sup>34</sup> Huan Jesús quilic Pedro:

—Nimitzilía neli pampa axan pan in layúa ayamo xahuanis in gallo, huan tehual tiqijtus pampa amo tichiximati, tiqijtus sejpa huan oc sejpa, quema, tiqijtus ca ye lajtulisli.

<sup>35</sup> Pedro quilic:

—Mas que nicpiaya pa nimiquis ca tehual, damo niquiliaya pampa amo nimitziximati.

Huan yojque quijtuje moxtin imonextiliniymes.

*Jesús quilajlanía Dios pin lajcotiyán Getsemaní*

*(Mr. 14:32-42; Lc. 22:39-46)*

<sup>36</sup> Cuaquinon hualaje ca imonextiliniymes pan se lajcotiyán itoca Getsemaní, huan Jesús quinmilic:

—Ximolalican nican huan nehual nías ca umpic pa niclajlanis Dios.

<sup>37</sup> Huan quinhuicac ca yihual Pedro huan in ome ixolomes Zebedeo huan pehuaya icnoti niman míac, mococujtiahuiaya niman míac pa iyolo.

<sup>38</sup> Cuaquinon quinmilic:

—Nechcocojtica noyolo míac, huan nilamati quinami nimictica. Ximocahuacan nican amhuanten huan xilachiacan ca nehual.

<sup>39</sup> Cuaquinon Jesús uyac nadita huejquita, huetzic pa iixco, quilajlanic Dios, quilic:

—NoTajtzin, sinda huil, ma camo nechpanu in hual yahui nechpanúa. Ma yoje, ma camo mochía quinami nicnequi, ma mochía quinami tehual ticnequi, inon ma ye.

<sup>40</sup> Cuaquinon mocuepac pa capa cataloaya yehuanten, quinmitac coxtataloaya, huan yihual quilic Pedro:

—¿Amo huil anlachía jan se hora san ca nehual?

<sup>41</sup> Ximocahuacan anejsatica huan xiclajlanican Dios, pa yoje amo anmitztilanilis anmoyolo Satanás. Neli pa anmoyolo anquinequi anquichía cuali. Ma yoje, anmocuerpo (anmonacayo) amo quipía chichahualisli pa quichías.

<sup>42</sup> Oc sejpa uyac huan yojque quilajlanic Dios, quilic:

—NoTajtzin, sinda inon hual yahui nechpanúa amo huil yes lapatili, cuaquín ma mochía quinami ticnequi.

<sup>43</sup> Huan oc sejpa quiman mocuepac capa cataloaya imonextiliniymes, quinmitac coxtataloaya pampa quinamantataya in cochilisli.

<sup>44</sup> Quincahuac yehuanten huan oc sejpa uyac, quilajlanic Dios quilijtataya oc sejpa in lajtomes hual lamic quijtuc. Yoje quilajlanic ca ye lajlanilisli.

<sup>45</sup> Cuaquinon hualac capa cataloaya imonextiliniymes huan quinmilic:

—Ancochi huan anmosehuía pa in nadita hual anmitzcahuilía. Xiquitacan, axan ajsic ilajco in layúa quiman nehual ilacal in cielo nicayas latemacali pa nechquitzquisi in lacames lajlaculi.

<sup>46</sup> Ximoquetzacan, ma tiacan. Xiquitacan, axan yihual hual nechtemaca huala.

*Quiquitzquilo huan quihuicalo Jesús*

*(Mr. 14:43-50; Lc. 22:47-53; Jn. 18:2-11)*

<sup>47</sup> Huan ayamo lamiaya laquezataya Jesús, xiquitacan, hualaya Judas, in se imonextilini ca in doce. Ca yihual hualaloaya se lanechiculisli hual yeje lacames hual in tiopistas huejué huan inminhuejueyenten in judíos quintilanije. Quimpixtihualaloaya cuahuimes huan teposli calica moanalo guaches.

<sup>48</sup> Huan Judas hual quitemacaya Jesús quinmacac in míac lalalera se lanextilisli, quinmilic:

—Aqui yes nictenamiquis, yihual in se, xijquitzquican.

<sup>49</sup> Huan jan axcan hualaya ca Jesús, quilic:

—¡Ma Dios mitzpía, Lamaxtini!

Huan quitenamiquic.

<sup>50</sup> Jesús quinanquilic:

—Nito, ¿pa inon tiunca nican?

Cuaquinon hualaje, molaxilije inmajmajuan pani Jesús huan quiquitzquiquisaje.

<sup>51</sup> Ca inon, xiquitacan, se hual cataya ca Jesús quixilanic imajma huan quiquixitiquisac iteposli pa moanalisli, quimacac se latzontequilisli itequipanujquil in tiopista hué, quicotonilic se inacas.

<sup>52</sup> Jesús quilic:

—Ximopili moteposli capa monequi mocahuas. Moxtin hual moanalo ca teposli pa moanalisli noje miqusi pan ipampa in teposli.

<sup>53</sup> ¿Amo ticmatí nehual huil niclajlanía noTajtzin huan Yihual nechtilanilis jan ajnaxcan doce batallones ca ilanahuatinijmes guaches hual cate pin cielo? Quema, huan oc se sinda nicnequiaya.

<sup>54</sup> Ma yoje, sinda yoje nichihuaya, ¿quinami lamiaya mochía Dios ilajtol lajcuiluli hual quijtúa pampa monequi pa nechpanus inon?

<sup>55</sup> Cuaquinon Jesús quinmilic in míac lalalera, quinmilic:

—¿Anquisac ca teposlimes huan cuahuimes huan quinami anquisaya anquiquitzqui je laxtequini? Itequi nimolaliaya pin tiopan nilamaxtitataya huan amo anechquitzquic.

<sup>56</sup> Ma yoje, mochi inon panujtica pa yoje lamis mochías len quiqcuiluje ilajtunijmes Dios.

Cuaquinon moxtin imonextiliniijmes quicajcahuaje, choluje.

*Jesús inminlaixpan yehuanten hual yeje in Lanechiculisli Hué  
(Mr. 14:53-65; Lc. 22:54-55, 63-71; Jn. 18:12-14, 19-24)*

<sup>57</sup> Yehuanten hual quiquitzquije Jesús quihuicaje ca ilaixpan Caifás in tiopista hué, capa cataloaya lanechiculi ilamaxtinijmes in lajtol huan inminhuejueyenten in judíos.

<sup>58</sup> Pedro quitocac nejnentataya huejca. Ajsic pa ilajcotiyan icali in tiopista hué. Nepa calaquic huan molalic ca in guaches pa quitasquiaya quinami yahuiaya laquisá mochi inon.

<sup>59</sup> In tiopistas huan in oc sequin ca in Lanechiculisli Hué quitemuloaya lacames hual quijtulosquiaya latexpahuilisli ilaixpan Dios ca lajtomes hual amo mopalalo. Yojque huil quitilanilosquiaya Jesús pa yesquiaya lamictili. Huan quema, quitemuloaya lacames hual islacatilosquiaya quijtutataloaya ilaixpan Dios pampa quijtuloaya melahuac.

<sup>60</sup> Ma yoje, amo quitaje lacames hual huil quijtuloaya len ca lajtol melahuac, mas que míac lacames islacatije inahuac yihual. Cuaquin lamije hualaje inminlaixpan ome lacames islacatinijmes.

<sup>61</sup> Quimotexpahuilije, quijtuje:

—In se quijtuc: “Nehual huil nicxitinía Dios itiopan hué huan quiman panusi ye tonalijmes huil nicchías oc sejpa.”

<sup>62</sup> Cuaquinon moquetzac in tiopista hué, quilic Jesús:

—¿Amo ticnanquilía nindeno inahuac in hual yehuanten mitzmotexpahuil-jiticate?

<sup>63</sup> Huan Jesús amo nahuatic. Cuaquinon in tiopista hué quilic:

—¡Nimitzilía pa titechilis ilaixpan Dios hual yuli, xitechili sinda tehual tiCristo, Dios ixolol!

<sup>64</sup> Jesús quilic:

—Nehual niunca, quinami tiqijtúa. Ma yoje, annimitzilía neli, anechitas nehual ilacal in cielo nimolalijtica pa ima cuali Dios hual quipía in chichahualisli niman hué. Annechitas nihualajtía pan imextemimes in cielo.

<sup>65</sup> Cuaquinon quitzayanic inahuas in tiopista hué. In quichihuaya pa lanextilisquiaya quinami cualanic míac pampa quijtuc inon Jesús, huan quijtuc:

—¡Quihuejuecaltic Dios! ¡Yajmo monequi pa tiqintemusi oc sequin lacames pa quimotexpahuilisi! ¡Axcan, xiquitacan! ¡Anquicaquic in lahuejuecaltisli! ¿Quinami anquita?

<sup>66</sup> Yehuanten quinancuilije, quilije:

—Quipías pa miquis.

<sup>67</sup> Cuaquinon quichijchaje pa iixco huan quitecuaje chichahuac ca inminmajmajuán. Oc sequin quitecuaje ca se ojla, quilije:

<sup>68</sup> —Tehual tiCristo, pampín, ¡xilajmati aqui mitztecuac!

*Pedro quinmilía pampa amo quiximati Jesús  
(Mr. 14:66-72; Lc. 22:56-62; Jn. 18:15-18,25-27)*

<sup>69</sup> Panujtataya Jesús inon, nepa pa quiahuac pin lajcotiyan cataya Pedro molalijtataya. Hualac capa yihual se tequipanujquil sihual yancuic, quilic:

—Tehual noje ticataya ca Jesús in galileteco.

<sup>70</sup> Huan yihual Pedro quilic pampa no inminlaixpan moxtin, quilic:

—Amo nicmati in hual tiqijjtutica.

<sup>71</sup> Cuaquín quisac Pedro pa in lalapujquil huan nepa oc se tequipanujquil sihual yancuic quitac huan quinmilic yehuanten hual nepa cataloaya:

—In se noje cataya ca Jesús in nazaretco.

<sup>72</sup> Huan oc sejpa quijtuc Pedro pampa no, quilijtataya quinami ilaixpan Dios, quijtuc:

—Amo niquiximati in lacal.

<sup>73</sup> Quiman panuc se nadita, hualaje capa yihual yehuanten hual moquez-tataloaya nepa, quilije Pedro:

—Tehual nuso tiunca ca yehuanten noje pampa tilajtúa quinami yehuanten in galiletecos. Molajtol technextilía inon.

<sup>74</sup> Cuaquinon pehuac quinotzac Dios pa quilalilis ila'ajualisli ipan sinda in hual yehuanten quijtutataloaya inahuac yihual cataya melahuac. Huan quijtuc ilaixpan Dios ca lajtomes hual amo mopalalo, quinmilic:

—Amo niquiximati in lacal.

Huan jan ajnaxcan xahuanic in gallo.

<sup>75</sup> Cuaquinon Pedro quijnamiquic len Jesús quilic: “Ayamo xahuanic in gallo, huan tiqijtus ca ye lajtulisli pampa amo tichiximati.” Huan Pedro quisac pa quiahuac huan pehuac chocac míac.

## 27

*Quitemacalo Jesús ca Pilato*  
(Mr. 15:1; Lc. 23:1-2; Jn. 18:28-32)

<sup>1</sup> Cuaquín huahtzincó quiman lanesic mochihuilije se lajtulisli in tiopistas huejué huan inminhuejueyenten in judíos. Moilije quinami huil laticlanilosquiaya pa yesquiaya lamictili Jesús.

<sup>2</sup> Quihuicaje ilpitataya huan quitemacaje Poncio Pilato in gobernador (lahuelitini) romano.

*Judas momictía*

<sup>3</sup> Cuaquinon Judas in se hual quitemacac Jesús ca ilacocolinjmes quitac quinami quitilaniye Jesús pa miquis, huan pampín mococuhuaya iyolo pampa quichíac inon. Quincuepilic in plata, in treinta (sempuhualihuanma-llacli) tomin, quinmacac in tiopistas huejué huan in huejueyenten.

<sup>4</sup> Quinmilic:

—Nicchíac laijlaculisli pampa annimitztemacac se hual amo quiapiaya len laijlaculisli.

Yehuanten quinanquiliye:

—¿Len inon pa tehuanten? Tehual mohuían ticpías pa ticchías in hual moneqwi pa timoquixtís in laijlaculisli.

<sup>5</sup> Cuaquinon quilasac Judás in tomin pa in lali pin tiopan huan quisac, uyac, huan mopiluc pan se cuahuil, miquic.

<sup>6</sup> Cuaquín canaje in tomin in tiopistas, moilije:

—In tolajtol amo techmacahuiltía pa ticlasasi in tomin capa quipialo itomin in tiopan hué pampa unca tomin hual quilaxlahuije pa yojque quimictisi se lalac.

<sup>7</sup> Molaquetzilije, huan ca nadita molalije pa quicuhuaje ca in tomin icuajmili in tapalquero. In cuajmili yesquiaya pa capa quilalpachulosquiaya yehuanten hual amo yuliloaya pa inminlali.

<sup>8</sup> Pampa inon quitocayaltije in cuajmili iCuajmili Esli, huan yojte motocati-huala axcan.

<sup>9</sup> Huan yojque lamic mochíac inon hual quijcuiluc Dios ilajtuni itocac Jeremías, quijtúa: “Huan quinmanaje in plata, in treinta tomin (cataya ilaxlahuilisli hual yehuanten pa Israel quilalilije yihual).

<sup>10</sup> Huan ca in tomin quicuhuaje icuajmili in tapalquero, jan quinami nechilic in Tata pa nicchías.”

*Jesús ilaixpan Pilato*  
(Mr. 15:2-5; Lc. 23:3-5; Jn. 18:33-38)

<sup>11</sup> Huan Jesús quihuicaje pa moquetzas iyampa in gobernador romano, huan in gobernador quilajlanic:

—Tehual, ¿tíunca inminhué in judíos?

Huan Jesús quilic:

—Quema, unca quinami tiquijtuc.

<sup>12</sup> Huan quimotexpahuililoaya in tiopistas huejué huan in huejueyenten. Ma yojte, Jesús amo quinnanquilic nindeno.

<sup>13</sup> Cuaquinon Pilato quilic:

—¿Amo tijcaqui mochi in calica mitzmotexpahuililo?

<sup>14</sup> Huan amo quinanquilic ca se lajtól. Pampa inon in gobernador molapolultic huan amo quimatic len quijtusquiaya pa iyolo.

*Quitlanilo Jesús pa miquis**(Mr. 15:6-20; Lc. 23:13-25; Jn. 18:38-19:16)*

<sup>15</sup> Axcan, pan in fiesta (ilhuil) quipiani in huelitini (gobernador) in lachihualisli pa quinmacahuilisqueiaya in judíos se hual cataya latzacuali pin calijtic, aquí yes quilajlanije.

<sup>16</sup> Quipiaje se latzacuali niman laiximatili hual motocaya Barrabás.

<sup>17</sup> Pampa inon quiman monechicuje, Pilato quinlajlanic:

—¿Aquí, nuso, anquinequi pa annimitzmacahuilis: Barrabás, o Jesús hual quitocayaltilo Cristo?

<sup>18</sup> Yojque quinlajlanic, pampa yihual quimatic pampa cataya pampa moxiculoaya pampa moxtin quixtocaloaya Jesús huan pampa inon quitemacaje yihual.

<sup>19</sup> Huan quiman molalijtataya Pilato pa iicpali capa molaliaya quiman quichíac ilachihualisli se la'ajuani, quinahuatlic lajtól isihua, quilic: “Amo xicpá nindeno pa tiqutas ca in lalac cuali, pampa pa layúa nipanuya lacócolisli pampa nilajtemiquic inahuac yihual.”

<sup>20</sup> Ma yoje, quinchihualtije in tiopistas huejeú huan in huejueyenten pa in míac lalalera molajlanilisi pa quinmacahuilis Barrabás huan pa latilanis pa quimictisi Jesús.

<sup>21</sup> Oc sejpa quinnotzac Pilato in gobernador, quinlajlanic:

—¿Calía innojen omenten anquinequi pa annimitzmacahuilis?

Quilije:

—Barrabás.

<sup>22</sup> Cuaquín Pilato quinlajlanic:

—Huan ¿len nicchihuilis Jesús hual quitocayaltilo Cristo?

Moxtin quinanquilije:

—¡Xicpilu pan se cuahuil!

<sup>23</sup> Pilato quinmilic:

—Axan, ¿len amo cuali quichíac?

Ma yoje, yehuanten oc sejpa quitzajtzilije:

—¡Xicpilu pan se cuahuil!

<sup>24</sup> Yoje Pilato quitac pampa amo mopaquiltilosquiaya in míac lalalera, huan neli quinequiloaya majcoquilo pa moanalosquiaya. Pampa inon latilanic pa quihualiquilosquiaya al huan mopaquiloc imajmajuan inminyampa in míac lalalera, quijtuc:

—Ma camo nechtextpahuili amaqui quiman quimictisi in lalac. Xiquijnamiquican inon amhuanten.

<sup>25</sup> Huan moxtin quinanquilije:

—¡Ma techtextpahuilican iesli tehuanten huan toxolomes pampa ticmictic!

<sup>26</sup> Cuaquinon Pilato quinmacahuilic Barrabás, huan latilanic pa iguaches quihuijuitequisi Jesús. Cuaquinon quitemacac pa quipilusi pan se cuahuil.

<sup>27</sup> Huan iguaches in gobernador quihuicaje Jesús calijtic icali cualtichin Pilato, icali itocaya Pretorio. Quinnechicuje mochi in míac guaches pa quiyahualusi Jesús.

<sup>28</sup> Quiquixtilije itzotzomajli huan quilaquentije ca se nahuas morado.

<sup>29</sup> Quijquitequije se yahuali lachihuali ca huizli huan quilajlalilije ipan itzontecon, huan quilalije se ojtal pa imajma cuali. Cuaquinon quimolan-cuacuetzilije ilaixpan huan quihuitzquilije quijutataloaya:

—¡Ma yuli inminhué in judíos!

<sup>30</sup> Noje quichijchaje, huan quiquitzquilije in ojtal huan quitecuaje pa itzontecon.

<sup>31</sup> Lamije quihuitzquiliye yoje, quiquijquixtiliye in nahuas huan quilaque-  
ntiye ca itzotzomajli yihual, cuaquinon quihuicaje pa quipilulosquiaya pan  
in cuahuil.

*Quipilulo Jesús pan in cuahuil*  
(Mr. 15:21-32; Lc. 23:26-43; Jn. 19:17-27)

<sup>32</sup> Huan quiman quisaje, quitaje se local cireneteco itocaya Simón. In se  
quillamamiltloaya ca in cuahuil calica yahuiloaya quipilulo Jesús.

<sup>33</sup> Yojque ajsiye pa se lajcotiyan itoca Golgotá. Quinequi quijtúa in lajtol  
“Caujtecomal”.

<sup>34</sup> Nepa quinequiye cuniltiye iayo uva lanipanuli ca se altzindi chichic.  
Quiman quichichinac Jesús amo quinequic cunic.

<sup>35</sup> Quiman lamije quipiluje pan in cuahuil, moxiluilije in guaches ca  
yehuanten itzotzomajli Jesús, quilastataloaya cuajtzindis cuixtitos. Huan  
quiman in guache moquixtilic se cuajtzindi capa quilasaje, sinda in cua-  
jtzindi cataya iyaxca hual quilalic pa in se itzotzomajli, yoje yihual canac in  
se itzotzomajli Jesús. Yojque lamic mochíac len quijcuiluc Dios ilajtuni pin ia-  
mal Dios, quijtuc: “Moxiluilije notzotzomajli ca yehuanten quinlastataloaya  
cuajtzindis cuijcuixtic.”

<sup>36</sup> Cuaquinon molalije huan mocahuaje quiztataloaya.

<sup>37</sup> Huan quisaluje ca pani pa itzontecon se amal capa quijcuiluje pa len  
yihual cataya lapiluli pan in cuahuil. Quijtuc: “IN UNCA JESÚS INMINHUÉ  
IN JUDÍOS.”

<sup>38</sup> Noje cataloaya ome laxtequinijmes hual quinpiluje ca Jesús, se cataya  
pa ima cuali huan in oc se pa ima amo cuali.

<sup>39</sup> Huan yehuanten hual panujtataloaya quihuejuecaltloaya, quihuixuj-  
tataloaya inmintzontecon.

<sup>40</sup> Quilije:

—Tel hual ticxitinis in tiopan hué huan quiman lamisi panusi ye tonalijmes  
ticchías oc sepa, ximoquixti pan mopolehuilisli. Sinda tehual tiunca ixól  
Dios, xitemu capa tiunca pan in cuahuil.

<sup>41</sup> Yojque quihuitzquiliye noje in tiopistas huejué huan inminhuejueyen-  
ten in judíos huan ilamaxtinijmes in lajtol huan in fariseos, moilije:

<sup>42</sup> —Oc sequin quinquixtic pan inminpolehuilisli. Ma yoje, yihual ihuían  
amo huil moquixtía pan ipolehuilisli. Sinda yihual ihué Israel, ma temu axan  
capa unca pan in cuahuil huan ticneltocasi.

<sup>43</sup> Quilalic ilaneltocalisli ca Dios. Axcan, ma Dios quiquixti de ipolehuilisli  
sinda neli quinequi, pampa techilic pampa yihual ixól Dios.

<sup>44</sup> Huan yojque quihuejuecaltije innojen laxtequinijmes noje hual ca  
yihual cataloaya lapiluli pan cuahuimes.

*Jesús miqui*  
(Mr. 15:33-41; Lc. 23:44-49; Jn. 19:28-30)

<sup>45</sup> Cuaquín lacualispan laticumactic pa mochi in lalticpan, huan mocajti-  
ahuiaya laticumac pa quiman ajsic in ye horas pa tiolac.

<sup>46</sup> Huan quinami pa ye horas pa tiolac Jesús tzajtzcic ca lajtol chichahuac,  
quijtuc:

—¡Elí, Elí! ¿Lama sabactani? —hual quinequi quijtúa: ¡NoDios, noDios! ¿Leca  
tichcajcahuac?

<sup>47</sup> Quiman quicaquiye inon sequin hual nepa moquezataloaya, quijtuje:

—In se quinoztica Elías ilajtuni Dios.



<sup>48</sup> Jan ajnaxcan molaluc se ca yehuanten huan canac se pochinguil hual quiquixtilo pin al huejcalan, quitechcuniltic ca iayo uva xocuc, quilalic pan se acal huan quilalic pa icamac Jesús pa quilauniltisquiaya.

<sup>49</sup> Huan quijtuye in oc sequin:

—Xijcahua, ma tiquitacan sinda hualas Elías pa quiquixtis pin polehuilislí.

<sup>50</sup> Cuaquín tzajtzc Jesús oc sejpa ca lajtól chicahuac, huan miquic, quitemacatica iyulilislí.

<sup>51</sup> Huan ca inon, xiquita, tzayanic in tzotzomajli telahuac hual pilujtataya pin tiopan hué lajco pin lasojli calijtic huan in niman lasojli calijtic. Tzayanic pa pani mochi pa latzindan, mocahuac ome lajcomes. Laulinic huan lapanije in teles.

<sup>52</sup> Huan cataloaya lalapuli in coyunquimes capa Dios ilacames huejueyenten hual miquije pa yina. Pehualoaya yulilo oc sejpa.

<sup>53</sup> Huan quiman Jesús yulic oc sejpa, yehuanten quisaje pa inmincoyunquimes huan calaquije Jerusalén in lasojli caltilan. Nepa míac quinmitaje.

<sup>54</sup> Inminlaicanani in guaches huan yehuanten hual mocahualoaya quiztataloaya Jesús pan in cuahuil, quiman quitaje in laulinilislí huan innojen oc sequin hual panujtataloaya, cuaquín momajtije míac, huan quijtuye:

—Neli in se yec ixolol Dios.

<sup>55</sup> Huan nepa cataloaya míac sihuames quilachixtataloaya huejca. Yehuanten quitcaje Jesús quitequipanuilijtiahuiloaya quiman quisaya pa Galilea.

<sup>56</sup> Cataloaya ca in sihuames María Magdalena huan María inminantzin Jacobo huan José, huan noje cataya nepa inminantzin ixolomes Zebedeo.

### *Quilalpachulo Jesús*

(*Mr. 15:42-47; Lc. 23:50-56; Jn. 19:38-42*)

<sup>57</sup> Quiman yahuiaya layuajti, hualac se lalac hual quipiaya míac hual iyaxca, motocaya José, yuliaya pin caltilan Arimatea. In José noje yec se imonextilini Jesús.

<sup>58</sup> Yihual uyac quitac Pilato, quilajlanic pa quitemacasakiya icuerpo (inacayo) imijquil Jesús. Cuaquinon Pilato latilanic pa quitemacasi.

<sup>59</sup> José canac in cuerpo, quiliaruc ca se tzotzomajli chipahuac.

<sup>60</sup> Cuaquín quilalic pa se coyunquil yancuic quinami se cueva (ostul) hual yihual pa quimaniyan latilanic pa quihuajuanilosquiaya pin tel. Cuaquinon quitzacuac in lalapulislí ca se tel niman hué quinami se yahualu-  
jquil, cuaquín uyac.

<sup>61</sup> Huan cataloaya nepa María Magdalena huan in oc se María yehuatataloaya ilaixpan in ostul.

### *Quintilanilo guaches pa quilachilisi in cueva pa camo calaquís amaqi*

<sup>62</sup> Mostatica hual cataya in tonali hual quitocac itonali in lachijchihualislí pa in fiesta (ilhuil), monechicultije in tiopistas huejué huan in fariseos huan uyaje quitaje Pilato.

<sup>63</sup> Quilije:

—Tata Lahuelitini, tiquijnamiquilo quinami in islatatini quijtuc quiman ayamo miquic, quil, “Panusi ye tonalijmes, huan niyulis oc sejpa.”

<sup>64</sup> Pampín, xilatilani pa quilachiasi in cueva capa unca in mijquil pa quiman lamisi panusi ye tonalijmes. Inon xichía pa camo cuajnesi hualasi imonextilinijmes huan quixtequisi in mijquil huan cuaquín quinmilisi lacames: “Yulic oc sejpa, axan yajmo mictica.” Yojque, in lacuaajcuamanalislí

calica laquisasi cayas niman hué, huan yajmo cayas yoje hué in lacuajcua-manalisli hual quijtyuc yihual quiman pehuac lacuajcuamanac.

<sup>65</sup> Quinmilic Pilato:

—Nepa anquipía guaches pa lachiasi. Xiacan, xinapachican quinami cuali anquimati anquichía pa mocahuas latzacuali.

<sup>66</sup> Yoje uyaje yehuanten huan quitzacuaje cuali in cueva (ostul) quilal-ijtcate se latzacualoni lachihuali ca cera pani in tel capa quitzactataya ilalapulisli in ostul. In latzacualoni cataya iyaxca ilahuétiltilisli romano. Cuaquinon uyaje quincajtataloaya nepa in guaches pa lachialosquiaya.

## 28

*Jesús yuli oc sejpa*

*(Mr. 16:1-8; Lc. 24:1-12; Jn. 20:1-10)*

<sup>1</sup> Cuaquín quiman panuc in tonali quiman mosehuilo in judíos huan lanesiaya pan tonali hual quinpehualtía in chicom tonalijmes yajyancuic, uyaje María Magdalena huan in oc se María pa quitasi in ostul (cueva).

<sup>2</sup> Huan jan ajnaxcan laulinic chicahuac. In panuc pampa temujtihuac se ilanahuatini in Tata pin cielo. Ajsic pa in cueva, quijcuanic in tel hual quitzacuac ilalapulisli in cueva huan molalic ipan.

<sup>3</sup> Laixpelaya in lanahuatini quinami se lapelanilisli huan itzotzomajli laixpelaya iztatataya quinami tesihuil.

<sup>4</sup> Quitaje in guaches, niman momajtije, yuyucaje huan mocahuaje quinami mijquimes, yoje míac quimacajsije.

<sup>5</sup> Cuaquinon quinmilic in sihuames in ilanahuatini in cielo:

—Amo ximomajtican. Nicmati pampa anquitemujtica Jesús hual quipiluje pani in cuahuil.

<sup>6</sup> Amo unca nican pampa yulic oc sejpa, jan quinami anmitzilic. Xihualacan pa anquitas capa quilalije, capa lastataya.

<sup>7</sup> Axcán, xiajtiquisacan, xiquinmilican imonextiliniymes pampa yultica oc sejpa, mas que quimictije. Axan quisac capa cate in mijquimes. Huan xiquitacan. Yahui anmitzlaicana amhuanten pa Galilea, nepa anquitas. Axan annimitzilic inon.

<sup>8</sup> Cuaquinon quicajtiquisaje in cueva (ostul) in sihuames momajtitat-aloya, huan ma yoje quipialoaya míac paquilisli. Molalujtiaje pa quinla-machiltilosquiaya in monextiliniymes.

<sup>9</sup> Huan quiman molalujtiahuiloaya, xiquitacan, quinnamiquic Jesús pan ojli huan yihual quinpiatic. Cuaquín yehuanten in sihuames hualaje ca yihual, quimolancuacuetzilije quinquitzquitataloaya icxihuajmes huan quinnapalujtataloaya icxihuajmes.

<sup>10</sup> Huan Jesús quinmilic:

—Amo ximomajtican. Ximohuicacan xiquinlamachiltican nocnían pa yasi pa Galilea, huan umpa nechitasi.

*In guaches quinpuhuililo in tiopistas len quinpanuc*

<sup>11</sup> Yajtiahuiloaya in sihuames, sequin innojen guaches uyaje pa Jerusalén, quinlamachiltije in tiopistas huejué mochi in hual quinpanuc.

<sup>12</sup> Cuaquín in tiopistas quinmonechicultije inminhuejueyenten in judíos pa mochihuilisli se lajtulisli. Molaquetzililoaya huan quiman molalilije ca se lajtulisli, quimacaje míac tomin in guaches.

<sup>13</sup> Quinmilije:

—Amhuanten xiquinmilican moxtin pampa quema, hualaje imonextilini-jmes pa layúa, quixtequije in mijquil quiman tehuanten ticoxtataloaya.

<sup>14</sup> Huan sinda quicaquis inon in gobernador, cuaquín tehuanten ticyonlali pa quineltocas len tiquilisi, huan amhuanten amo annitxtexpahuilis.

<sup>15</sup> Cuaquinon canaje in guaches in tomin huan quichihuaje quinami in tiopistas quinmilic. Huan yoje quijtutihualaje axan in judíos jan quinami quinlaquetzilije inon in guaches huan in tiopistas.

*Jesús quinmaca imonextilini-jmes inmintequipanulisli*  
(Mr. 16:14-18; Lc. 24:36-49; Jn. 20:19-23)

<sup>16</sup> Uyaje in once monextilini-jmes pa Galilea pa in loma (tepetzindi) capa quinnahuatic Jesús.

<sup>17</sup> Huan quiman quitaje, quimolancuacuetzilije. Ma yoje, sequin quimahuilloaya da amo neli cataya yihual.

<sup>18</sup> Cuaquinon ajsic Jesús capa yehuanten, quinmilic:

—Nehual nechtemacac Dios mochi lahuelilitisli pin cielo huan pan lalticpan.

<sup>19</sup> Pampín, xiacan capa moxtin in lacames pa mochi in lalimes pin lalticpan, xiquinchihuilican pa mochihuasi nomonextilini-jmes. Xiquincuayatequican ca inminlahuelilitisli Dios in Tajtzin huan Dios in Xolol huan Dios in Espiritu Santo.

<sup>20</sup> Huan xiquinmaxtican pa quineltocasi mochi in hual annitxtmaxtic amhuanten. Huan xiquitacan. Nehual nicayas ca amhuanten mojmota pa quiman ajsis in tonali hual lamis in lalticpan ca ilahuelilitisli hual axan huelitía. Yoje ma ye.

## Ilamachiltilisli cuali Jesucristo hual quijcuiluc San Marcos

*Lanotza Juan Lacuayatequini ca mías lacames capa amaqui chanti  
(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Yoje pehuac ilamachiltilisli cuali Jesucristo iXolol Dios.

<sup>2</sup> Pehuac quinami quijcuiluc Isaías ilajtuni Dios, quijcuiluc inon hual Dios quilic Jesucristo quiman ayamo cataya pan lalticpan, quilic:  
Xíquita, nehual nictilanía nolanahuatini pa mitzlaicanas pa mijchijchihuilis mo'ojli.

<sup>3</sup> Mocaquis nolanahuatini itzajtzilisli tzajztitica nepa capa amaqui chanti, quijtutica:  
“Huala toTata. Xicchijchihuacan anmoyolo anquiquixtilijtica mochi hual quijlacujtica.

Xicchijchihuacan quinami anquichijchihuilía ojli quiman huala se hué.  
Xicmelahuacan anmoyolo quinami quimelahualosquiaya iojli se hué.”

<sup>4</sup> Huan yoje hualac Juan Lacuayatequini, hualac capa amaqui chantiaya, quijtutaya Dios ilanahuatilisli. Quinmiliaya lacames huan sihuames pa mocuayatequilosquiaya pa yoje lanextililosquiaya quinami axan quipalaje inminyolo pa pehualosquiaya laijnamiqui quinami Dios quinequi. Yoje Dios quinpupuhuilisquiaya yehuanten inminlajlaculisli.

<sup>5</sup> Quisaloaya moxtin pin lalticpan motocaya Judea pa quicaquisi. Quisaloaya noje yehuanten pin caltilan (pueblo) hué itoca Jerusalén. Quincuayatequiaya Juan pin atenco hué itoca Jordán quiman moyolcuitiloaya ca Dios inminlajlaculisli.

<sup>6</sup> Huan quiptiaya Juan itzotzomajli lachihuali ca itojmiyo camello. Quipiaya ilacuejtiloni de cuilaxli. Inon hual quicuaya cataya chapulimes huan neheli hual canaló pa cuajlan.

<sup>7</sup> Quinnotzaya in lacames huan sihuames, quinmilitataya Dios ilanahuatilisli. Quinmiliaya:

–Nilaquisas nehual ca nolanotzalisli, cuaquín hualas se hual quiptías niman mías chichahualisli hual nehual amo nicpía. Pampín amo nimonotza pa nimopachus pa nictomilis ilacsames huan pa nictequipanuilis jan nadita.

<sup>8</sup> Nehual annimitzcuayatequía ca al. Yihual amnitzcuayatequis ca in Espíritu Santo.

*Juan quicuayatequía Jesús  
(Mt. 3:13-17; Lc. 3:21-22)*

<sup>9</sup> In tonalijmes quisac Jesús pin cali itoca Nazaret hual unca pin lalticpan Galilea. Uyac pa atenco hué itoca Jordán, huan nepa Juan quicuayatequic pin atenco hué.

<sup>10</sup> Quisac Jesús pin al, huan jan ajnaxcan quitac molapuc chichahuac in cielo (ilhuicac), quitac temujtihualaya in Espíritu Santo chiqueta se huilol huan moquetzac pani yihual.

<sup>11</sup> Huan moqaquic ilajtöl Dios lajtutica pin cielo (ilhuicac), quijtutaya:

–Tehual tinoxolol. Nimitzlasojla huan nicpía mías paquilisli ca tehual.

*Satanás quitilanilía iyolo Jesús  
(Mt. 4:1-11; Lc. 4:1-13)*

<sup>12</sup> Cuaquinon jan ajnaxcan in Espíritu quichihualtic pa yahuisquiaya Jesús ca capic amaquí chantiaya.

<sup>13</sup> Huan nepa mocahuac cuarenta (ompuhuali) tonalijmes. Nepa cataya Satanás, quinequiaya quitilanilía Jesús iyolo pa quichiasquiaya Jesús len hual quitzacuasquiaya Dios. Noje umpa ca Jesús cataloaya in yulijquimes hual yulilo pa cuañlan. Huan hualaje Dios ilanahuatinijmes in cielo (ilhuicac) huan quitequipanuilloaya.

*Jesús quipehualtía itequipanulisli*  
(Mt. 4:12-17; Lc. 4:14-15)

<sup>14</sup> Se tonali quitzacuaje Juan Lacuayatequini pin calijtic. In tonali hual quichihuilije inon Juan, Jesús uyac pan lalticpan motocaya Galilea. Quinnotzaya in lalacera, quinmilijtataya Dios ilanahuatilisli hual unca in lamachiltilisli cuali inahuac quinami Dios huelitía.

<sup>15</sup> Quijtuaya:

—Axan ajsic in tonali, amo huejcahuas in tonali quiman Dios yahui huelitía. Xicpalacan anmoyolo pa anpehuas anyultías anlajnamictica quinami Dios quinequí. Xicneltocan Dios ilamachiltilisli cuali.

*Jesús quinnotza nahui micheros*  
(Mt. 4:18-22; Lc. 5:1-11)

<sup>16</sup> Umpa panuaya Jesús inahuac in al huejcalan itoca Lago de Galilea. Nepa quinmitac Simón huan icni Andrés, quilastataloaya inminlatzojuini lajco pin al huejcalan. Quinmuloaya michimes pampa yehuanten micheros.

<sup>17</sup> Quinmilic Jesús:

—Xichtocan nehual. Annimitznexilis quinami huil anquintemus lames quinami axan anquintemúa michimes.

<sup>18</sup> Jan ajnaxcan quincahuaje inminlatzojuinijmes, quitocatiaye Jesús.

<sup>19</sup> Panuc Jesús nadita huejquita de umpa huan quinmitac Jacobo huan icni Juan, yehuanten ixolomes Zebedeo. Ca oc seguín cataloaya yehuanten pin barquito, quinpantitaloaya inminlatzojuinijmes yehuanten.

<sup>20</sup> Jan ajnaxcan quinnotzac Jesús. Cuaquín yehuanten quincacahuaje pin barquito laijtic inmintajtzin huan ilapalehuinijmes huan quitocatiaye Jesús.

*Se lalac hual quiapiaya se ijyecal amo cuali*  
(Lc. 4:31-37)

<sup>21</sup> Ajsije pin cali motocaya Capernaum. Cuaquinon pin tonali hual mosehuilo yehuanten in israelitos hual noje motocalo in judíos, calaquic Jesús pa inmintiopan in judíos, nepa lamaxtiaya.

<sup>22</sup> Lamaxtiaya ca chichahualisli quinami se hué. Amo lamaxtiaya yihual quinami yehuanten in ilamaxtinijmes in lajtol. Quimaxtiaya in lajtol hual quineltocalo in judíos quinami quipialo pa quimolancuacuetzilisi Dios. Pampín molapolultiloaya pampa lamaxtiaya yoje Jesús.

<sup>23</sup> Huan jan axcan cataya pin tiopan se lalac quiapiaya se ijyecal hual quichijtataya catzahuac in lalac pa iyolo.

<sup>24</sup> Tzajtzc in se, quilic:

—¿Len ticpía pa tiqitas ca tehuanten, Jesús hual tiquisac pin caltilan Nazaret? ¿Tihualac pa titechlamis? Nicmati aquí tehual. Tehual Dios ilalac chipahuac, Dios mitzlalic pa ticnextis Dios ichipahualisli.

<sup>25</sup> Cuaquín Jesús quinotzac chichahuac in ijyecal, quilic:

—¡Amo xinahuati huan xiquisa capa yihual!

<sup>26</sup> Cuaquín in ijyecal catzahuac quiyuyucaltic chichahuac in lalac, tzajtzc chichahuac huan quisac pin lalac.

<sup>27</sup> Huan umpa moxtin molapolultiloaya míac, moililoaya:  
 —¿Len inon? ¡Se lamaxtilisli yancuic! ¡Yihual quinnotza in ijyecames,  
 quichía quinami se hué hual quipía chichahualisli! ¡Huan quineltocalo!  
<sup>28</sup> Jan ajnaxcan moxtin quipuhualoaya pa mochi in lali Galilea in hual  
 quichihuic Jesús.

*Jesús quipajtia inantzin isihua Pedro*  
 (Mt. 8:14-15; Lc. 4:38-39)

<sup>29</sup> Cuaquín quisaje pin tiopan. Umpa mohuicac Jesús, huan ca yihual uyaje  
 Jacobo huan Juan. Uyaje pa inminchan Simón huan Andrés.

<sup>30</sup> Huan inantzin isihua Simón lastataya pa ilapexli, quipiaya totonalisli.  
 Jan ajnaxcan quilamachiltije Jesús pampa cataya cocoxqui yihual.

<sup>31</sup> Cuaquín ajsitiac capa yihual Jesús, quiquitzquic imajma, cajcoquic  
 pin lapexli, quiquetzac. Yoje pajtic in sihual, yajmo quipiaya totonalisli.  
 Cuaquín quinlacualtiaya.

*Calaquic in tonali, quinpajtia míac*  
 (Mt. 8:16-17; Lc. 4:40-41)

<sup>32</sup> Calaquic in tonali, huan layuajtitataya. Quihualiquilije Jesús moxtin in  
 cocoxquimes huan yehuanten hual quinpialoaya ijyecames amo cuajcuali.

<sup>33</sup> Huan moxtin motojpehuaje pa in cali ilalapujquil.

<sup>34</sup> Quinpajtic Jesús míac hual mococuloaya ca míac cocolisli. Quinquixtili-  
 aya yehuanten míac ijyecames amo cuajcuali. Ma yoje, amo quinmacahuiltic  
 Jesús pa lajtulosquiaya in ijyecames pampa quimatiloaya aqui yihual.

*Jesús lanoztinemi pan lalticpan Galilea*  
 (Lc. 4:42-44)

<sup>35</sup> Pa cualcan quiman ayamo lanestihualaya huan cataya laticumac, mo-  
 quetzac Jesús. Quisac pa quiahuac in caltilan, uyac capa amaqui cataya,  
 nepa huan Dios lajtuloaya.

<sup>36</sup> Simón ca oc sequin hual cataloaya ca yihual uyaje quitemuje.

<sup>37</sup> Quitaje, quinmilije:

—Moxtin mitztemujticate.

<sup>38</sup> Jesús quinmilic:

—Ma tiacan pa oc sequin caltilan pa nilanoztinemis. Umpa noje niquin-  
 milis Dios ilamachiltisli. Pampa inon niquisac pin cali.

<sup>39</sup> Yoje quinmilijtinemiaya Dios ilamachiltisli pa in judíos inmintiopa-  
 jmes pa mochi in lalticpan Galilea. Noje quinquixtiliaya ijyecames amo  
 cuajcuali hual quinquitzquiloaya lacames.

*Jesús quipajtia se hual palantica ipan inacal icuerpo*  
 (Mt. 8:1-4; Lc. 5:12-16)

<sup>40</sup> Ajsic capa Jesús se lalac, quilajlanic pa quicnilisquiaya huan pa quipa-  
 jtisquiaya. Quiipiaya in icocolisli icuilaxli itoca lepra. Quimolancuacuetzilic  
 Jesús, quilic:

—Sinda ticnequi, huil tichpajtis.

<sup>41</sup> Jesús quicnilic cualantica pampa quipiaya in cocolisli huan quimatocac  
 ca imajma, quilic:

—Nicnequi pa tipajtis. Xipajti.

<sup>42</sup> Jan ajnaxcan yajmo nesc icocolisli in lalac, yoje pajtic.

<sup>43</sup> Cuaquinon Jesús quinahuatic ca míac chichahualisli huan quitlanic pa  
 iojli yihual, quilijtataya:

<sup>44</sup> —Xiquita. Ximoiztia pa camo tiquilis amaqui nindeno. Jan xía ximonex-  
 tilic in tiopista. Axcán tichipahuac. Xiquihuica pa in tiopan in huendi hual

quinahuatic Moisés pa quimacas aqui yes hual quipiaya in cocolisli huan pajtic. Yoje lacames quimatisi pampa tipajtic tel.

<sup>45</sup> Ma yoje, quisac in lalac huan pehuac quinpuhuilic moxtin len quipanuc yihual. Pampín Jesús yajmo huil calaquiaya pan se caltilan sinda lacames quimatiloaya yihual cataya nepa. Yoje mocahuaya pa quiahuac capa amaqui chantiaya. Huan yahuiloaya quitalo lacames, quisaloaya pa mochi caltilan cajcapa.

## 2

### *Jesús quipajtia se lalac amo huil moliniaya*

(Mt. 9:1-8; Lc. 5:17-26)

<sup>1</sup> Panuje sequin tonalijmes, huan mocuepac Jesús oc sejpa pin caltilan Capernaum. Momachiltije in lalalera pampa yihual cataya pa ichan.

<sup>2</sup> Pampin monechiculoaya miac huan yoje yajmo quinmajsiaya ilalapu-  
jquil in cali capa Jesús quinmaxtiaya ilajtol Dios.

<sup>3</sup> Cuaquinon hualaje sequin quihualicatataloaya se lalac cocoxqui, amo huil moliniaya. Quimantihualaloaya pan ipelal telahuac nahui lacames.

<sup>4</sup> Huan amo huil cajxtiloaya in lalac calijtic capa Jesús pampa cataloaya miac pin cali calijtic huan pa quiahuac. Cuaquín quilapuje ca pani in cali capa cataya Jesús. Quitemuhuije in cocoxqui pan ipelal pa calijtic capa in coyunquul.

<sup>5</sup> Jesús quitac quinami quineltocaloaya pampa yihual huil quipajtisquiaya, quilic in cocoxqui:

—Nito, axan lapujpuhuali unca molaijlaculisli.

<sup>6</sup> Huan sequin lacames lamaxtinijmes hual quimaxtiloaya in lajtol in-  
ahuac quinami quimolancuacuetzililo Dios in judíos nepa molalijtataloaya. Moilije ca inminyolo:

<sup>7</sup> “¿Leca lajtúa yojque in se? Quihuejuecaltitica Dios. ¿Aqui huil quipu-  
jpuhuilía se lalac ilaijlaculisli? Dios yihual san huil quichihuilía inon.”

<sup>8</sup> Quimatic Jesús ca iyolo in hual yehuanten quijtuloaya ca inminyolo in  
lamaxtinijmes huan quinmilic:

—¿Leca anlajtúa yoje ca anmoyolo?

<sup>9</sup> Neli unca anquita quinami amo quinextilía nochichualisli sinda niquilía  
in cocoxqui: “Axan unca lapujpuhuali molaijlaculisli.” Ma yoje, sinda niquil-  
iaya: “Ximoquetza, xicajcoqui mocochiyan huan xinejnemi”, huan yihual  
pajtiaya, cuaquín anquimatiaya pampa quinextiliaya nochichualisli. Huan  
sinda niquiliaya inon huan yihual amo pajtiaya, cuaquín anquimatiaya  
pampa amo nicpía ilahuelilitlisli Dios.

<sup>10</sup> Axan, nicnequi pa anquimatis pampa nehual ilalac in cielo, quema,  
nicpía ilahuelilitlisli Dios pa niquinpujpuhuilis lacames inminlaijlaculisli.

Cuaquinon Jesús quiztataya in lalac hual amo huil moliniaya, quilic:

<sup>11</sup> —Ximoquetza, xicajcoqui mocochiyan huan xía pa mochan.

<sup>12</sup> Huan moquetzac in lalac jan ajnaxcan huan cajcoquic icochiyan huan  
quisac inminlaixpan moxtin. Pampín moxtin moitaloaya ca lamajtilisli  
huan quinmijtuloaya lajtomes huejué pa Dios. Quililoaya:

—Amo quiman tiquitaje len quinami inon.

### *Jesús quinotza Levi*

(Mt. 9:9-13; Lc. 5:27-32)

<sup>13</sup> Quisac Jesús oc sejpa pa itenco in al huejcalan. Moxtin hualaje capa  
yihual huan yihual quinmaxtiaya.

14 Umpa je nadita quiman panujtataya pa iojli, quitac ixolol Alfeo motocaya Leví. Molaliaya pin cali capa quilajlaniloaya lapixcalisli hual yec pa tomin, quinlaxlahuiloaya ca in tomin in romanos hual huelitiloaya. Jesús quilic:

—Xichtoca nehual.

Yoje, moquetzac Leví, huan Jesús uyaje.

15 Quiman panuc inon lacuajtataya Jesús pa ichan Leví. Ca Jesús huan imonextiliniymes lacuajtataloaya míac oc sequin hual quitocaje Jesús. Sequin yeje lacames hual quilajlaniloaya lapixcalisli hual yec ca tomin (contribuciones). Oc sequin yeje lacames hual amo quineltocaloaya cuali inminlajtlot in judíos hual quijtúa quinami monequi pa se quimolancuacuetzilís Dios.

16 Huan quitaloaya Jesús ilamaxtinijmes in lajtlot huan sequin hual quinel-tocaloaya inminlamaxtilisli in fariseos. Quitaloaya quinami lacuajtataloaya ca Jesús moxtin yehuanten. Huan in lamaxtinijmes quinnotzaje Jesús imonextiliniymes, quinmilije:

—¿Leca molalía anmolamaxtini pa lacuas huan pa launis ca lacames amo cuajcuali huan ca yehuanten hual quilajlanilo lapixcalisli hual unca tomin pa in romanos?

17 Quicaquic inon, Jesús quinmilic:

—Amo quinnequilo lapajtinijmes yehuanten hual amo cojcocoxqui. In cojcocoxqui, quema, quinnequilo. Yojqe nehual amo nihualaya pa niquinnotzas yehuanten hual quijtulo pa inminyolo: “Nel nicuali.” Nihualaya pa niquinnotzas pa nechtocasi yehuanten hual quimatilo pampa cate laijlaculi.

### *Quilajlanilo leca amo mosahualo Jesús imonextiliniymes*

(Mt. 9:14-17; Lc. 5:33-39)

18 Se tonali mosajtataloaya imonextiliniymes Juan Lacuayatequini huan inminmonextiliniymes in fariseos. Sequin lacames hualaje capa Jesús, quilajlanije inahuac inon, quilije:

—¿Leca mosahualo inminmonextiliniymes Juan huan in fariseos? Tehual momonextiliniymes amo mosahualo.

19 Jesús quinnanquilic:

—Amo monequi pa mosahuasi ilajlasojli se lalac hual yahui monamictía sinda cate ca yihual in tonalijmes quiman monamictitica. Huan yoje amo mosahualo nomonextiliniymes innojen tonalijmes hual cate ca nehual.

20 Ma yoje, ajsilo tonalijmes capa quinquixtilisi nehual hual niunca quinami in se hual yahui monamictía. Cuaquín mosahuasi.

21 Umpa pehuaya quinmaxti quinami inon hual yihual quinmaxtitataya cataya lamaxtilisli yancuic. Quinmilic:

—Amaqui quipantía je tzotzomajli hual moviejojtíc ca se dango yancuic. Sinda quipantía yoje, cuaquín in dango yancuic quicololúa ca in tzotzomajli hual moviejojtíc huan quitzayana oc sejpá.

22 Noje amaqui quilalía iayo uva yancuic laijtíc pin pocuinijmes lachihuali ca cuilaxli hual itequi quitequipanuje. Sinda yoje quichía, cuaquín iayo uva yancuic quitzayanaltís in cuilaxli pampa amo huil motilana. Toyahuis iayo uva, moijlacus in cuilaxli. Pampín monequi pa quilalis iayo uva yancuic pin pocuinijmes lachihuali ca cuilaxli yancuic.

*Imonextiliniymes Jesús quincopinilo imiahuimes trigo pan tonali quiman mosehuilo judíos*

(Mt. 12:1-8; Lc. 6:1-5)



<sup>23</sup> Se tonali nejnentiyahuiaya Jesús capa moscaltitaya trigo. Cataya in tonali hual mosehuilo in judíos. Pehuaje quincopintiaje imiahuimes trigo imonextiliniymes.

<sup>24</sup> Cuaquinon in fariseos quilije:

—Xiquita. ¿Leca quichihualo momonextiliniymes inon? Tolajtol hual techilía quinami monequi pa se quimolancuacuetzilis Dios amo quimacahuiltía pa quichías se inon pan tonali quiman timosehuilo tehuanten.

<sup>25</sup> Jesús quinmilic:

—¿Amo quiman anmomaxtic len quichíac David in hué pan se tonali pa yina? Yihual huan yehuanten hual quitocaloaya mayanaloya.

<sup>26</sup> Yoje calaquic pin tiopan hué calijtic, cataya nepa Abiatar in tiopista hué. Quincuac David in panes hual quilalilo in tiopistas ilaixpan Dios. Huan in lajtol quimacahuiltía pa quincuasi in panes jan in tiopistas san. Ma yoje, David quinmacac pa quincuasi in lacames hual cataloaya ca yihual. Huan amo quichihuaya David laijlaculisli mas que quichíac inon.

<sup>27</sup> Huan noje quinmilic:

—Dios quilalic pa cayas se tonali capa huil anmosehuis. Quichíac inon pa anmijchihuilis len cuali amhuanten. Dios amo quinchíac lacames pa yoje quinchihualtis pa mosehuis pan in tonali quiman mosehuilo.

<sup>28</sup> Pampín, nehual ilacal in cielo nicpía lahuellitlisli pa nicnahuatis len huil quichihuasi lacames pan in tonali capa mosehuilo.

### 3

#### *In lacal hual quipiaya se ima huaquic*

(Mt. 12:9-14; Lc. 6:6-11)

<sup>1</sup> Oc sejpa calaquic Jesús calijtic pa inmintioipan in judíos. Nepa cataya se lacal quipiaya se ima huaquic.

<sup>2</sup> Quinapachiloaya Jesús in lacames nepa pa quitasi sinda lapajtisquiaya pan tonali quiman mosehuilo pampa quinequiloaya motexpahuilo ca yihual.

<sup>3</sup> Cuaquín Jesús quinqotzac in lacal, quilic:

—Xihuá, ximoquetza lajco ca tehuanten capa ticcate.

<sup>4</sup> Jesús quinlajlanic, quinmilic:

—¿Calía unca cuali? ¿Unca cuali sinda ticchihualo cuali pan in tonali capa timosehuilo? ¿Unca cuali sinda ticchihualo amo cuali? ¿Unca cuali sinda quipalehuilo pa yulis se lacal? ¿Unca cuali sinda quimictilo?

Yehuanten amo nahuatije.

<sup>5</sup> Quicocuc iyolo Jesús, quinmitac cualantataya pampa amo quinequiloaya quimatilo. Cuaquín quilic in lacal:

—Xicxilani momajma.

Quixilanic huan pajtic imajma.

<sup>6</sup> Cuaquín quisaje in fariseos huan jan ajnaxcan ca yehuanten hual quitocaloaya Herodes laquetzaje. Quinequiloaya quimatilo quinami huil quimomictiluililosquiaya Jesús.

#### *Míac quitocalo Jesús huan ajsilo pa itenco in al huejcalan*

<sup>7</sup> Quisac Jesús pa in al huejcalan pin lalticpan Galilea. Quitocaje míac yehuanten hual chantiloaya pa Galilea.

<sup>8</sup> Noje hualaje míac hual chantiloaya pin lalticpan Judea huan pin caltilan hué Jerusalén huan pin lalticpan Idumea. Noje hualaje quistataloaya pa yoje itenco (analco) in atenco hué Jordán huan pa in lali itejtenco in caltilan hué

Tiro huan in caltilan hué Sidón. Yaje quitaje Jesús quiman quimatije pampa quinchihuaya innojen lachihualisli.

<sup>9</sup> Pampa inon Jesús quinmilic imonextilinjmes pa quipiasi lalalili se barquito capa yihual pa huil calaquis, pampa cuajnesi in míac lalalera yahuilooaya quitojpehualo.

<sup>10</sup> Quinpajtic míac hual cataloaya ca yehuanten. Pampín mochi coxquimes motojpejtiahuilooaya pa quimatocalosquiaya.

<sup>11</sup> Huan quiman in ijyecames amo cuajcuali quitaloaya Jesús, cuaquín quinmayahuilooaya ilaixpan yihual in lacames hual quinpiaje laijtic yehuanten, tzajtziyoaya, quilije:

—¡Tehual ti'ixolol Díos!

<sup>12</sup> Huan yihual quinmajuac chicahuac pa camo quijtusi aqui yihual.

*Jesús quinlajtultía doce (majlaclihuanome) imonextilinjmes*  
(Mt. 10:1-4; Lc. 6:12-16)

<sup>13</sup> Panuc inon, Jesús panquisac pin pani, quinnotzac yehuanten hual quinequiaya quinlajtulti. Yehuanten moxiluje ca in lalalera, ajstitihualaje capa yihual.

<sup>14</sup> Quinlajtultic doce (majlaclihuanome) ca yehuanten pa cayasi ca yihual. Yahuiaya quintilani pa quinmilitinemesi lacames ilamachilitisli.

<sup>15</sup> Noje quinmacac lahuelilitisli pa huil quinpajtisi yehuanten huan pa huil quinquixtilisli ijyecames amo cuajcuali.

<sup>16</sup> Quinlajtultic doce lacames. Se yec Simón hual noje quitocayaltic Pedro.

<sup>17</sup> Oc sequin yeje Jacobo huan icni Juan, yehuanten ixolomes Zebedeo. Jesús quintocayaltic yehuanten Boanerges. Inon quinequi quijtúa pampa yehuanten cataloaya lacames quinami comunilisli.

<sup>18</sup> In oc sequin cataloaya Andrés huan Felipe huan Bartolomé huan Mateo huan Tomás huan Jacobo ixolol Alfeo, huan Tadeo huan Simón hual yec se ca in lanechiculisli motocaya cananistas.

<sup>19</sup> Huan noje quilajtultic Judas Iscariote hual se tonali yahuiaya quitemaca Jesús ca yehuanten hual yahuilooaya quimictilo.

*Jesús laquetza inminahuac yehuanten hual quihuejuecaltía in Espíritu Santo*

(Mt. 12:22-32; Lc. 11:14-23; 12:10)

Cuaquinon ca imonextilinjmes calaquiye pan se cali.

<sup>20</sup> Oc sejpa monechicuje míac lalalera huan pampín amo huil quicualoaya nadita Jesús huan imonextilinjmes.

<sup>21</sup> Huan quiman quicaquiye yehuanten hual iyaxca Jesús, quisaje pa quisehuiltisi, pampa quijtuloaya:

—Axan mopoluc ilajnamiquilisli.

<sup>22</sup> Sequin ca in lamaxtinijmes hualaje, quisaje pin caltilan hué Jerusalén, quijtuloaya:

—Quipía laijtic yihual in ijyecal itoca Beelzebú. Yihual inminhué in ijyecames amo cuajcuali. Ca ilahuelilitisli Beelzebú quinquixtilía lacames in ijyecames hual quinpialo laijtic yehuanten.

<sup>23</sup> Cuaquinon Jesús quinnotzac, quinlaquetzilic se lapuhualisli calica yehuanten quimatilosquiaya cuali len quinequiaya quijtu, quinmilic:

—¿Quinami huil yihual Satanás moquixtía pa quiahuac sinda unca laijtic se?

<sup>24</sup> Sinda momijmictitinemilo in lacames pa se lali, cuaquín ilahuelilitisli in lali amo huejcahuas.

<sup>25</sup> Huan sinda yehuanten hual chantilo pan se cali moxilulo cualanticate huan mocualantitinemilo, cuaquín yajmo quiman monechicusi pa chantisi pan in se cali.

<sup>26</sup> Huan jan yoje, sinda Satanás huan iijyecames mocualantitinemilo huan yoje moxilulo, cuaquín yajmo huil huejcahuas Satanás, lamis ilahuelilitisli.

<sup>27</sup> Amaquí huil calaquí icalí se lalcal chicác pa quixtequilis len quipía sinda ayamo quilpic in lalcal chicác. Cuaquín, quiman unca lailpili, huil calaquí pa quiquixtilis mochi hual cayas calijtic.

<sup>28</sup> Annimitzilía neli, Dios quinpuppuhuilis in lacames mochi in laijlaculisli huan mochi inminlahuejuecaltisli hual quijtulo.

<sup>29</sup> Ma yoje, Dios amo quiman quipuppuhuas aquí hual quihuejuecaltía in Espíritu Santo. Huejcahuas pa yes in laijlaculisli, amo quiman lamis.

<sup>30</sup> Quinmilic Jesús inon pampa in lamaxtinijmes quijtuloaya:

—Yihual quipía iijecal catzahuac.

*¿Aquí inantzín huan icnían Jesús?*

*(Mt. 12:46-50; Lc. 8:19-21)*

<sup>31</sup> Cuaquinon hualaje inantzín huan icnían, mocahuaje pa quiahuac, quitilanije lajtol pa quilisi Jesús pampa quinequiloaya quitalo yehuanten.

<sup>32</sup> Yehuanten hual molalijtataloaya inahuac Jesús quilije:

—Monantzín huan mocnían umpa cate pa quiahuac mitztemujticate pa mitzitasi.

<sup>33</sup> Jesús quinnanquilic:

—¿Aquí nonantzín? ¿Aquinojen nocnían?

<sup>34</sup> Quinmitac yehuanten hual molaliloaya quiyahualujtataloaya, quijtuc:

—Nican cate nonantzín huan nocnían.

<sup>35</sup> Aquí hual quichías quinami quinequi Dios, yihual nocni lalcal huan nocni síhual huan nonantzín.

## 4

*Jesús quinmilía lapuhualisli pa quinmaxtis inahuac in lalcal hual quixintía latocli*

*(Mt. 13:1-9; Lc. 8:4-8)*

<sup>1</sup> Oc sejpa pehuac lamaxtic Jesús pa itenco in al huejcalan, huan hualaje quitaje miac lalalera. Pampín calaquic pan se barquito pani pin al huejcalan. Nepa molalic, huan mocahuaje in lalalera pa itenco in al huejcalan.

<sup>2</sup> Quinmaxtiaya miac pan ipampa lapuhualisli hual quinlatiliaya ilamaxtilisli, huan amo ca lajtol calica huil quimatiloaya len quinequiaya quijtu. Quinmaxtiaya quinmilijtataya:

<sup>3</sup> —Xilacaquican: Se lalcal quisac pa quixinis latocli.

<sup>4</sup> Laxintíac, laxintíac huan sequin latocli huetzije ipan itenco in ojli. Hualaje in tutomes, quicuaje.

<sup>5</sup> Oc sequin latocli huetzije pan tixcaltílan capa amo cataya lali telahuac. Innojen huejcahuac jan nadita huan ixuaje pampa amo cataya lali telahuac.

<sup>6</sup> Quisac in tonali, quinhuactic in pacholimes pampa amo quipialoaya lalhuayol.

<sup>7</sup> Oc sequin pan huiztilan huetzije. Moscaltije in huizli, quinmictije in pacholimes, yoje amo laquije in latocli.

<sup>8</sup> Oc sequin latocli huetzije ipan lali cuali. Ixuaje, moscaltije, quilalije ilaquilyo. Sequin latocli quilalije treinta (sempuhualihuanmajlacli) ca

mochi sejse latocli, oc sequin sesenta (yepuhuali) ca mochi sejse latocli, oc sequin cien (macuilpuhuali).

<sup>9</sup> Cuaquinon Jesús quinmilic:

—Aqui quipía inacas, ma quicaqui.

*¿Leca quinmaxtía ca lapuhualisli?*

*(Mt. 13:10-17; Lc. 8:9-10)*

<sup>10</sup> Lamic quinmaxtic yoje, mocahuac Jesús ihuán. Cuaquinon yehuanten hual mocahuaje capa yihual quilajlanije, quilije:

—¿Len quinequi quijtúa in lapuhualisli calica tilamaxtiaya?

<sup>11</sup> Quinmilic:

—Amhuanten anmitzmachilitica Dios len oc sequin amo quimatilo. Anmitzmachilitica quinami yihual huelitía pan mochi lalticpan. Huan yehuanten hual amo cate ca tehuanten, yihual quinmachiltía mochi pan ipampa lapuhualisli hual quinlatilía ilamaxtilisli, pa yoje

<sup>12</sup> mas que lachiasi, amo quitasi. Huan yoje, mas que lacaquisi, amo quimatisi len quinequi quijtúa. Inon quinpanúa pa yoje amo mopalasi yehuanten pa inminyolo huan pa yoje Dios amo quinpupuhuilis inminlai-laculisli.

*Jesús quinmilía len quinequi quijtúa ilapuhualisli*

*(Mt. 13:18-23; Lc. 8:11-15)*

<sup>13</sup> Huan quinmilic:

—¿Amo anquimati len quinequi quijtúa in lapuhualisli? Cuaquín ¿quinami anquimatis len quinequilo quijtulo mochi lapuhualisli?

<sup>14</sup> In lalac hual laxintíac, yihual quinami se hual quinmilía Dios ilamachilitisli.

<sup>15</sup> Sequin lacames cate quinami in latocli hual huetzije inahuac in ojli. Quicaquilo Dios ilamachilitisli, jan ajnaxcan huala Satanás, quinmijcuanilía in lacames Dios ilamachilitisli hual quixinic in lalac pa inminyolo yehuanten.

<sup>16</sup> Oc sequin cate quinami in latocli hual quixintíac pin tixcaltilan. Quicaquilo in lajtol, pehualo quineltocalo ca paquilisli.

<sup>17</sup> Ma yoje, Dios ilajtol amo calaquic cuali pa inminyolo yehuanten huan pampín amo huejcahualo pa quineltocasi. Huan yojque jan ajnaxcan in tonali hual quinpanulo lacocoltisli huan quiman quitojtocalo in lacames pampa quineltocalo Dios ilamachilitisli cuali, cuaquín yajmo quinequilo quineltocalo. Cate quinami in pacholimes hual amo quipialo lalhuayol, huejcahualo je nadita san.

<sup>18</sup> In latocli hual cataya lacinili pin huiztilan, in quinami aquinojen noje quicaquilo Dios ilanahuatilisli.

<sup>19</sup> Ma yoje, amo mocahualo pa quijnamiqusi in míac hual cate pin lalticpan hual quinequilo canal. Canalo tomin calica mocuajcuamanalo, mocuhuilijtcate inon hual quinchihuilía amo cuali. Quinequilo míac len yes huan yoje mochi inon quinmijlacúa lacames pa inminyolo. Quinequilo quilcahualo Dios ilajtol, huan mochihualo quinami cuahuimes hual amo laquilo. Dios ilajtol amo quinpalehuía.

<sup>20</sup> Huan in latocli hual cataya lacinili pan lali cuali, inon quinami yehuanten hual quicaquilo in lamachilitisli cuali huan quineltocalo. Cuaquinon Dios ilamachilitisli quinchihualtía cuali. Yulilo quichijtcate quinami Dios quinequi, sequin niman míac, oc sequin amo yoje míac, cate quinami latocli, sequin quilaquiltulo treinta latocli pan se miahuil, sequin sesenta pan se miahuil huan sequin cien latocli pan se miahuil.

*Mochi hual lalatali moitasi**(Lc. 8:16-18)*<sup>21</sup>Noje quinmilic:

—¿Cuajnesi quihualicalo se tapalquita calica lahuilo pa quilalisi itzindan se tapalcal o itzindan se lapexli? ¿Amo quilalilo capa quinlahuis moxtin?

<sup>22</sup>Yoje, len yes hual unca lalatali, unca yoje pa moitilisi se tonali. Huan len yes hual amaqui quimati, unca yoje pa yoje se tonali quimatisi.

<sup>23</sup>Aqui quipía inacas pa lacaquis, ma lacaqui.

<sup>24</sup>Noje quinmilic:

—Xiquijnamictiacan inon hual anquicaqui. San quinami anlajnamictía, yoje anquimatis inon hual quinequi quijtúa. Huan yoje, jan quinami anquimaca, san yoje anyahui anquípía. Huan anyahui anquípía míac hual amo anpehuac anquípíac amhuanten hual anlacaqui cuali.

<sup>25</sup>Aqui quipía, yihual yahui cana míac hual ayamo quipiaya. Aquí amo quipía, yihual quiquixtilisi in nadita hual quipía.

*Jesús lamaxtía ca ilapuhualisli quinami ixua in latocli*<sup>26</sup>Noje quijtuaya:

—Yoje unca quinami huelitía Dios. Unca quinami se lalac hual quixini latocli.

<sup>27</sup>Quiman unca laxinili, in lalac cochi pa layúa, moqueztinemi semilhuil. Ixuatía in latocli huan moscaltitía huan amo quimati in lalac quinami mochía.

<sup>28</sup>Mochía pan ipampa in lali ihuían. Pehua ca nesi isacayo, cuaquín in miahuil, huan umpa monextilo in latocli pin miahuil.

<sup>29</sup>Cuaquín cate yuyucsi in latocli, huan quisalo in lacames pa quitequisi, pampa ajsic in tonali pa lapixcasi.

*Jesús lamaxtía ca ilapuhualisli ilatocli mostaza**(Mt. 13:31-32; Lc. 13:18-19)*<sup>30</sup>Noje Jesús quijtuc:

—¿Quinami len huil tiquijtulo in unca quinami Dios huelitía? ¿Len lajtomes tiquijtusi pa ticnextilisi quinami unca?

<sup>31</sup>Unca quinami se latocli mostaza. Quitocalo pin lali in niman tipichin ca mochi latocli hual quitocalo pin lalticpan.

<sup>32</sup>Ma yoje, quiman unca latocali, ixua huan moscaltía hué quinami amo cate yoje huejué in oc sequin pacholimes. Itzmolinía, itzmolinía huan in tutomes huil quinchihualo inminchan pa ilasehuán (ilasehuayan) in laitzmolinilisi.

*Nican quijtúa quinami Jesús quitequipanuaya lapuhualisli quiman lamaxtiaya**(Mt. 13:34-35)*

<sup>33</sup>Huan quinmilic Jesús ilamaxtilisi ca míac lapuhualisli quinami innojen. Quinmilic ilamaxtilisi quinami huil quicaquije.

<sup>34</sup>Amo quinmilic nindeno sinda amo quinmilic ca lapuhualisli calica quinlatalic ilamaxtilisi, jan yoje quinmilic. Ma yoje quiman cataya ihuían ca inonextilinijmes, quinmilic len quinequiloaya quijtulo mochi ilapuhualisli.

*Jesús quinmilía pa mocahuasi in ijeocal huan in al huejcalan**(Mt. 8:23-27; Lc. 8:22-25)*<sup>35</sup>In tonali nepa quiman layuajtítataya, Jesús quinmilic:

—Ma ticpanahuican in al huejcalan ca yoje itenco.

<sup>36</sup> Cuaquinon yehuanten quinmilije pa mohuicasi in míac lacialera huan imonextiliniymes Jesús quihuicaje pin barquito capa cataya. Noje ca yehuanten inminbarquito uyaje oc sequin barquitos.

<sup>37</sup> Umpa ca se nadita pehuac ijyecac chichahuac. Majcoquiaya in al huan calaquiaya pin barquito, huan yoje tentataya ca al.

<sup>38</sup> Huan Jesús coxtataya pin barquito itenco, mocuajtontitaya ca se xotopa yamanquil. Yehuanten quejxiltije, quitzajtzilije:

—¡Lamaxtini! ¿Amo timomajtía pampa tipolejticate?

<sup>39</sup> Cuaquinon ejsac, moquetzac, cajuac in ijyecal huan quilic in al huejcalan:

—¡Ximocahua, ximosehui!

Huan mosehuic in ijyecal, in al yajmo majcoquiaya.

<sup>40</sup> Cuaquín Jesús quinmilic:

—¿Leca anquimacajsía? ¿Ayamo anquilalía laneltocalisli ca nehual?

<sup>41</sup> Momajtiloaya yehuanten míac, moilijtataloaya se huan oc se:

—¿Aqui yes in lacial hual quineltocalo in ijyecal huan in al huejcalan?

## 5

### *Jesús quiquixtilía míac ijyecames se lacial pin lali Gadara*

(Mt. 8:28-34; Lc. 8:26-39)

<sup>1</sup> Ajsije ca yoje itenco (analco) in al huejcalan pa in lali itocac Gadara.

<sup>2</sup> Quisac Jesús pin barquito laijtic. Hualac capa yihual quistihualaya se lacial capa quinlalpachulo mijquimes, quinamictihualac Jesús in lacial quipixtataya ijyecal amo cuali.

<sup>3</sup> Chantiaya in lacial pin ostumes (cuevas) capa quinlalpachulo mijquimes. Amaqui huil quilpiaya, quema, amo huil quilpiloaya ca teposli.

<sup>4</sup> Pan míac tonalijmes quilpinijme ca teposli pa icxihuajmes huan ca teposli pa imajmajuan. Ma yoje yihual quipostequini sequin teposlimes huan quicojcotonani oc sequin teposlimes huan moxtin momajtiloaya pa quiquitzquillosquiaya.

<sup>5</sup> Amo mocahuaya pa tzajztinemisquiaya ca semilhuil huan ca layúa pin tepetzindis (lomas) huan capa quinlalpachuje in mijquimes. Noje motecuatiniemiaya ca tixcalimes.

<sup>6</sup> Quitac pa huejquita Jesús, molalujtihualac, quimolancuacuetzilic, tza-jtzic chichahuac.

<sup>7</sup> Huan quilic:

—¿Len ticpía ca nehual, Jesús, tel ixól Dios in niman hué? ¡Nimitzilía pa tichilis ilaixpan Dios pampa amo tichcocoltis!

<sup>8</sup> Quilic inon pampa Jesús quilic:

—¡Ijyecal, xiquisa laijtic in lacial!

<sup>9</sup> Jesús quilajlanic, quilic:

—¿Quinami timotoca?

Quinanquilic:

—Cate míac notocajmes pampa ticate míac ijyecames.

<sup>10</sup> In lacial quitemachic Jesús míac pa camo quitilani pa quiahuac in lali.

<sup>11</sup> Umpa cataya se lanechiculisli ca míac coyamimes (cuchis) lacuajtat-aloaya pa itepotzcon se loma (tepetzindi).

<sup>12</sup> Huan quitemachije in ijyecames Jesús, quilije:

—Xitechtilani pin coyamimes, ma ticalaquican laijtic yehuanten.

<sup>13</sup> Cuaquinon Jesús quinmacahuiltic huan quistiaje in ijyecames laijtic in lacial. Calaquije ca laijtic in coyamimes, cataloaya quinami dos mil

(macuilitzondi). Cuaquín yehuanten molasaje pa temuán (temuayan) pa itepotzcon in loma, molasaje pin al huejcalan, moatoctije.

<sup>14</sup> Yehuanten hual quinmitaloaya in coyamimes choluje huan quinl-machiltije yehuanten pin caltilan huan pa itenco in caltilan len panuc. Pampín quistihualaje moxtin pa quitasi len panuc.

<sup>15</sup> Ajsije capa Jesús, quitaje in lalac hual quiquitquinijme in ijyecames. Nepa molalijtataya huan axan cataya lalaquentili. Quipiaya noje mochi ilaijnamiquilisli cuali. Pampín yehuanten hual chantiloaya pin caltilan momajmajtije.

<sup>16</sup> Huan aquinojen quitaje len quipanuc in lalac hual quiquitquinijme in ijyecames quinpuhuilije yehuanten quinami cataya, quinpuhuilije len quinpanuc in coyamimes.

<sup>17</sup> Cuaquinon pehuaje quitemachije Jesús míac pa yihual mohuicas pa inminlali.

<sup>18</sup> Yoje calaquic Jesús pin barquito. Huan in lalac hual quiquitquinijme in ijyecames quitemachic ca iyolo pa Jesús quihuicasquiaya ca yihual.

<sup>19</sup> Ma yoje, Jesús amo quimacahuilic. Quilic:

—Xía pa mochan huan mocnían pa oc sequin calimes, xiquinpuhuili quinami in Tata mijchihuilic míac hual huejué, huan quinami yihual mitz-icnilic.

<sup>20</sup> Cuaquín uyac in lalac, pehuac lapuhuac pin lali capa cataloaya in Majlaci Cajcaltilan (Diez Pueblos). Quinlaquetziliaya moxtin lacames mochi hual Jesús quichihuilic. Huan moxtin molapolultije.

*Ixolol muachita Jairo huan in sihual hual quimatocac inahuas Jesús (Mt. 9:18-26; Lc. 8:40-56)*

<sup>21</sup> Huan Jesús mocuepac oc sejpa pin barquito ca yoje (analco) in al huejcalan, ca imonextiliniymes mocuepac. Ajsije umpa, monechicuje míac lacames huan sihuames capa yihual cataya pa itenco in al huejcalan.

<sup>22</sup> Cuaquinon hualac ca in lalacera, ajsic itepotzcon Jesús, yihual se hué pa in tiopan. Quitac Jesús, quimolancuacuetzilic capa icxían.

<sup>23</sup> Quitemachiaya míac, quilic:

—Noxól muachita axan mictía. Xihuá, xiquinlali momajma pan capa yihual pa pajtis huan yulis.

<sup>24</sup> Ca Jairo uyac, huan quitocaloaya Jesús míac lalacera, quitojpejtihuiloyaya.

<sup>25</sup> Huan cataya nepa se sihual cocoxqui, mococuni ca eslera hual quisaya pa icuerpo, quiapiaya doce xixihuil.

<sup>26</sup> Panuc míac lacocoltilisli ca len quichihuilije míac lapajtinijmes. Quilamic mochi itomin huan amo quipalehuic nindeno, amo pajtic san nadita. Jan yoje mococujtiahuiaya míac, amo yoje cataya quiman pehuac mococuc.

<sup>27</sup> Huan quimatic len quiqtutinemiloaya quinami huil lapajtiaya Jesús. Pampín hualac ca in lalacera, ajsic itepotzcon Jesús, quimatoquilic inahuas.

<sup>28</sup> Inon quichíac pampa quiqtuaya laijtic yihual: “Sinda nicmatoquilis jan inahuas san, cuaquín nipajtis.”

<sup>29</sup> Huan jan ajnaxcan mosehuic iquisalisli eslera. Quimatic laijtic icuerpo pampa axan pajtic.

<sup>30</sup> Jesús jan ajnaxcan quimatic laijtic yihual pampa quisac pa yihual oc sejpa ilahuelilitisli pa lapajtis. Momalinac, quinmitac in míac lalacera, quinmilic:

—¿Aqui nechmatocac?

<sup>31</sup> Imonextiliniymes quilije:

—¿Leca tilajlanic: “Aquí nechmatocac”? Tiquiztica quinami in míac lalcalera ajsitalo monahuac.

<sup>32</sup> Ma yoje, yihual mocahuac lachixtataya cajcapa pa quitas aquí quichi-huilic inon.

<sup>33</sup> Cuaquín in sihual momajtic yuyucatataya. Huan quinami quimatic len panuc laijtic icuerpo, hualac, quimolancuacuetzilic ilaixpan Jesús, quilic mochi in hual quipanuc.

<sup>34</sup> Huan Jesús quilic:

—Nito, axan tipajtic pampa ticlalic molaneltoalisli ca nehual. Ximohuica axan ca paquilisli huan ma yajmo mitzcocúa mococolisli.

<sup>35</sup> Ayamo lamiaya lajtu Jesús, huan hualaje yehuanten hual cataloaya pa ichan ihué in tiopan. Quilije:

—Lamic polehuic moxolol, ¿pa len ticmaca tequil in lamaxtini?

<sup>36</sup> Quicaquic Jesús in hual quilije, huan quilic ihué in tiopan:

—Amo ximomajti, xiclali laneltocalisli ca nehual san.

<sup>37</sup> Huan amo quinmacahuiltic moxtin pa yalosquiaya ca yihual, jan Pedro huan Jacobo huan Juan icni Jacobo, yehuanten san.

<sup>38</sup> Ajsije pa ichan in hué lalac. Quitac Jesús quinami quichihualoaya míac xahuanilisli, chocataloaya huan tzajztitaloaya.

<sup>39</sup> Calaquic huan quinmilic:

—¿Leca anchocatica? Huan ¿leca anxahuantica? Amo polehuic in muachita, jan coxtica.

<sup>40</sup> Yehuanten quihuitzquilije san. Cuaquinon Jesús quinquixtic moxtin pa quiahuac. Quinhuicac itajtzin huan inantzin huan yehuanten hual ca yihual hualaloaya, calaquije capa cataya in muachita (ichpocal o piltondi).

<sup>41</sup> Quiquitzquic imajma in muachita, quilic ca ilajtol:

—Talita, cumi —hual quinequi quijtúa: Muachita, nimitzilía, ximoquetza.

<sup>42</sup> Jan ajnaxcan in muachita hual quiapiaya doce xixihuil moquetzac, huan pehuac nejnemic. Pampa inon molapolultiloaya míac yehuanten.

<sup>43</sup> Ma yoje, quinmilic Jesús chichahuac:

—Amo xicmachiltican amaqui len panuc.

Quinmilic noje pa quilacualtilosquiaya.

## 6

*Jesús pin caltilan (pueblo) Nazaret*

*(Mt. 13:53-58; Lc. 4:16-30)*

<sup>1</sup> Mohuicac Jesús umpa, mocuepac pa ilali capa moscaltic, uyac ca imonextiliniymes.

<sup>2</sup> In tonali hual mosehuilo in judíos pehuac lamaxtic pa inmintiopian, huan in míac hual quicactaloaya mocahualoaya moizticate, moilije:

—¿Capa monextilic in se mochi in hual techilijtica? ¿Len in lajmatilisli hual quiplía? Huan quinchía innojen hual techlapolultilo.

<sup>3</sup> ¿Amo in se in carpintero, amo yihual ixól María, huan amo icnián Jacobo huan José huan Judas huan Simón? Quema, yihual. Huan icnián sihuames, yehuanten cate nican ca tehuanten.

Huan quixixicuje, cualanije ca yihual.

<sup>4</sup> Huan Jesús quinmilic:

—Lacames quimatilo momajtilo ilaixpan se ilajtuni Dios. Jan yehuanten san pa ilali huan icnián pa oc sequin calimes huan yehuanten pa ichan, innojen amo quipililo lamajtilisli ilaixpan.



<sup>5</sup> Huan nepa amo huil quichíac len hual lanextilisqueiaya quinami yihual quipía Dios ilahuelilitilisi. Jan quinlalilic imajmajuan pan sequin naditas cocoxquimes huan quinpajtic.

<sup>6</sup> Huan molapolultiaya Jesús pampa yehuanten amo quinequiloaya quineltoocalo yihual.

*Jesús quintilanía imonextiliniymes pa quinmilisi in judíos ilajtol*  
(Mt. 10:5-15; Lc. 9:1-6)

Huan quisac nepa Nazaret, yajtiahuiaya pan sequin caltilan tijtipichin amo huejca, nejnepa lamaxtiaya.

<sup>7</sup> Cuaquín quinnotzac in doce imonextiliniymes ca yihual huan pehuac quintilaníc pa yahuilosquiaya oj'ome. Quinmacac lahuelilitilisi pa quin-quixtilisi lacames huan sihuames iyjecames amo cuajcuali.

<sup>8</sup> Quinnahuatic pa camo quihuicalosquiaya nindeno pa ojli, jan se cua-jtzindi san pa mopalehuisi pa nejnemisi. Huan amo quinmacahuiltic pa quihuicalosquiaya xotopa huan len quicalosquiaya huan tomin pa inmín-paxajmes.

<sup>9</sup> Noje quinmilic pa molalililosquiaya jan lacsames san, huan quinmilic pa molaquentilosquiaya ca in tzotzomajli calica mojmosta molaquentiloaya huan ca se cotón san.

<sup>10</sup> Quinmilic:

—Capa yes ancalaquis se cali, nepa xicayacan pa mochi tonaliymes ancayas pin caltilan.

<sup>11</sup> Sinda yehuanten pin caltilan amo anmitznamiquisi huan amo quineq-uisi anmitzcaquisi, cuaquín in tonali anquisas umpa, ximotzejtzeluilican in lalpotocli hual unca pa anmolacsames. Yoje quimatisi quinami quichihuil-ijitcate Dios len amo cuali. Annimitzilia neli, pa in tonali Dios quintilanís iyampa yihual yehuanten pin lalticpan, yehuanten pa in caltilan yalo panulo míac lacocoltilisi. Amo yoje míac panusi lacocoltilisi yehuanten de in caltilan Sodoma huan in caltilan Gomorra.

<sup>12</sup> Yoje quisaje in doce imonextiliniymes quinmiloaya in judíos Jesús ilamachilitilisi pa quipalasi inmínyolo pa yulisi quinami Dios quinequi.

<sup>13</sup> Noje quinquixtililoaya yehuanten míac iyjecames amo cuajcuali, quinx-ahuililoaya míac cocoxquimes ca chahuac huan quinpajtiloaya.

*Quimictilo Juan Lacuayatequini*  
(Mt. 14:1-12; Lc. 9:7-9)

<sup>14</sup> In hué itocac Herodes quimatic len quichihuaya Jesús, pampa moxtin molaquetziloaya inahuac yihual. Sequin quijtuloaya Jesús cataya Juan Lacuayatequini hual mocuepac yulic mas que quimictije.

<sup>15</sup> Oc sequin quijtuloaya:

—Yihual Elías, hual yec ilajtuni Dios pa yina.

Huan oc sequin quijtuloaya:

—Yihual se ca ilajtuniymes Dios hual yulinijme pa yina.

<sup>16</sup> Quiman quicaquiaya inon Herodes, quijtuc:

—In se unca Juan. Nilatilaníc pa quicotonilisi iquixlan. Unca yihual hual axan yuli oc sejpa, quisac pa capa cate in mijquimes.

<sup>17</sup> Yoje quijtuc Herodes pampa quinpiác sequin mesli, yihual latilaníc pa quiquitzilosquiaya Juan pa quicalactilosquiaya pin calijtic.

<sup>18</sup> Inon cataya pampa Juan sejpa huan oc sejpa quilic Herodes:

—Dios ilajtol quijtúa pampa amo unca moyaxca pa ticanas isihua mocni.

Juan quilic inon pampa Herodes canac Herodías hual yec isihua Felipe huan Felipe yec icni Herodes.

<sup>19</sup> Huan Herodías amo mocahuac cualanic ca Juan. Quinequiaya quimicti, huan amo huil.

<sup>20</sup> Amo huil quimictic pampa Herodes quimatiaya momajti ilaixpan Juan. Quimatiaya pampa Juan yec lalac cuali hual quiapiaya iyolo chipahuac. Pampa inon Herodes amo quimacahuiltiaya pa Herodías quichihuilisquiaya nindeno Juan. Herodes quicaquic quilaquetzilic Juan Dios ilajtol, huan mas que quimacajsiaya in hual quiliaya Juan, ma yoje quixtocaya quicaqui.

<sup>21</sup> Cuaquinon, ajsic se tonali quiman Herodías quitac quinami quimomic-tiulilisquiaya Juan. Pan in tonali quichijtaloaya ilhuil (fiesta) pampa in tonali monamiquic ca in tonali hual lacatic Herodes. Herodes quinnotzac pa lacuasi in huejueyenten huan in laicananijmes huan mochi yehuanten huejueyenten pin lalticpan Galilea.

<sup>22</sup> Lacuajtaloaya, calaquic Herodías ixolol sihual, pehuac mijtotic. Yoje quinmacac paquilisli Herodes huan yehuanten hual ca yihual cataloaya. Pampa in, Herodes quilic in sihual:

—Xichtemachi len ticnequis huan nel nimitzmacas.

<sup>23</sup> Quilic inon ca lajtol hual amo mopala, quilic:

—Len yes tichtemachis nimitzmacas, quema, sinda tichtemachis lajco in lali capa nihuelitía.

<sup>24</sup> Quisac in sihual yancuic, quilic inantzin:

—¿Len nictemachis?

Huan inantzin quinanquilic:

—Itzontecon Juan Lacuayatequini.

<sup>25</sup> Mocuectiquisac in sihual yancuic capa cataya Herodes, quilic:

—Nicnequi pa tichmacas jan ajnaxcan itzontecon Juan Lacuayatequini pan se tapalcal xalapa.

<sup>26</sup> Cuaquinon quicocuc iyolo in hué. Ma yoje, amo quinequiaya quipala in lajtol hual yihual quilic, pampa quijtoc ca lajtol hual amo mopala, huan quicaquije yehuanten hual nepa cataloaya ca yihual.

<sup>27</sup> Yoje, quitilanic se guache quilijtataya pa quihualiquilis Juan itzontecon.

<sup>28</sup> Uyac in guache pa in calijtic capa cataya Juan, quicotonilic iquixlan, quihualiac itzontecon Juan pan se tapalcal xalapa. Quimacac in sihual yancuic, huan yihual quihuiquilic inantzin.

<sup>29</sup> Quimatije inon imonextiliniyemes Juan, uyaje canaje icuerpo (inacayo), quilalpachuje.

### *Jesús quinlacualtía macuili mil lacames*

*(Mt. 14:13-21; Lc. 9:10-17; Jn. 6:1-14)*

<sup>30</sup> Yehuanten doce imonextiliniyemes Jesús monechicuje oc sejpá capa cataya Jesús, quilije mochi hual quichihuaje. Quilije noje len quinmaxtije yehuanten pa innojen míac caltilan.

<sup>31</sup> Cuaquín Jesús quinmilic:

—Ma tiacan tohuán pa lajcotiyan capa amaqui unca, nepa timosehuisi je tipichin.

Inon quinmilic pampa yahuilaloaya huan hualaloaya míac lacames huan sihuames. Pampín amo huil lacuaje Jesús huan imonextiliniyemes.

<sup>32</sup> Yoje uyaje ca se barquito ca capic amaqui cataya.

<sup>33</sup> Ma yoje, míac quinmitaje quiman uyaje yehuanten, huan quinmiximatije Jesús huan in doce imonextiliniyemes. Pampín quisaje pa mochi caltilan, molalujtaje ca umpic, ajsije quiman ayamo ajsic Jesús.

34 Cuaquinon, ajsic Jesús, quisac laijtíc in barquito, quinmitac míac lalacera. Huan quinpiliaya laicnilisli yehuanten pampa cataloaya quinami borregos hual amaqui quinmiztataya. Cuaquín pehuaya quinmaxti míac.

35 Quiman tiolactic, hualaje imonextilinijmes capa yihual, quilije:

—Axan tiolactic, ca niquic amaqui chanti.

36 Xiquintilani pa yasi pa innojen caltilan itenco nican huan pin caltilan tijtipichin pa mocuhuilisi len quicuasi.

37 Yihual quinnanquilic:

—Amhuanten xiquinlacualtican.

Quinnanquilije:

—¿Tiasi tijcuhuasi pan ca ome cientos denarios tomin pa tiquinlacualtisi?

38 Jesús quinlajlanic:

—¿Quichi panes anquinpía? Xiacan xiquitacan.

Quimatije quichi, cuaquín quilije:

—Macuili, huan ome michimes.

39 Cuaquinon quinmilic in lalacera pa mosehuisi sejsequin nican, sejsequin nepa pani pin sacal xuxuctic.

40 Yoje moxiluje yehuanten huan molalije ca míac lanechiculisi, sequin ca cien, oc sequin ca cincuenta lacames.

41 Huan Jesús quinmanac in macuili panes huan in ome michimes, lachiác pa pani pin cielo, quisehuic Dios pampa in hual yahuiuloaya quicualo. Cuaquinon quinxiluilic in panes, quinmacac imonextilinijmes pa quinlalilisi inminlaixpan moxtin. Noje quinxiluilic in ome michimes pa moxtin.

42 Yoje moxtin lacuaje huan pachihuije.

43 Cuaquín quinpejpenaje mochi in pan lapanali huan in michimes hual amo quicuaeje, quintemiltije doce chiquihumes ca innojen.

44 Cataloaya macuili mil lacames hual quicuaeje in panes.

*Jesús nejnentía pani in al*  
(Mt. 14:22-27; Jn. 6:16-21)

45 Jan axcan Jesús quinmilic imonextilinijmes pa lejcusi pin barquito, quinmilic pa quilaicanasi yihual pa Betsaida hual cataya pa yoje (analco) in al huejcalan. Huan yihual mocahuaya pa quinmilis in lalacera huan sihualera pa mohuicasi pa inminchan, quinchicahuaya.

46 Quiman quintilanic moxtin, uyac Jesús pin lomas (tepetzindis), umpa quilajlaniaya Dios.

47 Cuaquín layuajtíc, huan cataya in barquito lajco pin al huejcalan huan mocahuaya Jesús ihuán pan lali.

48 Pa cualcan quinmitac Jesús imonextilinijmes siahuiloaya quilanilultitaloaya in barquito ca cuahuimes, pampa quinlaixnamiquiaya in ijyecal chicahuac. Cuaquín ajsitihualaya Jesús nejnentataya pani pin al, yahuiaya quinpanahui.

49 Quitaje yihual nejnentihualaya pani pin al, quijtuloaya Jesús yec se lamajtini.

50 Pampín tzajtziuloaya pampa quitaje moxtin huan quimacajsije. Ma yoje, quinnotzac Jesús, quinmilic:

—¡Xicchicahualtican anmoyolo, amo ximomajtican! ¡Nehual niunca!

51 Lejcuc pin barquito ca yehuanten, mosehuic in ijyecal. Huan molapolultije imonextilinijmes.

52 Molapolultije pampa ayamo quimatiloaya quinami panuc nepa capa quinxiluilic Jesús in panes huan in michimes. Amo huil quimatiloaya san quinami míac unca ilahueliltilisli hual quipía Jesús.

*Jesús quinpajtía míac cojcocoxquimes pin lali Genesaret  
(Mt. 14:34-36)*

<sup>53</sup> Quipanahuije in al huejcalan, ajsije pin lali itocaya Genesaret. Quilpije in barquito pa itenco in al huejcalan.

<sup>54</sup> Quisaje pin barquito huan jan ajnaxcan in lalalera quiximatije, quis-lacuje Jesús.

<sup>55</sup> Cuaquín molalujtinemiloaya moxtin yehuanten umpa, pehuaje qui-hualicaje in cocoxquimes pan lapexlimes quiman quimatije capa cataya Jesús.

<sup>56</sup> Cajcapa yes calaquiaya yihual, sinda pa sequin caltilan tijtipichin o sinda pa sequin caltilan huejué o sinda pa sequin caltilan niman tijtipichin, quinlalije in cojcocoxquimes pin lajcotiyan. Quitemachiloaya Jesús pa yihual quinmacahuiltis pa quimatocasi jan itenco icotón huejcanic san. Huan moxtin hual quimatocaje, yehuanten pajtije.

## 7

*¿Len quiylacúa iyolo se lalal?*  
(Mt. 15:1-20)

<sup>1</sup> Huan quistihualaje Jerusalén fariseos huan sequin inminlamaxtinijmes in judíos, quimaxtiloaya inminlajtol hual quinmilía quinami monequi pa quimolancuacuetzilisi Dios. Yehuanten monechicuje capa cataya Jesús.

<sup>2</sup> Quitaje quinami sequin imonextilinijmes lacualoaya ca inminmajma-juan catzahuac, quinequi quijtúa amo lapacali. Huan inminlajtol in judíos quijtúa pampa quema, quiplalo pa mochipahuililo inminmajmajuan jan yojque quinami quijtúa in lajtol. Pampin motexpahuiloaya ca Jesús imonex-tilinijmes.

<sup>3</sup> (Motexpahuiloaya pampa in fariseos quichihualo quinami mochi in oc sequin judíos. Amo lacualo sinda amo pehualo ca lapacalisli pan inmajma-juan. Yojque quinmajcoquilo in lachihualisli hual quitemacaje pa yina míac xixihuil inmintajtzitzián.)

<sup>4</sup> Huan sinda yalo pa in lajcotiyan (tianquisli) capa lacuhualo huan lanamacalo, cuaquín quiman mocuepalo, amo lacualo sinda amo pehualo ca lapacalisli pan ipampa lajuichulisli hual quiplalo pa quichihuasi jan yoje. Huan cate oc sequin míac lajtomes hual quintemacaje inmintajtzitzián, hual in judíos quiplalo pa quineltoyasi, quinami innojen: Quiplalo pa quinpacasi quinami lacuayatequilisli tapalcames tijtipichin huan tapalcames huejué huan nixcumimes jan yoje quinami quijtúa inminlajtol.)

<sup>5</sup> Pampin yehuanten in fariseos huan in lamaxtinijmes quilajlanije Jesús, quilije:

—¿Leca amo quineltocono momonextilinijmes inminlajtomes totajtzitzián? Lacualo ca inminmajmajuan amo lachipahuali jan yoje, huan inon amo unca quinami quijtúa tolajtol hual techilía quinami ticmolancuacuetzililo Dios.

<sup>6</sup> Huan Jesús quinnanquilic:

—Isaías ilajtuni Dios quijtuc melahuac anmonahuac amhuanten hual anlajtúa yoje. Ma yoje, amo anquichía yoje quinami anlajtúa. Yihual Isaías quijsuiluc len Dios quijtuc, quilic:  
Innojen lacames quimatilo nechpililo lamajtilisli san ca inmincamac, huan ca inminyolo amo quiman nechijnamiquilo.

7 Jan lapic (de in balde) nechmolancuacuetzililo pampa quinmaxtilo san inminlajtomes lacames.

Amo monotza len in lancuacuetzalisli hual nejchihuילו, pampa quinmaxtilo san lacames inminlajtomes.

8 Amhuanten anquicahua Dios ilamachiltisli huan amo quiman anmocahua pa anquichías len anmitznahuatinijme in hual quijcuiluje lacames pa yina, pampa amo anquilcahua pa anquincuaatequis tapalcames huejué huan tijtipichin huan xicalimes. Huan anquinchía oc sequin míac hual anmitztemacanjme lacames.

9 Noje quinmilic:

—¿Cuajnesi anquichijtica cuali quiman yes anquitojpehua Dios ilamaxtilisli? Anquitojpehua quiman anquichijτίας anmolamaxtilisli hual anmitztemacanjme pa yina lacames.

10 Amo anquichijtica cuali, pampa Moisés quijtuc: “Xiquinlasojla motajtzin huan monantzin.” Noje quijtuc: “Aqui quihuejuecaltía itajtzin o inantzin, ma ye lamictili.”

11 Ma yoje, amhuanten anquijtúa pampa sinda se lalac quinmilía itajtzin huan inantzin: “Amo huil annimitzpalehuía ca notomin huan len yes noyaxca, pampa mochi hual noyaxca unca Corbán.” (Corbán quinequi quijtúa pampa quitemacaje Dios.)

12 Huan sinda quinmilía yoje, cuaquín amhuanten yajmo anquimacahuiltía pa quinpalehuis itajtzin huan inantzin.

13 Yoje anquichía. Huan yoje ca amhuanten yajmo monotzas nindeno Dios ilajtol pan ipampa anmolamaxtilisli. In lamaxtilisli anmitztemacanjme pa yina in huejueyenten. Huan amhuanten anquintemacas anmoxolomes in lamaxtilisli. Noje cate míac oc sequin lamaxtilisli quinami innojen hual anquinchía.

14 Oc sejpa Jesús quinnotzac in lacames huan sihuames, quinmilic:

—Xichcaquican anmoxtin huan xicmatican inon hual nicnequi niqijtúa.

15 Amo unca nindeno hual quicuas se hual quijlacus iyolo. Unca inon hual quisa capa iyolo se, quema, in quijlacúa.

16 Aquí yes quipía inacas, ma quicaqui inon.

17 Jesús moxilujtiac capa cataloaya in míac lalacera, calaquic pa icali. Quilajlanije imonextilinjmes len quinequiaya quijtu in lapuhualisli calica lamaxtiaya, yojque quinlatilijtataya in lalacera ilamaxtilisli.

18 Yihual quinmilic:

—¿Noje amo anquimati amhuanten len quinequi quijtúa? ¿Amo anquimati pampa mochi hual quicua se amo quijlacus iyolo?

19 Amo calaqui pa iyolo, calaqui pa laijtic icuerpo (inacayo), cuaquinon quisa quiman yes yahui sacatilan.

Yojque quinequiaya quijtu Jesús pampa mochi pin lalticpan hual quicualo lacames unca cuali pa tijcuasi.

20 Noje quinmilic:

—Unca in hual quisa capa iyolo se, inon quijlacúa.

21 Unca pampa laijtic iyolo se quijtúa len amo cuali. Huan quinami yoje quijtulo lacames pa laijtic inminyolo, monilulo lacames huan sihuames mas que amo monamictije.

22 Laxtequilo, lamictilo, canaloc oc sequin sihuames hual amo inminsihuahuan, quinequilo hual amo inminyaxca. Quichihualo in amo cuali,

lacuajcuamanalo, amo quimatilo pinahualo, quixiculilo oc sequin. Lahuejuecaltilo, amo lalasojlalo, amo quinequilo quimatilo len unca amo cuali pa motzacuilisi pa camo quichihuasi.

<sup>23</sup> Mochi inon quisalo pa laijtic iyolo se huan quijlacúa iyolo.

*Se sihual pin lali Sirofenicia quilalía ilaneltoçalisli ca Jesús  
(Mt. 15:21-28)*

<sup>24</sup> Cuaquinon quisac Jesús umpa, uyac capa cataloaya in caltilan hué Tiro huan in caltilan hué Sidón. Nepa pehuac chantic pa se cali. Quinequiaya pa amaqui quimatisquiaya pampa umpa cataya. Ma yoje, amo huil quinmolatiliaya.

<sup>25</sup> Nepa cataya se sihual quiapiaya se muachita (ichpocal). In muachita quiapiaya se ijyecal amo cuali. Quicaquic in sihual quilaquetzilije quinami huil lapajtía Jesús, huan jan ajnaxcan hualac quitac, quimolancuacuetzilic capa icxían.

<sup>26</sup> Cataya ilali in sihual in lali Sirofenicia huan lajtuaya griego. Quitemachiaya Jesús pa quiquixtilis in ijyecal imuachita.

<sup>27</sup> Jesús quilic:

—Ma mopehualti pa in xolomes pachihuasi. Amo unca cuali sinda quiquixtililo in hual quicualo in xolomes pa quilasasi pa quicuasi in pelotzitzindis.

<sup>28</sup> Huan in sihual quilic:

—Jo quema, Tata. Ma yojque itzindan capa lacualo in xolomes in pelotzitzindis quicualo inminlapanajquimes tijtipichin in xolomes hual quinmayahuilo pan lali.

<sup>29</sup> Jesús quilic:

—Unca cuali in hual tiquijtuc. Pampín, huil timohuica, axan quisac in ijyecal capa moxolol.

<sup>30</sup> Huan ajsic in sihual pa ichan, quitac in muachita pa ilapexli, quisac capa yihual in ijyecal.

*Jesús quipajtía se panata hual amo huil lajtúa*

<sup>31</sup> Quisac Jesús pin lali inahuac Tiro, quipanahuic Sidón, quipanajtác in lali capa cataloaya in Diez Pueblos (Majlacli Cajcaltilan), huan ajsic pa in al huejcalan itoca Galilea.

<sup>32</sup> Quihualicaje se lalac panata hual amo huil lajtuaya cuali. Quilije:

—Xicnequi xiquinlali momajmajuan capa yihual pa pajtis.

<sup>33</sup> Cuaquín Jesús huan in lalac panata moxiluje ca capic cataloaya inminhuán. Quinlalic Jesús ixerixajmes pa inacajmes in lalac, lachijchac, quimatocac inejnepil in lalac.

<sup>34</sup> Cuaquinon lachíac pa pani pin cielo, ijyulantic, quilic:

—¡Efata! —hual quinequi quijtúa: ¡Ma molapucan!

<sup>35</sup> Jan ajnaxcan molapuje inacajmes, molinic cuali inejnepil, lajtuc cuali.

<sup>36</sup> Quinnahuatic Jesús pa camo quilisi amaqui. Ma yoje, mas que mías quinmilic inon oc sejsa huan oc sejsa, jan yoje yehuanten mías, mías quinmilijtinemiloaya oc sequin.

<sup>37</sup> Huan in lalacera molapolultiloaya niman mías. Quema, amo quiman molapolultije yoje, quijtuloaya:

—Yihual quichía cuali mochi. Yehuanten hual panatas quinlacaquiltía, huan aquinojen hual amo lajtulo, yihual quinchihuilia pa lajtusi.

## 8

*Jesús quinlacualtía nahui mil lacames**(Mt. 15:32-39)*

<sup>1</sup> Innojen tonalijmes monechicuje oc sejpa míac lacames, huan amo quipialoaya len quicualosquiaya. Quinnotzac Jesús imonextiliniyjes quinmilic:

<sup>2</sup> —Ni quinmicnilitía in míac lalacera pampa quipía ye tonali yehuanten cate ca nehual huan axan amo quipialo len quicuasi.

<sup>3</sup> Sequin hualaje huejca. Sinda ni quintilanis ca mayandi pa inminchan, amo quipiassi chicahualisli pa in ojli.

<sup>4</sup> Quijtuje imonextiliniyjes:

—¿Quinami huil quinlacualtía se nican? Amaqui chanti ca níc.

<sup>5</sup> Quilajlanic, quinmilic:

—¿Quichi panes anquinpía?

Quijtuje:

—Chicome.

<sup>6</sup> Cuaquín Jesús quinmilic pa molalilosquiaya pan lali. Quinmanac in chicome panes, quisehuic Dios. Cuaquinon quinxiluilic, quinmacac imonextiliniyjes pa quinlalililosquiaya inminlaixpan yehuanten.

<sup>7</sup> Quimpialoaya noje sequin michimes tijtipichin. Quisehuic Dios, huan quinmilic noje imonextiliniyjes pa quinlalilisi inminlaixpan pa quicualosquiaya.

<sup>8</sup> Lacuaje huan pachihuije. Cuaquinon quinpejpenaje chicome chiquihuimes tenticate ca lajquitos ca in pan lalapanali hual mocahuaje.

<sup>9</sup> Yehuanten hual lacuaje cataloaya quinami nahui mil lacames. Cuaquinon quinmilic Jesús pa mohuicalosquiaya.

<sup>10</sup> Cuaquín, Jesús huan imonextiliniyjes calaquije se barquito, uyaje pa in lali motocaya Dalmanuta.

*Sequin fariseos quitemachililo Jesús se lanextilisli hual quinnextilía Dios ilahueliltisli**(Mt. 16:1-4; Lc. 12:54-56)*

<sup>11</sup> Hualaje quitaje Jesús sequin fariseos, pehuaje quinlaxilije Jesús lajtomes, quilije:

—Timitztemachilo, xicchía len hual technextilis pampa unca iyaxca Dios molahueliltisli.

Cataya pampa yehuanten amo neli quineltocaloaya pampa Dios quitilanic Jesús. Pampín quinequiloaya quichihualtilo se lanextilisli.

<sup>12</sup> Cuaquín ijyulantic Jesús ca mochi iyolo pampa amo quineltocaloaya huan quinmilic:

—¿Leca quitemachilo lacames pa quitasi je lanextilisli pin cielo? Annim-itzilía neli, amo nesis se lanextilisli pin cielo pa yehuanten hual yulticate axan.

<sup>13</sup> Huan quiman quinmilic inon, quincajcahuac, mocuepac calaquic in barquito oc sejpa. Quipanahuiaya ca imonextiliniyjes ca yoje (analco) in al huejcalan.

*Jesús quinlaquetzilia inahuac inminlaxocoyajquil in fariseos**(Mt. 16:5-12)*

<sup>14</sup> Huan imonextiliniyjes quilcahuaje quihuicaje len pa quicualosquiaya, quipialoaya jan se pan ca yehuanten pin barquito.

<sup>15</sup> Cuaquín quinmaxtic Jesús ca lajtomes niman pa inminyolo, quinmilic:

—Xiquitacan. Ximoitacan pa camo anmocuaquamanas ca inminlaxocoyajquil in fariseos huan Herodes.

<sup>16</sup> Pehualoaya moililo:

—Yihual techilic inon pampa amo ticualicaje len tijcuasi.

<sup>17</sup> Quimatic Jesús len moililoaya, quinmilic:

—¿Leca anmoilía pampa amo anquipía len pa tijcuasi? ¿Ayamo anquilalía pa anmotzontecon huan amo ancajsi pa anmoyolo inon hual nicnequi annimitzmaxtía? ¿Amo anquinequi anquimati len quinequilo quijtulo nolajtomes?

<sup>18</sup> Anquinpía anmoixtololjmes. ¿Amo anlachía? Anquinpía anmonacajmes. ¿Amo anlacaqui? ¿Amo anquijnamiqúa?

<sup>19</sup> Niqinxiluic in macuili panes ca in macuili mil lacames. Axan, ¿quichi chiquihuimes ca lajquitos lalapanali anquinnechic huan anquintemiltic? Yehuanten quinanquilije:

—Doce.

<sup>20</sup> —Huan niqinxiluic in chicome panes ca in nahui mil lacames. ¿Quichi chiquihuimes anquinnechic huan anquintemiltic ca lajquitos lalapanali hual anquinpejpenac?

Yehuanten lananquilije:

—Chicome.

<sup>21</sup> Cuaquinon quinlajlanic:

—¿Ayamo anquimati len annimitzmaxtitica? Da amo nilaqueztataya inahuac in hual tijcuasi.

### *Quipajtía Jesús se pachacal pin caltilan Betsaida*

<sup>22</sup> Ajsije pin caltilan motocaya Betsaida. Nepa sequin lacames quihualicaje capa Jesús se lalac pachacal, quilajlanije pa quimatocasquiaya.

<sup>23</sup> Cuaquín Jesús quiquitizquic ca imajma, quiquixtic in pachacal pa quiahuac in caltilan. Nepa lachijchac capa iixtololjmes pa quinxahuilis ca ilachijchal, quilalilic imajmajuan pani yihual huan quilajlanic:

—¿Huil tiquita len?

<sup>24</sup> Lachíac in pachacal huan quilic:

—Niqinmita lacames quinami cuahuimes, huan nejnemilo.

<sup>25</sup> Cuaquinon Jesús quinlalic oc sepa imajmajuan capa iixtololjmes in pachacal. Cuaquín momelahuac lachíac, huan axan, quema, lachíac cuali. Pajtije iixtololjmes, mochi huil quitaya.

<sup>26</sup> Huan Jesús quitilanic pa ichan, quilic:

—Amo xicalaqui pin caltilan axan huan amo xiquili amaqui.

### *Pedro quijtúa pampa Jesús unca in Cristo hual Dios quitilanic*

(Mt. 16:13-20; Lc. 9:18-21)

<sup>27</sup> Mohuicaje Jesús huan imonextilinjmes, uyaje pa innojen caltilan hual amo cataya huejca se caltilan motocaya Cesarea Filipino. Huan pa ojli quinlajlanic imonextilinjmes, quinmilic:

—¿Len quijtulo lacames pampa aqui nehual?

<sup>28</sup> Yehuanten quinanquilije:

—Sequin quijtulo tel tiJuan Lacuayatequini. Oc sequin quijtulo tel tiElías. Huan oc sequin quijtulo tel tiunca se ilajtunjmes Dios.

<sup>29</sup> Oc sepa yihual quinlajlanic:

—Amhuanten, ¿len anquijtúa pampa aqui nehual?

Pedro quinanquilic:

—Tehual tiunca in Cristo hual Dios quitilanic.

<sup>30</sup> Huan Jesús quinmilic chicahuac pa camo quilisi amaqui inon.

### *Jesús quijtúa quinami miquis*

(Mt. 16:21-28; Lc. 9:22-27)



<sup>31</sup> Pehuac quinmactic, quinmilic:

—Nehual ilacal in cielo nicpía pa nipanus míac lacocoltilisli. In abuelojmes huan tiopistas huejué huan in lamaxtinijmes nechilisi pampa amo quinequilo pa nicayas ca yehuanten, huan nechmictisi. Huan quiman panusi ye tonalijmes, niyulis oc sejpa.

<sup>32</sup> Inon quinmilic ca lajtol hual quimatije len quinequiaya quiitu. Cuaquinon Pedro quihuicac ca yihual ihuían, pehuac quilic chicahuac pa camo quiitusquiaya pampa yahuiaya miqui.

<sup>33</sup> Ma yoje, momalinac Jesús, quinmitaya imonextiliniijmes, cajuac Pedro huan quilic:

—¡Ximijcuani nolaixpan! Tilajtutica quinami Satanás. Amo tiquiitúa in hual unca iyaxca Dios, tiquiitúa san in hual quiitulosquiaya lacames.

<sup>34</sup> Cuaquinon quinnotzac Jesús imonextiliniijmes huan in lalacera, quinmilic:

—Aqui quinequi nechtocatía pa monexilis quinami nicnequi pa yulis, amo huil quichía quinami yihual quinequi. Quipía pa canas ojli capa yahui panúa lacocoltilisli quinami nehual nipanus lacocoltilisli huan cuaquín nechmictisi pan se cuahuil.

<sup>35</sup> Monequi pa yes yoje, pampa aqui yes quinequi cajcoquía iyulilisli icuerpo san, yoje yihual quipolus iyulilisli huan mochi. Quema, yihual miquis. Huan aqui momacahuiltis pa quipolus iyulilisli icuerpo pampa unca nomonextilini huan pampa quineltoça in lamachiltilisli cuali, yoje yihual neli cajcoquis iyulilisli.

<sup>36</sup> Cuaajnes moyaxajtía se lalac ca mochi in lalticpan. Ma yoje, miquis, quipolus iyulilisli. Cuaquinon, ¿len quipías?

<sup>37</sup> ¿Len huil quilaxlahuía se lalac pa quipías oc sejpa iyulilisli? Nindeno.

<sup>38</sup> Yehuanten hual axan yulticate quicajchualo Dios, quintocalo oc sequin dioses, quichihualo laijlaculisli. Huan aqui pinahuas pampa nehual huan nolajtomes, cuaquín nehual ilacal in cielo, nehual noje nipinahuas pampa yihual pa in tonali hual nihualas pa nihuelitis pan lalticpan. Nihualas ca ichicahualisli hué huan ilaixpelalisli cualtichin noTajtzin huan ilanahua-tinijmes chijchipahuac pin cielo hual quinpia pa quitequipanuilisli.

## 9

<sup>1</sup> Noje Jesús quinmilic:

—Neli annimitzilía, sequin ca yehuanten hual nican cate axan quitasi quinami hualas ilahueliltilisli Dios ca chicahualisli. Quema, yehuanten quitasi mas que ayamo miquije.

*Jesús mopala laixpelatica inminlaixpan ye imonextiliniijmes*  
(Mt. 17:1-13; Lc. 9:28-36)

<sup>2</sup> Panuje chicuase tonalijmes. Cuaquín Jesús quinhuicac Pedro huan Jacobo huan Juan, mohuicaje inminhuían, panquisaje se loma (tepel) cuajtic. Nepa mopalac Jesús inminlaixpan.

<sup>3</sup> Pehuac laixpelac inahuas, iztatataya míac quinami tisihuil. Se lapacani pan lalticpan amo huil quichipahuasquiaya iztac quinami in.

<sup>4</sup> Huan nesije Elías huan Moisés, ca Jesús laquezataloaya. Yehuanten in omenten yulinijme niman pa yina pa tonalijmes hual ayamo lacatic Jesús nican pan lalticpan.

<sup>5</sup> Cuaquín Pedro quinotzac Jesús, quilic:

—¡Lamaxtini! Cualí unca pampa ticate nican. Ma ticchihuacan ye calimes lachihuali ca isacayo cuahuimes, se pa tehual huan se pa Moisés huan se pa Elías.

<sup>6</sup> Inon quilic Pedro pampa momajtitataloaya in ye monextiliniymes huan pampín Pedro amo quimatiaya len quijtusquiaya.

<sup>7</sup> Huan hualac se mextemil, quinlaquentic huan quicaquiye in monextiliniymes se lajtol quistataya pin mextemil, quijtuc:

—In noxolol, yihual niclasojla. Xijcaquican yihual.

<sup>8</sup> Huan jan ajnaxcan, lachiaje inmintenco, yajmo quitaje amaqui ca yehuanten, jan yihual Jesús san.

<sup>9</sup> Cuaquín temujtiahuiloaya in loma (tepel) cuajtic, huan Jesús quinmilic chichahuac:

—Amo xiquilican amaqui len anquitac. San quiman nehual ilacal in cielo nimiquis huan cuaquinon niyulis oc sejpa, pa in tonali, xiquinmilican moxtin.

<sup>10</sup> Cuaquín yehuanten molajlaniloaya len quinequiaya quiytu in hual Jesús quinmilic, in quinami yahuiaya miqui huan umpa yahuiaya yuli oc sejpa. Huan mas que quiqnamiquiye pa inminyolo, ma yoje amo molaquetzilije inahuac inon.

<sup>11</sup> Cuaquín quilajlanije Jesús, quilije:

—¿Leca techmaxtilo ilamaxtiniymes Dios ilajtol, quil, monequi pa hualas Elías, cuaquinon hualas Cristo?

<sup>12</sup> Jesús quinnanquilije:

—Neli monequi pa hualas Elías pa quipehualtis imelahualisli mochi. Ma yoje, nehual ilacal in cielo, ¿quinami unca lajcuiluli ca Dios ilajtol pampa nehual nicpías pa nipanús mías lacocoltilisli hual nejchihuilisi in lacames, huan yehuanten nejxixicusi?

<sup>13</sup> Huan annimitzilía pampa hualac se hual quichihuaya quinami Elías, huan sequin quichihuilije quinami quinequiloaya. Quimictije jan quinami unca lajcuiluli inahuac yihual.

*Jesús quipajtia se xolol hual quipia iyjecal amo cuali  
(Mt. 17:14-21; Lc. 9:37-43)*

<sup>14</sup> Cuaquín ajsije capa cataloaya in oc sequin imonextiliniymes. Quinmitaje mías lacalera quinyahualujtataloaya yehuanten. Noje cataloaya ilamaxtiniymes inminlajtol in judíos. Quinlaxilijtataloaya lajtomes ca yehuanten imonextiliniymes Jesús.

<sup>15</sup> Quitaje Jesús in lacames, molapolultije, molaluje quipialtije.

<sup>16</sup> Huan Jesús quinlajlanic, quinmilic:

—¿Len anquilaxilijtica lajtomes ca in lamaxtiniymes?

<sup>17</sup> Huan quinanquilic se ca in lacames, quilic:

—¡Lamaxtini! Nicualicac noxól, quipía se iyjecal, pampín amo huil lajtúa.

<sup>18</sup> Capa ye quiqitzquía in iyjecal, cuaquín quimayahuía pan lali, nepa pan lali posuni icamac huan choca ilames. Cuaquín mocahua huapistic. Huan niquinlajlanic momonextiliniymes pa quiquixtilisi, huan amo huil yehuanten.

<sup>19</sup> Cuaquinon quinnanquilic Jesús, quinmilic:

—¡Ah, lacames hual amo anquineltocha Dios, hual amo anquilalía anmolaneltochalisli ca Dios! ¿Quichi tonalijmes monequi pa nicayas ca amhuan-ten? ¿Quichi tonalijmes nicpías pa nicchixtías pa anpehuas annechneltocas? ¡Xichhualiquilican in muachito!

<sup>20</sup> Quihualiquilije. Huan quiman in ijyecal hual cataya laijtic in muachito quitac Jesús, jan ajnaxcan quitzejtzejzeluc in muachito, quimayahuic huan huetzic in muachito pan lali momijmilujtataya, posuntataya pa icamac.

<sup>21</sup> Huan Jesús quilajlanic itajtzin, quilic:

—¿Quiichi xixil quipía quiman pehuac quiquitzquic?

Huan itajtzin quinanquilic:

—Quiman yec xól.

<sup>22</sup> Huan ca míac tonalijmes quiman quiquitzquic, quimayahuini pan tixuxli huan quimayahuini pa al pa quimictisquiaya. Sinda huil titejchihuilia len, cuaquín xitejchihuili, xitechpalehui.

<sup>23</sup> Jesús quilic:

—¿Leca tiqijitúa “Sinda huil”? Mochi huil panúa ca aqui yes quilalis laneltocalisli ca nehual.

<sup>24</sup> Huan jan ajnaxcan tzajtzic itajtzin in muachito, quilic:

—¡Tata, niclalía nolaneltocalisli ca tel! ¡Xichpalehui pa camo nicmahuilis da amo huil ticpajtis!

<sup>25</sup> Quitac Jesús quinami monechicujtataloaya míac lacames. Pampín ca-juc in ijyecal elehuis, quilic:

—¡Tel, ijyecal, pan mopampa amo huil lajtúa huan amo huil lacaqui in muachito! ¡Axan nimitzilía xiquisa pa yihual huan amo quiman xicalaqui oc sejpa capa yihual!

<sup>26</sup> Tzajtzic in ijyecal, quitzejtzeluc chicahuac in muachito huan quisac. Cuaquínon mocahuac chicuenta mijquil in muachito. Pampín quijtuloaya míac ca in lacames pampa axan miquic.

<sup>27</sup> Ma yoje, quiquitzquic Jesús imajma, cajcoquic huan moquetzac in muachito.

<sup>28</sup> Cuaquínon calaquic Jesús pan cali. Nepa cataya, hualaje capa yihual imonextilinjmes quilajlanije inminhuían, quilije:

—¿Leca tehuanten amo huil tijquixtilije in ijyecal?

<sup>29</sup> Huan Jesús quinnanquilic:

—Monequi pa quilajlanisi Dios huan pa mosahuasi pa huil quinquixtilisi ijyecames quinami innojen. Jan yoje huil yesi laquixtili yehuanten.

*Oc sejpa Jesús quinmilía quinami miquis*

*(Mt. 17:22-23; Lc. 9:43-45)*

<sup>30</sup> Quisaje yehuanten nepa, quipanajtiahuiloaya in lalticpan Galilea, huan Jesús quinequiaya pa amaqui quimatisquiaya.

<sup>31</sup> Cataya pampa quinmaxtiaya imonextilinjmes, quinmiliaya:

—Nehual ilcal in cielo nechtemacasi ca lacames hual nechquitzquisi. Nechmictisi huan quiman nimiquis, panusi ye tonalijmes, cuaquín niyulis oc sejpa.

<sup>32</sup> Ma yoje, yehuanten amo quimatiloaya len quinlaquetzilijtataya huan momajtiloaya quilajlanilo len quinequiaya quijtu.

*¿Aqui yihual in hué capa yehuanten?*

*(Mt. 18:1-5; Lc. 9:46-48)*

<sup>33</sup> Huan ajsije Capernaum. Cataloaya calijtic capa chantiloaya, Jesús quinlajlanic, quinmilic:

—¿Len anmolaquetzilijtihualaya pa ojli?

<sup>34</sup> Yehuanten amo nahuatije, pampa pa ojli molaquetziloaya inahuac aqui ca yehuanten yesquiaya in hué hual quinlaicanasquiaya in oc sequin.

<sup>35</sup> Cuaquinon molalic Jesús, quinnotzac in doce imonextiliniymes, quinmilic:

—Sinda se quinequi mochía in hué pa anmitzlaicanas amhuanten, cuaquín yihual quipías pa mochías in niman tipichin ca moxtin in oc sequin, huan quipías pa quintequipanuilis moxtin.

<sup>36</sup> Canac se xolol, quilalic lajco capa yehuanten, quinapaluc in xolol, quinmilic:

<sup>37</sup> —Sinda se quilalía ilaneltocalisli ca nehual huan notoca, huan pampín quinamiquía ca lasojlalisli se xól quinami inon, cuaquín yoje in se quichijtica quinami yihual nechnamiquía nehual ca lasojlalisli. Huan aqui hual nechnamiquía nehual, yihual amo nechnamictica nehual san. Noje quinamictica ca lasojlalisli yihual Dios hual nechtilanic pan lalticpan.

*Aqui hual amo quitzacuilia Jesús quipalehuía  
(Mt. 10:42; Lc. 9:49-50)*

<sup>38</sup> Cuaquín Juan quilic:

—Lamaxtini, tiquitaje se lalac quinquixtitataya iyyecames, quinquixtili-aya quijttutataya motoca, mitznoztica. Huan tehuanten tiquillje pa camo quichías inon, pampa yihual amo techtocatica.

<sup>39</sup> Jesús quilic:

—Amo xitzacuilican. Quiman yes quichía se len hual lalapolultía pan ipampa nochicahualisli hual quipalehuía pampa quijtúa notoca, yoje amo huil panus pa in se jan axcan nechhuejuecaltis.

<sup>40</sup> Inon annimitzilía pampa aqui yes amo tejtzacuilia, yoje yihual techpalehuía.

<sup>41</sup> Huan aqui yes anmitzmacas pa ancunis jan se tecomal ca al san, huan anmijchiuilia inon pampa amhuanten ilacames in Cristo, yoje annimitzilía neli, yihual yahui quipía ilaxlahuilisli.

*Ximozticacan pa camo anyulis laijlaculi  
(Mt. 18:6-9; Lc. 17:1-2)*

<sup>42</sup> Huan aqui yes quichihualtis laijlaculisli se ca in xolomes tijtipichin hual quilalilo inminlaneltocalisli ca nehual, yesquiaya cuali pa quipiluilisi se melal hué pa iquixlan in se huan quilasasi lajco pa al huejcalan pa moatocitis.

<sup>43</sup> Huan sinda momajma mijchihualtia laijlaculisli, cuaquín xijcotona. Cuali, cuali yes pa tehual ticalaquis pan cielo capa unca Dios ca se momajma san huan amo ca ome momajmajuan tías capa amo huil sehuis in tixuxli.

<sup>44</sup> Nepa amo miqulo in oculimes hual quicualo icuerpo se, huan noje nepa amo quiman sehuis in tixuxli.

<sup>45</sup> Huan sinda mocxían mijchihualtis laijlaculisli, cuaquín xijcotona. Cuali, cuali unca pa tehual pa tipehuas ticpiás in yulilisi hual Dios quimaca ticpixtica jan se mocxían san. Amo yesquiaya cuali pa tehual sinda Dios mitzlasas ca ome mocxihuajmes pa in tixuxli hual amo mosehuis.

<sup>46</sup> Nepa amo miquisi in oculimes hual quicualo icuerpo se, noje amo quiman sehuis in tixuxli.

<sup>47</sup> Huan sinda mijchihualtis laijlaculisli moixtololon, xijquixti. Cuali pa tehual tías capa huelitía Dios ca se moixtololon san. Amo yesquiaya cuali pa tehual sinda mitzlasas Dios ca ome moixtololojmes capa chichinahuía.

<sup>48</sup> Nepa amo miqulo in oculimes hual quicualo icuerpo se huan nepa amo quiman sehuía in tixuxli.

<sup>49</sup> Amhuanten nomonextiliniymes anquipía pa anpanus lacocoltilisli capa anyultica, huan yojque anmochipahuas quinami lachipahua tixuxli. Yojque

amo anmochías laijlaculi. Inon unca quinami quilalilo istal pan nacal hual unca pa huendi. Yoje amo moijlacúa.

<sup>50</sup> Unca cuali in istal pa camo moijlacus nacal. Quema, in istal unca cuali pa len yes ticlalisi. Ma yoje, sinda pataquías in istal, cuaquín ¿quinami quichihuasi pa mochías istal oc seppa? Dios ilajtol cuali unca quinami istal, pampa sinda anquipía pa anmoyolo, amo anmochías laijlaculi. Xicpiacan iistal Dios laijtic amhuanten. Yoje anyulis ca sehuilislí pa anmoyolo huan anpanus cuali ca moxtin.

## 10

### *Jesús lamaxtía de lacames hual quincajcahualo inminsihuahuan* (Mt. 19:1-12; Lc. 16:18)

<sup>1</sup> Quisac Jesús de Capernaum, uyac pa in lali Judea. Cuaquín uyac ca yojque (analco) in atenco hué Jordán. Huan oc seppa monechicujtihuualoaya miac lacames huan sihuames capa yihual, huan oc seppa quinmaxtiaya quinami quichihuani ca mochi cajcapa.

<sup>2</sup> Cuaquinon ajsije sequin fariseos capa yihual. Quinequiloaya quicaquilo sinda Jesús quiqtusquiaya se lajtol calica yehuanten huil quimotexpahuililosquiaya. Pampín quilajlanije, quilije:

—¿Tolajtol hual technextilía quinami ticmolancuacuetzililo Dios quimacahuiltía pa quincajcahuasi lacames inminsihuahuan?

<sup>3</sup> Jesús quinnanquilic:

—¿Len anmitzilic Moisés quinami lajtol inahuac inon?

<sup>4</sup> Yehuanten quinnanquilije:

—Moisés quiqcuiluc pin lajtol pa quimacahuiltisi se lalac quimacas isihua se amal hual quiqtúa pampa yajmo isihua yihual.

<sup>5</sup> Jesús quinnanquilic:

—Moisés quiqcuiluc in lajtol pampa amhuanten amo anquinequi ancana pa anquichías len yes cuali.

<sup>6</sup> Ma yoje, quiman pehuac mochi, pa innojen tonalijmes quiman quichíac Dios in lalticpan, Dios quinchíac lalac huan sihual.

<sup>7</sup> “Pampín se lalac yajmo yuli ca itajtzin huan inantzin, yuli ca isihua.

<sup>8</sup> Yoje in omenten mochihualo se, yajmo cate ome yehuanten, mochihuaje se san.”

<sup>9</sup> Dios quinchíac pa yesi se san. Pampín ma camo quinxilucan in lacames.

<sup>10</sup> Quiman mocuepaje pin cali, quilajlaniloaya Jesús imonextilinijmes oc seppa inahuac in hual yihual quinmilic in fariseos.

<sup>11</sup> Jesús quinmilic:

—Aquí yes quicajcahuas isihua huan monamictis ca oc se sihual, yoje yihual cana oc se sihual hual amo iyaxca pa yes isihua huan yoje quichihuilía amo cuali isihua hual quicajcahuac.

<sup>12</sup> Huan sinda se sihual quicajcahuas ilahuical huan yulis ca oc se lalac, yoje yihual cana oc se lalac hual amo iyaxca huan yoje quichihuilía amo cuali ilahuical hual quicajcahuac.

### *Jesús quinlasojla xolomes* (Mt. 19:13-15; Lc. 18:15-17)

<sup>13</sup> Quinhualiquililoaya Jesús xolomes pa yihual quinmatoquilis, huan imonextilinijmes quinmajualoaya yehuanten hual quinhualicatataloaya.

<sup>14</sup> Jesús quinmitac quinami quichijtataloaya, huan pampín yihual cualanic huan quinmilic:

—Xiquinmacahuiltican in xolomes pa hualasi ca nehual, amo xiquintzacuilican. Yehuanten hual cayasi capa Dios huelitía quipiasi pa yesi quinami xolomes.

<sup>15</sup> Se xolol quipía paquilisli quiman yes Dios quineltocaltía. Huan neli animitzilía, sinda se amo quilalía ilaneltocalisli ca ilahuelilitisli Dios quinami se xól quilalilía ilaneltocalisli yihual, cuaquín in se amo quiman cayas capa Dios huelitía.

<sup>16</sup> Cuaquinon quinnapaluaya mochi in xolomes, huan quinlalilic imajjuan capa yehuanten huan quintuchíac, quinmilic pampa Dios quinchihuilisquiaya cuali.

*In lacal yancuic hual quipiaya míac tomin*

*(Mt. 19:16-30; Lc. 18:18-30)*

<sup>17</sup> Cuaquinon Jesús canac ojli. Huan molalujtihualac se lacal, quimolanacuacuetzilizic, quilajlanic:

—Lamaxtini cuali, ¿len nicpías pa nicchías pa vojque Dios nechmacas pa camo quiman nilamis niyulis capa yihual quiman niyulis oc sejpa?

<sup>18</sup> Jesús quinanquilic:

—¿Leca tichilía pampa nehual nicuali? Amo unca amaqui hual cuali, jan Dios san unca cuali.

<sup>19</sup> Tel, ticmati innojen lajtomes hual Dios quinmilic lacames pa quichihuasi: “Amo xicana je sihual hual quipía ilahuical, amo xicmicti oc se, amo xilaixtequi, amo xicmotexpahuili se tislacatijtica, xiquinlasojla motajtzin huan monantzín.”

<sup>20</sup> In lacal yancuic quinanquilic, quilic:

—Lamaxtini, mochi inon niyulic nicneltocatihualac quiman niyec xól pa axan.

<sup>21</sup> Cuaquín quiztataya in lacal yancuic Jesús, quilasojlac, quilic:

—Unca oc se lachihualisli hual monequi pa ticchías. Xía, xicnamaca len ticpía. Cuaquín in tomin hual ticanac ca mochi hual ticnamacac xiquinmaca yehuanten hual amo quipialo. Yoje ticpías len hual ipati míac pin cielo capa unca Dios. Cuaquín xicana no'ojli capa panulo lacocoltilisli huan xichtoca nehual.

<sup>22</sup> Quilic Jesús inon, iixco in lacal yancuic sulahuac, uyac quicocujtíac iyolo pampa quipiaya míac hual iyaxca.

<sup>23</sup> Huan quinmiztataya Jesús imonextiliniymes hual cataloaya itenco, quinmilic:

—¡Quinami quipía pa motolinis niman míac pa calaquis capa huelitía Dios se lacal hual quipía míac tomin!

<sup>24</sup> Molapolultije imonextiliniymes quicactataloaya len quinmilic Jesús. Cuaquín Jesús oc sejpa quinmilic:

—Nitos, quipiasi pa motolinisi niman míac pa calaquisi capa huelitía Dios yehuanten hual quilalilo inminlachialisli ca in míac hual inminyaxca.

<sup>25</sup> Quema, sinda se camello huil quipanahuiaya iixtololon se lajtzomaloni, amo quipiaya pa motolinisquiaya yoje quinami se hual quipía míac tomin quiapiaya pa motolinisquiaya pa calaquis capa huelitía Dios.

<sup>26</sup> Huan molapolultije míac míac imonextiliniymes, molajlanije se huan oc se, moilije:

—Cuaquín ¿aqui huil quipías Dios iyulilisli hual amo quiman lamis sinda yoje unca?

<sup>27</sup> Jesús quinmitac huan quinmilic:

—Lacames amo quiman huil quichihualo pa panus inon. Ma yoje, Dios, quema, yihual huil, pampa ca Dios mochi huil panúa.

<sup>28</sup> Cuaquinon Pedro pehuac quilic:

—Xiquita. Tehuanten tijcajcahuaje mochi hual ticpiaje pa timitztocasi tehual.

<sup>29</sup> Jesús quinnanquilic:

—Annimitzilía melahuac. Cate yehuanten hual quincajcahualo inminchan huan inmicnían lacames huan inmicnían sihuames huan inminnantzitzían huan inmintajtzitzían huan inminxolomes huan inmincuajmilimes. Quema, mochi quincajcahualo pa nechtequipanuilis huan pa quilamachiltisi capa yes in lamachiltisli cuali.

<sup>30</sup> Ma yoje, mas que quincajcahualo, pa mochi in xixihuimes hual huejcahuas in lalticpan hual axan unca, mochi seje ca yehuanten quinpiás cien ca mochi seje calimes huan icnían lacames huan icnían sihuames huan inantzitzían huan ixolomes huan cuajmilimes. Huan noje quiman huejcajtica in lalticpan, quitojtovalo huan quicocoltilo yehuanten hual amo nechnehtocalo. Huan pa in lalticpan hual yahui caya, quipiás capa unca Dios in yulilisi hual amo quiman lamis.

<sup>31</sup> Ma yoje, míac hual axan cate huejueyenten cayasi itzinderos, huan in itzinderos cayasi huejueyenten.

*Oc sejpa Jesús quinmilía aquinojen yahuilo quimictilo*

*(Mt. 20:17-19; Lc. 18:31-34)*

<sup>32</sup> Cataloaya pa ojli, panquisaloaya pa Jerusalén, quinlaicanaya Jesús. Huan molapolultiloaya imonextiliniymes pampa Jesús amo momajtiaya yahui ca ompic. Yehuanten hual quintocaloaya Jesús huan imonextiliniymes, quema, momajtiloaya. Huan quinmanac Jesús ca yihual ihuían in doce imonextiliniymes, pehuac quinmilic len yahuiaya quipanu.

<sup>33</sup> Quinmilic:

—Xiquitacan. Tipanquisticate pa Jerusalén, huan nehual ilacal in cielo nechtemacasi ca in tiopistas huejué huan ca in lamaxtinijmes hual quimaxtilo inminlajtol inahuac quinami quimolancuacuetzililo Dios. Huan nechmotexpahuilisi pa yoje nicayas lamictili. Cuaquin nechtemacasi ca yehuanten hual amo judíos.

<sup>34</sup> Yehuanten nechhuitzquilisi huan nejchijchasi huan nechhuitequisi huan nechmictisi. Huan quiman panusi ye tonalijmes, niyulis oc sejpa.

*Jacobo huan Juan qitemachilo len pa yehuanten inminhuían*

*(Mt. 20:20-28)*

<sup>35</sup> Ajsije capa Jesús yehuanten Jacobo huan Juan, ixolomes Zebedeo, quilije:

—Lamaxtini, ticnequilo pa titejchihuulis len yes tialo timitztemachilo.

<sup>36</sup> Jesús quinmilic:

—¿Len anquinequi pa annimijchihuulis?

<sup>37</sup> Huan quilije:

—Xitechmacahuilti pa timolalisi se ca moma cuali huan se ca moma amo cuali pa in tonali hual timochías tohué ca míac laixpelalisli hué. Yoje timitzpalehuisi pa tihuelitis.

<sup>38</sup> Jesús quinmilic:

—Amo anquimati len anquitemachijtica. ¿Huil anpanúa lacocoltilisli quinami nehual nipanus lacocoltilisli? Yes quinami ancuniaya se tecomal chichic. ¿Huil anmopepenialtis in lacuayatequilisli quinami lacocoltilisli quinami nehual nimopepenialtis?

<sup>39</sup> Huan quilije:

—Tehuanten huil ticchihualo.

Jesús quinmilic:

—Quema, anpanus lacocoltilisli quinami nehual nipanus lacocoltilisli. Huan pampa nehual anquipías pa anmopepenialtis quinami se lacuayate-quilisli hual lacocoltia quinami nehual nicpiás pa nimopepenialtis.

<sup>40</sup> Ma yoje, amo unca noyaxca pa annimitzmacahuiltis pa anmolalis ca noma cuali huan pa noma amo cuali. Dios quinmacahuiltis pa molalisi nepa yehuanten hual quinlajtultic pa molalisi nepa.

<sup>41</sup> Quicaquije inon in oc sequin diez (majlacli) monextiliniymes, pehuaje cualanije ca Jacobo huan Juan.

<sup>42</sup> Cuaquinon quinnotzac Jesús pa hualasi capa yihual, huan quinmilic:

—Amhuanten anquimati quinami huelitilo yehuanten hual amo judíos pa mochi lalimes. Moxtin hual huelitilo capa yehuanten quinnextilo moxtin pampa quipialo lahuelilitisli pa quinchihualtisi lacames. Huan in huejueyenten ca yehuanten yulilo quinmilijtcate len quipiasí pa quichihuasi.

<sup>43</sup> 'Amo cayas yoje ca amhuanten. Nican unca quinami cayas: Aquí hual quinequisquiaya pa mochías quinami in hué pa anmitzlaicanas amhuanten, yihual quipías pa anmitztequipanuilis.

<sup>44</sup> Huan aquí yes quinequisquiaya mochías in se hual monotza míac ca amhuanten, cuaquín yihual quipías pa yes anmotequipanujquil.

<sup>45</sup> Monequi pa yes yoje, pampa noje nehual ilacal in cielo amo nihualac pan lalticpan pa nechtequipanuilis lacames. Nihualaya pa niquitequipanuilis huan noje nihualaya pa nimiquis pa yoje niquinmacahuas pa camo panusi in miquilisli hual amo quiman lámis.

### *In pachacal itoca Bartimeo lachía*

*(Mt. 20:29-34; Lc. 18:35-43)*

<sup>46</sup> Cuaquinon ajsije pa in caltilan Jericó. Huan quiman quistiahuiyoaya pa Jericó Jesús huan imonextiliniymes huan míac lacames huan sihuames, nepa molaliaya pa itenco in ojli Bartimeo, yihual Tameo ixolol. Yihual yuliaya motemachilijtataya tomin pampa yec pachacal.

<sup>47</sup> Quilije pampa panujtataya Jesús in nazareteco, huan pampín pehuac tzajtzc, quijtuaya:

—Jesús, tel ixolol David, xichicnili!

<sup>48</sup> Cajualoaya míac ca yehuanten, quililoaya pa mocahuasquiaya. Ma yoje, yihual tzajtziaya niman chicahuac, quilic:

—¡Tehual ti'ixolol David, xichicnili!

<sup>49</sup> Cuaquín moquetzac Jesús, quinmilic:

—Xicnotzacan pa hualas.

Huan quinotzaje in pachacal, quilije:

—Amo ximomajti, ximoquetza, mitznoztica.

<sup>50</sup> Yoje jan ajnaxcan moquixtilic ilaquen moquetziquisac, uyac ca Jesús.

<sup>51</sup> Jesús quilic:

—Axan, ¿len ticnequi pa nimijchihuilis?

Quilic in pachacal:

—Nolamaxtini, nicnequi nilachía.

<sup>52</sup> Huan Jesús quilic:

—Cuaquín ximohuica. Ticlalic molaneltoalisli ca nehual, pampín tipajtic.

Huan jan ajnaxcan huil lachíac Bartimeo huan quitocatiahuiaya Jesús pan ojli.



# 11

*Jesús calaqui Jerusalén pan ixolol se burra*  
(Mt. 21:1-11; Lc. 19:28-40; Jn. 12:12-19)

<sup>1</sup> Hualatataloaya pa Jerusalén, ajsije pa in ome caltilan tijtipichin Betfagé huan Betania. Innojen caltilan tijtipichin cataloaya pa quiahuac Jerusalén amo huejca, cataloaya pa iixlán in tepetzindi (loma) itoca Olivos. Quintilanic Jesús ome imonextilinjmes,

<sup>2</sup> quinmilic:

—Xiacan in caltilan anmolaixpan, huan jan axcan ancalactica, anquitas ilpitica se ixól je burra. Ayamo quiman lejcuc amaqui in burrito. Xictomacan, xicualicacan ca niquic.

<sup>3</sup> Sinda se anmitzilis: “¿Leca anquichijtica inon?”, cuaquín xiquilican: “In Tata quinequi pa nadita, huan jan axcan quicuepas.”

<sup>4-5</sup> Yoje uyaje huan quitaje ilpitataya se ixolol se burra. Cataya inahuac se ilalapujquil pa quiahuac se cali inahuac in ojli. Quitomaje, huan sequin ca yehuanten hual umpa moquetzaloaya quinmilije:

—¿Leca anquichijtica inon, anquitontica in burro?

<sup>6</sup> Yehuanten quinnanquillije quinami Jesús quinmilic, huan in lacames quinmacahuiltije pa yahuisi.

<sup>7</sup> Quihualiquilije Jesús in burro, quinlalilije inminlaquemes pani in burro, cuaquinon lejcuc Jesús.

<sup>8</sup> Huan miac quinsuhualoaya inminlaquemes pan ojli, oc sequin quinpipixtiloaya ca iramas (iitzmolinquimes) ca inminsacayo cuahuimes hual quincotonaje.

<sup>9</sup> Yehuanten hual quinlaicanaloaya huan yehuanten hual quitocaloaya tzajtztiahuiloyaya, quijtuloaya:

—¡Hosana! ¡Ma quichihuili niman cuali Dios yihual hual quitilanic pa huelitis!

<sup>10</sup> ¡Ma quituchía yihual hual huelitis capa huelitini totajtzin David! ¡Ma quijtucan “¡Hosana!” yehuanten hual yulilo pin cielo!

<sup>11</sup> Calaquic Jerusalén Jesús, uyac calijtic pin tiopan hué, huan nepa quinmiztinemic mochi hual nepa cataya. Cuaquín tiolactitiac, huan pampín quisac Jerusalén, uyaje yihual huan imonextilinjmes pa Betania.

*Jesús cajú se cuahuil higuero*  
(Mt. 21:18-19)

<sup>12</sup> Mostatica quisaje Betania huan Jesús mayantiahuiaya.

<sup>13</sup> Quitac pa huejquita se amacuál tipichin hual quiypiaya isacayo hué, huan uyac quitac sinda sulajtataya. Quiman ajsic, amo quitac nindeno ilaquilyo. Quiypiaya jan isacayo san, ayamo cataya itonali pa quiptiasquiaya ilaquilyo.

<sup>14</sup> Cuaquinon Jesús quilic in amacuál tipichin ca isacayo hué:

—Ma camo quiman quicua amaqui molaquilyo axan huan pa quiman. Quicaquije imonextilinjmes inon hual quilic.

*Jesús quinlaluxtía pa quiahuac in tiopan hué*  
(Mt. 21:12-17; Lc. 19:45-48; Jn. 2:13-22)

<sup>15</sup> Cuaquín ajsije pa Jerusalén huan umpa calaquic Jesús pin tiopan hué. Pehuac quinquixtic pa quiahuac aquinojen lanamactataloaya huan lacujtataloaya pin tiopan hué. Quintzincuepelic innojen capa yehuanten hual quinpatililoaya tomin quinpatililoaya inmintomin yehuanten hual mocuhuililoaya huendis, noje quintzincuepelic inmicpalijmes yehuanten hual quinnamacaloaya huilomes.

16 Huan amo quimacahuiltilic amaqui pa panusquiaya pa ilajcotían in tiopan hué sinda quimantiahuiaya len.

17 Huan quinmaxtiaya, quinmiliaya:

—¿Amo unca lajcuiluli inon hual quijtúa: “Quitocayaltisi nocali se cali capa quilajlanilo Dios, huan cayas cali pa moxtin capa huil quilajlanilo Dios”? Ma yoje, amhuanten anquichihuiljica in tiopan hué quinami cataya se cueva capa molatilo laxtequinijmes.

18 Inminhuejueyenten in tiopistas huan in lamaxtinijmes quicaquije inon, huan pehuaje quitemuje quinami huil quimictilosquiaya. Ma yoje, mo-majtiloaya pa quichihuilisi len pampa moxtin in lacames quixtocaloaya quicaquilo huan yehuanten molapolultiloaya pampa inon hual quinmaxtiaya Jesús.

19 Cuaquín ca tiolac quisaje Jerusalén Jesús huan imonextiliniijmes.

### *In amacuál tipichin huaquic*

(Mt. 21:20-22)

20 Mosta pa huajzinco panuloaya huan quitaje in amacuál tipichin (cuahuil higuero), huaquic pa ilalhuayojmes huan mochi.

21 Cuaquinon quijnamiquic Pedro huan quilic Jesús, quilic:

—Lamaxtini, xiquita, in amacuál tipichin hual ticajuac, axan huác.

22 Jesús quinanquilic:

—Xicalican anmolaneltocalisli ca Dios, anquimaztica pampa yihual huil quichía mochi.

23 Annimitzilía neli, amhuanten huil anquilía in loma nican, “Ximijcuani ximolasa pin al huejcalan”, huan quema, quichías quinami tiquilis sinda amo ticmahuilis pampa amo yahui quichía quinami tiquilis.

24 Pampa inon annimitzilía inon: Quiman yes anlajtúa ca Dios, huil anquitemachía pa yihual anmijchihuilis len yes. Xicneltocacan quinami axan anquipiác inon hual anquitemachic, huan yoje anquipías.

25 Huan sinda anmoqueztica anlajtutica ca Dios, huan jan axcan anquijnamiquía pampa anmitzcualantic se, cuaquín xicpujpuhuacan. Yoje quinpujpuhuas anmolajlaculisli anmoTajtzin hual unca pin cielo.

26 Annimitzilía inon, pampa sinda amo anquinpujpuhuas, cuaquín noje anmoTajtzin hué hual unca pin cielo amo quinpujpuhuas anmolajlaculisli.

### *Unca Jesús iyaxca pa quijtús len monequi quichihuasi lacames*

(Mt. 21:23-27; Lc. 20:1-8)

27 Huan oc sepa ajsije Jerusalén. Huan quiman Jesús nejnentinemiaya calijtic pin tiopan hué, hualaje capa yihual inminhuejueyenten in tiopistas, noje hualaje in lamaxtinijmes huan in abuelojmes.

28 Quilajlanije, quilije:

—¿Ca aqui ilahueliltisli ticchía innojen hual tiquinchijtica? ¿Aqui mitzhueliltic pa tiquinchías innojen?

29 Jesús quinnanquilic:

—Ma annimitzajlani noje se lajtol, huan xichnanquilican. Cuaquín annimitzilis aqui nechueliltic pa niquinchías innojen hual niquinchijtica.

30 ¿Cataya Dios hual quitilanic Juan Lacuayatequini ca lahueliltisli pa lacuayatequis o quitilanije lacames pa lacuayatequis? Xichnanquilican.

31 Cuaquinon yehuanten quijtuloaya lajtic yehuanten huan molaquetzililoaya, moilije:

—Sinda tiquilisli pampa quihueliltic Dios, yihual techilis: “¿Leca amo anquineltoac?”

<sup>32</sup> Ma yoje, amo huil tiquilisi pampa lacames quihueliltije.

Sinda quililoaya pampa lacames quihueliltije, cuaquín momajtiloaya inminyampa in lacames. Moxtin yehuanten quimatiloaya pampa Juan yec se ilajtuni Dios.

<sup>33</sup> Yoje, quinanquilije Jesús, quilije:

—Amo ticmatilo.

Cuaquinon Jesús quinmilic:

—Nehual noje amo annimitzilis aqui nechueliltic pa niquinchías innojen hual niquinchijtica.

## 12

### *Sequin lacames ej'elehuis hual tequipanuloaya lajlajco*

(Mt. 21:33-46; Lc. 20:9-19)

<sup>1</sup> Cuaquinon Jesús pehuac quinmaxtic ca se lapuhualisli hual quinmij-namiquiltisquiaya. Quinmilic:

—Se lacal quitocac se cuajmili ca uva. Quitzacuac quiyahualujtataya iteco ca tixcalimes lachijchihuali cuajtic (se tepandi), quihuajuanac se huejcalito pa quintelicsaloshiya in uvas pa quisasquiaya iayo. Noje quichíac se cali cuajtic capa huil lachiasquiaya pan mochi iuvatilan pa pani. Cuaquín quinmanac sequin lacames tequipanujquimes pa quitalosquiaya icuajmili, huan umpa quisac pa ichan, uyac huejca.

<sup>2</sup> Ajsic in tonali hual yucsitaloaya in uvas. Quitlanic se tequipanujquil pa yasquiaya cana hual yihual iyaxca ilaquilyo.

<sup>3</sup> Huan yehuanten hual tequipanuloaya lajlajco quiquitziye in tequipanujquil. Quihuitequiye, quitlanije huan amo quimacaje nindeno.

<sup>4</sup> Iteco mocuepac quitlanic oc se tequipanujquil, huan tixcalazos quimacaje, quicocoltije pa itzontecon huan quihuejuecaltije.

<sup>5</sup> Cuaquín iteco quitlanic oc se, huan yihual quimictije. Umpa in lacal quintilanic miac oc sequin itequipanujquimes huan in lacames hual tequipanuloaya lajlajco quinhuitequiye sequin huan quinmictije oc sequin.

<sup>6</sup> 'Quicahuilía in lacal oc se san pa quitlanis, in yec yihual ixól hual quila-sojlaya miac. Yoje quitlanic, pampa yihual quijtuc: "Yehuanten quimatisi momajtisi ilaixpan noxól!"

<sup>7</sup> Ma yoje, in tequipanujquimes ej'elehuis molaquetzilije se ca oc se, moilije: "In yihual hual canas icuajmili itajtzin, cayas iyaxca. Ma tián, ma ticmictican pa yes toyaxca tehuanten in cuajmili."

<sup>8</sup> Cuaquinon quiquitziye, quimictije, quilasaje imijquil pa quiahuac in cuajmili.

<sup>9</sup> 'Axan, ¿len quichías iteco in cuajmili? Mocuepas huan quinmictis in tequipanujquimes ej'elehuis. Cuaquín quinmacas oc sequin tequipanujquimes in cuajmili.

<sup>10</sup> '¿Amo quiman anmomaxtic in hual unca lajcuiluli? Quijtúa: Quilasaje in tel yehuanten hual quichihuaje in cali, quijtuye in tel amo unca cuali.

Ma yoje, in tel mochíac in tel calica quipehualtije mochi in cali.

<sup>11</sup> ToTata quialalic pan cali quiman pehuaya quichía, huan timocahuaje timolapolultiticate pampa tiquitaje inon hual quichías yihual.

<sup>12</sup> Yoje, in huejeyenten quinequiloaya quiquitziyo Jesús. Quimatiloaya Jesús quinmilic in lapuhualisli pa yoje laquetzasquiaya inminahuac yehuanten. Yehuanten cataloaya quinami in tequipanujquimes ej'elehuis. Ma

yoje, amo quiquitziye pampa momajtije inminyampa in lacalera. Pampín quicajcahuaje huan uyaje.

*Jesús laquetza inahuac in contribución (lapixcalisli hual unca tomin)*  
(Mt. 22:15-22; Lc. 20:20-26)

<sup>13</sup> Panuc inon, yehuanten quintilaniye capa Jesús sequin ca in fariseos huan oc sequin hual yeje ca in lanechiculisli hual quitocaloaya Herodes. Quinequiloaya pa Jesús quijtusquiaya se lajtol calica quitalosquiaya quinami huil quiquitziye.

<sup>14</sup> Hualaje quilije:

—Lamaxtini, ticmatilo pampa tehual tiqijtúa len melác. Tiquita je lacal jan quinami tiquita oc se, ticlasojla se lacal hué jan quinami se lacal tipichin san. Huan ticnextía melahuac len quinequi Dios pa quichihuasi in lacames. Axan timitzlajlanilo, ¿monequi pa ticlaxlahuilis in niman hué César ilapixcalisli tomin, o amo? ¿Ticlaxlahuisi, o amo ticlaxlahuisi?

<sup>15</sup> Quimatic Jesús quinami quinequiloaya quicaujcuamanalo, huan quinmilic:

—¿Leca anquitemúa quinami huil anechmotexpahuilis pa nechquitziye? Xichualiquilican se tomin denario pa niquitas.

<sup>16</sup> Yehuanten quihualiquilije huan Jesús quinlajlanic:

—¿Aqui iixco inon? Huan ¿aqui ilajcuilulisli?

Yehuanten quinanquilije:

—In niman hué César iyaxca.

<sup>17</sup> Cuaquinon quinmilic Jesús:

—Xicmacacan César hual iyaxca yihual, huan xicmacacan Dios hual iyaxca yihual.

Yoje, mocahuaje molapolultiticate pampa yojque quinnanquilic.

*Jesús quinlaquetzilá quinami ticmatilo pampa tiyulisi oc sejpa*  
(Mt. 22:23-33; Lc. 20:27-40)

<sup>18</sup> Cuaquinon hualaje sequin hual quinelocaloaya inminlamaxtilisli in saduceos. Yehuanten quijtulo pampa aquinojen miquilo amo yulisi oc sejpa. Quilije:

<sup>19</sup> —Lamaxtini, Moisés techahuilic in lajcuilulisli hual unca lajtol pa tehuanten. Huan in lajtol quijtúa sinda se lacal miqui huan quicahua isihua ihuían huan amo quinpioaloaya xolomes, cuaquín icni in lacal hual miquic quipías pa monamictis ca isihua ihuían icni. Inon quichías pa yoje quinpiasi xolomes hual motocasi quinami in se hual polehuic.

<sup>20</sup> Axan, cataloaya chicome (siete) icnián. Se monamictic, huan amo huejcahuaya miac huan polehuic, amo quicahuac se xolol.

<sup>21</sup> Pampín, oc se icni canac in sihual, yihual noje miquic, amo quincahuac xolomes. Yoje quiapanuc oc se icni.

<sup>22</sup> Huan yoje quinpanuc in chicome, monamictije ca in sihual. Amaqui ca moxtin innojen quincahuac xolomes. Cuaquín, polehuic in sihual noje.

<sup>23</sup> Axan, quiman yulisi oc sejpa innojen hual miquije, ¿calá lacal yes ilahuical in sihual? Pampa mochi in chicome monamictije ca in sihual.

<sup>24</sup> Cuaquinon Jesús quinnanquilic:

—Amhuanten annoixpolúa, pampa amo anquimati ilajcuilulisli Dios ilajtol huan ichicahuilisli.

<sup>25</sup> In tonali hual yulisi oc sejpa yehuanten hual miquije, cuaquín amo monamictis lacames huan sihuames. Yulisi quinami Dios ilanahuatiniyemes hual cate pin cielo.

<sup>26</sup> Huan inon hual anquijtua inminahuac yehuanten hual miquilo, quema, yulisi oc sepa. ¿Amo anmomaxtic capa quijtua iamal hual quijcuiluc Moisés? Pin cuajtzindi hual lalatataya capa Dios quinoztac Moisés, yoje quilic: “Nehual niunca iDios Abraham huan iDios Isaac huan iDios Jacob.” Yehuanten, quema, miquije. Ma yoje, yulticate, pampa quijtuc Dios: “Nehual inminDios yehuanten.”

<sup>27</sup> Huan Dios amo inminDios mijquimes. Yihual inminDios yehuanten hual yulilo. Yoje amhuanten anmoixpolujtica miac.

*Jesús quinmilía calía unca in lajtol niman hué*  
(Mt. 22:34-40)

<sup>28</sup> Ajsic se lamaxtini ca in lamaxtinijmes. Yihual quincacuiaya quiman laquetzaloaya, quimatic pampa Jesús quinnanquilic cuali. Huan quilajlanic: —¿Calía in niman hué ca mochi in lajtomes?

<sup>29</sup> Quinanquilic Jesús:

—Inon in lajtol niman hué: “Xijcaqui, Israel. In Tata toDios, yihual se san, amo unca oc se.

<sup>30</sup> Huan ticlasojlas in Tata moDios ca mochi moyolo huan ca mochi moyulilisi huan ca mochi moijnamiquilisli huan ca mochi mochicahualisli.” Inon in lajtol niman hué.

<sup>31</sup> Huan in oc se lajtol unca quinami inon hual nilamic niquijtuc: “Ticlasojlas aquí yes unca ca tehual quinami tehual timolasojla.” Amo unca oc sequin lajtomes hual monotzalo yoje miac quinami innojen.

<sup>32</sup> Cuaquinon in lamaxtini quilic:

—Cuali tiquijtuc, Lamaxtini. Unca melahuac len tiquijtua quinami Dios yihual se san. Amo unca oc se, jan yihual san.

<sup>33</sup> Huan sinda se quilasojla Dios ca mochi iyolo huan ca mochi ilajnamiquilisi huan ca mochi iyulilisi huan ca mochi ichicahualisli, huan sinda quilasojla mochi sejse hual unca ca yihual quinami yihual molasojla, quema, in monotza niman miac. Amo quiman monotzalo yoje mochi in huendis huan mochi in huejuendi hual cate borregos huan bueyes hual quilalililo pani capa quichichinuilisi ilaixpan Dios.

<sup>34</sup> Jesús quicaquic quinami quinnanquilic ca laijnamiquilisi huan quilic:

—Jan nadita san huan huil timoita ca Dios mitzlaicantica lajitic moyolo.

Cuaquinon moxtin momajtiloaya quilajlanilo oc sequin lajtomes pa quitasi quinami huil quimotexpahuuilosquiaya.

*In Cristo, ¿yihual ixolol David?*  
(Mt. 22:41-46; Lc. 20:41-44)

<sup>35</sup> Jesús lamaxtiaya pin tiopan hué, quinmilic:

—¿Quinami huil quijtulo in lamaxtinijmes pampa yihual ixolol David in Cristo hual Dios quitlanía?

<sup>36</sup> In Espíritu Santo quijtua pan ipampa yihual David, quijtua:

In Tata quilic noTata:

“Ximolali pa noma cuali pa tichpalehuis pa nihuelitis.

Xicaya nican pa quiman ajsis in tonali hual niquinlalis inmintzindan mocxihujmes yehuanten hual mitzcocolilo.”

<sup>37</sup> Yihual David quitocayaltia in Cristo noTata. Yoje, ¿quinami yes yihual ixolol David?

Huan in miac hual cataloaya nepa quixtocaloaya miac quicaquilo.

*Jesús quinmilá pa como momacahuiltisi pa mocuajcuamanasi ca in hual quimaxtilo ilamaxtinijmes Israel*

(Mt. 23:1-36; Lc. 11:37-54; 20:45-47)

<sup>38</sup> Lamaxtiaya Jesús, quijtuc:

—Xilachixtiacan pa como anmitzcuaajcuamanasi ilamaxtinijmes in lajtlo hual quimaxtilo, pampa yoje quichihualo yehuanten. Quixtocalo nejnentinemilo ca inminahuas huejuejcanic. Quixtocalo pa moxtin quinpijaltilo ca míac lamajtilisli.

<sup>39</sup> Quixtocalo molalilo pin icpalimes huejué pin tiopan calijtic pa moxtin quitasi quinami yehuanten cate lacames huejueyenten. Noje quixtocalo cayasi capa in huejueyenten cate lacuajticcate pin fiestas.

<sup>40</sup> Quinquixtililo inmincalimes in sihuames inminhuían huan amo quinmicnililo. Cuaquín quilajlanilo Dios ca míac lajtomes pa quincuaajcuamanasi in lacames huan sihuames pa yoje quijtusi pampa yehuanten lacames cuajcuali. Yehuanten Dios quinmacas míac lacocotlilisli hual niman ticocu.

*Se sihual ihuían quimaca je tomin tipichin*

(Lc. 21:1-4)

<sup>41</sup> Jesús yehuatataya laixpan capa quilasaloaya tomin laijtic pa in tiopan hué, quiztataya quinami yehuanten quilaxilijtiahuiloaya laijtic. Míac ca yehuanten hual quipialoaya míac tomin quilasaje míac laijtic.

<sup>42</sup> Huan panuc se sihual ihuían hual amo quipiaya. Quilaxilic ome tomin hual cataloaya niman tipichin.

<sup>43</sup> Cuaquín Jesús quinmilic pa quitasi imonextiliniijmes huan quinmilic:

—Neli annimitzilá, in sihual ihuían amo quipía pa molacualtis. Ma yoje, Dios quita quinami yihual quilaxilic laijtic míac. Amo yoje míac quilaxilije moxtin in oc sequin hual quilaxilijtataloaya tomin nepa.

<sup>44</sup> Moxtin yehuanten quilasaje tomin hual amo quinequije, cataya pampa quipialoaya míac. Huan in sihual ihuían quipiaya jan se nadita. Quilasac nepa mochi hual quipiaya calica quicuhuasquiaya len pa quicuasquiaya.

## 13

*Jesús quinmilá quinami yalo quixitinilo in tiopan hué*

(Mt. 24:1-2; Lc. 21:5-6)

<sup>1</sup> Jesús quisaya pa quiahuac in tiopan hué, huan se ca imonextiliniijmes quilic:

—Xiquita, Lamaxtini, in tixcalimes huan in calimes, ¡xiquita quinami cate hué huan cualtichin!

<sup>2</sup> Huan Jesús quinanquilic:

—¿Tiquinmita in calimes huejué? Amo mocahuas se tixcali inahuac oc se tixcali pan in calimes, mochi yesi lamayahuil.

*Jesús quinlaquetzilá quinami moitasi in tonali hual mochi yahui lami*

(Mt. 24:3-28; Lc. 21:7-24; 17:22-24)

<sup>3</sup> Uyaje panquisaje in tepetzindi (loma) itoca iLoma in Olivos hual cataya ilaixpan in tiopan hué. Nepa molalic Jesús huan Pedro huan Jacobo huan Juan huan Andrés quilajlanije inminhuijuían, quilije:

<sup>4</sup> —Xitechili. ¿Quiman panus inon? ¿Len lanextilisli cayas pa ticmatisi quiman yahui panúa mochi innojen?

<sup>5</sup> Huan Jesús pehuac quinmilic:

—Xilachiacan pa amaqü anmitzcuaajcuamanas.

<sup>6</sup> Hualasi míac lacames hual quiytusi quipialo nolahueliltilisli, quiytusi: "Nehual niCristo." Huan quincuaajcuamanasi míac lacames huan sihuames.

<sup>7</sup> Anquicaquis anmitzilisi quinami moanalo cajcapa huan quinami yalo moanalo cajcapa. Innojen tonalijmes hual anmitzlamachiltisi pampa panu-ticate in, amo ximomajtican. Yoje quipialo pa panusi, huan ayamo lamis in lalticpan.

<sup>8</sup> Lacames pa se lali moanasi ca lacames pa oc se lali. Huan aquinojen hual huelitilo pa se lali moanasi ca inminlalimes yehuanten hual lahueliltilo nepa. Huan laulinis cajcapa pin lalticpan. Noje cajcapa miqusi pan ipampa mayandi. Lacames cualantinemisi huan majcoctinemisi pa moanasi. Ma yoje, lacames jan pehuasi mococusi san ca innojen, san unca ipehualisli in lacocoltilisli.

<sup>9</sup> Amhuanten xilachixtiacan pa como anmocahuas pa annechneltocas. Sequin anmitztemacasi pa ilahueliltilisli inminlanechiculisi in huejueyen-ten. Sequin anmitzhuitequsi pin tiopajmes. Anmitzhuicasi inminlaixpan gobernadores huan in oc sequin niman hueyenten, yehuanten hual quipialo lahueliltilisli. Inon anmijchihuilisi pampa annechneltoca. Cuaquín anquij-tus lamachiltisli nonahuac nehual inminyampa yehuanten.

<sup>10</sup> Ayamo lamis in lalticpan sinda in cuali lamachiltisli ayamo yes lamachilti capa chantilo moxtin yehuanten pin lalticpan.

<sup>11</sup> Huan quiman anmitzquitzquilo pa anmitztemacasi ca yehuanten hual quipialo lahueliltilisli, amo ximomajtican pampa amo anquimati len anquij-tus. Xiquijtucan san inon hual jan axcan anmitziznamiquiltis in Espíritu Santo pa in tonali. Xiquijtucan inon pampa amo yes amhuanten hual anlajtus, cayas in Espíritu Santo hual lajtus pan anmopampa amhuanten.

<sup>12</sup> Cayasi icnían hual quitemacasi icnían pa quimictisi. Cayasi inminta-jtzitzían hual quintemacasi inminxolomes pa quinmictisi. Huan cayasi xolomes hual cualanisi ca inmintajtzitzían huan quintemacasi pa quinmic-tisi.

<sup>13</sup> Huan moxtin anmitzcocolisi pampa annechneltoca. Ma yoje, aquí hual mopepenialtis mas que quipías pa miquis, yihual yes laquixtili pin polehuilisi, quipías yulilisi hual amo quiman lamis.

<sup>14</sup> Daniel ilajtuni Dios quiqcuiluc pin amal de in hual elehuis hual qui-jlacúa. Inon noje quiqlacúa mochi capa quimolancuacuetzililo Dios. Quiman anquitas inon lalalili capa amo unca iyaxca pa cayas (ma monextía len quinequi quiqtúa inon aquí yes hual momaxtitica inon), cuaquín ma cholucan pan lomas yehuanten hual cayasi pin lalticpan Judea.

<sup>15</sup> Huan pa in tonali, aquí cayas pa pani icali ma como temu pa calaquis pa calijtic pa quiquixtis len pa calijtic.

<sup>16</sup> Huan aquí cayas pin cuajmili ma como mocuepa pa canas ilaquen.

<sup>17</sup> Huan jeh, quinami yalo cayalo lacocoltili yehuanten hual yalo quipialo xolotzitzindis huan yehuanten hual lachichilitiasí pan innojen tonalijmes!

<sup>18-19</sup> Huan xictemachican Dios pa como anquipías pa ancholus in tonal-ijmes quiman sehua, pampa pan innojen tonalijmes, quema, yalo panulo míac lacocoltilisli quinami ayamo quiman quinpanuaya lacames. In tonal-ijmes quiman pehuac quichíac Dios mochi, huan pa mochi in tonalijmes hual ajsitihualaloaya umpa pa axan, amo quiman cataloaya tonalijmes capa quinpanuaya lacames lacocoltilisli quinami inon hual quinpanus pa innojen tonalijmes hual ajsisi. Huan yajmo quinpanus yoje oc sejsa.

<sup>20</sup> Sinda toTata amo quilalic pa como huejcahualosquiaya innojen tonali-jmes, cuaquín amaqui mocahuasquiaya yultataya. Ma yoje, Dios quinlasojla

innojen hual quinlajtultic pa yesi yihual iyaxca. Pampín quilalic pa camo huejcahualosquiaya in tonalijmes.

<sup>21</sup> 'Cuaquinon innojen tonalijmes cuajnesi se anmitzilic: "Xiquitacan, nican unca in Cristo." Huan cuajnesi anmitzilic: "Xiquitacan, umpunca yihual." Amo xicneltocacan.

<sup>22</sup> Hualasi cristos hual amo yesi Cristo. Hualasi noje innojen hual quijtusi pampa yehuanten ilajtunijmes Dios, huan yesi islacatinijmes. Quinchihuasi innojen lachihualisli hual quinmolapolultisi lacames. Yoje, sinda huil quichihuasi, motolinisi pa quincuaajcuamanasi yehuanten nojen hual Dios quinlajtultic pa yesi iyaxca.

<sup>23</sup> Amhuanten xicayacan amo anmomaajtítica pampa inon, pampa axan annimitzilic pampa mochi in yahui panúa.

*Jesús quinlaquetzilía quinami hualas oc sejpa*

(Mt. 24:29-35,42,44; Lc. 21:25-36)

<sup>24</sup> Quiman lamisi panusi innojen tonalijmes capa yalo panulo lacocoltilisli yehuanten pin laticpan, cuaquín mochías laticumac in tonali. In mesli yajmo lahuís.

<sup>25</sup> Luceros (silalimes) hueztiasi pin cielo huan mochi hual unca pin cielo motzejtzelus.

<sup>26</sup> Cuaquinon moxtin nechitasi nehual ilacal in cielo. Nechitasi nihualajti-huala pani pin mextemimes nicpixtica chicahualisli hué huan laixpelalisli cualtichin.

<sup>27</sup> Huan niquintilanis nolanahuatinijmes pin cielo pa quinnechicusli innojen hual Dios quinlajtultic pa yesi iyaxca. Quinnechicusli quinquixticate cajcapa lami in laticpan huan cajcapa lami in cielo.

<sup>28</sup> Xijcaquican in laijnamiqulisli inahuac in amacuál tipichin. Itzmolinía sejselic huan selistítica isacayo. Cuaquín anquimati amo huejcahua pa ajsis xupanda.

<sup>29</sup> Yoje, in tonalijmes hual anquitas panujtica mochi inon hual axan annimitzilic, cuaquín anquimatis ajsitihualalo in tonalijmes. Quema, yalo ajsilo jan ajnaxcan.

<sup>30</sup> Neli annimitzilía inon: Panusi mochi innojen quiman yulticate yehuanten hual cayasi nepa pa innojen tonalijmes, ayamo lamisi quiman panusi mochi innojen, quema, quinmitasi.

<sup>31</sup> In cielo huan in laticpan lamisi. Ma yoje, nolajtomes amo lamisi.

<sup>32</sup> 'Amaqui quimati in tonali huan in hora quiman panus inon. Dios ilanahuatinijmes pin cielo amo quimatilo, Dios ixolol amo quimati. Jan Dios noTajtzin san quimati.

<sup>33</sup> Xilachiacan, xicayacan laeixtili, pampa amo anquimati calía tonali yes.

<sup>34</sup> Unca quinami se lacal hual yahui huejca. Quicahua icali, quinmilía chicahuaac itequipanujquimes pa quiztiasi in cali. Mochi sejse quipía itequipanulisli, huan quilía in lalapuni pa lachías.

<sup>35</sup> Yoje, xilachixtiacan amhuanten mojmosta, pampa amo anquimati quiman hualas anmoTata. Amo anquimati da hualas pa layúa o pa lajco layúa o pa cualcan o pa laxpoyahua nepa quiman xahuanía in gallo o pa huajtzinco.

<sup>36</sup> Xilachixtiacan pa camo hualas jan ajnaxcan huan anmitzajsis ancox-tica.

<sup>37</sup> Huan niquinmilía moxtin inon hual annimitzilía amhuanten. Xilachix-tiacan.



## 14

### *Quitemulo quinami huil quiquitzquilo Jesús* (Mt. 26:1-5; Lc. 22:1-2; Jn. 11:45-53)

<sup>1</sup> Mocahuaje ome tonalijmes huan cuaquín yahuiaya ajsi in ilhuil (fiesta) itoca ipascua in judíos. Noje cataloaya itonalijmes in fiesta quiman quicualo in pan hual amo quipía laxocoyajquil. Axcan inminhuejueyenten in tiopistas huan in lamaxtinijmes quitemuloaya quinami huil quiquitzquilosquiaya Jesús ca lacuajcuamanalisli pa quimictisi.

<sup>2</sup> Yoje quitemuloaya pampa quijtuloaya:

—Amo huil tijquitzquisi pin fiesta pampa cualantiquisasi in lalalera.

### *Se sihual quixahuilía Jesús* (Mt. 26:6-13; Jn. 12:1-8)

<sup>3</sup> Cataya Jesús pa Betania pa ichan Simón hual quipiani in cocolisli lepra hual quixacualuilía se icuilaxli icuerpo (inacayo). Umpa lacuaya huan ajsi se sihual capa yihual, quipiaya se tapalquita yancuic lachihuali ca se tixcali itoca alabastro. Quipiaya lajtic in tapalquita se chahuac hual ajuíac itoca nardo, ipatiaya míac. Cuaquín quilapanac in tapalquita, huan umpa quitoyahuac in chahuac hual ajuíac ipan itzontecon Jesús pa quixahuilis.

<sup>4</sup> Sequin hual umpa cataloaya cualanije, moilije:

—¿Leca amo quichíac cuali ca in chahuac hual ajuíac?

<sup>5</sup> Huil quinamacaloaya pa ye cientos denario tomin huan in tomin huil quinxiluililoaya ca yehuanten hual amo quipialo len.

Huan cajuaje in sihual.

<sup>6</sup> Jesús quinmilic:

—Xijcahuacan, ¿leca anquimaca tequil? Nejchihuilic len cuali in sihual.

<sup>7</sup> Cate itequi ca amhuanten yehuanten hual amo quipialo. Huil anquinchihuilía cuali quijquiman yes anquinequis. Huan nehual jan nadita huan amo nicayas ca amhuanten.

<sup>8</sup> In sihual quichíac hual huil quichíac. Axan nejxahuilic ca in chahuac hual ajuíac pa nejchijchihuilisquiaya pa in tonali hual yalo nechlalapachulo.

<sup>9</sup> Neli annimitzilía, capa yes pa mochi lalticpan quilaquetzilisi in lamachiltisli cuali, noje quipuhuasi in hual yihual nejchihuilic. Yoje moxtin quijnamiqisi yihual.

### *Judas quilalía pa quitemacas Jesús* (Mt. 26:14-16; Lc. 22:3-6)

<sup>10</sup> Cuaquinon Judas Iscariote hual yec se ca in doce (majlaclihuanome) monextilinjmes uyac quinmitac inminhueyenten in tiopistas. Yahuiaya quitemaca Jesús pa yehuanten inminlahueltilisli.

<sup>11</sup> Quicaquije yehuanten len yahuiaya quinchihuili, quipialoaya paquilisli huan quilije pampa neli yahuilooaya quilaxlahuilo. Cuaquinon quitemuaya Judas quinami yahuiaya quitemaca.

### *Jesús quiyancuilía inon calica tiquijnamiquilo* (Mt. 26:17-29; Lc. 22:7-23; Jn. 13:21-30; 1 Co. 11:23-26)

<sup>12</sup> Cataya in tonali quiman pehuaya in ilhuil (fiesta) quiman quicualoaya in pan hual amo quipía laxocoyajquil. Pan in tonali quimictilo quinami huendi in borrego itoca pascua. Pampín imonextilinjmes quilajlanije Jesús, quilije:

—¿Capa ticnequi pa tiasi pa ticyucxiltisi pa tijcuasi ilacualisli in pascua?

<sup>13</sup> Cuaquinon quintilanic ome imonextilinjmes, quinmilic:

—Xiacan pa in caltilan, nepa anquitas se lalcal quimantía je tapalcal ca al Xictocacan.

<sup>14</sup> Capa calaquís yihual, xiquilican iteco in cali: “Quijtúa in Lamaxtini: ¿Capa unca in calijtic capa tialo tijcualo nehual huan nomonextiliniymes ilacualisli in pascua?”

<sup>15</sup> Yihual anmitznexilis je calijtic hué nepa pin cali pa pani. Umpa cayasi mochi hual ticnequilo. Xicyucxiltican umpa in lacualisli pa tehuanten.

<sup>16</sup> Uyaje in monextiliniymes, ajsije pin caltilan, quitaje san quinami quinmilit Jesús. Huan nepa quiyucxiltije ilacualisli in pascua.

<sup>17</sup> Calaquic in tonali, hualaje Jesús huan in doce imonextiliniymes.

<sup>18</sup> Cataloaya nepa capa lacuajtataloaya, Jesús quinmilit:

—Neli annimitzilía, se ca amhuanten hual ca nehual lacuajtica, yihual yahui nechtemaca ca yehuanten hual yalo nechmictilo.

<sup>19</sup> Pehuac quincocuc inminyolo, molajlanije se ca oc se:

—¿Yes nehual?

Huan oc se noje quilajlanic:

—¿Yes nehual?

<sup>20</sup> Huan Jesús quinnanquilic:

—Yes se ca amhuanten doce hual huan nehual ticpaltitilo tolajcomes pan pin tapalquita xalapa.

<sup>21</sup> Nehual ilacal in cielo nía nimiQUI. In yes quinami quijcuiluje nonahuac nel Dios ilajtuniymes. Huan jeh, quinami yahui panu lacocoltilisli in lalcal hual nechtemaca pa nechmictisi yehuanten! Cualí cataya ca in lalcal sinda amo lacatic.

<sup>22</sup> Lacualoaya yehuanten, Jesús canac pan, quisehuic Dios, quilapanac huan quinxiluic pa quicualosquiaya, quinmilit:

—Xijcuacan, in nocuerpo.

<sup>23</sup> Canac se tapalquita calica launilo, quisehuic Dios. Cuaquinon quinmacac yehuanten huan moxtin cunije.

<sup>24</sup> Quinmilit:

—In noesli hual yahui toyahuía quiman nimiquis. Ca inon nicchías pa mocahuas cuali in lajtulisli hual Dios quichía pa lacames. Toyahuis noesli pa mía.

<sup>25</sup> Neli annimitzilía pampa amo nicunis oc sejpa iayo uva coc. Quiman ajsis in tonali nepa capa huelitía Dios, cuaquinon nicunis yancuic.

*Jesús quilía Pedro pampa yahui quijtúa pampa amo quiximati (Mt. 26:30-35; Lc. 22:31-34; Jn. 13:36-38)*

<sup>26</sup> Cuaquinon quicantarulije (quicuiquilije) Dios ilahueyilisli huan umpa quisaje. Uyaje panquisaje pin loma (tepetzindi) itoca Olivos.

<sup>27</sup> Huan Jesús quinmilit:

—Anmoxtin anyahui anechcajcahua axan layúa, pampa Dios ilajcuilulisli yoje quijtúa: “Nehual Dios nicmictis yihual hual quinmiztía in borregos huan in borregos mosemantinemisi.” Amhuanten in borregos. Yoje quijtúa in lajcuilulisli.

<sup>28</sup> Ma yoje, nel niyulis oc sejpa. Cuaquín nías annimitzlaicanas amhuanten pa in lalticpan Galilea.

<sup>29</sup> Cuaquinon Pedro quilic:

—Mas que moxtin oc sequin mitzcajcahuas, nel amo nimitzcajcahuas.

<sup>30</sup> Jesús quilic:

—Neli nimitzilía, axan layúa ayamo xahuanis ome xahuanilisli in gallo, huan tehual timocuepas tiqijtus ca ye lajtulisli pampa amo tichiximati.

<sup>31</sup> Ma yoje, Pedro quilic niman chicahuac:

—Sinda nicpiaya pa nimiquisquiaya ca tehual, amo quiman niquij-tusquiaya pampa amo nimitziximati.

Huan yojque quiytuje moxtin.

*Jesús quilajlanía Dios pin cuajtilan*

(Mt. 26:36-46; Lc. 22:39-46)

<sup>32</sup> Cuaquinon ajsije pan se cuajtilan itoca Getsemaní huan quinmilic Jesús imonextilinjmes:

—Ximolalican nican huan nel nías pa niclajlanis Dios.

<sup>33</sup> Quinhuicac Pedro huan Jacobo huan Juan, ca yihual uyaje. Pehuaya quicocu míac iyolo huan momajtiaya.

<sup>34</sup> Huan quinmilic:

—Nechcocúa noyolo, quema, ca nadita nicnequi nimiqui pampa yoje míac nechcocúa. Nican ximocahuacan huan xilachiacan.

<sup>35</sup> Huan uyac Jesús oc se nadita huejquita, molasac pan lali pa icamac. Quitemachic Dios sinda huil cayasquiaya pa yihual amo quipiasquiaya pa quipanusquiaya in lacocoltilisli hual yahuiaya quipanu nepa in tonali.

<sup>36</sup> Quiytuaya:

—Abba, noTajtzin, tehual huil ticchía mochi, xichnapati pa camo nipanus in hual yahui nechpanúa. Ma yoje, amo xicchía in hual nicnequi nel, xicchía in hual ticnequi tel.

<sup>37</sup> Cuaquinon mocuepac capa cataloaya imonextilinjmes, quinmitac coxtataloaya. Quilic Pedro:

—Simón, ¿ticoxtica? ¿Amo huil tilachía se nadita san?

<sup>38</sup> Xiejsacan, xiclajlanican Dios pa camo anmitztilanilis anmoyolo Satanás pa anquichías len amo cuali. Anquinequi anquichías pa anmoyolo. Ma yoje, amo anquipía chicahualisli pa anmocuerpo.

<sup>39</sup> Cuaquinon oc sejpa uyac quilajlanic Dios, quiytuc quinami pehuac quilajlanic.

<sup>40</sup> Oc sejpa mocuepac capa cataloaya, quinmitac coxtataloaya. Quipi-aloya míac cochilisli, amo quimatiloaya quinami quinanquillosquiaya.

<sup>41</sup> Mocuepac oc sejpa, ca in cataya ye latemachilisli hual quilic Dios. Cuaquín mocuepac capa cataloaya, quinmilic:

—Ayamo anlaquisa ancoxtica huan anmosejtica. Jan yoje. Axan nilamic nictemachic Dios, axan ajsic inon hual ticchíaloaya. Xiquitacan. Nehual ilacal in cielo nía nipanúa pa inminlahuelilitisli lacames laijlaculi.

<sup>42</sup> Ximoquetzacan, ma tiajtiacan. Xiquitacan, axan yihual hual yahui nechtemaca ajsitihuala.

*Quiquitzquilo Jesús ilacocolinjmes*

(Mt. 26:47-56; Lc. 22:47-53; Jn. 18:2-11)

<sup>43</sup> Ayamo lamic lajtuc Jesús huan ajsic Judas, yihual se ca in doce monextilinjmes. Ca yihual hualaloaya míac lacames quinpioaloaya teposlimes lajlatequi pa moanalisli, huan quinpioaloaya cuahuimes. Quintilanije inminhueyenten in tiopistas huan in lamaxtinijmes huan oc sequin huejueyenten.

<sup>44</sup> Huan Judas hual yahuiaya quitemaca quinnahuatic, quinmilic:

—Annimitzmacas je lanextilisli: Aqui nictenamiquis, yihual yes, xiquitaczacan pa camo anmitzcajcahuas huan pa camo cholus.

<sup>45</sup> Cuaquín ajsitihualac Judas capa Jesús, quilic:

—Lamaxtini, Lamaxtini —quipialtic, huan quitenamiquic.

<sup>46</sup> Cuaquinon ajsitihualaje huan quiquitzquije Jesús, quihuicaje.

<sup>47</sup> Huan se ca yehuanten imonextiliniymes hual nepa cataya quiquitzquic iteposli pa moanalisi, quicotonilic se inacas itequipanujquil in tiopista hué.

<sup>48</sup> Cuaquinon quinmilic Jesús:

—¿Anquisac pa annehqitzquis quinami nehual nicataya je laixtequini?

<sup>49</sup> Mojmosta nicataya ca amhuanten nilamaxtitataya pin tiopan hué huan nepa amo annehqitzquic. Ma yoje, inon panujtica yoje pa lamis mochías in hual quijtúa Dios ilajcuilulisi.

<sup>50</sup> Cuaquinon quicajcahuaje moxtin imonextiliniymes, choluje.

### *Cholúa se oquixli*

<sup>51</sup> Huan se oquixli hual quitocaya, yec lalaquentili ca se tzotzomajli iliarujtataya pan icuerpo, in san. Quiquitzquije in lacames.

<sup>52</sup> Jan axcan yihual itzotzomajli copinic huan yoje choluc nacatil.

### *Quihualcalo Jesús inminyampa inminlanechiculisli in hueyenten (Mt. 26:57-68; Lc. 22:54-55, 63-71; Jn. 18:12-14, 19-24)*

<sup>53</sup> Quihuicaje Jesús capa in tiopista hué. Axan monechicuje inminhueyenten in tiopistas huan oc sequin huejueyenten huan in lamaxtinijmes hual quinmaxtiloaya in lajtol hual quinnextilo in judíos quinami quimolancuacuetzililo Dios.

<sup>54</sup> Pedro quitocaya Jesús de huejca, ajsic huan calaquic ilajcotiyan ichan in tiopista hué. Umpa molaliaya ca in guaches moutzcutataloaya ilaixpan se tixuxli.

<sup>55</sup> Moxtin in huejueyenten hual huelitiloaya huan inminhueyenten in tiopistas quitemuloaya lacames hual quimotexpahuuililosquiaya Jesús. Yojqe huil quitilanosquiaya pa miquisquiaya. Huan amaqui quitaje.

<sup>56</sup> Míac quimotexpahuuililoaya islatatijtataloaya. Ma yoje, in hual quijtuloaya sequin amo cataya yoje quinami oc sequin quijtuloaya.

<sup>57</sup> Cuaquinon sequin moquetzaje pa quimotexpahuuililosquiaya, huan islataje, quijtuje:

<sup>58</sup> —Tehuanten tijaquije yihual quijtuc: “Nicxitinis in tiopan hual quichihuae in lacames, huan quiman panusi ye tonalijmes nicchías oc se tiopan hual lacames amo quichihuae.”

<sup>59</sup> Ma yoje, yehuanten noje amo cataloaya ca se lajtulisli pa quimotexpahuuililosquiaya.

<sup>60</sup> Cuaquin moquetzac inminyampa moxtin in tiopista hué, quilajlanic Jesús, quilic:

—¿Amo huil tilananquilía? ¿Len inon hual mitzmotexpahuilijtcate?

<sup>61</sup> Jesús mocahuac, amo quinancuilic se lajtol. Cuaquinon mocuepac quilajlanic in tiopista hué, quilic:

—¿Tehual tiunca in Cristo? ¿Tehual ixolol Dios in latuchihuali hual ticmolancuacuetzililo?

<sup>62</sup> Jesús quinancuilic:

—Quemá, nehual. Huan amhuanten annehchitas nehual ilacal in cielo. Annehchitas niyehuatca inahuac ima cuali Dios hual quipía mochi chichahualisi huan lahuélitilisi. Annechitas nihualajtica pan mextemimes pin cielo.

<sup>63</sup> Cuaquin quitzayanic itzotzomajli in tiopista hué pa quinnextilis moxtin quinami yihual quijtuaaya Jesús quihuejuecaltitayaya Dios. Quinmilic moxtin:

—¿Leca ticnequilo oc sequin lacames pa quimotexpahuilisi yihual?

<sup>64</sup> Axcan anquicaquic quinami yihual quihuejuecaltic Dios. ¿Len anquijtúa?

Huan moxtin quijtuye pampa quipiaya pa miquis.

<sup>65</sup> Cuaquinon sequin pehuaje quichijchaje. Quitzacuilije iixco ca se tzot-zomajli, cuaquín quitecualoaya ca inmajmajuan, quilije:

—¿Xitechili aquí mitztecua!

Huan in guaches canaje yihual huan quitecuaje niman chicahuac.

*Pedro quinmilía pampa amo quiximati Jesús*  
(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Pedro cataya pa latzindan pin lajcotiyan. Panuc se sihual, itequipanu-jquil in tiopista hué.

<sup>67</sup> Quiztíac Pedro moutzcutataya, cuaquín quitac oc sejpa huan quilic:

—Tehual noje ticataya ca Jesús in nazareteco.

<sup>68</sup> Pedro islacatic, quilic pampa no, quilic:

—Amo niquiximati huan amo nicmati len ticnequi tiqijjtúa.

Huan quisac pa quiahuac ilalapujquil in lajcotiyan. Cuaquinon xahuanic in gallo.

<sup>69</sup> Huan in sihual quitac oc sejpa, pehuac quinmilic yehuanten hual nepa moquezataloaya:

—In lacal se de yehuanten hual cataya ca Jesús nazareteco.

<sup>70</sup> Huan Pedro oc sejpa quijtuc pampa no. Huan ca je nadita, yehuanten hual nepa moquezataloaya quilije:

—Tehual neli se ca yehuanten. Tehual ticalileteco pampa tilajjtúa quinami se galileteco.

<sup>71</sup> Cuaquinon Pedro pehuaya quinotza Dios pa cajuas chicahuac sinda amo lajtuaya melahuac, huan quinmilic quinami iyampa Dios:

—Niclalía nolaixpan Dios damo niqijjtúa neli, amo niquiximati in lacal hual annechajlantica.

<sup>72</sup> Huan jan ajnaxcan xahuanic in gallo oc sejpa. Cuaquinon quijnamiquic Pedro quinami Jesús quilic: “Ayamo xahuanis ome xahuanilisli in gallo, huan tehual timocuepas tiqijjtus ca ye lajtulisli pampa amo tichiximati.”

Quijnamiquic in, jan axcan pejtquisac chocac.

## 15

*Quihuicalo Jesús ilaixpan Pilato*  
(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Quiman lanesic, monechicuje inminhueyenten in tiopistas ca in oc sequin huejueyenten huan in lamaxtinijmes huan moxtin in oc sequin ca yehuanten hual quiपालोaya lahuellitilisli. Quilpije Jesús huan quihuicaje pa quitemacasi ca Pilato in gobernador (huelitini) romano.

<sup>2</sup> Pilato quilajlanic, quilic:

—Tehual ¿tiunca inminhué in judíos?

Quinanquilic:

—Tehual tiqijjtúa.

<sup>3</sup> Quimotexpahuililoaya yihual ca míac lachihualisli amo cuajcuali inminhueyenten in tiopistas.

<sup>4</sup> Cuaquín Pilato quilajlanic oc sejpa, quilic:

—¿Amo len ticnanquilía? Xiquita in míac monahuac tehual hual mitzmot-expahuililo.

<sup>5</sup> Huan Jesús yajmo quinanquilic nindeno, huan pampín molapolultiaya Pilato.

*Quijtulo pampa Jesús quipta pa miquis  
(Mt. 27:15-31; Lc. 23:13-25; Jn. 18:38-19:16)*

<sup>6</sup> Pan mochi fiesta (ilhuil) Pilato quinmacahuilini in judíos se lailpili hual catani latzacuali pa calijtic hual quimotemachilinijme.

<sup>7</sup> Huan nepa cataya se lailpili motocaya Barrabás. Yihual se ca yehuanten hual quinequiye quichihuae moanalisi pa quinsulahualosquiaya in romanos, noje yehuanten quinmictije lacames.

<sup>8</sup> Pampín hualaje in judíos capa Pilato, pehuaje quitemachije pa quinchi-huililosquiaya in lachihualisli cuali quinami quinchihuilini yehuanten pan mochi ilhuil (fiesta).

<sup>9</sup> Yoje quinnanquylic Pilato:

—¿Anquinequi pa annimitzmacahuilis inminhué in judíos?

<sup>10</sup> Quimatiaya Pilato leca inminhueyenten in tiopistas quitemacaje Jesús. Moxicuje pampa quixtocaje Jesús moxtin lacames hual tijtipichin.

<sup>11</sup> Huan inminhueyenten in tiopistas quinmacaje lajtol in lalalera pa quitemachisi Pilato pa quinmacahuilisquiaya Barrabás.

<sup>12</sup> Cuaquinon oc sejpa Pilato quinmilic:

—Axan, ¿len nicchihuilis yihual hual itoca inminhué in judíos?

<sup>13</sup> Tzajtziye huan quinanquiliye:

—¡Xicpilu pan se cuahuil!

<sup>14</sup> Quinmilic Pilato:

—¿Leca? ¿Len amo cuali quichíac?

Ma yoje, yehuanten tzajtziyoaya míac ca chichualisli:

—¡Xicpilu pan se cuahuil!

<sup>15</sup> Cuaquinon Pilato quinmacahuilic Barrabás pa quinquiltisquiaya in lalalera huan latilanic pa iguaches quihuijuitequisi Jesús. Cuaquín quitemacac pa quipilusi pan se cuahuil.

<sup>16</sup> Iguaches Pilato quihuicaje pa lajtic ilajcotiyan icali in gobernador (huelitini). In cali motocaya Pretorio. Quinnechicuje mochi iguaches in lanechiculisli pa moanalisi.

<sup>17</sup> Cuaquinon quilaquentije Jesús ca se nahuas morado huan cahuanquil. Huan quijquetije se yahuali ca huizli. Quilalilije chichahuac pan itzontecon quinami yihual cataya se hué.

<sup>18</sup> Pehuaje quipialtije quinami quipialtiloaya se hué, quihuitzquilijtataloaya. Quitzajtziye quilijtataloaya:

—¡Ma yuli inminhué in judíos!

<sup>19</sup> Quitecualoaya oc sejpa itzontecon ca se ojlal, quichijchaloaya yihual. Quimolancuacuetzililoaya quinami quinextililoaya lamajtilisli iyampa se hué.

<sup>20</sup> Yoje lamije quihuitzquiliye, huan cuaquinon quiquixtilije in nahuas morado, quilaquentije ca yihual itzotzomajli huan quiquixtije pa quipilosquiaya pan se cuahuil.

*Jesús miqui pilujtica pan cuahuil  
(Mt. 27:32-44; Lc. 23:26-43; Jn. 19:17-27)*

<sup>21</sup> Panuc se lalal hual lacatic pin lali Cirene, motocaya Simón, mocuec-tataya pa ichan pin caltilan, tequipanuaya pa icuajmili. Yihual inmintajtzin yehuanten Alejandro huan Rufo. Innojen guaches quilamamiltije icuahuil Jesús pa ihuajcol Simón pa quimamilijtiac.

<sup>22</sup> Cajxiltije Jesús ca capic itoca Golgotá, in quinequi quijtúa Itzontecomal in mijquil.

<sup>23</sup> Quimacaje pa cunisquiaya iayo uva coc calica quinipanuje len altzindi chichic itoca mirra, huan Jesús amo cunic.

<sup>24</sup> Cuaquín quipiluje pan in cuahuil, huan moxiluije yehuanten itzotzomajli, mahuiltitaloaya pa itzotzomajli pa quimatilosquiaya aqui yahuiaya moyaxcaji ca mochi sejse ilajco itzotzomajli.

<sup>25</sup> Cataya nueve (chicnahui) horas pa huajtzinco quipiluje pan in cuahuil.

<sup>26</sup> Huan quijcuiluje se amal calica quimotexpahuilije ilachihualisli hual pampa inon quimictiloaya. Quisaluje pa pani icuahuil, huan in lajcuilulisi quijtuaya: “INMINHUÉ IN JUDÍOS”.

<sup>27</sup> Huan ca yihual in guaches quinpiluje ome laixtequinijmes pan cuahuimes, se cataya pa ima cuali huan oc se pa ima amo cuali.

<sup>28</sup> Yoje lamic mochiac Dios ilajcuilulisi hual quijtúa: “Quijtujque pampa yihual yec se ca yehuanten hual quichihualo amo cuali.”

<sup>29</sup> Innojen hual panuloaya pa quitasi quixixiculoaya quihuijuxtaloaya inmintzontecon, quilije:

—¡Jo! Tel tiunca in lalac hual quijtuc: “Nixxitinis in tiopan hué huan cuaquín quiman panusi ye tonalijmes nichías oc sejpa.”

<sup>30</sup> Axan, ximoquixti capa tía timiquis sinda huil, xitemu pin cuahuil.

<sup>31</sup> Yoje inminhueyenten in tiopistas huan in lamaxtinijmes noje quihuitzquilije, moilije se ca oc se:

—Quinquixtilic oc sequin pa camo miquilosquiaya. Ma yoje, amo huil moquixtilía yihual ihuían pa camo miquis.

<sup>32</sup> Axan, ma temu Cristo ihué Israel, ma quisa pin cuahuil. Cuaquín tiqitasi huan ticneltocasi yihual.

Huan quihuejuecaltije yehuanten noje hual ca yihual pilujtaloaya.

### *Jesús miqui*

*(Mt. 27:45-56; Lc. 23:44-49; Jn. 19:28-30)*

<sup>33</sup> Pa lacualispan laticumactic pan in lalticpan huan mocahuac yoje pa ye horas.

<sup>34</sup> Huan pa ye horas pa tiolac Jesús tzajtzc chicahuac, quijtuc:

—¡Eloí, Eloí! ¿Lama sabactani? —hual quinequi quijtúa: ¡NoDios, noDios! ¿Leca tichajcahuac?

<sup>35</sup> Sequin hual nepa moquezataloaya quijtuje:

—Xijcaquican, quinoztica Elías.

<sup>36</sup> Molalujtihualac se, quipaltic ca iayo uva xocuc se latehcunijquil hual moita pin al huejcalan, se pochinqul. Quilalic pan se ojlal, quilejcultic pa quipachichinasquiaya Jesús, quijtuc:

—Xilachiacan. Ma tiquitacan sinda Elías hualas quitemuhuis.

<sup>37</sup> Cuaquinon tzajtzc chicahuac Jesús huan miquic.

<sup>38</sup> Huan calijtic in tiopan hué cataya pilujtataya se tzotzomajli huejcanic huan telahuac hual quitzaculic yehuanten pin lasojli calijtic pa camo calaquilosquiaya pin niman lasojli icalijtic in tiopan. Huan in tzotzomajli tzayanic, pejtataya ca pani huan tzayanic mochi pa latzindan, mochijtataya ome lajlajco nepa quiman miquic Jesús.

<sup>39</sup> Huan inminlaicanani in guaches hual moquezatataya ilaixpan Jesús quitac quinami yoje tzajtzc Jesús quiman miquic huan quijtuc:

—Neli in lalac yec Dios ixolol.

<sup>40</sup> Nepa noje cataloaya sequin sihuames lachixtataloaya huejca. Ca yehuanten cataloaya María hual lacatic pin caltilan Magdala, huan María inminnantzin Jacobo in Tipichin huan José, huan Salome.

<sup>41</sup> Innojen sihuames yahuiloya cajcapa ca Jesús, quipalehuiloaya nepa capa cataya pa Galilea. Huan míac oc sequin sihuames hual hualaje ca yihual pa Jerusalén umpa cataloaya.

*Quilalilo Jesús imijquil laiitic se ostul (cueva)*  
(Mt. 27:57-61; Lc. 23:50-56; Jn. 19:38-42)

<sup>42</sup> Tiolactiaya pan in tonali hual quijtulo in tonali quiman mochijchihualo pa in ilhuil (fiesta) pa mostatica.

<sup>43</sup> Huan José hual lacatic pin caltilan Arimatea, yihual se ca in hueyenten huan moxtin quimatiloaya momajtilo iyampa yihual. Yihual noje quichixtataya in tonali quiman Dios san huelítis. Uyac amo momajtitataya capa Pilato pa motemachilis imijquil Jesús.

<sup>44</sup> Pilato molapolultic quiman quimatic Jesús miquic. Quitlanic se guache pa quinotzac pa hualas inminlaicanani in guaches. Ajsic in laicanani, Pilato quilajlanic sinda miquic Jesús.

<sup>45</sup> Quinanquilic in laicanani pampa quema, axan miquic. Cuaquinon Pilato quimacahuiltic José pa quihuicasquiaya imijquil Jesús.

<sup>46</sup> Huan quicuhuac José se tzotzomajli cuali huan iztac, quitemuhuije imijquil Jesús, quiliaruje pin tzotzomajli huan quilalije laiitic pan se cueva (ostul). In cueva yec lahuajuani pin se xaltel hué. De umpa quimijmiluje se tel pa quitzacuas in ostul.

<sup>47</sup> Huan María hual lacatic pa Magdala huan María inantzin José quitaloaya capa quilalije imijquil Jesús.

## 16

*Jesús yuli oc sejpa*  
(Mt. 28:1-10; Lc. 24:1-12; Jn. 20:1-10)

<sup>1</sup> Axan panuc in tonali hual mosehuilo in judíos, huan María hual lacatic pa Magdala huan Salome huan María inantzin Jacobo quicuhuaje len hual ajuíac. Ca innojen yahuiloya quixahuililo imijquil Jesús.

<sup>2</sup> Cataya in tonali hual quipehualtía in siete (chicome) tonalijmes huan uyaje yehuanten pa cualcan. Ajsije capa in cueva (ostul), quiman quistataya in tonali.

<sup>3</sup> Yehuanten moililoaya:

—¿Aqui techmijmiluilis in tixcali capa calaqui se pin ostul capa unca imijquil?

<sup>4</sup> Ma yoje, lachiaje, quitaje in tixcali hual niman hué cataya, quitaje pampa mijcuanic in tixcali ilaixpan in ostul (cueva).

<sup>5</sup> Calaquije, quitaje se lalac yancuic molalijtataya pan ima cuali in cueva. Cataya lalaquentili ca se nahuas huejcanic hual iztatataya, huan quimacajsije in sihuames.

<sup>6</sup> Ma yoje, in lalac quinmilic:

—Amo ximomajtican. Anquitemujtica Jesús in nazaretco hual quipiluje pan in cuahuil huan quimictije. Xiquitacan. Yulic oc sejpa, amo unca nican. Xiquitacan capa quilalije.

<sup>7</sup> Axan, xiacan, xiquinmilican Pedro huan in oc sequin imonextilinjmes: “Yihual anmitzlaicantía amhuanten pa Galilea. Umpa anquitas, umpa cayas jan quinami anmitzilic.”

<sup>8</sup> Cuaquin yehuanten in sihuames quisaje pin cueva (ostul), choluje pampa momajtitataloaya huan yuyucataloaya. Amo quipuhuilije amaqui inon hual quitaje pampa momajtiloaya.



*Jesús monextía ca María hual lacatic pa Magdala*  
(Jn. 20:11-18)

<sup>9</sup> Jesús yulic oc sejpa. Huan quiman lanesiaya in tonali hual quipehualtía in chicome tonaliyjes, pehuac monextic yultataya ca María hual lacatic pa Magdala. Quiman ayamo quimictije Jesús huan yihual nejnentinemiaya pa in lali Israel, yihual quiquixtilic María siete (chicome) ijyecames amo cuajcuali.

<sup>10</sup> Huan in sihual uyac quinlamachiltic yehuanten hual cayanijme ca Jesús, quinlamachiltic pampa axan yuliaya oc sejpa. Yehuanten quicocuhuaya inminyolo huan chocaloaya.

<sup>11</sup> Huan quiman quicaquije pampa yuliaya oc sejpa Jesús, quil, huan yihual María quitac, quil, yehuanten amo quineltocaje.

*Jesús monextía ca ome imonextilinijmes*  
(Lc. 24:13-35)

<sup>12</sup> Quiman panuc inon, ome imonextilinijmes nejnentiaje pin ojli hual uyac pa se caltilan amo huejca. Hualac Jesús, ajsic ca yehuanten, nesiaya quinami se lalac hual amo quiximatiloaya yehuanten. Ma yoje, ca nadíta quislacuje.

<sup>13</sup> Cuaquín mocuepaje pa Jerusalén, quinlamachiltije in oc sequin imonextilinijmes, huan amo quineltocaje yehuanten noje.

*Jesús quintilanía imonextilinijmes pa yasi pa mochi lalticpan*  
(Mt. 28:16-20; Lc. 24:36-49; Jn. 20:19-23)

<sup>14</sup> Panuc inon, monextic Jesús ca in once imonextilinijmes capa lacuatataloaya. Quinmajuac nadita pampa amo quinequiloaya quinneltocalo yehuanten hual quinmilije quinami quitaje yultataya oc sejpa.

<sup>15</sup> Huan quinmilic:

—Xiacan pa mochi in lalticpan, xiquinmilican moxtin nejnepa in lamachiltilisli cuali.

<sup>16</sup> Aquí hual quineltoca huan yes lacuayatequili, yoje yihual yes laquixtili pa camo polehuis huan quipías yulilisi hual amo quiman lamis. Huan aquí hual amo quineltocas in lajtol yahui panúa polehuilisi hual amo quiman lamis.

<sup>17</sup> Huan yehuanten hual quineltocasi nolajtol huil quinchihuasi lanextilisli hual quinnextililo quinami quipialo nolahueliltilisli. Ca in nolahueliltilisli quinquixtilisi lacames ijyecames amo cuajcuali. Huil lajtusi ca oc sequin lajtomes yajyancuic.

<sup>18</sup> Huil quinquitzuisi cuhuames ca inminmajmajuan huan sinda cunisi len hual quinpajuía, amo quincocoltis, amo miquisi. Huan quinlalilisi inminmajmajuan pani pin cocoxquimes huan innojen cocoxquimes pajtisi.

*Jesús lejcúa pa ilhuicac (pin cielo)*  
(Lc. 24:50-53)

<sup>19</sup> Huan quiman toTata Jesús lamic quinlaquetzilizic mochi innojen, cuaquín Dios quilejcultic. Quihuicac pa ilhuicac (pin cielo), nepa molalic pa ima cuali Dios pa huelitisi huan yihual.

<sup>20</sup> Huan pa mochi cajcapa yehuanten imonextilinijmes quinlaquetzilitinemioloaya moxtin in lamachiltilisli cuali quinami Dios techmaca in yulilisi hual amo quiman lamis. Yihual toTata quinpalehuiaya, quinhueliltiaya pa quichihuasi itequipanulisli. Huan yoje quinextiliaya quinami ilajtol unca melahuac pan inminpampa míac lanextilisli hual quinmitaltiloaya lacames ca lamajtilisi quiman quinchihuaje inminyampa. Yoje ma ye.

## Ilamachiltisli cuali Jesucristo hual quijcuiluc San Lucas

### *Lucas pehua quijcuiluilía (quescribiruilía) Teófilo*

<sup>1</sup> Lasojli Teófilo, cate míac lacames hual molalilijque pa quijcuilulosquiaya se lapuhualisli hual quilamachiltisquiaya quinami panujque innojen hual quinchíac Jesucristo hual neli ticmatilo.

<sup>2</sup> Inon techlamachiltijque yehuanten hual quinquajijque ilajtomes hual quijtuc. Huan quitajque ca inmixtololojmes len quichíac Jesucristo quiman yuliaya pan lalticpan huan quiman uyac pin cielo (ilhuicac). Yehuanten cate hual quilamachiltitinemiloaya ilajtol Jesucristo.

<sup>3</sup> Huan nehual noje nimomachiltisli cuali mochi in hual panuc, huan noje inon hual panuc pin tonalijmes quiman ayamo lacatic Jesucristo. Pampín níquixtocaya nimitzijcuiluili tehual, Teófilo, pa nimitzmachiltisquiaya seje ca seje innojen hual panujque quiman pehuac huan hual quinchijíac pa quiman laquisac. Inon nimitzijcuiluili pa ticmatisquiaya jan quinami panuc.

<sup>4</sup> Nicchijtica inon pa ticmatis cuali pampa unca melahuac huan neli in hual mitzmajtijque pampa quinchíac Jesucristo innojen.

### *Quilamachiltía se ilanahuatini in cielo (ilhuicac) pampa yahui lacati Juan Lacuayatequini*

<sup>5</sup> Pa innojen tonalijmes quiman Herodes yec in hué pin lalticpan Judea, cataya se tiopista motocaya Zacarías. Yihual yec se ca inminlanechiculisli in tiopistas hual quintocayaltioaya quinami motocaya Abías. In Abías yulini pa yina huan imiahuimes tiopistas tequipanunijme pin tiopan hué in tonalijmes hual quinlaliliniyme. Huan Zacarías quiapiaya isihua motocaya Elisabet. In Elisabet, yihual noje yec imiahuil in tiopista motocani Aarón hual yec in tiopista pa yina hual ca yihual Dios quinquahualtic inmintiopistas in israelitos pín lali Israel.

<sup>6</sup> In omenten, Zacarías huan Elisabet, Dios quinquimitaya cuali pampa quinel-tocaloaya ilajtulisli huan ilajtomes Dios toTata. Amaqui huil quinquimotex-pahuiliaya ca nindeno hual amo cataya cuali.

<sup>7</sup> Ma yoje, amo quiman quiapijque se xolol pampa amo huil quinquipiaya xolomes Elisabet. Huan in omenten Zacarías huan Elisabet axcan moviejojtijque.

<sup>8</sup> Cuaquinon se tonali, Zacarías huan icnían inmintiopistas inechiculisli Abías quipialoaya pa quichihualosquiaya inmintequipanulisli tiopistas ilaixpan Dios pín tiopan hué.

<sup>9</sup> Quinami quichihuanijme yehuanten in tiopistas quiman quinequiloaya quimatilo aqui yahuiaya quichía se huan oc se tequipanulisli pa itiopan hué Dios, quijcuilunijme (quescribirunijme) quinami motocaloaya moxtin in tiopistas seje itoca pan se cuajtzindi, quinquilasaje mochi innojen pan se tapalcal. Cuaquinon quiquixtijque pin tapalcal se cuajtzindi. Pa in tonali, quiquixtijme inon capa quijcuilujque quinami itocaya Zacarías. Yoje, in tonali quiapiaya yihual pa calaquisquiaya pin ilasojli calijtic in tiopan hué pa lapopochisquiaya.

10 Calaquic Zacarías, lapopochuiaya ca in ajuíac, huan moxtin in lacames huan sihuames cataloaya pa quiahuac in tiopan hué, quilajlantataloaya Dios.

11 Cuaquinon nesic se ilanahuatini toTata pin cielo (ilhuicac). Nesic capa Zacarías, moqueztataya in lanahuatini pa ima cuali inon capa lapopochuilo.

12 Quitac Zacarías in lanahuatini huan mocahuaya lachixtica, momajtic mías.

13 Cuaquín in lanahuatini quilic:

—Amo ximomajti, Zacarías, pampa quicaquic Dios in hual ticlajlanic. Mitzlatatilis mosihua Elisabet se xolol, huan tictocayaltis Juan.

14 Tehual ticayas paquintzudo, ticpías paquilisli, huan quipiasqui paquilisli mías lacames pampa yihual lacatic.

15 'Huan Dios quitas in xolol quinami se lalac hué. Dios quilía pa camo quiman cunis iayo uva coc, huan nindeno hual quipía alcohol. Huan in Espíritu Santo canas in xolol quiman ayamo lacatis.

16 In xolol quichías pa mías yehuanten pa Israel mocuepasqui quitequipanuilsiqui cuali in Tata Dios. Quincuepaltis pa quitequipanuilsiqui oc sejsa quinami quichihuanijme pa yina, quinami Dios quinnextilic.

17 Huan Dios quitilanis in Juan moxolol hual quipixtías ilajtol Dios, quitilanis quinami quitilanic ilajtuni Elías hual yulini pa yina. Quema, Juan yes quinami Elías ca iyolo huan ilahuelilitisli. Quinchihuilis inminyolo in tajtitzían pa yesi jan sejsa ca mosehuilisli ca inminyolo inminxolomes. Huan yehuanten hual aqui lacuilmatilo, yihual quinlaneltocaltis. Yojque yahui quichijchihuilis toTata lacames hual aqui cayasqui lachijchihuali pa quinamiquisqui Dios.

18 Cuaquín Zacarías quilajlanic in lanahuatini, quilic:

—¿Quinami nicmatis da in cayas jan quinami tiquijtutica? Pampa nehual nimoviejojtic huan nosihua moviejojtic.

19 Ilanahuatini in cielo quinanquilic:

—Nehual niGabriel, nictequipanuilía Dios. Cataya yihual hual nechtilanic pa nimitznotzas huan pa nimitzilis in cuali lamachilitisli.

20 Huan axcan, pampa amo tichneltocac, tía timocahua, amo huil tilajtus. Quiman lacatis moxolol, cuaquín tilajtus oc sejsa. Huan moxolol, quema, lacatis pan in tonali hual quipías pa mochías in hual nimitzilic.

21 Huan pa quiahuac in tiopan hué yehuanten quichixtataloaya Zacarías huan moilloaya:

—¿Leca huejcajtica pa quisas pin tiopan hué?

22 Cuaquinon quisac Zacarías, huan amo huil quinnotzaya. Cuaquinon quimatiloaya yehuanten pampa yihual quitac len ilanextilisli in cielo nepa capa cataya pa icalijtic in tiopan hué. Huan Zacarías quinlaquetzilic ca imajmajuan pampa axcan mocahuac, amo huil lajtuaya.

23 Ajsic in tonali hual laquisac tequipanuc Zacarías ca ilachihualisli se tiopista pin tiopan hué, cuaquinon uyac pa ichan.

24 Quiman panuc inon, pehuac pilhuac Elisabet isihua Zacarías, yahuiaya quilacatilti se xolol, huan amo quisac pa icali pa macuili mesli. Quijtuaya laijtic yihual:

25 “Yojque nejchihuilic in Tata, nechitac quinami nipinahuaya pampa amo nicpiaya se xolol. Axcan yajmo nipinahuas ca lacames pampa quema, nicpías se xolol.”

*Se ilanahuatini in cielo (ilhuicac) quimachiltía pampa lacatis Jesucristo*

<sup>26</sup> Pa in mesli chicuase quiman pilhuaya Elisabet, quitilanic Dios in lanahuatini Gabriel pa se caltilan itoca Nazaret pin lalticpan Galilea.

<sup>27</sup> Quitilanic pa quitas se sihual yancuic motocaya María. Yahuiaya monamicti María ca se lalac motocaya José. Yihual José yec imiahuil in hué David hual yulini pa yina.

<sup>28</sup> Calaquic in lanahuatini capa María, quilic:

—Nimitzpialtia, tehual hual Dios yahui mijchihuilía len niman cuali. In Tata unca ca tehual, yahui mijchihuilía len hual unca hué. Mochi in lachihualisli hual quinchihuilía moxtin oc sequin sihuames amo quiman cataya yojque hué.

<sup>29</sup> Mocahuac quizataya María quiman quinotzac in lanahuatini, moilic laijtic pa iyolo:

—Axcan, ¿leca yojque nechpialtitihuala in se?

<sup>30</sup> Cuaquinon in ilanahuatini in cielo (ilhuicac) quilic:

—María, amo ximomajti, pampa tehual tia ticpia len niman cuali hual mitzmacas Dios.

<sup>31</sup> Axcan, tipilhuas huan ticpiás se xolol huan tictocayaltis Jesús.

<sup>32</sup> Yihual yes hué, quitocayaltisqui ixolol in niman hué hual chanti niman miac pa pani pin cielo. Huan Dios in Tata quimacas ilahuelilitisli pa huelitis ca yehuanten pa Israel. Cayas yojque quinami quipiani in lahuelilitisli pa yina in hué David hual yec itajtzin motajtzizian, yihual yulini niman pa yina.

<sup>33</sup> Huan tehual moxol huelitis ca yehuanten ilacames Jacobo, cate yehuanten pa Israel, huan amo quiman lamis ilahuelilitisli yihual.

<sup>34</sup> Cuaquinon María quilajlanic in lanahuatini, quilic:

—¿Quinami huil nechpanus inon? Pampa amo nicpia nolahuical.

<sup>35</sup> Quinanquilic in lanahuatini, quilic:

—Hualas in Espíritu Santo mopan, huan ilahuelilitisli yihual hual chanti niman pa pani pin cielo mitzyahualus quinami ilasehuán se mextemil. Yojque mitzhuelilitis pa ticlacatiltis. Pampín, in se hual lacatis pa tehual cayas lalalili pa quichías Dios ilachihualisli niman hué, quilalilic pa cayas pa yihual pan lalticpan. Pampín, quitocayaltisqui ixolol Dios.

<sup>36</sup> Huan noje Elisabet mocni pa oc se cali yahui quipía se xolol lalac, mas que axcan moviejojt. Quema, huan axcan quipía chicuase mesli pilhuatica. Huan lacames quijtunijme yihual amo quiman yahuiaya quipía se xolol.

<sup>37</sup> Ma yoje, ca Dios amo unca nindeno hual amo huil quichía.

<sup>38</sup> Cuaquinon María quilic:

—Xiquita, nehual itequipanujquil in Tata. Ma nejchihuilis quinami tichilic. Cuaquinon quisac capa María ilanahuatini in cielo.

### *María quipaxaulía Elisabet*

<sup>39</sup> Pa in tonalijmes ejsehuic uyac María pa se caltilan pin lalticpan Judea, pin lali pani.

<sup>40</sup> Calaquic pa ichan Zacarías huan quipialtic Elisabet.

<sup>41</sup> Huan yojque panuc quiman Elisabet quicaquic quipialtic María, cuaquín tzicuic in xolol laijtic capa iyolo Elisabet, quitemiltic Elisabet in Espíritu Santo.

<sup>42</sup> Cuaquinon ca se lajtol chicahuac, quitzajtzilic:

—Dios mijchihuilic miac hual niman cuali. Yoje miac amo quiman quinchihuilic moxtin oc sequin sihuames. Huan Dios quichihuilis moxol lachihualisli hué, hual amo quinchihuilis oc sequin, pampa quipías mochi lasojlalisi pa in lalticpan huan pin cielo.

<sup>43</sup> Huan ¿len yes nechpanujtica? ¡Inantzin noTata nechpaxaluilijtica!

<sup>44</sup> Xiquita, jan ajnaxcan nimitzcaquic tinechpialtic, cuaquín tzicuinic ca paquilisli in xolol laijtic capa nehual.

<sup>45</sup> Tiyuli niman ca paquilisli pampa ticneltocac in hual mitzilic in Tata, huan yahui mochía in lajtol hual quijtuc.

<sup>46</sup> Cuaquinon María quilic:

Laijtic capa nehual niqijtúa lajtomes huejué pa in Tata,

<sup>47</sup> huan quipía paquilisli noyolo pampa Dios nechquixtía pin polehuilisli.

<sup>48</sup> Unca pampa Dios nechitac cuali nehual hual itequipanujquil, nehual hual amo nilapia.

Huan xiquita, pejtica axcan pa mochi xixihuil, moxtin lacames huan yehuanten hual lacatisqui laquetzasqui hué nonahuac nehual.

Quijtusqui pampa nehual nicanac ilachihualisli Dios, quijtusqui quinami Dios nechtechíac.

<sup>49</sup> In Dios hual quipía mochi lahuellitlisli, yihual nejchihuilic len hué.

Huan yihual unca niman hué huan amo quimacahuilítia pa cayas laijlaculisli capa yihual.

Pampín tehuanten tohuían amo huil tiajsilo ca yihual.

<sup>50</sup> Quinmicnilía yehuanten hual yulinijme pa yina huan yehuanten hual yulilo axcan huan pa mochi xixihuimes hual ajsitihualalo.

Quema, quinmicnilía yehuanten hual quimatilo momajtilo ilaixpan yihual.

<sup>51</sup> Ca ilahuelilitlisli imajma quinchihuac innojen hual niman huejué: quincholultic yehuanten hual quijtuloaya pa inminyolo pampa yehuanten huejueyenten.

<sup>52</sup> Quinquixtic lacames chijchicahuac pa capa hueltiloaya, huan yehuanten hual tijtipichin quinlalic capa huil canaloaya lasojlalisli.

<sup>53</sup> Quinmacac miac yehuanten hual quimatiloaya pampa monequi pa Dios quinpalehuis.

Huan quincholultic iyampa yihual amo quipixtataloaya nindeno yehuanten hual quijtuloaya pampa amo monequiaya pa Dios quinpalehuisquiaya.

<sup>54</sup> Quinpalehuía yehuanten pa Israel, yehuanten hual cate itequipanujquimes, quijnamiquic quinmicnilic.

<sup>55</sup> Quinchihuilic jan quinami quinmilic totajtztzian, quinami quinmilic Abraham huan imiahuimes pa yina huan pa axcan huan pa quiman.

<sup>56</sup> María mocahuac chantitataya ye mesli ca Elisabet, cuaquinon uyac pa ichan.

### *Lacati Juan Lacuayatequini*

<sup>57</sup> Cuaquinon, ajsic in tonali capa yahuiaya quipía ixolol Elisabet huan quiulatiltic se xolol lalac.

<sup>58</sup> Quimatijque ichantinjmes huan icnían quinami in Tata quichihuilic len cuali niman hué. Pampín hualajque quipaxaluilijque yehuanten, quipilijtataloaya yihual paquilisli.

<sup>59</sup> Cuaquinon, panuc in chicue tonaljmes, huan quipialoaya pa quitequililosquiaya nadita icuilaxli in xolol, quinami monequi pa quichihuasqui in judíos ca inminxolomes lacames, huan yahuilaloaya quitocayaltilo in xolol Zacarías, yojque quinami motocaya itajtzin.

<sup>60</sup> Huan inantzin Elisabet quinmilic:

—Amo tictocayaltisqui yojé, tictocayaltisqui Juan.

<sup>61</sup> Huan quilijque:

—Amo unca se anmocnían hual motoca yoje.

<sup>62</sup> Pampín quilajlaniloaya Zacarías ca inminmajmajuan quinami yihual quinequiaya pa motocasquiaya ixolol.

<sup>63</sup> Huan Zacarías molajlanilic se amal huan quijcuiluc: “Juan itoca.” Huan moxtin mocahualoaya moiztaloaya.

<sup>64</sup> Cuaquinon quilapuc icamac Zacarías huan jan ajnaxcan inejnepil huil lajtuaya, pehuac quijtuc lajtomes huejué pa Dios.

<sup>65</sup> Huan pehualoaya momajtilo moxtin in chantinijmes. Pa mochi in lali pa pani ilomera (itepetilan) in lalticpan Judea, moxtin pehualoaya moililo inahuac in hual panuc.

<sup>66</sup> Huan moxtin yehuanten hual quimatijque quinami panujque innojen quijnamictiahuilooaya lajtuc inminyolo, quijtuloaya:

—Axan, ¿len yahui caya ca in xolol?

Pampa cataya neli Dios ilahueliltilisli cataya ca yihual.

### *Zacarías quijtúa lajtomes huejué pa Dios*

<sup>67</sup> Huan in Espíritu Santo quitemiltic Zacarías itajtzin in xolol Juan, quilaquetzaltic ilajtomes in Espíritu Santo, huan quilic:

<sup>68</sup> Ma cayacan lajtuli lajtomes huejué pa in Tata, iDios Israel, pampa techitac pa techpalehuis huan pa laxlahuis pa tiyelosquiaya lamacahuali tehuanten ilacames.

<sup>69</sup> Quitilania se hual quipía mochi lahueliltilisli pa techquixtis pin polehuilisi.

In se unca imiahuil in hué David hual yec itequipanujquil Dios.

<sup>70</sup> Unca jan quinami Dios lajtuc pan inminpampa ilajtunijmes hual lajtujque pa yína, yehuanten quinlalilic pa quijtus ilajtol.

<sup>71</sup> Quijtuc pampa in se yahuiaya techquixti pin itemajquil tomocualantini-jmes huan pin ilahueliltilisli moxtin hual amo techixtocalo.

<sup>72</sup> Quijtuc pampa yojqe yahuiaya quinnicnili totajtzitzián.

Yoje quijnamiquic in lajtol hual quijtuc pampa yahuiaya tejchihuili yihual ihuán.

<sup>73</sup> Dios quimacac Abraham totajtzin in lajtulisli ca lajtomes hual amo quinpalas.

<sup>74</sup> Quimacac pa yoje techquixtisquiaya pa inminlahueliltilisli tomocualantini-jmes.

Yojque yajmo ticpialosquiaya pa timomajtilosquiaya inminpampa yehuanten.

<sup>75</sup> Quimacac in lajtol hual techilía quinami yahuiaya tejchihuili pa huil tictequipanuililosquiaya Dios ca toyolo lachipahuali, pa huil ticchihualosquiaya in hual Dios quixtoca pa ticchihuasi mochi in tonalijmes hual tiyulilo.

<sup>76</sup> Huan tehuál, noxolol, mitztocayaltisqui ilajtuni in Dios hual chanti niman pa pani pin cielo, pampa ticlaicanas in Tata pa ticchijchihuilis iojli.

<sup>77</sup> In quinequi quijtúa tehuál tía tiquinlamachiltía ilacames Dios quinami Dios yahui quinquixtía pin polehuilisi.

Huan yoje quinquixtía, cayas pampa quinpupuhuilía inminlajlaculisli.

<sup>78</sup> In unca pampa toDios quixtoca laicnilía.

Pampín Dios techita capa unca pa niman pani pin cielo, unca quinami ilaixpelalisli in huajtzinquito.

<sup>79</sup> Techixpela tehuanten hual ticate pin laticumac, tehuanten hual tichantilo capa unca quinami ilaticumactilisli in miqulilisli, quinequi quijtúa, capa tiyulilo timomajtiticate pampa timiquisi.

Axcan huil tilachialo cuali pa in ojli hual techhuicas capa ticayasi jan yoje ca Dios ca ilaijnamiquilisli huan imosehuilisli pa toyolo.

Ticpiasqui mochi hual unca cuali pa tehuanten, mochi hual Dios quipía pa tehuanten huan quinequi techmaca.

Techixpela pa techmelahuilis tocxihuaimes pan in ojli capa ticayasi jan yojque tilaijnamicticate quinami Dios huan capa ticayasi ticpixticate imosehuilisli pa toyolo.

Umpa laquisac lajtuc Zacarías.

<sup>80</sup> Huan moscaltitiahuiaya in xolol, cantiyahuiaya chichahualisli pa iyolo huan chantiaya capa amaqui oc se chantiaya. Panuje xixihuimes huan cuaquinon ajsic in tonali quiman Dios quitilanic pa quinnotzasquiaya quinmilijtataya yehuanten pa Israel ilajtol Dios.

## 2

### *Lacati Jesucristo*

*(Mt. 1:18-25)*

<sup>1</sup> Cataya pa innojen tonalijmes in hué niman hué hual motocaya César Agosto quichijchihuac se lajtol pa quichihualosquiaya se ilapuhualisli moxtin hual umpa chantiloaya pa mochi in lali.

<sup>2</sup> In lapuhualisli quichihuaique pa innojen tonalijmes hual Quirinio yec huelitini (gobernador) pin lali itoca Siria. In lapuhualisli cataya in calica yahuiloya quipehualtilo ilapixcalisli tomin pa in hueyenten hual huelitiloaya.

<sup>3</sup> Huan yahuiloya moxtin pa cayalosquiaya lasaluli pa in lasalulisli. Mochi seise uyac pa in caltilan capa moxtin itajtzitzian lacatijque huan yulinijme.

<sup>4</sup> Huan José noje uyac pa inmincaltilan itajtzitzian hual cataya pin ilomera (itepetilan) in lalticpan Judea. Quisac pin caltilan tipichin Nazaret pin lalticpan Galilea, huan panquisac pa Judea pa icaltilan tipichin David, in caltilan itoca Belén. José yec imiahuil David, pampin uyac pa Belén.

<sup>5</sup> Huan lamiaya monamicti ca María hual pilhuatataya, amo huejcahuasquiaya pa lacatis ixolol. Huan José uyaje pa yesi lasaluli pin lasalulisli.

<sup>6</sup> Cataloaya pa Belén, huan ajsic in tonali pa lacatis ixolol María.

<sup>7</sup> Huan lacatic pan yihual se xolol lalacal, ca yihual quipehualtic in xolomes hual quilacatiltic María. Quiliaruc ca se tzotzomajli huan quitecac pan se sacalera lanechiculi laijtuc se lacomultic capa lacualoaya in burros. Yojque quichiac María pampa amo cataya capa huil mosehuilosquiaya pin cali.

### *Ilanahuatini in cielo quinlamachiltia yehuanten hual quinmiztataloaya inminborregos*

<sup>8</sup> Huan cataloaya lacames hual quinmiztataloaya inminborregos pa layúa pin ixlahuitos itejtenco Belén.

<sup>9</sup> Huan nestiquisac inminlaixpan yehuanten ilanahuatini in Tata, quisac pin cielo (ilhuicac). Huan laixpelatiquisac ilaixpelalisli chichahuac in Tata quinyahualujtataya, huan momajmajtijque miac.

<sup>10</sup> Huan in lanahuatini quinmilic:

—Amo ximomajtican. Xiquitacan, nehual nihuala pa annimitzlamachiltis se lamachiltisli cuali hual anmitzmacas miac paquilisli, huan in lamachiltisli cayas pa moxtin.

<sup>11</sup> Axcan anmitzlacatitic axcan se hual anmitzquixtis pin polehuilisli. Unca CRISTO in Tata, lacatic pa icaltilan David.

<sup>12</sup> Axcan annimitzilía quinami anquitas. Anquitemus huan anquitas se xolol iliarujtica ca se tzotzomajli huan lastica pan se sacalera pan se lacomultic calíjtíc capa lacualo in burros.

<sup>13</sup> Jan ajnaxcan ca in lanahuatini nestiquisajque míac oc sequin ilanahuatinijmes in cielo, quijtutataloaya lajtomes huejué pa Dios, quijtuje:

<sup>14</sup> ¡Xiquijtucan lajtomes huejué huan cuajcualtichin pa Dios hual chanti niman pa pani pin cielos,

huan pan in lalticpan ma yulican ca mosehuilisli quipixticate in hual Dios quinmacasquiaya yehuanten hual yihual quinpilía paquilisli!

<sup>15</sup> Cuaquín in lanahuatinijmes quincahuajque innojen lacames hual quinmitaloaya inminborregos, uyaje pin cielo. Huan moilijque in lacames se ca oc se, quilijque:

—Ma tiacan pa Belén pa tiquitasqui in hual axcan panuc, hual in Tata techlamachiltic.

<sup>16</sup> Cuaquín uyaje ejsejtataloaya, latemujque huan quinmitajque María huan José huan in xolol lastataya pan se sacalera capa lacuanijme in burros.

<sup>17</sup> Quinmitajque in yeyenten, quinlamachiltijque in hual ilanahuatini in cielo (ilhuicac) quinmilic inahuac in xolol.

<sup>18</sup> Huan moxtin hual quicaquijque, mocahualoaya moiztataloaya ca lamajtilisli pampa quinmajtíc inon hual quinmililoaya inminlaitanijmes in borregos.

<sup>19</sup> Ma yoje, María cajcoquiaya mochi innojen laijtíc capa iyolo, mojmosta quijnamiquiaya mochi hual panuc.

<sup>20</sup> Huan mocuepaje pa inminborregos in laitanijmes quijtutataloaya lajtomes huejué pa Dios. Quijtutataloaya mochi hual cuali inahuac yihual, pampa quicaquijque huan quitajque mochi jan quinami quinmilic ilanahuatini in cielo (ilhuicac).

### *Quinextilo in xolol Jesús pin tiopan hué*

<sup>21</sup> Cuaquinon, quiman quinpiaya chicue tonalijmes quiman lacatic Jesús, quitequilijque nadita icuilaxli huan quitocayaltijque JESÚS, quinami ilanahuatini in cielo quilic María pa quitocayaltilosquiaya pa in tonali hual ayamo pehuaya moscalti in xolol laijtíc María inantzin.

<sup>22</sup> Ajsic in tonali hual María quiapiaya pa yes lachipahuali, quinami quijtúa ilajtol Moisés: Quijtúa pampa moxtin sihuames hual quilacatiltic se xolol quipialo pa mochipahuasi. Pampín, panguisajque pa Jerusalén itajtztizian pa quinextilisqui in xolol Jesús ilaixpan in Tata Dios nepa pin tiopan hué.

<sup>23</sup> Quichihujque inon pampa vojque unca lajcuiluli pa ilajtol in Tata: “Sinda unca lalac se xolol calica se sihual quinpehualtía ixolomes hual quinlacatiltía, cuaquín yihual unca lalalili pa yes iyaxca in Tata.”

<sup>24</sup> Huan itajtzin huan inantzin noje quilalilijque Dios in huendi pa María ilachipahualisli, quinami quijtúa ilajtol in Tata: In huendi yes ome huilomes o ome pichones sejselic.

<sup>25</sup> Huan xiquitacan. Cataya se lalac pa Jerusalén itocaya Simeón, yihual se lalac cuali, quilasojlaya in Tata huan cataya in Espíritu Santo laijtíc capa yihual iyolo. Axcan quiapiaya míac yihual mochixtataya pa quiman yahuiaya ajsi in Cristo hual Dios yahuiaya quitilani pa quinquixtisquiaya yehuanten pa Israel pin polehuilisli.

<sup>26</sup> Huan in Espíritu Santo quilamachiltic Simeón pampa yahuiaya quita in Tata Dios ¡Cristo hual in Tata Dios quilalilic pa hualasquiaya pa in lalticpan.



Quilic pampa yahuiaya quita iCristo huan amo miquisquiaya sinda ayamo quitac.

<sup>27</sup> Huan in Espíritu Santo quichihuilic Simeón pa quimatis pa iyolo pampa monequiaya pa yas pa in tiopan hué. Huan nepa ajsije José huan María pa quichihuililosquiaya ca in xolol Jesús quinami in lajtol quijtuc pa quichihuililosquiaya yihual.

<sup>28</sup> Cuaquinon Simeón canac huan quimacuic in xolol, quijtuc lajtomes huejué pa Dios huan quilic:

<sup>29</sup> Axcan, Tata Hué, xinechtilani pa nimiquis ca paquilisli quinami tinechilic.

<sup>30</sup> Axcan niqutac ca noixtololojmes yihual hual tictilanic pa techquixtilis in miqulislisli.

<sup>31</sup> Ticchijchiác inminlaixpan moxtin pa Israel.

<sup>32</sup> Yihual yes quinami lahuilislis pa mitznexstis tehual, Dios, ca yehuanten hual amo lacatijque israelitos, pa mitziximatisqui yehuanten.

Huan yes quinami laixpelalislis chichahuac pa quinnexstis yehuanten pa mochi in lalticpan in míac lachihualislis cuali,

hual tehual, Dios, tiquinchihuilic in israelitos hual moyaxca yehuanten.

Yojque quijtuc Simeón.

<sup>33</sup> Huan itajtzin huan inantzin in xolol Jesús mocahualoaya moizticate pampa quijtuya Simeón innojen lajtomes inahuac in xolol Jesús.

<sup>34</sup> Cuaquinon quinlaquetzilic cuali Simeón, quintuchihuaya, huan yihual quilic inantzin María, quilic:

–Xiquita. In xolol Dios quilalía ca tehuanten pa Israel huan yihual quinchihuilis pa míac ca yehuanten miquisqui amo lachipahuali ipampa inminlajlaculislis, huan míac yesi laquixtili pin ipolehuilislis inminlajlaculislis.

Noje Simeón quilic:

–Yihual in xolol yes se hual míac amo quinequisqui quineltoacasqui pampa Dios quitilanic. Pampa inon, amo quinequisqui quineltoacasqui inon hual quinmilis.

<sup>35</sup> Yojque momatis quinami yehuanten lajnamiquilo lajtic inminyolo. Huan tehual, María, yahui mitzcocúa moyolo pampa panus mochi inon.

<sup>36</sup> Nepa noje cataya Ana, ixolol sihual Fanuel. Yihual Fanuel imiahuil se hual motocaya Aser. In Aser yulini pa yina, yihual yec se ca Israel ixolomes hual imiahuimes huan inminmiahuimes in oc sequin ixolomes Israel mochihuaje yehuanten ilacames Israel, yehuanten in judíos. Huan in sihual Ana yec se ilajtuni Dios, cataya niman ilamantzita.

<sup>37</sup> Huan ilahuical chantije chicome xixihuil, cuaquín ilahuical polehuic. Huan mocahuac Ana ihuían pa nahuipuhualihuanahui (ochentaicuatro) xixihuil. In Ana mojmosta pa semilhuil cataya pin tiopan hué, amo quiman quisac huejca nepa, mosajtataya míac huan quilajlaniaya Dios mochi tonali, quimolancuacuetzilic yihualitonali, pa semilhuil huan pa layúa.

<sup>38</sup> Huan lamac laquetzac Simeón, jan ajnaxcan hualac capa yehuanten Ana, quisehuiaya Dios quijtutataya lajtomes huejué huan cuajcualtichin pa yihual, quinlaquetziliaya inahuac in xolol, quinlaquetziliaya moxtin hual quichixtataloaya in tonali hual Dios yahuiaya quilaxlahui inminlamacahuilislis yehuanten in israelitos.

### *Mocuepalo pa Nazaret*

<sup>39</sup> Cuaquinon laquisajque quichihuajque José huan María mochi quinami quijtúa ilajtol in Tata, mocuepaje pa in lalticpan Galilea pa Nazaret inmincali yehuanten.

<sup>40</sup> Huan moscaltiaya in xolol Jesús, mochicahualtiahuiaya ca míac lajmatilisli huan Dios quichihuilijtihuiaya cuali.

*In xolol Jesús pin tiopan hué*

<sup>41</sup> Itajtzitzían Jesús yahuilooaya xixixihuil pa Jerusalén pa cayalosquiaya pin fiesta (ilhuil) capa quicualo in judíos inacal borrego pa quijnamiquisqui quinami Dios quinquixtic in israelitos pin Egipto. Quinquixtic pa yina capa yehuanten pin lali Egipto hual quinchihuaaje tequipanujquimes hual amo quinlaxlahuilinijme.

<sup>42</sup> Cuaquinon, quiman Jesús moscaltic huan quinpiaya doce xixihuimes, yehuanten yeyenten panquisajque pa Jerusalén pa cayalosquiaya pa in fiesta, quinami quichihuanijme mochi xixihuil.

<sup>43</sup> Huan quiman laquisajque inmintonalijmes in fiesta (ilhuil), mocuepalooaya itajtzitzían. Ma yoje, mocahuac Jesús in xolol pa Jerusalén, huan amo quimatiloaya itajtzitzían.

<sup>44</sup> Quijtuloaya pampa yihual cataya ca in oc sequin míac hualca yehuanten canalooaya ojli. Yoje catalooaya pan ojli se tonali huan pehuajque quitemu-jque ca inmicnían huan inminchantinijmes hualca yehuanten catalooaya pa ojli.

<sup>45</sup> Huan pampa amo quitajque, mocuepajque pa Jerusalén quitemuajtia-jque.

<sup>46</sup> Cuaquinon, quiman panuje ye tonalijmes quiman mocahuac Jesús pa Jerusalén, itajtzitzían quitajque pin tiopan hué, molalijtataya lajco pa in lamaxtinijmes, quincactataya huan quinlajlantataya.

<sup>47</sup> Huan mocahualooaya moizticate moxtin hual quicaquiloaya, mocahualooaya yoje pampa quicaquiloaya quinami yihual quimatiaya huan quinami quinnanquiliaya.

<sup>48</sup> Huan quipolujque inminlajtol itajtzitzían nepa capa quitajque. Cuaquín inantzin quilic:

—Noxól, ¿leca yoje titejchiuilic? Xiquita. Motajtzin huan nehual timztzemujtinemiloaya, techcocojtinemiaya toyolo.

<sup>49</sup> Huan Jesús quinmilic:

—¿Len inon? ¿Annechtemujtinemiaya? ¿Amo anquimatiaya pampa nehual nicpia pa nicayas capa cate lachihuali innojen hual cate iyaxca noTajtzin?

<sup>50</sup> Amo quimatiloaya yehuanten len quinequiaya quijtu inon hual quinmilic.

<sup>51</sup> Cuaquín temujtiac ca yehuanten pa Nazaret huan yihual yuliaya quineltocatataya itajtzitzían. Ma yoje, inantzin sejpa huan oc sejpa quinmijnamiciahuiaya mochi innojen laijtic pa iyolo.

<sup>52</sup> Huan cantiyahuiaya Jesús míac lajmatilisli huan moscaltitiahuiaya hué. Huan yultiahuiaya quinami Dios quinequi huan moxtin quixtocalooaya míac.

### 3

*Juan Lacuayatequini quinnojnotta lacames capa amaqui chanti  
(Mt. 3:1-12; Mr. 1:1-8; Jn. 1:19-28)*

<sup>1</sup> Quipiaya quince xixihuil yihual huelitijtihuiaya in hué niman hué motocaya César Tiberias pa Roma. Huan Poncio Pilato yec huelitini romano pin lalticpan Judea, Herodes huelitiaya pin lalticpan Galilea, huan icni Felipe huelitiaya pin lali capa catalooaya in lalticpan Iturea huan in lalticpan Traconite. Lisanas huelitiaya pin lalticpan Abilinia.

<sup>2</sup> Anás huan Caifás yeje in tiopistas huejué. Pan in tonalijmes, Dios quitilanic Juan ixolol Zacarías pa quinnotzas in lalalera. Chantiaya Juan capa amaqui oc sequin chantiloaya.

<sup>3</sup> Yoje uyac Juan lanojnoztinemiaya pa mochi in lali itenco in atenco hué itoca Jordán, quinmilijtinemiaya yehuanten pa mopatillosquiaya inminyolo pa pehualosquiaya laijnamiquilo quinami Dios quinequi. Yoje huil cayalosquiaya lacuayatequili, yoje yelosquiaya lapujpuhuali inminlajlaculisli.

<sup>4</sup> Cataya quinami yec lajcuiluli pa in amal hual quijcuiluc Isaías ilajtuni Dios pa yina, quijtuc:

Mocaqui se hual tzajztitica pin lali capa amaqui chanti, quilía:  
 “Xicchihuilican iojli in Tata, xiquinchihuacan melahuac iojlitos.

<sup>5</sup> Mochi lali hual unca pa temuán cayas latemiltili ca lali, huan mochi loma (tepel) huan lomita (tepetzindi) mochihuasqui ixlán.

Ojlimes pandera mochihuasqui ojlimes mejmelahuac.

Ojlimes huajuahuastic mochihuasqui ojlimes aj'alastic.

<sup>6</sup> Cuaquinon moxtin quitasqui yihual hual Dios quitilania pa quinquixtilis ipolehuilisli inminlajlaculisli.”

Yojque unca lajcuiluli pin iamal Isaías.

<sup>7</sup> Yoje, miac quisajque pa miac caltilan pa quincuayatequis Juan nepa pa in atenco hué Jordán. Cuaquín Juan quinmilic:

—¡Amhuanten quinami cuhuames hual lapajuilo! ¿Anquijtúa sinda annimitzcuayatequis, cuaquin ancayas laquixtili pin polehuilisli quiman cualani Dios? No, amo yoje. Anquipía pa anyulis anquichijtás len unca cuali, pa yoje anquinnextilis Dios huan lacames pampa ca melahualisli anquipalac annoyolo pa anpehuas anlajnamiquis quinami Dios quinequi.

<sup>8</sup> Huan amo xipehuacan ximoilican lajitic pa annoyolo pampa amhuanten anunca imiahuimes Abraham totajtzin huan pampín Dios amo annimitztojtocas ilaixpan yihual. Nehual annimitzilía pampa Dios huil quinchía lacames ca in tixcalimes nican hual yelosquiaya imiahuimes Abraham.

<sup>9</sup> Axcan unca lalalili Dios pa annijxitinis anmonapatilisli. Unca quinami se hacha hual quilalilo pa ilalhuayol se cuahuil. Sinda amo quipía laquilyo cuali in cuahuil, cuaquín quimayahuisqui huan quilasasqui pin tixuxli. Huan jan yoje sinda amo quipala iyolo se pa laijnamiquis quinami Dios quinequi, cuaquín Dios quichihuilis quinami quichihuililo in cuahuil hual amo quipía laquilyo cuali.

<sup>10</sup> Huan quilajlanijque Juan innojen miac lacames, quilije:

—¿Len ticchihuasqui tehuanten?

<sup>11</sup> Quinnanquilic Juan:

—Sinda se quipía ome cotones, ma quimaca se pa yihual hual amo quipía se cotón. Huan sinda se quipía len quicua hual mocajtica, ma quimaca yihual hual mayana.

<sup>12</sup> Hualajque noje lacames hual canaloaya ilapixcalisli in tomin pa in hueyenten romanos. Hualajque pa yelosquiaya lacuayatequili, quilajlanijque:

—Lamaxtini, ¿len ticchihuasqui pa tilanextilisqui pampa ticpalaje toyolo pa tipehuasi tilajnamiquisqui quinami Dios quinequi?

<sup>13</sup> Juan quinmilic:

—Jan xicpixcacan in tomin san hual annitzlalililo yehuanten hual huilitilo.

<sup>14</sup> Noje quilajlanije in guaches hual quinlaquehuajque in lacames hual huilitiloaya, quilije:

—¿Len ticchihuasqui tehuanten noje?

Huan quinmilic:

—Amo xijquixtilican nindeno amaqui, amo pan ipampa quinami anquinmacajsi ca in lacocoltilisli hual huil anquinchihuilía sinda amo quichihualo quinami anquinequi. Huan amo xiquinmacajsican pan ipampa quinami cuajnesi anquinmotexpahuilía inahuac len amo quichihuaje. Huan ximopaquiltican san ca in hual anmitzlaxlahuilo anmotecojuan.

<sup>15</sup> Quijtuloaya moxtin yehuanten pampa Dios yahuiaya quitilani iCristo huan pampín quichialoaya. Quinequiloaya quimatilo da cuajnesi yesquiaya Juan in Cristo, pampa quijnamictinemiloaya laijtic pa inminyolo mochi hual quitaje hual quichihuaaya Juan.

<sup>16</sup> Huan Juan quinnanquilic moxtin, quinmilic:

—Nehual annimitzcuayatequí ca al. Ma yoje, hualas se hual quipía niman míac lahuelitlisli hual nel amo nicpía. Huan nehual amo nimonotza pa yes noyaxca pa nictomilis ilailpili ilacsames pa icxihujames. Yihual anmitzcuayatequis ca in Espíritu Santo, unca quinami tixuxli hual lachipahua.

<sup>17</sup> Huan yihual quinxilus yehuanten hual quineltocalo Dios pa camo cayasi ca yehuanten huál amo quineltocalo. Yes quinami yihual quipiasquiaya se latzejtzeluloni pa imajma calica quichipahuililo in trigo pa quisas in xiniul. Quimontus in trigo pa capa cajcoquilo huan in xiniul quilasas huan quichichinus pin tixuxli hual amo quiman sehuis.

<sup>18</sup> Yojque Juan quinnoztinemiaya yehuanten pa quinmilisquiaya len quipialoaya pa quichihualosquiaya. Yihual quinlaquetzilizitinemiaya míac huan ca oc sequin lajtomes pa quinchicahualtisquiaya yehuanten. Yojque quinlaquetziliaya in lacames ca in lamachilitlisli cuali.

<sup>19</sup> Huan Herodes in hué cualanic ca Juan. Cataya pampa Juan cajuac inminlaixpan moxtin in lacames, cajuac pampa Herodes canac Herodías. In Herodías yec isihua Felipe huan Felipe yec icni Herodes in hué. Juan noje cajuac Herodes pampa quinchihuaaya míac oc sequin lachihualisli amo cuajcuali.

<sup>20</sup> Cuaquinon mocuepac quichíac Herodes oc se lachihualisli amo cuali. Latilanic pa quitzacualosquiaya Juan pin calijtic.

### *Jesús unca lacuayatequili*

*(Mt. 3:13-17; Mr. 1:9-11)*

<sup>21</sup> Ayamo latilanic pa quitzacualosquiaya Juan pin calijtic, huan pampín, Juan ayamo mocahuaya pa quincuyatequisquiaya lacames. Juan noje quicuayatequic Jesús. Quiman laquisac cayac lacuayatequili, yihual Jesús quilajlantataya Dios, huan molapuc in cielo (ilhuicac).

<sup>22</sup> Temujtihalac in Espíritu Santo nestihualaya quinami se huilol. Moquetzac ipan capa yihual, huan quicaquiloaya moxtin se lajtol pin cielo (ilhuicac), quijtuc:

—Tehual noxolol hual nimitzlasojla, ca tehual nicpía míac paquilisli.

### *Nican lanextía quinami Jesús unca imiahuil Dios*

*(Mt. 1:1-17)*

<sup>23</sup> Jesús axcan moscaltic huan pehuaya quinpía quinami treinta xixihuil. Moxtin quijtujque pampa yihual yec ixolol José.

<sup>24</sup> Huan José yec ixolol Elí. Elí yec ixolol Matat, Matat yec ixolol Leví, Leví yec ixolol Melqui, Melqui yec ixolol Jana, Jana yec ixolol José.

<sup>25</sup> José yec ixolol Matatías, Matatías yec ixolol Amós, Amós yec ixolol Nahum, Nahum yec ixolol Esli, Esli yec ixolol Nagai.

<sup>26</sup> Nagai yec ixolol Maat, Maat yec ixolol Matatías, Matatías yec ixolol Semei, Semei yec ixolol José, José yec ixolol Judá.

<sup>27</sup> Judá yec ixolol Joana, Joana yec ixolol Resa, Resa yec ixolol Zorobabel, Zorobabel yec ixolol Salatiel, Salatiel yec ixolol Neri.

<sup>28</sup> Neri yec ixolol Melqui, Melqui yec ixolol Adi, Adi yec ixolol Cosam, Cosam yec ixolol Elmodam, Elmodam yec ixolol Er.

<sup>29</sup> Er yec ixolol Josué, Josué yec ixolol Eliezer, Eliezer yec ixolol Jorim, Jorim yec ixolol Matat, Matat yec ixolol Leví.

<sup>30</sup> Leví yec ixolol Simeon, Simeon yec ixolol Judá, Judá yec ixolol José, José yec ixolol Jonán, Jonán yec ixolol Eliaquim.

<sup>31</sup> Eliaquim yec ixolol Melea, Melea yec ixolol Mainán, Mainán yec ixolol Matata, Matata yec ixolol Natán, Natán yec ixolol David.

<sup>32</sup> David yec ixolol Isai, Isai yec ixolol Obed, Obed yec ixolol Booz, Booz yec ixolol Salmon, Salmon yec ixolol Naasón.

<sup>33</sup> Naasón yec ixolol Aminadab, Aminadab yec ixolol Aram, Aram yec ixolol Esrom, Esrom yec ixolol Fares, Fares yec ixolol Judá, Judá yec ixolol Jacob.

<sup>34</sup> Jacob yec ixolol Isaac, Isaac yec ixolol Abraham, Abraham yec ixolol Taré, Taré yec ixolol Nacor.

<sup>35</sup> Nacor yec ixolol Serug, Serug yec ixolol Ragau, Ragau yec ixolol Peleg, Peleg yec ixolol Heber, Heber yec ixolol Sala.

<sup>36</sup> Sala yec ixolol Cainán Cainán yec ixolol Arfacsad, Arfacsad yec ixolol Sem, Sem yec ixolol Noé, Noé yec ixolol Lamec.

<sup>37</sup> Lamec yec ixolol Matusalén, Matusalén yec ixolol Enoc, Enoc yec ixolol Jared, Jared yec ixolol Mahalaleel, Mahalaleel yec ixolol Cainán.

<sup>38</sup> Cainán yec ixolol Enos, Enos yec ixolol Set, Set yec ixolol Adán, Adán yec ixolol Dios.

## 4

### *Satanás quitilanilía Jesús iyolo* (Mt. 4:1-11; Mr. 1:12-13)

<sup>1</sup> Huan in Espíritu Santo quinejnemiltiaya Jesús nepa quiman quisac pin atenco hué Jordán pa mocuepasquiaya, huan quitilanilic capa amaqui chantiaya.

<sup>2</sup> Nepa in lili quitilanilic iyolo pa quichihuasquiaya len Dios amo quinequi, quitilaniliaya iyolo pa ompuhuali (cuarenta) tonalijmes. In tonalijmes amo quicuaya Jesús nindeno, huan quiman panuje in tonalijmes, yihual mayanaya.

<sup>3</sup> Cuaquín in lili quilic:

—Sinda tehual tiunca ixolol Dios, axan xiquili in tixcalimes pa mochihuasi len tijcuas.

<sup>4</sup> Cuaquinon quinanquilic Jesús, quilic:

—Yojque unca lajcuiluli pa ilajtol Dios, quijtúa: “Amo yulis se pan ipampa len quicua san, pampa in hual quicua se amo quichihuiliía nindeno pa yulis se iyolo. No, se lalac yulis pan ipampa mochi lajtol hual Dios quijtúa.”

<sup>5</sup> Cuaquinon in lili quihuicac Jesús pa pani huan quinextilic ca jan se nadita san mochi in lalimes pin lalticpan ca inminlacialera huan inmintomin.

<sup>6</sup> Huan in lili quilic:

—Tehual nimitzmacas mochi inon pa tiquinchiuilis quinami tehual ticnequis tiquinchiuilis, huan ticpías mochi len cuali hual moitas pa yehuanten. Huil nimitzmaca inon pampa unca noyaxca pa nicmacas aquí yes nicnequis nicmacas.

<sup>7</sup> Huan nimitzmacas mochi inon sinda tehual tinechmolancuacuetzilis.

<sup>8</sup> Huan Jesús quinancuilic:

—Yojque unca lajcuiluli, quijtua: “Ticmolancuacuetzilis jan in Tata moDios san, huan jan yihual san tictequipanulis.”

<sup>9</sup> Cuaquinon in lili quihuicac Jesús pa Jerusalén huan quilalic pa pani pin tiopan hué huan quilic:

—Sinda tehual tiunca Dios ixolol, ximolasa nican pan lali pa latzindan,

<sup>10</sup> pampa yojque unca lajcuiluli ilajtol Dios, quijtua:

Dios quintilanis ilanahuatinijmes pin cielo pa mitziztiasi cuali.

<sup>11</sup> Ca inminmajmajuan mitzajcoquisi pa camo timotecuas pan len tixcali mocxian.

<sup>12</sup> Huan quinancuilic Jesús, quilic:

—Huan yojque unca lajtuli: “Amo timolalis capa cuajnesi tipolehuis jan pa yoje ticmatis sinda in Tata moDios mitzquixtis pin polehuilisi.”

<sup>13</sup> Cuaquinon in lili lamic quitilanilic Jesús iyolo, mijcuanic nepa capa Jesús, yahuiaya quichía pa se tonali quiman huil quitilanilisquiaya iyolo oc sejpa.

### *Jesús pehua itequipanulisli pa Galilea*

*(Mt. 4:12-17; Mr. 1:14-15)*

<sup>14</sup> Cuaquinon mocuepac Jesús pa in lalticpan Galilea, quipixtataya ilahuelilitisli in Espíritu Santo. Huan momachiltijque pampa yihual panujtataya cajcaca pa mochi itenco in lali capa yes nejnentiniemiaya.

<sup>15</sup> Yihual lamaxtiniemiaya pa mochi inmintiopajmes, huan moxtin quijtuloaya lajtomes huejué pa yihual.

### *Jesús pa Nazaret*

*(Mt. 13:53-58; Mr. 6:1-6)*

<sup>16</sup> Huan uyac Jesús pa Nazaret capa itajtzitzián quiscaltijque, calaquic pa inmintiopian quinami quichihuaya pan mochi in tonalijmes hual mosehuilo in judíos huan yalo pa tiopan. Huan nepa Jesús moquetzac pa momaxtis.

<sup>17</sup> Quimacajque in amal hual quipía laijtic len quijcuiluc pa yina Isaías ilajtuni Dios. Quilapuc Jesús in amal, quitac capa yec lajcuiluli yojque:

<sup>18</sup> In Tata iEspíritu unca ca nehual pampa nechlalic yihual pa niquinmilis lamachiltisli cuali yehuanten hual quimatilo pampa monequi pa Dios quinpalehuis.

Nechtilanic pa niquinnahuatis pampa cate lamacahuali yehuanten hual Satanás quinpía lailpili.

Nechtilanic pa niquinnahuatis in pachacames pampa yalo lachialo oc sejpa.

Nechtilanic pa niquinmacahuas yehuanten hual inminlajlaculisli quinxacualuilijque inminyolo, nechtilanic pa yojque yesi lachijchihuali yancuic.

<sup>19</sup> Nechtilanic pa nilanahuatis pa quimatisqui pampa axcan in xihuil unca quiman Dios ca miac paquilisli quinequi quinchihuilía moxtin ilachihualisli cuali niman hué hual san yihual huil quinchihuilía.

<sup>20</sup> Cuaquinon quitzacuc Jesús in amal, quimacac in se hual cajcoquiaya in amal, cuaquinon molalic, huan mochahuajque quiztataloaya moxtin hual cataloaya pin tiopan calijtic.

<sup>21</sup> Cuaquinon pehuac quinlaquetziliz Jesús, quinmilic:

—Axcan lamíc mochíac in lajcuilulisli hual anquicaquíc nimomaxtic.

<sup>22</sup> Huan moxtin quijtuloaya neli pampa cataloaya cuali ilajtomes, mocahualoaya moiztataloaya pampa quinlaquetzilijtataya in lajtomes. Cuaquinon pehualoaya quijtulo:

—¿Amo in se ixolol José?

<sup>23</sup> Cuaquinon Jesús quinmilic:

—Neli amhuanten annechilis in lajtol hual quijtulo míac, annechilis: “Lapajtini, ximopajti tehual.” Huan annechilis: “Ticmatijque in hual ticchíac pin caltilan Capernaúm. Axan xicchía jan yoje nican pa mocaltilan capa timoscaltic.” Yoje annechilis.

<sup>24</sup> Huan quinmilic:

—Annimitzilía neli pampa yehuanten pin caltilan capa moscaltic se ilajtuni Dios amo quineltocono in lajtuni sinda yihual quinmilía ilajtoli Dios.

<sup>25</sup> Huan annimitzilía len melahuac: Cataloaya pin lali Israel míac sihuames inminhuían nepa capa yulini Elías ilajtuni Dios, cataya pin tonalijmes hual amo quiahuiaya pa ye xixihuil huan lajco. Huan cataya se mayandi pa mochi in lali.

<sup>26</sup> Ma yoje, Dios amo quitilanic Elías pa se ca innojen sihuames inminhuían pin lali Israel. Jan quitilanic pa se sihual ihuían hual amo yulini nican. Quitilanic pa se hual chantiaya pin caltilan tipichin itoca Sarepta, umpa amo huejca cataya in caltilan hué Sidón.

<sup>27</sup> Huan cataloaya míac lacames pin lali Israel hual mococuloaya ca in cocolisli lepra pin tonalijmes quiman yulini Eliseo ilajtuni Dios. Ma yoje, Eliseo amo quipajtic se ca yehuanten. San quipajtic in lalac itocaya Naamán, yihual yulini pin lali Siria.

<sup>28</sup> Pampin cualanije míac moxtin pa in tiopan pampa quinmilic Jesús innojen lajtomes.

<sup>29</sup> Moqueztiquisajque, quiquixtijque Jesús pa quiahuac in caltilan, quihuicajque pa itenco in loma (tepel) capa cataya in caltilan. Yahuiloya quilasalo pa in cuajtic nepa pa miquisquiaya.

<sup>30</sup> Ma yoje, yihual panuc lajco capa yehuanten huan uyac.

*Jesús quipajtia se lalac hual quiptia ijyecal amo cuali  
(Mr. 1:21-28)*

<sup>31</sup> Cuaquinon temuc pa Capernaum, se caltilan pin lalticpan Galilea, nepa lamaxtiaya mochi in tonalijmes hual mosehuilo in judíos.

<sup>32</sup> Mocahualoaya moiztataloaya míac pampa ilajtomes hual quinmaxtiaya yehuanten quipialoaya ilahuelilitlisli Dios.

<sup>33</sup> Huan pin tiopan cataya se lalac quiptiaya se ijyecal amo cuali huan catzahuac, huan quitzajtzilic ca lajtol chicahuac, quilic:

<sup>34</sup> —¡Ah tel! ¿Len ticptia ca tehuanten, Jesús in nazareteco? ¿Tihualaya pa titechlamisquiaya? Nicmati aqui tiunca tehual, tiunca in lalac lajtultili hual Dios quitilanic pa in lalticpan.

<sup>35</sup> Jesús cajuac, quilic:

—Amo xinahuati huan xiquisa pa quiahuac yihual.

Jan axcan in ijyecal amo cuali quilasac in lalac lajco capa yehuanten, quisac pa yihual, amo quicocoltic nindeno.

<sup>36</sup> Huan momajtijque moxtin, moililoaya:

—¿Len yes in lajtol hual quijtúa? Pampa ca ichicahualisli quinami quiptia se lalac ca lahuelilitlisli, yihual quinmilía in ijyecames amo cuajcuali huan quisalo pa laijtic yehuanten.

<sup>37</sup> Huan pa mochi cajcapa pa itejtenco in caltilan quilamachiltije inon hual quichíac Jesús.

*Jesús quipajtía inantzin isihua Simón Pedro*  
(Mt. 8:14-15; Mr. 1:29-31)

<sup>38</sup> Cuaquinon quisac pin tiopan, uyac pa ichan Simón, calaquic. Nepa quitac totontataya míac inantzin isihua Simón huan quilajlanijque Jesús pa quichihuilis len pa yihual.

<sup>39</sup> Yoje hualac Jesús, moquetzac inahuac huan cajuac in totonalisli. Pampín mosejtiquisac in totonalisli huan jan ajnaxcan moquetzac in sihual huan quinyucxiltiic len pa quicuasi.

*Jesús quinpajtía míac*  
(Mt. 8:16-17; Mr. 1:32-34)

<sup>40</sup> Calaquia in tonali pa tiolac huan moxtin hual quipialoaya pa inminchan cocoxquimes ca len yes cocolisli quihualiquililoaya Jesús. Huan yihual quilalilic imajmajuan pan mochi sejse in cocoxquimes, huan quinpajtíc.

<sup>41</sup> Quisaje iyecames pa míac yehuanten, tzajztitaloaya, quilijtataloaya:  
—Tehual ti'ixolol Dios.

Huan Jesús quinmajuaya, amo quinequiaya pa lajtulosquiaya, pampa yehuanten quimatiloaya yihual yec iCristó Dios.

*Jesús quinpaxaluilía in tiopajmes*  
(Mr. 1:35-39)

<sup>42</sup> Lanesic, quisac Jesús pin caltilan, uyac capa amaqui cataya. Quitemujtihualaloaya in míac lacames capa cataya huan quinequiloaya quitzacuillilo pa camo mohuicasquiaya, quinequiloaya pa mocahuas ca yehuanten.

<sup>43</sup> Ma yoje, yihual quinmilic:

—Cate noje oc sequin caltilan capa nicpía pa niquinlaquetzilis ilamachtilisli cuali Dios huan quinami huelitía. Unca pampa inon nechtilanic Dios pa nicchías.

<sup>44</sup> Huan yahuiaya quinahuatijtinemi ilajtol Dios pa inmintopajmes in judíos.

## 5

*Quinquitzquilo míac michimes*  
(Mt. 4:18-22; Mr. 1:16-20)

<sup>1</sup> Cataya se tonali in míac lalalera monechiculoaya inahuac Jesús pa quicaquillosquiaya ilajtol Dios. Yihual noje moquetzaya pa itenco in al huejcalan itoca Genesaret.

<sup>2</sup> Quinmitac ome canoas cataloaya itenquito in al huejcalan. Quinchahuajque in micheros, axcan quinchipajtataloaya inminlatzojuinijmes calica quinquitzquiloaya michimes.

<sup>3</sup> Calaquic Jesús pa in se canoa hual iyaxca Simón, huan quilajlanic pa quinejnemiltis in canoa pa quijcuanis nadita pin al huejcalan pa camo cayas pa itenco in al. Cuaquinon molallic huan pa in canoa quinmaxtiaya in míac lalalera.

<sup>4</sup> Cuaquín quiman mocahuac laquetzac, Jesús quilic Simón, quilic:

—Xicnejnemilti in canoa, ma ajsi capa cayas huejcalan huan xiquinlasacan anmolatzojuinijmes huejué pa anquinquitzquis michimes.

<sup>5</sup> Simón quilic:

—Lamaxtini, pa mochi layúa titequipanuloaya huan amo tijquitzquije nindeno. Ma yoje, pampa tel tichilic, niquinlasas in latzojuinijmes.



<sup>6</sup> Quichíac inon, huan quinnejnechicujque michera, míac, huan pehuajque tzayanijque inminlatzojuinijmes.

<sup>7</sup> Cuaquín quinculiniloaya inminmajmajuan pa hualasqui yehuanten pan in oc se canoa pa quinpalehuilosquiaya. Huan hualajque, quintemiltijque in ome canoas ca michimes, pampín pejtiajque moatocijque.

<sup>8</sup> Huan quitaya mochi inon Simón Pedro, huetzic quimolancuacuetzilijtica capa ilaixpan Jesús, molaquitizquic pa ilancuajmes Jesús, quilic:  
—Ximijcuani capa nehual, Tata, pampa nehual nilaijlaculi.

<sup>9</sup> Quilic inon pampa momajtiaya pampa quinquitzquijque innojen míac michimes.

<sup>10</sup> Yojqe mocahualoaya moizticate ca lamajtilisli moxtin hual cataloaya ca yihual. Quema, yoje mocahualoaya moizticate Jacobo huan Juan ixolomes Zebedeo, hual tequipanuloaya ca Simón. Huan Jesús quilic Simón:  
—Amo ximomajti. Tiquinquitzquini michimes hual miquinijme. Pejtica ca axcan huan pa quiman tiquinquitzquis lacames hual yulisqui pampa yesi nolaneltocanijmes.

<sup>11</sup> Cuaquinon quinqixtijque pin al huejcalan in canoas pa quinalilosquiaya pa itenco in al, huan jan axcan quincajcahuajque mochi huan quitocajque Jesús.

### *Jesús quipajtía se hual quipía lepra*

(Mt. 8:1-4; Mr. 1:40-45)

<sup>12</sup> Se tonali cataya Jesús pa se innojen caltilan, huan moitac se lalac, quipiaya in cocolisli itoca lepra pa mochi icuerpo. Huan quitac Jesús in lalac, mopachujtiquisac pan lali, huan quitemachic Jesús, quilic ca icnotilisli, quilic:

—Tata, sinda ticnequi, huil tijchipahuilis in lepra.

<sup>13</sup> Huan Jesús quixilanic imajma, quimatocac, quilic:

—Nicnequi nicchía. Xicaya lachipahuili.

Jan ajnaxcan pajtic in lepra pan in lalac.

<sup>14</sup> Cuaquinon Jesús quilic in lalac pa camo quilisquiaya amaqui, quilic:

—Axcán quiman timohuicas, ximonexti ca in tiopista huan xicuica se huendi hual quimaca se pa lachipahuilisli, quinami moijcuiluc ilajtol Moisés. In huendi quinnexilisli in tiopistas pampa axcan tichipahuac.

<sup>15</sup> Ma yoje, ilamachilitisli in lapajtilisli mosemanaya míac huan míac huan mojmosta momiactitihualaloaya in lacames pa quicaquilosquiaya Jesús huan pa yihual quinpajtilisquiaya inmincocolisli.

<sup>16</sup> Huan yihual yahuiaya ihuían capa amaqui chantiaya, yahuiaya pa nepa quilajlanis Dios.

### *Jesús quipajtía se hual amo huil nejnemiaya*

(Mt. 9:1-8; Mr. 2:1-12)

<sup>17</sup> Cataya se tonali yihual lamaxtiaya huan molalijtataloaya nepa sequin hual quineltoaloaya inminlamaxtilisli yehuanten hual itocaloaya fariseos, huan sequin ilamaxtinijmes inminlajtol hual quinextilia quinami quimolancuacuetzililo Dios in judíos. Yehuanten quisajque pa mochi caltilan pin lalticpan Galilea huan pin lalticpan Judea huan pin caltilan hué Jerusalén. Huan in Tata ilahuelilitisli cataya ca yihual pa lapajtisquiaya.

<sup>18</sup> Huan xiquitacan, quihualicatihualaloaya sequin lacames se lalac pan se lapejtzindi. In lalac amo huil moquetzaya, amo huil nejnemiaya. Yehuanten motolinijque pa quihualicalosquiaya pa calijtic pa quilalilosquiaya ilaixpan Jesús.

19 Huan amo quitaloaya quinami quihualicalosquiaya pa calijtic pampa quintzacuililoaya in miac lalalera itenco in cali. Pampín, lejcujuque pani in cali, quixitiniyque ca pani pa quichihuasi se coyunquil pa in tapanco capa quitemuhuijque in lalal lastataya pan in lapejtzindi. Quitemuhuijque lajco capa in lalalera, capa ilaixpan Jesús.

20 Huan yoje quitac Jesús quinami yehuanten quineltocaloaya yihual yahuiaya quipajti in cocoxqui. Pampín quilic:

—Lalal, axcan cate lapujpuhuali molaijlaculisli.

21 Cuaquinon pehualoaya quijtulo laiytic yehuanten in lamaxtinijmes huan in fariseos, quijtuloaya: “Huan ¿aqui in se hual quihuejuecaltitica Dios? Amo unca amaqui hual quipía lahuelilitlisli pan in lalticpan pa quinpujpuhuas lacames inminlaijlaculisli. Jan Dios san, unca iyaxca yihual.”

22 Quimatic Jesús len quijtuloaya pa inminyolo huan quinmilic:

—Anquijutitica laiytic pa anmoyolo pampa nicuejuecaltitica Dios pampa niqulic: “Cate lapujpuhuali molaijlaculisli.”

23 Axan, annimitznextilis len. Huil niqulis pampa cate lapujpuhuali ilaijlaculisli. Noje huil niqulis pa moquetzas huan nejnemis. Sínda moquetzas huan nejnemis anquimatis pampa nicpía lahuelilitlisli.

24 Yojque nehual ilalac in cielo nía annimitznextilía pampa unca noyaxca pan in lalticpan pa niquinpujpuhuilis lacames inminlaijlaculisli, quinami unca iyaxca Dios pa quichías yoje. Huan neli annimitznextilis inon, pampa nía nicpajtía in lalal.

Cuaquín, quimalinac iixco huan quitac in cocoxqui, quilic:

—Nimitzilía, ximoquetza, xicmama molapejtzindi huan xía pa mochan.

25 Jan ajnaxcan moquetzac in lalal inminlaixpan moxtin, quimamac in lapejtzindi capa lastataya, uyac pa ichan quijutitica lajtomes huejué pa Dios.

26 Huan mocahualoaya moizticate ca lamajtilisli moxtin. Pehualoaya quijtulo lajtomes huejué huan neli pa Dios. Pehualoaya momajtilo miac huan quilijtinemiloaya:

—Axan tiquinmitaje lejlen hual amo quiman moitaje pan lalticpan huan techmajtilo innojen.

### *Jesús quinotza Leví (Mt. 9:9-13; Mr. 2:13-17)*

27 Panujque innojen, quisac Jesús huan quitac se motocaya Leví molaij-tataya pin cali capa quilaxlahuiloaya pa ilapixcalisli tomin pa in hueyenten romanos. Huan Jesús quilic:

—Xihuala xichtoca, xiye se nomonextilini ca in oc sequin.

28 Cuaquinon moquetzac Leví, quincahuac mochi, huan yihual uyaje.

29 Huan quichihuilic Leví se lacualisli pa Jesús, quihuicac pa ichan. Noje quihuicac Leví oc sequin miac lacames, cataloaya oc sequin hual canaloaya ilapixcalisli tomin huan oc sequin lacames hual cataloaya ca yehuanten pa in lacualisli.

30 Amo quixtocaloaya inon yehuanten in fariseos huan inminlamaxtinijmes. Pampín yehuanten quinlajlanije imonextilinijmes Jesús, quinmilije:

—¿Leca amhuanten anlacua huan anlauni ca in ilapixcanijmes tomin pa in romanos huan in oc sequin lacames hual amo yulilo cuali?

31 Jesús quinnanquilic:

—Amo monequi pa quitasi se lapajtini yehuanten hual amo cocoxquimes. Yehuanten hual, quema, cate cocoxquimes quipialo pa quitasi se lapajtini.

<sup>32</sup> Huan nehual nihualaya pa niquinnotzas yehuanten hual quimatilo pampa quipialo laijlaculisli. Niquinmilis pa quinpalasi inminyolo pa pehuasi laijnamiquisqui quinami Dios quinequi. Amo nihualaya pa niquinnotzas yehuanten hual quijtulo lajtic inminyolo pampa quipialo inminyolo chipahuac. Yehuanten quijtulo pampa amo quipialo pa quipalasi inminyolo pa pehuasi laijnamiquisi quinami Dios quinequi.

*Quilajlanilo Jesús quinami mosahualo*  
(Mt. 9:14-17; Mr. 2:18-22)

<sup>33</sup> Sequin quilijque:

—Mosahualo míac imonextilinjmes Juan Lacuayatequini huan quilajlanilo Dios. Noje quichihualo yojque yehuanten in fariseos. Huan tehual momonextilinjmes mojmosta lacualo huan launilo, amo quiman mosahualo.

<sup>34</sup> Huan Jesús quinmilic:

—Nomonextilinjmes cate quinami yehuanten hual cate lahuicali pa se lanamictilisli huan nehual niunca quinami hual yahui monamictía. Amo huil anquinmilis pa mosahuasi yehuanten hual quinnotza se pa hualasi pa se lanamictilisli sinda cate ca in lacal hual monamictitica.

<sup>35</sup> Ma yoje, ajsisi in tonalijmes quiman quinquixtilisi yehuanten in se hual monamictitica hual quinnotzac pa hualasi pa in lanamictilisli. Cuaquinon pa in tonalijmes mosahuasi.

<sup>36</sup> Huan quinmilic yehuanten noje se lapuhualisli pa lamaxtisquiaya, se laijnamiquiltisli, quinmilic:

—Amaqui quitzayana se ilajco se nahuas yancuic pa quilalilis pan se tzayanquil pan se nahuas cacaxli. Sinda quichías in, yoje quijlacus in yancuic huan amo cayas iyaxca in lajco yancuic ca in nahuas cacaxli.

<sup>37</sup> Noje amaqui quintemiltía cuilaxlimes cajcacaxli ca iayo uva yancuic. Sinda quichía yoje, iayo uva yancuic quixopunis in cuilaxlimes.

<sup>38</sup> Pampín, quilalilo iayo uva yancuic pin cuilaxlimes yajyancuic. Huan jan yoje nolamaxtilisli amo unca iyaxca ilamaxtilisli in fariseos.

<sup>39</sup> Huan sinda se cunic iayo uva hual axan quipía míac tonalijmes quiman quilalijque pin cuilaxlimes, cuaquín yihual amo quinequi cuni jan ajnaxcan iayo uva yancuic, pampa quijtúa: “Unca cuali in hual axan quipía míac tonalijmes quiman quichihuaque.”

## 6

*Quincapehualo miahuimes pan tonali quiman mosehuilo in judíos*  
(Mt. 12:1-8; Mr. 2:23-28)

<sup>1</sup> Cataya pan se tonali quiman mosehuilo in judíos, panujtiahuiaya Jesús pan se cuajmili capa cataya trigo, huan pehuajque quincapehuajque miahuimes imonextilinjmes, quinxacualujque ca inminmajmajuan pa quisasquiaya in caliyo, cuaquinon quicuaque in trigo.

<sup>2</sup> Sequin fariseos quilijque:

—¿Leca anquichijtica len amo quimacahuiltía tolajtol pa quichías se pan tonalijmes hual timosehuilo?

<sup>3</sup> Huan quinnanquiloc Jesús, quinmilic:

—¿Amo quiman anmomaxtic in hual quichíac David quiman mayanaya, yihual huan moxtin yehuanten hual cataloaya ca yihual?

<sup>4</sup>Yihual calaquic pa itiopan hué Dios, quinmanac in panes hual in tiopistas quinlalilo ilaixpan Dios. Quincuac huan quinmacac yehuanten hual cataloaya ca yihual. Huan tolajtol lamacahuiltía pa quincuasi jan in tiopistas san.

<sup>5</sup>Cuaquinon quinmilic:

—Nehual ilacal in cielo niunca in Tata hual unca noyaxca pa niqijtus len huil quichía se pan in tonali chicome quiman mosehuilo.

*Jesús quipía lahuelilitisli*

(Mt. 12:9-14; Mr. 3:1-6)

<sup>6</sup>Cataya pan oc se tonali chicome quiman mosehuilo in judíos, huan calaquic Jesús pa se tiopan calijtic huan lamaxtiaya. Nepa cataya se lalac ca imajma cuali huaqui.

<sup>7</sup>Huan quinapachijtataloaya in lamaxtinijmes huan fariseos pa quimatilosciaya sinda cuajnesi yahuiaya quipajti Jesús pan in tonali chicome. Yoje quipialosciaya quinami quimotexpahuililosquiaya.

<sup>8</sup>Ma yoje, quimatiaya Jesús len quijtuloaya pa inminyolo, huan quilic in lalac hual quipiaya imajma huaqui, quilic:

—Ximoquetza huan xihuala ximoquetza lajco capa ticate tehuanten.

Huan yojque quichíac in lalac.

<sup>9</sup>Cuaquinon Jesús quinmilic:

—Ma annimitzajlani, ¿len quijtúa tolajtol? ¿Techmacahuiltía pa ticchihuasi len cuali o len amo cuali pan tonali chicome quiman timosehuilo? ¿Techmacahuiltía pa tijquixtisi se pin polehuilisi o pa tijcahuasi pa miquis?

<sup>10</sup>Quinmitac moxtin pa itenco, cuaquín quimalinac iixco ca in lalac hual quiapiaya imajma huaqui, quilic:

—Xicxilani momajma.

Huan quixilanic imajma in lalac huan mocuepac yulic imajma quinami cuali cataya quiman ayamo huaquiaya.

<sup>11</sup>Cuaquín cualaniloaya míac in fariseos huan lamaxtinijmes, pehuajque molajlanijque len huil quichihuililosquiaya Jesús.

*Jesús quinnextilía len quinequi quijtúa in lapuhualisli*

(Mt. 10:1-4; Mr. 3:13-19)

<sup>12</sup>Huan cataya pan innojen tonaliijmes quisac in caltilan Jesús. Uyac pa in loma (tepel) pa quilajlanis Dios, panuc mochi in layúa quilajlantataya Dios.

<sup>13</sup>Quiman lanesc, quinnotzac pa hualalosquiaya ca yihual imonextiliniijmes. Ca yehuanten cataloaya majlaclihuanome (doce) hual quinlajtultic. Yihual noje quintocayaltic ilanahuatinijmes.

<sup>14</sup>Cataya Simón hual noje quitocayaltic Pedro, cataya Andrés, yihual icni Simón, cataloaya Jacobo huan Juan, cataya Felipe, cataya Bartolomé,

<sup>15</sup>cataya Mateo, cataya Tomás, cataya Judás ixolol Alfeo, cataya Simón hual cataya ca innojen hual quinequiloaya molalilo inminpan in romanos, motocaloaya in Zelotes,

<sup>16</sup>cataya Judás ixolol Jacobo, huan cataya Judás Iscariote. Yihual in se hual quitemacac Jesús ca yehuanten hual yahuiloloaya quimictilo.

*Quinmaxtía Jesús niman míac lacames*

(Mt. 4:23-25)

<sup>17</sup>Temuc Jesús ca yehuanten, moquetzac pan se ixlán. Nepa hualaje míac imonextiliniijmes, huan hualaje noje míac yehuanten pa mochi in lalticpan Judea huan Jerusalén huan pin caltilan hué Tiro huan in caltilan hué Sidón hual cataloaya pa itenco in al niman huejcalan.

<sup>18</sup> Hualajque yehuanten pa quicaquillosquiaya Jesús huan pa yihual quin-pajtisquiaya inmincocolisli. Noje quinpajtiaya Jesús yehuanten hual quin-cocoltiloaya noje iyjecames amo cuajcuali.

<sup>19</sup> Huan motoliniloaya moxtin pa quimatocalosquiaya Jesús. Cataya pampa quistataya pa yihual ilahuelilitlisli pa lapajtisquiaya huan yoje pa-tije moxtin hual quimatocaloaya.

*Paquilisli huan icnotilisli*

*(Mt. 5:1-12)*

<sup>20</sup> Huan cajcoquic itzontecon Jesús pa quinmitasquiaya imonextilinjmes, pehuac quinmilic:

—Ma quiapiacan paquilisli yehuanten hual quimatilo pampa monequi niman míac pa canasi len Dios quiplá pa quinmacas. Quema, ma quiapiacan paquilisli, pampa Dios huelitis pa inminyolo.

<sup>21</sup> 'Ma quiapiacan paquilisli yehuanten hual aqui mayanalo pa len Dios quinequi quinmaca. Quema, ma quiapiacan paquilisli, pampa yehuanten pahihuisi.

'Ma quiapiacan paquilisli yehuanten hual chocalo pampa quincocujtica inminyolo de mochi in amo cuali hual quichihualo. Quema, ma quiapiacan paquilisli, pampa Dios quinchihuilisli pa paquisi.

<sup>22</sup> 'Ma quiapiacan paquilisli sinda amo quinmixtocalo in lacames, sinda amo quinmacahuilitlo pa calaquisi pa calijtic inmintiopajmes, sinda quincocolijtialo huan sinda quinhuejuecaltilo. Jo quema, ma quiapiacan paquilisli sinda yehuanten quinchihuililo yoje pampa nechnehtocalo nehual ilácal in cielo.

<sup>23</sup> Ma paquican pa in tonali quiman yoje quinpanus, ma tzicuinan ca paquilisli, pampa pin cielo quiplasi se laxlahuilisli hué. Quema, pampa in-mintajtzitzian yehuanten hual anmijchihuililo yoje quinchihuilinjime yoje Dios ilajtunjimes pa yina.

<sup>24</sup> 'Ma yoje, quichi cocolisli quiplasi pan inminyolo yehuanten hual quij-tulo pampa quiplalo mochi huan pampin amo monequi pa quiplasi in hual Dios quinequi quinmaca. Quema, quichi cocolisli quiplasi pampa axcan pan in lalticpan quiplajque inminlalacahuaitlisli.

<sup>25</sup> 'Huan quichi cocolisli quiplasi pan inminyolo yehuanten hual axcan quijtulo pampa amo unca nindeno hual Dios quiplá pa quinmacas hual monequi pa quiplasi. Jo quema, quichi cocolisli quiplasi pan inminyolo, pampa ajsis se tonali huan quinequi quiplasi len huil quinmaca Dios huan yajmo quinmacas!

'Huan quichi cocolisli pa inminyolo quiplasi yehuanten hual canaló mochi inminpaquilisli ca in hual quiplalo nican pin lalticpan. Jo quema, quichi cocolisli quiplasi. Pampa ajsis se tonali huan quincocus inminyolo, chocasi huan ijyulantitiasi pampa yajmo quiplasi len calica mopactilisli.

<sup>26</sup> 'Huan quichi cocolisli quiplasi pa inminyolo yehuanten hual moxtin laquetzalo cuali pampa quixtocalo in hual quichihualo yehuanten. Unca pampa yoje inmintajtzitzian laquetzaniyme pampa quixtocaniyme in lajtunijmes hual islacatinijme, quijtutataloaya pampa laquezataloaya ilajtomes Dios.

*Ma quilasolja se yihual hual quichihuilía amo cuali*

*(Mt. 5:38-48; 7:12)*

<sup>27</sup> 'Ma yojque, ahuanten hual annehcactica huan annehnehtocatica, annimitzilía xiquinlasojlacan yehuanten hual molalilo anmopan, xiquinchi-huilican cuali yehuanten hual amo anmitzitalo cuali.

<sup>28</sup> Xiquinlaquetzilican cuali yehuanten hual anmitzlaquetzililo amo cuali amhuanten, huan xiclaflanican Dios pa yehuanten hual anmijchihuililo amo cuali.

<sup>29</sup> Sinda se mitztecua pa moixco, xicmalina ca yihual oc se moixco pa mitztecuas oc sejpa. Huan sinda se mitzquixtilía monahuas, amo xictzacuili pa camo mitzquixtilis noje molaquen. Unca cuali pa timopepenialtis in amo cuali hual mijchihuililo yehuanten. Amo unca yojque cuali pa tiquin-cuepilis.

<sup>30</sup> Sinda se mitzmolajlanilis len tehual, xicmaca. Huan sinda se mitzquixtilía len, cuaquín amo xiclaflani sejpa pa mitzcuepilis.

<sup>31</sup> Xiquinchihuilican cuali in lacames quinami anquinequi pa yehuanten anmijchihuilisi cuali.

<sup>32</sup> Sinda anquinnequi yehuanten hual anmitznequilo, Dios amo yahui anmijsehuía pampa inon. Yehuanten hual amo mocahualo pa quichihuasi laijlaculisli jan yoje quinnequilo oc sequin hual noje quinnequilo yehuanten.

<sup>33</sup> Huan sinda anquichihuilía cuali san innojen hual aqui anmijchihuililo cuali, cuaquín ¿anquijtúa pampa yahui anmijsehuía Dios pampa inon? Xiquitacan. Yehuanten hual itequi quichihualo laijlaculisli quinchihuililo cuali innojen hual aqui quinchihuililo cuali yehuanten.

<sup>34</sup> Huan sinda anquinlanehuía anmotomin anquichixtica pampa yehuanten yalo anmitzcuepillo anmotomin, yoje amo yahui anmijsehuía Dios pampa inon. Jan yoje quichihualo yehuanten hual yulilo quichijiticate laijlaculisli. Quilanehuilo oc sequin quichixticate pa yehuanten quincuepilis inmintomin.

<sup>35</sup> Yoje, xiquinnequican yehuanten hual molalilo anmopan, xiquinchihuilican cuali huan xilalanehuican, amo xicchiacan lacuepilisli nindeno. Yoje Dios anmitzcuepilis miac huan anyes ixolomes Dios hual chanti niman pa pani pin cielo. Yihual quinchihuilía cuali yehuanten hual amo cuali huan yehuanten hual amo quisehuilo.

<sup>36</sup> Xilaicnilican quinami anmoTajtzin pin cielo laicnilía.

### *Amo xitenehuacan oc sequin*

*(Mt. 7:1-5)*

<sup>37</sup> Amo xiejsehuican pa anquinmotexpahuilis laijlaculisli oc sequin huan amo quinami anmitzmotexpahuilis laijlaculisli Dios. Xicpujpuhuacan in amo cuali hual oc sequin quichihualo, huan Dios anmitzpujpuhuilis in amo cuali hual anquichía.

<sup>38</sup> Xitemacacan huan Dios anmitzmacas, anmitzlamachihuilijtica ca ilamachihualisli iyaxca hual unca niman miac, amo quinami inminlamachihualisli lacames. Jo quema, Dios quilamachihuilía anmitztemilijtica huan anmijzejzeluilijtica huan anmitzpachihuiltitica, huan cuaquín anmitztemiltilis pa xinis pa in lali. Pampín, quinami amhuanten anlalamachihuilía, yoje Dios anmitzlamachihuilis.

<sup>39</sup> Cuaquilon quinmilic se laijnamiquiltisli calica quinmaxtiaya, quinmilic:

—Se pachacal amo huil quilaicana oc se pachacal. Huetzilosquiaya in omenten pa je lali lacomultic.

<sup>40</sup> Imonextilini se amo ajsis yes hué sinda ilamaxtini amo unca jan yojque hué. Laquisa monextilía in monextilini mochi len quimaxtía ilamaxtini, cuaquilon in monextilini yes jan quinami ilamaxtini san.

<sup>41</sup> ¿Leca tiquita mocni ilaijlaculisli tipichin huan amo tiquita tehual molaijlaculisli hué? Unca quinami tiquiztica se bagazo tipichichito pa iixtololon mocni, huan ma yoje amo timoitilia in cuahuil hual unca pa tehual moixtololon.

<sup>42</sup> ¿Quinami huil tehual tiqulis mocni: “Nito”, tiqulis, “ma nimitzquixtili in bagacito moixtololon”? Huan jamo tiquita in cuahuil hual unca pa moixtololon tehual! ¡Timochijtica quinami se niman cuali huan mocni amo yojque cuali quinami tel! ¡Lacuaajcuamanani! Xipehua timoquixtilijtica in cuahuil hual ticpia pa moixtololon tehual. Cuaquinon tilachias cuali pa tijquixtilis in bagacito mocni iixtololon.

*Quimatilo se cuahuil pan ipampa ilaquilyo*  
(Mt. 7:17-20; 12:34-35)

<sup>43</sup> 'Amo unca se cuahuil cuali hual quimati laqui ca laquilyo hual amo huil quicualo. Huan se cuahuil amo cuali hual amo monotza amo temaca laquilyo cuali.

<sup>44</sup> Ticmatilo se cuahuil huan oc se cuahuil pan ipampa ilaquilyo iyaxca. Amo huil canililo se ajual ilaquilyo se amacaujtzindi. Huan amo quinmanililo uvas se huitzcuaajtzindi.

<sup>45</sup> Yoje quichia len cuali se lalac cuali pampa iyolo cuali unca, huan amo quichia len cuali se lalac amo cuali pampa quipia iyolo amo cuali. Quinami lajtua se lalac lajitic pa iyolo, yojque lajtus ca icamac.

*In ome lalastili*  
(Mt. 7:24-27)

<sup>46</sup> 'Huan ¿leca annechnotza “Tata, Tata”, huan ma yoje amo anquinchia innojen hual annimitzilía?

<sup>47</sup> Annimitzilía quinami unca se lalac hual ca nehual hualas huan quichias len niqulis.

<sup>48</sup> Unca quinami se lalac hual quichihuaya se cali. Lahuajuana lajitic huejcalan. Huan quiman cajsic in xaltel, nepa pehua quilalia in tixcalimes pa quietzas icali. Huejcalantiac in atenco hué huan quihuitequia in al pan in cali. Ma yojque amo huil quiculinia in cali pampa in lalac quichiac pani in xaltel.

<sup>49</sup> Huan sinda nechcaqui se huan amo quichia quinami niquilía, cuaquin yihual unca quinami se lalac hual quichihuaya icali pan in lali, amo quitotcic in cali. Huejcalantiac in atenco hué, quihuitequic in al pan in cali, huan jan ajnaxcan quimayajtiquisac, mocahuac laxitinili mochi.

## 7

*Jesús quipajtia itequipanujquil se lalac romano*  
(Mt. 8:5-13)

<sup>1</sup> Cuaquinon, quiman laquisac quinnotzac yehuanten ca mochi in lajtomes pa quicaquilosquiaya, uyac Jesús pa in caltilan Capernaúm.

<sup>2</sup> Huan cataya se inminlaicanani guaches, yec romano. Quipiaya in laicanani se itequipanujquil niman cocoxqui, yahuiaya miqui. Huan in laicanani quinequiaya mic itequipanujquil.

<sup>3</sup> Quimatic in laicanani quinami Jesús huil tepajtiaya, quintilanic sequin inminhueyenten in judíos pa yasi quinahuatisi Jesús pa hualas quipajtis itequipanujquil in laicanani.

<sup>4</sup> Ajsijque in hueyenten capa cataya Jesús, pehualoaya quitemachilo ca mic lasojlalisi, quilijque:

<sup>5</sup>—Monequi pa ticpalehuis in laicanani pampa yihual technequi tehuanten in judíos huan techlaxlahuilic totiopan.

<sup>6</sup> Cuaquín uyac Jesús ca yehuanten. Ma yoje, amo cataya Jesús huejca pa ichan in laicanani huan quinamiquijque sequin hual cataloaya ca in laicanani, quintilanic in laicanani pa quinahuatilosquiaya Jesús, huan ca ilajtomes in laicanani quilijque:

—Tata, amo ximomaca tequil pa tihualas pa nochan pampa amo nimonotza pa ticalaquis nocali.

<sup>7</sup> Pampín niqijituc amo cataya noyaxca pa nihualas ca tehual pa nimitzlanlanis pa tinechpalehuis. Jan xiquijtu se lajtol san huan pajtis notequipanujquil.

<sup>8</sup> Nicmati yihual pajtis pan ipampa molajtol, pampa nehual nicpía pa nicneltocas nolaicanani ilajtol. Noje niquinpía guaches hual quipialo pa nechneltocasi. Niquilía in se “¡Xía!” huan yahui, niquilía oc se “¡Xihuala!” huan huala. Niquilía notequipanujquil “¡Xicchía inon!” huan quichía. Huan sinda yehuanten nechneltocalo pampa niquinmilía inon, cuaquín ¡quinami amo yahui pajtía notequipanujquil pan ipampa molajtol tehual!

<sup>9</sup> Quicaquic Jesús inon, lajtuaaya pa iyolo pampa quineltoaya chicahuac in laicanani mas que amo yec judío. Cuaquín, momalinac capa yehuanten hual quitocatihuiloya, quinmilic:

—Annimitzilía inon. Ayamo niquitac ca amhuanten israelitos jan se hual laneltoca yojque chicahuac quinami laneltoca in laicanani romano.

<sup>10</sup> Cuaquín, mocuepajque yehuanten hual quintilanic ca Jesús in laicanani. Ajsijque pa ichan, quitajque pajtic in tequipanujquil.

### *Jesús quiyuliltía ixolol se sihual ihuían*

<sup>11</sup> Panuc inon, yahuiaya Jesús pa se caltilan tipichin itoca Naín, quitocaloaya imonextiliniymes huan míac lalacera.

<sup>12</sup> Ajsic capa calaquilo pin caltilan, quitac se mijquil, quihuicatihuiloya pa quilalpachulosquiaya. Se sihual ihuían yec inantzin in mijquil, huan yihual yec ja in se xolol san hual quiapiaya. Ca in sihual cataloaya míac hual chantiloaya pa in caltilan.

<sup>13</sup> Quitaya in sihual, in Tata Jesús quiapiaya laicnililisli pa yihual, quilic:

—Amo xichoca.

<sup>14</sup> Ajsic Jesús capa cataya ilacomultic in mijquil, quimatocac, huan moquetzaje yehuanten hual quimamaloaya. Cuaquinon Jesús quilic in mijquil:

—Oquixli, nimitzilía ximoquetza.

<sup>15</sup> Cuaquinon moquetzac molalic in hual miquic, axcan yuliaya oc sejpa, pehuac lajtuc. Huan Jesús quitemacac inantzin yihual hual cataya mijquil.

<sup>16</sup> Huan momajtijque moxtin huan pehualoaya quijtulo lajtomes huejué pa Dios, quililoaya:

—Axcan nescic ca tehuanten se ilajtuni hué Dios.

Noje quijtuloaya:

—Axcan hualac Dios techpaxaluilic tehuanten hual techlajtultic.

<sup>17</sup> Huan quimatijque quinami panuc inon yehuanten pa mochi in lali Judea. Huan pa mochi in lali itejtenco Judea quimatijque len quichihuac Jesús.

*Quintilanía Juan Lacuayatequini sequin imonextiliniymes ca Jesús (Mt. 11:2-19)*



18 Huan Juan Lacuayatequini imonextiliniymes quimachiltijque Juan mochi inon. Pampín quinnotzac Juan ome imonextiliniymes, quintilanic ca in Tata Jesús.

19 Quintilanic pa quilajlanilosquiaya:

—¿Tehual tiunca in se hual Dios quiytuc yahuiaya techtilanili? O ¿ticchiasi oc se?

20 Yojque hualajque capa Jesús in lacames imonextiliniymes Juan huan quilije:

—Techtilanic Juan Lacuayatequini ca tehual pa timitzlajlanisi sinda tel tiunca in se hual Dios quiytuc yahuiaya huala pin lalticpan. ¿Tiuca tehual o ticchiasi oc se?

21 Huan pa in nadita hual nepa cataloaya in omenten hual Juan quintilanic, quitajque Jesús tepajtic. Quinpajtic míac cocoxquimes hual quinpialoaya míac cocolisli. Quinpajtic míac hual quincocoltiloaya ijyecames amo cuajcuali lajtuc yehuanten, huan quinclachialtic míac pachacames.

22 Cuaquinon Jesús quinnanquiloc in omenten imonextiliniymes Juan, quinmilic:

—Xiaca xicmachiltican Juan in hual anquitac huan in hual anquicaquic: Lachialo in pachacames, nejnemilo yehuanten hual amo huil nejneminijme. Pajtilo cuali yehuanten hual quipialo in cocolisli lepra. Lacaquilo hual cataloaya panatas. Yulticate oc seppa in mijquimes. Huan quicacicate nola machiltisli cuali yehuanten hual quimatilo pampa monequi pa quipiasilapalehuilisli Dios.

23 Quipías paquilisli aqui hual quilalía ilaneltocalisli ca nehual.

24 Yojque uyaje in omenten pa quinahuatilosquiaya Juan inon hual Jesús quinmilic. Cuaquinon inminyampa in míac lacames pehuaya Jesús quinlaquetzili quinami Juan quichijchihuiloc Jesús iojli, quinmilic:

—Nepa in tonalijmes anquisani ca capic amaqui chantiaya. ¿Aqui anquijtuni pampa anyahuiaya anquita? ¿Anquisani pa anquitasquiaya se lalac hual momajtic quiytuc len Dios quinequiaya pa quiytusquiaya, se lalac hual quiytuc len quinequiloaya lacames? No, Juan amo quinami inon, yihual amo quinami se acal hual in ijyecal quiculinía.

25 Cuaquín ¿len anquisani anquita? ¿Anquisani pa anquitasquiaya se lalac lalaquentili ca tzotzomajli cualtichin? Xiquitacan. Yehuanten hual molaquentilo ca tzotzomajli cualtichin cate capa chantilo in huejueyenten huan in huejueyenten quinchihuililo cuali huan quipialo míac hual cuajcuali. Juan amo quinami inon.

26 Cuaquinon ¿len anquisani anquita? ¿Anquisani pa anquitasquiaya se ilajtuni Dios? Jo quema, annimitzilía. Huan yihual amo yec jan se ilajtuni Dios san.

27 Unca pampa yoje unca lajcuiluli in hual Dios quiytuc pampa yihual Juan yahuiaya nejchihuilía, quil:

Xiquita, nimitzlaicanaltilía nolanahuatini pa yihual mijchijchihuilis mo'ojli moixpan,

pa mitziximatisqui yehuanten hual niquinlajtultic.

28 Annimitzilía inon. Ca moxtin lacames hual quinclacaltitije lacames huan sihuames, amo unca se hual ajsic yec hué quinami Juan Lacuayatequini unca hué. Ma yoje, yihual Juan amo niman hué quinami unca hué in niman tipichin hual unca ca yehuanten hual cate capa Dios huelitía.

<sup>29</sup> Huan pa innojen tonalijmes quiman moxtin quicaquiloaya Juan, jo quema, quicaquiloaya in yehuanten hual quipixcalo tomin pa yehuanten hual huelitilo, cuaquin yehuanten quimacahuiltijque pa quincuayatequis Juan. Quipalajque inminyolo pa laijnamiquilosquiaya quinami Dios quinequi. Yoje lanextilijque pampa Dios quinchihuilía seje jan yoje quinami quinchihuilía in oc sequin. Huan yehuanten quineltoajque Juan ilamaxtilisli.

<sup>30</sup> Ma yoje, in fariseos huan yehuanten hual quimaxtilo in lajtol amo quimacahuiltijque pa quincuayatequis Juan. Yoje lanextilijque pampa amo quineltoajque Dios. Quichihuiltijque pa camo quinpalehuitsquiaya ilajtol Dios, amo quipalajque inminyolo pa laijnamiquilosquiaya quinami Dios quinequi.

<sup>31</sup> Jesús quilic:

—¿Quinami cate yehuanten hual yulticate axan?

<sup>32</sup> Lachihualo quinami xolomes hual molalilo pa mahuiltisi. Quintzajtzilijticate yehuanten hual mahuiltilo ca yehuanten, quinmilitjicate: “Ticnequiloaya timahuiltilo quinami quiman monamictilo. Antimijtztotzonilije huan amo anmijtotic. Cuaquin ticnequiloaya timahuiltilo quinami quilalpachulo se mijquil, tizajtziye quinami techcocujtataya toyolo huan amo anchocac.”

<sup>33</sup> Yehuanten hual yulticate axan cate quinami in xolomes pampa amo quimatilo len quinequilo. Amo quixtocalo len yes hual Dios quinequi quinmaca. Juan amo lacuani huan amo cunini iayo uva coc quinami amhuanten anlacualo huan ancuni huan anquijtuni: “Yihual quipía se ijyecal amo cuali.”

<sup>34</sup> Huan nehual ilacal in cielo, nel niunca nican, nilacua huan nilauni quinami moxtin, huan anquijtúa: “Xiquitacan. Nepa unca se lacuani, unca se launini. Quinequi pa cayasi ca yihual yehuanten hual quipixcalo tomin pa yehuanten hual huelitilo. Quinequi pa cayasi ca yihual yehuanten hual laijlaculi.”

<sup>35</sup> Ma yoje —quinmilic Jesús —, moxtin hual quimatilo, yehuanten quimatilo ilajmatilisli Dios, in hual tiquinlaquetzililo yehuanten Juan huan nehual. Yehuanten quineltoacalo huan quilasojlalo in lajmatilisli.

### *Simón in fariseo quihuica Jesús pa ichan*

<sup>36</sup> Huan cataya se fariseo quihuicac Jesús pa ichan pa lacuas ca yihual. Calaquic Jesús icali in fariseo, molalic pa in lacualisli.

<sup>37</sup> Cataya se sihual yuliaya pin caltilan, se sihual laijlaculi. Yihual quimatic pampa lacuaya Jesús pa ichan in fariseo. Huan in sihual quihualicac se tapalquita lachijchihuali ca tixcali itoca alabastro. In tapalquita cataya tentica ca len hual ajuíac, itoca mirra.

<sup>38</sup> Huan in sihual ajsic moquetzac pa icxihuaajmes Jesús, chocaya huan ixicac ichoquis pani icxihuaajmes Jesús, pehuac quinpaltilic icxihuaajmes. Cuaquin in sihual quinhuactic icxihuaajmes Jesús ca itzondi, huan pehuaya quintenamiqi icxihuaajmes, quinxahuiliaya ca in mirra.

<sup>39</sup> Quitac inon in fariseo hual quihuicac Jesús pa ichan, huan quijtuc laijtuc yihual, moilic: “Sinda in se yec se ilajtuni Dios, yoje quimatiaya aquí unca in sihual hual quimatocica. Quimatiaya quinami yihual unca, yihual se sihual laijlaculi.”

<sup>40</sup> Huan Jesús quilic in fariseo:

—Simón —quilic—, nicpía len pa nimitzilis.

Huan Simón quilic:

—Xichili, Lamaxtini.

<sup>41</sup> Jesús quilic:

—Cataloaya ome lacames quihuiquililoaya tomin se telanehuini. Se quihuiquiliaya quinientos denarios tomin, in oc se quihuiquiliaya cincuenta.

<sup>42</sup> Pampa amo quipiaje in omenten nindeno calica quilaxlahuilosquiaya in telanehuini quinpuphuac pa camo quipialosquiaya pa quilaxlahuilosquiaya in tomin hual quihuiquililoaya. ¿Calía in omenten tehuiquilinijmes tiqijitúa yahuiaya quilasoja niman míac in telanehuini huan calía amo yoje míac?

<sup>43</sup> In fariseo quinanquilic:

—Niqijitúa in se hual quipuphuac hual quihuiquiliaya in míac tomin, yihual yahuiaya quilasoja niman míac.

Jesús quinanquilic:

—Tilananquilic cuali.

<sup>44</sup> Cuaquinon momalinac Jesús ca in sihual huan quilic Simón:

—¿Tiquita in sihual, Simón? Nicalaquic mochan huan tehual amo tichmacac al pa niqinpacasquiaya nocxihuaimes. Huan yihual nechpaltilic nocxihuaimes cá ichoquis iixtololojmes huan quinquactic ca itzondi.

<sup>45</sup> Amo tichtenamiquic pa tichpialtisquiaya, huan yihual quiman calaquic pehuaya quintenamiqui nocxihuaimes huan amo mocahuac quichíac.

<sup>46</sup> Amo tijxahuilic notzontecon ca chahuac, huan yihual quinxahuilía nocxihuaimes ca mirra.

<sup>47</sup> Pampín nimitzilía, Dios quipuphua ilaijlaculisli hual unca míac. Quipuphua pampa yihual nechlasojlac míac. Yihual hual Dios quipuphua hual amo quipía míac laijlaculisli, yihual quilasoja Dios jan nadita san.

<sup>48</sup> Cuaquinon Jesús quilic in sihual, quilic:

—Nicipupúa molaijlaculisli.

<sup>49</sup> Cuaquinon pehualoaya moililo lajitic inminyolo yehuanten hual cataloaya pa in lacualisli ca yihual, moilije: “¿Aqui inon hual quijitúa unca iyaxca pa quipuphuas laijlaculisli?”

<sup>50</sup> Jesús quilic in sihual:

—Tiunca laquixtili pin ipolehuilisli molaijlaculisli pampa tilaneltocac. Ximohuica cuali, xicmati pampa Dios mijchihuilic cuali.

## 8

### *Sihuames hual quipalehuiloaya Jesús*

<sup>1</sup> Panuc inon, cantiahuiaya ojli Jesús pa se caltilan huan pa oc se caltilan huan pa se calería pa yasquiaya pa oc se calería. Lanahuatijtinemiaya ca Dios ilanhuatilisli, quinlamachilitinemiaya moxtin ilamachilitilisli cuali hual unca quinami Dios huelitía. Uyaje ca yihual in doce imonextilinijmes

<sup>2</sup> huan sequin sihuames. In sihuames Jesús quinpajtilic inminocolisli huan quinquixtilic ijyecames amo cuajcuali. Cataya María hual yulini pa in caltilan Magdala, quisaje pa yihual chicome ijyecames amo cuajcuali.

<sup>3</sup> Noje cataya ca yehuanten Juana isihua Chuzá. In Chuzá yec se itequipanujquil hué in hué Herodes. Noje cataya Susana huan cataloaya míac oc sequin sihuames. In sihuames quinpalehuiloaya moxtin ca inmintomin huan ca in hual quicuaje.

*Ilainnamiquiltisli in latocani*  
(Mt. 13:1-9; Mr. 4:1-9)

<sup>4</sup> Huan monechiculoaya míac, quistihualaloaya pa mochi caltilan ca capic yihual cataya. Huan yihual quinlaquetzilic ca se lapuhualisli quinami laijnamiqutilisli pa quinmaxtisqueiaya, quinmilic:

<sup>5</sup> —Quisac se latocani pa quitocasquiaya ilatocli. Quixintiahuiaya, sequin latocli huetzije pa itenco in ojlitto huan cataloaya latelicsali huan in tutomes quincuaaje.

<sup>6</sup> Huetziaya oc sequin latocli pan in xaltel, ixuaje in latocli huan jan ajnaxcan pilinije pampa amo cataya lapaltijcal.

<sup>7</sup> Huetzije oc sequin latocli lajco pin huiztilan, moscaltiloaya in huizli capa ixualoaya in ipacholimes in latocli huan in pacholimes mosaluje pin huiztilan huan miqijje.

<sup>8</sup> Huetzije oc sequin latocli pan lali cuali huan moscaltije huan temacaje míac laquilyo, cien pa se latocli hual quixinic in latocani.

Lamic quinmilic Jesús in laijnamiqutilisli, quintzajtzilic:

—Aqui yes hual quinpía inacajmes pa lacaquis, ma lacaqui pampa etic pa quimatis se len quinequi quijtúa.

*¿Leca quinmilía innojen laijnamiqutilisli?*

*(Mt. 13:10-17; Mr. 4:10-12)*

<sup>9</sup> Cuaquinon pehuaje quilajlanije imonextilinjmes len quinequiaya quijtu in laijnamiqutilisli, in lapuhualisli calica yihual quinmaxtiaya, cataya lamaxtilisli lalatili.

<sup>10</sup> Huan Jesús quinmilic:

—Amhuanten anmitzmacahuilía Dios pa anquimatis innojen lajtomes hual anmitznextilía quinami yihual huelitía, innojen hual jan tehuanten ticmatilo san. Huan in oc sequin niquinlaquetzilía ilajtol Dios ca laijnamiqutilisli ca lamaxtilisli lalatili. Yoje, mas que quizticate, Dios quinchihuilía pa camo quitasi len quinequi quijtúa. Noje, mas que quicacticate, Dios quinchihuilía pa camo ajsisi quimatisi len quinequi quijtúa.

*Jesús quinmilía len quinequi quijtúa in laijnamiqutilisli*

*(Mt. 13:18-23; Mr. 4:13-20)*

<sup>11</sup> Inon unca hual quinequi quijtúa in laijnamiqutilisli:

<sup>12</sup> In latocli unca ilajtol Dios. In latocli pa itenco in ojlitto cate quinami aquinojen hual quicaquilo ilajtol Dios, cuaquin huala in lili, quinquixtilía in lajtol pa laijtic inminyolo capa ayamo quineltoaje. In lili quichíac inon pa camo yelosquiaya laquixtili pin ipolehuilisli inminlaijlaculisli sinda quinequiloaya quineltoalo.

<sup>13</sup> In latocli pin lali amo telahuac pan ipampa in xaltel cate quinami yehuanten hual quicaquilo ilajtol huan quineltoalo ca paquilisli. Ma yoje, amo quilalilo in lajtol pa inminyolo quinami se ilalhuayol se cuahuil. Quineltoalo san se nadita, huan sinda quipialo pa panusi lacocoltilisli pampa quineltoalo in lajtol, cuaquinon mijcuanilo, yajmo quixtoalo in lajtol.

<sup>14</sup> In latocli hual huetzije pin huiztilan, yehuanten cate quinami lacames hual quicaquije in lajtol huan quijnamiquilo niman míac in quinami yalo yulilo ca paquilisli. Yoje ca yehuanten ilajtol Dios amo moscaltía pa inminyolo, unca quinami se pacholi tzinlalajquil hual moscaltía pin lali, amo quiman yucsi.

<sup>15</sup> Huan in latocli hual huetzije pin lali cuali, yehuanten cate quinami lacames hual quicaquilo ilajtol Dios huan monextililo cuali pa camo quilcahuasi. Huan in lajtol quinchihuilía pa quichijtiasi len cuali, amo siahuilo pa yulisi quichijticate yoje.

*Ilanextilisli in tapalquita calica lahuilo*

(Mr. 4:21-25)

<sup>16</sup> Huan amaqui quitzacua se tapalquita calica lahuilo ca oc se tapalcal sinda quilalaltía. Huan amo quilalía itzindan se lapexli. Quema, quilalía capa mocahuas nestica pa quinlahuis yehuanten hual calacticate pin cali.

<sup>17</sup> Annimitzilía inon pampa amo unca nindeno laltili hual amo yes laitali. Jo quema, mochi hual amo quimatilo, inon quimatisi se tonali.

<sup>18</sup> Pampín xilaiztiacan quinami annechaqui, xichaquican cuali. Sinda annechaqui cuali, anmonextilis niman míac in hual unca pa ilajtol Dios. Huan sinda amo annechaqui cuali, Dios anmitzquixtilis in hual anquijtúa pampa anmonextilic pan ipampa ilajtol.

*Inantzin huan icnían Jesús*

(Mt. 12:46-50; Mr. 3:31-35)

<sup>19</sup> Cuaquinon hualaje inantzin huan icnían Jesús ca yihual, huan amo huil ajsije capa yihual pampa cataloaya míac hual quiyahualuloaya Jesús.

<sup>20</sup> Pampín quilamachiltijque Jesús, quilijque:

—Moqezticate pa quiahuac monantzin huan mocnían quinecticate mitz-italo.

<sup>21</sup> Huan yihual quinnanquilic yehuanten, quinmilic:

—Nonantzin huan nocnían cate yehuanten hual quicaquilo ilajtol Dios huan quichihualo in hual quijtúa.

*Jesús quisehuía in ijyecal huan in al huejcalan*

(Mt. 8:23-27; Mr. 4:35-41)

<sup>22</sup> Cataya pan se tonali quiman panuloaya mochi innojen, calaquiaaya Jesús pa lajco in al huejcalan ca se barquito. Huan imonextiliniymes cataloaya ca yihual. Yihual quinmilic:

—Ma ticpanahuican in al huejcalan ca yoje itenco (pa analco).

Yoje quipanajtiaje.

<sup>23</sup> Huan uyajtiaje ca in barquito, cochic Jesús. Cuaquín quinmajsic se ijyecal chicahuac lajco capa yahuloaya pin al huejcalan. Pehuaya calaqui al pin barquito, pejtiahuiaya temi huan ca nadita yahuiaya moatocli.

<sup>24</sup> Quejxiltitiquisajque Jesús, quitzajtzilijtataloaya:

—¡Lamaxtini, Lamaxtini! ¡Tipolehuisi!

Ejsac Jesús, cajuac in ijyecal huan in al hual majcoctataya, yojque mosehuic, mocahuac jan sepa in al huejcalan.

<sup>25</sup> Cuaquinon Jesús quinmilic:

—¿Leca anmomajtic? ¿Leca amo anquimati anquilalía anmolaneltocalisli ca nehual?

Cuaquín momajtiloaya yehuanten, amo huil mocahualoaya pa quijtu-losquiaya pa inminyolo pampa quiapiaya Jesús lahuelilitisli hué. Huan moililoaya se ca oc se:

—¿Len yes in lalcal? Yihual quinmajua in ijyecal huan in al, huan quinel-tocalo.

*In lalcal hual quiapiaya in ijyecal amo cuali*

(Mt. 8:28-34; Mr. 5:1-20)

<sup>26</sup> Cuaquinon ajsijque pa yoje itenco (analco) in al huejcalan. Nepa cataya inminlali in laticames gerasatecos. Nepa pa itenco in al huejcalan huil moitaya in laticpan Galilea ca yoje itenco (analco) umpa capa hualajque.

<sup>27</sup> Quisac Jesús pin barquito pan itenco in al. Cuaquinon quinamiquic se lalcal hual yulini pin caltilan, quinpiaya ijyecames amo cuajcuali. Quiapiaya míac xixihuil amo molaquentiaya ca inahuas, huan amo quinequiaya chanti

pa se cali. Chantiaya pin cuevas (ostumes) hual quinchihuaque pa lajlajtic. Nepa quinlalilosquiaya inminmijquimes.

<sup>28</sup> Huan jan axcan yihual quitac Jesús, quitzajtzilic, huetzic quimolan-cuacuetzilijtataya, huan ca lajfol chicahuac quilic:

—¡Xiquisa huan xichcahua, Jesús, t'heual t'ixolol in Dios hual chanti niman pa pani pin cielo! ¡Nimitzilía ca noyolo, amo xichcocolti!

<sup>29</sup> Tzajtzic yoje in iyjecal amo cuali, pampa Jesús quinmiliaya in iyjecalera pa quisalosquiaya ilajitic in lalac. Quimpiaya míac xixihuimes in iyjecal pehuac quiquitzquic chicahuac in lalac. Lacames quilpililoaya imajmajuan huan icxihuajmes ca teposli, yojque quipialoaya. Ma yoje, yihual quincotonaya in teposli huan in iyjecal amo cuali quilaluxtiaya ca capic amaqui chantiaya.

<sup>30</sup> Huan Jesús quilajlanic:

—¿Quinami timotoca?

Huan in iyjecal quinanjilic:

—Nimotoca Legión.

Legión quinequi quiqtúa míac, pampa calaquijque míac iyjecames amo cuajcuali pa lajitic in lalac.

<sup>31</sup> Huan innojen iyjecames pehuaje quitemachijque Jesús ca mochi inminyolo pa camo quintilanisquiaya pa capa Dios yahui quintzacua, capa amo quiman huil quisalosquiaya.

<sup>32</sup> Huan nepa cataya niman míac coyamimes (cuchis), lacuajtaloaya pan in loma (tepel). In iyjecames quitemachijque Jesús pa quinmacahuiltisquiaya calaquilo ca lajitic innojen coyamimes.

<sup>33</sup> Yojque quinmacahuiltic. Cuaquin quisajque in iyjecames pin lalac, calaquijque ca lajitic innojen coyamimes. Molalujtiquisajque in coyamimes pa iixlán in loma pa temuán (temuayan), molasajque pa in al huejcalan huan moactijque.

<sup>34</sup> Quitajque len panuc yehuanten hual quinmiztaloaya in coyamimes. Pampín cholujque huan quilamachiltijque pin caltilan huan pin calerías itenco in caltilan inon hual panuc.

<sup>35</sup> Cuaquinon quisajque yehuanten pa quitalosquiaya len panuc, hualajque capa cataya Jesús huan in lalac huan nepa quitaje molalijtataya in lalac. Axcan quisajque pa yihual in iyjecames, axcan cataya lalaquentili ca inahuas. Yajmo tzajtzitinemiaya quinami se hual amo quijnamiquí, huan yajmo cualantinemiaya, nepa cataya molalijtataya pa icxihuajmes Jesús. Pampín momajtiloaya in lacames.

<sup>36</sup> Huan yehuanten hual quitajque len panuc quinlamachiltijque quinami cataya lapajtili in lalac hual in iyjecames quiquitzquinijme.

<sup>37</sup> Cuaquinon moxtin yehuanten pa inminlali in gerasatecos quitemachijque Jesús pa mohuicasquiaya quistataya pa inminlali yehuanten, pampa momajtiloaya. Yojque uyac pa calaquisquiaya Jesús pin barquito pa mocuepas.

<sup>38</sup> Huan in lalac hual capa yihual quisajque in iyjecames quitemachic Jesús pa quimacahuiltis pa cayasquiaya ca yihual. Ma yoje, Jesús quitlanic pa yasquiaya, quilic:

<sup>39</sup> —Ximocuepa pa mochan huan xiquinpuhuili mochi hual mijchihuilic Dios.

Huan yihual mohuicaya pa mochi caltilan lamachiltitinemiaya mochi hual quichihuilic Jesús.

*Jesús quipajtia se sihual huan quiyuliltia ixól sihual Jairo*  
(Mt. 9:18-26; Mr. 5:21-43)

40 Cuaquinon Jesús mocuepac pa yoje itenco (analco) in al huejcalan pin lalticpan Galilea. Nepa quinamiqijque míac lalacera, pampa moxtin quichialoaya.

41 Huan umpa, xiquitacan, hualac se lalac itocaya Jairo, yihual yec se ihué in tiopan. Yihual molasac ilaixpan Jesús pa icxihuajmes, quitemachiaya pa yasquiaya pa ichan.

42 Quipiaya se xolol sihual, quil, quinpiaya majlaclihuanome (doce) xixihuil, huan yahuiaya polehui, quil, huan in Jairo amo quiapiaya oc se xolol. Huan yahuiloyaya in míac lalacera cajsitiahuiloyaya inahuac Jesús.

43 Yahuiaya ca yehuanten se sihual hual quinpiaya doce xixihuil pehuaya quicocu se cocolisli hual iesli quisaya. Quinlaxlahuiaya seppa huan oc seppa in lapajtinijmes huan axan yajmo quicahuilic se tomin. Amo huil quipajtijque in lapajtinijmes, amo jan se ca yehuanten.

44 Yoje ajsic pa Jesús itepotzcon, quimatocac itenco inahuas. Huan jan ajnaxcan mocahuac iesli in sihual, yajmo quisaya.

45 Cuaquinon Jesús quijtuc:

—¿Aqui nechmatocac?

Quilijque moxtin pampa no, amo quimatocajque. Huan Pedro quilic:

—Lamaxtini, mitzajsitalo monahuac in lalacera, yehuanten mijchihuic.

¿Leca tilajlanía: “Aqui nechmatocac”?

46 Jesús quilic:

—Nechmatocac se. Nicmati inon, pampa quisac pa nehual nolahuiltilisli calica nitepajtia.

47 Yoique quimatic in sihual amo huil quimolatic Jesús. Yuyucatihualac, huetzic ilaixpan, quilamachiltic Jesús inminlaixpan moxtin leca yihual quimatocac huan quilic quinami pajtic jan ajnaxcan.

48 Cuaquin Jesús quilic:

—Nito, tipajtic pampa tilaneltocac. Ximohuica, xicaya jan cuali ca Dios.

49 Ayamo laquisac lajtuc Jesús huan hualac se hual cataya pa icali Jairo, quilic:

—Axcan polehuic moxolol sihual. Yajmo xicmaca tequil in lamaxtini.

50 Ma yoje, inon quicaquic Jesús, huan quilic:

—Amo ximomajti, Jairo, jan xilaneltoaca san, huan moxolol yes lapajtili.

51 Cuaquinon uyac pa ichan Jairo, huan amo quimacahuilic pa calaquilosquiaya ca yihual oc sequin, jan Pedro huan Juan huan Jacobo huan itajtzin in xolol sihual huan inantzin san.

52 Chocaloaya huan tzajtziloaya moxtin, motecuiloyaya inminlaixpan itzindan in huajcol pampa polehuic in xolol, quincocuhuya inminyolo. Ma yoje, Jesús quinmilic:

53 —Amo xichocacan. Amo polehuic in xól, jan coxtica san.

Yehuanten quihuitzquilijque Jesús pampa quimatiloaya in xolol yajmo yultataya.

54 Ma yoje, Jesús quinquitzquic imajmajuan in xolol, quilic ca lajtol chicahuac:

—Muachita, ximoquetza.

55 Jan ajnaxcan mocuepac iyulilic laiitic yihual iyolo huan moquetzac. Cuaquin Jesús quinmilic pa quilacuailtilosquiaya.

56 Yoje mocahualoaya moizticate ca lamajtilisli itajtzitzian. Ma yoje, Jesús quinmilic pa camo quililosquiaya amaqui len panuc.

## 9

*Jesús quintilanía in doce imonextiliniymes pa oc sequin caltilan*  
(Mt. 10:5-15; Mr. 6:7-13)

<sup>1</sup> Cuaquinon quinahuatic Jesús pa monechiculosquiaya capa yihual in doce imonextiliniymes. Quinmacac lahuelilitlisli pa yes inminyaxca pa quinquixtilisi lacames iyecames amo cuajcuali. Quinmacac in lahuelilitlisli pa quinpajtilosquiaya aquinojen hual quipialoaya len yes cocolisli.

<sup>2</sup> Cuaquinon quintilanic pa quilamachiltilosquiaya cajcapa yes inminlaixpan lacames quinami Dios huelitía, huan quinmilic pa quinpajtilosquiaya.

<sup>3</sup> Quinmilic:

—Amo xiquihuicacan nindeno pa anmo'ojli, amo xiquihuicacan cuahuil pa anmopalehuis annejnemis, amo xiquihuicacan xotopa huan len pa anquicuas huan tomin. Huan xiquihuicacan jan se laquen san, sejse huan sejse ca amhuanten.

<sup>4</sup> Huan ancalaquis pa ichan se hual anmitznotzas pa anmocahuas, cuaquín nepa xichantican anquístía mojmosta pa nepa pa anquilamachiltitinemis quinami Dios huelitía.

<sup>5</sup> Huan sinda yehuante anmiztojtocasi pampa amo quixtocalo nola-machiltitisli cuali, cuaquín quiman anquisas pa in caltilan, xictzejtzeluilican in lalpotocli hual salijtica pan anmolacsames. Yoje momatis pampa in lacames anmijchihuilic len niman amo cuali.

<sup>6</sup> Cuaquinon mohuicajque Jesús ilanahuatinijmes, yahuiloaya pa míac caltilan tijtipichin sejse huan sejse, quinlamachiltitinemiloaya ílamachiltitisli cuali Jesús huan quinpajtitinemiloaya cocoxquimes.

*Herodes quimahuilía da unca Jesús o amo unca*  
(Mt. 14:1-12; Mr. 6:14-29)

<sup>7</sup> Huan quicaquic Herodes in hué quinami molaquetzilizitinemiloaya lacames, molaquetzilizitinemiloaya mochi hual quichihuaya Jesús. Pampín amo quimatiaya len quijtusquiaya Herodes pampa quijtuloaya sequin pampa Juan Lacuayatequini axcan yuliaya oc sejpa, quisac pa capa in mijquimes.

<sup>8</sup> Huan quijtuloaya oc sequin pampa Elías ilajtuni Dios, ilajtuni hual yulini pa yina, axcan mocuepac pan lalticpan. Oc sequin quijtuloaya pampa yuliaya oc sejpa oc se ilajtuni Dios hual yulini pa yina quinami yulinijme innojen ilajtunijmes Dios hual quitequipanuilinijme pa yina.

<sup>9</sup> Huan Herodes quilic:

—Nehual nilatilanica pa quicotonilisqui Juan iquixlan. Axcan, ¿aqui in se hual mojmosta nicmaztica len quichijtica?

Huan pehuaya qitemu Herodes quinami quitasquiaya Jesús.

*Jesús quinlacualtía macuili mil lacames*  
(Mt. 14:13-21; Mr. 6:30-44; Jn. 6:1-14)

<sup>10</sup> Ajsic in tonali quiman mocuepajque ilanahuatinijmes Jesús, quipuhuilijque mochi sejse lachihualisli hual quichihuajque. Cuaquín quinhuicac Jesús ca yihual, huan mohuicajque. Uyajque ajsijque capa cataloaya inminhuán capa amo huejca cataya se caltilan itocaya Betsaida.

<sup>11</sup> Ma yoje, quimatijque in míac lacames ca capic uyac Jesús, pampín quitocajque. Ajsijque yehuante, quinpialtic cuali Jesús huan pehuac quinlaquetzilic pa quimatilosquiaya quinami Dios huelitía. Huan quinpajtic yehuante hual quipialoaya cocolisli.



<sup>12</sup> Cuaquinon pehuac tiolactic, huan hualajque in doce ilanahuatinijmes, quinmilic:

—Xiquintilani in lalalera pa yasi pa innojen caltilan tijtipichin huan in calerías pa totenco. Yojque quitasi capa huil cochisi pa layúa huan quitasi len quicuasi. Amo unca nindeno nican pampa ticate nican capa amaqui chantitica.

<sup>13</sup> Huan Jesús quinmilic:

—Amhuanten xiquinmacacan len quicuasi.

Huan yehuanten quilijque:

—Amo ticpialo nindeno, jan ticpialo macuili panes huan ome michimes. Sinda ticnequilo ticanalo oc sequin, cuaquín ticpiasi pa tiasi tiquincuhuilisi len pa quicuasi moxtin.

<sup>14</sup> Cataya quinami macuili mil lacames. Cuaquín Jesús quinmilic ilanahuatinijmes, quinmilic:

—Xiquinmilican pa molalisi monechicujticate quinami cincuenta huan cincuenta lacames.

<sup>15</sup> Yojque quichihuaque, quinchihuilijque pa molalilosquiaya, quinmolaltijque moxtin.

<sup>16</sup> Cuaquinon quinmanac Jesús in macuili panes huan in ome michimes, lachíac pa in cielo (ilhuicac), quisehuic Dios, pehuac quincepehuac ca lajlajco in panes huan in michimes, quinmacatinemiaya imonextilinijmes pa yehuanten quinhuiquilijtinemilosquiaya in lalalera.

<sup>17</sup> Yojque lacualoaya in lalalera, pachihuijque moxtin. Huan quinpejpenajque imonextilinijmes in lajlajco lacapehuali hual quincehuaque, cataloaya doce chiquihuimes tentataloaya ca innojen pa yehuanten.

*Pedro quijtúa pampa Jesús unca in Cristo*

*(Mt. 16:13-19; Mr. 8:27-29)*

<sup>18</sup> Cataya se tonali Jesús quilalajaniaya Dios, huan umpa cataloaya ca yihual jan imonextilinijmes san. Huan Jesús quinlajlanic:

—Molaquetzilijticate lacames nonahuac nehual, ¿aqui quijtulo pampa nehual niunca?

<sup>19</sup> Quinanquilijque:

—Sequin quijtulo pampa tehual tiunca Juan Lacuayatequini. Oc sequin quijtulo pampa tehual tiElías ilajtuni Dios. Huan oc sequin quijtulo tehual tiunca se ilajtuni Dios hual yulini pa yina huan axan yultica oc sejpa.

Cuaquinon Jesús quinmilic:

—Huan amhuanten, ¿aqui anquijtúa pampa nehual niunca?

<sup>20</sup> Huan Pedro quinanquilic:

—Tehual tiunca iCristo Dios.

*Jesús quinlamachiltía pampa yahui miqui*

*(Mt. 16:20-28; Mr. 8:30-9:1)*

<sup>21</sup> Cuaquinon quinmilic chicahuac Jesús pa camo quililosquiaya amaqui inon, quinmilic:

<sup>22</sup> —Nehual ilacal in cielo nicpías pa nipanús míac lacocoltilisli. In hueyentén huan in tiopistas huejué huan in lamaxtinijmes nejchihuilisi pa nipanús inon, nechtojpehuasqui. Yehuanten quilalasi pa quichihuasi se lajtulisli pa nechquitzquisi, cuaquinon nechmictisi. Ma yoje, quiman panusi ye tonalijmes, cuaquin niyulis oc sejpa.

<sup>23</sup> Cuaquinon quinnotzac Jesús mochi in lacames, quinmilic:

—Sinda se quinequi ye nomonextilini, ma camo yuli quichijtica len yihual quinequi. Quipía pa yulis quichijtica len quinequi Dios. Huan ma quimati

mojmosta pampa quipía pa panus lacocoltilisli sinda nechtocatías, quinami nehual nipanus lacocoltilisli.

<sup>24</sup> In annimitzilia pampa sinda yuli se quitemujtinemi quinami canas mochi len calica huil mopaquiltis nican capa yultica pan lalticpan, cuaquín Dios amo quimacas in se in yulilislí hual jan quipía Dios san pa quimacas yihual. Huan sinda se yuli quitemujtinemi quinami quichías mochi quinami nehual nicnequi, huan sinda amo quimonotzilia nindeno inon hual unca pin lalticpan calica huil mopaquiltía, cuaquín Dios quimacas in se in yulilislí hual amo quiman lamis.

<sup>25</sup> ¿Quinami quipalehuis se lalac sinda canas mochi hual unca pin lalticpan calica mopaquiltis huan cuaquín polehuis? Amo quipalehuis nindeno sinda amo quipías in yulilislí calica Dios quinequi quiyuliltía.

<sup>26</sup> Pampín, aquí yes hual pinahua nonahuac nehual huan len niquijtúa, yoje nehual ilacal in cielo nipinahuas inahuac in se. Quema, nehual nipinahuas inahuac in se pa in tonali quiman nihualas ca laixpelalislí cualtichin pan lalticpan ca míac nochicahualislí nehual huan ichicahualislí noTajtzin huan inminchicahualislí in lanahuatinijmes pin cielo hual techtequipanuililo yihual huan nehual.

<sup>27</sup> Huan neli annimitzilia. Sequin hual nican moqueztcate neli yulisi pa quitasi quinami cayas pa in tonali hual Dios huelitía pan lalticpan.

### *Jesús nesi laixpelatica*

(Mt. 17:1-8; Mr. 9:2-8)

<sup>28</sup> Quiman lamic quinmilic Jesús in lajtomes, panuje quinami chicué tonalijmes, huan quinhuicac Pedro huan Juan huan Jacobo, panquisaje pan se loma (tepel) pa nepa Jesús quilajlanisquiaya Dios.

<sup>29</sup> Huan quiman lajlantataya yihual, mopalac iixco ca oc se lanextilislí. Itzotzomajli nesiaya iztatataya, laixpelatataya chichahuac.

<sup>30</sup> Huan moitilijque ome lacames laquezatataloaya ca yihual. Yehuanten cataloaya Moisés huan Elías ilajtunijmes Dios hual yulinijme pa yina.

<sup>31</sup> Yehuanten noje moitaloaya laixpelatatataloaya, ca Jesús molaquetzililoaya quinami quipiaya pa miquisquiaya Jesús pa Jerusalén.

<sup>32</sup> Quipialoaya míac cochilislí Pedro huan in oc sequin imonextiliniijmes. Ma yoje, ejsatiquisajque huan quitajque ilaixpelalislí chichahuac Jesús. Noje quinmitaje in omenten hual moquezatataloaya ca yihual.

<sup>33</sup> Cataloaya mijcuanatataloaya in omenten capa Jesús moquezatataloaya, huan Pedro quilic:

—Lamaxtini, unca cuali pampa ticate nican. Ma tiquinchihuacan ye calitos, se pa tehual huan se pa Moisés huan se pa Elías.

Amo quimatiaya Pedro len quiliaya.

<sup>34</sup> Ma yoje, quijtatataya inon, hualac se mextemil, quintzacuac. Huan momajtijque quiman quintzacuac in mextemil.

<sup>35</sup> Cuaquinon mocaquic se lajtol quistataya pin mextemil, quijtuc:

—In noxolol hual niclasojla míac. Xicayacan anquicactica len yes quijtúa.

<sup>36</sup> Quiman lamic mocaquic in lajtol, jan moitilic Jesús ihuían san. Huan yehuanten amo nahuatijque nindeno pa innojen tonalijmes, amo quila-machiltijque amaqui in hual quitaje.

### *Jesús quiquixtilía se iijecal amo cuali se muachito*

(Mt. 17:14-21; Mr. 9:14-29)

<sup>37</sup> Cataya mostatica quiman temujque pani in loma (tepel), quinamiquijque Jesús se lalacalera.

<sup>38</sup> Huan se lalca ca yehuanten quinotzac Jesús chicahuac, quilic:

—Lamaxtini, nicnequi pa tijchihuilis se cuali. Xichitili noxól, pampa jan in se san nicpía.

<sup>39</sup> Huan ¡xiquita! Se ijyecal cana huan jan ajnaxcan quilatzajtztia, quitzejtzelúa, cuaquín quisa posunquil pa icamac huan quicahuilía aniles, quixacualúa, amo quinequi quimacahua.

<sup>40</sup> Huan niquintemachic momonextilinijmes pa quiquixtililosquiaya, huan amo huil quiquixtilije.

<sup>41</sup> Jesús quinanquilic:

—¡Amhuanten hual anyultica axan! ¡Amo anlaneltocha, anmitzmalinilic in lili anmoyolo pa se ojli amo cuali! ¿Quichi tonalijmes nicpías pa nicayas ca amhuanten? ¿Quichi tonalijmes nicpías pa niquitas cocolisli pa noyolo pampa amo annehneltocha? Xichualiquili moxól nican.

<sup>42</sup> Huan quihualiquilijtataya itajtzin, in ijyecal canac in xolol, quitzejtzeluc niman chicahuac, quimayajtiquisac. Jan axcan Jesús cajcajuac in ijyecal amo cuali huan quipajtic in xolol, cuaquinon quicuepilic in xolol itajtzin.

<sup>43</sup> Pampín mocahualoaya moiztataloaya in lacames ca lamajtilisli pampa quitajque Dios ilahuelilitlisli hué.

*Jesús quinlamachiltía oc sepa pampa yahui miqui*

(Mt. 17:22-23; Mr. 9:30-32)

Huan quiman moiztataloaya ca lamajtilisli moxtin mochi innojen huejué hual quinchihtataya Jesús, yihual quinmilic imonextilinijmes:

<sup>44</sup>—Xicalican inon pa anmotzontecon hual annimitzilía: Amo huejcahuas ajsis in tonali quiman nehual ilalca in cielo nechtemacasi ca lacames hual cate Dios ilacocolinijmes.

<sup>45</sup> Ma yoje, yehuanten amo quimatiloaya len quinequiloaya quijtulo in lajtomes, quinmolatililoaya len quinequiloaya quijtulo in lajtomes pa yoje amo quimatilosquiaya yehuanten. Huan momajtiloaya pa quilajlanilosquiaya len quinequiloaya quijtulo in lajtomes.

*¿Aqui unca in hué hual quinlaicanas?*

(Mt. 18:1-5; Mr. 9:33-37)

<sup>46</sup> Huan pehualoaya quinmolaxililo lajtomes yehuanten, laquetzaloya pa quimatisi calía ca yehuanten yahuiaya ye in lalca hué.

<sup>47</sup> Huan Jesús momachiltic inon hual quijtuloaya lajtic inminyolo. Cuaquinon canac se xolotzindi, quiquetzac inahuac

<sup>48</sup> huan quinmilic:

—Se hual quimosehuiltía se xól tipichin pa quichihuilis mochi hual monequi, huan quichía inon pampa quineltocha pampa Dios nechtilanic pin lalticpan, cuaquín yoje in se nechmosehuiltía nehual. Huan aqui yes hual nechmosehuiltía, yoje quimosehuiltía yihual hual nechtilanic pin lalticpan. Yoje, yihual hual unca in niman tipichin ca anmoxtin cayas in niman hué.

*Unca pa tehuanten aqui hual amo tejtzacuilia tehuanten*

(Mr. 9:38-40)

<sup>49</sup> Cuaquinon Juan quilic:

—Lamaxtini, tiquitaje se hual quinixtiliaya ijyecames in lacames pan ipampa molahuelilitlisli. Huan tiquilije pa camo quichihuasquiaya pampa yihual amo techtocha.

<sup>50</sup> Jesús quilic:

—Amo xiclatzacuilican, pampa aqui yes hual amo tejtzacuilía yoje tech-palehuía.

*Jesús quinmajua Jacobo huan Juan*

<sup>51</sup> Ajsitihualaya in tonali hual Dios yahuiaya quilejculi Jesús pin cielo, huan molalilic Jesús pa yas pa Jerusalén huan amaqui huil quitzacuiliaya.

<sup>52</sup> Quintilanic lanahuatinijmes pa lamachiltitialesquiaya pampa yihual yahuiaya huala. Cuaquín uyaje in lanahuatinijmes, ajsijque pa se icaltilan in samaritecos pa quilajlanilosquiaya sinda quipialoaya calijtic capa mocahuasquiaya Jesús.

<sup>53</sup> Huan in samaritecos amo quinequiloaya pa ajsis capa yehuanten, pampa yihual yec se judío hual yahuiaya pa Jerusalén.

<sup>54</sup> Huan quimatijque inon imonextilinjmes Jacobo huan Juan, yoje quili-  
jqe:

—Lamaxtini, ¿ticnequi pa tiquilisi pa temus itixuxli in cielo pa lamis quinchichinus yehuanten? Yoje pa yina quinchihuilic Elías in guaches.

<sup>55</sup> Momalinac Jesús, quinmiztataya Juan huan Jacobo, quinmajua, quin-  
milic:

—Ayamo anquimati quinami niquijtúa laijtic nehual. Nehual ilacal in cielo amo nihualaya pa niquinmictisquiaya lacames. Nihualaya pa niquinquixtil-  
isquiaya pin ipolehuilisli inminlajlaculisli.

<sup>56</sup> Cuaquinon uyaje pa oc se caltilan.

*Ome lacames quinequilo quitocalo Jesús*

*(Mt. 8:19-22)*

<sup>57</sup> Huan nejntiyahuiloaya pa ojli, se lacal quilic Jesús:

—Tata, nicnequi nimitztoca ca capic yes tías tel.

<sup>58</sup> Jesús quilic:

—Quipialo in zorras inmincojcoyunqui, huan quinpialo inminchan in tutomes. Huan pa nehual ilacal in cielo amo unca capa nicpía nochan.

<sup>59</sup> Jesús quilic oc se lacal:

—Xichtoca nehual.

Huan yihual quilic:

—Xichmacahuilti pa nías niclaltocas notajtzin. Cuaquín nimitztocas.

<sup>60</sup> Jesús quilic:

—Ma quinlaltocacan inminmijquimes yehuanten hual yulticate mas que pa inminyolo miquije. Huan tehual, xía xiquinlamachilti lacames quinami huelitía Dios.

<sup>61</sup> Oc se lacal quilic Jesús:

—Nimitztocas, Tata. Ma yoje, xinechmacahuilti pa nimochicahuas ca yehuanten pa nochan. Cuaquinon nimitztocas.

<sup>62</sup> Huan Jesús quilic:

—Sinda se pehua laxahua huan sejpa huan oc sejpa lachixtía pa itepotzcon, yihual amo monotza pa laxahuas. Noje, sinda se pehua nechtocha huan sejpa huan oc sejpa quijnamictica in hual quixtocaya pin tonalijmes quiman ayamo pehuac nechtozac, cuaquín yihual amo monotza pa cayas capa Dios huelitía.

<sup>1</sup> Panujque innojen, quinsaluc in Tata Jesús oc sequin setenta, quintilanic oj'ome huan oj'ome pa yalosquiaya pa mochi caltilan capa yihual yahuiaya quinpaxaluili.

<sup>2</sup> Huan quinmilic:

—Cate miac hual yalo nechneltocalo huan ticpialo pa tiquinnechicusi pa pehuas huelitis Dios pa inminyolo. Yoje yes quinami se quipía se cuajmili hué pa lapixcas huan amo quipía miac lacames pa quipalehuisi pa lapixcas. Pampín xictemachican in Teco hual unca Dios pa yihual quintijtiantiquisas miac oc sequin lacames pa techpalehuisi ca in lapixcalisli.

<sup>3</sup> Ximohuicacan axan, huan xiquitacan: Annimitztilantica amhuanten huan anunca quinami borregitos lajco capa cate coyomes.

<sup>4</sup> Amo xiquihuicacan xotopa pa tomin, amo xiquihuicacan xiquipili pa anquihuictías len anquicuas, amo xiquihuicacan oc sequin ome lacames. Huan amo xiquinpialtitican in lacames hual anquinnamictías pa ojli.

<sup>5</sup> Quiman ancalaquis pan aquí yes icali, xipehuacan ca anquilis: “Xicayacan ca Dios imosehulisli amhuanten pa in cali.”

<sup>6</sup> Huan sinda nepa iteco in cali unca se lalac hual quinequi pa cayas ca Dios imosehulisli, cuaquinon amhuanten anquimatis, huan yihual cayas ca Dios imosehulisli. Huan sinda iteco in cali amo quinequi caya ca Dios imosehulisli, amhuanten anquimatis, huan yihual amo cayas ca Dios imosehulisli.

<sup>7</sup> Huan xichantitican san pin cali capa anmitzajxiltisi. Xijcuacan huan xicunican len yes anmitzmacasi, pampa unca iyaxca in tequipanujquil ilaxlahuilisli. Amo ximopalacan pa anchantis pa oc se cali pa in cali capa anpehuac anchantic.

<sup>8</sup> Huan calía yes caltilan ancalaquis huan anmitzajxiltis, xijcuacan len yes hual anmitzmacasi pa anquicuas.

<sup>9</sup> Xiquinpajtican in cocoxquimes, huan xiquinmilican: “Nican ca amhuanten axcan ajsitihualac in tonali quiman Dios huelitía.”

<sup>10</sup> Huan pin calía yes caltilan ancalaquis huan amo anmitzajxiltisi xiquisacan pa iojlimes in caltilan, xiquinmilican:

<sup>11</sup> “Quema, ilalmoluncal anmocaltilan hual salijtica capa tehuanten antimijtzejtzeluililo amhuanten. Yoje anquimatis pampa anquichíac len niman amo cuali pampa amo antechajxiltic tehuanten huan amo anquineltoac Dios ilamachilitisli cuali. Jan yoje, xicmatican pampa ajsitihualac in tonali quiman Dios huelitía.” Yoje xiquinmilican.

<sup>12</sup> Annimitzilía inon: In tonali hual Dios quintojtocas ilaixpan yihual ipampa inminlaijlaculisli yehuanten pin lalticpan pa panusi polehulisli hual amo quiman lamis, nepa yesi lacocoltili niman miac yehuanten hual yuliloaya pa in caltilan hual amo anmitzajxiltisi. Amo yoje miac yesi lacocoltili yehuanten hual yulinijme pin caltilan hué Sodoma, yehuanten in lacames ej'elehuis hual yulinijme pa yina.

*Innojen caltilan hual amo quineltocajque*  
(Mt. 11:20-24)

<sup>13</sup> Huan ¡quichi anyahui ancaya lacocoltili, amhuanten hual anyuli pin caltilan Corazín! Huan ¡quichi anyahui ancaya lacocoltili amhuanten pa Betsaida! Pa amhuanten niqunchíac miac hual anmitzlapolultije huan anpehuac anmoiztica ca lamajtilisli pampa anquitac Dios ilahuelitilisli. Ma yoje, amhuanten amo anquipalac anmooyolo pa anpehuasquiaya anlai-jnamiquía quinami Dios quinequi. Huan pa yina cataloaya in caltilan hué motocaya Tiro huan in caltilan hué Sidón. Huan sinda cataloaya lachihuali

innojen huejué capa yehuanten, quipalaloaya inminyolo yehuanten pa laijnamiquillosquiaya quinami Dios quinequi. Jo quema, molaquentiloaya ca tzotzomajli xinqui huan molaliloaya pin tinextilan pa lanextilosquiaya quochi icnotiloaya pampa quichihuajque míac hual amo cuali.

<sup>14</sup> Ma yoje, amo míac panusi lacocolinlisli yehuanten hual yulinijme pa Tiro huan Sidón quinami anpanus amhuanten hual anchanti pa Corazín huan Betsaida pa in tonali hual Dios quintojtocas ilaixpan yihual pa camo lamisi pa yesi lacocoltili yehuanten pin lalticpan hual amo quineltoalo.

<sup>15</sup> Huan amhuanten hual anchanti pa Capernaum, ¿cuajnesi anquijtúa ancayas se caltilan hual yehuanten pin cielo anmitzlasojlasi míac? Amo quiman. Amhuanten antemus capa cate in mijquimes, yajmo annessis.

<sup>16</sup> 'Aqui hual quicaqui len anquijtúa amhuanten nomonextilinijmes yoje quicaquí inon hual niqijtúa nehual. Huan aqui hual amo anmitzcaquí, yoje amo nechcaquí nel. Huan aqui hual amo nechcaquí, yoje amo quicaquí Dios hual nechtilanic.

Yoje que quinmilic Jesús imonextilinijmes. Cuaquinon mohuicajque.

### *Mocuepalo in setenta capa unca Jesús*

<sup>17</sup> Panuje tonalijmes, mocuepajque ca niman míac paquilisli in setenta ca Jesús, niman pactataloaya, quilijque:

—Tata, yehuanten in iyecames amo cuajcuali techneltocalo pampa titechmacac tehual molahuelilitlisli hual ticpía pampa tel iCristo de Dios.

<sup>18</sup> Jesús quinmilic:

—Nolacocolini Satanás quipiani ilahuelilitlisli hué calica quinequini mopalehuiaya pa ajsisquiaya pin cielo. Ma yoje, axcan unca lasulahuali. Unca quinami niqitac hueztihualaya pin cielo quinami lapelanilisli, jan ajnaxcan yihual cataya lasulahuali.

<sup>19</sup> Xiquitacan. Annimitzmacac lajtol chicahuac calica anquipías lahuelilitlisli pa anquinsulahuas nolacocolinijmes hual cate quinami cuhuames huan culomes. Yes quinami anquintelicsa nolacocolinijmes. Quema, huan annimitzmacac nolajtol chicahuac calica anquipías lahuelilitlisli pa anquisulahuas huan anquixixicus mochi ichicahuallisli in lacocolini. Huan amo huil anmijchiuilisli nindenno pa anmijzacuilis.

<sup>20</sup> Ma yoje, amo xicayacan anpactica jan pampa anmitzneltocalo in iyecames amo cuajcuali. Quema, xicayacan anpactica pampa quinmijcuiluc Dios anmotocajmes nepa pin cielo.

### *Quipía paquilisli Jesús*

*(Mt. 11:25-27; 13:16-17)*

<sup>21</sup> Axcan in Espiritu Santo quimacac Jesús míac paquilisli, pampín ca paquilisli quilic:

—Tehual noTajtzin, tel iTeco in cielo huan in lalticpan, nimitzilía inminlaxpan moxtin quinami timonotza pa timitzilisi quinami ticpía mochi lahueyilisli. Timonotza pa ticpías in, pampa tiqintzacuilic pa camo quimatisi innojen lachihualisli hual lanextilía quinami tihuelitía, tiqintzacuilic yehuanten hual quijtulo pampa quimatilo. Quijtulo pampa amo monequi pa tiqinpaléhuis tehual. Jo quema, tiqintzacuilic yehuanten huan ma yoje tiquinnextilic yehuanten hual quimatilo pampa monequi pa tiqinpaléhuis tehual. Quema, noTajtzin, inon ticchihuac pampa tiqitac cuali pa ticchihuasquiaya yoje.

<sup>22</sup> Cuaquinon Jesús quinmilic imonextilinijmes:

—Nechmacac noTajtzin nehual mochi lahuelilitlisli huan nechmacac mochi len quichíac. Huan amo unca oc se, jan Dios in Tajtzin san hual

quimati aquí niunca nehual ixól. Huan amo unca oc se, jan nehual san hual quimati aquí unca in Tajtzin Dios. No, amo unca oc se, jan nehual san huan aquí yes hual nicnequi nicnextili aquí unca noTajtzin.

<sup>23</sup> Cuaquinon momalinac quinmiztataya imonextiliniymes, quinmilic pa jan yehuanten san quicaquilosquiaya, quinmilic:

—Xicayacan ca niman míac paquilisli amhuanten pampa anquinmiztica innojen hual panujticate anmoyampa.

<sup>24</sup> In annimitzilía pampa cataloaya míac ilajtunijmes Dios huan míac huejueyenten hual quinequiloaya quinmitalo innojen hual amhuanten anquinmita, huan ma yoje amo quinmitaje. Huan quinequiloaya quicaquilo innojen hual anquinaquí, huan amo quicaquíe.

### *Jesús quinlapuhuilía in hual quichíac in cuali samaritano*

<sup>25</sup> Cuaquinon moquetzac se ilamxtini inminlajtol in judíos, quinequiaya quichihuili pa quijtusquiaya Jesús len lajtol calica huil quimotexpahuil-isquiaya, qullajlanic:

—Lamxtini, ¿len nicchías pa nicanas yulilisli hual amo quiman lamis?

<sup>26</sup> Jesús quinanquilic:

—¿Len unca lajcuiluli pa ilajtol Dios? ¿Len anmitznextilía pin lajtol?

<sup>27</sup> Quinanquilic ilamxtini in lajtol, quilic:

—In lajtol quijtúa: “Ticlasojlas in Tata moDios ca mochi quinami huil ticlasojla pa moyolo huan ca mochi quinami huil ticlasojla pa moyulilisli huan ca mochi mochicahualisli huan ca mochi molaijnamiquilisli. Huan ticlasojlas in oc se hual unca ca tehual san quinami tehual timolasojla.”

<sup>28</sup> Jesús quilic:

—Cuali tilananquilic. Xicchía inon huan amo tilamis tiyulis.

<sup>29</sup> Ma yoje, in lamxtini quinequiaya monapati pampa Jesús quilic inon. Pampín quilajlanic:

—Huan ¿aquí tiquijtúa unca in oc se hual nicpía pa niclasojlas?

<sup>30</sup> Canac Jesús in lajtol, quilic:

—Cataya se lalac quisac pa Jerusalén, temujtiahuiaya pa in caltilan Jérico. Quinnamiquic sequin laxtequinijmes hual quitecuaje huan quixtequilije mochi, quiquixtilije itzotzomajli, cuaquín uyaje, quicahuaje lastataya in lalac, ca je nadita miquiaya.

<sup>31</sup> Huan quinami panuc, yajtihualac se tiopista pa in ojli, quitac in lalac, panuc ca yoje pa in ojli.

<sup>32</sup> Cuaquín hualac se levita (se de yehuanten hual tequipanulo pin tiopan hué), huan quitac. Yihual noje panuc ca yoje pa in ojli, quinami in tiopista.

<sup>33</sup> Cuaquinon umpa panujtihualaya se lalac samariteco hual amo anquix-toca. Quipanajtihualaya tolali. Quitac in lalac huan quicniliaya yihual.

<sup>34</sup> Hualac ca yihual, quinlalilic dangos pin sahuames capa quitecuaje, quinxahuilic ca chahuac huan iayo uva coc. Cuaquinon quilejcultic pan yihual iburro, quihuicac pan se cali, nepa quitaya pa quipajtis.

<sup>35</sup> Mostatica pa huajtzinco quimacac tomin iteco in cali, quilic: “Xiquita yihual huan mochi hual ticpías pa ticlaxlahuis pa in hual monequi pa quipías yihual, nehual nimitzcuepilis in tonali nimocuepas ca níc.”

<sup>36</sup> Axan —quilic Jesús—, ye lacames quitaje in lalac hual laixtequinijmes quitecuaje. ¿Calía ca in yeyenten quichihuilic in lalac quinami quijtúa in lajtol pa ticchihuilisli mochi oc se hual moita ca tehuanten?

<sup>37</sup> In lamxtini quinanquilic Jesús, quilic:

—Yihual hual quipiliaya laicnihilisli in lalac hual quitecuaje, yihual quichi-huilic quinami quijtúa in lajtol.

Cuaquin Jesús quilic:

—Xía huan xicchía quinami yihual quichíac.

*Jesús pa inminchan Marta huan María*

<sup>38</sup> Yajtiahuiloaya yehuanten pan ojli, Jesús ihuían calaquic pan se caltilan tipichin, nepa cataya se sihual motocaya Marta, yehuanten moiximatiloaya. Yihual quinzac Jesús pa quipaxaluilisquiaya pa ichan.

<sup>39</sup> Huan Marta quiipiaya se icni sihual motocaya María. Yihual molalic pa icxihuajmes in Tata Jesús huan pehuaya quicaqui quinami quimaxtiaya ilajtol Dios.

<sup>40</sup> Ma yoje, icni Marta laijnamiquiaya siajtataya pampa quiyucxiltiaya mochi pa quicuasquiaya Jesús. Cuaquin hualac capa cataya Jesús, quilic:

—Tata, ¿amo tiqúita quinami nocni nechcahuac pa nitequipanusquiaya nohuían? Xiquili pa hualas nechpalehuis.

<sup>41</sup> Huan in Tata Jesús quinanquilic:

—Marta, Marta, timomaca míac tequil huan amo huil timosehuía.

<sup>42</sup> Jan inon san monequi pa ticchías quinami María quichijtica. Quinequiaya quichía in cuali, quinequiaya quicaqui ilajtol Dios. Amaqui quiquixtilis María in hual yihual cana quicactica ilajtol Dios.

## 11

*Jesús quinmilía quinami se quilajlanía Dios*

*(Mt. 6:9-15; 7:7-11)*

<sup>1</sup> Cataya se tonali cataya Jesús pan se lajcotiyan capa quilajlantataya Dios. Nepa noje cataloaya imonextilinijmes. Lamic quilajlanic, se imonextilini quilic:

—Tata, xitechnextili pa ticmatisi quinami ticlajlanisi Dios, quinami Juan Lacuayatequini quinnéxtilic imonextilinijmes.

<sup>2</sup> Huan Jesús quinmilic:

—Quiman anquilajlanía Dios, xiquilican yoje:

ToTajtzin Dios hual tiunca pin cielo, ma quijtucan moxtin motoca ca mochi inminlasojlalislisli huan inminlajtomes huejué huan cuajcualtichin.

Ma ajsi in tonali hual tihuelitía capa tehuanten.

Ma mochía len ticnequi pan laticpan jan quinami mochía pin cielo.

<sup>3</sup> Xitechmaca mojmosta pa tijcuasi in hual monequi.

<sup>4</sup> Huan xiquinpujpuhua tolaijlaculisli, pampa yoje tiquinpujpuhualo moxtin yehuanten hual tejchihuililo amo cuali.

Huan amo xitechlaicana ca capic Satanás huil techtilanilía toyolo pa ticchi-huasi len amo cuali, quema, huan xitechmacahuili pa camo techana yihual hual elehuis.

<sup>5</sup> Cuaquinon quinmilic:

—Cuajnesi se ca amhuanten ticpía se mocni hual chanti pa oc se cali huan tiajsi pa ichan yihual pa lajco layúa huan tiquilía: “Eh, Nito, ¿amo ticpía se ome laxcali pa tichlanehuis?”

<sup>6</sup> Ajsic pa nochan se tocni pa oc se cali panujtihualaya pa ojli, huan amo nicpía nindeno pa nicmacas pa lacuas” tiquilía.

<sup>7</sup> Huan pa calijtic yihual quinanquilía: “Amo xichyantitihuala. Nictzacuac nochan, axan tilasticate pa tolapexlimes nehual huan noxolomes. Amo huil nimoquetzas pa nimitzmacas nindeno” quilía.



<sup>8</sup> Annimitzilía —quilic Jesús—, cuajnesi in se pa icalijtic amo moquetzas pa mitzmacas tehual ome laxcali mas que tiunca icni pa oc se cali. Ma yoje, tehual hual tiunca icni pa quiahuac amo tipinahuac timotemachilic in se ome laxcali. Pampín, mocni pa calijtic neli moquetzas mitzmacas mochi in hual monequi pa ticpías.

<sup>9</sup> Huan annimitzilía: Ximotemachilican, huan Dios anmitzmacas. Xictemucan len Dios quipía pa amhuanten, huan anquitas. Quema, xiclaflanican Dios, unca quinami anquitecuilijtica pa ilalapujquil Dios. Huan anmitzlapulis.

<sup>10</sup> Xicchihuacan yoje pampa ancanas mochi hual len anmotemachilía Dios pa anmitzmacas. Huan moxtin hual len quitemulo in hual Dios quipía pa quinmacas, quema, yehuanten quitalo. Huan moxtin hual quinami quitecuililo ilalapujquil Dios, yoje Dios quinlapulis.

<sup>11</sup> 'Amo unca se itajtzin ca amhuanten hual quimacas se tixcali ixól sinda ixól motemachilía len quicuas. Noje amo unca se tata hual quimacas se cuhual sinda motemachilis se michin.

<sup>12</sup> Huan amo unca se tata hual quimacas se culol ixól sinda motemachilis se blanquillo.

<sup>13</sup> Pampín, mas que amhuanten anunca amo cuajcuali huan ma yoje anquimati anquinmaca anmoxolomes len unca cuali, cuaquinon anmoTajtzin pin cielo quimati niman cuali quinmaca in Espíritu Santo yehuanten hual quimotemachililo.

### *Quijtulo Jesús quipía Satanás ichicahualisli* (Mt. 12:22-30; Mr. 3:20-27)

<sup>14</sup> Cataya se tonali quiquixtiliaya Jesús se ijyecal amo cuali se lalac. In ijyecal amo cuali quichihuilni pa camo huil lajtusquiaya in lalac. Huan quisac pa yihual in ijyecal amo cuali, yoje pehuac lajtuc in lalac. Mochahuajque moizticate huan moilijticate in miac lalalera.

<sup>15</sup> Ma yoje, sequin quilijque:

—Yihual quinquixtilía in ijyecames hual amo cuajcuali pan ipampa ilahuelilitisli Beelzebú hual unca Satanás. Yihual huelitía ca moxtin in ijyecames hual amo cuajcuali.

<sup>16</sup> Oc sequin quimahuililoaya huan quijtuloaya pampa cuajnesi amo unca neli yihual Jesús yes in Cristo hual Dios quitilanic. Pampín quiyantiloaya pa yihual quinnextilisquiaya len pin cielo (ilhuicac) calica momahuisultilosquiaya ca lamajtilisli.

<sup>17</sup> Huan quimatic Jesús len quijtuloaya laijtic capa inminyolo, pampín quinmilic:

—Sinda amo cate ca se lajtulisli yehuanten hual huelitilo pa se lali, cuaquín amo huejcahuas inminlahuelilitisli, yajmo cayas. Huan sinda amo cate ca se lajtulisli yehuanten pa se cali huan mocualantitalo yehuanten, cuaquín yajmo huil huejcahuasi pa chantisi pa in se cali, yajmo cayas inminchan.

<sup>18</sup> Huan sinda Satanás huan yehuanten hual huelitilo ca yihual amo cate ca se lajtulisli, cuaquín amo huejcahuas Satanás pa huelitis. Inon anquimati.

<sup>19</sup> Ma yoje, sinda anquijtutica pampa nehual niquinquixtilía ijyecames amo cuajcuali ca ilahuelilitisli Beelzebú, cuaquinon ¿ca agui ilahuelilitisli quinquixtililo yehuanten anmolacames hual quimatilo quinquixtililo? ¿Anquijtutica pampa yehuanten quinquixtililo noje ca ilahuelilitisli Beelzebú? Sinda yoje anquijtutica, cuaquinon yehuanten anmitzmotexpahuilisi ilaixpan Dios.

<sup>20</sup> Axan annimitzilía pampa niqunquixtilía ca Dios ilahuelilitlisli. Pampín, axan ajsic Dios huelitijtica capa amhuanten.

<sup>21</sup> Unca quinami se lalac chicahuac hual quiztica ca teposli pa moanalisli ilajcotiyan capa quinpía mochi hual iyaxca, huan amo unca nindeno hual quimacac tequil.

<sup>22</sup> Ma yoje, sinda hualas se niman chicahuac huan quisulahuas, cuaquín quiquixtilis mochi calica monapatiaya, huan cuaquín in lalac niman chicahuac laxiluilis mochi len quinpíaya in lalac hual amo yoje chicahuac. Huan yoje cayas ca Satanás sinda ajsis capa yihual ilahuelilitlisli Dios.

<sup>23</sup> Aquí hual amo nechtoca unca nolacocolini. Huan aquí hual amo nechpalehuía nehual, yoje yihual quipalejtica Satanás.

*In ijyecal hual mocuepac  
(Mt. 12:43-45)*

<sup>24</sup> Quisa in ijyecal amo cuali pa se lalac, panujtía pa cajcapa amo unca al, mochi unca huaqui. Nepa panujtía pa quitas capa huil mosehuis. Sinda amo quita capa huil, cuaquín quijtúa: “Nimocuepas pa nochan hual cataya laijtíc capa in lalac capa niqisac.”

<sup>25</sup> Cuaquinon huala, huan quita quinami unca laijtíc capa in lalac. Unca quinami se cali laxpanali huan lachijchihuali cualtichin, amo chantitica nepa se ijyecal amo cuali.

<sup>26</sup> Cuaquín yahui quinmana oc sequin chicome ijyecames niman amo cuajcuali, yihual amo quiman cataya yojque amo cuali. Calaquilo yehuanten moxtin laijtíc capa in lalac pa nepa chantisi. Yoje mococúa in lalac niman míac axan. Quema, amo yoje míac mococuni quiman quipiani jan in se ijyecal amo cuali laijtíc capa yihual.

*¿Aquí quipía míac paquilisli?*

<sup>27</sup> Huan quijtutataya Jesús innojen lajtomes, cataya se sihual ca in míac lacames huan sihuames, quinotzac ca lajtól chicahuac, quilic:

—¡Niman míac paquilisli quipía in sihual hual mitzlatiltic huan michichiltic!

<sup>28</sup> Huan Jesús quilic:

—Ma yoje, niqijtúa in paquilisli amo unca yoje hué quinami inon hual quipialo yehuanten hual quicaquilo ilajtol Dios huan quichihualo len quinmíla, yehuanten hual quipixticate ilajtol pa inminyolo.

*Quiyantilo Jesús pa quinnextilis len lanextilisli pa in cielo (ilhuicac)  
(Mt. 12:38-42; Mr. 8:12)*

<sup>29</sup> Se tonali ajsitihualaloaya míac míac lacames inahuac Jesús, huan yihual pehuaya quinmili:

—Amhuanten hual anyultica axan anunca lacames anquipixtica anmoyolo amo cuajcuali. Mojmosta anechyantitica pa annimitznextilis pa in cielo len hual ayamo quiman anquitaya. Anquinequi anquita pa yoje anquineltochasquiaya pampa Dios nechtilanic nican pa in lalticpan. Ma yoje, amo annimitznextilis nindeno hual anquinctica anquita. Jan annimitznextilis inon san hual Jonás ilajtuni Dios quinnextilic yehuanten hual chantinjime pa yina pin caltilan hué motocani Nínive.

<sup>30</sup> Jonás quinnextilic yehuanten pa Nínive pampa Dios quitilanic yihual. Huan nehual ilalac in cielo annimitznextilis amhuanten pampa Dios neli nechtilanic nehual pin lalticpan.

<sup>31</sup> Cayas in tonali hual Dios quintojtocas ilaixpan yihual yehuanten pa in lalticpan hual amo quineltovalo, quintojtocas pa panusi lacocoltilisli hual

amo quiman lamis. Cuaquín in hué sihual hual huelitini pin lali huejca pa in sur nesis ilaixpan Dios ca amhuanten. Huan in sihual noje quijtus quinami Dios, pampa yihual hualac niman huejca pa quicaquisquiaya ilajmatilisli in hué Salomón hual yulini pa yina. Huan xiquitacan. Unca se hué nican hual yoje hué amo cataya Salomón.

<sup>32</sup> Yehuanten hual yulinijme pa Nínive nesis ilaixpan Dios ca amhuanten huan quijtusi quinami Dios. Yehuanten quipalaje inminyolo pa pehualosquiaya laijnamiquilo quinami Dios quiman Jonás quinnotzac quinmilijtataya ilajtol Dios. Huan xiquitacan. Unca se hué nican hual Jonás amo cataya yoje hué.

*In lahuilisli hual unca laijtic se iyolo*

*(Mt. 5:15; 6:22-23)*

<sup>33</sup> Jesús laqueztiahuiaya, quinmilic:

—Amaqui quilalaltía se tapalquita hual lahuía huan cuaquín quilalía capa amaqui unca o quilalía itzindan se chíquihuil. No, quilalía pa pani capa nestías pa quinlahuis yehuanten hual calacticate.

<sup>34</sup> Iixtololon se unca quinami se tapalquita hual quilahuilía, yoje huil lachía se. Sinda amo unca len hual quitzacuilía iixtololon se, cuaquinon quita in lahuilisli. Huan sinda unca len amo cuali hual quitzacuilía se iixtololon, cuaquinon amo lachía, jan unca laticumac san. Unca yoje ca iyolo se. Sinda unca amo cuali iyolo se, cuaquín in se unca laticumac.

<sup>35</sup> Pampín xicte mujtiacan quinami anquimatis da anmoyolo quipía lahuilisli o laticumactitica.

<sup>36</sup> Yojque, sinda quimacahuilía se pa calaquis pa iyolo ilajtol Dios pa huelitis ca yihual pa yulis quinami Dios quinequi, cuaquinon yajmo laticumactis pa iyolo. Huan yihual yes quinami se ca iixtololon cuali. Cayas quinami icaljitic se capa lajtica cuali se tapalquita hual lahuía. Yihual yulis quimaztica len quinequi quijtúa ilajtol Dios hual quilahuilijtica pa iyolo.

*Jesús quinmotexpahuilía in fariseos huan in lamaxtinijmes*

*(Mt. 23:1-36; Mr. 12:38-40; Lc. 20:45-47)*

<sup>37</sup> Mocahuac Jesús pa quinlaquetzlic, quihuicac se local fariseo pa lacuasquiaya Jesús pa ichan. Yoje calaquic Jesús, molalic pa lacuas.

<sup>38</sup> Huan mocahuac quiztica in fariseo pampa quitac Jesús amo pehuac ca in lapacalisli imajmajuan pa lacuasquiaya, quinami quijtúa in lajtol hual quimaxtilo in judíos.

<sup>39</sup> In Tata Jesús quilic:

—Axan, quema, amhuanten in fariseos anquijtúa pampa da anmopaquilía, cuaquín yoje anmitzita chipahuac Dios. Ma yoje, pa laijtic amhuanten capa anmoyolo anunca niman amo cuali ca mochi hual anquijtúa huan anquichía. Anunca quinami se hual quipaquilía pa quiahuac se tapalcal o se tapalquita xalapa, huan pa laijtic quicahua tetzcuinuc. Yoje anunca tetzcuinuc laijtic anmoyolo.

<sup>40</sup> ¡Amo anlainmiquía! Dios quichíac ilaijtic se iyolo, amo quichíac jan iquiahuac se.

<sup>41</sup> Huan amo xicpiacan len laijnamiquilisli inahuac len yes anmolajtol quijtúa inahuac quinami anmopaquilis. Xicmacahuiltican pa ilajtol Dios anmijchipahuilis anmoyolo, cuaquinon xiquinmijnamiqican yehuanten hual amo quipialo míac pa yoje anquinmacas sequin ilajlajco in hual anquipías. Yoje anquitas pampa mochi unca chipahuac pa amhuanten sinda unca chipahuac anmoyolo.

<sup>42</sup> Amhuanten fariseos, ¡quichi lacocoltilisli anyahui anpanu! Anquimaca Dios se ilajco in majlacli inminlajlajco mochi anmocominos huan anmoyerbabuena huan in oc sequin anmoajuíac, quinami quijtúa ilajtol Dios. Ma yoje, ilajtol Dios noje quijtúa pampa anquípia pa anquilasojla oc sequin, huan amo anquinsojla. Noje quijtúa in lajtol pampa anquípia pa anquintemus in hual cuali pa anquinchihuilis oc sequin hual panulo lacocoltilisli hual oc sequin quinchihuililo. Huan amo anquinchihuilía, amo anquinmoxpahuililo yehuanten hual quinchihuililo in amo cuali. Monequiaya pa anquichihuasquiaya innojen hual quijtúa in lajtol. Quema, monequiaya pa camo anquicahuas pa anquimacas in se ilajco inminmajlacli innojen hualajuíac. Ma yoje, monequi pa anpehuas anquijnamiquis anquichías in hual monotza in niman míac pa ilajtol Dios.

<sup>43</sup> ¡Quichi lacocoltilisli anyahui anpanúa amhuanten fariseos! Anquixtoca anmolalía pin tiopajmes capa moxtin anmitzitasi. Anquixtoca pa moxtin anmitzpialtisi ca míac momajtilisli pa ilajcotiyan in caltilan. Quema, anyahui anpanúa lacocoltilisli pampa inon.

<sup>44</sup> Huan ¡quichi lacocoltilisli anyahui anpanúa! Anunca quinami cajcapa quinlalpachuje mijquimes, capa yajmo quitalo lacames capa cate. Amo quimatilo sinda nejnentialo inminpan, huan in lajtol quijtúa pampa lacames yajmo cate chipahuac sinda nejnemilo inminpan. Jan yoje unca ca lacames hual quineltoalo len anquimaxtía. Amo quimatilo pampa anmolamaxtilisli amo unca quinami quijtúa ilajtol Dios. Yoje inminyolo amo unca chipahuac, unca jan quinami anmoyolo amhuanten.

<sup>45</sup> Quinanquilic se ilamaxtini inminlajtol in judíos, quilic:

—Lamaxtini, tiquijtúa innojen lajtomes, yoje titechuejuecaltitica tehuanten noje.

<sup>46</sup> Huan Jesús quilic:

—Amhuanten noje ilamaxtinijmes in lajtol, ¡quichi lacocoltilisli anyahui anpanúa! Unca pampa anquinchía niman míac lajtomes hual cate niman ej'etic pa quinneltocasi lacames. Cate lajtomes quinami se lamamalisli niman etic, huan amhuanten amo je nadita anquinneltoca in lajtomes hual anquinmilía oc sequin pampa quipialo pa quinneltocasi.

<sup>47</sup> ¡Quichi lacocoltilisli anyahui anpanúa! Unca pampa amhuanten anquinchíac in calitos hual anquinlalía pa pani capa quinlalpachuje Dios ilajtunijmes. Huan cataloaya anmotajtzitzian hual quinmictije ilajtunijmes Dios.

<sup>48</sup> Yoje anquimati cuali len quichihuaje anmotajtzitzian, huan anquixtoca len quichihuaje, pampa yehuanten quinmictije huan amhuanten anquinchía in caltzindis hual anquinlalía pa pani capa quinlalpachuje Dios ilajtunijmes.

<sup>49</sup> Pampín noje Dios ca ilajmatilisli hué quijtuc: “Annimitztilanilis nolajtunijmes huan nolanahuatinijmes. Sequin anquinmictis, oc sequin anquintotocas.”

<sup>50</sup> Yoje, Dios anmitzmotexpahuilis pampa cataloaya lamictili moxtin ilanahuatinijmes, yehuanten hual yulinijme quiman pehuac in laticpan huan yehuanten hual yultihualalo pa axan.

<sup>51</sup> Jo quema, anmitzmotexpahuilis pa yoje anmitztojtocas ilaixpan yihual pampa cataya lamictili Abel inminxól Adán huan Eva. Huan anmitztojtocas ilaixpan yihual pampa cataloaya lamictili moxtin in oc sequin ilajtunijmes hual yultihualaloaya quiman miquic Abel, pa quiman cataya lamictili Dios ilajtuni Zacarías. Yihual quimictije lajco pin ilasojli calijtic in tiopan hué

huan inon capa quichichinulo in huendis, nepa quimictije. Jo quema — quinmilic Jesús—, annimitzilía inon, anmitzmotexpahuilis Dios pa anmitz-tojtocas ilaixpan yihual pampa quichihuaque mochi in lamictilisli.

<sup>52</sup> ¡Quichi lacocoltilisli amhuanten ilamaxtinijmes in lajtol anyahui anpanúa! Unca pampa amo anquinmaxtic lacames in hual quinequi quijtúa ilajtol Dios. Amhuanten amo anquinequic anquimatic len quinequi quijtúa, huan anquintzacuilic pa camo quimatilosquiaya yehuanten hual motoliniloaya pa quimatilosquiaya len quinequi quijtúa.

<sup>53</sup> Cuaquinon, quisac Jesús nepa. Huan in lamaxtinijmes huan in fariseos pehualoaya moanalo chichahuac ca lajtimes ca Jesús. Motoliniloaya pa quilaquetzaltilosquiaya Jesús niman míac.

<sup>54</sup> Yoique quinapachiloaya Jesús, quinequiloaya quicaquilo pa yihual quitus len calica huil quimotexpahuilosquiaya.

## 12

### *Quimaxtía Jesús quinami lacuajcuamanalo in huejueyenten*

<sup>1</sup> Jan pan tonali hual panuloaya innojen, monechiculoaya míac lacames huan sihuames, niman míac míac hualaloaya huan pampín motelicsilijti-hualaloaya. Huan Jesús pehuac quinlaquetzilic imonextiliniijmes, quinmilic:

—Xiquiztiacan amhuanten pa camo anquimacahuiltis pa anmitztechcunilis pa anmoyolo in lacuajcuamanalisli quinami quintechcunilía inminyolo in fariseos. Unca quinami itexli in harina quitehcunía in laxocoyajquil.

<sup>2</sup> Amo unca nindeno hual unca latzacuali hual amo yes lalapuli. Huan amo unca nindeno lalatali hual amo yes lamatili.

<sup>3</sup> Yoje, len yes hual anquilic capa cataya laticumac hual amo anquinequic pa oc sequin quicaquilosquiaya, jan yoje inon quicaquisi capa amo huil quimolatlis nindeno, quinami capa lajtica. Huan len yes hual anquilis pa se calijic pa camo quicaquilosquiaya oc sequin, jan yoje in quinahuatisi moxtin.

### *Monequi pa timomajtisqui ilaixpan Dios* (Mt. 10:26-31)

<sup>4</sup> Huan annimitzilía inon, nocnían lajlasojli. Amo ximomajtican pampa lachames huil quimictilo icuerpo se huan cuaquinon yajmo huil quichihuilisi nindeno.

<sup>5</sup> Ma yoje, annimitznextilía aqui monequi pa anmomajtis. Ximomajtican pampa Dios quipía lahueliltilisli pa quilasas se pin capa lalatica huan milintica quiman quimictía. Quema, annimitzilía, ximomajtican pampa yihual huil quichía.

<sup>6</sup> Quinnamacalo macuili tutotzindis pa macuili tomin tijtipichin. Ma yoje, Dios amo quilcahua se tutol hual moitilía ca yehuanten.

<sup>7</sup> Jo quema, huan mochi se se itzondi anmotzontecon unca lapuhuali. Yoje, amo ximomajtican. Amhuanten anmonotza niman míac, amo yoje míac monotzalo míac tutotzindis.

### *Yehuanten hual quislacúa Jesús inminlaixpan moxtin* (Mt. 10:32-33; 12:32; 10:19-20)

<sup>8</sup> Huan annimitzilía inon. Aquí yes hual nechneletoxa huan quijtus pampa nehual niunca iCristo Dios, huan quijtus inon inminlaixpan moxtin, cuaquín nehual ilacal in cielo niquislacus inminyampa Dios ilanahuatinijmes pin cielo.

<sup>9</sup> Aquí yes hual quiytus pampa nehual amo niunca iCristo Dios, cuaquín yihual amo niquislacus inminyampa Dios ilanahuatinijmes pin cielo.

<sup>10</sup> Huan aquí yes hual nechuejuecaltis nehual ilacal in cielo, yihual Dios quipujpuhuas ilaijlaculisli. Ma yoje, sinda se quihuejuecaltis in Espíritu Santo, inon Dios amo quipujpuhuas.

<sup>11</sup> Huan cuajnesi anmitzhuicalo inminlaixpan yehuanten hual huelitilo o yehuanten hual quipialo lahuelilitisli. In tonali hual anmijchihuilito inon, amo ximotolinican pa anquijnamiqis lajtol calica anyahuí anmonapatía o calica anyahuí anquinmilía.

<sup>12</sup> Anmitznextilis in Espíritu Santo len anquipías pa anquinmilis jan axcan quiman yes anlajtus.

*Jesús laquetza de aquinojen quipialo míac tomin*

<sup>13</sup> Se lacal hual cataya nepa ca in míac lacames quilic:

—Lamaxtini, xiquilí nocni pa yihual nejxiluilis nehual len techcahuilic totajtzin in tonali polehuic.

<sup>14</sup> Jesús quilic:

—Lacal, ¿aquí nechlajtultic pa niyesquiaya ilaxiluni in hual iyaxca motajtzin?

<sup>15</sup> Cuaquín Jesús quinmilic in lacalera:

—Xiquitacan. Ximotzacuulican pa camo anquinctías míac huan míac. Niquilía inon pampa mas que quipía se míac hual iyaxca, ma yoje in míac hual quipía amo quiyuliltía.

<sup>16</sup> Cuaquinon quinpuhuilic len pa quinmijnamiquiltisquiaya in hual quinmaxtiaya. Quinmilic:

—Cataya se lacal hual quiapiaya míac tomin huan pa icuajmilimes lapixcaya niman cuali.

<sup>17</sup> Cuaquinon pehuaya moili: “¿Len nicchías pampa yajmo nicpías calijtic capa nicajcoquis nolapixcalisli?”

<sup>18</sup> Cuaquinon quilic: “Inon nicchías. Niquinxitinis nocalijtic capa nicajcoquis huan niqunmiscaltis nocalimes pa yesi niman huejué. Cuaquinon nicnechicus mochi hual len nicpixcas, nolayoli huan mochi oc sequin innojen hual noyaxca huan niquintemiltis nocalimes.

<sup>19</sup> Cuaquinon nimoilis: Axcan nehual nicpía míac la'ajcoquili hual nechuejuecaltis míac xixil. Nimosejtías, huan mojmosta nía nilacua huan nía nilauni huan nía nipaqui.” Yoje quilic in lacal.

<sup>20</sup> Ma yoje, Dios quilic: “¡Amo ticmati tilaijnamiquí! Axan layúa tía timiqui. Cuaquín ¿aquí moyaxcajtis ca mochi inon hual timoajcoquilic?” Yoje quilic Dios.

<sup>21</sup> Cuaquinon, Jesús quinmilic:

—Yoje yes ca se hual yuli moajcoquilitica míac pa yihual nican pan lalticpan huan ma yoje amo moajcoquilia míac in hual Dios quipía pa quimacas.

*Dios quinmiztía ixolomes*

(Mt. 6:25-34)

<sup>22</sup> Huan Jesús quinmilic imonextilinijmes:

—Pampín annimitzilía amo xicpiacan lamajtilisli inahuac quinami amhuanten anyulis huan len anquicas. Huan amo xicpiacan lamajtilisli inahuac quinami anmolaquentis.

<sup>23</sup> No, amo xilaijnamiquican ca lamajtilisli pampa inon. Dios anmitzmacac anmoyulilisli, huan anmoyulilisli monotza míac. Amo yoje míac monotza in hual anmitzmaca pa anquicas. Huan Dios quichíac anmocuerpo, huan

anmocuerpo monotza míac, amo yoje míac monotza inon hual anmitzmaca pa anmolaquentis.

<sup>24</sup> Xiquinmitacan in cuervos (cacalomes). Amo latocalo, amo lapixcalo, amo quipialo capa huil moajcoquililo nindeno. Ma yoje, Dios quinlacualtía. Huan amhuanten anmonotza míac. In tutomes amo yoje míac monotzalo.

<sup>25</sup> Huan cuajnesi anquinequi pa huejcahuas anmoyulislis nican pan lalticpan. Ma yoje amo huil anquihuejcahualtis se nadita, mas que míac anmomajtía anlajtutica pa anmoyolo pa anhuejcahuas anyulis.

<sup>26</sup> Pampín, sinda amo huil anquichía jan in nadita san, cuaquinon ¿leca anlajnamiquía ca momajtislis pa anquimatis quinami ancanas mochi inon hual monequi pa anquipías?

<sup>27</sup> Xiquinmitacan in xuchimes quinami moscaltilo. Amo tequipanulo, amo latzahualo, amo lajquétilo. Ma yoje, annimitzilia pampa Salomón ca mochi itomin huan innojen oc sequin hual quipiani amo quiman molaquentini cualtichin quinami se xuchil quinami innojen.

<sup>28</sup> Huan sinda Dios quichijchía se xuchil quinami tzotzomajli cualtichin, se xuchil hual unca axan pin cuajlan huan mosta quichichinulo inmincuajlan in cuajmilunijmes, cuaquín neli unca pampa Dios yahui anmitzlaquentía amhuanten hual amo míac anquilalilia Dios anmolaneltocalisli. Pampín, xicpiacan míac laneltocalisli ca Dios. Huan mas que amo anquipía míac laneltocalisli ca Dios, ma yoje anmijchihuilis innojen.

<sup>29</sup> Huan amhuanten, amo xictemujtinemican len anquicuas huan len ancunis, amo xiclajnamiquican ca lamajtislis inminahuac innojen.

<sup>30</sup> Moxtin pin lalticpan quintemulo innojen, quijnamiccate ca lamajtislis quinami quinmanas. Huan anmoTajtzin pin cielo quimati pampa monequi pa anquipías innojen.

<sup>31</sup> No, xictemucan mojmosta pa anquipías Dios huelitijtica pa anmoyolo, huan yihual anmitzmacas mochi in hual monequi pa anquipías.

*Ma caya pin cielo (ilhuicac) anmoyaxca hual neli monotza (Mt. 6:19-21)*

<sup>32</sup> Amo ximomajtican, amhuanten niman miactzindi hual annechneltoca, pampa Dios huelitía pa anmoyolo axcan huan amhuanten anhuelitis pan mochi in lalticpan. Jo quema, Dios quipía paquilisli pa anmitzmacas pa yes anmoyaxca inon pa anhuelitis.

<sup>33</sup> Xiquinnamacacan len anquipía huan xiquinmacacan yehuanten hual amo quipialo nindeno. Sinda anquinchihuilía cuali ca anmotomin, cuaquín amo anquipolúa, pampa Dios quita len anquinchihuilía huan anmitzajcoquillis míac hual cuali pin cielo. Yes quinami anmochihuilia ya xotopas hual amo quiman mochihualoaya dangochita ca cojcoyunqueimes capa quisasquiaya anmotomin huan yoje mopolusquiaya. Pin cielo amaqui huil anmitzixtequillía in hual Dios anmitzajcoquillía, huan in laxinaxli amo anmitzcualilo.

<sup>34</sup> Sinda anquixtoca in hual Dios huil anmitzajcoquillía pin cielo, cuaquín mojmosta anquijnamicctías inon. Huan sinda anquixtoca in míac hual cate pin lalticpan, cuaquín mojmosta anquijnamicctías inon.

*Monequi pa se mochías tequipanujquil cuali*

<sup>35</sup> Yoje, xiyén quinami lacames tequipanujquimes hual cate lacuejtili pa latequipanuilisi. Quimpiasi lalalaltili mochi in tapalquitos pa lahuilislis pin cali.

<sup>36</sup> Quichixtiasi inminteco hual yahui mocuepa pa ichan pampa uyac pa se lanamictilisli. Huan quiman ajsis in teco huan lanotzas pa in lalapujquil, yehuanten hual quichixticate quilapulisi jan ajnaxcan.

<sup>37</sup> Quichi paquilisli quipiasi in lacames pa in tonali ajsis inminteco huan quinmita quichixticate yihual. Jo quema, annimitzilia, mochijchias inminteco, quinmilis pa molalisi pa lacuasi huan yihual quinlacualtis.

<sup>38</sup> Huan sinda hualas inminteco pa chicnahui, diez, once, o lajco layúa o lajco yihuali o pa cualcan o cualquita o laxpoyahua huan yoje quinmitas quichixticate, cuaquin ¡quinami amo paquisi innojen lacames itequipanujquimes!

<sup>39</sup> Huan xicmatican inon. Sinda quimatiaya iteco se cali quiman yahuiaya huala in laxtequini, cuaquinon amo quimacahuultiaya pa quixitinisquiaya icali pa quixtequilisquiaya.

<sup>40</sup> Huan amhuanten ximochijchijtiacan pampa nehual ilacal in cielo jan niajsitiquisas, amo anquimatis quiman niajsis.

*In ome tequipanujquimes  
(Mt. 24:45-51)*

<sup>41</sup> Cuaquinon Pedro quilic:

—Tata, ¿titechilijtica in laijnamiquiltilisli pa titechmaxtis tehuanten san o pa moxtin?

<sup>42</sup> Huan in Tata Jesús quilic:

—Niquilijtica aqui yes hual nechtequipanuilia. Unca quinami inon: Sinda unca se hue hual quipia se tequipanujquil hual quimati, yoje in hue quimati yihual in tequipanujquil quimati quichia mochi quinami quinequi iteco. Pampin quilalisi pa quinmiztias oc sequin itequipanujquimes. Cuaquinon yihual in tequipanujquil quinxiluilis in oc sequin tequipanujquimes len quilis iteco pa quinxiluilis.

<sup>43</sup> ¡Quinami amo paquis in tequipanujquil pa in tonali hual hualas iteco huan quitas itequipanujquil quichijtica yoje!

<sup>44</sup> Neli annimitzilia, quimacas lahuellitilisli niman hue pa quiztias mochi hual unca iyaxca iteco.

<sup>45</sup> Ma yoje, cuajnesi in teco quilalia se itequipanujquil pa quinmiztias in oc sequin tequipanujquimes. Cuaquin cuajnesi in tequipanujquil quiijtus laijtic yihual, quil: “Huejcahua pa hualas noteco”, huan pehuas lacuas mojmosta huan launis huan mojmosta lahuantinemis.

<sup>46</sup> Cuaquinon hualas iteco in tequipanujquil pan se tonali hual amo quichixtica, amo momati quiman. Huan latilanis iteco pa yes lamictili itequipanujquil. Yihual yes lacocoltili ca in lacocoltilisli hual panusi yehuanten hual amo laneltocalo.

<sup>47</sup> In tequipanujquil hual quimati in hual iteco quinequi pa quichias huan ma yoje amo mochijchias pa quichias len quinequi, yojque yihual yes lahuitequili miac.

<sup>48</sup> Huan yihual in tequipanujquil hual amo quimati len quinequi iteco pa quichias, huan quichia in hual cahuilua pa quimacasi lacocoltilisli, ma yoje, yihual amo miac yes lahuitequili. Aqui yes hual quipia miac hual iteco quimacac, yoje yihual iteco quichias pa quicuepilis miac. Huan aqui yes hual iteco quimacas miac pa quiztias, yoje yihual quipias pa quicuepilis miac.

*Jesús quitilanis tixuxli pan lalticpan  
(Mt. 10:34-36)*



49 'Nihualac pa nicualicasquiaya ilahuelilitlisli Dios pan lalticpan, yes quinami niclasasquiaya tixuxli pan lalticpan. Huan ¡quichi nicnequi pa axan yesquiaya la'anilitli in lalticpan ca in tixuxli!

50 Ma yoje, monequi pa nipanuc lacocoltilisli, in yahui ye quinami se lacuayatequilisli hual nechcocus. ¡Quichi nicnequi pa lamis mochías!

51 ¿Anquijtúa pampa nihualaya pa nicchihuilisquiaya pa cayalosquiaya ca mosehuilisli yehuanten pan lalticpan? No, annimitzilía, nihualaya pa yajmo cayalosquiaya ca se laijnamiquilisli yehuanten.

52 Ma annimitznextili len nicnequi niquijtúa: Axan huan pa quiman lamis in lalticpan hual axan anquiximati, cayasi macuili pin se cali hual amo cayasi ca se laijnamiquilisli. Yeyenten amo quixtocasi quinami laijnamiquilo omenten, huan omenten amo quixtocasi quinami laijnamiquilo yeyenten.

53 Itajtzin amo mocahuas ca se laijnamiquilisli ca ixól, huan ixól amo mocahuas ca se laijnamiquilisli ca itajtzin. Inantzin amo mocahuas ca se laijnamiquilisli ca ixól sihual huan ixól sihual amo cayas ca se laijnamiquilisli ca inantzin. Inantzin amo cayas ca se laijnamiquilisli ca isihua ixól lacal huan isihua se lacal amo cayas ca se laijnamiquilisli ca inantzin ilahuical.

*Cayasi lanextilisli pin cielo hual amo quimatilo len quinequilo quijtulo*  
(Mt. 16:1-4; Mr. 8:11-13)

54 Cuaquinon Jesús quinmilitic yehuanten in míac lacalera:

—Anquita se mextemil pani pin laiztijcal, jan ajnaxcan anquijtúa: “Yahui quiahui”, huan yoje panúa.

55 Huan lanesi lapuhuitica, anquijtúa: “Yahui tona”, huan yoje panúa.

56 ¡Lacuajcuamananjimes hual anunca! Anmochía quinami lacames cuali huan amo anunca yoje. Anquimati len quinequilo quijtulo in lanextilisli hual anquinmita pan in lalticpan huan pin cielo. Huan amo anquimati len quinequilo anmitznextili innojen hual panujticate axan capa amhuanten, innojen lachihualisli hual niquinchijtica. Yoje annimitznextilijtica pampa Dios nechtilanic.

57 ¿Leca amo anquimati inon ca anmolajmatilisli?

*Xicsehuilti pa camo cualanis ca tehual se hual mitzmotexpahuilía*  
(Mt. 5:25-26)

58 'Cuajnesi mitzmotexpahuilía se hual molalía mopan, huan yihual mitzhuica pan lajco. Cuaquín ximotolini pa ticayas jan seppa ca yihual capa ayamo anajsis pan lajco. Sinda amo ticchías yoje, yihual mitzhuicas ilaixpan in la'ajuani huan in la'ajuani mitztemacas in policia huan in policia mijtzacuas pa calijtic.

59 Nimitzilía tehual, amo quiman tiquisas nepa sinda ayamo ticlaxlahuic mochi tomin tipichin hual titehuiquilía.

## 13

*Monequi pa ticpalasqui toyolo*

1 Pa in tonalijmes hualajque yehuanten hual quimachiltijque Jesús quinami Pilato quinmictic sequin lacames pin lalticpan Galilea huan quinipanic inminesli ca iesli inminhuendis hual yeje borregos.

2 Jesús quinnanquilic:

—¿Anquijtutica innojen lacames pa Galilea catanijme niman laijlaculi huan moxtin in oc sequin galileticos amo yoje laijlaculi? ¿Anquijtutica pampa inon panuje lacocoltilisli yoje pampa quichihuae míac hual amo cuali?

<sup>3</sup> Annimitzilía pampa no. Huan sinda amo anquipalas anmoyolo pa anpehuas anlajnamiquis quinami Dios quinequi, amhuanten anmoxtin quinami yehuanten anpolehuis huan yoje amo cayas quinami huil anmoquixtis pin polehuilisli.

<sup>4</sup> Huan nepa pin Jerusalén, innojen dieciocho (caxtuluhanye) lacames hual quinmictic in cali cuajtic Siloé in tonali hual huetzic inminpan, ¿anquij-tutica pampa yehuanten cataloaya niman laijlaculi huan moxtin in oc sequin hual chantilo pa Jerusalén amo yoje laijlaculi?

<sup>5</sup> No, annimitzilía, huan sinda amo anquipalas anmoyolo pa anpehuas anlajnamiquis quinami Dios quinequi, anmoxtin amhuanten anpolehuis quinami yehuanten, huan amo cayas quinami huil anmoquixtis pin miquilisli.

### *Se amacuál tipichin hual amo laqui*

<sup>6</sup> Cuaquinon quinmiliaya in laijnamiquiltisli pa quinmaxtisquiaya, quinmilitic:

—Cataya se lalac quiapiaya se amacuál tipichin hual ilaquilyo quicualo. Cataya latocali pa se cuajmili capa quintocac uvas. Hualac quintemujtataya laquilyo, huan amo quitac nindeno.

<sup>7</sup> Quilic itequipanujquil hual quiztataya in cuajmili latocali ca uvas, quil quilic: “Quita. Axcan quiplá ye xixil nihualaya nictemujtica laquilyo pan in amacuál tipichin huan amo niquiltilía nindeno. Xictzontequi pa huetzis huan pa yajmo mocahuas nepa, nelí amo unca cuali pa laquis. ¿Leca mocahua pin lali sinda amo laquis?”

<sup>8</sup> Huan yihual hual quiztíac quinanquilic: “Tata, xijcahua noje pa oc se xil, amo xicmayahui huan niclalmolunis itenco huan niclalis cuilal capa niclalmolunis.

<sup>9</sup> Cuajnesi ca inon laquis. Huan sinda amo laquis, cuaquinon ticmayahuis pa huetzis, pa yajmo mocahuas nepa.”

### *Jesús quipajtía se pan tonali hual mosehuilo in judíos*

<sup>10</sup> Cataya pan se tonali hual motequihuilo mosehuilo in judíos, huan Jesús lamaxtiaya pin se tiopan.

<sup>11</sup> Nepa cataya se sihual, quiapiaya se iyjecal amo cuali hual quiquixtiliaya ichicahualisli pa dieciocho xixil. Yoje quiapiaya pa nejnemisquiaya tepotzita, amo huil nadita momelahuaya.

<sup>12</sup> Jesús quitac, quinotzac pa hualasquiaya, quilic:

—Nito, yahui mitzmacahua in iyjecal hual mitzquixtilía mochicahualisli.

<sup>13</sup> Huan quinlalic imajmajuan ipan. Jan ajnaxcan yec lamelahuali, huan pehuac quijtc lajtomes huejué pa Dios.

<sup>14</sup> Huan ihué in tiopan cualanic pampa Jesús quipajtic pan in tonali hual mosehuilo in judíos. Pehuac quinmilitic yehuanten hual nepa cataloaya pin tiopan, quinmiliaya:

—Cate chucase tonalijmes, pan innojen monequi pa tequipanus se. Pan in tonalijmes xihualacan huan xicayacan lapajtíli, amo xihualacan pan in tonali hual timosehuilo.

<sup>15</sup> Huan in Tata Jesús quinanquilic:

—Lacuajcuamananjmes amhuanten hual anquijtúa anunca niman cuacuali. Mochi sejse ca amhuanten pan mochi tonalijmes hual anmosehuía quitoma ibuey o iburro capa ilpitate huan quihuica pa cunis al.

<sup>16</sup> Huan in sihual unca se imiahuil Abraham. Satanás quipiaya quinami lailpili pa dieciocho xixíl. Quichihuilic ca in ijyecal hual quiquixtilic ichicahualisli. Huan ¿amo monequiaya pa yihual yesquiaya latomali pan se tonali quiman timosehuilo?

<sup>17</sup> Quinmilic Jesús in lajtomes, yoje inminlaixpan moxtin quinpinahualtic yehuanten hual yeje ilacocolinjmes yihual. Huan in oc sequin pehualoaya quipialo míac paquilisli pampa Jesús quichihuaya míac hual pampa inon mocahualoaya moiztataloaya yehuanten ca lamajtilisli.

*Ilajnamiquitlisli in latocli tipichin*

(Mt. 13:31-32; Mr. 4:30-32)

<sup>18</sup> Jesús laqueztiac, quinmilic:

—¿Quinami len annimitzmaxtis pa anquimatis quinami huelitía Dios? ¿Ca len lamaxtilisli annimitzilis?

<sup>19</sup> Unca quinami se latocli cuixtito hual canac se lalac huan quilasac pa icuajmili. Ixuac, moscaltic huan mochíac se cuahuil huan in tutomes pehualoaya chantilo nepa.

*Jesús quinlaquetzilia quinami laxocoyajquil quichihuilia pan*

(Mt. 13:33)

<sup>20</sup> Oc sejpa quilic:

—¿Ca len lajtomes annimitznextilis quinami huelitía Dios?

<sup>21</sup> Unca quinami laxocoyajquil hual canac se sihual huan quiyamanic pa ye lamachihualonijmes itexli harina, cuaquín quiteposahualtic mochi itexli in harina.

*In lalapujquil pitzahuac*

(Mt. 7:13-14, 21-23)

<sup>22</sup> Huan panujtiahuiaya Jesús pa mochi in cajcaltlan huan in cajcaltlan tijtipichin. Lamaxtinemiaya, huan mojmosta cantiyahuiaya iojli pa Jerusalén.

<sup>23</sup> Huan se lalac quilic Jesús:

—Tata, ¿cate jan nadita lacames san hual yahuilo yelo laquixtili pin ipolehuilisli inminlajlaculisli?

<sup>24</sup> Huan Jesús quinmilic:

—Capa Dios huelitía unca quinami se cali hué hual quipía se lalapujquil san hual unca pitzahuac. Ximotolinican pa ancalaquis ca in lalapujquil pitzahuac, pampa annimitzilia cayasi míac hual quitemujtcate quinami calaquisi capa Dios huelitía, huan amo quiyasi in lahueliltilisli pa calaquisi nepa.

<sup>25</sup> Quiman moquetzac iTeco in cali huan quitzacuac in lalapujquil, cuaquinon amhuanten hual anunca pa quiahuac anpehuas anquinotzas pa in lalapujquil, anquilis: “¡Tata, xitechlapuli!” Huan yihual anmitznanquilis: “Amo annimitziximati, ¿capa anquisac pa anhualasquiaya nican?”

<sup>26</sup> Cuaquinon anpehuas anquilis: “Tilacuanijme huan tilaunijme capa tehual ticatani. Huan tehual tilamaxtini pa to'ojlimes huejué pa mochi innojen tocaltilan.”

<sup>27</sup> Huan in Teco anmitzilis: “Amo nicmati capa anquisac pa anhualasquiaya nican. Xiquisacan nican huejca ca capic amo niunca nehual, amhuanten anmoxtin hual anyuli anquichijtica in hual amo cuali.”

<sup>28</sup> Nepa cayasi chocalisli huan anquinchotcis anmolames quiman anquinmitas Abraham huan Isaac huan Jacob huan moxtin ilajtunijmes Dios hual cayasi capa Dios huelitijtica, huan amhuanten ancayas laquixtili pa quiahuac.

<sup>29</sup> Quema, hualasi lacames hual quisaje capa quisa in tonali huan capa calaquía in tonali huan hual quisaje pin norte huan pin sur. Huan molalisi inahuac pa capa Dios huelitía.

<sup>30</sup> Huan xiquitacan. Cate yehuanten hual ma yoje amo cayasi capa Dios huelitía, pampa amo quinequije quineltojade, mas que quimatije ilajtol Dios pin xixihuimes quiman ayamo quimatiloaya moxtin oc sequin. Huan cate yehuanten noje hual mas que ayamo quimatiloaya ilajtol Dios, ma yoje, pin tonali hual quimatije, cuaquin quineltojade. Yehuanten cayasi capa huelitía Dios.

### *Jesús quita Jerusalén huan choca*

(Mt. 23:37-39)

<sup>31</sup> Cuaquinon noje ajsitihualajque sequin fariseos capa cataya Jesús, quili-  
jqe:

—Xiquisa, ximohuica ca yoje, pampa quinequi mitzmictía Herodes.

<sup>32</sup> Jesús quinmilitic:

—Ximohuicacan huan quiman anquita in se hual quimati lacuajcuamana quinami se zorra, xiquilican: “Xiquita. Axan huan mosta nican ninicaya niquinquixtilitjía ijyecames amo cuajcuali huan nilapajtitías. Huan pa in ye tonali niájsis capa niajtía.”

<sup>33</sup> Ma yoje monequi pa nicanas ojli axan huan mosta huan huipla, pampa amo momacahuilitía pa miquis se ilajtuni Dios pa quiahuac Jerusalén.

<sup>34</sup> ¡Jerusalén, amhuanten pa Jerusalén, anquinmictía ilajtunijmes Dios, anquinlaxilía ca tixcalimes yehuanten hual Dios anmitztilanilía! Huan ¡quichi miac nicnequic annimitznechicuc pa annechneltoacasquiaya! Nicnequic annimitznechicuc quinami se lapachuani quinnechicúa iparachitos itzindan inastacapajmes, huan amo anquinequic.

<sup>35</sup> Xiquitacan. Dios yajmo unca nepa pa anmitziztías anmolacames. Axan anmitzcahuac pa anmoiztías amhuanten anmohuían, jan yoje anquinequi. Huan annimitzilía inon, lacames pa Jerusalén: Yajmo annechitas. San annechitas oc sejpá pan tonali quiman anquijtus: “Ma lajtucan moxtin, ma lajtucan ca lajtomes huejué pa yihual hual huala pampa Dios quitilanic ca ilahuelilitisli.”

## 14

### *Jesús quipajtia se hual quipía posahualisli*

<sup>1</sup> Cataya pan se tonali hual calaquic Jesús pa icali se hué fariseo pa lacuasquiaya, cataya in tonali hual mosehuilo in judíos. Huan yehuanten amo mócahualoaya pa quinapachilosquiaya.

<sup>2</sup> Cataya nepa ilaixpan Jesús se lalac, quiapiaya se cocolisli hual quiposahualtitataya.

<sup>3</sup> Huan Jesús quinmilitic in fariseos huan ilamaxtinijmes inminlajtol in judíos, quinmilitic:

—¿Quimacahuilitía tolajtol pa titepajtisi pan tonali hual timosehuilo, o amo quimacahuilitía?

<sup>4</sup> Yehuanten amo nahuatije. Cuaquinon Jesús quiquitzquic in lalac huan quipajtic huan quilic pa mohuicasquiaya.

<sup>5</sup> Cuaquinon quinmilitic:

—Amo unca se ca amhuanten hual amo quiquixtisquiaya jan ajnaxcan ixól o ibuey sinda huetzisqueiaya lajtic se coyunquil pan tonali hual timosehuilo.

<sup>6</sup> Huan momajtiloaya pa quinanquililosquiaya Jesús.

*Jesús quinmilía len quichihuasqui pin tonali hual quinnotzasqui pa lacuasqui*

<sup>7</sup> Huan quitaya Jesús quinami yehuanten hual cataloaya lanotzali pa lacualosquiaya itequi molajtultilijque pa yehuanten in icpalimes pa capa molalilosquiaya in huejueyenten pa lacualosquiaya. Pampín quinmilic in laijnamiquitlisli pa quinmaxtisquiaya, quinmilic:

<sup>8</sup>—Sinda mitznotta se pa tihualas pa se monamictilisli, amo ximoyaxcajtili se icpali hual unca pa in huejueyenten.

<sup>9</sup> Cuajnesi yihual hual mitznottzac noje quinotzac se hual tehual amo tiunca yoje hué quinami yihual. Cuaquín quihualicas huan mitzilis: “Xicmacahuilti pa molalis in lalac capa timolalijtica.” Cuaquinon tipehuas tipinahuas huan tías timolalis pan se icpali hual cayas pa yehuanten hual cate tijtipichin.

<sup>10</sup> No, xichía inon sinda tiunca lanotzali: Quiman tiajsis nepa, ximolali pan se icpali hual cayas pa yehuanten hual tijtipichinchito. Yoje, quiman hualas yihual hual mitznottzac pa in monamictilisli cuajnesi mitzilis: “Nito, ximolali pa in icpali hual unca pa se hué.” Cuaquinon, ticanas lasojlalisli inminlaixpan moxtin hual cayasi ca tehual pa lacuasi.

<sup>11</sup> Mochi seje hual mochías hué inminlaixpan oc sequin, yihual quichihuasi tipichinchito. Huan aqui yes hual mochías tipichinchito, yihual quichihuasi hué.

<sup>12</sup> Noje Jesús quiliaya yihual hual quinotzac, quilic:

—Sinda tía ticchía se fiesta hué capa tilalacualtía, amo xiquinnoztinemi itequi jan mocnían hual chantilo pa oc sequin calimes huan mocnían huan mochantinijmes san hual quipialo míac tomin. Sinda ticchijtías yoje, cuaquinon yehuanten mitznottzasi tehual huan yoje mitzcuepilisi in lachihualisli cuali.

<sup>13</sup> No, sinda tiquinnotzas lacames pa lacuasi pa mochan, xiquinmana yehuanten hual amo quipialo nindeno huan hual tungo huan hual amo huil nejnentalo huan hual pachacal.

<sup>14</sup> Yoje tipactías pampa yehuanten amo quipialo quinami mitzcuepilisi in lachihualisli cuali. Ma yoje, Dios mitzcuepilisi niman míac lachihualisli cuali pan in tonali tiyulis oc sejpa. In panus pan in tonali hual yulisi oc sejpa yehuanten hual iyaxca Dios hual ca yehuanten yihual amo quita nindeno amo cuali.

*Jesús laquetza de se lacualisli hué*  
(Mt. 22:1-10)

<sup>15</sup> Quicaquic in lajtomes se ca yehuanten hual cataloaya lacuajtataya ca yihual, quilic:

—Míac paquilisli cayas pa yihual hual quicuas ilacualisli capa Dios huelitía.

<sup>16</sup> Jesús quilic:

—Cataya se lalac yahuiaya quiyucxilti se lacualisli hué. Latilanic pa hualalosquiaya míac.

<sup>17</sup> In tonali hual mochi cataya layucxiltili, quitilanic itequipanujquil pa quinnahuatisquiaya yehuanten hual quinnotzac, quinmilic: “Xihualacan pampa axcan unca layucxiltili.”

<sup>18</sup> Cuaquín ca se laijnamiquilisli moxtin pehuaje quilije pampa amo yahuiloya yalo. In se hual in tequipanujquil pehuac quinotzac pa hualas quilic: “Nilamic nimocuhulic se cuajmili huan nicpía pa nías niquitas. Nimitzilía xichupjpuhua, amo huil nía.”

19 Oc se quil quilic: “Nilamic nimocuhuic macuili omenten bueyes huan niajtía pa niquinlaxahualtis pa nicmatis sinda cate cuali. Nimitzilía xichpujpuhua, amo huil nía.”

20 Huan oc se quilic: “Nilamic nimonamictic, pampín amo huil nía.”

21 Yoje mocuepac in tequipanujquil, quilamachiltic iteco innojen lajtomes. Cuaquín cualanic yihual hual quinnotzac pa hualalosquiaya, quilic itequipanujquil: “Xiejsehui xiquisa pa in ojlimes huejué pin caltilan huan in ojlimes tipichitos, huan xiquinmana xiquinhualica ca níc hual amo quipialo huan in tungos huan in pachacames huan yehuanten hual amo huil nejnemilo cuali.”

22 Huan itequipanujquil quichíac hual quilic iteco. Cuaquín mocuepac quilic: “Tata, nilamic nicchíac len tichilic huan jan yoje unca capa huil cayasi míac lacames.”

23 Huan in Tata quilic itequipanujquil: “Xiquisa pa quiahua in caltilan, xiquintemu yehuanten hual nejnentinemilo pan ojlimes, huan yehuanten hual mochahualo pin cuajlan pampa amo quipialo inminchan. Xiquinmana pa hualasi pa nochan pa yoje temis ca lacames nocali.

24 Nimitzilía, amo jan se ca yehuanten in lacames hual niquinnotzac pa hualalosquiaya yahui quicua nolacualisli.”

*¿Quichi monequi pa laxlahuis se sinda quinequi quitoca Cristo?  
(Mt. 10:37-38)*

25 Ca Jesús yajtiahuiloaya míac míac lacames. Cuaquín momalinac Jesús, quinmilic:

26 –Sinda se quinequi ye nomonextilini, quipías pa nechlasojlas niman míac, amo yoje quinami quinlasojla oc sequín. Quema, quipías pa nechlasojlas míac huan yoje nesis quinami yihual amo quinlasojla itajtzin huan inantzin huan isihua huan ixolomes huan icnían lacames huan sihuames. Quema, quipías pa nechlasojlas yoje míac, huan yoje nesis quinami yihual ihuán amo moixtoca. Sinda amo yoje, cuaquín amo huil yes nomonextilini.

27 Monequi pa nehual nimiquis. Yoje, aquí yes hual amo quinequi nech-toca huan amo quinequi miqui pa nehual, sinda cuajnesi monequi pa miquis pa nehual, cuaquín yihual amo huil ye nomonextilini.

28 Amo xipehuacan xiyén nomonextilinjmes sinda ayamo anquijnamiquic cuali in míac hual nía nicnequi pa anquichías pa nehual. Mochi sejse ca amhuanten hual yahui quichía se cali hué, quipehualtía molalijtica pa ajsis quimatis quichi quijtúa pampa yahui quipía pa quilaxlahuis. Yoje quitas da cajsis itomín pa laxlahuis in cali hual yahui quichía.

29 Sinda amo ajsi quimati se yoje, cuajnesi in tonali pehua quichía in cali hué, quita pampa itomin amo cajsis pa laxlahuis, amo huil lamis quichías. Cuaquínon moxtin hual quitalo pehuasi quihuitzquilisi in lalac.

30 Quilisi: “In lalac pehuac quichíac huan axan amo huil lamis quichías.”

31 Huan sinda se hué quinequi quichía moanalisi ca oc se hué, quipehualtía molalijtica pa ajsis quimatis sinda huil quisulahua in hué ca diez mil guaches hual quinpia, sinda in oc se hué quinpia veinte mil guaches hual hualalo pa quinamiquisi pa moanasi.

32 Huan sinda quijtúa pampa amo huil quisulahua, cuaquín quiman ayamo ajsiaya huan unca huéja in hué ca veinte mil guaches, in hué ca san diez mil guaches quinahuatía in oc se hué pampa amo quinequi moana ca yihual.

<sup>33</sup> Yoje, amaqui huil ye nomonextilini sinda amo nechmacahuilítia pa nicchías ca yihual len yes hual nicnequis nicchías ca yihual, quema, huan ca mochi hual unca iyaxca.

*Jesús laquetza inahuac istal hual yajmo latehcunía*

(Mt. 5:13; Mr. 9:50)

<sup>34</sup> Unca cuali in istal. Ma yoje, sinda in istal yajmo latehcunía quinami istal, cuaquín amaqui yahui quilalilía pan len yes quiyucxilitica pa quicuas.

<sup>35</sup> No, in istal hual yajmo latehcunía quinami istal yajmo unca cuali pa nindeno, yajmo unca cuali pa in lali huan pa in cuilal hual quimontulo. Jan quilasalo pa quiahuac san. Huan sinda se nomonextilini yajmo yuli quinami nehual, cuaquín noje yajmo unca cuali pa nehual. Ma lacaqui yihual hual quipía inacas pa lacaquis.

## 15

*Jesús quinpuhuilía len panus se iborrego hual mopoluc*

(Mt. 18:10-14)

<sup>1</sup> Huan ajsitihualaloaya moxtin in la'ananiymes hual quipixcaloaya tomin pa in romanos hual huelitiloaya. Noje ajsiloaya yehuanten hual yuliloaya amo cuali, hualaloaya pa quicaquilosquiaya Jesús.

<sup>2</sup> Pampa inon quimotexpahuililoaya in fariseos huan ilamaxtinijmes in-minlajtlo hual quineltocalo in judíos, quilije:

—In se quinamiquía quinami icnían in lacames hual amo yulilo cuali, quema, lacualo huan yehuanten.

<sup>3</sup> Cuaquinon Jesús quinmilic in laijnamiqutilisli pa quinmaxtisquiaya, quinmilic:

<sup>4</sup>—Sinda se lacal ca amhuanten quinpía cien borregos capa amaqui chanti, huan se iborrego mopolúa, cuaquín ¿amo quincahuas in noventa y nueve (nahuipuhualicaxtulihuanahui) borregos capa cataloaya huan yas latemus pa quitas in se hual mopoluc? Quema, yoje quichías.

<sup>5</sup> Huan quiman quitas in borrego, quilalis ca paquilisli pa ihuajcol.

<sup>6</sup> Huan quiman ajsis quimantica pa ichan, quinnotzas pa monechicusi yehuanten hual icnían pa oc sequin calimes huan yehuanten hual chantilo itenco, quinmilis: “Xicpiacan paquilisli ca nehual, pampa axan niquitac in borrego hual mopoluc.”

<sup>7</sup> Annimitzilía pampa cayasi niman míac paquilisli pin cielo quiman se lacal o se sihual hual amo yuli cuali quipalas iyolo pa pehuas laijnamiquis quinami Dios quinequi. Quema, cayas míac paquilisli pin cielo inahuac in se, amo cayas yoje míac paquilisli inminahuac noventainueve hual amo monequi pa quipalasi inminyolo pa pehuasi laijnamiquisi quinami Dios quinequi.

*Jesús quinpuhuilía inahuac in tomin lapoluli*

<sup>8</sup> O, sinda se sihual quinpía diez tomimes, mochi sejse ipati míac, huan sinda quipolúa se ca innojen tomimes, cuaquinon ¿amo quilalaltía se tapalcal pa lahuilisli huan quixpana in cali, huan ca melahualisli quitemúa pa quitas in tomin?

<sup>9</sup> Quema, yoje quichía. Huan quiman quita in tomin, quinnotza pa monechicusi icnían sihuames pa oc sequin calimes huan yehuanten hual chantilo itenco, quinmilía: “Xicpiacan paquilisli ca nehual, pampa axan niquitac in tomin hual nicpolujtataya.”

<sup>10</sup> Yoje annimitzilía, unca paquilisli ca Dios ilanahuatinijmes pin cielo sinda se hual unca laijlaculi quipala iyolo pa pehuas laijnamiquis quinami Dios quinequi.

*In xolol hual quilamic itomin itajtzin*

<sup>11</sup> Huan quinmilitic:

—Cataya se lalac quinpiaya ome ixolomes lacames.

<sup>12</sup> Huan in xól xocuyol quilic itajtzin: “Tata, xijxiluilil axan ilajco motomin hual cayas pa nehual.” Cuaquinon itajtzin quinxiluilic itomin ca in omenten ixolomes.

<sup>13</sup> Huan amo panuje míac tonalijmes, huan ixól xocuyol monechiculic mochi itomin hual quixiluilic itajtzin, cuaquinon quisac pa quiahuac ilali. Uyac pa se lali huejca, huan nepa quilantinemiaya mochi itomin. Amo cajcoquiaya tomin nindeno, yultataya yoje amo cuali.

<sup>14</sup> Quiman quilamic mochi hual quiapiaya, hualac se mayandi chichahuac pin lali capa cataya, huan yihual pehuac panuc mayanalislí.

<sup>15</sup> Uyac, quiyantic se lalac pin lali pa quimacasquiaya tequipanulisli. Yihual in lalac quitilanic pa icuajmili pa quilachilisquiaya icoyamimes (icuchis).

<sup>16</sup> Huan quinequiaya pachihui ca len quicuajtataloaya in coyamimes. Ma yoje, amaqui quimacaya nindeno pa quicuasquiaya.

<sup>17</sup> Pampín, quijnamiquic in amo cuali hual quichíac, quipalac iyolo pa laijnamiquisquiaya cuali, moilitic: “Quichi tequipanujquimes quinpía notajtzin huan yehuanten quipialo míac pa quicuasi, amo quicualo mochi. Huan nehual nican niunca huan nimiquí pampa nimayantinemi.

<sup>18</sup> Nimochijchías axan huan nías ca notajtzin huan niquilis: Tata, nicchíac len unca amo cuali ilaixpan Dios huan molaixpan tehual.

<sup>19</sup> Yajmo nimonotza pa niquijtus pampa niunca moxól. Xijchihuili axan pa nicayas se ca motequipanujquimes.”

<sup>20</sup> Yoje in xól mochijchíac, uyac ca itajtzin.

“Huan ayamo ajsic, quema, cataya huejca huan itajtzin pa ichan quitac ajsitihualac. Huan ca paquilisli niman hué molalujtíac ca ixól, quinapaluc quitenamictataya.

<sup>21</sup> Pehuac in xól quilic: “Tata, nicchíac len amo cuali ilaixpan Dios huan molaixpan tehual. Yoje amo nimonotza pa niquijtus pampa niunca moxól.”

<sup>22</sup> Ma yoje, itajtzin quinmilitic itequipanujquimes: “Xiejsehuican xijquixtican se nahuas niman cualtichin huan xiclaquentican noxól, xicualicacan se anillo pa ixerixa huan lacsames pa icxihuajmes.

<sup>23</sup> Huan xicualicacan in becerro tomahuac hual ticajcoctataloaya pa se fiesta. ¡Xicmictican, ma tilacuacan, ma tipaquican!

<sup>24</sup> Pampa in noxól cataya quinami miquic huan yulic oc sejpa, cataya lapoluli huan axan tiquitaje.” Huan pehualoaya mijtotilo ca paquilisli.

<sup>25</sup> In xól hué cataya pin cuajmili. Huan ajsic pa in cali, quinquic latzotontataloaya huan mijtotijtataloaya.

<sup>26</sup> Quinotzac pa hualasquiaya se ca in tequipanujquimes tipichinchitos, quilajlanic len panujtataya calijtic.

<sup>27</sup> Huan in tequipanujquil quilic: “Axan hualac mocni huan latilanic motajtzin pa quimictisi in becerro tomahuac hual ticajcoctataloaya pa fiesta, pampa mocni hualac. Yajmo unca quinami miquiaya, axan yultica.”

<sup>28</sup> Quicaquic inon, cualanic icni hué, amo quinequic calaquic. Huan quisac itajtzin, quiyantic ca lasojlalisli pa calaquisquiaya.



<sup>29</sup> Ma yoje, yihual quinanquilic itajtzin: “Xiquita. Quichi xixil nimtzequipanuilla huan amo quiman nimocahuac pa nimitzneltocas. Huan amo quiman tichmacac se chivito calica ticchihualosquiaya se fiesta nehual huan yehuanten hual niqinlasojla.

<sup>30</sup> Huan in tonali in se moxól hualac, in se hual quilamic motomin ca sihuames amo cuajcuali. Huan iticmictilic yihual in becerro tomahuac!”

<sup>31</sup> Itajtzin quilic: “Noxól, mojmosta tehual tiunca ca nehual huan mochi hual nicpia unca moyaxca.

<sup>32</sup> Huan amo cataya yoje ca mocni. Pampín, monequiaya pa ticpialosquiaya in fiesta huan pa ticpialosquiaya niman miac paquilisli. Unca pampa in mocni tehual cataya quinami miquic huan yulic oc seipa. Quema, unca pampa cataya lapoluli huan axan tiquitaje.”

## 16

### *Jesús laquetza inahuac ilaicanani se teco hual quilantataya itomin iteco*

<sup>1</sup> Cuaquinon Jesús quinlaquetzilic noje imonextilinjmes, quinmilic:

—Cataya se lalac quiapiaya niman miac calica yuliaya huan quiapiaya se laicanani. Huan sequin quilije in lalac quinami ilaicanani quilantinemiaya len iyaxca in lalac.

<sup>2</sup> Pampín in lalac latilanic pa hualalosquiaya ca yihual in laicanani huan quilic: “¿Leca nechililo pampa tehual itequi tichlaixtequilijtica? Axan, xilami xiquijcuilu mochi hual nechuiquilijtcate moxtin, pampa yajmo tiyes laicanani.”

<sup>3</sup> Cuaquin moilic in laicanani: “Axcán, ¿len nía nicchía pampa yajmo tiyes ilaicanani noteco? Amo nicpia chichualisli pa nitequipanus quinami se hual quimati cuajmilúa, huan nipinahuas pa niqinlajlanilis tomin oc sequin.

<sup>4</sup> ¡Ah! Axan nicmati len nicchías”, quil quilic, “pa nechajxiltisi oc sequin pa inminchan in tonali hual yajmo tiyes laicanani.”

<sup>5</sup> Cuaquinon quinnahuatic pa hualalosquiaya ca yihual moxtin yehuanten hual quihuiquilijtataloaya len in lalac iteco. Ajsije seise huan seise huan in laicanani quipehualtic ilajlanilisli ca se hual hualac, quilajlanic: “¿Quichi tiquihuiquila noteco?” Quinanquilic: “Tres cientos sesenta lamachihualoni ichahuac olivos”, quilic.

<sup>6</sup> Quilic in laicanani: “Xiquixtili moamal, xicana oc se amal, ximolali huan xiejehui xiquijcuilu pampa tiquihuiquila ciento ochenta san”, quilic.

<sup>7</sup> Cuaquinon in laicanani quilajlanic oc se, quil quilic: “Huan tehual, ¿quichi titehuiquilijtica?”, quilic. Huan quinanquilic: “Cien hanegas trigo”, quil quilic. In laicanani quilic: “Xicana in oc se amal huan xiquijcuilu ochenta.”

<sup>8</sup> Quimatic iteco in hual quichiac ilaicanani, huan yihual lajtuc ca lajtomes huejué pa in laicanani, mas que quicajcayahuilic in lalac itomin. Lajtuc hué pa yihual pampa in laicanani lanextilic quinami quimatiaya quinami molachilisquiaya mas que quichiac ca lacajcayahualisli. Yajmo yahuiaya ye ilaicanani in lalac iteco. Ma yoje, yehuanten hual quihuiquililoaya iteco axan yahuiloloaya quimacalo iyulilisli in laicanani. Yoje —quilic Jesús —, lacames pin lalticpan hual amo quineltocalo Dios, yehuanten quimatilo lachihualo ca oc sequin lacames hual amo quineltocalo Dios. Quema, lachihualo ca miac lajmatilisli, amo yoje miac lajmatilisli quipialo yehuanten hual quineltocalo Dios.

<sup>9</sup> Huan annimitzilía inon: Mas que lacames laijlaculi pin mochi in lalticpan lacuhualo huan lanamacalo ca miac tomin pa quichihuasi in hual amo

unca cuali, ma yoje, amhuanten xilachihuacan ca in tomin pa anmochías lajlasojli ca lacames pa yoje pan tonali quiman lamis in tomin, cuaquín ancayas la'ajxiltili pin calimes hual amo quiman lamisi.

<sup>10</sup> Noje Jesús quinmilic:

—Aqui yes hual quilachilía cuali len tipichin hual quililo pa quilachilis, yoje quilachilis cuali len hué hual quililo pa quilachilis. Huan aqui yes hual amo quilachilía cuali len tipichin hual quililo pa quilachilis, yoje yíal amo quilachilis cuali len hué hual quililo pa quilachilis.

<sup>11</sup> Yoje cayas sinda amo anquilachilía cuali innojen hual monotzalo pin lalticpan hual Dios anmitzilía pa anquinlachilis. Dios amo anmitzilis pa anquinlachilis innojen hual yihual iyaxca. Innojen amo quiman lamisi huan monotzalo niman míac hual amo yoje monotzalo innojen pin lalticpan.

<sup>12</sup> Huan sinda amo anquilachilía cuali in hual unca iyaxca oc se, nicnequi niqijitúa, in hual iyaxca Dios, cuaquinon Dios amo anmitzmacas len iyaxca pa yes anmoyaxca pa anquilachilis.

<sup>13</sup> Amaqui huil quinquipanuilía ome itecojuan, pampa amo quixtocas in se huan quixtocas in oc se, o quineltocas in se huan amo quineltocas in oc se. Huan noje amo huil anquitequipanuilía Dios sinda itequi antequipanúa san pa anquinmanas innojen hual iyaxca in lalticpan hual anquijitúa monotzalo.

<sup>14</sup> Quincaquiloaya mochi innojen lajtomes in fariseos, huan yehuanten quilasojlaloaya tomin míac. Pampín quilaxocuyililoaya Jesús pa quixixicuosquiaya.

<sup>15</sup> Pampín Jesús quinmilic:

—Amhuanten amo anmocahua pa anmonextilis inminlaixpan moxtin pampa anunca lacames niman cuajcuali. Ma yoje, Dios quimati len anquijitúa pa anmoyolo. Cate innojen, quema, hual lacames quijtulo pampa monotzalo míac, huan Dios amo quijtúa monotzalo míac. Innojen quicualantilo Dios, niman amo quinmixtoca.

### *Dios ilajtol huan quinami huelitía*

<sup>16</sup> Dios quimacac Moisés ilajtol huan Moisés quijcuiluc. Huan Dios quinmilic ilajtunijmes ilajtol huan yehuanten quijcuiluje. Huan mochi hual quijcuiluje Moisés huan ilajtunijmes Dios, inon anmitzmaxtic mochi hual Dios quinequiaya pa anquimatisquiaya quinami yihual unca. Cuaquinon hualac Juan Lacuayatequini, huan Dios pehuac quimaxtic lajtol yancuic. Axan moxtin quicacicate ilamachiltlisli cuali Dios huan quinami huelitía. Huan motolinli ca chicahualisli pa quipiasí Dios huelitijtca pa inminyolo. Ma yoje, amo quinequilo quipialo quinami Dios quilalic pa quipialosquiaya.

<sup>17</sup> Monequiaya pa cayasquiaya len ca míac chicahualisli pa quinlamis in cielo huan in lalticpan. Ma yoje, ca in míac chicahualisli, amo quiman huil quitzacuiliaya pa camo mochías jan se lajtol niman tipichin hual quijtúa Dios ilajtol.

### *Aquinojen hual quincajcahualo inminsihuahuan*

*(Mt. 19:1-12; Mr. 10:1-12)*

<sup>18</sup> Se lacal hual yajmo quinequi isihua huan quicajcahua, huan cuaquinon monamictía ca oc se sihual yoje cantica se sihual hual amo iyaxca. Huan jan yoje se lacal cana se sihual hual amo iyaxca sinda monamictía ca se sihual lacajcahuali hual ilahuical yajmo quinequiaya.

*In lacal hual quipiaya niman míac calica yuliaya huan Lázaro hual amo quipiaya len*

19 'Cataya, quil, se lalac hual quipiani niman míac. Molaquentini ca tzotzomajli cualtichin huan mojmosta quichihuani fiesta, quilamini míac tomin mojmosta.

20 Huan cataya se hual amo quipiani nindeno, yihual itocani Lázaro, lastataya cocoxqui pa ilalapujquil icali in lalac hual quipiani míac. Huan in Lázaro quipiaya sahuatera pa mochi icuerpo.

21 Huan mojmosta quinequiaya míac pa pachihuisquiaya ca in lacualisli hual quimayahuiloya itzindan capa lacuani in lalac hual quipiani míac. Ma yoje hualaloaya in pelojmes huan quipaluiloya isahuames Lázaro.

22 Cuaquinon se tonali polehuic in lalac Lázaro huan Dios ilanahuatinijmes pin cielo quihuicaje pin cielo (ilhuicac) capa unca Abraham, yihual hual quinpehualtic yehuanten in judíos. Huan polehuic in lalac hual quipiani míac huan quilalpachuje.

23 Huan cuaquín moitac capa yalo yehuanten hual miquilo amo quinelto-caticate Dios, huan nepa panuaya míac lacocoltilisli. Cuaquín lachiác huan quitac huejca Abrahám, huan yihual cataloaya Lázaro.

24 Huan in lalac hual quipiani míac quitzajtzilic, quilic: "Tata Abrahám, xichicnili, huan xictilani Lázaro pa quipaltilis pa al ilamili ixerixa pa nechiz-tialtilis nonejnepil, pampa nipanujtica míac lacocoltilisli pa in milinilisli."

25 Huan Abraham quilic: "Nito, xiquijnamiqui quinami tiquinpiani len niman cuajcuali nepa capa tiyulini pin lalticpan, huan Lázaro quipiani len amo cuali. Huan axan nican yihual quipia len cuali pin cielo huan tehual tipanujtica lacocoltilisli.

26 Huan ca mochi inon, unca se huejcalan niman palahuac lajco capa tehuanten huan amhuanten. Pampin yehuanten nican hual cuajnesi quinequiloaya panulo pa amhuanten amo huil. Noje nepa amo huil panulo pa tehuanten nican."

27 Cuaquín in lalac hual quipiani míac quilic: "Nimitztemachía cuaquín, Tata Abraham, xictilani Lázaro pa quinnahuatis yehuanten pa ichan notajzin,

28 pampa niquinpiá macuili nocnían. Ma quinnahuati pa yehuanten noje amo hualasi ca niquic capa panusi in lacocoltilisli."

29 Abraham quilic: "Yehuanten quipialo ilajtól Dios hual Moisés quijcuiluc, huan quipialo in hual quijcuilujé Dios ilajtunijmes. Ma momaxtican len unca lajcuiluli huan ma quineltoacan."

30 Huan in lalac hual quipiani míac tomin quilic: "Nocnían amo quinelto-casi Moisés huan Dios ilajtunijmes, Tata Abrahám. Ma yoje, sinda yahuiaya pa nocnían se hual miquic, cuaquinon, quema, quipalalosquiaya inminyolo pa pehualosquiaya laijnamiquilo quinami Dios quinequi."

31 Abraham quilic: "Sinda mocnían amo quinelto-caló in hual quijcuiluje Moisés huan Dios ilajtunijmes, cuaquinon amo huil quinlaneltocaltía se hual miquic huan yulic oc sejsa, mas que mocuepac capa yehuanten pa quinmilisquiaya."

## 17

*Jesús quinmotexpahuilá aquinojen quinmaxtilo oc sequin pa camo quinel-tocasi*

(Mt. 18:6-7, 21-22; Mr. 9:42)

1 Cuaquinon quinmilic Jesús imonextilnijmes:

—Amo mocahuas pa cayasi lacames hual quichihuasi len pa quitilanilis inminyolo oc sequin lacames pa yehuanten quichihuasi laijlaculisli. Pampín, iquichi yahui panúa lacocoltilisli in se hual quichías len quinami inon!

<sup>2</sup> Yesquiaya cuali pa quipilosquiaya se melapili etic pa iquixlan in se huan quilasalosquiaya pa in al huejcalan. Jo quema, cuali in quipanusquiaya, amo san gá yihual cuajnesi quitilanilis iyolo pa quichías laijlaculisli se ca yehuanten hual amo quipialo míac tonalijmes pehuaje nechneltocaje, yehuanten hual nechneltocalo quinami xolomes.

<sup>3</sup> Ximolachilican pa camo panus inon. Sinda mocni quichía se laijlaculisli, cuaquín xicajua. Sinda quipala iyolo pa pehuas laijnamiquis quinami Dios quinequi, xicpujpuhua huan yajmo xiquijnamiqui len quichíac.

<sup>4</sup> Huan cuajnesi mijchihuilis laijlaculisli tehual ca chicome lachihualisli pa se tonali huan pa in tonali hualas ca tehual quiman mijchihuilic seje ca in chicome lachihualisli, huan mitzilis ca mochi iyolo: “Nehcocúa noyolo pampa nimijchihuic in huan axcan yajmo quiman nimijchihuís.” Cuaquín sinda yoje mitzís, xicpujpuhua huan amo xiquijnamicría in laijlaculisli hual mijchihuic.

### *Laneltocalisli quimaca chichualisli se*

<sup>5</sup> Ilanahuatinijmes quilije in Tata Jesús, quilije:

—Xitechmaca míac lahueliltilisli pa tilaneltocasi niman cuali.

<sup>6</sup> In Tata Jesús quinmilitic:

—Se ilatocli mostaza ixua huan moscaltía huan mochías se cuahuil. Sinda anquipa laneltocalisli hual moscaltía quinami se ilatocli mostaza, cuaquín huil anquilisquiaya in xocol cuahuil nican, quil: “Ximocapuna huan ximootoca lajco pin al huejcalan.” Cuaquín anmitzneltocasquiaya, quichiasquiaya jan quinami tiquilic.

### *Jesús quinmilita len quipía pa quichías se hual latequipanuilita*

<sup>7</sup> Huan sinda se ca amhuanten ticpiasquiaya se latequipanujquil laxajtica o je lalac quinlachilijtica borregos, huan quisas pin cuajmili pa hualas pa in cali, amo tiquilis: “Xihuala ximolali pa tilacuas.”

<sup>8</sup> No, tiquilisquiaya: “Xiclali pan tixuxli pa yucsis pa tichmacas pa nilacuas, ximochijchía pa tichtequipanuilitis. Quiman nilamis nilacuas huan nilaunis, cuaquín huil tilacuas huan tilaunis tehual.”

<sup>9</sup> Cuaquinon, ¿ticsehuisquiaya in tequipanujquil pampa quichíac len tiquilic? No, amo ticsehuisquiaya.

<sup>10</sup> Yoje amhuanten, quiman yes anquichíac mochi in hual Dios anmitzilitic, cuaquín xiquijtucan: “Tehuanten titequipanujquimes hual amo timonotzalo, jan ticchihuaje inon hual ticpiaje pa ticchihuasi.”

### *Jesús quinpajtía majlacli cocoxquimes hual quipialo lepra*

<sup>11</sup> Huan cataya in Tata Jesús yajtiahuiaya pa Jerusalén, panujtiahuiaya lajco pa in ome lalimes Samaria huan Galilea pa inmintenco.

<sup>12</sup> Huan nican ajstitihualaya pa se caltilan tipichin capa quinnamiquic majlacli (diez) lacames quipialoaya in cocolisli itoca lepra. Yehuanten mocahuajque huejquita capa yihual cataya huan quinotzajque chichuac, quilijque:

<sup>13</sup> —¡Jesús, Lamaxtini, xitechicnili!

<sup>14</sup> Jesús quinmitac huan quinmilitic:

—Ximohuicacan huan ximonextican ca in tiopistas.

Huan cuaquinon quinpanuc quiman mohuicatihualoaya, yehuanten pajtisque.

<sup>15</sup> Se ca yehuanten quiztataya pampa pajtic, mocuepac quinmijtutica lajtomes huejué huan cuajcuali pa Dios ca lajtol chicahuac.

<sup>16</sup> Hualac huan huetzic pa icxihuajmes Jesús huan quisehuic. In se yec lacal samariteco huan in judíos amo quinmixtocalo in samaritecos.

<sup>17</sup> Yehuanten hual cataloaya ca Jesús quicaquijque Jesús quijtuc:

—¿Amo cataloaya diez lacames hual niquinpajtic? Huan in chicnahui lacames, ¿capa cate?

<sup>18</sup> ¿Unca jan in se san hual mocuepasquiaya pa quinmijtsquiaya lajtomes huejué huan cuajcuali pa Dios, in se lacal hual amo lacatic pa tolali tehuanten?

<sup>19</sup> Cuaquinon Jesús quilic in lacal samariteco:

—Ximoquetza huan ximohuica. Tichneltocac, pampín tipajtic, tiunca laquixtili pin amo cuali.

*Jesús quinmilía quinami ajsis inon quiman Dios huelitía*

*(Mt. 24:23-28, 36-41)*

<sup>20</sup> Quilajlanijque Jesús in fariseos, quilijque:

—¿Quiman ajsis in tonali hual huelitía Dios pan lalticpan?

Quinnanquilic Jesús:

—Mas que quitas se mochi in lanextilisli hual nesis nican pin lalticpan, ma yoje amo huil quimatis calía cayas ilanextilisli calica quimatis quinami ajsis inon quiman Dios huelitía pan lalticpan. Amo ajsis ca len lanextilisli hual quita se.

<sup>21</sup> Amo yalo quijtulo: “¡Quita, nican unca!”, o “¡Quita, nepa unca!” No, amo yalo quijtulo yoje. Xiquitacan. Inon quinami Dios huelitía axan unca capa amhuanten.

<sup>22</sup> Cuaquinon Jesús quinmilic imonextilinijmes, quilic:

—Ajsisi tonalijmes huan anquinctías pa ajsis jan ajnaxcan jan se tonali ca in tonalijmes capa nehual ilacal in cielo nihuelitis pan lalticpan. Anquinctías inon quiman ayamo nicpías pa nipehuas nihuelitis. Huan mas que anquinctías, ayamo ajsis.

<sup>23</sup> Anmitzilisi: “¡Quita, unca nepa! ¡Quita, unca nican!”, quil quilisi. Amo xijcahuacan anmotequipanulisli pa anquintocas in lacames, yehuanten islatatilo.

<sup>24</sup> Quinami in lapelanilisli lapelanía pa se ilajco pa in oc se ilajco in cielo, yoje yes in tonali hual nihualas nehual ilacal in cielo. Moxtin quimatis quiman inon panúa.

<sup>25</sup> Ma yoje, amo ajsis in tonali quiman ayamo nipanuc in lacocoltisli hual monequi pa nipanus huan pa nechilisi: “Amo ticnequilo pa ticayas nican.” Yoje nechilisi yehuanten hual yulticate axan.

<sup>26</sup> Huan jan quinami catani innojen tonalijmes hual yulini Noé pan lalticpan, yoje cayas pa innojen tonalijmes quiman nehual ilacal in cielo nimocuepas pan lalticpan.

<sup>27</sup> Nepa capa yulini Noé, lacames jan lacuanijme, launijme, monamicinijme huan quinmacanijme inminxolomes pa monamiciltosquiaya. Jan quijnamiquinijme innojen san. Yoje lachihuanijme, huan cuaquin ajsic in tonali hual calaquic Noé calijtic in arca. Cuaquinon hualac mochi in al huan quinmatocit moxtin in oc sequin.

<sup>28</sup> Jan yoje catani quinami inon pa innojen tonalijmes hual yulini in lacal itocaya Lot. Moxtin lacuanijme, launijme, lacuhuanijme, lanamacanijme, latocanijme, quinchihuaniyme calimes.

<sup>29</sup> Huan in tonali hual quisac Lot pa quiahuac in caltilan Sodoma, huetzije tixuxli huan azufre, quisac pin cielo, huan moxtin in oc sequin polehuije.

<sup>30</sup> Quinami cataya ca yehuanten, yoje cayas pan in tonali nehual ilacal in cielo nimonextis ca moxtin in lacames pin lalticpan.

<sup>31</sup> Pan in tonali, ma camo quijnamiqui amaqui len iyaxca hual quipías, ma camo laijnamiqui quinami yahui quinquixtía pa camo xitinis in hual quipía. Sinda unca pa quiahuac icali, ma camo calaqui. Huan noje sinda unca pin cuajmili, ma camo momalina pa canas len cayas pa itepotzcon.

<sup>32</sup> Xiquijnamiquican len quipanuc isihua Lot.

<sup>33</sup> Aqui yes hual jan quitemus san quinami huil quipías mochi hual quinequis pa iyulilisli nican pan lalticpan, yoje yihual quipolus iyulilisli. Dios quitilanis pa polehuilisli hual amo quiman lamis. Huan aqui yes hual amo quitemuqtías jan quinami quipías mochi in hual quinequis pa iyulilisli, yoje yihual quipías iyulilisli. Quema, quipías iyulilisli aqui yes hual momacahuiltis pa miquis pampa yihual quilasojla Dios huan ilahueliltisli.

<sup>34</sup> Annimitzilía pa in layúa, cayasi ome lacames pan se lapexli. Se cayas laquixtili pin polehuilisli, huan in oc se yes lacahuali.

<sup>35</sup> Cayasi ome sihuames testicate, in se cayas laquixtili huan in oc se yes lacahuali.

<sup>36</sup> Cayasi ome pin cuajmili. Se yes laquixtili huan in oc se yes lacahuali.

<sup>37</sup> Huan yehuanten quilajlanijque, quilijque:

—¿Ca capic, Tata?

Jesús quinmilic:

—Jan quinami capa unca se mijquil, nepa monechicusi in tzopilojmes.

## 18

### *Se laijnamiquiltisli inahuac se sihual ihuían huan in la'ajuani*

<sup>1</sup> Cuaquinon quinmilic Jesús se laijnamiquiltisli pa quinmactisquiaya quinami monequi pa moxtin amo mocahuasqui pa quilajlanisqui Dios huan amo siahuisqui,

<sup>2</sup> quinmilic:

—Cataya se la'ajuani pa se caltilan amo momajtiaya ilaixpan Dios, huan amo quimacajsiaya hual quijtuloaya lacames.

<sup>3</sup> Huan cataya se sihual ihuían pin caltilan amo mocahuaya pa hualas capa yihual, quilijtataya: “Xichnapati pa camo nechcaycayahuas in nolacocolini.” Huan pa miac tonalijmes amo quinequiaya quinapati in la'ajuani.

<sup>4</sup> Ma yoje, panuje tonalijmes, quijtuc lajtic yihual, quil: “Amo nimomajtía ilaixpan Dios, huan amo nicmacajsía hual quijtulo lacames.

<sup>5</sup> Ma yoje, nía nicnapatía in sihual ihuían jan pampa nechmacatica tequil. Sinda amo nicnapatis, yihual amo mocahuas pa hualas capa nehual huan nejsiahuiltis huan ca nadita amo huil nipanujtías in tequil.”

<sup>6</sup> Cuaquinon in Tata Jesús quilic:

—Xijcaquican len quijtúa in la'ajuani amo cuali.

<sup>7</sup> Huan Dios, ¿len quichías? ¿Amo quinnapatis yehuanten hual yihual quinlajtultic pa yelosquiaya iyaxca? Huan ¿huejcahuas pa quinnapatis?

<sup>8</sup> Neli annimitzilía, Dios quinnapatijtiquisas. Ma yoje, nehual ilacal in cielo, pa in tonali hual nihualas oc sepa, ¿nía niquinmita miac lacames pan lalticpan hual quineltocalo Dios ilamachiltisli cuali?

*Se laijnamiquiltlisli inminahuac in fariseo huan in la'anani hual quipixcaya tomin*

<sup>9</sup> Cuaquinon quinmilic Jesús se laijnamiquiltlisli pa yehuanten hual quijuloaya laijtic yehuanten pampa cataloaya lacames cuajcuali huan quinxijuloaya moxtin oc sequin. Quinmilic:

<sup>10</sup> —Cataloaya ome lacames panquisaje pa in tiopan hué pa quilajlanilosquiaya Dios. Se yec fariseo, in oc se yec se la'anani hual quipixcaya tomin pa in lahuellitlisli romano.

<sup>11</sup> Moquetzac in fariseo, quilic Dios in lajtomes pa lanextilisquiaya quinami yihual in fariseo cataya cuali, quilic: “Dios, nimijsehuía pampa amo niunca quinami moxtin in oc sequin lacames. Yehuanten laxtequinijmes, lacames hual amo quiman quineltoalo mochi in lajtol, lacames hual quinmanalo oc sequin sihuames. Quema, yehuanten quinami in la'anani hual quipixcaya tomin pa in romanos.

<sup>12</sup> Nel nimosahua ome lasahualisli mochi chicué tonalijmes, nimitzmaca se hual unca ca mochi diez tomin hual nechlaxlahuilo huan se hual moita ca mochi diez hual nicpixca.” Yoje quilic in fariseo.

<sup>13</sup> Huan in se hual quipixcaya tomin mocahuac huejca, amo quinequiaya lachía pa in cielo. Motecuaya pa itzindan iquixlan pampa icnotiaya pampa quinchíac laijlaculisli, quilijtataya: “O Dios, xichicnili, xichquixtili nolajlaculisli pampa nel in se hual nichíac laijlaculisli molaixpan tehual.” Yoje quilic in lalac hual quipixcaya tomin.

<sup>14</sup> Cuaquinon Jesús quinmilic yehuanten hual quicactataloaya:

—Annimitzilia inon. Temuc pa ichan in se hual quipixcaya tomin, Dios quiztataya quinami yajmo quipixtataya ilajlaculisli, pampa Dios quicaquic ilatemachilisli. Huan in fariseo temuc pa ichan quipixtataya ilajlaculisli. Cataya yoje pampa aqui yes hual mochías hué ilaixpan Dios, yihual Dios quichías tipichin. Huan aqui yes hual mochías tipichin ilaixpan Dios, yihual Dios quichías hué.

*Jesús quintuchía in xolomes*

*(Mt. 19:13-15; Mr. 10:13-16)*

<sup>15</sup> Huan quinhualiquililoaya Jesús in xolotzitzindis noje pa yihual quinmacasquiaya. Quitajque inon imonextilinijmes, pehuajque quinmajuajque yehuanten hual quinhualiquililoaya.

<sup>16</sup> Ma yoje, quinnotzac Jesús in xolotzitzindis pa hualalosquiaya capa yihual, quinmilic imonextilinijmes:

—Xiquinmacahuiltican pa hualasi capa nehual in xolotzitzindis. Amo xiquintzacuilican, pampa capa huelitía Dios jan moitasi yehuanten san hual quineltoalo ilajtol Dios quinami quineltoalo xolotzindis.

<sup>17</sup> Quema, annimitzilia neli, aquí yes hual amo quimacahuiltía pa Dios huelitis laijtic yihual quinami se xolotzindi quimacahuiltía huelitía, yihual amo quiman quipias Dios huelitijtica laijtic yihual. Unca pampa se xolotzindi quineltoaca mochi ilajtol Dios huan quineltoaca ca mochi iyolo.

*Se lalac yancuic hual quipiaya míac tomin laquetza ca Jesús*

*(Mt. 19:16-30; Mr. 10:17-31)*

<sup>18</sup> Huan se hué hual yec lalac yancuic quilajlanic Jesús, quilic:

—Lamaxtini ticuali, ¿len nichías pa nicanas in hual iyaxca Dios pa techmacas, iyulilisli hual amo quiman lamis?

<sup>19</sup> Jesús quilic:

—¿Leca tichilic pampa nicuali? Jan se san unca cuali, in unca Dios.

<sup>20</sup> Tiquinmati Dios ilajtomes hual ticpías pa tiquinneltocas: Amo xicana sihual hual amo mosihua, amo xilamicti, amo xilaxtequi, amo xiquili islacatilisli inahuac amaqui, xiquinlasojla ca momajtilisli motajtzin huan monantzin.

<sup>21</sup> In lacal yancuic quilic:

—Mochi innojen niquinneltocaya quiman niyec xolol huan quiman ni-mochíac lacal.

<sup>22</sup> Quicaquic Jesús inon, yihual quilic:

—Unca se lachihualisli hual ayamo ticchíac. Mochi hual ticpía xicnamaca huan xiquinxiluili yehuanten hual amo quipialo. Yoje ticpías nepa pa in cielo len hual monotza niman míac. Huan xihuala, xichtoca pa tiyes nomonextilini.

<sup>23</sup> Quincaquic innojen lajtomes in lacal yancuic, pehuac quicocuc iyolo míac, pampa quipiaya míac tomin.

<sup>24</sup> Quitac Jesús quinami in lacal yancuic icnotijtiahuiaya, huan quijtuc:

—¡Neli unca etic pa yehuanten hual quipialo míac pa quimacahuilitsi pa Dios huelitis pa inminyolo!

<sup>25</sup> Quema, unca niman etic pa se hual quipía míac pa quipías Dios huelititica pa iyolo. Amo unca yoje etic pa se camello calaquís huan quipanahuis pa iixtololon se lajtzomaloni.

<sup>26</sup> Yoje yehuanten hual quicaquijque inon quilijque:

—Cuaquín amo unca amaqui hual huil yes laquixtili pin ipolehuilisi ilajlaculisli.

<sup>27</sup> Jesús quinnanquilic:

—Dios huil quichía len yes hual amo huil quichihualo lacames.

<sup>28</sup> Cuaquinon Pedro quilic:

—Xiquita. Tijcajcahuaje mochi hual toyaxca pa timitztocalosquiaya pa tiyelosquiaya momonextilinijmes.

<sup>29</sup> Jesús quinmilic:

—Neli annimitzilía inon: Cuajnesi quincajcahuas se icali o isihua o icnían o itajtzin huan inantzin o ixolomes. Quincajcahuas pa quipías Dios huelititica pa iyolo.

<sup>30</sup> Se hual quichías yoje canas niman míac, huan quitas quinami amo cate míac innojen hual quincajcahuac. Quema, huan panus yoje ca moxtin, pampa quinpiás innojen axan capa yultica pin lalticpan. Huan pin lalticpan yancuic hual yahui caya, quipías yulilisi hual amo quiman lamis.

*Jesús laquetza oc sejpa pa quinmilis pampa yahui miqui*

*(Mt. 20:17-19; Mr. 10:32-34)*

<sup>31</sup> Cuaquinon Jesús quinhuicac in doce ilanahuatinijmes capa cataloaya inminhuán, quinmilic:

—Xiquitacan. Tipanquisticate pa Jerusalén huan lamis mochías mochi hual quijcuiluje Dios ilajtunijmes hual nehual ilacal in cielo nicpías pa nipanús.

<sup>32</sup> Quijcuiluje pampa nehual nechtemacasi ca yehuanten hual amo judíos. Yehuanten nechuitzquilisi, nechuejuecaltisi, nejchijchasi.

<sup>33</sup> Cuaquinon nechuitequisi huan nechmictisi. Huan quiman nechpanus inon, panusi ye tonalijmes huan niyulis oc sejpa.

<sup>34</sup> Yehuanten amo quimatiloaya nindeno len quinequiaya quiytu in lajtol hual Jesús quinmilic. Cataya quinami laticumac inminyolo.



*Jesús quipajtia se pachacal**(Mt. 20:29-34; Mr. 10:46-52)*

<sup>35</sup> Ajsitihualaya Jesús pa Jericó, huan cataya se lalac pachacal molalijtataya pa itenco in ojli, motemachilijtataya tomin.

<sup>36</sup> Huan quicaquic in miac lalacera panujtataloaya, quilajlanic pa quimatisquiaya len panujtataya.

<sup>37</sup> Quimachiltijque pampa Jesús in nazareteco panujtataya.

<sup>38</sup> Pampín tzajtzic, quilic:

—¡Jesús, tehual ixól David, xichicnili nehual!

<sup>39</sup> Yehuanten hual nejnemiloaya quilaicantataloaya Jesús cajuajque pa mocahuasquiaya. Ma yoje, yihual jan yoje amo mocahuaya pa tza-jtzisquiaya chichahuac, quilic:

—¡Tehual ixól David, xichicnili nehual!

<sup>40</sup> Moquetzac Jesús, latilanic pa quihuicalosquiaya in pachacal capa yihual.

<sup>41</sup> Ajsic yihual capa Jesús cataya, Jesús quilic:

—¿Len ticnequi pa nimijchihuilis tehual?

Huan yihual quilic:

—Tata, nicnequi nilachía.

<sup>42</sup> Huan Jesús quilic:

—¡Xilachía, cuaquín! Pampa ticneltocac, yoje tipajtic.

<sup>43</sup> Jan ajnaxcan lachiaya huan pehuaya quitoca Jesús pa in ojli, quinmij-tutataya lajtomes huejué huan cuajcuali pa Dios. Huan moxtin in oc sequin quijtuloaya lajtomes huejué pa Dios pampa quitajque len panuc.

**19***Jesús huan Zaqueo*

<sup>1</sup> Cuaquín Jesús calaquic in caltilan Jericó,

<sup>2</sup> huan pejtiahuiaya quipanahui in caltilan. Huan cataya se lalac motocaya Zaqueo, yihual yec in hué ca in la'ananiymes hual quipixcaloaya tomin pa in romanos hual hueltiloaya. Yec lalac hual quiyiaya miac tomin.

<sup>3</sup> Yihual quitemuaya quinami quitasquiaya Jesús pa quimatisquiaya aqui cataya. Huan amo huil quitaya pampa in lalacera quitzacuilijtataloaya. Yojque amo huil quitasquiaya pampa yihual yec lalac cuixtic huan amo huil lachiaya pa pani yehuanten.

<sup>4</sup> Pampín molalujtác ca capic yahuiloaya panulo moxtin. Lejcuc pan se cuahuil hual itoca sicómoro, lejcuc pa huil quitasquiaya Jesús, pampa yahuiaya panu pa in ojli nepa.

<sup>5</sup> Huan panuc Jesús ca ompic, lachiac pa pani huan quilic:

—Zaqueo, xitemujtiquisa, pampa monequi pa nimitzpxalulilis axan pa mochan.

<sup>6</sup> Yoje temujtiquisac Zaqueo, huan paquiaya niman miac pa yoje quinamiquisquiaya Jesús.

<sup>7</sup> Quitajque inon in lalacera, moxtin pehualoaya cualanilo pampa Jesús quichiac inon, quijtuloaya:

—Yihual uyac pa paxalus pa ichan se lalac laiylaculi.

<sup>8</sup> Cuaquinon moquetzac Zaqueo, quilic in Tata Jesús:

—Xiquita, Tata. Nía nicmaca yehuanten hual amo quipialo nindeno ilajco mochi in hual nicpía. Huan mochi sejse hual nijquixtilic tomin ca lacajcayahualisli, axan nía niclaxlahuía nahui tomin pa sejse tomin hual nijquixtilic yihual.

<sup>9</sup> Huan Jesús quilic:

—Axan in tonali moxtin pa icali Zaqueo cate laquixtili pin ipolehuilisli inminlajlaculisli, pampa yihual neli unca se imiahuil Abrahám. Axan quineltoca Dios quinami Abraham quineltocani.

<sup>10</sup> Unca laquixtili pin polehuilisli pampa nehual ilacal in cielo nihualaya pa nictemus huan pa nijquixtis pin polehuilisli aqui hual polejatataya.

*Jesús quinmilía se laijnamiquiltisli inahuac in majlacli (diez) tomin (Mt. 25:14-30)*

<sup>11</sup> Quincaquiloaya yehuanten innojen lajtomes, cuaquinon Jesús quinmilic oc se laijnamiquiltisli pa quinmaxtisqueiaya. Quinmilic inon pampa amo cataloaya huejca pa quiahuac Jerusalén, huan quijtuloaya yehuanten pampa jan ajnaxcan yahuiaya ajsi pan lalticpan in tonali hual Dios pehuaya hueliti.

<sup>12</sup> Huan Jesús quinmilic:

—Cataya se lacal lacatic pan huejueyenten, itajtzin yec se hué. Yahuiaya yahui in lacal pa se lali huejca, nepa yahuiloaya quichihuililo pa yesquiaya inminhué, cuaquinon yahuiaya mocuepa pa ilali.

<sup>13</sup> Ayamo uyac, huan latilanic pa hualalosquiaya capa yihual majlacli (diez) itequipanujquimes hual quitequipanuiloaya yihual ihuían. Quimcac tomin mochi seyse, quinmilic: “Xilacuhuacan huan xilanamacac can ca in tomin pa quiman nimocuepas.” Cuaquinon uyac.

<sup>14</sup> Ma yoje, yehuanten pa ilali amo quixtocaloaya, huan quinahuatije pa quililosquiaya: “Amo ticnequilo in se pa huelitis ca tehuanten.”

<sup>15</sup> Panuje tonalijmes, mochíac inminhué yehuanten nepa pin lali huejca. Cuaquinon, mocuepac pa ilali, quinnotzac pa hualalosquiaya capa yihual in diez tequipanujquimes hual quinmacac in tomin. Quinnotzac pa quimatiqueiaya quinami lacuhuaje huan lanamacaje huan quichi canaje ca in tomin.

<sup>16</sup> Hualac capa yihual in se calica pehuaya quilajlani quinami quichíac ca itomin, quilic: “Tata, motomin momiactic huan axan cate diez tomin pa mochi seyse tomin hual tichmacac.”

<sup>17</sup> Huan in Tata quilic: “Ticchíac cuali, tehual titequipanujquil cuali. Ticchíac cuali ca in nadita hual nimitzilic pa ticchihuasquiaya. Pampín, nicmati pampa tehual ticmati ticchía cuali ca mochi hual ticchías. Xihueliti pa innojen diez cajcaltlan.”

<sup>18</sup> Hualac oc se tequipanujquil, quilic: “Tata, motomin momiactic huan axan cate macuili tomin pa seyse tomin hual tichmacac.”

<sup>19</sup> Huan in hué quilic noje in se, quil: “Xihueliti tehual pa innojen macuili cajcaltlan.”

<sup>20</sup> Hualac oc se, quilic: “Tata, nican unca motomin, nicajcoquiaya pa se dango.

<sup>21</sup> Nicchíac yoje pampa nimomajtiaya molaixpan tehual pampa tehual tiunca se lacal chichahuac quinami se hual amo quipía pachihuilisli. Tiquihuica len amo ticlalic, ticpixca len hual amo tictocac.”

<sup>22</sup> In hué quilic: “Nimitzmotexpahuilía tehual pampa in hual tiquijtuc, titequipanujquil elehuis. Ticmatiaya pampa niunca se lacal chichahuac hual nicuica len amo niclalic. Huan ticmatiaya nel se lacal hual nicpixca len amo nictocac.

<sup>23</sup> ¿Leca, nuso, amo ticlalic notomin ca yehuanten hual quilanehuilo? Cuaquinon nehual nijquixtiaya ca míac quiman nihualaya.”

24 Cuaquín quinmilic yehuanten hual nepa moquezataloaya, quil: “Xiquixtilican in tomin huan xicmacacan in se hual canac diez tomin pa mochi sejse tomin hual nicmacac.”

25 Huan quilije: “Tata, quipía diez tomin pa mochi sejse tomin hual ticmacac.”

26 In hué quilic: “Annimitzilía inon. Aqui yes hual quipía, yihual quimacasi oc sequin míac. Huan aqui yes hual amo quipía, yihual quiquixtilisi in nadita hual quipía.

27 Huan innojen nolacocolinjmes hual amo quinequiloaya pa niyesquiaya inminhué, xiquinhualicacan nican, xiquinmictican nolaixpan.”

### *Jesús calaqui pin Jerusalén*

*(Mt. 21:1-11; Mr. 11:1-11; Jn. 12:12-19)*

28 Lamíc Jesús quinmilic innojen lajtomes, uyac laicantiahuiaya huan ja umpa quitocatiahuiyoaya yehuanten moxtin, panquistiahuiyoaya pa Jerusalén.

29 Ajsijque ilaixpan in lomita (tepetzindi) itoca Olivos, amo cataloaya huejca Betfagé huan Betania. Nepa Jesús quintilanic ome imonextilinjmes, 30 quinmilic:

—Xicalaquican in caltilan tipichin hual unca anmolaijpan. Nepa capa ancalaquis, anquitas se burra ixól ilpitica, ayamo quiman lejcuaaya amaqui. Xictomacan huán xicualicacan.

31 Huan sinda se anmitzajlanis: “Huan ¿leca anquitontica?” cuaquín yoje anquilis: “Monequi pa in Tata quipías yihual pa lejcus.”

32 Yoje uyaje yehuanten hual Jesús quintilanic, quitajque in burrito jan quinami Jesús quinmilic.

33 Huan quitontaloaya in burrito, itecojuan quinmilijque:

—¿Leca anquitontica in burrito?

34 Quinmilijque:

—Monequi pa in Tata quipías yihual pa lejcus.

35 Quihualicajque in burrito capa cataya Jesús. Cuaquinon quinlasajque inminlaquemes pani in burrito, quilejcultijque Jesús ipan.

36 Cuaquinon yajtiahuiaya in burrito, imonextilinjmes Jesús quilaicantiahuiyoaya lapixititataloaya ca inminlaquemes pa ojli pa yoje in burro nejnemisquiaya inminpan in laquemes.

37 Yojque ajsitiahuiaya Jesús ca capic pehualosquiaya temulo pin lomita (tepetzindi) itoca Olivos pa Jerusalén. Huan moxtin in míac monextilinjmes pehualoaya quijtulo lajtomes huejué huan cuajcuali pa Dios ca míac paquilisli huan ca lajtol chichahuac. In quichihualoaya pampa quinmitajque in míac hual Jesús quinchíac, yojque quinnextililoaya pampa yihual quipiaya ilahuelilitisli Dios.

38 Quililoaya:

—¡Dios quituchía huan quichihuilijtia cuali in hué hual quitilanic pan lalticpan! ¡Dios quijtuni pampa yahuiaya huala ca ilahuelilitisli Dios! ¡Pin cielo Dios moca Hua ca mosehuilisli ca in lacames! ¡Huan nepa capa niman pa pani moxtin quijtulo lajtol hué huan cuali pa Dios pampa inon!

39 Sequin fariseos hual cataloaya ca in míac lalalera quilijque Jesús:

—Lamaxtini, xiquinmili momonextilinjmes pa moca huasi.

40 Quinnanquilic Jesús, quil:

—Annimitzilía amhuanten pampa sinda amo nahuatilosquiaya yehuanten, cuaquinon tzajtzilosquiaya in tixcalimes.

<sup>41</sup> Huan quiman ajsitiajque pa Jerusalén, chocac Jesús quiman quitac in caltilan hué, quilic:

<sup>42</sup> —¡Sinda amhuanten pa Jerusalén anquimatiaya inon hual Dios anmitz-macasquiaya amhuanten pa yoje anquiplasquiaya yihual imosehuilisi pan anmoyolo! Huan axan Dios anmijtzacuilic pa como anquimatisquiaya.

<sup>43</sup> Ajsitihualasi tonalijmes huan yehuanten hual moanasi ca amhuanten quimontusi lali huan teles pa itenco anmocaltilan Jerusalem pa anmijtzacuilisi pa mochi laijtic, huan amo huil anmoquixtis.

<sup>44</sup> Cuaquinon yehuanten hual anmitzcocolisi anmitzlalhuitequisi pan lali, amhuanten huan anmoxolomes, huan amo quicahuasi se tixcali pa icalimes anmocaltilan, pampa yalo quinmayahuilo mochi. Yoje anmitzcuepilis Dios. Unca pampa amo anquimatiaya Dios hualac ca amhuanten pa innojen tonalijmes. Hualac pa anmitzquixtis pin polehuilisi.

### *Jesús quichipahua in tiopan hué*

(Mt. 21:12-17; Mr. 11:15-19; Jn. 2:13-22)

<sup>45</sup> Cuaquin calaquic Jesús calijtic in tiopan hué, pehuac quinquixtic pa quiahuac yehuanten hual lanamacaloaya nepa.

<sup>46</sup> Quinmilic:

—Yoje unca lajcuiluli pa iamal ilajtol Dios, quijtúa: “Nocali yes se cali capa lacames quilajlanilo Dios.” Yoje quijtúa. Huan amhuanten anquichíac in tiopan hué quinami inminchan laixtequinijmes.

<sup>47</sup> Lamaxtiaya mojmosta Jesús pin tiopan hué. Huan in tiopistas huejué huan ilamaxtinijmes inminlajtol in judíos quitemuloaya quinami quimictilosquiaya. Noje quinequiloaya quimictilo inminhueyeyenten in judíos.

<sup>48</sup> Ma yoje, amo huil quitaloaya quinami huil quichihualosquiaya, pampa mojmosta moxtin quinequiloaya quicaquilo, huan amo quiman quicahualoaya Jesús ihuán.

## 20

### *Ilahueliltilisi Jesús*

(Mt. 21:23-27; Mr. 11:27-33)

<sup>1</sup> Cataya pan se ca innojen tonalijmes lamaxtitataya Jesús pin tiopan hué, quinlaquetzilijtataya in lacames in lamachiltilisi cuali. Hualajque capa yihual in tiopistas huejué huan ilamaxtinijmes inminlajtol in judíos, huan noje hualajque oc sequin hueyenten.

<sup>2</sup> Quilijque:

—Xitechili ca aqui ilahueliltilisi anquichijtica innojen hual anquinchía. O ¿aqui unca in hual mitzmacac in lahueliltilisi?

<sup>3</sup> Huan Jesús quinnanquilic:

—Nehual noje annimitzljajlanis len huan amhuanten xichnanquilican.

<sup>4</sup> Juan Lacuayatequini quincuayatequini lacames pa yehuanten lanex-tilosquiaya pampa quipalaje inminyolo pa pehualosquiaya laijnamiquilo quinami Dios quinequi. ¿Ca aqui ilahueliltilisi quinchihuilini Juan inon? ¿Cataya ilahueliltilisi Dios o lacames?

<sup>5</sup> Yehuanten molaquetzilijque ca yehuanten inminhuán, moilijque:

—Sinda tiquilisi pampa cataya ilahueliltilisi Dios, cuaquinon techlajlanis: “¿Leca amo anquineltoac?”

<sup>6</sup> Sinda tiquilisi pampa cataya inminlahueliltilisi lacames, cuaquinon moxtin techlaxilisi tixcalimes, pampa yehuanten neli quijtulo pampa Juan yec ilajtuni Dios.

<sup>7</sup> Pampín quinanquilijque Jesús:

—Amo ticmatilo aqui ilahuelilitlisli quiapiaya Juan.

<sup>8</sup> Cuaquinon Jesús quinmilic:

—Huan nehual noje amo annimitzilis ca aqui ilahuelilitlisli niquinchía innojen.

*Sequin tequipanujquimes ej'elehuis*

(Mt. 21:33-44; Mr. 12:1-11)

<sup>9</sup> Cuaquinon pehuaya quinmili in lacames in laijnamiquiltlisli pa quinmactisquiaya, quinmilic:

—Cataya se lacal quilaltocac pan se cuajmili ipacholimes uva huan temacac lajlajco iuvatilan ca oc sequin lacames pa quitequipanuulisi. Cuaquín in lacal quisac pa ichan huan uyac huejca huan nepa mocahuac míac tonalijmes, huan in oc sequin lacames quilachililoaya iuvatilan.

<sup>10</sup> Yucsije in uvas, huan in lacal quitilanic se tequipanujquil pa yasquiaya pa in lacames hual quilachililoaya iuvatilan. Quintilanilic pa yehuanten quimacalosciaya se ilajco in uvas hual quitequije. Huan in lacames quihuitequije chicahuac, huan quicholultije huejca, amo quimacaje uvas nindeno.

<sup>11</sup> Oc sejpa in lacal quitilanic oc se itequipanujquil. Huan yihual noje quihuitequije chicahuac huan quihuejuecaltije, cuaquín quicholultije, amo quimacaje nindeno.

<sup>12</sup> Oc sejpa quitilanic oc se tequipanujquil, huan in se quitecuaje huan quisaya esli, cuaquín quilasaje pa quiahuac.

<sup>13</sup> Cuaquinon quijtuc iteco in uvatilan, quil: “¿Len nicchías? Axcan nictilanis noxól, yihual hual nicnequi míac. Cuajnési ca yihual quimatisi momajtisi.”

<sup>14</sup> Ma yoje, in tonali in tequipanujquimes ej'elehuis quitaje ixól, molaquetzilije, moilije: “In se yahui quipía in uvatilan pampa unca iyaxca itajtzin. Ma ticmictican pa timoyaxajtisi fehuanten in uvatilan pa yes toyaxca.”

<sup>15</sup> Cuaquinon quilasaje pa quiahuac in uvatilan, nepa quimictije. ¿Len, axan, quinchihuilis in lacames iteco in uvatilan?

<sup>16</sup> Yihual hualas huan quinmictis in lacames ej'elehuis. Cuaquinon temacas ca lajlajco iuvatilan ca oc sequin lacames pa quitequipanuulisi. Ja in san.

Yehuanten hual quicaquijque in laijnamiquiltlisli quilijque:

—Ma camo quimacahuiltili Dios pa panus inon.

<sup>17</sup> Huan Jesús lachíac capa yehuanten huan quinmilic:

—Cuaquinon, ¿len quinejquijtu in hual unca lajcuiluli pa Dios ilajtol? Yoje quijtúa:

Cataya se tixcali hual amo quinequiloaya quilalilo yehuanten hual quichihualoaya in cali.

Ma yoje iteco in cali quilalic in tixcali capa yehuanten hual quichihualoaya in cali yahuilaloaya quipehualtilo in cali.

Pampín quipialoaya pa quinlalilosquiaya in oc sequin tixcalimes pejticate capa quilalic in tixcali iteco in cali.

Yoje quijtúa ilajtol Dios huan quinejquijtu inon:

<sup>18</sup> Sinda se mochías nolacocolini cuaquinon yes quinami momañajtsi huan huetzís pan in tixcali. Cayas quinami latecuali chicahuac. Huan sinda se mocahuac amo quinectica nechnehtoca, yes quinami in tixcali huetzísquiaya pani yihual huan quitesisquiaya pa mochihuasquiaya lalmoluncal hual in iyyecal quihuicasquiaya. Quinami yoje cayas pan tonali Dios quitojtocas ilaixpan yihual se lacal. Yoje mocahuas laijcuanli, yajmo huil ajsi capa Dios.

*Ilapixcalisli tomin, ¿ticlaxlahuisi?**(Mt. 22:15-22; Mr. 12:13-17)*

<sup>19</sup> Cuaquinon ca nadita quitemujque quinami huil quiquitzquilosquiaya Jesús in tiopistas huejé huan ilamaxtinijmes inminlajtol in judíos. Ma yoje momajtiloaya pampa in lacames quicaquiloaya. Quimatiloaya in huejueyenten pampa Jesús quinequiaya quiytu pampa yehuanten cataloaya quinami innojen lacames e'elehéis quiman quinmiliaya in laijnamiquiltisli.

<sup>20</sup> Ma yoje, mocahualoaya laijcuanili nadita, quichialoaya pa quiman huil ajsilosquiaya ca yihual. Cuaquinon quinlaquehuaque lanapachinijmes, mochihuaje quinami cataloaya lacames cuali mas que lacuajcuamanoaya. Yoje quinequiloaya quichihuililo pa quiytusquiaya Jesús len lajtol calica huil quimotexpahuililosquiaya. Yoje quitemacalosquiaya pa in gobernador romano. Cataya jan yihual san hual quiipiaya lahueliltisli pa latilanisquiaya pa quimictilsquiaya Jesús.

<sup>21</sup> Huan in lanapachinijmes quilajlanijque Jesús, quilijque:

—Lamaxtini, ticmatilo pampa tehual tiquijtúa len unca cuali huan ticmaxtía len unca cuali. Ticmatilo noje pampa amo tiquita se quinami yihual cuali huan oc se amo yoje cuali. Huan ticmaxtía iojli Dios hual yihual quilalic pa canasi moxtin. Ticmaxtía melahuac, amo quiman ticmaxtía len hual amo unca quinami Dios quijtúa.

<sup>22</sup> Axan, xitechili, ¿quimacahuiltía tolajtol pa ticlaxlahuisi in hué César in tomin pa ilahueliltisli, o amo quimacahuiltía?

<sup>23</sup> Jesús quimatiaya quinami yehuanten quichihualoaya pa quimoixpolultilosquiaya ca ilajtomes. Cuaquinon huil quimotexpahuililoaya inminlaix-pa in hueyenten ihuelitinijmes in hué César. Yoje Jesús quinmilic:

—Xichnextili se tomin.

<sup>24</sup> Quinextilijque. Cuaquinon quinmilic:

—¿Aqui unca in itzontecon huan itoca pan in tomin?

Yehuanten quilijque:

—Unca iyaxca in hué César.

<sup>25</sup> Cuaquinon Jesús quinmilic:

—Pampín, anquipía pa anquilaxlahuis in tomin pa in hué César ilahueliltisli, huan anquipía pa anquimacas César mochi hual unca iyaxca César. Huan jan yoje anquipía pa anquimacas Dios mochi hual unca iyaxca Dios.

<sup>26</sup> Yojque amo huil quiytuloaya nindeno amo cuali ca quinami quin-nanquilic Jesús, pampa moxtin yehuanten hual nepa moquezataloaya quicaquiloaya Jesús huan quimatiloaya pampa amo moixpoluc ca innojen lajtomes hual quinnanquilic. Huan mocahualoaya moizticate lapolultili in lacames hual quilajlanijque inon. Mocahualoaya yoje pampa quinnanquilic Jesús ca ilajmatilisli hué.

*Quilajlanilo Jesús sinda yulisqui oc sejpa**(Mt. 22:23-33; Mr. 12:18-27)*

<sup>27</sup> Cuaquinon hualajque capa Jesús sequin saduceos, yehuanten quimaxtilo pampa amo yulisqui oc sejpa yehuanten hual miquilo. Huan quilajlanijque Jesús, quilijque:

<sup>28</sup> —Lamaxtini, Moisés hual yulini pa yina techijcuilulic inon: Sinda se lalac miquí, quiipía isihua huan amo quinpialo xolomes, cuaquinon icni in lalac hual miquic canas isihua icni hual miquic. Cuaquinon yehuanten quinpiasi xolomes huan quintocayaltisi quinami motocaya icni hual miquic.

29 Axan, cataloaya chicome icnían. Canac se sihual se inimcni, amo quinpiaje xolomes, cuaquín miquic in lalac.

30 Canac isihua ihuían oc se icni, cuaquinon miquic, amo quinpiaje xolomes.

31 Huan umpa canac in sihual ihuían oc se icni, miquic. Yojque panuc ca moxtin in chicome, amo quinpioaloaya xolomes ca in sihual, moxtin miquije.

32 Huan cuaquín miquic in sihual noje.

33 Axcan, sinda yulisi oc sejpa yehuanten hual miquilo, ¿pa calía innojen chicome yes in sihual? Pampa moxtin in chicome lacames quipialoaya in sihual.

34 Jesús quinnanquiloc:

—Jan yehuanten hual yulilo pin lalticpan monamictilo.

35 Ma yoje, quiman lamis in lalticpan hual axan unca, amo monamictilo yehuanten hual Dios quinlajtultic pa yulisi oc sejpa capa yihual unca pin cielo.

36 Noje yajmo huil miquilo, cayasi quinami in lanahuatinijmes pin cielo. Yehuanten amo monamictilo huan amo miquilo. Quema, cate ixolomes Dios yehuanten hual yulisi capa yihual quiman miquisi.

37 Huan neli unca pampa yehuanten hual miquilo yulisi oc sejpa. Moisés anmitzmachiltia inon, pampa quijcuiluc len in Tata Dios quiloc nepa quilaquetzilijtataya ca ilajtol quistataya pin huitzcuajtzindi. Quiloc: “Nehual iDios Abraham huan iDios Isaac huan iDios Jacob”, quiloc.

38 Dios amo unca inminDios in mijquimes, yihual inminDios yehuanten hual yulticate, pampa Dios quinmita moxtin quinami yulticate.

39 Cuaquinon sequin ca ilamaxtinijmes inminlajtol in judíos quilijque:

—Lamaxtini, tilajtuc cuali.

40 Inon quilijque pampa axan momajtiloaya pa quilajlanilosquiaya oc se lajtol.

*¿Aqui ixolol in Cristo?*

*(Mt. 22:41-46; Mr. 12:35-37)*

41 Cuaquinon Jesús quinmiloc:

—¿Quinami huil quijtulo pampa in Cristo ja unca san imiahuil David?

42 Yihual David quijtúa pa iamal in Salmos yoje:

In Tata Dios quiloc noTata, quiloc:

“Xihueliti ca nehual timolalijtica pa noma cuali.

43 Huan ajsis in tonali hual niquinchihuilis moxtin molacocolinijmes pa mitzneltocasqui.”

44 Yoje, David quitocayaltic “noTata.” Pampín, in Cristo unca niman hué huan David amo unca hué quinami yihual. Cuaquín, ¿quinami unca in Cristo imiahuil?

*Jesús quinmotexpahuilia ilamaxtinijmes inminlajtol in judíos*

*(Mt. 23:1-36; Mr. 12:38-40; Lc. 11:37-54)*

45 Cuaquinon Jesús quinlaquetziloc imonextilinijmes huan moxtin in oc sequin noje quicaquiloaya len quinmilijtataya, quinmiloc:

46 —Ximijmaztiacan inminpampa ilamaxtinijmes in lajtol. Yehuanten quinequilo molaquentitinemilo ca nahuajmes cuajcualtichin. Quixtocalo pa moxtin quinpialtilo ca mochi momajtilisli pin lajcojtiyan. Quixtocalo molalilo pin tiopajmes capa cate in icpalimes pa in huejueyenten. Huan quiman molalilo pa lacuasi, quixtocalo molalilo pan icpalimes hual cate pa in huejueyenten.

<sup>47</sup> Quinequilo pa moxtin quinmomaajtílisi míac, huan ma yoje, quincacayahualo sihuames hual cate inminhuían, quinmoyaxcajtílilo inmincalimes. Huan pa nesisi quinami cate lacames cuajcuali, mas que quinmixtequílilo, huejcahualo míac mochijcate quinami quilajlanticate Dios, quijttucate míac lajtomes. Yehuanten Dios quincocoltis niman míac, amo yoje míac quincocoltis oc sequin.

## 21

### *Itomin in sihual ihuían hual san quipiaya nadita pa molacualtis* (Mr. 12:41-44)

<sup>1</sup> Cuaquinon lachíac Jesús, quinmitac yehuanten in lacames hual quipialoaya míac tomin quilalijtataloaya inmintomin pin capa quilasaloaya tomin nepa pin tiopan hué.

<sup>2</sup> Huan quitac se sihual ihuían amo quipiaya ca len yulis. Yihual quilalic nepa ome tomin hual cataloaya tijtipichin, amo cataloaya oc sequin tomin yoje tipichin.

<sup>3</sup> Cuaquín Jesús quinmíllic in lacames:

—Neli annimitzilía, Dios quita quinami in sihual ihuían quilalic nepa míac tomin. Amo yoje míac inon hual in oc sequin quilalije, mas que yehuanten quilasaje nepa míac tomin.

<sup>4</sup> Unca pampa yehuanten quimacaje nadita inmintomin hual quipialoaya míac. Huan mas que in sihual ihuían amo quipiaya calica molacualtis, quilalic mochi in tomin hual quipiaya.

### *Jesús quinmili pampa cayas laxitinili in tiopan hué* (Mt. 24:1-2; Mr. 13:1-2)

<sup>5</sup> Sequin laquetzaloaya quinami in tiopan hué cataya lachihuali ca teles cuajcualtichin, noje cataloaya cajcapa míac hual ij'ipati hual lacames hual quipialoaya míac tomin quimacajque Dios. Huan Jesús quinmíllic:

<sup>6</sup> —Xitini innojen hual anquinmiztica. Ajsisi in tonalijmes huan amo mocahuas se tel ipan oc se tel, mochi yesi lamayahuili.

### *Jesús quinmilia len panus pan tonalijmes quiman yahui lami in lalticpan hual axan unca*

(Mt. 24:3-28; Mr. 13:3-23)

<sup>7</sup> Quilajlanijque Jesús, quilijque:

—Lamaxtini, ¿quiman yahui panúa inon? Huan ¿quinami ticmatisi quiman mochi inon yahui pehua panúa?

<sup>8</sup> Jesús quinanquíllic:

—Ximolachilijtiacan pa camo anmocahuas pa anquineltochas nolajtomes, pampa hualasi míac hual motocasi ca notoca pa yoje quipias lahuellitilisi inon hual anmitzilisi. Anmitzilisi: “Nehual niCristo.” Huan quilisi: “Axcan ajsic in tonali hual Dios anmitzilic.” Amo xiquintocatiacan.

<sup>9</sup> Huan quiman yes anmitzmachiltisi pampa cate moanalisi huan quinami lacames cualantinemisi pa quichihuasi moanalisi, amo ximomajitiacan pampa mochi innojen quipialo pa panusi pa quinpehualtis itonalijmes in lacocótilisli. Ma yoje, ayamo lami in lalticpan.

<sup>10</sup> Cuaquinon quinmíllic Jesús:

—Moanasi yehuanten pa se lali ca yehuanten pa oc se lali, huan amo mosehuisi pa moanasi. Quema, cajcapa yes moantiasi, huan in huejueyenten pa se lali quichihuilijtiasi pa inminguaches pa inminlali moanasi ca oc se lali iguaches. Yoje panus ca míac lalimes.



<sup>11</sup> Cayasi m'iac laulinilisi chijchicahuac cajcapa pa mochi in lalticpan. Huan cayasi cajcapa pin lalticpan mayandi huan m'iacocolisli hual mosemanas ca m'iac lacames cajcapa cayasi. Cayasi lanextilisli hual quinmajmajtisi moxtin. Huan nesisi pin cielo oc sequin lanextilisli hual quinmahuisultisi lacames ca lamajtilisi hué.

<sup>12</sup> Ma yoje, mochi innojen panusi quiman panuje tonalijmes capa anmitzquitzi pa anmijtzacuasi pa calijtic. Anmitztojtocasi, anmitztemacasi inminlaixpan inminhuejueyenten in tiopajmes pa anmitzlajlajlanisi amhuanten. Anmijtzacuasi pa calijtic quinami anyesquiaya lacames niman amo cuajcuali. Anmitzhuicasi inminlaixpan in huejueyenten huan huelitinijmes pampa annechneltoca.

<sup>13</sup> Pa innojen tonalijmes quiman anmitzpanus innojen, yoje anmitzmacas quinami huil anquinlaquetzilis quinami nehual huil niquinquixtia pin polehuilisi.

<sup>14</sup> Yoje, xicalican in pa anmoyolo: Amo xilajtucan pa anmoyolo quinami anyahui anquinnanquilía quiman yes ayamo ancayas inminlaixpan yehuanten pa anmonapatis,

<sup>15</sup> pampa nehual annimitzpalehuis. Nehual annimitzhueliltis pa anlajtus huan annimitzmacas noje lajmatilisli ca lajtomes huan annimitznextilis jan yoje quinami anquinmilis in lajtomes. Yoje moxtin anmolacolinijmes amo quimatisi quinami monanquilisi in lajmatilisli hual annimitzmacas, huan yehuanten amo huil anmitznanquilisi len pa monapatisi pampa annimitzmacas in lajtomes.

<sup>16</sup> Huan anmitztemacasi anmotajtzitzían huan anmocnían huan anmocnían pa oc sequin calimes, anmitztemacasi ca in huejueyenten huan sequin ca amhuanten anmitzmictisi in huejueyenten.

<sup>17</sup> Quema, moxtin amo anmitzixtocasi, anmitzcocolisi pampa annechneltoca nehual.

<sup>18</sup> Ma yoje, mas que anpanus in lacocoltilisli, Dios amo quiman quinmacahuiltis pa anmitzquixtisi capa yihual unca, no, amo jan se anmotzondi.

<sup>19</sup> Ximopepenialtican mochi inon ca chichualisli, pampa yoje anquipias anmoyulilisli, mas que cuajnesi anmitzmictisi.

<sup>20</sup> Huan in tonali hual anquitas in caltilan hué Jerusalén ca m'iac m'iac guachaje itenco, cuaquinon xicmatican pampa in guachaje amo huejcahuasi pa quixitinisi.

<sup>21</sup> Cuaquinon yehuanten hual cate pin mochi in lalticpan Judea ma cholucan pa in lomas huejca. Huan yehuanten hual cayasi pa Jerusalén ma quistiquisacan. Huan yehuanten hual cayasi pa quiahuac Jerusalén, yehuanten hual chantilo pa caltilan tijtipichin huan pin cuajlan itenco Jerusalén, ma como calaquican pa Jerusalén.

<sup>22</sup> No —quilic Jesús—, ma como calaquican, pampa in tonalijmes cayasi tonalijmes hual Dios quincocoltis in judíos pampa amo quineltovalo. Quincocoltis pampa quichihuaje m'iac pa quintzacuilisi lacames pa como quineltoyasi ilamachiltisli cuali. Mochias mochi hual unca lajcuiluli inminahuac in lacocoltilisli hual yalo panulo.

<sup>23</sup> Huan ¡quichi panusi lacocoltilisli in sihuames hual yalo quilacatitilo xolomes, huan yehuanten hual lachichiltitiasi innojen tonalijmes! Quema, pampa moxtin in lacames hual mocahualo pin lali panusi lacocoltilisli. Dios icualanilisli cayas pan yehuanten.

<sup>24</sup> In guaches quinmictisi ca inminteposlimes calica moanalo, huan quinhuicasi lailpili pa yesi tequipanujquimes hual amo quinlaxlahuilo pa mochi inminlalimes yehuanten hual amo judíos, amo mocuepasi ca caniquic. Huan

mocahuas Jerusalén se caltilan capa lacames hual amo judíos huelitisi. Nican huelitisi pa míac xixihuil. Cuaquín ajsis in tonali quiman lamisi in xixihuimes hual Dios quinlalic pa huelitisi.

*Jesús quinmilía quinami yihual yahui huala oc sejpa pan lalticpan*

(Mt. 24:29-35, 42-44; Mr. 13:24-37)

<sup>25</sup> Cayasi quinami lanextilisli pa in tonali huan in mesli huan in luceros (silalimes), pampín momajtisi lacames. Huan nican pan in lalticpan comuntías huan majcoctías chicahuac in al huejcalan, huan pampín momajtisi in lacames pampa amo quimatasi leca yoje quichías.

<sup>26</sup> Quema, lacames miqusi ca momajtilisli pampa quiztiasi innojen hual yahui quipanúa in lalticpan capa yulilo. Momajtisi pampa motzejzelusi ichicahualisli mochi in cielo huan in lalticpan.

<sup>27</sup> Cuaquinon, moxtin nechitisi nehual ilacal in cielo. Nechitisi nihualas pan se mextemil, nihualas ca chicahualisli hué huan laixpelalisli niman cualtichin.

<sup>28</sup> Pampín, in tonali quiman pehuasi panusi innojen, ximochijchijtiacan huan xilachixtiacan. Xicayacan quinami anyahui anquita in hual anquequiaya anquita pa quiman, pampa quema, ajsitihualas in tonali hual annimitzquixtis pin mochi lacocoltilisli hual anpanujtías.

<sup>29</sup> Cuaquinon Jesús quinmilic se laijnamiquiltisli pa quinnextilisquiaya inon hual quinmilijtataya, quinmilic:

—Xiquitacan in amacuál tipichin huan mochi in cuahuimes.

<sup>30</sup> Xuchujtiasi huan selistitiasi, cuaquinon anquimatis axan ajsitihuala in xupanda.

<sup>31</sup> Yoje, amhuanten, quiman anquitas innojen panujtiasi, cuaquín xicmatican pampa ajsitihualas Dios pa huelitis pan lalticpan.

<sup>32</sup> Neli annimitzilía inon: Panus inon hual annimitzilijtica quiman ayamo miqusi moxtin hual yulticate pa innojen tonalijmes.

<sup>33</sup> Lamisi in cielo huan in lalticpan. Ma yoje, nolajtomes amo quiman lamisi, amo quiman mocahuasi pa mocaquisi.

<sup>34</sup> Ximolachilican pa como amhuanten cuajnesi anquimacahuiltis pa mochihuasi chicahuac anmoyolo ca lahuanalisli huan oc sequin laijlaculisli. Ximolachilican pa como ancayas quinami yehuanten hual mojmosta motolinilo san pa canasi len canequilo. San quijnamiquilo in hual panúa pan in lalticpan hual axan unca. Sinda anunca yoje, cuaquinon in tonali hual nimocuepas pan lalticpan annimitzajsis jan ajnaxcan huan amo ancayas anchixtica.

<sup>35</sup> Quema, pampa quinmajsis moxtin yehuanten hual chantiticate pan mochi in lalticpan.

<sup>36</sup> Xiyén, cuaquín, quinami yehuanten hual ejsaticate, xiclañlanican Dios pa amhuanten huil ancayas laquixtili pin mochi innojen hual yalo panulo. Yoje anmoquetzas amo anmomajtitica noyampa nehual ilacal in cielo, huan amo annimitztilanis pa lacocoltilisli hual amo quiman lamisi.

Yoje quinmilic Jesús.

<sup>37</sup> Huan mojmosta cataya Jesús pin tiopan hué lamaxtitataya. Pa layúa quisaya pa Jerusalén, panuaya lajlayúa pin lomita (tepetzindi) itoca Olivos.

<sup>38</sup> Huan hualaloaya moxtin pa laxpoyahua pa in tiopan hué pa quicaquillosquiaya.

## 22

*Molalilo pa quiquitzquisqui Jesús  
(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Cuaquinon ajstitihualaya itonali in fiesta (ilhuil) capa quicualo in judíos in pan hual amo quipía laxocoyajquil, in ilhuil itoca Pascua.

<sup>2</sup> Quitemuloaya in tiopistas huejué huan innojen ilamaxtinijmes inminlajtōl in judíos quinami quiquitzquilosquiaya Jesús pa quimictilosquiaya. Huan amo huil quiquitzquiloaya pampa momajtiloaya laixpan in lacames hual quitocaloaya.

<sup>3</sup> Cuaquinon Satanás moyaxcajtīlic iyolo Judás, in se hual quitocayaltijque Iscariote. Yihual yec se ca in doce lanahuatinijmes. Satanás moyaxcajtīlic yihual pa quinextilisquiaya quinami yihual Judás huil quitemacasquiaya Jesús ca yehuanten hual quinequiloaya quimictilo.

<sup>4</sup> Cuaquinon uyac Judás pa laquetzasquiaya ca in tiopistas huejué huan in piscales, quinmilic quinami yahuiaya quintemaquili Jesús.

<sup>5</sup> Yoje yehuanten paquiloaya niman míac huan quichihuaque se laquetzalisli ca Judás pa quilaxlahuisqui ca tomin huan quimacajque.

<sup>6</sup> Cuaquinon yihual quinmilic neli pampa quintemaquilisquiaya Jesús, huan pehuac quitemuc quinami huil quitemaquilisquiaya Jesús ca yehuanten. Quinequiaya quichía capa amo cayasquiaya míac lacames ca Jesús hual quinapatilosquiaya.

*Ilacualisli toTata  
(Mt. 26:17-29; Mr. 14:12-25; Jn. 13:21-30; 1 Co. 11:23-26)*

<sup>7</sup> Ajsic in tonali quiman quicualo judíos in pan hual amo quipía laxocoyajquil. Pa in tonali quipialoaya pa quimictilosquiaya in borreguito pa in fiesta (ilhuil) itoca Pascua.

<sup>8</sup> Jesús quintilanic Pedro huan Juan, quinmilic:

—Xiacañ xitechuyucxiltīlican in borreguito pa tijcuasi pa in fiesta.

<sup>9</sup> Huan quilijque:

—¿Capa ticnequi pa ticyucxiltisi?

<sup>10</sup> Quinmilic:

—Xiquitacan. Ancalaquis pa in caltilan, anmitznamiquis se lalac quimantihualá se tapalcal ca al. Xictocacan pa in cali capa calaquis.

<sup>11</sup> Cuaquín xiquilican iteco in cali: “In Lamaxtini mitzilía: ¿Capa unca in calijtic capa nehual nijcuas iborreguito Pascua ca nomonextilinijmes?”, quil. Yoje anquilis —quinmilic Jesús—,

<sup>12</sup> huan yihual anmitznextilis se calijtic hué pa pani calijtic in cali capa moitasi mochi hual monequi pa ticpiasi. Nepa xicyucxiltīlican.

<sup>13</sup> Uyaje Pedro huan Juan, quitajque jan quinami Jesús quinmilic, huan quiyucxiltijque in borreguito.

<sup>14</sup> Ajsic in layúa pa lacualosquiaya, molalijque pa lacuasqui Jesús huan imonextilinijmes ca yihual.

<sup>15</sup> Cuaquinon Jesús quinmilic:

—¡Nehual nicnequiaya míac nijcua in borreguito pa pascua ca amhuanten! Cuaquín nías pa nīpanus nolacocoltilisli.

<sup>16</sup> Inon annimitzilía pampa yajmo nijcuas in lacualisli pan lalticpan. Ma yoje, quiman ajsis in tonali quiman moitas Dios huelitijtica, nepa nijcuas, pampa nepa lamis mochías mochi lachihualisli hual ayamo panuc hual pampa innojen ticpialo in fiesta Pascua.

17 Quimacajque Jesús se tapalcatzindi huan yihual quisehuic Dios, cuaquinon quinmilic:

—Xicanacan inon huan ximoxiluilican ca amhuanten pa ancunis.

18 Annimitzilia inon pampa yajmo quiman nicunis len lachihuali ca ilaquilyo uvas. Ma yoje, quiman ajsis in tonali hual Dios huelitis pan lalticpan, cuaquin nicunis.

19 Cuaquinon canac pan huan quisehuic Dios, quilapanac huan quinmacac, quinmilic:

—In nonacal, mochi nehual nimotemacas pa nimitquis pa amhuanten. Xijcuacan in, yoje pa annehijnamiquis.

20 Huan quiman lamijque lacuajque, canac Jesús in tapalcatzindi yoje quinami canac in pan, quinmilic:

—In hual ancunis pa in tapalcatzindi unca in lajtulisli yancuic ca nehual huan amhuanten. Nicchijtica in lajtulisli ca noesli hual toyahuis pa amhuanten.

21 Ma yoje, xiquitacan. Yihual hual nechtemaca ca yehuanten hual nechcocolilo unca nican lacuajtica ca nehual.

22 Yalo nechmictilo nehual ilacal in cielo jan quinami Dios quilalic. Ma yoje iquichi yahui panu lacocoltilisli in lacal hual nechtemaca!

23 Cuaquinon pehualoaya molajlanilo huan molaxililo lajtomes yehuanten pa lajmatasi aqui yesquiaya hual yahuiaya quitemaca Jesús.

*Laquetzalo pa lajmatasi aqui yes in hué ca yehuanten hual quinlaicanas*

24 Pehualoaya molaxililo lajtomes in monextilinjmes, laquezataloaya pa lajmatasqui aqui ca yehuanten cataya in hué hual quinlaicanasquiaya moxtin.

25 Huan Jesús quinmilic:

—In huejueyenten ca yehuanten hual amo cate judíos huelitilo ca yehuanten ca chichualisli quinami tecojuan. Huelitilo pa yoje quinnextilisli yehuanten inminlahuelilitisli huan pa yoje quinnextilisli pampa cate niman huejué, huan pa yoje quinnextilisli yehuanten hual quinneltocaltisi pampa amo cate huejué yehuanten. Yehuanten in laicananijmes, quema, motocay-altilo ca tocajmes hual quinequilo quijtulo pampa yehuanten cate lacames hual yulilo quinchihuiliticcate cuali yehuanten hual quinneltocaltilo.

26 Amhuanten amo anyes yoje. Monequi pa yes quinami in tipichin yihual hual unca in hué capa amhuanten. Huan yihual hual quinlaicana oc sequin ma ye se hual quintequipanuilia in oc sequin.

27 Ma annimitzili len nicnequi niquijtúa. ¿Aqui in hué? ¿Unca yihual hual molalía pa lacuas, o yihual hual quitequipanuilitica? ¿Amo unca in hué yihual hual molalijtica pa lacuas? Quema, unca yihual. Ma yoje, nehual niunca ca amhuanten quinami in se hual latequipanuilitica.

28 Huan amhuanten aunca aquinojen hual anmocahuaya ca nehual quiman quitlanaloaya noyolo pa nicchiasquiaya in hual amo cuali, quiman niquitaya miac icnotilisli.

29 Huan nehual annimitzmaca lahuelilitisli pa anhuelitis. Yoje noTajtzin nechmacac lahuelilitisli pa nihuelitis.

30 Pampin yes anmoyaxca pa anmolalis pa anlacuas huan anlaunis ca nehual pan tonali hual nihuelitis. Yoje anquipias paquilisli ca nehual. Huan yes anmoyaxca pa anyes la'juanijmes pa anquinmotexpahuilis huan pa anquinmacahuas yehuanten hual cate iyaxca in lali Israel, yehuanten inminmiahuimes mochi sejse ca in doce ixolomes Israel.

*Jesús quilía pampa Pedro yahui quijtúa yihual amo quiximati Jesús*  
(Mt. 26:31-35; Mr. 14:27-31; Jn. 13:36-38)

<sup>31</sup> Jesús quilic Pedro:

—Simón, Simón, xiquita. Satanás latemachic pa anmitzanas amhuan-ten. Quinequi pa yajmo annechneltocas. Pampín quitemachic pa quimac-ahuiltisquiaya pa anmitzpanultisquiaya lacocoltilisli. Yoje Satanás quijtúa pampa inon yajmo annechneltocas.

<sup>32</sup> Ma yoje, nehual nictemachic Dios pa tehual, Pedro, pa camo mitz-macahuiltisquiaya pa timocahuas pa tichneltocas. Huan tehual, in tonali hual mocuepa moyolo ca Dios, xiquinpalehui mocnían innojen oc sequin monextiliniymes pa nechneltocasi ca miac chichahualisli.

<sup>33</sup> Pedro quilic:

—Tata, sinda monequis, huan tehual tiasi pa ticayasi latzacuali ca calijtic, pa tehual nimiquis. Niunca nimochijchijtica pa nipanus inon.

<sup>34</sup> Huan Jesús quilic:

—Pedro, nimitzilía inon: Axan in layúa, ayamo xahuanis se gallo huan tiquijtus sepa huan oc sepa ca ye lajtulisli pampa amo tichiximati.

*Ajsi in hora capa Jesús panúa lacocoltilisli*

<sup>35</sup> Cuaquinon Jesús quinmilic:

—In tonali hual annimitztilanic huan amo anquiapiaya xotopa huan len pa tomin, huan san in ome lacsames, ¿monequiaya pa anquiapiasquiaya len?

Quinanquilijque:

—Nindeno.

<sup>36</sup> Cuaquín quinmilic:

—Axan, aquí hual quipía xotopa, ma quihuica, huan ma quihuica len pa tomin noje. Huan aquí hual amo quipía teposli pa moanalisli, ma quinamaca inahuas huan ma mocuhuili se.

<sup>37</sup> Quema, ma quichía yoje pampa annimitzilía monequi pa nejchihuili inon hual unca lajcuiluli nonahuac nehual pa iamal Dios ilajtuni. Huan yoje quijtúa hual unca lajcuiluli: “Quijtujque pampa yihual yec se lalac elehuis.” Quema, pampa ajsitihuala ilajco in tonali capa lamis mochías in lajtol hual quijtúa in hual yahui nechpanúa nehual.

<sup>38</sup> Huan in lanahuatinijmes quilijque:

—Tata, nican cate ome teposlimes pa moanalisli.

Jesús quinnanquilic:

—Yajmo tilaquetzasi inahuac inon.

*Jesús panúa lacocoltilisli quilajlantica Dios pa Getsemani*  
(Mt. 26:36-46; Mr. 14:32-42)

<sup>39</sup> Cuaquinon quisac Jesús pa Jerusalén, mohuicac pa in loma itoca Olivos, quinami quichihuaya lajlayúa. Huan quitocaloaya yihual imonextiliniymes.

<sup>40</sup> Ajsijque ca umpic, Jesús quinmilic:

—Xiclajlánican Dios pa camo anmitztilanilis anmoyolo Satanás. Yihual quinequi pa yajmo annechneltocas.

<sup>41</sup> Mijcuanic Jesús capa yehuanten pa cayas huejquita quinami se tixcali lalasalí.

<sup>42</sup> Nepa molancuacuetzac, quilajlaniaya Dios, quilic:

—Tata, sinda ticnequi, xichquixti pa camo nipanus inon hual nía nipanu. Ma yoje, ma camo mochía quinami niquijtúa nel, jan ma mochía quinami tiquijtúa tehual.

<sup>43</sup> Nestic ca yihual se ilanahuatini in cielo pa quichichahualtisquiaya.

<sup>44</sup> Huan cataya panujtataya lacocoltilisli niman míac. Yoique quilajlaniaya Dios ca míac chichahualisli, huan ixicaya imijtonil chicuenta esli ixicatataya pan in lali.

<sup>45</sup> Cuaquinon moquetzac capa quilajlaniaya Dios, hualac capa cataloaya imonextiliniymes, quinmitac coxtataloaya pampa quincocujtataya inminyolo.

<sup>46</sup> Huan quinmilic:

—¿Leca ancoxica? Ximoquetzacan huan xiclaflanican Dios pa como anmitztilanilis anmoyolo Satanás.

*Quiquitzquilo Jesús*

(Mt. 26:47-56; Mr. 14:43-50; Jn. 18:2-11)

<sup>47</sup> Ayamo lamic quinmilic inon, ajsiloaya lalacera huan in se imonextilini motocaya Judas, yihual se ca in doce, quinlaicanaya. Yihual ajsiaya pa quitenamiquisquiaya.

<sup>48</sup> Huan Jesús quilic:

—Judas, ¿tichtenamiquic nehual ilacal in cielo, pa yoje tiquinnextilisquiaya nolacocoliniymes capa nel?

<sup>49</sup> Quitajque imonextiliniymes len yahuiaya panu, quilijque:

—Tata, ¿amo timoanasi ca in teposli pa moanalisli?

<sup>50</sup> Huan se ca yehuanten quitecuac ca iteposli itequipanujquil in tiopista hué, yoique quicotonilic se inacas pa ima cuali.

<sup>51</sup> Jesús calactiquisac capa moantataya, quilic:

—Xijcahua, yajmo xicchia inon.

Huan quisaluc inacas oc sejpa pa itzontecon, quipajtic.

<sup>52</sup> Cuaquín Jesús quinmilic yehuanten hual hualajque pa quiquitzquilosquiaya, cataloaya tiopistas huejué huan in piscales huan in oc sequin hueyente, quinmilic:

—¿Anhualaya pa annehquitzquisquiaya ca teposlimes pa moanalisli huan cuahuimes yoje quinami nicataya se laxtequini?

<sup>53</sup> Mojmosta nicataya ca amhuanten pin tiopan hué, huan amo annehquitzquic. Ma yoje, in unca quiman Dios anmitzmacahuiltica pa anquichías hual len anquinequi. Noje Dios quimacac Satanás in lahuellitilisli pa axan in layúa, yihual Satanás huelitía capa laticumac.

*Pedro quilia pampa amo quiximati Jesús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Yoje quiquitzquijque Jesús, quihuicatiajque, quihuicajque pa ichan in tiopista hué. Huan quintocaya Pedro huejca inmintepotzcon.

<sup>55</sup> Nepa pa ilajcotiyan ichan in tiopista hué quipitzajque se tixuxli. Molalijque pa itenco in tixuxli, huan Pedro moquezfataya ca yehuanten.

<sup>56</sup> Nepa cataya se tequipanujquil sihual, quitac Pedro moqueztataya, quilahuiaya in tixuxli. Huan yihual mocahuac quiztica jan sejpa, quinmilic:

—In se noje cataya ca Jesús.

<sup>57</sup> Pedro quijtuc pampa no, quilic:

—Sihual, amo niquiximati aqui yihual.

<sup>58</sup> Panuc nadita huan oc se lalac quitac Pedro, quilic:

—Tehual noje tiunca se ca yehuanten.

Huan Pedro quinanquilic:

—Lalac, amo niunca se ca yihual ilacames.

<sup>59</sup> Panuc quinami se hora quiman quijtuc inon, huan oc se lalac pehuac quijtuc pampa neli, quilic:

—Neli in se noje cataya ca yihual, pampa yihual noje unca se galileteco.

<sup>60</sup> Huan Pedro quinanquiloc:

—Lacal, amo nicmati len tiquijtutica.

Huan jan ajnaxcan, ayamo laquisac lajtutataya Pedro, xahuanic se gallo.

<sup>61</sup> Huan momalinac in Tata Jesús, quitac Pedro. Cuaquinon Pedro quijnamiquic len quiloc in Tata Jesús, quinami yihual quiloc: “Axan layúa ayamo xahuanis se gallo huan tiquijtus ca ye lajtulisli pampa amo tichiximati nehual.”

<sup>62</sup> Pampín quisac Pedro pa quiahuac, pehuac chocac chichahuac.

### *Quihuitzquililo Jesús*

(Mt. 26:67-68; Mr. 14:65)

<sup>63</sup> Huan in lacames hual quiquitzquijque Jesús quihuitzquilijtinemiloaya, quihuitectinemiloaya.

<sup>64</sup> Quilpijque se dango pa iixtololojmes huan quilajlantinemiloaya, quililoaya:

—¡Xilajtu ca Dios ilahuelilitlisli, xitechili aqui mitztecuac!

<sup>65</sup> Huan ca míac oc sequin lajtomes quihuejuecaltinemiloaya.

### *Jesús inminlaixpan in Lanechiculisli Hué*

(Mt. 26:59-66; Mr. 14:55-64; Jn. 18:19-24)

<sup>66</sup> Quiman lanesic, monechicujque inminhueyente in judíos. Yehuanten cataloaya in tiopistas huejué huan ilamaxtinijmes inminlajtol in judíos. Quihuicajque Jesús capa cataloaya lanechiculi yehuanten inminLanechiculisli Hué in tiopistas huan in lamaxtinijmes.

<sup>67</sup> Nepa quilijque:

—Sinda tehual tiunca in Cristo hual Dios mitztilanic, cuaquín xitechili.

<sup>68</sup> Huan Jesús quinmiloc:

—Sinda annimitzilía, neli amo anquineltocas. Huan sinda annimitzljalanis len anquinequi anquijtúa quiman annechlajlanía sinda niunca in Cristo, neli unca da amo annechnanquilis.

<sup>69</sup> Ma yoje, axan huan pa mosta nehual ilacal in cielo nicayas nihuelitijtica ca Dios ilahuelilitlisli, nepa nimolalis pa ima cuali Dios.

<sup>70</sup> Cuaquín moxtin quilajlanijque:

—Tehual nuso, ¿tiunca ixolol Dios?

Jesús quinnanquiloc:

—Jo quema, nehual niunca quinami anquijtúa.

<sup>71</sup> Yehuanten quijtujque:

—¡Yajmo monequi pa tilajlajlantinemisi, pampa tehuanten nojen tijaquije quinami quijtuc ca icamac!

## 23

### *Jesús ilaixpan Pilato*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Cuaquinon moquetzajque moxtin hual cataloaya nepa pin Lanechiculisli Hué, quihuicajque Jesús capa cataya in gobernador romano itocaya Pilato.

<sup>2</sup> Nepa pehualoaya quipitzililo tixuxli, quimotexpahuililoaya, quilijque:

—Tilajlanije huan ticmatije pampa in se quinequiaya quipehualti moanalisli ca in lacames pa tolali. Quinequiaya quitzacuili pa camo quilaxlahuilosquiaya ilapixcalisli in tomin pa in hué César. Noje quijtúa pampa yihual ihuían unca se hué hual itoca Cristo.

<sup>3</sup> Cuaquín Pilato quilajlanic Jesús, quiloc:

—¿Tehual tiunca inminhué in judíos?

Jesús quinanquilic:

—Jo quema, unca tehual hual tiquijtúa.

<sup>4</sup> Huan quinmilic Pilato in tiopistas huejué huan in lalalera, quinmilic:

—Amo niqutilía nindeno amo cuali ca in lalal.

<sup>5</sup> Ma yoje, yehuanten quijtuloaya pampa neli cataya yojque, quipitzililoaya tixuxli, quilijque:

—Techmocualantilía tehuanten in judíos pa cuajnesi timoanasi. Yihual lamaxtinemi pa mochi in lalticpan Judea, pehuaya pin lalticpan Galilea, lamaxtithualaya ca niquic.

### *Jesús ilaixpan Herodes*

<sup>6</sup> Quicaquic inon Pilato, quilajlanic sinda Jesús yec galileteco.

<sup>7</sup> Huan quimatic pampa quema, yuliaya Jesús pa Galilea capa in hué Herodes huelitiaya. Cuaquín quitlanic Jesús capa Herodes, yihual quiapiaya lahuelitilislí ca galiletecos. Huan pa innojen tonalijmes, Herodes cataya pa Jerusalén pa in fiesta (ilhuil).

<sup>8</sup> Yoje, quiman Herodes quitac Jesús, quiapiaya míac paquilislí, pampa quiapiaya míac tonalijmes quinequiaya quita. Cataya pampa yihual quincacuiaya moxtin laquetzalooaya inahuac mochi hual quichihuaya yihual. Huan quichiaya pa quitasquiaya len hual Jesús quichiasquiaya, quinequiaya quita len lanextilislí hual quimahuisultisquiaya Herodes ca lamajtilislí.

<sup>9</sup> Pampín Herodes quilajlaniaya Jesús ca míac lajtomes. Ma yoje, Jesús amo quinanquilic nindeno.

<sup>10</sup> Moquetzalooaya in tiopistas huejué huan ilamaxtinijmes inminlajtol hual quinnextililo in judíos quinami quimolancuacuetzililo Dios, huan quimotexpahuililoaya Jesús chichahuac.

<sup>11</sup> Jan yojque, quixijxicujque Herodes huan moxtin yehuanten hual catalooaya ca yihual, quihuitzquililoaya. Cuaquinon Herodes quilaquentic Jesús ca se nahuas cahuanquil calica molaquentilo huejueyenten. Cuaquín quitlanic oc sejpa capa cataya Pilato.

<sup>12</sup> Huan pampín pa in tonali pehualooaya moixtocalo Herodes huan Pilato, mas que amo moixtocanijme quiman ayamo panuc inon.

### *Quijtulo pampa Jesús quipías pa miquis* (Mt. 27:15-26; Mr. 15:6-15; Jn. 18:39-19:16)

<sup>13</sup> Cuaquinon quinahuatic Pilato pa monechiculosquiaya in tiopistas huejué huan yehuanten hual quipialooaya lahuelitilislí huan in lalalera.

<sup>14</sup> Quinmilic:

—Annechualiquilic in lalal, annechilijtataya pampa yihual quinmocualantiliaya in judíos pa quipehualtilosquiaya moanalislí ca in romanos. Huan xiquitacan, niclajlanic anmolaixpan huan amo niqutilic nindeno amo cuali ca in lalal quinami inon hual anquimotexpahuilijtica.

<sup>15</sup> Huan Herodes noje amo quitilic nindeno ca yihual pampa nechtilanilic oc sejpa. Huan xiquitacan, yihual amo quichíac nindeno. Pampín, quinami quijtúa in lajtol, amo huil tilatilanilo pa yes lamictili.

<sup>16</sup> Yoje, nilatilanis pa quihuitequisi noguaches ca in lahuitequiloni ca teposlí, cuaquín nicmacahuas.

<sup>17</sup> Inon quinmilic Pilato pampa mochi xihuil cataya ilachihualislí in huelitijmes romanos pa quinmacahuililosquiaya in lalalera pa nepa in fiesta (ilhuil) se hual cataya latzacuali ca in lacames lailpili.



18 Huan tzajtziyque yehuanten moxtin, quilijque:

—¡Xicmicti in se, huan xitechmacahuili Barrabás!

19 In Barrabás yec se hual quincualantic in judíos pin caltilan hué. Quinequiaya quipehualti se moanalisi. Yihual noje quimictic se lalac, pampín quitzacuajque pa calijtic.

20 Oc sejpa quinnotzac Pilato yehuanten, quinmilic pampa quinequiaya quimacahua Jesús.

21 Ma yoje, yehuanten quitzajtzilijtinemiloaya yihual, quililoaya:

—¡Xicpilu pan se cuahuil, xicpilu pan se cuahuil!

22 Axan, huan ca inon cataya ye lanotzalisli, Pilato quinmilic:

—¿Leca? ¿Len amo cuali quichíac in lalac? Amo niquitilic nindeno yihual hual monotza pa yes lamictili, huan amo huil nilatilanía pa quimictisi. Pampín, nilatilanis pa quihuitequisi, cuaquinon nicmacahuas.

23 Ma yoje, yehuanten amo mocahualoaya pa quililosquiaya ca lajtomés chijchicahuac pa quipilulosquiaya pan se cuahuil, huan ca in míac tzajtzilisli, yojque quisulahuajque Pilato.

24 Pampín yihual latilanic pa Jesús yesquiaya lamictili quinami quitemachiloaya yehuanten.

25 Cuaquinon, Pilato latilanic pa quimacahualosquiaya yihual hual quitzacuajque pin calijtic, yihual hual quinequiaya quipehualti moanalisi huan hual quimictic se lalac. Quema, yihual quimacahuajque quinami in judíos quitemachiloaya. Huan Jesús, yihual Pilato temacac ca yehuanten pa quichihuililosquiaya quinami quinequiloaya.

### *Quipilulo Jesús pan se cuahuil*

*(Mt. 27:32-44; Mr. 15:21-32; Jn. 19:17-27)*

26 Huan nepa capa quihuicatihuiloya Jesús, quiquitziyque Simón, yihual se lalac hual lacatic pin lali itoca Cirene. Cataya in Simón pa icuajmili huan axan mocuetataya pa Jerusalén. Quimamiltijque in Simón ca icuahuil Jesús pa quihuicatasquiaya itepotzcon Jesús.

27 Huan quitocaloaya lalacera, cataloaya yehuanten hual chantiloaya pa Jerusalén. Ca yehuanten cataloaya sihuames hual motecuilijtiahuiloya itzindan inminquixlan huan quichoquilijtiahuiloaya Jesús.

28 Momalinac Jesús ca yehuanten, quinmilic:

—Amhuanten sihuames hual anchanti nican Jerusalén, ximocahuacan pa annejchoquilis. Monequi pa anmochoquilis amhuanten. Huan xiquinchoquilian anmoxolomes, pampa xiquitacan:

29 Ajsitihualasi in tonaljimes hual moxtin quilisi: “Cate ca niman míac paquilisli yehuanten hual amo yalo quinpialo xolomes, huan hual amo quiman quilacatiltije xolomes, yehuanten hual amo quiman quinchichiltije xolomes”, quilisi.

30 Cuaquín pehuasi quiytusi: “¡Ma huetzican topan in lomas! ¡Ma techpachucan in lomas pa timiquisi!”, quiytusi.

31 Quema, pampa sinda nejchihuililo yoje in romanos nehual hual amo nicpía laijlaculisli, cuaquín ¡quinami amo yalo anmizpitzililo tixuxli amhuanten hual anquinpía míac laijlaculisli! In cuahuil huaquic chichinahuía ca míac milinilisli, amo yoje chichinahuía in cuahuil xuxuhuc.

32 Quinhuicaloaya noje oc sequin ome lacames pa quinpilulosquiaya ca Jesús, in omenten yeje laixtequinijmes huan lamictinijmes.

<sup>33</sup> Huan ajsijque pa capa itoca Tzontecomal, nepa quipilujque Jesús pan in cuahuil huan noje quinpilujque in oc sequin omenten pan inmincuahuimes, se pa ima cuali Jesús huan in oc se pa ima amo cuali.

<sup>34</sup> Huan Jesús quilic:

—Tata, xiquinpujpuhua yehuanten hual nechmictiticate, pampa amo quimatilo len quichijticate.

In guaches moxiluilijque itzotzomajli Jesús huan pa quichihualosquiaya inon, quicuixtijque cuajtzindis, huan quinlasajque in cuajtzindis quinami yoje pa quimatilosquiaya aqui yahuiaya cana in tzotzomajli hual nepa quilalijque pa quipiasquiaya.

<sup>35</sup> Huan mocahuajque lachixtataloaya in lalacalera. In huejueyenten quihuitzquililoaya Jesús, quilijque:

—Oc sequin yihual quinquixtic pin miquilisli. Axcan, ma moquixti yihual pin imiquilisli sinda in se unca iCristo Dios hual Dios quitilanic.

<sup>36</sup> Huan quihuitzquilijque in guaches noje, ajsijque, quichihuaque quinami quinequiloaya quicuniltilo iayo uva xocuc.

<sup>37</sup> Quilijque:

—Sinda tiunca inminhué in judíos, cuaquín ximoquixti pin momiquilisli tehual.

<sup>38</sup> Huan cataya se amal ca lajcuilulisli pani pin cuahuil, quijtuc: “IN UNCA INMINHUÉ IN JUDÍOS.” Huan cataya lajcuiluli ca lajtol latín huan ca lajtol griego huan ca lajtol hebreo.

<sup>39</sup> Cuaquinon, se laxtequini hual pilujtataya ca Jesús, quihuejuecaltic Jesús, quilic:

—¿Amo tiunca in Cristo? Ximoquixti pin momiquilisli huan xitechquixti pin tomiquilisli tehuanten.

<sup>40</sup> Quinanquilic in oc se laxtequini, cajuac, quilic:

—¿Amo timomajtía je nadita ilaixpan Dios, mas que ticmati tía timiqui tehual noje?

<sup>41</sup> Tehuanten tialo timiquilo pampa techahuilúa, ticchihuaje len amo cuajcuali huan tipanulo in lacocoltilisli. Huan in se amo quiman quichíac len amo cuali.

<sup>42</sup> Cuaquinon quilic:

—Jesús, xichijnamiqui pan in tonali tihualas oc sepa pa tihuelitis.

<sup>43</sup> Huan Jesús quilic:

—Neli nimitzilía, axan ticayas ca nehual pa iparaiso Dios.

### *Jesús miqui*

*(Mt. 27:45-56; Mr. 15:33-41; Jn. 19:28-30)*

<sup>44</sup> Cataya quinami lacualispan huan laticumactic pa mochi in lalticpan, mocahuac laticumac pa ye pa tiolac,

<sup>45</sup> amo lahuiaya in tonali. Huan in tzotzomajli telahuazo hual pilujtataya lajco pa in lasojli calijtic huan in niman lasojli calijtic pin tiopan hué, tzayanic pa lajco, mochíac ome.

<sup>46</sup> Huan tzajtzc Jesús ca lajtol chicahuac, quilic:

—Tata, nimotemaca ca noyulilisli pa tichlachilis.

Quiman quijtuc Jesús inon, jan yoje miquic.

<sup>47</sup> Nepa cataya in laicanani romano hual yec inminteco cien guaches. Quitac yihual len panuc, quijtuc lajtomes huejué huan cuajcuali pa Dios, quilic:

—Neli in lalacal yec se lalacal cuali, amo quichíac len amo cuali.

<sup>48</sup> Huan moxtin in lalacera hual hualajque pa quitalosquiaya in lamictilislí, quitajque len panuc, pehualoaya motecuililo pa itzindan inminquixlan huan pehualoaya mocuepalo pa Jerusalén.

<sup>49</sup> Ma yoje, mocahuajque nepa moquezataloaya huejquita yehuanten hual quiximatiloaya Jesús. Innojen sihuames noje hual quitocaloaya Jesús quiman quisaya pin lalticpan Galilea cataloaya quiztataloaya mochi inon hual panuc.

### *Quilalpachulo Jesús*

*(Mt. 27:57-61; Mr. 15:42-47; Jn. 19:38-42)*

<sup>50</sup> Huan nepa cataya se lalac itoca José. Yihual yec se hué ca in Lanechiculislí Hué, yec se lalac cuali. Dios quitilic cuali iyolo José, pampa José yuliaya quinami Dios quinequi pa moxtin yulisi.

<sup>51</sup> Yihual amo cataya ca in lajtulisli hual quichihujque in oc sequin hual yeje in Lanechiculislí Hué hual quimotexpahuililoaya Jesús pa quimictilosquiaya. Yihual yuliaya pa se caltilan itoca Arimatea, unca pa Judea inminlalticpan in judíos. In José quichiaya in tonali quiman huelitisquiaya Dios.

<sup>52</sup> Yihual uyac ilaixpan Pilato, quitemachic pa yihual quimacahuiltisquiaya quihuica imijquil Jesús.

<sup>53</sup> Cuaquinon uyac quitemuhuilic, quiquixtic pin cuahuil, quiliaruc ca se tzotzomajli yancuic, huan quilalic pan se coyunquil lahuajuanali pin tel, nepa ayamo quilalijque se mijquil.

<sup>54</sup> In tonali cataya se hué tonali pa in inminilhuil (fiesta), itocac in tonali pa lachijchihualislí pampa mostatica yahuiaya ye itonali niman hué inminfiesta in judíos. Axcan pejtihualaya ajsi in itonali in ilhuil.

<sup>55</sup> Huan quitocatiahuloaya José in sihuames huejquita, yehuanten hual quisajque pa Galilea ca Jesús. Quitajque in coyunquil (ostul) huan quitajque quinami quilalijque ca lajtic imijquil Jesús.

<sup>56</sup> Cuaquinon mocuepajque pa inminchan huan quichijchihujque len ca chahuac hual ajuíac calica quixahuililosquiaya in mijquil. Cuaquin ajsic in tonali hual mosehuilo in judíos huan mosehuiloaya in sihuames quinami quijtúa inminlajtol in judíos.

## 24

### *Jesús yuli oc seipa*

*(Mt. 28:1-10; Mr. 16:1-8; Jn. 20:1-10)*

<sup>1</sup> Huan mostatica, cataya pa laxpoyahuita pa in tonali hual quipehualtía in chicome, hualajque in sihuames pa in coyunquil (ostul) capa quilalijque imijquil Jesús. Quihualicaloaya inon hual ajuíac hual quichijchihujque.

<sup>2</sup> Ajsijque, huan quitajque in tixcali hual cataya chicuenta se layahualujquil, quitajque laijcuanili in tixcali capa quitzactataya in coyunquil (ostul).

<sup>3</sup> Calaquijque, huan amo quitajque imijquil in Tata Jesús.

<sup>4</sup> Yojque, nepa cataloaya, amo quimatiloaya len quijtulosquiaya. Cuaquinon nestiquisajque ome lacames, cataloaya lalaquentili ca nahuajmes hual niman laixpelaloaya.

<sup>5</sup> Huan momajtjque in sihuames lachixtataloaya pan lali pampa in laixpelalislí quinmixpelaya pa inmixtololajmes. Innojen lacames quinlajlanijque in sihuames, quinmilijque:

—¿Leca anquitemujtica nican pin mijquimes yihual hual yultica?

<sup>6</sup> Amo unca nican, axcan yultica oc sejpa. Xiquijnamiquican quinami anmitzilic inon pa innojen tonalijmes quiman ayamo anquisaya pa Galilea.

<sup>7</sup> Anmitzilic pampa monequiaya pa yihual ilacal in cielo yesquiaya latemacali ca lacames e'jelehuis. Yehuanten yahuiyoaya quipilulo pan se cuahuil, huan quiman panuje ye tonalijmes, yihual yahuiaya yuli oc sejpa.

<sup>8</sup> Cuaquinon quijnamiquijque len quinmilic Jesús.

<sup>9</sup> Quisaje pin coyunquil (ostul), uyajtiquisajque pa quimachiltosquiaya in once lanahuatinijmes huan moxtin in oc sequin monextilinjmes mochi innojen hual panujque.

<sup>10</sup> Cataloaya María Magdalena, huan Juana huan María inantzin Jacobo huan in oc sequin sihuames ca yehuanten hual quinmilijque in lanahuatinijmes innojen lajtomes.

<sup>11</sup> Huan ca yehuanten in lanahuatinijmes nesiaya quinami in sihuames amo quimatiloaya len quijtutataloaya, pampa inon amo quineltocaloaya.

<sup>12</sup> Ma yoje, moquetzac Pedro, molaluc pa in coyunquil, mopachuc quinmitac quinami in tzotzomajli cataya ihuán. Cuaquinon uyac Pedro ihuán, laijnamiquiaya pa quimatisquiaya len quinequiaya quijtu inon.

*Yehuanten hual canajque ojli pa Emaús quitalo Jesús  
(Mr. 16:12-13)*

<sup>13</sup> Huan noje pan in tonali yahuiyoaya ome imonextilinjmes Jesús pa se caltilan tipichin itoca Emaús. Pa ajsilosquiaya nepa, nejnemilosquiaya quinami once kilómetros pan in ojli hual quisac nepa Jerusalén.

<sup>14</sup> Yehuanten molaquetzlijjtataloaya ca mochi innojen hual panujque.

<sup>15</sup> Huan cataloaya laquezatataloaya huan quijnamictataloaya mochi hual panuc, jan axcan hualaya inminahuac yihual Jesús capa yehuanten nejnentataloaya, pehuaya nejnemi ca yehuanten. Ma yoje, yehuanten amo quiximatiloaya Jesús,

<sup>16</sup> Dios quinchihuilic inmixtololojmes pa camo quislaculosquiaya.

<sup>17</sup> Huan Jesús quinmilic:

—¿Len inon hual anmolaquetzlijjtía capa annejnentiá?

Cuaquín yehuanten moquetzajque, lachixtataloaya quinami quincocujtataya inminyolo.

<sup>18</sup> Se ca in omenten motocaya Cleopas quinanquilic, quilajlanic:

—¿Tehual tiunca se ca in míac judíos hual amo lacatije nican hual chantiticate pa Jerusalén pa ticayas pa in fiesta huan amo ticmati innojen lachihualisli hual panuje pa Jerusalén pan in tonalijmes? Sinda amo ticmati, cuaquín tiunca in se san hual amo quimati.

<sup>19</sup> Huan Jesús quinmilic:

—Cuaquín, ¿len panuc?

Yehuanten quilijque:

—Unca in hual quipanuc Jesús in nazaretco. Yihual yec lalac hual lanextiliaya pampa yihual yec lajtuni Dios. Yec se lajtuni hual quiapiaya míac lahueliltilisli ca mochi len quichihuaya huan quijtuaya. Yoje quinextiliaya ilahueliltilisli ilaixpan Dios huan inminlaixpan moxtin lacames.

<sup>20</sup> Ma yoje, totiopistas huejué huan yehuanten hual huelitilo ca tehuanten quitemacaje pa in huelitini romano pa yihual latilanisquiaya pa yesquiaya lamictili, huan quipiluje pan se cuahuil.

<sup>21</sup> Huan tehuanten ticchixtataloaya pampa cataya yihual hual yesquiaya in se hual yahuiaya laxlahui pa techquixtisquiaya moxtin tehuanten in

israelitos pin topolehuilislí. Huan axan, ca mochi inon, quipía ye tonalijmes quiman quipanuc yihual inon.

<sup>22</sup> Huan unca oc se lajtol ca inon. Sequin sihuames ca tehuanten techmacajsije. Uyaje laxpoyahuita pa in coyunquil capa quilalije in mijquil.

<sup>23</sup> Amo quitaje in mijquil, quil. Ma yoje, techlamachiltihualaje pampa quinmitaje chicuenta lanahuatinijmes hual quisaje pin cielo hual quinmilije pampa yuliaya oc sejpa.

<sup>24</sup> Cuaquinon yaje sequin lacames ca tehuanten pa in coyunquil, quitaje mochi jan quinami techlilije in sihuames. Ma yoje, yihual amo quitaje.

<sup>25</sup> Cuaquín Jesús quinmilic:

—Amhuanten, ¡quinami amo anquimati! Anhuejcahua pa anquineltochas mochi inon hual quijtunijme Dios ilajtunijmes.

<sup>26</sup> Monequiaya pa panusquiaya in Cristo mochi inon, yoje laxlahuic pa mochi inminlajlaculislí in lacames pin lalticpan. Cuaquinon pampa inon Dios quichíac niman hué, yahui quipía in Cristo pa imajma cuali pa huelitis.

<sup>27</sup> Huan pehuac quinmilic in hual quijcuiluc Moisés. Cuaquín quinmiliaya len quijtujque mochi oc sequin ilajtunijmes Dios. Quinmilic len quinequiaya quijtu mochi hual quijcuilujque pa quinmachiltilosquiaya in hual yahuiaya quipanu Cristo.

<sup>28</sup> Huan quiman ajsijque pa in cali ca capic yajtiahuiloaya, yihual Jesús quichíac quinami yahuiaya nejnentía pa ca yojque.

<sup>29</sup> Cuaquín yehuanten quilijque ca mochi inminyolo, quilijque:

—Ximosehui ca tehuanten, axan unca tiolac huan layuajtitihuala.

Yoje calaquic ca yehuanten pa mocahuasquiaya.

<sup>30</sup> Huan cataya nepa molalijataya pa lacuasquiaya ca yehuanten, yihual canac in pan, quisehuic Dios, quilapanac in pan huan quinmacaya.

<sup>31</sup> Cuaquinon Dios quinlapulic in omenten inmixtololojmes huan quiximatijque Jesús. Huan jan axcan yajmo nesiaya Jesús ca yehuanten.

<sup>32</sup> Cuaquinon mollijque:

—¿Amo ticpiaje míac paquilislí pa toyolo nepa pan ojli quiman yihual techmachiltihualaya len quinequi quijtúa in hual unca lajcuiluli pa ilajtol Dios?

<sup>33</sup> Cuaquinon moquetzajque jan ajnaxcan, mocuetquisaje pa Jerusalén huan quinmitajque in once lanahuatinijmes, cataloaya lanechiculi ca in oc sequin monextilinijmes.

<sup>34</sup> Huan yehuanten quinmilijque in omenten:

—Neli yultica oc sejpa in Tata huan Simón quitac.

<sup>35</sup> Cuaquinon in omenten quinlamachiltijque len quinpanuaya pan in ojli pa Emaús, quinmachiltijque quinami quiximatijque Jesús quiman quilapanac in pan.

### *Jesús quinmonextilía imonextilinijmes*

*(Mt. 28:16-20; Mr. 16:14-18; Jn. 20:19-23)*

<sup>36</sup> Molaquetzilijataloaya pa momachiltilosquiaya mochi inon huan yihual Jesús nestiquisac lajco ca yehuanten capa cataloaya, quinmilic:

—Ma mosehui anmoyolo.

<sup>37</sup> Yehuanten momajtitiquisajque huan mocahuajque momajticate, quijtujque pampa quiztataloaya se lamajtini.

<sup>38</sup> Huan Jesús quinmilic:

—¿Leca anyuyucatica? Huan ¿pa len anlajtutica yoje pa anmoyolo?

<sup>39</sup> Xichitilican nomajmajuan huan nocxihuajmes, huan xicmatican pampa nehual niyultica. Xichquitzquican huan xiquitacan, pampa anquimati se

lamajtini amo quinpiá nacial huan umimes quinami anquita pampa nehual niquinpiá.

<sup>40</sup> Quinmilic inon, quinnexilic icxihujmes huan imajmajuan.

<sup>41</sup> Huan ayamo quineltoaloaya cataya Jesús pampa quipialoaya niman miac paquilisli huan pampa mocahualoaya quiztataloaya Jesús ca lamajtilisli. Huan Jesús quinmilic:

—¿Amo anquipiá nican len pa nijcuas?

<sup>42</sup> Cuaquinon quimacajque se lajco michin lahuatzali huan se xuchiyo néculi.

<sup>43</sup> Yihual canac huan quicuac inminlaixpan.

<sup>44</sup> Cuaquinon quinmilic:

—Ayamo annimitzcahuac quiman annimitzlaquetziliaya in lajtomes pa annimitznexilisquiaya quinami monequiaya pa mochihuasquiaya mochi innojen lajtomes hual cate lajcuiluli pa ilajtol Dios hual quijtuc pan ipampa Moisés. Huan yoje quijtuc pa inminamames ilajtunijmes Dios huan pa iamal in cantaditas (cuicames) Salmos. Annimitzilic mochi in lajtomes hual cate lajcuiluli pa ilajtol Dios nonahuac nehual.

<sup>45</sup> Cuaquinon quinmachiltic len quinequilo quijtulo innojen lajtomes hual cate lajcuiluli pa ilajtol Dios.

<sup>46</sup> Huan quinmilic:

—Yoje unca lajcuiluli. Monequiaya pa nipanusquiaya miac lacocoltisli nehual in Cristo, huan monequiaya pa nimiquis huan pa niyulis oc sejpa quiman panuje ye tonalijmes.

<sup>47</sup> Axan, pampa nicchiac mochi inon, in unca ilahuelilitisli notoca. Ca in lahuelilitisli, monequi pa anquinlamachiltis moxtin pin lalticpan pampa quipialo pa quipalasi inminyolo pa laijnamiquisi quinami Dios quinequi. Yoje Dios huil quinpujpuhuilis inminlajlaculisli. Xipehuacan xicchihuacan inon pa Jerusalén.

<sup>48</sup> Amhuanten anunca aquinojen hual anquitac panuje mochi inon hual nechpanuc.

<sup>49</sup> Huan xiquitacan. Nehual nía annimitztilanilía in se hual noTajtzin neli quijtuc pampa yahuiaya anmitzmaca. Huan amhuanten, ximocahuacan nican pa Jerusalén. Amo huejcahuas ajsis in tonali quiman yihual anmitzmacas ilahuelilitisli yihual hual quisas pin cielo pa hualas ca amhuanten.

### *Jesús lejcúa pin cielo (ilhuicac)*

*(Mr. 16:19-20)*

<sup>50</sup> Cuaquin quinhuicac Jesús yehuanten capa cataloaya amo huejca pa quiahuac Betania. Cuaquinon quinmajcoquic imajmajuan huan quitemachic Dios pa quinchihuilisquiaya cuali.

<sup>51</sup> Huan quiman cataya quilajlantataya Dios pa yehuanten, mohuicac lejcutataya pa pani pin cielo (ilhuicac).

<sup>52</sup> Yehuanten quimolancuacuetzilijque, cuaquinon mocuepajque pa Jerusalén ca paquilisli niman hué.

<sup>53</sup> Huan cataloaya mojmosta pin tiopan hué, quijtutataloaya lajtomes niman huejué huan cuajcuali pa Dios. Yojque ma ye.

## Ilamachiltisli cuali Jesucristo hual quijcuiluc San Juan

### *Dios ilajtol mochiác lalac*

<sup>1</sup> Niman pa yina Dios quipehualtic mochi hual unca. Huan noje pa yina yuliaya in Se hual quijtuć in lajtol calica quipehualtic mochi. Yihual cataya umpa capa ayamo pehuac mochi. Huan cataya yihual hual technextilic quinami unca Dios, yihual hual quijtuć Dios ilajtol. Cataloaya huan Dios in Se, huan in Se yec Dios.

<sup>2</sup> Quema, huan Dios cataloaya in Se hual quijtuć Dios ilajtol, huan Dios cataloaya umpa capa ayamo pehuac mochi.

<sup>3</sup> Yihual quinchíac mochi, amo yec lachihuali nindeno sinda amo yeje innojen hual yihual quinchíac.

<sup>4</sup> Yihual yec aquí hual quiyuliltía in hual quichíac. Huan in yulilisi calica yihual quiyuliltía unca in hual technextilía neli quinami huil tiquiximatilo, unca quinami techlahuilía toyolo timoxtin.

<sup>5</sup> In yulilisi calica techyuliltía unca quinami lahuilisi hual lahui capa laticumac. Huan in laticumactilisli amo quiman huil quisehuía in lahuilisi.

<sup>6</sup> Cataya se lalac hual Dios quitilanic pa lajtus. Yihual motocaya Juan Lacuayatequini.

<sup>7</sup> Hualac in Juan pa lamachiltis neli quinami se hual amo lacuajcuamana inahuac Dios ilajtol. Hualac pa lajtus neli inahuac Jesucristo, in Se hual techlahuíá toyolo pa technextilis quinami neli huil tiquiximatilo Dios. Dios quitilanic Juan pa yojque moxtin quilalilisi inminlaneltocalisli ca in Se huan pa quineltocasi pan ipampa len quinmilic Juan.

<sup>8</sup> In Juan amo yec yihual hual techyuliltía. Juan yec hual hualac pa lajtus neli inahuac in se hual hualaya pa techyuliltis.

<sup>9</sup> Huan in se yec yihual hual neli quiyuliltía mochi lalac pa quipías lahuilisi melahuac pa iyolo. Huan hualaya pin lalticpan.

<sup>10</sup> Yihual cataya pin lalticpan, huan pan ipampa yihual in lalticpan yec lachihuali. Ma yojé, yehuanten pin lalticpan amo quimatije pampa cataya yihual hual quichíac mochi.

<sup>11</sup> Hualac pa ilali hual yihual quichíac huan in míac ca yehuanten hual chantiloaya pa ilali amo quinequije quinamiquije.

<sup>12</sup> Ma yojé, cataloaya sequin hual quema, quinequije quinamiquije pa mochihualosquiaya icnían. Huan yehuanten yihual quinmacac pa yes inminyaxca pa mochihuasi Dios ixolomes. Quema, yehuanten yeje hual aquí quineltocaloaya yihual pampa quimatije yihual quisac capa Dios.

<sup>13</sup> Yojé lacatije quinami Dios ixolomes. Huan mas que lacatije quinami Dios ixolomes, amo cataya yojé quinami lacatilo pan lalticpan. Amo cataya quinami lacati se quipixtica itajtzin iesli huan inantzín iesli. Huan amo cataya quinami lacati se pampa oc se icuerpo quinequi monipanúa ca oc se pa lacatis se pan ipampa se lalac huan se sihual. Huan amo cataya quinami lacati se pampa in lacames quinequije pa lacatis in se. No, cataya quinami lacati se pampa Dios, yojé quinami san yihual Dios quimati.

<sup>14</sup> Huan yihual hual technextilic quinami unca Dios mochiác lalac quinami tehuanten huan chantini capa tehuanten. Huan tehuanten tiqitaloaya quinami quipiaya Dios ichichualisli hué huan ilaixpelalisli hué huan

cualtichin hual techlamahuisultiaya ca lamajtilisli. Yihual quipiaya in chicahualisli hué quinami monequi pa quipías se hual unca ixolol in Tata Dios, hual unca in se xolol san hual quipía Dios. Huan ca in míac chicahualisli hual quipía, tehuanten tiqitaloaya quinami yihual quinchihuiliaya moxtin míac lachihualisli cuali huan amo mocahua pa quiytus in hual unca melahuac huan neli.

<sup>15</sup> Juan Lacuayatequini lajtuc neli inahuac yihual, huan unca quinami axan tijcactialo ilajtol hual quiytuya chicahuac:

—Annimitzlaquetzilig inahuac quiman yes nel nicayas niclantías notequipanulisli. Hualas se hual monotza niman míac huan nehual amo nimonotza nindeno. Unca pampa yihual yulini quiman nehual ayamo nipehuac niyulic. Yihual unca niman hué huan nehual amo nihué —yoje quiytuc Juan Lacuayatequini.

<sup>16</sup> Tehuanten imonextiliniymes Jesucristo ticanilije yihual se ilajquito in niman míac lachihualisli cuali hual quipía. Quema, huan amo timocahuasi pa ticanilisi inon.

<sup>17</sup> Moisés pa yina quinmilic Dios ilajtol inahuac mochi hual ticpialoaya pa ticchihuasi tehuanten in israelitos. In cataya se lapalehuilisli. Ma yoje, hualac Jesucristo, yihual technextilic in cuali niman hué hual san Dios huil tejchihuilia. Huan technextilic inon hual unca melahuac inahuac Dios, technextilic quinami Dios technequi niman míac.

<sup>18</sup> Huan mas que amaqui amo quiman quitac Dios, ma yoje Dios ixolol unca yihual hual techlamachiltic quinami unca Dios. Yihual in se xolol hual Dios quipía huan yihual quinami Dios. Yihual unca inahuac totajtzin Dios, huan quiximati mochi inahuac yihual huan quilasojla mochi inahuac yihual.

*Juan Lacuayatequini lajtúa neli inahuac Jesucristo  
(Mt. 3:11-12; Mr. 1:78; Lc. 3:15-17)*

<sup>19</sup> Yojque inminhuejueyenten in judíos quintilanilije capa Juan tiopistas huan inminlapalehuiniymes in levitas. Quintilanije quistataloaya pa Jerusalén pa quilajlanisi, quilije:

—¿Len lahuelilitilisli ticanac?

<sup>20</sup> Huan inon unca len Juan quiytuc neli, quinmilic len quimatic pa iyolo. Amo quinmilic da amo quimatic, jan quinmilic len quimatic san, quinmilic:

—Nehual amo in Cristo hual Dios techtilanilia.

<sup>21</sup> Cuaquinon quilajlanije:

—Axcan, ¿len lahuelilitilisli ticpía? ¿Ilahuelilitilisli Elías? ¿Tehual Elías?

Huan quinmilic:

—Amo niunca.

Tel ¿tunca in se hual yes Dios ilajtuni hual yahui huala?

Huan Juan quinnanquilic:

—Nehual amo niunca.

<sup>22</sup> Cuaquinon quilije:

—¿Aqui tehual, nuso? Pa yoje tiquinmachiltisi yehuanten hual techtilanije ca tehual. ¿Len tía titechili monahuac?

<sup>23</sup> Quinmilic:

—Dios ilajtuni hual motocani Isaías quiytuc pa yina inahuac se hual ilajtol mocaquis tzajztitica capa amaqui chanti, huan in lajtol quiytúa: “Xichijchi-huacan in ojli capa yahui panúa in Tata.” Inon unca hual quiytuc pa yina Isaías. Huan nehual jan yoje annimitzilijtica pa anmochijchías pampa yahui



panúa capa amhuanten in Tata. Annimitzilijtica inon jan quinami Isaías quijtuc pa yina pampa nehual niahuiaya annimitzili.

<sup>24</sup> Yehuanten in tiopistas huan inminlapalehuinijmes in levitas hual cataloaya latilanili capa Juan, yehuanten yeje ca in lacames judíos hual quineltocaloaya inminlamaxtilisli in lacames hual motocaloaya fariseos.

<sup>25</sup> Huan quilajlanije quilijticate:

—Cuaquinon, ¿leca tilacuayatequía sinda tehual amo in Cristo huan tel amo Elías huan tel amo in lajtuni?

<sup>26</sup> Juan quinnanquilic:

—Nehual nilacuayatequía ca al. Ma yoje, ca amhuanten moqueztica se hual amo anquiximati. Yihual pehuas quichías in hual Dios quitlanic pa quichías quiman yes nilaquisas ca in hual Dios nechtilanic pa nicchías nehual. Yihual anmitzlacuayatequis ca in Espíritu Santo hual ilacuayatequilisli unca quinami tixuxli.

<sup>27</sup> Huan nehual amo nimonotza pa nictequipanuilis jan se nadita, ma niquijtu, amo nimonotza pa nictequipanuilis quinami se itequipanujquil quitomilía ilacsames iteco.

<sup>28</sup> Inon panuc pin caltlan itoca Betábara hual unca ca yojque itenco (analco) in atenco hué Jordán capa Juan Lacuayatequini lacuayatectataya.

### *Jesús iBorrego Dios*

<sup>29</sup> Mostatica quitaya Juan Jesús hualatataya capa yihual, huan Juan quij-tuc:

—Xiquitacan. Nepa unca in se hual Dios quilalía quinami huendi, yihual unca Dios iBorrego. Pan ipampa yihual Dios quinquixtilis in lacames mochi inminlajlaculisli.

<sup>30</sup> In se unca yihual hual annimitzlaquetziliaya nepa capa niquijtuc: “Monotza niman hué yihual hual hualas pin tonalijmes quiman nilantica ca notequipanulisli. Huan nehual amo nimonotza len pampa yihual yultataya quiman nehual ayamo niyuliaya.”

<sup>31</sup> Huan nehual amo nicmatiaya yihual yec hual aqui ticchixtataloaya pa hualas. Ma yoje monequi pa yehuanten in israelitos quimatisi pampa axan hualac. Pampa inon nilacuayatecihualaya ca al pa quiximatilosquiaya.

<sup>32</sup> Huan oc sepa Juan lajtuc neli, quijtutica:

—Niquitac temujtica pin ilhuicac (in cielo) in Espíritu Santo, nesc quinami se huilol. Temuaya huan ajsic pani capa yihual, nepa mocahuac.

<sup>33</sup> Huan quiman ayamo niquitac panuc inon, nehual amo nicmatic yihual yec hual aqui ticchialoaya. Ma yoje, Dios nechtilanic pa nilacuayatequis ca al huan yihual nechilic: “Ca yihual capa tiquitas temujtihuualas in Espíritu Santo huan ca in se mocajtica, cuaquín in se yes hual aqui lacuayatequía ca in Espíritu Santo.”

<sup>34</sup> Huan niquitac huan axan niquijtúa neli in se unca Dios iXolol.

### *Jesús pehua quinmana imonextilinjmes*

<sup>35</sup> Mostatica oc sepa moquezttataya Juan ca ome imonextilinjmes.

<sup>36</sup> Nepa Juan quitac Jesús panujtiahuiaya. Mocahuac quiztataya Juan, cuaquín quinmilic:

—Xiquitacan. Umpa unca Dios iBorreguito.

<sup>37</sup> Quicaquije len quinmilic Juan in omenten imonextilinjmes huan quitocaje Jesús.

<sup>38</sup> Momalinac Jesús, quinmitac quitocatihualaloaya, quinmilic:

—¿Len anquitemujtihuala?

Yehuanten quillije:

—Rabí, ¿capa tichanti pa yoje timitzpaxaluilisi?

(Rabí quinequi quijtúa Lamaxtini.)

<sup>39</sup> Quinmilic:

—Xihualacan huan anquitas.

Cuaquinon uyaje huan quitaje capa chantiaya, mocahuaje ca yihual in semilhuil, cataya quinami nahui horas pa tiolac.

<sup>40</sup> Huan Andrés cataya se ca in omenten hual quicaquije len quijtuc Juan Lacuayatequini huan cuaquín quitocaje Jesús. Andrés yec icni Simón Pedro.

<sup>41</sup> Cuaquín, in Andrés amo huejcahuac uyac quitemuc icni Simón huan umpa capa quitac, quilic:

—Tilamije ticmatije pampa axan unca in Mesías pin lalticpan, tilamije tiquitaje. (Mesías quinequi quijtúa Cristo, yihual hual Dios quilajtultic pa huelitis.)

<sup>42</sup> Andrés quihualicac Simón capa cataya Jesús. Huan umpa capa Jesús quitac Simón, mocahuac quiztica, quilic:

—Tel timotoca Simón ti'ixól Jonás. Mitztocayaltisi Cefas. (Cefas quinequi quijtúa Pedro o tixcali.)

### *Jesús quinnotza Felipe huan Natanael*

<sup>43</sup> Mostatica quinequiaya quisa Jesús capa chantiaya, quinequiaya yahui pa in lalticpan Galilea. Quitac Felipe huan quilic:

—Xichtoca.

<sup>44</sup> Chantiaya Felipe pin caltilan Betsaida, capa chantiloaya noje Andrés huan Pedro.

<sup>45</sup> Uyac Felipe, quitemuc huan quitac Natanaél, quilic:

—Tiquitaje yihual hual aquí quijcuiluc Moisés pa iamal in lajtol pa tehuan-ten in israelitos, noje quijcuiluje inahuac yihual Dios ilajtunijmes. Yihual Jesús ixolol José, yihual quisac pin caltilan Nazaret.

<sup>46</sup> Natanaél quilic:

—Da amo unca len cuali hual quisac pa Nazaret.

Felipe quilic:

—Xihuala xiquita.

<sup>47</sup> Jesús quitac Natanaél hualac capa yihual, huan quijtuc, quilic:

—Xiquita. Nepa unca se israelito melác. Amo quimati lacuajcuamana, amo unca se nadita lacuajcuamanalisisli ca yihual.

<sup>48</sup> Natanaél quilic:

—¿Quinami tichiximati? ¿Capa tichiximatic?

Quinanquilic Jesús:

—Ayamó mitznotzac Felipe huan nicmatic timolalijtataya itzindan in amacuál tipichin. Unca jan quinami nimitzitic nepa.

<sup>49</sup> Natanaél quinanquilic:

—Rabí, tehual Dios iXolol, tehual ihué Israel.

<sup>50</sup> Quinanquilic Jesús quilijtica:

—Nimitzilic quinami nimitzitic itzindan in amacuál tipichin, huan ¿pampa inon tichneltocha? Inon amo lachihualisli hué quinami innojen míac huéjue hual tiquinmitas pa tonalijmes hual yalo ajsilo.

<sup>51</sup> Huan quilic:

—Annimitzilía neli inon. Anquitas lapujtica in cielo huan anquinmitas Dios ilanahuatinijmes pin cielo (ilhuicac) lejcucate huan temujtcate nopan nehual ilacal in cielo.

## 2

*Jesús yahui pa se monamictilisli pa Caná de Galilea*

<sup>1</sup> Mostatica yupan Jesús cataya capa yahuiloya monamictilo omenten pin caltilan Caná pin lalticpan Galilea. Huan cataya nepa Jesús inantzin.

<sup>2</sup> Quinntozaje Jesús noje huan imonextilinjmes pa hualalosquiaya capa yahuiloya monamictilo.

<sup>3</sup> Quitaje pampa yajmo cataya iayo uva coc. Pampín inantzin quilic Jesús:  
—Yajmo quipialo iayo uva coc.

<sup>4</sup> Huan Jesús quilic:

—Nana, ¿len nicpías pa niqitas ca tehual? Ayamo ajsic in tonali pa nipehuas nicchías len quinnextilis lacames capa nihualac.

<sup>5</sup> Quinmilic inantzin in tequipanujquimes:

—Xicchihuacan len yes anmitzilis.

<sup>6</sup> Cataloaya nepa seis (chicuase) tapalcames lachihuali ca tixcali hual quilalililoaya al. In al quinequiloaya pa lachipahuasi quinami quijtúa ilajtol Dios hual quimaxtilo in judíos. Cajsiloaya mochi sejse ca in chicuase tapalcames quinami ochenta o cien litros.

<sup>7</sup> Quinmilic Jesús:

—Xiquintemiltican ca al in tapalcames.

Huan quintemiltije, ca nadita quinequiloaya toyahuil.

<sup>8</sup> Cuaquinon Jesús quinmilic:

—Axan, xicanacan, xiquihuiquilican inminlaicanani yehuanten hual quinmacaticate iayo uva coc yehuanten hual quinhualicaje pa in monamictilisli.

Yojque quichihuaje.

<sup>9</sup> Huan cunic in laicanani in al hual mochíac iayo uva coc. Yihual amo quimatiaya capa canaje. Ma yoje, in tequipanujquimes quimatije, pampa cataloaya yehuanten hual canaje in al. Cuaquín quinntozac in laicanani yihual hual monamictiaya.

<sup>10</sup> Quilic:

—Mochi lacal pehua quinmacatica iayo uva coc cuali pa cunisi yehuanten hual quinhualicac pa ichan pa len fiesta. Cuaquinon quiman cuniloaya míac, yihual quinmaca pa cunisi iayo uva coc hual amo niman cuali. Ma yoje, tehual ticajcoquic in cuali pa cunisi axan.

<sup>11</sup> Ca inon pehuaya quinchía Jesús innojen hual quinmahuisultiloaya ca lamajtilisli lacames. Cataya pin caltilan Caná pin lalticpan Galilea. Yoje quinextic quinami yihual quipía Dios ilahuelilitilisli hué, huan quilalililoaya inminlaneltocalisli ca yihual imonextilinjmes pampa quimatiloaya yihual yec in Cristo.

<sup>12</sup> Panuc inon, temuc Jesús pa in caltilan Capernaum, yihual huan inantzin huan icnián huan imonextilinjmes. Umpa chantiloaya jan se ome tonalijmes san.

*Jesús quichipahua in tiopan hué*

(Mt. 21:12-13; Mr. 11:15-18; Lc. 19:45-46)

<sup>13</sup> Ajsithualaya inminfiesta (ilhuil) in judíos, in fiesta itoca pascua, huan panquisac Jesús pa Jerusalén.

<sup>14</sup> Nepa pin tiopan hué quinmitac yehuanten hual quinmacaloaya toros huan borregos huan huilomes. Noje quinmitac yehuanten hual yehualoaya quinpatilijtaloaya in lacames inmintomin.

<sup>15</sup> Cuaquinon mochihuicilic se lahuitequiloni ca mecames, quinquixtic moxtin pa quiahuac in tiopan hué, in borregos huan in toros huan in lanamacanijmes. Quilasac pan lali inmintomin yehuanten hual quinpatילוaya, huan quintzincuepac innojen capa molaliloaya pa lanamacasi.

<sup>16</sup> Quinmilic yehuanten hual quinnamacaloaya huilomes, quinmilic:  
—¡Xi quinquixtican innojen nican pa quiahuac, amo xicchihuacan pa anlana-macas pa ichan noTajtzin!

<sup>17</sup> Quijnamiquije imonextiliniymes quinami unca lajcuiluli pa Dios iamal, yojque quijtúa inahuac yihual: “Ca lanequilisli niman hué hual nechyantía chichahuac nicnequi pa quichihuasi quinami ticnequi, Tata, quiman yes niunca calijtic mocali.” Yojque unca lajcuiluli.

<sup>18</sup> Cuaquinon quinanquilije in huejueyenten in judíos, quilije:  
—¿Len ilanextilisli ilahuelilitlisli Dios tia titechnextilia, pa yojque ticmatisi unca tel moyaxca pa ticchías inon, huan da ticpía lahuelilitlisli pa ticchías inon?

<sup>19</sup> Jesús quinnanquilic:

—Xicxitinican in tiopan huan quiman panusi ye tonalijmes, nijquetzas.

<sup>20</sup> Cuaquinon quilije in judíos:

—Cuarenta y seis (Ompuhualihuanchicuase) xixihuic quichijtataloaya in tiopan hué, huan ¿tehual tijquetzas jan pan ye tonalijmes san? Tislacati.

<sup>21</sup> Amo quimatiloaya pampa Jesús quinequiaya quiytu icuerpo quiman quiytutataya “in tiopan”, pampa Dios chantiaya laijtic Jesús icuerpo quinami cataya se tiopan.

<sup>22</sup> Yoje, quiman quimictije Jesús huan umpa panuje ye tonalijmes, cuaquín ajsic in tonali quiman mocuepac yulic Jesús. Cuaquinon quijnamiquije imonextiliniymes quinami yihual quijtuc inon. Quineltocaje len cataya lajcuiluli inahuac Jesús huan quijnamiquije in lajtol hual yihual quinmilic.

### *Jesús quinmiximati moxtin*

<sup>23</sup> Ma yoje, mochi in tonalijmes capa cataya Jesús pa Jerusalén pa in ilhuil (fiesta) pascua, cataloaya míac lacames nepa hual quineltocaje pampa Dios quitlanic pin lalticpan pa huelitis capa yehuanten, jan quinami quinequi quijtúa itoca. Quineltocaje quiman quitaloaya innojen huejué hual quinchíac calica quinnextiliaya quinami yihual quiptiaya Dios ilahuelilitlisli.

<sup>24</sup> Ma yoje, Jesús amo quilaliaya laneltocalisli ca yehuanten. Yihual quinmiximatiaya moxtin.

<sup>25</sup> Amo monequiaya pa se quilis yihual len neli unca laijtic inminyolo lacames, pampa yihual ihuán quimatiaya cuali quinami jan axcan in lacames huil quipalalo inminyolo pa mochihuasi ilacocoliniymes yihual.

## 3

### *Jesús huan Nicodemo*

<sup>1</sup> Ma yoje, cataya se lalac ca in lacames fariseos, motocaya Nicodemo. Yihual se hué lalac ca in judíos.

<sup>2</sup> In se hualac capa Jesús pa layúa, quilic:

—Rabí, ticmatilo tehual tiunca lamaxtini hual tihualac pampa Dios mitztlanic. Ticmatilo inon, pampa amaqui huil quinchihuaya innojen huejué hual tehual tiquinchía sinda amo cataya Dios ca yihual.

<sup>3</sup> Jesús quinanquilic:

—Neli nimitzilía, sinda amo mocuepa lacati se pa pani pin cielo, yihual amo huil quimatis nindeno quinami Dios lahueliltía.

<sup>4</sup> Quilic Nicodemo:

—¿Quinami huil lacati se sinda axan unca hué? Amo huil calaqui oc sejpa laijtic inantzin pa yoje mocuepas lacatis.

<sup>5</sup> Quinanquilic Jesús:

—Nimitzilía neli, sinda amo lacati se pan ipampa al huan in Espíritu Santo, cuaquín yihual amo huil cayas capa lahuellitía Dios.

<sup>6</sup> Lacames cate nacal huan umil huan esli. Huan quinlacatitilo oc sequin hual cate nacal huan umil huan esli. In Espíritu quilacatitía espíritu.

<sup>7</sup> Amo ximolapolulti pampa nimitzilic anquipías pa anlacatis pa pani pin cielo (ilhuicac).

<sup>8</sup> In ijyecal unca quinami in Espíritu, ijyecatía ca capic quinequi huan tijcaqui. Ma yoje, amo ticmati capa hualac huan ca capic yahui. Jan yoje unca ca sejse sinda lacati pan ipampa in Espíritu. Amo quita capa huala in Espíritu, amo quita tequipanujtica, amo quita ca capic yahui.

<sup>9</sup> Nicodemo quinancelic:

—¿Quinami huil panúa inon?

<sup>10</sup> Quinanquilic Jesús:

—Tehual tiunca inminlamaxtini niman hué in israelitos, huan ¿amo ticmati len quinequilo quijtulo innojen?

<sup>11</sup> Nimitzilía neli, tehuanten tiquijtulo len ticmatilo, huan tiquijtulo neli len tiqitaje. Huan amo ancana len tiquijtulo neli.

<sup>12</sup> Annimitzlaquetzilic inminahuac innojen hual panulo pan lalticpan. Huan amo anquineltoca in hual nicnequi annimitzmaxtía. Axan, ¿quinami anquineltocas sinda annimitzlaquetzilis inahuac in hual panúa pin cielo (ilhuicac)? Amo huil.

<sup>13</sup> Amo unca amaqui hual lejcuc pin cielo. Pampín amaqui huil anmitzilis len panúa pin cielo. Jan in Se hual temuc quistataya pin cielo, nehual ilacal in cielo, nehual huil.

<sup>14-15</sup> Huan jan yoje quinami Moisés cajcoquic in teposcuhual nepa capa amaqui cuajmiluni, jan yoje nehual ilacal in cielo nicpiás pa niyes la'ajcoquili, pa yoje moxtin hual quilalisi inminlaneltocalisli ca nehual canasi Dios iyulilislí hual amo quiman lamis.

### *In lasojlalisli hual quipía pa moxtin pin lalticpan*

<sup>16</sup> Unca pampa Dios quinnequic miac moxtin yehuanten pin lalticpan. Huan yoje unca quinami quinnequic: Quitemacac ixolol, in se san hual quipía, quitemacac pa miquis, pa yoje aqui yes quilalía ilaneltocalisli ca yihual, yoje in se amo polehuis pa yajmo yulis ca yihual. Huan amo inon san. Noje canas Dios iyulilislí hual amo quiman lamis.

<sup>17</sup> Unca pampa Dios amo quitilanic iXolol pin lalticpan pa quinpolehuiltis yehuanten pin lalticpan. Quitilanic iXolol pa yoje pan ipampa yihual yehuanten yesi lamacahuali pa camo polehuisi pampa yeje laijlaculi.

<sup>18</sup> Aquí yes hual quineltoca Dios iXolol yihual Dios amo quipolehuiltis. Amo quipías pa miquis laxiluli pa yajmo quitas Dios pampa yec laijlaculi. Aquí yes amo quineltoca, in se Dios axan quijtuc pampa quipía pa miquis laxiluli ilaixpan Dios pampa amo quineltoca Dios iXolol hual unca in se iXolol hual quipía.

<sup>19</sup> Huan ¿leca cate yoje lapolehuilti innojen lacames hual amo quineltocalo Dios iXolol? Unca pampa Dios ilajtol ajsic pin lalticpan, unca quinami lahuilislí pa lacames inminyolo. Ma yoje, in lacames amo quixtocaje Dios ilahuilislí pa inminyolo. Quixtocaje yulije quichijtcate amo cuali. Yehuanten hual quixtocalo quichihualo amo cuali quixtocalo quichihualo capa

laticumac. Yoje, in lacames quixtocalo in laticumac huan in lahuilisli amo quixtocalo.

<sup>20</sup> Unca pampa mochi se hual quichía len amo cuali, yihual amo quixtoca Dios ilajtol hual unca quinami lahuilisli. In se amo moajxiltía pa quicaquis Dios ilajtol, pampa amo quinequi pa momatis quinami amo unca cuali in hual quichijtica.

<sup>21</sup> Huan se hual yuli quichijtica len unca melahuac quinami quijtúa Dios ilajtol, yihual moajxiltía capa huil quicaqui Dios ilajtol hual unca quinami lahuilisli. Quichía yoje pa yoje mochi in hual quichijtica cayas quinami quichía se hual quineltoca Dios.

### *Juan Lacuayatequini lajtúa oc sejpa inahuac Jesús*

<sup>22</sup> Panuc inon, uyaje Jesús huan imonextiliniymes pa in lalticpan Judea, nepa mochahuaya huan lacuayatequiaya.

<sup>23-24</sup> Juan noje cataya pin caltilan Enon capa amo cataya huejca Salim. Nepa lacuayatecataya pampa cataya míac al. Hualaloaya lacames huan quincuayatequiaya Juan pampa Juan ayamo cataya latzacuali pa calijtic.

<sup>25</sup> Yoje, pehuaje molaxilije lajtomes Juan imonextiliniymes ca se judío, molaxililoaya lajtomes inahuac quinami mochipahuas se pa yoje Dios quitas chipahuac in se.

<sup>26</sup> Cuaquinon hualaje Juan imonextiliniymes capa yihual, quilije:

—Rabí, yihual hual cataya ca tehual ca yoje (analco) in atenco hué Jordán, tiquijtuc neli pampa yihual unca Dios iBorrogo, huan xiquita. In se lacuayatectica huan moxtin quitocalo yihual.

<sup>27</sup> Quinnanquiloc Juan, quinmilic:

—Se lacal amo huil cana Dios ilahueliltilisli sinda Dios pin cielo amo quimacac.

<sup>28</sup> Amhuanten nojen anquimati neli quinami anechcaquic niquijtuc ca lajtol melahuac pampa nehual amo in Cristo. Ma yoje, niunca latilani, Dios nechtilanic pa nicayasquiaya nican in tonalijmes capa ayamo hualaya Cristo pa yoje niquinmilis in lacames pampa yahuiaya huala.

<sup>29</sup> Unca quinami in lacames hual yalo monamictilo. In lacal quipía in sihual hualca monamictis. Ma yoje, in lacal ilasoqli moquetza pa cayas inahuac in lacal hual monamictía pa quipalehuis. Huan quiman yes ilasoqli quicaqui lajtujtica in lacal hual monamictis, cuaquinon ilasoqli quipía míac paquilisli pampa quicaqui. Huan nehual niquinami in lacal ilasoqli. Nicpía míac paquilisli pampa in lacal hual monamictía, nicpía yoje niman míac paquilisli hual yajmo huil momiactía.

<sup>30</sup> Lacames quipiasi pa quimatisi mojmosta quinami yihual unca niman hué. Huan quipiasi pa quimatisi quinami nehual nitipichin.

### *Yihual hual huala quistataya pa pani*

<sup>31</sup> Yihual hual hualac quistataya pa pani unca niman hué. Moxtin oc sequin amo quiman ajsisi yesi yoje hué. Yihual hual unca pin lalticpan hualac pin lalticpan huan lajtúa quinami quimatilo len unca pin lalticpan. Yihual hual hualac quistataya pin cielo unca niman hué. Moxtin oc sequin amo quiman ajsisi yesi yoje hué.

<sup>32</sup> Yihual quijtúa neli len quitac huan quicaquic nepa pin cielo. Huan mas que amo unca se hual quineltoca len yihual Cristo quijtúa, ma yoje Cristo quimati huan quijtúa neli pampa Dios unca melahuac, huan unca neli in hual yihual quijtúa.

<sup>33</sup> Aquí yes quineltoaca len yihual Cristo quijtúa neli, cuaquín yihual quimati huan quijtúa neli pampa Dios unca melahuac, quinami se temulol lanextilía neli quinami se amal quijtúa len hual unca neli.

<sup>34</sup> Yihual Cristo hual Dios quitilanic quijtúa Dios ilajtomes, pampa yihual Dios quimaca mochi in Espíritu Santo. Amo quimaca quinami se hual lalamachihuilijtinemi.

<sup>35</sup> Dios in Tata quinequi Jesús iXolol, huan quitemacac mochi ca Jesús iXolol pa yes iyaxca. Yoje mochi hual iyaxca Dios unca iyaxca Jesucristo.

<sup>36</sup> Aquí yes quineltoaca Dios iXolol quiptía Dios iyulilisli hual amo quiman lamis. Huan aquí yes amo quineltoaca Dios iXolol amo quitas iyulilisli. Dios amo mocahua pa cualanis ca in se hual amo quineltoaca.

## 4

### *Jesús huan in sihual samariteca*

<sup>1</sup> Cuaquinon, quisac in Tata pin lalticpan Judea. Quisac pampa quimatic quinami yehuanten hual quineltoaloaya inminlamaxtilisli in fariseos quicaquije quinami yihual Jesús quinmanaya huan quincuaatequiaya mías monextiliniymes huan Juan yajmo mías.

<sup>2</sup> Ma yoje, amo cataya Jesús hual lacuaatequiaya, cataloaya imonextiliniymes hual lacuaatequiyoaya.

<sup>3</sup> Pampín, quisac in lalticpan Judea, uyac pa in lalticpan Galilea.

<sup>4</sup> Huan quiptiaya pa quipanahuis in lalticpan Samaria.

<sup>5</sup> Quipanajtataya ca ompic, uyac capa amo huejca cataya se caltilan pa Samaria itocac Sicar. Ajsic capa in lali hual Jacob quimacac ixolol José pa yina.

<sup>6</sup> Noje cataya nepa Jacob icoyunquil huejcalan pa al. Huan quinami sjajtihualaya Jesús ca in mías nejnemilisli, molalic inahuac in coyunquil, cataya quinami lacualispan.

<sup>7</sup> Cuaquín hualac se sihual samariteca pa canas al. Jesús quilic:

—Xichmaca al pa nicunis.

<sup>8</sup> Cataloaya inminhuían pampa uyaje imonextiliniymes pa in caltilan pa quicuhualosquiaya len quicualosquiaya.

<sup>9</sup> In sihual samariteca quilic:

—Tehual tijudío. ¿Leca tinechmotemachilía nehual len ticunis? Nel niunca samariteca.

(Quilic yoje, pampa in judíos amo motemachilo ca in samaritecos, amo quinmixtocalo yehuanten.)

<sup>10</sup> Jesús quinangunquic, quilic:

—Sinda ticmatiya len Dios quinequi mitzmaca, huan sinda tiquiximatiya aquí nehual niunca hual nimitzmotemachilic al pa nicunis, cuaquín tichmotemachiliaya huan nimitzmacaya al hual totoca pa layulitilis.

<sup>11</sup> In sihual quilic:

—Tata, tehual amo ticptía len calica ticanas al, huan in coyunquil unca huejcalan. ¿Capa ticptía in al hual totoca pa layulitilis?

<sup>12</sup> ¿Tehual tihué huan totajtzin Jacob amo yoje hué? Yihual quihuajuanac in coyunquil huan techcahuilic. Cuniniyme al hual quisac nican, yihual huan ixolomes huan iyulijquimes cuniniyme al hual canaje pin huejcalan nican. Huan tehual, ¿tinechmacas al?

<sup>13</sup> Jesús quinangunquic:

—Moxtin hual cunilo in al nican amiquisi oc sejpa.

<sup>14</sup> Ma yoje, aqui yes cunis in al hual nicmacas nehual, yihual amo quiman amiquis. Quema, in al hual nicmacas yes quinami se ilajuichuilisli al laijtic yihual huan in al quinami lajuichus lejcutica pa pani pa quiyuliltis ca Dios iyulilisi hual amo quiman lamis.

<sup>15</sup> In sihual quilic:

—Tata, xinechmaca in al pa camo niamiquis huan pa camo nicpías pa nihualas nicanas al ca niquic.

<sup>16</sup> Jesús quilic:

—Xía xicnotza pa hualas molahuical huan xihualacan ca niquic.

<sup>17</sup> Quinanquilic in sihual:

—Amo nicpía nolahuical.

Jesús quilic:

—Neli tiquijtúa tichilijtica pampa amo ticpía molahuical.

<sup>18</sup> Unca pampa tiquinpiac maculli molahuicalhuan. Huan amo san inon, yihual hual ticpía axan amo molahuical. Neli tiquijtuc tichilijtataya inon.

<sup>19</sup> In sihual quilic:

—Tata, nicmati pampa inon pampa tehual tiunca se ilajtuni Dios.

<sup>20</sup> Quimolancuacuetziliniyme Dios totajtzitzián pan in loma nican. Huan amhuanten anquijtúa unca pin Jerusalén capa monequi pa lacames quimolancuacuetzilisi Dios.

<sup>21</sup> Jesús quilic:

—Nito, xicneltoca len nía nimitzilía. Ajsiticate tonalijmes huan pa innojen tonalijmes yajmo monotzas capa anquimolancuacuetzilis toTajtzin Dios. Amo anquipías pa anquimolancuacuetzilis nican, amo anquipías pa anquimolancuacuetzilis pa Jerusalén.

<sup>22</sup> Amhuanten anquimolancuacuetzilía len amo anquimati. Tehuanten ticmolancuacuetzililo len ticmatilo. Unca pan topampa tehuanten in judíos huala Dios ilajtol hual lamaxtilía quinami in lacames moquixtilisi pin ipolehualisli inminlajlaculisli. Huan lamaxtilía quinami quipiasi Dios iyulilisi hual amo quiman lamis.

<sup>23</sup> Ma yoje, ajsitica in tonali, quema, axan ajsic in tonali, huan yehuanten hual neli quimolancuacuetzililo Dios quimolancuacuetzilisi pan ipampa inminyolo huan quimolancuacuetzilisi pan ipampa mochi melahualisli. Lacames quinami innojen toTajtzin Dios quintemujtía pa quimolancuacuetzilisi.

<sup>24</sup> Dios unca Espiritu, huan yehuanten hual quimolancuacuetzililo quipialo pa quimolancuacuetzilisi pan ipampa espíritu huan pan ipampa melahualisli. In espíritu unca pa iyolo se. Dios toTajtzin quintemúa lacames huan sihuames quinami yehuanten pa quimolancuacuetzilisi yoje.

<sup>25</sup> In sihual quilic:

—Nicmati pampa yahui huala in Mesías hual quitocayaltilo Cristo. In tonali yihual hualas, yihual technextilis mochi.

<sup>26</sup> Jesús quilic:

—Nehual niunca in Cristo, nehual hual nimitzlaquetzilijtica tehual.

<sup>27</sup> Jan nican mocuetthualaloaya imonextiliniymes, mocaualoaya moizticate pampa Jesús laqueztataya ca se sihual. Ma yojque amaqi quilic: “¿Len ticequi ca in se?”, o “¿Leca tilaquetzica ca yihual?”

<sup>28</sup> Cuaquinon quicajcahuac in sihual itapalcal, uyac, yajtiac pa in caltilan, quinmilic in lacames:

<sup>29</sup> —Xihualacan xiquitacan se lalacal hual nechilic mochi len nicchihuaya. ¿Amo yes in Cristo in se?



30 Jan axcan quisaje pin caltilan, pehuaje hualaje ca capic cataya Jesús.

31 Hualajtataloaya in samaritecos, quilije Jesús imonextiliniymes:

—Rabí, xilacua.

32 Huan Jesús quinmilic:

—Nehual nicpía len nijcuas hual amhuanten amo anquimati.

33 Pampín moilije imonextiliniymes se ca oc se, moilije:

—¿Unca se hual quihualiquilic len pa quicuas?

34 Jesús quinmilic:

—Nicnequi míac pa nicchías len quinequi Dios hual nechtilanic, amo yoje míac nicnequi nilacua. Yoje nilamís nicchías Dios itequipanulisli.

35 ¿Amo anquijtúa: “Quipías nahui mesli, cuaquinon ajsis in lapixcalisli”? Huan nehual niquinnechicujtica lacames hual nechneltoalo, inon unca quinami se lapixcalisli. Huan xiquitacan, annimitzilía xiquinlapucan annoixtololojmes huan xiquinmiztiacan in cuajmilimes. Unca quinami lacames huan sihuames hual nechneltoasi axan hualajtcate nepa pin cuajmilimes. Unca quinami cuajmilimes axan chicajtcate pa in lapixcalisli, pampa lacames yalo nechneltoalo.

36 Unca quinami axan cantica in lapixcani ilaquehualisli, huan lapejpen-tica huan lamontutica. Yoje lanechicujtica pa in lapixcalisli. In lapixcalisli unca quinami se hual quinnotzas oc sequin lacames pa nechneltoasi, huan yehuanten canasi Dios iyulilisli hual amo quiman lamis. Yoje moxtin hual pehuaje quinlamachiltije nonahuac nehual quipiasi paquilisli ca yehuanten hual quinpalehuije pa nechneltoasi. Unca jan quinami in paquilisli hual quipialo yehuanten hual latocalo huan yehuanten hual lapixcalo.

37 Unca neli in hual tiquijtulo: “Unca se hual latoca, huan oc se hual lapixca.”

38 Unca quinami annimitztilanic pa anlaxpíca capa amo antequipanuaaya. Oc sequin tequipanuloaya nepa, huan axan unca quinami amhuanten anpejtica anlaxpíca capa yehuanten latocaniyme.

39 Huan míac ca innojen lacames samaritecos hual chantiloaya pa in caltilan quineltocaje pan ipampa len quinmilic in sihual. Yihual quinmilic neli: “Yihual nechilic mochi hual nicchiac pa noyulilisli.”

40 Yoje, hualaje capa yihual Jesús in samaritecos, quitemachije pa mocahuas ca yehuanten pin caltilan Sicar. Cuaquín mocahuac Jesús umpa ome tonaliymes.

41 Huan míac oc sequin ca yehuanten quineltocaje Jesús pan ipampa len yihual quinmilic.

42 Pehuaje quilije in sihual:

—Axan ticneltoalo amo pan ipampa len titechilic, pampa axan tijcaquije tehuanten tohuán, huan neli ticmatilo in lalac unca in Cristo hual quinquixtilía inminlajlaculisli in lacames pin lalticpan pa camo polehuisi.

### *Jesús quipajtía ixolol lalac se huelitini*

43 Panuje in ome tonaliymes, quisac Jesús umpa huan uyac pa in lalticpan Galilea.

44 Uyac umpa ca imonextiliniymes. Huan yihual Jesús neli quijtuc pampa amo quimatilo momajtilo iyampa se ilajtuni Dios yehuanten pa ilali capa moscaltic.

45 Ma yoje, yehuanten pa Galilea quinamiquije ca paquilisli, pampa quitaje mochi innojen hual quinchíac nepa Jerusalén pin fiesta (ilhuil), yehuanten noje nepa cataloaya.

<sup>46</sup> Cuaquinon uyac oc sejpa pa in caltilan Caná pin lalticpan Galilea. In caltilan cataya capa quiapiaya je quesqui tonalijmes quipalac in al pa mochíasquiaya iayo uva coc. Huan cataya se huelitini ca yehuanten hual huelitiloaya. Quiapiaya ixolol mococujtataya pin caltilan Capernaum.

<sup>47</sup> Quicaquic lajtuloaya quinami quisac Jesús in lalticpan Judea huan axan ajsic pa Galilea. Pampín uyac capa Jesús, quiyantic pa temus Jesús pa Capernaum pa quipajtis ixolol, pampa yahuiaya miqi ixolol.

<sup>48</sup> Jesús quilic:

—Sinda amo anquita panúa len pin cielo (ilhuicac) o pan lalticpan hual anmitzmahuisultía ca lamajtilisli, amo quiman anquinequi anquineltoca nehual niquistihualac capa unca Dios.

<sup>49</sup> In huelitini quilic:

—Tata, xihuala ca nehual pa camo miquis noxól.

<sup>50</sup> Jesús quilic:

—Xía pa mochan, yuli moxól, amo miquis.

Quineltocac in lalac in hual quilic Jesús, uyac.

<sup>51</sup> Huan cataya pan ojli, ayamo ajsiaya pa ichan huan quinamictihualaje itequipanujquimes, quilije pampa pajtic ixolol, quilije:

—Pajtic moxól, yultica.

<sup>52</sup> Quilajlanic quiman pehuac pajtic huan quilije:

—Yalhua pa se hora pa tiolac mosehuic totoniác.

<sup>53</sup> Pampín quimatic itajtzin cataya in hora quiman quilic Jesús: “Yultica moxól.” Yoje yihual quineltocac pampa Jesús quistihualac capa unca Dios huan noje quineltocaje moxtin pa ichan.

<sup>54</sup> Ca inon, axan cataloaya ome lachihualisli hual Jesús quinchíac hual pampa innojen quinmahuisultije ca lamajtilisli moxtin. Inon panuc pin tonalijmes quiman quisac in lalticpan Judea pa hualas pa Galilea.

## 5

### *Jesús quipajtia se lalac hual amo huil moquetza*

<sup>1</sup> Panuje innojen tonalijmes, cataya se fiesta (ilhuil) pa in judíos, huan panquisac Jesús pa Jerusalén.

<sup>2</sup> Cataya se lahuajuanali amo huejcalan capa maltinijme. Amo cataya huejca in lalapujquil capa calaquinijme in borregos pa in cali cuajtic (tepandi) hual quiyahualuaya in caltilan. In lahuajuanali motocaya ca lajtol hebreo Betzata, huan pa itenco catanijme macuili caltzindis mochi lalapuli san ca chicuenta cuajmaxalimes lachihuali ca tixcalimes.

<sup>3</sup> Pa in caltzindis lastataloaya míac hual cojcocoxqui, pachacames huan yehuanten hual amo huil nejnemiloaya huan yehuanten hual mocololojtotaloaya. Quichialoaya pa quiman molinisquiaya in al.

<sup>4</sup> Se ilanahuatini in Tata temuni quistataya pin cielo (ilhuicac) huan quiculinini in al, yoje panuc sejpa huan oc sejpa mochi xihuil. Huan quiman mosehuiaya molini in al, cuaquín aqi cayasquiaya hual laicaniaya calaqui pa al, yojque yihual pajtiaya.

<sup>5</sup> Nepa lastataya se lalac cocoxqui, axan quiapiaya treinta y ocho (semphualicaxtulihuanye) xixihuil amo huil moliniaya.

<sup>6</sup> Quitac Jesús in lalac lastataya, quimatic pampa quiapiaya míac xixihuil yoje cocoxqui. Huan quilic:

—¿Ticnequi tipajtia?

<sup>7</sup> In cocoxqui quinanquilic:

—Tata, amo nicpía je lalcal ca nel pa nechlasas pa al quiman yes mosehuía molinía. Huan nimotolinía pa nitemus pa al, umpa nechpanahuía oc se.

<sup>8</sup> Jesús quilic:

—Ximoquetza, xicana mopelal huan xinejnemi.

<sup>9</sup> Huan jan ajnaxcan pajtic in lalcal, canac ipelal huan pehuac nejnemic. Cataya in tonali siete (chicome) huan pa in tonali mosehuilo in judíos.

<sup>10</sup> Pampín quilije in judíos yihual hual pajtic, quil:

—Axan in tonali timosehuilo, huan tolajtol amo mitzmacahuiltía pa tic-mantías mopelal.

<sup>11</sup> Yihual quinnanquilic:

—Yihual hual nechpajtic nechilic: “Xicana mopelal huan xinejñentía.”

<sup>12</sup> Quilajlanije:

—¿Aqui in lalcal hual mitzilic: “Xicana huan xinejñentía”?

<sup>13</sup> Yihual hual Jesús quipajtic amo huil quinmiliaya aquí cataya, pampa mohuicac Jesús, yajmo huil moitiliaya pampa tentataya ca lacames in laj-cotiyán.

<sup>14</sup> Mochíac je nadita huan Jesús quitac in lalcal hual quipajtic, cataya calijtic pin tiopan hué, huan quilic:

—Xiquita. Axan tipajtic. Yajmo xicchía laijlaculisli amo san gá mitzpanus oc se cocolisli hual mitzcocoltis míac, hual amo mitzcocoltic yoje míac mococolisli hual tilamic tipajtic.

<sup>15</sup> Uyac in lalcal, quinmilic in judíos huejué cataya Jesús hual quipajtic.

<sup>16</sup> Pampa inon in judíos huejué quitemujtinemiloaya quinami quitojtocasi Jesús pampa amo quineltoaya inminlajtol. Quichihualoaya yoje pampa Jesús quichíac inon pan in tonali hual mosehuilo in judíos.

<sup>17</sup> Ma yoje, Jesús quinnanquilic:

—NoTajtzin amo mocahua pa quichías mochi hual unca cuali. Quinami pa yina, jan yoje axan. Huan nehual nicchijtica noje quinami yihual.

<sup>18</sup> Cuaquín pampa inon, quitejtemuje in judíos niman míac quinami quim-ictilosquiaya. Amo cataya jan pampa quichihuaya len amo quixtocaloaya pan tonali chicome san. Noje yihual quinmilic pampa Dios yec yihual iTajtzin. Huan pampa quijtuaya inon, yoje yihual mochihuaya jan quinami Dios.

### *Dios iXolol quipía lahuelilitisli*

<sup>19</sup> Cuaquinon, Jesús pehuac monapatic ca ilajtomes, quinmilic:

—Neli annimitzilía, nehual iXolol Dios amo huil nicchía nindeno pan nopampa. Jan huil nicchía len niquita quichijtica noTajtzin. Unca pampa len yes yihual quichía, cuaquinon jan yoje inon nicchía nehual iXolol.

<sup>20</sup> Inon unca pampa noTajtzin nechlasojla nehual iXolol, huan nech-nextilía mochi innojen hual yihual quinchía. Quema, huan nechnextilis lachihualisli niman huejué. Amo cate yoje huejué innojen hual annehitac niqinchíac. Nechnextilis pa yoje niqinchías huan pa yoje anmomajtis pampa anquitas quinami quipía lahuelilitisli.

<sup>21</sup> Yoje, quinami noTajtzin quinyuliltía in mijquimes, jan yoje nehual iXolol niquinyuliltía aquinojen yesí nicnequi niquinyuliltía.

<sup>22</sup> Huan amo inon san. NoTajtzin Dios amo quitojtoca amaqui ilaixpan pa polehuis capa amo huil mocuepas. Ma yoje, quimacac pa nehual iXolol niquintojtas nolaixpan yehuanten hual quipialo laijlaculisli.

<sup>23</sup> Yoje, moxtin quimatisi momajtisi nolaixpan nehual Dios iXolol jan quinami quimatilo momajtilo ilaixpan noTajtzin Dios. Aquí yes amo quimati

momajtía nolaixpan nehual Dios iXolol, cuaquín jan yoje amo quimati momajtía ilaixpan noTajtzin hual nechtilanic nican pan lalticpan.

<sup>24</sup> Neli, neli annimitzilía, aquí yes quicaqui len niqijtúa huan quineltoqa yihual Dios hual nechtilanic, yihual quipía Dios iyulilisi hual amo quiman lamis. Huan amo nictojtocas nolaixpan nehual pampa yec laijlaculi. Quema, axan yihual quisac capa in miqulilisi lahueliltiaya huan quimajtic, axan quipía Dios iyulilisi.

<sup>25</sup> Neli, neli annimitzilía, ajsitica in tonali, quema, axan ajsic in tonali hual yehuanten hual miquije quicaquisi nolajtol nehual Dios iXolol, huan yehuanten hual quicaquisi yulisi oc sejpa. Moquetzasi, quisasi pin miqulilisi, yajmo quiman miquisi.

<sup>26</sup> Unca pampa jan quinami Dios noTajtzin quipía yulilisi pan ipampa yihual ihuían, jan yoje nechmacac nehual iXolol noje pa nicpías yulilisi pan nopampa.

<sup>27</sup> Huan Dios nechmacac lahueliltilisi pa niquinmilis pampa quipiasí pa polehuisi laxiluli pa camo cayasi ca Dios pampa nehual niunca ilacal in cielo.

<sup>28</sup> Amo ximolapolultican pampa inon, pampa ajsis in tonali hual moxtin in mijquimes hual cataloaya lalalpachuli quicaquisi nolajtol.

<sup>29</sup> Pampín, quisasi capa cataloaya lalalpachuli. Yehuanten hual yulinijme pan lalticpan quichijtaloaya inon hual unca cuali canasi Dios iyulilisi hual amo quiman lamis. Yehuanten hual yulinijme pan lalticpan quichijtaloaya in hual amo unca cuali yulisi oc sejpa pa niqijtus pampa quipiasí pa polehuisi pa camo quiman cayasi ca Dios.

### *Cate mías hual quinxetilia Jesús ilahueliltilisi*

<sup>30</sup> Amo huil nicchía nindeno sinda nicnequi nicchía pan ipampa no-lahueliltilisi. Ca Dios ilahueliltilisi nicpía pa nicchías mochi. Huan quinami nijcaqui Dios quijtúa, niquintojtoqa nolaixpan nehual pa polehuisi o niquin-macahua pa yulisi. Huan unca melahuac len yes niqijtúa inahuac aquí yes. Unca melahuac pampa amo nictemúa quinami nicchías len nehual nicnequi. Nictemúa quinami nicchías len yihual quinequi hual nechtilanic pan lalticpan.

<sup>31</sup> Sinda nilajtuaya neli nonahuac nehual nohuían, in lajtulisi amo anmitzajsiaya pa yoje anquipías pa anquineltoqas pampa unca melahuac in hual niqijtúa.

<sup>32</sup> Unca oc se hual quijtúa neli nonahuac nehual, huan nicmati inon hual yihual quijtúa unca melahuac.

<sup>33</sup> Amhuanten anquintilanic lacames pa quilajlanisi Juan Lacuayatequini sinda yihual yec in Cristo, huan yihual anmitzilic inon hual unca melahuac nonahuac nehual.

<sup>34</sup> Huan ca nehual amo monotza nindeno in hual lacames quijtulo neli nonahuac nehual. Unca oc se hual lajtúa neli nonahuac nehual, yihual Dios. Ma yoje, annimitzilijtica inon hual Juan quijtuc nonahuac nehual, pa huejtica annechneltocas huan yoje anyes laquixtli pin ipolehuilisi anmolajlaculisi.

<sup>35</sup> Juan Lacuayatequini anmitzilic nadita inahuac Dios ilajtol. Yoje yihual cataya quinami lahuilisi laixpelatataya hual Dios quilalaltic. Huan ancataya niman ca paquilisi pa je nadita pa anquicaquis len inahuac Dios ilajtol hual yihual anmitziliaya. Ancataya quinami lacames hual quipialo paquilisi ca se lahuilisi.

<sup>36</sup> In hual Juan Lacuayatequini anmitzilic nonahuac nehual cataya melahuac. Ma yoje, innojen hual niqinchijtica neli quinxetilia quinami

noTajtzin nechtilanic pa niquinchías. Quema, lanextililo niman míac. Amo yoje míac lanextilía in lajtol hual Juan quijtuc nonahuac nehual. Yihual Dios noTajtzin nechilic pa nichías mochi innojen hual anquinmita anmomaajtítica ipampa Dios ilahuelilitlisli. Nechilic pa nilamis niquinchías, huan innojen lachihualisli quinextililo pampa nihualac niquistataya capa unca Dios noTajtzin.

<sup>37</sup> Quema, noTajtzin Dios nechtilanic pa nihualas ca niquic, huan quila-machiltic lajtomes nonahuac nehual hual neli cate. Ma yoje, amhuanten amo quiman anquicaquic ilajtol huan amo quiman anquitac.

<sup>38</sup> Huan amhuanten amo anquipía Dios ilajtol mocajtica lajitic anmoyolo. Inon nicmati, pampa mas que Dios nechtilanic pa nihualas, ma yoje amo annechneltoca.

<sup>39</sup> Anquitejtemujtía len unca lajcuiluli pin amames hual Dios ilajtunijmes quijcuiluje. Anquichía yoje pampa anquijtúa jan monequi pa anmomaxtía pa yoje ancanas Dios iyulilisl hual amo quiman lamis. Huan inon hual unca lajcuiluli neli anmitznextilía pampa nehual niunca aqui hual annimitzilía.

<sup>40</sup> Ma yoje, amo anquinequi anhuala ca nehual pa yoje anmitzmacas Dios iyulilisl hual amo quiman lamis.

<sup>41</sup> Amo nimotolinía pa niquitas quinami niquinlaquetzaltis hué nonahuac nehual lacames.

<sup>42</sup> Ma yoje, annimitziximati amhuanten, nicmati pampa lajitic amhuanten anmoyolo amo anquilasoja Dios.

<sup>43</sup> Nihualaya quinami Dios noTajtzin ilanahuatini, huan nicpía ilahuelilitlisli hual unca ca quinami itoca. Huan amhuanten amo annechneltoca. Sinda huala oc se ca ilahuelilitlisli yihual ihuían, cuaquín yihual anquineltocas.

<sup>44</sup> ¿Quinami huil annechneltoca? Amo huil, sinda mochi sejse ca amhuan-ten amo anmocahua pa anquitemus pa oc sequin anmitzitasi cuali huan amo anquitemúa pa Dios anmitzitas cuali.

<sup>45</sup> Amo xiquijtucan pampa nehual nía annimitzmotexpahuilía ilaixpan Dios noTajtzin. Unca se hual anmitzmotexpahuilía. Yihual Moisés hual anquijtúa pampa anquineltoca.

<sup>46</sup> Yihual anmitzmotexpahuillis pampa sinda anquineltocaya len yihual quijtuc, cuaquinon annechneltocaya, pampa yihual quijcuiluc lajtomes nonahuac nehual.

<sup>47</sup> Ma yoje, sinda amo anquineltoca in hual yihual quijcuiluc, cuaquinon amo anyahui anquineltoca in hual niquijtúa nehual.

## 6

### *Jesús quinlacualtía maculi mil lacames*

(Mt. 14:13-21; Mr. 6:30-44; Lc. 9:10-17)

<sup>1</sup> Panuc inon, Jesús quipanahuic in al huejcalan itoca Galilea, noje itoca Tiberias. Quipanahuic ca barquito ca yoje itenco (analco).

<sup>2</sup> Huan quitocaloaya niman míac lacames huan sihuames pampa quitaloaya quinami quinpaajtaya in cocoximes. Inon quinextiliaya quinami yihual quiptiaya Dios ilahuelilitlisli.

<sup>3</sup> Huan panquisac Jesús pa pani pin loma (tepetzindi), nepa molalic ca imonextilinijmes.

<sup>4</sup> Ajsitihualaya in fiesta (ilhuil) itoca pascua, in judíos inminilhuil.

<sup>5</sup> Momelahuac Jesús, quinmitac niman míac lacames huan sihuames hualajtcate capa yihual, huan quilic Felipe:

—¿Capa tijcuhasi len pa quicuasi in lalalera?

<sup>6</sup> Jesús quimatiaya len yahuiaya quichía pa canas in lacuali. Ma yoje, quilajlanic Felipe inon pa yoje quijnamiquiltisquiaya Felipe quinami yihual Felipe quipiaya pa monextilisquiaya míac pa quimatisquiaya quinami cataya hué Jesús ilahuelilitisli.

<sup>7</sup> Felipe quinanquilic:

—In tomin hual canaloya ome cientos (majlaclipuhuali) lacames tequipanujticate pan se tonali, in cataya tipichin, amo quinmajsisquiaya pa mochi sejse quipiasquiaya je nadita pan pa quicuasquiaya.

<sup>8</sup> Se ca Jesús imonextilinjmes hual yec icni Simón Pedro, huan motocaya Andrés, quilic:

<sup>9</sup> —Nican unca se muachito, quinpía macuili panes lachihuali ca cebada huan ome michimes. Unca san naditita. ¿Quinami quinmajsis innojen in míac lacames?

<sup>10</sup> Jesús quilic:

—Xiquinmilican in lacames pa molalisi.

Cataya nepa míac sacal. Huan molalije pani pin sacal in lacames, cataloaya quinami cinco (macuili) mil.

<sup>11</sup> Cuaquín quinmanac Jesús in panes huan quisehuic Dios. Cuaquinon quinxiluic yehuanten hual molalijtataloaya. Jan yoje quinxiluic in michimes huan quicuaje moxtin quinami quinequiloaya quicualo.

<sup>12</sup> Quiman pachihuije, quinmilic imonextilinjmes:

—Xiquinpejpenacan in lajquitos lalapanali hual quincahuaje, pa camo ticpolusi nindeno.

<sup>13</sup> Quimpejpenaje huan quintemiltije doce chiquihuimes ca inminlajquitos in macuili panes lalapanali. Cataloaya in hual quicahuaje yehuanten hual lacualoaya.

<sup>14</sup> Yoje, quiman quitaje in míac lacames huan sihuames in hual Jesús quichíac, inon hual lanextilic quinami yihual quipiaya Dios ilahuelilitisli, cuaquín quillije:

—Neli in se ilajtuni Dios hual yahuiaya huala pin lalticpan.

<sup>15</sup> Pampín, Jesús quimatic yehuanten yahuiloya hualalo canaloya pa quichi-hualtije pa yes inminhué. Yoje mijcuanic ihuán oc sepa pa pani pin loma (tepetzindi).

*Jesús nejnemi pani pa al*  
(Mt. 14:22-27; Mr. 6:45-52)

<sup>16</sup> Axan tiolactitiahuiaya, huan temuje imonextilinjmes pa in al huejcalan.

<sup>17</sup> Calaquije pan se barquito, yahuiloya quipanahuilo in al huejcalan pa ajsisi pa Capernaum.

<sup>18</sup> Pehuac majcoquic in al hué pampa pehuac ijyecac se ijyecac chicahuac.

<sup>19</sup> Quilanilultitiahuiloya in barquito quinami macuili o chicuase huejcani (cinco o seis kilometros), cuaquín quitaje Jesús pani pin al, nejnemiaya ajsitihualaya capa in barquito, huan momajtiloaya míac.

<sup>20</sup> Huan jan axcan yihual quinmilic:

—¡Nehual niunca, amo ximomajtican!

<sup>21</sup> Cuaquinon quinequiloaya pa calaquis pin barquito. Calaquic cuaquín, huan jan ajnaxcan ajsic in barquito pa itenco in lali ca capic yajtiahuiloya.

*Lacalera quitemulo Jesús*

<sup>22</sup> Mostatica ayamo mohuicaloaya in míac lacalera hual cataloaya ca yoje (analco) in al huejcalan, capa Jesús quinlacualtic. Quitoaya quinami

yalhua pa tiolac amo cataya oc se barquito, jan se san, huan pa in se barquito jan calaquije in monextiliniymes san, huan mohuicaje inminhuían. Quitaloaya quinami Jesús amo calaquic pin barquito ca yehuanten.

<sup>23</sup> Ma yoje ajsitihualaje barquitos hual cayaje pa Tiberias, ajsije capa amo huejca cataloaya in lalalera, capa in Tata Jesús quisehuic Dios pa in pan hual yehuanten quicuaaje.

<sup>24</sup> Yoje, quitaje in lalalera quinami yajmo cataya Jesús ca yehuanten, huan noje yajmo cataloaya imonextiliniymes. Cuaquin yehuanten noje calaquije pin barquitos hual ajsije, quipanahuije in al huejcalan, ajsije pa Capernaum, pehuaje quitemuje Jesús.

### *Jesús in pan hual layuliltía*

<sup>25</sup> Huan quitaje Jesús nepa pa ca yoje (analco) in al huejcalan, quilajlanije: —Rabí, ¿quiman tihualac ca niquic?

<sup>26</sup> Jesús quinnanquilic:

—Neli, neli annimitzilía inon: Amo annechtemujtica pampa anquitac len nicchía hual lanextilía quinami nehual nicpía Dios ilahueliltisli. Jan annechtemujtica san pampa anpachihuic pan ipampa in pan hual anquicuac.

<sup>27</sup> Anquijnamictica san inon hual anquicua. Huan inon moijlacúa, amo huejcahua, amo anmitzyuliltis pa yajmo anmiquis. Pampín, amo ximotolinican pa ancanas inon hual amo anmitzyuliltis. Monequi pa anquichías inon hual nía annimitzilía. Ximotolinican pa ancanas pa anquicuas in hual huejcahua pa yes, hual anmitzmacas iyuliltisli cuali hual amo quiman lamis. Inon nehual annimitzmacas, nehual ilacal in cielo. Huan Dios noTajtzin neli nechilic pa annimitzmacas inon. Huan amo quiman quipalas len quijtúa. Unca quinami se layapani pan se amal, quiyapa in hual unca lajcuiluli pan in amal pa camo mopalas.

<sup>28</sup> Yoje in lalalera quilije:

—Huan ¿len monequi pa ticchihuasi pa tictequipanuilsis Dios quinami yihual quinequi?

<sup>29</sup> Jesús quinnanquilic:

—Inon unca hual Dios quinequi pa anquichías, huan neli, amo unca tequipanulisli. Dios quinequi pa anquineltoacas yihual hual yihual Dios quitilanic pan lalticpan, niquijtúa, xichneltoacan nehual.

<sup>30</sup> Yoje quilije:

—Huan ¿len tía ticchía pa titechnextilis da Dios neli mitztilanic? Yoje timitzneltocasi. ¿Len tía ticchía?

<sup>31</sup> Totajtzitzian quicuanijme pa yina in maná umpa quiman yultataloaya capa oc sequin amo chantiniyme. Quinami unca lajcuiluli pa Dios iamal, quijtúa: “Yihual quinmacac pan hual cataya pin cielo (ilhuicac) pa quicuasí.”

<sup>32</sup> Jesús quinmilic:

—Neli, neli annimitzilía, amo cataya Moisés hual anmitzmacaya in pan hual cataya pin cielo huan temuc capa amhuanten, quinami anquijtúa. No, cataya Dios noTajtzin hual anmitzmaca in pan melahuac pin cielo hual neli anmitzyuliltía.

<sup>33</sup> Sinda annimitzlaquetzilía inahuac in pan pin cielo hual Dios quimaca, nicnequi niquijtúa pampa nehual niunca in pan hual Dios quimaca, nehual in lalac hual niquisac pin cielo pa nitemus ca niquic. Nehual in lalac hual niquinmaca yuliltisli yehuanten pin lalticpan.

<sup>34</sup> Cuaquinon quilije:

—Tata, xitechmaca mojmosta in pan hual titechlaquetzilijtica.

<sup>35</sup> Jesús quinmilic:

—Nehual niquinami pan hual quimaca yulilisli. Aquí yes hualas ca nehual pa motemacas, cuaquín in se amo quiman mayanas. Huan aquí yes nechnehtocas, in se amo quiman amiquis.

<sup>36</sup> Annimitzilic pampa mas que amhuanten annechitac, amo annechnehtocac.

<sup>37</sup> Ma yoje, sequin nechnehtocalo. Yehuanten cate innojen hual nechmacac Dios noTajtzin, huan yehuanten hualasi ca nehual. Huan aquí yes hualas ca nehual, amo quiman nijquixtis in se capa niunca.

<sup>38</sup> Amo niquinquixtis, pampa niquisac pin cielo pa nitemus ca niquic amo pa nicchías len nehual nicnequi. Nitemus pa nicchías quinami quinequi yihual hual nechtilanic.

<sup>39</sup> Huan yihual hual nechtilanic quinequi pa como nicpolus amaqi ca yehuanten hual yihual nechmaca pa cayasi ca nehual. Yihual quinequi pa niqinyuliltis pan in tonali quiman lamis in lalticpan hual axan unca.

<sup>40</sup> Quema, in unca hual quinequi noTajtzin. Quinequi pa quipías iyulilisli hual amo quiman lamis mochi seje hual nechita huan nechnehtoca nehual iXolol. Huan nehual nicyuliltis mochi seje pan in tonali quiman lamis in lalticpan hual axan unca.

<sup>41</sup> Cuaquinon pehuaje laquetzaje in hueyenten judíos pampa amo quixtocaloaya len quinmiliaya Jesús, pampa quinmiliaya yihual yec in pan hual quisac pin cielo huan temuc pan lalticpan.

<sup>42</sup> Quililoaya:

—In se unca Jesús ixolol José, yihual itajtzin huan inantzin tiquinmiximatilo. Huan techilijtica yihual quisac pin cielo huan temuc ca niquic. Amo ticnehtocalo len techilijtica tehuanten.

<sup>43</sup> Quinnanquicilic Jesús, quinmilic:

—Amo ximolaquetzilican yoje pampa amo anquixtoca len annimitzilic.

<sup>44</sup> Amaqui huil huala ca nehual sinda Dios noTajtzin amo quinequiltia pa hualas ca nehual. Huan nicyuliltis pan in tonali quiman lamis in lalticpan hual axan unca.

<sup>45</sup> Dios ilajtunijmes quijcuiluje inon, huan yoje mocahua melahuac. Quijcuiluje: “Dios quinmaxtis yehuanten moxtin.” Pampín annimitzilía pampa hualasi ca nehual moxtin hual quicaquilo len quijtúa Dios noTajtzin. Quema, monextililo pan ipampa ilajtol pampa yihual quinmaxtilía ilajtol.

<sup>46</sup> Amo unca se ca amhuanten hual quitac Dios noTajtzin. Jan nehual san niquitac Dios noTajtzin, nehual hual niquisac pin cielo pa nitemus ca niquic.

<sup>47</sup> Neli, neli annimitzilía, aquí yes nechnehtoca quipía Dios iyulilisli cuali hual amo quiman lamis.

<sup>48</sup> Nehual niunca in pan hual layuliltía.

<sup>49</sup> Anmotajtzitzían quicuanijme in maná pa yina nepa capa amaqi cuamiluni. Ma yoje, yehuanten miquije.

<sup>50</sup> Nehual annimitzlaquetzilijtica inahuac in pan hual quisac pin cielo huan temuc, pa yoje, sinda se lalac quicuas, yoje amo miquis.

<sup>51</sup> Nehual niunca in pan hual layuliltía, nehual in pan hual quisac pin cielo huan temuc. Sinda se lalac quicua in pan, cuaquín amo mocahua pa yulis. Quema, huan in pan hual nehual nía nicmaca, in unca nocuerpo inacal, pa yoje moxtin pin lalticpan quipiasí Dios iyulilisli.

<sup>52</sup> Inminhueyenten in judíos molaxilije lajtomes se ca oc se, moilijtcate:

—¿Quinami huil in lalac techmaca inacal icuerpo pa tijcuasi?

<sup>53</sup> Cuaquín Jesús quinmilic:



—Neli, neli annimitzilía, sinda amo anquicua inacal nocuerpo nehual ilacal in cielo, huan sinda amo ancuni noesli, cuaquín amo anquipías Dios iyulilislí lajitic amhuanten.

<sup>54</sup> Yihual hual quicua nocuerpo inacal huan cuni noesli, unca yihual hual quipía Dios iyulilislí hual amo quiman lamis. Huan nehual nicyuliltis pa in tonalí quiman lamis in lalticpan hual axan unca.

<sup>55</sup> Nocuerpo inacal neli unca quinami len quicua huan noesli neli unca quinami len cuni se.

<sup>56</sup> Unca quinami yuli lajitic nehual yihual hual quicua nocuerpo inacal huan cuni noesli. Nicnequi niquijtúa yihual yuli pan ipampa noyulilislí huan nehual niyuli lajitic yihual.

<sup>57</sup> Nechtlanic Dios noTajtzin hual yuli, huan nehual niyuli pan ipampa Dios noTajtzin. Pampín yoje yulis pan nopampa nehual aqui yes hual nechcuas.

<sup>58</sup> Nehual niunca in pan hual quisac pin cielo huan temuc ca niquic. In pan amo unca quinami in pan hual quisac pin cielo hual quicuaeje anotajtzitzián huan miquije. Aquí hual quicua in pan hual niquijtutica amo quiman mochahuas pa yulis.

<sup>59</sup> Innojen lajtomes quinmilic pin tiopan nepa Capernaum capa lamaxti-aya.

### *Lajtomes hual layuliltía*

<sup>60</sup> Quicaquije inon mías ca imonextiliniymes huan quijtuje:

—Innojen lajtomes lacualantilo huan ej'etiasticate pa ticmatisi len quinequilo quijtulo. Amaqui quinequis quicaquis, amo huil quimati se len quinequilo quijtulo.

<sup>61</sup> Quimatic Jesús lajitic yihual quinami molaquetzililoaya imonextiliniymes inahuac len quinmiliaya huan amo quixtocaloaya len quilic. Pampín quinmilic:

—¿Amo anquixtoca in hual annimitzilic?

<sup>62</sup> Cuaquinon, ¿len anyahui anquijtúa pin tonalí annechitas nehual ilacal in cielo nilejcutica ca capic nicatani nepa pin cielo quiman ayamo nihualac pan lalticpan?

<sup>63</sup> Xicmatican pampa unca in Espíritu hual layuliltía. Se inacal icuerpo amo lapalehuía nindeno pa layuliltis. In lajtomes hual annimitzilic quiyuliltilo se iyolo huan in yulilislí huejcahuas, amo quiman lamis.

<sup>64</sup> Ma yoje, sequin ca amhuanten amo annechneltoca.

Quinmilic Jesús inon, pampa yihual quinmiximatic quiman pehuac itequipanulislí yehuanten hual amo quineltocaje. Huan quimatic aquí yahuiaya quitemaca ca yehuanten hual quinequiloaya quimictilo.

<sup>65</sup> Huan quinmilic:

—Pampa inon annimitzilic amaqui huil huala ca nehual sinda Dios noTajtzin amo quimacahuiltía.

<sup>66</sup> Quinmilic inon, mocuepaje mías ca imonextiliniymes, yajmo quitocaje.

<sup>67</sup> Cuaquinon Jesús quinmilic in doce imonextiliniymes hual mochahualoaya, quinmilic:

—¿Amhuanten noje anquinequi anmohuica?

<sup>68</sup> Quinanquilic Simón Pedro, quilic:

—Tata, ¿ca aquí tiasi? Tehual tiquinpía lajtomes hual layuliltilo ca Dios iyulilislí hual amo quiman lamis.

<sup>69</sup> Huan tehuanten timitzneltocaje huan ticmatilo pampa tehual tiunca in se hual Dios quilajultic pa technextilis quinami lajtúa Dios pa iyolo.

<sup>70</sup> Jesús quinancuic:

—Annimitzljaltulic amhuanten doce huan se ca amhuanten unca iyaxca in lili, quitequipanuilía in lili.

<sup>71</sup> Ca in lajtomes yihual quinequiaya quijtu pampa Judas ixolol Simón Iscariote yec iyaxca in lili. Yihual se ca in doce imonextiliniymes, huan yihual in se hual yahuiaya quitemaca Jesús ca yehuanten hual yahuiyoaya quimictilo.

## 7

### *Jesús icnían amo quineltocalo*

<sup>1</sup> Panuc inon, panujtiahuiaya Jesús pa míac caltilan pin lalticpan Galilea. Yajmo quinequiaya panu pin lalticpan Judea pampa quitemuloaya quinami huil quimictilosquiaya inminhuejueyenten in judíos.

<sup>2</sup> Ma yoje, ajsitihualaya inminfiesta (ilhuil) in judíos itoca in fiesta quiman chantilo pin caltzindis.

<sup>3</sup> Yoje, Jesús icnían quilije:

—Ximohuica, amo ximocahua nican, xía pa Judea, pa yoje quitasi momonextiliniymes hual cate nepa innojen hual tiquinchía, hual pampa innojen mahuisulo momajtíticate moxtin.

<sup>4</sup> Xicchía yoje, pampa sinda se quitemúa quinami huil quinmachiltía moxtin inahuac yihual, yihual amo quiman yahui quinlatilía in hual quichía. Tiquinchía innojen hual quinlamahuisultilo momajtíticate in lames. Axan, xiquinchía inminlaixpan moxtin.

<sup>5</sup> Yoique quilije icnían pampa yehuanten noje amo quineltocaloaya pampa Dios quilajltulic pa temus pa in lalticpan.

<sup>6</sup> Cuaquinon Jesús quinmilitic:

—Ayamo monequi pa nehual nías nipanquisas ca ompic, pampa ayamo ajsic in tonali. Pa amhuanten mojmosta unca in tonali.

<sup>7</sup> Yehuanten pin lalticpan amo huil quinequilo anmitzmictilo. Ma yoje, nehual quinequilo nechmictilo, pampa niquinmilía neli quinami amo unca cuali in hual yehuanten quichihualo.

<sup>8</sup> Amhuanten xiacan pa in fiesta (ilhuil). Nehual ayamo nías pa in fiesta pampa ayamo ajsic notonali.

<sup>9</sup> Yoje, lamic quinmilitic inon, yihual mocahuac nepa Galilea.

### *Jesús yahui pa in fiesta*

<sup>10</sup> Quiman uyaje icnían pa in fiesta (ilhuil), yihual quichiaya je nadita, cuaquinon noje uyac. Ma yoje, amo quimacahuiltic pa oc sequin quitasi yihual yajtataya pan tonali hual uyac, quinami quinmolatilitiahuiaya.

<sup>11</sup> Huan quitemuloaya Jesús in huejueyenten judíos nepa pin fiesta (ilhuil), quililoaya:

—¿Capa unca in se?

<sup>12</sup> Huan quitenehualoaya in míac lalalera inahuac yihual, molaxilijtine-miloaya lajtomes. Sequin inminhuían moililoaya, quijtuloaya: “Cuali in lalcal.” Oc sequin quijtuloaya: “Amo unca cuali. Yihual neli quincuajcuamana moxtin.”

<sup>13</sup> Ma yoje, amaqi quiipiaya iyolo chichahuac pa laquetzas yoje inminlaixpan moxtin. Momajtuloaya, amo quinequiloaya pa quinquajcuamana moxtin.

<sup>14</sup> Cuaquinon quiman panuje ilajco inmintonalijmes in fiesta, panquisac Jesús pa in tiopan hué huan lamaxtiaya.

15 Pampa inon, mahuisuloaya momajtitataloaya in huejueyenten judiós, quillije:

—¿Quinami quimati lanextilía in se? Amo quiman cataya ca tolamaxtinimes huejué.

16 Quinnanquilic Jesús, quinmilic:

—In hual nicmaxtitica amo unca nolajtomes nehual, unca ilajtomes yihual hual nechtilanic.

17 Sinda se quinequi quichía len Dios quinequi, yihual quimatis sinda unca Dios ilamaxtilisli in hual nicmaxtitica, o sinda nehual nilajtutica ca nolajtomes nehual nohuían.

18 Se quinmilía lacames yihual ilajtomes, sinda yihual quitemuá pa lacames lajtusi niman cuali inahuac yihual. Amo yoje se lacal melahuac. Yihual quitemuá quinami huil quinlaquetzaltis cuali lacames inahuac yihual hual quitanic pa hualasquiaya lajtu. Amo unca nindeno calica se quijlacultis se lacal melahuac quinami yihual.

19 Pa yina Moisés quinmacac anotajtzitzián Dios ilajtol. Ma yoje amo unca se ca amhuanfen hual quineltoca. ¿Leca anquitemujtica quinami annehmictis?

20 Quinnanquillije innojen míac lacames, quillije:

—Tehual ticpía se ijyecal hual mitzijlacúa. ¿Aqui quitemujtica quinami huil mitzmictis?

21 Lananquilic Jesús, quinmilic:

—Nicchiac se lachihualisli huan pampa inon anmoxtin anmahuisuaya anmomajtitataya.

22 Moisés anmitzjcuilulic in lajtol hual quijtúa pa anquitzontequía nadita inmencuilaxli anmoxolomes lacames quiman yes lacatilo. Moisés amo anmitzmacac in lajtol. Cataloaya anotajtzitzián hual yulinijme pa yina míac xixihuimes quiman ayamo lacatic Moisés, yehuanten anmitzmacaje in lajtol. Huan pan tonali hual in lajtol quijtúa pa anmosehuis, ma yoje anquinchihuilía anmoxolomes quinami quijtúa in lajtol.

23 Axan, inon anquichihuilía se pan tonali chicome (siete) quiman anmosehuía pa yoje anquineltocas cuali Moisés ilajtol. Ma yoje, nehual, nicpajtic se lacal mochi icocolisli pan tonali chicome, huan pampín ancualantica ca nehual.

24 Monequi pa anlajnamiquis quinami Dios lajnamiquía pa anquimatis sinda len unca cuali o amo cuali. Amo xiquijtucan unca cuali o amo cuali pan ipampa quinami amhuanten anmohuían anquijtúa unca cuali o amo cuali se lachihualisli.

### *Jesús quijtúa quinami hualac pan lalticpan*

25 Cuaquinon sequin ca yehuanten hual yuliloaya pa Jerusalén mola-jlanije:

—¿Amo unca in se yihual hual quitemujticate quinami huil quimictisi?

26 Huan ¡xiquitacan! Nepa laqueztica inminlaixpan moxtin huan amo unca se lacal hual quijtúa len pa quitzacuasi yihual. ¿Yes quimatisi in huejueyenten pampa in lacal in Cristo?

27 Ma yoje, tehuanten ticmatilo in caltilan capa quisac in lacal. Nesis in Cristo, amaqui, quil, quimatis capa quisas.

28 Yoje, tzajtzic Jesús pin tiopan hué capa lamaxtitataya, quinmilic:

—¡Annehximati huan anquimati noje capa niquisac! Huan amo nihualaya pan ipampa nel nolahuellitilisli huan nolajtol. Unca yihual Dios in melahuac hual nechtilanic, huan yihual amo anquiximati.

<sup>29</sup> Nehual, quema, niquiximati, pampa niquisaya capa yihual unca. Unca yihual hual nechtilanic.

<sup>30</sup> Yoje, pehuaje ajsije pa quiquitzquilosquiaya. Ma yoje, amo cataya se lalac hual quilalic ima ipan, pampa ayamo ajsic itonali pa miquis.

<sup>31</sup> Ma yoje, ca in lalacera cataloaya míac hual pehuaje quineltocaje pampa yihual in Cristo, quilije:

—Neli in se in Cristo. Amaqui quinchías in míac quinami yihual quinchía. Innojen technextililo quinami yihual quiipía Dios ichichualisli.

*In fariseos quinequilo quiquitzquilo Jesús*

<sup>32</sup> Quicaquije in fariseos quinami in lacames laquezataloaya ixtacayito innojen lajtomes inahuac Jesús. Pampín innojen fariseos huan tiopistas huejué quintilanije ipiscales in tiopan hué pa quiquitzquilosquiaya Jesús.

<sup>33</sup> Ma yoje, Jesús laquezaya inminlaixpan moxtin, quinmilic:

—Nicayas jan nadita ca amhuanten, cuaquín nías capa aqui nechtilanic.

<sup>34</sup> Annechtemus, huan amo annechitas. Huan capa nicayas, amhuanten amo huil anajsis.

<sup>35</sup> In judíos moilije se ca oc se:

—¿Ca capic yas in lalac pa camo tiqitasi? ¿Yas ca capic cate in judíos hual mosemananijme cajcapa ca yehuanten hual lajtulo griego? ¿Yahui quinmaxtía in griegos?

<sup>36</sup> ¿Len quinejqujtu in lajtol hual yíal quilic: “Annechtemus, huan amo annechitas. Huan capa nicayas, amhuanten amo huil anajsis”?

*In al hual iyaxca iatenco iEspíritu Dios hual layuliltía*

<sup>37</sup> Cuaquinon ajsic in tonali hual lamiaya in ilhuil (fiesta), cataya itonali niman hué in fiesta. Pa in tonali moquetzac Jesús, quintajtzilic in lacames, quinmilic:

—Sinda se quinami amiqui pa iyolo, ma huala ca nehual, huan ma caya quinami launtica.

<sup>38</sup> Aquí yes nechneltocha, ca yihual yes quinami quisas pa iyolo in se míac aj'atenco ca al hual quimacas yulilislí, quinami quijtúa Dios ilajtol lajcuilulí.

<sup>39</sup> Jesús quijtuaaya inon inahuac in Espíritu Santo hual yahuiaya calaquí pa inminyolo yehuanten hual yahuiloya quineltocalo Jesús. Ma yoje, ayamo hualaya in Espíritu Santo, pampa Jesús ayamo yec lalalili capa yahuiaya cana in niman míac lasojlalislí hual amo lami. Dios ayamo quilalic Jesús nepa.

*In lalacera amo cate ca se lajtulisli*

<sup>40</sup> Axcán, sequin ca in lalacera, quiman quicaquije inon hual quijtuc Jesús, quijtuje:

—Neli in se Dios ilajtuni hual yahuiaya huala pan lalticpan.

<sup>41</sup> Oc sequin quijtuje:

—In se in Cristo.

Ma yoje, sequin quijtuje:

—Amo yoje, pampa amo yes galileteco in Cristo.

<sup>42</sup> ¿Amo quijtúa Dios ilajtol lajcuilulí pampa in Cristo yes imiahuil David huan lacatis pa Belén, in caltilan hual yec iyaxca David? Quema, yoje quijtúa.

<sup>43</sup> Pampa inon in míac ca yehuanten amo molaliloaya innahuac ca in hual quijtuloaya inahuac Jesús.

<sup>44</sup> Huan sequin quinequiloaya quiquitzquilo. Ma yoje, amo cataya se lalac hual quilalic ima ipan pa quiquitzquis.

<sup>45</sup> Cuaquinon mocuepaje in piscales ca in tiopistas huejué huan in fariseos. Huan in tiopistas huejué huan in fariseos quinmilije:

—¿Leca amo anquiquitzquic pa anquihualicasquiaya?

<sup>46</sup> Quinnanquilije in piscales, quinmilije:

—¿Amo quiman cataya se lalac hual yoje lajtuc quinami in lalac!

<sup>47</sup> Quinnanquilije in fariseos:

—¿Amhuanten noje anunca lacuajcuamanali?

<sup>48</sup> Amo unca amaqui ca in huejueyenten huan ca in fariseos hual quinel-tocalo.

<sup>49</sup> Quema, in míac lalalera quinel-tocalo. Ma yoje, yehuanten in lalalera amo quimatilo nindeno inahuac in lajtol. Ej'elehuis cate.

<sup>50</sup> Cataya nepa Nicodemo, yihual yec se ca in huejueyenten. Cataya yihual hual hualac capa Jesús pa layúa. Yihual quinmilic:

<sup>51</sup> —Quinami quijtúa tolajtol, amo tictilanilo se lalac pa yes lacocoltili pampa quichíac in amo cuali sinda ayamo tijaquije len yihual quijtúa inahuac in hual quichijtica. ¿Amo unca yoje?

<sup>52</sup> Quinanquilije:

—¿Tehual noje, ticalileteco elehuis? Xictemu huan ticmatis pampa amo unca se ca Dios ilajtunijmes hual lacatic huan yuliaya pa Galilea.

<sup>53</sup> Huan moxtin yehuanten uyaje seje huan seje pa ichan.

## 8

### *In sihual hual quichíac laijlaculisli*

<sup>1</sup> Huan uyac Jesús pa iLoma (tepetzindi) in Olivos.

<sup>2</sup> Mostatica ca huajtzingo, calaquic oc sejpa pin tiopan hué. Moxtin in lacames hualaje capa yihual, huan molalic Jesús, quinmaxtiaya.

<sup>3-4</sup> Huan inminlamaxtinijmes in lajtol hual quinel-tocalo judíos huan in fariseos quihualicaloaya se sihual capa Jesús. Quiquitzquije in sihual monilujtataya ca se lalac hual amo ilahuical. Quilalije in sihual lajco ca yehuanten, huan quilije Jesús:

—Lamaxtini, in sihual ticajsije monilujtataya ca se lalac amo ilahuical.

<sup>5</sup> Axcan, pa ilajtol, Moisés quijtuc pa ticlaxililosquiaya ca tixcalazos yehuanten quinami in se. Axan, tehual ¿len tiquijtúa pa ticchihuilisi in sihual? ¿Ticmictisi ca tixcalazos?

<sup>6</sup> Inon quilije pa quichihuasi pa Jesús quipías pa quichías o quilis len calica huil quimotexpahuililosquiaya. Cuaquín mopachuc Jesús, lajcuiluc ca ixerixa pan lali.

<sup>7</sup> Huan quinami quilajlaniloaya huan mocuepaloaya quilajlanilo, Jesús moquetzac, quinmilic:

—Aquí yes ca amhuanten hual unca chipahuac pa iyolo huan amo unca laijlaculi, ma pehua quilaxili se tixcali.

<sup>8</sup> Huan oc sejpa mopachuc, huan ca ixerixa lajcuiluaya pan lali.

<sup>9</sup> Yehuanten, quiman quicaquije inon, pehualoaya quisalo seje huan seje. Pehualoaya quisalo lacames hual quipiaje míac xixihuil quiman lacatije, cuaquinon quisaloaya yehuanten hual yajyancuic. Quimatiloaya laijtic yehuanten moxtin quinami cataloaya laijlaculi pa inminyolo. Cuaquinon, mocahuac Jesús huían huan in sihual nepa capa cataya lajco ca yehuanten.

<sup>10</sup> Cuaquinon Jesús moquetzac, quilic in sihual:

—Nito, ¿capa cate? ¿Amaqui quijtuc pampa ticpia pa tiyes lamictili?

<sup>11</sup> Huan in sihual quilic:

—Amaqui, Tata.

Cuaquín Jesús quilic:

—Nehual noje amo niqijtus pampa ticpía pa timiquis. Axan, xía huan yajmo xiyuli ticchijtica laijlaculisli.

*Jesús ilahuilisli in lalticpan*

<sup>12</sup> Oc sejpa quinlaquetzlic yehuanten Jesús, quinmilic:

—Nehual niquinlahuía yehuanten pin lalticpan. Niqijtúa, unca pampa niquinmaca lahuilisli pa iyolo aqui yes hual nechtoaca. In se amo yulis quinami se hual nejnemi capa laticumac pan se ojli hual amo quiximati. Yihual quimatis canas Dios iojli. Yihual yulis ca Dios iyulilisli hual unca quinami lahuilisli hual quiyuliltía se iyolo huan iyulilisli hual cate quinami micticate.

<sup>13</sup> Cuaquinon quilije in fariseos:

—Inon hual tiqijtutica amo unca melahuac, pampa tehual mohuían tiquilic. Amo ticpía se hual mitzpalehuis quijtutica len unca neli monahuac tehual.

<sup>14</sup> Quinnanquilic Jesús, quinmilic:

—Mas que san nehual niqijtúa neli nonahuac nel nohuían, ma yoje in hual niqijtúa unca melahuac. Nicmati capa nihualaya huan ca capic nía. Yoje, unca melác in hual niqijtúa. Amhuanten amo anquimati capa nihualaya huan ca capic nía.

<sup>15</sup> Amhuanten anlajlanía pa anquimatis huan anquimaca iojli se yoje jan quinami laijtic amhuanten anquíta san. Huan nel amo nicmaca iojli amaqui.

<sup>16</sup> Quema, huan sinda nicmaca iojli, ma yoje unca melahuac quinami nicmaca iojli. Unca melahuac pampa amo nicmaca iojli nohuían. Dios noTajtzin hual nechtilanic, huan yihual ticmacalo iojli tiomenten.

<sup>17</sup> Huan mocahua lajcuiluli pa anmolajtol sinda omenten quijtulo pampa unca neli len yes, cuaquín moxtin quipialo pa quineltocasi quinami neli.

<sup>18</sup> Nehual nilajtúa neli nonahuac nehual huan inahuac noTajtzin hual nechtilanic, yihual lajtúa neli nonahuac nehual.

<sup>19</sup> Cuaquinon quilije:

—¿Capa unca moTajtzin?

Jesús quinnanquilic:

—Amo annehiximati nehual huan amo anquiximati noTajtzin. Sinda annehiximatiaya nel, cuaquín noje anquiximatiaya noTajtzin.

<sup>20</sup> Innojen lajtomes quijtuc Jesús calijtic capa cajcoquiloaya in tomin pin tiopan hué, cataya nepa capa lamaxtiaya. Huan amaqui quiquitzquic, pampa ayamo ajsic in tonali pa yes laquitzquili.

*Yehuanten amo huil yahuillo ca capic Jesús yahui*

<sup>21</sup> Cuaquinon oc sejpa laquetzac inminlaixpan, quinmilic:

—Nía nimohuica huan amhuanten annechtemus. Ma yoje, anmiquis anquinpixtica anmolajlaculisli hual anmitzizlacúa, anmiquis laijlaculi. Amhuanten amo huil anajsis capa nehual nías.

<sup>22</sup> Pampa inon, moilije in judíos:

—¿Yahui momictía huan pampín techilijtica: “Amo huil anajsis capa nehual nías”?

<sup>23</sup> Huan Jesús quinmilic:

—Amhuanten anunca iyaxca in lalticpan nican hual unca itzindan in cielo (ilhuicac). Huan nehual niunca iyaxca in cielo hual pa pani. Amhuanten anunca iyaxca in lalticpan capa mochi unca laijlaculi. Nehual amo niunca iyaxca in lalticpan nican.

<sup>24</sup> Yoje, annimitzilic amhuanten anmiquis laijlaculi, Dios amo anmitzanas. Unca pampa sinda amo annechneltoca nehual in se hual niunca quinami Dios hual nechtilanic pa nihualas nican, cuaquinon anmiquis laijlaculi, anyahui anmiqui anquixtixa anmolaijlaculisli.

<sup>25</sup> Cuaquinon quilije:

—¿Aqui tehual, nuso?

Jesús quinmilic:

—Nehual niaqui hual annimitzilic quiman nipehuaya annimitzlaquetzili.

<sup>26</sup> Nicpia míac pa niqijtus huan míac calica annimitzmacas anmo'ojli amhuanten pampa anunca laijlaculi. Huan yihual hual nechtilanic unca melahuac, huan nehual niquinmilia yehuanten pin lalticpan innojen laj-tomes hual nijcaqui yihual nechilía.

<sup>27</sup> Amo quimatije pampa Jesús quinlaquetziliaya inahuac Dios iTajtzin.

<sup>28</sup> Pampín Jesús quinmilic:

—In tonali quiman yes annechajcoquis nehual ilacal in cielo pa annechmictis, yoje pampa inon Dios nejchías hué. Cuaquín anquimatis pampa neli niunca yihual hual Dios quitilanic. Nehual niunca, huan anquimatis quinami amo nichía nindeno pan nopampa nehual nohuían. No, jan quinami nechmaxtía Dios noTajtzin, yoje inon niqijtúa.

<sup>29</sup> Unca ca nehual yihual hual nechtilanic pa nicmachiltis ilajtol. Huan amo nechcahuas, pampín amo nicayas nohuían. In unca pampa nehual amo nimocahua pa niquinchías innojen hual quipaquilito.

<sup>30</sup> Quinmilic Jesús innojen lajtomes, cataloaya míac ca inminhuejueyenten in judíos pehuaje quineltocaje pampa yihual yec in local hual mojmosta quinmiliaya pampa yec.

*Jesús lajtúa inahuac ixolomes Dios huan yehuanten hual iyaxca in lili hual quinchihualtía laijlaculisli*

<sup>31</sup> Yoje, Jesús quinmilic inminhuejueyenten in judíos hual axan quineltocatataloaya, quinmilic:

—Sinda ancayas anquineltoctatías in hual niqijtúa, cuaquinon neli anunca amhuanten nomonextilinijmes.

<sup>32</sup> Huan anquimatis len unca melahuac inahuac Dios. Huan inon hual unca melahuac anmitzmacahuas pa como anquineltoctas Satanás iislacatilisli huan anmitzmacahuas pa como anpolehuís pampa anyec laijlaculi.

<sup>33</sup> Quinanquilije:

—Tehuanten imiahuimes Abraham, huan ayamo quiman tiyeje itequipanujquimes se toteco hual amo techlaxlahuiaya. Axan, ¿quinami titechilía ticayasi lamacahuali?

<sup>34</sup> Quinnanquilic Jesús:

—Neli, neli annimitzilía, mochi seje hual cayas quichijtica len hual quijlacúa, yoje yihual unca itequipanujquil se teco hual quichihualtía laijlaculisli.

<sup>35</sup> Huan se tequipanujquil amo mocahuas yes iyaxca iteco quinami unca ixól iteco. Ma yoje, se ixól, quema, mocahuas yes ixól itajtzin.

<sup>36</sup> Yoje, sinda ixól in se anmitzilis pampa yihual anmitzmacahua, cuaquín neli unca pampa anunca lamacahuali quinami ixól in se. Yajmo anunca tequipanujquimes amo lalaxlahuili.

<sup>37</sup> Nicmati pampa amhuanten anunca imiahuimes Abraham. Ma yoje, anquitemujtica quinami annechmictis. Inon anquichía pampa pa anmoyolo

amo anquinequi anquineltoaca inon hual niqijitúa anmonahuac amhuan-  
ten. Ma yoje, unca melahuac.

<sup>38</sup> Nehual annimitzlaquetzilía inminahuac innojen hual niquinmitac nepa  
capa nicataya ca Dios noTajtzin nehual, huan amhuan ten noje anquinchía  
innojen hual anquinaquic inahuac anmotajtzin amhuan ten.

<sup>39</sup> Quinanquilije yihual, quilije:

—Totajtzin yihual Abraham.

Jesús quinmilic:

—Sinda Abraham cataya anmotajtzin, cuaquín anquichihuaya len quichi-  
huani Abraham.

<sup>40</sup> Axan anquitemujtica quinami annehmictis nehual hual niunca lalac  
hual annimitzilic len unca melahuac, inon hual nijcaquic nechilic Dios.  
Abraham amo lachihuani quinami amhuan ten. Yihual quineltoacani Dios  
huan quipilini lasojlalisli yehuan ten hual quilije Dios ilajtol.

<sup>41</sup> Amhuan ten anquichía quinami quichía anmotajtzin.

Quilije:

—Amo tilacatije inminpampa lacames hual amo monamictije huan hual  
amo quimolancuacuetzilije Dios. Ticpialo se toTajtzin, yihual Dios.

<sup>42</sup> Quinmilic Jesús:

—Sinda Dios cataya anmoTajtzin, cuaquín annehclasojlaya, pampa  
niquisac capa unca Dios huan nihualac pan lalticpan. Amo nihualaya  
pan nopampa nehual, nihualaya pampa Dios nechtilanic pa nihualas.

<sup>43</sup> ¿Leca amo anquimati len quinejqijtu in hual annimitzilía? Annimitzilía  
leca. Unca pampa amo anquinequi anquimacahuilítia pa anmitzpatilis  
anmoyolo in hual niqijitúa.

<sup>44</sup> Amhuan ten anunca ixolomes in lili, yihual anmotajtzin, huan in amo  
cuali hual yihual quinequi quichía, noje amhuan ten anquinequi anquichía.  
Quiman pehuac mochi pa axan, in lili yec lamictini. Yihual amo quiman  
quixtoaca len unca melahuac, pampa ca yihual amo moitilía len unca  
melahuac. Sinda islacati, yoje unca san pampa yihual quinami inon.  
Quema, yihual quipehualtic islacatilisli.

<sup>45</sup> Huan amhuan ten amo annehneltoaca pampa annimitzilía len unca  
melahuac.

<sup>46</sup> Amo unca se ca amhuan ten hual huil lanextilía pampa nel nichía  
lajljalculisli. Sinda niqijitúa len unca melahuac, ¿leca amo annehneltoaca?

<sup>47</sup> Aquí hual quipía Dios quinami iTajtzin, yoje yihual quinequi quinquaci  
Dios ilajtomes. Pampa inon amo anquinequi anquinaquic Dios ilajtomes,  
pampa amo anquipía Dios quinami anmoTajtzin.

### *Cristo yuliaya quiman ayamo lacatic Abraham*

<sup>48</sup> Innojen huejueyenten ca in judíos quinanquilije:

—Unca yoje quinami tiqijituloaya, tel tisamariteco huan ticpía ijyecal amo  
cuali.

<sup>49</sup> Jesús quinnanquilic:

—Amo nicpía ijyecal amo cuali. Quema, nicpía lasojlalisli pa Dios noTa-  
jtzin, huan amhuan ten amo annehclasojla.

<sup>50</sup> Nehual amo nictemujtica quinami nimochías hué nohuían. Unca Se hual  
quichía inon, huan yihual anmitzmacas anmo'ojli.

<sup>51</sup> Neli, neli annimitzilía, sinda se lalac yuli cantica cuali len niqijitúa,  
cuaquín yihual amo quiman quimatis miquis.

<sup>52</sup> In huejueyenten judíos quilije:



—Axan ticmatilo pampa tehual ticpía se ijyecal amo cuali laijtic moyolo. Miquic Abraham, huan miquije Dios ilajtunijmes, huan tehual titechilía sinda se lalac yuli cantica cuali len tiquijtúa, amo quiman quimatis len yes pa miquis se.

<sup>53</sup> ¿Tiquijtúa tiunca niman hué huan totajtzin Abraham hual miquic amo yec yoje hué? ¿Huan Dios ilajtunijmes hual miquije amo yeje yoje huejué? ¿Len timochijtica ca tehual mohuían?

<sup>54</sup> Jesús quinnanquilic:

—Sinda nehual niahuiaya nimochía hué, cuaquín nolahueyilisli amo monotzaya nindeno. Unca noTajtzin hual nejchía hué. Amhuanten anquijtúa yihual anmoDios.

<sup>55</sup> Ma yoje, amo quiman anquiximatiaya huan ayamo anquiximati axan. Nehual, quema, niquiximati. Huan sinda niquijtuaya: “Amo niquiximati”, cuaquín nicataya quinami amhuanten, nislacatiaya. Ma yoje, niquiximati huan niyuli nicantica cuali in hual quijtúa.

<sup>56</sup> Quipiaya niman mías paquilisli anmotajtzin Abraham, pampa in tonalijmes quiman yulini pan lalticpan, quimatic pampa yahuiaya quita quinami cayasquiaya in tonali hual niahuiaya nicaya nican pan lalticpan. Huan neli quitac, huan pampín quiapiaya mías paquilisli.

<sup>57</sup> Cuaquinon in huejueyenten judíos quillije:

—Ayamo tiyulic cincuenta xixil huan ¿tehual tiquitac Abraham?

<sup>58</sup> Jesús quinmilic:

—Neli, neli annimitzilía, nehual niyultataya quiman ayamo lacatic Abraham.

<sup>59</sup> Cuaquinon quinquitzquije tixcalimes pa quilaxililosquiaya, huan Jesús quinmolatilic, quisac pin tiopan hué huan yoje mohuicac

## 9

### *Quiipajtía Jesús se lalac hual lacatic pachacal*

<sup>1</sup> Panujtataya Jesús, quitac se lalac pachacal, yoje lacatic.

<sup>2</sup> Huan Jesús imonextilinijmes quilajlanije, quillije:

—Lamaxtini, ¿aqui quichíac laijlaculisli huan pampín lacatic pachacal in lalac? ¿Cataya yihual in se ihuían, o cataloaya itajtzin huan inantzin?

<sup>3</sup> Jesús quinnanquilic:

—Amo cataya in lalac hual quichíac laijlaculisli, huan amo cataloaya inantzin huan itajtzin hual quichihuaje. Jan quipanuc pa yoje pan ipampa yihual moitilisli innojen lachihualisli huejué hual Dios huil quinchía.

<sup>4</sup> Monequi pa nicayas nicchijtica itequipanulisli Dios hual nechtilanic huan monequi pa nicchijtías quiman unca semilhuil. Ajsitihuala in layúa, cuaquín amaqui huil tequipanúa. Nicnequi niquijtúa, ajsitihualalo tonalijmes hual yajmo nicayas nican.

<sup>5</sup> Pan mochi in tonalijmes hual niunca nican pan lalticpan, niunca quinami lahuilisli pa yehuanten pin lalticpan. Unca quinami niquinlahuilitica Dios iojli.

<sup>6</sup> Lamic quijtuc inon, lachijchac pan lali, quichíac sucuil ca ilachijchal huan ca in sucuil quixahuilic iixtololojmes in pachacal.

<sup>7</sup> Cuaquín quilic:

—Xía ximoixpaca ca al nepa pin lahuajuanali hual itoca Siloé. (Siloé quinequi quijtúa Latilanili.)

Yoje uyac in pachacal, moixpacac huan lachixtihualac.

<sup>8</sup> Cuaquinon, quitaje yehuanten hual chantiloaya inahuac huan yehuanten hual quitanijme quinami molajlanilijtinemini tomin, huan moifiloaya:

—¿Amo in se yihual hual molalini huan molajlanini tomin?

<sup>9</sup> Sequin quililoaya:

—Unca yihual.

Oc sequin quililoaya:

—Amo yihual, san nesi quinami yihual.

Ma yoje, yihual hual catani pachacal quinmiliaya:

—Nehual niunca hual nicataya pachacal.

<sup>10</sup> Pampa inon quililoaya:

—¿Quinami tipajtic pa yoje huil tilachía axan?

<sup>11</sup> Quinnanquilic in lalac, quinmilic:

—In lalac itoca Jesús quichíac sucuil calica quinxahuic noixtolojmes huan nechilic: “Xía ximoixpaca ca al nepa pin lahuajuanali itoca Siloé.” Pampín, níac huan nimoixpacac, yoje nilachixtihualac.

<sup>12</sup> Huan quilije:

—¿Capa unca in se?

Quinmilic:

—Amo nicmati.

### *In fariseos quilajlanilo in pachacal*

<sup>13</sup> Quihuicaje inminlaixpan in fariseos in se hual catani pachacal.

<sup>14</sup> Huan cataya pan tonali chicome (siete) quiman mosehuilo in judíos hual Jesús quichíac in sucuil huan quipajtic in pachacal pa huil lachías.

<sup>15</sup> Pampín in fariseos noje quilajlanije in lalac oc sejpa quinami pehuac lachíac, huan quinmilic:

—Quilalic sucuil pan noixtolojmes huan nimoixpacac huan nilachixtihualac.

<sup>16</sup> Cuaquinon quilije sequin ca in fariseos:

—In lalac amo unca se ilalac Dios pampa amo quimati momajtía tequipanúa pan tonali hual timosehuilo.

Oc sequin quinmiloaya:

—¿Quinami huil se lalac laijlaculi quinchía innojen hual cate lachihuali hual techlamahuisultilo timomajticitacé?

Huan amo cataloaya ca se lajtulisli yehuanten.

<sup>17</sup> Cuaquinon quilije oc sejpa in lalac hual yajmo yec pachacal, quilije:

—¿Len tiquijtúa tehual inahuac yihual? Pampa tehual tiunca hual mitzalachialtic.

Quinmilic:

—Niquijtúa yihual unca se ilajtuni Dios.

<sup>18</sup> In huejueyenten judíos amo quineltocaje inon hual quinmilije inahuac in lalac, amo quineltocaje pampa yec pachacal huan axan lachiaya. Pampín, quinnotzajque itajtzin huan inantzin.

<sup>19</sup> Quinlajlanije:

—¿In se anmoxól huan anquijtúa lacatic pachacal? Axcan, ¿quinami huil lachía nuso?

<sup>20</sup> Huan lananquilije itajtzin huan inantzin, quinmilije:

—Ticmatilo in se toxól huan lacatic pachacal.

<sup>21</sup> Ma yoje, amo ticmatilo axan quinami huil lachía, huan amo ticmatilo aquí quilachialtic. Xiclaclanican yihual, yihual lalac hué, yíal motilanía, yihual huil lajtúa inahuac yihual ihuían.

<sup>22</sup> Quilije inon itajtzin huan inantzin pampa momajtiloaya inminlaixpan in huejueyenten judíos. Cataya pampa axan quilalije in huejueyenten pa quiquixtilisi pa quiahuac in tiopan aqui yes hual quiqtusquiaya Jesús unca in Cristo.

<sup>23</sup> Pampa inon itajtzin huan inantzin in pachacal quinmilije: “Yihual motilania, xiclajlanican yihual.”

<sup>24</sup> Yoje, quinoztaje oc sejpa in lalacal hual yajmo yec pachacal, quilije:  
—Amo xitechcuajcuamana, san ilaixpan Dios xitechili melahuac. Tehuanten ticmatilo in lalacal se lalacal laijlaculi.

<sup>25</sup> Huan yihual quinnanquilic:  
—Sinda yihual se lalacal laijlaculi, amo nicmati. In san nicmati: Niyec pachacal huan axan nilachía.

<sup>26</sup> Quilije:

—Cuaquín ¿len mijchihuic? ¿Quinami mitzlachialtic nuso?

<sup>27</sup> Quinnanquilic:

—Annimitzilic huan amo anquinequiaya anquicaqui. ¿Leca anquinequi anquicaqui oc sejpa? Unca neli amo anquinequi anmochía imonextilini-jmes. O ¿cuajnesi quema anquinequi? ¿Pampín anquinequi anquicaqui oc sejpa?

<sup>28</sup> Cuaquín yehuanten quixixiculoaya, quilije:

—Tehual imonextilini in se. Tehuanten ti'imonextilini-jmes Moisés.

<sup>29</sup> Ticmatilo Dios laquetzac ca Moisés. In se amo ticmatilo capa pehuac nestic.

<sup>30</sup> Lananquilic in lalacal, quinmilic:

—¡Jo, cuaquín, nimolapolultía ca inon! ¡Anquijtúa da amo anquimati capa pehuac nestic huan ma yoje nechlachialtic!

<sup>31</sup> Ticmatilo Dios amo quicaqui yehuanten hual cate laijlaculi sinda mola-jlanililo len ca yihual. Quema, sinda se quimolancuacuetzilía Dios ca mochi iyolo huan quichía quinami quinequi Dios, cuaquín Dios quicaqui quiman yes quilajlanía.

<sup>32</sup> Quiman yes pehuac in lalticpan amo quiman cayani lalacal hual quilachialtic se lalacal hual lacatic pachacal.

<sup>33</sup> Sinda in lalacal amo cataya iyaxca Dios, amo huil quichihuaya nindeno.

<sup>34</sup> Lananquilije yehuanten, quilije:

—Tehual tilacatic jan mochi laijlaculi. Huan tehual ¿tiquijtúa huil titech-maxtía tehuanten?

Huan quiquixtije pa quiahuac in tiopan.

### *Yehuanten pachacames pa inminyolo*

<sup>35</sup> Jesús quicaquic quinami quiquixtije pa quiahuac in tiopan, huan quiman quitac, quilajlanic:

—Tehual, ¿ticneltoca yihual hual ilalacal in cielo?

<sup>36</sup> Quinanquilic in lalacal:

—Huan ¿aqui yihual, Tata, pa yoje nicneltocas?

<sup>37</sup> Jesús quilic:

—Axan tiquitac yihual. Nehual in se hual nilaqueztica ca tehual.

<sup>38</sup> In lalacal quilic:

—Necneltoca, Tata.

Huan quimolancuacuetzilic.

<sup>39</sup> Cuaquín Jesús quilic:

—Nihualaya pin lalticpan pa niquinxilus in lacames pan ipampa quinami niquinmacas inminojli. Cate yehuanten hual quimatilo pampa amo lachialo pa inminyolo. Nihualaya pa niquinlachialtis. Yoje niquinxilúa pa camo cayasi ca yehuanten hual quijtulo laijtic yehuanten pampa lachialo cuali pa inminyolo huan ma yoje amo neli lachialo nepa. Nihualaya pa niquinchiuilis yehuanten quinami pachacames pa inminyolo.

<sup>40</sup> Quicaquije inon sequin fariseos hual nepa moquezataloaya, quilije:

—Huan tehuanten, ¿tipachacames noje?

<sup>41</sup> Jesús quinmilic:

—Sinda amhuanten ancataya pachacames, cuaquín amo anquiapiaya laijlaculisli. Ma yoje, anquijtúa pampa anlachia pa anmoyolo huan amo neli inon. Yoje anmochhua laijlaculi.

## 10

### *In lanechiculi calijtic pa in borregos*

<sup>1</sup> Neli, neli annimitzilía, aquí yes amo calaqui ca ilalapujquil in borregos inminlajitic, huan ma yoje calaqui ca yoje, cuaquín yihual quinami se hual la'anilía, unca quinami laxtequini.

<sup>2</sup> Huan aquí hual calaqui ca in lalapujquil, yihual in teco, yíal quinmiztía in borregos.

<sup>3</sup> Yihual hual quiztía in lalapujquil quilapulía in teco. Quitencaquilo in borregos inminteco huan yihual quinnotza iborregos, mochi sejse quinami itoca, huan quinlaicana pa quiahuac.

<sup>4</sup> Quiman mochi iborregos pa quiahuac cate, cuaquinon laicantía inminteco huan iborregos quitocatialo pampa quiximatilo yihual quinami quinnotza.

<sup>5</sup> Huan amo quitocasi se hual amo quiximatilo. San cholusi ilaixpan yihual pampa amo quiximatilo yihual quinami quinnotza.

<sup>6</sup> Quinlaquetzilic Jesús ca in lapuhualisli hual quiapiaya se lamaxtilisli lalatili. Ma yoje, yehuanten amo quimatiloaya len quinequiaya quiitu in hual quinmiliaya.

### *Jesús unca in teco cuali*

<sup>7</sup> Cuaquinon, Jesús quinmilic oc sejpa:

—Neli, neli annimitzilía nehual niquinami in lalapujquil pa in borregos.

<sup>8</sup> Pa yina pin tonalijmes hual ayamo niajsiaya pan lalticpan cataloaya yehuanten hual quinmiloaya lacames pampa yehuanten Cristo. Annimitzilía pampa moxtin yehuanten cataloaya quinami laxtequinijmes, yehuanten lacames hual la'anililo. Ma yoje, in borregos amo quicaquiloaya pa quintocalosquiaya. Nicnequi niquijtúa, yehuanten hual hualaloaya necheltocalo amo quicaquiloaya.

<sup>9</sup> Yoje, nehual niquinami in lalapujquil. Pan nopampa, sinda se calaquía, nicnequi niquijtúa, sinda necheltoca, yoje moitas capa Dios hual cana pa huelitis pan yihual huan yoje yes laquixtili pin polehuilisli ca capic quihuicaya ilaijlaculisli. Yes quinami se borrego huil panúa ca calijtic huan pa quiahuac huan quitas sacal pa quicuas.

<sup>10</sup> Huala in laxtequini jan pa laxtequis huan pa lamictis huan pa laijlacus. Nehual nihualaya pa yoje lacames quiyasi niman míac in hual Dios quita monequi pa quiplas se pa yoje yulis ca paquilisli.

<sup>11</sup> Nehual in teco cuali. In teco cuali motemaca pa miquis pa yoje quinpiás laquixtili pin polehuilisli iborregos.

<sup>12</sup> Aquí hual amo unca in teco huan jan unca se hual in teco quilaquehua, yoje yihual amo inminteco in borregos. Pampín, sinda quita hualajtica in coyol, quincajcahua in laquejquil in borregos huan cholúa. Huan in coyol quinhuilantía in borregos huan quinmacajsía pa mosemanasi.

<sup>13</sup> Yoje quichía aquí yes hual unca lalaquehuali, pampa amo motolinía pa in borregos.

<sup>14</sup> Nehual in teco cuali, huan niquinmiximati yehuanten hual noyaxca. Huan yehuanten hual noyaxca nechiximati nehual.

<sup>15</sup> Unca jan quinami nechiximati noTajtzin huan nehual niquiximati noTajtzin. Nimotemacas pa nimiquis pa in borregos hual cate in lacames hual necheltocalo.

<sup>16</sup> Niqinpiá oc sequin borregos hual amo cate ca in lajtíc latzacuali, yehuanten hual amo iyaxca Israel. Nicpiá pa niqinhualicas pa cayasi ca nehual. Quicaquisi nolajtol huan monechicusi huan mochihuasi jan se ca yehuanten hual ilacames Israel, huan nechpiasi nehual pa inminteco.

<sup>17</sup> Pampa inon noTajtzin nechlasojla pampa nimotemaca pa nimiquis, pa yoje niyulis oc seppa.

<sup>18</sup> Amaqui nejchihuilis pa nimiquis. Nehual nohuían nimotemaca pa nimiquis. Nicpiá lahuelilitisli pa nimotemacas pa nimiquis, huan nicpiá lahuelilitisli pa nicanas noyulilisi oc seppa. In nicchías pampa yoje noTajtzin nechilic pa nichías.

<sup>19</sup> Oc seppa in huejueyenten judíos amo moililoaya ca se lajtulisli inahuac in hual Jesús quinmilic.

<sup>20</sup> Huan miác ca yehuanten quililoaya:

—Yihual quipía se ijyecal amo cuali lajtíc iyolo. Yihual amo quimati in hual quijtutica, yihual quinami yes quichía. ¿Leca anquicactica?

<sup>21</sup> Oc sequin quililoaya:

—Se hual quipía ijyecal amo cuali amo lajtúa ca lajtomes quinami innojen. ¿Huil quilachialtía se pachacal se hual quipía ijyecal amo cuali? ¡Amo quiman huil!

### *In judíos amo quinequilo quineltocalo Jesús*

<sup>22</sup> Cataya cuaquinon in fiesta (ilhuil) quiman quijnamiquiloaya ilayan-cuiluilisli in tiopan hué pa Jerusalén, huan pa quiahuac cataya sehua.

<sup>23</sup> Huan nejntentinemiaya Jesús pin tiopan hué, cataya pa se lanejnemijquil hual itocaya Salomón ilanejnemijquil.

<sup>24</sup> Yoje, quiyahualujtihualaloaya in huejueyenten judíos, peshualoaya quililo:

—Axan, ¿quichi tonalijmes tía titechcahua amo ticmazticate aquí tehual? Sinda tehual tiunca in Cristo, xitechili ca lajtol calica amo timoixpolulo.

<sup>25</sup> Jesús quinnanquilic:

—Annimitzilic seppa huan oc seppa huan amo anquineltoac. Innojen hual niqinchía pan ipampa noTajtzin ilahuelilitisli, innojen annitznexitlía neli pampa nicpiá Dios ilahuelilitisli.

<sup>26</sup> Ma yoje, amhuanten amo annecheltoca pampa amhuanten amo ca noborregos.

<sup>27</sup> Nechtencaquilo noborregos, huan nehual niquinmiximati, huan nech-tocalo.

<sup>28</sup> Huan nehual niquinmaca Dios iyulilisi hual amo quiman lamis huan yehuanten amo quiman polehuisi. Huan amaqui huil nechquixitlía yehuan-ten. Unca quinami yehuanten cate pa noma.

<sup>29</sup> Dios noTajtzin nechmacac yehuanten hual nechneltocalo hual niquijtúa yehuanten noborregos. Huan Dios noTajtzin, yihual in niman hué, amo unca oc se yoje hué. Huan amaqui huil quinquinxtilia noTajtzin, unca quinami cate pa ima.

<sup>30</sup> Nehual huan noTajtzin, tehuanten ticate jan se san.

<sup>31</sup> Oc sejpa quinquitzquije tixcalimes in judíos pa quilaxilisi.

<sup>32</sup> Jesús quinmilic:

—Cate míac lachihualisli cuajcuali hual annimitznextilic. Huan niquinchiác pampa noTajtzin nechilic pa niquinchiác. ¿Calía ca innojen amo anmitzanac cuali pa yoje anquinequi annechlxilixi tixcalimes?

<sup>33</sup> In judíos quinanquilije:

—Amo timitzmacalo tixcalazos pampa ticchiác len cuali. Unca pampa ticejuecaltitica Dios. Unca pampa tehual, mas que tilacal san, tiquijutitica pampa tehual Dios.

<sup>34</sup> Jesús quinnanquilic:

—Unca lajcuiluli pa iamal anmolajtol hual noje unca Dios ilajtol, quijtúa: “Niquijtuc: Amhuanten anunca dioses.”

<sup>35</sup> Capa Dios quijtuc inon, yoje quinmiliaya ilajtol yehuanten hual quintilanic pa quinmilisi lacames inon. Huan quema, Dios quinmilic yehuanten yeje dioses mas que yehuanten lacames san. Huan monequi pa anquineltocas inon, pampa unca Dios ilajtol lajcuiluli huan amaqui huil quijtúa pampa amo unca melahuac.

<sup>36</sup> Axan, pa in tonali hual noTajtzin nechtilanic pin lalticpan, nechlalic quinami ilanahuatini. Pampa inon amo unca anmoyaxca pa annechilisi niqihuejuecaltitica Dios pampa annimitzilic nehual niunca Dios iXolol.

<sup>37</sup> Sinda amo niquinchiá innojen hual Dios noTajtzin nechtilanic pa niquinchiás, cuaquín amo xichneltocacan.

<sup>38</sup> Huan sinda quema niquinchiá innojen, cuaquinon, mas que amo anechneltoca nehual, xicneltocacan innojen cate hual noTajtzin nechmacac pa niquinchiás. Xicneltocacan pa yoje anquimatis huan pa ancayas anquimaztica quinami Dios noTajtzin unca nonahuac, huan yihual tiyulticate, nehual niunca inahuac. Yihual laijtuc nehual huan nehual laijtuc yihual.

<sup>39</sup> Cuaquinon motolinije pa quiquitzquilosquiaya oc sejpa, huan yihual mijcuantiquisac inminlaixpan yehuanten.

<sup>40</sup> Uyac oc sejpa ca yoje (analco) in atenco hué Jordán, cataya capa Juan pehuaya lacuayatequi. Nepa Jesús mocahuaya chantitayata.

<sup>41</sup> Huan ca ompic míac lacames uyaje ca yihual, huan quililoaya:

—Neli amo quichiác Juan nindeno hual techmahuisultiaya ca lamajtilisli. Ma yoje, mochi in hual Juan quijtuc inahuac in lacal cataya melahuac.

<sup>42</sup> Huan míac pehuaje quineltocaje nepa.

## 11

### *Lázaro miqui*

<sup>1</sup> Cataya se lacal cocoxqui, yihual Lázaro hual yulic pin caltilan Betania, in caltilan capa chantiloaya María huan icni sihual Marta.

<sup>2</sup> Cataya in se María hual quixahuilic in Tata Jesús ca chahuac hual ajuíac, huan quinhuactic icxihuajmes ca itzondi. Quichihuilic inon pin tonalijmes quiman ayamo quimictije Jesús in judíos.

Yihual Lázaro in cocoxquil, yihual inmicni María huan Marta.

<sup>3</sup> Yoje, icnián sihuames quitilanilije Jesús lajtol, quilije:

—Tata, quita, yihual cocoxqui, yihual hual ticnequi.

<sup>4</sup> Ma yoje, in tonali Jesús quicaquic in lamachiltisli hual quitilanilije, quinmilic imonextiliniymes:

—Inocolisli amo unca pa yihual miquis. Unca pa quitasi moxtin quinami unca niman hué Dios ilahueltisli, pa yoje nehual hual Dios iXól nejchías hué Dios pan ipampa in cocolisli.

<sup>5</sup> Jesús quinnequic Marta huan icni sihual huan Lázaro.

<sup>6</sup> Ma yoje, pa in tonali hual quicaquic pampa Lázaro cataya cocoxqui, mocahuaya ome tonalijmes nepa capa cataya.

<sup>7</sup> Cuaquinon, quiman panuje innojen tonalijmes, quinmilic imonextiliniymes:

—Ma tiacan oc sejpa pa Judea.

<sup>8</sup> Quilije imonextiliniymes:

—Lamaxtini, in huejueyenten judíos san huipala quinequiloaya mitzmictilo ca tixcalazos. ¿Leca tías ca ompic oc sejpa?

<sup>9</sup> Jesús quinnanquic:

—Cate doce lajlajco pa se semilhuil, ¿amo yoje? Huan jan yoje Dios quilalic quichi lachihualisli monequi pa nicchías pa se semilhuil. Amo nejtzacuilis nindeno pa camo nicchías mochi hual Dios nechilic pa nicchías. Sinda se nejnemi pa semilhuil, amo motecuas icxían ca se tixcali, pampa lachía pan ipampa in lahuilisli hual quilahuía mochi in lalticpan.

<sup>10</sup> Huan sinda se nejnemi pa layúa, yoje yahui momañajtía, pampa amo unca lahuilisli pa yihual lachías. Huan sinda unca laticumac lajtic iyolo se, momañajtis pampa ilahuilisli Dios amo quinextilis Dios iojli.

<sup>11</sup> Lamac quijtuic inon, yihual quinmilic:

—Tocni Lázaro cochic axan. Huan nehual nía pa niquejxiltis.

<sup>12</sup> Cuaquín imonextiliniymes quilije:

—Tata, sinda coxtica, cuaquín pajtis.

<sup>13</sup> Jesús quinequiaya quijtu pampa miquic Lázaro. Huan quijtuje imonextiliniymes pampa yihual quinlaquetziliaya quinami cochiaya.

<sup>14</sup> Pampín, quinmilic Jesús ca lajtol calica amo moixpolulosquiaya:

—Lázaro miquic.

<sup>15</sup> Huan unca paquilisli pa noyolo pampa amo nicataya nepa, pampa yoje cataya cuali pa amhuanten. Pampa inon, anyahui anquilalía miac laneltocalisli ca nehual. Ma yoje, ma tiacan capa yihual.

<sup>16</sup> Cuaquinon Tomás hual noje itocaya Seinomenten quinmilic in oc sequin monextiliniymes, quinmilic:

—Ma tiacan noje ca yihual, pa yoje timiquisi ca yihual.

*Jesús, yihual in se hual quinyliltía in mijquimes, yihual in yulilisli*

<sup>17</sup> Yoje, ajsiaya Jesús, quilije quinami axan quinpiaya nahui tonalijmes hual Lázaro cataya pin cueva (ostul) capa quilalpachuje.

<sup>18</sup> Betania huan Jerusalén amo cate huejca se ca in oc se, quinami cinco (macuili) kilometros.

<sup>19</sup> Huan miac ca in huejueyenten judíos hualaje ca Marta huan María pa quinlacahualtilisi inmicni Lázaro.

<sup>20</sup> Huan quiman quimatic Marta pampa ajsitihualaya Jesús, uyac quinamiquic. Ma yoje, mocahuac María molalijtataya pin cali.

<sup>21</sup> Huan Marta quic Jesús:

—Tata, amo miquiaya nocni sinda ticataya nican.

<sup>22</sup> Ma yoje, axan nicmati len yes ticlajlanis Dios, yihual mitzmacas.

<sup>23</sup> Jesús quilic:

—Mocni yulis oc sejpa.

<sup>24</sup> Marta quilic:

—Nicmati yihual yulis oc sejpa pan tonali quiman lamis in lalticpan hual axan unca. Yulis nepa ca moxtin hual yulisi oc sejpa.

<sup>25</sup> Jesús quilic:

—Nehual in inminlayulitlisli in mijquimes, nehual in yulilisli. Nehual pan nopampa huil nicyuliltia aqui yes huan quiman yes nicnequi, pampa nicpía yulilisli calica nilayuliltia. Aquí nechneltoca, mas que miquis, ma yoje yihual yulis.

<sup>26</sup> Huan aqui yes yuli nechneltocatica, yihual amo quiman miquis pa moxilus ilaixpan Dios. ¿Ticneltoca inon hual nimitzilijtica?

<sup>27</sup> Marta quinancuilic:

—Jo quema, Tata, nehual nicneltoca quinami tehual tiunca in Cristo, tiunca iXolol Dios hual ticchialoaya pa hualas pin lalticpan.

*Jesús choca inahuac capa quilalpachuje Lázaro*

<sup>28</sup> Huan quiman quilic inon, mohuicac, uyac quinzac ixtacayito icni María, quilic:

—Axan unca in Lamaxtini huan mitznoztica.

<sup>29</sup> Huan quicaquic inon María, moqueztiquisac, uyac capa Jesús.

<sup>30</sup> Axan ayamo calaquic Jesús pin caltilan, ayamo mijcuanic capa Marta quinamiquic.

<sup>31</sup> Pin cali cataloaya ca María sequin huejueyenten judíos hual quilac-ahualtitataloaya. Cuaquinon, quitaje moqueztiquisac huan quisac. Yehuanten quitocaje, quijtutataloaya yihual yahuiaya pa in cueva (ostul) capa quilalije in mijquil. Quijtuloaya yahuiaya quichoquili umpa.

<sup>32</sup> Yoje, ajsic capa cataya Jesús quimolancuacuetzilijtiquisac, quilijtica:

—Tata, sinda tehual ticataya nican, nocni amo miquiaya.

<sup>33</sup> Huan Jesús quitaya chocatataya huan quinmitaya in judíos hual hualaloaya ca yihual María, yehuanten noje chocataloaya. Cuaquin quic-ocuc iyolo huan laijtic yihual motoliniaya.

<sup>34</sup> Quinmilic:

—¿Capa anquilalic?

Quinmilije:

—Xihuala huan xiquita.

<sup>35</sup> Chocac Jesús.

<sup>36</sup> Cuaquin moilije in judíos:

—Xiquitacan quinami yihual quinequic.

<sup>37</sup> Huan sequin ca yehuanten quilije:

—In lalac quilachialtic se pachacal. ¿Leca amo huil quitzacuilic pa camo miquisquiaya in lalac?

<sup>38</sup> Huan Jesús iyolo quicocujtataya ca icnotilisli, ijyulantic laijtic yihual quiman ajsiaya capa quilalije. Cataya se cueva (ostul) huan se tel quilalilije inahuac pa quitzacuas.

<sup>39</sup> Quinmilic:

—Xiquijcuanican in tel.

Marta icni in mijquil quilic:

—Tata, axan quisas ijyul. Quipía nahui tonalijmes quiman polehuic.

<sup>40</sup> Jesús quilic:

—Nimitzilic sinda ticneltocas, tiqitas quinami unca hué Dios ilahueltilisli. ¿Amo tiquijnamiquí?



41 Cuaquín quijcuanije in tel. Huan Jesús lachíac pa in cielo (ilhuicac) huan quilic:

—Tata, nimijsehuía pampa tichcaquic.

42 Huan nicmati tehual amo quiman timocahua pa tichcaquis. Ma yoje, nimitzilic inon pampa yehuanten in míac moqueztecate notenco, huan yoje quineltocasi tehual tichtilanic nican pan lalticpan.

43 Huan quiman lamíc lajtuc yoje, tzajtzic ca lajtol chicahuac, quilic:

—¡Lázaro, xihuala pa quiahuac!

44 Huan hualac pa quiahuac Lázaro, yihual hual cataya mijquil, ilpitataya ca in tzotzomajli calica quiliarulo in mijquimes, huan pa iixco ilpitataya oc se tzotzomajli. Jesús quinmilic:

—Xictomilican pa huil yas.

*Molaquetzililo in huejueyenten quinami quinmictiluililo Jesús*

(Mt. 26:15; Mr. 14:12; Lc. 22:12)

45 Yoje, míac ca innojen huejueyenten judíos pehuaje quineltocaje Jesús unca in Cristo, pampa nepa ca María cataloaya huan quitaje in hual quichíac Jesús.

46 Ma yoje, sequin ca yehuanten uyaje capa in fariseos, quinpuhuilije inon hual Jesús lamíc quichíac.

47 Pampín, lanahuatije in tiopistas huejué huan in fariseos pa monechicusi moxtin yehuanten, moilije:

¿Len tialo ticchihualo? Pampa in lalac quinchía míac hual quinmahuisul-tilo ca lamajtilisli moxtin.

48 Sinda ticmacahuiltilo pa yahuis yoje, moxtin quineltocasi yihual unca in Cristo. Cuaquín hualasi in romanos huan techquixtilisi tolahuellitlisli huan tolali.

49-50 Cuaquín se ca yehuanten motocaya Caifás, yihual in tiopista hué pa in xihuil, quinmilic:

—Amo anquimati nindeno, huan amo anmoijnamiquiltía quinami unca cuali pa amhuanten pa san se lalac miquis pa moxtin, yoje pa camo lamisi moxtin huan tolali.

51 Yihual Caifás amo quinmilic inon pan ipampa yihual ihuían. Cataya pampa yihual yec tiopista hué pa in xihuil, pampín yihual quijtutataya Dios ilajtol inahuac Jesús. Ma yoje, amo quimatiaya pampa yihual quijtutataya pampa Jesús yahuiaya miqui pa camo quipías pa polehuisi yehuanten pin lali Israel.

52 Huan Jesús amo yahuiaya miqui jan pa yehuanten hual iyaxca Israel san. Noje pan ipampa imiquilisli, Dios yahuiaya quinnechicu Dios ixolomes hual mosemanticate pa mochi in lalticpan, pa yoje ixolomes yesi jan se cali san.

53 Yoje, pejtataloaya ca in tonali huan pa mochi in tonalijmes hual ajsitihualaloaya, yehuanten molaquetzililoaya quinami yahuiloaya quimictiluililo.

54 Pampín yajmo mocahuaya Jesús chantitataya capa huil quitaloaya in huejueyenten judíos. Jan mohuicac pa quiahuac nepa pa se caltilan capa amo cataya huejca in lali capa amaqui chantiaya. In caltilan itocaya Efraín. Nepa mocahuac ca imonextilinjmes.

55 Ajsitihualaya in fiesta (ilhuil) ipascua in judíos, huan míac lacames pa mochi in lalticpan panquisaloaya pa Jerusalén, quinequiloaya ajsilo pin tonalijmes quiman ayamo pehuac in fiesta (ilhuil) pa huil mochipahuasi

quinami quijtúa in lajtol hual lamaxtilía quinami monequi pa mochijchi-huililo pa huil quimolancuacuetzilisi Dios.

<sup>56</sup> Innojen lacames quitemuloaya Jesús, moililoaya moquezataloaya pin tiopan hué, quililoaya:

—¿Anquijtúa yihual amo hualas pa in ilhuil?

<sup>57</sup> Quiman ajsitihualamo in fiesta (ilhuil), lanahuatije in tiopistas huejué huan fariseos sinda calía lalacal yes quimatic capa cataya Jesús, quiapiaya pa quinlamachiltis in huejueyenten pa yoje huil quiquitzquisi.

## 12

*Se sihual quixahuilía Jesús itzontecon huan icxían*  
(Mt. 26:6-13; Mr. 14:3-9)

<sup>1</sup> Yoje, ca chucuase tonalijmes yahuiaya ajsi in fiesta (ilhuil) itoca pascua, huan Jesús hualac pa Betania capa cataya Lázaro hual miquic hual Jesús quiyuliltic.

<sup>2</sup> Huan quichihualoaya nepa se lacualisli. Marta quinlacualtiaya yehuanten pan capa lacualoaya, huan Lázaro cataya se ca yehuanten hual cataloaya ca Jesús lacuajtataloaya.

<sup>3</sup> Cuaquín María canac se altzindi tetzahuac lachihuali ca nardo puro, quinami lajco kilo, niman ipati. Huan ca inon quixahuilic Jesús icxihua-jmes, de umpa quinhuactic icxihua-jmes ca itzondi. Yoje, pa mochi in cali quijnecuije quinami ajuíac in altzindi.

<sup>4</sup> Huan nepa cataya Judas Iscariote. Yihual imonextilini Jesús hual yahuiaya quitemaca Jesús ca yehuanten hual yahuiloaya latilanilo pa quimictisi. Quilic:

<sup>5</sup> —¿Leca amo quinamacaje in altzindi huan quinmacaje in tomin yehuanten hual amo qui-pialo? Xiquitacan. In altzindi ipati quinami in tomin hual canaloye cientos lacames tequipanujticate se tonali.

<sup>6</sup> Judas quilic inon pampa yihual yec laxtequini. Amo quilic pampa quinmicniliaya yehuanten hual amo qui-pialoaya nindeno. Cataya pampa yihual mojmosta quihuicani in xotopa capa qui-pixtiahuiloyaya inmintomin yehuanten. Huan yihual sejpa huan oc sejpa caniliaya tomin pin xotopa hual yehuanten quilalilije laijtic.

<sup>7</sup> Cuaquín Jesús quilic:

—Amo xicmaca tequil. Cataya pampa quinequiaya cajcoqui pa nejhauillis pin tonalijmes capa ayamo nechlalpachuje.

<sup>8</sup> Mojmosta anquinpiás ca amhuanten yehuanten hual amo qui-pialo. Ma yoje, nehual amo annehpiás ca amhuanten míac tonalijmes.

*Quitemulo quinami huil quimictisi Lázaro*

<sup>9</sup> Axan, míac lacames judíos amo huejué quimatije Jesús cataya nepa Betania. Pampín hualaje, huan amo jan pa huil quitasi Jesús san. Noje quinequiloaya quitalo Lázaro hual Jesús quiyuliltic oc sejpa.

<sup>10-11</sup> Pampín, in tiopistas huejué molaquetzililoaya quinami quimictilosquiaya Lázaro noje. Axan míac judíos mocahuaje pa quinneltocasi quinami quinequiloaya in huejueyenten judíos. Axan quinneltocaloaya Jesús pampa yihual quiyuliltic Lázaro.

*Jesús calaquía Jerusalén*

<sup>12</sup> Mostatica monechicuje míac ca yehuanten hual quipialoaya sequin tonaliymes ajsije pa Jerusalén pa in fiesta (ilhuil). Quimatije quinami Jesús ajsitihualaya noje pa Jerusalén.

<sup>13</sup> Pampín quinmanaje isacayo in palmas huan quisaje pa quinamiquisi, huan tzajtziyoaya, quijtutaloaya:

—¡Hosana! (In lajtol quinequi quijtúa: “¡Xitejchiuili cuali axcan!”) ¡Ma lajtucan cuali moxtin inahuac yihual hual huala ca in Tata ilahueliltilisli! ¡Yihual ihué Israel!

<sup>14</sup> Quitac Jesús se burro yancuic, molalic ipan, jan quinami Dios ilajtol quijtuc pa yina inahuac yihual, yoje unca lajcuiluli:

<sup>15</sup> Amo ximomajtcan amhuanten hual anchanti pa Sión. Xiquitacan, huala anmohué capa amhuanten, molalijitca pani ixolol se burra.

<sup>16</sup> Amo quimatije imonextiliniymes len quinequije quijtuje mochi innojen pa in tonali hual panujtataloaya. Ma yoje, in tonali hual Jesús yuliaya oc sejpa, cuaquinon quimatije. Quijnamiquiloaya quinami cataya lajcuiluli pa Dios ilajtol pampa lacames yahuiloyaya quichihuililo innojen lachihualisli. Huan imonextiliniymes quinmitaje yehuanten capa quichihuilije mochi innojen.

<sup>17</sup> Huan nepa noje cataloaya in míac hual cataloaya ca Jesús in tonali hual yihual quinotzac Lázaro pa quisasquiaya pa quiahuac capa quilalije imijquil, in tonali hual yihual quiyuliltic oc sejpa. Axcan yehuanten quinlaquetzilitinemiyoaya neli inahuac míac oc sequin innojen lachihualisli hual quitaje panuje.

<sup>18</sup> Pampa inon uyaje pa quinamiquisi Jesús in míac oc sequin, pampa quimatije inon hual Jesús quichihuilic Lázaro. Yoje quimahuisujtiahuiloyaya ca lamajtilisli.

<sup>19</sup> Pampín, moililoaya in fariseos, quijtuloaya:

—Xiquitacan. Yajmo huil ticchihualo nindeno. Quitocaticate moxtin in lalacera pin lali.

### *Sequin lacames griegos qitemulo Jesús*

<sup>20</sup> Huan cataloaya sequin lacames griegos ca yehuanten hual panquisaje pa Jerusalén pa quimolancuacuetzilisi Dios nepa pin fiesta (ilhuil).

<sup>21</sup> Hualaje in griegos capa Felipe, yihual cataya se hual chantiaya pin caltilan Betsaida pin lalticpan Galilea. Quilajlanije quilije:

—Tata, ticnequilo tiqitalo Jesús.

<sup>22</sup> Uyac Felipe, quilic Andrés, huan Andrés uyac ca Felipe huan yehuanten quilije Jesús.

<sup>23</sup> Jesús quinnanquilic, quinmilic:

—Axan ajsic in tonali hual nel nicanas lahueyilisli hual nejchihuilis niman hué nehual ilacal in cielo.

<sup>24</sup> Neli, neli annimitzilía inon: Se latochi mocahua jan se san sinda amo huetzis pin lali huan polehuis. Huan sinda quema polehuis, cuaquín ixuas huan quilalis míac.

<sup>25</sup> Aquí hual quinequi yultía pa yoje canas mochi hual huil cana pa yulis pan lalticpan quinami yihual quinequi, yoje yihual polehuis amo quipixtica in yulilisl hual amo quiman lamis. Huan aquí hual motzacua pa camo yulis yoje, cuaquín yihual quimajcoquilis iyulilisl huan amo quiman quipolus.

<sup>26</sup> Sinda se lalacal, aquí yes, quinequi nechtequipanuilía, ma nechtoaca. Huan capa niunca, nepa noje cayas yihual hual nechtequipanuilía. Sinda se lalacal aquí yes nechtequipanuilía, cuaquín Dios noTajtzín quichihuilía hué in se.

*Jesús quinlamachiltá quinami yalo quimictilo*

<sup>27</sup> Axan nimoita nietaixtica laijtic noyolo, huan nehual, ¿len nía niqijtúa inahuac inon? ¿Niclajlanis Dios noTajtzin pa yihual nechquixtis pa camo nipanús in miqilislí hual yahui nechpanúa? No, inon amo niclajlanis, pampa nihualac pan lalticpan pa yoje nechpanus, pampín nechajsitihuala in tonali.

<sup>28</sup> Tata, xicchía niman hué motoca tehual. Ximochía niman hué inminlaixpan moxtin, pa quilasojlasi niman míac motoca.

Mocactihualac se lajtol pin cielo, quilic:

—Nimochíac niman hué, huan oc sepa nimochías niman hué pa moxtin quilasojlasi notoca.

<sup>29</sup> Quijtuje pampa comunic in míac ca yehuanten hual nepa moquetzaloaya huan quicaquije. Oc sequin quijtuje:

—Lajtuc ca yihual se ilanahuatini in cielo.

<sup>30</sup> Jesús quinnanquilic:

—Amo mocactihualac in lajtol pa nehual nijcaquis. Mocactihualac pa amhuanten anquicaquis.

<sup>31</sup> Axan Dios yahui quinmaca ojli yehuanten pin lalticpan, axan Satanás yahui caya laquixtili capa quipía ilahueliltilisli.

<sup>32</sup> Huan nehual niyes lachihuali hué pa in tonali hual nechajcoquisi. Yoje niqinchihuilis pa moxtin hualasi ca nehual, yehuanten pa mochí lali niqinlaneltocaltis pa nechtocasi.

<sup>33</sup> Inon Jesús quilic, pa yoje quimatisi quinami yahuiaya miqui.

<sup>34</sup> Pampín, innojen míac lacames quinnanquilije:

—Quinami techmomaxtililo len quijtúa ilajtol Dios hual quilic Moisés, tijcaquilo quinami quijtúa pampa in Cristo mocahua yultica huan amo quiman miquis. ¿Quinami huil titechilía monequi pa yes la'ajcoquili pa quimictisi yihual hual cataya inahuac Dios, hual Dios quitilanic pin lalticpan? ¿Aqui unca in ilacal in cielo?

<sup>35</sup> Jesús quinmilic:

—Jan nadita san nicayas ca amhuanten, nehual hual niqinami lahuilislí pa annimitzlahuis pan Dios iojli. Xiyén quinami yehuanten hual quimatilo nejnemilo pan se ojli mopalejtcate ca in lahuilislí. Xicchihuacan inon pa yoje amo anmitzajsis in laticumactilislí. Pampa yihual hual nejnemía capa laticumac amo quimati ca capic yahui.

<sup>36</sup> Axan anquipía Dios ilahuilislí, inon hual annimitzilía. Xicneltocacan, pa yoje anmochías Dios ixolomes anquixtica Dios ilahuilislí laijtic amhuanten amoyolo.

Quinmilic Jesús innojen lajtomes, huan cuaquinon moxiluc inminlaixpan yehuanten, quinmolatlic.

*In unca leca in judíos amo quineltocaje Jesús*

<sup>37</sup> Huan mas que yihual quinchíac inminlaixpan míac lachihualislí hual lanextiloaya quinami yihual neli quipiaya in hual iyaxca Dios, ma yoje amo quineltocaloaya.

<sup>38</sup> Amo quineltocaloaya pa yoje panus quinami quijtuc inminahuac yehuanten Dios ilajtuni itocac Isaías. Yoje unca lajcuiluli quinami yihual quijtuc:

Tata, amaqui quineltocac len ticlamachiltijque.

Huan amo unca amaqui hual cataya lanextili quinami unca hué Dios ilahueliltilisli.

<sup>39</sup> Pampa inon amo huil quineltoaloaya, pampa ca oc se lajtol pa iamal Isaías quijtuc:

<sup>40</sup> Unca quinami Dios quinpachacaruc inmixtololojmes huan quinchihuilic pa camo huil quimatisi len Dios quinequi.

Dios quinchihuilic yoje pa yoje yes quinami amo quitasi ca inmixtololojmes, quinchihuilic pa yoje amo quimatisi pa inminyolo, quinchihuilic pa yoje amo quimatisi len quinequi quijtúa pa inminyolo, quinchihuilic pa yoje amo mopalasi quinami amo quineltoaloaya, pampa sinda mopalaloaya, cuaquinon niquinquixtiaya, quilía in Tata, pa inminpolehuilisi.

<sup>41</sup> Innojen lajtomes quijtuc Isaías pampa yihual quitac Cristo ca mochi ilaixpelasli chicahuac, huan pampa inon Isaías quijtuc quinami quitac Cristo.

<sup>42</sup> Huan quema, míac ca in huejueyenten judios quineltoaje Cristo. Ma yoje, momajtije inminlaixpan in fariseos, huan pampín amo quililoaya pampa quema, quineltoaje. Sinda quililoaya yoje, cuaquín in fariseos quinquixtiloaya mochi hual inminyaxca pa quichihualosquiaya pin tiopan hué. Yoje yajmo huil calaquiloaya pa se tiopan, huan yoje in míac judíos molaliloaya inminpan.

<sup>43</sup> Amo quinequiloaya cayalo laquixtili pa camo huil calaquilosquiaya in tiopan hué, pampa quixtoaloaya míac pa lacames lajtulosquiaya cuali inminahuac yehuanten. Pa yehuanten, amo monotzaya pa Dios lajtusquiaya cuali inminahuac.

*Jesús ilajtomes quinmotexpahuililo in lacames pa yoje yesi latojtocali ilaixpan Dios*

<sup>44</sup> Latzajtzilic Jesús, quilic:

—Aqui hual nechneltoaca amo nechneltoaca nehual. Quema, quineltoaca yihual hual nechtilanic.

<sup>45</sup> Huan aqui hual nechita, yihual quiztica aqui hual nechtilanic.

<sup>46</sup> Nihualaya quinami se lahuilisi pin lalticpan, pa yoje aqui yes nechneltoaca amo yulis quinami se hual nejnemía capa laticumac.

<sup>47</sup> Huan sinda aqui lalacal yes quicaquía len niquijtúa, huan amo quineltoaca, cuaquín nel amo nicmacas iojli. Amo nihualaya pa niquinmacas ojlí yehuanten pin lalticpan. Nihualaya pa niquinquixtis pa inminpolehuilisi.

<sup>48</sup> Aquí hual nejxicúa huan amo quineltoaca in hual niquijtúa, yihual quipía in hual quimotexpahuilisi. Yes in lajtol hual niquijtuc. Pan ipampa in, yihual yes latojtocali pa camo cayas ilaixpan Dios. Polehuis pan tonali quiman lamis in lalticpan hual axan unca, huan amo quiman mocuepas.

<sup>49</sup> Yoje yes latojtocali pa camo cayas iyampa Dios pampa amo niquijtuc nindeno hual nehual nohuian niquijtuc pa noyolo. Cataya Dios noTajtzin hual nechtilanic, yihual nechmacac lajtol. Ca in niquijtúa huan ca in annimitzilia.

<sup>50</sup> Huan nicmati ilajtol unca pa nel annimitzlamachiltis huan pa annimitznextilis quinami huil anquipía iyulilisi hual amo quiman lamis. Huan innojen lajtomes hual niquijtúa cate innojen jan quinami Dios in Tata nechilic, huan jan yoje niquinmilía.

<sup>1</sup> Ayamo ajsiaya itonali in fiesta (ilhuil) pascua huan Jesús quimatiaya pampa cataya in tonali capa yes lamictili. Quimatic pampa yahuiaya quisa pa in lalticpan pa mocuepas capa Dios iTajtzin. Amo mocahuaya pa quinnequis yehuanten hual iyaxca huan quinnequiaya ca mochi iyolo. Yoje, quiman calaquic in tonali, mochijchihualoaya pa lacualosquiaya.

<sup>2-4</sup> Satanás calaquic pa iyolo Judas Iscariote, ixolol Simón. Yoje yihual yahuiaya quitemaca Jesús ca yehuanten hual yahuiloyaya quitilanilo pa quimictilosquiaya. Jesús quimatiaya quinami Dios iTajtzin quimacac yihual Jesús lahuelilitilisi pa mochi. Quimatic quinami yihual cayac capa Dios huan umpa hualac pan lalticpan. Huan axan yahuiaya mocuepa capa Dios. Yoje, quiman lamije quicuaje ilacualisli in pascua, moquetzac Jesús, moquixtilic inahuas huan canac se tzotzomajli calica mohuactia se, huan ca inon mocuejtic.

<sup>5</sup> Cuaquinon quitoyahuac al pa se xicali hué huan pehuac quinpaquilic icxihuaimes imonextiliniyimes huan quinhuactic ca in tzotzomajli calica mocuejtic.

<sup>6</sup> Ajsic capa Simón Pedro, hual quilic:

—Tata, ¿tía tichpaquilía nehual noxihuaimes?

<sup>7</sup> Jesús quinanquilic:

—Ayamo ticmati leca nehual nimijchihuilijtica inon. Ma yoje, ca jan nadita ticmatis.

<sup>8</sup> Pedro quilic:

—Amo quiman tichpaquilis noxihuaimes.

Jesús quinanquilic:

—Sinda amo nimitzpaquilis, cuaquín amo huil tiyes nomonextilini.

<sup>9</sup> Simón Pedro quilic:

—Tata, amo jan noxihuaimes san. Noje xichpaquili nomajmajuan huan notzontecon.

<sup>10</sup> Jesús quilic:

—Aqui hual unca la'altili amo monequi pa maltis pa mochi icuerpo, jan pa icxihuaimes san, pampa axan yihual unca mochi chipahuac. Amhuanten anunca chipahuac, ma yoje amo anmoxtin.

<sup>11</sup> Jesús quimatic aqui yahuiaya quitemaca ca yehuanten hual yahuiloyaya quimictilo. Pampín quinmilic: “Amo anunca chipahuac anmoxtin.”

<sup>12</sup> Quimpaquilic inmicxihuaimes huan umpa molaquentic ca inahuas. Cuaquín molalic huan quinmilic:

—¿Anquimati in hual nilamic annimijchihuilic?

<sup>13</sup> Annehtocayaltía Lamaxtini huan Tata. Huan yoje annehtocayaltía cuali, pampa nehual, quema, nilamaxtini huan niTata.

<sup>14</sup> Huan mas que nehual niunca Tata huan Lamaxtini, ma yoje annimitzpaquilic anmocxihuaimes. Pampín, sinda annimijchihuilic yoje, monequi pa amhuanten anquinpaquilis anmocxihuaimes se huan oc se. Nicnequi niqijtía, monequi pa amhuanten anmotequipanuilis quinami tequipanujquimes moxtin oc sequin ca amhuanten.

<sup>15</sup> Unca pampa axan annimitznextilic ca in lachihualisli quinami monequi pa anquichías yoje jan quinami nel annimijchihuilic.

<sup>16</sup> Neli, neli annimitzilía inon: Se tequipanujquil amo unca hué quinami iteco unca hué. Huan aqui hual unca latilanili amo unca hué quinami unca hué aqui quitlanic.

<sup>17</sup> Anquimati inon. Sinda anyulis quinami quijtulo in lajtomes, yoje anyulis ca paquilisli.

<sup>18</sup> 'Amo nilaqueztica anmonahuac anmoxtin. Nehual nicmati aquinojen niquinlajtultic. Huan unca se hual niclajtultic hual unca ca tehuanten pa yoje panus quinami quijtúa Dios ilajtol lajcuiluli, quijtúa: "Yihual hual huan nehual tilacuaje, unca quinami nechlaxilic mas que tiyeje quinami icnían."

<sup>19</sup> Ca nican mosta annimitzilijtica in hual yahui panúa mas que ayamo panuc, pa yoje pa in tonali quiman panus, cuaquín anquineltocas nehual in se hual Dios quitilanic.

<sup>20</sup> Neli, neli annimitzilía, aquí hual quimosehuilía aquí yes nictilanis, unca quinami yihual nechnamiqui cuali nehual. Huan aquí hual nechnamiqui cuali, neli unca quinami quinamictica cuali yihual hual nechtilanic.

*Jesús quinmachiltía pampa Judas yahui quitemaca ca yehuanten hual quimictisi*

(Mt. 26:20-25; Mr. 14:17-21; Lc. 22:21-23)

<sup>21</sup> Lamic lajtuc Jesús yoje, quitzintecuac pa iyolo huan lajtuc pa huil quicaquisi cuali, quinmilijtica:

—Neli, neli annimitzilía, se ca amhuanten yahui nechtemaca ca yehuanten hual yalo nechmictilo.

<sup>22</sup> Moitaloaya imonextilinjmes se ca oc se, quimahuilijtataloaya de aquí quilaquetziliaya.

<sup>23</sup> Cataya inahuac Jesús se imonextilini huilantataya pa Jesús ilaixpan ihuajcol. (Pa yina yoje lacuanijme huilantataloaya yehuanten inahuac inon capa lacuanijme.) Huan Jesús quinequiaya in monextilini.

<sup>24</sup> Cuaquín Simón Pedro quilamachiltic ca ima in monextilini pa quila-jlanisquiaya Jesús aquí yahuiaya quitemaca.

<sup>25</sup> Huan huilantiquisac in monextilini pani Jesús ilaixpan huan quilic:

—Tata, ¿aquí yihual hual yahui mitztemaca?

<sup>26</sup> Jesús quinanquilic:

—Yihual unca hual nía nicpulactilía in pan huan nía nicmaca.

Quipulactic ilajco in pan pin tapalquita, quimacac Judas ixolol Simón Iscariote.

<sup>27</sup> Canac Judas in pan, cuaquinon Satanás calaquic pa iyolo, quiquitzquic. Cuaquín Jesús quilic Judas:

—Xicchía jan ajnaxcan in hual tía ticchía.

<sup>28</sup> Ca yehuanten hual cataloaya nepa lacuajtataloaya, amo cataya se hual quimatiaya leca Jesús quilic inon.

<sup>29</sup> Sequín quijtuje cataya pampa quipiaya Judas in tomin, huan pampín Jesús quilijtataya pa quincuhuas innojen hual yahuiyoaya quinequilo pa in fiesta (ilhuil). O quijtuje pampa quilijtataya pa quimacas len yehuanten hual amo quipialoaya nindeno.

<sup>30</sup> Yoje, canac Judas ilajco in pan, uyajtiquisac. Cataya layúa.

*In lajtol yancuic hual monequi pa quineltocas*

<sup>31</sup> Quiman quisac Judas, Jesús quinmilic:

—Axan, nehual ilacal in cielo niyes lachihuali niman hué. Huan Dios yes lachihuali hué pan nopampa.

<sup>32</sup> Huan pampa Dios yes lachihuali niman hué pan nopampa, noje yihual nechhías nel niman hué pan ipampa yihual. Nicayas jan quinami yihual Dios.

<sup>33</sup> Nitos, jan nadita nicayas ca amhuanten. Annechtemus, huan ma yoje, quinami niquinmilic in huejueyenten judíos, yoje axan annimitzilijtica, ca capic nías, amo huil anyas amhuanten.

<sup>34</sup> Annimitzilijtica se lajtol yancuic, unca inon: Ximolasojlajan se huan oc se. Jan quinami nehual annimitzlasojlac, noje amhuanten ximolasojlajan.

<sup>35</sup> Pan ipampa inon, moxtin quimatisi amhuanten anunca nomonextilini-jmes, sinda anmolasoilas se huan oc se.

*Jesús quilia Pedro pampa yahui quijtúa pampa amo quiximati*  
(Mt. 26:31-35; Mr. 14:27-31; Lc. 22:31-34)

<sup>36</sup> Simón Pedro quilic:

—Tata, ¿ca capic tía?

Jesús quinanquilic:

—Amo huil tichtoca axan ca capic nía. Ma yoje, tichtocas innojen tonal-jmes hual ajsitihualalo.

<sup>37</sup> Pedro quilic:

—Tata, ¿leca amo huil nimitztoca axan in layúa? Nimiquisquiaya ca tehual.

<sup>38</sup> Quinanquilic Jesús:

—¿Timiquisquiaya ca nehual? Neli, neli annimitzilía, tehual axan in layúa tía tiquilia ca ye lajtulisli pampa amo tichiximati, huan inon tía tiquilia quiman ayamo xahuans in gallo.

## 14

*Jesús yihual in ojli hual techhuicas ca toTajtzin Dios*

<sup>1</sup> Ma camo anmitzcocu anmoyolo. Anquineltoaca Dios, xichneltoacan nehual noje.

<sup>2</sup> Pin cielo capa chanti noTajtzin cate míac calimes capa chantisi yehuanten hual nechlasojlalo. Sinda amo cataya yoje pin cielo, cuaquín amo annimitzil-iaya quinami nía ca ompic pa annimijchijchihuilis capa ancayas.

<sup>3</sup> Huan sinda nías pa annimijchijchihuilis capa ancayas, cuaquín nihualas oc seppa pa annimitzanas, pa yoje ancayas amhuanten capa nehual niunca.

<sup>4</sup> Huan anquimati ca capic nía huan in ojli anquimati.

<sup>5</sup> Tomás quilic:

—Tata, amo ticmatilo ca capic tía. ¿Quinami ticmatisi in ojli?

<sup>6</sup> Quinanquilic Jesús:

—Nehual in ojli hual lahuica capa Dios, amo unca oc se. Nehual niaqui hual niquijtúa mochi hual unca melahuac inahuac Dios. Huan nehual niunca in yulilisli, nicnequi niquijtúa nehual nicmaca moxtin Dios iyulilisli. Amaqui huil ajsis capa Dios sinda amo ajsis pan nopampa nel.

<sup>7</sup> Sinda annehiximatiaya nehual, noje anquiximatiaya Dios noTajtzin. Quiman anpehuac annehitocac pa axan, annehiximatijtica. Yoje anquix-imatis Dios noTajtzin noje. Ca nican mosta anquiximati huan yihual anquitac.

<sup>8</sup> Felipe quilic:

—Tata, xitehnextili Dios toTajtzin, ja in san ticnequilo.

<sup>9</sup> Jesús quilic:

—Míac tonalijmes niunca ca amhuanten huan ma yoje ¿ayamo tichiximati, Felipe? Aqui hual nechitac nel, yihual noje quitac Dios noTajtzin. ¿Quinami tichilía pa annimitznextilis Dios noTajtzin?

<sup>10</sup> ¿Amo ticlalijtica molaneltoocalisli ca in lajtol hual mitznextilía quinami nehual niunca ca Dios noTajtzin huan Dios noTajtzin unca lajtic nehual? Innojen lajtomes hual annimitzilijtica amo niquijtutica ca nolajpnamiquillis nehual nohuían. Unca Dios noTajtzin hual unca lajitic nehual, huan yihual tequipanujtica pan nopampa.



<sup>11</sup> Xichneltocacan quiman annimitzilía quinami nehual niunca ca Dios noTajtzin huan Dios noTajtzin unca laijtic nehual. O, sinda amo anquineltoca inon, xichneltocacan pan ipampa innojen hual niquinchíac hual quinextiliaya quinami nehual nicpía Dios ilahuelilitilisi.

<sup>12</sup> Neli, neli annimitzilía inon: Aquí hual nechneltoca, yihual quinchías noje innojen huejué hual nehual niquinchía. Quema, huan quinchías lachihualisli hual cayasi niman huejué hual innojen hual niquinchíac amo yeje yoje huejué. Huil quinchías pampa nehual nías capa unca Dios noTajtzin.

<sup>13</sup> Huan len yes pan ipampa notoca ilahuelilitilisi anquilajlanis hual nel nicquita cuali, cuaquinn annimijchihuilis, pa yoje pan nopampa nel lacames quitasi Dios noTajtzin niman hué.

<sup>14</sup> Quema, sinda anquilajlanis len yes pan ipampa notoca ilahuelilitilisi, cuaquín annimijchihuilis inon.

### *Jesús quijtúa neli pampa yahui techtilanilía in Espíritu Santo*

<sup>15</sup> Sinda annechlasojla, anquinchías quinami quijtulo nolajtomes.

<sup>16</sup> Huan niclajlanis Dios noTajtzin huan yihual anmitztilanilis oc se, pa yihual amo quiman anmitzcajcahuas amhuanten. Anmijchicahualtis huan anmitzlaicanas, yihual yes anmolapalehuini.

<sup>17</sup> Yihual in Espíritu Santo. Mochi hual yihual quijtúa unca melahuac. Yehuanten pin lalticpan quixtocalo yulilo quinami Satanás quinnextilía. Yoje amo huil canaló in Espíritu Santo, pampa amo quitalo huan amo huil quiximatilo. Ma yoje, amhuanten anquiximatis, pampa yihual mocahuas chantitica ca amhuanten huan cayas laijtic amhuanten anmoyolo.

<sup>18</sup> No, amo nía annimitzcajcahua quinami xolomes hual amo quipialo inmintajtzitzian. Nimocuepas nihualas ca amhuanten.

<sup>19</sup> Jan nadita san huan yehuanten pin lalticpan yajmo nechitasi. Ma yoje, amhuanten annechitas pampa niyulis. Huan pampa niyuli, amhuanten noje anyulis.

<sup>20</sup> Pa in tonali quiman niyulis oc sejpa, anquimatis quinami nehual niunca ca laijtic Dios noTajtzin huan amhuanten anunca ca laijtic nehual huan nehual niunca ca laijtic amhuanten.

<sup>21</sup> Aquí hual quimati nolajtomes huan yas yultica quinami quijtulo, yoje yihual unca se hual yas nechlasojlatica. Huan aquí hual nechlasojla, yoje noTajtzin quilasojlas, huan nehual niclasojlas huan nicmonextilis yihual.

<sup>22</sup> Cataya oc se imonextilini itocaya Judas, yihual amo Judas Iscariote, quilic:

—Tata, ¿quinami panúa pa tehual titechmonextilis tehuanten huan amo tía tiquinmonextilía yehuanten oc sequin pin lalticpan?

<sup>23</sup> Jesús quinanquilic:

—Sinda se lalac nechlasojla, yihual yulis ca se lajtulisli ca nehual nolajtol hual niquijtúa. Huan Dios noTajtzin quilasojlas yihual huan tehuanten tihualasi capa yihual huan tichantisi laijtic iyolo.

<sup>24</sup> Aquí hual amo nechlasojla amo yuli ca se lajtulisli ca nel nolajtol hual niquijtúa. Huan in lajtol hual anquicaquic quiman nehual annimitzilic amo unca nehual nolajtol. Unca ilajtol Dios noTajtzin hual nechtilanic ca niquic.

<sup>25</sup> Innojen lajtomes annimitzilic pin tonalijmes quiman nicataya niyul-tataya ca amhuanten.

<sup>26</sup> Ma yoje, hualas in Lalacahualtini hual anmijchicahualtis huan anmitzlaicanas, yihual in Espíritu Santo. Huan Dios noTajtzin quitilanis pan

ipampa ilahuelilitisli notoca nehual. Yihual in Espíritu Santo anmitzmaxtis mochi, huan anmitzlaijnamiqultis mochi hual annimitzilic.

<sup>27</sup> Annimitzcahua anquinpixtica mosehuilisli huan laneltocalisli, huan inon amo cayas quinami in mosehuilisli huan laneltocalisli hual anquinpías sinda anyuliaya quinami quijtulo yehuanten pin lalticpan. Amo huejcahua in mosehuilisli huan laneltocalisli hual iyaxca in lalticpan. Pampín, ma camo anmitzcocu anmoyolo, noje ma camo momajti.

<sup>28</sup> Annechcaquic annimitzilic nía nimohuica huan nimocuepas nihualas ca amhuanten. Sinda annechlasojlaya, anquiapiaya paquilisli, pampa nía ca capic Dios noTajtzin, pampa Dios noTajtzin yihual unca niman hué huan nehual amo yoje hué.

<sup>29</sup> Axan annimitzilic quiman ayamo panúa, pa yoje quiman panus, amhuanten anquineltoacas.

<sup>30</sup> Yajmo nilaquetzas miac ca amhuanten, pampa huala Satanás, yihual aqui lahueliltía pa moxtin hual amo Dios ilacames. Ma yoje, amo quipía lahuelilitisli nindeno ca nehual.

<sup>31</sup> Inon nechpanujtica pa yoje quimatisi yehuanten pin lalticpan quinami nehual niclasojla Dios noTajtzin. Huan quinami yihual noTajtzin nechmacac lajtol, jan yoje nichía. Ximoquetzacan, ma tiquisacan pa quiahuac nican.

## 15

### *Ipacholi uva huan itzmolinilisli*

<sup>1</sup> Nehual niquinami icuajmecal uva neli hual Dios quitocac. Huan Dios noTajtzin, yihual quinami iteco icuajmecal uva hual quiztía pa quichijchías.

<sup>2</sup> Mochi hual itzmolinía ca nehual in icuajmecal uva, Dios quicotona sinda amo quilalía laquilyo. Huan mochi hual itzmolinía hual quema quilalía laquilyo, iteco quichipahua, quipujpuhua pa yoje quilalis miac laquilyo.

<sup>3</sup> Axan amhuanten anunca chipahuac pan ipampa in lajtol hual annimitzilic.

<sup>4</sup> Xicayacan anyultica ca nehual annimitzlanextilijtica amhuanten. Huan xichmacahuiltican pa nehual nicayas niyultica lajtic amhuanten. Se itzmolinquil amo huil quilalía laquilyo ihuían sinda amo mocahua ca in icuajmecal uva. Huan jan yoje, amhuanten amo huil anquichía nindeno hual Dios quita cuali sinda amo ancayas anyultica ca nehual annimitzlanextilijtica.

<sup>5</sup> Nehual niquinami in icuajmecal uva, huan amhuanten in itzmolinquimes. Aquí hual caya yultica ca nehual niclanextilijtica huan jan yoje nechmacahuiltía pa niyulis lajtic yihual, yoje yihual quichías miac hual Dios quita cuali, yes quinami in icuajmecal uva hual quilalía miac laquilyo. Pampa sinda nehual amo niyultica lajtic amhuanten annimitzlanextilijtica, amhuanten amo huil anquichía nindeno hual Dios quita cuali.

<sup>6</sup> Huan sinda se lalac amo yuli ca nehual niclanextilijtica, yihual yes quinami se itzmolinquil hual huaqui. Quicotonalo huan quilasalo. Quema, quinechiculo huan quilasalo pin tixuxli huan quichichinulo.

<sup>7</sup> Sinda anyuli ca nehual annimitzlanextilijtica huan sinda anyultía ca nel nolajtomes, cuaquín xiclaflanican Dios len yes anquinequi, huan yihual annijchihulis.

<sup>8</sup> Sinda anquichía miac hual quita cuali Dios noTajtzin, cuaquín ancayas quinami se icuajmecal uva hual laqui miac. Huan yoje yesi lajtuli lajtomes niman hué inahuac Dios noTajtzin. Yoje anyes nomonextilinjmes.

<sup>9</sup> Jan quinami Dios noTajtzin nechlasojlaya, jan yoje annimitzlasojlaya. Xiyulican annehlasojlatica.

<sup>10</sup> Sinda ancayas anyultica ca nehual nolajtomes, yoje anyulis annehlasojlatica. Ancayas jan quinami nehual. Niyuli ca yihual Dios noTajtzin ilajtomes huan niyuli niclasojlatica.

<sup>11</sup> 'Innojen lajtomes annimitzilic pa yoje anquipías in paquilisli hual nel nicpía huan pa yoje anmopaquilisli yes míac huan pa anyulis antentica ca niman míac paquilisli.

<sup>12</sup> Inon nolajtol: Nicnequi pa amhuanten anmolasoilas jan quinami nehual amo nimocahua pa annimitzlasojlas.

<sup>13</sup> Sinda se miqui pa yehuanten hual quinlasojla pa yoje yehuanten mocahuasi yulticate, cuaquín amo unca oc se lasojlalisli hué quinami inon.

<sup>14</sup> Amhuanten anunca yehuanten hual niquinlasojla sinda anyuli anquichijtica quinami quijtulo innojen lajtomes hual annimitzilía.

<sup>15</sup> Yajmo annimitzilía amhuanten anunca notequipanujquimes, pampa amo quimati je tequipanujquil leca quichía iteco len yes quichía. Axcan, annimitzilía amhuanten anunca hual annimitzlasojla pampa annimitzlamachiltic mochi hual nijcaquic nechilic Dios noTajtzin.

<sup>16</sup> Amhuanten amo anquilalic pa amochías nomonextiliniyimes. Cataya pampa nehual annimitzljaltulic amhuanten. Huan annimitzljaltulic pa anyulis anquinmantica lacames pa nechneltocasi huan pa anquitequipanuilis Dios ca mochi hual unca quinami yihual quita cuali. Yoje anyes quinami icuajmecal uva hual quilalía ilaquilyo hual amo lamis huejcahuas, pampa yehuanten hual nechneltovalo yalo yulilo ca nehual. Noje annimitzljaltulic pa yoje Dios noTajtzin anmitzmacas len yes anquilajlanis pan ipampa notoca ilahuelilitlisli.

<sup>17</sup> Inon annimitzilijtica pa anquichías, pa yoje anmolasoilas se huan oc se.

*Yehuanten pin lalticpan quincocolilo Jesús huan yehuanten hual quineltovalo*

<sup>18</sup> 'Sinda yehuanten pin lalticpan amo quinequilo anmitzitalo, cuaquinon anquimati pampa yehuanten amo quinequiloaya nechitalo nehual nepa capa ayamo pehuaje anmitzcocolije amhuanten.

<sup>19</sup> Sinda ancataya quinami yehuanten pin lalticpan hual amo nechneltovalo, cuaquín yehuanten anmitzitaloaya lajlasojli lacames ca yehuanten, pampa anyesquiaya quinami yehuanten. Ma yoje, amhuanten amo inminyaxca yehuanten pin lalticpan hual amo nechneltovalo. Nehual annimitzljaltulic pa anquincahuas yehuanten. Yoje amo quinequilo anmitzitalo.

<sup>20</sup> Xiquijnamiquican in hual annimitzilic: "Se tequipanujquil san huil ajsis yes hué quinami iteco unca hué. Amo huil quipanahuía yoje in hué hual unca iteco." Pampín, quinami nejchihuiliye nehual anmoteco, yoje anmijchihuili. Nechtotocaje pa nejchihuiliilosquiaya tetzcuinuc. Noje anmitztojtocasi pa anmijchihuili tetzcuinuc. Sinda yuliloaya ca nel nolajtol hual niquijtua, cuaquín yulisi ca amhuanten anmolajtol hual anquijtua, pampa anquijtua jan quinami nehual.

<sup>21</sup> Huan mochi inon anmijchihuili pampa annehnelto, pampa amo quiximatilo Dios hual nechtilanic.

<sup>22</sup> 'Sinda amo nihualaya pa nilajtusquiaya ca yehuanten, yoje amo quipialoaya laijlaculisli. Huan axan amo huil mocahualo amo quipixticate laijlaculisli pampa nihualac huan ma yoje amo nechneltovalo. Inon inmin-laijlaculisli.

<sup>23</sup> Aquí hual nechcocolía, yihual noje quicocolía Dios noTajtzin.

<sup>24</sup> Sinda nehual amo niqinchihuaya capa yehuanten innojen hual amo quiman quinchihuaya oc se, cuaquín yehuanten amo quipialoaya laijlaculisi. Axan quinmitaje len niqinchíac, huan yoje quimatije pampa neli nicpía ilahuelilitisli noTajtzin. Yihual quinchía innojen pan nopampa. Ma yoje amo mocahualo pa nechcocolisi nehual huan amo mocahualo pa quicocolisi Dios noTajtzin.

<sup>25</sup> Huan inon panujtica pa yoje panus mochi quinami unca lajcuiluli pa yehuanten inminlajtol hual noje unca Dios ilajtol, quijtúa: “Yehuanten amo mocahuaje pa nechcocolisi, mas que amo cataya nindeno calica huil nechmotexpahuilije.”

<sup>26</sup> “Ma yoje, amo huejcahuas pa hualas in Lalacahualtini hual anmitzlaicanas huan anmijchicahualtis. Yihual annimitztilanis pa quisas capa unca Dios noTajtzin. Yihual in Espíritu hual jan quijtúa len melahuac san. Yihual quisa capa unca noTajtzin Dios. In tonali hual yihual hualas, yihual lajtus neli nonahuac nehual.”

<sup>27</sup> Huan amhuanten anlajtus neli nonahuac nehual pampa ca nehual anunca amhuanten quiman nipehuaya nicchía Dios itequipanulisli huan pa axan.

## 16

<sup>1</sup> Innojen lajtomes annimitzilic pa yoje amo anmocahuas pa annechneltocas pa in tonalijmes hual anmijchihuilisi amo cuali pampa annechneltoca.

<sup>2</sup> Anmitzquixtisi pin tiopajmes. Quema, huan ajsi in tonali hual aqui yes anmitzmictis quijtus yihual quichijtica len lachihualisli pa Dios.

<sup>3</sup> Huan quinchihuasi innojen pampa amo quiman quiximatic Dios noTajtzin huan amo quiman nechiximatic nehual.

<sup>4</sup> Ma yoje, annimitzilic innojen lajtomes, pa yoje pa in tonalijmes hual ajsisi, huan anmitzpanus inon, cuaquín anquinmijnamiquis quinami annimitzilic. Unca inon hual quichía in Espíritu Santo.

<sup>5</sup> Quipía míac tonalijmes quiman nipehuac annimitzilic nolajtomes. Annimitzmaxtithualac, axan nican cate, huan ayamo annimitzilic innojen lajtomes hual axan annimitzilijtica. Amo annimitzilic pampa mojmosta nícata ca amhuanten.

<sup>6</sup> Axan nía ca capic unca yihual hual nechtilanic, huan ma yoje, amo unca se ca amhuanten hual nechlajlanía, quil, ¿ca capic tía?

<sup>7</sup> Huan anmitzcocúa míac anmoyolo pampa annimitzilic innojen lajtomes.

<sup>8</sup> Ma yoje, annimitzilia neli pampa unca cuali pa amhuanten pa nimohuicas. Sinda amo nimohuicas, cuaquinon amo hualas ca amhuanten in Lalacahualtini. Yoje, in tonali hual nimohuicas, nictilanis in Lalacahualtini pa amhuanten.

<sup>9</sup> Huan yihual, in tonali hual hualas, quinnextilis chicahuac yehuanten pin lalticpan quinami yehuanten cate laijlaculi, quinnextilis chicahuac yehuanten inahuac nomelahualisli, huan quinnextilis chicahuac quinami Dios neli yahui quitojtoca ilaixpan yihual yehuanten hual yulilo quichijtica in hual amo cuali.

<sup>10</sup> Quinnextilis yehuanten cate laijlaculi pan ipampa quinami amo nechneltocalo.

<sup>11</sup> Quinnextilis pampa nehual nimelahuac pan ipampa quinami nehual nías ca Dios noTajtzin huan yajmo annechitas, mas que nehual nicayas nicchijtica mochi quinami Dios noTajtzin quixtoca.

<sup>12</sup> Quinnextilis quinami Dios neli yahui quitojtoca ilaixpan yihual yehuanten hual amo yulilo cuali, pan ipampa quinami axan quitojtocac

ilaixpan yihual Satanás in lili. Yihual in hué pin lalticpan hual huelitía pan yehuanten hual amo Dios ilacames.

<sup>12</sup> Niquinpía míac lajtomes pa annimitzilis hual ayamo huil anquimati len quinequilo quijtulo pampa cate lajtomes ej'etic.

<sup>13</sup> Ma yoje, in tonali hual hualas yihual in Espíritu hual quijtúa mochi hual unca melahuac, cuaquín yihual anmitznextilis mochi hual unca melahuac inahuac Dios. Huil quichía inon, pampa amo yahui lajtúa pan ipampa yihual ihuían. Cayas len yes quicaquis Dios quijtus, inon yihual quijtus. Huan anmitzlaquetzilis ca lajtol hual moxtin quimatisi len quinequi quijtúa, anmitzlaquetzilis inminahuac mochi innojen hual yahui lo panulo.

<sup>14</sup> Annejchías niman hué pampa yihual canas len niquijtúa huan anmitznextilis len quinequi quijtúa.

<sup>15</sup> Mochi hual Dios noTajtzin quipía, xicmatican pampa in noyaxca. Yoje, annimitzilic pampa yihual in Espíritu Santo cana in hual niquijtúa huan yihual anmitzilis len quinequi quijtúa.

### *Inmicnotilisli mopalas pa mochías paquilisli*

<sup>16</sup> 'Jan nadita san huan yajmo annehchitas. Huan cuaquín jan nadita san huan oc sejpa annehchitas, pampa nías ca capic unca in Tajtzin.

<sup>17</sup> Sequin ca imonextiliniymes mollije se ca oc se:

—¿Len quinequi quijtúa inon hual techilijtica? Techilía: “Jan nadita san huan amo annehchitas. Huan cuaquín annehchitas oc sejpa quiman panus jan nadita san.” Huan noje techilía unca pampa yihual yahui ca capic Dios in Tajtzin.

<sup>18</sup> ¿Len inon hual techilía: “Jan nadita san?” Amo ticmatilo len quinequi quijtúa.

<sup>19</sup> Jesús quimatic laijtic yihual quinami yehuanten quinequiloaya quila-jlanilo inahuac inon hual quinmilijtataya, huan quinmilic:

—¿Anmolajlantica amhuanten inahuac inon hual annimitzilic: “Jan nadita san huan yajmo annehchitas huan cuaquín jan nadita san huan annehchitas oc sejpa?”

<sup>20</sup> Neli, neli annimitzilía, anchocas huan anlaquetzas inahuac quinami anmitzcocúa anmoyolo. Huan yehuanten hual yulilo pin lalticpan huan amo quineltoalo Dios, jan quinami quinequi Satanás hual huelitía pin lalticpan, yehuanten quiyasi paquilisli. Quema, amhuanten anmitzcocus anmoyolo. Ma yoje, amo anmochahuas yoje. Anmpalas huan anquipías míac paquilisli.

<sup>21</sup> Quiman yes se sihual lalacatiltía, mococúa pampa ajsic in tonali pa lalacatiltis. Ma yoje, quiman lacatic in xól, cuaquín in sihual yajmo quiqnamiquía mochi in lacocoltilisli. Axan paqui míac pa iyolo pampa lacatic se xól pin lalticpan.

<sup>22</sup> Huan amhuanten axan anquipía icnotilisli. Ma yoje, annimitzitas oc sejpa huan ancayas anquipixtica míac paquilisli pa anmoyolo. Huan amaqui huil anmitzquixtilía anmopaquilisli.

<sup>23</sup> 'Pan in tonali amo anquipías pa annechlajlanis nindeno inahuac ca capic nía, quinami axan annechlajlanic, pampa pan in tonali anquimatis. Neli, neli annimitzilía, sinda anquilajlanis Dios noTajtzin len yes, yihual anmitzmacas pan ipampa notoca ilahueliltilisli.

<sup>24</sup> Pa mochi tonaliymes hual nicayac ca amhuanten, ayamo anquilajlanic nindeno pan ipampa notoca ilahueliltilisli. Axan xiclaajlanican huan anquipías pa yoje ancayas ca niman míac paquilisli.

*Jesucristo quinsulahua yehuanten pin lalticpan*

<sup>25</sup> Innojen lajtomes annimitzilic ca lajtol hual amo anquimati len quinequi quijtúa. Ajsis in tonali hual yajmo annimitzilis len ca lajtol hual amo anquimati. San annimitzlaquetzilis inahuac Dios noTajtzin ca lajtol hual anquimatis neli len quinequi quijtúa.

<sup>26</sup> In tonali anlajlanis pan ipampa notoca ilahuelilitisli. Huan amo annimitzilijtica pampa nía niclajlanía Dios noTajtzin pa yihual anmitzmacas len anquilajlanis. Amo monequis pa nicchías yoje.

<sup>27</sup> Inon unca pampa yihual Dios noTajtzin anmitzlasojla. Anmitzlasojla pampa amhuanten annehclasojla huan amo anmochahua pa anquineltocas quinami nehual niquisac nepa capa unca Dios noTajtzin.

<sup>28</sup> Niquisac pa in cielo capa ticataloaya huan Dios noTajtzin, huan nihualac pin lalticpan, nican niunca. Axan nijcahua in lalticpan huan nimocuepas ca capic Dios noTajtzin.

<sup>29</sup> Imonextilinjmes quilije:

—Xiquita, axan tilaqueztica ca lajtol hual ticmatilo len quinequi quijtúa. Amo tilajtutica ca lajtol hual amo ticmatilo.

<sup>30</sup> Axan ticmatilo tehual ticmati mochi, huan amo monequi pa se mitzljajlanis len, pampa ticmati len yes quinequi mitzljajlanía quiman ayamo mitzljajlanic. Pan ipampa inon, ticneltocalo tehual tiquisac pin cielo nepa capa mitztilanic Dios.

<sup>31</sup> Jesús quinnanquilic:

—¿Axan anlaneltoaca?

<sup>32</sup> Xiquitacan. Ajsitica, quema, axan ajsic in tonali hual ancayas lasem-anali mochi sejse pa ichan, annehcahuas nohuían. Ma yoje amo niunca nohuían, pampa unca ca nehual Dios noTajtzin.

<sup>33</sup> Innojen lajtomes annimitzilic, huan mocahualo ca amhuanten, pa yoje pan nopampa amo anquipías pa anmomajtis. Nican pin lalticpan anpanus mochi hual anmitzcocoltis. Ma yoje xicpiacan miac paquilisli. Nehual niquinsulahuac yehuanten hual iyaxca in lalticpan hual quinequillosquiaya anmitzlamilo. Quema, axan niquinsulahuac yehuanten.

## 17

*Jesús quilajlanía Dios pa imonextilinjmes*

<sup>1</sup> Ca innojen lajtomes, Jesús laquisac laquetzac ca imonextilinjmes. Cuaquinon lachíac pa in cielo (ilhuicac) huan quilic:

—Tata, axan ajsitihualac in hual yahuiaya huala. Xijchía niman hué nehual moxolol, pa yoje nehual moxolol huil nimijchía niman hué. Nicnextic quinami tiunca niman hué pan ipampa quinami niquinmacas moyulilisli hual amo quiman lamis.

<sup>2</sup> Niquinmacas moxtin yehuanten hual tichmacac pa yesi nomonextilinjmes. In nicchías pan ipampa quinami tichmacac lahuelilitisli ca moxtin pin lalticpan.

<sup>3</sup> Huan sinda mitziximatilo tehual in se Dios, amo unca oc se, tehual in Dios melahuac, huan sinda nechiximatilo nehual Jesucristo hual tichtilanic pan lalticpan, cuaquinon yoje quipialo moyulilisli hual amo quiman lamis.

<sup>4</sup> Niclamachiltic nican pan lalticpan quinami tehual tiunca niman hué pan ipampa quinami niclamic nicchíac in motequipanulisli hual tichmacac pa nicchías.

<sup>5</sup> Huan axan, Tata, xiclamachilti quinami niunca niman hué quiman nicayas oc sejpa monahuac, pa yoje nicayas lachihuali niman hué, jan quinami nicanani quiman huan tehual ticatanijme huan ayamo pehuac in lalticpan.

<sup>6</sup> Niqinnextilic quinami tehual tiunca noTajtzin, inon niqinnextilic yehuanten hual tichmacac pa yesi nomonextilinijmes. Tiqinlajtultic, calaloaya ca yehuanten pin lalticpan. Yehuanten yeje moyaxca tehual, huan tichmacac yehuanten huan yalo yultialo lachijticate quinami tiqijitúa.

<sup>7</sup> Axan quimatilo mochi len yes tichmacac nehual, huan inon moyaxca tehual.

<sup>8</sup> Inon quimatilo, pampa in lajtol hual tichmacac, inon niqinmilic. Huan quineltoaje in hual niqinmilic, huan quimatije neli pampa nehual nihualac niquistataya capa tehual. Huan quineltoaje pampa tehual tichtilanic.

<sup>9</sup> Nimitzljalanía pa tehual tiqinlachilis. Amo nimitzljaltica in pa yehuanten pin lalticpan axan. San nimitzljaltica inon pa yehuanten hual tichmacac pa yesi tolacames, pampa yehuanten cate molacames tehual.

<sup>10</sup> Huan mochi hual noyaxca, noje unca moyaxca, huan mochi hual unca moyaxca, noje in noyaxca. Huan yehuanten quinlamachiltije nochichualisli niman hué huan nolaixpelalisli cualtichin. Huan yalo quinlamachiltialo, huil moita inon pan ipampa quinami yulilo.

<sup>11</sup> Nehual yajmo nicayas pin lalticpan. Yehuanten cate pin lalticpan, huan nía nihuala capa tehual. Tata, ma ye lamachiltili quinami unca niman hué motoca. Xiquinmiztia yehuanten pa cayasi quinami tehual motoca quinnextilia quinami monequi pa yulisi yehuanten hual moyaxca. Huan tehual tichtocayaltic quinami tehual timotoca. Yoje, pampa inon yehuanten yesi se san, jan quinami tehual huan nehual ticcate se.

<sup>12</sup> Innojen tonalijmes hual nicanataya ca yehuanten, niqintzacuiliaya pa camo mopolulosquiaya. Niqintzacuiliaya pan ipampa motoca ilahueliltisli, yehuanten hual tichmacac pa yesi nolacames. Niqinlachiliaya pa camo mopolulosquiaya, huan yehuanten amo nicmacahuiltic pa Satanás quinpolehuiltis. Jan in se hual quiipiaya pa polehuis pa camo quiman quisas pin ipolehuilisi, yihual nicmacahuiltic pa quipolehuiltis Satanás. Inon quipanuc pa yoje panus quinami unca lajcuiluli molajtol.

<sup>13</sup> Huan axan nía nihuala capa tehual. Huan innojen lajtomes nimitzilijtica nican quiman ayamo niquisac pin lalticpan, pa yoje yehuanten mocahuasi ca niman mías paquilisli pa inminyolo, quipixticcate nopaquilisli.

<sup>14</sup> Niqinmacac molajtol. Huan yehuanten hual yulilo quichijticcate quinami quixtoca Satanás hual huelitia pin lalticpan, yehuanten quincocolilo nomonextilinijmes. Unca pampa nomonextilinijmes amo yulilo quineccate lachihualo quinami yehuanten pin lalticpan, jan quinami nehual amo nilachía quinami yehuanten pin lalticpan.

<sup>15</sup> Amo nimitzljaltica pa tehual tiqinquixtis pa camo cayasi ca yehuanten hual amo quinequilo yulilo quinami quijtúa molajtol. Nimitzljaltica pa tiqinmitas pa camo quinsulahuas Satanás.

<sup>16</sup> Yehuanten amo iyaxca in lalticpan capa Satanás huelitia inminpan moxtin, jan quinami nehual amo niunca iyaxca in lalticpan.

<sup>17</sup> Xiclali pa yulisi quineccate yulilo quinami tiquita cuali tehual, amo quinami quijtusi yehuanten pin lalticpan. Huan xiquinchihuili inon pan ipampa in hual unca melahuac. Tehual molajtol, in hual unca melahuac.

<sup>18</sup> Huan jan quinami tehual tichtilanic nehual nican pin lalticpan, jan yoje nehual niqintilanic yehuanten pa yasi pa mochi in lalticpan.

<sup>19</sup> Huan pa mochi quisas cuali pa yehuanten, nehual nimolalía pa nimiquis, inon nicchía pampa unca quinami ticnequi tehual. Inon nicchía pa jan yoje yehuanten yesi lalalili pa yulisi quichijitcate quinami tehual ticnequi. Quichihuasi inon pan ipampa molajtol melahuac.

<sup>20</sup> Ma yoje, amo nimitzljlantica pa tiquinchiuilis mochi inon jan pa innojen nomonextiliniymes san. Nimitzljlantica noje pa tiquinchiuilis inon yehuanten hual yalo necheltocalo pan ipampa quinami innojen nomonextiliniymes quinmilisi yehuanten nonahuac nehual.

<sup>21</sup> Nimitzljlantica pa tiquinchiuilis inon pa yoje yehuanten moxtin cayasi ca se laijnamiquilisli. Cayasi jan quinami tehual, Tata, tiunca ca nehual huan nehual niunca ca tehual, huan ticate ca se laijnamiquilisli. Yoje yehuanten cayasi ca tehuanten ca se laijnamiquilisli. Yoje quineltocasi yehuanten pin lalticpan pampa tehual tichtilanic.

<sup>22</sup> Huan jan quinami tehual ca jan nadita san tía tilanextía quinami nehual niunca niman hué, jan yoje nehual nía niquinchía yehuanten niman hué ca inon calica tía tijchía nehual niman hué. Inon pa yoje cayasi ca se laijnamiquilisli, jan quinami tehual huan nehual ticate ca se laijnamiquilisli.

<sup>23</sup> Nehual niyultica lajitic ca yehuanten, huan tehual tiyultica lajitic ca nehual, pa yoje yehuanten cayasi yulticate moxtin ca se laijnamiquilisli quinami tehual ticnequi pa yulisi. Yoje quimatisi yehuanten pin lalticpan pampa tehual tichtilanic ca niquic. Quimatisi pampa tehual tiquinlasojlac jan quinami tehual tichlasojla nehual.

<sup>24</sup> Tata, nicnequi pa yehuanten noje hual tehual tichmacac cayasi capa nehual nicayas, pa yoje quitasi quinami tehual tijchíac nehual niman hué ca mochicahualisli huan molaixpelalisli niman cualtichin. Inon tichmacac pampa amo timocahua pa tichlasojlas quinami tichlasojlaya quiman ayamo yec lachihuali in lalticpan huan pa axan.

<sup>25</sup> Ah, Tata, tehual ticchía mochi cuali huan melahuac. Yehuanten pin lalticpan amo mitziximatije. Ma yoje, nehual nimitziximatic. Huan innojen nican quimatilo pampa tehual tichtilanic.

<sup>26</sup> Huan nehual niquinnexilic quinami tiunca pa yoje mitziximatisi. Huan amo nimocahuas pa niquinlamachiltis inon, pa yoje yehuanten quimatisi lalasojlasi jan quinami tehual tichlasojla, huan pa yoje nehual nicayas pa lajitic yehuanten inminyolo.

## 18

### *Quiquitzquilo Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Quiman Jesús lamic quilic Dios inon, uyajtíac ca imonextiliniymes, quipanahuije in atenco itoca Cedrón. Ca yoje (analco) in atenco cataya se cuajtilan ca cuahuimes hual ilaquilyo yec olivos. Nepa calaquic Jesús ca imonextiliniymes.

<sup>2</sup> Judas yahuiaya quitemaca Jesús ca yehuanten hual yahuiiloaya latilaniilo pa yesquiaya lamictili. Yihual noje quimatiaya capa cataya in cuajtilan. Sejpa huan oc sejpa Jesús huan imonextiliniymes monechiculoaya umpa. Pampín Judas quimatiaya capa cataya.

<sup>3</sup> Yoje yihual quinmanac míac guaches huan piscales hual in tiopistas huejué huan in fariseos quintilanije, quinlaicantiahuiaya ca umpic. Moxtin quinpialoaya calica molahuilosquiaya huan cuajtzitzindis lalatihuiiloaya huan ca cuahuimes huan teposlimes hual latequilo. Innojen quintequipanulo guaches pa moanalisli.



<sup>4</sup> Huan pampa Jesús quimatiaya mochi hual yahuiaya quipanu, uyac ca yehuanten, quinmilic:

—¿Aqui anquitemujtica?

<sup>5</sup> Quinanquilije:

—Jesús in nazaretco.

Quinmilic Jesús:

—Nehual niunca.

Huan Judas hual quitemacac Jesús ca yehuanten nepa noje huan yehuanten moquezataloaya.

<sup>6</sup> Yoje, quiman quinmilic Jesús: “Nehual niunca”, yehuanten molasaje pa inminteptozcon huan huetzije pan lali.

<sup>7</sup> Oc sejpá Jesús quinlajlanic:

—¿Aqui anquitemujtica?

Huan quilije:

—Jesús in nazaretco.

<sup>8</sup> Jesús quinnanquilic:

—Annimitzilic nehual niunca. Sinda nehual annechtemujtica, cuaquín xiquinmacahuiltican pa yasi innojen lacames hual cate ca nehual.

<sup>9</sup> Inon quinmilic Jesús pa yoje panus jan quinami yihual quilic Dios: “Amo niquinpoluc amaqui ca yehuanten hual fichmacac pa nechnehtocasi. Quema, amo nicpoluc se.”

<sup>10</sup> Cuaquinon Simón Pedro hual quipiác se teposli latequi quiquixtic huan quítecuac se itequipanujquil in tiopista hué, quicotonilic inacas, cataya inacas pa ima cuali. In tequipanujquil itocaya Malco.

<sup>11</sup> Jesús quilic Pedro:

—Xicajcoqui moteposli pa capa tijquixtic. Inon hual nechpanujtica unca in hual quinequi Dios noTajtzin pa nechpanus. ¿Tiquijtúa nehual amo nía nicmacahuiltía pa nechpanus mas que yes quinami chichic pa nehual?

### *Jesús ilaixpan in tiopista hué*

(Mt. 26:57-58; Mr. 14:53-54; Lc. 22:54)

<sup>12</sup> Cuaquinon quiquitziquije Jesús in guaches huan inminlaicanani huan inminpiscasales in judíos huejué, quilpije.

<sup>13</sup> Pehuaje quihuicaje jan axcan capa cataya Anás, yihual itajtzin isihua Caifás huan Caifás yec in tiopista hué pa in xihuil.

<sup>14</sup> Huan cataya yihual in Caifás hual quinmacac lajtol inminhuejueyenten in judíos pa canas se lalacal san pa miquis pa moxtin yehuanten.

### *Pedro quijtúa pampa amo quiximati Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Huan Simón Pedro quitocac Jesús huan noje oc se imonextilini quitocac. In tiopista hué quiximatiaya in oc se monextilini. Pampa inon yihual calaquic pa ilajcotiyan in tiopista hué ichan, capa cataya Jesús.

<sup>16</sup> Mocahuac Pedro moquezataya pa in lalapujquil pa quiahuac. Cuaquín quisac in oc se monextilini hual quiximatiaya in tiopista hué, huan quilic in tequipanujquil sihual hual quilachiliaya in lalapujquil pa quimacahuiltis pa calaquis Pedro. Cuaquinon in monextilini quihuicac Pedro pa calijtic.

<sup>17</sup> In sihual hual quilachilijtataya in lalapujquil quilic Pedro:

—Tehual noje, ¿tíunca se imonextilini in lalacal Jesús?

Yihual quilic:

—Amo niunca imonextilini.

<sup>18</sup> Nepa moquezatataloaya itequipanujquimes in tiopista hué huan in piscales. Quipitzaje se tixuxli pampa quitaloaya sehua huan quiyahualuloaya itenco moutzcutataloaya. Huan noje moquezataya Pedro nepa moutzcutataya.

*In tiopista hué quilajlanía chichahuac Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Cuaquinon in tiopista hué quilajlanic Jesús pa quinpuhuilisquiaya inminahuac imonextiliniymes huan len quimaxtiaya.

<sup>20</sup> Jesús quinanquilic:

—Nehual nilajtuaya mojmosta inminlaixpan moxtin. Mojmosta nilamaxtiaya pin tiopajmes huan in tiopan hué huan capa yes monechiculo mochi in judíos, huan amo niqijituc nindeno ixtacayito.

<sup>21</sup> ¿Leca tichlajlantica inon? Xiquinlajlani aquinojen nechcaquiloaya in hual niquinmiliaya. Xiquita, innojen quimatilo len niquinmiliaya.

<sup>22</sup> Quilic Jesús inon, se piscal nepa moquezataya inahuac quitecuac Jesús pa iixco, quilic:

—¿Yoje ticnanquilía in tiopista hué?

<sup>23</sup> Jesús quinanquilic:

—Sinda niqijituc len amo cuali, xitechnextili quinami cataya amo cuali. Huan sinda nilajtuc cuali, ¿leca tichtecuac?

<sup>24</sup> Cuaquinon Anás quitilanic Jesús lailpili capa cataya Caifás in tiopista hué.

*Pedro quijtúa oc sejpa yihual amo quiximati Jesús*

(Mt. 26:71-75; Mr. 14:69-72; Lc. 22:58-62)

<sup>25</sup> Huan mocahuac Pedro moquezataya huan moutzcutataya. In lacames nepa quilije:

—¿Tehual noje tiunca se ca imonextiliniymes in Jesús?

Pedro islacatijtataya quinmilic:

—Amo niunca.

<sup>26</sup> Nepa cataya se icni pa oc se cali in se hual Pedro quicotonilic inacas, in se icni pa oc se cali noje yec se itequipanujquil in tiopista hué, quilic:

—¿Amo nimitzitac nepa ca yihual pin cuajtilan capa laquilo olivos?

<sup>27</sup> Oc sejpa islacatic Pedro quilijtataya pampa no. Jan ajnaxcan xahuanic se gallo.

*Jesús ilaixpan Pilato*

(Mt. 27:12, 11-14; Mr. 15:15; Lc. 23:15)

<sup>28</sup> Cuaquinon quiquixtije Jesús ilaixpan Caifás, quihuicaje ca se cali hué itocaya in Pretorio capa chantiaya in gobernador (huelitini) romano. Ca ompic quihuicaje pa yihual in gobernador quitilanisquiaya pa quimictisi Jesús. Yahuiaya lanesi in tonali. Yehuanten in judíos amo calaquiloaya pin Pretorio, pampa inminlajtol hual quinmaxtía quinami monequi pa quimolancuacuetzilisi Dios quijtúa pa yehuanten amo cayasi ca yehuanten hual amo judíos. Sinda yoje quichihualoaya, cuaquinon amo huil quicualoaya iborrego in fiesta (ilhuil) pascua. In lajtol lajcuiluli quijtúa pampa cayalosquiaya laijlaculi sinda yoje quichihualoaya.

<sup>29</sup> Pampín, quisac Pilato in gobernador (huelitini) ca yehuanten, quinmilic:

—¿Leca anmotexpahuía? ¿Len anmijchihuilic in lalac?

<sup>30</sup> Quinanquilije:

—Sinda in lalac amo quichihuaya len niman amo cuali, cuaquín amo timitztemacaloaya.

<sup>31</sup> Huan Pilato quinmilic:

—Xiquihuicacan amhuanten anmohuían huan xictilani pa iojli quinami quijjtúa anmolajtol.

In huejueyenten judíos quilije:

—In lajtol amo techmacahuiltía pa tehuanten tilatilanisi pa yes lamictili se.

<sup>32</sup> Inon quijjtuye pa yoje panus in hual yihual Jesús quijjtuc inahuac quinami yahuiaya miqui.

<sup>33</sup> Cuaquín Pilato calaquic oc sejpa pin Pretorio calijtic, lanotzac pa hualas Jesús ilaixpan, quilic:

—¿Tehual inminhué in judíos?

<sup>34</sup> Jesús quinanquilic:

—¿Tichlajlantica inon pampa tiquijjtúa yoje? O ¿tehual mitzilije inon non-ahuac nehual oc sequin lacames?

<sup>35</sup> Pilato quinanquilic:

—¿Quinami huil nicmati inon nehual? Nehual amo nijudío. Cataloaya in lacames pa molali tehual huan in tiopistas huejué hual nechtemacaje tehual. ¿Len ticchíac? ¿Leca mitztemacaje ca nehual?

<sup>36</sup> Jesús quinanquilic:

—Amo nilahueliltía quinami huelitilo in huejueyenten pin lalticpan pampa nehual amo nihué yoje quinami yehuanten inminhuejueyenten. Sinda yoje cataya, cuaquín moanaloya nolapalehuinijmes ca yehuanten pa camo nechtemacalosquiaya ca in judíos. Huan jan yoje, amo nechnap-atiloaya pampa amo niunca se hué quinami in huejueyenten pin lalticpan.

<sup>37</sup> Pilato quilic:

—Cuaquín, tehual tiunca se hué, ¿quema?

Jesús quinanquilic:

—Quema, tehual tiquijjtuc pampa nehual niunca se hué. Nicpía pa nilajtus neli inahuac in hual unca melahuac. Pampa inon nilacatic, pampa inon nihualac pin lalticpan. Mochi lalac hual quinequi yuli quichijtica huan quilijtica in hual melahuac, yihual yuli quinami quijjtulo nolajtomes.

<sup>38</sup> Pilato quilic:

—Neli amo huil quimati se len quinequi quijjtúa in lajtol “melahuac”.

### *Quitlanilo Jesús pa miquis*

*(Mt. 27:15-31; Mr. 15:6-20; Lc. 23:13-25)*

Cuaquinon, quijjtuc inon Pilato, quisac oc sejpa pa quiahuac capa cataloaya in judíos, quinmilic:

—Amo niquitilía amo cuali nindeno hual quichíac in lalac.

<sup>39</sup> Axcán, mochi xil pan in fiestas unca lamacahuali pa amhuanten se lalac hual unca laquitzquili, aquí yes anquinequi. ¿Anquinequi pa annimitzmacahuilis anmohué amhuanten in judíos?

<sup>40</sup> Cuaquinon oc sejpa tzajtziye, quilijjtataloaya:

—¡Amo in se! ¡Xitechmacahuili Barrabás!

In Barrabás yec laxtequini.

## 19

<sup>1</sup> Cuaquinon, Pilato canac Jesús, latilanic pa quihuitequisi chichahuac ca mecames hual quitejtequije icuilaxli huan inacal.

<sup>2</sup> Huan in guaches quijjquetije len chicuenta se layahuali ca huizlimes xijxilanqui huan quilajlalije pani itzontecon, huan quilaquentije ca se nahuas morado.

<sup>3</sup> Cuaquín yajtiahuiloaya ilaixpan yihual Jesús quilijtataloaya:

—¡Ma yuli inminhué in judíos! —quilije quitecuatataloaya pa iixco.

<sup>4</sup> Huan quisac Pilato oc sejpa pa quiahuac ca yehuanten huan quinmilic:

—Xiquitacan, nijquixtis pa quiahuac ca amhuanten pa yoje anquimatis amo niquitilía ca yihual laijlaculisli nindeno hual quichíac yihual.

<sup>5</sup> Hualac pa quiahuac Jesús quipixtataya pani itzontecon in layahuali lachihuali ca huizlimes huan cataya lalaquentili ca in nahuas morado. Cuaquín Pilato quinmilic:

—¡Xiquitacan in lacal!

<sup>6</sup> Quitaje Jesús in tiopistas huejué huan innojen hual quinquipanuilije, quitzajtzilije:

—¡Xicpilu pan se cuahuil! ¡Xicpilu pan se cuahuil!

Quinmilic Pilato:

—¡Xicanacan amhuanten huan xicpilucan pan se cuahuil! Pampa nehual amo niquitilía nindeno amo cuali ca yihual.

<sup>7</sup> Quinanquilije in judíos:

—Tehuanten ticpialo se lajtol, huan quinami quijtúa in lajtol monequi pa miquis, pampa yihual quilic yihual Dios iXolol.

<sup>8</sup> Quicaquic inon, Pilato momajtic míac.

<sup>9</sup> Calaquic oc sejpa pin Pretorio itenencia, huan quilic Jesús:

—¿Capa cataya molali quiman tipejtihualaya ca niquic?

Jesús amo quinanquilic nindeno.

<sup>10</sup> Cuaquínon Pilato quilic:

—¿Quinami amo tilaquetza ca nehual? ¿Amo ticmati nehual nicpía lahuelilitlisli pa nimitzmacahuas, huan nicpía lahuelilitlisli pa nilatilanis pa mitzpilusi pan se cuahuil?

<sup>11</sup> Jesús quinanquilic:

—Amo ticpiaya lahuelilitlisli nindeno pa tijchihuilis len, sinda Dios amo mitzmacaya nepa pin cielo pa pani. Yoje, yihual hual nechtemacac ca tehual quichíac in laijlaculisli hué. Tel molaijlaculisli amo unca yoje hué.

<sup>12</sup> Pampa inon Pilato quitemuc quinami huil quimacahuac Jesús. Ma yoje, tzajtziye in judíos quilijtataloaya:

—¡Sinda ticmacahuas in se, cuaquín tehual amo tises inahuac César in hué romano! ¡Mochi lacal hual mochía se hué quinequi quiquixtilía ilahuelilitlisli César in hué niman hué!

<sup>13</sup> Quicaquic Pilato len quilije, cuaquín quihualicac Jesús pa quiahuac huan molalic pa in icpali hué capa quimacani ojli yehuanten hual quinmoxpahuilinjime. Cataya pan se tixcaltilan itocaya Tixcaltilan Aj'alastic. Ca lajtol hebreo moijtúa Gabata.

<sup>14</sup> In tonali itocaya In Tonalí Capa Mochijchihualo, cataya se itonali hué in fiesta (ilhuil) pascua. Cataya quinami lacualispan huan quinmilic Pilato in judíos:

—¡Xiquitacan anmohué!

<sup>15</sup> Yehuanten quitzajtzilije:

—¡Xiquijcuani, xiquijcuani, xicpilu pan cuahuil!

Quinlajlanic Pilato, quinmilic:

—¿Nicpilus anmohué pan cuahuil?

Quinanquilije in tiopistas huejué:

—¡Amo ticpialo oc se hué, jan César san!

16 Cuaquinon, quintemacac Pilato Jesús ca yehuanten pa yes lapiluli pan cuahuil.

*Quipilulo Jesús pan cuahuil*  
(Mt. 27:32-44; Mr. 15:21-32; Lc. 23:26-43)

17 Canaje Jesús, huan yihual quisac quimantiahuiaya icuahuil, uyaje pa se ixlahuito itocac Itzontecomal in Mijquil, in moijtúa ca hebreo Golgotá.

18 Cataya nepa capa quipiluje pani in cuahuil, huan ca yihual quinpiluje oc sequin ome pan cuahuimes, quinpiluje in yeyenten huan Jesús lajco capa yehuanten omenten.

19 Huan noje quijcuiluc Pilato se amal pa quimatisi moxtin leca quipiluje pani in cuahuil, huan quisaluc pan in cuahuil in amal hual quijtuc: "JESÚS IN NAZARETECO, INMINHUÉ IN JUDÍOS."

20 Yoje, momaxtije in amal miac judíos, pampa amo cataya huejca pa quihuac Jerusalén capa quipiluje Jesús pani in cuahuil. Huan in amal quijcuiluc ca lajtol hebreo huan ca lajtol latín huan ca lajtol griego.

21 Quitaje in amal in judíos inmintiopistas huejué, huan quilije Pilato:

—Amo xiquijcuilu "Inminhué in judíos". Xiquijcuilu pampa in se quijtuc: "Nehual niunca inminhué in judíos."

22 Quinnanquilic Pilato:

—Inon hual niquijcuiluc mocahua lajcuiluli yoje.

23 Huan in guaches nepa capa quipiluje Jesús pan in cuahuil, canaje itzotzomajli huan moxiluilije pa yehuanten nahuenten, se tzotzomajli pa se guache. Noje canaje ilaquen. Huan ilaquen cataya lajquetili mochi pa pani, amo quiapiaya lajzomali.

24 Yoje, moilije se ca oc se:

—Ma camo tictzayanacan. Ma tiquinlasacan nahui lajquntos cuajtzindi cuixtito pin lasehualoni (sombbrero), cuaquín sejse ca tehuanten tijquixtisi se lajquto amo tiqizticate quiman tijquixtisi. Huan aqui hual canas in lajquto xilancui ca in nahuenten, yihual quipias pa iyaxca in laquen.

Yoje quichihuaje pa panus quinami unca lajcuiluli pa Dios ilajtol, in Amal itoca Salmos, yoje quijtúa: "Moxiluilije ca yehuanten notzotzomajli huan quinlasaje lajcomes de cuahuil pa se quipias nolaquen pa iyaxca."

25 In guaches quichihuaje quinami quijtulo in lajtomes.

Nepa amo huejca capa cataya Jesús icuahuil moquezataloaya inantzin, huan icni sihual inantzin huan María isihua Cleofas, huan María hual quisac pin caltilan Magdala.

26 Jesús quitac inantzin huan quitac imonextilini hual quilasojlac nepa moquezataya. Cuaquín quilic inantzin:

—Nana, xiquita. Axan yihual moxól.

27 Cuaquín quilic imonextilini:

—Xiquita. Axan yihual monantzin.

Huan pa in tonali in monextilini quihuicac Jesús inantzin pa ichan pa mocahuas chantitica ca yihual.

*Jesús miqui*  
(Mt. 27:45-56; Mr. 15:33-41; Lc. 23:44-49)

28 Panuc inon, cuaquín Jesús quimatiaya quinami mochi panuc quinami unca lajcuiluli Dios ilajtol hual quijtúa quinami yahuiaya panu. Huan quilic: —Niamictica.

<sup>29</sup> Nepa cataya se tapalcal tentataya ca iayo uva xocuc. Yoje quitechcuniltije se pochinquil ca in iayo uva xuc, quilalije pan se acal itoca hisopo, cajoquiye huan quilalije pa icamac pa quipachichinasquiaya.

<sup>30</sup> Cunic in iayo uva xocuc, Jesús quiytuc:

—Axan nilamic nicchíac mochi hual nicpiaya pa nicchías.

Huan quipiluc itzontecon huan quimacahuilic pa quisasquiaya iyulilisli, yoje polehuic.

### *Se guache quilapúa Jesús ilanasticali ca se latzopinijquil*

<sup>31</sup> Mostatica yahuiaya caya itonali in pascua. Pampín, in tonali hual quipiluje Jesús pani in cuahuil cataya in tonali capa in judíos mochijchihualoaya pa in pascua. Huan in huejueyenten judíos amo quinequiloaya pa mocahualosquiaya in lacames pilujtataloaya pani in cuahuimes pan in tonali pascua quiman mosehuilo, pampa in tonali yec se tonali hué. Pampa inon, in huejueyenten judíos quilajlanije Pilato pa yihual latilanisquiaya pa in guaches quinpostequililosquiaya inmicxihuaajmes yehuanten pan in cuahuimes, pa yoje miqulosquiaya huan yoje huil quinmijcuanilosquiaya in mijquimes.

<sup>32</sup> Cuaquín uyaje in guaches quinpostequilije inmicxihuaajmes in se hual pilujtataya pa Jesús ima cuali huan in oc se pa ima amo cuali hual ca yihual pilujtataloaya. Yoje amo huil motzanuije huan pampín polehuiloaya.

<sup>33</sup> Cuaquinon, ajsije capa Jesús, huan quinami quitaje pampa yihual polehuic, pampín amo quipostequilije icxihuaajmes.

<sup>34</sup> Ma yoje, se ca in guaches quicoyunic ilanasticali Jesús ca se latzopinijquil, huan jan ajnaxcan quisac esli huan al.

<sup>35</sup> Huan yihual hual quitac inon quiman panuc quiytúa neli pampa inon panuc, huan in hual yihual quiytúa unca melahuac, huan yihual quimati pampa neli quiytúa, pa yoje amhuanten noje anquineltocas.

<sup>36</sup> Panuje innojen pa yoje panusi quinami Dios ilajtol lajcuiluli quiytúa: “Amo quipostequisi se iumil in huendi.”

<sup>37</sup> Huan amo inon san. Pa oc se iamal Dios ilajtol lajcuiluli quiytúa: “Mocahuasi quizticate yihual hual quitzopinije ca in teposli.”

### *Quilalilo Jesús imijquil pa se ostul* (Mt. 27:57-61; Mr. 15:42-47; Lc. 23:50-56)

<sup>38</sup> Panuje mochi inon, hualaya José hual yuliaya pin caltilan Arimatéa. Yihual yec se imonextilini Jesús. Ma yoje, momajtiaya inminlaixpan in judíos, huan pampa inon amo quimacahuilatiya pa quimatisquiaya inon amaqui. Huan in José quilajlanic Pilato pa quimacahuilic pa quihuicas Jesús imijquil. Yoje Pilato quimacahuilic. Cuaquinon José uyac quihuicac.

<sup>39</sup> Huan yihual hualaje noje Nicodemo, yihual in se hual quimaniyan hualac quitac Jesús pa layúa. In Nicodemo quihualicac ca yihual len laniluli lachihuali ca mirra huan áloes hual ajuíac, cataya quinami treinta kilos.

<sup>40</sup> Canaje Jesús imijquil, quiliaruje ca tzotzomajli lachihuali ca lino, quitehcuniltijtataloaya ca in altzindi lachihuali ca mirra huan áloes. Yoje unca quinami quichijchihuililo in judíos se mijquil quiman yes yalo quilalilo pin cueva (ostul) capa quilalpachulo.

<sup>41</sup> Huan cataya nepa amo huejca capa quipiluje pan in cuahuil se lajcotiyan latzacuali, huan pin lajcotiyan cataya se cueva (ostul) yancuic capa ayamo quiman quilalije se mijquil.

<sup>42</sup> Huan pampa cataya in tonali hual mochijchihualo in judíos pa in oc se tonali quiman quipialoaya pa mosehuisi, nepa quilalije in mijquil Jesús pampa amo cataya huejca in cueva (ostul).

## 20

### *Jesús yuli oc sejpa*

(Mt. 28:1-10; Mr. 16:18; Lc. 24:1-12)

<sup>1</sup> Cuaquinon, panuje in tonalijmes. Cataya laxpoyahuita pa in tonali hual quipehualtía in ocho tonalijmes. Laticumac, ayamo lanesiaya, huan hualaya pa in cueva (ostul) María hual chantini pa Magdala, huan quitac quinami cataya laijcuanili in tel hual quitzactataya in cueva.

<sup>2</sup> Jan axcan molalujtíac capa cataloaya Simón Pedro huan in oc se monextilini hual Jesús quinequiaya, quinmilic:

—Quiquixtilije in Tata pin cueva capa quilalpachuje, huan amo ticmatilo capa quilalije.

<sup>3</sup> Cuaquín quisaje Pedro huan in oc se monextilini, uyajtiquisaje pa in cueva (ostul).

<sup>4</sup> Molalujtiahuloaya in omenten, huan in oc se monextilini molaluaya ca mochi ichichualisli. Amo molalujtiahuiaya Pedro quinami yihual. Pampín, yihual ajsic ihuían capa cataya in cueva (ostul).

<sup>5</sup> Ajsic yihual, mopachuc, quitac in tzotzomajli lastataya, ma yoje amo calaquic laijtíc.

<sup>6</sup> Cuaquín ajsic noje Simón Pedro quitocatihualaya huan calaquic laijtíc in cueva (ostul). Quitac in tzotzomajli lastataya iliarujtataya.

<sup>7</sup> Huan in tzotzomajli hual quiliaruje pa Jesús itzontecon amo lastataya ca in oc sequin tzotzomajli, lastataya iliarujtataya ihuían.

<sup>8</sup> Cuaquinon, calaquic in oc se monextilini hual ajsic quilaicantataya Pedro. Yihual calaquic in ostul (cueva) laijtíc huan quitac mochi huan quineltocac pampa Jesús yajmo cataya nepa.

<sup>9</sup> Yoje quineltocac pampa ayamo quimatiloaya len quinequiaya quiitu Dios ilajtol lajcuiluli hual quijtúa pampa Jesús quiapiaya pa yulisquiaya oc sejpa mas que miquic huan cataya ca in mijquimes.

<sup>10</sup> Yoje, mohuicaje in monextiliniymes ca capic chantitataloaya.

### *Jesús nesi ca María in magdalena*

(Mr. 16:9-11)

<sup>11</sup> Huan María moquetzaya pa in cueva (ostul) pa quiahuac, chocatataya. Huan quinami chocaya, mopachuc pa quitasquiaya pa in ostul laijtíc.

<sup>12</sup> Huan nepa quinmitac ome ilanahuatinijmes in cielo lalaquentili ca tzotzomajli iztatataya, molalijtataloaya se pa capa catani Jesús itzontecon huan se capa catanijme icxihujmes, pani capa catani lastataya Jesús imijquil.

<sup>13</sup> Huan yehuanten quilije:

—Nito, ¿leca tichocatíca?

Quinmilic:

—Pampa quijcuanije noTeco huan amo nicmati capa quilalije.

<sup>14</sup> Quinmilic inon, momalinac huan pa itepotzcon quitac Jesús moquetzatataya. Ma yoje, amo quimatiaya cataya Jesús.

<sup>15</sup> Huan Jesús quilic:

—Nito, ¿leca tichocatíca? ¿Aqui tictemujtica?

María quiituaya pampa yihual yec in lalac hual quiztinemiaya in laj-cotiyán, huan quilic:

—Tata, sinda tel tiqui huicac, xichili capa ticlalic huan nehual nicuicatías.

<sup>16</sup> Huan Jesús quilic:

—María.

Huan yihual momalinac, quilic ca lajtol hebreo:

—¡Rabboni! —hual quinequí quijtúa ¡Lamaxtini!

<sup>17</sup> Jesús quilic:

—Amo xicaya tichquitzquitica, pampa ayamo nilejuc capa unca noTajtzin. Axcan, xía capa cate nocnían, xiquinmili pampa nilejuc pan cielo capa unca noTajtzin huan anmoTajtzin huan capa unca noDios huan anmoDios.

<sup>18</sup> Cuaquinon uyajtiquisac María in magdalena pa quinlamachiltis in monextiliniymes, quinmilic:

—¡Nel niqitac in Tata! —huan quinmilic pampa yihual quilic innojen lajtomes.

*Jesús nesi capa cate in monextiliniymes*

(Mt. 28:16-20; Mr. 16:14-18; Lc. 24:36-49)

<sup>19</sup> Huan cataya tiolac pa in tonali, in tonali hual quinpehualtía in chicue tonaliymes, huan in monextiliniymes quipialoaya tzactataya in calijtic capa cataloaya pampa momajtiloaya. Quijtuloaya cuajnesi in judíos quinmitalosquiaya. Jesús nesi huan moquetzac lajco capa yehuanten, quinmilic:

—Ma Dios anmitzmaca mochi hual cuali huan ma anmijchihuili mochi hual cuali.

<sup>20</sup> Huan quinmilic inon, quinnextilic imajmajuan huan ilanasticali. Yoje quipialoaya míac paquilisli in monextiliniymes pampa quitaloaya Jesús.

<sup>21</sup> Huan quinmilic yehuanten Jesús oc sejpa:

—Ma Dios anmitzmaca mochi hual cuali huan ma anmijchihuili mochi hual cuali. Quinami in Tata Dios nechtilanic, jan yoje nehual annimitztilanía amhuanten.

<sup>22</sup> Quiman quinmilic inon, quimacahuiltic pa iijyul quisac inminpan, quinmilijtataya:

—Xicpiacan yoje in Espíritu Santo.

<sup>23</sup> Sinda anquinmilía aquinojen yesi pampa cate lapujpuhuali inminlajlaculisli, unca pampa Dios quijtuc pampa cate lapujpuhuali. Huan sinda anquinmilía aquinojen yesi pampa amo cate lapujpuhuali inminlajlaculisli, unca pampa Dios quijtuc pampa amo cate lapujpuhuali.

*Tomás quita in Tata yultica oc sejpa*

<sup>24</sup> Ma yoje, Tomás, se ca in doce monextiliniymes (yihual yec in se ca yehuanten hual quintocayaltije “Seinomenten”), amo cataya ca yehuanten nepa quiman hualac Jesús.

<sup>25</sup> Pampín, in oc sequin monextiliniymes quilije:

—Tiquitaje in Tata.

Huan Tomás quinmilic:

—Sinda amo niqita pa imajmajuan capa quicoyunilije in teposli huan sinda amo niclalis noma capa quitzopinic pa ilanasticali, cuaquín amo quiman nicneltocas yihual yultica oc sejpa.

<sup>26</sup> Cuaquinon panuje chicue tonaliymes. Cataloaya in monextiliniymes oc sejpa calijtic, huan ca yehuanten Tomás cataya. Calaquic Jesús calijtic mas que tzactataloaya in calijtic capa cataloaya, huan moquetziquisac lajco capa yehuanten, quinmilic:

—Ma Dios anmitzmaca mochi hual cuali huan anmijchihuili mochi hual cuali.

<sup>27</sup> Cuaquín yihual quilic Tomás:



—Xiclali moxerixa nican huan xiquinmita nomajmajuan, huan xijcalacti moma pin nolanasticali. Huan amo xiye se hual amo quineltoaca, xiye se hual quineltoaca.

<sup>28</sup> Tomás quinanquilic:

—¡NoTata huan noDios!

<sup>29</sup> Jesús quilic:

—Tomás, ticneltocaya pampa tichitac. Ma quipiacan paquilisli yehuanten hual amo nechitac huan ma yoje quineltoacalo nehual niyulic oc sejsa.

### *Nican quijtúa leca cataya lajcuiluli in amal*

<sup>30</sup> Quinchíac Jesús míac oc sequin lachihualisli inminlaixpan imonextilini-jmes hual quinlamahuisultije ca lamajtilisli. Cate lachihualisli hual amo cate lajcuiluli pa in amal.

<sup>31</sup> Ma yoje, innojen hual quema, cate lajcuiluli nican, cate lajcuiluli pa yoje anquineltocas Jesús unca in Cristo hual Dios quilajtultic pa quipías Dios ilahuelilitisli. Huan cate lajcuiluli pa anquineltocas yihual Dios iXolol, cate lajcuiluli pa yoje anquipías yulilisli pan ipampa quinami anquilalilis anmolaneltoacalisli ca itoca.

## 21

### *Jesús monextía ca siete (chicome) imonextilini-jmes*

<sup>1</sup> Panuje innojen lachihualisli. Cuaquín Jesús monextilic imonextilini-jmes oc sejsa, cataya pa in al huejcalan itoca Tiberias. Huan yojqe unca quinami quinmonextilic.

<sup>2</sup> Cataloaya lanechiculi nepa Simón Pedro huan Tomás hual noje quitocayaltiloaya “Seinomenten”. Noje cataya Natanael hual yulini pin caltilan Cana pin lalticpan Galilea, huan cataloaya ixolomes Zebedeo huan oc sequin omenten imonextilini-jmes Jesús.

<sup>3</sup> Huan Simón Pedro quinmilic:

—Nehual nía niquinquitzaúa michin.

Yehuanten quilije:

—Tehuanten noje tiasi timitztocasi.

Quisaje huan calaquije pin barquito huan pa in layúa amo quiquitzquiloaya nindeno.

<sup>4</sup> Yahuiaya quisa in tonali, huan nepa xalipan cataya Jesús. Ma yoje in monextilini-jmes amo quimatiloaya yihual cataya.

<sup>5</sup> Cuaquinon Jesús quinnotzac:

—Nitos, ¿amo anquipía michin pa quicuas se?

Quinanquilije pampa amo quipialoaya.

<sup>6</sup> Huan yihual quinmilic:

—Xiclasacan xictzojuican ca ima cuali in barquito huan anquinquitzaquis.

Cuaquín quitzojuije huan jan axcan etíac ca míac michimes, amo huil quejuaje pa quilalilosquiaya in xiquipili hué pin barquito pampa quinmanaje niman míac michimes.

<sup>7</sup> Cuaquinon lajtuc in monextilini hual Jesús quinequiaya, yihual quilic Pedro:

—¡Unca in Tata!

Quicaquic Simón Pedro pampa cataya in Tata, molaquentic pampa quiquixtic ilaquen pa tequipanus. Cuaquín molasac pa al.

<sup>8</sup> In oc sequin monextilini-jmes ajsije pa xalipan pin barquito quitilanti-hualaloaya in xiquipili tentataya ca michimes. Amo cataya huejca in xalipan itenco, jan cien metros san.

<sup>9</sup> Ajsije pin xalipan, quitaje tixuxli ca ticahuandera huan michin lalalili ipan, huan noje cataya pan.

<sup>10</sup> Jesús quinmilic:

—Xiquinhualacacan sequin michimes hual anlamic anquinquitzquic.

<sup>11</sup> Huan uyac Simón Pedro, quitilanac pa xalipan in xiquipili hué tentataya ca michimes huejué, cataloaya ciento cincuenta y tres (chicomepuhualimajlaclihuanye). Huan mas que cataloaya innojen míac, ma yoje amo cotonic in xiquipili.

<sup>12</sup> Cuaquín Jesús quinmilic:

—Xihualacan xilacuacan.

Huan amaqui ca in monextilini jmes laicanac pa quilajlanis: “¿Aqui tehual?”, pampa momajtiloaya, quimatiloaya pampa yihual Jesús.

<sup>13</sup> Huan hualac Jesús, canac in pan huan quinmacac, huan in michin jan yoje quinmacac.

<sup>14</sup> Ca in, cataya sejpa huan oc sejpa ca ye lanextilisi hual Jesús monextic yultataya oc sejpa ca imonextilini jmes quiman moquetzac huan quisac capa micataya ca in mijquimes.

### *Jesús laquetza ca Simón Pedro*

<sup>15</sup> Yoje, quiman lamije lacuaje, Jesús quilic Simón Pedro:

—Simón, ti'ixól Juan, ¿tilaicana tichlasojla ca innojen oc sequin quinami nechlasojlalo?

Pedro quilic:

—Quema, Tata, ticmati nimitznequi.

Jesús quilic:

—Xiquinmita huan xiquinlacualti noborreguitos.

<sup>16</sup> Jesús quilic oc sejpa:

—Simón, ti'ixól Jonás, ¿tichlasojla nehual?

Pedro quilic:

—Quema, Tata, ticmati nimitznequi.

Jesús quilic:

—Xiquinlachili huan xiquinlacualti noborregos.

<sup>17</sup> Jesús quilic oc sejpa, huan ca in cataya ca ye lajlanilisi, quilic:

—Simón, ti'ixól Jonás, ¿tichnequi nehual?

Huan quicocuc Pedro iyolo pampa Jesús quilic ca in ye lajlanilisi: “¿Tichnequi nehual?” Huan quilic:

—Tata, ticmati mochì, ticmati nimitznequi.

Jesús quilic:

—Xiquinlachili huan xiquinlacualti noborreguitos.

<sup>18</sup> Neli, nimitzilía inon: Ticatani yancuic, timolalilini molacuejtioni, timocuejtini tehual huan tinejnemini ca capic catani ticnequini. Huan quiman tiviejojtis, tiquinxilani momajmajuan huan oc se mitzlalilis molacuejtioni huan mitzhuicas ca capic amo ticnequis tías.

<sup>19</sup> Inon quilic pa quimachiltis Pedro quinami yahuiaya miqi huan pan ipampa imiquilisi quinami yahuiaya quichihuili hué Dios. Huan lamic Jesús quilic inon, cuaquín quilic:

—Xichtoca pa tiyes nomonextilini.

### *In monextilini lalasojlali*

<sup>20</sup> Pedro momalinac, quitac in monextilini hual Jesús quilasojlaya, quinto-catataya. Yihual in monextilini hual mohuilaniaya pa ilaixpan ihuajcol Jesús

nepa capa lacuajtataloaya, yihual hual quilajlanic: “Tata, ¿aqui yihual hual yahui mitztemaca ca yehuanten hual yalo mitzmictilo?”

<sup>21</sup> Huan quiman Pedro quitac in monextilini, quilajlanic Jesús:

—Tata, huan ¿len yahui quichía nepa unca?

<sup>22</sup> Jesús quilic:

—Sinda nehual nicnequi pa yihual mocahuas nican pan lalticpan pa quiman ajsis in tonali hual nihualas oc sejpa pan lalticpan, cuaquín ¿len ticpías tehual pa tiqitas ca inon? Tehual xichtoca pa timochías nomonex-tilini.

<sup>23</sup> Yoje, ca moxtin tocnían hual quineltocalo in Tata, mosemanac in lajtol, huan pampa inon yehuanten quijtuloaya in se monextilini amo quiman yahuiaya miqui. Ma yoje, Jesús amo quilic pampa amo quiman yahuiaya miqui. San quilic: “Sinda nehual nicnequi pa yihual mocahuas nican pan lalticpan pa quiman ajsis in tonali hual nihualas oc sejpa pan lalticpan, cuaquín ¿len ticpías tehual pa tiqitas ca inon?”

<sup>24</sup> Huan in monextilini nehual niunca. Huan neli niquilía innojen lajtomes. Noje niunca in monextilini hual niquinmijcuiluc mochi innojen lajtomes. Huan ticmatilo pampa unca melahuac in lajtol hual nehual neli niquihtúa.

<sup>25</sup> Cate noje míac oc sequin lachihualisli hual Jesús quinchíac. Huan sinda quinmijcuiluloaya (quinmescribiruloaya) mochi sejse, niquihtúa pampa mochi in lalticpan amo huil cajxiltiaya mochi in amames hual quiplaloaya pa moijcuilulosquiaya (moescribirulosquiaya). Yoje ma ye.

## Inon unca hual quichihujque Jesucristo ilanahuatinijmes

### *Yahui huala in Espíritu Santo*

<sup>1</sup> Teófilo, tehual hual moxtin quimatilo mitzpililo lamajtilisli, nimitzi-  
jcuiluilia in amal nican. Pa in oc se noamal calica nicpehualtic nola-  
puhualisli, nimitzijcuiluilic inahuac mochi inon hual pehuac quichiac huan  
quimaxtic Jesús. Nicpuhuac in hual mitzmachiltic quiman pehuac huan  
quinami lachijtiahuiaya innojen xixihuil pa quiman ajsic in tonali hual  
cataya la'ajcoquili pin cielo.

<sup>2</sup> Ma yojque, pan tonalijmes quiman ayamo cataya la'ajcoquili pin cielo,  
quinmachiltic pan ipampa in Espíritu Santo yehuanten hual quinlajtultic  
pa yelosquiaya ilanahuatinijmes, quinmachiltic mochi hual quipialoaya pa  
quichihualosquiaya yehuanten.

<sup>3</sup> Quiman panuc Jesús ilacocoltilisli huan miquic, yihual yulic oc se-  
jpa. Monextic neli yultataya ca míac nesilisli ca yehuanten ilanahua-  
tinijmes huan yehuanten neli quimatiloaya pampa yuliaya. Huan pan  
cuarenta tonalijmes yojque monextitinemiaya ca yehuanten huan quinmil-  
iaya quinami Dios huelitía.

<sup>4</sup> Pan tonalijmes quiman ayamo quisac Jesús capa yehuanten, quinmilic  
pa mocahuasi pa Jerusalén, quinmilic:

—Amo ximohuicacan pa quiahuac Jerusalén. Nepa xicchiacan yihual hual  
anmitztilanilia noTajtzin. Nehual noje annimitzilic sejpa huan oc sejpa  
pampa yihual hualas.

<sup>5</sup> Juan Lacuayatequini neli lacuayatequiaya ca al. Jan yoje, amo panusi  
míac tonalijmes pejticate axcan huan anyahui ancaya lacuayatequili ca in  
Espíritu Santo. Pampa in, xicchiacan pa Jerusalén, xicchiacan in tonali hual  
hualas.

### *Jesús unca la'ajcoquili pin cielo (ilhuicac)*

<sup>6</sup> Cuaquinon, quiman ca Jesús monechiculoaya, quilajlanijque, quilijque:  
—Tata, ¿axcan tía ticmaca tolali Israel ilahueliltilisli pa huelitis ihuian pa  
tolali oc sejpa quinami cataya pa yina?

<sup>7</sup> Huan quinnanquilic Jesús, quinmilic, quil:

—Amo unca anmoyaxca pa anquimatis inon. ToTajtzin Dios, jan yihual san  
unca iyaxca huan quipía lahuellitlisli pa quilis calía tonali yahui panúa inon.

<sup>8</sup> Ma yoje, in tonali hual hualas in Espíritu Santo ca amhuanten, yihual  
anmitzmacas lahuellitlisli huan anquisas pa anquinnahuatis lacames no-  
lamaxtilisli nehual, anquinlaquetzilis inahuac inon pa Jerusalén huan pa  
mochi in lalticpan Judea huan pin lalticpan Samaria huan pa mochi in  
lalticpan ca capic unca niman huejca.

<sup>9</sup> Lamac quinmilic inon, lejcuc Jesús ca yehuanten ilanahuatinijmes  
quiztataloaya. Cuaquinon hualac se mextemil, quitzacuilic, huan yajmo  
quitajque.

<sup>10</sup> Yojque mocahualoaya lachixtataloaya pa pani pin cielo, monexti-  
tiquisajque ca yehuanten ome lacames, yehuanten cataloaya lalaquentili ca  
tzotzomajli iztac.

<sup>11</sup> Quinmilijque:

—Lacames galiletecos, ¿leca anmoca hua anlachixtica pa in cielo? In Jesús, yihual hual lejcutiác pa in cielo, hualas oc se jpa. Huan quinami anquítac la'ajcoquili, jan yojque anquitas yihual quiman temujtihuualas oc se jpa.

*Quilajtultilo Matías pa quichihuas itequipanulisli Judas*

<sup>12</sup> Cuaquinon quisaje pin lomita (tepetzindi) itoca Olivos, uyaje pa Jerusalén, amo huejca cataya, jan huejquita quinami quijtúa inminlajtol in judíos pa huil nejnemis se pan tonali quiman mosehuilo in judíos.

<sup>13</sup> Ajsije pa Jerusalén, calaquije pin cali, lejuje pa pani capa chantiloaya. Yehuanten cataloaya Pedro huan Jacobo huan Andrés huan Felipe huan Tomás huan Bartolomé huan Mateo huan Jacobo ixolol Alfeo. Noje cataya Simón, yihual se ca inminlanechiculisli lacames hual quinequinijme moanalo ca in romanos pa quinlaluxtisi pa quiahuac inminlali in judíos. Inminlanechiculisli motocani cananistas. Huan noje cataya Judas, yihual icni Jacobo.

<sup>14</sup> Yehuanten moxtin molaliloaya ca se lajtulisli pa lajlanilosquiaya Dios. Ca yehuanten cataloaya in sihuames huan María inantzin Jesucristo huan noje cataloaya nepa icnián Jesucristo.

<sup>15</sup> Innojen tonalijmes moquetzac Pedro lajco capa in laneltocanijmes, yehuanten cataloaya quinami ciento veinte (chicuasepuhuali), huan Pedro quinmili:

<sup>16</sup> —Nocnián lacames, qui piaya pa lamis mochías inon hual quijtuc in Espíritu Santo inahuac Judas. Yihual quinlaicanac yehuanten hual hualaje pa quihuicasi laipili Jesús. In Espíritu Santo technextilía inon pan ipampa in hual quijcuiluc in hué David pa yina.

<sup>17</sup> Judas yec se ca tehuanten imonextilinijmes Jesús, cataya iyaxca pa tequipanus ca tehuanten.

<sup>18</sup> Huan mocuhuilic se cuajmili ca in treinta tomin lachihuali ca plata hual quilaxlahuije Judas pa in niman amo cuali hual quichíac. Cuaquín huetzic in lalac pa itzontecon, xopunic icuerpo (inacayo) huan quistiquisaje mochi ilajtic (icuilaxcol).

<sup>19</sup> Quiman quimatijque inon yehuanten hual chantiloaya pin Jerusalén, quitocayaltijque in cuajmili Aceldama. In quinequi quijtúa iCuajmili Esli pa inminlajtol yehuanten.

<sup>20</sup> Huan yojque unca lajcuiluli inon inahuac Judas pa iamal in Salmos, quijtúa:

Ma ye lacajcahuali icali,  
huan ma camo chanti amaqui pa icalijtic.

Huan quijtúa noje:

Ma tequipanu oc se capa yihual tequipanuni.

<sup>21</sup> Pedro laqueztiahuiaya, quinmiliaya, quil:

—Pampa inon, ma tijcalactican ca tehuanten oc se lalac pa quichijtías Judas itequipanulisli. Quipiás pa yes se hual itequi ca tehuanten quitocaya Jesús.

<sup>22</sup> Quipiás pa yes se hual ca tehuanten cataya quiman tipehuaje, quiman Juan quicuayatequic Jesús. Quipiás pa yes se hual mocahuaya ca tehuanten pa in tonali quiman huitajaje Jesús la'ajcoquili pin cielo. Yoje cayas ca tehuanten oc se lalac hual huil quijtúa neli pampa Jesús yulic oc se jpa.

<sup>23</sup> Cuaquinon quinlajtultijque ome hual cataloaya ca yehuanten, se ca itoca José Barsabas, noje itocaya Justo, in oc se ca itoca Matías.

<sup>24</sup> Cuaquinon, moxtin quilajlanijque Dios, yoje quilijque, quil:

—Tata, tehual tiquinmiximati inminyolo moxtin. Xitehnextili axcan calía ca in ome lacames tehual ticlajtultic.

<sup>25</sup> Yoje, pa yihual cayas iyaxca itequipanulisli Judas. Yihual quicahuac itequipanulisli quiman quichíac in niman amo cuali. Pampín uyac ca capic cataya iyaxca pa yahuisquiaya.

<sup>26</sup> Cuaquinon quilalijque cuajtzindis lacuixtili huan quisac icuajtzindi Matías. Yojque quilajtultije Matías, huan yihual yec lanahuatini ca in oc sequin once lanahuatinijmes.

## 2

### *Huala in Espíritu Santo*

<sup>1</sup> Ajsic in tonali itoca Pentecostés, moxtin cataloaya pan se cali, lajtuloaya pa inminyolo quinami se san.

<sup>2</sup> Huan jan ajnaxcan hualajtiquisac se xahuanilisli, quisac pin cielo (ilhucac) quinami se ijyecal chicahuac. Mocaquic pa mochi in cali calijtic capa cataloaya.

<sup>3</sup> Cuaquinon nesiloaya capa yehuanten len quinami sequin tixuxlimes. Mochi sejse cataya chicuenta se inejnepil hual cataya laxifuli. Huan moxiluje mochi sejse innojen tixuxlimes, molalije sejse pan mochi sejse ca yehuanten.

<sup>4</sup> Calaquic in Espíritu Santo ca moxtin inminyolo, huan yehuanten pehuaje lajtuje ca oc sequin lajtomes quiman in Espíritu Santo quinhuellitiaya pa lajtusi.

<sup>5</sup> Innojen tonalijmes hualajque pa Jerusalén judíos hual chantiloaya pa mochi in lalimes pin lalticpan, hual axcan chantitataloaya nepa pin caltilan.

<sup>6</sup> Yehuanten quicaquiloaya inminxahuanilisli in lanahuatinijmes laquezatataloaya. Pampín monechicujtihualaloaya ca capic cataloaya in lanahuatinijmes, moitaloaya ca lamajtilisli pampa quicaquiloaya in lanahuatinijmes lajtutataloaya ca ilajtol mochi sejse hual lajtuaya pa calía yes lali capa lacatic.

<sup>7</sup> Huan momajtitihualaloaya huan moiztihualaloaya ca lamajtilisli moilij-tataloaya:

—Xiquitacan. In lacames cate moxtin galiletecos, innojen hual laquezaticate.

<sup>8</sup> ¿Quinami tiquincaticate yehuanten lajtulo tolajtol tehuanten hual tilajtulo pin lali capa tilacatiye?

<sup>9</sup> Sequin ca tehuanten tichantilo pin lali Partia, sequin tichantilo pin lali Media, oc sequin tichantilo pa Elam. Sequin ticate judíos hual tichantilo pin lali Mesopotamia huan in lalticpan Capadocia, huan pin lalticpan Ponto huan pa Asia.

<sup>10</sup> Tichantilo noje pin lalticpan Frigia huan pa Panfilia. Tichantilo pa Egipto huan cajcapa pin lali Libia nepa pa itenco in lali itoca Cirene. Sequin ca tehuanten tichantilo pin caltilan hué Roma, nican tichantiticate se ome tonalitos san.

<sup>11</sup> Sequin tilacatiye judíos, oc sequin amo tilacatiye judíos, mas que timochihuaje lacames hual ticmolancuacuetzililo Dios quinami in judíos. Sequin tichantilo pin lali Arabia. Ma yoje tiquincaticate innojen galiletecos laquezaticate ca tolajtol mochi sejse ca tehuanten, techilijticate innojen hual Dios quinchía, innojen hual techmolachialtilo ca lamajtilisli.

<sup>12</sup> Yojque molapoluloaya moxtin, amo quimatiloaya len yahuiloaya quijtulo, moililoaya se ca oc se, quil:

—¿Len yes inon?

<sup>13</sup> Huan quinhuitzquilijtinemiloaya oc sequin, quiqtuje:  
 –Yehuanten lahuanticate ca iayo uva tzopelic huan yancuic.

*Pedro quinnotza in lacalera*

<sup>14</sup> Cuaquinon moquetzac Pedro ca in once lanahuatinijmes, quinnotzac in lacalera ca lajtol chicahuac, quinmilic:

–Lacames hual anmolali unca Judea huan anmoxtin hual anchanti pa Jerusalén, xicmatican inon, xijcaquican cuali len nía annimitzilia.

<sup>15</sup> Amo lahuanticate in lacames quinami anquijtutica. Amhuanten anquimati pampa nican amo lahuanalo pa huajtzinco, huan jan ticate chic-nahui horas san pa huajtzinco.

<sup>16</sup> No, inon hual anquita panujtica unca in hual quijtuc pa yina Joel, yihual yec Dios ilajtuni. Nía annimitzilia len quijsuiluc. Quijtuc:

<sup>17</sup> Huan pin tonalijmes quiman mochijchías in lalticpan pa lamis, quijtúa quil Dios, niquinlacactilis noEspíritu ca laijtuc inminyolo moxtin.

Yoje quijtusqui nolajtomes anmoxolomes lacames huan sihuames.

In lacames yajyancuic quinmitasqui laixotocalisli hual Dios quinnexilis, huan in abuelojmes quintemiquisi lajtemijquimes.

<sup>18</sup> Quema, pa in tonali niquinlacactilis noEspíritu ca laijtuc inminyolo nola-palehuinijmes lacames huan sihuames, huan laquetzasqui nonahuac nehual.

<sup>19</sup> Huan nehual niquinchihuas pin cielo lejlen hual lamajtilo, huan nicnextis nolahuellitlisli pa latzindan pin lalticpan.

Cayasi esli huan tixuxli huan pocli tetzahuac, se popucalisli niman hué.

<sup>20</sup> Mopalas in tonali, laticumactis, mochihuas chichiltic in mesli quinami esli.

In yahui panúa quiman ca nadita ajsis in tonali quiman in Tata quinmacas ojli in lacames,

In yes se tonali hual laixpelas míac, lahuis chicahuac.

<sup>21</sup> Huan yoje cayas ca aqui yes quinnotzas itoca in Tata, yihual yes laquixtili pin ipolehuilislisli ilaijlaculisli.

Inon unca len quijtúa Dios pan ipampa ilajtuni Joel hual quijsuiluc inon.

<sup>22</sup> Cuaquinon Pedro quinmilic:

–Xijcaquican, lacames israelitos, in hual nía annimitzilia. Jesús hual yulini pin caltilan Nazaret yec se lalac hual Dios anmitznexitic pampa yihual Jesús yec lalac hual yihual Dios quitilanic. Huan yoje Dios anmitznexitic inon pan ipampa innojen hual anmitzlachialtijca ca lamajtilisli. Innojen yihual quinchíac anmoyampa amhuanten pan ipampa quinami Dios quihueliltic Jesús pa quinchías. Inon amhuanten anquimati.

<sup>23</sup> Huan yihual anquimictic pan se cuahuil pan inminpampa lacames hual amo quineltoocalo tolajtol. Inon quipanuc, pampa quiman Dios quipehualtic mochi, yihual quilalic pa quipanusquiaya, quimatic pampa yahuiaya quipanuc. Huan amhuanten anquitemacac pa quimictilosquiaya.

<sup>24</sup> Ma yoje, yihual Dios quiyuliltic, quimacahuac pa como mocahuasquiaya mictataya Jesús. In miqulislisli amo huil quisulahuac Jesús pa como yulisquiaya oc sejpá.

<sup>25</sup> Yoje lajtuc pa yina tohué David inahuac yihual Jesús, quijtuc, quil: Mojmosta niqitaya in Tata pa nolaixpan, pampa yihual nechlachilía cuali pa como nicpiás len hual nechmajtis.

<sup>26</sup> Pampa in, paqui noyolo huan quijtúa nocamac ilajtomes ca paquilisli hué, huan quema, nocuerpo yuli cantica len cuali hual nicchixtica.

<sup>27</sup> Pampa amo ticmacahuiltis pa nehual nimocahuas capa in mijquimes.

Huan amo ticmacahuiltilis pa palanis nocuerpo nehual, quema, nehual hual ticlajtultic pa nihuelitis.

<sup>28</sup> Tinechmaxtis pa nicanas in ojli capa amo nimocahuas pa niyultías, nicayas ca niman míac paquilisli quiman niunca moyampa.

Yojque quijtuc David hual yec tohué pa yina.

<sup>29</sup> Nocnían lacames, annimitzlaquetzilía inahuac tocní hué David hual yulini pa yina. Nehual huil annimitzilía ca lajtol melahuac, David in hué miquic huan quilalpachuje, tiqitalo tehuanten axcan capa quilalpachuje.

<sup>30</sup> Ma yoje, in hué David yec se ilajtuni Dios hual huil quijtuc len yahuiaya panu, pampa Dios quihueliltic. Quimatic David quinami Dios quilic in ca lajtol hual amo mopala. Quilic pampa yihual Dios yahuiaya quichía hué se imiahuil David hual yahuiaya lacati. Yahuiaya ye hué capa David huelitini.

<sup>31</sup> Huan David quimatic inon pa yina quiman ayamo panuc. Pampín lajtuc de quiman yahuiaya yuli oc sejpa yihual hual Dios quilalic pa yes tohué, quema, in Jesús hual moscaltic pa Nazaret. David quijtuc pampa amo yahuiaya ye lacajcahuali yihual capa in mijquimes, huan amo yahuiaya palani icuerpo.

<sup>32</sup> In Jesús Dios quiyuliltic oc sejpa, huan tehuanten ticate hual tiquitaje timoxtin innojen hual antimitzlaquetzilijtcate.

<sup>33</sup> Axcan, Dios quichíac in Jesús pa yes niman hué. Quilalic pa huelitis, axan unca pa ima cuali Dios pa huelitis. Noje Jesús canac ilahueliltisli Dios pa techtilanilis in Espíritu Santo. Axcan anquiztica huan anquicactica quinami lahueliltía in Espíritu Santo.

<sup>34</sup> Xiquitacan. David in hué amo lejcuc pin cielo. Ma yoje yihual ihuían quijtuc:

Dios in Tata quilic noTata:

“Ximolali pa noma cuali,

<sup>35</sup> xicaya nepa pa quiman niquinsulahuas molacocolinijmes.

Niquinneltocaltis tehual.”

<sup>36</sup> Cuaquinon Pedro quinmilic:

—Pampa inon ma quimatican inon moxtin yehuanten israelitos huan ma camo quimahuilican pampa amo melahuac: In Jesús hual amhuanten anqipiluc pan in cuahuil, yihual Dios quichía pa yihual yes in Tata huan in Cristo.

<sup>37</sup> Quicaquijque inon, quincocuc niman míac inminyolo, quinlajlanijque Pedro huan in oc sequin lanahuatinijmes, quinmilijque:

—Tocnían lacames, ¿len ticchihuasi?

<sup>38</sup> Pedro quinnanquilic:

—Xicpalacan anmoyolo pa anlajnamiquis quinami Dios quinequi, ximocuayatequican anmoxtin pa anquinextilis quinami anquineltoca in hual Dios axan technextilic inahuac Jesucristo. Yoje anquinextilis moxtin pampa yihual anmoTata. Yoje quinpuphuas anmolajlaculisli, noje anmitzmacas in Espíritu Santo pa anmoyolo.

<sup>39</sup> Dios quijtuc neli pampa yahuiaya anmijchihuili inon pa amhuanten huan pa anmoxolomes huan pa moxtin hual chantilo huejca, moxtin hual Dios toTata quinnotzas.

<sup>40</sup> Huan ca in lajtomes huan ca míac oc sequin lajtomes, Pedro quinmilic in melahualisli. Quinmilic quinami monequi pa laneltocasqui yehuanten, quinmilic:

—Ximoquixtilican pin polehuilisli capa anunca ca yehuanten hual yulilo quichijtcate amo cuali huan yalo polehuilo.



<sup>41</sup> Cuaquinon, aquinojen quinmixtocaje ilajtomes Pedro cataloaya lacuay-atequili. Huan pa in tonali miaje quinami ye mil lacames hual pehuaje quineltoaje Cristo.

<sup>42</sup> Huan monechiculoaya mojmosta pa quicaquisi len quimaxtiloaya in lanahuatinijmes. Moxtin chantiloaya quinami cataloaya inmicnían moxtin, monechiculoaya pa quicualosquiaya pan pa quiqnamiquisqui in Tata. Huan yehuanten amo quicahualoaya pa quilajlanisqui Dios mojmosta.

### *Yoje yulinijme yehuanten hual ipehuayan quineltoajque Cristo*

<sup>43</sup> Huan Dios ilahuelilitlisli quinmomajtiltic moxtin pampa quitaje miaje mochi hual Dios quichíac pan inminpampa in lanahuatinijmes. Pampa inon lachialoaya momajtitataloaya, quiztataloaya innojen hual quinextiloaya Dios ilahuelilitlisli.

<sup>44</sup> Chantiloaya monechicujticate in laneltocanjmes huan mochi hual quinpialoaya quinxiluililoaya ca moxtin in oc sequin laneltocanjmes.

<sup>45</sup> Quinamacaloaya len quipialoaya huan len inminyaxca, cuaquin quix-iluililoaya mochi sejse hual monequiaya pa quipiasquiaya len yesquiaya.

<sup>46</sup> Huan mojmosta yahuiloya sejpa huan oc sejpa pin tiopan hué pampa lajtuloaya pa inminyolo ca se lajtulisli. Quinlapanililoaya in pan quiman quicualoaya ilacualisli in Tata. Lacuajtinemiloaya pa calijtic inminalimes yehuanten, monechiculoaya pa lacualosquiaya ca paquilisli. Mocahuaya ca paquilisli mochi sejse ca iyolo, pampa quimatiloaya Cristo cataya ca yehuanten.

<sup>47</sup> Quijtuloaya lajtomes huejué pa Dios, huan moxtin in oc sequin quinmixtoaloaya. Mojmosta in Tatita quinmiactiaya yehuanten hual quinequiloaya quilalilo inminlaneltocalisli ca in Tata. Huan pehualoaya monechiculo ca yehuanten hual axan quineltoajque Cristo. Monechiculoaya ca yehuanten pampa quinequilosquiaya moquixtililo pin ipolehuilisli inminlajlaculisli.

## 3

### *Unca lapajtili se hual amo huil nejnemiaya*

<sup>1</sup> Panquisaloaya Pedro huan Juan pin tiopan hué pan ye horas pa tiolac. Cataya in hora quiman quilajlaninijme Dios.

<sup>2</sup> Cataya nepa se lalac lahualicali, amo huil nejnemiaya, yojque lacatic. Mojmosta quilalinijme ilaixpan ilalupujquil in tiopan hué, in lalapujquil itocaya Cualtichin. Nepa quilalinijme pa quinmotemachilis tomin yehuanten hual panujtataloaya pin tiopan hué.

<sup>3</sup> Quinmitac Pedro huan Juan pehualoaya calaquilo pin tiopan hué. Cuaquin quintemachic pa quimacasquiaya se tomin.

<sup>4</sup> Huan mocahuac Pedro quiztataya in lalac, noje Juan quiztataya, huan Pedro quilic:

—Xitechita.

<sup>5</sup> Huan mocahuac quinmiztataya in lalac, quichixtataya yahuiloya quimacalo len tomin yehuanten.

<sup>6</sup> Huan Pedro quilic:

—Amo nicpía tomin. Ma yoje, inon hual, quema, nicpía, in nimitzmaca: Ximoquetza huan xinejnemi pan ipampa ilahuelilitlisli Jesucristo in nazaretco.

<sup>7</sup> Cuaquinon Pedro quiquitzquic ima cuali in lalac huan cajcoquic. Jan axcan momacatiquisaje chichualisli icxihuajmes huan icayacojmes.

<sup>8</sup> Tzicuinic pani icxihuaimes, moquetzac huan pehuac nejnemic, calaquic ca yehuanten pin tiopan hué calijtic, nejnentíac huan tzicuintíac huan quijtutíac lajtomes huejué pampa Dios quipajtic.

<sup>9</sup> Huan moxtin in lalacera quitajque nejnentiahuiaya huan quijtutiahuiaya lajtomes huejué pa Dios.

<sup>10</sup> Quimatijque pampa in se yec yihual hual molalini pin tiopan hué ilalapujquil itoca Cualtichin. Quimatijque cataya in se hual motemachilini tomin. Pampa in, molapolultiloaya huan amo quimatiloaya len quijtu-losquiaya inahuac inon hual quipanuc.

*Inon unca hual Pedro quijtuc pin lasehuán (lasehuayan) huejcanic, itocaya iLanejnemijquil Salomón*

<sup>11</sup> Huan in lalac hual pajtic quinquitziya, amo quinmacahuaya Pedro huan Juan, huan in lalacera molalujtihualaloaya capa yehuanten cataloaya pin lasehuayan pa nejnemisi, itocaya iLanejnemijquil Salomón, molapolultihualaloaya míac.

<sup>12</sup> Cuaquinon quinmitac Pedro yehuanten, quinmilic:

—Lacames israelitos, ¿leca anmocahua antechiztica pampa panuc inon? ¿Leca antechiztica quinami tehuanten ticnejnemiltije in lalac pan ipampa tolahuliltilisli? ¿Leca anquijtutica pampa tehuanten ticpialo lahueliltilisli hual amo quipialo oc sequin lacames? ¿Anquijtutica pampa tehuanten tilacames hual ticchihualo míac pa yoje Dios techhuelilitis huan oc sequin lacames amo yoje míac quichihualo?

<sup>13</sup> InminDios Abraham huan Isaac huan Jacob, yihual inminDios totajtzitzián, unca yihual hual quilalilic lahueliltilisli hué pa iXolol Jesús. Huan amhuanten anquitemacac Jesús ca yehuanten hual huelitilo, huan amo anquinequiaya pa quimacahuasqui quiman cataya ilaixpan Pilato, mas que Pilato quinequiaya quimacahua.

<sup>14</sup> Amhuanten amo anquinequiaya pa yes lamacahuali Jesús in lalac hual amo yec laijlaculi, yihual hual Dios quilajtultic. No, amhuanten anquilic pa anmitzmacahuuilosquiaya se lamictini.

<sup>15</sup> Huan anquimictic in Cristo hual quinmaca yulilisli moxtin. Ma yoje Dios quiyuliltic oc seppa, quiquixtic pa capa cate in mijquimes. Tehuanten ticmatilo inon pampa tiqitaje quiman lamije panuje ye tonalijmes huan yihual quisac pa capa quilalpachuje quiman lamic miquic.

<sup>16</sup> Huan in lalac nican hual amo huil nejnemini axan amhuanten anquiztica huan anquiximati. Huan Dios quipajtic pampa ticneltocalo ilahuliltilisli Jesús. Huan pampa ticneltocalo Jesús, pampin axan in lalac moqueztica lapajtili anmolaijxpan amoxtin.

<sup>17</sup> Huan axan, nocnián, nicmati pampa amhuanten amo anquimatiaya len anquichihuaya pan in tonali anquimictic Jesús, huan amo quimatiloaya in yehuanten hual huelitilo.

<sup>18</sup> Ma yoje, quichíac Dios jan quinami yihual quilalic pa panusquiaya, quijtuc inon quiman ayamo quinchihualtic ilajtunijmes pa lajtulosquiaya quinami iCristo Dios yahuiaya panu lacocoltilisli.

<sup>19</sup> Pampin xicpalacan axcan anmoyolo, huan xicanacan iojli Dios. Yojque yihual anmitzquixtilis anmolaijlaculisli. Yojque anpanus tonalijmes hual nepa Dios anmitzmosehuiltilis anmoyolo.

<sup>20</sup> Huan yoje anmitztilanilis in se hual niman pa quiman anmitzmachtije. Yihual in se hual Dios quilajtultic, nicnequi niquijtúa, in Jesús in Cristo.

<sup>21</sup> Axan yihual quipias pa mocahuas pin cielo, huan nepa mocahuas pa in tonali quiman Dios yahui quinmelahua huan quinyancuila mochi. Inon

pehuani quiytu Dios quiman pehuac in lalticpan. Quijtuni pan inminpampa ilajtunijmes hual quinlajltultic.

<sup>22</sup> Yojque se ca innojen, Moisés, quinmilic totajtzitzían, quinmilic, quil: “Anmitztilanilis in Tata anmoDios se hual nesis capa amhuanten anmocnían, se hual yes lajtuni quinami nehual. In se anquineltocas mochi hual anmitzilis.

<sup>23</sup> Huan aquí yes amo quineltocas in lajtuni” quijtuc Moisés, “cuaquín in se yajmo cayas ca yehuanten hual iyaxca Dios. Dios quipolehuiltis ca polehuiltisli hual amo quiman lamis.”

<sup>24</sup> “Yoje —quinmilic Pedro—, moxtin ilajtunijmes Dios quijtunijme inon. Pehuac lajtuc Samuel huan cuaquinon lajtuloaya moxtin in oc sequin lajtunijmes hual yultihualaloaya quiman polehuic Samuel. Moxtin yehuanten lamachiltijque inahuac len yahuiaya panu pan tonalijmes capa tiyulticate axcan tehuanten.

<sup>25</sup> Amhuanten anunca aquinojen hual anquipías innojen hual cuali, pampa anunca imiahuimes ilajtunijmes Dios. Jo quema, huan in lajtulisli hual Dios quichíac ca totajtzitzían unca pa amhuanten noje. Ca in lajtulisli Dios quilic Abraham, quil quilic: “Momiahuil quinchihuilis cuali moxtin yehuanten pin lalticpan.”

<sup>26</sup> Dios quiquixtic iXolol Jesús capa cataya ca in mijquimes, huan pejtataya ca amhuanten, anmitztilanilic Jesús pa yoje anmijchihuilisquiaya cuali, pa yojque yajmo anyulis anquichijtica laijlaculisli.

## 4

*Pedro huan Juan quijtulo ilamaxtilisli Cristo inminlaixpan yehuanten hual huelitilo*

<sup>1</sup> Quinmilitataloaya in lalalera inon Pedro huan Juan, huan jan ajnaxcan moqueztiquisaje inminahuac in tiopistas huan ilaicnani ilachianijmes in tiopan hué. Huan ca yehuanten hualaloaya innojen hual quineltocaloaya ilamaxtilisli in saduceos.

<sup>2</sup> Cualaniloaya pampa Pedro huan Juan quinmaxtiloaya inahuac Jesús. Quinmiloaya pampa Jesús miquic huan cuaquinon yulic oc sejpa. Huan pampa in, quil, moxtin yulisi oc sejpa quiman miquilo.

<sup>3</sup> Yojque, quinqitzquijque huan quintzacuajque pa calijtic pa quiman ajsiaya mostatica, cuaquinon huil quinlajlanilosquiaya. Yojque quichihua-aje pampa tiolactiaya huan amo monechicujtataloaya in huejueyenten.

<sup>4</sup> Ma yoje, quineltocaloaya niman míac lacames ca yehuanten hual quicaquijque in lajtol. Yojque mijque in laneltocanijmes. Axcan ajsije yeje quinami macuili mil lacames hual quineltocaloaya Cristo.

<sup>5</sup> Cuaquinon mostatica monechicujque inminhuejueyenten in judíos huan in abuelojmes huan in lamaxtinijmes hual quinmaxtiloaya inminlajtomes in judíos.

<sup>6</sup> Ca yehuanten cataloaya Anás, yihual in tiopista hué, huan Caifás ilahuical ixolol sidual Anás, huan Juan huan Alejandro huan moxtin in lacames hual yeje inmicnían in tiopistas huejué, inmicnían pa oc sequin calimes.

<sup>7</sup> Quinlajijque Pedro huan Juan inminlaixpan yehuanten, quinlajlanijque: —¿Ca aquí ilahueliltisli anquichíac inon?

<sup>8</sup> Cuaquinon in Espíritu Santo quihueliltic Pedro pa quinmilis, quil:

—Amhuanten inminhueyenten huan inminabuelojmes in israelitos,

<sup>9</sup> antechlajlantica axcan inahuac len cuali ticchihuilijque in lalal coxqui, antechlajlantica ca aquí ilahueliltisli yihual pajtic.

<sup>10</sup> Xicmatican anmoxtin huan ma quimatican inon mochi Israel: Unca ca ilahuelilitlisli Jesucristo in nazaretecó calica in se moqueztica anmolaixpan lapajtili. In Jesús anquipiluc pan se cuahuil huan anquimictic. Ma yoje, Dios quiyulitlic oc sejpa, quiquixtic capa cataya ca in mijquimes.

<sup>11</sup> Pan ipampa se ilajtuni, yihual Dios quijtuc pampa cataloaya sequin lacames hual quichijtataloaya se cali. Cataya se tixcali hual amo quinequiloaya quilalilo pin cali. Ma yoje iteco in cali quilallic in tixcali capa quipialoaya pa quitequipanusquiaya in tixcali yehuanten hual quichijtataloaya in cali. Jesús unca quinami in tixcali, unca in itixcali hué in cali. Huan Dios unca quinami iteco in cali. Yoje, Dios quilallic in Jesús pa ima cuali yihual.

<sup>12</sup> Huan amo unca oc se, jan yihual Jesús san hual huil tejchiphauillis toyolo, amo quitilanic Dios oc se pin mochi lalticpan hual quipía lahuelilitlisli pa techquixtilis pin ipolehuillisli tolaijlaculisli, jan Jesús san.

<sup>13</sup> Innojen tiopistas huan in huejueyenten quitaje quinami Pedro laquetzaya amo momajtitataya, huan noje amo momajtiaya Juan. Noje quimatije pampa yehuanten yeje lacames hual amo uyajque momaxtijque ca in lamaxtinijmes, amo yeje lacames ca laquetzalisli. Pampa in, mopolultiloaya, pehuajque quijnamiqijque pampa Pedro huan Juan cayanijme ca Jesús.

<sup>14</sup> Noje quitaloaya in lalcal hual pajtic, nepa ca Pedro huan Juan moquezataya. Yojqe amo huil quijtuloaya len amo cuali inahuac in hual quichihuilijque in lalcal Pedro huan Juan.

<sup>15</sup> Ma yoje, quiman quinmilijque in yeyenten pa quisasqui pa quiahuac capa monechicujtataloaya, molaquetzililoaya, moililoaya:

<sup>16</sup> —¿Len tiquinchihuilisqui innojen lacames? Moxtin hual chanticate pa Jerusalén quimatilo pampa quipajtijque yehuanten ca se lahuelilitlisli in se hual amo huil nejnemiaya. Tehuanten amo huil tiquijtulo pampa islacatijcate, pampa nepa unca in lalcal hual pajtic.

<sup>17</sup> Ma yoje, pa yajmo momachiltitías ca in lalcalera israelito len quipanuc in lalcal, ma tiquinmajtican tiquinmilijticate pa yajmo quinlaquetzilisqui lacames ilajtol Jesús.

<sup>18</sup> Cuaquinon quinnotzajque Pedro huan Juan, quinmilijque pa calaquisqui. Quinmilijque pa camo quiman quilaquetzilijtinemisqui amaqui inahuac Jesús, huan pa camo lamaxtinemisqui ca ilamaxtilisli.

<sup>19</sup> Huan quinnanquilijque Pedro huan Juan, quinmilijque:

—Ximoijnamiquican calía unca cuali ilaixpan Dios pa ticchiuasi. ¿Unca cuali pa antimitzneltocasi amhuanten o pa ticneltocasi Dios?

<sup>20</sup> Tehuanten amo huil timocahualo pa tilaqueztinemisi inahuac in hual tiquitajque huan tijcaquije.

<sup>21</sup> Oc sejpa in tiopistas huan in huejueyenten quinmilijque pampa yahuililoaya quinpitzililo tixuxli sinda amo quinneltocaloaya. Cuaquinon quinmacahuajque. Momajtiloaya pa quinmacasqui lacocoltilisli pampa in lalcalera pin caltilan cualanilosquiaya ca yehuanten sinda yoje quinchihuililoaya. Moxtin quinmijtutataloaya lajtomes huejué pa Dios huan quisejtalaloaya pampa in lalcal axcan huil nejnemiaya.

<sup>22</sup> Cataya pampa lacatic in lalcal quinpiaya quinami cuarenta y un, dos, tres (ompuhualihuanse, ome, ye) xixihuimes.

### *Moxtin in laneltocanjmes quilajlanilo Dios pa quinpalehuis*

<sup>23</sup> Quiman quinmacahuajque Pedro huan Juan, yehuanten uyajque ca capic cataloaya in oc sequin laneltocanjmes, quinmachiltijque mochi inon hual quinmilijque in tiopistas huejué huan in abuelojmes.

<sup>24</sup> Yojque, quiman quicaquijque in, moxtin quilajlanijque Dios ca se lajtulisli, quilijque:

—ToTata hué, tehual tiquinchiác in cielo huan in laticpan huan in al huejcalan.

<sup>25</sup> Huan pan ipampa in Espíritu Santo, tehual Dios ticchiác pa David quijcuiluc molajtomes, quijtuc:

¿Leca mocuajcualantinemiloaya yehuanten hual amo molacames?

Huan ¿leca quijtulo ilacames Israel len hual amo monotza?

<sup>26</sup> Hualalo in huejueyenten huan in huelitinijmes, monechiculo pa molaquetzilisqui pa quintzacuilisqui Dios huan in lacal hual Dios quilajtultic pa yes hué, yihual Cristo.

<sup>27</sup> Huan neli monechicuje nican pa Jerusalén, monechicuje pa latexpahuisi in huejueyenten pa yoje huil quimictisi motequipanujquil hual ticlajtultic, in Jesús hual ticlajtultic pa yes moCristo. Jo quema, monechicuje in hué Herodes huan Poncio Pilato ca in lacames pa oc sequin lalimes huan ca ilacames Israel.

<sup>28</sup> Monechicuje pa quichihuasi mochi inon hual tiquijtuc pampa yahuiaya panu pan tonalijmes quiman ayamo panuc.

<sup>29</sup> Huan axan, Tata, xiquita quinami quinequilo techmajtilo yehuanten. Xitechmaca tehuanten motequipanujquimes mochi chicahualisli pa ticmachiltisi molajtul.

<sup>30</sup> Itoca moXolol Jesús hual ticlajtultic pa yes hué quipía lahueliltilisli. Pampín pan ipampa ilahueliltilisli Jesús xitechmaca tehuanten lahueliltilisli pa tiqipnajtisi cocoxquimes, huan pa ticchihuasi miác hual quinmolapolulsi lacames pampa tiquinnextilijtica molahueliltilisli.

<sup>31</sup> Lamijque quilajlanijque Dios, cuaquín molinic in cali capa monechiculoaya, pampa hualac in Espíritu Santo, quinhueliltilic moxtin, huan yehuanten quijtuloaya ca lahueliltilisli ilajtul Dios.

### *Jesucristo ilacames moxiluililo se ca oc se len inminyaxca*

<sup>32</sup> Huan pa inminyolo quipialoaya jan se lajtulisli yehuanten hual quinel-tocaloaya ilajtul Dios. Moxtin quijtutataloaya jan yoje, amaqui quijtuaya pampa in hual quipiaya yahuiaya ye pa yihual ihuian. Moxtin quijtuloaya pampa yahuiaya ye pa moxtin laneltocanijmes.

<sup>33</sup> In lanahuatinijmes amo mocahuajque pa quijtutinemilosquiaya ilamachiltisli in Tata hual yulic oc sepa. Laqueztinemiloaya ca ichicahualisli in Espíritu Santo. Huan moxtin in oc sequin quinmixtocaloaya in lanahuatinijmes miác.

<sup>34</sup> Huan amo cataya amaqui ca yehuanten hual amo quipiaya nindeno, pampa in tecojuan hual quinpialoaya inminlalimes huan calimes quinnamacajque.

<sup>35</sup> Cuaquinon quinhualiquilijque in lanahuatinijmes in tomin hual canajque quiman quinnamacajque. Cuaquinon in lanahuatinijmes quixiluililoaya mochi sejse hual monequiaya pa quipiasquiaya len.

<sup>36</sup> Cataya se itoca José hual in lanahuatinijmes quitocayaltije Bernabé, itoca quinequi quijtúa lacal hual quimati quinlacahualtia oc sequin. Yihual yec se judío ca imiahuimes Leví. In Leví yec se ca in doce lacames hual quinpehualtije yehuanten in israelitos, yulini pa yina. In Bernabé lacatic pa se lali itoca Chipe hual unca lajco pin al huejcalan.

<sup>37</sup> Yihual quipiaya se cuajmili huan quinnamacac, quinhualiquilic in lanahuatinijmes in tomin.

## 5

*Inminlajlaculisli Ananías huan Safira*

<sup>1</sup> Huan cataya se laca itoca Ananías, quiapiaya isihua itoca Safira. In Ananías quinamacac se icuajmili.

<sup>2</sup> Yihual moajcoquilit se omito in tomin hual quilaxlahuijque. Huan isihua quimatiaya inon huan cataya ca se lajtulisli ca ilahuical. Yojque, Ananías quinhualiquilit in lanahuatinijmes in oc se ilajco in tomin, quinmiliaya pampa quinmacaya mochi.

<sup>3</sup> Cuaquinon Pedro quilic:

—Ananías, ¿leca ticchiac inon calica Satanás mitztilanilic moyolo pa tislacatis ca in Espíritu Santo? Timoajcoquilijtica se omito in tomin hual mitzlahuijque.

<sup>4</sup> ¿Amo cataya moyaxca in cuajmili quiman ayamo ticnamacac? Huan quiman ticnamacac, ¿amo cataya moyaxca in tomin? ¿leca nuso ticlalic pa ticchiasquiaya inon? Amo tislacatic ca lacames, tislacatic ca Dios.

<sup>5</sup> Quincaquic in lajtomes Ananías, hueztiquisac, polehuic. Huan moxtin, quiman quimatijque inon pehuajque momajtijque miac.

<sup>6</sup> Cuaquinon moquetzajque in lacames yajyancuic, quilaquentijque, quihuicajque huan quilalpachujque.

<sup>7</sup> Mocaahuac se nadita, quinami ye horas, calaquic isihua, amo quimatiaya len panuc.

<sup>8</sup> Huan Pedro quilic:

—Xichili sinda anquinamacac anmocujmili ca yoje miac tomin.

Huan yihual quinanquilic:

—Jo quema, ca yoje miac.

<sup>9</sup> Huan Pedro quilic:

—¿leca nuso amocahuac ca in lajtulisli tehual huan molahuical pa anquichías inon? ¿Cuajnesi anquijtuc pampa huil anquicujcuamanac in Espíritu Santo? Xiquita. Mocaqui capantihualalo pin lalapujquil inmicxihuajmes innojen hual quilalpachuje molahuical, tehual noje mitzhuicasi.

<sup>10</sup> Huan hueztiquisac Safira pa icxihuajmes Pedro, polehuic. Calaquijque in lacames yajyancuic, quifajque mictataya, quihuicajque yihual noje, quilalpachujque inahuac ilahuical.

<sup>11</sup> Pampín momajtiloaya miac moxtin in laneltocanijmes huan momajtiloaya moxtin hual momachiltijque ca innojen hual panujque.

*Quichihualo miac hual quinlapolultilo moxtin*

<sup>12</sup> Huan Dios quinnextiliaya ilahuelilitlisli yehuanten ca innojen miac hual quinchihuaya pan inminpampa in lanahuatinijmes. Huan moxtin in laneltocanijmes quipialoaya se lajtulisli san, monechiculoaya pin llanejnemijquil Salomón hual cataya pin tiopan hué.

<sup>13</sup> Ma yoje, in oc sequin hual amo quineltoaloaya momajtiloaya yahuilo capa monechiculoaya in laneltocanijmes, mas que quinmixtoaloaya miac in laneltocanijmes.

<sup>14</sup> Huan mojmosta miajtiahuiloaya aquinojen quineltoaloaya in Tata Jesús, huan cataloaya miac sihuames jan quinami cataloaya lacames.

<sup>15</sup> Cuaquinon yoje quinhualicajque pin ojlimes in cocoxquimes, quinlajque pan lapexlimes huan pan pelames. Yojque quiman panuaya Pedro, cuajnesi quinmacasquiaya ilasehuán pan in cocoxquimes pa yojque pajtilosquiaya.

<sup>16</sup> Noje hualaloaya yehuanten hual chantiloaya pa innojen caltilan pa itejtenco Jerusalén. Quinhualicaloaya in cocoxquimes huan aquinojen quinpialoaya ijyecames amo cuajcuali, huan moxtin cataloaya lapajtli.

*Quintzacualo pin calijtic in lanahuatinijmes*

<sup>17</sup> Cuaquinon pehuac moxicuc chichahuac in tiopista hué, yihual huan moxtin hual cataloaya ca yihual, yehuanten hual quineltoaloaya ilamaxtilisli in saduceos.

<sup>18</sup> Huan quinqutzquijque in lanahuatinijmes, quintzacuajque pa calijtic.

<sup>19</sup> Ma yoje, pa layúa in Tata ilanahuatini pin cielo quinlapulic in ilalapunquimes in calijtic capa cataloaya latzacuali, quinlaicanac pa quiahuac, quinmilic:

<sup>20</sup> —Xiacan, ximoquetzacan pin tiopan hué huan xiquinnahuatlican moxtin yehuanten mochi ilamachtilisli cuali in yulilisli hual Jesús quimaca.

<sup>21</sup> Yojque, quicaquijque inon, calaquijque pin tiopan hué quiman lanestihualaya, huan pehualoaya lamaxtilo. Lamaxtiloaya in lanahuatinijmes, hualajque in tiopista hué huan aquinojen cataloaya ca yihual, ajsijque pa oc se icalijtic in tiopan hué. Quitlanijque lajto pa monechicusqui moxtin in Lanechiculisli Hué ca moxtin inminabuelojmes in lali Israel. Cuaquinon quintlanijque lachianijmes pa quinhualiquilisqui in lanahuatinijmes hual cataloaya latzacuali pin calijtic.

<sup>22</sup> Huan ajsijque nepa in lachianijmes hual quintlanijque pa quinmanasui in lanahuatinijmes, amo quinmitajque.

<sup>23</sup> Mocuepajque, lamachilitihualajque, quinmilijque:

—Tiquitaje in calijtic latzacuali cuali huan in lachianijmes moquezataloaya pan lalapunquimes. Ma yoje, techlapulije, amo tiquitaje amaqui calijtic.

<sup>24</sup> Quicaquijque inon in tiopista niman hué huan inminlaicanani in lachianijmes huan in tiopistas huejué, amo quimatiloaya len quijtulosquiaya, quijtujque:

—¿Len panuc, huan len yahui panúa axan?

<sup>25</sup> Cuaquinon hualac se, quinlamachiltic, quinmilic:

—Xiquitacan. Innojen lacames hual anquintzacuac calijtic axan cate moquezaticate pin tiopan hué, quinmaxtiticcate in lacames.

<sup>26</sup> Cuaquinon hualajque ilaicanani in lachianijmes huan ilacames huan quinhuicajque in lanahuatinijmes. Ma yoje, quinhuicajque amo quintecuatiahuiloya, pampa momajtiloaya cuajnesi in lacames hual quincacuiloaya quinlaxililosquiaya tixcalimes sinda quinchihuilijtiyahuilosquiaya lacocoltilisli.

<sup>27</sup> Yojque quinhuicajque, quinlalijque lajco capa in Lanechiculisli Hué, huan in tiopista hué quinmilic:

<sup>28</sup> —Tehuanten in Lanechiculisli Hué antimitzilijque chichahuac pa camo anquinmilis ilamaxtilisli in se itoca Jesús, huan xiquitacan, moxtin pa Jerusalén quimatilo inon hual anquimaxtítica. Huan anquinctica antechmotexpahuilía yojque quinami tehuanten ticataloaya hual ticmictijque in lalac.

<sup>29</sup> Cuaquín quinnanquilic Pedro ca in oc sequin lanahuatinijmes, quinmilic:

—Ticpialo pa ticneltocasi Dios sinda lacames techililo pa camo ticchihuasi in hual Dios techilía pa ticchihuasi.

<sup>30</sup> InminDios totajtzitzían cataya yihual quiyuliltic oc sejpa Jesús hual amhuanten anquimictic. Anlatilanic pa quipilusi pan se cuahuil.

<sup>31</sup> Ma yoje Dios axan quimacac Jesús lahuelilitisli hué pa yes laicanani pa huil huelitis quinami Dios huan pa quinquixtis lacames pin ipolehuilisli Dios icualanilisli. In Jesús Dios quimacac lahuelilitisli pa quinpupuhuas lacames inminlajlaculisli, pa quinquixtilis inminlajlaculisli.

<sup>32</sup> Huan tehuanten ticmatilo pampa neli cate in lajtomes hual tiquijtticate, huan in Espíritu Santo unca pa toyolo. Yihual in Espíritu Santo Dios quinmaca moxtin hual quineltocalo huan in Espíritu Santo techmaxtia pampa in hual tiquijttulo unca melahuac.

<sup>33</sup> Quicaquijque inon yehuanten pin Lanechiculisli Hué, cualanijque niman chichahuac huan quinequiloaya quinmictilo in lanahuatinijmes.

<sup>34</sup> Cuaquín moquetzac nepa ca in lanechiculisli se ca yehuanten hual quineltocaloaya ilamaxtilisli in fariseos, yihual itocaya Gamaliel. Yihual yec se ilamaxtini inminlajtol in judíos, quilasojlaloaya moxtin lacames. Quinmilic pa quinquixtilosquiaya in lanahuatinijmes pa quiahuac pa je nadita.

<sup>35</sup> Cuaquinon laquetzac ca yehuanten pin lanechiculisli, quinmilic:

—Lacames israelitos, xiclachican inahuac in hual anyahui anquinchi-huilía innojen lacames.

<sup>36</sup> In annimitzilía, pampa monequi pa anquijnamiquis quinami amo quipía míac xixihuil quiman yulini in se itoca Teudas hual quijtuni pampa yihual yec hué lalac huan quitocanjime quinami nahui cientos lacames. Huan in Teudas cataya lamictili huan moxtin hual quitocanjime mosemanaloaya ca capic yes, huan yojque yajmo nesiaya ilanechiculisli.

<sup>37</sup> Panuc inon, nesc Judas in galiletco, catanjime in tonalijmes quiman in huejueyenten quinpuhualoaya moxtin. Yihual quinlaicanac míac lacames hual quitocanjime. Huan yihual noje miquic huan mosemantiaje moxtin hual quitocanjime.

<sup>38</sup> Huan axcan annimitzilía inon: ximijcuanican pa camo anquintzacuas in lacames. Xiquincahuacan, pampa sinda in hual quichijtticate unca san hual lacames quinchijtticate, cuaquín amo huejcahuas pa mosehuis.

<sup>39</sup> Ma yojque, sinda unca iyaxca Dios in hual quichijtticate, cuaquín amhuanten amo huil anquintzaculis. Pampa in, xiquincahuacan pa camo anmoitas anmoantica ca Dios.

<sup>40</sup> Cuaquinon, quixtocajque in hual quinmilic Gamaliel. Yojque, quiman quinnotzajque in lanahuatinijmes, quinhuitequijque, quinmilijque chichahuac pa yajmo quilamachiltinemosquiaya Jesús ilamaxtilisli. Cuaquinon quinmacahuajque.

<sup>41</sup> Ma yoje, quisajque in lanahuatinijmes, ca paquilisli quisajque pin Lanechiculisli Hué, pampa Dios quinchihuilic len hué. Quinchihuilic hué pampa quinmacahuiltic pa panusqui lacocoltilisli pampa quineltocaloaya Jesucristo.

<sup>42</sup> Huan mojmosta amo mocahualoaya pa quimaxtilosquiaya huan pa quinhualtilosquiaya ilamachiltisli cuali Jesucristo. Quichihualoaya pin tioplan hué huan calpanuloaya lamaxtitataloaya pa inminchan moxtin.

## 6

*Quinlajttitulo chicome lacames lapalehuinijmes pa quinxiluililo in hual quicualoaya*

<sup>1</sup> In tonalijmes miajque innojen hual quineltocaloaya Cristo. Huan yehuanten hual lajtuloaya griego nadita cualaniloaya ca yehuanten hual lajtuloaya hebreo. Cataya pampa in sihuames inminhuían hual lajtuloaya



griego amo quipialoaya míac pa quicualosquiaya. Amo quinmacaloaya míac quinami quinmacaloaya in sihuames inminhuían hual lajtuloaya hebreo. Inon quinpanuc quiman yes quinxiluiloaya len quicualosquiaya mojmosta.

<sup>2</sup> Cuaquinon in doce lanahuatinijmes quinahuatijque pa monechicusqui moxtin in laneltocanijmes, quinmilijque:

—Amo unca cuali pa tehuanten in lanahuatinijmes timocahuasi pa ticmaxtisi ilajtol Dios pa tiquinxiluilisi len quicuasi.

<sup>3</sup> Pampín, tocnían, xiquinlajtultican chicome lacames capa amhuanten, lacames hual in Espíritu Santo quinhueliltía, lacames hual quimatilo míac. Tiquinlajtultisi pa quinxiluili in lacuali.

<sup>4</sup> Huan tehuanten in lanahuatinijmes ticayasi ticlajlanticate Dios huan tiqinnahuatiliticate moxtin ilajtol.

<sup>5</sup> Cuaquín moxtin quitajque pampa cuali in lajtol. Quilajtultijque Estéban, yihual yec lacal hual míac quimatiaya quineltoaca ilajtol Dios, huan in Espíritu Santo moyaxcajtiliaya iyolo. Noje quinlajtultijque Felipe huan Prócoro huan Nicanor huan Timón huan Parmenas huan Nicolás. (Nicolás yulini pin caltilan hué Antioquía. Yihual lacatic pa oc se lali, amo yec judío nepa capa lacatic, san pehuac quineltoac in judíos inminlamaxtilisi quinami quimolancuacuetzililo Dios. Cuaquinon pehuac quineltoac Cristo.)

<sup>6</sup> Lamijque quinlajtultijque in chicome lacames, quinhualicajque inminlaixpan in lanahuatinijmes. Yehuanten in lanahuatinijmes quinlalilijque inminmajmajuan pan in chicome lacames huan quilajlanijque Dios pa yehuanten. Yojque lanextilijque pampa yehuanten in chicome lacames yahuiloya quitequipanuililo Dios quinlaxiluilijticate in hual quicualoaya.

<sup>7</sup> Huan míac oc sequin pehuajque quicaquijque ilajtol Dios, huan pa Jerusalén miajtiajque niman míac aquinojen hual quineltoaloaya Cristo. Quema, míac tiopistas judíos pehuajque quineltoajque Cristo.

### *Quiquitzquilo Estéban*

<sup>8</sup> Huan Dios quihueliltic Estéban pa quinchíac míac hual pampa innojen molapolultiloaya moxtin. Innojen hual quinchíac cataloaya hual quinextiaya Dios ilahuelilitilisi.

<sup>9</sup> Ma yoje, cataloaya sequin lacames judíos hual yehuanten inmintiopan itocaya inmintiopan in tequipanujquimes lamacahuali, huan cataloaya oc sequin judíos hual inminlali itoca Cirene, huan oc sequin hual yulinijme pin caltilan hué Alejándria, huan oc sequin hual yulinijme pin lalticpan itocaya Cilicia huan pin oc se lalticpan itocaya Asia. Huan Estéban quinlaquetzilijtinemiloaya inahuac ilajtol Dios, huan yehuanten amo quinequiloaya quineltoalo len quimaxtiaya Estéban.

<sup>10</sup> Ma yoje, amo huil quisulahualoaya Estéban ca yehuanten inminlajtoques, pampa in Espíritu Santo amo mocahuac pa quimacas Estéban lajmatilisi huan quimacac lajtol calica quinnanquiliaya.

<sup>11</sup> Cuaquinon quinmanajque lacames, quinmilijque pa islacatisqui quimotexpahuilijtcate Estéban. Quinmilijque pa quijutinemisqui quinami quicaquijque Estéban quinhuejuecaltitataya Moisés huan Dios.

<sup>12</sup> Yojque quincualantitinemiloaya in lacalera huan in abuelojmes huan yehuanten hual quimaxtiloaya inminlajtol in judíos. Hualajtiquisajque, quiquitzquijque Estéban huan quihuilanajque pa in Lanechiculisli Hué.

<sup>13</sup> Cuaquinon moquetzajque yehuanten hual yahuiloya islacatilo pa quimotexpahuililosquiaya Estéban, quijtujque islaticatijtcate:

—In lacal amo mocahua pa laquetzas len amo cuali inahuac in lasojli tiopan hué huan inahuac ilajtol Moisés.

<sup>14</sup> Ticmatilo inon pampa tijaquijque yihual quijtutataya, quil, pampa in Jesús, in se hual yulini pa Nazarét, quil, quixitinis in lasojli tiopan hué huan quinpalas in lajtol hual Moisés techtemacac.

<sup>15</sup> Huan moxtin nepa hual cataloaya pin Lanechiculisli Hué quitaloaya Estéban, amo mocahualoaya pa quitalosquiaya iixco. Quitajque cahuan-tataya iixco chicuenta iixco se ilanahuatini in cielo.

## 7

### *Monapatía Estéban inminlaixpan yehuanten hual lahuelilitlo*

<sup>1</sup> Cuaquinon in tiopista hué quilajlanic Estéban, quil:

—¿Unca yojque inon hual quijtulo?

<sup>2</sup> Huan Estéban quinnanquilic:

—Lacames nocnián huan notajtzitzián, xilacaquican. In Dios hual quipía mochi lahuelilitlisli hué monextilic totajtzin Abraham. Cataya pin lali itoca Mesopotamia, cataya quiman ayamo pehuac chantic pin lalticpan itoca Harán.

<sup>3</sup> Dios quilic: “Xiquisa pa molali huan pa capa cate mocnián, huan xía pa in lali hual nimitznextilis.”

<sup>4</sup> Cuaquinon, quisac pa inminlali in caldeos, chantiaya pa Harán. Huan quiman polehuic itajtzin, hualac Abraham pa chantis nican pin lali capa amhuanten anchantitica axan.

<sup>5</sup> Dios amo quimacac Abraham se nadita in lali nican pa yesquiaya iyaxca. Ma yoje, quilic neli pampa yahuiaya quimaca in lali pa quipiasquiaya. Huan amo mocahuasquiaya pa yes inminyaxca yihual huan imiahuimes, mas que ayamo quipiác Abrahám se ixolol.

<sup>6</sup> Yojque Dios quijtuc noje pampa Abraham imiahuimes yahuilooaya chantilo pa oc se lali hual amo inminyaxca. Dios quijtuc pampa yehuanten pa in oc se lali yahuilooaya quinchihualo imiahuimes Abrahám tequipanujquimes hual amo quilaxlahuilo. Yahuilooaya quinchihuילו in amo cuali pa nahui cientos xixihuimes.

<sup>7</sup> Ma yoje, Dios quilic: “Niquincocoltis yehuanten hual quinchihuilisqui yojque. Huan quiman panus inon, cuaquin quisasqui momiahuimes huan nechmolancuacuetzilisqui pin lali nican.”

<sup>8</sup> Cuaquinon quichíac Dios se lajtulisli ca Abraham, —quinmilic Estéban —, huan pa monextis in lajtulisli, quintequilijque naditita inmincuilaxli in xolomes lacames, huan yojque amo timocahualo pa tiquinchihuilisli yoje toxolomes tehuanten in judíos timoxtin. Yojque quiman lacatic Isaac hual yec ixolol Abrahám quichíac chicué tonalijmes, cuaquinon quitequilic icuilaxli. Cuaquinon Isaac quipiaya ixolol Jacob huan pa Jacob lacatije in doce lacames, yehuanten hual quinpehualtije in doce inminlanechiculisli imiahuimes hual ticate tehuanten in judíos.

<sup>9</sup> Huan moxiculoaya ixolomes Jacob ca inmicni José, pampín quinamaquiltije José icnián oc sequin lacames hual quihuicaje quinami tequipanujquil ilpitataya pa in lali Egipto. Ma yoje, Dios cataya ca José.

<sup>10</sup> Quiquixtilic pa mochi icocoltisli hual panuc. Noje Dios quixtocaltic José in Faraón hual yec in hué nepa Egipto. Quixtocac pampa Dios quimacac José míac lajmatilisli. Yoje Faraón quilalic José pa yes huelitini pin lali Egipto huan pa moxtin yehuanten hual cataloaya pa ichan Faraón.

11 'Cuaquín ajsic se mayandi pa mochi in lali Egipto huan pa tolali Canaan. Panuloaya míac mayanalisi, amo quitaloaya len quicuaque totajtztzían.

12 Cuaquín quilijque Jacob pampa cataya, quil, trigo pa Egipto, pampín pehuac quintilanic pa Egipto ixolomes hual yeje totajtztzían, quintilanic pan trigo.

13 Huan quiman Jacob quintilanic oc sejpa pa Egipto, cuaquinon José quinmachiltic icnían pampa yihual inimicni José pampa ayamo quislacuje. Yojque, Faraón in hué quimatic in lali capa lacatic José huan noje quimatic ca len lacames yihual lacatic.

14 Cuaquín José quintilanic icnían pa quinmanasi Jacob huan moxtin yehuanten pa inminchan. Cataloaya setenta y cinco (yepuhualicaxtuli) lacames huan sihuames.

15 Huan uyac Jacob, quisac pa in lali Canaan pa yas pa Egipto. Nepa polehuic Jacob huan cuaquinon totajtztzían noje polehuije.

16 Mocuepaje pa Canaan pa quinhuicasi in mijquimes pa in caltilan itoca Siquem nican pa tolali Canaan, nepa quinlalpachuje pa in nadita lali hual mocuhuilic Abraham hual quinamaquiltijque ixolomes Hamor nepa pa Siquem.

17 Ajsitihualaya in tonalijmes pa lamisquiaya mochía len Dios quilic pampa yahuiaya quinchihuilic Abraham imiahuimes, huan miajtiahuiloya yehuanten imiahuimes Israel.

18 Cuaquín ajsije tonalijmes quiman cataya oc se hué pin lali Egipto. In hué amo quimatiaya in hual quichihuaní José.

19 Yihual techcuaajcuamanaya tehuanten in judíos, quinchihuilic niman míac amo cuali totajtztzían. Latilanic pa quincajcahualosquiaya inminxolomes lacames quiman yes lacatije pa yoje miqulosquiaya.

20 'Cataloaya in tonalijmes lacatic Moisés —quinmilic Estéban—, huan Dios quixtocac míac. Itajtzin huan inantzin quilachililoaya Moisés pa ye mesli pa inminchan.

21 Cuaquín quipialoaya pa quiquixtisi pa calijtic inminchan. Huan ixolol sihual Faraón in hué pa Egipto canac Moisés, quipiani quinami yec yihual ixolol.

22 Huan quimaxtije Moisés ca mochi inminlajmatilisli yehuanten pa Egipto. Pampín huelitiaya míac, quimatiaya lajtu niman cuali huan quimatiaya quichía míac.

23 'Yojque, ajsic yec lalac ca cuarenta xixihuil, quijttuc pampa yahuiaya quinpaxaluili icnían israelitos.

24 Huan quitac se lalac egipcio quihuitequiaya se lalac israelito. Jan ajnaxcan Moisés uyac quinapatic. Quilacuepilic in lalac egipcio pampa quichihuilaya inon in lalac israelito, quimictic Moisés in egipcio.

25 Moisés quijttuc pampa yehuanten israelitos quimatilosquiaya pampa Dios yahuiaya quinquixti pa Egipto pan ipampa yihual. Ma yoje, yehuanten amo huil quimatiloaya inon.

26 Mostatica moitilic Moisés paxalujtataya capa yehuanten cataloaya. Quinmitac ome icnían israelitos moanticate. Yihual motoliniaya pa quinsehuic pa camo moanalosquiaya, quinmilic: "Lacames, amhuanten anunca anmocnían. ¿Leca anmoantica?"

27 Ma yoje, in se hual quichihuilaya amo cuali icni quitojpehuac Moisés, quilic: "¿Quinami unca moyaxca pa tyes laicanani huan lamacahuani pa tehuanten?"

<sup>28</sup> ¿Huejtica ticnequi tichmicti jan quinami yalhua ticmictic in lalac egipcio?”

<sup>29</sup> Cuaquín choluc Moisés pampa quijtuc inon in lalac. Uyac chantic pan lali itoca Madián, se lali hual amo yihual ilali. Nepa monamictic, quinpiaya ome ixolomes lacames.

<sup>30</sup> Mocaahuac nepa cuarenta xixil —quinmilic Estéban— huan se ilanahuatini in cielo monexita ca Moisés capa amaqui chantiaya, cataya capa unca in loma itoca Sinaí. Huan ilanahuatini in cielo quinotzac Moisés pa se huitzcuaajtzindi lalatica.

<sup>31</sup> Quitac Moisés inon, quilapolultic in hual quiztataya. Moajxiltiaya pa quitasquiaya cuali, lajtuc in Tata, quilic:

<sup>32</sup> “Nehual niunca inminDios motajtzitzían, iDios Abraham huan iDios Isaac huan iDios Jacob.” Cuaquín pehuac yuyucac Moisés, momajtiaya pa quiztías.

<sup>33</sup> Cuaquion in Tata quilic: “Xiquintoma xiquinquixti ilacsames mocxi-huajmes, pampa in lali capa timoqueztica unca lali hual Dios mochipahuilic pa yihual ihuán.

<sup>34</sup> Niquitac neli quinami panujticate lacocoltilisli nolacames nepa pa Egipto, nijcaquic quinami xahuanticate. Pampa in, nitemuc pa niquinmacahuas. Huan axcan, xihuala tehual, nimitztilanis pa timocuepas pa Egipto.”

<sup>35</sup> In Moisés in israelitos amo quinequije, quilije: “¿Quinami unca moyaxca pa tiyes tolaicanani huan tolamacahuani?” Ma yoje Dios quitilanic in Moisés, quichiác laicanani. Huan quilajtultic in Moisés pa quimacahuasquiaya in israelitos hual quipianijme pa tequipanulosquiaya amo ca laxlahuilisli. Yahuiaya quinmacahua pan ipampa ilanahuatini in cielo hual yahuiaya quipalehui. Cataya ilanahuatini in cielo hual quimonextilic ca in huizcuaajtzindi hual lalatataya.

<sup>36</sup> In Moisés quinlaicanac quinquixtitataya in israelitos pin lali Egipto. Quinchihuaya inminlaixpan yehuánten innojen hual quinlapolultiloaya ca lamajtilisli. Quinchihuilliaya pin lali Egipto huan pin Al Huejcalan Chichiltic, huan pa cuarenta xixihuimes pin lali capa amaqui oc sequín chantiaya.

<sup>37</sup> Yihual unca in Moisés hual quinmilic yehuánten ilacames Israel, quil: “Dios anmitzlatitilis se ilajtuni capa anmocnián. Yihual yes quinami nehual, yihual anquineltoacas.”

<sup>38</sup> In Moisés unca aqui cataya capa yehuánten ilacames Israel in xixihuimes quiman monexiculoaya capa amaqui chantiaya. Yihual cataya ca ilanahuatini in cielo hual laquetzaya ca yihual pin loma (tepel) hué itoca Sinaí. Huan yihual Moisés noje cataya ca totajtzitzían. Canac pan ipampa ilanahuatini in cielo in lajtol cuali hual techyuliltía, canac pa anmitzmacas amhuánten.

<sup>39</sup> Ma yoje, totajtzitzían amo quinequije quineltoaje in lajtol —quinmilic Estéban —, quitojpehuaje Moisés, amo quinequije quicaquije. Ca miác laneguilisli quijnamiquije Egipto, ca ompic quinequiloaya mocuepalo oc sejpa.

<sup>40</sup> Quilije Aaron; “Xitejchihuilli tatadioses hual techlaicanasi pa Egipto oc sejpa, pampa in Moisés, in se hual techhualiac techquixtitataya pa Egipto, axcan amo ticmatilo len quipanuc.”

<sup>41</sup> Cuaquín in tonalijmes quichihuaje se mono chicuenta se becerro. Quihualiquilije huendi ilaixpan, huahuaje quipiaje paquilisli pampa quichihuaje in becerro ca inminmajmajuan.

42 Pampín Dios mocahuac pa quinchihuilis cuali. Quitemacac pa quinmolancuacuetzilisi in tonali huan in mesli huan in silalimes. Yojque unca lajcuiluli pin iamal Dios ilajtuni, quijtua:

¿Annehualiquilic nehual huendis hual yeje yulijquimes pa cuarenta xixi-huimes pin lali capa amaqui chantiaya, amhuanten israelitos?

43 No, anquimantíac ilatzacualoni Moloc huan len chicuenta ilucero in dios itoca Renfán.

Cataloaya monos hual anquinchíac pa anquinmolancuacuetzilisi.

Pampín annimitzijcuanis pa anquisas pa anmolali huan annimitztilanis ca yoje nepa Babilonia.

44 'Pa innojen xixihuimes quiman cataloaya totajtzitzían capa amaqui chantiaya —Estéban quinlaquetzilijtiahuiaya—, quipianijme in cali lachihuali ca cuilaxli, nepa calijtic quinpianijme la'ajcoquili in tixcalimes, inminpan cataya lajcuiluli ilajtol Dios. Noje pin cali quimolancuacuetziliniyme Dios. Dios, pan tonaliymes hual laquetzac ca Moisés, quilic pa quichías in cali lachihuali ca cuilaxli jan quinami Dios quinextilic Moisés quiman cataya ca yihual pin loma (tepel) hué itoca Sinaí.

45 Canaje in cali totajtzitzían, quihualicaje pa in lali nican in tonaliymes quiman calaquije ca Josué. Quinlaicanac ca niquic Josué pampa Moisés polehuic. Moyaxcajtije ca in lali nican. Dios quinquixtiaya in oc sequin lacalera hual cataloaya nican. Totajtzitzían quitaje quinami Dios quinquixtic. Huan in cali lachihuali ca cuilaxli mocahuac nican huan cuaquín ajsije innojen tonaliymes quiman David yec hué.

46 Dios quichihuilic niman cuali David, huan David quitemachic Dios pa quimacahuiltis quichihuilis se cali hué pa iDios Israel.

47 Huan Dios amo quimacahuiltic. Cataya Salomón ixolol David hual quichihuilic Dios in cali.

48 Ma yoje, in Dios niman hué amo chanti pin tiopajmes hual quinchihualo lacames. Unca jan quinami quijtúa Dios pan ipampa ilajtuni, quilic:

49 Mochi in cielo jan unca san quinami capa nimolalía, huan in lalticpan jan unca san quinami capa niquinlalía nocxihujmes.

¿Len cali annejchihuilis? quil quilía in Tata,

o ¿len anquichías capa nimosehuis?

50 Amo huil anquichías len pa nehual pampa ca nehual nolahuelilitilisi niquinchíac mochi innojen.

Yojque quijtuc Dios.

51 ¡Amhuanten amo quiman anquinequi anquimati —quinnotzac Estéban —, huan mas que anquipía pan anmocuerpos in latequilisi hual quinextía tolajtulisi ca Dios, amo anquinequi anquinelto ca pa anmoyolo amo cuali! Anmonacajmes amo quinequilo lacaquilo pa anquijnamiquis in lajtulisi. Amo quiman anquinequi anquinelto ca in Espíritu Santo, anuncia quinami annotajtzitzían.

52 Ma annimitzili inon. Annotajtzitzían quintojtocanijme moxtin ilajtunijmes Dios pa quinchihuililosquiaya lacocoltilisi, quema, moxtin. Huan quinmictije yehuanten hual pa yina quinlamachilitoaya pampa hualas in lacal hual amo quipía laijlaculisi hual Dios yahuiaya quitilani pin lalticpan. Huan yihual in lacal hual amo quipía laijlaculisi amhuanten anquitemacac pa yes lamictili.

53 Jo quema, ancataya amhuanten hual anquipíac in ilajtol Dios pan inminpampa ilanahuatinijmes in cielo huan ma yoje amo anquinelto ca.

### *Quimictilo Estéban*

<sup>54</sup> Quicaquijque inon yehuanten pin Lanechiculisli Hué, cualaniloaya ca mochi inminchicahualisli huan lacuajcualoaya pa Estéban.

<sup>55</sup> Ma yoje, pa iyolo Estéban huelitiaya in Espíritu Santo, huan yihual Estéban mocajtiquisac lachixtica pa pani pin cielo (ilhuicac). Quitac ilaix-pelalisli cualtichin Dios, huan nepa moquezataya Jesús pa ima cuali Dios.

<sup>56</sup> Cuaquín quinnotzac in lalacera Estéban, quil:

—¡Xiquitacan, niquta lapujtica in cielo, huan yihual ilacal in cielo, yihual moqueztica pa ima cuali Dios!

<sup>57</sup> Cuaquín tzajtziyque ca lajtol chicahuac huan motzacuilijque inminnacajmes huan ca se lajtulisli molalujtiquisajque capa Estéban.

<sup>58</sup> Quiquixtitiquisajque pa quiahuc Jerusalén, cuaquinon quilaxilijque tixcalazos. Huan yehuanten hual quimotexpahuilijque Estéban quinmacajque inminnahujmes se lacal yancuic itoca Saulo pa yihual quinmitilis.

<sup>59</sup> Quimictiloaya Estéban ca tixcalazos, yihual quinoztataya in Tata, quil quilic:

—Tata Jesús, xicana noyulilisli.

<sup>60</sup> Cuaquinon molancuacuetzac, tzajtziac ca lajtol chicahuac, quijtuc:

—Tata, amo xiquinmotexpahuili pampa quichihuaje in laijlaculisli. Lamic quijtuc inon, polehuic.

## 8

### *Saulo quintojtoca in laneltocanjmes*

<sup>1</sup> Huan Saulo quinequiaya pa miquisquiaya, yihual cataya ca inminlaj-tulisli yehuanten hual quimictijque. Cuaquín in tonali, yehuanten hual amo quineltocaloaya Jesucristo pehuajque quintojtocajque niman míac in laneltocanjmes. Quintoajtocaloaya pa quinchihuilisqui lacocoltisli yehuanten hual cataloaya pa Jerusalén. Niman míac cholujque mosemantiajque caj-capic pin lalticpan Judea huan pin lalticpan Samaría. Jan in lanahuatinijmes san mocahuajque pa Jerusalén.

<sup>2</sup> Sequin lacames hual quineltocaloaya Dios ca mochi inminyolo quilal-pachujque Estebán huan quichoquilijque niman míac.

<sup>3</sup> Huan Saulo pehuac motolinic pa quinlamis in laneltocanjmes, calpanu-aya calactinemiaya pa inminchan, huan quinhuicatiahuiaya lacames huan sihuames, quinhuilantiahuiaya pa quintzacuas pin calijtic.

### *Quinlaquetzililo ilajtol Cristo capa yehuanten pa Samaría*

<sup>4</sup> Pampín mosemantiahuiiloaya in laneltocanjmes, yajtinemiloaya quinla-quetzilijticcate moxtin in lamachilitisli cuali.

<sup>5</sup> Huan Felipe temuc pa in caltilan hué pin lalticpan Samaría, nepa quinla-quetziliiaya in lacames ilajtol Cristo.

<sup>6</sup> Quicaquiloaya cuali in míac lacames in hual quinmiliaya Felipe. Cataloaya ca se lajtulisli pampa quicaquiloaya huan quitaloaya innojen míac hual quinchihuaya Felipe calica quinnextiliaya ilahuelilitisli Dios.

<sup>7</sup> Pan ipampa Dios ilahuelilitisli quisajque ijyecames amo cuajcuali pa míac hual quinpioaloaya, quisajque tzajtziyahuiiloaya chicahuac. Noje quin-pajtic Felipe míac cocoxquimes hual amo huil moliniloaya huan oc sequin hual amo huil nejnemiloaya cuali.

<sup>8</sup> Pampín cataya míac paquilisli pa in caltilan.

<sup>9</sup> Nepa cataya se lalac itoca Simón, yec lalac laxuxani nepa quiman ayamo hualac Felipe. Huan yehuanten pa Samaria molapolultinijme pampa quinmitanijme innojen hual yihual quinchihuani. In Simón quiqtuaya pampa yihual yec lalac ca míac lahuelilitisli.

<sup>10</sup> Huan moxtin lacames tijtipichin huan quema, lacames huejueyenten quicaquinijme ca mochi lamajtilisli, quiqtunijme:

—In Simón quipía Dios ilahuelilitisli, in lahuelilitisli hual itoca hué.

<sup>11</sup> Huan míac xixihuil quicaquinijme ca mochi lamajtilisli pampa molapolultinijme quiman quitanijme mochi in laxuxanilisli hual quichihuani.

<sup>12</sup> Cuaquín Felipe quinlaquetziliz yehuanten pa quimatilosquiaya ilahuelilitisli Dios huan ilahuelilitisli Jesucristo, huan pampín quineltocaloaya in lamachilitisli cuali huan cataloaya lacuayatequili lacames huan noje sihuames.

<sup>13</sup> Huan in Simón noje quineltocac huan cataya lacuayatequili. Cuaquín yihual mojmosta quitocatihuiaya Felipe huan molapolultiaya míac quiman yec quinmitaya panulo innojen hual quinextiloaya ilahuelilitisli hual Dios quipía.

<sup>14</sup> Cuaquín momachilitijque in lanahuatinijmes pa Jerusalén quinami yehuanten pin lalticpan Samaria quineltocaloaya ilajtol Dios. Pampín quinlanilijque Pedro huan Juan.

<sup>15</sup> Temujque yehuanten pa Samaria huan quilajlanijque Dios pa quin-huelilitis in Espíritu Santo yehuanten hual axan quineltocajque.

<sup>16</sup> Quipiajque pa quichihuasi inon pampa ayamo quin-huelilitic in Espíritu Santo yehuanten pa Samaria. Jan cataloaya lacuayatequili pampa quineltocajque Jesucristo.

<sup>17</sup> Cuaquinon quinlanilijque Pedro huan Juan inminmajmajuan pan yehuanten pa Samaria hual quineltocajque Cristo, yojque quin-huelilitic in Espíritu Santo.

<sup>18</sup> Huan quitac Simón quinami hualac in Espíritu Santo quiman yes in lanahuatinijmes quinlanilijque inminmajmajuan pani yehuanten. Pampa in quinequiaya quinmaca Pedro huan Juan tomin, quinmilic:

<sup>19</sup> —Xichmaca nehual noje in lahuelilitisli pa quihuelilitis in Espíritu Santo aquí yes niclailis nomajmajuan.

<sup>20</sup> Pedro quilic:

—Xipolehui ca mochi motomin pampa tiquijtuc tiahuiaya timocuhuilil lahuelilitisli hual Dios san quitlanía. In lahuelilitisli amo huil mocuhuilía se.

<sup>21</sup> Tehual amo unca moyaxca pa titequipanus ca in, pampa amo unca chipahuac moyolo ilaixpan Dios.

<sup>22</sup> Pampín xicpala moyolo, xijcahua in amo cuali hual tiquijtuc. Xiclajlani Dios pa cuajnesi yihual mitzpujpuhua in hual ticnequiaya tichía pa moyolo.

<sup>23</sup> In nimitzilía pampa niquita tehual timoxicujtica míac huan amo timocajtica pa tiquijtus len amo cuali pa moyolo.

<sup>24</sup> Cuaquín quinancuic Simón:

—Xiclajlánican in Tata pa nehual amhuanten pa camo nechpanus nindeno quinami in hual tichilic.

<sup>25</sup> Quiman lamijque quinnahuatilizque Pedro huan Juan in lamachilitisli cuali quinmilijtataloaya quinami unca melahuac ilajtol Dios, cuaquín canajque ojli pa mocuepasqui pa Jerusalén. Quinpanajtiahuiuloaya míac caltilan pa in lalticpan Samaria, nepa quinlanahuatilizque yehuanten in lamachilitisli cuali.

*Felipe quiximati se lalac hual chantiaya pin lali itoca Etiopía*

<sup>26</sup> Huan se ilanahuatini in Tata pin cielo (ilhuicac) quilic Felipe, quil:

—Ximoquetza huan xía pa sur, xicana in ojli hual quisa nepa Jerusalén huan temúa pa Gaza, in ojli panúa capa amaqui chanti.

<sup>27</sup> Cuaquín moquetzac Felipe, uyac. Cataya pa ojli, Felipe quitac se lalac hual chantiaya pa Etiopía, in lalac yec se eunuco (se lalac hual amo huil mochía itajtzin xolomes). Yihual yajtiahuiaya pan ojli pan layahualujquimes. Yihual yec hué lalac hual quitequipanuilic in hué sihual itocaya Candace hual huelitiaya pin lali Etiopía. Yec icomisariado de bienes, quilachiliaya mochi itomin in hué sihual. In lalac eunuco hualac pa Jerusalén pa quimolancuacuetzilis Dios.

<sup>28</sup> Axcan mocuetiahuiaya pa Etiopía. Molalijtataya pa ilayahualujquimes yihual, momaxtiaya in amal hual quijcuiluc Isaías hual pa yina yec ilajtuni Dios.

<sup>29</sup> Cuaquín in Espíritu Santo quilic Felipe, quil:

—Ximoajxilti pa in ca layahualujquimes.

<sup>30</sup> Yojque molalujtíac Felipe huan quicaquic in lalac momaxtitataya iamal Isaías ilajtuni Dios. Huan Felipe quilic:

—¿Ticmati len quinequi quijtúa in hual timomaxtitica?

<sup>31</sup> Huan in lalac eunuco quilic:

—¿Quinami huil nicmati sínda amaqui nechnextilía?

Quilic Felipe pa lejcus pin layahualujquimes pa molalis inahuac.

<sup>32</sup> Huan pa ilajtol Dios capa momaxtitataya yojque quijtuc:

Cataya quinami se borrego hual quihuicaloaya pa quimictisqui, huan quinami se borreguito hual amo choca quiman quiximalo, yojque cataya in lalac, amo quijtuc nindeno.

<sup>33</sup> Quichihuiliyque yihual len quichihuililo se lalac amo cuali, quimotexpahuiliyque mas que amo quichihuac nindeno amo cuali.

Huan ¿aqui huil quimati quichi cate moxtin aquinojen hual quineltoalo? Yihual quimictiyque huan quisac yihual pin lalticpan.

<sup>34</sup> In lalac eunuco quilajlanic Felipe, quilic:

—Ma nimitztlajlani, ¿aqui unca in se hual techlaquetziliytica in lajtuni? ¿Yihual ihuían, o oc se?

<sup>35</sup> Cuaquinon Felipe quinanquiliaya, pehuac quilic ilamachiltisli cuali Jesús quinami quijtuc ilajtol Dios pa in amal capa momaxtitataya in lalac eunuco.

<sup>36</sup> Quiman uyajtiajque oc se nadita pan ojli, ajsiyque capa cataya al, huan in lalac eunuco quilic:

—Xiquita. Nican unca al. ¿Amo huil niyes lacuayatequili nehual?

<sup>37</sup> Huan Felipe quilic:

—Sinda ticneltoca ca mochi moyolo, ¿leca camo?

Cuaquinon in lalac eunuco quinanquilic:

—Nícneltoca Jesucristo pampa yihual ixolol Dios.

<sup>38</sup> Cuaquín quilic pa moquetzasquiaya in layahualujquimes huan temu-jque in omenten pa al, Felipe huan in lalac eunuco, cuaquín Felipe quicuayatequic.

<sup>39</sup> Quisajque pin al, huan iEspíritu in Tata quihuicatiquisac Felipe, yojque in lalac eunuco yajmo quitaya. Cuaquín canac ojli oc sejpa, yajtíac ca míac paquilisli.

<sup>40</sup> Ma yoje, Felipe moitac pin caltilan itoca Azote huan quinquilajziya in lacames, quimilijtataya in lamachiltisli cuali nepa huan pa mochi innojen



caltilan hual quinpanajtiahuiaya. Lamic quinpanahuic huan ajsic pa in caltilan Cesarea.

## 9

### *Saulo quipala iyolo*

(Hch. 22:6-16; 26:12-18)

<sup>1</sup> Huan Saulo amo mocahuaya pa quijtutinemisquiaya pampa yahuiaya quinlami aquinojen quineltoaloaya in Tata. Pampa inon uyac quitac in tiopista hué.

<sup>2</sup> Quilajlanic pa quimacasquiaya amames lajcuiluli pa quinhuiquil-isquiaya yehuanten hual quipialoaya lahuellitilisi pin tiopajmes hual caloaya pin caltilan hué Damasco. In amames quimacahuilic Saulo pa quinquitzquisquiaya moxtin hual quitocaloaya Jesús iojli, ma yecan lacames o ma yecan sihuames. Cuaquinon quinhuicasquiaya lailpili pa Jerusalén.

<sup>3</sup> Huan cataya nepa quiman ajstitiahuiloaya pan ojli amo huejca pa quiahuac Damasco, jan ajnaxcan quixpelatiquisac itenco Saulo se laixpelal-isi pin cielo.

<sup>4</sup> Huetzic pan lali Saulo, quicaquic se lajtol quilic:

—Saulo, Saulo, ¿leca tiquintojtocatica yehuanten hual nechneltoalo? Yo-  
jque tichtojtocatica nehual.

Huan Saulo quinanquilic:

—¿Aqui tehual, Tata?

<sup>5</sup> Huan in lajtol quilic:

—Nehual nijesús hual tictojtocatica. Timococoltitica tehual, tiquinami se  
buey hual quitecuajtica in latzopinijquil ca icxían.

<sup>6</sup> Cuaquinon Saulo yuyucatataya quilic:

—Tata, ¿len ticnequi pa nicchías?

Quinanquilic:

—Ximoquetza huan xicalaqui pin caltilan, nepa mitzilisi se len ticpías pa  
ticchías.

<sup>7</sup> Huan mocahuajque, amo huil lajtujque in lacames hual ca Saulo yahui-  
loaya pin ojli. Quicaquijque quema in lajtol. Ma yoje amo quitajque  
amaqui.

<sup>8</sup> Cuaquín moquetzac Saulo capa cataya pan lali, huan quiman quinlapuc  
ixtololojmes amo huil lachiaya. Yoje in lacames ca yihual quiquitzi-  
quijque imajma huan quihuicajque pa Damasco.

<sup>9</sup> Huan cataya pa ye tonalijmes amo lachiaya, amo lacuaya huan amo  
launiaya.

<sup>10</sup> Cataya pa Damasco se laneltocani itocaya Ananías huan in Tata Jesús  
quixotocac Ananías huan quilic:

—Ananías.

Huan quinanquilic:

—Nican niunca, Tata.

<sup>11</sup> Huan in Tata Jesús quilic:

—Ximoquetza, xía pa in ojli itoca Melahuac, xictemu pa icali Juda se itoca  
Saulo hual chantini pin caltilan Tarso. Yihual quilajlantica Dios.

<sup>12</sup> Huan pan ipampa laixotocalisli yihual quitac se lalac, huan tehual  
tunca in lalac hual quitac. In Saulo mitzitic tihualac, tiquinlalic momajma-  
juan ipan pa lachiasquiaya oc sejpa.

<sup>13</sup> Quinanquilic Ananías, quilic:

—Tata, nechlamachiltije míac lacames in hual quichijtinemi in se. Quinchi-huilijtinemiaya tetzcuinuc yehuanten hual mitzneltocalo pa Jerusalén.

<sup>14</sup> Huan quimacahuiltije, quil, in tiopistas huejué pa Jerusalén pa hualasquiaya nican pa quinhuicasquiaya lailpili moxtin hual mitznotzalo pa tiquinpalehuis. Yahui quintzacua pin calijtic.

<sup>15</sup> Ma yoje, in Tata quilic:

—Xía, pampa nehual niclajtultic in Saulo pa nechtequipanuulis. Quinla-quetzilis nonahuac nehual inminlaixpan yehuanten hual amo judíos huan inminlaixpan inminhueyenten huan noje inmixpan in judíos.

<sup>16</sup> Nicnextilis Saulo quinami yahui quipía pa panus míac lacocoltilisli pampa yihual nechneltoca.

<sup>17</sup> Cuaquín uyac Ananías, calaquic pin cali capa cataya Saulo, quilalilic imajmajuan ipan, quilic:

—Nocni Saulo, nechtilanic in Tata, yihual hual mitzmonextilic tehual pan ojli capa tihualaya. Nechtilanic pa tilachías oc sejpa, huan pa mitzhuelilitis in Espíritu Santo.

<sup>18</sup> Jan ajnaxcan cataya quinami hueztiquisaje len chicuenta icaliyó michin pan Saulo iixtololojmes. Cuaquion huil lachiaya oc sejpa. Yoje, moquetzac huan cataya lacuayatequili.

<sup>19</sup> Cuaquion lacuac huan yojque canac chicahualisli. Mocahuac pa sequin tonalijmes umpa ca in laneltocanijmes hual cataloaya pa Damasco.

### *Saulo quinmíla lacames pa Damasco ilamachiltisli Cristo*

<sup>20</sup> Huan jan axcan pehuac quinlaquetzilic ilamachiltisli Jesús pin tiopas-  
jmes, quijtuaya pampa in Jesús yihual ixolol Dios.

<sup>21</sup> Yoje, molapolultijque moxtin hual quicaquiloaya, pehualoaya quijtulo:

—¿Amo yihual in se hual quinchihuilini lacocoltilisli yehuanten pa Jerusalén hual quineltocalo in Jesús? Huan ¿amo cataya pampa inon noje hualac yihual ca niguic pa quinhuicasquiaya lailpili pa in tiopistas huejué?

<sup>22</sup> Ma yoje, quinlaquetzilijthuiaya míac Saulo ilajtol Dios ca míac laj-matilisli huan amo momajtic. Yojque quinsulahuaya ca ilamaxtilisli moxtin in judíos hual chantiloaya nepa pa Damasco, quinnextiliaya neli pampa in Jesús yihual in Cristo hual Dios quitilanic pan lalticpan.

### *Saulo cholúa pa camo quimictisqui in judíos*

<sup>23</sup> Panujque míac tonalijmes, huan cuaquion molalilijque in judíos pa quitemusquiaya quinami quimictilosquiaya Saulo.

<sup>24</sup> Momachiltic Saulo pampa yahuiloaya quimictilo, quichixtataloaya yihual yihualitonali, pa semilhuil huan pa layúa, pa ilalapujquimes in latzacuali palahuac huan cuajtic hual quiyahualujtataya in caltilan.

<sup>25</sup> Pampín, quihuicajque Saulo in laneltocanijmes, quitemuhijque pa pani ilatzacuali palahuac in caltilan pa layúa, quitemuhijque ca se chiqui-huil hué ca mecames pa quiahuac in palahuac latzacuali, huan yojque choluc Saulo.

### *Saulo pa Jerusalén*

<sup>26</sup> Ajsic Saulo pa Jerusalén, quinequiaya yahui capa monechiculoaya in laneltocanijmes, huan momajtiloaya yehuanten pampa yihual quinchi-huilini tetzcuinuc, amo quijtuloaya pampa neli yihual axcan quineltocaya Cristo.

<sup>27</sup> Ma yoje, Bernabé quinamiquic Saulo quinami icni, quihuicac capa cayajque in lanahuatinijmes, quinpuhuilic quinami pan ojli Saulo quitac

in Tata Jesús huan quinami in Tata Jesús laquetzac ca Saulo. Bernabé noje quinmilic quinami nepa pa Damasco Saulo amo momajtiaya quinlaquetzili ilamachiltisli Jesús.

<sup>28</sup> Yojque, mocahuaya Saulo ca yehuanten, yajtinemiaya cajcapa pa Jerusalén.

<sup>29</sup> Laqueztinemiaya Saulo ilamachiltisli Jesús in Tata, amo momajtitica nindeno. Laquetzaya ca in judíos hual lajtuloaya griego, noje layantiaya ca yehuanten. Cuaquín yehuanten motoliniloaya pa quimictilosquiaya Saulo.

<sup>30</sup> Quimatijque inon icnián laneltocanijmes, huan quihuicajque Saulo, temujque pa Cesarea. Umpa quitilanijque pa barco pa in caltilan Tarso.

<sup>31</sup> Cuaquinon quipialoaya mosehuilisli moxtin in laneltocanijmes pa mochi in lalticpan Judea huan pin lalticpan Galilea huan pin lalticpan Samaria. Mojmosta monextילוaya míac ilamaxtilisli in Tata, yojque quinel-tocaloaya ca míac chicahualisli. Huan moxtin yultinemiyoaya momajtiloaya ilaixpan Dios. Huan quinpalehuiaya mojmosta in Espíritu Santo, yojque miajqe Dios ilacames.

### *Eneas unca lapajtli*

<sup>32</sup> Huan panuaya Pedro cajcapa pa míac caltilan, temuc pa se itoca Lida, nepa chantiloaya sequin hual Dios quinlajtultic pa quinelocalosquiaya.

<sup>33</sup> Nepa quitac se lacal itoca Eneas. In se lastataya pan lapexli quipiaya chicue xixihuil amo huil nejnemiaya.

<sup>34</sup> Huan Pedro quilic:

—Eneas, mitzpajtía Jesucristo. Ximoquetza huan xicajcoqui molapexli.

Jan ajnaxcan moqueztiquisac.

<sup>35</sup> Huan quitajque moxtin hual chantiloaya pa Lida huan pa quiahuac pin ixlán Sarón. Niman míac momalinajque inminyolo pa quitocasqui in Tata Jesús.

### *Dorcas yuli oc sejpa*

<sup>36</sup> Cataya pin caltilan itoca Jope se sihual laneltocani itoca Tabita. Pa lajtlogriego itoca Dorcas. In se mojmosta quinchihuiliytinemiaya len cuali oc sequin huan quinmacatinemiaya míac yehuanten hual amo quipialoaya nindeno.

<sup>37</sup> Pa in tonalijmes mococuhuaya, cuaquinon polehuic. Cuaquín caltijque in mijquil huan quihuicajque pa pani, quilalijque calijtic pin caltzindi pani in cali.

<sup>38</sup> Momachiltijque in laneltocanijmes pampa Pedro cataya nepa Lida hual amo cataya huejca. Pampín yehuanten pa Jope quintilanijque ome lacames ca capic cataya Pedro pa quillosquiaya:

—Amo xihuejcahua pa tihualas ca tehuanten.

<sup>39</sup> Yojque moquetzac Pedro, uyac ca yehuanten. Ajsic pa Jope, quihuicajque pa in calijtic pa pani. Huan hualajque ca Pedro moxtin in sihuames hual inminhuán, chocataloaya, quinextilijque in laquemes huan inminahuajmes hual quinnemiltiyoaya, hual quintzomilini Dorcas quiman yulini.

<sup>40</sup> Cuaquín quinquixtic Pedro pa quiahuac moxtin, molancuacuetzac quilajlanic Dios. Cuaquinon momalinac Pedro capa in mijquil, quilic:

—Tabita, ximoquetza.

Molapulic iixtololojmes huan quiztataya Pedro, molalic.

<sup>41</sup> Cuaquinon Pedro quimacac imajma huan quiquetzac Dorcas. Cuaquín quinnotzac in sihuames hual inminhuán huan quitemacac yultataya oc sejpa.

<sup>42</sup> Huan quimachiltijque inon pa mochi Jope. Pampa in, pehuaje quinelto-cajque in Tata Jesús míac lacames huan sihuames nepa Jope.

<sup>43</sup> Huan Pedro mocahuac pa Jope, chantitataya sequin tonalijmes pa ichan se itoca Simón, yihual quiyapani cuilaxli.

## 10

### *Pedro huan Cornelio*

<sup>1</sup> Cataya se lalac pin caltilan Cesarea, yihual itocaya Cornelio. Yec inmin-laicanani cien guaches hual cataloaya ilanechiculisli guaches hual motocaya in Italiano.

<sup>2</sup> Yihual yec lalac cuali, huan yihual huan moxtin hual chantiloaya pa ichan quimolancuacuetzililoaya Dios huan momajtiloaya ilaixpan Dios. Cornelio quimacani len cuali yehuanten in judíos hual amo quipialoaya nindeno huan mojmosta quilajlaniaya Dios.

<sup>3</sup> Se tonali quinami ye horas pa tiolac, quitac in Cornelio se ilanahuatini iDios in cielo (ilhuicac), hualac capa yihual quilic:

—¡Cornelio!

<sup>4</sup> Mocahuac Cornelio quiztataya huan momajtitataya, quilic:

—¿Len ticnequisquiaya, Tata?

In lanahuatini quilic:

—Quicaquic Dios inon hual ticlajlanic huan yihual quimati quinami tiquinpalehuía yehuanten hual amo quipialo nindeno. Pampín mitzij-namiquía.

<sup>5</sup> Axcán, xiquintilani lacames pa yasqui pa Jope, xicnahuati pa hualas se itoca Simón hual noje itoca Pedro.

<sup>6</sup> Nepa chantiticate huan se Simón hual quiyapa cuilaxli. Unca inahuac in al huejcalan icali in se hual quimati quiyapa cuilaxli. Mitzilis in Simón Pedro len ticpías pa ticchías.

<sup>7</sup> Jan axcan yajmo nesci ilanahuatini in cielo hual laquetzac ca yihual. Yojqe quinnotzac Cornelio ome itequipanujquimes huan se guache hual noje quinelto-caya Dios, yihual yec se ca yehuanten in guaches hual mojmosta mocahuaya quitequipanuiljtataya Cornelio san.

<sup>8</sup> Cuaquín quinmachiltic Cornelio mochi, quintilanic pa Jope.

<sup>9</sup> Mostatica, yehuanten cataloaya pin ojli huan moajxilitihualaloaya pa Jope. Huan Pedro axan lejcuc pa in cali ca pani capa palahuac pa quilajlanis Dios, cataya lacualispan.

<sup>10</sup> Huan mayantiquisac Pedro, quinequiaya lacua. Yojqe quiyucxilitoaya len quicuasquiaya. Huan quiman Pedro quichixtataya, moxtotoc len.

<sup>11</sup> Quitac lapujtica in cielo huan nepa temujtihualac len chicuenta se tzotzomajli hué, cataya latemuhuili ca itejtenco lailpili, temuc pan lalticpan.

<sup>12</sup> Pa in tzotzomajli cataloaya mochi yulijquimes ca nahui icxihuaimes huan yulijquimes hual mohuilanilo pan lali huan tutomes.

<sup>13</sup> Cuaquinon se lajtol mocaquic, quilic:

—Ximoquetza, Pedro, xicmicti len pa tijcuas.

<sup>14</sup> Pedro quilic:

—Amo quiman, Tata, pampa amo quiman nijcuac len hual amo cuali pa quicuasi tehuanten in judíos, jan quinami quijtúa tolajtol.

<sup>15</sup> Quijtuc in lajtol oc sejpá:

—In hual Dios quijtúa unca cuali pa quicuas se, amo xiquili tehual da amo cuali.

16 In panuc ca ye latemuhuilisli huan jan ajnaxcan yec lahuicali pin cielo in hual nesiaya chicuenta se tzotzomajli.

17 Yoje mocahuac Pedro quijnamicataya, quijutuc:

—¿Len yes inon? ¿Leca nechnextilic Dios in laxotocalisli?

Ca in nadita, ajsijque pa in cali capa cataya Pedro in lacames hual quintilanic Cornelio, lamijque lajlanijque capa cataya in cali huan axcan ajsijque.

18 Lanotzajque, lajlanijque sinda cuajnesi chantiaya nepa se itoca Simón hual noje itoca Pedro.

19 Pedro ayamo mocahuaya pa quijnamiquis in laxotocalisli.

20 Cuaquín in Espíritu Santo quilic:

—Xiquita. Cate ye lacames mitztemujticate. Axcan, ximoquetza, xitemu huan xía ca yehuanten. Amo xicmahuili, pampa nehual niquintilanic.

21 Yojque temuc Pedro capa cataloaya innojen lacames, quinmilic:

—Xiquitacan. Nehual aquí anquitemujtica. ¿Pa len anhualaya?

22 Yehuanten quinanquilijque:

—Unca se itoca Cornelio, yihual inminlaicanani cien guaches. Yihual se lalac cuali, quichía len Dios quinequi, momajtía ilaixpan Dios. Lajtulo cuali inahuac yihual moxtin in judíos. Se ilanahuatini in cielo quilic in Cornelio pa techtilanisquiaya pa timitzhuicalosquiaya tehual pa ichan. In lanahuatini quilic pa quicaquis len tehual tía tiquilía.

23 Pampín quinmilic Pedro pa mosehuilosquiaya, pa panulosquiaya in layúa ca yihual. Huan mostatica moquetzac Pedro, ca yehuanten uyac. Ca yehuanten noje uyajque sequin inmicnían laneltocanjmes, chantiloaya nepa Jope.

24 Mostatica ajsijque pa Cesarea, nepa quinchixtataloaya Cornelio ca icnían huan ilajlasojli hual yuliloaya pa oc sequin calimes, quinnehicuc Cornelio pa ichan.

25 Calactataya Pedro, quisac Cornelio pa quinamiquis, quimolancuacuetzilitihualaya Pedro.

26 Jan axcan, Pedro quiquetzac, quilic:

—Ximoquetza, nehual noje nilacal, amo xichmolancuacuetzili.

27 Cuaquín calaquic Pedro, huan yihual laquezatataloaya huan calijtic quinmitac Pedro lalalera lanechiculi.

28 Cuaquinon Pedro quinmilic:

—Amhuanten anquimati pampa tolajtol hual technextilía quinami ticmolancuacuetzililo Dios amo techmacahuiltía pa timochihuasi lajlasojli cuajcuali ca aquinojen hual amo cate judíos. Noje amo toyaxca pa tiquin-paxaluilisi. Ma yoje, nechnextilic Dios pampa amo unca cuali pa nehual niquijtus da amo cuajcuali yehuanten hual amo judíos huan yojque monequi pa camo niquijtus da amo unca cuali pa se judío quinpaxaluilis.

29 Yojque, nihualac pampa tilatilanic pa nihualasquiaya, amo nimone-nequic. Axcan, ma annimitzlajlani, ¿leca anlatalanic pa nihualasquiaya?

30 Cuaquín quijutuc Cornelio:

—Axan quipía nahui tonali ca nijquin horas, ye pa tiolac, niclajlantataya Dios nohuán pa nocalijtic huan monextitiquisac se lalac pa nolaixpan lalaquentili ca tzotzomajli laixpelatica.

31 Nechilic: “Cornelio, Dios quijnamiquic len ticlajlanic, huan noje quijnamiquic in cuali hual tiquinchihuilía judíos hual amo quipialo nindeno.

32 Axcan, xilatilani pa in caltilan Jope pa ticnahuatis pa hualas se itoca Simón hual noje itoca Pedro. Yihual chantitica pa ichan Simón in hual quimati layapa cuilaxli nepa inahuac in al huejcalan.”

<sup>33</sup> Jan axcan, nilatilanic pa tihualasquiaya huan tehual tinejchihuic cuali pampa tihualac. Axcan, timoxtin ticate nican ilaixpan Dios pa tijcaquisi mochi hual mitzilic in Tata pa titechilis.

*Inon hual quinmilic Pedro yehuanten pa icali Cornelio*

<sup>34</sup> Yoje pehuac laquetzac Pedro, quinmilic:

—Axcan neli nicmati pampa Dios quita se jan quinami quita oc se, da unca judío o da amo unca judío.

<sup>35</sup> Capa cate mochi lacames yihual quilajtultía aquí yes hual quimati momajtia ilaixpan yihual, aquí yes hual itequí quichía len cuali.

<sup>36</sup> Dios quintilanilic in judíos ilajtol, unca lamachiltisli cuali hual tech-hueliltía pa ticayasi jan sejpa ca Dios pan ipampa Jesucristo. Yihual iteco moxtin.

<sup>37</sup> Amhuanten anquimati in hual panuc pa mochi inminlali in judíos. Pehuac pin laticpan Galilea, cataya quiman Juan lamini lanoztinemi pa lacames quipalasi inminyolo pa laijnamiquisi quinami Dios, pa yoje huil yesi lacuayatequili.

<sup>38</sup> Cuaquinon Dios quilalic Jesús pa quichías itequipanulisli, yihual Jesús hual moscaltic pin caltilan Nazaret. Dios quimacac pa iyolo Jesús in Espíritu Santo, quimacac miac lahuellitlisli. Cuaquinon ca in lahuellitlisli yajtine-miaya Jesús quichijtataya len cuali. Quinpajtic moxtin aquinojen hual in lili quincocoltiaya ca ilahuellitlisli. Yojque quichihuaya Jesús pampa Dios cataya ca yihual.

<sup>39</sup> Huan nehual huan oc sequin lanahuatinijmes, tehuanten tiquitaje ca toixtololojmes mochi hual quichíac Jesús cajcapa pa inminlali in judíos huan pa Jerusalén.

<sup>40</sup> Huan quipiluje pan se cuahuil pa quimictisi huan yojque miquic. Ma yoje, yihual Dios quiyuliltic quiman panuje ye tonalijmes, quimacahuilic pa yesquiaya laitali.

<sup>41</sup> Amo quitaje moxtin, jan tiquitaje tehuanten san. Dios techlajtultic quiman ayamo panuje innojen, techlajtultic pa tiyelosquiaya hual tiquit-alosquiaya ca toixtololojmes. Tehuanten tiyeje aquinojen hual tilacuanijme huan tilaunijme ca yihual quiman yuliaya oc sejpa.

<sup>42</sup> Huan techtilanic pa tiquinlaquetzililosquiaya in judíos de inon. Techtilanic pa tiquijtulosquiaya neli pampa in Jesús unca yihual hual Dios quilaj-tultic pa yes la'ajuani pa in tonali quiman lamis in laticpan. Quijtus len quipanús sejse quinami cahuilúa aquí hual yahui caya yultica huan aquí hual miquic.

<sup>43</sup> Yojque quijtulo neli mochi in amames hual quinmijcuiluje Dios ilajtu-nijmes. Quijtulo pampa Dios quinpujpuhuas inminlaijlaculisli moxtin hual quineltovalo, quinpujpuhuas pan ipampa Jesús.

*Huala in Espíritu Santo pan innojen hual amo judíos*

<sup>44</sup> Ayamo lamiaya quinmilic Pedro in lajtomes huan hualac in Espíritu Santo ca moxtin hual quicaquiloaya.

<sup>45</sup> Huan molapolultiloaya moxtin in laneltocanijmes judíos hual yeje lat-zonatequili pa inmincuilaxlimes, yehuanten hual hualajque ca Pedro. Mo-lapolultiloaya pampa quitajque quinami hualac in Espíritu Santo noje capa in lacames hual amo yeje judíos, capa Cornelio huan icnían hual yuliloaya ca oc sequin calimes huan ilajlasojli.

<sup>46</sup> In judíos quincaquijque yehuanten hual amo yeje judíos. Quincaqui-jque yehuanten laquezataloaya ca oc sequin lajtomes hual ayamo quiman

quimatiloaya laquetzalo. Quילוaya Dios míac lajtomes cuajcuali huan huejué. Cuaquinon Pedro quinmilic yehuanten hual hualajque ca yihual, quinmilic:

<sup>47</sup> —Innojen quipialo in Espíritu Santo san quinami tehuanten. Neli amaqui huil quijtúa pampa amo unca inminyaxca pa tiquincuayatequisi ca al.

<sup>48</sup> Cuaquín quilic Pedro pa yesqui lacuayatequili quiman quijtuloaya pampa quineltocaloaya Jesucristo. Huan yehuanten quilajlanijque Pedro pa mocahuas ca yehuanten sequin tonalijmes.

## 11

*Pedro quinmachiltia in abuelojmes huan in lanahuatinijmes pa Jerusalén in hual panuc pa ichan Cornelio*

<sup>1</sup> Momachiltijque in lanahuatinijmes huan tocnían laneltocanjmes hual cataloaya pa Judea, momachiltijque quinami pehualoaya quineltocalo ilajtol Dios yehuanten hual amo yeje judíos.

<sup>2</sup> Quiman panquisac Pedro pa Jerusalén, pehualoaya cajualo in judíos hual quineltocaloaya in lajtol hual quijtúa pampa moxtin quipialo pa quipiasqui icuilaxli latzontequili quinami quijtúa inminlajtol in judíos.

<sup>3</sup> Quilijque:

—Tíac tipaxaluc pa inminchan yehuanten hual amo quipialo latzontequili inmincuilaxli quinami quijtúa tolajtol, noje ca yehuanten tilacuac.

<sup>4</sup> Pampa inon, pehuac quinmachiltic Pedro mochi sejse lachihualisli hual panujque, quinmilic:

<sup>5</sup> —Nicataya pin caltilan Jope, niclajlantataya Dios. Niquitac quinami len laxotocalisli, temujtihualac len chicuenta se tzotzomajli hué, yec late-mihuili pin cielo quinami quiquitzquitataloaya ca in nahui itejtenco, temujtihualac ca capic nicataya.

<sup>6</sup> Nimocahuac niquiztataya pa inon, niquitac ca nolajnamiquilisli. Niquinmitac iyulijquimes in laticpan ca nahui icxihuajmes, huan iyulijquimes in cuajlan huan yulijquimes hual mohuilanalo pan lali huan tutomes.

<sup>7</sup> Cuaquín nijcaquic se lajtol, nechilic: “Ximoquetza, Pedro, xicmicti len pa tijcuas.”

<sup>8</sup> Ma yoje, nicnanquilic: “Amo quiman, Tata, pampa amo quiman nijcua in hual tolajtol quijtúa pa camo quicuasi tehuanten in judíos.”

<sup>9</sup> Huan nechnanquilic in lajtol pin cielo oc sejpa, quil: “Amo xiquijtu pampa amo unca cuali pa quicuas se in hual Dios quijtúa pampa unca cuali.”

<sup>10</sup> Huan in panuc ca ye latemuhuilisli huan cuaquín lejuje in tzotzomajli huan in yulijquimes oc sejpa pin cielo.

<sup>11</sup> Cuaquinon jan ajnaxcan ajsije ye lacames pa in cali capa nicataya, cataloaya latilanili pa nechanasí, quisaje pin caltilan Cesarea.

<sup>12</sup> Nechilic in Espíritu Santo pa nías ca yehuanten huan pa camo nías nicmahuilijtataya. Yoique in lacames huan nehual tiaje pa Cesarea, noje chicuase tocnían uyaje ca tehuanten huan ticalaquije pa ichan in lalac itoca Cornelio.

<sup>13</sup> Techmachiltic in Cornelio quinami quitac se ilanahuatini in cielo pa icali calijtic moqueztataya, huan in lanahuatini quilic: “Xiquintilani lacames pa Jope pa canasi Simón, in hual noje itoca Pedro.

<sup>14</sup> Mitzilis quinami tehual huan moxtin hual chantilo pa mochan anyes laquixtili pin polehuilisli.”

15 Yojque, quiman nipehuac niquinlaquetzilic yehuanten, jan axcan hualajtiquisac capa yehuanten in Espíritu Santo jan quinami hualac capa tehuanten ipehuayan quiman pehuac quitilanic in Tata.

16 Cuaquín niquijnamiquic ilajtol in Tata Jesús quiman quijtuc: “Neli Juan lacuayatequic ca al. Ma yoje, amhuanten anyes lacuayatequili ca in Espíritu Santo.”

17 Pampín, sinda quinmacac Dios yehuanten in lahueliltilisli hual techmacac tehuanten noje hual ticneltocaje in Tata Jesucristo, cuaquinon nehual amo huil nictzacuilic Dios.

18 Quiman quicaquijque inon, yajmo cajuajque Pedro, quijtujque lajtomes huejué huan cuajcuali pa Dios, quilijque:

—Jan yoje Dios quimacahuiltic pa quinpalasi inminyolo pa laijnamiquisi quinami Dios yehuanten hual amo judíos, Dios quinmaca yulilislisli hual amo quiman lamis!

### *In laneltocanijmes pin caltilan Antioquía*

19 Quiman quimictijque Esteban, cuaquinon pehuajque quintejtemujque moxtin hual quineltoaloaya toTata Jesucristo pa quinchihuililosquiaya lacocoltilisli. Pampín cholujque in laneltocanijmes ca capic yesquiaya huan ajsijque pa in lali itoca Fenicia huan pa in lali lajco pin al huejcalan itoca Chipre huan pa in caltilan Antioquía. Quinlaquetzilijtinemiloaya ilajtol Dios ca in judíos san hual chantiloaya nejnepa.

20 Ma yoje, cataloaya sequin ca in laneltocanijmes hual chantinijme pa Chipre huan pa in lali itoca Cirene hual hualajque pa Antioquía, noje quimachiltilijtinemiloaya lacames griegos ilamachiltilisli cuali in Tata Jesús.

21 Huan quinhuelilític míac in Tata quiman quinmililoaya in lamachiltilisli cuali. Quineltoajque niman míac lacames huan canajque iojli in Tata Jesús.

22 Huan momachiltijque in laneltocanijmes pa Jerusalén quinami inon panuaya nepa Antioquía. Pampín quitilanjque Bernabé ca umpic pa Antioquía.

23 Huan quiman yihual ajsic, quitac quinami Dios quinchihuilic cuali in laneltocanijmes. Pampín quipiaya paquilisli huan quinchicahualtic pa inminyolo moxtin pa quitocasqui ca míac chicahualisli iojli in Tata Jesús.

24 Cataya pampa Bernabé yec lalac cuali. Yuliaya quimacahuiltitica pa in Espíritu Santo quimacas ilachicahualtilisli, huan noje quineltocaya in Tata Jesús ca mochi iyolo. Yojque miajque in lacames hual quineltoaloaya in Tata.

25 Cuaquín uyac Bernabé pa Tarso pa quitemusquiaya Saulo.

26 Quiman quitac Saulo, yihual quihuicac pa Antioquía, huan nepa mochualoaya ca in laneltocanijmes pa se xihuil. Ca yehuanten monechiculoaya, quinmaxtitataloaya míac lacames Bernabé huan Saulo. Huan nepa pa Antioquía cataya capa pehuaje quintocayaltije cristianos yehuanten hual quineltoaloaya toTata Jesucristo.

27 Innojen tonalijmes temuje pa Antioquía sequin ilajtunijmes Dios hual cataloaya pa Jerusalén.

28 Huan moquetzac se ca yehuanten itocaya Agabo, moquetzac pa lajtusquiaya. Quijtuc pan ipampa in Espíritu Santo pampa yahuiaya caya se mayandi hué pa mochi in lalticpan. In mayandi panuc quiman Claudio yec in hué romano pa mochi lalimes.

29 Yojque, quichihujque se lajtulisli yehuanten hual quineltoaloaya Jesús nepa pa Antioquía. Molalijque pa quinechiculosquiaya tomin, moxtin



tequipanujticate pa inon. In tomin quintilanosquiaya inmicnían hual chanfiloaya pa in lalticpan Judea. Mochí seise quimacac tomin quinami huil quichihuaya pa quinpaléhuis yehuanten hual amo quipialoaya nindeno.

<sup>30</sup> Cuaquinon yahuilloaya quintilanililo in tomin yehuanten hual quinmiztinemiloaya in laneltocaniymes pin Judea. Quintilanijque Bernabé huan Saulo pa quinhuiquilisqui in tomin pa yehuanten.

## 12

### *Quimictilo Jacobo huan quitzacualo Pedro pin calijtic*

<sup>1</sup> Pa innojen tonalijmes latilanic Herodes in hué pa quinquitzquilosquiaya sequin laneltocaniymes pa quinchihuililosquiaya lacocoltlisli.

<sup>2</sup> Latilanic pa quimictilosquiaya Jacobo hual yec icni Juan, quicotonilije iquixlan.

<sup>3</sup> Quitac Herodes quinami in quinpaquiltic in judíos, huan pampín latilanic noje pa quiquitzquilosquiaya Pedro. Cataloaya pin tonalijmes hual quicualoaya in pan hual amo quipía laxocoyajquil, itoca in fiesta (ilhuil) pascua.

<sup>4</sup> Yojque quiquitzquijque Pedro huan quitzacuajque pin calijtic. Quitemacajque ca dieciseis (caxtuli huan se) guaches pa quinapachilosquiaya pa camo quisasquiaya Pedro. Cataloaya nahui nahuenten, huan mochi seise quinpiaya nahui guaches. Seise nahuenten quipialoaya quiman yahuilloaya quinapachilo Pedro. Huan quiman lamisquiaya in fiesta (ilhuil), Herodes yahuiaya quiquixti Pedro pin calijtic, yahuiaya quijtu pampa quipiaya pa miquís. Cuaquinon yahuiaya latilani pa quimictilosquiaya inminyampa moxtin.

<sup>5</sup> Yojque, Pedro cataya latzacuali pin calijtic ca in guaches quinapachijtataloaya. Ma yoje, amo mocahuajque pa quilajlanilosquiaya Dios pa Pedro moxtin laneltocaniymes, quilajlanijque ca mochi inminyolo.

### *Dios quimacahua Pedro pa quisas pin calijtic*

<sup>6</sup> Yojque cataya in layúa, huan mostatica Herodes yahuiaya quiquixti Pedro. Coxtataya Pedro ca ome guaches, se pa ima cuali huan se pa ima amo cuali, huan yihual ilpitataya ca ome teposli. Noje cataloaya guaches pa quiahuac pin ilalapujquil in calijtic lanapachijtataloaya.

<sup>7</sup> Cuaquinon nestiquisac se ilanahuatini in cielo hual in Tata quitilanic. Lajtiquisac pin calijtic, huan in lanahuatini quitecuac Pedro pa iumil lanasticali, quejxiltic, quillic:

–Ximoqueztiquisa.

Copinijque in teposli pa imajmajuan.

<sup>8</sup> Huan in lanahuatini quillic:

–Ximolaquenti huan xiquinlali molacsames.

Yojque quichíac Pedro, huan in lanahuatini quillic:

–Xiclali monahuas huan xichtoca.

<sup>9</sup> Yojque quisac Pedro, quitocac in lanahuatini huan amo quimatiaya in hual quipanujtataya pan ipampa in lanahuatini cataya ca melahuac, jan quijtuaya pampa moxotocaya.

<sup>10</sup> Ajsijque capa cataloaya se nahuenten guaches lanapachijtataloaya, quinpanahuije yehuanten, ajsijque capa cataloaya in oc sequin guaches, quinpanahuijque. Cuaquín ajsijque pa in lalapujquil lachihuali ca teposli hual cataya inahuac itenco in ojli, in ojli temacaya pin caltilan. Molapuc in lalapujquil ihuán, quisaje yehuanten, canaje in ojli huan jan ajnaxcan yajmo nesic ilanahuatini in cielo ca Pedro.

<sup>11</sup> Axan quimatic Pedro pampa amo moxotocaya, quijtuc laijtuc yihual:

—Axan nicmati neli in Tata quitilanic se ilanahuatini in cielo. Quitilanic pa nechquixtis pin polehuilisli, in hual yahuiaya nejchihuili in hué Herodes. Inon yihual huan moxtin in judíos quichixtataloaya pa nechpanusquiaya.

<sup>12</sup> Quijtutiahuiaya pa iyolo ca inon, ajsic pa ichan María inantzin Juan. In Juan noje motocaya Marcos. Nepa cataloaya miac laneltocanijmes, monchiculoaya quilajlantataloaya Dios pa Pedro.

<sup>13</sup> Quitecuac Pedro in ilalapujquil in lajcotiyan hual cataya ilaixpan in cali. Hualac se tequipanujquil muachita itoca Rode pa quitasquiaya aquí cataya.

<sup>14</sup> Quimatic pampa cataya Pedro ilajtol, pampín mopaquiltic miac huan amo quilapulic in lalapujquil, jan molalujtiac pa quinmachiltisquiaya in oc sequin pampa Pedro cataya pa quiahuac in lalapujquil.

<sup>15</sup> Yehuanten quilije:

—Tehual ticchá quinami yes.

Ma yoje, yihual amo mocahuac pa quijtus cataya neli, cuaquinon yehuanten quijtujque:

—Unca ilanahuatini hual quisac pin cielo hual quilachilia.

<sup>16</sup> Huan Pedro amo mocahuac quitecuac in lalapujquil, pampín quilapulije. Quiman quitajque, molapolultijque.

<sup>17</sup> Huan yihual quitzejtzeluc ca imajma pa camo nahuatilosquiaya, cuaquinon quinpuhuic quinami in Tata quiquixtic pin calijtic, noje quinmili:

—Xiquinmachiltican Jacobo huan tocnían laneltocanijmes innojen hual nechpanuc.

Cuaquín quisac, mopalac pa camo moitasquiaya chantitataya umpa Jerusalén.

<sup>18</sup> Cuaquín quiman lanesic, in guaches amo quimatiloaya len quijtulosquiaya inahuac in hual quipanuc Pedro.

<sup>19</sup> Yoje latilanic Herodes pa quitemulosquiaya Pedro, huan amo quitaje. Cuaquín quinlajlanic Herodes in guaches len quipanuc. Yehuanten amo huil quinanguilije nindeno. Pampín latilanic pa quinmictilosquiaya in guaches, huan yihual quisac pin lalticpan Judea, temuc pa Cesarea, nepa mocahuac chantitataya.

### *Miqui Herodes*

<sup>20</sup> Huan cualantataya Herodes miac ca yehuanten pin caltilan Tiro huan in caltilan Sidón, yajmo lamacahuiltic pa yehuanten pa ilali quinnamaquiltilosquiaya len quicuasqui yehuanten pa Tiro huan Sidón. Ma yoje, yehuanten in tirotecos huan sidontecos quipialoaya pa molacualtilosquiaya ca in hual quinnamaquiltilosquiaya yehuanten pin lali capa in hué Herodes huelitiaya. Pampa inon quichihuajque lajtulisli ca Blasto, yihual yec se itequipanujquil hué Herodes. Quilijque Blasto in tirotecos huan in sidontecos pa yihual quitemachisquiaya Herodes pa mochiasquiaya jan sejpa ca yehuanten.

<sup>21</sup> Yojque, quilalic Herodes se tonali huan pa in tonali molaquentic ca itzotzomajli cualtichin hual quipialo in hueyenten. Molalic pa paní capa moxtin huil quitaloaya pan iicpali hué, cuaquinon quinnojnnotzaya yehuanten.

<sup>22</sup> Huan yehuanten tzajtziloaya, quililoaya:

—¡Unca se dios hual lajtúa, amo unca se lacal!

Yojque quijtuloaya pampa quinequiloaya pa mocahuasquiaya Herodes niman cuali ca yehuanten.

<sup>23</sup> Huan jan ajnaxcan, hualac se ilanahuatini in Tata pin cielo, quicocoltic Herodes ca se cocolisli pampa quimacahuilic pa in lacames quijtutine-milosquiaya yojque, quijtuloaya pampa Herodes yec se dios. Huan yojque Herodes amo momajtiaya ilaixpan Dios. Pampín, quicuajque oculilimes icuerpo (inacayo) Herodes, huan pampa inon miquic.

<sup>24</sup> Ma yoje, cataloaya míac hual quicaquiloaya ilajtol Dios huan miajque yehuanten hual quineltoaloaya.

<sup>25</sup> Quisajque Bernabé huan Saulo pa Jerusalén, mocuepajque pa Antioquía, axan laquisajque ca itequipanulisli nepa Jerusalén. Quihualicajque ca yehuanten Juan hual noje motocaya Marcos.

## 13

### *Quinlajtultilo Bernabé huan Saulo pa quichihuasqui oc se tequipanulisli*

<sup>1</sup> Pa Antioquía ca in laneltocaniymes cataloaya lajtunijmes huan lamax-tinijmes. Cataloaya Bernabé huan Simeón, yihual noje motocaya Niger, huan cataloaya Lucio hual chantini pin lali itoca Cirene, huan Manaen hual moscaltic ca Herodes in hué pa ichan, huan Saulo.

<sup>2</sup> Se tonali quilajlantataloaya Dios huan mosajtataloaya, quinmilic in Espíritu Santo:

—Xijxiluilican Bernabé huan Saulo pa quichihuasqui in tequipanulisli hual niquinmacac.

<sup>3</sup> Cuaquinon, mosahuajque huan quilajlanijque Dios, quinlalilijque in-minmajmajuan inminpan Bernabé huan Saulo. In lanextilic pampa Dios axan quinlajtultic pa in tequipanulisli. Cuaquinon in laneltocaniymes quin-lanijque Bernabé huan Saulo.

### *Quijtulo ilajtol Jesucristo Bernabé huan Saulo pin lali lajco pin al huejcalan itoca Chipre*

<sup>4</sup> Yojque quintilanic in Espíritu Santo. Quistataloaya pa Antioquía, temu-  
jque pa in caltilan itoca Seleucia. Nepa calaquijque se barco hué, uyajque pa in lali itoca Chipre lajco pin al huejcalan.

<sup>5</sup> Ajsijque pa se caltilan pa itenco Chipre hual motocaya Salamina. Umpa pa inmintiopajmes in judíos quinahuatiloaya ca mochi inminyolo ilajtol Dios. Noje cataya ca yehuanten Juan Marcos hual quinpalehuiaya.

<sup>6</sup> Cuaquín quipanahuijque pa mochi in lali huan ajsijque pa in caltilan Pafos. Nepa quitajque se lacal laxuxani, yec se ilajtuni Dios, quil quilic, mas que islacatic, amo yec neli. Yihual yec judío, motocaya Barjesús.

<sup>7</sup> In Barjesús yec inahuac in huelitini (gobernador) itoca Sergio Paulo hual yec lacal hual quimatiaya, huan yihual quinnahuatic pa hualalosquiaya Bernabé huan Saulo pampa quinequiaya quicaqui ilajtol Dios.

<sup>8</sup> Ma yoje, Barjesús in laxuxani molalic pa quintzacuilisquiaya yehuanten pa como quinahuatilosquiaya ilajtol Dios. In laxuxani noje motocaya Elimas. Elimas quinequi quijtúa laxuxani. Yihual amo quinequiaya pa Sergio Paulo quineltoacasquiaya Jesucristo.

<sup>9</sup> Ma yoje, Saulo hual noje itoca Pablo quiapiaya in Espíritu Santo quihuelilitataya pa iyolo, mochahuac quiztataya Elimas

<sup>10</sup> huan quilic:

—Tehual ticmatí tilacuaajcuamantía huan ticmatí ticchía mochi hual unca elehuis. Tehual tiquinami in lili, timolalía ipan mochi hual melahuac. ¿Amo quiman timocahuas pa ticchías pando iojli melahuac Dios?

<sup>11</sup> Huan axcan, xiquita. Yahui mitzcocoltía in Tata. Ticayas pachacal huan amo huil tiquitas nindeno pa míac tonalijmes. Cuaquín Dios mitzmacahuiltis pa tilachías oc sejpa.

Jan ajnaxcan, yajmo lachiaya, mopachacaruc. Quitaya laticumac san huan quitemujtinemiaya se hual quilaicanasquiaya ca imajma.

<sup>12</sup> Cuaquín pampa quitac in gobernador Sergio Paulo in hual quipanuc Elimas, yojque yihual quineltocac ilajtol Dios, molapolultic pampa quitac quinami ilamaxtilisli in Tata Jesús quiapiaya míac chicahualisli.

*Pablo huan Bernabé yahuil pa Antioquía pin lalticpan Pisidia*

<sup>13</sup> Huan quisajque ca barco nepa Pafos Pablo huan yehuanten hual catloaya ca yihual, ajsijque pin caltilan itoca Perge pin lalticpan Panfilia. Huan nepa Juan moxiluc pa yajmo cayas ca yehuanten, mocuepac pa Jerusalén.

<sup>14</sup> Pablo huan Bernabé quistiajque nepa Perge, ajsijque pin caltilan Antioquía pin lalticpan Pisidia. Uyajque pa inmintiopan in judíos pan tonali quiman mosehuilo in judíos, nepa molalijque. Quicaquijque se quinmomaxtilic yehuanten ilajtol Dios. Cataya pa iamal Dios ilajtomes hual quijcuilucque Dios ilajtunijmes.

<sup>15</sup> Cuaquinon, quiman laquisac quinmomaxtilic, ilaicananijmes in tiopan quinnotzajque Pablo huan Bernabé, quinmilijque:

—Lacames tocnán, sinda anquipía len lajtol calica anquinchichaualtis pa inminyolo in lacames, xiquilican.

<sup>16</sup> Cuaquín moquetzac Pablo, quixilanic imajma pa yehuanten pa camo nahuatilosquiaya, quinmilic:

—Lacames israelitos huan amhuanten amo israelitos hual ma yoje anmoajtía ilaixpan Dios, xilacaquican.

<sup>17</sup> InminDios in israelitos hual ticate tehuanten in judíos, yihual Dios molajtultilic totajtzitzían. Quinchihuilic hué yehuanten quiman catanijme pin lali itoca Egipto. Cuaquinon quinextic Dios ilahuelilitilisi huan quinlaicanac pa quiahuac Egipto.

<sup>18</sup> Pa cuarenta xixihuimes quinmolachiliaya yehuanten huan amo quinlamiaya mas que quichihuaniyme míac amo cuali pin lali capa amaqui chantiaya.

<sup>19</sup> Huan quiman quinsulahuilic chicome (siete) hueyenten ca inminlacames pin lali Canaan, quinxiluilic totajtzitzían inminlali yehuanten.

<sup>20</sup> Cuaquín Dios quinmacac laicananijmes pa huelitilosquiaya capa yehuanten quinami pa cuatro ciento cincuenta xixihuimes. Lamije quinlaicanaje yehuanten quiman ajsije in tonalijmes hual yuliaya Samuel, yihual yec Dios ilajtuni.

<sup>21</sup> Huan pa in tonalijmes totajtzitzían quinequiloaya quipialo se hué. Pampín, Dios quinmacac Saúl ixolol Cis. Yihual yec se lacal israelito ca imiahuimes Benjamín, huan huelitiaya in Saúl capa totajtzitzían pa cuarenta (ompuhuali) xixihuimes.

<sup>22</sup> Huan quiman Dios quijcuanic Saúl pa yajmo yes hué, cuaquín Dios quilajtultic David pa yes inminhué yehuanten, quijtuc cuali inahuac yihual, quilic: “David ixolol Isaí niquta quinami lacal hual quipaquiltía noyolo, yihual quichías len yes hual nicnequi.”

<sup>23</sup> Pablo lajtutíac, quinmilic:

—Huan quinami Dios quijtuc neli pa yina, yihual quihualiac pa tehuanten ilacames Israel se hual techquixtilía pin ipolehuilisi tolaijlaculisli. Huan in se unca Jesús imiahuil in hué David.

<sup>24</sup> In Jesús ayamo pehuac quichíac itequipanulisli pampa monequiaya pa Juan Lacuayatequini laquisasquiaya quinnahuatijtinemi Dios ilajtol inminlaixpan moxtin in judíos. Quinmiliaya pa quinpalalosquiaya inminyolo pa laijnnamiquis pa quinami Dios quinequi, cuaquinon quincuayatequisquiaya.

<sup>25</sup> Cuaquín pa innojen tonalijmes hual Juan lamiaya quichía itequipanulisli, quijtuaya: “Nehual amo niunca aqui anquijtutica amhuanten. Xiquitacan. Hualas se nechtocatica nehual, huan nel amo nimonotza pa nictomilis ilailpili ilacsames pampa yihual unca niman hué, nehual amo quiman nicayas yoje hué.”

<sup>26</sup> Pablo lajtutíac, quinmilic:

—Lacames nocnían, amhuanten imiahuimes Abraham huan amhuanten hual annomajtía ilaixpan Dios, ma annimitzili inon. Dios quinequic pa tijcaquilosquiaya in lajtol hual techquixtía pin ipolehuilisli icualanilisli Dios.

<sup>27</sup> Yehuanten hual chantilo pa Jerusalén, huan yehuanten hual quipialo lahuelilitlisli amo quimatiloaya aqui yec Jesús. Amo quimatiloaya len quinequi quijtúa in hual quijcuiluje ilajtunijmes Dios. Amo quimatiloaya mas que momaxtilo inon pan mochi in tonalijmes quiman timosehuilo. Pampín quitilaniye in Jesús pa quimictilosquiaya, yoje lamije quichihuaje in hual yec lajcuiluli.

<sup>28</sup> Huan mas que amo quitaje len calica huil quitilansi pa yesi lamictili, ma yoje quitemachije Pilato pa latilansi pa in guaches quimictilosquiaya Jesús pan se cuahuil.

<sup>29</sup> Yoique lamije quichihuaje len quijtulo in amames inon hual quipiaya pa quipanusquiaya Jesús. In amames quinmijcuiluje pa yina Dios ilajtunijmes. Quiquixtijje pin cuahuil, quitemuhuije, quilalpachuje pa se cueva pa lajtice se tel, se coyunquil capa quilalilo mijquimes.

<sup>30</sup> Ma yoje, Dios quiyuliltic, quiquixtice capa in mijquimes.

<sup>31</sup> Huan cuaquinon Jesús monextic míac tonalijmes ca yehuanten hual pehuanijme ca yihual pin lalticpan Galilea, panquisanijme ca yihual pa Jerusalén. Axan yehuanten quinnahuatilitinemilo moxtin lacames ilajtol yihual.

<sup>32</sup> Huan tehuanten antimitzilijticate san in lamachilitlisli cuali. Inon unca hual neli Dios quinmilic totatzitzían pampa yahuiaya quinchihuili. Huan inon Dios axan lamic quinchihuilic yehuanten inminmiahuimes totatzitzían pan tonali hual quiyuliltic Jesús oc sejpa.

<sup>33</sup> Huan tehuanten inminmiahuimes totatzitzían. Unca quinami quijtúa pa salmo ome: “Tehual tinoxolol”, quil, “axan nimochíac motajtzin.”

<sup>34</sup> Quema, Dios quiyuliltic quiquixtitataya pa camo palanisquiaya icuerpo. Techilía pa ilajtol lajcuiluli pampa yahuiaya quichía inon, quilic: “Neli nimijchihuilis len hué pa tehual, yes inon hual niquilic David pampa niahuiaya nimijchihuili.”

<sup>35</sup> Inon quijtuc Dios, pampa ca oc se ilajtol noje quijtuc jan quinami cataya Jesús hual lajtutataya, quilic: “Amo ticmacahuiltis pa palanis nocuerpo nehual molajtultili hual fichlajtultic.”

<sup>36</sup> Axcan in ticmatilo. David huelitini capa totajtzitzían in judíos quinami quinequiaya Dios. Cuaquinon polehuic David, quilalpachuje huan ticmatilo pampa palanic icuerpo David.

<sup>37</sup> Ma yoje, amo palanic icuerpo yihual hual Dios quiyuliltic oc sejpa.

<sup>38</sup> Xicmatican axcan, lacames nocnían, pan ipampa in Jesús Dios quinpuhuas anmolajlaculisli, inon antimitzililo neli.

<sup>39</sup> Pan ipampa Jesucristo, Dios quinquixtilía inminlajlaculisli moxtin hual quineltoalo. In lajtol hual Dios quilib Moisés amo quiman huil quinquixtilic in lacames inminlajlaculisli.

<sup>40</sup> Xiquijquiztiacan pa como anmitzpanus len quijcuiluje ilajtunijmes Dios, quijtuje:

<sup>41</sup> Xiquitacan amhuanten laxijxunijmes, huan ximolapolultican huan xipolehuican,

pampa nehual nía nicchía len pan innojen tonalijmes quiman anyultías.

Yes len hual amo anquineltoacasquiaya mas que se anmitzilisquiaya.

Yojque quijtúa ilajtol Dios.

<sup>42</sup> Yojque Pablo laquisac quinlaquetziliz huan quistiajque pin tiopan yihual huan Bernabé. Cuaquín yehuanten hual lacatijque judíos quitemachijque pa quinnahuatillosquiaya oc seppa innojen lajtomes, huan pa quinnahuatillosquiaya pa in oc se tonali quiman mosehuiloaya.

<sup>43</sup> Lamis in lanechiculisli pin tiopan huan míac judíos quintocajque Pablo huan Bernabé. Noje quintocajque míac hual amo yeje judíos mas que quimolancuacuetzililoaya Dios quinami in judíos. Huan quinlaquetzilijque Pablo huan Bernabé, quinchicahaltijque pa como mocahualosquiaya pa quineltoacatillosquiaya Dios huan pa quijnamictiasqui quinami quinmicnília yehuanten.

<sup>44</sup> Ajsic in oc se tonali quiman mosehuiloaya, huan ca nadita moxtin yehuanten pin caltilan monechicujque, pampa quinequiloaya quicaquilo ilajtol Dios.

<sup>45</sup> Ma yoje, quiman in judíos quinmitajque in míac lacalera hual hualajque, niman moxicujque, quijtutinemiloaya pampa amo melahuac in hual quinmiliaya Pablo, quihuejuecaltitinemiloaya ilajtol Jesucristo.

<sup>46</sup> Ma yoje amo momajtiloaya Pablo huan Bernabé, amo mocahualoaya. San quinlaquetzililoaya, quinmilloaya:

—Ticpiaje pa tipehualosquiaya antimitzlaquetzililo amhuanten ilajtol Dios. Ma yoje amo anquinequi anquinelto. Amhuanten quinami lacames hual anmomaca ojli quinami in la'ajuaniymes quinchihuililo yehuanten hual oc sequin quinmotexpahuililo. Yoje amhuanten anmochijtica lacames hual amo monotzalo pa quipiasi in yulilislis hual amo quiman lamis. Pampín xiquitacan. Antimitzcajahualo huan tiquinlaquetzilisi yehuanten hual amo judíos.

<sup>47</sup> In ticchihualo pampa yojque techilic in Tata. Yihual pa yina quilib: Annimitzljaltultic pa anquinnahuatilis nolajtol capa moxtin yehuanten pin lalticpan,

yojque quimatisqui pampa nehual niquinquixtilis inminlajlaculisli, pampa nolajtol quinalhuilis yehuanten no'ojli.

<sup>48</sup> Yoje, quiman quicaquijque inon yehuanten hual amo judíos, quipiajque míac paquilisli, quijtuloaya lajtomes cuajcuali huan huejué ilaixpan in Tata. Quineltoajque moxtin aquinojen Dios quinlajtultic pa quipialosquiaya in yulilislis hual amo quiman lamis.

<sup>49</sup> Yojque mosemanac ilajtol in Tata pa mochi in lali.

<sup>50</sup> Ma yoje in judíos latenehualoaya inminahuac Pablo huan Bernabé ca in sihuames hual yuliloaya quichijticate len quijtulo in lajtomes quinami quipialoaya pa quimolancuacuetzilisqui Dios. Moxtin quimatioaya momajtilo pampa quineltoaloaya inminlahueliltilisli in lajtomes. Huan in judíos yojque quincualantijque ca Pablo huan Bernabé. Noje quincualantijque in hueyenten pin caltilan ca Pablo huan Bernabé. Quimpehualtijque pa quintojtocasqui huan yojque quinquixtijque pa inminlali.

<sup>51</sup> Ma yoje, quintzejtzjelujque Pablo huan Bernabé inminlacsames pa quiquixtililosquiaya ilalmoluncal inminlali. Yojque quinextlijtataloaya yehuanten pa Antioquía quinami cataya niman amo cuali inon hual quichihuaque, pampa amo quixtocaloaya ilajtol Dios. Cuaquinon uyajque pa in caltilan Iconio.

<sup>52</sup> Ma yoje yehuanten hual quineltocajque nepa pa Antioquía quipialoaya paquilisli huan in Espiritu Santo huelitiaya pa inminyolo.

## 14

### *Pablo huan Bernabé pa Iconio*

<sup>1</sup> Moitaloaya pin caltilan Iconio Pablo huan Bernabé, huan calaquijque in omenten pa inmintiopan in judíos. Nepa niman cuali quinnahuatiliqque ilajtol Dios, huan yoje quineltocajque niman míac lacames, judíos huan yehuanten hual amo judíos.

<sup>2</sup> Ma yoje in judíos hual amo quinequiloaya quineltocalo Cristo ilamachiltilisli cuali quincualantijque yehuanten hual amo judíos, quincualantijque ca yehuanten hual, quemá, quinequiloaya quineltocalo.

<sup>3</sup> Ma yoje, Pablo huan Bernabé panuloaya míac tonalijmes nepa, quinnahuatiloaya in Tata ilajtol, amo momajtitataloaya. Huan in Tata Jesús quinnextilic in lacames pa Iconio pampa cataya melahuac in lajtol hual Pablo huan Bernabé quijtuloaya. Quinnextilic inon pan ipampa quinami Pablo huan Bernabé quinpajtic cocoxquimes, Dios quinhueliltic pa quinpajtije.

<sup>4</sup> Ma yoje, amo cataloaya ca se lajtulisli in lacames. Sequin quixtocaje len quijtuloaya in judíos, oc sequin quixtocaje len quijtuloaya in lanahuatini-jmes Pablo huan Bernabé.

<sup>5</sup> Yojque, quichihuaque in judíos se lajtulisli ca yehuanten hual amo judíos huan ca yehuanten hual quipialoaya lahueliltisli. Quichihuaque lajtulisli pa quinhuejuecaltilosquiaya in lanahuatini-jmes huan pa quinlaxililosquiaya tixcalazos.

<sup>6</sup> Quimatijque inon Pablo huan Bernabé, pampín cholujque pa ome caltilan huejué hual motocaje Derbe huan Listra. Noje cataloaya sequin caltilan pa inmintejtenco. Innojen caltilan cayajque pin lali itoca Licaonia.

<sup>7</sup> Nepa quinnahuatiloaya ilamachiltilisli cuali Jesucristo.

### *Quilaxililo tixcalazos Pablo*

<sup>8</sup> Huan cataya se lalacal pa Listra amo huil quinnejnemiltiaya icxihua-jmes. Latic yojqque huan amo quiman nejnemic.

<sup>9</sup> Nepa molalijtataya, quicaquiaya laqueztataya Pablo. Pablo mocahuaya quizataya huan quitac pampa in lalacal quimatic pa iyolo pampa Dios huil quipajtisquiaya.

<sup>10</sup> Yojque ca lajtol chicahuac, Pablo quilic:

—Ximoquetza melahuac ca moxihua-jmes.

Huan moqueztiquisac huan tzicuinic, pehuac nejnemic.

<sup>11</sup> Yojque, quiman quitaje in lacames in hual quipanuc in lalacal, pehuaje tzajtziye ca ilajtol Licaonia, quijtutataloaya:

—¡Innojen lacames neli cate todioses hual mochihua-jmes quinami lacames huan quisaje pin cielo huan temuje ca tehuanten!

<sup>12</sup> Yojque Bernabé quilalilije itoca inmindios Júpiter, huan Pablo quilalilije itoca inmindios Mercurio, pampa Pablo cataya in se hual cantataya in lajtol. Quijtulo in licaontecos pampa inmindios Mercurio quichía yojqque.

<sup>13</sup> Huan quipiani yehuanten in licaontecos itiopan nepa capa calaquiniyme pin caltilan, nepa quimolancuacuetziliniyme in dios Júpiter. Huan in tiopista quinhualicac toros huan in lacames quisujsujque xuchimes hual in tiopista quinhualicac pa ilalapujquimes ilajcotiyan inmintiopan. Yihual huan in míac lacalera quinequiloaya quinmictilo in toros pa yoje quinmolancuacuetzililosquiaya Pablo huan Bernabé.

<sup>14</sup> Quiman quicaquijque in lanahuatinijmes Pablo huan Bernabé len yahuiloaya quichihualo, jan axcan quintzayaniyque inmincotones pampa quincocuc inminyolo ca cualanilisli pampa yahuiloaya quichihualo inon. Molasaje lajco capa in míac lacalera, quintzajtzilije quinmilijtataloaya:

<sup>15</sup> —¡Lacames! ¿Leca anquichijtica inon? Tehuanten tilacames jan quinami amhuanten. Antimitznahuatitilo in lamachiltilisli cuali pa antimitznextilisi quinami monequi pa anmoca huas pa anquinmolancuacuetzilis in monos huan pa anquimolancuacuetzilis in Dios hual yultica. Yihual quichíac in cielo huan in lalticpan huan in al huejcalan huan mochi hual cate ca innojen.

<sup>16</sup> Pa yina Dios quinmacahuiltini lacames pa quinmanasi inminojlimes yehuanten.

<sup>17</sup> Ma yoje, amo mocahuaya pa quichiasquiaya len calica quinnextiliaya pampa yihual unca Dios. Quimacaya in quiahuil, quinmacaya in tonaliyjes quiman lapixcalo quiman yucsi in laquilyo huan in trigo. Techlacualtía pa tipachihuisi huan techmoixtocaltilía toyolo ca paquilisli.

<sup>18</sup> Pablo huan Bernabé yojque quinmilijque huan quinmilijque pa camo quinmictilosquiaya in toros calica yahuiloaya quinchihuil molancuacuetzalisi. Cuaquinon in licaontecos mocahuaje pa quichihualosquiaya, mas que ca nadita Pablo huan Bernabé amo huil quintzacuililoaya pa camo quichihualosquiaya yojque.

<sup>19</sup> Cuaquín hualajque in judíos hual chantiloaya pa Antioquía huan Iconio, quinyantijque yehuanten pa Listra pa cualanilosquiaya ca Pablo. Pampín quilaxilijque ca tixcalazos yehuanten pa Listra, cuaquinon quihuilanajque pa quiahuac in caltilan pampa quijtujque pampa miquic.

<sup>20</sup> Ma yoje, quiman monechicujque in laneltocaniyjes quiyahualujtaloaya itenco Pablo capa lastataya nepa, yihual moquetzac huan calaquic pin caltilan. Mostatica yihual huan Bernabé uyajque pa in caltilan Derbe.

<sup>21</sup> Cuaquinon quinnahuatilitinemiloaya yehuanten pa Derbe ca in lamachiltilisli cuali, huan míac lacames mochihuaje laneltocaniyjes. Cuaquín mocuepajque Pablo huan Bernabé pa Listra huan Iconio huan pa Antioquía.

<sup>22</sup> Quinchicahualtijque inminyolo innojen laneltocaniyjes pa camo mochualosquiaya pa quineltocasqui Jesucristo. Quinmilijque:

—Timoxtin ticpialo pa tipanusi míac lacocoltilisli, jan yoje tiajsisi capa Dios huelitía.

<sup>23</sup> Huan quinlajtultijque sequin lacames pa yelosquiaya yehuanten hual quinmitalosquiaya in laneltocaniyjes. Cuaquinon quilajlanijque Dios huan mosahuaje, quintemacaje pa ilahuelitilisli in Tata Jesucristo yehuanten hual quineltocaloaya.

### *Mocuepalo Pablo huan Bernabé pa Antioquía pin lalticpan Siria*

<sup>24</sup> Cuaquín quipanahuijque Pablo huan Bernabé in lalticpan Pisidia, huan uyajque pa in lalticpan Panfilia.

<sup>25</sup> Umpa quinnahuatilijque Dios ilajtol pa Perge, huan ca se nadita temu-  
jque pa Atalia.



<sup>26</sup> Cuaquín uyajque ca barco hué huan ajsic pa Fenicia. Nepa canajque ojli pa ajsisqui pa Antioquía pin lalticpan Siria, capa pehuajque canajque ojli pa in lalimes ca capic uyajque. Nepa cataya capa in laneltocanijmes pehualoaya quintilanilo Pablo huan Bernabé huan quilajlaniloaya Dios pa quinpalehuis pa huil quichijtiásqui in tequipanulisli hual Dios quintilanic pa quichihualosquiaya. Huan axcan lamijque quichihuaque in tequipanulisli, axcan mocuepajque.

<sup>27</sup> Ajsijque pa Antioquía, quinahuatijque pa monechiculosquiaya yehuanten hual quineltocaloaya Jesucristo. Cuaquín quinlamachiltijque mochi hual quichíac Dios pan inminpampa yehuanten, quinami yihual quinhuelilitic yehuanten hual amo judíos pa quineltocasqui in Tata Jesucristo.

<sup>28</sup> Huan panujque Pablo huan Bernabé míac tonalijmes ca yehuanten hual quineltocaloaya in Tata Jesús nepa pa Antioquía.

## 15

### *Monechiculo in lanahuatinijmes huan abuelojmes pa Jerusalén*

<sup>1</sup> Cuaquinon, cataloaya sequin hual quisajque pin lalticpan Judea huan temujque pa Antioquía. Pehualoaya quinmaxtilo tocnían laneltocanijmes hual amo judíos, yojque quinmילוaya:

—Sinda amo anuncia latzontequili pa anmocuilaxli quinami quimaxtic Moisés pa yina, cuaquinon amo huil anyes laquixtili pin ipolehuilisli Dios icualanilisli.

<sup>2</sup> Pampín Pablo huan Bernabé pehualoaya quinlaxililo lajtomes ca in judíos, quinmילוaya pampa amo neli cataya inon hual quimaxtitataloaya, quinmילוaya pampa amaqui ca in lacames hual amo judíos quipía pa lamis quichías inon hual quijtúa in lajtol hual Moisés quijcuiluc. Ma yoje, in judíos hual quisajque pin Judea quinlaxilijtinemiloaya lajtomes chichahuac ca Pablo huan Bernabé. Pampín in laneltocanijmes quinlajtultijque Pablo huan Bernabé huan oc sequin ca yehuanten, quinlajtultijque pa panquiasosquiaya pa Jerusalén. Nepa yahuilaloaya quinmitalo in lanahuatinijmes huan in abuelojmes. Yahuilaloaya quinnahuatililo in hual quinmaxtiloaya in lacames pa Jerusalén hual temujque pa Antioquía. Quinequiloaya quimatilo neli sinda in hueyenten pa Jerusalén cataloaya ca se lajtulisli ca inon hual quinmaxtiloaya.

<sup>3</sup> Yojque, in laneltocanijmes quintilanjque. Yehuanten quipanahuijque pa in lali Fenicia huan in lalticpan Samaria, huan cajcapa quinlaquetzilijtinemiloaya moxtin in laneltocanijmes quinami yehuanten hual amo judíos quicajcualoaya quinami molancuacuetzanijme inminlaixpan inmindioses huan pehualoaya quineltocalo Dios. Quiman quicaquijque inon, quipialoaya míac paquillisli moxtin in laneltocanijmes pampa yehuanten hual amo judíos noje quineltocaloaya.

<sup>4</sup> Cuaquín ajsijque pa Jerusalén. Quimpialtijque ca paquillisli in laneltocanijmes huan in lanahuatinijmes huan in abuelojmes. Huan Pablo huan Bernabé quinmachiltijque mochi hual Dios quichíac pan inminpampa yehuanten.

<sup>5</sup> Ma yoje, moquetzajque sequin hual quineltocaloaya inminlamaxtilisli in fariseos huan noje quineltocaloaya in Tata Jesús, quinmilijque:

—Monequi pa tiquinmilisi pa quichihuasi inon hual quijtúa in lajtol hual Moisés techmacac, quipialo pa quintzontequilisli mochi seje icuilaxli.

<sup>6</sup> Monechicujque in lanahuatinijmes huan in abuelojmes pa molaquetzil-isqui pa ajsilosquiaya mocahualo ca se lajtulisli.

<sup>7</sup> Quiman molaquetziliijque míac, cuaquinon moquetzac Pedro, quinmilic:

—Lacames nocnían, amhuanten anquimati amo quipía míac quiman Dios nechljaltultic nehual pa niqinmilis in lamachiltisli cuali yehuanten hual amo judíos. Pan ipampa inon hual niqinmilic, yojque quicaquije huan quineltocaje.

<sup>8</sup> Dios quinmiximati inminyolo lacames huan yihual quinextilic pampa quinmanac yehuanten hual amo judíos. Nicmati inon pampa Dios quinmacac in Espíritu Santo jan quinami techmacac tehuanten.

<sup>9</sup> Dios quinnequi yehuanten quinami yihual technequi tehuanten noje pampa quinchipahuilic inminyolo quiman quineltocaje ilajtlo.

<sup>10</sup> Axcán, ¿leca anquijuttica pampa Dios quinequi pa quichihuasi lanex-tilisli pan inmincuerpos tocnían hual amo judíos? Dios technextilic pampa yajmo monequi pa quipiasí inon. ¿Anquinequi anquicualantía Dios, cuajnesi? Anquinctica anquilalilía len etic pa tocnían hual amo huil mopepenialtisi pa lamisi quichihuasi. Tehuanten noje amo huil timopepenialtiloaya pa til-amilosquiaya ticchihualo mochi len quijtúa ilajtlo Moisés, huan totajtzitzián amo huil mopepenialtinijme pa quichihualosquiaya.

<sup>11</sup> Amo xicchihuacan inon. Ticmatilo pampa ticate laquixtili pa ipolehuil-isli Dios icualanilisli pan ipampa iicnililisli in Tata Jesús. Huan ticmatilo pampa unca yojque ca yehuanten noje hual amo judíos.

<sup>12</sup> Yojque, yajmo nahuatijque in laneltocanijmes. Cuaquinon quicaquij-que len quinmilijque Bernabé huan Pablo, quinmachiltijque mochi hual Dios quichíac pan inminpampa yehuanten quiman cataloaya ca yehuan-ten hual amo judíos. Quinmachiltijque quinami quinpajtiloaya ca Dios ilahueliltisli.

<sup>13</sup> Huan quiman laquisajque lajtujque Bernabé huan Pablo, cuaquinon lajtuc Jacobo, quinmilic:

—Lacames nocnían, xichcaquican.

<sup>14</sup> Axcán anmitzmachiltic Simón Pedro quinami Dios pehuac quinnextilic ilahueliltisli capa yehuanten hual amo judíos, quil quilic, Dios quichíac in pa quinlajtultisquiaya, quil, lacames capa yehuanten hual quineltocalosquiaya Cristo.

<sup>15</sup> Huan inon unca ca se lajtulisli ca len quijtunijme Dios ilajtunijmes. Yojque unca lajcuiluli len Dios quinmilic:

<sup>16</sup> Quiman lamisi panusi innojen, nehual Dios nimocuepas ca nolacames in judíos, imiahuimes David,

yehuanten yes quinami se tiopan laxitinili pampa cate lacames laijlaculi.

Ma yoje, in tonali hual nimocuepas ca yehuanten, cuaquín in hual niquinchi-huilis yes quinami nicchijchihuasquiaya in tiopan laxitinili, huan yoje niquinchijchihuilis innojen lacames laijlaculi.

Nechmolancuacuetzilisqui quinami nechmolancuacuetzilinijme yehuan-ten hual yulinijme quiman yulini in hué David.

<sup>17</sup> Nicchihuas in pa yojque quitemusqui quiximatisqui in Tata in oc sequin lacames pin lalticpan, jo quema, mochi in oc sequin lacames hual amo judíos hual nehual in Tata niquinlajtultic pa mochi oc sequin lalimes.

<sup>18</sup> Yojque quijtúa in Tata hual quichihua innojen, yihual hual aquí tech-machiltic mochi inon pa yina.

In unca len Dios quinmilic ilajtunijmes.

<sup>19</sup> Pampín —quinmilic Jacobo—, niqijtúa ma camo tiquinmacacan tequil aquinojen hual amo judíos hual pejticate quineltoalo Dios.

<sup>20</sup> Annimitzmaca lajtol pa tiquinmijcuiluilisi se amal. Jan tiquinmilisi san pa camo quicuasi in huendis hual quilalilo inminlaixpan in monos inmindioses yehuanten hual amo quineltoalo Cristo. Tiquinmilisi pa se amo canas se sihual o se lalac hual amo unca isihua o ilahuical, pa quipías jan se iyaxca san. Noje tiquinmilisi pa camo quicuasi inacal se yulijquil hual quitolpatzcaje pa quimictisi hual iesli amo quisac quiman miquic. Noje tiquinmilisi pa camo quicuasi esli. Yojque amo quincualantisi in judíos.

<sup>21</sup> Quipialo pa quichihuasi yoje pampa axan pa mochi caltlan cate judíos hual pehualoaya chantilo nepa pa yina, huan quicaquilo momaxtilo ilajtol Moisés pa inmintiopajmes. Noje quinlaquetzililo ilajtol Moisés mochi in tonalijmes hual mosehuilo.

<sup>22</sup> Cuaquinon yehuanten in lanahuatinijmes huan in abuelojmes huan moxtin in laneltocanijmes quitajque cuali pa quinlajtultilosquiaya lacames pa quintilanosquiaya pa Antioquía ca Pablo huan Bernabé. Quilajtultijque Judas hual noje motocaya Barsabás huan noje quilajtultijque Silas. In omenten yejque huejué lacames ca in laneltocanijmes tocnán.

<sup>23</sup> Quitlanijque ca yehuanten se amal hual quihuicajque pa Antioquía. In amal quijtuc:

“Tehuanten in lanahuatinijmes huan in abuelojmes anmocián antimitzijcuiluililo amhuanten tocnán hual amo judíos pa Antioquía huan pa in lalticpan Siria huan pa in lalticpan Cilicia, antimitzipialto.

<sup>24</sup> Techlamachiltije pampa sequin ca tehuanten quisaje nican, quil, huan uyaje pa amhuanten, mas que tehuanten amo tiquntlanije. Anmitzmacaje tequil, quil, huan pampín amhuanten amo anquimatiaya len yesquiaya cuali pa anquichías, quil, huan anmitzmacac tequil ca inon hual anmitzmactiloaya. Anmitzilije pampa anquipía pa anmotzontequilis anmocuixlaxli huan anquipía pa anquineltoacas in lajtol hual Dios quilic Moisés.

<sup>25</sup> Pampín tehuanten timoxtin timocahuaje ca se lajtulisli huan techanac cuali pa tiquinlajtultisi lacames pa antimitztilanilisi ca tolasojli Bernabé huan tolasojli Pablo.

<sup>26-27</sup> Pan míac tonalijmes Pablo huan Bernabé moitalo yultinemilo capa ca nadita miqulosquiaya pampa quitequipanuililo in Tata Jesucristo. Ca yehuanten techanac cuali pa antimitztilanilisi Judas huan Silas hual anmitznahuatilisli mochi pa anquimatis cuali len quinequi quijtúa ilajtol in Tata.

<sup>28</sup> Antimitzijcuiluililo inon pampa tiqitaje cuali tehuanten huan in Espiritu Santo pa camo antimitzilisli pa anquichías míac. Jan xicchihuacan san innojen hual monotzalo.

<sup>29</sup> Amo xijcuacan len hual quilalilo inminlaixpan in monos inmindioses hual quinmolancuacuetzililo, amo xijcuacan esli, amo xijcuacan inacal se yulijquil hual quitolpatzcaje pa quimictisi. Huan sejse lalac ma quipía se isihua san, huan sejse sihual ma quipía se ilahuical, ma camo moteca ca oc se, san ca in se hualca monamictic. Sinda anquinneltoca innojen, yojque anquichías cuali. Ma Dios anmitzpiá.”

<sup>30</sup> Yojque, quintlanijque, quisajque pa Jerusalén yehuanten, huan temujque pa Antioquía. Nepa ajsijque, quinnahuatijque pa monechicusqui in laneltocanijmes, quinmacajque in amal.

<sup>31</sup> Quiman quinmomaxtilijque in amal, paquijque in laneltocanijmes pampa in lajtomes quinlacahuatijque, quinquixtilijque inminicnotilisli.

<sup>32</sup> Judas huan Silas noje yeje yehuanten ilajtunijmes Dios huan pan ipampa inon hual quinmaxtiloaya, quinchicahualtiloaya míac inminyolo tocnían huan quinpalehuiloaya pa quineltoacasqui Jesucristo niman cuali.

<sup>33</sup> Judas huan Silas huan in oc sequin hual quistihualajque nepa Jerusalén mocahuajque nepa pa Antioquía sequin tonalijmes, cuaquinon yahuiiloaya mocuepalo capa tocnían laneltocanijmes pa Jerusalén hual latilanijque pa hualalosquiaya pa Antioquía. Yehuanten pa Antioquía quinchicahuajque quinsejtataloaya yehuanten pa mocuepasqui cuali pa Jerusalén capa cataloaya yehuanten hual quintilanijque.

<sup>34</sup> Ma yoje, Silas molalic pa mocahuas nepa Antioquía.

<sup>35</sup> Huan mocahualoaya Pablo huan Bernabé pa Antioquía ca tocnían, lamaxtitinemiloaya huan quinnahuatilijtinemiloaya ilamachiltlisli cuali in Tata. Huan cataloaya míac oc sequin hual noje lamaxtiloaya capa in laneltocanijmes.

*Pablo pehua yahui huejca oc sejpa pa quinahuatis in lajtol cuali*

<sup>36</sup> Panuje sequin tonalijmes, huan Pablo quilic Bernabé:

—Axcan, ma timocuepacan, ma tiquinpaxalulican tocnían pa mochi innojen caltilan capa tiquinnahuatilije in Tata ilajtol. Ma timocuepacan pa tiqitasi quinamí cate.

<sup>37</sup> Bernabé quinequiaya quihuica noje ca yehuanten Juan, in hual noje motocaya Marcos.

<sup>38</sup> Quijtuc Pablo pampa amo cataya cuali pa quihuicalosquiaya Juan Marcos ca yehuanten pampa yihual quincajcahuac nepa capa cataloaya pin lalticpan Panfilia.

<sup>39</sup> Cuaquín molaxililoaya lajtomes míac. Ma yoje, amo ajsijque pa se lajtulisli. Pampa in, moxilujque. Bernabé quihuicac Juan Marcos ca yihual, uyajque ca barco pa Chipre.

<sup>40</sup> Pablo quilajtultic Silas pa yasquiaya ca yihual, huan inmicnían laneltocanijmes quilajlanijque in Tata pa quinmitasquiaya ca iicnililisli.

<sup>41</sup> Quipanahuijque in lalticpan Siria huan in lalticpan Cilicia huan quinchicahualtitinemiloaya inminyolo in laneltocanijmes nejnepa.

## 16

*Timoteo yahui ca Pablo huan Silas*

<sup>1</sup> Ajsijque Pablo huan Silas pa Derbe huan Listra. Nepa cataya se laneltocani itoca Timoteo, ixolol se síhual judía hual quineltoac Cristo. Itajtzin yec se lalac griego.

<sup>2</sup> Lajtujque cuali inahuac Timoteo icnían laneltocanijmes pa Listra huan Iconio.

<sup>3</sup> In Timoteo Pablo quinequiaya pa yasquiaya ca yihual. Ma yoje canac huan quitzontequilic pa icuilaxli, pampa cataloaya míac judíos pa innojen caltilan huan quimatiloaya itajtzin Timoteo yec lalac griego.

<sup>4</sup> Cuaquín quinpanahuijque Pablo huan Silas huan Timoteo pa sequin caltilan huan pa oc sequin huan laquetzajque ca moxtin in laneltocanijmes. Quinmilije inon hual in lanahuatinijmes huan in abuelojmes pa Jerusalén quilijque pa quichihualosquiaya moxtin in laneltocanijmes hual amo yeje judíos.

<sup>5</sup> Yojque, quinchicahualtijque pa quineltoacasqui in Tata Jesús niman cuali, huan yojque itequi miajque in lacames hual quineltoaloaya toTata.

*Pan ipampa laxotocalisli, Pablo quita se lalac hual yuliaya pa Macedonia*

<sup>6</sup> Quipanahuijque in lali itoca Frigia huan in lali itoca Galacia, huan quintzacuilic in Espíritu Santo pa camo quinnahuatillosquiaya ilajtol Dios pin lalticpan Asia.

<sup>7</sup> Pampín, uyajque huan ajsijque pa in lali itoca Misia, yahuiloaya yahuilo pa in lalticpan itoca Bitinia. Ma yoje, ¡Espíritu Jesús amo quinmacahuiltic.

<sup>8</sup> Cuaquín quipanahuijque in lali itoca Misia huan temujque pa Troas huan nehual Lucas niquinmitac nepa.

<sup>9</sup> Huan pa layúa nesic ca Pablo len quinami laxotocalisli, quitac se lacal hual yuliaya pin lali Macedonia, moquezataya huan quitemachijtataya, quilic: “Xipanú pa Macedonia, xitechpalehui.”

<sup>10</sup> Quiman quitac Pablo in laxotocalisli, jan ajnaxcan timochijchihujque pa tiyahuilosquiaya pa in lali Macedonia. Ticmatijque pampa technotzaya Dios pa tiquinnahuatillosquiaya in lamachiltisli cuali ca yehuanten pa Macedonia.

### *Pablo huan Silas yahuilo pa in caltilan Filipos*

<sup>11</sup> Yojque, quisajque ca barco nepa Troas, tiajque jan yoje pa in lali lajco pin al huejcalan itoca Samotracia. Mostatica tiajsijque pa in caltilan Neapolis.

<sup>12</sup> Nepa tiquisajque, tiajque pa in caltilan Filipos. Inon in caltilan hué pa ilajco Macedonia capa quisa in tonali, unca se caltilan romano. Cataloaya guaches romanos hual quipehualtijque, yojque mocahua se caltilan romano. Ticataloaya sequin tonalijmes nepa.

<sup>13</sup> Pan tonali quiman mosehuilo, tiquisajque pa quiahuac ilalapujquimes in caltilan, tiajque pa atenco hué capa tiqijitujque yahuinijme pa quilajlanilosquiaya Dios. Nepa timolalijque, tpehualoaya tilaquetzalo ca in sihuames hual monechiculoaya.

<sup>14</sup> Cataya nepa se sihual itoca Lidia, lacatic pin caltilan Tiatira. In Lidia yec se lanamacani, quinamacaya tzotzomajli hual cataya layapali morado. Yihual Lidia quimolancuacuetziliaya Dios. Mocahuaya quicactica len Pablo quinmiliaya, huan in Tata Jesús quihueliltic pa iyolo pa quilalic ilaneltocalisli ca in hual Pablo quijtuaya.

<sup>15</sup> Yojque, cataloaya lacuayatequili, yihual huan noje yehuanten pa ichan, huan cuaquinon quinmilit Pablo huan yehuanten hual cataloaya ca yihual, quinmilit:

—Sinda anquijtua pampa nehual neli nicneltoca in Tata, xihualacan pa nochan, nepa xichantican.

Yojque technotzac ca lanequilisli, pampín nepa tiajque pa tichantillosquiaya.

<sup>16</sup> Cuaquín cataya se tonali tiyahuloaya pa capa quilajlaniloaya Dios, cataya se muachita hual itecojuan moyaxcajtijijque yihual. In muachita quinqtequipanuilini itecojuan, quiapiaya se iyjecal amo cuali hual quilalilic Satanás. Yihual in muachita quinnehicuhuilic míac tomin pa itecojuan, pampa in iyjecal amo cuali quihueliltini yihual pa quijtusquiaya len yahuiaya panu.

<sup>17</sup> Technamiquic pan ojli huan pehuaya techtoca totepoczcon Pablo huan tehuanten, tzajtziyahuiaya, quiliaya:

—In lacames yehuanten itequipanujquimes Dios, in Dios hual san yihual unca hué. Yehuanten anmitzmachiltilo iojli capa ancayas laquixtili pin polehuilislí.

<sup>18</sup> In quichihuaya míac tonalijmes. Cuaquín cualaniaya Pablo pampa quimacaya tequil. Pampín momalinac quinotzac in iyjecal amo cuali, quilic:

—Nimitzilía pan ipampa Jesucristo ilahueliltisli, xiquisa capa yihual.

Huan jan ajnaxcan in ijyecal quisac pa yihual.

<sup>19</sup> Axcan, quitajque itecojuan in muachita pampa yajmo huil quinechicuhuilic tomin. Pampin quinqutzquijque Pablo huan Silas, quinhuilanajque pin tenencia capa cataloaya in hueyenten.

<sup>20</sup> Quinmotexpahuilijque Pablo huan Silas, quilijque:

—In lacames cate judíos, quimacalo tequil tocaltilan.

<sup>21</sup> Yehuanten quinmaxtilo lachihualisli hual molalilo ipan tolajtol sinda tiquinneltocasi o sinda tiquinchihuasi, pampa tehuanten ticate lacames hual ticpialo toyaxca ca romanos.

<sup>22</sup> Yojque, cualantihualajque ca yehuanten moxtin in lacames, huan in guaches quinquixtilijquisajque innahuajmes quintzayanilijtataloaya. Latilanijque in la'ajuaniymes pa quinhuitequilosquiaya.

<sup>23</sup> Cuaquín quiman lamijque quinhuitequijque ca miac latecualisli, quinhuicajque pa in calijtic, quilijque chicahuac in se hual quintzacuaya pa quinmitasquiaya cuali pa camo quisalosquiaya.

<sup>24</sup> Yihual quicactataya in lajtol, quintzacuac pa in niman calijtic, quinlalilic icxihuajmes pan sequin cuahuimes hual quipiajque cojcoyunquimes capa quinqutzquijque inmicxihuajmes. Amo huil quinquixtiloaya inmicxihuajmes pampa quintzacualo in cuahuimes ca teposlimes.

<sup>25</sup> Ma yoje, pa lajco layúa, quilajlaniloaya Dios Pablo huan Silas huan quicantarullijtataloaya (quicuilijtataloaya) Dios ca lajtomes cuajcuali huan huejué. Huan in oc sequin hual cataloaya latzacuali pa calijtic quincauloaya.

<sup>26</sup> Jan ajnaxcan, laulinic chicahuac, moliniloaya ilalastili in calijtic, molapujque mochi lapapujquimes jan ajnaxcan huan tomajque in teposlimes, huetzijque mochi sejse hual cataya pan in laquitzquilini.

<sup>27</sup> Cuaquín ejsac in se hual quinmiztataya yehuanten hual cataloaya latzacuali huan quinmitac in lapapujquimes lapujticate. Cuaquín quiquixtic iteposli pa moanalisli, yahuiaya momicti, quijtuaya pampa cholujque moxtin hual cataloaya latzacuali.

<sup>28</sup> Jan axcan, Pablo quinotzac ca lajtol chicahuac, quilic:

—Amo ximomicti, pampa timoxtin nican ticate.

<sup>29</sup> Molajlanilic in lalac se tixuxli, calactiquisac capa cataloaya Pablo huan Silas, molancuacuetzac yuyucatataya inminlaixpan.

<sup>30</sup> Huan quinhuicac pa quiahuac, quinmilic:

—Tatas, ¿len nicpía pa nicchías pa niyes laquixtili pin ipolehuilisli?

<sup>31</sup> Huan quilijque:

—Xicneltoca in Tata Jesucristo huan tiyes laquixtili pin ipolehuilisli Dios icualanilisli, tehual huan moxtin pa mochan.

<sup>32</sup> Huan uyajque pa ichan, quinnahuatilijque ilajtol Dios ca yihual huan moxtin pa ichan.

<sup>33</sup> Huan jan axcan in layúa quinhuicac in lalac Pablo huan Silas, quinpaquilic inminlatecualisli huan ca nadita cataloaya lacuayatequili yihual huan moxtin hual chantiloaya pa ichan.

<sup>34</sup> Cuaquín quinhuicac Pablo huan Silas calijtic pa ichan huan quinlacualtic. Huan quipialoaya paquilisli yihual huan moxtin pa ichan pampa axcan quineltocaloaya Dios.

<sup>35</sup> Mostatica in la'ajuaniymes quinnahuatijque in lachianiymes pa quililosquiaya in lalac hual quinlachiliaya yehuanten hual cataloaya latzacuali pa calijtic, quilijque:

—Xiquinmacahua in omenten lacames.

<sup>36</sup> Yojque in lalac quinmilic Pablo huan Silas in lajtomes, quinmilic:

—Axan nechnahuatije in la'ajuaniymes pa annimitzmacahuasquiaya. Pampín, xiacan, ma Dios anmitzhuica.

<sup>37</sup> Ma yoje, Pablo quinmilic in lachianijmes, quil:

—Tehuanten ticate lacames hual ticpialo toyaxca ca romanos. Huan antechhuitequic inminyampa yehuanten pa anmocaltilan. Inon anquichíac mas que amo quilajlanijque in la'ajuaniymes leca techmotexpahuilliloaya. Cuaquinon antejtzacuac pin calijtic. Mochi inon hual antejchihuilic amo unca quinami quijtúa in lajtól pa lacames hual cate ca inminyaxca romanos. Huan axcan ¿yalo techmacahualo huan amo inminyampa yehuanten pa anmocaltilan, yojque pa camo quimatis amaqüi? Pampa no. Ma hualacan yehuanten in la'ajuaniymes, ma techmacahuacan yehuanten.

<sup>38</sup> Innojen lachianijmes (policías) quinmachiltije in la'ajuaniymes in hual quinmilic Pablo. Huan quiman momachiltijque in la'ajuaniymes pampa Pablo huan Silas yeje ca inminyaxca romanos, yojque momajtijque míac.

<sup>39</sup> Hualajque capa Pablo huan Silas, quinlajlanijque pa quinpujpuhualosquiaya. Cuaquinon quinquixtijque pin calijtic huan quintemachijque ca mochi inminyolo pa quisalosquiaya inminaltilan.

<sup>40</sup> Yojque quisajque capa cataloaya latzacuali huan cuaquín uyajque pa ichan Lidia. Nepa quinpxalulijque in laneltocaniymes tocnían huan quinchicahualtijque pa inminyolo, cuaquín uyajque.

## 17

### *Cualantinemilo yehuanten pa Tesalónica*

<sup>1</sup> Quimpanahuijque Pablo huan Silas in caltilan Anfipolis huan in caltilan Apolonia, ajsijque pa Tesalónica. Nepa cataya se inmintiopan in judíos.

<sup>2</sup> Huan quinami itequi quichihuani Pablo, calaquic pin tiopan pan tonali quiman mosehuilo huan pa ye tonalijmes quiman mosehuilo quinnahuatilic Dios ilajtol lajcuiluli.

<sup>3</sup> Quinmaxtiaya huan quinnexiliaya pampa quiapiaya pa panusquiaya lacocoltilisli in Cristo huan noje quiman miquic, quiapiaya pa yulis oc sejpa, quinmiliaya:

—In Jesús, yihual in Cristo, inahuac yihual annimitzmachiltitica.

<sup>4</sup> Cataloaya sequin ca yehuanten in judíos pehualoaya quineltoalo Cristo huan quintocaloaya Pablo huan Silas. Noje pehualoaya quineltoalo míac ca in lacames griegos hual quimolancuacuetzililoaya Dios. Huan quineltoaloaya míac sihuames hual moxtin quimatiloaya momajtilo inminlaixpan yehuanten.

<sup>5</sup> Ma yoje, moxiculoaya in míac judíos pampa sequin cantataloaya oc se ojli hual cataya Cristo iojli. Pampín quinmanajque lacames ej'elehuis capa in lacames hual amaqüi quinmitaya ca mosehuilisli, quinnechicujque, quinmilijque pa tzajtzinemilosquiaya pa quimacalosquiaya tequil moxtin pa Tesalónica. Yojque, hualajtiquisajque pa ichan se itoca Jason, quintemujtaloaya Pablo huan Silas, quinequiloaya quinhuicalo capa cataloaya lanechiculi in lacames pin caltilan.

<sup>6</sup> Amo quinmitajque Pablo huan Silas, pampín quihuilanajque Jason huan sequin tocnían laneltocaniymes, quinhuicajque pa la'ajuaniymes in caltilan, tzajtzihualaloaya, quilijque:

—In lacames hual temacalo tequil pa mochi in lalticpan hualajque noje ca niquic. Quinmanac Jason pa chantilosquiaya pa ichan huan umpa chantiticate.

<sup>7</sup> Huan innojen moxtin lachihualo quinami ilacocolinijmes ilajtomes in hué Cesar, quijtulo pampa unca oc se hué pa mochi in lalticpan, itoca Jesús.

<sup>8</sup> Quicaquijque inon in la'ajuaniymes huan in lacames, pampín cualanijqe.

<sup>9</sup> Yojque, canilijque tomin Jason huan innojen oc sequin tocnían, quipi-aloaya pa quicuepilisi in tomin Jason huan tocnían quiman quisalosquiaya Pablo huan Silas pa quiahuac Tesalónica. Canajque in tomin, cuaquinon quinmacahuajque Jason huan in lacames hual cataloaya ca yihual.

### *Pablo huan Silas yalo pa in caltilan Berea*

<sup>10</sup> Yojque, jan ajnaxcan pa layúa yehuanten tocnían quintilanijque Pablo huan Silas pa in caltilan Berea. Huan quiman ajsijque umpa, Pablo huan Silas uyajque pa inmintiopan in judíos.

<sup>11</sup> Yehuanten in judíos pa in tiopan nepa quipialoaya inminyolo hual míac quinequiloaya quineltocalo ilajtol Dios, amo cataloaya quinami yehuanten pa Tesalónica. Mojmosta momaxtiloaya in lajtol lajcuiluli pa quimatilosquiaya sinda innojen lajtomes cataloaya quinami Pablo quinmaxtitataya.

<sup>12</sup> Yojque, quineltocaloaya Jesús míac judíos nepa. Noje quineltocaloaya míac sihuames griegas hual moxtin quimatiloaya momajtilo inminlaixpan yehuanten. Huan noje quineltocaloaya lacames griegos.

<sup>13</sup> Ma yoje, momachiltijque in judíos nepa pa Tesalónica pampa quinnahuatiaya Pablo noje pa Berea. Pampín uyajque umpa noje, quijtutinemiloaya pampa amo melahuac len Pablo quimaxtiaya, quiyantitinemiloaya pa quitojtocalosquiaya Pablo.

<sup>14</sup> Cuaquinon jan ajnaxcan in laneltocaniymes tocnían quitilanijque Pablo pa yasquiaya pa in al huejcalan, huan ca yihual uyajque sequin tocnían nepa Berea. Mocahuajque Silas huan Timoteo umpa Berea.

<sup>15</sup> Yehuanten hual uyajque ca Pablo quihuicajque pa in caltilan hué Atenas. Cuaquinon quicahuajque Pablo nepa huan mocuepajque pa Berea. Pablo quinmilic pa quinmililosquiaya Silas huan Timoteo pa camo huejcahuasqui pa hualalosquiaya pa Atenas capa yihual cataya.

### *Pablo pa Atenas*

<sup>16</sup> Yojque, quiman Pablo quinchixtataya Timoteo huan Silas pa Atenas, cualanic laijtic yihual pampa cajcapa pin caltilan hué quinmitaya monos hual yehuanten pa Atenas quinmolancuacuetzililoaya.

<sup>17</sup> Yojque, quinnahuatiaya ilajtol Dios pa inmintiopan in judíos, quinnahuatijtjinemiaya aquinojen quimolancuacuetzililoaya Dios. Noje mojmosta quinnahuatijtjinemiaya ca aqui cayasquiaya nepa pin lajcotiyan capa lanamacaniyme.

<sup>18</sup> Huan sequin lacames pehualoaya laquetzalo ca Pablo. Ca innojen sequin quintocaloaya inminlamaxtilisli se ilanechiculisli lacames hual motocalo epicúreos. Oc sequin quintocaloaya inminlamaxtilisli se ilanechiculisli lacames hual motocalo estoicos. Yehuanten pehualoaya quijtulo:

—Axcán, ¿len quinectica techili in laquetzani?

Oc sequin quijtuloaya:

—Momati quinequi techlaquetzilía inminahuac oc sequin dioses hual amo quimatilo nican.

Quijtuloaya inon pampa Pablo quinnahuatijtjinemiaya ilajtol Jesús huan quinami yulilo oc sepa in mijquimes.



19 Yojque canajque Pablo, quihualicajque pa in lajcotiyan itoca Areópago. Nepa in hueyenten monechicunijme pa molaquetzililosquiaya inminahuac lajtomes hual quipianijme. Quilijque:

—Xitejchiuili in cuali pa titechilis len yes in lamaxtilisli yancuic hual tilaqueztinemi.

20 In lajtomes hual tijcacticate titechilis techlapolultilo. Pampín ticnecticate ticmatilo len quinequi quijtúa innojen.

21 Yojque cate moxtin in lacames pa Atenas huan aquinojen amo lacatijque nepa hual nepa chantilo. Itequi jan quixtocalo quijtulo o quicaquilo len yancuic san, quiman yes cayas len quinami inon.

22 Yojque moquetzac Pablo pin Areópago lajco capa yehuanten inminlanechiculisli in griegos pa Atenas huan quinmilic:

—Lacames atenatecos, nehual nía annimitzlaquetzilía inahuac mochi hual niquita nican pa anmocaltilan. Nicmati pampa amhuanten anlamolanacuuetzilía míac.

23 Inon nicmati, pampa quiman nicpanajtataya in caltilan niqiztinemiaya ca míac lailalisli mochi cajcapa anlamolanacuuetzilía huan niquitac se hual ipan cataya lajcuiluli in lajtomes: “Pa se dios hual amaqui quiximati.” Amhuanten anquimolanacuuetzilía in Dios hual amo anquimati nindeno. Pampín nehual nía annimitzlamachiltía ilajto yihual.

24 Yihual in Dios hual quinchíac in lalticpan huan mochi innojen hual cate. Yihual inminteco in cielo huan in lalticpan, amo chanti calijtc tiopajmes hual quinchihualo lacames.

25 Dios quipía mochi, amo monequi pa quipías nindeno hual quinchihualo lacames. Yihual quinmaca moxtin in yulilisli huan iyyul huan mochi.

26 Dios quinchíac mochi lacames pa ilalimes in lalticpan, quinchíac pan ipampa se lalac, quintilanic pa chantilosquiaya pa mochi in lalticpan. Noje Dios quinlalilic quichi xixihuimes sejse lali pin lalticpan yahuiaya ye inminyaxca ilanechiculisli in lacames hual chantilo pa in lali o moyaxcajtילו in lali. Noje quinlalilic quichi lali yahuiloyaya quipialo in lalimes capa yulilosquiaya, quinchihuilic inmintejtenco mochi in lalimes.

27 Jo quema, Dios quinlalic mochi inminlalimes lacames pin lalticpan, quinequi pa yehuanten quitemusi yihual sinda cuajnesi moajxiltilosquiaya capa yihual pa quiximatilosquiaya. Neli Dios amo unca huejca, mochi lalac ca tehuanten huil tiajsilo capa yihual pa toyolo.

28 Unca pan ipampa Dios tiyulilo huan tinejnemilo huan ticchihualo mochi innojen hual ticchihualo. Unca quinami quijtujque sequin anmolajcuilunijmes pa yina, quijtujque: “Tehuanten ticate yihual ixolomes.”

29 Pampín, sinda ticmatilo pampa tehuanten ti'ixolomes yihual, ma camo tiqijutcan pampa Dios unca quinami se mono lachihuali ca oro o ca plata o ca tixcali o len quichíac se hual quimatiaya, o len quichíac se quinami laijnamiquiaya.

30 Yojque, mas que pa yina Dios quinmacahuiltic pa quichihualosquiaya quinami quinequiloaya yehuanten hual amo quimatiloaya in hual quijtúa Dios, ma yoje axcan amo unca yojque. Axcan Dios quinmilijtica moxtin pa mochi in lalticpan pa quinpalasi inminyolo pa laijnamiquisi quinami yihual quinequi.

31 In quichijtica pampa axan quilalac se tonali quiman yahui quinchihuilía moxtin quinami quinmahuilúa pampa yulilo elehuis. Jo quema, Dios quinmaca ojli lacames yojque ca melahualisli pan ipampa se lalac hual quilajultic pa quinmacas ojli. Huan in lalac itoca Jesús. Dios quiyuliltic in Jesús mas que yec lamictili. Yojque technextilic neli pampa quilajultic

in Jesús pa quintilanis lacames pa camo cayasi capa unca Dios pampa cate laijlaculí, huan amo quiman huil mocuepasi capa yihual.

<sup>32</sup> Quiman quicaquijque Pablo quinlaquetzilijtataya inahuac se hual miquic huan cuaquin yulic oc sejpa, sequin quihuitzquiliijque, oc sequin quilijque:

—Timitzcaquisi oc se tonali quiman titechilis in lamaxtilisli.

<sup>33</sup> Yojque Pablo quisac inminlaixpan yehuanten.

<sup>34</sup> Ma yoje, sequin quitocaloaya Pablo, se ca yehuanten motocaya Dionisio, yihual yec se ila'ajuani in Areópago, in tenencia. Cataya noje se sihual itoca Damaris, huan cataloaya oc sequin hual quineltocajque ca in omenten.

## 18

### *Pablo yahui pa in caltilan Corinto*

<sup>1</sup> Panujque innojen, quisac Pablo pa Atenas, uyac pa in caltilan Corinto.

<sup>2</sup> Umpa quiximatic se lacal judío itoca Aquila. Yihual lacatic pin lalticpan itoca Ponto huan yuliaya pin lali itoca Italia. Yajmo yultataya nepa Italia pampa quipiác sequin tonalijmes quiman huan isihua Priscila hualajque pa Corinto. Hualajque pa Corinto pampa in hué itoca Claudio quitilanic lajtol pa quisalosquiaya moxtin in judíos pin caltilan hué Roma, in capital. Yojque Pablo quinpaxaluiliaya Aquila huan Priscila pa inminchan nepa pa Corinto.

<sup>3</sup> Quimatiaya Aquila in tequipanulisli hual noje quimatiaya Pablo, quimatiloaya quitzomalo tzotzomajli telahuac calica quinchihualo calitos pa cuajlan ca in tzotzomajli. Pampin Pablo pehuac chantic ca Aquila pa ichan huan yojque pehualoaya tequipanulo in omenten.

<sup>4</sup> Huan mochi in tonalijmes quiman mosehuilo in judíos, uyac Pablo pa inmintiopan. Nepa laquetzaya ca in judíos huan ca yehuanten hual amo judíos, quinequiaya quinnextili pampa cataya neli ilajtol Jesucristo hual yihual quinmilijtataya.

<sup>5</sup> Yojque, quiman ajsijque Silas huan Timoteo hual catanijme pa Macedonia, quitajque pampa itequi mojmosta quinnahuatijtinemiaya Pablo ilajtol Dios in corintios. Quinmaxtitinemiaya in judíos ca lajtol melahuac pampa yihual Jesús unca in Cristo hual quichixtataloaya in judíos.

<sup>6</sup> Ma yoje, yehuanten mocahualoaya amo quinctataloaya quineltocalo, amo mocahualoaya pa lahuejuecaltitinemilosquiaya. Pampa inon Pablo quintzejteluilic inahuas quinami unca inminlachihualisli in judíos, yojque quinnextiliaya pampa quincajcahuaya. Quisaya pa capa yehuanten pampa quichihualoaya amo cuali, quinmilic:

—Axcan, amhuanten anmitzmotexpahuilía Dios pampa anquichíac inon, pampa nehual annimitzmacac ilajtol Dios pa anquineltoacasquiaya, huan amo anquinequic. Yojque Dios amo nechmotexpahuilis nehual. Huan axcan mosta nía niquinnahuatilia ilajtol Dios jan ca yehuanten san hual amo judíos.

<sup>7</sup> Cuaquinon quisac Pablo pa inmintiopan, uyac calaquic pa ichan se itoca Ticio Justo. Yihual yec se hual quimólanacuuetziliaya Dios huan icali cataya inahuac inmintiopan in judíos.

<sup>8</sup> Huan ihué in tiopan, yihual itocaya Crispo, quineltocac in Tata, yihual huan moxtin pa ichan. Noje quineltocaloaya miác lacames huan sihuames pa Corinto huan cataloaya lacuayatequili.

<sup>9</sup> Huan in Tata quilic Pablo pa layúa pan ipampa laxotocalisli, quilic:

—Amo ximomajti. Xilaqueztía huan amo ximocahua pa tilaquetzas.

<sup>10</sup> Nehual niunca ca tehual. Amaqui yahui mitzquitza pa mitzcocoltis pampa pa in caltilan cate miac hual yalo nechneltoalo.

<sup>11</sup> Yojque chantiaya Pablo nepa pa se xihuil huan chicuase mesli, quimaxtinemiaya ilajtol Dios capa yehuanten.

<sup>12</sup> Axcan, se itoca Galión yec huelitini (governador) pin lalticpan itoca Acaya, huan nepa pin lalticpan Acaya unca in caltilan Corinto. Se tonali ca se lajtulisli cualantiquisaje in judíos ca Pablo, quihuicaje pa pan lajco capa cataya Galión.

<sup>13</sup> Quilije:

—In se amo mocahua pa quinmaxtinemis lacames pa quimolancuacuetzilisi Dios amo quinami quijtúa tolajtol.

<sup>14</sup> Yahuiaya laju Pablo pa monapatisquiaya huan Galión pehuac quinnotzac in judíos, quinmilic:

—Sinda quichihuaya len amo cuali in se o sinda quichihuaya len hual monotzaya pa tijquitzaqui, cuaquín nicnequisquiaya annimitzcaqui amhuanten judíos.

<sup>15</sup> Huan amo unca yojque. Ancualantica inahuac len quimaxtia in lalcal, anquinequi anquinlaxilia lajtomes inminahuac in hual quijtunijme anmotajtzian huan in lajtomes hual san amhuanten anquipia. Ximolalican ca se lajtulisli amhuanten anmohuan. Nehual amo niyes la'ajuani pa niquincaquis innojen.

<sup>16</sup> Cuaquín Galión quintojtalcit in lachianijmes pa quinquixtilosquiaya in judíos pan lajco.

<sup>17</sup> Cuaquinon quiquitzaquijque moxtin Sóstenes in hual yec ihué inmintiopan in judíos, quihuitequijque ilaixpan pan lajco huan inon amo monotzaya nindeno ca Galión.

*Pablo mocuepa pa Antioquia, cuaquinon pehua paxalúa oc sejpa pa miac lalimes*

<sup>18</sup> Mocahuac Pablo miac tonalijmes nepa Corinto. Cuaquín mochicahuac ca in laneltocanijmes tocnian huan uyac, ca yihual uyajque Priscila huan Aquila. Ajsijque pa Cencrea capa moximilic Pablo itzontecon. Quichiac inon pa lanextilis pampa nepa lamic quichiac len yihual neli quilic in Tata pampa yahuiaya quichia. Cuaquinon lejcuc pan se barco hual yahuiaya pa in lali Siria.

<sup>19</sup> Ajsijque pa Efeso huan Pablo quincahuac nepa Aquila huan Priscila pa pehualosquiaya chantilo. Huan calaquic Pablo pa inmintiopan in judíos, quinnahuatilitic yehuanten ilajtol Dios ca in judíos.

<sup>20</sup> Quiman yehuanten quitemachijque pa mocahuasquiaya Pablo oc sequin tonalijmes ca yehuanten, quinmilic pampa no.

<sup>21</sup> San mochicahuac ca yehuanten, quinmilic:

—Nicipia pa nias pa Jerusalén pa nicayas nepa pa in fiesta. Nimocuepas ca amhuanten oc sejpa sinda Dios quinequis.

Cuaquinon quisac ca barco pin caltilan Efeso.

<sup>22</sup> Quiman ajsic pa Cesarea, panquisac pa Jerusalén, nepa quinpialtic in laneltocanijmes, cuaquinon temuc pa Antioquia.

<sup>23</sup> Quiman panujque je quesqui tonali nepa, uyac oc sejpa huan quinpaxalulijtinemiaya mochi innojen caltilan pin lali itoca Galacia huan in lali itoca Frigia. Quinchicahuatitaya inminyolo moxtin in laneltocanijmes pa mochi in miac caltilan.

### *Apolos nahuatía pa Efeso*

<sup>24</sup> Huan cataya se lalac judío itoca Apolos, yec iyaxca pin caltilan hué itoca Alejándria. Yihual quimatic lajtuc niman cuali, noje quimatic niman cuali ilajtol Dios lajcuiluli. Hualac pa Efeso.

<sup>25</sup> In Apolos cataya lamaxtili pa quimatis iojli in Tata, huan ca mochi iyolo nahuatiaya huan lamaxtiaya ca lajtol hual moxtin huil quimatiaya len quinequiaya quiytu. Quimaxtiaya ilajtol Jesús, mas que jan quimatic san len quimaxtini Juan Lacuayatequini inahuac Jesús.

<sup>26</sup> In Apolos pehuac laquetzac pa inmintiopan in judíos, amo momajtiaya. Huan quiman quicaquijque Priscila huan Aquila, cuaquín yehuanten canajque huan quilaquetzilijque míac ca lajtol calica huil quimatiaya in hual quinequi quiytúa mochi inahuac iojli Dios hual ayamo quimatiaya.

<sup>27</sup> Huan quiman Apolos quinequiaya yahui pa in lali Acaya, in laneltocanimjes tocnían quilijque pampa cataya cuali pa yasquiaya. Quinmijcuiluilijque se amal tocnían hual chantiloaya umpa pa Acaya, quinmilijque pa quinamiquilosquiaya Apolos ca paquilisli. Yojque, Apolos ajsic pa Acaya, huan quinpalehuic míac yehuanten hual quineltocajque toTata Jesús pan ipampa in cuali hual Dios tejchihuilía.

<sup>28</sup> Quinpalehuic pampa yihual huil laquetzaya jan cuali san ilajtol Dios. Yojque amo huil quinanquililoaya in judíos, amo huil quiytuloaya pampa amo cataya melahuac in hual Apolos quinmiliaya. Quinnextiliaya inminlaixpan moxtin pampa Jesús unca in Cristo hual Dios quitilanic, quinnextiliaya pan ipampa ilajtol Dios hual unca lajcuiluli.

## 19

### *Pablo pin caltilan Efeso*

<sup>1</sup> Quiman cataya Apolos pa Corinto, Pablo lamic paxaluc pa innojen caltilan hual cataloaya pin lomera (tepetilan) huan hualaya pa Efeso.

<sup>2</sup> Nepa quinmitac sequin monextilinjmes huan quinmilic:

—¿Hualac in Espíritu Santo pa amhuanten quiman anpehuac anquineltocac Cristo?

Yehuanten quilije:

—No, tehuanten amo tijcaquijque amaqui lajtúa inahuac in Espíritu Santo.

<sup>3</sup> Huan Pablo quinlajlanic:

—Cuaquín ¿len lamaxtilisli anquineltocaya quiman ancataya lacuayatequili?

Quinanquilijque:

—Ticataloaya lacuayatequili quinami quimaxtic Juan Lacuayatequini.

<sup>4</sup> Pablo quinmilic:

—Juan quincuayatequini lacames pa yoje lanextilosquiaya pampa quipalaje inminyolo pa laijnamiquisi quinami quinequi Dios. Noje Juan quinmilic pa quineltocalosquiaya in lalac hual yahuiaya huala quiman yihual Juan laquisac quichíac itequipanulisli hual Dios quitilanic pa yihual quichihuasquiaya. Huan in lalac unca Jesús in Cristo.

<sup>5</sup> Quiman quicaquijque inon, cataloaya lacuayatequili quinami lamaxtic Jesucristo, quinoztataloaya Dios pan ipampa itoca Jesús.

<sup>6</sup> Huan quiman quinlalilic Pablo imajmajuan inminpan yehuanten, hualaya pa inminyolo in Espíritu Santo huan pehualoaya lajtulo ca oc sequin lajtomes hual amo quiman quimatiniyme lajtulo, huan laquetzaloaya Dios ilajtomes.

<sup>7</sup> Yehuanten yeje quinami doce lacames.

<sup>8</sup> Panuc inon, calaquic Pablo pa inmintiopan in judíos nepa pa Efeso, huan yihual pehuaya laquetza amo quimacajsitataya huan pa ye mesli quinnahuatiliaya quinami huelitía Dios. Quichihuaya mochi len huil pa quinnextiliaya pampa cataya melahuac inon hual quijtutataya.

<sup>9</sup> Ma yoje, sequin ca in judíos mochicahualtije inminyolo pa como quinel-tocalosquiaya in lajtol. Pehualoaya laquetzalo amo cuali inahuac Dios iojli. Cuaquinon mijcuanic Pablo capa yehuanten, quinhuicac ca yihual in monextiliniymes huan mojmosta quinmachiatiaya Dios ilajtol pa iescuela (imonextiloyan) se hual motocaya Tirano.

<sup>10</sup> Yojque Pablo quichihuaya pa ome xixihuil, huan pampín, pin lalticpan Asia capa cataya Efeso, moxtin hual chantiloaya nepa quicaquiloaya Dios ilajtol. Cataloaya yehuanten hual judíos huan yehuanten hual amo judíos quicaquiloaya.

<sup>11</sup> Huan Dios quihueliltic Pablo míac pa quinpajtisquiaya cocoxquimes. Quihueliltic pa quinpajtis quinami amo quinpajtiaya pan oc sequin tonalimes.

<sup>12</sup> Yojque quihucaloaya dangos huan tzotzomajtzindis hual quilalijque pan icuerpo Pablo, cuaquín quinhuicaloaya huan quinlalilijque pan inmin-cuerpos in cocoxquimes huan yojque pajtjque. Noje quisaje ijyecames amo cuajcuali pa yehuanten hual quinpialoaya.

<sup>13</sup> Huan noje cataloaya sequin judíos hual yahuiloyaya cajcapa, quin-quixtilijtinemiloaya ijyecames amo cuajcuali. Yehuanten motoliniloaya pa quinquixtililosquiaya in ijyecames amo cuajcuali pan ipampa quinami quijtuloaya itoca in Tata Jesús, quinmilloaya:

—Xiquisacan, annimitztilanía ca itoca Jesús, yihual hual quinnahuatijtía Pablo.

<sup>14</sup> Huan cataya se judío motocaya Esceva, yihual se tiopista huan quinpiaya chicome ixolomes hual quinquixtitinemiloaya yojque in ijyecames.

<sup>15</sup> Huan se tonali quiman quililoaya pa quisasquiaya se ijyecal amo cuali, in ijyecal quinnanquiliic:

—In Jesús niquiximati huan noje niquiximati in Pablo. ¿Aquinojen amhuan-ten? Amo anunca Jesús ilacames.

<sup>16</sup> Huan molasac pani yehuanten in local hual quiapiaya in ijyecal amo cuali. Huil moanaya niman chichahuac huan yehuanten amo huil yoje, pampa in local quiapiaya in ijyecal amo cuali. Pampín quinsulahuac huan yehuanten moxtin in lacames choluloaya pa quiahuac in cali, cataloaya latecuali huan nacatijmes.

<sup>17</sup> Cuaquín momachiltijque quinami panuc inon moxtin in judíos huan in amo judíos hual chantiloaya nepa pa Efeso, momajmajtiloaya huan pampín moxtin quitaloaya huan quijtuloaya quinami itoca in Tata Jesús quiapiaya niman míac chichualisli.

<sup>18</sup> Hualaloaya míac ca yehuanten hual quineltoajque in Tata Jesús, layul-cuitiloaya huan lamachiltiloaya inminahuac innojen lachihualisli amo cuali hual quichihuanijme.

<sup>19</sup> Huan cataloaya míac hual quichihuanijme laxuxalisli. Yojque quiman quinechicujque inminamames hual quinextilic quinami quichihualo in lax-uxalisli, quinchichinuloaya inminlaixpan moxtin. Cuaquinon quipuhuilj-que quichi ipatiloaya in amames, huan yoje momatijque pampa ipatiloaya cincuenta mil tomin plata.

<sup>20</sup> Cuaquín miajque ichichualisli ilajtol Dios ca yehuanten, quinel-tocaloaya ilajtol ca mochi inminyolo.

<sup>21</sup> Panuc inon huan quinequiaya paxalu Pablo pa in lalimes Macedonia huan Acaya huan ca inon cataya ca se lajtulisli ca in Espíritu Santo. Quinequiaya quinpaxaluili yehuanten hual quineltocaloaya toTata Jesucristo nepa cajcapa chantiloaya. Cuaquinon yahuiaya yahui pa Jerusalén, quilic:

—Quiman nías pa Jerusalén, cuaquín nicpías pa niqitas in caltilan hué Roma.

<sup>22</sup> Cuaquín quintilanic pa Macedonia ome ilapalehuinijmes, Timoteo huan Erasto, huan Pablo mocahuaya sequin tonalijmes pin lalticpan Asia.

### *Cualantiquisalo pin caltilan Efeso*

<sup>23</sup> Innojen tonalijmes cataloaya sequin lacames hual amo quixtocaje iojli Jesús, yehuanten quinchihualtijque pa mocualantisqui míac yehuanten pa Efeso.

<sup>24</sup> Cataya se motocaya Demetrio, yihual quinchihuani caltzindis lachihuali ca plata. Cataloaya caltzindis tijtipichin hual nesiloaya quinami in tiopan hué capa quimolancuacuetzililo in diosa sihual itoca Diana, yihual yec idiosa Efeso. Pan impampa in caltzindis tijtipichin monechiculiloaya míac tomin Demetrio huan yehuanten hual tequipanuloaya ca yihual.

<sup>25</sup> Pampín quinahuatic pa monechiculosquiaya moxtin itequipanujquimes huan in oc sequin hual quichihualoaya in tequipanulisli, quinmilic:

—Lacames, anquimati quinami timonechicuhuililo míac tomin ca in hual ticchihualo.

<sup>26</sup> Huan anquiztica huan anquicactica quinami in Pablo laqueztinemi quijtutica pampa amo cate dioses in monos hual quichihualo lacames. Huan axan cate míac hual quineltocalo in hual quijtutinemi in Pablo pampa yihual quimati laquetza cuali. Huan in Pablo amo quinlaquetzilijtica yehuanten pa Efeso san. Noje quinlaquetzilijtica yehuanten hual yulilo pa mochi in lalticpan Asia.

<sup>27</sup> Pampín cayas polehuilisli pa tehuanten, pampa yajmo yalo quixtocalo len ticchihualo. Huan noje ca inon cayas polehuilisli pampa cuajnesi yes lacajcahuali icali in diosa Diana. Huan cuajnesi yajmo yalo quillasojlalo in cali hué huan cualtichin, in cali capa quimolancuacuetzililo moxtin pa Asia huan pin lalticpan.

<sup>28</sup> Quiman quicaquijque inon, cualantiquisajque chichahuac, pehualoaya tzajtzi, quilijtataloaya:

—¡Hué unca Diana inmindiosa in efestecos!

<sup>29</sup> Huan mocaquiaya pa mochi in caltilan in tzajtzilisli, molalujtihualaloaya in lacames, amo quimatiloaya len panuaya. Ca se lajtulisli molalujtiquisaloaya pa capa quipialoaya in lanechiculisli pin ilajcotiyan hué in caltilan Efeso. Ca yehuanten quihuilanaloaya Gayo huan Aristarco, yehuanten quitocanjme Pablo quiman canani ojli pa oc sequin caltilan.

<sup>30</sup> Huan Pablo quinectataya calaqui pin lajcotiyan hué capa monechicujtiquisaloaya. Ma yoje, amo quimacahuiltiloaya tocnán in monextilinijmes.

<sup>31</sup> Huan noje sequin ca inminhueyenten in lanechiculisli hual quiximatiloaya cuali Pablo quitilanijque lajtol quinahuatijtataya pa camo calaquisquiaya pin lanechiculisli.

<sup>32</sup> Huan lajitic pin lanechiculisli comuntataloaya huan tzajtzitataloaya. Sequin quitzajtziyoaya se lajtol, oc sequin quitzajtziyoaya oc se lajtol. Huan in míac lacames nepa amo quimatiloaya pa len monechiculoaya.

<sup>33</sup> Cualaniloaya in míac lacames ca mochi in judíos. Cataya se judío itoca Alejandro nepa pin lanechiculisli, huan quiman quilajlanijque pa len

monechicujtataloaya, cuaquín moxtin in judíos quitojpehuaje Alejandro pa yasquiaya ilaixpan in lanechiculisli pa quinnotzasquiaya in lalalera pa camo cualanilosquiaya ca in judíos. Quiculiniaya Alejandro imajma ilaixpan in lanechiculisli, quinequiaya laquetza pa in judíos.

<sup>34</sup> Ma yoje, quiman quimatiloaya pampa yihual yec judío, cuaquín moxtin tzajtziiloaya chicahuac quinami cataya ilajtol se san, quilije:

—¡Hué unca Diana inmindiosa in efestecos!

Huan pa ome horas yoje tzajtziiloaya.

<sup>35</sup> Cuaquinon hualac inminlaixpan in presidente, quinmilic:

—Ximocahuacan.

Cuaquinon quinmilic:

—Lacames efestecos, amo unca lalal hual amo quimati pampa Efeso unca in caltilan capa quilachililo icali in diosa hué Diana huan itixcali santo yihual hual huetzic pan lalticpan quiman quisac pin cielo.

<sup>36</sup> Amaqui huil quijtúa pampa inon amo unca melahuac. Pampín monequi pa anmocahuas, amo xicchihuacan len hual lanextilía pampa amo anquimati nindeno.

<sup>37</sup> Anquinhualicac ca niquic in lacames hual amo quixtequillije nindeno itiopan todiosa huan amo quihuejuecaltije todiosa.

<sup>38</sup> Axcan, sinda Demetrio huan in tequipanujquimes ca yihual quipialo len pa quijtusi, cate tonalijmes quiman monechiculo in huelitinijmes pa lajlanisi. Yojque, huil motexpahuilo huan monapatilo inahuac len unca inminyaxca mochi sejse ca yehuanten.

<sup>39</sup> Sinda anquinequi anquimati oc sequin lachihualisli huan amo jan inon san, cuaquinon huil molajlanisi quiman timonechiculo quinami quijtúa in lajtol.

<sup>40</sup> Ma mochía yojque, pampa tialo timoitalo pin lamajtilisli pampa ticchihuaje inon axcan. Cuajnesi sequin quinmachiltisi yehuanten hual cate ca ilahuelilitisli in hué Cesar in hual panuc nican huan quijtusi pampa tehuanten ticchijtcate se moanalisi ipan in hué. Huan amo ticmatilo quinami tiquinmilisi leca timonechicuje.

<sup>41</sup> Quiman quinmilic inon in presidente, cuaquinon quinmilic pampa axan lamic in lanechiculisli huan quinmilic pa mohuicalosquiaya.

## 20

### *Pablo yahui pa Macedonia, cuaquinon pa Grecia*

<sup>1</sup> Cuaquinon, quiman yajmo cualantinemiloaya yehuanten pa Efeso, Pablo quinnahuatic in laneltocanijmes pa monechiculosquiaya. Monechicujque, quinlaquetzic in quinami monequi pa tiyulisqui pan iojli in Tata Jesús. Cuaquinon quinchicahuac Pablo huan uyac pa Macedonia.

<sup>2</sup> Quipanahuic cajcapa pin lali Macedonia huan ca mías lajtoques quinchicahuáltic inminyolo in laneltocanijmes. Cuaquinon uyac pa in lali Grecia.

<sup>3</sup> Nepa mocahuaya ye mesli. Cuaquinon quiman yahuiaya yahui ca barco pa in lali Siria, momachiltic pampa quinapachiloaya in judíos pa quimictilosquiaya quiman yahuiaya cana in barco. Pampín mocuepac pa Mactidonia pan ojli.

<sup>4</sup> Ca yihual uyajque Sopater ixolol Pirro hual lacatic pa Berea, huan noje Aristarco huan Segundo hual lacatijque pa Tesalónica huan Gayo hual lacatic pin caltilan Derbe, huan Timoteo. Huan noje ca Pablo uyajque Tíquico huan Trófimo hual lacatijque pin lalticpan Asia.

<sup>5</sup> Ajsijque pa Filipos capa nehual Lucas nicataya. Cuaquinon innojen tocnían techlaicanajque huan tejchialoaya pin caltilan Troas.

<sup>6</sup> Cuaquín tehuanten Pablo huan nehual tiajque ca barco quiman laquisac in fiesta (ilhuil) quiman quicualo in pan hual amo quipía laxocoyajquil. Tiyahuiloaya pin barco, huan quiman tiajque pa macuili tonalijmes, tiájsijque pa Troas capa tejchixtataloaya, nepa timocahuajque chicome (siete) tonalijmes.

### *Pablo paxalúa pa Troas*

<sup>7</sup> Cuaquín pan tonali hual quipehualtía in chicome, timonechicujque pa ticlapanalosquiaya pan quinami toTata Jesús techilic pa timoijnamiquiltilosquiaya quinami yihual miquic pa tehuanten. Techlaquetzilic Pablo techmaxitátaya ilajtol Dios. Huan pampa yahuiaya quisa nepa Troas mostatica, huejcahuaya Pablo ca ilaquetzalisli, huan pa lajco layúa ayamo lamiaya laquetza.

<sup>8</sup> Cataloaya míac tapalquitas milintataloaya pa in calijtic pa pani in cali capa timonechiculoaya.

<sup>9</sup> Huan cataya se oquixli itoca Eutico molalijtataya pa se lalapujquil capa quitalo pa quahuac in cali. Quipiaya se cochilisli chicahuac pampa Pablo huejcahuaya míac ca ilaquetzalisli. Yojque quisulahuac Eutico in cochilisli chicahuac huan huetzic pa quahuac in lalapujquil, cataya ye cajcalijtic pa pani. Yojque cajcoquijque mictataya.

<sup>10</sup> Ma yoje, temuc Pablo, molasac ipan huan quinapaluc, cuaquinon quinmilic:

—Ma como anmitzcocu anmoyolo, pampa axan yultica oc sejpa.

<sup>11</sup> Huan lejcuc Pablo calijtic oc sejpa. Quiman quilapanac in pan huan quicuac, quinlaquetzilijtíac pa mochi in layúa hual quincahuiliaya. Quiman lanesic, cuaquín uyac.

<sup>12</sup> Huan in oquixli hual miquic hual Dios quiyuliltic oc sejpa quihuicajque pa ichan huan quipialoaya míac paquilisli moxtin, huan mochicahualtililoaya míac pa inminyolo.

### *Quisalo nepa Troas pa yasqui pa Mileto*

<sup>13</sup> Pablo molalilic pa yahuisquiaya pa ojli pa Asón, nepa calaquisquiaya pin barco ca tehuanten. Pampín ticanajque in barco huan tiajque pa Asón.

<sup>14</sup> Huan quiman technamiquic Pablo umpa pa Asón, tiqihuiicajque ca tehuanten pin barco, tiajque pa Mitilene.

<sup>15</sup> Huan umpa tiajque ca in barco, mostatica tipanujque ilaixpan Quiós huan oc se tonali tiájsijque pa in lali lajco pin al huejcalan itoca Samos. Timosehujque pin caltilan Trogilio huan mostatica tiájsijque pa Mileto.

<sup>16</sup> Yojque ticchihuajque pampa molalilic Pablo pa como timocahualosquiaya míac tonalijmes pin lalticpan Asia, pampín tiajque ca in barco pa yoje amo timoquetzalosquiaya pa Efeso hual unca pin Asia. San ticnequijque tiajque pa Mileto hual unca nadita ca umpic capa unca Efeso. Pablo ejsajataya pampa quinequiaya ajsi pa Jerusalén sinda huil ajsic umpa pa itonali in fiesta (ilhuil) itoca Pentecostés.

### *Pablo quinlaquetzilía ilajtol Cristo in abuelojmes laneltocanjmes pa Efeso*

<sup>17</sup> Nepa pa Mileto quinahuatic Pablo pa hualalosquiaya pa Mileto in abuelojmes laneltocanjmes hual chantiloaya pa Efeso.

<sup>18</sup> Huan quiman ajsijque capa yihual, Pablo quinmilic:



—Anquimati quinami mojmosta nicataya ca amhuanten quiman nipehuac niyulic pa Asia huan pa quiman niquisac nepa.

<sup>19</sup> Nictequipanuliaya in Tata ca mochi noyolo. Amo quiman nimochiác hué ilaixpan amaqüi, huan míac tonalijmes nictequipanuliaya in Tata nichocatataya. Huan nipanuc lacocoltilisli pampa quinequiloaya nejchihuililo amo cuali in judíos.

<sup>20</sup> Anquimati amo quiman nimocahuaya pa annimitzilisquiaya len yesquiaya cuali pa amhuanten. Annimitzmaxtiaya quiman anmoxtin anmonechicuhuaya huan quiman niahuiaya pa mochi seise anmochan.

<sup>21</sup> Niqunmiliaya judíos huan yehuanten hual amo judíos quinami quipialo pa quipalasi inminyolo pa quichihuasi len quinequi Dios, noje quipialo pa quineltocasi toTata Jesús.

<sup>22</sup> 'Huan axcan, xiquitacan, nechtilantica in Espíritu Santo pa nías pa Jerusalén huan nicpía pa nicneltocas. Huan amo nicmati len yahui nechpanúa nepa.

<sup>23</sup> In san nicmati, pa mochi caltilan ca capic nías, in Espíritu Santo nechilía neli pampa yalo nejtzacualo pin calijtic huan nía nipanúa míac lacocoltilisli.

<sup>24</sup> Ma yoje, inon amo nechmajtitica nindeno huan amo nechmonotzilía nindeno nel noyulilisli sinda jan huil nilaquisas nicchías in tequipanulisli hual nechilic in Tata Jesús pa nilamis nicchías. Yihual nechilic pa nicnahuatijtías ilamachitilisli cuali, niqunmilijtica lacames quinami techicnilía Dios.

<sup>25</sup> 'Pampín ninejnemiaya nilaqueztinemiaya ca amhuanten quinami huelitía Dios. Huan axcan xiquitacan. Nicmati pampa yajmo anechitilis noixco ca amhuanten anmoxtin.

<sup>26</sup> Ma yoje sinda unca se ca amhuanten hual amo quineltoca ilajtol Dios, amo huil nechmotexpahuilis nel.

<sup>27</sup> Annimitznahuatilic mochi ilajtol Dios, amo annimitzlatilic nindeno hual ilajtol techilía.

<sup>28</sup> Yojque, ximolachilican amhuanten nojen huan xiquinmiztiacan moxtin hual quineltocalo toTata Jesucristo, pampa anmitzlatilic in Espíritu Santo pa yoje anquichías quinami se quilachilía iborregos. Quimictijque Jesucristo yehuanten pa Jerusalén huan pan ipampa iesli hual toyahuic, yihual moyacajtilic yehuanten hual quineltocalo.

<sup>29</sup> Nehual nicmati pampa quiman nimohuicas, cuaquín hualasi capa amhuanten lacames hual islacatisi ca amhuanten pampa quinequisi anmitzquixtisi pan iojli Jesús pa camo anquitocatis. In lacames cayasi quinami coyomes hual quisemanalo in borregos.

<sup>30</sup> Huan capa amhuanten nojen cayasi lacames hual quimaxtisi islacatilisli. Yojque quitlanilisi inminyolo in laneltocanjmes pa quineltocasi in islacatilisli hual quimaxtisi.

<sup>31</sup> Pampín ximoiztiacan, xiquijnamiquican quinami pa ye xixihuil yihualitonal, pa semilhuil huan pa layúa, amo nijcahuaya pa annimitzijnamiquiltis mochi inon ca mochi seise ca amhuanten, nichocatataya quiman annimitzil-iaya.

<sup>32</sup> 'Huan axcan nocnían, ma Dios anmitzlachili huan ma anmijchicahualti anmoyolo in ilajtol iicnililisli. Ilajtol Dios huil quichía niman míac. Huil anmitzlachilía anmoyolo huan yoje se tonali anquipías mochi hual Dios quinequi anmitzmaca amhuanten. Jo quema, móchi inon Dios quinequi quinmaca moxtin yehuanten hual yihual quinlajtultic pa yesi ilacames.

<sup>33</sup> Amo quiman nicnequic amaqüi itomin, amo quiman nicnequic itzotzomajli amaqüi.

<sup>34</sup> No, amhuanten nojen anquimati pampa nehual ca in nomajmajuan nitequipanuaya pa nimolacualtisquiaya huan pa niquinlacualtisquiaya yehuanten hual cataloaya ca nehual.

<sup>35</sup> Mojmosta annimitzmaxtiaya pampa yojque ticpialo pa titequipanusu pa ticpiasi len calica huil tiquinpalehuisi yehuanten hual amo quipialo chicahualisli. Xiquijnamiquican len quijtuc toTata Jesús, quijtuc: “Míac paquilisli Dios quimacas se hual quinmaca oc sequin len quipías. Amo yojque míac paquilisli quimacas Dios se hual san cana len quimacalo yihual.”

<sup>36</sup> Huan quiman quinmilic inon, molancuacuetzac Pablo ca moxtin yehuanten huan quilájlanic Dios.

<sup>37</sup> Huan chocaloaya míac moxtin, quinapalujque Pablo pa iquixlan, quite-namiquiloaya.

<sup>38</sup> Quincocuhuaya inminyolo míac pampa yihual mohuicatihuiaya. Ma yoje quincocuhuaya inminyolo niman míac quiman quinmilic pampa yajmo yahuiloya qitalo iixco. Cuaquinon uyajque ca Pablo pa in barco.

## 21

### *Pablo yahui pa Jerusalén*

<sup>1</sup> Quiman tilejucque in barco huan timoxilujque capa cataloaya yehuanten, tiajque melajtataya pa in lali lajco pin al huejcalan itoca Cos, huan mostatica tiajque pa Rodas huan umpa pa Pátara huan Mira.

<sup>2</sup> Huan umpa tiquitajque se barco hual yahuiaya quipanahui in al huejcalan pa Fenicia. Tilejucque in barco, tiajque.

<sup>3</sup> Huan quiman pehuac nesic in lali lajco pin al huejcalan itoca Chipre, ticpanahujque ca in lali pa tomajma amo cuali huan tiajque pa Siria. Umpa tiajsijque pa in caltilan hué Tiro capa calaquilo huan quisalo barcos. Nepa quilatemuhuilijque in barco.

<sup>4</sup> Tehuanten tiqintemujque in laneltocanijmes huan timocahuajque pa siete tonalijmes ca yehuanten. Yehuanten quilijque Pablo pa camo panquisasquiaya pa Jerusalén pampa in Espíritu Santo lamic quinmilic len yahuiaya quipanu Pablo.

<sup>5</sup> Quiman panujque in chicome (siete) tonalijmes, tiquisajque nepa Tiro huan ca tehuanten uyajque moxtin yehuanten ca in sihuames noje huan in xolomes. Timolancuacuetzajque pan itenco in al huejcalan, ticlajlanijque Dios, cuaquinon timochicahuajque se huan oc se.

<sup>6</sup> Tilejucque pin barco huan yehuanten mocuepajque pa inminchan.

<sup>7</sup> Cuaquin tehuanten tiajque tijcajtataloaya Tiro huan tiajsijque Tolemaida. Nepa tilamijque tiajque ca barco. Tiquinpialtijque tocnían in laneltocanijmes huan timocahuajque ca yehuanten se tonali.

<sup>8</sup> Mostatica tiquisajque nepa Tolemaida, tiajque pan ojli pa Cesarea, nepa tiajsijque pa ichan Felipe in evangelista, yihual yec se ca in chicome lacames hual quinlajtultijque in lanahuatinijmes pa quinlachillosquiaya in sihuames hual mocahualoaya inminhuían. Nepa pa ichan tichantiloaya.

<sup>9</sup> In Felipe quinpiaya nahui ixolomes sihuames. Yehuanten ayamo monamictijque, nepa chantiloaya pa ichan inmintajtzin. Yehuanten quipialoaya Dios ilahueliltlisli pa quinahuatisqui ilajtol.

<sup>10</sup> Ticataloaya pa Felipe ichan sequin tonalijmes, ajsic se lalac hual chantic pa Judea, yihual itoca Agabo. Yec se ilajtuni Dios, quipiaya Dios ilahueliltlisli pa quijtusquiaya len yahuiaya panu.

<sup>11</sup> Techpaxaluliaya, canac ilacuejtiloni Pablo, moilpilic icxihuajmes huan imajmajuan, quijtuc:

—Yojque quijtúa in Espíritu Santo: In judíos pin Jerusalén yojque quilpisi in lacal hual iyaxca in lacuejtiloni. Cuaquinon quitemacasi ca yehuanten hual amo judíos.

12 Yojque quiman tijcaquijque inon, tipehuajque tiquilijque Pablo ca ic-notilisi ca mochi toyolo pa como panguisasquiaya pa Jerusalén, tehuanten huan yehuanten hual chantiloaya pa Cesarea.

13 Cuaquinon lananquilic Pablo, techilic:

—¿Leca anchocatica huan annehcocoltitica noyolo? Amo xicchihuacan inon pampa sinda quinequi Dios, niunca ca se lajtulisli ca yihual pa nías pa Jerusalén pa nicayas laipili nepa, huan noje niunca ca se lajtulisli pa nimiquei nepa sinda yojque quinequi in Tata Jesús.

14 Yojque amo quinequic quichíac quinami ticmacajque lajtol, pampín yajmo tinahuatijque, tiquijtujque:

—Ma ye quinami quinequi in Tata.

15 Quiman panujque innojen tonalijmes, timochijchihuajque huan tipan-quisajque pa Jerusalén.

16 Noje ca tehuanten uyajque sequin laneltocanjmes hual chantiloaya pa Cesarea. Yehuanten techhuicajque pa ichan se laneltocani itoca Mnason, yihual lacatic pa Chipre, in lali lajco pin al huejcalan. Yihual cataya monextilini pa míac xixihuil, ca yihual pa ichan timocahuajque.

### *Pablo quipaxahuilía Jacobo*

17 Quiman tiajsijque pa Jerusalén, tocnían laneltocanjmes techpialtijque ca paquilisli.

18 Cuaquín mostatica uyac Pablo ca tehuanten pa tiquitalosquiaya Jacobo huan nepa mochi inminabuelojmes in laneltocanjmes cataloaya ca Jacobo.

19 Quinpialtic Pablo huan pehuac quinpuhuilic mochi hual quichíac Dios ca yehuanten hual amo judíos pan ipampa in hual yihual Pablo quichíac, pampa Dios quihuelilitic.

20 Quiman quicaquijque Jacobo huan in laneltocanjmes, quijtujque laj-tomes huejué huan cuajcuali pa Dios. Cuaquinon quilijque Pablo, quil:

—Ticmati, tuinon, quichi miles judíos cate hual axcan quineltoalo Cristo. Ma yoje, quimatilo momajtilo niman míac inahuac inon hual Moisés quijtuc pa ilajtol pa ticchihualosquiaya tehuanten, huan quinequilo noje pa mochi oc sequin quimatisi momajtisi yoje.

21 Huan sequin quintenejticate in judíos nican monahuac tehual. Quijtulo islatatijticate pampa tehual tiquinmaxitinemi in judíos hual chantilo pa innojen caltilan capa chantilo yehuanten hual amo judíos, quil quililo, tiquinmilijtinemi pa como quintzontequilisi icuilaxli inminxolomes, quil, quinami quijtuc Moisés pa quichihualosquiaya. Huan quijtulo pampa tehual tiquinmilijtinemi pa yajmo quichihuasi in míac lachihualisli hual monequi pa quinchihuasi in judíos.

22 Axan, ¿len ticchihuasi? Moxtin in judíos hual quineltoalo Cristo momachiltisi pampa axcan tihualac ca niquic.

23 Pampín, xicchia in hual timitzilisi: Cate ca tehuanten nahui tocnían laneltocanjmes hual quichihuaje se lajtulisli ca Dios. Axan quipialo pa lamisi quichihuasi.

24 Tehual xiquinhuica in lacames, ximochipahua quinami se quipía pa quichías quiman quichías se lajtulisli ca Dios. Tehual xiclahuili pa in nahuenten. Cuaquinon yehuanten huil moximasi quinami quichihualo quiman lamilo quichihualo judíos inminlajtulisli ca Dios. Yojque quimatisi

in judíos pampa in hual momachiltije monahuac tehual amo unca melahuac. Quema, quimatisi pampa tehual noje ticneltoca ilajtol Moisés.

<sup>25</sup> Ma yoje, pa yehuanten hual amo judíos hual noje quineltocalo Cristo, tiquintilanije se amal calica tiquinmilije len tiquitulo unca cuali pa camo quichihuasi: Ma camo quicuacan nacal hual quilalilo inminlaixpan monos, ma camo quicuacan esli huan inacal se yulijquil latolpatzcali, huan ma quipía jan se isihua o se ilahuical san. Jan ma camo motecacan ca oc se.

### *Quiquitzquilo Pablo pin tiopan hué*

<sup>26</sup> Cuaquinon mostatica quinquicac Pablo in nahui lacames, mochipahuac quinami se judío quipía pa quichías quiman quichía se lajtulisli ca Dios. Yoje quichihuaje innojen nahuenten lacames noje, cuaquinon calaquic Pablo calijtic in tiopan hué, quinlamachiltic in tiopistas quichi tonalijmes cayalosquiaya quiman lamilosquiaya quichihualo in lachipahualisli yihual huan in nahuenten lacames, cuaquinon huil laxlahuisquiaya Pablo in huendi.

<sup>27</sup> Yojque lamijque quichihuajque chicome (siete) tonalijmes Pablo huan innojen nahui lacames. Ma yoje, quiman ca nadita yahuiloaya laquisalo ca in chicome tonalijmes, quitaloaya Pablo sequin judíos hual chantiloaya pin laticpan Asia, quitajque calijtic in tiopan hué huan quincualantijque in lalalera. Quiquitzquitquisajque Pablo,

<sup>28</sup> tzajztitaloaya, quilijque:

—¡Lacames israelitos, xilapalehuican! ¡In se in lalal hual yajtinemi pa mochi cajcapa lamaxtitinemi pampa tehuanten amo ticate cuali! ¡Lamaxtitinemi pa camo quineltocasi in hual Moisés quijtuni pa quichihualosquiaya! ¡Lamaxtitinemi pampa in tiopan hué nican amo unca cuali! ¡Huan noje yihual quichíac catzahualisli, quinhualicac lacames griegos nican calijtic pin lasojli tiopan hué huan yojque quijlacuc!

<sup>29</sup> Inon quijtujque pampa quitajque nepa pa Jerusalén ca Pablo tocní Trófimo hual yec de Efeso. Quijtujque pampa Pablo quihualicac Trófimo calijtic in tiopan hué, mas que amo quichíac inon.

<sup>30</sup> Yojque mochi in lalalera pin caltilan cualaniloaya, molalujtihualajque, quiquitzquijque Pablo, quihuilanajque pa quiahuac in tiopan hué, huan jan ajnaxcan quintzactiquisajque in lalapujquimes.

<sup>31</sup> Huan quiman motoliniloaya pa quimictilosquiaya Pablo, sequin quila-machiltijque inminlaicanani hué moxtin in guaches len panujtataya, quilijque pampa mochi Jerusalén cualantinemiloaya huan tzajztitinemiloaya.

<sup>32</sup> Yojque jan ajnaxcan quinquicac in laicanani hué sequin guaches huan se ome laicananijmes, molalujque pa temuán (temuayan) capa cualantine-miloaya. Huan quiman in judíos quinmitajque in laicanani hué huan in guaches, mocahuajque quihuitequijque Pablo.

<sup>33</sup> Ajsic in laicanani hué, latilanic pa iguaches quiquitzquilosquiaya Pablo huan pa quipilosquiaya ca teposli. Cuaquinon quilajlanic pampa aqui yihual huan len amo cuali quichíac.

<sup>34</sup> Tzajtzijque chichahuac in lalalera, quijtujque míac, huan pampín in laicanani hué amo huil quimatiaya neli leca tzajztitinemiloaya yehuanten. Yojque quinmilic iguaches pa quihuicalosquiaya Pablo pa calijtic inmincalimes in guaches.

<sup>35</sup> Huan quiman ajsijque pa in lalejculonijmes (in escalera) ca Pablo, in guaches quipialoaya pa quimamalosquiaya pampa in judíos niman cualaniloaya, quinctataloaya quiquitzquilo Pablo oc seppa.

<sup>36</sup> Pampín quintocaloaya in guaches, quintajztzilijtiahuiloaya:  
—¡Xicmictican!

*Pablo quinnotza in lalalera pa monapatis*

<sup>37</sup> Jan axcan quiman yahuilooaya quihuicalo pa inmincali in guaches calijtic, Pablo quinotzac in laicanani hué, quilic:

—¿Tichmacahuiltía pa nimitzilil len?

In laicanani hué quilic:

—Tehual ¿ticmati tilajtúa griego?

<sup>38</sup> Cuaquín tiunca in lalal egipcio hual quipehualtic se moanalislis quipía sequin mesli. Huan quinhuicac nahui mil inminlacames inminlanchiculisli in lamictinijmes, quinhuicac ca capic amaqui chanti.

<sup>39</sup> Pablo quinanquilic:

—Amo niunca in se. Nehual nilalac judío huan nilacatic pa in caltilan Tarso. In amo se caltilan tipichin nepa pin lalticpan Cilicia huan nepa nichantiaya. Xichmacahuilti pa niquinnotzas in lalalera.

<sup>40</sup> Cuaquín in laicanani hué quimacahuiltic pa lajtusquiaya Pablo, huan yojque Pablo moquetzac pa in escalera. Quinchihuilic in judíos se lanex-tilisli ca imajma pa mocalualosquiaya. Cuaquín quiman yajmo mocaquic nindeno, quinnotzac Pablo ca lajtol hebreo, quinmilic:

## 22

<sup>1</sup>—Lacames nocnían huan notajztiztían, xijcaquican axan len nía niqijjtúa pa nimonapatis.

<sup>2</sup> Cuaquín quiman quicaquijjque Pablo quinlaquetzilijtataya ca inminlajtol hebreo, yehuanten niman míac mocaluajque.

<sup>3</sup> Huan Pablo quinmilijjtíac:

—Nehual nilalac israelito, nilacatic pa in caltilan Tarso pin lalticpan Cilicia. Ma yoje, nimoscaltic nican Jerusalén capa níac pin cali capa monextililo pin caltilan nican, huan Gamaliel yec nolamaxtini. Yihual nechlamaxti-aya yojque chichahuac pa niceltocasquiaya in lajtomes hual techmacajque totajztiztían, in lajtomes hual Moisés quinmacac totajztiztían. Itequi ca mochi noyolo nimotoliniaya pa nichiasquiaya quinami niqijjtuya Dios quinequi. Unca quinami amhuanten axan anquichijjtica.

<sup>4</sup> Pa yina nipehuani niquntejtemuni pa niquntojtocasquiaya yehuan-ten hual quitocalo iojli Jesús, niquntojtocani lacames huan sihuames, niqunquitzquini huan niquintilanini pa quintzualosquiaya pa calijtic. Jo quema, huan nicnequini pa miquilosquiaya.

<sup>5</sup> Yojque huil amnitzililo noje in tiopista hué huan moxtin inminabuelo-jmes in judíos hual huelitilo. Nechmacajque amames pa niquinhuilqu-ilsquiaya tocnían judíos hual cate pa Damasco. Níac nepa pa niquntejte-musquiaya yehuanten hual quitocaloaya iojli Jesús. Niahuiaya niquin-hualica lailpili nican pa Jerusalén pa quincocoltilosquiaya pa yajmo quitocalosquiaya iojli Jesús.

*Pablo quinquhuilía quinami quipalac iyolo pan tonali hual in Tata Jesús quinotzac*

(Hch. 9:1-19; 26:12-18)

<sup>6</sup> Cuaquín cataya quiman ninejntataya pan ojli huan amo cataya huejca in caltilan Damasco, cataya lacualispan, huan jan ajnaxcan pin cielo nechix-pelatisquisac pa noitenco se laixpelalisli niman chichahuac.

<sup>7</sup> Nihuetzic pan lali huan nijaquic se lajtol nechilic: “Saulo, Saulo, ¿leca tiquintojtocatica yehuanten hual nechneltoocalo? Yojqe tichtojtocatica nehual.” Huan nehual nicnanquilic: “¿Aqui tehual, Tata?”

<sup>8</sup> Huan nechilic: “Nehual niJesús in nazareteco hual tichtojtocatica.”

<sup>9</sup> Yehuanten hual cataloaya ca nehual quitajque in laixpelalisli. Ma yoje, amo quicaquijque in lajtol hual laquetzaya ca nehual.

<sup>10</sup> Cuaquín niquilic: “¿Len nicchías, Tata?” Huan in Tata nechilic: “Ximoquetza, xía pa Damasco, huan nepa mitzilisi mochi hual ticpías pa ticchías.”

<sup>11</sup> Huan yojqe chichahuac cataya in laixpelalisli, amo huil nilachiaya. Pampín nechquitziuilje nomajma huan nechhuicaje pa Damasco yehuanten hual cataloaya ca nehual.

<sup>12</sup> Huan cataya se lalac itoca Ananías nepa Damasco. Yihual yec lalac hual itequi lamiaya quichía mochi hual quijtúa tolajtol tehuanten in judíos, huan quijtuloaya moxtin in judíos hual umpa chantiloaya pampa in Ananías yec lalac cuali.

<sup>13</sup> Hualac capa nehual in Ananías, ajsic huan nechilic: “Nocni Saulo, tía tilachía oc sejpa jan axcan.” Huan jan axcan nilachíac huan niquitaya yihual.

<sup>14</sup> Cuaquín nechilic: “In Dios hual quimolancuacuetziliniyme totajtitzían mitzljaltulic tehual pa yina pa ticmatis len yihual quinequi pa tehual ticchías. Mitzljaltulic pa tiquitas Jesús hual unca melahuac pa iyolo, huan tiquitac. Mitzljaltulic pa tijcaquis ilajtol mitzlaquetzilijtica huan tijcaquic.

<sup>15</sup> Mochi inon mitzpanuc pampa Dios quinequi pa tiquinmilis mochi lacames in hual tiquitac huan tijcaquic.

<sup>16</sup> Huan axcan, ¿leca tihuejcahua? Axan ticpía mochi hual monequi. Ximoquetza huan xicaya lacuayatequili, xicnotza toTata Jesús pa mijchipahuilis molajlaculisli.” Inon nechilic Ananías.

*Pablo quinmilía quinami Dios quitlanic pa yehuanten hual amo judíos*

<sup>17</sup> Cuaquín cataya quiman nimocuepac ca niquic pa Jerusalén huan se tonali niclajlantataya Dios pin tiopan hué, nilaxotocac.

<sup>18</sup> Niquitac in Tata Jesús huan nechilic: “Xiejsehui xiquisa nican Jerusalén, amo xihuejcahua, pampa yehuanten nican amo quineftocasi len tiquinmilis nonahuac nehual.”

<sup>19</sup> Huan nehual niquilic: “Tata, ¿amo nechcaquisi? Yehuanten quimatilo pampa nehual niquintzacuani pa calijtic yehuanten hual mitzneltocaloaya, huan niquinhuitequini pin tiopajmes.

<sup>20</sup> Huan quiman quimictije Estéban hual quinahuatijtinemini molajtol, yojqe nepa ca yehuanten nicataya huan nicnequiaya pa quimictilosquiaya. Noje niquinlachilic inmintzotzomajli yehuanten hual quimictitataloaya.”

<sup>21</sup> Ma yoje, Jesús nechilic: “Xía, pampa nimitztilanis huejca pa yehuanten hual amo judíos.”

<sup>22</sup> Jan ca niquic san quicaquiloaya Pablo, huan quiman quinmilic inon inminahuac yehuanten hual amo judíos, tzajtzijque chichahuac, quilijque:

—¡Ma miqúi in se! ¡Amo unca iyaxca pa yultías!

*Pablo ca inminlaicanani hué in guaches*

<sup>23</sup> Tzajtziloaya huan quinquixtiloaya inminahuas, quintzejtelujtataloaya, yojqe quilasaloaya lalpotocli pin ijyecal.

<sup>24</sup> Cuaquínon latlanic in laicanani hué pa quihuicalosquiaya Pablo pa inmincali in guaches calijtic, quinmilic pa quihuitequilosquiaya. Quijtuaya in laicanani hué pampa yojqe momachiltilosquiaya leca tzajtziloaya in judíos pa quimictilosquiaya Pablo.

<sup>25</sup> Ma yoje, quiman quilpiliqque imajmajuan huan icxihuajmes pa pehualosquiaya quihuitequilo, Pablo quinotzac in laicanani nepa moquez-tataya, quilic:

—¿Tehual unca moyaxca pa ticuitequis se lalcal romano hual ayamo laticlanije in huelitinijmes pa yes lacocolti?

<sup>26</sup> Quiman quicaquic inon, uyac in laicanani capa cataya in laicanani hué, quilic:

—Quita. ¿Len tía ticchihua? In lalcal se romano.

<sup>27</sup> Hualac ca Pablo in laicanani hué, quilic:

—Xinechili, ¿tehual tilalcal romano?

Pablo quilic:

—Jo quema.

<sup>28</sup> In laicanani hué quinanquilic:

—Nehual nilalcal romano huan niclaxlahuic mícac tomin pa yojque inon yes noyaxca.

Huan Pablo quilic:

—Nehual nilacatic romano.

<sup>29</sup> Jan ajnaxcan mijcuanijque yehuanten hual yahuiloya quihuitequilo Pablo. Huan momajtiaya in laicanani hué noje quiman quimatic pampa Pablo yec lalcal romano, pampa yihual quinmilic pa quilpilosquiaya huan quilpijqque.

### *Pablo inminlaixpan inminla'ajuaniqmes in judíos*

<sup>30</sup> Cuaquín mostatica quimacahuac Pablo in laicanani hué pampa quinequiaya quimati neli leca quimotexpahuililoaya Pablo in judíos. Laticlanic pa monechiculosquiaya in tiopistas huejué ca moxtin in Lanechiculisli Hué. Cuaquinon in laicanani hué quihuicac Pablo pa latzindan huan quilalic ca yehuanten.

## 23

<sup>1</sup> Cuaquín, quiman Pablo mocahuaya quiztataya in lacames pin Lanechiculisli Hué, quinmilic:

—Lacames nocnían, mojmosta pa yina huan pa axan niyuli ca mosehuilisli ilaixpan Dios, amo nechmotexpahuilía noyolo ilajmatilisli inahuac len unca cuali huan amo cuali.

<sup>2</sup> Huan in tiopista hué itoca Ananías quinmilic pa quitecualosquiaya Pablo pa icamac yehuanten hual moquezatataloaya inahuac yihual.

<sup>3</sup> Cuaquinon Pablo quinotzac in tiopista hué, quinanquilic:

—¡Tehual timochijtica quinami lalcal niman chipahuac! ¡Dios yahui mitztecua tel! ¡Nepa tiyehuatica pa tilajlanis quinami quijtúa tolajtol! Huan ¿leca tiquinmilía pa nechtecuasi? ¡Tolajtol amo quimacahuilía inon!

<sup>4</sup> Yehuanten hual nepa moquezatataloaya quilijque:

—Tiquihuejuecaltitica in tiopista hué hual Dios quilajtultic.

<sup>5</sup> Pablo quinnanquilic:

—Nocnían, amo niquislacuhuaya pampa yihual yec in tiopista hué, pampa Dios ilajtol lajcuiluli quijtúa: “Amo xiquijtu len amo cuali hual cajuas se hual huelitía capa amhuanten.”

<sup>6</sup> Cuaquín quitac Pablo quinami sequin pin Lanechiculisli Hué quitocaloaya ilamaxtilisli in saduceos huan in oc sequin quitocaloaya ilamaxtilisli in fariseos. Pampa in quitzajtzilic ca lajtol chicahuac yehuanten pin lanechiculisli, quinmilic:

—Lacames nocnían, nehual nifariseo huan yec fariseo notajtzin. Nechmot-expahuilijtcate pampa nehual nicchixtica in tonali quiman tiyulisi oc sejpa ca tocuerpos quiman timiquilo.

<sup>7</sup> Yojque, pampa Pablo quijtuc inon, pehualoaya molaxililo lajtol in fariseos huan in saduceos, yajmo cataloaya ca se lajtulisi yehuanten.

<sup>8</sup> Cataya pampa quijtulo in saduceos in mijquimes amo yulilo oc sejpa, huan quijtulo pampa amo cate lanahuatinijmes pin cielo huan iyjecames cuajcuali huan amo cuajcuali. Huan quineltocalo in fariseos mochi innojen.

<sup>9</sup> Pampín pehuac se cualanilisi niman hué pin Lanechiculisli Hué huan cuaquinon moquetzajque sequin lamaxtinijmes hual yeje fariseos, quinmilijque chicahuac:

—Amo tiquitalo nindeno amo cuali ca in lalac. Sinda cuajnesi se espíritu o se ilanahuatini in cielo laquetzac ca yihual, amo quichihuilía nindeno amo cuali ipan tolajtol inon.

<sup>10</sup> Huan mochihuaya in cualanilisi niman chicahuac. Pampín momajtiaya in laicanani hué pampa huejtica yahuiloaya quicocoltilo Pablo niman miac. Yojque quinmilic pa temusqui in guaches pa quiquixtililosquiaya Pablo capa yehuanten huan pa quihuicalosquiaya pin inmincalimes in guaches.

<sup>11</sup> Huan mostatica pa layúa nesi in Tata ca Pablo, quilic:

—Amo ximomajti, pampa tía ticnahuatía nolajtol nehual pin caltilan hué Roma quinami noje ticnahuatiaya pa Jerusalén.

### *Quichihualo se lajtulisi pa quimictisqui Pablo*

<sup>12</sup> Mostatica quichihuaque in judíos se lajtulisi pa quimictilosquiaya Pablo, moilijque ilaixpan Dios, quilijque:

—Ma Dios techtilani pa ticayasqui lacocoltili sinda tilacualo o sinda tilaunilo sinda ayamo ticmictijque in Pablo.

<sup>13</sup> Yojque quijtujque ilaixpan Dios quinami ompuhuali (cuarenta) lacames ca se ome oc sequin lacames hual monechicujque pa quichihuasqui in lajtulisi chicahuac.

<sup>14</sup> Cuaquín uyajque pa in tiopista hué huan inminabuelojmes in judíos, quinmilije:

—Axan tiqijtujque ilaixpan Dios pa yihual techtilanis pa ticayasqui laco-coltili sinda tilacuasi o sinda tilaunisi sinda ayamo ticmictijque Pablo.

<sup>15</sup> Axcán, amhuanten huan yehuanten in Lanechiculisli Hué xicmachiltican inminlaicanani hué in guaches pampa anquinequi anquilajlanilía Pablo mochi inon oc sejpa huan niman cuali. Xictemachican in laicanani hué pa quihualicas Pablo ca amhuanten. Huan tehuanten ticayasqui lachijchihualí pa ticmictisi Pablo quiman ajsitihualas.

<sup>16</sup> Ma yoje, quicaquic inon ixolol lalac icni sihual Pablo pampa yahuiloaya quimictilo Pablo. Pampín uyajtiquisac pa inmincali in guaches capa Pablo cataya latzacuali, calaquic, quilamachiltic Pablo.

<sup>17</sup> Huan Pablo quinotzac pa hualas se ilaicanani in guaches, quilic:

—Xicuica in oquixli pa in laicanani hué, pampa quipía len pa quilamachiltis.

<sup>18</sup> Yojque in laicanani canac ixolol icni sihual Pablo, quihuicac ca in laicanani hué huan quilic:

—In latzacuali Pablo nechnotzac pa nihualas ca yihual, nechtemachic pa nimitzhualiquilis in oquixli pampa yihual quipía len pa mitzilis.

<sup>19</sup> Yojque canac in laicanani hué imajma in oquixli, huan yihual mohuica-jque pa capa cataloaya inminhuían, quilajlanic:

—¿Len unca inon hual ticpía pa tinechmachiltis?



<sup>20</sup> In oquixli quilic:

—Axan quichihua je se lajtulisli in judíos huan yalo mitztemachilo pa ticuicas Pablo mosta pa latzindan pa icali in Lanechiculisli Hué, quil, pa momachiltisi oc se jpa niman cuali inahuac inon hual quimotexpahuilijticate, quil. Ma yo je, islacatilo.

<sup>21</sup> Pampín, tehual amo xicchía quinami quinequilo, pampa cate quinami cuarenta y se, ome lacames yalo anmitzmolatililo pan ojli pa quimictisi Pablo. Quijtu je chicahuac ilaixpan Dios pa quintilanis capa cayasqui lacocilti sinda lacualo o launilo sinda ayamo quimictije Pablo. Huan axcan cate lachijchihuali huan lachixticate pa ticchías quinami quinequilo.

<sup>22</sup> Yojque, quilic chicahuac in laicanani hué ixolol icni sihual Pablo, quilic: —Amo xiquili amaqui len tilamic tinechlamachiltic.

*Quitlanía Pablo ca in lalac hual huelitía*

<sup>23</sup> Cuaquinon quinnotzac inminlaicanani hué in guaches ome laicananimes pa hualasqui ca yihual, quinmilic:

—Xiquinpiacan guaches lachijchihuali pa chicnahui (nueve) horas pa layúa pa yasi pa Cesarea. Anquinmanas dos cientos guaches hual nejnentiási, setenta guaches hual lejcutiási pan caballos huan dos cientos guaches hual quinpixtiasi inminteposlimes pa moanalísli.

<sup>24</sup> No je latilanic pa quinmanalosquiaya ome caballos pa Pablo no je lejcusquiaya. Latilanic pa quihuicasqui quiyahualujticate pa mochi ojli, huan yojque ajsilosquiaya ca in lalac itoca Felix in huelitini hual cataya pa Cesarea.

<sup>25</sup> No je in laicanani hué quitlanilic in lalac hual huelitiaya se amal ca yehuanten, huan yojque quijtuc in amal:

<sup>26</sup> “Claudio Lisias pa in lasojli Tata Huelitini Félix, nimitzpialtía.

<sup>27</sup> ‘In lalac quiqitzquije in judíos huan yahuiloya quimictilo quiman nihualajtiqisac ca noguaches, niqinquixtilic yehuanten quiman nicmatic yihual lalac romano.

<sup>28</sup> Nicnequiaya nicmati in amo cuali hual quichíac hual pampa inon quimotexpahuililoaya. Pampín nicuicac inminlaixpan inminLanechiculisli Hué in judíos.

<sup>29</sup> Nepa niqitac pampa quimotexpahuililoaya inahuac len lajtol hual quítúa quinami quimolancuacuetzililo inminDios. Amo quimotexpahuililoaya ca len monotzaya pa quimictilosquiaya o pa quitzacualosquiaya pin calijtic.

<sup>30</sup> Huan quiman nechmachiltijque pampa quichihua je se lajtulisli pa quimictilosquiaya in lalac pan ipampa lacuajcuamanalísli, cuaquín jan axcan nictilanic ca tehual. No je nilatilanic pa quimotexpahuilísqui pa molaixpan yehuanten hual quimotexpahuililo. Xicaya cuali.”

Yojque quijtuc in amal.

<sup>31</sup> Yojque, in guaches canajque Pablo quinami quinmilic in laicanani hué, quihuicajque pa layúa pa Antípatris.

<sup>32</sup> Mostatica yajtiajque ca Pablo in guaches hual lejcutihuiloya ca caballos huan mocuetiahuiloya in oc sequin guaches pa inmincalimes in guaches pa Jerusalén.

<sup>33</sup> Huan in guaches ca caballos ajsijque pa Cesarea huan quimacajque in amal in lalac huelitini (gobernador), no je quitemacajque Pablo ca yihual.

<sup>34</sup> Yojque, quiman Felix, in huelitini, lamíc momaxtic in amal, quilajlanic Pablo pa calía lalticpan lacatic. Pablo quinanquilic pampa cataya pin lalticpan Cilicia.

<sup>35</sup> Cuaquín Felix quilic:

—Nijcaquis len ticpías pa tiquijtus quiman hualasi yehuanten hual mitz-motexpahuililo.

Cuaquin latlanic pa quilachillosquiaya Pablo pa icali hué hual itoca iPretorio Herodes.

## 24

<sup>1</sup> Panujque macuili tonaliymes, huan temujque pa Cesarea Ananías in tiopista hué ca sequin inminabuelojmes in judíos huan se itoca Tértulo. In Tértulo yec licenciado. Yehuanten quimotexpahuilijque Pablo ca Felix in huelitini.

<sup>2</sup> Quinahuatijque pa hualasquiaya Pablo. Hualac Pablo, huan Tértulo pehuac motexpahuic ca in lalac Felix, quilic:

—Lasojli Félix, pa tehuanten unca mosehuilisli mojmosta huan tipaquilo pampa axan mochíac niman cuali tolali.

<sup>3</sup> Tihuelitía cuali ca mochi huan pa mochi cajcapa pan ipampa molajmatil-isli tehual. Ticanalo mochi inon pampa tehual titejchihuilía. Huan pampín timijsehuido míac, Tata Huelitini.

<sup>4</sup> Ma yoje, pa camo nimitzmaca míac tequil, nimitztemachía pa tichcaquis jan nadita san, quinami tehual mojmosta tilachihuilía cuali.

<sup>5</sup> Unca pampa tiquitajque in lalac unca quinami se cocolisli. Amo mocahua quimacatinemi tequil pa yajmo cayasi ca se lajtulisli in judíos cajcapa yes chantilo pa mochi in lalticpan. Yihual ilaicanani ilamaxtilisli in Jesús hual chantini pa Nazarét, inminlanechiculisli in nazarenos.

<sup>6</sup> Yihual noje motolintataya pa quiylacusquiaya totiopan hué huan pampín tijquitzquijque. Ticnequiloaya ticchihuililo quinami quijtúa tolajtol.

<sup>7</sup> Ma yoje, hualac Lisias inminlaicanani hué in guaches huan ca niman míac chicahualisli techquixtilic in se.

<sup>8</sup> Quijtuc pampa yehuanten hual quimotexpahuילוaya se quipialoaya pa hualasi ca tehual. Huan sinda ticlajlanis tehual, huil ticmati unca melahuac mochi in hual ticmotexpahuilijcate.

<sup>9</sup> Huan in judíos hual nepa cataloaya noje quijtujque pampa cataya yojque quinami quijtuc Tértulo.

<sup>10</sup> Cuaquinon in lalac Felix quichihuilic lanextilisli Pablo pa lananquil-isquiaya, huan Pablo quulic:

—Nicmati pampa tehual tihuelitiaya pa tolali axan pa míac xixihuil. Pampín nicpía paquilisli pa nimitzilis len nicchijtataya quiman nechquitzquije.

<sup>11</sup> Jan quipía quinami doce tonaliymes san quiman nipanquisac pa Jerusalén pa nicmolancuacuetzilisquiaya Dios. Tehual huil ticmati unca neli inon.

<sup>12</sup> Yehuanten amo nechitaje niquinlaxilijtataya lajtomes, amo nechitaje nicchijtataya zahuanilisli pa niquincualantis pin tiopan hué huan amo pa oc sequin tiopajmes pin caltilan.

<sup>13</sup> Huan yehuanten amo quimatilo nindeno calica huil mitznextilisli da unca neli inon hual nechmotexpahuililo.

<sup>14</sup> Jan nimitzilía neli inon, nicmolancuacuetzilía iDios totajtzitzián, nictoca iojli Jesús, in ojli hual innojen lacames quijtulo unca se ojli ca lamaxtilisli amo cuali. Huan niquinneltoca mochi innojen hual unca lajcuiluli pa iamames tolajtol huan pin amames hual quinnimjcuilujque ilajtunijmes toDios.

<sup>15</sup> Niyuli nicchixtía pa Dios tejchihuilis len yihual quilic neli, yojque quinami quichialo in lacames nican. Huan yojque nicchixtica pampa Dios

yahui quinyulitía oc sejpa yehuanten hual miquije. Yahui quinyulitía yehuanten hual quineltocalo huan yehuanten hual amo quineltocalo.

<sup>16</sup> Pampín nimotolinía pa nicchías len Dios quita cuali huan len quitalo cuali lacames. Nicchía inon pa camo nechmotexpahuilis noyolo nindeno.

<sup>17</sup> Axan quipía nahui, macuili xixihuil amo nicataya pin Jerusalén. Huan quiman niajsic nepa quipía doce tonalijmes, nicpiaya len pa niqin-macasquiaya nocnán judíos hual amo quipialoaya pa molacualtis. Noje niahuiaya niclali se huendi pin tiopan hué.

<sup>18</sup> Nechitaje pin tiopan hué sequin judíos hual chantilo pin lalticpan Asia. Nechitaje nicchijtataya innojen lachihualisli, nimochipajtataya quinami quijtúa tolajtol. Amo cataloaya lalacalera ca nehual huan amo nicchijtataya zahuanilisli.

<sup>19</sup> In judíos asiatecos, innojen cate hual quipialoaya pa nechmotexpahuillosquiaya pa moixpan sinda quijtulo pampa nicchihuaya len amo cuali.

<sup>20</sup> O yehuanten nican ma quijtucan len amo cuali quitaje nicchíac quiman nimoqueztataya inminlaixpan yehuanten pa inLanechiculisli Hué in judíos.

<sup>21</sup> Cuajnesi quinequilo quijtulo pampa nicchíac len amo cuali quiman nitzajtzc nimoqueztataya capa yehuanten, niqintzajtzilic: “Annechmot-expahuilijtica axan pampa nicneltoca yalo yulilo oc sejpa yehuanten hual míquilo”, niqinmilic.

<sup>22</sup> In Félix quimatiaya míac inahuac ilamaxtilisli iojli Jesucristo. Yojque, quiman quicaquic inon, mocahuac pa lajlanis huan quilamic in lanechiculisli, quinmilijtica:

—Quiman hualas in laicanani hué Lisias, cuaquín annimitzilis quinami niquita anmotexpahuilisli.

<sup>23</sup> Cuaquín Félix quilic in laicanani pa quilachillosquiaya Pablo in guaches. Noje quilic pa quimacahuiltsquiaya Pablo pa quichiasquiaya len quinequisquiaya quichía, san amo huil quisaya pa quiahuac in cali. Huan quilic pa camo quitzaculisquiaya ilajlasojli Pablo hual quinequiaya quipaxaluili o quichihuili len yes cuali.

<sup>24</sup> Cuaquín, quiman panujque sequin tonalijmes, hualajque Félix huan isihua itoca Drusila, yihual yec judía. Quinahuatic Félix pa hualasquiaya Pablo pa huil quicaquisquiaya len Pablo quilaquetzilisquiaya pa quimatisquiaya quinami se quineltoca Cristo.

<sup>25</sup> Huan quilaquetziliaya Pablo quinami lacames quipialo pa yesqui melahuac pa inminyolo quinami Dios unca melahuac. Quilaquetziliaya quinami quinequi Dios pa timotzaculisqui pa camo ticchihuasqui in amo cuali. Quiliaya noje pampa Dios yahui quintojtoca pa quisas ilaixpan yihual yehuanten hual amo quineltocalo. Pampín pehuaya momajti Félix, quilic:

—Xía nuso axan. Quiman nicpía oc se tonali nimitznotzas pa tihualas ca nehual.

<sup>26</sup> Noje Félix amo mocahuac pa quichiasquiaya pa Pablo quimacasquiaya tomin pa yojque quimacahuasquiaya. Pampín Félix quinahuatiaya míac tonalijmes pa hualasquiaya Pablo pa laquetzasquiaya ca yihual.

<sup>27</sup> Huan yojque panujque ome xixihuil. Cuaquínon quijcuanijque Félix, yajmo yec lalac hual huelitiaya. Ja umpa quitocac yihual pa huelitis se hual itocaya Porcio Festo. Yihual in huelitini yancuic. Ma yoje, quiman quisaya Félix pa yajmo huelitisquiaya, quinequiaya quinchihuili len hual quixtocaloaya in judíos. Pampín quicahuac Pablo latzacuali calijtic.

## 25

*Pablo ilaixpan Festo*

<sup>1</sup> Cuaquinon ajsic Festo pa Cesarea, pehuac yec lacial huelitini pin lalticpan Judea huan quiman panujque ye tonalijmes, quisac nepa Cesarea pa panquisasquiaya pa Jerusalén.

<sup>2</sup> Nepa quitaloaya in tiopistas huejué huan inminhueyenten in judíos. Yehuanten quilamachiltijque pampa quimotexpahuילוaya Pablo, pehuajque quitemachijque Festo pa quinchihuilisquiaya cuali.

<sup>3</sup> Quinequiloaya pa quitilanisquiaya Pablo pa Jerusalén. Huan umpa pan ojli sequin judíos yahuiloaya quinapachilo pa quimictilosquiaya quiman panuaya.

<sup>4</sup> Ma yoje, quinnanquilic Festo, quinmilic:

—In Pablo yahui mocahua latzacuali pa Cesarea, huan nehual amo nía nihuejcahua pa nimocuepas ca umpic.

<sup>5</sup> Pampín, yehuanten hual quipialo in lahueliltisli capa amhuanten ma temucan ca nehual pa Cesarea. Cuaquinon sinda unca len amo cuali hual quichíac in lacial, nepa ma quimotexpahuilican.

<sup>6</sup> Mocahuac in Festo nepa pa Jerusalén jan se ocho o diez tonalijmes san, cuaquinon mocuepac pa Cesarea. Nepa ajsic huan mostatica molalic pa iicpali hué in lacial hual huelitía, latilanic pa canalesquiaya Pablo.

<sup>7</sup> Quiman hualac Pablo, moquetzajque itenco moxtin in judíos hual quisajque ca Festo nepa Jerusalén huan temujque pa Cesarea. Quimotexpahuilijque Pablo ca míac lachihualisli amo cuajcuali huan huejué. Ma yoje, amo huil quinextiloaya yehuanten sinda quijtuloaya melahuac.

<sup>8</sup> Cuaquín Pablo lajtuc pa quinnextilisquiaya pampa amo quichíac nindeno amo cuali, quinmilic:

—Amo nicchíac nindeno hual inminlajtol in judíos amo techmacahuiltía pa ticchiuasi. Amo nicchíac nindeno amo cuali pin tiopan hué, amo nicchíac nindeno hual ilajtol in hué romano amo techmacahuiltía pa ticchiuasi.

<sup>9</sup> Festo quinequiaya quinchihuili len hual quinnextilisquiaya in judíos pampa yihual quinequisquiaya quinpaquilti. Pampín quilajlanic Pablo, quilic:

—¿Ticnequi tipanquisa pa Jerusalén, pa nimitzcaquis umpa quinami tilananquilis inahuac inon calica mitzmotexpahuililo?

<sup>10</sup> Huan Pablo quilic:

—Nimoquetzica inminlaixpan in huelitini romano hual quipía ilahueliltisli in hué nepa Roma. Unca nican capa nicpía pa niyes lacaquili huan amo pa Jerusalén. Yojque unca quinami quijtúa in lajtol. In judíos amo niqinchihuilic nindeno amo cuali, quinami tehual noje ticmati cuali.

<sup>11</sup> Sinda nicchíac len hual nechahuilúa pa nimiquis, cuaquín amo nimonapatis, ma nechmictican. Ma yoje, sinda amo unca melahuac len quijtulo nechmotexpahuilijticate, cuaquín amaqi huil nechtemaca ca yehuanten. Nehual nimotemacas ca Cesar inminhué in romanos, nicnequi pa yihual nechcaquis.

<sup>12</sup> Cuaquín laquetzac Festo ca ilacames ilanechiculisli, huan cuaquín quinnanquilic Pablo, quilic:

—Ticnequi timotemaca ca Cesar in hué. Pampa inon, ca Cesar tías.

*Festo quilaquetzilia in hué Agripa quinami quimotexpahuililo Pablo*

<sup>13</sup> Panujque sequin tonalijmes, hualajque pa Cesarea inminhué in judíos hual itocaya Agripa huan icni sihual itocaya Berenice, hualajque pa quipialtisqui in hué local Festo.

<sup>14</sup> Quiman cayajque nepa sequin tonalijmes, Festo quilaquetzilic Agripa quinami quimotexpahuililoaya Pablo, quilic:

—Unca se local latzacuali hual Félix quicahuac nican quiman quisac pa yajmo yes huelitini.

<sup>15</sup> Quiman níac pa Jerusalén, quimotexpahuilije in tiopistas huejué huan inminabuelojmes in judíos, quitemachijtataloaya pa nictilanisquiaya pa miquis.

<sup>16</sup> Yehuanten niqinnanquilic pampa tolajtol tehuanten romanos amo quimacahuilítia pa quitilansi se local quinami quinequilo yehuanten hual quimotexpahuililo. Romanos —quilic Festo—, quipehualtilo in lajlanilisi quimacatica tonali pa moitasi laneciculi yehuanten moxtin, pa cayas in se inminlaixpan yehuanten hual quimotexpahuililo. Yojque in se huil monapatía de len quimotexpahuililo.

<sup>17</sup> Pampín tihualaje ca niqic huan amo nihuejcahuac pa nicpehualtis in lajlanilisi. Cataya mostatica nimolalic pa noicpali pa la'ajuani huan nilatilanic pa canasi in local.

<sup>18</sup> Huan quiman moquezataloaya in local inminlaixpan yehuanten, amo quimotexpahuilijque ca nindeno hual niqijtuaya yehuanten yahuiloya quimotexpahuililo. Amo cataya len quinami se hué lachihualisli amo cuali.

<sup>19</sup> Jan quimotexpahuililoaya inahuac len quinami quimolancuacuetzililo inminDios san. Laquezataloaya inahuac se hual itoca Jesús hual miqic, huan quijtúa Pablo neli pampa yuli.

<sup>20</sup> Yojque nehual amo nicmatiaya quinami huil niclajlanisquiaya len quinami inon. Pampín niclajlanic Pablo sinda cuajnesi quinequiaya yahui pa Jerusalén, pa umpa yesquiaya lacaquili inminyampa yehuanten.

<sup>21</sup> Ma yoje, quilic Pablo pampa yahuiaya motemaca ca in hué Cesar pa yihual quicaquisquiaya quinami Pablo yahuiaya monapati. Cuaquín nilatilanic pa quipialosquiaya nican. Quiman panusi sequin tonalijmes huil nictilanis ca Cesar Augusto in hué.

<sup>22</sup> Agripa quinanquilic Festo, quilic:

—Nehual noje nicnequisquiaya nijcaqui len quijtúa in local.

Festo quilic:

—Mosta tijcaquis lajtus.

<sup>23</sup> Yojque mostatica hualajque Agripa huan Berenice in omente lalaquentili cualtichin, huan quintocathualaloaya moxtin oc sequin cualtichin se itepotzcon oc se. Calaquijque pa se calijtic hué capa monechicunijme in huejueyenten. Calaquijque ca yehuanten in inminlaicananijmes huejué in guaches huan inminhuejueyenten in caltilan Cesarea. Cuaquinon latilanic Festo pa quihualcalosquiaya Pablo.

<sup>24</sup> Quiman ajsic Pablo, cuaquín Festo quinmilic:

—Hué Agripa huan anmoxtin lacames hual anunca nican ca tehuanten, anquiztica in se hual inahuac yihual moxtin in judíos pa Jerusalén huan nican nechlaquetzilije. Quimotexpahuililoaya huan quilijtinemiloaya pampa yajmo unca iyaxca pa yultías.

<sup>25</sup> Ma yoje, nehual amo niqitiliaya se lachihualisli amo cuali hual cahuiluaya pa yes latilanis pa miquis. Jan yoje yihual ihuán quinequiaya motemaca ca in hué Cesar pa yihual quicaquiltisquiaya. Pampín nimolalic pa nictilanisquiaya in local ca in hué.

<sup>26</sup> Ma yoje, nican neli nimoitas amo nicmaztica len lajtol pa niquijcuiluilis in Tata Hué Cesar pa nicmachiltis leca nictilanijtica ca yihual. Pampa inon nicualica in se pa anmolaijpan pa anquicaquis. Huan pa molaixpan, Hué Agripa, nicualica ca niman míac lanequilisli pa yojque, cuajnesí quiman ticlajlanis yihual, nehual nicpías len niquijcuiluilis in hué Cesar leca nictilanijtica in lalac.

<sup>27</sup> Niquijtúa inon pampa niquijtúa ninesis quinami se hual amo laijnamiquía cuali sinda nictilanis se lailpili ca in hué huan amo huil niclamachiltía ca lajtol neli leca quimotexpahuilijtcate in judíos.

Yojque quijtuc Festo.

## 26

### *Pablo ilaixpan in hué Agripa*

<sup>1</sup> Cuaquinon Agripa quilic Pablo:

—Timitzmacahuilijtcate pa timonapatis tehual, xilajtu.

Cuaquinon quixilanic Pablo imajma, quichíac lanextilisli, pehuaya lajtu yojque, quinmilic:

<sup>2</sup>—Tata Hué Agripa, nimoiztica ca paquilisli axcan pampa tichmacahuilijtica pa nimonapatis pa molaixpan inahuac mochi inon hual nechmotexpahuilijtcate in judíos.

<sup>3</sup> Huan amo in san. Noje nicpía paquilisli pampa tehual tiquinmati mochi innojen lachihualisli huan innojen lajtomes hual quinneltocalo in judíos, huan ticmati mochi hual inahuac inon molaxililo lajtomes. Pampín nimitztemachía pa tichcaquis huan pa camo tisiahuis quiman tichcactica.

### *Pablo quinmilía quinami yulini quiman ayamo quiximatic Cristo*

<sup>4</sup> Moxtin in judíos —quilic Pablo—, quimatilo quinami niyulini quiman nicataya muachito huan quiman nimoscaltitayaya. Quimatilo inon yehuanten hual yulilo capa nilacatic huan quimatilo yehuanten hual yulilo pa Jerusalén.

<sup>5</sup> Sinda quinequiloaya mitzililo, huil mitzililoaya pampa nehual nifariseo huan niyulini quinami yulilo in fariseos. Quichihualo in fariseos quinami monequí pa quichihuasi innojen lachihualisli hual cate quinami ticmolancuacuetzililo Dios. Amo yojque míac quichihualo in oc sequin judíos.

<sup>6</sup> Huan axcan nechmotexpahuilijtcate. Huan ¿leca? Unca pampa nichixtica inon hual Dios neli quinmilic totajtzitzián pampa yihual yahuiaya quinmaca. Huan inon unca hual nichixtica, Dios yahui quinyuliltía in mijquimes.

<sup>7</sup> Huan inon quichixticate moxtin inminmiahuimes in doce totajtzitzián tehuanten hual ilacames Israel, quichixticate pampa quinequilo yulilo oc seppa. Pampín quimolancuacuetzililo Dios huan quitequipanuilito yihualitonalí, pa semilhuil huan pa layúa. Huan Tata Hué Agripa, nehual noje nichixtica Dios yahui nechyliltía. Huan pampa in, in judíos nechmotexpahuilijtcate axcan, in nimitzilía Tata Hué Agripa.

<sup>8</sup> Huan ¿leca anquijtúa laijtic amhuanten pampa Dios amo quipía chicahualisli pa quinyuliltis yehuanten hual miqijje?

### *Pablo quijtúa quinami quitojtocani in laneltocaniymes*

<sup>9</sup> Nehual, amo quipía míac xixihuil quiman niquijtuni pampa nicpiaya pa niquinchihuilisquiaya míac amo cuali yehuanten hual quinneltocalo Jesús

in nazaretco. Nicnequiaya pa yajmo laquetzalosquiaya len lajtol inahuac yihual.

<sup>10</sup> Nicchiác inon pa Jerusalén. Niquintzacuac míac ilaneltocanijmes pa calijtic, nicanac inminlatilaniisli in tiopistas huejué. Huan noje, quiman latilaniinijme pa yesquiaya lamictili se laneltocani, nehual noje niquinmacani nolajtol pa yesquiaya lamictili.

<sup>11</sup> Huan pa mochi in tiopajmes cataloaya míac tonalijmes quiman niquin-cocoltini in laneltocanijmes, niquinchihualtini lahuejuecaltisli pa quijtusi pampa Jesús amo unca Dios. Nicualanini ca yehuanten niman chicahuac, quema, huan niahuini pa oc sequin caltilan pa niquintojtocasquiaya.

*Pablo quinpuhuilía oc sejpá quinami pehuac quineltocac Cristo*

*(Hch. 9:1-19; 22:6-16)*

<sup>12</sup> Yojque nicchijtinemini huan cataya se tonali niahuia pa Damasco pa niquinquitziquisquiaya moxtin laneltocanijmes nepa pa niquinhuicasquiaya lailpili pa Jerusalén. Nicpiaya se amal pa nicchiasquiaya inon ca ilahueliltilisli in tiopista hué.

<sup>13</sup> Cataya lacualispan, Tata Hué Agripa, huan niqitac se lahuilisli niman chicahuac, laixpelatiquisac pin cielo. Amo quiman huil lahui in tonali quinami in lahuilisli. Nechixpelac notenco huan quinmixpelac yehuanten hual yahuiloaya ca nehual.

<sup>14</sup> Timoxtin tihuetzije pan lali huan nehual nijcaquic se lajtutataya ca lajtol hebreo, nechilic: “Saulo, Saulo, ¿leca tiquintojtocatica yehuanten hual nechneltoalo? Yojque tichtojtocatica nehual. Unca len chicahuac pa tehual. Tiquinami se buey hual quitecua in latzopinijquil ca icxían.”

<sup>15</sup> Huan niqilic: “¿Aqui tehual, Tata?” Huan in Tata nechilic: “Nehual niJesús hual tichtojtocatica.

<sup>16</sup> Axan, ximoquetza ca mocxihuajmes. Nimitzmonextilic tehual pampa nimitzljaltulic pa tichtequipanuilis. Tía tiquinlaquetzilijtinemi lacames in quinami tichitac axcan. Noje tichitas ca oc sequin tonalijmes huan ticpiás pa tiquinlaquetzilis lacames hual nimitznextilis umpa.

<sup>17</sup> Nimitzquixtilis pin polehuilisli quiman tiunca ca judíos huan ca yehuanten hual amo judíos pa camo mijchihuilisli len quinequisi mijchihuilisli.

<sup>18</sup> Unca ca yehuanten hual amo judíos capa nimitztilanis pa quimatisi len quinequi quijtúa Dios ilajtol. Nimitztilanis pa tiquinmilis pa mocahuasi pa canasi iojli laticumac Satanás, pa tiquinmilis pa canasi iojli Dios capa lajtica, pa camo quineltocasi Satanás huan pa quineltocasi Dios. Nimitztilanis ca yehuanten pa tiquinmilis pampa Dios quinpujpuhuas yehuanten inminlaij-laculisli. Yojque quipiasli in hual nía niquinmaca moxtin yehuanten hual niquinlajtultía, hual nechneltoalo.” Inon nechilic Jesús.

*Pablo quineltoca len quilic Jesús*

<sup>19</sup> Yojque, Tata Hué Agripa, nicneltocac len nechilic Jesús quiman nech-notzac nepa pin cielo.

<sup>20</sup> Jo quema, nipehuac niquinlaquetzilijtataya yehuanten hual chantiloaya pa Damasco in hual niqitac. Niquinmilic pa quipalalosquiaya inminyolo pa pehuasi laijnamiquisi quinami yihual Dios huan pa canalosquiaya iojli Dios. Niquinmilic pa quichihualosquiaya len quinnextilisquiaya moxtin pampa axan quipalaje inminyolo. Cuaquín, panuc inon, nicchiác yojque pa Jerusalén, cuaquinon pa mochi in lali Judea. Noje niquinmilic inon yehuanten hual amo judíos.

<sup>21</sup> Pampín nechquitzquiye in judíos pin tiopan hué, motoliniloaya pa nechmictilosquiaya.

<sup>22</sup> Ma yoje, nechpalehuiaya Dios nepa in tonalijmes huan axan nican. Yoje in tonali niyuli niqinlaquetzilijta in lamachtilisli cuali ca lacames tijtipichin huan lacames huejué. Jan niqinmilía san inon hual Dios ilajtunijmes huan Moisés quijtunijme pa yina pampa yahuiaya panu.

<sup>23</sup> Quijtunijme pampa quipiaya panusquiaya lacocoltilisli in Cristo, quipiaya pa miquisquiaya. Quijtunijme pampa yihual yesquiaya hual quipehualtiaya moxtin hual miquiye huan mocuepaje yulijé pa camo miquisi oc sejpa. Yojqe Cristo quinnextilisquiaya in judíos huan yehuanten hual amo judíos pampa neli yulisi oc sejpa yehuanten hual miquilo. Inon unca in lanahuatilisli hual quinlahuilía lacames inminyolo.

*Pablo motolinía pa quiyamanilis iyolo Agripa pa quineltocas Jesús*

<sup>24</sup> Quiman quijtuc Pablo innojen lajtomes pa monapatisquiaya, quitzaizilic Festo ca lajtol chicahuac, quilic:

—¡Amo ticpía laijnamiquilisli, Pablo, pampa ticmonextilic niman míac! ¡Pampín axan timochíac se hual amo quipía laijnamiquilisli!

<sup>25</sup> Pablo quinanquilic:

—Amo niunca yojque, Tata Festo. Neli niquiqtutica inon ca lajtomes hual unca melahuac hual moxtin quimatilo len quinequilo quijtulo.

<sup>26</sup> Nican unca in hué huan amo nimomajtía niquiqtutía inon ilaixpan yihual, pampa yihual quimati cuali in hual niquiqtutica. Nehual niquiqtutía neli pampa yihual cajsíaya lamachtilisli inahuac in hual panuaya. Inon hual niclaquetzilijtica amo panuaya capa cataya lalatlí.

<sup>27</sup> Tehual, Tata Hué Agripa, ¿ticneltoca len Dios quijtuc pan inminpampa ilajtunijmes? Nicmati pampa tehual ticmati in unca jan quinami annimitzilic.

<sup>28</sup> Huan Agripa quilic Pablo:

—Pan se nadita ticnequi tijsulahua pa nimochihuas se hual quineltoca Cristo.

<sup>29</sup> Huan Pablo quinanquilic:

—Nictemachía Dios pa quinequis pa ticneltocas Cristo, pa tiyes quinami nehual, ma ye pan se nadita, ma ye pan míac tonalijmes. Huan in hual nictemachía Dios pa tehual, noje nictemachía pa moxtin nican hual nechcaticate axcan. Jan annimitzilía san amo nicnectica pa anyesquiaya lailpili quinami nehual.

<sup>30</sup> Ca inon laquisac lajtuc Pablo, huan moquetzac in hué, cuaquinon moquetzajque Festo in lalac huelitía huan Berenice huan yehuanten hual nepa cataloaya.

<sup>31</sup> Quiman mohuicajque, laqueztiahuilooaya se ca oc se, quililoaya:

—Amo quichíac in lalac nindeno hual cahuilúa pa yes lamictili, huan amo cahuilúa pa yes latzacuali pa calijtic.

<sup>32</sup> Huan Agripa quilic Festo:

—Tehuanten huil ticmacahualoaya in lalac sinda amo quinequiaya motemaca ca in hué Cesar.

## 27

*Quitlanilo Pablo pa Roma*

<sup>1</sup> Quiman quilalijque pa quitlanilosquiaya Pablo pa in lali Italia capa unca in caltilan hué Roma, nehual Lucas huan yihual tiajqe. Quitemacajque



Pablo huan oc sequin lacames lailpili ca se laicanani itoca Julio. Yihual yec ilaicanani inminlanechiculisli in guaches itoca iBatallón Augusto.

<sup>2</sup> Tilejucjque pan se barco hual quisaya pin caltilan Adramitio capa barcos quisalo huan moquetzaló. Amo yahuiaya huejcahua pa quisas nepa Cesarea huan yahuiaya panu pa atenco in lalticpan Asia, nepa cataloaya sequin caltilan capa calaquilo barcos. Noje ca tehuanten yahuiaya yahui Aristarco hual lacatic pa Tesalónica pin lali Macedonia.

<sup>3</sup> Mostatica tiajsijque pa Sidón capa calaquilo in barcos huan nepa Julio cataya niman cuali ca Pablo, quichihuilic se cuali hué. Quimacahuiltic pa yas capa ilajlasojli pa Sidón pa yehuanten quichihuililosquiaya mochi hual monequiaya pa quipiasquiaya.

<sup>4</sup> Cuaquín quiman tiquisajque nepa Sidón, amo ijyecaya quinami quinequiaya yahui in barco. Pampín tipanujque pan norte in lali Chipre hual unca lajco pin al huejcalan. Yojque yajmo miac techpitzaya in ijyecal.

<sup>5</sup> Panujtiahuiaya tobarco pin al huejcalan capa amo huejca cataloaya in lalticpan Cilicia huan in lalticpan Panfilia. Cuaquinon tiajsijque pa Mira pin lali itoca Licia.

<sup>6</sup> Huan umpa quitac in laicanani se barco hual quisac nepa pin caltilan hué Alejándria capa calaquilo barcos, yahuiaya pa Italia. Techlejcultijque pin barco, cuaquinon tiquisajque tinejntiajque ca in barco.

<sup>7</sup> Tiyahuiloaya yulito sequin tonalijmes huan ca miac latolinilisli tiajsijque ilaixpan capa itoca Gnido. Amo techmacahuiltiaya in ijyecal pa tiajtiahuilosquiaya capa ticnequiloaya. Pampín ticmalinajque in barco nadita pa tiajsisqui pa in sur in lali itoca Creta hual unca lajco pin al huejcalan. Huan tipanujque in atenco in lali capa cataya in caltilan Salmón.

<sup>8</sup> Huan umpa ca latolinilisli tipanuloaya pa in sur in lali Creta huan ca nadita tihualajque pa capa itoca Buenos Puertos, capa in caltilan Lasea amo cataya huejca.

<sup>9</sup> Axcan quiapiaya miac tonalijmes quiman tiquisajque nepa Cesarea. Noje cataya cuajnesi polehuilisli sinda tialosquiaya ca barco, pampa axcan panuc in tonali quiman mosahualo in judíos, huan quiman panuc in tonali yahuiaya pehua majcoquiá miac in al huejcalan. Pampín Pablo quinlaquetzilic pampa moitalosquiaya pin polehuilisli hual yahuiaya panu, quinmilic:

<sup>10</sup> —Lacames, niqijtúa pampa cayas polehuilisli huan miac xitinilisli pa in hual ticmantialo pin barco sinda tiquisasi nican. Huan noje ticayasi tehuanten pin polehuilisli, cuajnesi timoatocitisi noje.

<sup>11</sup> Ma yoje, inminlaicanani in guaches amo quinequiaya quicaqui in hual quijtuc Pablo. Quinequiaya quicaqui in hual quilijque yihual hual quinejnmiltiaya in barco huan yihual iteco in barco.

<sup>12</sup> Cuaquín yehuanten in miac lacames quilalijque pa quisalosquiaya nepa. In caltilan capa cataloaya amo cataya cuali pa panulosquiaya in mesli quiman cayasquiaya secuisli, pampa mojmosta ijyecasquiaya huan quichiasquiaya sehua. Pampín, sinda cuajnesi huil, yahuiiloaya ajsilo pa Fenece pa panulosquiaya nepa in tonalijmes quiman cayasquiaya secuisli. In cataya se caltilan capa huil calaquiloaya in barcos huan cataloaya latzacuali in ijyecames. San ijyecasquiaya pin noroeste huan pin suroeste.

*Pehua ijyeca chichahuac pin al huejcalan*

<sup>13</sup> Cuaquinon quiman pehuac ijyecac yulito pin sur, quijtujque pampa cataya in ijyecal hual quinectataloaya. Yojque quiquixtijque in teposli etic pin al, quilalic pin barco, cuaquinon techhuicaya in barco capa amo cataya huejca iatenco in lali Creta.

<sup>14</sup> Ma yoje, panuc je nadita, pehuac ijyecac chicahuac pa Creta huan cajsic in ijyecal in barco, cataya in ijyecal hual quitocayaltilo in Norestero.

<sup>15</sup> Yojque ijyecac chicahuac pan barco, pampin in barco amo huil quixnamiquiaya in ijyecal. Pampin, ticpiajque pa ticmacahuiltilosquiaya pa in ijyecal quihuicasquiaya in barco.

<sup>16</sup> Huan quiman tipanuloaya pa itepotzcon se lali tipichin itoca Claudia lajco pin al huejcalan, in lali quitzacuiliaya pa camo m'iac techhuitequisquiaya chicahuac in ijyecal. Yojque huil ca tolinilisliticaajcoquijque pin barco in barquito hual tictilantiahuiloaya pa tolaltepotzcon.

<sup>17</sup> Quiman ticajcoquijque in barquito, pehualoaya quilalilo paxas lachi-hual ca mecames huejué, quilalililoaya lajco pan in barco pa camo mocaxanisquiaya icuahuimes in barco. Momajtiloaya pampa quijtuloaya in barco yahuiaya ajsi pa se laxitinijcal pin al huejcalan capa cataya m'iac xali, in laxitinijcal itoca in Sirte. Pampin quitemuhuijque in tzotzomajli telahuac pa camo quihuicasquiaya in barco in ijyecal pan in xali capa amo cataya huejcalan in al. Yojque quimacahuiltijque in barco pa lanilusquiaya san, in ijyecal huan in al quihuicaloaya in barco.

<sup>18</sup> Mostatica amo mocahuaya pa quihuicasquiaya cajcapa in barco in ijyecal huan in al, pampin pehualoaya quilasalo yehuanten in lamamajquil pin al huejcalan pa mocahuasquiaya amo niman etic in barco.

<sup>19</sup> Huan quiman quiapiaya ye tonalijmes quiman tiquisajque nepa Creta, pehuajque quilasajque pa al innojen teposlimes huan cuahuimes calica tequipanuloaya pin barco, quinlasajque ca inminmajmajuan yehuanten.

<sup>20</sup> Quiapiaya m'iac tonalijmes amo nesiloaya in tonali huan in luceros (silalimes), huan mochi tonali techhuitequiaya in ijyecal chicahuac. Yojque yajmo ticchialoaya nindeno, yajmo tiqijtujque pampa timoquixtililosquiaya pin polehuilislí.

<sup>21</sup> Huan quiapiaya m'iac tonalijmes amo tilacualoaya. Cuaquinon moquetzac Pablo lajco capa yehuanten, quinmilic:

—Lacames, cataya cuali sinda annehcaquiaya nepa pa Creta quiman annimitzilic pampa yahuiaya caya polehuilislí sinda tiquisallosquiaya nepa. Sinda amo tiquisaloaya, amo tiquinpoluloaya mochi innojen hual tiquinpoluje.

<sup>22</sup> Ma yoje, axcan annimitzilí, amo ximomajtican, pampa amo cayas se ca anmoxtin hual polehuis. Jan in barco san yes lapolulí.

<sup>23</sup> Nicmati inon pampa axcan layúa hualac ca nehual se ilanahuatini noDios pin cielo. In Dios nehual niunca iyaxca huan noje nictequipanuilí. Huan in lanahuatini nechilic:

<sup>24</sup> “Amo ximomajti, Pablo, ticpia pa timoquetzas ilaixpan in hué Cesar, huan xiquita. Dios yahui mijchihuilí in cuali hual tictemachic. Amaqui yahui polehuía ca moxtin yehuanten hual cate ca tehual.” Yojque nechilic in lanahuatini.

<sup>25</sup> Pampin, lacames, ma camo anmitzcocu anmoyolo, pampa nicneltoca Dios. Nicmati yes quinami nechilic ilanahuatini.

<sup>26</sup> Ma yoje, ticpiasi pa tiajsisi pan se lali lajco pin al huejcalan.

Yojque quinmilic Pablo.

<sup>27</sup> Huan se layúa quiman ticataloaya catorce tonalijmes ca in ijyecal techhuicatataya, timoitaloaya pin al huejcalan itoca Adria. Huan quinami pa lajco layúa momachiltijque in tequipanujquimes pin barco pampa tiajsitataloaya pan se lali.

<sup>28</sup> Lalamachihuaque pa quimatilosquiaya quichi huejcalan cataya in al, huan cataya treintiseis metros. Tiaque oc se nadita, oc sejpa lalamachihuaque, cataya huejcalan quinami veintisiete metros.

<sup>29</sup> Pampín momajtijque pampa yahuiaya molasa in barco pan capa amo huejcalan capa cataloaya teles (temes). Yojque xitinisquiaya in barco. Pampín quinlasajque pa al nahui teposlimes ej'etic pa itepotzcon in barco pa yajmo mohuicasquiaya pa itenco in lali. Momajtiloaya yehuanten, quinequiloaya pa lanesisquiaya.

<sup>30</sup> Huan in tequipanujquimes pin barco quitemuloaya quinami cholulosquiaya quicajcajtataloaya in barco. Quitemuhiloaya in barquito pin al huejcalan. Techililoaya pampa yahuiiloaya quilasalo teposlimes ej'etic pa ilaixpan in barco pa yojque amo miac mohuicatihuisquiaya. Yehuanten san lacaujcamanaloya, jan quitemuloaya san quinami huil cholulosquiaya pa camo moatctisqui.

<sup>31</sup> Cuaquinon Pablo quilic in laicanani huan in guaches, quinmilic:

—Sinda amo mocahualo yehuanten pin barco, amhuanten amo huil anmoquixtis pin polehuilisli.

<sup>32</sup> Cuaquinon quicotonilijque in guaches imecal in barquito huan yojque quimacahuiltijque pa huetzis pa al.

<sup>33</sup> Cuaquín pa cualcan quinchicahualtinemiaya Pablo moxtin pa lacualosquiaya, quinmiliaya:

—Axcán quipía catorce tonalijmes amo anlacuaya. Amo anmocahuaya pa anmomajtís, amo anquicuaya nindeno.

<sup>34</sup> Pampín annimitzilía xicnequican xijcuacan nadita, pampa monequi pa ticchihuasi inon pa yojque ticanasi chicahualisli calica timoquixtisi pin polehuilisli. Amaqui yes lacocotili, amo quipolus jan se itzondi itzontecon se.

<sup>35</sup> Quiman quijtuc inon, canac pan, quisehuic Dios inminlaixpan moxtin, cuaquin quilapanac in pan, pehuac quicuac.

<sup>36</sup> Cuaquín mochicahualtijque moxtin huan yehuanten noje canajque len pa quicualosquiaya.

<sup>37</sup> Pin barco timoxtin ticataloaya doscientos setenta y seis (majlacli-huanypuhualicaxtulihuanse) lacames.

<sup>38</sup> Quiman pachihuijque moxtin, quichihuaque in barco pa camo yes etic quinami cataya, quilasajque in trigo pa al huejcalan.

### *Xitini in barco huan moijsima*

<sup>39</sup> Huan quiman lanesic, amo quiximatiloaya in lali hual quitajque. Ma yoje, quitajque capa calaquiaya in al huejcalan je nadita pin lali, cataya se al tipichin cá xalipan pa in atenco. Quilalijque pa cajxiltilosquiaya in barco sinda huil pan in xalipan.

<sup>40</sup> Quicotonaje inminmecames in teposlimes ej'etic, quinmacahuiltijque pa huetzilosquiaya pa al huejcalan. Huan quiman quichijtataloaya inon noje quitomaloaya in mecames hual quilpilo in cuahuil calica quimalinalo in barco. Noje cajcoquijque in tzotzomajli telahuac pa ilaixpan in barco pa quipitzasquiaya in ijyecal, yojque pehuaya ajsi in barco pa in xalipan.

<sup>41</sup> Ma yoje, san laniluaya in barco pan capa monamiquiloaya ome alimes huejué. Nepa amo cataya huejcalan huan ajsic in barco pa inon, nepa mosaluc ilaixpan, mocahuac, amo huil molinic. Huan ilamili in barco pehuaya xitini pampa in al quihuitequiaya chicahuac.

<sup>42</sup> Cuaquinon in guaches quinequiloaya quinmictilo in lacames lailpili pa camo cholulosquiaya lanilujtataloaya.

<sup>43</sup> Ma yoje, inminlaicanani in guaches amo quinequiaya pa miquisquiaya Pablo huan quintzacuilic in guaches pa camo quichihualosquiaya in hual quinequiloaya quichihualo. Quinmilic in laicanani pa pehualosquiaya molasalo pa al yehuanten hual huil laniluloaya. Yojque molasaloaya pa al pa ajsilosquiaya pan lali.

<sup>44</sup> Cuaquín quinmilic pa quintocasqui in oc sequin pan icuahumes huan ilajcomes in barco huan yojque timóxtin timoquixtijque pin al huejcalan huan tiajsijque pan lali.

## 28

### *Pablo pin lali Malta lajco pin al huejcalan*

<sup>1</sup> Quiman timoquixtijque pin al huejcalan, ticmatijque pampa in lali itocaya Malta.

<sup>2</sup> Huan tejchihuilijque cuali, techicnijque in lacames chantinijmes nepa, pampa quipitzajque tixuxli hué huan technotzajque pa timoajxiltosquiaya timóxtin pampa quichijtataya sehua huan quiajtataya.

<sup>3</sup> Huan quinechicuc Pablo sequin cuajtzindis pa quinsajsacas pa in tixuxli. Quiman quinlalic pan in tixuxli, quisac se cuhual pin cuatzindis pampa cataya totonqui, quiquitzquic quicuaajcuac Pablo pa imajma.

<sup>4</sup> Huan quiman in chantinijmes quitajque in cuhual pilujtataya pan imajma, pehualoaya moililo:

—In se neli unca se lamictini. Huan mas que moquixtic pa camo polehuisquiaya pin al huejcalan, ma yoje yahui polehui, yojque unca latilanili ca capic cahuilúa.

<sup>5</sup> Ma yoje, quitzejtzeluilic Pablo in cuhual pa quimacahuasquiaya imajma huan huetzic in cuhual pa in tixuxli, huan amo quipanuc Pablo nindeno amo cuali.

<sup>6</sup> Yehuanten quichiajque pa quitalosquiaya sinda Pablo posahuasquiaya o sinda jan ajnaxcan huetzisquiaya mictataya. Huan quiman quichiajque miác, huan amo quipanuc Pablo nindeno, cuaquinon quijtuloaya ca oc se lajtulisi, pehualoaya moililo pampa Pablo yec se dios.

<sup>7</sup> Nepa capa timoutzculoaya, amo huejca cataloaya icuajmilimes inminhué yehuanten pin lali. Yihual motocaya Publio. Yihual technotzac pa ichan huan nepa timocahualoaya ye tonalijmes, tejchihuiliaya cuali.

<sup>8</sup> Huan cataya cocoxqui itajtzin Publio, totoniaya huan quipiaya catzahualisli ca esli, lastataya pa ilapexli. Pablo calaquic capa cataya, quilajlanic Dios pa yihual, cuaquín quinlalic imajmajuan ipan, yojque pajtic.

<sup>9</sup> Cuaquinon, quiman yehuanten pin lali quimatijque inon, hualaloaya in cocoxquimes huan Pablo quinpajtic.

<sup>10</sup> Pampín ca miác lachihualisli technextililoaya quinami quimatiloaya momajtilo tolaixpan, technextililoaya quinami miác technequiloaya. Huan quiman tiquisajque nepa ca barco, techmacajque mochi hual monequiaya pa ticpialosquiaya.

### *Pablo ajsi pa Roma*

<sup>11</sup> Quiman tipanujque nepa ye mesli, tiquisajque nepa ca se barco hual quisac nepa Alejandría capa calaquilo barcos. In barco quinpiaya inminlanextilisli in ome dioses hual motocaloaya Castor huan Pólux. In barco panuaya itonalijmes in secuisli nepa pin lali Malta.

<sup>12</sup> Tiquisajque ca in barco nepa Malta huan techhuicatiahuiaya pa oc se lali huan yoje tiajsijque pin caltilan pa barcos itoca Siracusa. Nepa timocahuajque ye tonalijmes.

<sup>13</sup> Cuaquinon ca in barco tipanujque pa itenco in lali huan tiajsijque pan se caltilan pa barcos itoca Regio, cataya pin lali itoca Italia. Quiman panuc se tonali nepa, pehuac iyjecac pa in sur. Pa oc se tonali tiajque ca in barco pa in caltilan pa barcos itoca Puteoli pin lali Italia.

<sup>14</sup> Nepa tiquitaje sequin tocnían laneltocaniymes hual technotzajque pa timocahualosquiaya chicome tonaliymes ca yehuanten. Nepa timocahua-  
jque, cuaquín ticanajque ojli pa Roma.

<sup>15</sup> Umpa pin Roma quicaquijque tocnían laneltocaniymes pampa ti-  
hualaloaya. Yehuanten quisajque nepa Roma, hualaloaya pa tech-  
namiquisqui pan ojli. Sequin hualajque huejca pa quiahuac Roma pa in  
caltilan iForo Apio, oc sequin hualajque amo yoje huejca pa in caltilan  
Tres Tabernas. Huan quiman quinmitac Pablo tocnían laneltocaniymes,  
quisehuic Dios huan mochicahuatic pa iyolo.

<sup>16</sup> Quiman tiajsijque pa Roma, inminlaicanani in guaches quintemacac  
yehuanten hual lajlailpili ca inminlaicanani inminlachianijmes lacames  
lajlailpili. Ma yoje, quimacahuatic Pablo pa chantisquiaya ihuían ca se  
guache pa quilachiasquiaya.

### *Pablo quinnahuatlía ilajtol Jesucristo nepa Roma*

<sup>17</sup> Panuloaya ye tonaliymes quiman tiajsijque huan quinnahuatic Pablo  
pa monechiculosquiaya moxtin inminlacames huejué in judíos. Quiman  
ajsijque capa Pablo yehuanten, yihual quinmilic:

–Lacames nocnían nehual amo niquinchiuilic nindeno amo cuali  
yehuanten tocnían judíos, huan amo nicchiác len hual amo unca ca  
se lajtulisli ca inminlachihualisli totatzizían. Ma yoje nepa Jerusalén  
nechtemacaje lajpili ca in lahuelilitlisli romano.

<sup>18</sup> Innojen huelitiniymes romanos lajlanije inahuac mochi hual nechmo-  
texpahuililoaya tocnían judíos. Quiman amo quitaje nindeno ca in calica  
nechmotexpahuililoaya hual nechahuiluaya pa nimiquisquiaya, quinequi-  
loaya nechmacahualo.

<sup>19</sup> Ma yoje, amo mocahualoaya pa nechmotexpahuililosquiaya  
tolaicananiymes judíos. Pampín, nicpiaya pa nimotemacasquiaya  
ca Cesar in hué. Nicchiác inon mas que amo nicpiaya len calica  
niquinmotexpahuilisquiaya nocnían judíos.

<sup>20</sup> Pampín nilanahuatic pa anhualasquiaya. Nicnequiaya annimitzita  
huan annimitzlaquetzilía inahuac inon. Annimitzilía pampa nicnemiltía  
in teposli calica nechilpije pampa nicneltoca in Cristo hual moxtin judíos  
quichixticate.

Yoje quinmilic Pablo.

<sup>21</sup> Huan yehuanten quinnanquiliyque:

–Tehuanten amo ticanaje amal hual techtilanije tocnían judíos hual cate  
pa Jerusalén huan amo ajsic nican se tocní judío pa techmachiltisquiaya  
huan pa techlaquetzilisquiaya len amo cuali calica mitzmotexpahuililo.

<sup>22</sup> Ma yoje, tiquitulo pampa yesquiaya cuali pa timitzcaquilosquiaya  
tehual pa titechnextilis in hual ticneltoca. Tiquijfulo in pampa pa mochi  
cajcapa ticmatilo pampa moxtin laquetzalo amo ca se lajtulisli inahuac Jesús  
iojli.

<sup>23</sup> Huan yehuanten quilalijque ca Pablo se tonali huan pa in tonali  
ajsijque pa icalijtic miac innojen judíos. Pablo quinmaxtiaya, quinlaque-  
tziliaya melahuac inahuac ilahuelilitlisli Dios. Motoliniaya pa quinnelto-  
caltilosquiaya in hual Moisés huan Dios ilajtunijmes quijtunijme pa yina

quinami Jesús hualasquiaya pan lalticpan. Quinlaquetziliaya Pablo pej-tataya pa huajtzinco, huan pa mochi semilhuil pa quiman tiolactic quinla-quetziliaya.

<sup>24</sup> Sequin quineltocajque in hual quinmilic Pablo, huan oc sequin amo quineltocajque.

<sup>25</sup> Yojque, pampa amo cataloaya ca se lajtulisli innojen judíos se ca oc se, pehualoaya moquetzalo pa quisalosquiaya. Cuaquín Pablo quinmilic oc se lajtol san, quinmilic:

—Neli in Espíritu Santo quiytuaya len niman melahuac quinami catanijme anmotajtzitzián. Quiytuaya inon pan ipampa in hual quijuiluc Isaías ilajtuni Dios, quiytuc:

<sup>26</sup> Xía ca innojen ilacames Israel, yojque xiquinmili len quiytúa Dios.

Huan Dios, quil, quiytúa:

Mas que anlacactías, ma yoje amo anquimatis len nicnequi niquiytúa.

Mas que anlaxixtías, ma yoje amo anquimatis len anquiztica.

<sup>27</sup> Noje Dios quiytúa:

Quipialo in lacames inminyolo hual amo quinequilo quimatilo, huan inminacajmes amo huil lacaquilo cuali.

Motzacuililo inmixtololojmes pa camo quimatisqui len quinequi quiytúa in hual nicchijtica.

Motzacuililo inminacajmes pa camo quicaquisqui len quinequi quiytúa in hual niquinmilijtica.

Motzacuililo inminyolo pa camo quimatisqui len nicnequi niquiytúa, motzacuililo pa camo momalinasqui pa mocuepasqui ca nehual pa yoje niquinpajtisqui niquinquixtilijtica inminlaijlaculisli.

<sup>28</sup> Cuaquinon Pablo quinmilic:

—Yojque, xicmatican inon. Dios quintilanilía in lamachiltisli cuali ca yehuanten hual amo judíos, huan yehuanten quineltocasi.

<sup>29</sup> Quiman quinmilic Pablo inon, quisaloaya in judíos molaxilijtaloaya lajtomes mías ca yehuanten.

<sup>30</sup> Huan mocaquaya nepa Pablo pa ome xixihuil, chantiaya pan se cali hual quilaquehuac.

<sup>31</sup> Quimacahuiltijque pa quinnahuatilisquiaya moxtin Dios ilahueliltisli, huan yihual quimaxtiaya mochi hual cataya pa ilajtol in Tata Jesucristo. Amo cataya amaqui hual quitzacuiliiya pa camo quichihuasquiaya inon.

## **In amal hual in lanahuatini Pablo quinmijcuiluilic in laneltocanjmes pin caltlan Roma**

### *Pablo quinmijcuiluilía (quinmescribiruilía) in laneltocanjmes pa Roma*

<sup>1</sup> Nehual Pablo niunca itequipanujquil Cristo Jesús, ni quijtúa, nehual niunca mochi iyaxca. Nechlajtultic quiman nechnotzac pa nives ilanahuatini. Nejxiluc Dios pa camo nicchías oc se tequipanulisli pa niquinmilis lacames Dios ilamachiltisli cuali.

<sup>2</sup> Yihual quijtuc neli in lamachiltisli cuali hual axan unca huan niman pa yina yoje cataya. Lajtuc pan inminpampa ilajtunijmes hual quinmijcuiluje Dios ilajtomes hual techililo ilamachiltisli cuali. Yehuanten inminlajcuilulisli quijcuiluje pampa Dios quinmilic len quijcuilulosquiaya huan unca niman chipahuac, amo unca quinami in hual quijcuilulo lacames.

<sup>3</sup> In lamachiltisli cuali techilía in hual quichíac Dios iXolol. Yihual lacatic imiahuil David hual yec tohué pa yina. Huan mas que Dios iXolol noje unca Dios, ma yoje quilacatiltic se síhual quinami tehuanten tilacatiye, pan inminpampa sihuames.

<sup>4</sup> Huan Dios quijtuc neli pampa yihual Cristo unca iXolol quipixtica niman míac lahueliltisli. Quipiaya in lahueliltisli niman hué pan ipampa in Espiritu hual quipía mochi cuali huan quipía chipahualisli hual amo huil cajsilo lacames. Huan neli yihual Dios iXolol quinextilía pampa yihual quipía in lahueliltisli niman hué. Quipía in lahueliltisli pampa miquic huan cuaquín yulic oc sejpa pa yajmo miquis, quema, yihual Jesucristo toTata.

<sup>5</sup> Huan pan ipampa yihual tehuanten ticpialo in cuali hual Dios tejchi-huilía. Huan unca toyaxca pa tiyesi ilanahuatinijmes pa yoje tehuanten tiquinpalehuisi pa quineltocasi lacames pa mochi in lalticpan quinami Cristo quinquixtilía yehuanten inminlajlaculisli. Yoje, lacames quilasojlasi itoca Jesucristo. Huan quimahuisusi yihual ca lamajtilisli yehuanten hual quinnotzac pa yesi icnían iyaxca.

<sup>6</sup> Huan amhuanten noje anunca icnían hual quinnotzac.

<sup>7</sup> Pampa inon annimitzijcuiluilijtica anmoxtin pin caltlan hué Roma, amhuanten hual Dios anmitzlasojla míac. Yihual anmitznotzac pa anyes ixolomes laxiluli pa camo cayasi ca moxtin in oc sequin pin lalticpan hual amo quineltocalo. Ma Dios toTajtzin huan in Tata Jesucristo annimijchiuilic can mochi hual cuali yes pa anquipías mosehuilisli pa anmoyolo.

### *Pablo quinequi quinpaxaluilía yehuanten pa Roma*

<sup>8</sup> Ma nipehua noamal nicsejtica noDios pan ipampa Jesucristo. Nicsehuía quiman yes annimitzijnamiquía anmoxtin. Unca pampa quimatilo cuali pa mochi in lalticpan quinami amhuanten anyuli anquinctica anquichía quinami quijtúa Dios ilajtol.

<sup>9-10</sup> Amo nimocahua pa annimitzijnamiquis quiman yes niclajlanía Dios. Yihual Dios neli quimati unca melahuac inon hual annimitzilía. Yihual in Dios hual nicmolancuacuetzilía ca mochi noyolo yojque quinami niquinmilía oc sequin ilamachiltisli cuali Jesús, yihual Dios iXolol. Quiman yes niclajlanía, annimitzijnamiquía. Niclajlanía pa cuajnesi axan quisas cuali pa

nehual huil nihualas annimitzpaxaluilis, sinda yes quinami Dios quinequi. Nicchiác míac xixihuil pa huil nihualas.

<sup>11</sup> Unca pampa nicnequi niman míac annimixiluilis len hual in Espiritu Santo anmitzmacas pan nopampa nel. Inon yes len calica yihual anmijchicahualtis míac pa anquineltoacas Dios ilajtol pa anmoyolo.

<sup>12</sup> Huan amo inon san. Noje nicnequi niqijtúa inon pampa nehual niyesquiaya lachicahuaitili noje pan anmopampa, pampa amhuanten huan nehual ticlailo tolaneltoacalisli ca Cristo. Huan pan ipampa tehuanten tolaneltoacalisli pa inon hual yihual tejchihuilitic, timochicahuaitilo.

<sup>13</sup> Huan nocnián, nicnequi míac pa neli anquimatis quinami míac tonalijmes niclalic pa nihualas ca amhuanten. Ma yoje, mochi xixihuil cataloaya innojen hual nechpanuje hual amo mocahuaya pa nejtzacuilis. Nicnequiaya nihuala pa niquinmitasquiaya oc sequin pehuasi canasi iojli Cristo. Nicnequiaya pa yulisi quinecticate míac pa quichihuasi quinami quijtúa Dios ilajtol pan ipampa in hual annimitzilisquiaya. Yoje panuc quiman niquinpaxaluiliaya oc sequin, huan nicnequiaya pa panusquiaya yoje ca amhuanten.

<sup>14</sup> Dios nechlajtultic pa niquinmilis ilamachiltisli cuali. Huan pampa inon nicpía pa niquinmilis yehuanten hual lajtulo tolajtol huan yehuanten hual amo lajtulo tolajtol, nicpía pa niquinmilis yehuanten hual quimatilo huan yehuanten hual amo quimatilo.

<sup>15</sup> Yoje, nicpía míac lanequilisli pa annimitzilis in lamachiltisli cuali noje ca amhuanten hual anunca pa Roma.

### *In lamachiltisli cuali quipía chichahuaitisli*

<sup>16</sup> Unca pampa amo nipinahua niquinmilía oc sequin in lamachiltisli cuali, pampa unca pan ipampa inon Dios quitequipanúa ilahueliltisli hué pa quinquixtilis lacames inminlajlaculisli, huan pa quinyulitis quinami yancuic. Inon hual Dios quinequi quinchihuilitía neli unca pa in judíos huan caquinon noje pa yehuanten hual amo judíos.

<sup>17</sup> Pan ipampa in lamachiltisli cuali, Dios technextilía quinami yihual quinhualica capa yihual lacames huan sihuames pa yesi ixolomes, quijtúa neli pampa yajmo quita len amo cuali ca yehuanten. Quinhualica ca yihual jan pan ipampa quinami quineltoacalo ilamachiltisli cuali, jan quinami unca lajcuiluli pa iamal Dios ilajtol: “Dios quijtúa pampa yajmo quita len amo cuali ca se pan ipampa quinami in se quineltoaca Dios ilajtol. Pampín in se yulisi ca Dios iyulilislisli hual quimaca.”

### *Dios quinmotexpahuilitía moxtin lacames*

<sup>18</sup> Monequi pa Dios quinhualica ca yihual lacames pa yesi ixolomes jan pan ipampa quinami quineltoacalo ilamachiltisli cuali san. Inon unca pampa Dios, nepa capa chanti pin cielo, lanextilía quinami yihual cualani niman míac ca moxtin in lacames hual amo quinequilo quimolancuacuetzililo. Amo quixtoacalo Dios huan quichihualo in hual yehuanten quimatilo unca amo cuali. Huan yoje pan ipampa in amo cuali hual quichihualo, motolinilo pa quitzacuasi Dios ilajtol melahuac. Quitzacualo pa camo quimatisi lacames quinami Dios quinmita quiman quichihualo amo cuali. Huan pampín, Dios quintojtoacas ilaixpan yihual pa yesi lapolehuilitili.

<sup>19</sup> Quema, Dios lanextilía quinami neli yahui quintojtoca ilaixpan yihual in lacames pa yesi lacocoltili. Unca pampa huil quimatilo quinami unca Dios, pampa yihual quinhueliltic pa yehuanten quimatilosquiaya pa inmínyolo. Ma yoje, amo quinequilo quimatilo.



<sup>20</sup> Quipía niman míac xixihuimes quiman Dios quinchíac in cielo huan in laticpan. Yoje, lacames quimatije quinami Dios unca, mas que amo quitaje. Huil quimatije pampa ilahuelilitlisli chicahuac huan niman hué amo quiman mocahuaya pa cayas. Amo quipiaya pehualisli huan amo quiman lami. Quema, yihual Dios quipía len lajmatilisli hual amo quiman huil ticajsilo. Mochi inon inahuac Dios huil quimati cuali se pan ipampa mochi hual Dios quichíac. Pampa inon, yehuanten hual quilalilo pa camo quinellocasi Dios amo quipialo quinami huil mopujpuhuililo pa ilaixpan Dios in amo cuali hual quichihualo.

<sup>21</sup> Unca pampa quimatije pampa Dios unca, huan ma yoje amo quilasojlaje. Amo quijnamiquije yihual quinami monequi pa laijnamiquilosquiaya. Amo quisehujie pa in hual yihual quinmaca. Huan amo quiman mocahuaje pa yultiasi quijnamicataloaya mochi calica huil moijlaculoaya. Quicuilmatiloaya pan Dios iojli, amo quinequiloaya quimatilo nindeno quinami unca Dios, mochihualoaya laticumac pa inminyolo.

<sup>22</sup> Quijtuloaya pampa yehuanten quimatiloaya, huan ma yoje neli mochihualoaya lacames hual amo quimatiloaya nadita hual quinnexilia quinami unca Dios.

<sup>23</sup> Yajmo quinequiloaya quimolancuacuetzililo Dios hual quipía mochi lahuelilitlisli huan unca mochi cuali, yihual amo quiman miqui. Ma yoje, yehuanten pehualoaya quinmolancuacuetzililo monos lachihuali pa nesisi quinami lacames hual miquilo. Huan quinmolancuacuetzililoaya monos lachihuali chiqueta tutomes huan yulijquimes ca nahui inmicxían huan yulijquimes hual mohuilanalo pan lali.

<sup>24</sup> Yoje, Dios quincajcahuac pa quichijtiahuilosquiaya in amo cuali hual quinequiloaya quichihualo pa inminyolo, niquijtua, Dios quincajcahuac pa quichihualosquiaya len Dios quita quinami niman catzahuac. Inmincuerpos quintequipanultiloaya pa quichihualosquiaya inon hual unca niman amo cuali.

<sup>25</sup> Yehuanten yeje lacames hual mopatiloaya Dios ilamaxtilisli hual melahuac, mopatiloaya pa in islacatilisli, huan quinmolancuacuetzililoaya innojen hual Dios quichíac huan yajmo quimolancuacuetzililoaya Dios ihuán hual quinchíac mochi. Yihual san monotza pa moxtin amo quiman mocahuasi pa quimolancuacuetzilisi mojmosta, yoje ma ye.

<sup>26</sup> Yojque, pampa amo quinequiloaya quinellocalo ilajtol melahuac, Dios quincajcahuac pa yulisi quichijticate len lapinahualtia. Cataya pampa inminsihuahuan mopatiloaya quinami Dios quilalic pa lacames huan sihuames monilusi huan in sihuames quichihualoaya yoje hual amo unca quinami Dios quilalic.

<sup>27</sup> Huan jan yoje, in lacames noje mocahualoaya pa monilulosquiaya ca in sihuames quinami Dios quilalic pa quichihuasi, huan chichinahuloaya laijtic yehuanten, quinecticate quichihualo ca oc sequin lacames len niman lapinahualtia. Inon quichihualoaya huan yoje canaloaya laijtic inmincuerpos in lacocoltilisli hual Dios quijtuc da quipialoaya pa panulosquiaya. Yojque, moijlaculoaya quiman mocahualoaya pa quichihuasi quinami Dios quilalic.

<sup>28</sup> Huan jan yoje, quinami amo quitaje cuali quipiasi laijtic inminyolo Dios ilajmatilisli melahuac, cuaquin Dios quincajcahuac quipixtataloaya laijnamiquilisli hual quinmijlaculo, huan inminlajnamiquilisli yehuanten quinchihualtiaya len niman amo cuali.

<sup>29</sup> Jan yoje quijnamiquiloaya míac pa inminyolo hual niman amo cuali pa quichihualosquiaya. Quinequiloaya quinchihuililo amo cuali oc sequin,

quinequiloaya quipialo míac hual amo monequi pa quipiasi. Quema, quinequiloaya quipialo inon hual inminyaxca oc sequin. Yuliloaya quinecataloaya pa quinpanusquiaya len amo cuali oc sequin, moxiculoaya quinecataloaya in hual oc sequin quipialoaya, quixtocaloaya quinmictilo lacames, yehuanten mocualantiloaya mojmosta lacuajcuamantinemiloaya, mojmosta quijnamiquiloaya amo cuali inahuac mochi in hual quichihualoaya oc sequin, latenehualoaya.

<sup>30</sup> Quinhuejuecaltiloaya oc sequin quiman amo cataloaya ca yehuanten, quicocoloaya Dios. Huan quinami quinchihuililoaya huan quinaquetzililoaya oc sequin, yojque lanextiliaya pampa amo quimatiloaya momajtilo. Inon lanextiliaya quinami yehuanten quijituloaya pa inminyolo pampa ca in oc sequin amo cataya inminyaxca pa quipialosquiaya in hual inminyaxca. Moijnamiquiloaya pa inminyolo pampa san yehuanten cataloaya in niman huejueyenten. Quijnamiquiloaya míac pa inminyolo quinami huil quichihualosquiaya len amo cuali. Amo quineltocaloaya inmíntajtzitzian.

<sup>31</sup> Amo quimatiloaya jan nadita quinami unca Dios huan ilamaxtilisli, amo quimatiloaya len unca cuali. Amaqui huil quineltocaya nindeno hual yehuanten quijituloaya, amo quimatiloaya lalasojlalo. Amo quimatiloaya quinami yulilosquiaya ca mosehuilisli pa mochahualosquiaya jan sejpa ca oc sequin, amo quimatiloaya laicnililo.

<sup>32</sup> Huan mas que quimatilo cuali pampa Dios ilajtol quijtúa monequi pa miqúisi lacames hual yulilo quichijtcate yoje, jan yoje yehuanten yultialo quichijtcate yoje. Huan amo inon san. Quipialo paquilisli ca oc sequin hual yultialo quichijtcate yoje.

## 2

### *Dios pan ipampa in hual melahuac quijtúa yehuanten quipiasi pa miqúisi*

<sup>1</sup> Yoje, amo cayas calica timopujpuhuas tehual hual tiquijtúa oc se quipías pa miqúis pampa yuli quichijtica laijlaculisli. Amo monotza aquí tiyes hual tiquijtúa inon. Unca pampa sinda tiquijtúa oc se quipía pa miqúis, cuaquín tiquijtúa noje tehual ticpía pa timiquis, pampa tiquinchá innojen hual amo cuali jan quinami in oc sequin quichihualo amo cuali. Huan yoje, Dios mitzmotexpahuilía jan quinami in oc sequin, mas que tehual timolalía inminlaixpan oc sequin quinami unca moyaxca pa tiquijtus pampa quipía pa miqúis.

<sup>2</sup> Axan, timoxtin ticmatilo pampa Dios quijtúa melahuac sinda quijtúa quipialo pa miqúisi yehuanten hual quinchihualo len quinami innojen hual amo cuali.

<sup>3</sup> Huan tehual, aquí tiyes, tiquijtus oc sequin hual quinchihualo innojen amo cuajcuali quipiasi pa polehuisi. Huan ¿tiquijtúa pampa huil ticholus tehual ilaixpan Dios pa camo mitzilis tel ticpía pa timiquis? No, pampa tehual noje tiquinchá innojen.

<sup>4</sup> ¿Cuajnesi amo ticmati tilaijnamiquía melahuac quinami unca Dios? Yihual quixtoca quinchihuilía niman cuali lacames. Huan pampa inon, huejehua pa quincocoltis pampa quichihualo in amo cuali. ¿Amo ticmati Dios unca niman cuali ca tehual pa yoje ticayas laicanali pa ticpalas moyolo pa yajmo ticchijtías in amo cuali?

<sup>5</sup> Ma yoje, amo ticequi ticpala moyolo pa timocahuas pa ticchijtías in hual amo cuali. Pampín ticmatis quinami Dios quinequiaya mitzlaicana pa ticpalas moyolo. Ticmatis pan in tonali quiman Dios quinnmaca lacocoltisli yehuanten hual e'elehuis. Huan quijtus pampa quipiasi pa polehuisi, quijtus inon cuali huan melahuac, amo moixpolus.

<sup>6</sup> Quichihuilis cuali o amo cuali mochi sejse, quichihuilis yoje quinami mochi sejse yuliaya.

<sup>7</sup> Dios quinchihuilis cuali yehuanten hual quimatilo quitemulo quinami yulisi quichijtcate len cuali. Huan yehuanten canaló Dios iyulilisi hual amo quiman lamis, pampa quitemulo pa Dios lajtus cuali inahuac in hual quichihualo yehuanten. Quitemulo pa Dios quinmilis yehuanten lajtomés huejué huan cuajcuali.

Huan quitemulo pa cayasi lamacahuiliti pa yultiasi ca Dios pa camo quiman moxilusi napa capa yihual.

<sup>8</sup> Ma yoje, cate yehuanten hual amo mocahualo pa molalisi quinami icocolinijmes Dios pa camo quineltocasi. Amo quimatilo quineltocalo Dios ilamaxtilisi melahuac, niman miac quixtocalo quichihualo in hual amo cuali. Pampín ca yehuanten mocahua Dios cualantica mojmota pa quiman ajsis in tonali hual quijtus yehuanten yesi lacocoltili.

<sup>9</sup> Mochi lalac huan sidual hual yulilo quichijtcate in amo cuali, yehuanten quinpanusi miac lacocoltilisi, amo huil quitasi quinami moquixtilisi pa camo quinpanus. Inon neli cayas pa in judíos huan cuaquinon noje pa yehuanten hual amo judíos.

<sup>10</sup> Huan Dios laquetzas hué huan cuali pa moxtin hual yulilo quichijtcate len cuali. Quema, huan cayas mochi hual unca cuali pa yehuanten. Inon Dios neli pehuas quinchihuilis in judíos huan cuaquinon noje yehuanten hual amo judíos.

<sup>11</sup> Unca pampa Dios quichía mochi melahuac, quijtutica quipiasi pa yesi lacocoltili jan pampa yulilo quichijtcate in hual Dios quita elehuis.

<sup>12</sup> Annimitzilía leca Dios quijtúa quipiasi pa yesi lacocoltili lacames: Cataloaya lacames hual amo quiman quimatije Dios ilajtol hual quinmacac in judíos pa yina, in lajtol hual lacames quipialo pa quineltocasi. Ma yoje, yehuanten yuliloaya quichijtaloaya amo cuali. Pampín, Dios quijtus quipiasi pa polehuisi. Inon amo quijtus pampa quijtúa yoje ilajtol hual quinmacac in judíos, pampa yehuanten amo quimatiloaya in lajtol. Noje cataloaya yehuanten hual quimatiloaya in lajtol hual Dios quinmacac in judíos, huan ma yoje yuliloaya quichijtaloaya in hual amo unca quinami quijtúa in lajtol. Yehuanten, quema, Dios quijtus quipiasi pa miquisi yoje quinami quijtúa in lajtol.

<sup>13</sup> Inon unca pampa Dios amo quinmita lacames huan sihuames quinami amo quipixtcate laijlaculisli jan pampa yehuanten quicaquije len quijtúa in lajtol. Cate yehuanten hual quema yulilo quichijtcate len quijtúa in lajtol, yehuanten Dios quinmita quinami amo quipixtcate laijlaculisli.

<sup>14</sup> Unca yoje, pampa sinda lacames hual amo judíos huan amo quipía in lajtol, huan ma yoje yulilo quichijtcate len quijtúa in lajtol, yoje lanextililo quinami quimatilo in lajtol pan ipampa inminlajmatilisi calica lacatije. Huan inon san unca inminlajtol hual quinnextilía quinami monequi pa yulisi se.

<sup>15</sup> Yoje, lacames quinami yehuanten lanextililo quinami quipialo ilajtol Dios laijtic inminyolo, pampa quipialo lajmatilisi pa quichihuasi in hual quijtúa in lajtol. Unca quinami Dios ilajtol cataya lajcuiluli pa inminyolo. Moxtin quipialo pa inminyolo inminlajmatilisi calica quimatilo len unca cuali huan len amo unca cuali. Pampín quimatisi motexpahuilisi huan quipujpuhuasi inminlajlaculisli pan tonali quiman Dios quijtus sinda quipiasí pa yesi lacocoltili o amo quipiasi pa yesi lacocoltili.

16 Huan inon cayas pan tonali quiman yehuanten moitilisi iyampa Dios. Pan in tonali yihual quijtus quipias pa yesi lacocoltili. Yesi lacocoltili pampa quichihuae mochi hual quinequiloaya quinlatililo Dios huan lacames, quema, mochi hual quichihuae. Dios quijtus inon pan ipampa Cristo Jesús, huan quimatasi yehuanten pampa yihual Dios quijtua melahualisli sinda quijtus quipias pa yesi lacocoltili o amo lacocoltili. Yoje quijtua in lamachiltilisli cuali hual nehual niclamachiltia.

*Nican Pablo quijcuilua quinami in judíos quitalo Dios ilajtol hual quinmilic pan ipampa Moisés*

17 Tehual hual tiquijtua tiunca judío, huan ticnectica pa moxtin quimatasi inon, ticlalia mochi molaneltoalisli pan Dios ilajtol. Inon mitztlanic pan ipampa Moisés pa yoje timoquixtis pin ipolehuilisli molaijlaculisli. Huan tilajtua hue monahuac tehual pampa ticmolancuacuetzilia Dios hual amo quimolancuacuetzililo yehuanten hual amo judíos.

18 Huan ticmati in hual Dios quinequi. Noje ticmati tilatemua pa ticmatis calia ca innojen hual tiquinchia cate niman cuali. Huan ticmati tilatemua pa ticmatis calia ca innojen hual quinchihualo oc sequin amo cate yoje cuali. Inon ticmati pampa tiunca lamaxtili cuali ca in hual unca Moisés ilajtol.

19 Yoje, tiquijtua pa moyolo pampa tehual huil tiquinmaxtia yehuanten hual amo quimatilo in hual quijtua Dios. Tiquijtua pampa huil tiquinmaxtia mochi ilamaxtilisli yihual. Yoje timoitas quinami lahuilisli pa yehuanten hual cate laticumac pa inminyolo.

20 Quema, timoita quinami lamaxtini hual huil quinmelahua yehuanten hual amo quinequilo quimatilo len unca cuali o amo cuali, timoita quinami lamaxtini pa lacames hual amo quimatilo. Ticmati pampa ticpia mochi lajmatilisli hual melahuac pan ipampa in lajtol.

21 Yoje, pampa mochi inon unca melahuac, timoitas ca lahuiltilisli pa tiquinnexilis oc sequin inon hual quinequi quijtua Dios ilajtol. Cuaquinon, ¿leca amo timonextilia pa ticchias tehual nuso len quijtua in lajtol? Tiquinmilia oc sequin quinami in lajtol quijtua pa camo laixtequisi. Huan tehual, ¿tilaixtequia?

22 Tehual tiquinmilía oc sequin pa camo canasi isihua oc se. Huan tehual, ¿leca ticana isihua oc se? Huan tehual tiquincolia monos hual lacames quimolancuacuetzililo. Axcan tehual, ¿leca tiquinmixtequia monos pa inmintiopajmes yehuanten hual amo quineltoalo Dios? Amo quiman timoitasquiaya ticmolancuacuetzilijtica se mono. Ma yoje, ¿leca tiquinchia inon huan inon hual lanextilia quinami ticxixicia Dios?

23 Tehual tilaquetza ca lamajtilisli len quinequi quijtua in lajtol hual Dios quilic Moisés, jan pampa unca lajtol san. Ma yoje, pampa amo ticchia quinami quijtua in lajtol, yojque tiquihuejuecaltia Dios.

24 Amhuanten in judíos amo anquineltoaca Dios ilajtol, huan yoje unca lajcuiluli pa iamal ilajtol Dios: “Yehuanten hual amo judíos quihuejuecaltilo itoca Dios pampa amhuanten amo anquineltoaca.”

25 Sinda se unca lacal judío, yihual quipia lacotonali icuilaxli se nadita, inon se lanextilisli pa lanextilis quinami yihual se ca ilacames Dios. Ma yoje, in lanextilisli jan monotza san sinda yuli quichijtica quinami quijtua ilajtol Dios. Huan sinda yuli amo quichijtica len quijtua in lajtol, yoje mochia quinami se hual amo quipia in lanextilisli pan icuerpo. Huan yihual noje yajmo quinpia innojen hual inminyaxca in judíos.

<sup>26</sup> Yoje, sinda se amo quipía in lanextilisli pan icuerpo, huan ma yoje yuli quichijtica quinami quijtúa Dios ilajtol, cuaquinon Dios quita quinami se hual quema, quipía ilanextilisli pan icuerpo huan quita quinami se ca ilacames.

<sup>27</sup> Huan aquí yes hual yuli quichijtica in hual quijtúa in lajtol, yihual yoje quimotexpahuilía aquí yes icni judío hual yuli amo quichijtica in hual quijtúa in lajtol. Quema, mas que quipía in lanextilisli pan icuerpo huan quimati in lajtol quinami unca lajcuiluli, ma yoje Dios quijtus pampa quipías pa miquis.

<sup>28</sup> Huan inon unca pampa se lacal o sidual amo unca se ca Dios ixolomes sinda san unca imiahuil se ilacal Dios. Huan noje amo unca se ca Dios ilacames je lacal hual jan quipía in lanextilisli pan icuerpo san.

<sup>29</sup> San yihual unca se ixolol Dios sinda quipía in lanextilisli lalatali lajtic icuerpo, unca pan iyolo. Yoje moita pampa neli yihual se ca Dios ilacames. Cana in lanextilisli pan ipampa quinami Dios quichihuilía pa iyolo, amo cana pan ipampa quinami quichía len quijtúa in lajtol. Huan sinda se quipía in lanextilisli pa iyolo, cuaquín unca pa yihual Dios san pa quitas cuali in se. Amo monotza nindeno sinda lacames quitasi cuali o amo cuali, pampa lacames amo quimatilo quinami unca iyolo.

### 3

<sup>1</sup> Cuaquinon, ¿len quipía se judío hual monotza? ¿Len monotza sinda se judío quipía in lanextilisli pa icuerpo?

<sup>2</sup> Ma niqijtu pampa in judío quipía míac hual Dios quimacac hual yihual amo quinmacac yehuanten hual amo judíos. Ma nipehua annimitzili quinami Dios quilalic pa yehuanten in judíos quipialosquiaya in tequipanlisli pa quisemanalosquiaya ilajtol ca moxtin pin lalticpan.

<sup>3</sup> Axan ¿len monotza sinda sequin amo quinelocaloaya len Dios quinmilic? Pampa amo quichihuaje yoje, cuaquín ¿quinequi quijtúa inon pampa Dios amo yahui lami quichía in hual neli quijtúa?

<sup>4</sup> ¡Ma como quiman quijtu inon amaquí! Huil ticmatilo neli pampa Dios amo quiman mocahua pa lajtus melahuac, mas que cuajnesi moxtin lacames islacatilo. Unca quinami moijsuilúa pa iamal ilajtol Dios:

Tehual, Dios, yoje ticchiác pa lacames quijtusi pampa tehual molajtomes cate mejmelahuac huan yoje tiquinsulahuas lacames quiman quijtulo amo tiunca melahuac.

<sup>5</sup> Tehuanten tilacames hual ticate laijlaculi pa toyolo, huan pan ipampa inon tilanextililo quinami Dios amo quipía laijlaculisli pa iyolo nindeno. Cuaquinon ¿len tiquijtusi? ¿Tiquijtusi quinami sequin quijtulo pampa Dios amo quichijtica in hual cuali huan melahuac sinda quijtúa ticpiasi pa timiquisi pampa ticate laijlaculi? Oc sejpa niqijtúa ¡ma como quiman quijtu inon amaquí!

<sup>6</sup> Pampa sinda Dios amo cataya cuali huan melahuac, cuaquín amo cataya iyaxca pa quijtusquiaya pampa quipiasi pa miquisi yehuanten pin lalticpan.

<sup>7</sup> Cuajnesi se quinequis quijtus inon, quijtus: “Dios imelahualisli mochía niman hué pampa nehual nislacati, huan pampín lacames quijtulo lajtomes niman hué pa yihual.” Axan, sinda cuajnesi unca yoje, cuaquín ¿leca Dios quijtutías pampa nicpía pa nimiquis nehual pampa niunca lacal laijlaculi pa noyolo?

<sup>8</sup> Huan ¿leca como tiquijtulo: “Ma ticchiuacan len amo cuali pa yoje in hual cuali panus?” Yojque sequin quijtulo pampa tehuanten tiquijtulo pa toyolo len quinami inon. Huan neli cate sequin hual techuejuecaltilo yojque.

Dios quichías quinami quinmahuilúa quiman quintilanis lacames quinami yehuanten ca capic amo quiman mocuepasi capa yihual.

*Timoxtin ticate laijlaculi*

<sup>9</sup> Axcan, ¿len, cuaquín? Tehuanten in judíos, ¿yahui techilía Dios pampa tehuanten tilacames niman cuali huan yehuanten hual amo judíos amo cuali? No, amo ticate cuali huan yehuanten amo cuali. Pampín Dios quijtus tehuanten in judíos ticpiasi pa timoxilusi pa yajmo ticayasi ca yihual. Annimitzilic pampa in judíos cate laijlaculi jan quinami yehuanten hual amo judíos. Moxtin quineltoalo len quinchihualtía inminyolo laijlaculi.

<sup>10</sup> Jan yoje unca lajcuiluli pa iamal ilajtol Dios, quijtúa:

Amo unca se hual yuli quinectica quichía quinami quijtúa Dios ilajtol pa yoje yes cuali huan melahuac, amo unca jan se san.

<sup>11</sup> Amo unca san se hual quimati len Dios quinequi quijtúa, amo unca se hual quinequi quimati len Dios quinequi pa quichías.

<sup>12</sup> Moxtin moxilujque pa camo quitocasi Dios iojli, mochihuajque lacames hual moijlacujque.

Amo unca se hual yuli quichijtica len cuali, amo unca jan se san.

<sup>13</sup> Pa inminquixlan quisalo lajtomes hual quinami potunilo, quinami in potunilisi hual quisa pa se coyunquil lapujtica capa quilalijque se mijquil.

Ca inminejnepimes lajtulo pa lacuajcuamanasqui.

Unca quinami quipialo inminpajli cuhuames lajitic inmincamac.

<sup>14</sup> Inmincamac quijtúa lajtomes hual lanextilía quinami quincocolilo oc sequin.

<sup>15</sup> Quinequilo míac pa quinmictisqui oc sequin.

<sup>16</sup> Pan ipampa quinami yulilo, quinchihualtilo oc sequin pa panusqui míac lacocoltisli pa yoje yajmo huil yulisqui ca paquilisli.

<sup>17</sup> Amo quiman quimatijque quinequijque yulijque ca mosehuilisli pa inminyolo.

<sup>18</sup> Amo quimatilo momajtlo ilaixpan Dios, amo quiman quijnamiquilo inon.

<sup>19</sup> Axcan, ticmatilo pampa len yes quijtúa Dios ilajtol, yoje quinmilijtica yehuanten hual yulilo capa in lajtol huelitía, pa yoje amo cayas se hual quilapus icamac pa monapatis sinda Dios quilía unca laijlaculi. Quema, yoje moxtin yehuanten pin lalticpan quipiasi pa motemacasi lacames quipixticate laijlaculisli. Yoje moxtin pin lalticpan mochihuasi lacames hual quipiasi pa miquisi pampa Dios yahui quijtúa yehuanten quipialo pa moxilusi pa yajmo cayasi ca yihual. In unca miquilisli.

<sup>20</sup> Miquisi pampa mas que se quichía len yes in lajtol quijtúa, ma yoje Dios amo quiman quijtus yihual amo unca laijlaculi pampa inon. Unca yoje pampa se lalac quimati yihual unca laijlaculi pan ipampa in hual quijtúa in lajtol.

*Pan ipampa tolaneltoalisli, timoquixtisi pin polehuilisli ca capic techuica tolaijlaculisli*

<sup>21</sup> Ma yoje, axan Dios technextilic quinami tiajsisi tiyesi lacames amo ticpixticate laijlaculisli ilaixpan yihual. Huan inon amo quipía nindeno pa quitas ca in lajtol hual Dios quinmilic in judíos pan ipampa Moisés. Ma yoje, unca pa Dios ilajtol capa timomaxtilo quinami se lalac mochía pa Dios quitas amo quipixtica laijlaculisli. Ticmatilo inon pan ipampa in hual quijtuje ilajtunijmes, quema, huan Moisés noje.

<sup>22</sup> Quema, tiajsilo tiyelo yoje ilaixpan Dios pan ipampa quinami ticnel-tocalo Jesucristo. Unca pa moxtin hual quinel-tocalo Jesucristo, yehuanten ajsisi yesi yoje ilaixpan Dios. Inon Dios quichihuilía se jan quinami quichihuilía oc se.

<sup>23</sup> Jan unca se ojli pa canasi moxtin in lacames, pampa moxtin quichihuaje laijlaculisli huan yoje amo ajsilo quipialo in cuali hual unca iyaxca Dios pa yoje Dios quinmitas quinami ixolómes.

<sup>24</sup> Huan yehuanten ajsisi yesi lacames hual Dios quinmita cuali pampa Dios quijtúa neli pampa yajmo quipialo laijlaculisli. Quinchihuilía yehuanten yoje pan ipampa quinami Dios quinequi quinchihuilía cuali lacames. Huan amo quipialo pa quilaxlahuisi. Quema, pan ipampa quinami quinel-tocalo Cristo Jesús, yoje cate lamacahuali pa camo quiman moxilusi ilaixpan Dios.

<sup>25</sup> Dios quilalic Cristo pa yes se huendi lamictili, pa yoje moxtin quitalosquiaya quinami quilalic Cristo pa yes yihual hual quinquixtilisquiaya inminlajlaculisli yehuanten. Quinchihuilíaya pan ipampa Cristo iesli hual toyahuic quiman miquic. Inon neli quinequi lanextilía quinami Dios amo huil quimacahuilía pa lacames inminlajlaculisli cayas quinami len hual amo monotza nindeno. Huan axan, yajmo yahui quijnamiquía lacames inminlajlaculisli hual quichihualoaya quiman Cristo ayamo miquic.

<sup>26</sup> Inon unca pampa Dios quilalic pa quinmopepenialtilis lacames inminlajlaculisli hual quinchihuanijme pa yina huan hual axan in tonali quinchijtihualalo. Axan pa innojen tonaliymes Dios noje technextilía neli quinami quichijtia inon hual unca jan yoje pa se quinami pa oc se. Huan axan momati quinami yihual huil quijtúa neli pampa amo quita laijlaculisli ca se pan ipampa quinami quineltoqa Jesucristo.

<sup>27</sup> Axan, ¿quinami huil lajtúa hué se lalac ilaixpan Dios inahuac in cuali hual quichiac? Amo huil, pampa amo ticpialo nindeno hual Dios quita cuali, pampa tilacames laijlaculi. Sinda Dios quijtuaya pampa yihual techita amo laijlaculi pan inminpampa lejlen cuali tiquinchihualo, cuaquinon yoje ticpialoaya len calica tilajtuolosquiaya hué inahuac in hual ticchihuaje. Pampin, Dios amo techilis pampa amo ticate laijlaculi ilaixpan yihual pan ipampa len yes ticchihualo. Ma yoje, sinda ticnel-tocalo ca mochi toyolo Cristo Jesús, cuaquinon Dios quijtúa neli pampa amo ticate laijlaculi.

<sup>28</sup> Yoje, ticmatilo axan pampa Dios quijtúa se amo unca laijlaculi sinda quineltoqa in Tata Jesucristo. Dios amo quijtúa pampa amo unca laijlaculi se pan ipampa quinami quichía len quijtúa ilajtol hual yihual quilic Moisés.

<sup>29</sup> Sinda cataya yoje, cuaquín Dios cataya inminDios in judíos san. Huan ¿amo yihual inminDios yehuanten hual amo judíos? Quema, yihual noje inminDios yehuanten hual amo judíos.

<sup>30</sup> Unca jan se Dios huan yihual quijtúa pampa se judío hual quipía in lanextilisli pa icuerpo yajmo unca laijlaculi pampa quineltoqa toTata. Huan pa se hual amo judío hual amo quipía in lanextilisli pa icuerpo, Dios quijtúa pampa amo laijlaculi jan yoje pampa quineltoqa toTata Jesucristo.

<sup>31</sup> Yoje, cuajnesi sequin quijtulo pampa yoje tiquijtulo ilajtol Moisés amo monotza nindeno. ¡Ma camo quiman quijtu inon amaqui! Neli amo tiquijtulo yoje. Quema, tiquijtulo pampa unca melahuac in hual quijtúa in lajtol. Momati pan ipampa ilajtol pampa amo huil tiajsilo tiyelo lacames hual Dios quinmita amo quipixticate laijlaculisli.



*Ilanextilisli Abraham hual quineltocani pa yina*

1 Catani Abraham hual techpehualtic tehuanten in judíos. ¿Len tiquijtusí, cuaquín, inahuac quinami yihual yulini?

2 Tiquijtusí sinda yihual yulini quichijtataya len quijtúa Dios ilajtol pa mochi iyulilisli huan pampín Dios quijtuaya pampa amo quitaya laijlaculisli ca Abraham, cuaquín quipiaya Abraham len calica huil lajtusquiaya hué inahuac quinami yulini. Ma yoje, amo quipiaya quinami lajtusquiaya hué ilaixpan Dios ipampa quinami yulini.

3 Pa ticmatisi inon, ma tiquitacan len quijtúa Dios ilajtol lajcuiluli. Quijtúa, quil: “Abraham quineltocac in hual Dios quilic, huan pampín Dios quijtuc Abraham yajmo quipiaya laijlaculisli”, quil. Huan amo quijtuc yoje inahuac len hual quichíac Abraham.

4 Sinda se tequipanúa, yoje lacames amo quijtulo unca se lachihualisli cuali pa yihual ilaxlahuilisli, quinami len hual quimacalo mas que amo quihuiquililo. Quijtulo ilaxlahuilisli unca hual quihuiquililo.

5 Huan amo yoje inon hual Dios quimaca. Amo quipía se inon hual Dios quimaca pampa tequipanúa. Unca pa se hual amo tequipanúa pa quipías in cuali hual san huil tejchihuilía Dios, unca pa se hual san quilalía ilaneltocalisli pan Dios. Huan unca yihual Dios hual quijtúa pampa yajmo quipía laijlaculisli yihual hual quipiani laijlaculisli. Inon Dios quinextía pan ipampa inon hual quimaca, quita quinami amo quipixtica laijlaculisli in se hual quineltoca yihual.

6 Yoje David noje lajtuni quinami quipía míac paquilisli se hual Dios quijtúa pampa yajmo quipía nindeno hual Dios quimotexpahuilis pampa inon. Huan in se amo quipía pa tequipanus pa yoje quijtus Dios pampa yihual yajmo quipía laijlaculisli.

7 Quema, inon David quijtuc:

Quipialo niman míac paquilisli yehuanten hual Dios quinpujpuhuac inmin-laijlaculisli.

Quema, quipialo paquilisli yehuanten hual Dios yajmo quinmita quinami lacames quipixticate inminlaijlaculisli.

8 Huan quipía niman míac paquilisli in se hual in Tata amo quiman quijnamiquis ilaijlaculisli.

9 Axan, cuaquín, ¿len tiquijtusí inahuac in lachihualisli cuali hual quinchihuilic Dios? ¿Unca jan pa yehuanten in judíos hual quipialo inmincuilaxli lacotonali pa yes inminlanextilisli ilacames Dios? Ó, ¿unca pa yehuanten nojen hual amo quipialo in lacotonalisli, yehuanten hual amo judíos? No, jan unca pa yehuanten san hual quilalilo inminlaneltocalisli pan Jesucristo, pampa annimitzilic len quinextilía Dios ilajtol lajcuiluli. Quijtúa: “Abraham quineltocac in hual Dios quilic, huan pampín Dios quijtuc pampa Abraham yec se hual amo quipía laijlaculisli.”

10 Axcán, ¿quiman quijtuc Dios pampa amo quipiaya laijlaculisli Abraham? ¿Cataya quiman quipíac Abraham icuilaxli lacotonali, o quiman ayamo quipíac? Cataya quiman ayamo quipíac Abraham lacotonali icuilaxli.

11 Huan Dios quilic Abraham pa mochi huilisquiaya in lacotonalisli pan icuilaxli pa yesquiaya quinami lanextilisli hual neli lanextilisquiaya quinami Abraham quilalic mochi ilaneltocalisli ca in hual Dios quilic. Huan pampa quilalic ilaneltocalisli ca in hual Dios quilic, cuaquinon Dios quijtuc pampa Abraham yajmo quipiaya laijlaculisli. Huan yoje Abraham mochíac inminlaicanani moxtin hual quineltocalo Dios ilajtol yancuic huan ma yoje



amo quipialo lacotonali inmincuilaxli. Huan yoje quinami ca Abraham, Dios quijtúa pampa yehuanten nojen amo quipialo laijlaculisli.

<sup>12</sup> Abraham noje yec se hual quipiaya in lacotonalisli, huan jan yoje yihual inminlaicanani moxtin, judíos huan amo judíos, hual quineltocalo jan ilajtol Dios san. Unca pampa mochíac inminlaicanani Abraham quiman ayamo quipiaya in lacotonalisli pan icuerpo. Yoje, quinami tictocalo in ojli hual canac Abraham, yihual quinami totajtzin pampa ticneltocalo Dios ilajtol quinami yihual Abraham quineltocani Dios ilajtol.

*In unca hual Dios quilic pampa quinchihuilisquiaya pan ipampa quinami quilalilo inminlaneltocalisli*

<sup>13</sup> Dios techilic neli pampa ticanasi in lalticpan pa tolaxilulisli hual to-tajtzin Dios techmacas. Ma yoje, ticmatilo pampa amo unca pan ipampa quinami Abraham huan tehuanten ticchihualo in hual quijtúa Dios ilajtol hual Moisés quijuiculuc. Dios techilía neli pampa ticanasi in laxilulisli pampa ticneltocalo da Dios quichías quinami quijtúa. Huan pampín Dios quijtúa neli pampa tehuanten yajmo ticpialo laijlaculisli.

<sup>14</sup> Huan sinda in tolaxilulisli hual Dios quimaca cataya pa yehuanten hual quichihualo len quijtúa in lajtol hual Dios quilic Moisés pa quijuiculuc, cuaquinon amo monofzaya sinda quineltocaloaya Dios ilajtol hual technex-tilía in hual tejchihuilic Jesucristo. Huan amo inon san. Noje quijtúa pampa yehuanten amo quiman huil quipialoaya ilaxilulisli Dios hual quilic pampa yahuiaya quimaca. Unca pampa amo quiman huil lami quichía se mochi hual unca lajcuiluli pa Dios ilajtol hual Moisés quijuiculuc.

<sup>15</sup> Huan pampín, in lajtol quijtúa pampa quipialo pa miquisi lacames. Amo huil quichihualo mochi hual quijtúa in lajtol, huan pampín Dios cualani niman míac. Quipía pa quintojtocas ilaixpan yehuanten quinami quinmahuilúa. Ma yoje, sinda amo cataya lajtol hual techilía len ticpialo pa ticchihuasi, cuaquinon amaqüi quipiaya pa miquis. Unca pampa amaqüi quilalis pa camo quineltocas se lajtol hual quichihualtía sinda amo unca se lajtol quinami inon.

<sup>16</sup> Yoje, ticanasi in lalticpan quinami ilaxilulisli Dios pampa Dios quijtúa tehuanten yajmo ticpialo laijlaculisli pan ipampa quinami ticneltocalo in hual Dios quijtúa. Dios quinequi pa yes yoje quinami yihual quinchihuilía cuali lacames. Yoje neli panus in hual Dios quinmilía. Yihual yahui quimaca ilaxilulisli moxtin yehuanten hual quineltocalo ilajtol quinami Abraham. Huan amo unca in laxilulisli jan pa yehuanten in judíos san hual yulilo quichijtcate yoje quinami quijtúa in lajtol hual Dios quilic Moisés, huan noje quilalilo inminlaneltocalisli ca Jesucristo quinami Dios ilajtol techilía. Noje unca pa yehuanten hual amo judíos hual san quilalilo inminlaneltocalisli ca Jesucristo. Jan yoje Abraham tolaicanani timoxtin quilalic ilaneltocalisli ca in hual Dios quilic.

<sup>17</sup> Unca quinami quijtúa Dios ilajtol lajcuiluli, quijtúa: “Tehual Abraham nimijchiac pa tiyes inmintajtzin míac lacames pa míac lalimes”, quil. Yoje unca quinami yihual Abraham quinpehualtic moxtin hual quilalilo mochi inminlaneltocalisli ca Dios ilajtol. Dios quitaya Abraham quinami inmintaj-tzin. Yihual in Dios hual quinyuliltía yehuanten hual miquije, yihual in Dios hual quijtúa ca lahueliltilisli pa pehuasi yesi mochi hual ayamo quiman yeje.

<sup>18</sup> Huan quineltocac Abraham pampa Dios huil quichihuaya. Quema, Abraham mocahuaya quichixtataya pa quinpiasquiaya míac imiahuimes.

Quineltocaya pampa yahuiaya panu yoje, mas que nesiaya quinami lajtomes hual se hual amo laijnamiquiaya cuali quichixtiahuísquiaya pa panusi. Huan yoje yihual quineltocaya pampa yahuiaya ye inmintajtzin mías lacames pa mías lalimes, jan quinami Dios quilic, quil: “Yoje mías cayasi momiahuimes, Abraham”, quil.

<sup>19</sup> Huan amo lantiyahuiaya ilaneltocalisli. Mocahuaya chichahuac jan yoje quiman quijnamiquiaya quinami icuerpo moviejojtíc, yajmo huil ihuán lalacatiltiaya. Catani quinami se mijquil amo huil lalacatiltía, pampa yulic cien (macuilipuhuali) xixihuimes. Huan mocahuaya chichahuac ilaneltocalisli noje quiman quijnamiquiaya isihua Sara icuerpo hual noje moviejojtíc. Yihual catani quinami se mijquil, yajmo huil quinpiaya xolomes.

<sup>20</sup> Amo quimahuiliaya pampa amo yahuiaya panu in hual Dios quilic neli. Quilic pampa yahuiaya quinpiá mías miahuimes. Yoje mochicahualtiti-ahuiaya quinami quineltocaya Dios ilajtol huan quijtcu lajtomes huejué pa Dios pampa Dios quipía lahueliltilisli hué.

<sup>21</sup> Yoje Abraham quimatiaya neli Dios huil quichía in hual quijtcu pampa yahuiaya quichía.

<sup>22</sup> Pampa inon, Dios quijtcu neli pampa yajmo quitaya laijlaculisli ca Abraham pampa yihual Abraham quineltocaya Dios ilajtol.

<sup>23</sup> Huan amo jan pa Abraham san catani lajcuiluli quinami Dios quijtcu yihual Abraham yajmo quipiyá laijlaculisli.

<sup>24</sup> Catani lajcuiluli noje pa tehuanten. Dios quilalic pa quijtcu neli pampa tehuanten noje amo ticpialo laijlaculisli. Catani lajcuiluli pa tehuanten hual ticneltocalo yihual hual quiyuliltic toTata Jesús oc sejsa quiman miquic.

<sup>25</sup> Yihual Jesús cataya latemacali pa quimictisi pa tehuanten (pa techmic-tiulisi) pampa ticchihuaje mías hual Dios ilajtol quijtcu pa camo ticchihuasi. Huan Dios quiyuliltic Jesucristo oc sejsa quiman miquic pa yoje yihual Dios huil lamachiltis pampa yajmo ticpialo laijlaculisli.

## 5

### *¿Len techpanuc quiman Dios techitac quinami lacames amo laijlaculi?*

<sup>1</sup> Yoje, Dios quijtcu pampa yajmo ticpialo laijlaculisli huan inon pampa ticneltocalo ilajtol Jesucristo. Pampa inon ticate ticpixticate mosehuilisli ca Dios, ticate jan sejsa ca yihual. Yihual techpuppuhuac huan techana quinami ixolomes. Inon unca pa tehuanten pan ipampa toTata Jesucristo.

<sup>2</sup> Pan ipampa yihual, axan tiajsije capa ticanalo in cuali hual san Dios huil tejchihuilia. Inon ticpialo pampa ticneltocalo Jesucristo. Huan timoitalo ca niman mías paquilisli pan ipampa quinami ticchialo inon hual neli Dios tejxiluilis. Ticmatilo unca len hual iyaxca huan niman cualtichin.

<sup>3</sup> Huan amo inon san. Noje ticate ca niman mías paquilisli quiman tipanulo lacocoltilisli, ticmazticate neli pampa inon hual ticpanulo techueliltía pa timopepenialtisi quiman yes techajsis len amo cuali.

<sup>4</sup> Huan sinda ticmatilo timopepenialtilo quiman tipanulo lacocoltilisli, cuaquinon Dios techita cuali. Techita cuali quiman tictequipanuilisli cuali mas que tipanulo lacocoltilisli. Ca inon yihual quitemúa pa quimatis quinami huil timotolinilo pa tictequipanuilisli. Huan yoje tejchicahualtilía toyolo pa ticchiasi pa ajsis in tonali hual yihual Dios lamis tejchihuilis in hual quijtcu pampa yahui tejchihuilia.

<sup>5</sup> Huan inon hual ticchialo ticmatilo neli yahui panúa. Yoje amo timochihuasi lacames huan sihuames hual quijtcu yajmo monotza nindenno. Amo timoitasi quinami ticate lacuajcuamanali quinami neli timoitaloaya yoje

sinda amo panuaya. Inon ticmatilo pampa ticmatije ca mochi toyolo Dios techlasolja míac. Huan ilasojlalisli hué mocahua pa toyolo pa yoje tehuanten ticmatisi tilasojlasi. Unca in Espíritu Santo hual techlamachiltia inon. Dios techmacac in Espíritu Santo pa yihual cayas mojmosta laijtíc timoxtin hual ticate Dios ixolomes.

<sup>6</sup> Quema, amo timoitasi lacuajcuamanali pampa quiman amo huil timopalehuiloaya pa ticpiasi in cuali hual san Dios huil tejchihuiliá, Cristo miquic pa yehuanten hual yulilo amo quineltocaticate Dios. Miquic pa laxlahuis pa quinquixtilis inminlajlaculisli.

<sup>7</sup> Huil panúa pa se miquisquiaya pa se lalac hual amo quipía laijlaculisli. Huan cuajnesi cayas se hual amo momajtsquiaya pa miquisquiaya pa se hual quinchihuiliá cuali moxtin.

<sup>8</sup> Ma yoje, Dios technextilia quinami yihual techlasolja míac pampa Cristo miquic pa tehuanten quiman tiyeje lacames huan sihuames laijlaculi.

<sup>9</sup> Yoje, Dios quijtuc pampa yajmo quita laijlaculisli ca timoxtin huan inon unca pan ipampa iesli Cristo hual quisac quiman miquic. Pampa inon, niman neli unca ticayasi laquixtili pin polehuilisli hual quinpanus lacames pampa Dios cualanía. Dios quintojtocas ilaixpan yihual yehuanten pa cayasi lacocoltili ca lacocoltilisli hual amo quiman lamis. Huan tehuanten, pan ipampa Cristo ticayasi laquixtili pa camo tipanus inon.

<sup>10</sup> Timochihuaje jan seija ca Dios ticpixticate mosehuilisli pa toyolo ca yihual pampa miquic iXolol Jesús quiman ticataloaya icocolinijmes yihual. Cuaquín pampa inon niman neli unca ticayasi laquixtili pin lacocoltilisli calica Dios quinpolehuiltis yehuanten hual quilalilo pa camo quineltocasi. Ticayasi laquixtili pa inon pan ipampa Cristo iyulilisli hual noje unca laijtíc tehuanten.

<sup>11</sup> Huan amo ja inon san. Noje ticate ca niman míac paquilisli pampa ticpialo Dios pa toDios tehuanten huan inon pan ipampa toTata Jesucristo. Pan ipampa yihual ticanalo in cuali hual san Dios huil tejchihuiliá. Ca inon ticpialo mosehuilisli pa toyolo ca yihual.

### *Adán huan Cristo*

<sup>12</sup> Yoje, pan ipampa se lalac Adán in laijlaculisli nesic pin lalticpan. Huan pan ipampa in laijlaculisli noje unca miqulilisli. Yoje moxtin quipialo pa miquisi pampa moxtin quichihuaje laijlaculisli.

<sup>13</sup> Cataya laijlaculisli pin lalticpan quiman Dios ayamo quimacac Moisés in lajtol. Huan lacames yuliloaya quichijtataloaya laijlaculisli. San amo quinmotexpahuililo pampa quichihualoaya laijlaculisli sinda amo unca lajtol hual quinnextilia len unca laijlaculisli.

<sup>14</sup> Ma yoje, quiman yuliaya Adán huan pa quiman yuliaya Moisés, moxtin miquije. Quema, cataya quinami in miqulilisli huelitiaya pa yehuanten, mas que amo quiman quichihuaje laijlaculisli quinami Adán ilaijlaculisli. Yihual ilaijlaculisli quichiac mas que Dios quilic pa camo quichiasquiaya. Yoique quipanultilic iyolo laijlaculi pan moxtin imiahuimes, pampa yihual Adán quinpehualtic mochi lacames. Huan Cristo yahuiaya nesi pin lalticpan quiman panuloaya niman míac xixihuimes. Cuaquín, yihual Cristo quinpehualtic moxtin hual cate ilacames axan. Yihual quinpanultilic ichipahuilisli pan moxtin yehuanten.

<sup>15</sup> Yoje, pan ipampa Dios ilachihualisli cuali, yihual techita tehuanten chipahuac, amo ticpixticate len laijlaculisli, tejchihuiliá cuali. Amo yoje ilaijlaculisli Adán hual tejchihuiliá amo cuali. Míac lacames, quema, moxtin lacames miquije pampa se lalac, Adán, quichiac len Dios quilic pa camo

quichías. Ma yoje, niman neli unca pampa in cuali hual Dios quinchihuilía, quinchihuilis niman míac cuali pa míac lacames, mas que Adán ilaijla-culisli quinchihuilic míac lacames niman amo cuali. In cuali hual Dios quinchihuilía unca inon hual tejchihuilía pan ipampa in se lalac san, yihual Jesucristo.

<sup>16</sup> Huan in cuali hual Dios tejchihuilic pan ipampa Cristo amo unca quinami techpanuc pampa se lalac, Adán, quichíac laiijlaculisli. Yoje ca ompic tiquitalo Adán hual amo quineltocac se lajtol, huan pampa inon, Dios quipiác pa quilalis pa moxtin miquisi. Yojqe miquilo Adán huan moxtin imiahuimes hual timoxtin ticate. Huan ca niquic, tiquitalo axan quinami Dios quilalía pa quinpuphuas mochi tolaijla-culisli. Yoje mochi huil panúa cuali pa in míac lacames hual quichihuaje míac laiijlaculisli. Inon unca pampa Dios quijtúa axan pampa yajmo unca nindeno hual yihual Dios quipía pa quinmotexpahuilis.

<sup>17</sup> Yojqe, moxtin quipialo pa miquisi pan ipampa ilaijla-culisli se lalac, Adán. Axan niman neli unca pampa yehuanten amo quiman lamisi yulisi huelitjicate ca paquilisli ca Cristo. Yoje yes san sinda canal in cuali niman hué hual quinchihuilía Dios. Inon yihual quinchihuilía pampa quijtúa yajmo unca len ca yehuanten hual pampa inon quinmotexpahuilis. In cuali quinchihuilía Dios pan ipampa inon hual Jesucristo lamic quichíac pa in tonali hual miquic.

<sup>18</sup> Axan, quinami se lalac, Adán, amo quineltocac se lajtol hual Dios quilic pa camo quichías, pampa inon Dios quijtuc pampa quipialo pa miquisi moxtin lacames, yehuanten imiahuimes Adán. Huan jan yoje oc se lalac, Jesucristo, quineltocac mochi Dios ilajtomes hual Dios quilic pa quichías. Huan pampa inon quichíac pa moxtin huil quipialo ilapuphualisli Dios. Huan Dios quinmaca in yulilisi hual amo quiman lamis pan ipampa ilapuphualisli.

<sup>19</sup> Quema, in míac lacames mochihuaje lacames laiijlaculi pan ipampa quinami se lalac, Adán, amo quineltocac Dios. Jan yoje in míac lacames noje mochihuasi lacames hual Dios quinmita amo quipixticate laiijlaculisli. Inon unca pan ipampa quinami se lalac, Jesucristo, amo quiman mocahuac pa quineltocas Dios.

<sup>20</sup> Yoje in lajtol hual Dios quilic Moisés cataya pa quinnextilic lacames quinami míac quixtocalo quichihualo laiijlaculisli. Inon unca pampa in lajtol quinnextilic quinami cate míac hual huil quinchihualo calica moiijlaculo. Ma yoje, capa momiactiaya laiijlaculisli, Dios ilachihualisli cuali niman míac momiactiaya pa quipuphuas in laiijlaculisli.

<sup>21</sup> Cuaquinon, pan ipampa in laiijlaculisli, yoje miquilo lacames. Ma yoje, in cuali hual san Dios quinchihuilía cuali quinyulitía oc sejpa pan ipampa quinami yihual quinpuphualisli lacames inminlaiijlaculisli. Quijtúa yihual pampa yajmo quita nindeno ca yehuanten hual pampa inon quinmotexpahuilía. Axan quipialo iyulilisi hual amo quiman lamis, huan inon pan ipampa Jesucristo toTata.

## 6

*Pampa ticchihualo laiijlaculisli, timicticate. Pampa miquic Cristo tiyulticate*

<sup>1</sup> Cuaquinon, ¿len tiquiqtusi? ¿Tiyultiasi ticchijticate laiijlaculisli pa yoje in cuali hual san Dios huil tejchihuilía momiactis niman míac?

<sup>2</sup> ¡No, ma camo quiman quiytu amaqui yoje! Dios techita axan quinami timiquije pampa ticchihualo laijlaculisli, huan yoje unca quinami timiquije pa yajmo ticchihualosquiaya laijlaculisli. Axcan, ¿quinami huil tiyultiasi ticchijicate laijlaculisli? No, monequi pa timocahuasi pa ticchihuasi.

<sup>3</sup> ¿Amo anquimati quinami timoxtin hual ticataloaya lacuayatequili quiman timotemacaje pa tiyelosquiaya se ca Jesucristo, jan yoje cataya quinami timictataloaya ca yihual? Yoje Dios techitac quinami timiquije ca Cristo.

<sup>4</sup> Quema, Dios techita axan quinami ticataloaya lalalpachuli ca Jesucristo pan ipampa tolacuayatequilisli. Huan Cristo cataya layuliltili oc sejpa quis-tataya capa in mijquimes pan ipampa Dios toTajtzin ilahueliltilisli niman hué. Huan pampa yihual cataya layuliltili, jan yoje tehuanten noje tiyulisi ca yulilisi yancuic.

<sup>5</sup> Unca quinami ticataloaya ca yihual quiman miquic, Dios techita yoje. Huan pampa unca yoje, noje neli unca ticate ca yihual pan ipampa quinami tiyulilo oc sejpa, jan quinami yihual yulic oc sejpa.

<sup>6</sup> Huil tiquijtulo inon pampa ticmatilo yajmo ticate quinami ticatanijme quiman ayamo ticeltocaje Cristo. Unca quinami toyolo laijlaculi miquic. Cataya in toyolo laijlaculi hual tejchihualtiaya mochi inon hual amo unca quinami Dios quinequi. Tehuanten yajmo tilacames hual ticpialo toyolo laijlaculi. Axcan unca quinami toyolo laijlaculi cataya lapiluli pan in cuahuil ca Cristo. Axan Dios techita quinami ticataloaya yoje lapiluli pa yoje toyolo laijlaculi yes laxitinili. In toyolo laijlaculi mojmosta tejchihualtilini laijlaculisli ca tocuerpo.

<sup>7</sup> Huan pampa se hual miquic yajmo quichía laijlaculisli, jan yoje aqui hual Dios quita quinami miquic yajmo quinequi quichía laijlaculisli. Unca lamacahuali pa yajmo quichihualtis mochi in amo cuali pa iyolo hual quichihualtini.

<sup>8</sup> Huan amo inon san. Sinda Dios techita quinami timiquije ca Cristo, ticmatilo noje tiyulisi ca yihual huan tiyulisi quinami yihual yuli.

<sup>9</sup> Unca pampa ticmatilo Cristo cataya layuliltili oc sejpa. Mocuepac pa yajmo cayasquiaya capa catani ca in mijquimes. Axan, yajmo miquis, in miqulisli yajmo quipía lahueliltilisli ca yihual, yajmo quipía chichahualisli pa quimictis.

<sup>10</sup> In unca pampa quinami cajsí yihual pampa miquic, yoje miquic se tonali huan amo quiman quipías pa mocuepas miquis. Unca pampa quiman miquic, yihual quilaxlahuic mochi pa quixitinis laijlaculisli. Cristo yajmo quipías pa miquis pa yajmo huelitis laijlaculisli ca tehuanten. Huan quinami cajsí yihual pampa yuli, axcan yuli ca Dios, yajmo moxilus pa camo cayas capa yihual.

<sup>11</sup> Huan jan quinami inon, amhuanten noje xiyulican anmoiztica quinami anmiquic. Huan pampa inon yajmo anquipía nindeno pa anquitas ca laijlaculisli. Noje xiyulican anmoiztica quinami axan anunca anyultica pa anquitequipanullis Dios. Anunca anyultica pa Dios pampa anunca ca Cristo Jesús axan.

<sup>12</sup> Yoje, amo ximacahuiltican anmoyolo laijlaculi pa anmijchihualtis in amo cuali. Amo ximacahuiltican pa anmitzlaneltocaltis len yes amo cuali hual anmoyolo laijlaculi quinequi pa anquichías.

<sup>13</sup> Huan noje, ximocahuacan pa camo anquichías laijlaculisli ca anmoma-jmajuan huan anmocxihuaajmes huan anmocamac huan mochi hual unca iyaxca anmocuerpo. Quema, ximocahuiltican amhuanten pa anyes pa Dios san, quinami monequi pa lacames hual axan yulticate quinami yehuan-

ten hual quisaje pa capa cate in mijquimes. Huan ximomacahuiltican pa mochi hual anquichías yes in hual unca ca se lajtulisli ca Dios.

<sup>14</sup> Anmoyolo laijlaculi amo anmijchihualtis, pampa yajmo huelitía ca amhuanten ilajtol Dios hual quijcuiluc Moisés. In lajtol mojmosta anmitznel-tocaltini ca chichualisli. Axcán huelitía ca amhuanten in cuali hual san Dios huil anmijchihuilia. Inon anmitzhueliltía pa anquineltocas Dios ca lanequilisli.

*Quijtúa quinami cate in tequipanujquimes hual amo quinlaxlahuilo*

<sup>15</sup> ¿Len tiqijtusi, cuaquín? ¿Huil ticchihualo laijlaculisli quijquiman pampa yajmo huelitía pa tehuanten in lajtol, huan quema, lahueliltía pa tehuanten in cuali hual san Dios huil tejchihuilia? ¡Ma como quiman quijtu inon amaqui!

<sup>16</sup> ¿Amo anquimati pampa aquí yes anmotemacas pa anyes itequipanujquimes se hual amo anmitzlahuía, anuncia itequipanujquimes yihual pa anquineltocas? Cuaquín huil anmotemacas pa anquichías laijlaculisli huan pampa inon anmiquis, amo quiman anyulis capa unca Dios. Huan sinda amo yoje, amhuanten huil anmotemacas pa anquineltocas Dios pa anyulis quinami Dios quixtoca, anquixtoca anmoyolo chijchipahuac.

<sup>17</sup> Ma yoje, ma ticsehuican Dios. Mas que ancatani tequipanujquimes pa anquichiasquiaya laijlaculisli, axcán yajmo anuncia yojque. Anquineltocac pa anmoyolo in lamaxtilisli hual Dios quilalic. Huan yihual anmitztemacac pa anyulis anlachijtica quinami quijtúa ilamaxtilisli.

<sup>18</sup> Inon unca pampa anuncia lamacahuili. Yajmo anquipía pa anyulis ca in laijlaculisli anmijchihualtijtica. Axan Dios anmijchía itequipanujquimes pa anyulis anquichijtica len cuali, inon unca quinami yihual quinequi.

<sup>19</sup> Annimitzlaquetzilijtica quinami lacames lajtulo mojmosta, pa yoje anquimatis len nicnequi niqijtúa. Unca pampa lacames amo huil quimatilo len quinequi quijtúa in hual unca pa toyolo sinda amo tilajtulo yoje. Pa yina anmotemacani pa anquichías len Dios quita amo cuali huan pa anquichías mochi tonali miac hual amo cate quinami quijtúa Dios ilajtol. Axan ximotemacacan pa anquichías mochi hual unca cuali huan mochi hual Dios quita chipahuac. Yoje neli anmochías cuali huan chipahuac pa anyes jan pa Dios san.

<sup>20</sup> Anyec quinami tequipanujquimes hual amo quilaxlahuilo pa anquichihuasquiaya laijlaculisli. Cuaquín anquijtuaya pampa amo anquipiaya pa anyulis anquichijtica len cuali huan melahuac. Cataya quinami anmotemacaya pa anquichías laijlaculisli.

<sup>21</sup> Cuaquinon, ¿len lapalehuilisli anquipiác quiman anquichihuaya innojen hual axan apinahua pampa anquichihuani? Nindeno, pampa jan lamilo mochi innojen ca miqulisli pa inminyolo yehuanten hual quinchihualo.

<sup>22</sup> Ma yoje, axcán ancayac lamacahuili. Yajmo anquipía pa anquichías laijlaculisli. Quema, anquipiás pa anquitequipanuilis Dios. Huan pampa inon ancana lapalehuilisli hué, pampa huil anyuli anquichijtica inon hual cuali huan chipahuac, pa anyes lacames huan sihuames jan pa Dios san. Huan inon lami cuali pa amhuanten, pampa anquipía anmoyulilisli ca Dios. Huan in yulilisli amo quiman lamis.

<sup>23</sup> Neli unca yoje, pampa se hual yuli quichijtica laijlaculisli miquis huan moxilus pa yajmo huil cayas ca Dios. Inon unca ilaxlahuilisli se hual yuli quichijtica laijlaculisli. Ma yoje, Dios quinyliltía lacames, quinmaca

yulilisi hual amo quiman lamis. Amo quipialo pa quilaxlahuisi Dios inon. Huan quinyuliltía pan ipampa Cristo Jesús toTata.

## 7

### *In lanexilis quilá quinami unca monamictilisi*

<sup>1</sup> Nocnían, nilaqueztica ca amhuanten hual anquimati in lajtol hual Dios quilalic. Neli anquimati quinami se quipía pa quineltocas in lajtol jan pa innojen xixihuil quiman ylhual yuli san.

<sup>2</sup> Huan yojque unca ca se sihual quiman monamictía. Pa mochi xixihuil hual yuli ilahuical, in lajtol quijtúa pampa in sihual mocahua iyaxca ilahuical. Ma yoje, sinda miqui ilahuical, cuaquinon yajmo quipía nindeno pa quitas ca inon hual in lajtol quijtúa inahuac ilahuical, yajmo cajsí in sihual.

<sup>3</sup> Yoje, sinda ilahuical unca yultica, huan isihua mohuicas pa yulis ca oc se lalac huan yehuanten monipanulo, cuaquín moxtin huil quijtusi pampa in sihual canac se lalac hual amo iyaxca. Sinda miqui ilahuical, cuaquinon in sihual unca lamacahuali. In lajtol yajmo cajsí pampa yajmo yuli ilahuical. Amo huil quijtusi lacames in sihual cana se lalac hual amo iyaxca sinda monamictis ca oc se lalac ihuían.

<sup>4</sup> Jan yoje, nocnían, amhuanten hual anquineltoaca Cristo, amhuanten noje anunca lamacahuali quinami in sihual hual ilahuical miquic. Quiman Cristo yec lamictili, cuaquín Dios anmitzítac amhuanten quinami ancataya lamictili pampa amo anquineltoac ilajtol. Dios anmitzítac quinami anmiquic ca Cristo.

Pampa inon yajmo anquipías pa anquitas nindeno ca in lajtol hual Dios quimacac Moisés pa yoje Dios anmitzítas quinami lacames hual amo quipialo laijlaculisli. Anunca quinami anmictica huan yoje in lajtol yajmo anmitzajsi pampa inon. Yoje ancataya lamacahuali pa anmochías iyaxca oc se. Anmochías iyaxca Cristo hual yulic oc sejpa huan quisac capa cataloaya huan in mijquimes. Anmochías iyaxca ilacames pa yoje anyulisquiaya ca yulilisi cuali hual quipaquiltis Dios.

<sup>5</sup> Quiman tiyuliloaya ticchijataloaya quinami quinequiloaya toyolo laijlaculi, yoje ticnequiloaya míac pa ticchihualosquiaya laijlaculisli. In lajtol techlanequiltic pa ticchihualosquiaya mochi hual amo cuali. Huan sinda yoje tiyulisi, timiquisi huan timocahuasi laxiluli pa camo ticayasi capa unca Dios.

<sup>6</sup> Ma yoje, axcan ticcate lamacahuali huan amo techajsi in lajtol, pampa unca quinami timiquije pa yajmo tiyulisi quinami tiyulinijme. Ticpianijme pa tiyulilosquiaya mojmosta timotolinticate pa ticneltoacas in lajtol. Ticataloaya quinami lacames lailpili pa tiyesi latzacuali calijtic. Huan axan ticcate lamacahuali pa yoje ticayasi lahueliliti pa tictequipanuilisi Dios ca mochi toyolo. Huan tictequipanuilisi pan ipampa se yulilisi yancuic, pan ipampa in Espíritu Santo. Yajmo monequi pa tictequipanuilisi Dios chichahuac yoje quinami quijtúa in lajtol hual Dios quilalic pa yina.

### *Lajtic toyolo ticnequilo ticchihualo laijlaculisli*

<sup>7</sup> Cuaquinon ¿len tiquiqtusi? ¿Amo unca cuali in lajtol? ¿Unca laijlaculisli? ¡Ma como quiman quijtú inon amaqui! Sinda amo cataya in lajtol, amo nicmatiyaya len unca laijlaculisli, pampa neli amo nicmatiyaya amo unca cuali sinda se quinequi quipía len hual iyaxca oc se. Ma yoje, in lajtol quiqtuaya: “Amo ticnequis ticpías in hual amo moyaxca.”



<sup>8</sup> Huan pampa nel niunca laijlaculi, cuaquín quiman nicmatic amo unca cuali pa se quinequis len amo iyaxca, yoje noyolo laijlaculi laijtíc nehual nechlanequiltic míc hual amo cuali pa nicnequisquiaya. Huan quiman amo nicmatiaya len quijtúa in lajtol, cuaquinon, quinami mochi lacames, amo nicmatiaya sínda nicchijtataya laijlaculisli.

<sup>9</sup> Nehual pa yina niyulini amo nicmazzataya quinami nechajsiaya in lajtol. Ma yoje, quiman nicmatic in lajtol, cuaquín cataya quinami noyolo laijlaculi moyuliltic pa nechyantís pa nicchías len amo unca cuali. Pampa inon, Dios ilajtol quijtuaaya nicpiaya pa nimiquisquiaya.

<sup>10</sup> In lajtol Dios quimacac pa yoje pan ipampa in lajtol nicmatisquiaya quinami huil niyulis chipahuac huan ca paquilisli ca Dios. Huan axan in lajtol monextic quinami len hual quijtúa pampa nicpiaya pa nimiquis.

<sup>11</sup> Huan noyolo laijlaculi amo mocahuaya pa nechijnamiquiltis pampa huil nicneltoca mochi in hual quijtúa in lajtol. Yoje nechcuaajcuamanac noyolo laijlaculi. Huan yoje in lajtol nechtilanic pa nimiquisquiaya.

<sup>12</sup> Yoje, in lajtol unca chipahuac huan cajsí se jan quinami oc se, huan unca cuali. Lacames amo cate yoje.

<sup>13</sup> Huan in hual unca cuali, axan ¿cataya in hual mochíac quinami len hual quijtuaaya pampa nicpiaya pa nimiquisquiaya? ¡Ma camo quiman quijtú inon amaqui! Cataya noyolo laijlaculi hual amo quineltocaya in lajtol. Cataya inon hual nechhualiquilic miqulisli. Cataya yoje pa neli nicmatis quinami unca laijlaculi noyolo huan yoje amo cuali. Huan pampa noyolo cataya laijlaculi, in lajtol quijtuaaya nicpiaya pa nimiquisquiaya. Yojque, pan ipampa in lajtol timoxtin ticmatilo quinami niman amo cuali unca toyolo laijlaculi.

<sup>14</sup> Ticmatilo quinami in lajtol hualac pan ipampa Dios iEspíritu huan yoje yehuanten hual quipialo Dios iEspíritu pa inminyolo quimatilo in lajtol unca cuali. Ma yoje, noyolo laijlaculi mocahua laijtíc nel. Niunca quinami se tequipanujquíl lanamaquilti hual quipía pa quineltocas iteco. Huan in noyolo laijlaculi unca quinami noteco nehual, mojmosta nicnequi nicchía laijlaculisli.

<sup>15</sup> Huan yoje, amo niquinmita cuali innojen hual niquinchía pan míc tonalijmes. Nesi quinami yesquiaya oc se hual nejchihualtía. Amo niquinmita cuali huan amo nicmati leca niquinchía innojen. Amo nimoita cuali sínda niquinchijtica, pampa amo nicchía in hual niquita cuali. Nicchía inon hual amo niquixtoca.

<sup>16</sup> Huan sínda nicmati pampa inon hual nicchía amo unca cuali, cuaquín niquita cuali in lajtol hual quijtúa pa camo niquinchía innojen. Huan yoje neli niquiqtúa pampa cuali in lajtol.

<sup>17</sup> Axan, yajmo unca nehual hual niquinchía, unca in noyolo laijlaculi hual nejchihualtía laijtíc nehual.

<sup>18</sup> Unca pampa neli nicmati da amo unca len cuali laijtíc nehual. Nicnequi niquiqtúa, noyolo laijlaculi laijtíc nehual amo quiman quinequi quichía len cuali. Nicpiá ca nehual nolahueliltilisli pa nicnequis nicchías len cuali. Ma yoje, pa nicchías len cuali, inon amo huil.

<sup>19</sup> In hual nicnequi nicchía, ma niquiqtú, in hual unca cuali, inon amo nicchía. Huan inon hual amo nicnequi nicchía, ma niquiqtú, inon hual amo unca cuali, inon nicchía.

<sup>20</sup> Axcan, sínda nicchía inon hual amo nicnequi, cuaquinon yajmo unca nehual hual nicchía. Unca noyolo laijlaculi hual unca laijtíc nehual hual



quichía.

<sup>21</sup> Yoje, niquita lajitic nehual inon. Quiman nicnequi nicchía len cuali, cuaquín nepa noje unca nonahuac len amo cuali hual nechlanequiltía pa nichías in amo cuali.

<sup>22</sup> Ca mochi nolanequilisli lajitic nehual, nimoita ca paquilisli nicnectica pa nichías in hual quijtúa Dios ilajtol.

<sup>23</sup> Ma yoje, niquita oc se len hual quinequi huelitía capa nehual, huan inon quilalía pa camo nicneltocas Dios pa yoje nejxitinilis noyolo yancuic. Unca quinami moana ca noyolo yancuic hual in Espiritu Santo nechlalilic. Inon unca noyolo laijlaculi hual quinequi huelitía capa nehual, nechana quinami tequipanujquil lailpili.

<sup>24</sup> ¡Ah, nilacal hual nipolejtica! ¿Aqui nechquixtilis pin imiquilisli in noyolo laijlaculi hual nechhuicatía pa nimiquis nimoxilujtica pa camo nicayas capa unca Dios?

<sup>25</sup> Nicsehuía Dios pan ipampa Jesucristo toTata, yihual nechquixtilijtica pin miqulisli. Axan, nican nehual ca noyolo yancuic niunca itequipanujquil Dios pa nicneltocas ilajtol. Ma yoje, niunca itequipanujquil noyolo laijlaculi pa nichías laijlaculisli.

## 8

### *In yulilisli hual unca pan ipampa Dios iEspíritu*

<sup>1</sup> Yojque, Dios quijtúa pampa amo quipiasi pa miquisi yehuanten hual yihual quinmita cuali quinami Cristo. Quinmita cuali pampa unca quinami yihual quinlalic yehuanten lajitic Cristo huan yoje unca quinami quinlalilic yehuanten in cuali hual unca iyaxca Cristo.

<sup>2</sup> Pampín Dios amo nechjcuianilis yihual ipampa nolaijlaculisli. Unca pampa in Espiritu Santo nechmaca yulilisli pan ipampa Cristo Jesús huan huelitía pan nehual. Nechmacahuac pa yoje yajmo huelitis laijlaculisli huan miqulisli pan nehual.

<sup>3</sup> Cataya pampa mojmosta toyolo laijlaculi amo mocahua pa tejchihualtis laijlaculisli. Huan in lajtol hual quimacac Moisés amo quipiaya chichahualisli pa tejtzaculisli pa camo ticchihualosquiaya laijlaculisli. Pampín, Dios quiflanic iXolol iyaxca pin lalticpan. Yihual lacatijtihualac quipixtataya se cuerpo quinami tocuero, huan iyolo quinami toyolo. Ma yoje, mas que Dios ixolol yec lacal quinami tehuanten, amo quiman quichíac laijlaculisli. Dios quilalic pa iXolol miquisquiaya huan yoje laxlahuisquiaya tolaijlaculisli ca icuerpo. Inon unca quinami techquixtilía tolaijlaculisli. Yoje Dios quilic pa iXolol quipiaya pa miquisquiaya pa tehuanten hual ticate lacames huan sihuames laijlaculi.

<sup>4</sup> Dios quichíac inon pa yoje tehuanten tiyesi mochi amo ticpixticate laijlaculisli. In lajtol quijtúa pampa monequi pa jan yoje yesi lacames. Tehuanten huil ticate yoje pampa tiyulilo ca in Espiritu Santo huelitijtica pan tehuanten. Amo tiyulilo ca toyolo laijlaculi huelitijtica pan tehuanten.

<sup>5</sup> Unca pampa yehuanten hual yulilo jan pa quinquiltisi inminyolo laijlaculi quijnamiquilo san len quinequilo yehuanten inminhuían. Amo yoje yehuanten hual yulilo pa quinquiltisi in Espiritu Santo. Yehuanten quijnamiquilo san len yes iyaxca in Espiritu Santo.

<sup>6</sup> Unca yoje pampa sinda mojmosta yulilo lacames quijnamiccate san len quinequilo yehuanten inminhuían, cuaquín yehuanten lamisi moxilujticate pa camo cayasi capa unca Dios. Amo quiman huil mocuepasi ca yihual. Inon unca miqulisli pa inminyolo. Amo yoje yehuanten hual yulilo quilalijticate

inminlajnamiquilisli pan len yes iyaxca in Espíritu Santo. Yehuanten yulisi ilaixpan Dios quiximatijtcate, huan mosejticate pa inminyolo ilaixpan yihual.

<sup>7</sup> Yehuanten hual quilalilo mochi inminlajnamiquilisli pan len quinequilo jan yehuanten san, yoje quilalijtcate pa como quineltoyasi Dios. Amo quinequilo pa huelitis pan yehuanten. Yehuanten hual laijnamiquilo yoje amo mosulahualo ca Dios ilajtol, huan amo huil mosulahualo.

<sup>8</sup> Huan yehuanten amo huil quipaquiltilo Dios sinda yulilo mopaquiltilite jan yehuanten san.

<sup>9</sup> Amo yoje ca amhuanten. Amo anyuli anquinmacahuiltitica anmoyolo laijlaculi pa huelitis capa amhuanten. Anquinmacahuiltitía pa huelitis in Espíritu Santo capa amhuanten. Anyuli quinami anmitzilía in Espíritu Santo, pampa chanti laijtic amhuanten Dios iEspíritu. Sinda se amo quipía Cristo iEspíritu, cuaquín in se amo unca iyaxca Cristo.

<sup>10</sup> Dios quinmita anmocuerpos pampa cate laijlaculi, yoje lacatije huan quichihuaje laijlaculisli. Ma yoje, sinda Cristo iEspíritu unca laijtic amhuanten, cuaquinon ca anmoyolo yancuic anyuli pampa Dios anmitzita quinami amo anquipixtica laijlaculisli, jan quinami Cristo amo quipía laijlaculisli.

<sup>11</sup> Huan amo san inon. Dios toTajtzin quiyuliltic Jesús quiman miquic huan cataya ca in mijquimes. Huan Dios in Espíritu Santo chanti laijtic amhuanten. Pampín, yihual hual quiyuliltic Cristo Jesús noje anmitzyuliltis anmocuerpos hual miquisi. Huan Dios anmitzyuliltis pan ipampa in Espíritu Santo hual chanti laijtic amhuanten.

<sup>12</sup> Cuaquinon, nocnían, amo ticpialo pa tiyulisi jojque quinami quinequilo toyolo laijlaculi pa tiyulisi.

<sup>13</sup> Sinda anyuli yoje, cuaquín in tonali hual anmiqui, ancayas latzacuali pa como huil ancalaquis capa unca Dios, amo quiman huil anajsis nepa. Yoje, anquipía pa anyulis quinami in Espíritu anmitzilía. Huan sinda anyuli yoje, monequi pa anmotzactías pa como anyulis anquichijtías in amo cuali hual anmoyolo laijlaculi quinequi pa anquichías. Cuaquín anyulis anquipixtica in yulilisli yancuic hual quipialo moxtin hual quineltoyalo Cristo.

<sup>14</sup> Quema, anyulis yoje yancuic, pampa moxtin hual Dios iEspíritu quinalcana, yehuanten cate Dios ixolomes.

<sup>15</sup> Unca pampa ancanac in Espíritu Santo hual amo anmijchíac quinami tequipanujquimes hual amo quilaxlahuilo pa yoje anmomajtisquiaya anajsi ca Dios. Neli in Espíritu Santo anmijchíac pa anmoiximatis quinami Dios ixolomes. Huan pan ipampa in Espíritu ticnotzalo Dios tiquilijtcate: “¡Abba!”, hual quinequi quijtúa “¡Tata!”

<sup>16</sup> Unca yihual in Espíritu hual quinmillá toyolo pampa tehuanten ti'ixolomes Dios.

<sup>17</sup> Huan quinami ti'ixolomes Dios, cuaquinon noje Dios tejaxiluilis in hual iyaxca. Inon quipía pa tehuanten, quema, ca Cristo ticpiasi. Noje ca Cristo tipanusi míac hual techcocoltía. Pampín ca yihual ticayasi la'ajcoquili ca capic ticanasi míac lahueliltisli. Huan Dios lajtus hué tonahuac tehuanten pampa ticate iyaxca.

<sup>18</sup> Dios yahui technextilía míac hual ticanasi quiman ticayasi ca yihual. Niquijtúa pampa cayas niman cuali. Amo yoje cuali in hual ticpialo pan lalticpan. Pampa inon, tiqitasi quinami nindeno inon hual tejaxitnic huan techcocoltic nican.

<sup>19</sup> Huan inon hual ticanasi unca niman hué huan míac. Pampín quichialo ca niman míac lanequilisli mochi hual Dios quichíac pin cielo huan pan

lalticpan. Quichixticate in tonali hual ajsis quiman Dios quinmacahuiltis moxtin pa quimatisi pampa tehuanten ti'ixolomes.

<sup>20</sup> Huan axcan mocahualo quichixticate, pampa Dios quisulahuac mochi hual quichíac pa como quipias mochi inminchicahualisli hual quipianijme quiman Dios quinpehualtic. Amo mochihaaje yoje pampa quinequiloaya yehuanten inminhuán. Cataya pampa quichíac Adán in laijlaculisli Dios quijituc pa cayas yojque. Axan, mochi hual Dios quichíac quichixtica pa ajsis in tonali.

<sup>21</sup> Cuaquinon noje, mochi hual Dios quichíac yajmo quipías pa mocahuas palantiasi huan yajmo quipias pa mocahuas cacaxlito. No, quiman Dios ixolomes canasi in laixpelalisli cualtichin huan lahueliltilisli hué, niqijitúa, quiman Dios quinmacahuas pa yajmo quinmijlacultis in hual quinmijlacultía axan, cuaquin noje mochi hual Dios quichíac cayasi lamacahuali pa yajmo quintzacuas inon calica Dios quintzacuac.

<sup>22</sup> Ticmatilo pampa mochi hual Dios quichíac yahui caya lamacahuali yoje. Quiman Dios quinpehualtic mochi niman pa yina hual mocajtihualac pa axan, mochi in yulijquimes huan lacames hual Dios quinchíac axan mocahualo quinami panujticate lacocoltilisli quinami se sihual panúa lacocoltilisli quiman yahui lacati ixolol. Quema, mochi hual Dios quinchíac panulo lacocoltilisli, yajmo ajsilo quipialo in hual quipianijme quiman Dios quinpehualtic.

<sup>23</sup> Huan amo panulo lacocoltilisli san innojen oc sequin hual Dios quinchíac. Noje techpanúa tehuanten hual ticneltocalo Cristo huan ticpialo in Espíritu Santo hual tejchía nadita quinami Cristo axan. Ma yoje, ajsis in tonali hual ticchixticate, huan cuaquin tiajsisi tiyesi jan quinami yihual. Axan techcocojica toyolo nican capa ticchixticate ca miac lanequilisli in tonali hual Dios lamis techmacahuiltis pa ticayasi mochi laiximatili quinami ixolomes. Ma yoje, quiman ajsis in tonali hual Dios quichías mochi yajyan-cuic, cuaquinon tocuerpos hual axan ticpialo cayasi lapatilili pa oc sequin cuerpos hual amo quiman lamisi.

<sup>24</sup> Inon neli unca, pampa quinami ticlalije tolaneltocalisli ca Cristo, cuaquin ticmatije pampa neli ticanasi in hual techilic yahuiaya techmaca, mas que ayamo tiqitalo axan. Sinda tiqitaloaya, cuaquin yajmo monequiaya pa ticchixtiasi, pampa sinda quita se len, cuaquinon ¿leca quichixtías?

<sup>25</sup> Axan amo ticpialo huan amo tiqitalo inon hual ticchixticate pa ajsis ca tehuanten. Pampín timochicahualtilo ticchixticate in tonali quiman ticanasi.

<sup>26</sup> Yoje in Espíritu Santo techpalehuía pa ticpiasi chicahualisli pa timopejpenialtilo in lacocoltilisli hual monequi pa tipanusi axan. Huan in Espíritu Santo techpalehuía pa huil tiajsilo tilachihualo quinami cana cuali pa Dios ixolomes. Techpalehuía pampa amo ticmatilo len unca cuali pa ticlajlanisi Dios. Ma yoje, yihual in Espíritu Santo quimati. Huan yihual quilajlanía Dios pa tehuanten, quilajlanijtica ca siahuilisli yoje quinami amo huil ticmatilo ticchihualo ca lajtomes.

<sup>27</sup> Huan Dios quita lajtuc toyolo pa quimatis len tiqijitucate nepa. Yoje yihual quimati len quinequi quijitúa in Espíritu Santo, pampa in Espíritu Santo quilajlanía Dios pa yihual tejchihuilis cuali quinami yihual Dios quinequi pa tehuanten hual ixolomes.

*Tehuanten tiquinsulahualo tolacocolinijmes huan amo jan inon san*

<sup>28</sup> Huan ticmatilo pampa mochi innojen hual panulo mochihuililo se ca oc se pa yoje lamisi cuali pa yehuanten hual quilasojlalo Dios. Yehuanten

cate hual yihual quinnotzac pa quichihuasi huan pa yesi mochi hual yihual quilalic pa yehuanten.

<sup>29</sup> Dios quinmiximatic yehuanten quiman ayamo quichíac len. Huan yehuanten hual quinmiximatic, yihual quilalic pa yesi jan quinami unca ixolol. Quilalic pa yesi yojque quiman ayamo catanjime lacames pan lalticpan. Yoje quilalic pa Jesús ixolol Dios quinpiasquiaya míac icnían huan pa yihual yesquiaya inimicni hué ca yehuanten.

<sup>30</sup> Huan yehuanten hual Dios quinlalic pa yesi ixolomes, yihual quinnotzac. Huan yehuanten hual quinnotzac, Dios quijtuc pampa yajmo quiपालoaया nindeno calica huil quinmotexpahuiliaya. Huan yehuanten hual yihual quijtuc pampa yajmo quiपालoaया nindeno calica yihual huil quinmotexpahuilisquiaya, yihual noje quijtuc pampa ajsisi quiyasi len cuali cualtichin hual quiपीा Cristo.

<sup>31</sup> Cuaquinon, ¿len tiquijtusi inahuac inon? Sinda Dios quilalic pa techpalehuís, amo unca amaqui hual huil tejtzacuilis pa camo ticpiasi in hual Dios quiपीा pa tehuanten.

<sup>32</sup> Yihual amo quitzacuilic pa camo miquisquiaya ixolol, in se san hual quiपीा. Pa timoxtin Dios quitemacac Jesucristo pa miquis pa tehuanten. Huan pampa tejchihuilic inon, neli unca da noje yihual techmacas mochi in cuali hual san yihual huil tejchihuilía. Unca jan quinami yihual techmaca Cristo pa techquixtis pin miquilisi ca capic techuicaya tolajlaculisli.

<sup>33</sup> Amo unca amaqui hual quinmotexpahuilis yehuanten hual Dios quinlajtultic pa yesi ixolomes, pampa unca Dios hual quijtúa pampa ca yehuanten yajmo unca nindeno hual huil quinmotexpahuilis se.

<sup>34</sup> Huan amo unca amaqui huil quijtus yehuanten quiyasi pa miquisi, pampa Cristo miquic, Dios quilalic pa quiपालoaया pa miquis pa yehuanten. Miquic Cristo pa camo miquisi yehuanten pampa sinda yoje miquije, amo huil cayalosquiaya capa unca Dios. Huan amo san inon. Noje monequi pa tiquijtusi quinami Cristo yulic oc seppa huan unca pin cielo (ilhuicac) ca Dios huan quiपीा hual yihual iyaxca. Huan yes yihual iyaxca pa huelitis pin cielo huan pan lalticpan jan quinami Dios. Huan axan nepa unca quilajlantica Dios pa techpuppuhuas mojmosta sinda ticchihualo lajlaculisli.

<sup>35</sup> ¿Len huil techpanus hual quitzacuilis Cristo pa yajmo techlasojlas? Nindeno. Cuajnesi tipanusi míac lacocoltisli hual amo huil tiquitasí quinami timonapatisi. Cuajnesi tipanusi lacocoltisli quiman techtojtocatihualasi pa tejchihuilisi míac amo cuali. Cuajnesi cayasi tonalijmes quiman ticpiasi niman míac mayandi o yajmo techcahuilis tzotzomajli. Cuajnesi cayasi tonalijmes quiman timoitalo tialo timiquilo. Cuajnesi techmijmictisi.

<sup>36</sup> Huan neli unca lajcuiluli pa iamal Dios ilajtol, pa in amal Salmos quinami neli tialo tipanulo lacocoltisli yoje, pampa quijtúa: Pampa tiunca toDios, techmictitate mochi in semilhuil, techitalo jan quinami ticataloaya borregos hual quinhuicatiahuiloaya pa quinmictilosquiaya.

<sup>37</sup> Huan mas que techpanúa mochi in amo cuali, ticsulahualo. Huan amo jan ticsulahualo san. Noje ticpiasi niman míac hual amo quiyasi yehuanten hual jan lasulahualo san. Unca pampa Dios techpalehuía niman míac. Huan mochi in cuali ticpialo pan ipampa Jesucristo hual techlasojlac.

<sup>38-39</sup> Inon niquijtúa pampa neli nicmati inon: Sinda timijmiquisi, inon amo quitzacuas Dios pa yajmo techlasojlas. Huan len yes techpanus quiman tuyulicate amo tejtzacuilis pa camo techlasojlas Dios. Huan in iyecames cuajcuali o amo cuajcuali, huan yehuanten hual huelitilo amo huil tejtzacuilisi Dios ilasojlalisli. Huan inon hual panujtica axan, huan inon hual

yahui panúa mosta, huan in huejueyenten amo cuajcuali, huan in ijyecames huejueyenten hual cate niman pa pani, huan yehuanten hual cate pin niman huejcalan, huan len yesi oc sequin hual Dios quinchíac amo quiman huil tejtzacuilis Dios ilasojlalisli pa camo techajsis. Huan techajsi pan ipampa Cristo Jesús toTata.

## 9

### *Dios quinlajtultic yehuanten in israelitos pa yesi ilacames*

<sup>1-2</sup> Nehual niunca se ilacal Cristo huan yoje niqijutitica len melahuac, amo nislacatijtica. Nolajmatilisli lajtitic nehual nechmachiltía neli pampa nilajtutica melahuac. Huan in Espíritu Santo nechilía pampa neli nilajtutica melahuac. Yoje niqijtúa nel nicpía míac laicnotilisli hual amo mocahua pa nechococ noyolo.

<sup>3</sup> Quema, ca jan nadita san, nehual huil nicnequisquiaya pa Dios quitusquiaya pampa nicpía pa nimiquis pa niyesquiaya laquixtili ilaixpan Cristo sinda pan ipampa inon nocnían judíos quipialosquiaya Dios iyulilisli hual ticpialo tehuanten hual ticneltocalo Cristo. Yehuanten in judíos cate nocnían pampa ticate imiahuimes se, huan pampín niqijtúa yoje.

<sup>4</sup> Yehuanten cate israelitos pampa cate imiahuimes totajzin Israel hual yulini pa yina. Dios quilalic pa yehuanten yelosquiaya quinami ixolomes pampa quinmolajtultilic. Quilalic pa yehuanten moxiluililosquiaya ilaixpelalisli cualtichin huan chicahuac. Quilalic pa yehuanten quinmanilisi in lajtomes calica quinnextiliaya quinami lachihualosquiaya yehuanten. Quinnextilic yehuanten pan inminpampa ilajtomes quinami monequi pa quimolancuacuetzilisi. Huan quinmilic yehuanten ilajtomes in cuali hual neli yahuiaya quinchihuili, jan quinami quijtuaya.

<sup>5</sup> Tehuanten in judíos noje ticpialo totajtzitzian huejué quinami Abraham huan Isaac huan Jacob huan in oc sequin. Huan Cristo lacatic se judío, yihual inminhué moxtin yehuanten, yihual Dios. Huan ma camo quiman lamican lajtucan hué inahuac yihual. Yoje ma ye.

<sup>6</sup> Ma yoje, amo moxtin in israelitos quineltocaje Dios ilajtol. Amo moxtin yehuanten hual imiahuimes Israel cate neli Dios ixolomes hual tiquintocay-altilo ilIsrael Dios.

<sup>7</sup> Huan yehuanten imiahuimes Abraham, quema, lacatijthualaje pejtataloaya ca yihual pa yina. Ma yoje, amo moxtin yehuanten quineltocaloaya Dios quinami Abraham quineltocani Dios. Huan pampín yehuanten amo imiahuimes pa inminyolo. Inon Dios ilajtol technextilía pampa quijtúa inon quiman yihual quilaquetzilijtataya Abraham huan quilic: “Niquinlajtultis momiahuil pan ipampa imiahuimes Isaac moxolol. Pan ipampa Isaac tiqipínias momiahuil.”

<sup>8</sup> Inon quinequi quijtúa pampa amo moxtin imiahuimes Abraham lacatije pa mochihuasi ixolomes Dios. San yehuanten hual lacatije huan quineltocaloaya inon hual Dios neli quijtúa, yehuanten mochihualoaya imiahuimes Abraham pa inminyolo. Yoje Dios quinmita, pampa quineltocaloaya ilajtol.

<sup>9</sup> Cataya yoje pampa inon unca hual Dios neli quilic Abraham, quil: “Pa oc se xihuil quiman monamiquis in tonali, cuaquín quipías Sara se xolol”, quil.

<sup>10</sup> Huan amo jan inon san. Quiman Rebeca noje yahuiaya quinlacatilti in omenten ixolomes totajzin Isaac, Dios quilic se lajtol melahuac.

<sup>11</sup> Monequi pa niqijtus quinami Dios quilic inon Rebeca quiman ayamo lacatije in ome xolomes, huan pampín ayamo quichihuaje len cuali huan len

amo cuali. Cataya pa yoje panusquiaya in quinami Dios quilalic. Quilalic pa quinlajtultis yehuanten hual yahuilooaya yelo ixolomes pan ipampa in lalajtultisli hual yihual niman pa yina quilalic.

12 Huan Dios san quinlajtultic in omenten xolomes pa yelosquiaya quinami yihual quinequiaya, pampa quilic Rebeca, quil: “In hual quipehualtis inminlacatilisli yehuanten quitequipanuilis in oc se hual quitocas lacatis”, quil.

13 Huan inon unca jan quinami unca ilajtol Dios lajcuiluli, pampa noje quijtúa: “Jacob niclasojlac huan Esaú amo niclasojlac.” Yoje inon technextilía quinami unca jan Dios iyaxca san pa quinlajtultis sequin pa yesi ixolomes, huan unca jan Dios iyaxca san amo quinlajtultis oc sequin pa yesi ixolomes. Huan amo quipía pa quinlajtultis pampa quichihualo yehuanten len hual quipaquiltía Dios.

14 Cuaquinon, ¿len tiquijtusi? ¿Tiquijtusi Dios amo quimati quichihuilía se jan quinami quichihuilía oc se? ¡Ma camo quiman quijtu inon amaqui!

15 Dios quimati cuali quichihuilía se quinami oc se, pampa yihual amo quiman mochua pa quichías quinami yihual quilic Moisés, quil: “Niquicnilis aqui yes nicnequi niquicnilía, huan nicpilis laicnililisli ca aqui yes nicnequi nicpilia laicnililisli”, quil.

16 Yoje, se amo cana in cuali hual san Dios huil quichihuilía jan pampa in se quilalía pa canas. Huan amo cana pampa in se quitequipanuilis chichahuac ca mochi ichichualisli pa canas. No, jan yihual cana inon pampa Dios quilalía pa quicnilis in se.

17 Dios ilajtol technextilía inon pan ipampa inon hual unca lajcuiluli inahuac Faraón ihué Egipto. Quijtúa, quil: “Pampa jan inon san nimitzlalic pa tiyes ihué Egipto nican, pa yoje nicnextilis nolahuellitilisli pan ipampa quinami ticlaliaya pa camo ticnequis tichcaquis. Inon nicchia pa yoje lajtusi hué nonahuac nehual pa mochi in lalticpan”, quil.

18 Yoje, aqui yes Dios quinequi quicnilía, yihual quicnilía. Huan aqui yes quinequi quichihuilía pa camo quinequis quicaquis, cuaquín yoje quichihuilía.

19 Axan, cuajnesi se nechilis, quil: “Huan ¿leca techmotexpahuilijtia Dios tehuanten? Amo unca amaqui huil quitzacuilis pa camo quichías len yihual quinequi”, quil.

20 ¡Huan tehual, local! ¿Quinami tel amo timomajtia pa ticnanquilis yoje Dios? Tiunca quinami se tapalcal hual quilisquiaya yihual hual quipantía, quil: “¿Leca tijchijtica yoje?”, quil.

21 O ¿tiquijtúa amo iyaxca se tapalquero pa canas in lali layamanili huan ca in quichías quipantitica se tapalcal cualtichin pa quipilis len quinequi huan pa quilalis capa moxtin huil quitalo quinami unca cualtichin? O ¿ca in lali quichías se tapalcal amo cualtichin pa quipilis len quinequi, se tapalcal hual amaqui quinequi quita?

22 Jan yoje, unca Dios iyaxca noje pa quichías quinami quinequi ca lacames. Unca iyaxca pa quichías sinda quinequi lanextilía icualanilisli ca in amo cuali hual quichihualo lacames huan sinda quinequi quinnextilía ilahuellitilisli. Amo unca moyaxca pa quinanquilis sinda quinequi quichía yoje. Dios motzacuilic míac xixihuimes pa camo quintilanis pa polehuilisli yehuanten hual cate lachijchihuali pa polehuilisli hual amo quiman lamis. Huan quiman motzacuilic míac xixil pa camo quichías inon, cuaquín quintilanic pa yesi lacocoltili pampa yajmo quitzacuaya icualanilisli.

23 Noje unca iyaxca Dios pa quinlamachiltis lacames quinami quipía niman míac pa quinmacas yehuanten hual quinequi quinmicnilía. Yehuanten cate hual aquinojen yihual quinlajtultic quiman ayamo quichíac in lalticpan. Quinchijchihuilic pa quipiasi ca yihual yulilislí hual amo quiman lamis pin laixpelalislí cualtichin.

24 Yehuanten cate hual quinnotzac pa yesi ixolomes, in quinequi quijtúa amo jan tehuanten san hual ticate judíos. Noje quinequi quijtúa lacames hual amo judíos.

25 Unca jan quinami quijtúa Osee ilajtuni Dios, quinami moijcuilúa pa Dios ilajtol, quijtúa, quil:  
Yehuanten hual amo yeje nolacames niquintocayaltis nolacames, huan in lacames hual amo niquinlasojlani, axan niquinlasojlas.

26 Huan jan nepa capa quinmilic, quil:  
“Amhuanten amo nolacames”, quil,  
axan nepa in lacames quintocayaltisi ixolomes in Dios hual yultica.  
Yoje quijtúa pa iamal Osee.

27 Huan Isaías, yihual Dios ilajtuni, quijtúa pa Dios ilajtol lajcuiluli, quil, unca quinami tzajtzi quijtutica in hual yahuiaya quipanu Israel, quil: “Mas que in israelitos cate niman míac pa yoje amo huil quinpuhuililo quinami amo huil quipuhuililo in xali pan xalipan nepa pa in atenco in al huejcalan, ma yoje jan sejsequin ca yehuanten yes laquixtili pin miquilislí ca capic quinhuica inminlajlaculislí.

28 In Tata amo huejcahuas pa quichías quinami yihual quijtuc pampa yahuiaya quichía pan lalticpan. Amo huejcahuas pa quincocoltis in israelitos, quinami neli quijtuc.”

29 Huan san quinami quijtuc Isaías ca oc se lajtol quiman ayamo panuc, quil:  
In Tata unca hual huelitía pan mochi pin cielo huan pan lalticpan, huan sinda amo techcahuiliaya sequin tomiahuimes,  
cuaquinon timochihualoaya timoxtin quinami moxtin pin caltilan itoca Sodoma, jan ajnaxcan catanijme lamictili.  
Quema, timochihualoaya quinami yehuanten pin caltilan itoca Gomorra, ticataloaya lamictili timoxtin quinami yehuanten.

### *In judíos amo quitalo in lamachiltislí cuali*

30 Cuaquinon, ¿len huil tiquiqtulo inahuc in lajtol? Inon tiquiqtulo: In lacames hual amo judíos amo motoliniloaya pa mochihualosquiaya lacames hual Dios quinmitasquiaya lacames amo laijlaculi. Ma yoje Dios quijtuc pampa yehuanten yajmo cate laijlaculi, huan inon unca pampa quineltoacaje ilajtol.

31 Amo cataya yoje ca in míac israelitos, in judíos. Motoliniloaya niman míac pa mochihualosquiaya lacames hual Dios quinmita lachipahuali pa camo quipiasi laijlaculislí. Motoliniloaya pa mochihualosquiayao yoje pampa quineltoaloaya in lajtol hual Dios quilib Moisés pa quiqcuilus. Ma yoje, amo ajsije quichihuaje len quijtúa in lajtol, huan yoje amo mochihualoaya lacames hual Dios quinmitaya lachipahuali, amo quipixticate laijlaculislí.

32 Huan ¿leca? Cataya pampa amo quilaliloaya inminlaneltoalislí ca ilajtol Jesucristo pa yojque Dios quinmitasquiaya amo quipixtataloaya inminlajlaculislí pan ipampa inon. Jan motoliniloaya chichahuac pa mochihualosquiaya lacames amo laijlaculi pan ipampa quinami quichihualoaya len quijtúa in lajtol hual Dios quilib Moisés. Huan yoje cualanilo sinda se quinmilía quinami mochihualo lacames amo laijlaculi pan ipampa Cristo



imiquilisli. Amo quinequilo quineltoalo, cate jan quinami se hual cualani sinda momañajtía pan se tixcali huan huetzi, amo ajsi ca capic quinequi yahui.

<sup>33</sup> Huan inon unca lajcuiluli pa Dios ilajtol, quijtúa, quil:

Xiquita, niclalijtica se lalac capa cate nolacames pa Sión, se hual amo quinequisi quicaquisi.

Cayas quinami se tixcali hual quinmomañajtías huan quinhuetziltis huan yojque amo ajsisi ca capic quinequilo yalo.

Ma yoje, aquí hual quilalía ilaneltoalisli ca yihual amo quiman moitas lacaujcuamanali pampa quineltoac.

## 10

<sup>1</sup> Nocnían, nicnequi ca mochi noyolo pa yehuanten in judíos yesi laquixtili pin polehuilisli. Huan niclajlanía Dios pa yihual quinquixtilis pin polehuilisli.

<sup>2</sup> Annimitzilía neli pampa nicmati quinami yehuanten quichihualo ca mochi inminyolo in hual lajtic yehuanten quijtulo pampa yoje quitequipanuilijticate Dios. Ma yoje, quichihualo mochi inon amo quineltoacicate in hual Dios ilajtol quinmaxtía quinami se ajsi quiximati Dios.

<sup>3</sup> Yoje, amo quinequiloaya quimatilo quinami se mochías pa yoje Dios quitas quinami se hual amo quipía iyolo laijlaculi. San quitemuloaya quinami huil ajsisi yesi ca inminyolo amo laijlaculi quinami jan yehuanten san quinequiloaya, amo quinami Dios quinequi. Amo quinequiloaya quineltoalo inon hual Dios quilalic, inon calica se ajsis quipías iyolo amo laijlaculi ilaixpan Dios.

<sup>4</sup> Pampín, moixpoluje pan ipampa quinami quineltoalo in lajtol hual Dios quilic Moisés pa quijcuilus. In lajtol Dios quilalic san pa quinlaicanasquiaya lacames pa quineltoacasi Cristo. Yoje Dios quinmita amo laijlaculi moxtin hual quilalilo inminlaneltoalisli ca yihual Cristo.

<sup>5</sup> Moisés quijcuiluc in lajtol hual quijtuc quinami se huil quipía iyolo amo laijlaculi, quijcuiluc, quil: “Se hual quichía len quijtúa in lajtol, yihual yulis ca Dios pan ipampa inon.”

<sup>6</sup> Ma yoje, pa huil quipías iyolo amo laijlaculi pan ipampa quinami quilalía ilaneltoalisli ca Cristo, Dios ilajtol quijtúa, quil: “Amo xiquijtu lajtic moyolo pampa amo huil tilejcúa pin cielo.” In quinequi quijtúa, tilejcúa pa ticualicas Cristo pa temuán (temuayan) pa mitzquixtilis molaijlaculisli. Amo monequi pa panus inon, pampa axan hualac Cristo pan lalticpan.

<sup>7</sup> Huan ilajtol Dios noje quijtúa, quil: “Amo xiquijtu lajtic moyolo pampa amo huil timochipahuilía moyolo pa yajmo cayas laijlaculi pampa amo huil titemúa pin coyunquil niman huejcalan, nepa capa cate yehuanten hual miquije.” Quinequi quijtúa, titemúa pa ticualicas Cristo pa pani. Amo monequi ticchía inon pampa axan moquetzac Cristo, yajmo unca capa in mijquimes.

<sup>8</sup> No, axcan Dios ilajtol techilía len monequi ticchía pa timochías lachipahuali pa moyolo laijlaculi, quijtúa, quil: “Dios ilamaxtilisli huil mitzpalehuía pampa unca ca tehual. Axan tijcaquic huan huil ticpuhua huan huil tiquijnami quía inon lajtic pa moyolo.” Inon unca in lamaxtilisli hual quinxtilía se quinami quilalía ilaneltoalisli ca Dios ilajtol. Inon unca in lamaxtilisli hual ticlamachilito:

<sup>9</sup> Sinda tiquijtúa inminlaxpan lacames pampa in Tata Jesúcristo quipía mochi lahuelilitilisli pin cielo huan pan lalticpan, huan sinda ticneltoaca



lajtic pa moyolo pampa Dios quiyuliltic oc sejpa quiman miquic huan yoje techmachiltia pampa Jesús unca iXolol ca mochi in lahueliltilisli, cuaquinon ticayas laquixtili pin ipolehuilisli Dios icualanilisli.

10 Monequi pa ticchías yoje, pampa ca iyolo se quineltocha huan yoje unca lachipahuali iyolo laijlaculi. Huan ca icamac se quijtua inminlaixpan lacames in hual quineltocha huan yoje unca laquixtili pin ipolehuilisli Dios icualanilisli.

11 Unca yoje, pampa Dios ilajtol lajcuiluli quijtúa, quil: “Aqui hual quilalía ilaneltochalisli ca yihual, Dios canas quinami ixolol huan yihual amo moitas lacaujcuamanali iyampa Dios.”

12 Huan Dios ilajtol nican quinmilía inon moxtin, pampa Dios quinchipahuilía inminlajlaculisli yehuanten hual amo judíos jan quinami quinchipahuilía in judíos, pampa yihual in se Tata pa moxtin. Quipía miac cuali pa quinchihuilis moxtin hual quitemachilo.

13 Quijtúa Dios ilajtol, quil: “Moxtin hual quitzajtzilisi Dios pan ipampa itoca yesi layuliltili huan amo quitasi Dios icualanilisli.”

14 Ma yoje, amo huil quitzajtzilisi yihual sinda amo quilalije inminlaneltochalisli ca yihual. Huan amo huil quilalisi inminlaneltochalisli ca yihual in Tata Jesucristo sinda amo quimatije quinami miquic pa yehuanten. Huan amo huil quimatilo inon sinda amo unca se hual quinlamachiltis.

15 Huan amaqui huil quinlamachiltis sinda amo quitilanisi ca capic cate pa quinlamachiltis. Huan quintilanilije yehuanten pa quinlamachiltisi, jan quinami unca lajcuiluli. Quijtúa, quil: “¡Quinami unca niman cualtichin pani in lomas (tepemes) pampa quilamachiltitihualo in lamachiltilisli cuali! Inon techmaca mosehuilisli ca Dios pa toyolo.”

16 Ma yoje, jan sequin naditas quineltochaje in lamachiltilisli cuali, mas que cataya pa moxtin quicaquilosquiaya. Pa Dios iamal, ilajtuni Isaías quijtuc, quil: “Tata, jan sequin naditas san quineltochajque molamachiltilisli hual tiqinmilijque.”

17 Axan, se lalac huil quilalía ilaneltochalisli ca se lajtol quiman quicaqui, huan huil quicaqui in lajtol quiman quililo ilajtol Cristo hual yihual quinmilitic pa quililosquiaya.

18 Axan, nilajlanía, ¿amo quiman quicaquije in judíos? ¡Jo quema, neli quicaquije! Dios ilajtol lajcuiluli pa yina quijtúa, quil:

Pa mochi in lalticpan mocaquic ixahuanilisli inminlanahuatilisli. Quema, mocaquic inminlanahuatilisli pa itenco niman huejca pin lalticpan capa cate lacames.

19 Axan, nilajlanía, ¿amo quimatije yehuanten in israelitos, in judíos, quinami Dios yahuiaya quichihuili cuali oc sequin lacames? Quema, pampa Moisés pehuac quinmilitic in lamachiltilisli hual Dios quinmilitic yehuanten in israelitos, quil:

Nehual annimijchahuatiltis pan inminpampa lacames hual anquinixxicus. Annimitzcualantis pan inminpampa lacames hual amhuanten anquijtúa da amo huil quimatilo nindeno quinami unca Dios.

20 Huan Isaías amo momajtic quijtuc in hual Dios quilitic pampa yahuiaya quinchihuili yehuanten hual amo judíos, quil:

Nechitajque yehuanten hual amo nechtemujtataloaya. Nimonextilic ca lacames hual amo quilajlanijque pa nimochías inminDios.

21 Ma yoje, quiman quijtúa quinami lachihualo in israelitos, quijtúa, quil:

Mojmosta, sejemilhuil niqinixlanía nomajmajuan pa niqinnotzas pa hualasi ca nehual lacames hual amo quinequilo nechneltochalo huan lacuilmatilo pa camo quitocasqui no'ojli.

## 11

*Nican quijcuilúa quinami Dios quinmita in judíos*

<sup>1</sup> Axan, nilajlanía, ¿da Dios cuajnesi quijjutica ilacames Israel, in judíos, yajmo cate iyaxca? ¿Axan quintojpehuac pa yajmo yesi iyaxca? ¡Ma como quiman quijtu inon amaqui! Xiquitacan. Nehual noje niunca judío, niunca se imiahuil Abraham pan ipampa ixohuiyo Benjamín.

<sup>2</sup> No, Dios amo quitojpehuac pa yajmo yesi iyaxca ilacames hual yihual quinlajtultic niman pa yina. ¿Amo anquimati len Dios ilajtol techpuhuilía quiman Elías, hual yec ilajtuni Dios pa yina, motexpahuiaya ca Dios pampa yehuanten in israelitos quinequiloaya quimictilo? Quilic:

<sup>3</sup> “Tata, quinmictijque molajtunijmes huan quinxitinijque innojen capa quinlalilo inminpan inminhuendis pa mijchichinulilosquiaya. Huan jan nehual san nimocahua nohuán, nehual san nimitzneltoca, huan nechtemutjicate pa nechmictisqui.”

<sup>4</sup> Huan ¿quinami quinanquilic Dios? Quinanquilic, quil: “Cate chicome mil lacames hual nimocahuilic nehual, huan yehuanten amo quiman quimolan-cuacuetzilijque in mono Baal.”

<sup>5</sup> Yoje, axan cate sequin judíos noje hual quineltocalo Dios ilajtol, Dios quinlajtultic pan ipampa ilachihualisli cuali.

<sup>6</sup> Huan sinda quinlajtultic pan ipampa yihual ilachihualisli cuali, cuaquín yajmo huil quijtulo pampa Dios quinlajtultic pan ipampa len yehuanten cuajnesi quichihuae pa yoje Dios quinequisquiaya quinlajtulti. Sinda quinlajultiaya quinami yojque, cuaquinon in cuali hual san Dios huil quinchihuilía cataya laxlahuilisli.

<sup>7</sup> Axcan, ¿len huil tiqijtulo inahuac inon? Inon hual in israelitos quitejtemuje huan motolinije pa quipialosquiaya hual san Dios huil quimacasquiaya, inon amo canaje. Ma yoje, in israelitos hual Dios quinlajtultic, quema, canaje. Huan moxtin in oc sequin israelitos Dios quintzacuilic pa como quimatilosquiaya len quinequiaya quijtu ilajtol.

<sup>8</sup> Panuc ca yehuanten jan quinami unca lajcuiluli pa Dios ilajtol, quil: “Dios quinmacac inminyolo hual amo quimati. Yoje quinxitinic pa como huil mochihuasi ilacames. Cate quinami amo huil lachialo ca inmixtololojmes huan amo huil lacaquilo ca innacajmes. Yoje mocahualo axan quinami cataloaya pa yina.”

<sup>9</sup> Huan David pa yina quijtúa ca Dios ilajtol, quil:

Quilalijque inminlaneltocalisli ca quinami quichihuaeque quinami quijtúa in lajtol hual Dios quinmacac pa yina huan yojque pa inminyolo quijtulo mochi unca cuali ca yehuanten.

Cate quinami lacames hual molalijticate pan capa unca lacualisli, quijtulo mochi yahui cuali. Ma yoje, moixpolulo.

Pampín ma quinmajsitiquisa ilacocoltilisli Dios hual yoje monequiaya quinmajsí.

Ma quinmajsí quinami quipanúa se yulijquil hual unca laquitzquilic ca se laquitzquiloni.

<sup>10</sup> Ma yén (yecan) latzacuali pa como quimatisqui quinami moixpolujque, pampa amo quimatiloaya in hual quinequi quijtúa Dios ilamaxtilisli. Huan ma siahuican inmincotes ca lamamanijquimes huejué.

*Quinami Dios quinquixtía pin polehuilic yehuanten hual amo judíos*

<sup>11</sup> Quipoluloaya in judíos Dios iojli pampa quintzacuiliaya inminlaij-laculisli, unca quinami momañajtiloaya. Axan, nilajlanía, ¿pampa inon mocahuasi laxiluli pa como quiman huil mocuepasi pa Dios? ¡Ma como quiman

quijtu inon amaqui! Ma yoje, pampa moxiluloaya pa yajmo cayalosquiaya pan Dios iojli, yoje yehuanten hual amo judíos cate canticate Dios iojli. Huan inon quinchahuatiltis in judíos pa quinequisi canasi iojli Dios.

<sup>12</sup> Quema, amo quineltoaje Dios ilajtol in judíos, yoje quipoluje in miac hual Dios quinequiaya quinmaca. Huan yehuanten hual amo judíos canaló in miac hual Dios yahuiaya quinmaca in judíos. Ma yoje, ajsitihualalo tonalijmes capa in judíos cayasi lalalili oc sejsa ca Dios ilacames. Pa in tonali hual panus inon, cuaquinon neli moxtin Dios ilacames, yehuanten in judíos huan yehuanten hual amo judíos, canasi in niman miac cuali hual san Dios huil quimaca. Pa mochi innojen xixihuil hual pehuaje panuje pa yina huan panujtihualaloaya pa axan, tehuanten ilacames Dios ayamo ticanaje in miac cuali quinami tialo ticanalo.

<sup>13</sup> Ma yoje, inon annimitzilijtica amhuanten hual amo judíos. Unca neli Dios nechlalic pa nyesquiaya ilanahuatini ilajtol ca amhuanten hual amo judíos. Huan in notequipanulisli niquita quinami monotza niman miac.

<sup>14</sup> Pampa inon, cuajnesi niquinchahuatiltis nocnian in judíos, pa yoje quinequisi Dios ilatuchihualisli hual ticpialo tehuanten. Yoje huil niquinpalehuís sequin judíos pa quilalisi inminlaneltoyalisli ca Cristo.

<sup>15</sup> Inon nicnequi nicchá, pampa Dios quitojpehuac ilaixpan yihual pa yajmo quipialosquiaya ilachihualisli cuali. Huan yoje pampa inon yehuanten hual amo judíos huil canaló in cuali hual yihual quinchihuilía. Cuaquinon sinda Dios quinmanas in judíos oc sejsa pa quinlalis ca ilacames, cuaquinon yes quinami mijquimes pehualo yulilo oc sejsa.

<sup>16</sup> In judíos quixiluililo yihual Dios san ilajquito ilapehualtili in textli hual quichihualo ca in trigo hual pehualo quipixcalo. Quixiluililo quinami huendi. Dios quita in lajquito quinami iyaxca. Noje ca in lajco Dios quita quinami quimacaloaya in judíos mochi in textli pa yesquiaya iyaxca. Huan sinda Dios quita iyaxca yihual ilalhuayol se cuahuil, cuaquín iitzmolinquimes (iramas) cate iyaxca. Huan jan yoje ca in judíos. Sinda Dios quinmita quinami ilacames iyaxca in judíos hual yeje inminlapehualtilisli yehuanten hual quineltoaje Cristo, cuaquinon quinmita moxtin in judíos quinami ilacames iyaxca.

<sup>17</sup> Huil tiquijtulo in judíos cate quinami se cuahuil hual laqui olivos pa se cuajmili. Sequin iitzmolinquimes (iramas) cataloaya lacotonali. Huan tehual hual amo judío, ma tiquijtucan tehual tiquinami iitzmolinquil (irama) se cuahuil hual laqui iolivo in cuajlan huan mitzaniltije pa iitzmolinquimes (iramas) in olivo pin cuajmili. Yoje ca yehuanten ticpixtica molajco iayo chahuac ichoquis in cuahuil pin cuajmili hual laqui olivo.

<sup>18</sup> Ma yoje, amo xiquinxijxicu in itzmolinquimes (ramas) hual cataloaya lacotonali, nicnequi niqijtúa, amo xiquinxijxicu in judíos hual amo quineltoalo. Quema, sinda tilajtúa hué monahuac tehual, ma yoje, xiquijnamiqui amo unca tehual hual ticpalehuía in lalhuayol, unca in lalhuayol hual mitzpalehuía. In quinequi quijtúa Dios iicnililisli mitzajsic tehual pan ipampa Abraham huan imiahumes.

<sup>19</sup> Cuaquinon cuajnesi tiquijtus: “Sequin itzmolinquimes (ramas) cataloaya lacotonali pa yoje nyesquiaya la'aniltili.” Quinequi quijtúa sequin judíos cataloaya laquixtili pa ilaixpan Dios pa yoje tyesquiaya lalalili nepa.

<sup>20</sup> Quema, nimitzilía, huan amo unca jan yoje san. Cataya pampa yehuanten amo quineltoaje inon quinami Dios quinquixtilía inminlajlaculisli pan ipampa Cristo. Pampin mocahualo quinami itzmolinquimes (ramas) laco-

tonali. Huan tehual ticneltocac huan pampín tiunca ca Dios mitzicnilijtica, tiunca quinami itzmolinquil (rama) la'aniltili. Yoje, amo ximoixtoca pampa inon. Yes cuali pa timomajtis.

<sup>21</sup> Unca pampa sinda Dios amo quitac cuali pa quinpixtiahuisquiaya in judíos ca ilacames capa cataya inminyaxca pa yesi quinami iitzmolinquil (irama) se cuahuil olivo hual cataya latocali pin cuajmili, cuaquín Dios amo quitas cuali mitzpixtías ca ilacames sinda yajmo ticneltocatías tehual hual tiunca quinami irama se cuahuil hual laqui olivos pa cuajlan.

<sup>22</sup> Xiquita, axcan, quinami Dios quinchihuilía sequin cuali huan ca oc sequin quinchihuilía amo ca iicnilitisli. Ca yehuanten hual yajmo quinequije quineltoctaije, yihual amo quinnicnilic. Huan ca tehual mijchihuilis cuali sinda tiyultías ticneltocatías. Yihual mitzpiá pan ipampa in cuali hual san yihual huil mijchihuilía. Sinda yajmo ticneltoca inon, cuaquinon tehual noje mitzquixtis Dios pa camo ticayas ca ilacames quinami amo cayasi innojen itzmolinquimes (ramas) lacotonali ca in cuahuil.

<sup>23</sup> Huan innojen oc sequin, in judíos, sinda yajmo yultiasi amo quineltocticate, huan pehuasi quineltoctasi, cuaquinon cayasi lalalili oc sejpa ca Dios ilacames, quinami se itzmolinquil (rama) la'aniltili oc sejpa pan se cuahuil. Dios quipía lahuelilitisli pa quilalilis oc sejpa ca ilacames.

<sup>24</sup> Huan Dios, quema, quinlalis oc sejpa, pampa sinda tehual mitzalic ca ilacames, cuaquinon ¡quinami amo quixtocas míac quinlalis in judíos oc sejpa ca ilacames! Inon unca pampa tehual tiquinami iitzmolinquil (irama) se cuahuil olivo pa cuajlan hual cataya lalalili pan se cuahuil olivo pin cuajmili. Yehuanten in judíos cate quinami iitzmolinquimes (iramas) in cuahuil olivo pin cuajmili, pampa yehuanten cataloaya ilapehualtilisli Dios ilacames. Huan neli amo unca tequipanulisli hué pa se caniltis oc sejpa iitzmolinquil (irama) se icuahuil olivo in cuajmili pan icuahuil in cuajmili capa quicotonilije, pampa quipialo míac lahuelilitisli pa moanilisli.

### *In judíos quema, mocuepasi ca Dios*

<sup>25</sup> Pampín, nocnían, nicnequi pa neli anquimatis inon, pa camo anquimatiltis pampa amhuanten anquipía míac lajmatilisli, anquijtutica Dios yajmo quipía nindeno pa quitas ca in judíos. Unca pampa Dios axan quilamachiltitica len inminahuac in judíos hual ayamo ticmatije, huan unca inon: In niman míac judíos mocahualo amo quinecticate quimatilo len quinequi quijtúa Dios ilajtol hual quilamachiltía quinami Cristo techquixtía pin polehuilisli. Yoje mocajtcate axan. Ma yoje, ajsis se tonali hual moxtin yehuanten hual amo judíos hual Dios quinlajtultic pa mochihuasi iyaxca lamasi ajsisi quineltoctasi Cristo.

<sup>26</sup> Huan cuaquinon, mochi Israel, hual quinequi quijtúa mochi in judíos, yesi laquixtili pin polehuilisli, quilalisi inminlaneltoctalisli ca Cristo. Yoje panus jan quinami unca lajcuiluli pa Dios ilajtol, quil:

Nesis ca Israel capa chantilo pin Sión, se hual quinquixtis pa inminpolehuilisli.

Yihual quinquixtilis in amo cuali moxtin ilacames Jacob, pa yoje quinequisi quineltoctasi Dios.

<sup>27</sup> Huan pa in tonali hual niquinquixtilis inminlajlaculisli pan ipampa in lalal, cuaquinon ca inon nilaquisac nicchíac in lajtulisli hual nicchíac ca yehuanten.

Yoje quijtúa ilajtol Dios pa yina.

<sup>28</sup> Sinda tiquinmitalo ilacames Israel yoje quinami amo quinequilo quineltoctalo Dios ilamachiltisli cuali, cuaquinon tiquiqtulo yehuanten quilalije pa

como quixtocasi Dios. Huan pampa amo quixtocaje ilamachiltisli cuali, yoje inon cataya cuali pa amhuanten, pampa Dios anmitzítac amhuanten in amo judíos ca iicnilisli. Huan sinda tiquinmitalo ilacames Israel quinami yehuanten hual Dios quinlajtultic quiman ayamo anmitzljajtultic, cuaquinon tiqijtulo yehuanten Dios ilacames hual yihual quinlasojla niman míac pampa yoje quinmilic quiman quichíac in lajtulisli ca inmintajtz-itzían pa yina.

<sup>29</sup> Dios amo quiman mocahuac pa quinlasojlas in judíos, pampa amo quiman mopatílía len quilía, amo quiquixtilía se in hual quimacac. Huan sinda quinoza se pa yes se ca yihual ilacames, cuaquinon in se amo quiman mocahua pa yes se ca ilacames.

<sup>30</sup> Yoje pa yina amo anquineltoçaya Dios. Axan Dios anmitzicnilijtica huan anmitzpujpujtica pampa yehuanten in judíos amo quineltoçaticate.

<sup>31</sup> Axan amo quineltoçaticate Dios pampa Dios anmitzicnilic amhuanten. Huan quiman in judíos ajsici quimatisi inon, cuaquinon yehuanten noje quinequisi pa Dios quinmicnilis.

<sup>32</sup> Unca yoje pampa Dios quincajcahuac moxtin lacames pa huil quichi-huasi quinami quinequilo, amo quineltoçaticate. Inon quinchihuilic pa yoje huil quinmicnilisquiaya moxtin, amo monotza sinda yehuanten judíos o amo judíos.

<sup>33</sup> Ah, ¡quichi míac, amo quiman lami in cuali hual Dios quinchihuilía lacames! ¡Amo quiman lami ilahueliltisli huan ilajmatilisli pa quichías mochi niman cuali, huan yihual quimati mochi! Lacames amo huil lajlanilo pa quimatisi len quinequi quijtúa mochi hual quichía huan leca yihual yoje quilalía pa quichías mochi hual quichía. Huan amo huil quimatilo quichi míac ojlimes calica yihual quinchihualtía lacames inon hual yihual quilalic pa mochías.

<sup>34</sup> Quema, “amo unca amaqui hual quimatic len Dios quijnamiquía huan amo unca amaqui hual huil quilía quinami monequi pa Dios quichías len.

<sup>35</sup> Huan amo unca amaqui hual pehuac quimacac Dios len pa huil quijtus pampa unca iyaxca pa quijtus pampa Dios quipía pa quilaxlahuis pa inon.”

<sup>36</sup> Unca pampa mochi hual unca hualac pejtataya capa unca Dios. Pan ipampa yihual mochi yec lachihuali jan quinami yihual quinequic. Huan pa yihual unca mochi in hual yec lachihuali, pampa yihual quilalic pa yoje yesquiaya. Pampín ¡ma como quiman mocahuacan moxtin pa quimacasi míac lasojlalisli niman hué! Yoje ma ye.

## 12

### *Monequi pa tiyulisi jan pa Dios san*

<sup>1</sup> Yoje, nocnían, pampa Dios techicnilía niman míac, annimitzilía ca noyolo, ximotemacacan Dios amhuanten jan quinami huendi yultica huan niman chipahuac, hual Dios quinequi cana ca lasojlalisli. Se huendi quinami inon quimaca Dios paquilisli. Huan yoje anquimatis pampa anquimolancuacuetzilía Dios ca anmoyolo huan anmolajjnamiquilisli.

<sup>2</sup> Huan ximocahuacan pa como anquinequis anyulis quinami yulilo amo cuali yehuanten hual jan quijnamiquilo in hual yes pa yehuanten pin lalticpan. Anmochihuilis cuali anmopalatica quinami anyuli pa yoje anyulis quinami Dios quinequi. Huan anquipalas quinami anlajjnamiquía. Yoje anajsis anquimatis quinami Dios quinequi pa tiyesi huan quinami quinequi pa ticchihuasi. Huan yoje anquimatis anquichías in hual yes cuali huan in

hual quimaca paquilisli Dios huan in hual techajxiltía capa ticpiasi mochi hual unca cuali pa tehuanten.

<sup>3</sup> Quiman nechnotzac Dios pa niyes ilanahuatini, nejchihuilic míac cuali hual san yihual huil quichihuilía se. Pampa inon, niquilía sejse ca amhuanten pa camo quijtus laijtíc iyolo yihual unca hué sinda amo unca yoje hué. Monequí pa quijtus laijtíc yihual iyolo jan melahuac, jan quinami quijtúa melahuac laijtíc iyolo quinami oc sequin cate. Inon ma quichihua mochi sejse ca amhuanten quinami Dios quilamachihuilic lahuelilitlisli pa quineltocas in hual quijtúa ilajtol.

<sup>4</sup> Monequí pa camo tiquijtus pa toyolo pampa ticate hué. Unca pampa pa se icuerpo quinpía icxían huan imajma huan inacas huan iixtololon, huan sejse ca innojen motequipanúa amo jan yoje quinami motequipanulo in oc sequin.

<sup>5</sup> Huan jan yoje tehuanten timoxtin timochihualo quinami se cuerpo san pa Cristo, pampa mochi sejse ca tehuanten ticate quinami laipili ca yihual pa tipesi quinami se cuerpo san ca yihual. Huan quinami innojen pa se icuerpo molinilo, se quipalejtica oc se, yoje ticchihualo.

<sup>6</sup> Tehuanten ticpialo lahuelilitlisli hual in Espíritu techmaca, huan se quipía ilahuelilitlisli hual amo unca yoje quinami unca ilahuelilitlisli oc se. Inon unca pampa Dios tejchihuilía cuali hual san yihual huil tejchihuilía, yoje pan se tonali, yoje pan oc se tonali. Quema, tejchihuilía quiman ticlalilo tolanellocalisli ca Cristo. Pampa yihual techueliltía, cuaquín ma titequipanucan cuali ca inon calica techueliltía. Sinda in Espíritu techmacac lahuelilitlisli pa tiquijtus len ilajtol Dios hual yihual techmacac jan axcan, ma tiquijtucan yoje quinami quijtuaya Dios ilamaxtilisli.

<sup>7</sup> Sinda techueliltía in Espíritu pa tiquintequipanullisli Dios ilacames, ma tiquintequipanullisli cuali. Sinda in Espíritu quimacac se in lahuelilitlisli pa lamaxtis, ma quimaxti Dios ilamaxtilisli.

<sup>8</sup> Sinda quimacac se in lahuelilitlisli pa quimaca chichahualisli Dios ilacames pa yulisi yoje quinami quijtúa Dios ilamaxtilisli, ma quichía. Sinda quimacac lahuelilitlisli pa quinxiluilis pa oc sequin len quipía hual iyaxca, ma quinchihuilí amo quinami se tzutzucal, amo quichixtica pa quicuepilisli o pa yehuanten quitasi quinami se hué. Sinda quimacac lahuelilitlisli pa yes laicanani pa Dios ilacames, ma quichía ca mochi iyolo. Sinda quimacac lahuelilitlisli pa quinpalehuis yehuanten hual amo quipialo nindeno, ma quichía ca mochi iyolo.

*Monequí pa quichías inon se hual quipía Dios iyulilislí yancuic laijtíc yihual*

<sup>9</sup> Xiquinlasojlacan melahuac oc sequin, amo san ximonextican quinami anquinlasojla. Xictemucan quinami anmotzacuilis pa camo anquinchihuilis oc sequin len amo unca cuali. Huan ca mochi anmochichahualisli, ximotolinican pa anquinchihuilis in hual unca cuali huan in hual quinpalehuis moxtin.

<sup>10</sup> Amhuanten Dios ilacames. Pampín ximolasojlacan se huan oc se ca anmoyolo, jan quinami lacames inmicnían molasojlalo. Mochi sejse ca amhuanten ma caya mochi in tonalijmes ca niman míac lasojlalisli pa oc sequin. Amo xictemucan pa oc sequin anmitzlasojlalo yoje.

<sup>11</sup> Amo quiman xilatzejtican. Xicaya anquichijtica len yes Dios quinequí. Ximochihualtican míac quiman anquitequipanullijtica in Tata.

<sup>12</sup> Xicpiacan paquilisli pampa anquimati neli anmitzajsis in niman cuali hual anquichixtica pa Dios anmitzmacas. Ximopepenialtican in amo cuali

hual anmijchihuililo yehuanten hual amo quineltocalo Cristo. Amo ximocahuacan pa anyulis anquilajlantica Dios.

<sup>13</sup> Sinda amo quipialo míac Dios ilacames, cuaquín xiquitacan inon quinami amhuanten ancataya hual amo anquipiaya míac huan xiquinpalehuican anquinmacatica in hual amo quipialo. Xiquinnamiquican quinami anmocnían yehuanten hual amo lacatije pa anmolali hual amo quipialo capa chantisi huan amo quipialo len quicuasi.

<sup>14</sup> Xiclajanican Dios pa quinchihuilis cuali yehuanten hual anmitztojtocalo pa anmijchihuilisi amo cuali. Amo xiclajanican pa Dios quinchihuilis amo cuali yehuanten, anquincocolijtica ca lajtomes amo cuaqcuali huan hijchicahuac.

<sup>15</sup> Xiquinnexsilican oc sequin hual quipixticate paquilisli quinami amhuanten noje anquipía paquilisli pampa yehuanten quipialo paquilisli. Huan sinda oc sequin quincoculo inminyolo, cuaquinon ma anmitzcocu anmoyolo amhuanten noje ca yehuanten.

<sup>16</sup> Huan mochi tonalijmes capa anuncia amhuanten ma caya se laijnamiquilisli se ca oc se. Amo xictemucan quinami anmochías huejueyenten. Yes cuali pa anmomacahuiltis pa ancayas quinami yehuanten hual moitalo tijtipichin. Amo ximomatiltican, amo ximoitacan quinami lacames ca niman míac lajmatilisli.

<sup>17</sup> Amo quiman xijcuepilican amaqui amo cuali sinda anmijchihuilic amo cuali. Xilajnamiquican pa yoje mochi hual anquichías yes cuali hual moxtin quitasi quinami unca cuali.

<sup>18</sup> Huan sinda huil, cuaquinon xicayacan ca mosehuilisli pa anmoyolo ca moxtin, yoje quinami anmitzajsi pa ancayas, yoje quinami anquipía lahuelilitisli pa anquichías inon.

<sup>19</sup> Lasojli nocnían, amo xiquincuepilican yehuanten hual anmijchihuililo amo cuali. Monequi pa anquimacahuiltis pa ajsis Dios icualanilisli inminpan, pampa yoje unca lajcuiluli Dios ilajtol, quil: “Jan nehual san unca noyaxca pa niquincuepilis, huan niquincuepilis, quijtúa in Tata.”

<sup>20</sup> Yes cuali pa anquichías quinami noje quijtúa: “Sinda mayantica yihual hual amo mitzixtoca, xicmaca len quicuas. Sinda amictica, cuaquín xicmaca len cunis, pampa sinda inon ticchihuilía, yoje ticchihuilis pa lalas ca pinahualisli, yes quinami ticmontutica ticahuandi pin se tapalcal pani itzontecon.”

<sup>21</sup> Amo xicmacahuiltican pa anmoyolo quipolus ichicahualisli pampa anmijchihuililo in hual amo cuali, huan amo ximomacahuiltican pa anmocualantis pa yoje anquinchihuilis amo cuali oc sequin. Xicchihuacan in hual cuali, huan yoje in amo cuali yajmo monotza len, pampa ca in cuali tiquinsulahua yehuanten hual anmijchihuililo amo cuali.

## 13

### *Dios ilacames quipialo pa quineltocasi yehuanten hual huelitilo*

<sup>1</sup> Ma quilali mochi sejse lajtic itzontecon pa quinneltocas yehuanten hual huelitilo, pampa jan Dios quimacac lahuelilitisli pa inon. Huan pa yehuanten hual huelitilo cataya yihual Dios hual quinlallic sejse itequipanulisli.

<sup>2</sup> Pampín, aqui hual quilalía pa ilajnamiquilisli pa como quineltocas in se hual quipía in lahuelilitisli, yoje yihual amo quineltocatica in hual Dios quilalic. Huan sinda lacames quilalisi pa como quineltocasi in hual Dios quilalic, cuaquinon pampa inon Dios quijtus yehuanten cayasi lacocoltili.



<sup>3</sup> Yoje, yehuanten hual yulilo quichijtcate in hual amo unca quinami quijtúa in lajtol momajtilo pampa yehuanten hual quipialo lahuelilitilisi huil latlanilo pa panusi lacocoltilisi. Ma yoje, amo momajtilo inminlaixpan yehuanten ca lahuelilitilisi in lacames huan sihuames hual yulilo quichijtcate len cuali. Axan, ¿ticnequi yulili amo timomajtica inminlaixpan yehuanten hual quipialo lahuelilitilisi? Cuaquín xicchía in hual unca cuali, huan inon yehuanten quixtocasi.

<sup>4</sup> Dios quinlalic pa huelitisi pa mitzpalehuisi pa ticpixtías in hual moyaxca huan pa mijchihuili cuali. Sinda ticchías in hual amo cuali, cuaquín monequi pa timomajtis, pampa neli unca inminyaxca pa quinmacasi je laxacualulisi. Yehuanten cate Dios itequipanujquimes pa quicocoltisi ca Dios ilahuelilitilisi aqui hual quichía amo cuali.

<sup>5</sup> Yoje, monequi pa se quilalis pa itzontecon inon pa quinneltocas, amo jan pampa Dios quinmacac lahuelilitilisi pa cajcajus pa yes lacocoltisi san. Noje monequi quichía yoje se pa yoje quipías se mosehuilisi pa ilajmatilisi pa iyolo calica quimati len unca cuali huan len amo unca cuali. Pan ipampa in lajmatilisi, yoje quimati se quinami Dios quinequi pa quinneltocas yehuanten hual quipialo lahuelilitilisi.

<sup>6</sup> Pampa inon noje anquilaxlahuía ilapixcalisi in tomin. Unca pampa yehuanten cate Dios itequipanujquimes. Tequipanulo huelitijtcate quinami Dios quinlalic pa quichihuasi.

<sup>7</sup> Xiquinmacacan moxtin in lacames hual quipialo lahuelilitilisi in hual anquinhuiquilía hual unca quinami quijtulo ilajtomes in lahuelilitilisi. Xiclaxlahuican ilapixcalisi tomin aqui hual quipías pa anmitzanilisi, ma yén (yecan) tomin hual anquipías pa anquilaxlahuis pa anmolalimes o pa anmolapixcalisi. Xicmatican ximomajtan inminlaixpan yehuanten hual quipialo lahuelilitilisi pa quijtusi sinda se quipías pa yes lacocoltisi pampa quichía amo cuali. Huan xiquinmacacan lasojlalisi yehuanten hual quipialo inminyaxca pa lacames quinmacasi lasojlalisi.

### *Inon Dios quinmilic pampa quipias pa quinchihuili inmicnán*

<sup>8</sup> Amo xiquihuiquilian amaqui nindeno, xiquinlaxlahuican mochi hual anquihuiquilía. Ma yoje, unca se lachihualisi hual amo quiman anlaquisas anquipías pa anquihuiquili huan anquinmacas moxtin in oc sequin. Inon unca anmolasojlalisi. Quema, unca quinami tiquinhuiquililo tiquinlasojlalo moxtin hual tocnán. Unca pampa aqui yes quilasojla oc se hual huan yihual moitililo huan yuli quichihuiljtica cuali, yoje in se quichiac mochi in hual in lajtol quijtúa.

<sup>9</sup> Dios ilajtomes hual quijtulo: “Amo ximoteca ca se sihual o se lalac hual amo mosihua o molahuical, amo xilamicti, amo xilaixtequi, amo xicnequi pa ticpías len amo moyaxca”; huan sinda unca len yes lajtol quinami innojen, cuaquín mochi in lajtomes mochihuasi sinda se yuli quichijtica in lajtol hual quijtúa: “Ticchiuilis lasojlalisi yihual hual unca monahuac jan quinami timochihuili squiaya tehual noje.”

<sup>10</sup> Yihual hual quilasojla in se hual unca inahuac amo quichihuili nindeno amo cuali. Pampín, sinda se quilasojla, yojque quichía mochi hual quijtúa Dios ilajtol.

<sup>11</sup> Yoje, xicchihuacan mochi inon. Huan amo inon san. Noje anmitzmonotzilía pa anquichías, pampa anquimati quinami panulo molalujtialo in tonalijmes. Axan unca in tonali pa anejsas, amo xicpiacan cochilisi. Nicnequi niqijtúa, unca in tonali pa anpehuas antequipanús ca mías mías



chicahualisli pa anyulis yoje quinami quinequi Cristo, pampa moajxiltihuala in tonali hual Cristo techquixtilis pa yajmo quiman timocuepasi ticayasi pin polehuilisli hual ticmatilo nican pan laticpan. In tonalijmes hual tipehuaaje ticneltocaje Cristo, yahuiaya huejcahua pa ajsisquiaya in tonali. Amo cataya quinami unca axcan, pampa panuje míac tonalijmes huan yajmo yoje huejcahuas pa ajsis.

<sup>12</sup> Unca quinami axan lantica in layúa, quinequi quijtúa, lanticate in tonalijmes quiman ticate pan laticpan ca mochi in laicnotilisli huan laticumactilisli. Axan ajsitihuala in huaajtzinco quiman ticayasi ca Cristo ca mochi ilaixpelalisli cualtichin huan chicahuac. Yoje, ma timocahuacan pa tiqinchihuasi in hual amo cuali, hual ticnequilo ticchihuasi capa amaqui techita. Ma ticayacan ticchijticate mochi quinami ticataloaya mojmosta pin lahuilisli. Ma ticayacan quinami se guache hual lanesi huan molaquentía ca tzotzomajli huan teposli calica moana. Molaquentía yoje pa camo cayas lasulahuali.

<sup>13</sup> Ma tiyulican yoje cuali quinami ticchihualo quiman moxtin techizticate. Ma camo quiman timoitacan ca yehuanten capa tzajztzicate huan cuncicate alcohol huan mochi len yes calica lahuanalo. Ma camo quiman tiyultiacan timotecaticate ca oc sequin sihuames o lacames. Ma camo tiqinchihuilijtiacan ca yehuanten len techpinahualtilo. Ma camo quiman tiyulican timocualantiticate ca oc sequin, huan timocualanilijtiaci inminahuac oc sequin.

<sup>14</sup> Yes cuali pa anyulis quinami in Tata Jesucristo, jan quinami yihual anmijchíac pa anyes quinami yihual. Huan amo quiman xiquijnamiquican quinami huil ancanas len pa anquipaquiltis anmoyolo laijlaculi sinda quinequi pa anquichías len amo cuali.

## 14

### *Amo xictemu pa tiqutilis laijlaculisli mocni*

<sup>1</sup> Xicanacan quinami anmocni aqui yes hual quilalía ilaneltocalisli ca Jesucristo. Ma yoje, cate sequin tocnán hual amo unca chicahuac inminlaneltocalisli. Pampin, amo ximoanilican ca lajtomes inminahuac innojen hual ticchihualo hual huejtica ca timoxtin amo ticate ca se laijnamiquilisli. Cuajnesi tocní hual amo quineltoca Cristo chicahuac quijtúa yihual quipías pa quichías oc se lachihualisli pa quipaquiltis Dios, amo huil quijtúa “in san” sinda jan quilalis ilaneltocalisli ca Jesucristo san.

<sup>2</sup> Annimitzmaca se lajtol hual lanextilía inon. Se laneltocani quijtúa pampa huil quicua mochi. Ma yoje, in se hual amo quipía ilaneltocalisli chicahuac cuajnesi quijtúa quipaquiltis Dios sinda quicua jan len moscaltía pin lali san.

<sup>3</sup> Yihual hual quicua mochi ma camo quixixicu in se hual amo quincua. Huan yihual hual amo quicua mochi, ma camo quijtu len hual lanextilía pampa yihual quijtúa pa iyolo pampa in se hual quicua mochi quichijtica laijlaculisli. Unca pampa Dios canac quinami ixolol.

<sup>4</sup> Tehual, ¿leca tiquijtúa unca moyaxca pa timolalis quinami se hual quipía lahuelilitilisli pa quijtus itequipanujquil oc se lalac da quichía cuali o amo cuali? Unca iteco in tequipanujquil hual iyaxca pa quijtus inon. Huan jan yoje toTeco in Tata Jesús cayas quinchihuilijtica in hual iyaxca ca ilacames hual cate tocnán hual quineltocalo, quipía lahuelilitilisli pa quipalehuis pa camo mocahuas pa yes se ca ilacames.

<sup>5</sup> Annimitzilis oc se lajtol hual lanextilía. Cuajnesi unca se lalac quijtúa pampa monequi pa ticmacasi Dios míac lasojlalisli pan se tonali, huan amo

yoje m'iac lasojlalisli pan oc sequin tonalijmes. Cuaquinon unca oc se lalac hual quijtúa pampa amo monotza nindeno calía tonali yes, pampa quijtúa se tonali unca jan quinami oc se tonali pa ticmacasi lasojlalisli Dios. Yoje, monequi pa sejse cayas lanextili cuali ca yihual ilaijnamiquilisli in hual yes in niman cuali.

<sup>6</sup> Aquí hual quijtúa se tonali unca hué huan in oc sequin tonalijmes amo yoje huejué, cuaquín yihual quijtúa yoje pa quimacas lasojlalisli in Tata. Huan aquí hual quijtúa in se tonali unca quinami in oc sequin tonalijmes, yoje yihual noje quimaca lasojlalisli in Tata. Yihual hual quicua mochi hual unca pa lacames quicuasi, yoje yihual quimaca Dios lasojlalisli pampa quisehuía pa len quicua. Huan yihual hual amo quicua innojen hual oc sequin quicualo, yoje yihual quimaca Dios lasojlalisli ca quinami amo quicua, huan yihual noje quisehuía Dios pa in hual quicua.

*Monequi pa tiyulisi tiquijnamicticate quinami oc sequin tocn'ian quiztialo in hual ticchihualo*

<sup>7</sup> Unca pampa amo unca se ca tehuanten Dios ilacames hual yuli pa yihual ihu'ian. Huan amo unca se ca tehuanten Dios ixolomes hual miq'ui pa yihual ihu'ian. Amo unca toyaxca pa ticlalisli quiman timiquisi.

<sup>8</sup> Unca pampa sinda tiyulilo, cuaquinon unca pa in Tata tiyulilo, pampa yihual quinnexilis oc sequin ilahuelilitilisli niman hué pan topampa tehuanten. Sinda timiquilo, cuaquinon timiquilo pa in Tata, pampa yihual quilalis in tonali quiman timiquilo huan tehuanten amo timocahualo pa tiyesi iyaxca pampa tiyultialo ca yihual. Yoje, sinda tiyulilo o sinda timiquilo, ma yoje amo timocahualo pa tiyesi iyaxca in Tata Jesucristo.

<sup>9</sup> Ticate iyaxca yihual pampa inon hual n'ia annimitzil'ia: Cristo miquic huan yulic oc sejpa. Yoje unca yihual iyaxca pa huelitis pan icn'ian hual miq'uije jan quinami unca yihual iyaxca pa huelitis pan icn'ian hual yulticate.

<sup>10</sup> Huan tehual, ¿leca tiquijtúa unca tehual moyaxca pa tiq'uilis amo quich'ia cuali mocni hual Cristo canac quinami se icni? ¿Huan tiquijtúa amo quich'ia cuali pampa tiquijtúa yihual amo quichijtica mochi hual Dios quinequi? O tehual, ¿leca ticxijxicúa mocni hual Cristo canac quinami icni, huan ticxijxicúa pampa yihual quijtúa monequi pa quich'ias oc sequin lachihualisli huan amo jan pa quilalis ilaneltocalisli ca Cristo san pa quipaquiltis Dios? Xiquita. Timoxtin ticpiasi pa tinesisi iyampa Dios pan tonali yihual molalis pa techpuhuilis tolaijlaculisli huan tejchihuilis in hual monequi pampa ticchihuaaje in laijlaculisli.

<sup>11</sup> Unca lajcuiluli pin iamal Dios ilajtol, quil:

Quinami neli niyuli, quijtúa in Tata, noje moxtin neli nechmolancuacuetzil-isqui noyampa,

huan moxtin neli quijtusqui pampa nehual niunca Dios huan nicp'ia mochi lahuelilitilisli, quil.

<sup>12</sup> Yoje, sejse ca tehuanten quimacas lapuhualisli yihual ihu'ian iyampa Dios, quipuhuilis sejse ilachihualisli.

*Amo xicmomañajtili mocni*

<sup>13</sup> Yoje, ma camo quiman timochihuilican yoje tehuanten se huan oc se. Unca inon hual yes cuali pa anquich'ias: Ximoitacan cuali pa camo anquich'ias nindeno hual pampa inon se tocn'ia cuajnesi quijtus anquichihuasquiaya laijlaculisli. Unca pampa yihual tocn'ia amo quilalic chicahuac ilaneltocalisli ca Cristo huan pamp'ín quijtúa unca laijlaculisli in hual anquich'ia, mas que tel ticmati Dios ilajtol amo quijtúa pa camo quich'ias se inon.

<sup>14</sup> Nicmati huan in Tata Jesús nechmachiltía neli pampa amo unca nindeno pin lalticpan hual tijcualo huan ticunilo hual huil tejtzacuilis pa camo tiajsisi ca toyolo ca Dios. Ma yoje, sinda se quijtúa lajtic pa yihual pampa monequi pa camo quicuasi inon Dios ilacames, cuaquinon pa in se unca laijlaculisli sinda quicua inon.

<sup>15</sup> Yoje, amo xicchía nindeno hual mocni quijtúa unca laijlaculisli, pampa sinda mocni quichía len hual mitzita ticchijtica huan quijtúa pa iyolo unca laijlaculisli da se quichía inon, cuaquinon pa yihual inon unca laijlaculisli. Huan pa tehual noje unca laijlaculisli pampa amo tiyultica ilaixpan yihual ca lasojlalisli. Amo xicchihualti mocni len yihual quijtúa amo unca cuali. Xiquijnamiqui pampa Cristo miquic pa yihual mocni.

<sup>16</sup> Pampín, mas que unca moyaxca pa ticchías inon hual Dios ilajtol amo quijtúa pa camo ticchihuasi, ma yoje sequin anmocnían laneltocanjmes amo quijtulo yoje. Pampín yehuanten hual amo quineltocalo Cristo techuejuecaltilo pampa timocualantilo capa tehuanten tohuían.

<sup>17</sup> Ma camo panu inon pampa sinda Dios huelitía pa toyolo, inon hual tijcualo huan inon hual ticunilo amo monotzalo, amo tejtzacuilia Dios nindeno hual tijcualo huan ticunilo. Quema, moxtin quimatilo da Dios huelitía pa toyolo quiman quitalo pan ipampa quinami tiyulilo ticchijticate cuali. Quimatilo ipampa quinami tiyulilo amo timocualantilo ca tocnían hual quineltocalo Cristo, pampa monequi pa ticpiasi mosehuilisli ca Dios pa toyolo. Quimatilo pan ipampa topaquilisli hual techlalilia pa toyolo in Espíritu Santo.

<sup>18</sup> Yoje, monequi pa aqui hual quitequipanuilia Cristo motzaculis pa camo quichías inon: Ma camo quichía len yes quicocúa iyolo se icni hual amo quilalijtica chichahuac ilaneltocalisli ca Cristo. Sinda yuli se amo quicocolitica inminyolo icnían, cuaquin yoje quipaquititica cuali Dios. Huan lacames yalo quilasojlalo pampa yuli yoje.

<sup>19</sup> Axan, ca mochi toyolo ma timotolinican pa ticchihuasi len yes hual techpalehuía pa tiyulisi ca mosehuilisli pa toyolo se ca oc se. Ma timotolinican pa ticchihuasi len yes pa timopalehuisi timoxtin se huan oc se. Yoje ticpiasi mojmosta oc se nadita lajmatilisli huan lahuelilitilisli pa tiyulisí quinami Cristo icnían quipialo pa yulisi.

<sup>20</sup> Amo xiquijlacu iyolo se tocní hual amo quineltoca chichahuac Jesucristo ilamachilitilisli cuali, pampa Dios tequipanujtica pa yihual iyolo pa yes quinami yihual Dios quinequi. Huan sinda tiyuli tiquijlacujtica, cuaquin yoje tiquijlacúa Dios itequipanulisli. Ma nimitzili oc se lanextilisli. Mochi hual tijcualo unca cuali pa tijcuasi. Dios amo tejtzacuilia pa camo tijcuasi len yes. Ma yoje, amo unca cuali pa in lalal hual quijtúa lajtic yihual pampa Dios techilia pa camo tijcuasi len ca innojen hual tijcualo. Ma yoje, cuajnesi amo motzacua pa camo quicuas. Huan pampa quicua, cuaquin quijtúa pa iyolo pampa yoje quichíac laijlaculisli, huan pampín quijtúa Dios cualani ca yihual.

<sup>21</sup> Yoje, yes cuali pa ticchías inon, nicnequi niquijtúa, yes cuali pa camo tijcuas nacal huan pa camo cunis altzindi coc, o len yes quinami innojen sinda quiman ticchías inon, tiquijlacus pa iyolo mocni hual quineltoca Cristo.

<sup>22</sup> Tehual, sinda ticmati da amo mitzijlacúa in hual tijcuas o ticunis o ticchías, huan ticmztica Dios quita cuali, cuaquin ma mochahua yoje, anquimztica huan Dios. Ma yoje, mas que ticmati inon, amo ximonextili hué pampa inon inminlaixpan oc sequin hual quijtulo pa inminyolo pampa amo

cayas cuali pa quichías se inon. ¡Mocahua ca paquilisli se lalac hual amo quiman quipía pa motexpahuilis pampa quichía len hual Dios quimachiltía neli pampa unca cuali!

<sup>23</sup> Ma yoje, aquí hual quimahuilía sinda quichía o quicua o cuni len huan yihual amo quimati ca mochi iyolo pampa quichijtica cuali o amo cuali, cuaquinon yihual motexpahuilía sinda quichía o quicua o cuni. Motexpahuilía pampa amo quineltoca chicahuac ilajtol Dios pa quimatis quinami Dios quita inon, sinda cuali o amo cuali. Huan len yes hual se quichía amo quijnamictica quinami yihual quijtúa Dios ilajtol quinextilía, cuaquinon ca yihual inon unca laijlaculisli sinda quichía.

## 15

### *Xicpaquilti hual unca monahuac, amo ximopaquilti tehual mohuían*

<sup>1</sup> Tehuanten hual ticlalilo chicahuac tolaneltocalisli ca Cristo, monequi pa timopepenialtisi ca tocnían hual amo quipialo laneltocalisli chicahuac ca Cristo. Mas que Dios ilajtol amo tejtzacuilía pa camo ticchihuasi len, ma yoje, ma camo timopaquiltican ticchijtcate sinda tocnían hual amo chicahuac quijtol pampa amo unca cuali pa ticchihuasi.

<sup>2</sup> Mochi sejse ca tehuanten, ma ticpaquiltican tocní hual quineltoca Cristo, ticchijtcate ilaixpan yihual len cuali pa yihual pan mochi tonalijmes yultías quineltocatica Cristo.

<sup>3</sup> Monequi pa ticchihuasi yoje pampa yihual Cristo amo mopaquiltiaya. Quema, huan pampín quipanuc Cristo jan quinami catani lajcuiluli, quil: “Mochi lajtomes calica mitzhuejuecaltije tehual, Dios, mochi inon hual mitzcocoltije moyolo tehual, inon niquinmacahuiltic pa nechilisi huan pa nechcocoltisi jan yoje.” Yoje quijtúa ilajtol Dios.

<sup>4</sup> Axan, in hual catani lajcuiluli pa yina pa Dios ilajtol catani lajcuiluli pa yoje tehuanten tiyelosquiaya lamaxtili. Pampa inon, quiman techpanúa mochi inon hual amo cuajcuali, amo timocahualo pa ticchixtiasi inon hual ticmatilo yahui tejchihuilía Dios. Huan ticchixtialo ticmaztcate pan ipampa Dios ilajtol lajcuiluli pampa yahui techpanúa inon. In lajtol tejchicahuáltia pa tiyulisli ticchijtcate in hual Dios quinequi.

<sup>5</sup> Quema, unca Dios ichicahualisli hual ticanalo pa huil timopepenialtisi quiman techpanúa len amo cuali, amo tiquijtuticate ca laijtic toyolo quinami tiquincuepilisli. Yihual Dios tejchicahuáltia pa yoje tiyulisli ticneltocatiasi. Ma anmitzmaca in chicahualisli pa anyulis anmoxtin se ca oc sequin, anquijnamictica san in hual unca cuali pa anmoxtin. Yoje anquipaquiltía Cristo Jesús anyultica quinami yihual.

<sup>6</sup> Dios quinequi pa anyulis yoje, pa yoje anmoxtin ca se laijnamiqulisli anquijtus lajtomes hué pa Dios, hual unca iTajtzin toTata Jesucristo.

### *In lamachiltisli cuali quilamachiltililo yehuanten hual amo judíos*

<sup>7</sup> Yoje, mas que anquijnamiqúa ca míac laijnamiqulisli in hual unca cuali pa ticchihuasi, ximonamiquican ca paquilisli mochi sejse ca amhuanten hual anquineltoca Cristo. Jan yoje Cristo noje technamiquic ca paquilisli pa yoje pan topampa Dios quicaquis lajtulisli hué pa yihual.

<sup>8</sup> Nicnequi niquijtúa inon: Cristo hualac pa quiniquipanullis in judíos, quinnextilijtataya pampa in lajtol hual Dios quijtc pa yina unca lajtol melahuac. Quema, hualac pa quichihuasquiaya in hual Dios quinmilic pa yina in judíos inmintajtzitzián, in hual neli yahuiaya quinchihuili. Yoique Cristo lanextilic quinami huil quilalilo laneltocalisli ca in hual Dios quijtúa.

<sup>9</sup> Huan pa in lacames hual amo judíos, Cristo hualac noje pa yoje yehuanten lajtulosquiaya hué pa Dios, pa quijtulosquiaya quinami yihual quinmicnilic quiman quinlajtultic pa yesi yihual ilacames. Yojque unca lajcuiluli pa Dios ilajtol quinami quineltocalosquiaya in lacames amo judíos, quijtúa, quil:

Pampa inon nehual nilaquetzas ca lajtomes hué pa tehual capa yehuanten hual amo judíos,

huan nijcantarus (nijcuicas) ca lajtomes huejué pa nimitzmacas lasojlalisli tehual.

<sup>10</sup> Huan pa oc se iamal Dios ilajtol quijtúa, quil:

Xicpiacan míac paquilisli, xiyén (xiyecan) ca paquilisli amhuanten hual amo judíos.

Xicpiacan paquilisli ca in judíos hual Dios ilacames.

<sup>11</sup> Huan pa oc se lajcuilulisli quijtúa quil:

Anmoxtin in lacames hual amo judíos, xiquijtucan lajtomes hué pa toTajtzin Dios,

huan moxtin in lacames hual judíos ma lajtucan hué pa yihual.

<sup>12</sup> Huan oc se iamal ilajtol Dios hual quijcuiluc Isaías, yihual Dios ilajtuni, quijtúa, quil:

Yes se imiahuil Isaí hual yec itajtzin in hué David.

Huan imiahuil nesis quinami ixua se ipacholi se cuahuil lamayahuili, pampa yehuanten ca icali David cate quinami se cuahuil lacotonali.

Huan imiahuil Isaí moscaltis pa huelitis pan lacames hual amo judíos, quema, in lacames hual amo judíos quineltocasqui yihual.

<sup>13</sup> Cuaquinon in Dios hual techmaca in laneltocalisli hual ticlaililo ca Cristo, ma anmitzmaca mochi paquilisli huan mosehuilisli pa anmoyolo. Ma anmijchiuili inon pan ipampa quinami anquilalía anmolaneltocalisli ca yihual, pa yoje anmolaneltocalisli momiactis mojmosta pan ipampa ichichualisli in Espíritu Santo.

<sup>14</sup> Amo nimocahua pa nicmatis neli pan noyolo, nocnían, nehual noje nicmati neli quinami amhuanten amo anmocahua pa anyulis anmochihuilijtica len unca cuali pa amhuanten. Inon unca pampa anquimati len monequi pa anquimatis inahuac Cristo ilamaxtilisli. Huan yoje huil anmoijnamiquiltía se huan oc se quinami Cristo ilamaxtilisli technextilía quinami ticpialo pa tiyulisli.

<sup>15</sup> Ma yoje, amo nimomajtitíac annimitzjcuiluilic in amal ca lamaxtilisli chichahuac pan inminpampa innojen lajtomes, pampa nicnequiaya annimitzjnamiquilti inon. Nicchíac pampa Dios nechtilanic pan ipampa ilachihualisli cuali hual nejchihuilic.

<sup>16</sup> In lachihualisli cuali nejchihuilic pa nictequipanuilis Cristo Jesús pan ipampa quinami niquinmilía ilajtol in lacames hual amo judíos. Nictequipanuilía Cristo niquinmilijtica yehuanten hual amo judíos in lamachiltisli cuali pa yoje yehuanten mochihuasi ilacames Cristo. Huan yihual quinmanas ca paquilisli pampa in Espíritu Santo quinchipahuilic yehuanten. Yoje, pampa niqihualiquilía Dios in lacames, nictequipanuilía Dios quinami se tiopista hual quilalía huendi ilaixpan Dios. Yehuanten cate nohuendi.

<sup>17</sup> Cuaquinon, pan ipampa in hual Cristo Jesús nejchihuilic, nilajtúa hué inahuac Dios ilajtol, huan niquiqtúa quinami ilamaxtilisli mosemantica cajcapa pan ipampa quinami unca lamachiltili. Ca inon nicpia paquilisli.

<sup>18</sup> Unca pampa amo nimomajtía nilajtúa inahuac inon hual Cristo quichíac pan nopampa nehual pa yoje niquinlanequiltisquiaya in lacames hual amo judíos pa quineltocalosquiaya Cristo. Cristo quinlaneltocaltic pan ipampa ilamaxtilisli hual niquinmilic. Huan quinlaneltocaltic pan ipampa quinami niyuliaya inminlaixpan yehuanten.

<sup>19</sup> Quema, nechmacac lahuelilitlisli pa niquinchías innojen lachihualisli inminlaixpan yehuanten. Huan pampa innojen, quimahuísuje ca lamajtilisli. Huan niquinchíac pan ipampa in Espíritu Santo ilahuelilitlisli. Inon Cristo quichíac pan nopampa huan pampa inon nicsemantinemiaya ilamachilitlisli cuali. Nipejtiahuiaya pa Jerusalén, ninejntiahuiaya pa míac caltilan huan niajsic niman huejca pin lali itoca Ilírca. Yoje nicchíac mochi notequipanulisli pa niclamisquiaya nicsemana in lamachilitlisli cuali.

<sup>20</sup> Huan nicpía pa nimotolinis pa nicsemanas in lamachilitlisli cuali capa yes ayamo quiman quimatilo ilajtol Cristo. Amo yesquiaya cuali pa nehual niyes tequipanujquil capa oc se lalac pehuac quinlamachilitlic Dios ilajtol, pampa monequi pa camo nechilisi lajtimes huejué huan cuajcuali sinda oc se ilalac Dios quichíac inon pa toTata.

<sup>21</sup> Yes cuali pa nías capa ayamo quimatije ilajtol Cristo pa yoje panus quinami unca lajcuiluli pa iamal Dios ilajtol, quil:

Quimatisqui ilajtol yihual yehuanten hual amaqui quinlamachilitlic,

huan quimatisqui len quinequi quijtúa in lanahuatilisli yehuanten hual amo quiman quicaquijque quijtujque in hual yihual quinchihuilic.

### *Pablo quinequi yahui pa Roma*

<sup>22</sup> Yoje, pampa niahuiaya cajcapa, pampín amo huil annimitzpaxaluiliaya. Cataloaya míac hual nejtzacuilinijme pa camo niasquiaya.

<sup>23</sup> Ma yoje, axan yajmo nicpía len pa nicchías nican pin lalimes capa nicayac. Huan quipía míac xixihuil hual nicnequiaya ca míac lanequilisli nihuala annimitzpaxaluili.

<sup>24</sup> Pampín, nihualas ca amhuanten quiman nipanus nicantica ojli pa España. Quema, nicchixtica pa annechpalehuis pan nolahuejcalisli quiman niquisas pa Roma ca umpic. Ma yoje, pa nipehuas, nicnequi nimopaquiltía annimitzpaxaluilijtica amhuanten.

<sup>25</sup> Axcán, nía nicana ojli pa niajsis Jerusalén pa niquinpalehuis Dios ilacames umpa.

<sup>26</sup> Inon unca pampa in laneltocanjmes hual chantilo pa in lalimes Macedonia huan Acaya quijtuje pampa yesquiaya cuali pa yehuanten quintilanilosquiaya len pa Dios ilacames nepa pa Jerusalén hual amo quipialo nindeno pa molacualtisi. Yoje quinnextililosquiaya quinami yehuanten quinmitalo pampa cate inmicnían pan ipampa Cristo.

<sup>27</sup> Inon quinchihuilijtcate pampa quinequiloaya quichihualo ca míac lanequilisli. Huan neli ca yehuanten pa Macedonia huan Acaya unca quinami quihuiquililo quinchihuililo yoje yehuanten pa Jerusalén. Niquijtúa inon pampa yehuanten pa Jerusalén pehuaje pa quinxiluilisli Dios ilamachilitlisli cuali pa inminyolo yehuanten hual amo judíos. Huan yoje ipampa in Tata, yehuanten hual amo judíos quihuiquililo quinxiluililo in hual quipialo pa quinpalehuilisi ca len yes monequi pa quipiasi yehuanten pa Jerusalén.

<sup>28</sup> Yoje, quiman nilamis ca in tequipanulisli huan quiman niquintemacac yehuanten pa Jerusalén in hual tocnían pa Macedonia huan Acaya quin-nechiculiye, cuaquinon annimitzpxalauilijitihualas quiman nipanujtías pa España.

<sup>29</sup> Huan nicmati pampa quiman nihualas ca amhuanten, nihualas niten-tica pa noyolo ca mochi in cuali hual Cristo nechmacas.

<sup>30</sup> Axcan, annimitztemachía ca mochi noyolo, nocnían, pan ipampa in Tata Jesucristo huan ilasojlalisli in Espíritu Santo, xiclajlanican Dios pa nehual. Ma ticlajlanican nehual huan amhuanten ca míac tochicahualisli.

<sup>31</sup> Ticlajlanisi pa yoje nicayas laquixtili pin polehuilisli quiman nicayas ca yehuanten pin lalticpan Judea. Nepa cate yehuanten hual amo quineltocalo Cristo. Ma ticlajlanican Dios noje pa yehuanten Dios ilacames pa Jerusalén canasi ca míac lanequilisli tolapalehuilisli.

<sup>32</sup> Sinda canasi ca lanequilisli, cuaquín huil nías ca amhuanten ca míac paquilisli sinda Dios quinequi. Huan timochicahuasi quiman nimoitas ca amhuanten.

<sup>33</sup> Ma caya ca anmoxtin in Dios hual techmaca mosehuilisli pa toyolo. Yoje ma ye.

## 16

### *Pablo quinchicahua yehuanten hual quinmiximati pa Roma*

<sup>1</sup> Nicnequi pa anquiximatis Febe tozni sihual hual huala ca amhuanten. Yi-hual se tequipanujquil niman cuali ca in laneltocanjmes hual monechiculo pin caltilan itoca Cencrea.

<sup>2</sup> Xicnamiquican quinami se tozni hual quineltoca in Tata. Yoje cana cuali pa tehuanten hual ticate Dios ixolomes pa yoje tiquinnamiquisi tocnían hual quitequipanuililo Dios. Pampín, xiquiztiacan pa anquipalehuis ca len yes monequi pa quipías pa itequipanulisli, pampa yihual noje quinpalehuic míac tocnían huan nehual noje nechpalehuic míac.

<sup>3</sup> Xiquinpialtican Priscila huan Aquila hual ca nehual titequipanuloaya pa Cristo Jesús.

<sup>4</sup> Yehuanten uyaje capa ca nadita cuajnesi yahuiloaya miquilo pa nechquixtililosquiaya pin nomiquilisli. Niqinsehuía pampa inon, huan amo nehual nohuían. Noje quinsehuilo moxtin yehuanten in laneltocani-jmes hual amo judíos pa mochi innojen caltilan capa monechiculo pa quimolancuacuetzilisi Dios.

<sup>5</sup> Xiquinpialtican moxtin hual monechiculo pa quimolancuacuetzilisi Dios nepa pa inminchan Priscila huan Aquila. Xicpialtican Epenete hual niclaso-ja míac. Ca moxtin laneltocanjmes pin lalticpan Asia, cataya yihual hual پهuac quineltocac Cristo.

<sup>6</sup> Xicpialtican María, yihual tequipanuc chichahuac ca amhuanten.

<sup>7</sup> Xiquinpialtican Andrónico huan Junias nocnían pa oc se cali, cataloaya noje latzacuali calijtic quinami nehual. Yehuanten hueyenten capa cate Dios ilanahuatinijmes huan quineltocaje Cristo quiman nehual ayamo nicnelto-caya.

<sup>8</sup> Xicpialtican nolasojli Amplias hual unca nolasojli pan ipampa in Tata.

<sup>9</sup> Xicpialtican Urbano tozni hual tequipanúa ca tehuanten pan itequipan-ulisli in Tata. Huan xicpialtican nolasojli Estaquis.

<sup>10</sup> Xicpialtican Apeles hual momati pampa yihual neli quineltoca Cristo. Xiquinpialtican yehuanten hual yulilo pa ichan Aristóbulo.



11 Xicpialtican Herodión, yihual nocni pa oc se cali. Xiquinpialtican yehuanten hual quineltocalo in Tata hual yulilo pa ichan Narciso.

12 Xiquinpialtican Trifena huan Trifosa yehuanten sihuames hual quitequipanuililo in Tata. Xicpialtican tocní sihual Pérsida hual tequipanuc ca míac chicahualisli pa in Tata.

13 Xicpialtican Rufo, yihual se hué ca in Tata ilacames, huan xicpialtican inantzin hual unca pa nehual quinami nonantzin.

14 Xiquinpialtican Asíncrito huan Flegonte huan Hermas huan Patrobas huan Hermes huan tocnían laneltocanijmes hual cate ca yehuanten.

15 Xiquinpialtican noje Filólogo huan Julia huan Nereo huan icni sihual huan Olimpás huan moxtin tocnían hual quineltocalo Cristo, hual cate ca yehuanten.

16 Ximopialtican se huan oc se ca se latenamiquilisli yoje quinami ticchi-hualo tehuanten hual Dios ixolomes. Anmijchicahualo moxtin yehuanten icnían Cristo pa mochi innojen cajcaltilan nican capa monechiculo.

17 Nocnían, annimitzilia ca mochi noyolo, ximijmatican xiquinmiztiacan aquinojen yehuanten hual quinchihuililo tocnían pa camo quijnamiquisi Dios ilamaxtilisli quinami Cristo technextilic. Huan ximijmatican yehuanten hual quinlaicanalo Dios ixolomes pa moxilusi pa yajmo quitocasi iojli Cristo. Yehuanten quinequilo anmitzmaxtilo yoje quinami amo unca in lamaxtilisli hual anmonextilic. Amo xicpiacan nindeno pa anquitas ca yehuanten.

18 Inon annimitzizcuiluilía, pampa lacames quinami yehuanten amo quitequipanuililo toTata Cristo. San motequipanuililo yehuanten pan ipampa inminlamaxtilisli. Quinequilo qitalo quinami huil quichihuasi in hual quinequilo jan yehuanten san. Huan quinami quimatilo lajtulo niman cuali ca lacuajcuamanalisli, yoje quincuaajcuamanililo inminyolo yehuanten hual amo quimatilo.

19 Nicmati neli pampa anquiztiac lamaxtinijmes quinami yehuanten, pampa pa mochi caltilan cate lamachitili quinami cuali anquineltoca Dios ilajtol. Pampín nicpía niman míac paquilisli pampa yoje anquineltoca. Ma yoje, nicnequi pa anquipías lajmatilisli pa in hual unca cuali. Huan nicnequi pa camo huil anyes latilanili pa anmoyolo pa anquichías len hual amo unca cuali.

20 Sinda anmochías yoje, cuaquín Dios hual techmaca mosehuilisli pa toyolo amo huejcahuas pa quinsulahuas innojen lamaxtinijmes hual amo quimaxtilo Dios ilajtol. Yes quinami yihual Dios anmijxacualuilía Satanás itzindán anmocxihuajmes. Ma caya ca amhuanten in cuali hual anmijchihuilía toTata Jesús.

21 Anmitzpialtía Timoteo, huan nehual titequipanulo, noje anmitzpialtilo Lucio huan Jasón huan Sosípater nocnían pa oc sequin calimes.

22 Nehual, Tercio, niqijcuiluilijtica in amal pa Pablo, annimitzpialtía pan pampa in Tata hual ticneltocalo.

23 Anmitzpialtía Gayo hual nechnotzac pa nichantis pa ichan, huan noje quinnotzac moxtin in laneltocanijmes pa monechicusi pa ichan pan mochi tonali quiman timonechiculo. Anmitzpialtía Erasto icomisariado in caltilan nican, anmitzpialtía noje tocní Cuarto.

24 Ma caya ca anmoxtin ilachihualisli cuali toTata Jesucristo. Yoje ma ye.

*Pablo quijtúa lajtomes huejué pa Dios pa quilamis in amal*

25 Ma tiquijtucan lajtomes huejué pa Dios hual huil anmijchicahualtía pa camo anmocahuas pa anyulis anquineltocatica in lamachitilisli cuali hual



Dios nechtilanic pa niclamachiltis. Unca ilanahuatilisli Jesucristo. Inon unca ca se lajtulisli ca in hual Dios techmachiltía axan. Quiman pehuac mochi, huan ca niman míac xixihuimes Dios ayamo quilamachiltic inon huan pampín amaqui quimatiaya.

<sup>26</sup> Ma yoje, axan unca lamachilti. Huan pampa inon hual quijcuiluje Dios ilajtunijmes pa yina, tiquinlamachiltililo lacames pa mochi lalimes. Dios hual amo mocahua pa yulis latilanic pa quinlamachiltililo moxtin ilamachiltisli cuali. Latilanic pa yoje axan moxtin huil quineltocasi ilajtol Jesucristo.

<sup>27</sup> Pampa inon hual quichíac, ma camo timocahuacan pa tiquijtusi lajtomes huejué mojmosta pa Dios pan ipampa Jesucristo. San yihual Dios quipía mochi lajmatilisli huan unca niman hué, amo unca oc se hué quinami yihual. Yihual quilalic pa mochi mochías yoje pin cielo (ilhuicac) huan pan lalticpan. Yoje ma ye.

## In amal hual in lanahuatini Pablo quinmijcuiluilic in laneltocanijmes hual yulinijme pin caltilan Corinto

*Pablo quinmijcuiluilía Dios ilacames hual cate pa Corinto*

<sup>1</sup> Nehual niPablo huan Dios nechnotzac pa niyes ilanahuatini Cristo Jesús. Cataya pampa yoje quinequic Dios. Huan tocní Sóstenes ticcate.

<sup>2</sup> Annimitzjicuiluilijtica amhuanten hual anunca pin caltilan Corinto, amhuanten hual anmonechicúa pa anquimolancuacuetzilía Dios. Amhuanten Dios anmijchipahuilic anmoyolo pa anyes ilacames iyaxca huan pa anyulis chipahuac pan ipampa Cristo Jesús. Quema, Dios anmitznotzac pa anyes ilacames. Huan quinnotzac pa yesi ilacames moxtin hual quinzaló Dios pan ipampa itoca toTata Jesucristo, yehuanten hual chantilo cajcaca yes. Cristo yihual inminTata huan toTata.

<sup>3</sup> Ma Dios toTajtzin huan in Tata Jesucristo anmijchiuilican cuali huan anmitzmacacan mosehuilislí pa anmoyolo.

*Quijtúa Pablo quinami Cristo tejchiuilía niman míac cuali*

<sup>4</sup> Amo nimocahua pa nicehuis Dios, pampa anmijchiuilic cuali pan ipampa Cristo Jesús.

<sup>5</sup> Nicsehuía pampa yojque huan yojque anmitzmacac míac pa anquipías pa anmoyolo. Ancanac niman míac pan ipampa yihual.

<sup>6</sup> Huan jan yoje, quinami anmitzmacac míac, yihual anmitzneltoaltic pampa unca neli mochi hual antimitzlamachiltije inahuac Cristo.

<sup>7</sup> Pampa inon, anquipía mochi inon calica Dios anmitzhueliltilía anmoyolo. Mochi inon anquipía mochi tonalijmes nican capa anyultía anquichixtica in tonali quiman nesis toTata Jesucristo.

<sup>8</sup> Yihual anmijchicahualtis pa ancayas anquineltoaltica pa quiman mochi hual Dios quichíac lamis yes quinami axan unca. Yoje amo anmitzmotexpahuilís Dios pan tonali quiman hualas toTata Jesús.

<sup>9</sup> Inon ticmatilo pampa huil ticneltoalo Dios tejchiuilis jan quinami techilic, yihual Dios hual technotzac pa tiyulisi inahuac iXolol Jesucristo toTata.

*Sequin laneltocanijmes nepa Corinto amo moitalo quinami oc sequin laneltocanijmes*

<sup>10</sup> Ma yoje, ca mochi noyolo, nocnían, inon annimitzyantía annimitzjnamiquiltitica ca ilahueliltilislí itoca Jesucristo hual anquitequipanuilía. Annimitzyantía pa anmoitas quinami moxtin oc sequin hual cate ca amhuanten. Annimitzyantía pa como cayasi ca amhuanten laquetzalisli hual anmijxil se ca oc se. Quema, annimitzyantía pa anmochías jan se san quinami anlajnamiquía huan quinami anquijtúa len anquijnamictica.

<sup>11</sup> Inon annimitzilía, nocnían, pampa sequin hual chantilo pa ichan Cloé nechlaquetzilije nechlamachiltitaloaya quinami sequin ca amhuanten calanalilo amo quixtoaltica quinami oc sequin laijnamiquilo.

<sup>12</sup> Nicnequi niqijtúa inon, quijtulo pampa sejse ca amhuanten amo quijtúa quinami in oc se. Sequin quijtulo: “Nehual niunca Pablo imonextilini”, huan oc sequin quijtulo: “Nehual niunca imonextilini Apolos”, huan oc

sequin: “Nehual niunca imonexutilini Cefas”, huan oc sequin: “Nehual niunca Cristo imonexutilini.”

<sup>13</sup> Ma annimitzlañlani, ¿anquijtua pampa huil anmochias imonexutilinijmes Cristo huan noje imonexutilinijmes oc se? ¿Anquijtua pampa nehual Pablo nicataya lapiluli pan se cuahuil pa amhuanten? ¿Ancataya lacuayatequili pa yoje anyesquiaya latocayaltli quinami lacames hual noyaxca, hual nechnetocalo? Amo huil anquijtua yoje.

<sup>14</sup> Nicsehuia Dios pampa capa amhuanten niqincuayatequic san Crispo huan Gayo.

<sup>15</sup> Yoje amaqui huil quijtus yihual yec lacuayatequili pa yoje nehual niyesquiaya iteco, quinami nehual cuajnesi nicpiaya lahuellitilisi pa yihual mochihuasquiaya nomonexutilini.

<sup>16</sup> Ah, huan niqulcahuac, niqincuayatequic yehuanten noje pa ichan Estefanas. Amo niqijnamiquia sinda nijcuayatequic oc se ca amhuanten.

<sup>17</sup> Amo niqincuayatequic miac pampa Cristo amo nechtilanic pa ni-lacuayatequisquiaya. Nechtlanic pa nicnahuatis in lamachtilitilisi cuali. Huan amo nechtilanic pa niqinmahuisultis lacames pan ipampa quinami nilajtua inminlaixpan ca lajtomes cuajcualtichin. Amo nechtilanic pa yoje nilajtus, amo sangá in lajtomes cuajcualtichin quintzacuililosquiaya lacames pa camo quimatilosquiaya leca miquic Cristo.

### *Cristo unca Dios ilahuellitilisi huan ilajmatilisi*

<sup>18</sup> Ticneltocalo in lamaxtilisi quinami Cristo miquic pan cuahuil. Yehuanten hual amo quipialo in yulilisi yancuic quijtulo pampa san lacames hual amo quipialo lajnamiqilisi cuali quineltocalo in lamaxtilisi. Ma yoje, ca tehuanten hual Dios techquixtilijtica pin ipolehuilisi tolaijlaculisi, neli ticmatilo pampa ilajtol Cristo quipia Dios ilahuellitilisi.

<sup>19</sup> Inon ticmatilo pampa unca lajcuiluli pa iamal Dios ilajtol, quijtua, quil: Niqinmijlaculis inminlajmatilisi lacames hual quimatilo. Huan yehuanten hual quijtulo pampa quimatilo, niqintzacuilis pa camo lamis cuali in hual yehuanten quijtulo pampa yalo quichihualo, quil.

<sup>20</sup> Yoje cuaquin, Dios technexutilijtica pampa pa yihual, amo monotza nindeno inminlajmatilisi yehuanten pin lalticpan, yehuanten hual quijtulo pampa quimatilo, ma yen (yecan) judios hual quimatilo mochi in lajtol hual quinexutilia quinami quipialo pa quineltocasi Dios, ma yecan lacames hual amo judios hual quimatilo miac huan quimatilo molaxililo lajtomes inahuac mochi hual unca pin lalticpan. Quema, Dios lanexutilic quinami amo monotza inminlajmatilisi lacames hual Satanás hueltia pa inminyolo.

<sup>21</sup> Huan yoje tiquitalo quinami Dios, pan ipampa ilajmatilisi yihual amo quimacahuilic pa lacames pin lalticpan quiximatilosquiaya Dios pan ipampa inminlajmatilisi. Yoje canac cuali Dios pa quinquixtilis pin polehuilisi capic quinhuica inminlajlaculisi yehuanten. Huan quinquixtia pin inminpolehuilisi pan ipampa quinami quineltocalo ilajtol quiman quincaculo yehuanten hual quinnahuatilo. Huan in miac ca yehuanten pin lalticpan quijtulo pampa ilajtol hual ticlamachtililo unca lajtol hual san quineltocalo lacames hual amo quipialo lajnamiqilisi cuali.

<sup>22</sup> Inon unca yoje pampa in judios amo mocahualo pa quinequisi quiyantisi Dios pa quichias len huil quitasi hual quinmolapolutilo huan cuaquinon, quijtulo, quineltocasi, quil. Huan yehuanten hual amo judios quicaculo len lanahuatilisli pa quimatisi sinda quinnexutilia lajmatilisi. Huan sinda quijtulo pa inminyolo pampa amo quinnexutilia, cuaquin amo quineltocalo.

<sup>23</sup> Amo yoje tehuanten. Ticlamachiltilo quinami Cristo miquic pa tehuanten pan in cuahuil. Huan quiman quicaquilo inon in judíos, quijtulo cualanticate pampa in Cristo amo huil yes lamictili, huan pampín Jesucristo amo quisac nepa capa unca Dios, quil. Huan quiman quicaquilo inon in lacames hual amo judíos, quijtulo pampa san lacames hual amo quipialo laijnamiquilisli cuali quineltocalosquiaya pampa Dios quilalisquiaya pa míquisquiaya se pa yoje moxtin yelosquiaya lapalehuili.

<sup>24</sup> Ma yoje, tehuanten hual Dios technotzac pa tiyesi ixolomes, ma tiyén (tiyecan) judíos o ma yén (yecan) lacames hual amo judíos, tehuanten ticmatilo pampa Cristo quipía ilahuelilitlisli Dios huan ilajmatilisli Dios.

<sup>25</sup> Yoje, inon unca hual quichíac Dios. Huan lacames pin lalticpan quijtulo pampa inon unca lajtol hual san quineltocalo yehuanten hual amo laijnamiquilo cuali. Inon Dios quichía huan lacames quijtulo pampa lanextilía pampa Dios amo huelitía. Ma yoje, ca inon yihual techmonextilía ca niman míac lahuelilitlisli. Amo quiman ajsis yes yoje míac mochi inminlahuelilitlisli moxtin lacames.

<sup>26</sup> Cuaquinon, nocnían, xiquijnamiquican quinami ancataya quiman Dios anmitznotzac pa anyes ilacames. Ca amhuanten amo cataloaya míac hual quipialoaya míac lajmatilisli hual lacames quijtulo unca lajmatilisli. Huan ca amhuanten amo cataloaya míac hual quipialoaya lahuelilitlisli ca yehuanten hual huelitilo. Huan amo cataloaya míac ca amhuanten hual lacatijque inminxolomes huejueyenten.

<sup>27</sup> Quema, Dios quilalic pa mochiasquiaya in hual lacames pin lalticpan quijtulo san quineltocalo yehuanten hual amo laijnamiquilo cuali. Inon quichíac Dios pa yoje quinpinajtis yehuanten hual quijtulo pampa quipialo lajmatilisli. Huan quilalic pa mochihuasquiaya ilajtol ca inon hual amo quipía lahuelilitlisli pa yoje quinpinajtis yehuanten hual quijtulo, quema, pampa quipialo lahuelilitlisli.

<sup>28</sup> Huan Dios quinlajultic lacames pin lalticpan hual amo lacatijque ixolomes huejueyenten, huan quinlajultic in lacames laxixiculi. Quema, quinlajultic hual yehuanten pin lalticpan quijtulo amo monotzalo nindeno, quinlajultic pa quinquixtilis ilahuelilitlisli mochi inon hual yehuanten pin lalticpan quijtulo pampa monotza.

<sup>29</sup> Inon Dios quichíac pa yoje amo cayas se lalac ilaixpan yihual hual huil lajtutinemis hué inahuac yihual ihuían.

<sup>30</sup> Ma yoje, amhuanten Dios anmitzmacac anmoyulilisli yancuic, in hual unca pan ipampa Cristo Jesús. Miquic pan cuahuil pa tehuanten huan pan ipampa inon, Dios technextilía ilajmatilisli. Huan pan ipampa Jesucristo, Dios huil quijtuc pampa yajmo quita laijlaculisli ca tehuanten. Huil tejchiphahuilic toyolo pa tiyesi ilacames chijchiphahuac pa yihual san. Huan noje huil techmacahuac pa yajmo techpolehuisquiaya folajlaculisli.

<sup>31</sup> Yoje cuaquín, Dios tejchihuilic mochi inon pan ipampa ilajmatilisli, tejchihuilic pa timochihuasi yoje quinami unca lajcuilluli pa ilajtol Dios, quijtúa: “Aqui quinequi lajtúa hué, ma lajtu hué inahuac in Tata Dios.”

## 2

### *Ilanahuatilisli Jesucristo, yihual hual cataya lapiluli pan cuahuil*

<sup>1</sup> Huan nehual, nocnían, in tonali hual nihualaya ca amhuanten, amo nilamachiltitihualaya quinami se lajtuni hué annimitzilijtica lajtomes huejué yojque hual lanextilíaya quinami nehual nicmatíaya míac in ilajmatilisli in

lalticpan. Yojque amo annimitzlamachiltic in hual Dios annijchihuilic pan ipampa Cristo.

<sup>2</sup> Ayamo niajsiaya ca amhuanten, nimolalic pa san niclamachiltiti-hualasquiaya ilajtol Jesucristo huan quinami cataya lamictili pin cuahuil.

<sup>3</sup> Huan nehual amo nicpiaya chicahualisli quiman nicataya ca amhuanten. Nimomajtiaya huan niyuyucaya míac.

<sup>4</sup> Huan in lamachiltisli cuali hual annimitzmachiltic, inon amo annimitzilic ca lajtomes huejué hual lanextililoaya inminlajmatilisli lacames. Amo nicnequiaya annimitzneltoalti yoje pan ipampa quinami annimitzlaquezataya. San annimitzlamachiltic ilajtol Dios ca in Espíritu Santo amnitlanextilijataya ilahueliltisli.

<sup>5</sup> Yoje annimitzlamachiltic amo sangá anquineltocasquiaya Cristo pampa anquitaya in lamachiltisli cuali quinami cataya len quimajtije lacames hual quimatilo. San nicnequiaya pa anquineltocasquiaya Cristo pampa anquitaya quinami Dios techmachiltía ilahueliltisli pan ipampa in lamachiltisli cuali.

### *Dios quimacahuiltía pa tiquiximatisi pan ipampa iEspíritu*

<sup>6</sup> Ma yoje, tilajtulo ca lajmatilisli sinda ticate ca yehuanten hual quimatilo pan ipampa quinami cuali quineltocalo ilajtol Dios. Huan inon amo in lajmatilisli hual monextililo lacames nican pin lalticpan. Huan amo unca inminlajmatilisli yehuanten hual huelitilo pin lalticpan. Inminlajmatilisli hual yehuanten quipialo yahui mopolúa.

<sup>7</sup> Amo yoje tilajtulo. Quema, tiquijtulo quinami Dios quinquixtilía lacames inminlajlaculisli hual quinhuiquilía polehuilisli. Lacames amo quiman quimatilo inon sinda Dios amo quinnextilía. Dios tejtzacuilic pa amaqui quimatisquiaya inon pan ipampa inminlajmatilisli lacames. Ma yoje Dios pan ipampa yihual ilajmatilisli quilalic quinami yahuiaya quinquixtili lacames inminlajlaculisli. In lamachiltisli cuali quijtúa pampa ayamo pehuac quichíac Dios in cielo huan in lalticpan quiman quilalic pa quichiasquiaya inon hual quichíac. Huan quichíac inon pa yoje ticpialosquiaya tolaxilulisli ca yihual ilahueliltisli huan ilaixpelalisli cualtichín.

<sup>8</sup> Inon hual Dios quilalic pa quichíac, amaqui ca yehuanten hual huelitiloaya pin lalticpan quimatiaya len quichijtataya. Sinda quimatiloaya inon, amo quimictiloaya pin cuahuil in Tata hual quipía mochi lahueliltisli huan unca in niman hué. Quema, yehuanten amo quimatiloaya in hual Dios quilalic pa quichiasquiaya.

<sup>9</sup> Jan quinami unca lajcuiluli pa iamal Dios ilajtol, quijtúa, quil: Amaqui quitac, amaqui quicaquic, huan amaqui quimatic lajtic iyolo len Dios quichijchihuc pa quipiasli yehuanten hual quilasojlalo, quil.

<sup>10</sup> Dios ilajtol quijtúa yoje, pampa unca pan ipampa in Espíritu Santo technextilic Dios inon tehuanten hual ticneltovalo. Unca pampa in Espíritu Santo technextilía mochi, quema, innojen de Dios hual etiaticate pa quimatis se len quinequilo quijtulo.

<sup>11</sup> Jan iyolo san hual unca lajtic se lalac quinmati innojen hual quinminamiquía se lalac. Huan jan yoje, jan Dios iEspíritu san quinmati innojen hual quinminamiquía Dios.

<sup>12</sup> Huan tehuanten amo technemiltía in espíritu hual quinnemiltía oc sequin lacames pin lalticpan hual quilalilo pa como quineltofacasi Dios. Pampa no, technemiltía iEspíritu Dios pa yoje huil ticmatilosquiaya in hual Dios techmaca huan tejchihuilía. Inon ticmatilo pan ipampa quinami tejchihuilía cuali.

<sup>13</sup> Huan innojen lajtomes hual antimitzililo amo cate lajtomes hual techmaxtije lacames pan ipampa inminlamaxtilisli. Cataya in Espíritu Santo hual techmaxtic. Huan inon hual iyaxca in Espíritu, unca in Espíritu Santo hual technextilía pan ipampa quinami quimati yihual. Jan yehuanten san hual quipialo in Espíritu Santo pa inminyolo quimatilo inon, quimatilo pan ipampa in Espíritu Santo.

<sup>14</sup> Se hual amo quipía iEspíritu Dios amo quinmoanilía innojen hual in Espíritu Santo techmaxtía, pampa yihual quinmita quinami lajtomes hual san quinneltocalo lacames hual amo laijnamiquilo cuali. Amo huil quimati len quinequilo quijtulo pampa jan in Espíritu Santo san huil quinextilía.

<sup>15</sup> Ma yoje, se hual quema, quipía iEspíritu Dios huil quimati mochi hual quilía in Espíritu Santo, huan amaqui huil quijtúa yihual moixpolúa.

<sup>16</sup> Unca pampa Dios ilajtol quijtúa: “Amaqui amo quiman quimatic quinami Dios laijnamiquía huan amaqui huil quimaxtía Dios”, quil. Ma yoje, tehuanten techhueliltía iEspíritu Santo Dios pa tilaijnamiqusi quinami Cristo.

### 3

#### *Ticjihjticate Dios itequipanulisli ca moxtin in laneltocanijmes*

<sup>1</sup> Huan nehual, nocnán, amo quiman huil annimitzmaxtiaya quinami niquinmaxtía lacames hual quipialo iEspíritu Santo Dios. Nicpiaya pa annimitzmaxtisquiaya quinami niquinmaxtiaya yehuanten hual amo quimacahuiltilo pa quinnejnemiltis in Espíritu Santo. Ancataya quinami xolomes hual lamije lacatije. Huan mas que anmochíac ilacames Cristo, amo huil anmonextiliaya quinami monequi pa yulisi yehuanten hual ilacames Cristo.

<sup>2</sup> Pampín annimitzmaxtiaya len amo etiactica pa quimatis se, amo annimziliaya lamaxtilisli chicahuac pampa yoje amo huil anmonextilisquiaya. Cataya quinami quilacualtilo se xolol tipichin ca leche huan amo ca nacal, pampa ayamo huil quicuajcua nacal. Huan amhuanten ayamo anmochahua pa ancayas quinami xolomes tijtipichin, pampa ayamo huil ancana lamaxtilisli chicahuac.

<sup>3</sup> Unca pampa ayamo anquimacahuiltilo pa anmitznejnemiltis Dios iEspíritu Santo. Ni quijtúa inon pampa anmochahuatilia huan amo anyuli mochi se se ca laijnamiquilisli san. Huan sinda anyuli yoje, amo anquimacahuilitica pa anmitznejnemiltis iEspíritu Dios. Anyultica quinami yehuanten hual amo quipialo iEspíritu Santo de Dios.

<sup>4</sup> Unca yoje, pampa sinda se ca amhuanten quijtúa: “Nehual niunca Pablo imonextilini”, huan oc se quijtúa: “Nehual niunca Apolos imonextilini”, yoje anlajtutica quinami lacames hual amo quipialo Dios iEspíritu Santo.

<sup>5</sup> Huan ¿len monotza Apolos? Huan ¿len nimonotza nehual Pablo? Jan ticate Dios itequipanujquimes san. Pan topampa tehuanten, amhuanten anquineltoac Jesucristo. Huan se se ca tehuanten tictequipanuilinijme in Tata quiman tictatanijme ca amhuanten, tictequipanuilinijme quinami yihual techhueliltic.

<sup>6</sup> Nehual annimitzilic Dios ilamachilitisli cuali, nicpehualtic ca amhuanten, niquinami se hual latocac pa se cuajmili. Cuaquinon hualac ca amhuanten Apolos pa anmitzmaxtisquiaya, yihual quinami se hual la'ajuiliaya. Ma yoje, cataya Dios hual quimíactiaya yehuanten hual quineltoaloaya ilajtol, yoje quinami momiactilo in pacholimes.

<sup>7</sup> Yoje, aquí hual latoca huan aquí hual la'ajuilia amo monotzalo len, unca Dios hual monotza pampa yihual quinmiactis in pacholimes. Huan jan yoje

amo monotza len yihual hual quipehualtía Dios ilajtol pa lacames huan sihuames huan cuaquín quinmaxtía. Unca Dios hual monotza mochi, pampa yihual quinmiactía yehuanten hual quinelto calo ilajtol.

<sup>8</sup> Dios quinmita aquí latoca huan aquí la'ajuilía quinami yehuanten jan se san. In omenten caté itequipanujquimes Dios huan se se canas ilaxlahuilisli, yihual canas yoje quinami tequipanuc.

<sup>9</sup> Yojqe unca, pampa tehuanten anmolamaxtinijmes ticate tequipanujquimes ca Dios, ticate lanechiculi ca amhuanten. Huan amhuanten anunca ixolomes Dios hual yihual anmitznextilijtica pa anquitequipanuilis. Yoje anlanextilía quinami Dios unca cuali, anlanextilía pan ipampa quinami antequipanúa anmoxtin ca se laijnamiquilisli. Dios unca quinami se hual quiztica imili pa laquis cuali pa yoje lapixcas míac, huan amhuanten anunca quinami Dios imili. Noje Dios unca quinami se hual quichía se cali, huan quinlalía in adobes inminnahuac pa yes se cali cuali. Huan amhuanten anunca quinami in adobes, Dios anmitztlalía se se huan se se capa yihual quinequí, pa yoje amhuanten anmochías jan se lanechiculi quinami yihual quinequí.

<sup>10</sup> Huan Dios nechmacac lahueliltilisli pa niqinpehualtis lacames huan sihuames hual monechicusi pa moximatisi yehuanten ilacames Cristo. Yoje niunca quinami se hual quipehualtía se cali lachi huali ca adobes, ma niqijtu quinami se hual quimati míac quinami se quipehualtía se cali pa itzindan. Yoje nel nicataya in se hual anmimitzpehualtic pa anmochiasquiaya iyaxca Cristo. Ma yoje, unca oc se quichijtica in cali pani in lapehualtili. Huan jan yoje, amhuanten hual anquinelto ca, yoje anmomiactítica. Axcán, ma quiztica cuali aquí yes quinami quinmaxtía ilacames Dios pa camo quipalas in lamaxtilisli calica niqinpehualtic.

<sup>11</sup> Amo unca oc se lamaxtilisli calica se huil quinpehualtía Dios ixolomes, jan ilamaxtilisli Jesucristo san.

<sup>12</sup> Sinda se quiscaltía se cali pani in lapehualtili, cuajnesi cana len hual ij'ipati, quinami oro huan plata huan tixcalitos hual ij'ipati, huan len hual amo ij'ipati quinami cuahuil huan surumota huan isacayo soyal huan in hual cana pa imili.

<sup>13</sup> Huan jan yoje momatis quinami se se quitequipanuilía in Tata, pampa quiman hualas Cristo oc se jpa, pa in tonali momatis inminlaixpan moxtin quinami se se quitequipanuilic. Dios yahui quichihuilía len itequipanulisli se se, pa quimatis sinda yahui huejcahua. Quichihuilía yoje quinami se quilalía oro pin tixuxli pa quichías oro chipahuac. Huan Dios, quiman quichías yoje pa se se itequipanulisli, cuaquín quichipahuilis o quixitinilis pa yoje momatis da Dios quitas cuali o amo cuali.

<sup>14</sup> Sinda quisas cuali se itequipanulisli hual quichihuilic pa Dios, cuaquín in se canas ilaxlahuilisli hual Dios quimacas.

<sup>15</sup> Huan sinda amo quisas cuali se itequipanulisli hual quichihuilic pa Dios, ma niqijtu, sinda Dios quita amo quisaya cuali itequipanulisli, cuaquinon in se amo canas len, mas que yihual ihuían quisas pin polehuilisli hual quihuiquilía ilaijlaculisli. Yoje cayas quinami se hual moquixtic pa se cali chichinajtica.

<sup>16</sup> Neli amhuanten anquimati pampa chanti ca amhuanten iEspíritu Santo Dios, huan pampa inon, anunca quinami Dios itio pan. Nesi quinami anquilcahuac inon.

<sup>17</sup> Ma yoje, sinda se quinmijlaculis inminyolo yehuanten capa yihual Dios chanti, da se quinmijlaculis ca lamaxtilisli amo cuali o ca laijlaculisli,

cuaquinon Dios quijlacus in se, pampa yihual chanti laijtic sejse ixolomes pan ipampa iEspíritu Santo. Yoje Dios quichías pampa yihual chanti ca amhuanten huan pampín, anunca chipahuac huan anunca pa Dios san.

<sup>18</sup> Ma camo mocuajcuamana amaqui. Sinda unca se ca amhuanten hual quijtúa pampa quimati míac ilajmatilisli in lalticpan, cuaquín ma mochías quinami se hual amo quimati nindeno. Ma niquijtu, ma quimacahuilti in se pa quitasi in lacames pin lalticpan quinami se hual amo laijnamiquía cuali, pa yoje mochías se hual quipía Dios ilajmatilisli.

<sup>19</sup> Quema, ma mochía yoje, pampa Dios quita quinami amo monotza nindeno in lajmatilisli hual quipialo lacames pin lalticpan hual amo quinelto calo in Tata. Ticmatilo Dios yoje quita, pampa yoje unca lajcuiluli ilajtol Dios, yoje quijtúa: “Yihual quinquitzquía yehuanten hual yulilo pin lalticpan hual quijtulo pampa quimatilo. Quintzacuilía pa camo lamisi cuali ca inminlachihualisli.”

<sup>20</sup> Huan pa oc se iamal ilajtol yoje quijtúa: “Quimati in Tata quinami laijnamiquílo yehuanten hual quimatilo, hual quipialo ilajmatilisli in lalticpan. Quimati in Tata quinami amo monotza inminlajmatilisli lacames.”

<sup>21</sup> Yoje cuaquín, ma camo lajtu hué amaqui inminahuac in lamaxtinijmes hual quintoca huan quinmita quinami huejué, pampa mochi unca anmoyaxca.

<sup>22</sup> Huil anmoanilis in hual cuali hual unca ca mochi huan hual moxtin quimacalo, ma ye Pablo, ma ye Apolos, ma ye Cefas, ma ye mochi hual Dios quichíac, ma ye yulilislisli, ma ye miquilislisli, ma ye len unca axan, ma ye len cayas. Yoje mochi huan moxtin cate anmoyaxca pa ancanas in hual cuali.

<sup>23</sup> Huan amhuanten anunca iyaxca Cristo. Huan Cristo unca iyaxca Dios.

## 4

### *In lanahuatinijmes inmintequipanulisli*

<sup>1</sup> Yoje, ma techitacan tehuanten lacames hual tictequipanuililo Cristo, ma techitacan lacames hual yihual techlajtultic pa ticlamachilitinemisi ilajtol Dios hual quipía naditas xixihuimes yihual pehuac quinnexilic yehuanten pin lalticpan.

<sup>2</sup> Huan amo inon san. Noje sinda se quipía ilajtultilisli len, cuaquín quipía pa yes se lalac hual iteco quiximati quinami se hual quimati yuli quinelto calo iteco.

<sup>3</sup> Ma yoje, pa nehual amo monotza len sinda lacames nechlajlanilo pa quimatisi da nilami nicchía cuali in tequipanulisli hual Dios nechmacac. Noje amo nimolajlanía nehual pa nicmatis sinda nicchijtica cuali in tequipanulisli hual Dios nechmacac.

<sup>4</sup> Niquijtúa inon, pampa mas que amo nicmati len amo cuali Dios cuajnesi quita ca notequipanulisli pa yihual, ma yoje amo unca pampa inon Dios quitas cuali notequipanulisli.

<sup>5</sup> Yihual hual unca iyaxca pa nechlajlanis quinami nicchía notequipanulisli unca in Tata. Yoje, ximocahuacan amhuanten pa camo anquijtus amo quichihualo cuali yehuanten anmocnián hual quinelto calo ca nehual. Quema, pampa ajsis in tonali hual Dios quilalic hual yihual quijtus sinda ticchihuaje cuali o amo ticchihuaje cuali, nicnequi niquijtúa, in tonali hual in Tata hualas oc sejsa. Cuaquinon momatis quinami Dios quinmita. Yihual noje quinnexitis mochi inon hual lacames quinchihuaje hual ayamo



romatic. Huan quinnextilis mochi hual in lacames neli quinequiye quichi-huaje lajtic inminyolo. Huan cuaquinon sejse quicaquis Dios lajtutica hué inahuac quinami quichiac.

<sup>6</sup> Ma yoje, nocñan, innojen lajtomes hual nilamic annimitzjcuilulic tonahuac nehual huan Apolos nicnequiaya pa cayas se lajtulisli pa annimitznextilis in hual monequi pa anquichías. Pan ipampa in lanextilisli nicnequi pa anmonextilis inon hual nía annimitzilia: Amo unca cuali sinda anlajtutinemi hué inahuac quinami anquitoca ilamaxtilisli se ca tehuanten in lanahuatinijmes. Annimitzilía oc se lanextilisli. Se lajtúa hué inahuac quinami yihual quitoca nolamaxtilisli huan quixixicúa oc se icni pampa yihual quitoca ilamaxtilisli Apolos. Ximonextilican pa anquitocas ilamaxtilisli Dios quinami unca lajcuiluli.

<sup>7</sup> Monequi pa anmonextilis anquichías inon mochi sejse ca amhuanten, pampa amaqui mitzita quinami se hual quipía se lahuelilitlisli hual oc sequin amo quipialo. Huan sinda cuajnesi ticpía se lahuelilitlisli hual oc sequin amo quipialo, ma yoje, ticanac in pampa Dios mitzmacac. Huan quinami neli unca ticanac mochi hual ticpía pampa mitzmacac Dios, cuaquinon ¿leca tilajtúa hué monahuac tehuall mohuían? Tiunca quinami se hual quijtúa pampa quipía mochi pan ipampa ilahuelilitlisli yihual ihuían.

<sup>8</sup> Anquijtúa pampa anquipía mochi hual monequi pa anquipías pa anmoyolo. Ma yoje amo neli unca. Anquijtúa pampa anquipía nican mochi in pin cielo pa anmoyolo hual Dios quita quinami ipati, huan amo neli unca. Anquijtúa anunca huejueyenten huan Dios anmitzita quinami huejueyenten. Huan tehuanten antechcahuaya antechilcajtataya pa yoje anyes huejueyenten amo ca tehuanten. Ma yoje, amo neli anunca quinami huejueyenten. Neli nicnequisquiaya pa Dios anmitzitasquiaya quinami huejueyenten pa yoje lacames techitalosquiaya noje quinami huejueyenten ca amhuanten.

<sup>9</sup> Nicnequisquiaya chicahuac pa inon techpanusquiaya, pampa niquijtúa Dios tejchiuilic tehuanten in lanahuatinijmes quinami amo timonotzalo nindeno pa inminlaixpan moxtin oc sequin pin lalticpan. Quema, yihual technextía pa inminlaixpan quinami sequin hual se la'ajuani lamic quijtuc pampa quipialo pa miquisi. Niquijtúa inon, pampa moxtin yehuanten pin lalticpan huan pin cielo, nicnequi niquijtúa, lacames huan ilanahuatinijmes in cielo (ilhuicac) techitalo quinami yehuanten hual quinmitalo innojen lacames laquitzquili hual caté lailpili huan yalo yelo lamictili pin lajcotiyan inminyampa moxtin.

<sup>10</sup> Yehuanten pin lalticpan quijtulo pampa amo ticmatilo tehuanten, huan inon pampa ticlamachilitinemilo ilamaxtilisli Cristo. Huan amhuanten anquijtúa pampa anquimati míac pan ipampa Cristo huan oc sequin hual iyaxca Cristo amo quimatilo yoje míac. Yehuanten pin lalticpan techitalo lacames hual amo ticpialo chicahualisli, huan amhuanten anmoita quinami anquipixtica chicahualisli. Amhuanten anquijtúa pampa anyultica quinami huejueyenten huan oc sequin quijtulo lajtol hué pa amhuanten. Huan tehuanten in lanahuatinijmes tejxixiculo quinami amo timonotzalo pa technextilisli momajtilisli.

<sup>11</sup> Quema, quiman tipehuaje huan pa axan, tiyulilo timayanticate huan tiamicticate huan amo ticpixticate in tzotzomajli hual monequi pa ticpiasi. Techcocotilo huan amo ticpialo capa tichantilo.

<sup>12</sup> Huan titequipanulo chicahuac ca tomajmajuan pa timolacualtisi. Tech-huejuecaltilo, tiquinmililo len cuali de Dios. Techtojtocono pa tejchiuilisli

amo cuali, tiquinmacahuilito, amo timolacuepililo.

<sup>13</sup> Sinda techmotexpahuililo ca len hual amo unca melahuac, tiquinnan-quililo ca lajtomes yajyamanquil pa camo cualanisi pa yoje mopatilisi inminyolo. Quema, quiman tipehuaje huan pa axan, yehuanten pin laticpan techitalo quinami len lamontulisli palantica, tehuanten techitalo quinami tilacames pucmic. Quema, techitalo jan quinami quitalo catzahualisli hual quiquixtililo mochi pin laticpan hual quichipahualo.

<sup>14</sup> Amo annimitziycuiluilijtica innojen lajtomes pa annimitzpinajtis. San nicnequi annimitzmaca lajtulisli chicahuac amhuanten hual anunca quinami noxolomes hual niquinlasojla míac.

<sup>15</sup> Pampín, mas que cuajnesi cate niman míac yehuanten hual anmitzitalo pa anmitzlaicanasi pa iojli Cristo, amo cate míac lacames hual anmitzpehualtic pa ancanas Cristo iojli. San cataya se san, nehual nicataya. Cataya quinami nehual anotajtzin hual annimitzlacatilic pa anyes iyaxca Cristo, pampa anlacatic pa ancanas yulilisli yancuic pan ipampa quinami nehual annimitzilic in lamachilitlisli cuali.

<sup>16</sup> Yoje, annimitzmaca lajtulisli chicahuac, xiyulican quinami nehual, jan quinami se ixolomes yulilo quinami yihual inmintajtzin.

<sup>17</sup> Huan pa anyes lapalehuili pa anyulis quinami nehual, yoje annimitztilanilijtica Timoteo. Yihual quinami noxolol hual niclasojla míac, huan yihual amo mocahua pa quitocas in Tata huan Cristo iojli. Yihual Timoteo anmitzijnamiquiltis mochi inon quinami niyultía nicnectica nicneltocatica mochi ilajtol Cristo. Yoje niquinmaxtía ilacames Cristo pa yulisi, niquinmaxtía cajcapa yes ilacames monechiculo.

<sup>18</sup> Ma yoje, cate sequin ca amhuanten hual quijtulo yehuanten cate huejueyenten huan amo momajtilo, pampa quijtulo amo nías capa anunca amhuanten.

<sup>19</sup> Mas que quijtulo yoje, nehual nías huan amo nihuejcahuas pa nías ca amhuanten sinda Dios quinequi. Huan amo niquinneltocas quinami lajtulo in lacames hual lajtulo ca lajtomes huejué pa yehuanten inminhuían. Ma yoje, nicmatis sinda neli quipialo lahuelilitlisli.

<sup>20</sup> Inon nicmatis, pampa amo momati da Dios huelitía pan se pan ipampa len quijtúa in se. Momati da Dios huelitía pan ipampa quinami moita pampa quiptía lahuelilitlisli hual Dios quimaca.

<sup>21</sup> Axcán, ¿len anquinequi? ¿Anquinequi pa nías ca amhuanten nicualantica quinami se itajtzin hual yahui quinhuitequía ixolomes? O ¿anquinequi pa nías amo nicualantica ca amhuanten ca lasojlalisli, pa yoje amo monequis pa niqijtus lajtomes chichicahuac?

## 5

*Quinmillá monequi pa quijtusi quiptías pa quisas capa yehuanten in se hual canac isihua itajtzin*

<sup>1</sup> Mocaqui pa mochi cajcapa quinami ca amhuanten unca se hual canac se sihual hual amo iyaxca. Huan quinami yihual quichiác inon, yoje in lacames hual amo quinefocalo Dios amo quimacahuilito pa se lalac canas sihual yoje quinami in lalac ca amhuanten hual canac itajtzin isihua.

<sup>2</sup> Huan ¡xiquitacán! ¡Ma yoje amhuanten anlajtúa ca lajtomes huejué pa amhuanten quinami anquijtuaya pampa Dios amo yahui anmitzmotexpahuilía! Niman amo cana cuali pa anquijtus inon pa anmoyolo. Monequi pa anmitzcocus míac anmoyolo pampa in se quichiác in niman amo cuali. Annimitzilía, xijquixtican pa capa amhuanten in se hual quichiác inon.

<sup>3</sup> Anquipía pa anquichías yoje, pampa nehual, mas que amo niunca nepa ca amhuanten, ma yoje nicmati pa noyolo len annimitzilisquiaya sinda nepa nicataya. Huan axan niqijituc pampa in se quipía pa quisas pa capa amhuanten. Inon niqijituc quinami nicataya ca amhuanten. Quema, mas que yihual se ca Cristo ilacames, ma yoje quichíac in laijlaculisli niman elehuis.

<sup>4</sup> Pampa inon, niqijituc in se quipías pa quisas huan inon annimitzicuilulíá nicpíxtica ilahuelilitlisli in Tata Jesús. Monequi pa anmonechicus nepa ca ilahuelilitlisli toTata Jesús nepa ca amhuanten pa anmitzpalehuis. Huan nehual nicayas annimitzijnamíctica huan niclajlantica Dios quinami nicataya umpa ca amhuanten.

<sup>5</sup> Monequi pa yes laquixtili pa camo cayas ca amhuanten in lalac hual quichíac in niman amo cuali. Xictemacacan ca Satanás pa Satanás huelitis capa yihual. Yoje icuerpo mochijías cocoxqui. Cuaquín yajmo quinequis quichías in laijlaculisli. Quiman anquitemacas ca Satanás, cuaquinon Dios huan ilacames yajmo quipias pa quitasi nindeno ca yihual. Monequi pa quipanus yoje pa quipalas iyolo huan pa yes lachipahuali pa camo cayas ca laijlaculisli pan in tonali hual mocuepas in Tata.

<sup>6</sup> Anquimacahuilitica pa mocahuas ca amhuanten in lalac huan pampín, amo unca cuali quinami anlajtúa hué amnopampa amhuanten. ¿Amo anquimati quinami quijtulo: “Nadita laxocoyajquil quiteposahualtis mochi in texli”? Huan jan yoje, jan nadita laijlaculisli hual moitilía ca Dios ilacames huil mopanultía ca moxtin, huan quiman panusi tonalijmes, quinmijlacus moxtin.

<sup>7</sup> Pampa inon, ximochipahuilican pa yajmo cayas anmolajlaculisli. Anyulini pa yina anquichijtataya laijlaculisli. Axan xiquijnamiquican quinami in judíos quinchipahualo inminchan pa mochijchihuasi pa inminfiesta (ilhuil) pascua pa yoje amo mocahuas calijtic laxocoyajquil nindeno. Yoje inon unca se lachihualisli pa anmitznextilis quinami anquipía pa anmochipahuilis pa yajmo cayas ca amhuanten anmolajlaculisli hual anquichihuani. Quiman anquichía yoje, anmochías quinami anmitznextilía ilachihualisli in texli yancuic hual amo quipía laxocoyajquil. Axan xiyulican quinami lacames hual Dios quinyulitlic yoje yancuic, lacames hual amo quipíalo laijlaculisli. Cate quinami se texli yancuic hual amo quipía laxocoyajquil, amo teposahua. Ca in texli quichihualo pan hual quícualo quiman quimictilo in borreguito pa in fiesta (ilhuil) itoca pascua. Huan noje tohuendi lamictili pa in pascua unca Cristo, yihual quinami se borreguito hual Dios quilalic pa yes lamictili pa techquixtilía tolajlaculisli.

<sup>8</sup> Yoje, ma tiyulican quinami monequi pa yulisi Cristo ilacames. Axan ma camo tiyulican quinami tiyulinijme pa yina, lacames laijlaculisli ticchijtataloaya len amo cuali. Axan ma tiyultiacan melahuac pa quimatisi moxtin quinami Dios techyulitlic quinami yancuic. Ma camo ticchihuacan in hual tipinahualosquiaya ticchihualo.

<sup>9</sup> Pa quimaniyan annimitzicuilulic se amal. Ca in amal annimitzilic pa camo anquipías len pa anquitas ca yehuanten hual canal o se sihual o lalac hual amo inminyaxca. Huan annimitzilic pa camo anquipías len pa anquitas ca yehuanten hual quichihualo o se lachihualisli quinami inon.

<sup>10</sup> Amo nicnequiaya niqijitu pa camo quiman anquipiasquiaya nindeno pa anquitasquiaya ca yehuanten pin lalticpan hual amo Dios ilacames, yehuanten hual canal o se sihual, o se lalac hual amo inminyaxca hual amo monamictic ca yihual, huan quichihualo len amo cuali quinami inon. Huan amo niqijituaya pa camo anquinmitasquiaya ca lacames hual

amo mocaualo pa quinequisi niman míac, míac, huan quinmajmanililo oc sequin. Huan amo niqijtuaya pa camo anquinmitasquiaya ca lacames hual quinmolancuacuetzililo oc sequin dioses. Sinda amo anquitaya ca yehuanten, cuaquín monequiaya pa anquisasquiaya pin lalticpan pa anmicuanisquiaya capa yehuanten.

<sup>11</sup> Inon, quema, nicnequiaya niqijtu: Annimitzjcuiluilic pa camo anquipiás len pa anquitas ca se hual tiqijitulo yihual unca tocni pampa quineltoca in Tata huan ma yoje cana síhual, lalac hual amo iyaxca, se hual quichía len quinami inon, se hual quinequi quipía míac, míac, se hual quinmolancuacuetzililo oc sequin dioses, se hual lahuejuecaltía, se hual unca lahuanquil, se hual unca laxtequini. Quema, annimitzjcuiluilic pa camo quiman anlacuas ca in se.

<sup>12</sup> Mas que amo unca iyaxca pa se ca Dios ixolomes quijtus pampa yehuanten hual amo Dios ixolomes quipiasí pa yesi la'ajuali pampa quichihualo laijlaculisli, ma yoje, unca amhuanten anmoyaxca pa anquijtus pampa quipiasí pa yesi la'ajuali yehuanten hual quema, caté Dios ixolomes hual quichihuaje laijlaculisli.

<sup>13</sup> Huan yehuanten hual amo ixolomes Dios, yihual Dios ihuían quijtus da quipialo pa yesi la'ajuali pampa quichihualo inminlajlaculisli. Axan, amhuanten xijquixtican pa capa amhuanten in lalac laijlaculi.

## 6

*Quinmilá pa camo yasi ca inmintexpahuilisli inminlaixpan la'ajuanijmes hual amo quineltocalo Dios*

<sup>1</sup> Nimolapolultía quiman nijcaquía quinami amhuanten amo anquimati anmomajti pa yas inminlaixpan in la'ajuanijmes hual amo ilacames Dios quiman quipía pa quimotexpahuilis icni hual quineltoca Cristo. Nimolapolultía pampa amo quimotexpahuilía inminlaixpan ixolomes Dios. ¿Quinami huil amo quimati momajtía se pa quichías yoje?

<sup>2</sup> ¿Amo anquimati ilacames Dios yalo quisehuilo mochi inminlatexpahuilisli yehuanten hual Dios quinchíac hual cate pin cielo (ilhuicac) huan pan lalticpan? Quema, anyahui anquinchihuilía inon yehuanten. Huan yoje, axan neli unca nican pan lalticpan anquipía lahuelilitisli pa anlajlanis pa anquimatis quinami anquisehuís mochi latexpahuilisli hual amo monotzalo míac.

<sup>3</sup> ¿Amo anquimati pampa tiahulo tiqinsehuilo mochi inminlatexpahuilisli in lanahuatinijmes pin cielo? Huan, pampa neli unca anyahui anquisehuía, noje unca neli anquipía lahuelilitisli huan lajmatilisli pa anquisehuís innojen hual quinpanulo lacames quiman yulticate pan lalticpan.

<sup>4</sup> Cuaquinon, sinda cuajnesi cayasi latexpahuilisli ca amhuanten hual anunca Dios ilacames, cuaquinon ¿leca anquinmacahuiltía pa quinsehuilisli yehuanten hual moxtin laneltocanijmes quinmitalo quinami lacames hual amo monotzalo míac?

<sup>5</sup> Inon annimitzilijtica pa annimitzpinajtis. ¿Amo unca se capa amhuanten ca lajmatilisli hual huil quisehuilis se latexpahuilisli ca se tocni huan oc se tocni?

<sup>6</sup> Capa amhuanten, se tocni motexpahuía ca oc se tocni, huan ¡inon quichihualo inminlaixpan la'ajuanijmes hual amo quineltocalo Dios!

<sup>7</sup> Sinda anmotexpahuís inminlaixpan yehuanten hual amo quineltocalo Dios, cuaquín pampa inon anmijsulahuac in amo cuali, pampa cataya se latexpahuilisli ca amhuanten hual anunca Dios ilacames. Yesquiaya cuali pa

se quimacahuiltis pa oc se icni quichihuilisquiaya amo cuali huan mopepenialtisquiaya. Quema, yesquiaya cuali pa quimacahuiltisquiaya oc se icni quicajcayahuasquiaya huan in se mopepenialtisquiaya. Inon yesquiaya cuali, huan amo yoje cuali unca pa se motexpahuisquiaya inminlaixpan yehuanten hual amo quineltocalo Dios.

<sup>8</sup> Amhuanten, mas que anunca Dios ilacames, ma yoje anquinchihuilía amo cuali oc sequin huan anquincajcayahua, mas que cate anmocñan.

<sup>9</sup> ¿Cuajnesi amo anquimatiaya yehuanten hual yulilo quichijtcate len amo cuali amo quipiasí laxilulisli pin cielo ca Dios capa huelitía? Amo ximocuaajcuamanacan. Aquí hual monipanúa ca se huan oc se calica amo monamictía amo quipíasí laxilulisli ca Dios. Huan yoje unca ca aquí hual quinmolancuacuetzilía inminlaixpan monos o len yes pa quimolancuacuetzilís. Huan unca yoje ca aquí hual monipanúa ca isihua oc se, o ca ilahuical oc se. Unca yoje ca se lacal hual quimacahuiltía pa oc se lacal monipanus ca yihual quinami monipanulo ca se sihual. Huan aquí hual unca lacal huan cana oc se lacal pa monipanus quinami lacames monipanulo ca sihuames noje amo quipiasí laxilulisli ca Dios.

<sup>10</sup> Huan jan yoje, se laxtequini, huan aquinojen hual quinequilo míc, míc len yes, huan lahuanquimes, huan aquinojen hual lahuejuecaltilo, huan aquinojen hual lamictilo pa laxtequisi, quema, yehuanten hual yulilo quichijtcate innojen amo quipiasí laxilulisli pin cielo (ilhuicac) ca Dios.

<sup>11</sup> Huan sequin ca amhuanten anyulini anquinchijtataya lejlen quinami innojen. Ma yoje, ancataya lachipahuali pa anmoyolo pa yes laquixtili anmolaijlaculisli. Ancataya lalalili pa anyes san Dios ilacames chijchipahuac, huan Dios umpa quijtt pampa unca lapujpuhuali anmolaijlaculisli. Yoje Dios huil anmitzita amo anquixtica laiylaculisli. Inon Dios anmijchihuilic pan ipampa ilahueliltisli itoca in Tata Jesucristo huan pan ipampa iEspíritu Santo toDios.

### *Se icuerpo monequi pa mocahuas chipahuac pa Dios*

<sup>12</sup> Sequin quijtulo: “Ticate lamacahuilti pa ticchihuasi len yes ticnequilo ticchihuasi hual Dios amo quijtuc pa camo ticchihuasi.” Inon quijtulo. Ma yoje, amo mochi inon tejchihuililo cuali sinda tiquinchihuasi, huan cuajnesi amo quinchihuililo cuali oc sequin sinda tiquinchihuasi. Niunca lamacahuilti pa niquinchías mochi innojen. Ma yoje, nehual amo nicmacahuiltis pa noyolo nejchihualtis innojen.

<sup>13</sup> Laijtuc pa toyolo capa timayanalo, monequi pa ticpiasi len tijcuasi. Huan Dios techmacac mochi len tijcuasi. Ma yoje, Dios amo quinchías toyolo huan in hual tijcualo pa huejcahuasi yesi yoje. Se tonali Dios quinlamis toyolo huan in hual tijcualo. Jan yoje ca se icuerpo Dios amo quichías pa in se monilus ca aquí yes quiman yes in se quinequi. No, amo quiman, pampa Dios tejchihuilic tocuerpos huan quinequi pa ticneltocasi yihual ca yehuanten. In Tata unca pa se icuerpo, pampa yuli pa tocuerpos huan yojqe huil tiyulilo quinami yihual quinequi.

<sup>14</sup> Huan quichías Dios inon, quiyuliltic in Tata Jesús oc sejpa quiman miquic. Huan yihual noje techyuliltis oc sejpa tehuanten pan ipampa ilahueliltisli.

<sup>15</sup> Amhuanten, quema, anquimati pampa amhuanten hual anquinelto ca Cristo anunca iyaxca Cristo jan quinami tomajma huan tocñan cate toyaxca pa techtequipanullisli. Yoje, amo unca cuali pa nehual nicanas in hual iyaxca Cristo pa nimonilus ca se sihual hual monilúa ca calía yes lacal. No, ¡ma camo quiman niqijtu pa noyolo pa nicchías yoje!

<sup>16</sup> ¿Amo anquimati sinda se monilúa ca se sihual amo cuali, yoje huan yihual mochihuasi quinami se cuerpo? Yoje unca, pampa Dios ilajtol quijtúa: "In omenten mochihuasi se." Yoje Dios quinmita.

<sup>17</sup> Huan aqui hual quimaca iyolo in Tata Jesús, yoje huan yihual mochihuasi se san.

<sup>18</sup> Ximomajtican pa como anmonilus ca se sihual o lalac hual amo mosihua o molañuical, ximijcuantiquisacan quiman yes anmoitas capa huil anquichías inon. Mochi oc se ilachihualisli laijlaculisli hual quichía se amo quijlacúa icuerpo quinami quiman monilúa ca se hual amo iyaxca. Aquí hual quichía yoje mochihuilía laijlaculisli pampa quijlacúa icuerpo huan yoje quijcuaniltía icuerpo pa como cayas ca Cristo icuerpo.

<sup>19</sup> ¿Amo anquimatiaya in Espíritu Santo chanti lajtic anmocuerpos? Quema, yoje unca, huan anmocuerpos (anmonacayo) amo anmoyaxca amhuanten, pampa Dios anmitzcuhuac. Laxlahuic pa amhuanten, ipatiaya niman míac in laxlahuilisli.

<sup>20</sup> Pampín, anquipía pa anquinoxtilis Dios momajtilisli pan impampa anmocuerpos jan quinami anquinoxtilía momajtilisli pan impampa anmoyolo, pampa in omenten cate iyaxca Dios.

## 7

### *Quinmilía quinami monequi pa yulisi quiman monamictilo*

<sup>1</sup> Axan ma annimitznanquili innojen lajtomes hual annehclajlanic quiman annehijcuiluilic pa anmoamal. Anquijtuc unca cuali pa se lalac amo monilus ca se sihual.

<sup>2</sup> Ma yoje, moita se míac quiman iyolo unca latilanili pa monilusi huan se sihual sinda amo quipía isihua. Huan yoje unca ca se sihual sinda amo quipía ilahuical. Pampín, ma quipía sejse lalac isihua pa yihual ihuían. Huan sejse sihual ma quipía ilahuical pa yihual ihuían.

<sup>3</sup> Pa isihua, monequi pa se lalac motemacas pa monilus ca yihual, pampa pa isihua unca iyaxca. Huan jan yoje pa ilahuical, monequi pa se isihua motemacas pa monilus ca yihual, pampa pa ilahuical unca iyaxca yihual.

<sup>4</sup> Unca pampa pa isihua amo unca iyaxca ihuían icuerpo (inacayo) yihual. Noje unca iyaxca ilahuical. Huan jan yoje, amo unca iyaxca ihuían icuerpo in lalac, noje unca iyaxca isihua.

<sup>5</sup> Se lalac ca isihua, ma como moquixtilican in hual inminyaxca pa monilusi. Jan quiman anmocahuas ca se lajtulisli pa como anmonilus pa se ome tonalijmes san quiman anquinequi anpanúa in tonalijmes anquilajlantica Dios, cuaquín huil anmocahua pa anmonilus. Huan quiman laquisalo in tonalijmes, xipehuacan ximonilucan oc sejpa, amo san gá Satanás anmitztilanilis anmoyolo pa anquichías in hual amo cuali hual cuajnesi anquinequis míac pa anquichías.

<sup>6</sup> Ma yoje, amo annimitziliztica pampa anquipías pa anquichías se lajtulisli quinami inon. Annimitziliztica huil anquichía yoje sinda anquijtúa yes cuali pa amhuanten.

<sup>7</sup> Nehual nicnequisquiaya pa moxtin lacames yelosquiaya quinami nehual, lacames hual quípialo lahueliltilisli pa motzacuilisli pa como monilusi ca sihuames. Ma yoje, sejse quipía ilahueliltilisli hual Dios quimacac, se quipía in lahueliltilisli, oc se quipía oc se lahueliltilisli.

<sup>8</sup> Pa yehuanten hual amo cate lanamictili huan pa in sihuames hual miquije inminlahuicalhuan, niquinmilía unca cuali pa mocahuasi yehuanten quinami nehual noje niunca.

<sup>9</sup> Ma yoje, sinda quinequilo míac monilusi quinami lacames ca sihuames, cuaquín ma monamictican, pampa cuali unca pa se monamictis pa camo yulis chichinajtica laijtic pampa quinejnectica quipía isihua.

<sup>10</sup> Huan yehuanten hual monamictije, niquinmilía chicahuac, huan no, unca in Tata hual quinmilía chicahuac, pa camo moxilu se sihual pa yajmo yulis ca ilahuical.

<sup>11</sup> Sinda quema, moxilúa, ma mocahua ihuían, ma camo monamicti ca oc se, o ma caya jan sejpa ca ilahuical, ma chantican in omenten oc sejpa. Huan se lalac, ma camo moxilu pa camo yulis ca isihua.

<sup>12</sup> Huan in oc sequin niquinmilía inon: Sinda se tozni hual quineltozac Cristo, da quipía isihua hual amo quineltozac Cristo huan ma yoje isihua quinequi caya yultica ca yihual, cuaquín ma camo moxilu ilahuical pa yajmo yulis ca yihual.

<sup>13</sup> Huan se sihual hual unca iyaxca Cristo, sinda quipía ilahuical hual amo quineltoza Cristo, huan quinequi caya yultica ca in sihual, ma camo moxilu pa yajmo yulis ca ilahuical.

<sup>14</sup> Ma ye yoje, pampa in sihual hual quineltoza Cristo unca se san ca ilahuical. Yoje quinmita Dios in omenten jan se san. Pampín Dios quita ilahuical quinami yihual chipahuac, pampa unca chipahuac isihua. Huan jan yojque, in lalac hual quineltoza Cristo unca jan se san ca isihua. Yoje Dios quinmita. Pampín Dios quita isihua quinami yihual chipahuac pampa unca chipahuac ilahuical. Sinda amo yoje cayasquiaya, cuaquinon anmoxolomes cayalosquiaya xolomes hual Dios amo quinmitasquiaya chijchipahuac. Ma yoje, quinami cate axan, Dios quinmita quinami chijchipahuac, pampa se ca imintajtzitzian Dios quichipahuac pa yes se ixolol.

<sup>15</sup> Huan sinda moxilúa yihual hual amo quineltoza Cristo, pa yajmo yulis ca isihua o ilahuical cuaquín ma moxilu. Sinda yoje panúa, tozni lalac huan tozni sihual amo quipía pa mocahuas monamictitica ca in se hual moxilúa. Dios technotzac pa tiyesi ilacames pa tiyulisi ca mosehuilisi pa toyolo.

<sup>16</sup> Damo huil ticmati neli, nocni sihual, da ticpalehuis molahuical pa quineltozac Cristo. Huan damo huil ticmati neli, tozni lalac, da ticpalehuis mosihua pa quineltozac Cristo.

<sup>17</sup> Jan inon san, ma yuli sejse quinami cataya quiman Dios quintonzac pa yes se ca ilacames. Niquinmilía chicahuac pa yulisi yoje moxtin tocnían cajcapa yes chantilo huan monechiculo quinami quichihualo Dios ilacames.

<sup>18</sup> Sinda quipía se pa icuerpo ilacotonalisli in judíos, nicnequi niqijtúa, da quipiaya lacotonali icuilaxli quiman Dios quintonzac, ma camo quitemu quinami huil quimopolutilis in lacotonalisli. Sinda se amo quipiaya in lacotonalisli quiman Dios quintonzac, ma camo quinmilican pa quicotonilisi icuilaxli quinami quichihuililo in judíos.

<sup>19</sup> Amo monotza nindeno sinda se quipía in lacotonalisli o sinda se amo quipía in lacotonalisli. Quema, monotza mochi pa se yulis quichijtica quinami quijtúa Dios.

<sup>20</sup> Ma mocahua sejse jan quinami cataya quiman Dios quintonzac pa yes se ca ilacames.

<sup>21</sup> Ma annimitznextili in ca se lajtulisli. Sinda Dios quintonza se pa yes pa yihual huan in se quipía iteco hual quimocuhuilic pa quitequipanuilis, cuaquín ma camo quijtu in se pampa yihual amo monotza nindeno. Ma yoje, sinda huil quitas quinami huil quisas pa yajmo yes iyaxca iteco, ma quichia.

<sup>22</sup> Amo monotza nindeno ca Dios sinda yec lalac lacuhuali pa quitequipanuilis iteco quiman Dios quintonzac. Huan amo monotza sinda amo



yec lalac lacuhuali quiman Dios quinoztac. Sinda unca lalac lacuhuali, axan yuli inahuac in Tata hual quimacahuac pa yajmo yes se ilalac iteco Satanás hual quichihualtini laijlaculisli. Huan jan yoje, yihual hual amo yec lalac lacuhuali quiman Dios quinoztac, ma yoje, axcan yihual quipía Cristo quinami iteco.

<sup>23</sup> Dios anmitzcuhac pa anyes iyaxca, huan laxlahuic míac pa amhuanten.

<sup>24</sup> Pampa inon, amo ximochihuacan lacames hual anquinpía quinami anmotecojuan lacames hual anmitzlatzaculisli pa camo anquichías in hual Dios quinequi. Yoje, nocnían, ma yultía seje quinami yec quiman Dios quinoztac, sinda yec lalac lacuhuali pa quitequipanuilis iteco o amo lalac lacuhuali, ma yultía quilalijtica ilaneltocalisli ca Dios.

<sup>25</sup> Amo nicpía lajtol hual nechmacac in Tata pa annimitzilis pa sihuames hual ayamo moniluje ca se lalac. Ma yoje annimitzilía len nicmati unca lajtol cuali inahuac inon, pampa nechmachiltic in Tata ca lajmatilisli huan yoje lacames huil quineltocasi pampa in hual niquinmilía unca quinami Dios quijtusquiaya.

<sup>26</sup> Yoje, niqijtúa inon unca cuali. Nicnequi niqijtúa, amo yahui huejcahua pa moitasi tonalijmes quiman Dios ilacames yalo quipanulo míac lacocoltilisli. Pampín unca cuali pa yes yoje se quinami nía annimitzilía:

<sup>27</sup> Sinda se monamictic, ma camo quitemu quinami moxilus pa yajmo yulis ca isihua. Sinda se amo monamictía, ma camo quitemu sihual pa monamictis.

<sup>28</sup> Huan sinda, quema, timonamictía, amo ticchía laijlaculisli pampa ticchíac inon. Huan sinda monamictía se sihual hual ayamo moniluc ca se lalac, yihual noje amo quichijtica laijlaculisli sinda monamictía. Ma yoje, panusi lacocoltilisli pampa monamictije, huan nicnequisquiaya pa camo anquipías pa anpanus inon.

<sup>29</sup> San inon, nocnían, nicnequi niqijtúa. Amo huejcahuasi míac in tonalijmes hual Dios techcahuilic pa ticchihuasi inon hual yihual quinequi. Axcan huan pa mosta, yehuanten hual quinpioalo inminsihuahuan, ma quitequipanuilian in Tata ca mochi inminyolo quinami amo quipialoaya pa quinmijnamiquilosquiaya inminsihuahuan.

<sup>30</sup> Huan yehuanten hual quincocujtica inminyolo, ma quitequipanuilian in Tata quinami amo quicocuhuaaya inminyolo. Yehuanten hual quipixticate paquilisli, ma quitequipanuilian amo quijnamicticate míac in hual quinpaquiltic. Huan yehuanten hual lacuhuanijmes huan lanamacanijmes ma quitequipanuilian in Tata quinami amo quipialoaya pa quijnamiquilosquiaya in hual quinamacalo huan quicuhualo.

<sup>31</sup> Yehuanten hual tequipanulo ca mochi innojen hual cate pin lalticpan, ma quitequipanuilian in Tata quinami amo quinmonotziliaya nindeno innojen hual cate pin lalticpan. Monequi pa quijtsi yojque laijtic yehuanten inminyolo, pampa amo yahui mocahua toyulilisli pin lalticpan yojque quinami ticmatilo.

<sup>32</sup> Nicnequisquiaya pa anyultías amo anquixtica momajtilisli inahuac mochi innojen pin lalticpan hual amo yalo huejcahualo. Aquí hual amo monamictía, ca yihual monotza mochi hual quinequi in Tata, laijnamiquía quinami huil quipaquiltía in Tata.

<sup>33</sup> Huan aquí hual monamictía, pa yihual monotza iyulilisli pin lalticpan, huan quimonotzilía quinami huil quipaquiltía isihua.

<sup>34</sup> Huan yojque quinpio in omenten pa quinpaquiltis, in Tata huan isihua. Huan in sihual hual amo monamictía huan in sihual yancuic hual ayamo



monamictía, yoje ca yehuanten monotza in hual quinequi in Tata, pa yojque yesi chijchipahuac pa inminyolo huan pa yesi jan pa in Tata san, sejse icuerpo huan iyolo. Amo unca yoje ca in sihual hual monamictía. Pa yihual monotza iyulilisi pin lalticpan huan quimonotzilía quinami huil quipaquiltila ilahuical.

<sup>35</sup> Inon hual annimitzilía unca lajtól ca míac lapalehuilisi pa amhuanten. Amo annimitzilijtica inon pa annimitzlatzacuilis pa como anmonamictis. Annimitzilijtica inon pa anyulis anquichijtías in hual amo quiman mocahua pa canas cuali, huan pa anyulis anquitequipanuilijtías in Tata ca mochi anmoyolo. Huan sinda anyulis yoje, amo anmijtzacuilis nindeno pa como anquitequipanuilis in Tata.

<sup>36</sup> Axcán, sinda se lalac quipía ixolol sihual hual ayamo moniluc ca se lalac, huan yihual quijtúa laijtic iyolo pampa amo unca cuali pa quitzacuilis pa como monamictis pampa in xolol sihual axan moscaltic huan quinequi míac monamictía, cuaquin ma quichía in lalac quinami quinequi, amo quichijtica laijlaculisli yoje. Ma monamicti in xolol sihual ca in lalac.

<sup>37</sup> Huan yihual quichía cuali hual quilalic chicahuac pa iyolo pa quipixtías ixolol sihual pa como monamictis. Ma yoje, quichías cuali san sinda amo monequi pa quimacahuiltilis ixolol, quema, quichías cuali sinda quipixtías ixolol amo lanamictili, sinda neli quilalic yojque pa iyolo.

<sup>38</sup> Yoje, quichía cuali sinda quitemaca pa monamictis ixolol sihual hual ayamo moniluc ca se lalac. Ma yoje, yihual quichía niman cuali sinda amo quitemaca pa monamictis ixolol sihual hual ayamo moniluc ca se lalac.

<sup>39</sup> Se sihual mocahua iyaxca ilahuical pa mochi in xixihuimes hual yuli in lalac. Huan sinda miqui ilahuical, cuaquinon unca iyaxca in sihual pa monamictis ca oc se lalac hual quixtoca. Ma yoje monequi pa in lalac hual quixtoca yes se ca Cristo ilacames.

<sup>40</sup> Mas que monequi pa yes yoje, nehual niquijtúa yihual cayas ca paquilisli sinda mocahua ihuían. Niquijtúa da amo cayas ca yoje míac paquilisli sinda monamictía oc sejpa. Huan niquijtúa Dios in Espíritu Santo nechnextilijtica in unca niman cuali pa in sihual.

## 8

*¿Huil tijcualo nacal hual quilalilo inminlaixpan monos hual quinmolan-cuacuetzililo?*

<sup>1</sup> Axcán ma annimitzijcuiluilía inahuac nacal hual cataya lalalilo quinami huendi ilaixpan se mono hual quimolancuacuetzililo. Timoxtin ticmatilo monos amo monotzalo nindeno. Ma yojque, sinda se quimati inon, cuaquin huejtica yahui quijtúa pa iyolo pampa yihual hué. Amo unca yoje ca se hual quimati lalasoja, yihual quinchihuilía cuali moxtin ilacames Dios.

<sup>2</sup> Sinda se quijtúa laijtic iyolo pampa quimati len, cuaquin mocuajcuamana, pampa ayamo quimati quinami monequi pa quimatis.

<sup>3</sup> Huan sinda se quilasoja Dios, yoje Dios quiximati in se quinami se ca ilacames.

<sup>4</sup> Yoje, tiquijtulo inon inahuac len quicuasi hual quilalilo ilaixpan se mono quinami huendi. Ticmatilo se mono neli amo yuli huan amo monotza nindeno pin lalticpan huan pin cielo. Huan ticmatilo amo unca oc se Dios, jan se san.

<sup>5</sup> Huan ma yojque, mas que cate míac hual lacames quijtulo pampa cate dioses, ma cayacan pin cielo (ilhuicac), ma cayacan pan lalticpan, yehuanten

neli cate m'iac dioses huan m'iac ijyecames amo cuajcuali hual huelitilo ca yehuanten hual amo Dios ilacames.

<sup>6</sup> Huan mas que unca yoje pa yehuanten, pa tehuanten jan unca se Dios hual toTajtzin. Capa yihual quisaje mochi hual unca, huan pa yihual ticate pa tictequipanuilis. Huan unca se toTata Jesucristo, pan ipampa yihual Dios quinch'iac mochi. Huan pan ipampa Cristo, tehuanten toyolo techyuliltil'ia Cristo ca yulililisi yancuic.

<sup>7</sup> Ma yojque, amo moxtin quimatilo inon. Huan sequin hual motequi-huinijme quicualo in hual quilalilo ilaixpan in mono quinami huendi, axan cate tocn'ian pan ipampa in Tata. Ma yojque sinda axan quicualo in hual cataya lalalili ilaixpan in mono quinami huendi, moitalo laijlaculi pampa inon. Huan yojque moitalo quinami yajmo chipahuac inminyolo. Pampa inon, quincocolt'ia pa inminyolo calica quimatilo len unca cuali huan len amo unca cuali.

<sup>8</sup> Huan tehuanten, len yes tijcuasi amo tejchihuililo nindeno quinami timoitalo ca Dios. Sinda amo tijcualo, amo ticpolulo nindeno in hual Dios techmaca, huan sinda quema, tijcualo, ticpiasi san inon hual iyaxca Dios.

<sup>9</sup> Ma yoje, mas que unca anmoyaxca pa anquicuas inminlacuali hual quilalilo inminlaixpan monos hual quinmolancuacuetzililo, ximoitacan cuali pa camo cuajnesi anquichihuilis pa se tocni quich'ias laijlaculisli. Sinda in tocni quimahuil'ia pampa in hual Dios quimacahuil't'ia pa quich'ias, yihual huejtica quich'ias laijlaculisli da mitzitas tijcuas.

<sup>10</sup> Pamp'ín, monequi pa camo tijcuas. Mas que ticmati monos amo monotzalo nindeno, yihual amo neli quimati inon. Huan sinda mitzitas tehual tijcuajtica pan capa yehuanten quicualo in huendis hual quinlalilo inminlaixpan in monos, cuajnesi amo yahui momajt'ia quicuas inminlacualisli in monos. Cuaquín quicuas, mas que quimahuil'ia ca ilajmatilisli hual quinextil'ia len unca cuali huan amo cuali.

<sup>11</sup> Huan yojque, tiqijlacus yihual hual cuajnesi ayamo mocahuac pa momajtisquiaya nadita inahuac in mono. Noje tiqijlacus pan ipampa quinami tehual ticmati in mono amo monotza len. Huan mocni cayas laijlaculi, mas que Cristo miquic pa yihual.

<sup>12</sup> Yojque, ticchihuilic laijlaculisli mocni, tijcocoltilic iyolo pampa yihual amo motzacuilic pa camo quichiasquiaya in hual yihual quijt'ua laijtic iyolo amo unca cuali. Huan yojque anquich'ias laijlaculisli ilaixpan Cristo.

<sup>13</sup> Pamp'ín, sinda nocni nehual quich'ias laijlaculisli pampa nechita nijcuatica len yes hual tijcualo, cuaquín amo quiman nijcuas inon oc sejp'a, amo san gá quich'ias laijlaculisli nocni pampa nehual nijcuac.

## 9

### *Pablo quijt'ua in hual unca iyaxca se lanahuatini*

<sup>1</sup> Nehual Dios nechmacahuil't'ia pa nich'ias mochi. Amo nicp'ia len niqitas ca inon hual quijt'ua in lajtol inahuac in hual monequi pa se quich'ias pa quimolancuacuetzilis Dios. Huan niunca se lanahuatini hual yihual in Tata nechlajtultic, niqitac Jesús toTata yultica oc sejp'a. Amhuanten anunca se ca in Tata pan ipampa quinami annimitzmachiltic ilajtol. Inon cataya notequipanulisli ca amhuanten.

<sup>2</sup> Cate sequin hual nechitalo quinami se lanahuatini, huan cate oc sequin amo quinequilo nechitalo quinami se lanahuatini hual Dios quilajtultic. Ma yojque unca melahuac nel niunca ilanahuatini Dios, huan amhuanten anquimati nehual niunca ilanahuatini. Pan nopampa nehual anmoch'iac in

Tata ilacames. Huan pampa axcan anunca ilacames in Tata, noje inon axcan anmitznextilía neli pampa nehual nilanahuatini hual in Tata nechlajtultic. Niunca quinami layapali pan anmoyolo. Jan yoje momati se amal unca neli amal se caltilan pampa in la'ajuani quiyapa iamal ca itemulol.

<sup>3</sup> Huan inon hual nía niquijtúa unca in lajtol calica nimonapatía ca yehuanten hual nechlajlanilo pa quimatis sinda neli nicpía lahuelilitisli hual Dios nechmaca.

<sup>4</sup> Unca noyaxca pa nicanas len nijcuas huan len nicunis hual nechmacalo.

<sup>5</sup> Ca capic nías, unca noyaxca pa nicuicasquiaya umpa nosihua hual quineltoca Cristo sinda nicpiaya nosihua. Unca noyaxca jan quinami unca inminyaxca innojen oc sequin lanahuatinijmes, quema, quinami icnían in Tata huan Cefas noje.

<sup>6</sup> Huan amhuanten ¿anquijtúa pampa jan nehual huan Bernabé san amo unca toyaxca pa timocahuasi pa titequipanusi pa timolacualtisi pa yoje timolalisi pa ticlamachiltisi in lamachiltisli cuali? Neli unca toyaxca.

<sup>7</sup> Amo unca se guache hual tequipanúa ihuían pa molacualtisi. Amo unca se hual quilachilía iuvatilan oc se huan amo quicua ilaquilyo in uvatilan. Huan amo unca se hual quilachilía se quesqui sihuacuacujmes huan amo cuni inminleche.

<sup>8</sup> Inon amo niquijtutica pampa in lacames hual quipialo lahuelilitisli quilalililo yojque.

<sup>9</sup> Inon unca lajcuiluli pa ilajtol Dios hual Moisés techmacac, in lajtol hual monequi pa ticneltocasi, quijtúa: “Amo tiquilpilis iyacatzol in buey hual quitelíca inmiehuimes in trigo.” ¿Anquijtúa Dios quimacac in lajtol pampa jan quinmijnamiquiaya san bueyes?

<sup>10</sup> No, Dios quijtuc inon pa tejchihuilisquiaya cuali tehuanten in lanahuatinijmes. Neli cataya lajcuiluli pa tehuanten pa yojque ticchialosquiaya ticmazticate yihual techmacas len monequi. Inon ticanasi pampa ticlamachiltiyo ilajtol Dios huan tiquinmaxtiloaya yehuanten hual quineltocaje ilajtol. Tolaxlahuilisli ticchialosquiaya jan quinami aquí laxahua huan aquí lapixca, quichialo quimazticate pampa yalo canaló se ilajco in trigo quinami laxlahuilisli.

<sup>11</sup> Ticxinije ilajtol Dios quinami se latocli capa amhuanten, pa yojque anquipiasquiaya mochi hual yes cuali pa anmoyolo, pa yoje amo anmocahuas pa anyulis pa iojli Dios. Pampa antimijchihuilije inon, cuaquinon unca neli amo antimitzljajlanticate mías sinda ticchialo pa antechmacas nadita in hual anquipía pa huil timolacualtisi. Yoje yesquiaya quinami tilapixcatialosquiaya capa amhuanten capa tilatocaje.

<sup>12</sup> Inon unca toyaxca tehuanten in lanahuatinijmes. Huan sinda ca oc sequin itequipanujquimes Dios unca inminyaxca pa canasi quinami inminlaxlahuilisli in hual anmoyaxca hual anquinxilulía, cuaquín pa tehuanten unca niman mías toyaxca pa huil ticanalosquiaya tolaxilulisli. Ma yoje tehuanten amo quiman ticchihuaje yojque ca in hual unca toyaxca. Inon, quema, ticchihualo. Timolalilo pa timopepenialtisi ca mochi hual techajsi sinda amo ticpialo inon hual monequi. Amo ticnequilo pa lacames cuajnesi quijtusi ticanalo mías tomin pampa ticlamachiltiyo ilajtol Dios. Yoje yehuanten cuajnesi yelosquiaya latzacuali pa camo quineltocalosquiaya Cristo ilamachiltisli cuali.

<sup>13</sup> Neli anquimati quinami yehuanten hual quitequipanuililo Dios pin tiopan hué molacualtilo ca inminacal in huendis hual lacames quihualicalo pa in tiopan. Quema, yehuanten quilalilo in huendi capa quichichinulo pa

quimolancuacuetzilisi Dios huan canaló inminlaxilulisli in nacal hual unca lalalili ipan.

<sup>14</sup> Huan jan yojque in Tata noje quilalic pa molacualtisi yehuanten hual quilamachiltulilo in lamachiltulisli cuali pan ipampa quinami quinlamachiltulo in lamachiltulisli cuali.

<sup>15</sup> Ma yoje, nehual amo quiman niccháac yoje, mas que cataya noyaxca pa nicchías. Huan amo niqunmijcuilúa innojen lajtomes pa yoje niaysis nicmatis sinda neli amhuanten anyahui annechlacualtía. Sinda monequiaya pa nimiquisquiaya pa yoje amo annimitzanilisquiaya laxlahuilisli, cuaquin nimiquiaya. Amaqui yahui nechquixtilia in hual unca noyaxca pa nilajtus hué pampa amo annimitzljajlanis pa annechlacualtis.

<sup>16</sup> Sinda niclamachiltitinemi in lamachiltulisli cuali, huan pampín annechlacualtía, yoje annechlaxlahuic. Pampín amo cayas noyaxca pa nilajtus hué. Dios nechlalilic pa niclamachiltijtías ilamachiltulisli cuali. Huan ¡len amo nipanús la'ajualisli chicahuac sinda amo niclamachiltis in lamachiltulisli cuali!

<sup>17</sup> Pampín, nicchá pampa nehual nicnequi, huan nicpías nolaxlahuilisli. Huan sinda amo nicnequiaya nicchá, ma yoje nicataya lachihualtili pa nicchiasquiaya, Dios nechlalilic pa niqutilijtías.

<sup>18</sup> ¿Len, axan, unca nolaxlahuilisli? Nolaxlahuilisli unca pa annimitzlamachiltis in lamachiltulisli cuali huan pa como annimitzljajlanilis nindenó pampa annimitzlamachiltic. Yoje niquita quinami nolaxlahuilisli inon pampa amo niccháac quinami unca noyaxca pa annimitzljajlanilis nolaxlahuilisli.

<sup>19</sup> Unca pampa mas que amo niunca se hual quipía iteco hual amo quilaxlahuía, ma yojque nimochía quinami se hual yuli quinami moxtin cate itecojuan. Pampín nimochía pa niqunpalehuis quineltocasi Dios yoje míac lacames quinami huil niquneltocaltis.

<sup>20</sup> Quema, nimochíac nehual quinami se judío quiman niqunmilijtica in judíos in lamachiltulisli cuali. Nicnequi niqijtúa, quiman niqunmilijtica in lamachiltulisli cuali, nimochía quinami se hual yuli quichijtica in hual quijtúa inminlajtol in judíos hual quimaxtía quinami monequi quitequipanuilisi Dios. Huan mas que nehual nohuían amo nicpía pa nijcactías inminlajtol in judíos, ma yojque nijcactías pa niqunpalehuis quineltocasi in judíos hual yulilo quichijtcate len quijtúa inminlajtol.

<sup>21</sup> Huan quiman niqunmilijtica in lamachiltulisli cuali yehuanten hual amo quimatilo in judíos inminlajtol, cuaquinon nehual nimochía quinami se hual amo yuli quinami quijtúa in judíos inminlajtol inahuac quinami quitequipanuililo Dios. Yojque niqunpalehuía pa quineltocasi yehuanten noje. Ma yoje, nicneltoca Dios ilajtol, huan Cristo ilajtol unca lajtíc noyolo pa nicneltocas.

<sup>22</sup> Cate yehuanten hual quimahuililo pa quichihuasi in hual ilamaxtilisli Cristo quijtúa huil quichihualo. Ca yehuanten nimochía se hual amo quichía in hual quijtulo cuajnesi amo unca cuali. Yoje nicchá pa niqunpalehuis pa quineltocasi ca chicahualisli in lamachiltulisli cuali. Ca moxtin nimochía mochi quinami nehual huil pa niyes quinami yehuanten. Yoje nicchá pa cuajnesi niqunpalehuis sequin pa moquixtilisi pin polehuilisli ca capic quinhuca inminlajlaculisli.

<sup>23</sup> Huan nicchá mochi inon pampa niclasojla in cuali lamachiltulisli. Nicchá pa yojque nicpías ca in oc sequin in míac hual in cuali lamachiltulisli quijtúa pampa Dios yahui quinxiluilía moxtin hual quineltocalo.

<sup>24</sup> ¿Amo anquimati quinami unca ca yehuanten hual molalulo pan se laluxtilisli? Moxtin molalulo huan ma yojque jan se san cana in laxlahuilisli. Yojque, ximolalucan pa ancanas in laxlahuilisli. Nicnequi niqijtúa, xiyulican ca mochi amochicahualisli quinami Dios quinequi, pa ancanas in hual Dios quijtuc neli pampa yahui anmitzmaca.

<sup>25</sup> Pan se laluxtilisli, sejse quichía mochi hual huil pa quipanahuis. Huan pa mochijchías pa quipanahuis, yihual quijcuanía mochi hual quitzacuilis pa camo quipanahuis. Yehuanten hual mochijchihualo yojque quichihualo pa yoje canasi se laxlahuilisli hual unca se layahuali lachihuali ca isacayo se cuahuil. Huan in layahuali amo huejcahuas miac tonalijmes. Tehuanten, amo quinami yehuanten, ticanasi chicuenta se layahuali hual huejcahuas, amo quiman lamis.

<sup>26</sup> Yoje, nehual nicchía mochi hual huil nicchía pa nicanas nolaxlahuilisli. Amo nicchía quinami se hual molalúa huan amo quimati ca capic molalus pa canas. Huan amo niquinami se hual moantica ca imajmajuan amo quitecuatica nindeno.

<sup>27</sup> San inon nicchía: Nicsulahua chicahuac nocuerpo pa yoje nicchías len yes hual nicmati pampa nicpias pa nicchías. Unca quinami nicmochicahualtilía nocuerpo. Quema, nicsulahua pa nechneltocas, amo san gá nicpolus nolaxlahuilisli. Inon nicchía pampa cuajnesi sinda amo yoje nicchías, Dios amo quitas cuali notequipanulisli pa yihual. Huan inon mas que niquinlamachiltic oc sequin in cuali lamachiltisli.

## 10

### *Quinmaca lajtol chichahuac yehuanten hual quinmolancuacuetzililo monos*

<sup>1</sup> Nocnían, nicnequi pa anquimatis inon: Quiman totajtztiztían in israelitos yajtiahuiloya pa inminlali, moxtin cataloaya itzindan in mextemil, huan yehuanten moxtin quipanajtiaje in Al Huejcalan Chichiltic.

<sup>2</sup> Huan pampa quipiaje Moisés quinlaicantataya, quineltocaje huan uyaje itzindan imextemil inapatilisli Dios huan quipanajtiaje in Al Huejcalan Chichiltic. Inon lanextilía quinami yehuanten yeje lacames hual cate lacuayatequili quiman quijtulo yalo quitocalo in Tata ca mochi inminyolo.

<sup>3</sup> Moxtin yehuanten quicuaeje inon hual Dios nepa pin cielo quintilanilic.

<sup>4</sup> Moxtin cuniloaya al hual Dios quinmacac, quisac pa se tel. Huan cataya quinami yehuanten noje cuniloaya pa inminyolo ial in Tel. Mochi tonali in Tel quintocaya, huan in Tel yec Cristo.

<sup>5</sup> Huan mas que Dios quinmiztiahuaiaya mochi in tonalijmes hual yajtiahuiloya, ma yoje, in miac ca yehuanten amo quipaquiltiyoaya Dios. Pampín miquije cajcapa nepa pin lali capa amaqui chantiaya.

<sup>6</sup> Mochi inon hual quinpanuc yehuanten cate lanextilisli pa tehuanten, pa camo ticayasi lacames hual ticnequilo len amo unca cuali, quinami yehuanten nojen quinequiloaya.

<sup>7</sup> Huan amo ximochihuacan lacames hual quinmolancuacuetzililo monos quinami sequin ca yehuanten, jan quinami unca lajcuiluli, quijtúa: “Yehuanten molalije pa lacuasi huan pa launisi, huan moquetzaje pa mahuiltisi mijtijticate”, quil. (Yoje quinextilije lasojlalisli inminmono hual quichihuaje.)

<sup>8</sup> Huan ma camo timonilucan lacames ca sihuames pa ticchihuasi len amo cuali, quinami sequin ca yehuanten quichihuaje amo cuali lacames ca sihuames hual amo yeje inminsihuahuan. Huan pampa quichihuaje inon, pan jan se tonali san miquije veintitrés mil ca yehuanten.

<sup>9</sup> Huan ma camo tijcuilmatijtiacan pan iojli in Tata. Da ticchihuasi yoje, cuaquín ticchihuilijticate len pa tiqitasi quichi amo cuali Dios techmacahuiltis pa ticchihuasi huan ma yoje amo tejtzacuilis. Sequin ca yehuanten totajtzitzían quichihuaje yoje, huan hualaje cuhuames huan quincuaajcuaaje. Yoje miquije míac totajtzitzían.

<sup>10</sup> Huan ma camo tila'ajuajtiacan ilaixpan Dios quinami sequin ca yehuanten la'ajuajtiahuinjme huan pampín temuc pin cielo Dios ilanahuatini lamictini in cielo huan quinmictic míac ca yehuanten.

<sup>11</sup> Mochi inon hual quinpanuc yehuanten cataloaya quinami laijnamiquiltisli pa tehuanten. Dios quichíac pa moijcuilusi innojen lajtojes pa yihual technextilis quinami monequi pa timoiztiasi ca melahualisli, tehuanten hual tiyulilo pin tonalijmes hual axan ajsije. Pampín ximoiztiacan, pampa tehuanten tiyulilo quiman lanticate itonalijmes in laticpan hual axan unca.

<sup>12</sup> Yoje, aquí quijtúa pampa amo quiman yahui quisa pan iojli Cristo, ma lachixtía cuali amo san gá quichías laijlacuilisli huan yoje quisas pa yajmo quitocas iojli Dios.

<sup>13</sup> Innojen amo cuajcuali hual anmitzpanúa amhuanten cate jan innojen hual quinpanulo moxtin oc sequin. Ma yoje, amhuanten huil anquimati pampa anmitzpalehuía Dios. Yihual amo quimacahuiltis pa anmitzpanus len amo cuali hual amo huil anmopepenialtía pa anpanus. Anmitzajsis in amo cuali, Dios anmitzmacas quinami huil anquisas cuali pa inon, huan cuaquinon yoje huil anmopepenialtis.

<sup>14</sup> Cuaquín, lajlasojli nocnían, ximomajtitiacan pa camo anquinmolancuacuetzilis in monos, pa yojque amo quiman anmoitas capa quinmolancuacuetzililo.

<sup>15</sup> Amhuanten anuncia lacames huan sihuames hual anquimati, huan annimitzilijtica inon pampa yoje anuncia. Huil anquimati amhuanten nojen pampa unca cuali in hual annimitzilía.

<sup>16</sup> Iayo uva coc pin tapalquita hual ticunilo tolaxilulisli ca in oc sequin tocnían, tipehualo tilajlanticate Dios, ticsejticate Dios pa inon. Quiman ticchihualo inon, yojque ticnextilo pampa ticneltocalo quinami pa tehuanten Cristo quitoyahuac iesli pin cuahuil. Huan in pan ticlapanalo huan tijcualo sejse tolaxilulisli ca in oc sequin tocnían. Quiman ticchihualo inon, yoje tilanextililo quinami ticneltocalo Cristo panuc míac lacocoltilisli pa tehuanten.

<sup>17</sup> In pan hual unca lalapanali ca míac lajlajco, ma yoje unca san se pan. Huan tehuanten, mas que ticate míac lacames huan sihuames, ma yoje ticate san se ca Cristo, pampa timoxtin sejse ticpialo tolaxilulisli ca se pan. Huan quinami mochi in lajlajco cate ca se pan, yojque timoxtin hual tijcualo in pan, ticate se, jan quinami icuerpo Cristo unca se san.

<sup>18</sup> Xiquitacan quinami motequihuil in israelitos quiman quimolancuacuetzililoaya Dios quinami quijtúa inminlajtol. Yehuanten quicualo inon hual quilalilo quinami huendi pani inon capa quinchichinulo huendis. Yoje cate quinami inahuac Dios pan ipampa in huendi.

<sup>19</sup> Axcán, ¿len nicnequi niquiqtúa pan ipampa in lajtomes? Nicnequi niquiqtúa pampa amo monotza nindeno in hual yehuanten hual amo quineltocalo Dios quilalilo quinami huendi pa ilaixpan se mono. Huan amo nicnequi niquiqtúa pampa in mono ihuán monotza len.

<sup>20</sup> Inon, quema, nicnequi niquiqtúa: Neli, yehuanten hual amo quineltocalo Dios quilalijticate inminhuendi inminlaxpan ijyecames amo cua-

jcuali quiman quilalilo ilaixpan se mono. Amo quilalijtcate ilaixpan Dios. Huan amo nicnequi pa anmochías lacames hual quipixtialo ilaxilulisli len hual inminyaxca ijyecames amo cuajcuali.

<sup>21</sup> Ancuni iayo uva coc pa itapalquita in Tata. Pampa inon monequi pa como ancunis noje in tapalquita hual unca inminyaxca ijyecames amo cuajcuali. Monequi pa como quiman anquichías inon. Huan anlacua capa quicualo ilacualisli in Tata. Pampa inon monequi pa como anquipías anmolaxilulisli ca ijyecames amo cuajcuali ipan capa monechicuo yehuanten hual quilalilo len quicuasi inminlaixpan ijyecames amo cuajcuali.

<sup>22</sup> ¿Tijcualantisi Dios pa tejchahuatilis topampa tehuanten? ¡Neli unca amo ticpialo míac chichahualisli quinami yihual quipía!

### *Monequi pa tiyulisli tiquijnamicticate quinami timopalehuisi timoxtin*

<sup>23</sup> Tehuanten huil ticpialo huan huil ticchihualo mochi hual Dios amo quijtuc pa como ticpiasi huan pa como ticchihuasi. Ma yoje, amo unca mochi innojen hual techpalehuía tehuanten. Huan noje amo unca mochi hual quinpalehuía oc sequin. Huil ticpialo mochi huan huil ticchihualo mochi. Ma yoje amo mochi innojen tejchihuililo pa timochihuasi ilacames Dios cuali quinami yihual quinequi.

<sup>24</sup> Ma como caya amaqui hual yuli quitemujtca quinami huil mopaquilúa yihual ihuían. San monequi pa quitemus in hual cayas cuali pa in oc sequin.

<sup>25-26</sup> Mochi hual quinamacalo pin lajcotiyan (tianquisli) capa mocuhuililo len quicuasi, inon xijcuacan huan amo ximomajtican da cuajnesi cataya nacal hual quilalije quinami huendi inminlaixpan in monos. Amo monequi pa anquilajlanía capa canaje in nacal pampa in lalticpan huan mochi hual unca pin lalticpan unca iyaxca in Tata. Pampín amo xicmahuilican sinda anquichijtca cuali o amo cuali sinda anquicua.

<sup>27</sup> Sinda se hual amo quineltoca Dios anmitznotzas pa anlacuas ca yihual, huan anquinequi anyahui ca yihual, cuaquín xijcuacan mochi hual anmitzlanilis anmolaxpan, huan amo xilajlanican da unca huendi pa se mono. Ma como anmitzlanjlacutili anmolajmatilisli calica anquimatis len unca cuali huan len amo unca cuali.

<sup>28</sup> Ma yoje, sinda se anmitzilis in unca inacal se huendi hual cataya lalalili ilaixpan se mono, cuaquín amo xijcuacan, pampa yoje ticpias momajtilisli pa yihual hual anmitzlamachiltic pampa cataya huendi. Mas que mochi pin lalticpan unca iyaxca in Tata, ma yoje amo ticnequi ticchihuilia amo cuali yihual ilajmatilisli calica quimati len unca cuali huan len amo unca cuali.

<sup>29</sup> Amo niqijjtutca amhuanten anmolajmatilisli calica anquimatis in cuali huan in hual amo cuali. San niqijjtutca yihual ilajmatilisli, yihual hual anmitzlic pampa cataya huendi. Dios nechmaca pa yes noyaxca pa nijcuas len yes nicnequi. Amo monotza nindeno sinda se nechmotexpahuilia ca Dios pampa quijtúa in hual nehual nicchijtca amo unca cuali. Quema, amo monotza nindeno, pampa Dios nechnextilic yihual amo quita nindeno amo cuali ca len nijcua. In se nechmotexpahuilia pampa amo chichahuac ilajmatilisli calica quimati in cuali huan amo cuali.

<sup>30</sup> Sinda nicsehuía Dios pa in hual nijcua, cuaquín ¿leca nechmotexpahuilia pampa nijcua in? Nicsehuic Dios pa inon, huan yajmo niqijnamiquía pampa quilalic ilaixpan in mono.

<sup>31</sup> Yoje, nocnían, monequi pa anyulis anmopalejtca moxtin, ma ye sinda anquicuas, ma ye da ancunis, ma ye da anquichías len yes. Xicchihuacan mochi pa yoje anquichihuilis Dios mochi pa yoje anquinextilis quinami Dios unca hué.



<sup>32</sup> Xiyulican yoje pa camo anquichías nindeno hual oc sequin quijtulo amo unca cuali, ma yén (yecan) judíos, ma yecan yehuanten hual amo judíos, ma yecan yehuanten hual ilacames Dios.

<sup>33</sup> Jan yoje, nehual niyuli niquinpaquiltitica moxtin pan ipampa mochi hual nicchía. Amo niyuli nictemujtica len yes nechpalehuis pa nicpiás len nicnequi nehual. San nictemúa pa nicchías len yes quinpalehuis yoje moxtin, pa yoje yehuanten yesi laquixtili pin ipolehuilisli inminlaijlaculisli huan pa yoje canasi in yulilisli yancuic hual Dios quinmacas.

## 11

<sup>1</sup> Ximochihuacan quinami nehual, xiyulican xilachijtiacan quinami nehual, jan quinami nehual noje niyuli nilachijtía quinami Cristo.

*Quinami monequi lachihualo in sihuames quiman monechiculo pa quimolancuacuetzililo Dios*

<sup>2</sup> Axcan ma annimitzili pampa niquita cuali quinami annehijnamiquía nehual huan mochi in hual annimitzmxtic. Huan mochi tonali anyajtía anquinneltocatica mochi ilajtomes in lamaxtilisli hual monequi pa quinneltocasi Dios ilacames jan quinami annimitzmxtic.

<sup>3</sup> Ma yoje, nicnequi pa anquimatis Cristo quipía lahueliltilisli pa quilaicanas mochi lacames. Huan se lalacal quipía lahueliltilisli pa quilaicanas isihua, huan Dios quipía lahueliltilisli pa quilaicanas Cristo.

<sup>4</sup> Monequi pa mochi lalacal pinahuas hual quilajlanía Dios o quimaxtía ilajtol Dios huan quipía lalalili ilasehualoni (sombbrero) pa itzontecon, pampa inon amo cana cuali. Sinda se lalacal quitzacuulis itzontecon, unca quinami quijjtutica pampa oc se lalacal inahuac Cristo quipía lahueliltilisli pa quilaicanas.

<sup>5</sup> Huan sinda se sihual quilajlanía Dios huan quimaxtía ilajtol Dios amo quipixtica latzacuali itzontecon, yoje yihual amo quimati momajtía ipampa itzontecon huan monequi pa mopinahuas pampa amo cana cuali. Nesi quinami yihual quijjtúa pampa quipía lahueliltilisli se lalacal. Inon pinahua jan quinami quiplaya laximali itzontecon quinami moximalo in lacames.

<sup>6</sup> Yojque, sinda se sihual amo quinequi motzacuilia itzontecon, ma moxima. Huan sinda neli unca pinahualisli pa se sihual quipías laximali itzontecon, cuaquinon ma motzacuili itzontecon.

<sup>7</sup> Quema, ma caya yojque, pampa in lalacal quipía pa quichías yoje. Monequi pa como motzacuulis itzontecon, pampa yihual unca lachihuali pa nesis chicuenta Dios huan yoje quinextía nadita ilahueliltilisli Dios. Amo yoje in sihual. In sihual Dios quichíac pa quinextis quinami Dios quichíac in lalacal pa quipías lahueliltilisli.

<sup>8</sup> Unca yojque, pampa in lalacal Dios amo quichíac pan ipampa in sihual, quichíac in sihual pan ipampa in lalacal.

<sup>9</sup> Noje Dios amo quichíac in lalacal pa yes ilapalehuini in sihual, quichíac in sihual pa yes in lalacal ilapalehuini.

<sup>10</sup> Pampa inon monequi pa se sihual motzacuulis itzontecon pa quinextis quinami ilahuical quipía lahueliltilisli pa yihual. Noje monequi pa motzacuulis itzontecon pa quinnextilis in lanahuatinijmes pin cielo quinami yihual quimati Dios quita cuali pa se sihual motzacuulis itzontecon. In lanahuatinijmes pin cielo amo mochualo pa cayasi ca tehuanten quiman ticmolancuacuetzilijticate Dios.



<sup>11</sup> Ma yoje, aquinojen yesi hual yulilo inahuac in Tata, in lalac huan in si-hual cate jan se, lacames amo yulilo amo quipixticate inminlapalehuilisli in sihuames, huan sihuames amo yulilo amo quipixticate inminlapalehuilisli in lacames. Dios amo quinmita in lacames cuali huan in sihuames amo yoje cuali. Quinmita se jan quinami in oc se.

<sup>12</sup> Huan quiman Dios quipehualtic mochi, in sihual yec lachihuali pan ipampa in lalac. Axan in lalac lacati pan ipampa in sihual. Dios quinchíac mochi huan quilalic pa yesi yoje.

<sup>13</sup> Xiquitacan huan xiquijnamiquican len unca cuali. ¿Anquijtúa cana cuali pa se sihual quilajlanis Dios sinda amo unca latzacuali itzontecon? No, amo cana cuali.

<sup>14</sup> ¿Amo anmitznextilía inon quinami Dios quinchíac lacames pampa unca pinahualisli pa se lalac sinda quipía itzondi huejcanic?

<sup>15</sup> Ma yoje, sinda se sihual quipía itzondi huejcanic, unca cualtichin pa yihual. Huan cana cuali quiman quipía yoje. Unca pampa Dios quimacac in sihual itzondi huejcanic pa yes chicuenta latzacuali itzontecon.

<sup>16</sup> Yoje, sinda se nesi quinami quinequi quinlaxilía lajtomes inahuac inon, ma quimati pampa tehuanten in lanahuatinijmes amo ticchihualo oc se lachihualisli quiman ticlajlanilo Dios huan quiman ticmaxtilo ilajtol. Huan amo quichihualo oc se lachihualisli in oc sequin omitos ilacames Dios cajcapa monechiculo pa quimolancuacuetzilisli.

### *Amo cana cuali quinami in corintotecos quicualo ilacualisli in Tata*

<sup>17</sup> Axan, ca inon hual nía annimitzlaquetzilía, nía annimitzilía pampa amo anquichijtica cuali. Quiman anmonechicúa, amo anmitzpalehuía, anmijchihuilía amo cuali.

<sup>18</sup> Nipehua annimitzlaquetzilijtica inon: Quiman amhuanten in laneltocanijmes anmonechicúa pa anquimolancuacuetzilis Dios, nechililo pampa amo mocahua pa cayasi sequin hual amo cate ca se lajtulisli ca oc sequin. Huan niquijtúa pampa nadita in hual nechililo unca yoje quinami quijtulo.

<sup>19</sup> Unca pampa quipía pa cayasi lacames hual amo cate ca se lajtulisli ca in oc sequin hual quineltocalo cuali in lamaxtilisli hual in lanahuatinijmes quinmilije. Quema, quipía pa cayasi in lacames pa yoje capa anunca amhuanten momatisi cuali calía cate yehuanten hual neli quineltocalo Dios ilamaxtilisli.

<sup>20</sup> Yoje, mas que anmonechicúa pa anquimolancuacuetzilis Cristo pan ipampa ilacualisli in Tata, neli amo unca ilacualisli in Tata hual anquicua.

<sup>21</sup> Amo huil yes ilacualisli in Tata sinda pehualo lacualo sequin quiman ayamo ajsilo in oc sequin. Huan yoje, lami inon ca se hual mayantica, huan oc se hual cunic miac mochía lahuantica.

<sup>22</sup> ¿Leca, nuso? ¿Amo anquipía anmochan capa huil anlacua huan anlauni? ¿Leca amo anmocahúas nepa pa anlacuas huan anlaunis? Quiman anlacua yoje capa anmonechicúa, anquinxixicujtica ilacames Dios hual cate lanechiculi nepa, huan anquinpinajtía yehuanten hual amo huil quipialo len quicualo. ¿Len annimitzilía amhuanten pampa anquichía inon? ¿Annimitzilis len cuali pampa anquichía yoje? ¡Xiquitacan! ¡Amo quiman annimitzilis len cuali pampa anquichía yoje, annimitzajua!

### *Ilacualisli in Tata*

*(Mt. 26:26-29; Mr. 14:22-25; Lc. 22:14-20)*

<sup>23</sup> Annimitzijnamiquiltis in hual annimitzilic pa anquimatisquiaya leca tijcualo ilacualisli in Tata. Annimitzilic quinami yihual noje nechmachiltic,

unca inon: Pa in layúa quiman Judas quitemacac in Tata Jesús ca yehuanten hual quinequiloaya quimictilo, Jesús canac pan.

<sup>24</sup> Huan quiman quisehuic Dios, quilapanac in pan huan quijtuc: “In unca nocuerpo (nonacayo) nehual hual nictemaca pa yes lamictili pa amhuanten. Amo ximocahuacan pa anquichías inon pa anquijnamiqwis mochi hual nicchiác pa amhuanten.”

<sup>25</sup> Huan jan yoje canac in iayo uva coc pin tapalquita quiman lamije lacuaje, quijtuc: “In iayo uva coc unca noesli. Noesli toyahuis pa yoje niclalis in lajtulisli yancuic hual nicchiác pa amhuanten. Amo ximocahuacan pa anquichías inon quiman yes ancunis yoje quinami annimitzilijtica. Xicchi-huacan yoje pa anquijnamiqwis mochi hual nicchiác pa amhuanten.”

<sup>26</sup> Cristo tehilic pa ticchihuasi yoje pampa quiman yes anquicuas in pan huan ancunis in iayo uva coc, yoje anquilamachilitica quinami miquic in Tata pa tehuanten. Anquilamachilititía inon pa quiman ajsis in tonali hual yihual hualas oc sejpa.

### *Quinami monequi pa tijcuasi ilacualisli in Tata*

<sup>27</sup> Pampa inon aquí yes hual quicuas in pan huan cunis iayo uva coc calica tiquijnamiquilo in Tata, huan quichías yoje hual amo cana cuali pa quichihuasi yoje ilacames Cristo, cuaquín cayas latexpahuili in se pampa amo quijnamiquía icuerpo (inacayo) huan iesli in Tata.

<sup>28</sup> Pampín, ma moita se ihuán laijtíc iyolo pa quimatis sinda quijnamiquía Cristo icuerpo huan iesli quinami monequi pa quijnamiqwis se. Cuaquinon ma quicua in pan huan ma cuni iayo uva coc.

<sup>29</sup> Ma quichía yoje pampa Dios quijtuc yihual quipía pa yes lacocoltili sinda quitas ilacualisli Dios quinami quinmita mochi oc sequin lacualisli quiman lacua huan launi. Se quinami yihual amo moijnamiquiltía leca motemacac Cristo pa miqwis.

<sup>30</sup> Pampa inon, cate ca amhuanten míac hual Dios quinmacac cocolisli huan sequin capa amhuanten miquije.

<sup>31</sup> Ma yoje, sinda timoitaloaya tehuanten noje laijtíc toyolo pa yoje ticmatilosquiaya in hual ticchihualo hual Dios amo quixtoca, cuaquín Dios amo techmacaya lacocoltilisli.

<sup>32</sup> Huan sinda in Tata techmaca lacocoltilisli, techmaca pa timomajtisi pa ticchihuasi in amo cuali. In Tata tejchihuilía yoje pa camo quipías pa techilis ticpiasi pa tiquisasi pa ilaixpan yihual jan quinami yehuanten pin laticpan hual amo quineltocalo.

<sup>33</sup> Yoje, nocnián, quiman anmonechicúa pa anquicuas ilacualisli in Tata, ximochiacan pa huil ajsisi moxtin.

<sup>34</sup> Sinda se quimati pampa mayantihuala, cuaquín ma lacua pa ichan pa camo anmitzmacas lacocoltilisli Dios pampa amo anmonechicúa pa anlacuas quinami cana cuali pa Dios ilacames. Huan innojen oc sequin lachihualisli, annimitzilis quinami monequi pa anquichías quiman niajsis.

## 12

### *Quinami in Espíritu Santo quinmaca lahueliltisli mochi sejse in laneltocanjimes*

<sup>1</sup> Ma antimitzilican, nocnián, quinami in Espíritu Santo techueliltía, nicnequi pa anquimatis innojen.

<sup>2</sup> Anquimati pampa quiman ayamo anquineltocaya Cristo, amo cataya laijtíc amhuanten in Espíritu Santo huan pampín, Satanás anmitzlaicanaya

pan ojlimes amo cuajcuali pa anquinmolancuacuetzilis monos hual amo lajtulo. Quema, mochi tonali cataya quinami yihual anmitztilanac pa ancanasquiaya ojlimes capa anmohuicaya huejca capa Dios amo cataya. Ma yoje, axan anquípía in Espíritu Santo.

<sup>3</sup> Yoje, annimitzmachiltía sinda se lalac hual lajtutica pan ipampa Dios iEspíritu Santo amo quiman quijtus: “¡jesús unca elehuis!” Huan noje amo quijtus oc se lajtol calica quihuejuecaltis Jesús. Huan amaqi huil quijtúa: “¡jesús unca in Tata!” sinda amo quijtúa pan ipampa Dios iEspíritu Santo, pampa san in Espíritu Santo huil techmachiltía inon.

<sup>4</sup> Ma yoje, cate míac lahuelilitlisli hual Dios in Espíritu Santo techmaca, quixiluilía mochi sejse quinami quinequi.

<sup>5</sup> Huan Dios ilacames huil quitequipanuילו, se ca se tequipanulisli, oc se ca oc se tequipanulisli. Ma yoje unca yihual in Tata hual tictequipanuililo.

<sup>6</sup> Huan monequi pa quichihuasi se tequipanulisli yoje huan oc se tequipanulisli amo quinami yoje, pampa sequin amo cate quinami oc sequin. Ma yoje, unca yihual Dios hual quinquitequipanultía ilacames ca mochi lahuelilitlisli hual quinnama.

<sup>7</sup> Dios quinequi pa canasi lapalehuilisli mochi sejse pan ipampa ilahuelilitlisli in Espíritu Santo hual unca pa laijtuc in laneltocanijmes.

<sup>8</sup> Yoje, Dios quimaca se in lahuelilitlisli pa quimatis niman cuali Dios ilajtol. Huan pan ipampa inon, quimati lapalehuía cuali. Huan Dios quimaca in oc se in lahuelilitlisli pa quijtus ca lajmatilisli len quinequi quijtúa ilajtol Dios, quimaca in lahuelilitlisli jan quinami quiqía yihual in Espíritu Santo.

<sup>9</sup> Huan quimaca oc se in lahuelilitlisli pa quilalis míac laneltocalisli ca in hual quijtuc Cristo, huan pampa inon huil quichía inon hual Dios quinequi pa mochías. Huan quimaca in laneltocalisli hué pan ipampa yihual in Espíritu. Huan yehuanten hual Dios quinnama in laneltocalisli hué, cuajnesi quimaca lahuelilitlisli se pa quinpajtis cocoxquimes, in pan ipampa in se Espíritu Santo.

<sup>10</sup> Huan quimaca lahuelilitlisli oc se pa quinchías innojen hual quinnamaisultilo lacames ca lamajtilisli, huan cuajnesi quimaca lahuelilitlisli oc se pa quilamachiltía ca chichualisli pa yoje quinnapalehuis cuali pa quinneltocasi lacames in hual Dios quilib. Huan pa oc se quimaca lahuelilitlisli pa quimatis sinda oc sequin lajtulo pan ipampa in Espíritu Santo huan sinda lajtulo pan inminpampa ijyecames amo cuajcuali. Huan Dios cuajnesi quimaca lahuelilitlisli se pa lajtus ca oc sequin lajtomes hual amo quiman pehuac quimatic, lajtomes hual in Espíritu Santo quihuelilitic pa lajtus jan ajnaxcan. Huan pa oc se Dios quimaca lahuelilitlisli pa quimatis len quinequi quijtúa in se hual lajtúa ca oc se lajtol.

<sup>11</sup> Unca se Espíritu, yihual in Espíritu Santo hual amo mocahua pa quinnahuelilitis Dios ilacames pa quinchihuasi mochi inon. Yihual quinnaxiluilía mochi sejse ihuían se lahuelilitlisli huan oc se lahuelilitlisli quinami yihual in Espíritu Santo quita cuali.

### *Timoxtin ticate quinami se cuerpo san*

<sup>12</sup> Yoje quichía pampa jan quinami se lalac quinnápía imajmajuan huan icxihujames huan itzontecon, ma yoje, yihual unca se san. Huan jan yoje unca Cristo, yihual se san, mas que tehuanten icnían ticate míac.

<sup>13</sup> Sinda ticate judíos, sinda ticate icnían hual amo judíos, sinda ticate inmintequipanujquimes tecojuan hual quinnahualtilo huan amo quinnaxlahuilo, sinda ticate tequipanujquimes hual quinnaxlahuilo, jan yoje

timoxtin ticate iyaxca pampa noje timoxtin ticataloaya lacuayatequili pan ipampa se Espiritu hual ticanaje pa toyolo. Pampa inon, Dios techita quinami ixolomes, techita quinami se san pampa timoxtin ticpialo in se Espiritu.

14 Icuervo (inacayo) se nesi quinami se san. Ma yoje quinpía míac hual iyaxca, quinami inacas huan imajmajuan huan icxihuajmes huan iixtololomes.

15 Sinda huil lajtuaya se icxían huan quiituaya: “Nel amo niunca ca icuervo pampa amo niunca icuervo imajma”, ma yoje mocahuaya ca icuervo mas que quiituaya pampa amo cataya ca icuervo.

16 Huan sinda huil lajtuaya se inacas huan quiituaya: “Amo niunca ca icuervo pampa amo niunca iixtololon”, ma yoje, mocahuaya ca icuervo mas que quiituaya pampa amo unca ca icuervo.

17 Sinda mochi icuervo se cataya jan iixtololon san, cuaquín ¿quinami lacaquiaya? Huan sinda mochi icuervo cataya jan pa lacaquis san, cuaquín ¿quinami lajnecuiaya?

18 Yojque, quinami unca axan, Dios quinlalic innojen pa se icuervo, quinlalilic yoje quinami quinequiaya.

19 Sinda mochi cataya ma tiqijitucan se imajma, cuaquín amo cataya se icuervo.

20 Quinami unca axan, cate imajma huan icxían huan iyacatzol, cate míac. Ma yoje, unca san se icuervo.

21 Huan se amo quiman quiitusquiaya: “Nicipía noixtololon huan amo monequi pa nicpías nomajma.” Huan amo quiman quiitusquiaya: “Nicipía notzontecon huan pampa inon amo monequi pa nicpías nocxían.”

22 No, monequi pa tiqijitusi pampa quema, monequi pa ticpiasi mochi innojen. Amo huil tipanuloaya cuali sinda amo tiquinpialoaya innojen hual iyaxca tocuervo hual tiqijitulo amo monotzalo míac.

23 Huan innojen ca tocuervo hual tiqijitulo amo monequi pa tiquinmacas míac lasojlalisli, ma yoje innojen tiquincuejtilo ca laitalisli. Huan innojen hual iyaxca tocuervo hual sinda moitalo yehuanten, yoje tipinahualo, tiquinlaquentilo pa camo moitasi huan yoje tiquinnextililo míac lasojlalisli.

24 Ma yoje, pan tocuervo capa amo tipinahualo, amo monequi pa tiquinlaquentisi quinami pan tocuervo capa tipinahualo. Pampín, unca melahuac inon: Dios quichíac cuali tocuervo huan techajxiltic cuali tomajmajuan huan toxihuajmes huan tonacas huan mochi. Yojque quimaca pa canasi míac lasojlalisli innojen hual amo monotzalo míac. Yojque Dios quichíac tocuervo huan yojque unca ca Cristo icuervo hual tehuanten ticate, nicnequi niqijitúa innojen hual cate quinami icamac huan imajmajuan huan icxihuajmes icuervo Cristo.

25 Dios quichíac yoje pa camo moxilusi in lacames huan sihuames hual cate quinami Cristo icuervo. Quema, Dios quinequi pa moxtin hual cate quinami Cristo icuervo, quinequi quijtúa, moxtin in laneltocanijmes, Dios quinequi pa moitasi mochi sejse. Quinami quita in se, yoje ma quita in oc se.

26 Huan yoje pan ipampa quinami Dios quichíac cuali Cristo icuervo pa yojque cajsisi cuali in laneltocanijmes, axan, sinda se mococúa, cuaquín mochi icuervo, quinequi quijtúa, moxtin laneltocanijmes, mococulo inahuac in se. Huan sinda se ilaneltocani Cristo icuervo cana lasojlalisli, cuaquín moxtin laneltocanijmes quipialo paquilisli ca yihual.

27 Yoje, amhuanten anmoxtin anunca quinami icuervo Cristo huan mochi sejse capa amhuanten anunca quinami icxían o imajmajuan o iyolo o inacas.

<sup>28</sup> Huan Dios quilalic pa sequin ilacames lapalehuilo. Quinlalic lanahuatinijmes hual pehuaje quilamachiltije in lamachiltisli cuali. Cuaquinon quinlalic lajtunijmes hual quinmachiltilo len quinequi quijtúa Dios ilajtol. Cuaquinon quinlalic lamaxtinijmes. Cuaquinon quilalic pa sequin ca Dios ilahueliltisli huil quinchihualo lachihualisli hual quinmahuisultilo ca lamajtilisli lacames. Huan quilalic pa sequin quipialo lahueliltisli pa lapajtsi. Quilalic pa sequin quimatisi cuali quinami lapalehuisi, quilalic pa sequin yesi lacames hual quimatisi huelitisí capa cate Dios ilacames, huan quilalic pa sequin lajtusi ca oc sequin lajtomes.

<sup>29</sup> ¿Cate lanahuatinijmes moxtin? Amo cate. ¿Cate lajtunijmes moxtin? ¿Cate lamaxtinijmes moxtin? ¿Quinchihualo moxtin innojen hual quinmahuisultilo lacames ca lamajtilisli?

<sup>30</sup> ¿Quipialo moxtin in lahueliltisli pa lapajtsi? ¿Lajtulo moxtin ca oc sequin lajtomes? ¿Quipialo moxtin in lahueliltisli pa quimatisi len quijtulo yehuanten hual lajtulo ca oc sequin lajtomes?

<sup>31</sup> Amo moxtin quinpialo innojen lahueliltisli. Ma yoje, xicte mucan pa in Espiritu Santo anmitzhueliltis ca innojen lahueliltisli hual quinchihuililo niman cuali moxtin laneltocanijmes. Cate sequin lahueliltisli hual amo ajsilo quinchihuililo yoje cuali. Huan nía annimitznextilía se ojli niman cuali pa ancanas. Mas que se cuajnesi quinpia in oc sequin lahueliltisli, ma yoje amo quichihuilisí yoje cuali quinami in ojli nican quichihuilis.

## 13

### *In unca quinami yuli se sinda quinlasojla oc sequin*

<sup>1</sup> Sinda nehual nicpiaya lahueliltisli pa nilajtusquiaya ca mochi inminlajtomes moxtin lacames pa mochi in lalticpan, quema, huan ca inminlajtomes in lanahuatinijmes pin cielo (ilhuicac) noje, huan sinda amo nicmatiaya nilalasoja, cuaquinon nimochihuaya quinami xahuanisli hual lalacajsoma, quinami se quihuitectiahuiaya se teposli.

<sup>2</sup> Huan sinda nicpiaya in lahueliltisli pa niqijtusquiaya ilajtol Dios jan axcan quiman yihual quilalisquiaya pa noyolo, huan sinda nicmatiaya mochi quinami unca Dios hual lacames san huil quimatilo quiman Dios quinnextilía, huan sinda nicmatiaya mochi hual Dios quimati huan len quichía, huan sinda nicmatiaya nicneltoca in Tata pa yojque huil niquinmijcuanisquiaya lomas (tepemes) ca capic yes, huan ma yoje sinda amo nicmatiaya nilalasoja, cuaquinon amo nimonotzaya nindeno.

<sup>3</sup> Huan sinda nicanaya mochi len noyaxca pa niqinxiluilis ca yehuanten hual amo quipialo len pa quicuasi, huan sinda nimotemacaya pa nechmictilosquiaya ca tixuxli pampa nicneltocaya Dios ca míac chichualisli, huan ma yoje amo nicmatiaya nilalasoja, cuaquinon amo nechmacaya lapalehuilisli nindeno.

<sup>4</sup> Sinda se quimati lalasoja, yihual mopepenialtía pa quipanus mochi lacocoltisli hual ajsis pan yihual. Sinda se quimati lalasoja, yihual amo mocahua pa quichihuilis cuali oc sequin, huan amo chahuatía, amo mocualanilía. Sinda quimati lalasoja se, yihual amo moilía quinami unca niman cuali yihual. Amo lajnamiquía pa iyolo pampa yihual unca hué.

<sup>5</sup> Amo quinchihuilía oc sequin nindeno hual amo cana cuali. Amo quitemúa pa quipías mochi quinami yihual quinequi. Amo quitemúa pa canas mochi len yihual quinequi. Amo momacahuiltía pa mocualantiquisas. Amo quijnamiquía mochi in amo cuali hual quichihuililo oc sequin, pa yoje molacuepilis.

<sup>6</sup> Amo quipía paquilisli sinda quichihualo oc sequin len amo cuali. Ma yoje, quipía paquilisli ca oc sequin sinda yulilo melahuac.

<sup>7</sup> Sinda se quimati lalasoja, amo latenehua sinda quinpanúa in lacocotlilisli hual quinpanúa oc sequin pampa quichihuaje laijlaculisli. Sinda se quimati lalasoja, quinctía quineltoaca pampa yes cuali mochi hual oc sequin quichihualo. Sinda se quimati lalasoja, yihual quichixtía pa mochi lamis cuali. Sinda se quimati lalasoja, yihual amo mocahua lasulahuali sinda quipanúa len amo cuali pampa quimati lalasoja. No, yihual quimacahuiltía pa quipanus in amo cuali.

<sup>8</sup> Amo quiman mocahuas pa cayasi yehuanten hual quimatilo lalasojalo, lasojlalisli amo quiman lamis. Amo unca yoje ca in lahuelilitlisli pa quijtus se ilajtol Dios sinda Dios quilalía pa iyolo se. Se tonali in lahuelilitlisli yajmo quipías pa yes. Huan mas que unca in lahuelilitlisli pa lajtus ca oc se lajtol hual amo quiman canac se, ma yoje in lahuelilitlisli lamis se tonali. Huan mas que unca in lahuelilitlisli pa quipías lajmatilisli hual san Dios quimaca, ma yoje, se tonali in lahuelilitlisli yajmo quipías pa yes.

<sup>9</sup> Unca pampa axan ayamo tiajsilo ticmatilo mochi yoje quinami tialo ticmatilo, huan ayamo tiajsilo tiquijtulo ilajtol Dios hual quilalía pa toyolo yoje quinami huil tiquijtusi.

<sup>10</sup> Mas que yoje unca axcan, mochi cayas lachihuali quinami Dios quilalic pa cayas. Cuaquinon yajmo cayas mochi inon hual amo quiman ajsic yec lachihuali quinami Dios quilalic pa cayasquiaya. Inon panus quiman Cristo ajsis cayas ca tehuanten.

<sup>11</sup> Quiman nicatani xolol, nilajtuni quinami se xolol, nilajnamiquini quinami se xolol, nicpiani laijnamiquilitlisli quinami se xolol. Nimochiác lalac, nimocahuac pa nicchiasquiaya mochi quinami nicchihuani quiman nicatani tipichin.

<sup>12</sup> Huan jan yoje unca ca tehuanten axan, pampa axan ticmatilo nadita quinami unca Dios, amo mochi. Ticate quinami se hual lachía ca se espejo pa cualcan, amo lachía cuali. Hualas Cristo, cuaquinon tilachiasi quinami yehuanten hual moitalo iixco ca iixco. Axan ticmatilo jan nadita san. Hualas Cristo, cuaquinon nicmatis mochi inahuac Dios, jan quinami Dios pa yina huan axcan quimatic mochi nonahuac nehual.

<sup>13</sup> Yoje, se tonali, yajmo monotzasi nindeno innojen calica techueliltía in Espiritu Santo. Ma yoje mocahuasi in yeyenten: Tolaneltocalisli hual ticlalije ca in hual Dios techilía quinami yihual unca, toyulilisli ca Cristo hual ticchialo ca mochi laneltocalisli huan ticchixtiasi pa quiman hualas oc sejpa Cristo, huan lasojlalisli. Huan ca in yeyenten, unca in lasojlalisli hual miac monotza. Amo yoje miac monotzalo in oc sequin.

## 14

*In lajtulisli ca oc sequin lajtomes quinami in Espiritu Santo quihueliltía se*

<sup>1</sup> Xictemucan ca mochi anmoyolo pa anquimatis anlalasojlas huan xicnequican ca mochi anmoyolo pa in Espiritu Santo anmitzhueliltis ca len yes lahuelilitlisli hual quipía pa anmitzmacas. Xicnequican miac pa anquipías in lahuelilitlisli pa anquijtus Dios ilajtol hual yihual anmitzlalilía pa anmoyolo. Amo yoje miac xicnequican pa anquipías innojen oc sequin lahuelilitlisli.

<sup>2</sup> Quema, in lahuelilitlisli monotza niman miac, amo yoje miac monotza in lahuelilitlisli pa lajtus ca se lajtol hual in Espiritu Santo quihueliltía se pa lajtus. In unca pampa yihual hual motequihuía lajtúa ca se lajtol amo

lajtutica ca lacames. Yihual lajtutica ca Dios, pampa amaqui ca icnián quimati len quijtúa. Ma yoje, pan ipampa in lajtol, yihual quijtutica ilajtomes Dios hual oc sequin amo huil quimatilo sinda yihual Dios amo quinnexiltía len quinequi quijtúa.

<sup>3</sup> Amo unca yoje ca se hual quijtúa Dios ilajtol ca inminlajtol icnián, pampa yihual quinlaquetzilijtica lacames huan sihuames. Yoje quinpalehuía pa mochihuasi lacames huan sihuames hual cuali quitocalo Dios. Huan quinchicahualtía pa huil lachihuasi quinami Dios quinequi. Quinchicahualtía pa quinpalehuis pa mopepenialtisi de mochi in amo cuali hual Dios quimacahuiltía pa quinpanus.

<sup>4</sup> Amo yoje ca yihual hual lajtúa ca se lajtol hual quihueliltía in Espiritu Santo. In se san mopalehuía yihual ihuían pa quimatis quitocas Dios cuali. Yihual quinpalehuía moxtin hual monechiculo ca yihual, san sinda quimati quinmilía Dios ilajtol ca inminlajtol.

<sup>5</sup> Nicnequisquiaya pa anmoxtin anlajtusquiaya ca lajtomes hual in Espiritu Santo anmitzhueliltía pa anquijtus. Ma yoje, monotza míac in lahueliltisli calica quijtus se ilajtol Dios pa moxtin quimatisi, huan amo yoje monotza pa lajtus se ca oc sequin lajtomes hual in Espiritu Santo huil anmitzhueliltía pa anquijtus. San sinda unca se hual quimati quinmilía in oc sequin len quinequi quijtúa inon hual quijtúa yihual hual lajtúa ca oc se lajtol, cuaquinon moxtin hual monechiculo quicaquisi lajtol hual quinpalehuis pa mochihuasi lacames hual quimatilo quitocalo Dios cuali.

<sup>6</sup> Axan, nocnián, sinda nilajtutihuala ca amhuanten ca oc sequin lajtomes hual in Espiritu Santo nechueliltic pa niquijtusquiaya, cuaquinon ¿quinami annimitzpalehuis sinda annimitznotzas ca lajtomes hual amo anquimati len quinequilo quijtulo? Cuajnesi annimitzilis len Dios nechlamachiltic hual anmitznextilis quinami yihual tejchihuilla. Cuajnesi annimitzilis len lajmatilisli hual nechmacac. Cuajnesi annimitzilis len lajtol hual yihual nechmaca pa annimitzpalehuis pa anmochías cuali ca lajmatilisli hual ayamo anmonextilic. Cuajnesi annimitzilis len ilamaxtilisli yihual, huan amo anquimatis len annimitzilic.

<sup>7</sup> Huan jan yoje sinda in latzotzonaloni latzotzona, ma tiquijtucan in flauta, in arpa, huan sinda amo latzotzonalocali cuali, cuaquinon ¿quinami huil quislacúa se len cantadita (cuical) quitzotzona?

<sup>8</sup> Huan noje, sinda in guaches quichixticate pa moanasi huan se quipitza in lancaquetzaloni amo quitzotzontica cuali, cuaquín ¿quinami quimatisi mochijchihuasi pa moanasi? Amo huil.

<sup>9</sup> Huan jan yoje amhuanten nojen, sinda amo anlajtúa ca lajtomes hual quinmatilo anmocnián, cuaquín ¿quinami quimatisi len anquijtúa? Yojque ancayas quinami se hual laquetza ca in iyecal, amo monotza nindeno in hual anquijtúa.

<sup>10</sup> Ticmatilo pampa cate míac lajtomes pin lalticpan hual amo huil tilajtulo, huan mochi innojen quipialo yehuanten hual quimatilo len quijtulo.

<sup>11</sup> Ma yoje, sinda amo nicmati len quinequi quijtúa in lajtol, cuaquinon yihual hual lajtutica nechitas quinami se hual amo yuli capa chanti yihual, huan niqitas in se hual lajtutica quinami se hual amo yuli capa nichanti nel.

<sup>12</sup> Huan unca jan yoje ca amhuanten nojen quiman anmonechicúa pa anquimolancuacuetzilis Dios. Neli anquinequi míac pa ancanas in lahueliltisli calica huil anmitzhueliltía in Espiritu Santo. Pampa inon, xictemu-



can quinami anquinneltocaltis niman cuali moxtin yehuanten hual monchiculo ca amhuanten pa anquilajlanis Dios.

<sup>13</sup> Yoje, aquí lajtúa ca se lajtol calica in Espíritu Santo quihueliltic, ma quilajlani Dios pa canas in lahueliltilisli pa quijtus len quinequi quijtúa.

<sup>14</sup> Monequi pa quilajlanis yoje, pampa ma tiquijtucan sinda nehual niclajlanía Dios nilajtutica ca oc sequin lajtomes calica in Espíritu Santo nechueliltía, cuaquín unca noyolo hual quilajlanía Dios. Ma yoje, ca notzontecon amo niqijnamiquía in hual niqijjtutica.

<sup>15</sup> Cuaquín, ¿len monequi pa nicchías? Niclajlanis Dios pan ipampa noyolo, huan noje niclajlanis pan ipampa nolajnamiquilislisli. Nijcantaruilís Dios pan ipampa noyolo, huan noje pan ipampa nolajnamiquilislisli nijcantaruilís.

<sup>16</sup> Monequi pa nicchías yoje, pampa sinda nilajtus ca oc se lajtol, cuaquín quiman niqinmilis lajtomes huejué pa Dios pan ipampa noyolo, in se hual calaquís capa tehuanten timonechicujticate huan amo quimati, axcan ¿quinami quimatis yihual unca ca se lajtulisli ca nehual sinda nicsehuía Dios? Amo huil sinda amo quimati len niqijjtúa.

<sup>17</sup> Tehual noje, ticchía cuali sinda ticsehuía Dios ca in lajtol. Ma yoje, in oc se hual noje unca se ixolol Dios yoje amo unca lapalehuili pa quineltocas cuali.

<sup>18</sup> Nicsehuía Dios pampa in Espíritu Santo nechueliltía pa nilajtus ca míac oc sequin lajtomes, huan anmoxtin amo yoje míac.

<sup>19</sup> Ma yoje, quiman niunca capa tocnían laneltocaniymes monechicujticate, nicnequi pa niqinmaxtis, huan pampín nicnequisquiaya míac pa niqijjtusquiaya se ome lajtomes ca in lajtol hual quimatilo tocnían huan amo quiman nicnequisquiaya nilajtu ca míac lajtomes hual amaqui quimati len quinequilo quijtulo.

<sup>20</sup> Nocnían, amo xiyén (xiyecan) quinami xolomes quiman anquinmijnamiquía in míac ilahueliltilisli in Espíritu Santo. Quema, xiyén quinami xolotzitzindis hual amo quimatilo míac quinami quichihualo amo cuali. Ma yoje, quinami anlajnamiquía, axan ximochihuacan quinami lacames hual quimatilo.

<sup>21</sup> Pa ilajtol Dios unca lajcuiluli, yoje quijtúa: “Niquinlaquetzilis in lacames nican pan inminpampa lacames hual amo lacatije nican. Yehuanten lajtusi ca lajtomes hual amo quimatilo nican. Ma yoje, amo nechnellocasi innojen lacames nican, yojque quijtúa in Tata”, quil.

<sup>22</sup> Yoje, in lahueliltilisli pa se lajtus ca oc sequin lajtomes hual in Espíritu Santo quinmaca, inon unca lanextilisli calica quinmachiltis pampa yehuanten hual amo quinelocalo Cristo amo cate ilacames Dios, amo unca pa quinmachiltis yehuanten hual quema, quinelocalo Cristo. Huan in lahueliltilisli calica se quijtus Dios ilajtol ca inminlajtol icnían, in lahueliltilisli in Espíritu Santo quinmaca. Pan ipampa inon quicaquilo in hual Dios quinmilía yehuanten hual quinelocalo Cristo. Amo unca pa yehuanten hual amo quinelocalo.

<sup>23</sup> Yoje, ma tiquijtucan pampa monechicujticate pan se lajcotiyan moxtin yehuanten hual iyaxca Dios, huan moxtin lajtuticate ca in lajtomes hual oc sequin amo quimatilo, hual in Espíritu Santo quinmaca. Cuaquín sinda hualalo capa yehuanten sequin hual amo quinelocalo, yoje yehuanten hual amo Dios ilacames yafo quijtulo pampa quipoluje ilajnamiquilislisli yehuanten hual Dios ilacames.

<sup>24</sup> Huan pa oc se lajcotiyan capa monechicujticate, moxtin quijtuticate ilajtol Dios ca lajtol hual moxtin quimatilo. Cuaquín sinda calaquís capa



yehuanten se hual amo quineltocha Cristo huan amo quimati len quijtúa ilajtol Dios, cuaquinon quijnamiquis ilajlajculisli hual quichíac. Quijnamiquis pan ipampa len quililo moxtin hual quijtuticate ilajtol Dios. Yoje yihual moitas quinami quilajlaniaya se la'ajuani len yes quichíac. Unca pampa Dios ilajtol quinextilía ilajlajculisli.

<sup>25</sup> Pampín, axan quimatis pampa amo cate cuali innojen lachihualisli amo cuajcuali hual quinpiaya lalatili pa iyolo. Yoje quicocus iyolo pampa quichíac in lajlajculisli. Pampín mopachus pampa yihual quimatis yihual unca iyampa Dios. Huan yihual quimolancuacuetzilis huan lamachiltis pampa Dios neli unca ca amhuanten.

### *Monechiculo tocnían, ma quichihuacan mochi pa canas cuali*

<sup>26</sup> Yoje, nocnían, ¿len yes cuali pa anquichías quiman anmonechicúa? Sinda se quipía se alabanza, sinda se quipía se lamaxtilisli, se lanahuatilisli hual Dios quinextilic, sinda quipía len pa quijtus pan ipampa se lajtol hual in Espíritu Santo quihuelilitic pa quijtus, sinda se quipía in lahuellitilisli pa quijtus len quinequi quijtúa in oc se lajtol, cuaquín ma quinchihuacan innojen se huan cuaquín oc se. Ma caya mochi pa quinpalehuis yehuanten ilacames Dios pa quineltocha Cristo ca chichahualisli.

<sup>27</sup> Sinda cate aquinojen quinequilo quijtulo ilajtol Dios ca se lajtol hual in Espíritu Santo quimaca, ma lajtucan jan ome san, o san ye lacames, yehuanten san. Huan ma lajtucan jan se, cuaquín in oc se. Ma caya se hual huil quinmilis in oc sequin hual nepa cate lanechiculi len quijtuje yehuanten hual lajtuloaya ca in oc se lajtol hual quinhuelilitic in Espíritu Santo.

<sup>28</sup> Huan sinda amo unca se hual huil quinmilis in oc sequin len quililoaya yehuanten hual lajtuloaya ca in oc se lajtol, cuaquín ma camo nahuatican sinda cate capa lanechiculi tocnían, jan ma lajtu sejse ca Dios ca in lajtol quiman cayas ihuán.

<sup>29</sup> Huan yehuanten hual quipialo in lahuellitilisli pa quijtus ilajtol Dios hual yihual quialic pa inminyolo, ma lajtucan ome o ye ca anmolajtol. Cate lanechiculi nepa oc sequin hual quipialo lahuellitilisli pa quimatisi sinda se lajtutica pan ipampa in Espíritu Santo. Ma quincacuican pa quimatisi sinda in hual quijtuticate cate ilajtomes in Espíritu Santo.

<sup>30</sup> Huan sinda unca oc se nepa hual Dios quimacatiquisac len pa quinnex-tilis ilacames Dios hual cate nepa, cuaquín ma mochahua in se hual pehuac quinmilic ilajtol Dios.

<sup>31</sup> Pampa inon mochi sejse ca amhuanten huil anquijtus ilajtol Dios, pa yoje moxtin huil monextilisli huan cayasi lachicahualtili pa inminyolo.

<sup>32</sup> Huan yehuanten hual quijtulo ilajtol Dios, ma quimati sejse quisulahua ilahuellitilisli pa quijtus, pa yoje quimacahuiltis pa lajtus oc se.

<sup>33</sup> Dios amo quixtocha sinda ilacames monechiculo huan lajtulo moxtin pampa mochi sejse amo quinequi quimacahuiltia oc se pa lajtus nadita. Dios quixtocha ca cayas mosehuilisli ca mochi hual ticchihualo.

<sup>34</sup> Quinami unca ca moxtin pin calimes capa monechiculo in laneltocani-jmes, monequi pa in sihuames amo nahuatisi quiman cate lanechiculi Dios ilacames, pampa in sihuames amo cate lamacahuilti pa lajtusi. Monequi pa mosulahuasi, quinami noje quijtúa Dios ilajtol.

<sup>35</sup> Huan sinda quinequilo monextililo len, ma quilajlanican inmin-lahuicalhuan pa inminchan. Unca pinahualisli pa se sihual lajtus capa monechiculo Dios ilacames.

<sup>36</sup> Sinda anquijtúa pampa amo unca cuali pa quichihualo yoje Dios ilacames quiman monechiculo, cuaquín ¿cuaajnesi anquijtúa amhuanten ancataya innojen hual quinpehualtije yehuanten hual quitilanililo ilajtol Dios in oc sequin caltilan capa ayamo cataloaya yehuanten hual ilacames Dios? O ¿cuaajnesi anquijtúa ilajtol Dios anmitzajsic amhuanten san, huan amo quinmajsic in oc sequin? Huan pampín ¿anquijtúa unca anmoyaxca pa anquichías mochi quinami yes anquixtoca, huan amo quinami quichihualo in oc sequin laneltocanijmes hual cate pa oc sequin míac cajcaltilan? Amo yoje unca. Monequi pa anquichías quinami quichihualo pa innojen míac oc sequin cajcaltilan.

<sup>37</sup> Pampín, sinda unca se hual quijtúa yihual unca se ilajtuni ilajtol Dios, sinda neli quijtúa pampa quiúa in lajmatilisli hual quimacac in Espíritu Santo, ma quimati pampa innojen lajtomes hual niqunmijcuilujtica cate hual nechilic in Tata.

<sup>38</sup> Huan sinda unca se hual amo quinequi quimati in Tata quilic inon, cuaquín amo xicneltocacan in se.

<sup>39</sup> Yoje, nocnían, xicnequican míac pa in Tata anmitzhueliltis pa anquijtus ilajtol Dios, huan amo xiquintzacuilican yehuanten hual quinequilo quijtulo ilajtol Dios ca oc sequin lajtomes quinami in Espíritu Santo quinhueliltía.

<sup>40</sup> Ma yoje, ma quichihuacan mochi yoje quinami cana cuali pa quichi-huasi Dios ilacames. Huan ma quichihuacan mochi yoje pa camo molapolul-tisi Dios ilacames quiman monechiculo.

## 15

### *Neli unca Cristo miqic huan cuaquinon yulic oc sepa*

<sup>1</sup> Axan, nocnían, nicnequi annimitzijnamiquiltía in lamachiltisli cuali hual annimitzlamachiltic. Inon anquinequic ancanac huan anyultía anquineltoatica.

<sup>2</sup> Huan pan ipampa in lamachiltisli cuali anyultía anmoquixtilijtica pin miqulisli ca capic anmitzhuicani anmolaijlaculisli. Annimitzijnamiquiltía ca in lajtomes calica annimitzilic in lamachiltisli cuali, sinda anquijnam-ictica chicahuac in hual annimitzilic. Neli unca anquijnamiquis sinda neli anquimati len quinequi quijtúa, huan amo jan lapic (de in balde) anquinel-tocac.

<sup>3</sup> Anquijnamiquía len annimitzilic, pampa annimitznextilic hual monotza in niman míac, hual nechnextilic nehual noje in Tata. Annimitzla-machiltic quinami Cristo miqic pa techquixtilis tolaijlaculisli tehuanten, yoje quinami quijtúa Dios ilajtol hual unca lajcuiluli.

<sup>4</sup> Huan yihual cataya lalalpachuli, huan yulic oc sepa quiman panuje innojen ye tonalijmes quiman cataya ca in mijquimes, yoje quinami quijtúa ilajtol Dios lajcuiluli.

<sup>5</sup> Huan Cefas quitac, cuaquinon quitaje imonextiliniyjes yehuanten in Doce lanahuatiniyjes.

<sup>6</sup> Cuaquinon quitaje pan se tonali quinami quinientos tocnían, quema, noje cataloaya oc sequin ca innojen quinientos. In míac yehuanten yulticate axan, mas que sequin miquije.

<sup>7</sup> Cuaquinon Jacobo quitac huan cuaquinon quitaje moxtin in lanahuatini-yjes.

<sup>8</sup> Huan quiman quitaje moxtin yehuanten, cuaquín nel niqitac. Ma yoje, amo monextic capa nehual pin tonalijmes quiman in oc sequin quitaje. Pampín niqinami se hual lacatic quiman amo cataya itonali pa lacatis.

<sup>9</sup> Huan yoje nehual niunca, pampa nehual niunca in lanahuatini hual nimonotza nindeno, amo niquinami in oc sequin lanahuatinijmes. Quema, amo nimonotza pa nechtocayaltisi se lanahuatini, pampa niquintojtocani pa niquinchiuilis lacocoltilisli Dios ilacames hual monechiculo pa quij-namiqusi Dios iXolol.

<sup>10</sup> Huan pan ipampa in cuali hual Dios tejchihuilía, in cuali hual amo lami huan amo nimonotza pa nicanas, nehual niunca in lalcal hual axan niunca. Huan in cuali hual nejchihuilic amo cataya jan lapic (de in balde). Quema, nehual nitequipanuya niman chicahuac. In oc sequin lanahuatinijmes amo tequipanuloaya yoje chicahuac. Ma yoje, neli amo cataya nehual hual tequipanuya, pampa no, cataya san in cuali hual nejchihuilía Dios nehual. Yihual nechueliltic pa nitequipanusquiaya.

<sup>11</sup> Mas que nehual nicataya hual annimitzilic in lamachiltisli cuali, ma yoje, inon amo monotza len. Huan amo monotza len sinda cataloaya in oc sequin lanahuatinijmes hual anmitzilije. Inon hual neli monotza unca ticlamachiltilo ilajtol Dios pan ipampa in cuali hual san Dios huil quinchihuilía lacames, huan yoje amhuanten anquineltocac.

### *Neli unca yehuanten hual miqulo yalo yulilo oc seppa*

<sup>12</sup> Axan, sinda tiquinlamachiltilo Cristo mictataya ye tonalijmes huan cuaquín yulic oc seppa, cuaquinon amo unca inminyaxca pa quijtusi in mijquimes amo yulisi oc seppa, quinami quijtulo sequin capa amhuanten.

<sup>13</sup> Sinda yehuanten hual miquije amo yulisi oc seppa, cuaquinon Cristo amo yulic oc seppa.

<sup>14</sup> Huan sinda Cristo amo yulic oc seppa, cuaquín jan lapic tehuanten antimitzmachiltilo yihual yulic oc seppa, huan jan lapic (de balde) anquineltoca in lajtol hual antimitzlamachiltilo.

<sup>15</sup> Huan amo inon san. Tehuanten in lanahuatinijmes axan techitasi lacames hual amo tiquijtulo len unca melahuac inahuac Dios, pampa tiquijtuye neli tilacames hual tiquitaje Cristo. Tiquitaje yultataya ca toixtolólomes, yihual Dios quiyuliltic Cristo quiman miquic. Ma yoje, amo cataya melahuac Dios quiyuliltic Cristo sinda neli amo yuliloaya oc seppa yehuanten hual miquije, quinami quijtulo sequin capa amhuanten.

<sup>16</sup> Neli yoje cayasquiaya inon, pampa sinda amo yulisi oc seppa yehuanten hual miquije, cuaquinon Cristo noje amo yulic oc seppa.

<sup>17</sup> Huan sinda Cristo amo yulic oc seppa, cuaquín amo monotza nindeno sinda anquineltoca yihual. Anmocahua lacames laijlaculi pa anmoyolo.

<sup>18</sup> Axcan yehuanten noje hual polehuije quineltocatataloaya Cristo, yoje polehuije quinami yehuanten hual amo quineltocalo.

<sup>19</sup> Sinda ticneltocalo Cristo san quiman tiyulticate nican pan lalticpan, huan cuaquinon timiquilo, huan tiquitalo pampa tipolehuije huan amo timocuepasi tiyulisi, cuaquín ticate lacames hual timonotzalo pa techicnilisi ca in niman miac laicnilisli. Amo monotzalo pa quinmicnilisi yoje miac moxtin pin lalticpan hual amo quineltocalo Cristo.

<sup>20</sup> Axcan, ¿unca yoje? Amo quiman, pampa Cristo neli yulic oc seppa. Quisac pa in mijquimes, yajmo quiman miquis. Yihual quinpehualtic yehuanten hual miquije pa yulisi oc seppa huan yajmo quiman miqusi. Unca quinami quiman quitocalo latocli. Sequin pehualo ixualo, cuaquín oc sequin ixualo yulito. Jan yoje, pampa Cristo quinpehualtic yehuanten hual yulilo oc seppa pa yajmo miqusi, neli unca yehuanten yalo yulilo oc seppa.

<sup>21</sup> Pampa quichíac laijlaculisli se lalcal, moxtin quipialo pa miqusi. Huan jan yoje pan ipampa se lalcal, noje yulisi oc seppa yehuanten hual miquije.

<sup>22</sup> Inon unca pampa timoxtin ticate imiahuimes Adán huan pampín timiquisi. Jan yoje moxtin yehuanten hual quinlacatiltía Dios pan ipampa Cristo yesi layuliltili pa yajmo miquisi.

<sup>23</sup> Ma yoje, cayasi layuliltili mochi sejse pan in tonali hual Dios quinlalilic. Cristo unca in Se hual niman hué huan yihual quipehualtic pa huil yulisi oc sejpa, quinami ilapehualtilisli imiahuimes trigo hual ixualo. Cuaquinon quiman Cristo hualas oc sejpa, yulisi oc sejpa yehuanten hual cate iyaxca Cristo.

<sup>24</sup> Cuaquín lamis in lalticpan, yajmo cayas quinami tiquiximatilo axan. Panus inon quiman Cristo quicuepilis Dios toTajtzin in lahuellitilisi hual Dios quimacac Cristo quiman pehuaya mochi. Inon panus quiman quinquitilis pa capa huelititicate moxtin yehuanten hual quipialo len yes lahuellitilisi pa huelitisi, yehuanten hual amo quixtocalo Cristo.

<sup>25</sup> Panus yojque pampa Cristo quipias pa huelititias pa quiman ajsis in tonali hual quinsulahuas moxtin yehuanten hual amo quinequilo quitalo Cristo quinami Dios.

<sup>26</sup> Huan quiman quinsulahuas moxtin yehuanten, cuaquinon quichías pa yajmo miquis amaqui. In miqulisi unca quinami se hual amo ticnequilo tiqitalo pampa timomajtilo pa timiquisi quinami timomajtilo pampa quinequilo techmictilo aquinojen hual techcocolilo.

<sup>27</sup> Quema, pampa yoje ilajtol Dios quijtúa pampa quisulahuac Cristo mochi pa yojque moxtin yehuanten hual amo quinequilo quitalo quipias pa quineltocasi. Ma yoje, quiman Dios quijtúa pampa mochi unca lasulahuali pa quineltocasi Cristo, neli unca yihual Dios amo yes lasulahuali, pampa cataya Dios hual quisulahuilic Cristo mochi hual unca.

<sup>28</sup> Ma yoje, quiman mochi cayasi lasulahuali, cuaquinon yihual noje, niqijtúa Cristo iXolol Dios, quitemacas ilahuellitilisi ca Dios iTajtzin hual quisulahuilic mochi. Quichías yojque pa yojque mochi hual Dios quinchiac quimatasi pampa mochi unca iyaxca yihual Dios huan yihual quipia mochi chicahualisli pa huelitis pa mochi. Huan unca iyaxca mochi tolasojlalisli huan tolanellocalisli.

<sup>29</sup> Huan sinda inon amo cataya yoje, nicnequi niqijtúa, sinda in mijquimes amo yulisi oc sejpa huan sinda in Tata amo yahui quisulahuaya mochi in hual amo cuali, cuaquín amo monotza nindeno quiman quincuyatequilo lacames, inon pa quinpalehuisi yehuanten hual miquije. Sinda amo quiman yulilo oc sejpa yehuanten hual miquije, cuaquinon ¿leca cate lacuayatequili yehuanten hual yulticate pa yehuanten hual miquije?

<sup>30</sup> Huan tehuanten noje, ¿pa len tiyulilo mojmosta amo ticmazticate sinda yalo techmictilo o amo yalo techmictilo?

<sup>31</sup> Annimitzilía neli, nocnían, nilajtúa hué pa noyolo nonahuac nehual nohuían inahuac in hual Cristo Jesús toTata anmijchiuilic pan nopampa. Pampa nictequipanuilía in Tata Jesús niunca quinami nimictica mojmosta.

<sup>32</sup> Lacames quijtulosquiaya da amo nechpalehuiaya nindeno in lacocoltisli hual nipanuc quiman moanaje ca nehual lacames nepa pin cailtan Efeso. Moanaje quinami yulijquimes hual yulilo pa cuajlan. Ma yoje, timomacahuiltilo pa timoitasi mochi tonali amo ticmazticate da timiquisi o tiyulisi, pampa ticmatilo tiyulisi oc sejpa. Sinda amo yulilo oc sejpa in mijquimes, yesquiaya cuali pa tehuanten tiqijtusi quinami sequin quijtulo: “Ma tilacuacan huan ma tilaunican pa tiyulisi cuali axan, pampa mosta timiquisi.”

<sup>33</sup> Amo ximocuaajcuamanacan pan ipampa lamaxtilisli quinami inon. Lacames quijtulo: “Sinda se yuli inahuac oc se hual yuli amo cuali, cuaquín

noje moijlacus iyulilislí, noje pehuas yulis amo cuali.” Huan jan yoje, anyulis inminahuac yehuanten hual quijtulo pampa in mijquimes amo yulilo oc sejpa. Cuajnesi anpehuas anlajnamiquis quinami yehuanten.

<sup>34</sup> Ximocuepacan xicanacan anmolajnamiquilislí huan ximocahuacan pa anquichías laijlaculisli. Annimitzilía inon, pampa cate sequin capa amhuan-ten hual nesilo quinami amo quimatilo nindeno quinami Dios quinmita. Annimitzilía inon pa annimitzpinajtis.

*¿Quinami yalo yulilo oc sejpa in mijquimes?*

<sup>35</sup> Huan cuajnesi quijtus se: “¿Quinami yulilo oc sejpa yehuanten hual miqijje? ¿Ca len cuerpo quistihualalo pa capa quinlalpachuje?”

<sup>36</sup> Nadita amo quimati laijnamiqúa se hual quilajlanía inon. Xiquita. Tehual, inon hual tictoca jan ixua san sinda palanis icaliyó pin lali, pehua ca in.

<sup>37</sup> Huan in latocli hual tictoca amo unca in pacholi hual yahui ixua, amo cayas jan quinami inon hual tictocac. No, san unca in latocli ihuían, cuajnesi unca trigo o se ca in oc sequin latoclimes.

<sup>38</sup> Dios quichíac pa nesis se latocli ca icuerpo quinami yihual quinequic. Huan pa mochi sejse latocli quinmaca inminesilislí calica nesi se latocli amo quinami oc se latocli.

<sup>39</sup> Huan noje, amo unca se nacal hual nesi jan quinami oc se nacal. Se nacal unca inacal lacames huan oc se inacal yulijquimes huan oc se inacal michimes.

<sup>40</sup> Huan cate lejlen hual cate pin cielo huan lejlen hual cate pin lalticpan. Huan innojen pin cielo nesilo yoje cualtichin quinami in laixpelalislí pin cielo. Huan nesilo cualtichin innojen hual cate pan lalticpan quinami cate in hual unca cualtichin pan lalticpan.

<sup>41</sup> In tonali nesi cualtichin huan amo unca oc se cualtichin quinami in. In mesli nesi cualtichin huan amo unca oc se quinami in. In luceros (silalimes) nesilo cualtichin huan amo cate oc sequin quinami innojen. Quema, huan se silalin lahui huan amo cate oc sequin silalimes hual nesilo yoje cualtichin quinami in silalin.

<sup>42</sup> Yoje unca ca yehuanten hual yulisi oc sejpa hual quisasi pa capa in mijquimes. Amo quipiasi in cuerpo hual quipianijme quiman miqijje. Miquilo, quilaltocalo quinami quitocalo latocli. Inmincuerpos palanilo, huan quiman yulisi oc sejpa amo quiman palanisi.

<sup>43</sup> Quinlaltocalo quiman miquilo, palanilo, huan xacualihuilo, yajmo canaló lasojlalislí quinami quiman yuliloaya. Ma yoje quiman yulisi oc sejpa, inmincuerpos cayasi mochi cualtichin. Quiman quinlaltocalo inmincuerpos, yajmo huil molinilo. Yulisi oc sejpa, cayasi cuerpos hual quipiasi niman miac chicahualislí pa huejcahuasi yulisi, amo quiman lamisi.

<sup>44</sup> Quiman quinlaltocalo tocuerpos, cate cuerpos jan pa in lalticpan san. Yulisi oc sejpa, yesi cuerpos hual cayasi cuali pin lalticpan yancuic capa tiyulisi mochi pan ipampa iEspíritu Dios. Yehuanten pin lalticpan quipialo cuerpos hual cate cuali pa toyulilislí nican pan lalticpan. Huan jan yoje yehuanten hual cate pin cielo (ilhuicac) quinpiasi inmincuerpos hual cayasi cuali pa inminyulilislí nepa.

<sup>45</sup> Noje unca lajcuiluli yoje: “In lalac hual quinpehualtic moxtin lacames, yihual mochíac se hual yuliyasa quipixtataya icuerpo, yihual Adán.” In oc se Adán calica Dios quilamic itequipanulislí ca lacames unca Jesucristo, yihual mochíac se hual techyuliltía toyolo pa camo lamisi. Huan techmacas cuerpos hual noje yulisi huan amo quiman lamisi.

<sup>46</sup> Ma yoje, in cuerpo hual yulis huan amo quiman lamis amo yes in cuerpo hual axan ticpialo. In cuerpo hual ticpialo axan unca cuali pa quiman tiyulticate pan lalticpan. Cuaquinon mopatilis huan yes se cuerpo cuali pa toyulilisi pin cielo.

<sup>47</sup> In lacal Adán hual quinpehualtic timoxtin yec lachihuali ca in lali pa yulis pan lalticpan. In oc se Adán hual unca Jesucristo, yihual quipías icuerpo hual unca pa yulis pin cielo.

<sup>48</sup> Huan quinami cataya lachihuali ca in lali Adán, jan yoje cate mochi lacames, nesilo quinami Adán, quisaje pa yihual huan cate quinami yihual. Huan quinami unca yihual Jesucristo hual unca pin cielo, jan yoje yesi yehuanten hual yesi pa in cielo. Quinequi quijtúa yehuanten hual iyaxca Cristo, yesi quinami yihual Cristo.

<sup>49</sup> Huan yoje quinami tehuanten axan ticate quinami Adán hual icuerpo mochíac lali oc sejpa, tehuanten noje tiyesi jan quinami yihual hual unca pin cielo hual amo mocahua pa yulis.

<sup>50</sup> Huan annimitzilía inon, nocnían, tehuanten quinami ticate axan ca tonacal huan toesi amo huil ticpiasi tolaxilulisi ca Dios capa huelitía nepa pin cielo. Inon hual huil palanis amo huil quipías laxilulisi ca inon hual amo quiman palanis.

<sup>51</sup> Xiquitacan. Nía annimitzilía len hual ayamo quimatic amaqui. Axcan anyahui anquimati. Cayasi míac ca tehuanten in laneltocaniymes hual amo timiquisi. Tócueros cayasi lapatili.

<sup>52</sup> Inon panus jan ajnaxcan quinami sinda se quitzacuas huan quila-pus iixtololon, panus quiman xahuanis in lancaquetzaloni, panus quiman xahuanis in lancaquetzaloni pa yajmo xahuanis oc sejpa. Quema, latzot-zonas in lancaquetzaloni huan yehuanten hual miqijue yulisi oc sejpa ca inmincuerpos (inminacayo) hual yajmo quiman miquisi. Huan tehuanten hual ayamo timiquije, tonacayo (tocuerpos) noje mopalasi pa yajmo quiman miquisi.

<sup>53</sup> Panus yoje, pampa tocuerpos hual miquilo huan palanilo quipiasi pa mochijtiqisiasi cueros hual amo miquilo huan amo palanilo, cayas quinami timolaquentilosquiaya ca len hual huejcahuas, amo quiman lamis. Quema, tocuerpos hual axcan yalo miquilo huan yalo palanilo, innojen quipialo pa mopalatiqisiasi.

<sup>54</sup> Innojen tocuerpos hual huil palanilo mopalatiqisiasi pa mochihuasi cueros hual amo palanilo. Huan quiman innojen hual yalo miquilo mopalatiqisiasi pa mochías len hual amo miquisi, cuaquinon panus inon hual unca lajcuiluli pa ilajtol Dios, quijtúa: “In miquilisi yajmo cayas, unca quinami lasulahuali pan ipampa yulilisi.

<sup>55</sup> ¿Quinami huil techcocoltis in miquilisi? ¿Quinami huil tejsulahuas in miquilisi? In miquilisi yajmo huil techcocoltía, yajmo huil tejsulahuas pa yajmo tiyulisi.”

<sup>56</sup> Pampa ticchihuaje laijlaculisi, Dios quilalic pa timiquisi. Yoje quilalic pampa ilajtol quijtúa yehuanten hual quichihualo laijlaculisi quipialo pa miquisi. Pampin in laijlaculisi cana ichicahualisi pan ipampa in lajtol hual techilía quinami monequi pa tiyulisi. Huan in lajtol amo huil ticneltocalo.

<sup>57</sup> Ma yojqe, ma ticsehuican Dios, pampa yihual techmacatica chichahualisi pa timosulahuasi pa como tiyulisi ticchícticate laijlaculisi. Huan inon ticchihualo pan ipampa toTata Jesucristo hual miquic huan cuaquín yulic oc sejpa. Jan yoje, yihual techyuliltis tehuanten oc sejpa.

<sup>58</sup> Pampa inon, nocnían hual annimitzlasojla niman míac, amo ximocahua-can pa anquineltoas Jesucristo ca mochi anmoyolo. Amo ximacahuiltican amaqui huan nindeno pa anmitzjicuanis pan iojli Cristo. Huan mochi tonali xiyulican xicchijtiacan míac itequipanulisli in Tata. Anquimati pampa amo unca san latic (de in balde) anmotequipanulisli hual anquichía ca ichicahualisli in Tata.

## 16

*In tomin hual yehuanten pa Corinto yahuilooaya quinmacalo in laneltocani-jmes hual amo quipialooaya nindeno*

<sup>1</sup> Axcan ma annimitzjicuiliuli in hual monequi pa anquichías ca in tomin hual anquinechicujtica pa anquinmacas ilacames Dios hual amo quipialo. Jan quinami niquinmilic pa quichihuasi yehuanten hual monechiculo pa qimolancuacuetzilisi Dios nepa cajcapa pin lalticpan Galacia, jan yoje xicchihuacan amhuanten.

<sup>2</sup> Pa in tonali hual quipehualtia mochi in chicome tonalijmes, mochi sejse ca amhuanten ma cajcoqui sequin itomin pa yoje momiactis, ma ye se ilaxilulisli itomin hual quilaxlahuilo capa tequipanúa. Ma quichía sejse yoje pa camo monequis pa quinechicus tomin quiman nihualas ca amhuanten.

<sup>3</sup> Huan in tonali niajsis, xiquinpiacan lalajtultili lacames hual aqui anquin-mita quinami lacames hual quimatilo quichijchihualo cuali pa quihuicasi anmotomin pa yehuanten pa Jerusalén. Huan nehual niquinmijcuilus amames pa mochi sejse ca yehuanten, pa yoje monapatisi inminlaixpan yehuanten pa Jerusalén. Yoje quimatisi aquinojen cate innojen lacames.

<sup>4</sup> Huan sinda monequi pa nehual noje niasquiaya, cuaquinon yehuanten nechtocasi.

*Pablo yahui cana ojli pa Macedonia*

<sup>5</sup> Nías ca amhuanten quiman nipanús pa in lalticpan Macedonia.

<sup>6</sup> Cuajnesi ca amhuanten nimocahuas o noje nicayas nepa pa mochi itonalijmes in sejsecuilisli. Yoje amhuanten huil annechpalehuis pa no'ojli ca capic yes nías.

<sup>7</sup> Yoje nicnequi nicchías pampa axan amo nicnequi jan annimitzpxaluilis je nadita san. Nicchixtica pa huil nimocahuas míac tonalijmes ca amhuanten sinda nechmacahuiltis in Tata.

<sup>8</sup> Ma yoje, nimocahuas nican Efeso pa nicayas pa in fiesta (ilhuil) Pentecostés.

<sup>9</sup> Nican nicayas pampa unca se tequipanulisli hué pa in Tata nican hual nicnequi nicchía. Unca míac pa ticchihuasi huan cayasi míac hual quinelto-casi ilajtol Dios. Noje cate míac lacames nican hual quinequilo tejtzacuililo totequipanulisli tehuanten.

<sup>10</sup> Sinda yas Timoteo capa amhuanten, xiquitacan pa anquimosehuiltis huan pa camo cayas amaqui ca amhuanten hual amo quinamiquis quinami tocní quiman unca ca amhuanten. Xicchihuacan yoje, pampa yihual quichía itequipanulisli in Tata jan quinami nehual noje.

<sup>11</sup> Ma camo quixijxícu amaqui. Xicpalehuican pa iojli, xictilanican ca mosehuilisli pa iyolo, pa yoje hualas ca nehual, pampa nicchixtica pa hualasi yihual huan tocnían hual quineltoocalo toTata.

<sup>12</sup> Axcan annimitzilía inon hual nechilic tocní Apolos. Niquiyantic chic-ahuac pa yas ca amhuanten quiman uyaje in oc sequin tocnían. Ma yoje, yihual amo jan nadita quinequiaya yahui axcan. Yihual yas quiman cayas oc se tonali pa huil yas.

*Pablo quinchicahua yehuanten pampa lami quinmijcuilulía*

<sup>13</sup> Xilachixtiacan mochi tonali pa camo anmitzcuaajcuamanasi yehuanten hual amo lamaxtilo ca ilajtol Dios quinami quijtúa. Xicneltocatiacan chicahuac Cristo. Xiyulican amo anmomajtitica, yoje unca quinami monequi pa yulisi Dios ilacames. Ximochihuacan chicahuac ca Dios ichicahualisli pa camo quiman anmocahuas pa anquineltocas ilajtol.

<sup>14</sup> Huan mochi hual anquichía, ma ye lachihuali pampa anquinlasojla toTata huan yehuanten hual iyaxca.

<sup>15</sup> Axan, nocnían, annimitzljajlanía pa anquichías inon. Anquimati pampa yehuanten pa ichan Estéfnas cataloaya hual pehuaje quineltoque ilajtol Dios. Ayamo cataloaya oc sequin hual quineltoque nepa pa anmolali Acaya quiman niquinmachiltic Dios ilajtol. Yehuanten molalije pa quintequipanuulisi huan quinpalahuasi Dios ilacames hual amo quipialo mías.

<sup>16</sup> Yehuanten cate lacames hual quimatilo lapalehuilo huan latequipanuulilo chicahuac. Huan cate oc sequin quinami yehuanten hual lapalehuilo huan tequipanuulo ca tehuanten. Pampín, annimitztemachía amhuanten noje, pa anquinequis anmolaneltoque ca lacames quinami yehuanten pa anmonextilis quinami monequi pa anquintequipanuulisi tocnían.

<sup>17</sup> Nicpía mías paquilisli pampa axan ajsije capa nehual Estéfnas huan Fortunato huan Acaico, pampa annimitzijnamicataya mías. Huan mas que amhuanten amo huil anhualaya ca yehuanten, ma yoje quiman ajsije yehuanten, nimoitac ca paquilisli pampa cataya quinami amhuanten anhualaya.

<sup>18</sup> Cataya yoje pampa yehuanten nejchihuulic pa nimoitas ca niman mías paquilisli pa noyolo. Huan annimijchihuulisi amhuanten nojen pa anquipías niman mías paquilisli pa anmoyolo quiman mocuepasi capa amhuanten. Xiquinlamachiltican moxtin in cuali hual quichihualo lacames quinami yehuanten.

<sup>19</sup> Annimijchihualo moxtin innojen tocnían hual cate cajcapa yes pin lalticpan Asia cajcapa monechiculo pa quimolancuacuetzilisi in Tata. Annimijchihualo mías pan ipampa ilasojlalisi in Tata. Annimijchihualo ca mochi inminyolo Aquila huan Prisca huan noje tocnían hual monechiculo pa inminchan.

<sup>20</sup> Annimijchihualo moxtin anmocnían. Ximopialtican quinami motequihuilo mopiailtilo Dios ilacames, ca latenamiquilisi hual unca ilanextilisli anmolasojlalisli chipahuac seje ca in oc sequin ca amhuanten.

<sup>21</sup> Nehual Pablo niqijcuilujtica in lapiailtilisi ca nomajma.

<sup>22</sup> Sinda unca se hual amo quilasojla toTata, ma Dios quiquixti pa iyampa yihual pa camo quiman cayas capa unca Dios. ¡Maranata! In quinequi quijtúa ¡Ma huala toTata!

<sup>23</sup> Ma caya ca amhuanten in cuali hual jan huil tejchihuulía in Tata Jesús san.

<sup>24</sup> Nolasojlalisi hual nicpía pa amhuanten pan ipampa Cristo Jesús, ma caya ca anmoxtin. Yoje ma ye.



## Oc se amal hual in lanahuatini Pablo quinmijcuiluilic laneltocanjmes hual yulinijme pin caltilan Corinto

*Pablo quinmijcuiluilía (quinmescibiruilía) yehuanten hual quineltocalo Cristo pin caltilan Corinto*

<sup>1</sup> Nehual Pablo niunca Cristo Jesús ilanahuatini pampa yoje Dios quinequic pa niyes ilanahuatini. Huan točni Timoteo ticate. Annimitzjicuiluilijtica amhuanten hual anmonechicúa pa anquimolancuacuetzilis Dios pampa anquineltoca yihual nepa pin caltilan Corinto. Noje annimitzjicuiluilijtica moxtin ilacames Dios hual cate nepa noje pa mochi in lali Acaya.

<sup>2</sup> Ma Dios toTajtzin huan toTata Jesucristo anmijchihuilican cuali huan anmitzmacacan mosehuilisi pa anmoyolo.

*Pablo quinmilía quinami Dios quinlacahuatlía yehuanten hual icnotilo huan panulo lacocoltilisi*

<sup>3</sup> Ma quiytucan moxtin lajtomes niman cuali pa Dios hual unca iTajtzin toTata Jesucristo. Yihual toTajtzin hual quimati laicnília, huan yihual in Dios hual quimati techmaca mochi lajtol hual tejchicahuatlía pa toyolo huan techlacahuatlía.

<sup>4</sup> Dios techlacahuatlía, mocajtica tonahuac pa techmacas chicahualisi pa mochi tonalijmes quiman tipanujticate lacocoltilisi. Inon tejchihuilía pa yoje huil ticmatisi ticmacasi chicahualisi oc sequin mochi tonalijmes quiman yehuanten panujticate lacocoltilisi. Tiquinmacalo in chicahualisi calica Dios tejchicahuatlía tehuanten noje quiman techmaca chicahualisi.

<sup>5</sup> Inon unca yoje pampa jan quinami tipanujticate míac lacocoltilisi pa Cristo, yoje quinami yihual panuc lacocoltilisi, cuaquín jan yoje yihual mocahua tonahuac pa ticanasi míac ichicahualisi hual quinequi techmaca.

<sup>6</sup> Sinda lacames techcocoltilo, yoje unca pa amhuanten ancanas chicahualisi pa ancayas lachicahuatlili huan pa ancayas laquixtili pa ipolehuilisi anmolaijlaculisli pa anmoyolo. Huan sinda tehuanten timochicahuatlilo pa como ticayasi majquimes, cuaquín unca pa yoje amhuanten anmochicahuatlisi pa como ancayas majquimes. Huan anmochicahuatlisi pa como ancayas majquimes sinda amo anmocahua pa anmopepenialtisi in lacocoltilisi quinami techpanúa tehuanten.

<sup>7</sup> Amo timocahualo pa ticchiasi in cuali, huan amo unca nindeno hual tejtzacuilía pa como ticchiasi. Quema, neli mocahua chicahuac inon hual ticchialo pa amhuanten. Ticmatilo pa toyolo pampa anmocahuas anquineltocatica, mas que anmitzpanus míac hual anmitzcocúa. Inon ticmatilo pampa quinami anpanúa in lacocoltilisi jan quinami tehuanten, noje anmochicahuatlía pa como ancayas majquimes. Huan amo ancayas majquimes pampa Dios techpalehuía pa timopepenialtisi ca ichicahualisi.

<sup>8</sup> Tiquijtulo yoje, nocnían, pampa ticnequilo pa anquimatis quinami míac tipanuje lacocoltilisi nepa pin lalticpan Asia. Quema, yoje míac tipanujtataloaya latojtocalisi, amo huil timopepenialtiloaya huan timocahuaje pa ticchiasi pa huil tiquisallosquiaya pa como timiquilosquiaya.

<sup>9</sup> Quema, tiquijtuloaya pampa neli yehuanten molalilije pa techmic-tilosquiaya. Ma yoje, inon techpanuc pa yoje amo ticlaililosquiaya laneltocalisli ca tehuanten tochichualisli. Techpanuc pa ticlaililosquiaya laneltocalisli ca Dios hual quinyuliltía oc sejpa yehuanten hual miqijue.

<sup>10</sup> Yoje techquixtic pin miquilisli hual yoje míc ticmacajsije. Huan techquixtis oc sejpa. Ca yihual timolalije pa ticchiasi pa yihual techquixtilis pin miquilisli oc sejpa.

<sup>11</sup> Amhuanten noje anquipía pa antechpalehuis pan ipampa quinami anquilajlanía Dios pa tehuanten. Yojque, míc hual cate tocnán quisehuis Dios pa tehuanten. Yes pampa Dios tejchihuilía cuali. Tejchihuilía cuali pampa míc hual cate ilacames quilajlanije pa tejchihuilisquiaya yoje.

*Pablo quinmilía leca amo uyac pa Corinto*

<sup>12</sup> Ticnequilo pa anquilajlanis Dios pa tehuanten, pampa tiquijtulo ca niman míc paquilisli pampa tiyulije ticchihuilijtataloaya len cana cuali inminlaixpan yehuanten pin lalticpan huan neli anmolaixpan amhuanten. Tiyulije niman chipahuac anmoyampa huan amo tiyulije tilacaujcuamantataloaya. Yoje tiyulije pan ipampa quinami Dios mojmosta techpalehuía, huan amo pan ipampa in lajmatilisli hual quipialo yehuanten pin lalticpan hual amo quiximatilo Dios. Huan tolajmatilisli hual technextilía len unca cuali huan len unca amo cuali techmachiltía neli pampa tiquijtucate len melahuac.

<sup>13-14</sup> Amo tilacaujcuamanticate quiman antimitzizcuiluililo (antimitzescibiruililo), pampa antimitzizcuiluililo mochi ca lajtol hual amhuanten huil anmomaxtía huan huil anquimati len quinequi quijtúa. Axan anquimati nadita pampa huil antechpilía míc paquilisli quinami tehuanten antimitzpililo míc paquilisli. Huan pa in tonali quiman hualas oc sejpa in Tata Jesús, nicchixtica niquita pampa neli anajsic anquimatic pampa huil antechpilis míc paquilisli pan topampa tehuanten, jan quinami pan anmopampa antimitzpililo paquilisli.

<sup>15</sup> Quinami niqijtuaya neli pa noyolo pampa cataya yoje, nicnequiaya nicpehualti nopaxaluilisli nihualajtica ca amhuanten pa yojque annimitz-palehuisquiaya sejpa huan oc sejpa.

<sup>16</sup> Nicnequiaya annimitzpxaluililo quiman niajtiahuiaya pa Macedonia. Huan nicnequiaya annimitzpxaluililo quiman nimocuepaya niquistataya pa Macedonia pa annehpalehuisquiaya pa nicanasquiaya ojli pa in lalticpan Judea. Ma yoje, amo nicchihuaya yoje.

<sup>17</sup> Huan ¿anquijtúa pampa yoje nicnequiaya nicchía? ¿Anquijtúa pampa niunca se hual yuli lajihjica quinami niqijtuaya da amo monotza nindeno len yes? ¿Anquijtúa nehual niquita nicchía mochi quinami se lalac hual yuli quinami quinequilo yehuanten pin lalticpan pa yulis se? ¿Anquijtúa niunca se lalac hual quijtúa “quema” huan “amo” in ome lajtomes jan inminahuac quiman nilananquilía, quinami antimitzililoaya pampa tihualasi huan cuaquinon amo ticchihualo in hual antimitzilije? No, tehuanten amo quinami inon.

<sup>18</sup> Neli huil ticneltocalo len quijtúa Dios. Huan jan yoje neli unca pampa inon hual antimitzililo amo quinequi quijtúa “quema” huan “amo” in omenten lajtomes.

<sup>19</sup> Tehuanten Silvano huan Timoteo huan nehual antimitzlamachiltilo quinami Dios iXolol Jesucristo amo quijtúa “quema” huan “amo” pan se lajtulisli. No, pampa ca yihual huil tiquijtulo “quema” pa mochi hual quijtúa, pampa ticmatilo neli unca.

<sup>20</sup> Yoje, mochi hual Dios quilía neli pampa tejchihuulis, inon tejchihuulis pan ipampa Jesucristo. Pan ipampa yihual, ticmatilo Dios techilijtica “quema” ca len yes techilía. Pampa inon, tiqijitulo “Yoje ma ye” pan ipampa Cristo, pa yoje Dios quincacuis míc lajtomes huejué hual moxtin yalo quililo.

<sup>21</sup> Huan unca Dios hual tejchihuilia tehuanten huan amhuanten pa tiyul-tiasi tictocaticate Cristo pa iojli, amo timijcuanticate capa yihual. Huan Dios techlajultic pa tictequipanuilisi.

<sup>22</sup> Yihual quilalic topan quinami ilayapalisli ca temulol hual amo moita. Quilalic topan pa momatis pampa ticcate iyaxca huan pa tejtzacuilis pa camo tiqitasi polehuilisli. Quimacac iEspíritu Santo laijtic pa toyolo pa yoje ticmatis pampa tialo ticpialo mochi hual quinequi techmaca.

<sup>23</sup> Axcán, pampa Dios quimati in hual niqijitúa pa noyolo, nicnotza yihual pa anmitznextilis pampa unca neli inon hual nía annimitzilía: Nimotzacuilic mochi innojen tonalijmes pa camo nihualasquiaya pa Corinto, pampa amo nicnequiaya nicajua amaqui.

<sup>24</sup> Amo unca pa tehuanten antimitzilisi chicahuac inon hual anquipía pa anquineltocas pa yoje anyulis anquineltocatica Cristo chicahuac. No, titequiapanulo ca amhuanten pa anquipías paquilisli anquichijtica quinami Dios quinequi. Sinda anyuli anquineltocatica chicahuac Dios ilajtol, cuaquín yoje amo quiman anmoxilus pa anquicahuas Dios iojli.

## 2

<sup>1</sup> Ma yoje, nimolalic pa camo annimitzpxaluilis oc sejsa sinda yahuiaya techcocu toyolo nehual huan amhuanten.

<sup>2</sup> Yojque nichíac pampa sinda annimitzcocuhuilía anmoyolo, cuaquín amo cayas amaqui hual nechpaquiltis sinda quincocujtica inminyolo yehuanten hual niquincocuhuilic inminyolo.

<sup>3</sup> Huan annimitzjcuiluilic ca lajtomes chijchicahuac pa yoje, quiman nias-jiaya ca amhuanten, amo nechcocusquiaya noyolo. Unca pampa amhuanten anquipía pa annechmacas paquilisli. Niqijtuaya neli pa noyolo pampa quiman nihualaya, neli amhuanten anmoxtin anquipiasquiaya paquilisli jan quinami nehual.

<sup>4</sup> Annimitzjcuiluilic (annimitzescbiruilic) quiman nechcocujtataya chicahuac noyolo, huan nichocatataya. Ma yoje, amo annimitzjcuiluilic inon pampa nicnequiaya pa anmitzcocus anmoyolo. Cataya pa annimitzmachiltisquiaya quinami míc annimitzlasojla.

### *Pablo quinmilía pa quipujpuhuasi in se hual quichíac in laijlaculisli*

<sup>5</sup> Huan sinda unca se hual quincocuc inminyolo pampa quichíac in laijlaculisli, cuaquinon amo unca nehual nohuian nejchihuulic. Nadita anmijhuilic anmoxtin noje. Niqijitúa “nadita” pa yoje amo nesis quinami nilajcuilujtica chicahuac ca cualanilisli.

<sup>6</sup> Pa in se niqijitúa “jan ca inon san” ca in la'ajualisli hual anquichihuulic in míc capa amhuanten.

<sup>7</sup> Axcán, yes cuali pa anmocuepas pa anquipujpúas huan pa anquilacahualtis. Sinda amo, cuaquín cuajnesi yihual moitas lasulahuali ca míc lacocolisli pa iyolo.

<sup>8</sup> Yoje, annimitztemachía xicnextilican oc sejsa quinami anquilasojla.

<sup>9</sup> Huan yoje, cataya pampa inon noje annimitzjcuiluilic, pa yoje nicmatis huan pa annimijchihualtis se lanextilisli pa momatis sinda anquineltoca Cristo ca mochi hual anquichía.

<sup>10</sup> Huan aquí yes anquipujpúa, cuaquín nehual noje nicpujpuá pampa nicmati anquichíac cuali. Huan sinda unca len hual monequi pa nicpujpuás, cuaquinon inon hual nicpujpuá unca pa anmijchihuilis cuali ilaixpan Cristo.

<sup>11</sup> Yoje Satanás amo techquitzquis sejpa pa huil tejsulahuas. Ticmatilo cuali quinami yihual quitemujtía quinami huil tejchihuilis amo cuali.

*Pablo quijtúa quinami amo quipiaya mosehuilisli pa iyolo nepa pin caltilan Troas*

<sup>12</sup> In tonali quiman niajsic pa in caltilan Troas pa niclamachiltisquiaya ilamachiltisli cuali Cristo, nicmatiaya quinami toTata nejchihuilic tonalijmes cuajcuali pa niquinlaquetzilisquiaya yehuanten nepa pa quimatisquiaya Dios ilajtol.

<sup>13</sup> Ma yoje, amo nicpiaya mosehuilisli pa noyolo pampa amo niqitaya nepa tocní Tito. Pampín nimoxiluc, niquincahuac tocnían huan níac pa in lali Macedonia.

*Ticsulahualo mochi pan ipampa Cristo*

<sup>14</sup> Huan ma nicsehui Dios hual mojmosta unca quinami yihual techlaicana quinami se guache quinlaicana oc sequin guaches pa se latocalisli sinda quinsulahuaje yehuanten hual moanaloya ca yehuanten. Quema, Dios techlasulahuaultilía yehuanten hual moanaloya ca tehuanten, techlasulahuaultilía pan ipampa Cristo. Huan pan topampa tehuanten, Dios quisemana ilamachiltisli Cristo pa mochi caltilan cajcava yesi. Unca quinami len hual ajuíac mosemana cajcava.

<sup>15</sup> Quema, unca pampa tehuanten ticate quinami len hual iyaxca Cristo hual ajuíac. Yojque Dios quijtúa pampa ticate tehuanten. Quijtúa pampa ticate quinami ajualisli capa cate yehuanten hual Dios quinquixtítica pa ipolehuilisli inminlajlaculisli. Huan ticate ajualisli capa cate yehuanten hual mopolujticate huan amo quiman moitasi oc sejpa pampa amo canaloyi Cristo.

<sup>16</sup> Huan in hual quinami ajuíac, unca in lamachiltisli cuali hual ticlamachiltinemilo. Quinnextilía yehuanten hual moplejticate len hual quinmijnamiquiltía miqulisli san. Huan pampa yultiasi amo quineltocaticate, yoje lamisi miquisi huan yajmo moitasi capa unca Dios. Huan yehuanten hual canaloyi in lamachiltisli cuali, pan ipampa in lamachiltisli cuali, quimatilo pampa quiipalo yulilisli huan amo mocahuasi pa yulisi. Huan ¿aquí huil quiipía chichualisli pa quinchías innojen pan ipampa ichichualisli yihual ihuían? Amaquí huil.

<sup>17</sup> Ma yoje, pan ipampa ichichualisli Dios tehuanten huil ticchihualo. Amo ticate lacames hual quilamachiltilo Dios ilajtol pa ticanasi tomin. Quema, cate sequin hual quichihualo yoje. Ma yoje, tehuanten tilacames hual tiquiqtulo ilajtol Dios. Huan moxtin huil quimatilo pampa tiquiqtulo melahuac, pampa tiquiqtulo quinami ticataloaya iyampa Dios hual techtilanic pa tiyesi itequipanujquimes pan ipampa Cristo.

### 3

*Pablo quinmilía len quinequí quijtúa Dios ilajtulisli yancuic*

<sup>1</sup> Axan, ¿anquiqtúa tipejticate tilajtulo hué tonahuac tehuanten tohuían oc sejpa? Huan pampa inon hual nilamic niquiqtuc, ¿anquiqtúa monequi pa ticpiasi amames hual oc sequin quinmijcuiluje pa lajtulosquiaya hué tonahuac tehuanten, quinami monequí pa quipiasi oc sequin? ¿Anquiqtúa monequi pa

amhuanten anquinmijcuilus amames hual lajtulo hué tonahuac tehuanten huan pan impampa in amames ticpialosquiaya lahueliltilisli?

<sup>2</sup> Damo ticinequilo nindeno quinami inon. Amhuanten nojen anunca quinami amal hual lajtúa hué tonahuac tehuanten quinami neli ticate Dios ilanahuatinijmes hual yihual quintilanic. Unca quinami in amal unca lajcuiluli pan toyolo. Huan yoje, moxtin huil quimatilo pampa amhuanten anlajtúa hué tonahuac tehuanten, pampa unca quinami yehuanten momaxticate inon hual unca quinami lajcuiluli pani anmoyolo.

<sup>3</sup> Quema, yoje anquinnextilía moxtin pampa anunca quinami se amal hual Cristo anmitzjcuiluilic huan tehuanten antimitzhualiquilije. Huan in hual unca quinami cataya amal, amo unca quinami cataya lajcuiluli ca tinta. Inon quijcuiluc iEspíritu Santo Dios, yihual in Dios hual yuli. Amo cataya lajcuiluli pan tixcalimes aj'alastic. Cataya lajcuiluli pan inminyolo lacames, inminyolo yajyamanquil. In quinequi quijtúa anquipía ilajtol Cristo pa anmoyolo pampa anyuli anquichijtica quinami ilajtol quijtúa.

<sup>4</sup> Yojque, ilaixpan Dios ticmatilo pa toyolo pampa huil tiquijtulo neli pampa ticate Dios ilanahuatinijmes. Unca Cristo hual techmachiltic inon pa toyolo.

<sup>5</sup> Amo tiquijtuticate pampa huil ticchihualo len pan topampa tehuanten, pa yojque tiquijtulosquiaya pampa len tolahuliltilisli tehuanten quisa pa tehuanten tohuían. Tehuanten tolahuliltilisli quisa pa Dios hual unca ca tehuanten.

<sup>6</sup> Unca yihual hual techueliltic pa tictequipanuilisi ticlamachiltiticate ilajtulisi yancuic. Huan in lajtulisli yancuic amo unca míac lajtomes lajcuiluli hual ticpialo pa ticneltocasi. In lajtulisli yancuic ticmatilo pan ipampa quinami technextilía in Espíritu Santo. Ilajtulisi in míac lajtomes lajcuiluli amo huil ticneltocalo huan pampín techtilanisi pa timiquisi. Quema, in lajtulisli lamictía. Huan in Espíritu Santo hual quinextilía se in lajtulisli yancuic, yihual layuliltía.

<sup>7</sup> Axan, in lajtulisli lajcuiluli pan tixcali, in lajtulisli hual lamictía, Dios quinmijcuiluilic totajtzitzían ca míac laixpelalisli cualtichin hual moita san capa unca in Dios hual unca mochi cuali. Huan pampa inon, iixco Moisés noje laixpelaya chicahuac. Yoje yehuanten in israelitos totajtzitzían momajtije quitaje iixco Moisés laixpelatataya chicahuac, mas que lantiahuiaya in laixpelalisli.

<sup>8</sup> Huan sinda cataya yojque ca in lajtulisli calica Dios pehuac monextic ca ilacames, cuaquín ¿amo cayasquiaya lalalili ca niman míac laixpelalisli chicahuac in lajtulisli hual in Espíritu Santo technextilía?

<sup>9</sup> Quema, cayasquiaya yojque. Sinda cataya laixpelalisli cualtichin quiman quinlalilije in lajtulisli hual techtilanía pa timiquisi, cuaquinan cayasquiaya niman míac laixpelalisli cualtichin huan hué quiman in Espíritu Santo quilalic in lajtulisli calica Dios quinchipahuilía inminyolo lacames. Yoje quinquixtilía inminlaijlaculisli pa Dios toTajtzin quinmitas quinami lacames amo quipixticate lai jlaculisli.

<sup>10</sup> Inon tiquijtulo neli, pampa in lajtol hual Dios quinmilic totajtzitzían hual quipiani laixpelalisli cualtichin axan amo quipía laixpelalisli cualtichin nindeno sinda tiquitalosquiaya inahuac inon hual Dios techualiquilic ca niman míac laixpelalisli cualtichin.

<sup>11</sup> In lajtol hual Dios quinlalilic hualac ca yehuanten pa yina ca lanextilisli chicahuac. Axan yajmo moita yojque pampa unca quinami len hual pilinia.

Yoje, inon hual Dios techlalilic hual amo lamis huejcahuas, neli quipías niman míac chicahualisli hué.

<sup>12</sup> Yoje, amo timomajtilo se naditita pampa ticchixticate pa ticanasi in chicahualisli hual unca niman hué huan amo lamis huejcahuas.

<sup>13</sup> Huan pampa amo timomajtilo se nadita, amo ticate quinami Moisés hual quitzacuac iixco ca se dango pa yojque amo quitalosquiaya in israelitos quinami lantiahuiaya in laixpelalisli pa Moisés iixco.

<sup>14</sup> Huan yehuanten ilacames Israel amo mopatilije quinami laijnamiquilo, pampa quinami len hual unca chicahuac, jan yoje mocahualo yehuanten ilacames Israel quiman laijnamiquilo. Amo huil mopalalo, mochihuaje pachacal pa inminyolo. Pampa inon, yehuanten hual yulinijme pa yina huan yehuanten hual yulilo axan amo quimatilo len quinequi quijtúa quiman momaxtilo ilajtulisli in lajtol calica Dios pehuac monextic ca ilacames. Unca quinami se tzotzomajli mocahua quintzacuilijtica inminlajnamiquilisli calica quimatilosquiaya len quinequi quijtúa in lajtol. Jan pan ipampa Cristo san huil quimatisi len quinequi quijtúa.

<sup>15</sup> Quema, pa yina huan axan, quiman yes momaxtilo iamal Moisés, unca quinami se tzotzomajli quintzacuilijtica pa camo quitasi pa quimatisi len quinequi quijtúa.

<sup>16</sup> Ma yoje, sinda se lalacal motemaca pa yes se ca Dios ilacames, cuaquín unca quinami in tzotzomajli cataya laijcuanili.

<sup>17</sup> Axan, in Tata, yihual in Espíritu hual quinmijcuanilía inon hual quintzacuilía pa camo quimatisi len quinequi quijtúa. Huan capa cayas iEspíritu Santo in Tata, nepa lacames cate lamacahuali pa camo quipiasli pa panusi in lacocotilisli hual panusi sinda amo quineltocalo in lajtol. Cate lamacahuali pa yajmo quinlachihualtía inminlajlaculisli.

<sup>18</sup> Huan timoxtin tiquizticate ilaixpelalisli cualtichin in Tata, amo ticpixticate quinami in tzotzomajli tejtzacuilijtica toixco. Huan ticate timopalaticate pa timochihuasi quinami in Tata Jesús. Se tonali ticanasi nadita ilaixpelalisli cualtichin, oc se tonali ticanasi oc se nadita. Yoje, se tonali huan oc se tonali ticantiasi pa ticayasi se tonali quinami yihual, pampa in lapatilisli cualtichin quisa pa in Tata pan ipampa iEspíritu.

## 4

<sup>1</sup> Yoje, amo timomajtilo. Unca pampa ticpialo in tequipanulisli pa Dios pan ipampa ilaicnihilisli.

<sup>2</sup> Amo ticchihualo pinahualisli hual quichihualo lacames quinmolatilijticate oc sequin. Amo ticchihualo lacuajcuanalisli pa tiquisasi cuali ca len yes ticchixticate. Huan amo tilamaxtilo ca inminlamaxtilisli lacames quinami cataya ilajtol Dios. Amo ticmaxtilo quinami amo quijtúa ilajtol Dios. Quema, tiquijtulo melahuac inminlaixpan moxtin ca lajtol hual huil quimatilo len quinequi quijtúa. Huan pan ipampa inon timonextililo ca moxtin quinami ticate lacames mejmelahuac. Huan yehuanten nechitalo yoje pampa inminlajmatilisli pa inminyolo quinnextilía len unca cuali huan amo cuali. Noje Dios techita yoje.

<sup>3</sup> Huan mas que cuajnesi tolamachiltisli cuali amo huil quimatilo len quinequi quijtúa, san cate yehuanten hual amo cate pan iojli Cristo hual amo huil quimatilo. Yehuanten yajtialo micticate, amo moquixticate pa in polehuilisli.

4 Yehuanten cate quinami pachacames pampa laijnamiquilo yoje, amo laneltocalo. Quinchihuilic yojque Satanás, yihual in dios hual quitequipanuillilo yehuanten hual amo quiximatilo toDios. Satanás quinchihuilic pa yojque quintzacuilis pa camo quitasi pa inminyolo ilahuilislí ilamachiltisli cuali Cristo. In lamachiltisli unca hué huan cualtichin. Huan Cristo unca san mochi quinami Dios. Ma yoje, amo huil quimatilo inon pa inminyolo.

5 Tehuanten amo tilacuajcuamanalo quiman tiquinlaquetzililo ilajtol Dios, pampa amo tiquinlaquetzilijtcate tonahuac tehuanten. Tiquinlamachiltiticate inahuac Jesucristo huan quinami yihual unca in Tata hual quipía lahueliltisli pan moxtin. Huan tehuanten antimitzililo pampa ticate anmotequipanujquimes pampa yoje quinequi Jesús.

6 Yoje ticate pampa cataya Dios hual quijtuc: “Ma lahui capa laticumac”, huan yihual Dios lahuic pa laijtic toyolo pa techmacas tehuanten ilajmatilislí ichichahualislí cualtichin hual tiquitalo quiman tiquizticate Cristo. Unca quinami lahuilislí pa toyolo.

### *Tiyulilo ticlalijtcate tolaneltocalislí ca Cristo*

7 Huan ticpialo ilahuilislí ilajmatilislí Dios. Tiquitalo quinami ipati niman míac. Amo yoje míac ipatilo mochi pin laticpan quinami ipati inon. Huan ticpialo in lahuilislí pa laijtic tocuerpos hual caté lachihuali ca in lali. Ca inon ticnextilo quinami in chichahualislí niman hué quisa capa Dios huan amo quisa capa tehuanten.

8 Ca mochi lachihualislí quinami huil, tolacocolinijmes tejchihuililo amo cuali. Ma yoje, amo huil tejtzacuililo pa camo huil tiquisasi pa capa timoitalo pin amo cuali, pa camo tiasi ticchijtcate totequipanulislí. Huan mas que pan míac tonalijmes amo huil tilajnamiquilo ca mosehuilislí pa ticmatisi len ticpialo pa ticchihuasi, ma yoje, amo quiman timoitalo lasulahuali.

9 Techtojtocalo pa techmictisi, huan Dios amo techcajchahua. Sinda tejsulahualo, Dios amo quinmacahuiltía pa techmictisi.

10 Mojmosta timoitalo capa quinequilo techmictilo quinami quimictije Jesús. Inon techpanúa pa yoje moitas noje pa tocuerpos iyulilislí Jesús hual tejtzacuilía pa camo timiquisi.

11 Unca pampa mochi in tonalijmes quiman tiyulticate, amo mocahualo pa techtemacasi pa techmictisi pampa ticneltocalo Jesús, pa yoje monextilislí ilayuliltisli Jesús pa innojen tocuerpos (tonacayo) hual huil miquilo.

12 Yoje, timoitalo mojmosta capa huil timiquisi. Ma yoje, amhuanten anquiztia iyulilislí Jesús anmitzyuliltitica.

13 Ticpialo in se Espíritu hual techpalehuía pa ticlalislí tolaneltocalislí ca Jesús. Ticpialo in se Espíritu, jan quinami quijcuiluc se pan ipampa in Espíritu, quijcuiluc, quil: “Nlclalc nolaneltocalislí ca in, huan pampa inon nilajtuc.” Huan pampín tehuanten noje ticlalije tolaneltocalislí ca ilajtol Dios. Huan yoje ticneltocalo huan tilajtulo.

14 Dios quiyuliltic in Tata Jesús quiman cataya mictataya capa cate in mijquimes. Huan pampín ticneltocalo pampa noje techyuliltis pa ticayasi ca yihual. Huan techuicas noje ca amhuanten ca capic ticayasi ca yihual.

15 Mochi inon panuc pa yoje anmitzpanus len cuali amhuanten. Huan yoje, quiman ajsis in cuali ca míac huan oc sequin míac lacames hual Dios quinchihuilía, cuaquín yehuanten quisehuisi Dios míac. Yihual yoje quincaquis míac lajtomes huejué hual yehuanten quilisi.

16 Pampín amo timomajtilo. Mas que tocueros quinectialo lamilo pa miquisi, ma yoje toyulilisi pa laijtic tehuanten mochía yancuic mojmosta.

17 In lacocoltilisi hual tipanulo amo unca mías sinda tiqiztialo inahuac in mías laixpelalisi cualtichin hual amo lamis huejcahuas. In laixpelalisi cualtichin Dios quichijhijtica pa techmacas. Quema, amo tiqitalo nindenlo pan lalticpan hual huil tiqijtulo pampa unca jan quinami in laixpelalisi cualtichin.

18 Inon unca pampa tiqizticate innojen hual amo moitas nican pan lalticpan. Amo ticmacalo toxco ca innojen hual moitalo. Innojen hual moitalo yajmo huejcahuasi quiman lamis in lalticpan. Ma yoje, innojen cuajcualtichin hual amo moitalo amo quiman lamisi huejcahuasi.

## 5

1 Ticmatilo pampa in cuerpo (tonacayo) capa tiyulilo unca lachihuali ca lali, huan quinami se cali amo huejcahua, yoje amo huejcahua in cuerpo. Ma yoje, sinda in cuerpo xitinis, cuaquín ticpialo capa tichantisi. Unca se cali hual Dios quichíac, amo quichíac lacames. Unca pin cielo huan amo quiman lamis.

2 Nican neli tisiahuilo huan ticnequilosquiaya mías timolaquentilo ca tocuero hual unca pin cielo pa tichantilosquiaya pin tocuero hual unca iyaxca in cielo.

3 Inon ticnequilo, pa yoje, sinda timolaquentilo ca inon, cuaquinon amo timoitasi nacatil, quinequi quijtúa, toyolo amo moitas amo quipixtica icuero pa quipachus.

4 Neli unca inon pampa mochi in xixihuimes quiman tichantiticate pin cali hual unca tocuero, titenalo huan timoitalo lacocoltili. Amo unca pampa ticnequilo timiquilo pa yoje yajmo techcocoltía tocuero hual mojmosta oc se nadita mochijtica quinami lantica. Ticnequilo quinami timolaquentilo ca tocuero yancuic hual Dios yahui techmaca. In ticnequilo pa yojque yajmo nesis in tocuero tehuanten hual yahui miqui. Huan yajmo nesis, pampa in yulilisi yancuic cayas capa catani in yulilisi calica tipehuaje, in yulilisi hual amo huejcahuas.

5 Huan Dios, unca yihual hual jan yoje tejchijchihuilic pa huil ticpiasi mochi inon. Techmacac in Espíritu Santo pa techmachiltis neli pampa tialo ticpialo inon.

6 Yoje, amo timocahualo pa ticmatisi inon pa toyolo pampa pa mochi tonalijmes hual tiyulilo ca in tocuero, timocahualo pa quiahuac tocali, nicnequi niqijjtúa, ayamo ticate ca in Tata.

7 Huan tiyultialo nican pan lalticpan pan ipampa quinami ticneltocalo Dios ilajtol. Amo tiyultialo san ticneltocaticate len tiqitalo.

8 Tiquijtulo neli pa toyolo huan ticnequilosquiaya pa yajmo tiyulisi pa tocuero hual axan ticpialo, pa yoje huil tiyultiasi capa unca in Tata, pa yoje tichantisi ca yihual.

9 Pampa inon timotolinilo pa tiyulisi ticpaquiltiticate in Tata, ma caya quiman ticate pa laijtic tocuero huan pa quiahuac tocuero.

10 Yoje ticchihualo pampa timoxtin ticpiasi pa tinesisi iyampa Cristo quiman molalis pa technextilis sinda totequipanulisi pa yihual quimonziliaya. Monequi pa yihual technextilis inon pa yoje mochi seje ca tehuanten ticanasi in hual cayas toyaxca sinda unca cuali, o sinda amo unca cuali. Ticanasi pampa inon hual mochi seje ca tehuanten ticchihuaje quiman tiyuliloaya pa tocuero nican pan lalticpan.

*Dios ilajtol techmaca mosehuilisi pa toyolo*



<sup>11</sup> Yoje, pampa tiquiximatilo in Tata hual monequi pa timomajtisi ilaixpan yihual, timotolinilo pa tiquinyonlalis lacames pa quilalisi inminlaneltolalisli ca yihual. Dios quimati quinami ticate pa toyolo. Huan neli pa toyolo tiqijitulo ticchixicate pampa amhuanten noje anquimati da ticate lacames mejmelahuac. Anquimati inon pan ipampa ilajmatilisli anmoyolo.

<sup>12</sup> Amo antimitzilijticate oc sepa quinami cuali tiyulilo pa yoje anquijtus len cuali pa anmoyolo inahuac quinami tiyulilo. No, antimitzmacaticate quinami huil anquinlaquetzilis hué tonahuac tehuanten ca oc sequin, pa yoje huil anquinnanquilis yehuanten hual lajtulo hué pa inminyolo san inahuac quinami nesilo oc sequin. Nicnequi niqijtúa, lajtulo hué inahuac quinami quinmitalo oc sequin ca inmixelolojmes huan amo inahuac quinami nesilo pa inminyolo.

<sup>13</sup> Ma annimitznextili len nicnequi niqijtúa. Tehuanten, sinda tinesilo ca amhuanten quinami yehuanten hual amo laijnamiquilo cuali, cuaquín unca pa Dios san. Huan sinda tilajtulo huan tilachihualo quinami yehuanten hual quimatilo in hual laquetzalo, cuaquín unca pa antimijchihuilisli cuali amhuanten.

<sup>14</sup> Inon unca pampa Cristo tejchihualtía pan ipampa ilasojlalisli hual quilalic pa toyolo. Yoje ticmatilo neli pampa sinda se miqic pa laxlahuis pa inminyulilisli moxtin, cuaquín Dios quita inon quinami moxtin miqije.

<sup>15</sup> Huan Cristo miqic pa moxtin, pa yoje yehuanten hual yulticate yajmo yulisi pa mopaquiltisi yehuanten inminhuían. Axan, quinequi pa yulisi quipaquiltiticate yihual hual miqic huan yulic oc sepa pa quinchihuilisli cuali yehuanten.

<sup>16</sup> Axan huan pa quiman, yajmo tiqitalo amaqui quinami quitalo yehuanten pin lalticpan hual amo quiximatilo Dios. Huan mas que tiquiximatinijme Cristo quinami quitalo yehuanten pin lalticpan, axan yajmo tiquiximatilo yojque.

<sup>17</sup> Huan yoje sinda se mochíac se ca Cristo ilacames, axan yihual unca lalac lahichuali yancuic. Yajmo cate innojen calica pehuac yulic pan lalticpan hual quichihualtic quiman ayamo mochíac ilaneltocani Cristo. Xicmatican inon. Axan, mochí hual quichihualtía unca yancuic, yuli ca se yulilisli yancuic.

<sup>18</sup> Mochi inon quimaca Dios. Yihual quijcuanic in hual tejxiluc pa camo ticayalocuiaya ca yihual, inon hual tejchihuilini pa timoxtin tiyesi ilacocolinijmes. Axan yajmo ticate ilacocolinijmes. Huan Dios quichiac yoje pan ipampa Cristo imiquilisli. Tejchíac ilanahuatinijmes pa tiquinnexilisli lacames quinami Dios yajmo quinmita quinami ilacocolinijmes.

<sup>19</sup> Inon quinequi quijtúa pampa Dios cataya ca Cristo huan Cristo yoje quipiaya Dios ilahuelilitilisli pa quijcuanis inon hual quinchihuilic yehuanten pin lalticpan pa yelosquiaya ilacocolinijmes Dios. Huan quinhueliltic pa mochihuasi ilacames. Yajmo quinmotexpahuilijtica pampa catanijme laijlaculi. Huan mochilanilic in lanahuatilisli hual unca quinami axan quinequi quinmita moxtin quinami ilacames.

<sup>20</sup> Yoje, tehuanten ticate lanahuatinijmes pa Cristo. Dios quintemachijtica lacames pa mochihuasi ilacames, quintemachijtica pan topampa tehuanten. Tehuanten tiqijitulo ilamachilitilisli Cristo quinami cataya yihual hual lajtuya, tilajtulo pa ticchihuasi nican hué. Huan antimitzyantiticate chichahuac, ximochihuacan pa yajmo ancayas ilacocolinijmes Dios.

<sup>21</sup> Pa tejchihuilisli cuali tehuanten, Dios quilalilic Cristo ilatexpahuilisli mochi inminlaijlaculisli moxtin yehuanten pin lalticpan. Inon quichíac pa yoje Cristo panus ilacocoltilisli mochi laijlaculisli, mas que Cristo amo

quiman quimatic quichíac laijlaculisli. Quichihuilic Dios inon pa yoje tehuanten Dios techitasquiaya jan cuali quinami yihual unca cuali amo quipixtica laijlaculisli nindeno. Huan tejchihuilic Dios inon pan ipampa Cristo.

## 6

<sup>1</sup> Tehuanten hual titequipanujticate ca Dios, antimitztemachilo chicahuac, ximacahuiltican pa anmijchihualtis in cuali hual Dios tejchihuilía. Ma camo huala jan lapic (de in balde) ca amhuanten.

<sup>2</sup> Tiquijtulo inon, pampa Dios quijttúa pa ilajtol lajcuiluli:

Pa in tonali hual niqijtuc cuali, nimitzcaquic, huan nimitzpalehuic pan in tonali quiman ticataya laquixtili pa ipolehuilisli molaijlaculisli.

Xiquitacan. Axan unca in tonali hual quijtuc cuali huan quilalic. Xiquitacan. Axan unca in tonali hual anmitzquixtis Dios pin ipolehuilisli anmolaijlaculisli.

<sup>3</sup> Amo ticchihualo nindeno hual quitzaculis se pa camo canas iojli Dios. Amo ticnequilo pa moitilis len amo cuali ca quinami ticchihualo Dios itequipanulisli.

<sup>4</sup> Huan quinami tehuanten ticate Dios itequipanujquimes, yoje pan ipampa mochi lachihualisli, timonextilo tehuanten lacames hual tiyulilo quinami Dios quinequi. Yoje tiyulilo tipanujticate míac amo cuali hual tejchihuililo hual amo huil timoquixtililo pa inon. Tiyulilo timoizticate capa monequi pa ticpiasi míac hual amo huil ticanasi. Tiyulilo capa lacames tejchihuililo niman amo cuali.

<sup>5</sup> Techhuitequilo, tejtzacualo pa calijtic, majcoquilo lacames techixnamiquilijticate pa tejchihuilisli tetzcuinuc. Ticpialo pa titequipanusí chicahuac huan pampín tisiahuilo míac. Cate míac layuajmes amo techmacahuiltilo pa ticochisi, huan míac tonalijmes tipanusí timayanticate.

<sup>6</sup> Ma yoje tilanextilo pampa ticate ixolomes Dios pampa tiyulilo chipahuac huan pampa ticpialo lajmatilisli hual tiquitalo pa Dios ilajtol. Ticnextilo pampa amo ticualantiquisalo, huan pampa ticate cuali ca oc sequin. Ticnextilo pampa ticpialo pa toyolo in Espíritu Santo huan pampa tiquinlasojlalo lacames laijtic toyolo tiquinchihuilijticate cuali.

<sup>7</sup> Tilanextilo pampa ticate Dios ixolomes pampa tiquijtulo len unca melahuac, huan pampa Dios quinnextilía moxtin ichicahualisli ca mochi hual ticchihualo. Ticnextilo pampa ticpialo innojen calica huil timoanalo ipan in hual amo cuali. Pa inon Dios techuelilitía, pampa yihual techita lacames hual amo ticate laijlaculi. Yoje timoanasi ca Satanás pampa Dios quilalic pa timoanasi quiman yes tiquitalo in amo cuali pa tomajma cuali huan tomajma amo cuali, capa yes Satanás quinequi techana.

<sup>8</sup> Timonextilo pampa ticate Dios ilacames quiman oc sequin techmacalo momajtilisli o quiman tejtzacuililo pa camo ticpiasi mochi hual unca toyaxca pa ticpiasi o ticchihuasi, huan pampín tejiixiculo lacames. Timonextilo quinami Dios ilacames sinda laquetzalo tetzcuinuc huan sinda laquetzalo cuali inahuac in hual ticchihualo huan tiquijtulo tehuanten. Tejchihuililo quinami islacatinijmes, huan ma yoje tilacames mejmelahuac.

<sup>9</sup> Quijtulo pampa tehuanten quinami lacames hual amo monotzalo pa quinmiximatis se. Ma yoje, capa cate ilacames Dios techiximatilo cuali. Ca sequin nesi ca nadita tialo timiquilo, huan ¡xiquitacan! Dios techquixtia pin polehuilisli pa tiyultiasi. Techitalo quinami lacames hual Dios quincocoltica pampa ticate laijlaculi huan ma yoje ayamo ticate lamictili.

<sup>10</sup> Techitalo quinami lacames hual quincocojtica inminyolo huan ma yoje ticpialo paquilisli. Techitalo quinami lacames hual amo quipialo nindeno, huan ma yoje tiquinchihuililo lacames míac pa yoje quipiasí in míac hual Dios quinmaca. Techitalo quinami lacames hual amo quipialo nindeno hual inminyaxca huan ma yoje ticpialo mochi hual techmaca Dios hual unca toyaxca noje.

<sup>11</sup> Tocián pa Corinto, amo timotzacuilije pa camo antimitzilisi mochi in totequipanulisli. Antimitznequilo míac.

<sup>12</sup> Tolasojlalisli pa amhuanten amo unca tipichin. Neli tehuanten titemilo ca lasojlalisli pa amhuanten. Ma yoje ca amhuanten, nesi quinami amo antechlasojla míac tehuanten.

<sup>13</sup> Axan annimitzilía inon quinami niquinmilisquiaya xolomes: Xitechcuepilian quinami antimijchihuilije, xitechlasojlacan míac, amo jan nadita san.

### *Tehuanten ticate mochi sejse quinami tiopan capa chanti Dios laijtic tehuanten*

<sup>14</sup> Amo ximonamictican ca yehuanten hual amo quineltoalo toTata. Huan amo ximochihuilican lajtulisli calica anmijchihualtilo quinami yehuanten. Yehuanten hual yulilo quinami Dios quinequi neli amo huil yulilo ca yehuanten hual amo quinequilo yulilo quinami quinequi Dios. Huan aquinojen quipialo ilahulisli Dios laijtic capa inminyolo amo huil yesi ca se lajtulisli ca yehuanten hual inminyolo unca laticumac.

<sup>15</sup> Huan amo huil cate ca se lajtulisli Cristo huan Belial. (Belial unca oc se itoca Satanás.) Se hual quineltoaca Cristo amo quipía laxilulisli ca in hual quipía se hual amo quineltoaca Cristo.

<sup>16</sup> Huan amo unca ca se lajtulisli capa chanti Dios huan capa cate in monos hual lacames quinmolancuacuetzililo. Inon unca pampa tehuanten ticate tiopan Dios hual amo mocahua pa yulis (hual yulí mochipa), jan quinami quijtúa Dios:

Niyulis laijtic yehuanten huan nichantis pa yehuanten inminyolo, huan niyes inminDios huan yehuanten yesi nolacames.

<sup>17</sup> Pampín, in Tata noje quijtúa:

Yoje, xiquisacan nepa capa yehuanten hual amo nechneltoalo, huan ximocahuacan laxiluli capa yehuanten,

ximocahuacan pa anquijtus huan anquichías len calica Dios anmitzitas la'anilitli ca laijlaculisli.

Cuaquinon annimitzixnamiquis ca lanequilisli,

<sup>18</sup> huan niyes anmoTajtzin amhuanten huan amhuanten anyes noxolomes lacames huan sihuames,

quijtúa in Tata hual quipía mochi chichahualisli.

Yoje quijtúa in Tata.

## 7

<sup>1</sup> Lasojli nocnán, Dios quilic neli quinami yihual yahui quichía mochi inon. Pampín, ma timochipahuilican mochi hual quinchihuilía lacocoltilisli tocuervo huan toyolo. Ma timochihuacan lacames hual quimatilo yulilo quichijticate mochi cuali. Yoje momatis pampa ticate Dios ilacames, tiyulticate quinami yihual quinequi pa tiyulisí, pampa timomajtilo ilaixpan Dios ca lasojlalisli.

*Quijtúa quinami in corintotecos mopalaje pa inminyolo*

<sup>2</sup> ¡Ximotolinican pa anquimatis in hual ticnequilo tiqijtulo jan quinami antechiximati! Amo tijcajcahuaje amaqui, amo tiqijlaculije amaqui ilaneltocalisli, amo tijcajcuamanaje amaqui pa ticanalosquiaya len iyaxca.

<sup>3</sup> Amo annimitzilijtica inon quinami nicataya annimitzmotexpahuilijtataya, pampa amo quipía miac quiman annimitzlic quinami antimitzlasojlalo miac. Niman miac tiyulilosquiaya ca amhuanten huan timiquilosquiaya ca amhuanten sinda Dios quinequiaya.

<sup>4</sup> Niqijtúa niman chicahuac pa noyolo pampa amhuanten anyulis anquichjtica in cuali hual monequi pa anquichías. Nilajtúa hué anmonahuac amhuanten. Nicpía mosehuilisli hué pa noyolo pan anmopampa, niunca lalacahualtili. Mas que tipanulo miac hual amo cuali, ma yoje nimocahua ca niman miac paquilisli.

<sup>5</sup> Quema, tipanuloaya miac hual amo cuali, pampa quiman tiajsije pin lalticpan Macedonia, amo huil timosehuiloaya pa tocuerpos nindeno. Techtojtocaloaya pa tejchihuillosquiaya tetzcuinuc mochi cajcapa timotitililoaya. Lacames hual amo quineltocalo technamiquije totenco pa tejchihuilisi mochi amo cuali. Huan lajtic toyolo mochi tonali timomajtiloaya.

<sup>6</sup> Ma yoje, Dios quinlacahualtia yehuanten hual amo quipialo chicahualisli pa inminyolo, huan techlacahualtic pan ipampa Tito pan tonali hual ajsic.

<sup>7</sup> Huan amo ticataloaya lalacahualtili san pampa yihual hualac. Noje timolacahualtije pan ipampa in lacahualtilisli calica amhuanten anquilacahualtic. Quema, timolacahualtije pampa yihual techilic quinami anquinequi miac antechitas, huan quinami anmitzcocúa anmoyolo pampa nechcocuc noyolo pampa anpanujtica umpa in hual amo cuali. Huan timolacahualtije pampa techilic quinami anquinequi annechnapatía huan quinami anquichjtica quinami annimitzilia. Pampa inon nicataya ca niman miac paquilisli.

<sup>8</sup> Annimitzilia leca. Sinda annimijchihuilic pa anmitzcocuhuaya anmoyolo pan ipampa noamal, ma yoje amo nechcocúa noyolo axan, mas que quiman annimitztilanilic in amal, quema, nechcocuhuaya. Nechcocuhuaya pampa nicmatiaaya quinami in amal quicocoltisquiaya anmoyolo, mas qee annitzcnotiaaya jan pa je tipichin san.

<sup>9</sup> Ma yoje, quinami unca axan, niunca ca paquilisli. Amo niunca ca paquilisli pampa anmitzcocuc anmoyolo. Niunca ca paquilisli pampa anmitzcocoltic anmoyolo in amal huan pampín anquipalac anmoyolo pa anlajtusquiaya pa anmoyolo quinami Dios lajtúa. Inon cataya pampa anquiapiaya se icnotilisli hual Dios anmitzmacac, huan yoje amo anquipoluc nindeno pan topampa.

<sup>10</sup> Sinda Dios anmitzicnotiltía, yoje anmitzpalaltilia anmoyolo pa anlajtus pa anmoyolo quinami yihual. Huan inon anmitzquixtia pin ipolehuilisli laijlaculisli. Huan amo anicnotis pampa panujtica in amo cuali capa amhuanten. Sinda amhuanten anicnotía yoje quinami quincocúa inminyolo yehuanten pa in lalticpan hual cate laijlaculi, cuaquin in icnotilisli amo anmitzpalahuía. San anmitzmacahuiltía pa anmiquis.

<sup>11</sup> Anquimati inon, pampa xiquitacan quinami anmitzpalahuic in icnotilisli hual Dios anmitztilanilic. Axan anunca lacames hual niman anquinequi anyuli quinami Dios quinequi. Huan xiquitacan quinami axan anquinequi niman miac pa anquinnextilia moxtin pampa yajmo anmotexpahuía ca nindeno. Xiquitacan quinami axan ancualantica pampa quichjticate in amo cuali sequin capa amhuanten hual noje cate Dios ilacames. Xiquitacan quinami axan anmomajtitica pampa in amo cuali panujtica capa

amhuanten. Xiquitacan quinami axan anquinctica míac annechita oc sejpa huan anquinctica pa annimitzitas cuali. Xiquitacan quinami axan anquinejnequi pa mochi quisas cuali pa nehual huan pa Dios itequipanulisli. Xiquitacan quinami ca míac lanequilisli anlajlaniaya huan ancajuac pa moquixtis pa amhuanten in se hual quichíac in amo cuali.

Ca mochi hual moitaya ca in lachihualisli, anmonextilic neli quinami amo annoijlacultía nindeno pampa inon.

<sup>12</sup> Yoje, mas que annimitzijuiluilic, amo cataya mochi pampa quichíac yihual in lachihualisli amo cuali. Huan amo cataya mochi pampa inon hual quipanuc yihual hual panuc in amo cuali hual quichihuilic. No, annimitzijuiluilic pa yoje, quinami Dios anmitziztica, anajsis anquimatis amhuanten nojen quinami annechneltocas ca mochi anmoyolo.

<sup>13</sup> Pampín ticate ca paquilisli pa toyolo. Timocahualo lalacahualtili, timotalo ca chicahualisli pa toyolo.

Huan noje, pampa yoje timolacahualtije tehuanten, ticpialoaya míac paquilisli pampa cataya Tito ca niman míac paquilisli. Yihual cataya yoje, pampa quipíac mosehuilisli pa iyolo pan anmopampa anmoxtin.

<sup>14</sup> Niclaquetzilizic lajtomes huejué pampa anquichihuaya yoje. Pampín, amo nicataya lapinahualtili. Ma yoje, jan quinami mochi hual antimitzilije unca melahuac, jan yojque momatiaya melahuac in huejué lajtomes hual tiquijtuje pampa anyuli pa in Tata.

<sup>15</sup> Huan pampa inon, yihual Tito anmitzlasojla míac, pampa quijnamiquía quinami anquinctocac huan quinami anquinamiquic anmomajtitataya huan anyuyucatataya pan tonali hual ajsic ca amhuanten.

<sup>16</sup> Nicpía paquilisli, pampa huil niqijtúa chicahuac ca mochi noyolo pampa amhuanten anquichías mochi cuali hual monequi pa anquichías.

## 8

### *Dios ilacames quimatilo quimaca len quipialo pa lapalehuisi*

<sup>1</sup> Nocnían, ticnequilo pa anquimatis oc sejpa quinami unca in cuali hual san Dios huil tejchihuilía. Inon monextilic capa yehuanten hual quinehtocalo pin lalticpan Macedonia.

<sup>2</sup> Panuje niman míac lacocoltilisli inminpampa yehuanten hual quincocolilo. Ma yoje quipialo niman míac paquilisli, huan mas que cate lacames hual san quipialo naditita, ma yoje quinechicujque niman míac pa quinmacasi yehuanten hual amo quipialo.

<sup>3</sup> Huil annimitzilía neli, quimacaje quinami huil ca in hual quipiaje. Quema, neli quimacaje pa yehuanten mas que amo quipialoaya len pa quinmacas. Huan quimacaloaya amo pampa nehual niquinmilic pa quimacaje. Cataya pampa yehuanten san quinequiloaya.

<sup>4</sup> Quema, techtemachijque ca mochi inminyolo pa tiquinchihuililosquiaya cuali pa tiquinmacahuiltilosquiaya pa quinmacasi inminlajco pa quimpalehuisqui Dios ilacames jan quinami quimpalejticate in oc sequin.

<sup>5</sup> Huan amo quimacaloaya quinami tiquijtuloaya pa toyolo yahuiloaya quimacalo. Inon hual monotza niman míac, motemacajque yehuanten nojen ca in Tata, huan cuaquín motemacajque ca tehuanten quinami Dios quinequic.

<sup>6</sup> Huan pampa quichihuaje yoje, tiquiyantije Tito pa quilamis quichías capa amhuanten itequipanulisli in cuali hual san Dios huil quinchihuilía lacames. Inon ilanechiculisli mochi in tomin hual quinequilo quimacalo

Dios ilacames. Quinami pehuaje quinechicuje in tomin, tiquilije pa quichij-tiahuilosquiaya.

<sup>7</sup> Axan, quinami anquichía niman cuali mochi hual anquichía, ximoiztia-can pa anquichías cuali in itequipanulisli in cuali hual Dios anmijchihuilía, pampa anquineltoca in Tata niman cuali. Huan anquilamachiltía ilajtol Dios niman cuali, anquipía niman míac lajmatilisli. Huan anyuli anquichijtica Dios itequipanulisli niman cuali, huan antechlasojla niman cuali. Pampín, monequi pa anquichías in tequipanulisli quinami anquichía mochi niman cuali.

<sup>8</sup> Ma yoje, amo annimitzilijtica chicahuac pa anquichías quinami quichi-huaje yehuanten. San nicnequi pa anquitas quinami ca míac lanequilisli oc sequin quinpalehuilo Dios ilacames hual amo quipialo hual monequi pa quipiási. Huan yoje amhuanten noje huil anquimatis sinda neli anquinlaso-latica Dios ilacames quiman anquinmita jan quinami anmoita amhuanten.

<sup>9</sup> Yojqe techlasojla toTata, pampa anquimati in cuali hual toTata Jesu-cristo tejchihuilía. Mas que quipiaya míac, ma yoje mochiac lacal hual amo quipiaya nindeno pa yoje anmijchihuilisquiaya cuali, pa yoje anmochi-asquiaya amhuanten lacames hual quipialo míac pan ipampa quinami yihual mochiac se hual amo quipiaya nindeno.

<sup>10</sup> Axan, annimitzilía quinami niqijitúa pa noyolo ca in itequipanulisli in cuali hual Dios tejchihuilía: Unca cuali axcan pa amhuanten anlaquisas ca inon hual axan quipía se xil quiman anpehuac anquichíac. Huan amo san anpehuac anquichíac, noje anpehuac anquinequic anquichíac.

<sup>11</sup> Axan xilaquisacan pa yoje quinami anmolalic chicahuac pa an-quinequic anquichíac, amhuanten jan yoje anquinequis míac pa anlaquisas anquichías quinami huil anquichías ca in hual anquipía.

<sup>12</sup> Yoje yes cuali, pampa da unca lanequilisli, cuaquinox Dios quita cuali in hual quimaca se sinda quiquixtilía ilajquito in hual yihual quipía. Dios amo quijtúa pa se quimacas ilajquito inon hual amo quipía.

<sup>13</sup> Amo nicnequi pa oc sequin cayasi lamacahuali pa camo quimacas len, sinda pan ipampa inon amhuanten anyahui anquipía pa anquimacas míac sinda amo anquipía míac.

<sup>14</sup> San nicnequi pa cayas jan yoje pa moxtin. Cuaquín ca in míac hual anquipía axan, cayas cuali pa anquinmacas anmolajquito yehuanten hual amo quipialo in hual monequi pa quipiási. Huan yehuanten anmitzcuepilis pan ipampa quinami anmitzmacasi inminlajquito in míac hual quipialo míac hual monequi pa amhuanten anquipías. Huan yoje quisas jan yoje pa moxtin.

<sup>15</sup> Quinami unca lajcuiluli pa ilajtol Dios, quijtúa: “Aqui quipejpenac míac amo quicahuilic míac. San quicahuilic hual monequiaya pa quipiasquiaya. Huan aqui quipejpenac nadita noje quicahuilic mochi hual monequiaya pa quipiasquiaya.”

### *Tito huan itocanjmes*

<sup>16</sup> Huan ma ticsehuican Dios pampa quilalic pa iyolo Tito pa quinequis pa huil quitas ca amhuanten in lanequilisli hué pa anquinchihuilis cuali yehuanten hual amo quipialo, jan yoje quinami in lanequilisli hual annim-itzpilía pa noyolo.

<sup>17</sup> Niqijitúa inon pampa yihual quipiaya paquilisli quiman tiquiyantije pa yahuisquiaya capa amhuanten. Huan amo in san. Noje yahui capa amhuanten pampa yihual niman míac quinequiaya yahui.

<sup>18</sup> Ca yihual Tito, tictilanticate pa quitocas in tocní hual quiximatilo niman cuali moxtin in laneltocanjmes cajcapa monechiculo pa quimolancuacuetzilisi Dios. In tocní quiximatilo pampa quilamachiltía in lamachiltílisli cuali.

<sup>19</sup> Huan amo in san. Noje in laneltocanjmes cajcapa monechiculo quilajtutije pa canas ojli ca tehuanten quiman ticchijticate in itequipanulíslí in cuali hual Dios quinchihuilía lacames. Ticchijticate in tequipanulíslí pa yoje toTata quincacuis míac lajtomes huejué huan cuajcuali hual quilisi ilacames, huan pa yoje quinextis tolanequilíslí calica tiquinpalehuisi Dios ilacames.

<sup>20</sup> Yoje ticnequilo tictzacuillilo aquí yes techmotexpahuilísquiaya inahuac quinami tiqinxiluilijticate Dios ilacames hual amo quipialo len.

<sup>21</sup> Unca pampa timotolinilo pa ticchihuasi quinami Dios quita cuali. Huan amo in san, noje ticchihuasi quinami lacames quitalo cuali.

<sup>22</sup> Huan ca yehuanten tictilanticate tocní hual sejpa huan oc sejpa míac ticchihuilije pa ticmatílosquiaya quinami quichihuaya mochi. Huan yoje tiqitaje pampa tequipanúa míac, yihual unca se lalcal hual neli quinequi quitequipanulía in Tata. Axan yihual quinequi niman míac pa quichías in tequipanulíslí, pampa quijtúa chicahuac pa iyolo pampa amhuanten anquichías inon hual monequi pa anquichías.

<sup>23</sup> Sinda se quinequi anmitzljalanía quinami quichías Tito, annimitzilía yihual nolasojli huan titequipanulo ca yihual pa amhuanten. Huan pa anquimatis quinami lachihualo tocnían hual tiquintilanticate, yehuanten inminlanahuatinijmes in míac inminlanechiculisli laneltocanjmes hual cajcapa monechiculo quimolancuacuetzilijticate Dios pan ipampa itoca Cristo. Mochi in míac lanechiculisli quinextililo moxtin pin lalticpan Cristo ilaixpelalíslí cualtichin huan ichicahualíslí hual san yihual quipía.

<sup>24</sup> Pampín xicnechicucan in tomin pa yehuanten hual amo quipialo, huan yoje anquinxtilis inminlaixpan moxtin laneltocanjmes quinami anquinalasojla Dios ilacames, huan quinami unca melahuac quinami tiquinlaquetzililo hué ca oc sequin lacames quinami anquitequipanulía in Tata.

## 9

### *In tomin hual quinechicujque pa in laneltocanjmes hual amo quipialoaya*

<sup>1</sup> Axan amo nadita monequi pa annimitzjcuiluilis inahuac inon hual anquinctica anquinmaca Dios ilacames.

<sup>2</sup> Nicmati quinami míac anquinctica. Nilaquetza hué inminlaixpan yehuanten pa Macedonia quinami amhuanten anquichijtica. Niqinmílía quinami amhuanten pin lalticpan Acaya anlaquisac ca in lanechiculisli axan quipía se xihuil. Huan pampa quimatilo quinami anquinequi míac pa anquichías inon, yoje in míac ca yehuanten noje canaje lanequilíslí pan ipampa anmolanequilíslí.

<sup>3</sup> Ma yoje, niquintilantica tocnían pa como cayas jan lapic (de in balde) quinami tilajtutje hué inahuac quinami amhuanten axan anquípía lanechiculi in tomin. Pampa niqinmílic quinami ancayasquiaya ca in lanechiculisli lachihuali, niquintilantica pa yoje neli ancayas ca in tomin lanechiculi.

<sup>4</sup> Niquintilantica amo san gá in sinda sequin macedontecos yasi ca nehual, huan quiman ajsisi umpa huan quitasi pampa amo anuncia lachijchihuali pampa ayamo anquinechicuc in tomin, yoje tipinahuasi pampa tiqijtu-loaya pa toyolo pampa neli anyesquiaya lachijchihuali. Huan amhuanten noje neli anpinahuaya sinda ayamo ancataya lachijchihuali.

<sup>5</sup> Pampín, niquijtuc pampa monequi pa niquinyantis tocnían pa yasi capa amhuanten huan pa nehual ayamo nías, pa yoje yehuanten laicanasi quilaquisaltisi mochi hual moita ca inon hual anquijtuc neli pampa anyahuiaya anquimaca, pa yoje cayas lachijchihuali. Ma yoje, amo ticnequilo pa yes quinami len antimitzquijquixtilijtcate quinami se ilapixcalisli tomin. San ticnequilo pa yes quinami len hual anquinequi anquimaca.

<sup>6</sup> Inon niquijtutica: Aquí latoca jan nadita yahui lapixca jan nadita. Huan aquí latoca míac yahui lapixca míac. Jan yoje aquí quimaca nadita quipías san nadita in cuali hual Dios quinchihuilía lacames.

<sup>7</sup> Monequi pa mochi sejse quichías quinami quijtuc pa iyolo pa quichías. Ma camo quimaca quinami se hual amo quinequisquiaya, ma camo quimaca quinami quichihualtificate, pampa Dios quilasojla se hual quimacatía len ca paquilisli huan quixtoca quimaca.

<sup>8</sup> Huan Dios huil anmitzmaca míac pan ipampa mochi in cuali hual san yihual huil quinchihuilía lacames, pa yoje anquipixtías mochi hual quinequi anmitzmaca. Huan amhuanten noje huil anquimacas míac pa huil anquichías mochi tequipanulisli cuali.

<sup>9</sup> Jan yoje unca lajcuiluli Dios ilajtol:

Quinmaca cajcapa yesi yehuanten hual amo quipialo, quinami se hual quixintía latocli.

In cuali hual quichía huejcahuas huan amo quiman lamis.

<sup>10</sup> Dios hual cana latocli pa quimacas se hual latoca huan quimaca pan pa lacualisli, yoje yihual anmitzmiactilis anmochicahualisli pa anquinchihuilis cuali oc sequin.

<sup>11</sup> Quema, Dios anmitzmacas míac pan ipampa mochi in cuali hual huil anmijchihuilía. Huan yoje huil anquinmacas míac yehuanten hual amo quipialo. Huan pan tonali hual canaló inon hual tehuanten tiquinhuiquilisli yehuanten, cuaquín laquisas ca yehuanten quisejtcate Dios.

<sup>12</sup> Quema, pampa sinda tictequipanuilisli Dios tiquinhuiquilijtcate in tomin, amo san ticmacaticate Dios ixolomes len monequi pa quipiasí. Noje inon hual tiquinchihuililo quisas ca yehuanten quisejtcate Dios míac.

<sup>13</sup> Quiman anquichía in tequipanulisli yoje anquinpalejtica Dios ixolomes. Yoje inon quinextilis quinami anquilía Dios lajtomes huejué huan cuajcuali pa anmoyolo pampa anquineltoca in hual quijtúa in lamachiltisli cuali hual anquilamachiltía. Huan anquilis lajtomes huejué huan cuajcuali pa anmoyolo pampa anquimaca míac pa yulisi cuali yehuanten huan moxtin oc sequin.

<sup>14</sup> Pampa inon, yehuanten quinequisi míac pa anmitzitasi pa anmitziximatisi. Huan quilajlanisi Dios pa amhuanten, pampa Dios anmijchihuilic niman míac ilachihualisli cuali pa anmoyolo.

<sup>15</sup> ¡Ma ticsehuican Dios pampa yihual tejchihuilía cuali yoje míac! ¡Amo huil tiquinmijnamiquilo lajtomes pa tiquijtusi quinami unca hué in cuali hual tejchihuilía!

## 10

*Pablo quijcuilúa quinami yihual quipía lahueliltisli hual unca iyaxca se ilanahuatini Dios*

<sup>1</sup> Nehual, Pablo, annimitzyantía inon, quinami Cristo anmitzyantisquiaya, ca lajtomes amo la'ajuali huan amo chijchicahuac. Xicmatican len quinequi quijtúa in hual nía annimitzilía. Quijtulo sequin pampa nehual nimomajtía



quiman annimitzixnamiquía, noixco ca anmoixco. Ma yoje, quiman amo niunca ca amhuanten, cuaquín, quijtulo, annimitzlaquetzilía chicahuac, amo nimomajtítica.

<sup>2</sup> Axan annimitztequijtica inon. Quiman yes nihualas ca amhuanten amo xijchihuilican pa nicpiás pa nimonextis nicualantica ca sequin hual nicpiás pa niqunmixcomacas. Quijtulo pampa ticatē lacames hual lachihualo yoje quinami lachihualo yehuanten pin lalticpan hual cate laijlaculi.

<sup>3</sup> Inon amo unca neli, pampa mas que tiyulilo pin lalticpan, ma yoje amo timoanalo quinami guaches pan se moanalisi.

<sup>4</sup> Innojen calica timoanalo amo cate in teposlimes hual quinmulalo in guaches. Innojen calica timoanalo quiपालो ichichualisli Dios pa quixitinisi mochi hual mochía chicahuac pa quisulahuas Dios ilajtol.

<sup>5</sup> Yoje, ticsulahualo quinami lajtulo pa inminyolo lacames quinami yehuanten. Mochihualo hué pa quimotexpahuilisi Dios huan pa molalisi pa lajtusi quinami icocolinjmes pa yoje motzacuilisi pa como quiximatisi Dios. Mochi in hual quijtulo, inon ticsulahualo pan ipampa Cristo.

<sup>6</sup> Huan ticatē lachijchihuali pa ticmacas tixuxli pa mochi inminlajlaculisli yehuanten hual ayamo quinequilo laneltocalo. Huan inon ticchihuasi quiman yes amhuanten anmonextilis quinami anquineltoqa cuali mochi ilajtol Dios.

<sup>7</sup> Amhuanten anquita huan anquijnamiquía mochi jan quinami nesi se pa quihuac. Sinda se quijtúa chicahuac pa iyolo pampa yihual se ca Cristo ilacames, ma moijnamiquilti inon: Jan quinami yihual unca iyaxca Cristo, jan yoje ticatē tehuanten.

<sup>8</sup> Techmacac in Tata tolahueliltilisli pa antimijchihuilisi cuali, amo pa antimitzijlacusi. Pampa inon, amo nechpinahualtía sinda nilajtúa nadita hué inahuac tolahueliltilisli.

<sup>9</sup> Amo nyesquiaya quinami annimitzmajtisquiaya ca noamames.

<sup>10</sup> Ma yoje, quijtulo yehuanten: “Pablo lajtúa ca chichualisli. In lajtomes hual yihual quijcuiúa cate ej'etic pa quichías se huan unca chicahuac. Ma yoje, quiman unca ca tehuanten, cuaquín momajtía, huan in hual yihual quijtúa huil ticxixiculo.” Yoje quijtulo.

<sup>11</sup> Axan, nehual niqijtúa, lacames hual quijtulo yoje, ma quimatican len quinequi quijtúa inon. Inon hual tiqijtulo ca toamames sinda amo ticatē capa amhuanten, jan yoje ticchihualo sinda ticayasi capa amhuanten.

<sup>12</sup> Neli timomajtilo tiqijtulo pa toyolo pampa ticatē jan yoje quinami oc sequin hual momatiltilo. Amo tictemulo pa tiquinmitalo oc sequin pa ticmatisi sinda tiajsilo ticayalo quinami yehuanten. Yehuanten hual molamachihuililo ca yehuanten inminlamachihualoni amo quimatilo qui-jnamiquilo. Noje amo quimatilo quijnamiquilo sinda moitalo pa quimatisi sinda cate jan quinami oc sequin.

<sup>13</sup> Tehuanten amo tiqijtusi inahuac ticatē hué tehuanten. San tiqijtusi inon hual techmonotzilía. Tilajtusi hué san ipampa inon hual Dios tech-lalilic. Unca tolajquito itequipanulisli. Huan tilajtusi hué ipampa inon capa techlalic pa tictequipanulisli. Huan techlalilic pa tiajsisi pa tictequipanulisli capa amhuanten.

<sup>14</sup> San tilaquetzalo hué inahuac totequipanulisli capa amhuanten. Tila-quetzalo ca in laquetzalisli hual unca toyaxca, pampa quema, tiajsije capa amhuanten pa antimitzilisi Cristo ilamachiltilisli cuali. Sinda amo tia-jsiloyaya capa amhuanten pa ticpehualtisi in lamachiltilisli cuali, cuaquín amo cataya toyaxca pa tilaquetzasi hué inahuac totequipanulisli.

<sup>15</sup> Huan san tilaquetzalo hué inahuac inon hual Dios techlalilic. Nicnequi niquijtúa, amo tilaquetzalo hué tonahuac tehuanten quinami cataloaya tehuanten hual ticchihuaje inon hual quichihuaje oc sequin lacames. Inon hual, quema, ticchixticate pa panus neli capa amhuanten unca pa mochías niman hué in tequipanulisli hual huil ticchihuasi capa amhuanten. Noje ticchixticate pa huil tiajsisi huejca ca in lamachilitisli cuali huan amo pa titequipanusí san capa anchantís. Tiquijtulo neli pa toyolo pampa yahui caya yoje pampa anquilalis anmolaneltocalisli ca in Tata oc se nadita huan oc se nadita mojmosta.

<sup>16</sup> Yoje, huil tiquinmachiltisi Dios ilajtol pin lalimes hual mocahualo ca yoje capa unca anmolali. Ma yoje, ma ye san ca capic Dios techlalilic tehuanten pa titequipanulisli. Cuaquín amo tilajtusi hué tonahuac tehuanten quinami cataloaya tehuanten hual ticchihuaje tequipanulisli hual quichíac oc se tocní capa Dios quilalilic pa quitequipanulisli.

<sup>17</sup> Sinda se quinequi laquetza hué pampa inon hual san yihual quichíac, ma camo quichía. ¡Ma laquetza hué quijtutica quinami quichíac cuali in Tata!

<sup>18</sup> Inon tiquijtulo, pampa Dios amo quita cuali in se hual lajtúa hué pampa quichíac len yihual ihuán. Sinda yihual in Tata lajtúa hué pampa quichía se inon, yoje momatis pampa quita cuali.

## 11

### *In lanahuatinijmes hual islacatilo*

<sup>1</sup> Nicnequisquiaya pa anquicaquis nadita laquetzalisli hual nesis quinami nilajtutica quinami se hual amo quimati len quijtutica. Quema, xijcaquican in laquetzalisli amo ansiajtica huan amo ancualantica pampa nía annimtizilía inon. Neli annechpilía lanequilisli pa annechcaquis.

<sup>2</sup> Nichahuatía pa amhuanten, Dios nejchihuicilic pa nilajnamiquis yoje pa noyolo, pampa annimitzanac pa anyes quinami sihual yancuic hual monamictía ca Cristo. Unca quinami sihual yancuic huan chipahuac hual yes iyaxca ilahuical, in se san hual iyaxca in se ilahuical.

<sup>3</sup> Ma yoje, san quinami in cuhual quicuajcuamanac Eva ca islacatilisli pa camo quineltoacas Dios, nimomajjtica amhuanten noje annimjcuanis pan iojli Cristo pampa cuajnesi anlajtúa yoje pa anmoyolo. Huan yoje yajmo anquilasojlás Cristo quinami monequi quilasojla se sihual yancuic ilahuical ca se laijnamiquilisli chipahuac.

<sup>4</sup> Nicnequi pa anquicaquis inon hual nehual annimtizilis. Nicnequi pa anquicaquis pampa amhuanten amo anhuejcahua pa anquimacahuiltis pa annimtmixtis se hual huala capa amhuanten pa anmitzlamachiltía pampa unca oc se Jesús hual quipía oc se lamaxtilisli. Yihual amo quinami in Jesús hual antimitzlamachiltije. Amo anhuejcahua pa anquineltocas oc se espíritu hual amo in Espíritu Santo hual anpehuac anquineltocac. Huan amo anhuejcahua pa anquimacahuiltis oc se pa anmitzyantis pa anquineltocas se lamachilitisli hual amo unca in lamachilitisli cuali.

<sup>5</sup> Amo unca cuali pa anquimacahuiltis pa anmitzyantis yoje yehuanten. Niquijtúa nehual amo niunca se hual monequi pa niquitas oc se hual nechpalehuis pa niajsis nicayas jan yoje cuajcualtichin quinami in lanahuatinijmes hual islacatilo. Quijtulo pampa yehuanten lacames niman huejué.

<sup>6</sup> Mas que cuajnesi amo nilanotza cuali inminlaixpan lacames, ma yoje nicmati cuali len niquijtúa. Ca mochi quinami huil, tehuanten antimitzmachiltije inon ca lajtol hual moxtin quimatiloaya len quinequiaya quijtu. Huan antimitznexstillije len quinequi Dios ca mochi hual ticchihuaje.

7 Nimochíac tipichin pampa nitequipanuc pa nimolacualtic, pa yojque amhuanten huil anmochiasquiaya huejué anmochijtataya ixolomes Dios. ¿Anquijtúa cataya laijlaculisli pa nehual pampa annimitzmachiltic ilamachiltisli cuali Dios huan amo annimitzlajlanic laxlahuilisli nindeno pa inon?

8 Xiquitacan, cataya quinami nicanilic tomin oc sequin inminlanechiculisli laneltocanijmes quiman nechmacaje inmintomin pa nimolacualtic pa yojque annimijchihuilis Dios itequipanulisli capa amhuanten.

9 Huan innojen tonalijmes nicanani ca amhuanten huan monequini pa nicpiasquiaya len, amo nicmacac tequil amaqui ca amhuanten pa nechpalehuís, pampa tocnían pa Macedonia hual hualaje ca nehual nechhualiquilic mochi in hual monequini pa nicpiasquiaya. Huan yojque nimotzacuilic huan nimotzacuilis mochi quinami huil pa camo annimitzlatilic etialisli.

10 Neli niquijtutica inon ilaixpan Cristo hual unca laijtíc nehual pa nechlaquetzaltic melahuac. Inon hual nilaquetzica hué nonahuac nehual amo yes latzacuali pa camo mocaquis pin calimes hual cate pa Acaya.

11 Huan ¿leca niquijtúa inon? ¿Unca pampa amo annimitzlasojla? ¡Dios quimati annimitzlasojla!

12 Inon hual nicchijtica, nía nicchijtía pa niquintzacuilis yehuanten hual quitemulo quinami huil laquetzasi hué inahuac quinami tequipanulo. Quijtulo pampa tequipanulo san quinami tehuanten titequipanulo.

13 Lacames quinami yehuanten cate lanahuatinijmes hual islacatilo, cate tequipanujquimes hual lacuajcuamanalo, mochijticate quinami ilanahuatinijmes Cristo, huan neli amo cate.

14 Huan ¿leca timocahualo timoizticate, amo ticmzticate len tiquijtulo inahuac inon? Yihual Satanás mochía quinami se ilanahuatini in cielo hual quipía Dios ilahuilisli. Quema, mochía quinami se hual quichía in hual unca cuali.

15 Yojque, amo timolapolulosquiaya sinda tiquitalo Satanás itequipanujquimes mochijticate quinami lacames hual quimaxtilo islacatijticate quinami monequi pa yulis se pa quipaquiltis Dios. In lanahuatinijmes lamisi quinami quinmahuilúa pampa quimaxtilo in amo cuali.

### *Quinami Pablo panuc lacocoltilisli*

16 Annimitzilía oc sejpa, ma camo quijtu amaqui pampa nehual amo nicmati nindeno. Sinda quema anquijtúa yoje, xichitacan quinami nicanani se hual amo quimati nindeno, pa yojque nehual noje nilaquetzas nadita hué nonahuac nehual.

17 In hual niquijtutica, amo niquijtutica quinami cataya lajtol in Tata. San niquijtutica quinami nicanani se hual amo quimati nindeno huan ma yoje amo pinahua pa lajtus quinami unca hué yihual ihuán.

18 Míac lacames quijtulo quinami yehuanten cate hué, quinami cate huejueyenten pan ipampa len huil canal nican pan lalticpan. Pampín niquijtus quinami nehual niunca hué, quinami se hual amo quimati nindeno, pampa niyulic nipanujtica míac calica huil nilajtúa quinami nehual nicuali.

19 Niquijtúa yoje, pampa amo anquintzacuilía yehuanten hual amo quimatilo nindeno pa camo anmitzmactisi, pampa anquijtúa yehuanten quimatilo míac. Pampa inon annehmacahuiltis sinda nehual nilaquetza quinami se hual amo quimati nindeno.

20 Quema, pampa anquimacahuiltía sinda se lalac anmitztequipanultis chicahuac amo anmitz laxlajtica, o anmitzanilía len o anmitz cajúyahua o

mochía hué capa amhuanten o anmitzhuejuecaltía huan anmitztecua pa annoixco.

<sup>21</sup> Cuajnesi nicpía pa niqijtus: “¡Nipinahua pampa timomajtiloaya pa antimijchihuillosquiaya quinami inon!”

Ma yoje, sinda aquí yes amo momajtía pa quijtus len inahuac quinami yihual unca hué, nehual noje amo nía nimomajtía pa nilaquetzas quinami nehual niunca hué yoje quinami yihual. Xiquijnamiquican pampa nehual nilajtutica quinami se hual amo quimati len quijtutica.

<sup>22</sup> Quijtulo pampa cate hebreos hual quimatilo lajtulo ca hebreo. Nehual noje nihebreo huan nilajtúa ca hebreo. Quijtulo pampa cate israelitos. Nehual noje, ni'israelito. Quijtulo pampa cate imiahuimes Abrahám. Nehual noje niunca.

<sup>23</sup> Quijtulo pampa cate Cristo itequipanujquimes. Huan nel niqijtúa niunca se itequipanujquil niman hué quinami yehuanten amo quiman cataloaya. Ma yoje xiquijnamiquican, nilajtutica quinami se hual unca pa quiahuac itzontecon. Nitequipanuc niman míac, amo yoje míac tequipanuje yehuanten. Nicataya latzacuali calijtic niman míac huan yehuanten amo quiman ajsije cayaje latzacuali yoje míac. Amo nicmati quichi tonalijmes nicataya lahuitequili huan míac tonalijmes niahuiaya nimiquí.

<sup>24</sup> Ca macuili lahuitequilisli nechhuitequije in judíos ca mecal hueyote innojen treinta y nueve latecualisli.

<sup>25</sup> Ca ye lahuitequilisli nechhuitequiloaya lacames ca cuahuimes. Se tonali nechlaxilijque tixcalazos. Xitiniye ye barcos capa niahuiaya pan al huejcalan. Se semilhuil huan se layúa nicataya pin al huejcalan ca itenco huejca. Nilanilujtataya pan icuahuimes in barco hual xitinic.

<sup>26</sup> Míac nicanaya ojli capa nimoitaya quinami nimiquisquiaya. Cataloaya atencoymes huejué huan cataloaya laxtequinijmes. Nimoitaya ca in judíos nocnían huan ca yehuanten hual amo judíos hual quinequiloaya nechmictilo. Nimoitaya míac quinami nimictinemisquiaya pa cajcaltilan huan pa cuajlan huan pan barcos huan ca lacames hual quijtuloaya yehuanten tocnían laneltocanijmes huan islacatiloaya.

<sup>27</sup> Huan nicpiaya pa nitequipanus niman chichahuac, amo nicpixtataya in hual monequiaya pa nicpías. Míac layuajmes amo huil nimocochiltiaya, oc seppa huan oc seppa nímáyantinemiaya huan niamictinemiaya. Quema, míac tonalijmes amo nicpiaya len nijcuasquiaya, míac tonalijmes niquiztataya sehua huan amo nicpiaya tzotzomajli.

<sup>28</sup> Huan ca mochi innojen, nimoita ca ietialisli mochi inminlanechicujquimes in laneltocanijmes. Niquijnamiquía míac moxtin yehuanten pampa amo nicmati len quinpanujtica.

<sup>29</sup> Mochi sejse capa yehuanten hual panúa lacoccoltilisli o laijlaculisli, ca yihual nechcocúa noyolo quinami nechpanuaya nehual yoje. Huan mochi sejse capa yehuanten sinda unca se hual quilaicanac pa quichías laijlaculisli, cuaquín nel nichichinahuiaya laijtic noyolo pampa nechcocuhuaya noyolo, nipinahuaya huan nicualaniaya.

<sup>30</sup> Sinda monequi pa nilajtus hué, cuaquinon nilajtus hué pampa amo nicpía chichahualisli.

<sup>31</sup> In Dios huan iTajtzin in Tata Jesús, yihual hual moxtin amo mocahuasi pa quilisi lajtomes huejué huan cuajcuali, yihual quimati amo nislacatijtica.

<sup>32</sup> Pin caltilan hué itoca Damasco, in huelitini (gobernador) hual in hué Aretas quilalic nepa, yihual quinlalic guaches pa mochi in caltilan capa

calaquilo huan quisalo pin caltilan. Quinlalic nepa pa nejtzacualosquiaya pa camo nicholusquiaya. Yoje huil nechquitzquilosquiaya.

<sup>33</sup> Huan tocnían nechtemuhuije pa se chiquihuil hué pa se lapulisli pin cali (tepandi) cuajtic huan palahuac lachihuali ca tixcali hual quiyahualuaya in caltilan. Yoje nimoquixtic pin nopolehuilislisli huan nicholuc.

## 12

*Dios quimaxtic Pablo míac pan ipampa len quinextilic pa quitas ihuían huan pa quicaquis ihuían*

<sup>1</sup> Nicpiaya pa nilajtus hué annimitzilijtica mochi innojen hual nechpanuje nehual, mas que amo nechpalehuiaya huan amo quimpalehuiaya oc sequin. Ma yoje, niajtías niquijtutica quinami in Tata nechlaltaltic míac pan ipampa quinami laxotocalislisli, huan noje quinami míac nechlacaquiltic nehual nohuían san. Cate innojen hual amo huil ticmatilo pan ipampa tolahuelilitilislisli ihuían.

<sup>2</sup> Nicmati in hual quipanuc se lalac, yihual se ca Cristo ilacames hual axan quipía catorce xixihuil, cataya la'ajcoquili huan ajsic capa unca se cielo (ilhuicac) hual unca pa pani in ome cielos. Amo nicmati sinda in lalac cataya pa laijtíc icuerpo (inacayo) o pa quiahuac icuerpo. Dios quimati san.

<sup>3</sup> Huan nicmati in lalac yec laquitzquili pa yes la'ajcoquili. Huan sinda cataya la'ajcoquili ca icuerpo o amo ca icuerpo, jan iyolo san, inon amo nicmati.

<sup>4</sup> San cataya la'ajcoquili pa ilajco in cielo itoca paraíso huan nepa quicaquic lajtomes hual Dios amo quimacahuiltiaya se lalac pa quijtusquiaya sinda huil quinmijtuaya in lajtomes.

<sup>5</sup> Pampa inon hual quipanuc in se unca noyaxca pa nilajtus hué. Quema, nicataya in lalac huan nicmati unca melahuac in hual nijcaquic. Ma yoje, amo nicnequi nilajtúa hué inahuac in hual nechpanuc. San nicnequi nilajtúa inminahuac innojen hual lanextilo pampa amo nicpía chichahualislisli.

<sup>6</sup> Huil nilajtusquiaya hué inahuac in hual nechpanuc, pampa sinda nicnequiaya nicchía, amo nicataya quinami se hual amo quimati len unca melahuac. Ma yoje, nimotzacuilis pa camo nilaquetzas hué inahuac inon. Yoje amaqui quijtus laijtíc yihual pampa nehual niunca hué mas que cuajnesi ninesi niman hué ca oc sequin o nechitalo hué oc sequin o quijtulo pa inminyolo pampa niunca hué quiman quicaquilo in hual niquijtúa.

<sup>7</sup> Dios nechnextilic niman míac quinami unca yihual ca oc sequin lanextilislisli pa innojen. Ma yoje, pa camo nimochihuasquiaya hué quiman niquijnamictica mochi in cuali hual nejchihuilic, quimacahuiltic pa Satanás latilanis pa se ca iijyecames nechcocoltitías quinami se huizli quitzopintica icuerpo se. Quema, in unca pa nejtzacuilis pa camo nimochías hué.

<sup>8</sup> Pan ye latemachilislis nictemachic in Tata pa yihual quijcuanisquiaya capa nehual in iijyecal Satanás.

<sup>9</sup> Ma yoje, nechilic in Tata: "In cuali hual nimijchihuilía unca mochi hual monequi pa ticpías, san inon. Unca pampa nochichahualislis ajsis monextilislis hué ca lacames quiman yehuanten amo quipialo chichahualislisli." Yoje nechilic. Cuaquinon, ca paquilislis hué, nicnequi míac pa nilaquetzas hué inahuac quinami yoje huan yoje amo nicpía chichahualislisli. Nicchías inon, pa yojqe ichichahualislisli Cristo moitilic ca nehual.

<sup>10</sup> Pampín, pa nesis hué Cristo, nicpía niman míac paquilislis quiman nimoita amo nicpixtica chichahualislisli huan quiman nechuejuecaltilo huan

quiman nipanúa lacocoltilisli huan quiman nechtojtocalo pa nejchihuulisli amo cuali huan quiman nimoita capa amo huil niqusa pa camo nipanus lacocoltilisli. Niqijitúa inon pampa sinda niunca amo nicpixtica nochicahualisli, cuaquinon monextía ca nehual Dios ichicahualisli.

*Pablo quita míac hual quichihualo laneltocanijmes pa Corinto hual quicocúa iyolo*

<sup>11</sup> Axan, nimochíac quinami se hual amo quimati len quijtutica. Amhuan-ten annejchihualtic inon. Monequiaya pa amhuan-ten anljatusquiaya hué inahuac mochi hual nechpanuc nehual pa yoje amo nechpiaya pa nilajtus vojque. Ma yoje, amo anljatuc hué inahuac in hual nechpanuc. Pampín annejchihualtic pa nilaquetzas yoje, pampa innojen lanahuatinijmes hual anquintoca moitalo huejué. Ma yoje, nehual amo nimoita tipichin inmin-nahuac. Mas que amo nimonotza nindeno, amo niunca nadita tipichin huan yehuanten huejué.

<sup>12</sup> Neli unca pampa capa amhuan-ten, Dios quinchíac pan nopampa inno-je lanexstilisli hual lanextililo quinami neli niunca se ilanahuatini ca in oc sequin. Niqinchihuaya innojen huan nipanuaya mochi hual nejchihuulic amo cuali hual ajsic ca nehual. Quema, niqinchihuaya innojen lanexstilisli hual monextije pampa mochihualoaya ca Dios ichicahualisli. Cataloaya hual quinchialtije ca lamajtilisli lacames huan quinnextilic Dios ichicahualisli hué.

<sup>13</sup> Pampín, amo niunca tipichin huan in oc sequin lanahuatinijmes niman huejué. ¿Anquijtúa pampa amhuan-ten ancanac jan nadita in cuali hual Dios tejchihuulía? Cate míac oc sequin ilanechicujquimes Dios ilacames cajcapa. ¿Anquijtúa pampa innojen canaje míac ilachihualisli cuali? Amo cataya yoje. O jan in san, ¿cujajnesi anquijtutica amo annimijchihuulic mochi hual niqinchihuulic mochi oc sequin inminlanechiculisli in laneltocanijmes quiman amo annimitztlalilic len etic pa annehclacualtis? ¡Xicpujpuhuacan in hual amo nicnequic annimijchihuulic!

<sup>14</sup> Xiquitacan. Inon unca in ye lapaxaluilisli hual niunca lachijchihuali pa annimitzpaxaluilis. Huan amo annimitzmacahuultis pa annehclacualtis. Amo nictemujtica pa nicanas len unca anmoyaxca. Quema, nictemúa quinami annimitzanas amhuan-ten pa in Tata. Amo nicnequi nicana len unca anmoyaxca, pampa in xolomes amo quipialo pa quinmajcoquilisli len pa inmintajtzitzián. Cate inmintajtzitzián hual quipialo quinmajcoquilisli len pa inminxolomes.

<sup>15</sup> Huan nehual quinami anmotajtzin nicayas ca míac paquilisli pa annimitztequipanuilis huan pa niclaxlahuis mochi, quema, mas que yajmo nechcahuilis tomin nindeno huan yajmo nechcahuilis nochicahualisli. Inon nicchiasquiaya pa yoje annimitzpalehuis pa anquipías mochi in cuali hual Dios quipía pa anmoyolo. Huan sinda vojque annimitzlasojlatía, cuaquín ¿amo yoje míac anyahui annehclasojla?

<sup>16</sup> Ma caya inon da amo annimitztlalilic in etialisli pa annehclacualtis. Ma yoje, quijtulo pampa nehual nicataya se hual niunca lachijchihuali pa nicchías len yes pa nicanas len nicnequiaya. Quijtulo pampa annimitzanic len nicnequiaya ca lacaujcuamanalisli.

<sup>17</sup> ¿Annimitzcujcuamanac amhuan-ten pan ipampa se ca yehuanten hual nictilanic ca amhuan-ten? No, amo se ca yehuanten.

<sup>18</sup> Niqiyantic Tito pa yas ca amhuan-ten huan nictilanic in oc se tozni pa yasi huan yihual. Axan, ¿yihual Tito anmitzcujcuamanac? Amo quiman.

Tilachihuaje Tito huan nehual ticpixtataloaya toyolo tehuanten jan yoje, se quinami in oc se.

<sup>19</sup> ¿Axan anquijititica pa míac tonalijmes pampa timotolinticate pa tinesisi cuali anmolaixpan? No. San unca ilaixpan Dios tiquijtulo inon, quinami ticate se ca Cristo. Mochi hual antimitzililo unca pa antimijchicahualtisi pa momiactis anmolaneltocalisli pa Cristo, amhuanten nocnían hual annimitzlasojla.

<sup>20</sup> Monequi pa anyes lachicahualtili, pampa nimomajtitica cuajnesi quiman niájsis capa amhuanten, amo annimitzitas quinami nicnequi pa ancayas. Huan amhuanten cuajnesi amo annechitas nehual quinami anquinequi. Nimomajtía pampa cuajnesi annimitzitas anmolaxilijitica lajtomes huan anchahuatijitica huan ancualantiquisa huan san anquijititica pa anmoyolo quinami mochi sejse huil cana len pa yihual ihuían. Huan cuajnesi annimitzitas anlaxijxicujitica huan anlatenejtica yoje lalati huan anlajitica hué inahuac quinami anmoita. Quema, cuajnesi annimitzitas anyultica amo ca melahualisli. Huan yoje ca nadita amo anquitas len monequi pa quichihuasi Dios ilacames.

<sup>21</sup> Quema, nimomajtía pampa quiman nihualas ca amhuanten oc sejpa, cuajnesi noDios nechpinahualtis anmolaixpan. Cuajnesi nicpiás pa nimococus pa noyolo pampa míac capa amhuanten quichihuaje laijlaculisli huan amo mopatilije inminyolo pa lajtusi pa inminyolo quinami Dios. Quinchihuaje innojen hual Dios quinmita pucmic. Lacames canaje sihuames amo quinami quijtúa ilajtol Dios. Huan amo mocahuaje pa quinequisi quichihuasi len hual amo cana cuali. Quema, nimomajtía da míac amo quipalaje inminyolo pampa quinchihuaje innojen.

## 13

### *Pablo quinmilía len yahui quichía quiman ajsi, cuaquin quinchicahua*

<sup>1</sup> Quiman niájsis ca amhuanten, yes ye paxaluilisli nihualac ca amhuanten. Len yes hual cayas latexpahuili pan se, monequis pa ome o ye quijtusi pampa neli quimatilo pampa in se quipía laijlaculisli.

<sup>2</sup> Inon niquinmilía yehuanten hual quichihuaje laijlaculisli: Quiman nihuala oc sejpa, amo nía nimotzacuilía pa camo niquinmacas ojli. Niquinmilic yehuanten huan moxtin in oc sequin, huan niquinmilía axan mas que ayamo niunca nepa. Jan yoje niquinmilic quiman nicataya ca amhuanten in ome paxaluilisli hual annimitzpaxaluilic.

<sup>3</sup> Yoje nicayas, pampa anquinequi anquimati quinami neli lajtúa Cristo pan nopampa. Yihual quinextilía míac chichahualisli quiman anmijchihuilijtica len. Huan monextía ichichahualisli hué noje capa amhuanten pa annitmacas ojli sinda anquichía len yes hual amo cuali.

<sup>4</sup> In momati, pampa mas que cataya lapiluli Cristo pan in cuahuil nestataya quinami se hual amo quipiaya chichahualisli pa moquixtis pin imiquilisli, ma yoje axan yuli pan ipampa ichichahualisli Dios. Huan unca jan yoje ca tehuanten. Amo ticpialo tochichahualisli toyaxca. Ticpialo ichichahualisli pampa ticate se ca yihual. Ma yoje, quiman antimijchihuilijticate quinami unca toyaxca pampa ticpialo lahuellitilisli, tiyulisí ca yihual pan ipampa Dios ichichahualisli pa antimitzpalehuisi.

<sup>5</sup> Ximonextilican neli sejse ca anmoxtin pa anquimatis da anyultica quinami monequi pa yulisi yehuanten hual neli quilalilo inminlaneltocalisli ca Cristo. Mochi sejse ma quita pa yihual iyolo pa quimatis neli pampa unca se ca Dios ilacames. ¿Amo anquijnami quía inon quinami Jesucristo yuli

lajitic anmoxtin sejse? Ma yoje, sinda amo anquilalic anmolaneltocalisli ca Cristo, amo huil anlanextilis pampa unca lajitic pa anmoyolo.

<sup>6</sup> Nicchixtica pa amhuanten anquitas pampa tehuanten antimitznextilic cuali quinami neli ticpialo Jesucristo lajitic toyolo tehuanten.

<sup>7</sup> Huan ticlajlanilo Dios pa como anquichías len amo cuali. Amo ticlajlanilo inon pa yoje lacames quimatasi pampa neli Cristo yuli lajitic pa tehuanten. Inon ticlajlanilo pa anyulis anquichijtica in hual unca cuali mas que lacames cuajnesi techitasi quinami tehuanten amo neli ticate ilanahuatinijmes Cristo. Huan cuajnesi techitasi quinami tehuanten amo tilanextilije cuali pampa ticpialo Cristo lajitic toyolo tehuanten. Amo monotza len sinda san nesis pampa tehuanten amo tilanextilije cuali pampa unca pa toyolo. Ma yoje, monotza míac pa amhuanten anquichías len quinequi Dios.

<sup>8</sup> Inon niqijitúa pampa amo huil nicchía nindeno pa niqintzacuilis Dios ilacames sinda yulticate quinami quijtúa ilajtol melahuac. Amo huil nicchi-huaya mas que cuajnesi nicnequisquiaya nicchía inon pa annimitzmachiltis quinami nicpía in ilahuelilitilisli se ilanahuatini Cristo. San huil nicchía inon sinda ilacames amo yulticate quinami quijtúa Dios ilajtol.

<sup>9</sup> Pampa inon ticpialo paquilisli quiman amo ticpialo chicahualisli huan amhuanten anunca ca chicahualisli. Ticnequilo tiquijtulo, ticpialo paquilisli sinda amo ticpialo pa tictequipanultisi tolahuelilitilisli pa antimitzajuasi chicahuac. Quema, ticpialo paquilisli quiman anquipía chicahualisli pa anyulis quinami Dios quinequi. Inon hual ticlajlanilo Dios unca pa an-mochías niman cuali quinami yihual quinequi.

<sup>10</sup> Pampa inon annimitzjicuilulijtica innojen lajtomes mas que amo ni-unca ca amhuanten, pa yoje pan in tonali hual nihualas, amo nicpías pa nicayas cualanquil ca amhuanten quiman nictequipanun in lahuelilitilisli hual nechmacac in Tata. In lahuelilitilisli unca pa annimitzpalehuis pa an-quineltocas niman cuali. Amo nechmacac lahuelilitilisli pa annimitzquixtilis anmochicahualisli pa como huil anyulis quinami yihual quinequi.

<sup>11</sup> Axan, nechcahuilía san inon pa annimijchicahuas, nocnían. Ximotolinican pa anmonextilis quinami monequi pa yulisi ilacames Dios. Xiyén chicahuac pa anmoyolo quinami annimitzyantía, xilajnamiquican quinami se san ca oc sequin, huan xiyulican ca mosehuilisli pa móchi anmoyolo. Huan Dios hual lalasojla huan quinlalilis mosehuilisli pa lacames inminyolo, yihual cayas ca amhuanten.

<sup>12</sup> Ximopialtican se ca oc sequin ca in tenamiquilisli quinami jan Dios ilacames quichihualo.

<sup>13</sup> Anmitzpialtilo moxtin tocnían nican hual quipialo inminlaneltocalisli lalalili ca Dios.

<sup>14</sup> Ma caya ca amhuanten in cuali hual san toTata Jesucristo huil tejchi-huilía huan ma caya ca amhuanten ilasojlalisli Dios. Huan ma caya ca amhuanten in Espíritu Santo hual techmachiltía pampa timoxtin ticate se san ca Dios. Unca pampa timoxtin ticpialo pa toyolo in Espíritu Santo. Yoje ma ye.



## In amal hual Pablo quinmijcuilulic in laneltocanjmes pin lalticpan itocani Galacia

### *Pablo quinmijcuilulía in laneltocanjmes pa Galacia*

<sup>1</sup> Nehual Pablo, nilanahuatini huan amo nechtilanije lacames. Noje amo cataloaya lacames hual nechlajtultije pa niyes lanahuatini. Cataloaya Jesucristo huan Dios toTajtzin nechlajtultije pa niyes lanahuatini. Quema, nechlajtultije Jesucristo hual miquic huan Dios toTajtzin hual quiyuliltic oc sejpa quiman miquic.

<sup>2</sup> Nehual huan moxtin tocnían hual cate ca nehual, antimitzijcuilulijtcate amhuanten in laneltocanjmes hual anmonechicúa pa míac caltilan hual cate pin lalticpan Galacia.

<sup>3</sup> Ma Dios toTajtzin huan in Tata Jesucristo anmijchihuilican cuali huan ma caya inminmosehuilisi pa anmoyolo.

<sup>4</sup> Quema, Jesucristo motemacac pa miquis pa yojque Dios techquixtilis tolajlaculisi. Huan yoje techquixtía pin polehuilisi ca capic techuica in amo cuali hual axcan yulilo quichijtcate yehuanten pin lalticpan. In amo cuali pin lalticpan amo mocahua pa techijlacus. Techquixtía Cristo pa in polehuilisi pampa yoje quinequic toDios. Yihual noje unca toTajtzin hual amo mocahua pa yes toTajtzin, yojque ma ye.

<sup>5</sup> Pampa inon, ma tiquijtucan pa Dios toTajtzin lajtomés huejué hual amo quiman lamis, yojque ma ye.

### *Amo unca oc se lajtol hual techmaxtía quinami Dios techquixtía pin polehuilisi*

<sup>6</sup> Nimolapolultía pampa yojque amo ca míac tonalijmes anquicajtica ilaneltocalisi Dios hual anmitznotzac pa ancanas iojli pan ipampa in cuali hual tejchihuilía Cristo. Quema, anquicajtica huan axcan anquinctica ancanas oc se ojli pa anquineltoacas oc se lamaxtilisi calica, quil, anmoquixtis pin polehuilisi.

<sup>7</sup> Xiquitacan. Amo unca oc se lamaxtilisi calica huil anmoquixtis pin polehuilisi. Jan sequin lacames anmitzlapolultiticate. Anmitzilijtcate pampa inminlamaxtilisi unca melahuac. Quincticate quijlaculo ilamaxtilisi Cristo ilamachtilisi cuali.

<sup>8</sup> Ma yoje, sinda tehuanten tohuían o quema, se ilanahuatini in cielo antimitzmachtililo oc se lamaxtilisi pa in lamachtilisi cuali, huan sinda in lamaxtilisi amo unca san ilamaxtilisi in lamachtilisi cuali hual ticpehualtije antimitzlamachiltije, cuaquín ma Dios techpolehuiltili ca mochi icualanilisi.

<sup>9</sup> Quinami antimitzilije pa innojen tonalijmes hual tipehualoaya antimitznotzalo, nehual noje axcan niquijtúa oc sejpa: Sinda se anmitzlamachiltía oc se lamaxtilisi pa in lamachtilisi cuali pa anquineltoacas noje ca tolamaxtilisi hual anquicaquic tehuanten antimitzilijtataloaya, ma Dios quipolehuiltili ca mochi icualanilisi.

<sup>10</sup> Axan, ¿leca annimitzilic inon? ¿Anquijtúa nicnectica pa nechitasi cuali lacames o pa nechitas cuali Dios? ¿Anquijtúa nictemujtica quinami huil niquinpaquiltis lacames? No, amo yoje, pampa sinda niquinpaquiltitiahuiaya lacames, huan sinda niquinmaxtiahuiaya len yehuanten quinequilo pa niquinmaxtis, cuaquinon yojque yajmo nicataya Cristo itequipanujquil, pampa amo niclamachiltiaya Cristo ilanextilisi.

*Yoje unca quinami Pablo mochihuac lanahuatini*

<sup>11</sup> Inon annimitzilía, nocnían, pampa nicnequi pa anquimatis inon. Amo cataloaya lacames hual nechilije in lamachiltisli cuali calica annimitzlamachiltic Cristo ilanextilisli.

<sup>12</sup> Amo nijcaquic in lanextilisli pan inminpampa lacames, yehuanten amo nechnextilije. Cataya pan ipampa Jesucristo ihuían nijcaquic, yihual nechnextilic.

<sup>13</sup> Cataya yoje quinami nechpanuc: Anquimatic quinami niyulini pa innojen tonalijmes hual nictequipanuilini Dios quinami quitequipanuililo in judíos. Huan quinami yehuanten yulilo, nehual noje niyulini. Quema, huan niquintojtocani yehuanten hual quineltoaloaya Cristo monechicujtine-miloaya pa quitequipanuililosquiaya Dios. Niquintojtocani niman míac, huan oc sequin amo yoje míac quintojtoaloaya quinami nehual. Ca mochi nochicahualisli niquintojtocani pa niquinchiuilisquiaya amo cuali. Nimotolinini pa niquintzacuilisquiaya pa yojque yajmo quineltoalosquiaya Cristo.

<sup>14</sup> Huan nimonextilijtiahuia niman míac quinami in judíos quimolancuacuetzililo Dios. Amo monextilijtiahuiloaya yoje míac yehuanten nocnían in judíos hual moscaltije ca nehual. Nicnequini niman míac pa nicnapatis mochi in lajtol hual technextililo quinami ticmolancuacuetzililo Dios hual totajtzitán techcahuilije, amo yoje míac quinequinijme quichihualo in oc sequin judíos nocnían. Nehual nicnequini pa moxtin quineltoalosquiaya inminlajtol in judíos.

<sup>15</sup> Ma yoje, Dios quilalic pa nictequipanuilis yihual. Inon quilalic quiman ayamo nilacatic. Nechnotzac pan ipampa in cuali hual tejchihuilía pa nicchías itequipanulisli. Yoje, in tonali hual yihual quitac cuali,

<sup>16</sup> nechnextilic iXolol pa neli nicmatis aqui yihual huan pa yojque niclamachiltis ilamachiltisli cuali Jesucristo capa moxtin in oc sequin nican pin lalticpan hual amo judíos. Huan quiman nicmatic pampa niahuiaya niquinlamachilti ilamachiltisli cuali ca yehuanten hual amo judíos, cuaquinon ca lacames amo nilaquetzac pa niquinmilisquiaya inon.

<sup>17</sup> Huan amo nipanquisac pa Jerusalén pa nilaquetzas ca yehuanten hual yeje lanahuatinijmes pa innojen tonalijmes quiman nehual ayamo nimochihuaya lanahuatini. No, nicchíac inon: Níac pa in lali Arabia huan cuaquín nimocuepac oc sejpa pa in caltilan hué Damasco.

<sup>18</sup> Cuaquinon panuje ye xixihuimes, huan nipanquisac pa Jerusalén pa nicpaxalulic Cefas. Nicataya ca yihual pa quince tonalijmes.

<sup>19</sup> Amo niquitac oc se ca in lanahuatinijmes, jan Jacobo san, yihual icni in Tata Jesús.

<sup>20</sup> Innojen lajtomes hual annimitzijcuiluilijtica, xiquitacan, ilaixpan Dios annimitzilía, amo nislacatijtica.

<sup>21</sup> Cuaquinon níac pa in lalimes Siria huan Cilicia.

<sup>22</sup> Yoje amo nechiximatije nehual yehuanten hual quineltoaje Cristo pin lalticpan Judea, yehuanten hual nepa pa míac caltilan monechiculo pa quimolancuacuetzilisi toTata.

<sup>23</sup> Jan quimatije san pampa nehual axcan niclamachiltinemiaya ilanextilisli in lamachiltisli cuali hual pa yina nicnequini nictzacuali pa yajmo mosemanasquiaya ca lacames. Quema, nehual hual pa yina niquintojtocani niquinchiuilijtataya tetzcuinuc pa yajmo quineltoacasi axan niclamachiltinemiaya.

<sup>24</sup> Huan yehuanten in laneltocaniymes pa Judea quililoaya Dios lajtomes huejué pampa yihual nejchihuilic inon.

## 2

### *In oc sequin lanahuatinijmes quinamiquilo Pablo quinami inmicni*

<sup>1</sup> Cuaquinon panuje catorce xixihuimes, huan nipanquisac oc sejpa pa Jerusalén, huan Bernabé tipanquisaje. Noje ca tehuanten ticuicaje Tito.

<sup>2</sup> Ca ompic nipanquisac pampa nechnextilic toTata pampa yihual quinequiaya pa nías. Huan nilaquetzac ca yehuanten inminhuían hual moxtin quinmitaloaya quinami inminhuejueyenten in laneltocaniymes. Niquinlaquetzilic quinami niclamachilitataya in lamachilitlisli cuali capa yehuanten hual amo judíos. Niquinlaquetzilic pa neli quimatisi len niclamachilitica. Nicnequiaya nicmati sinda cuajnesi yesquiaya jan latic (de in balde) mochi in tequipanulisli hual nicchihuaya capa cataloaya yehuanten hual niquinlamachilitinemiaya.

<sup>3</sup> Huan yehuanten in huejueyenten amo quitaje yoje notequipanulisli. Tito cataya nepa ca nehual, huan yihual se griego, amo judío. Ma yoje, amo quilije pa yihual quipías pa yes latequili pa icuilaxli quinami lanextilisli pa quinami quineltocaya.

<sup>4</sup> Ma yoje, nepa cataloaya sequin hual techilije pampa yeje tocnían hual quineltocaloaya Cristo quinami tehuanten. Huan islacatiloaya. Calaquije capa timonechicuje, amo ticmatije aquinojen yehuanten, calaquije quinami lachochahuanijmes capa tehuanten pa technapachilosquiaya. Quinequiyoaya quimatilo sinda tiquinneeltocaloaya in judíos inminlajtomes hual quinnextililo quinami quimolancuacuetzililo Dios. In lajtomes amo ticpialo pa tiquinneeltocasi, jan ticpialo pa ticneeltocasi Cristo Jesús. Ma yoje, yehuanten technapachiloaya pa techneltocaltilosquiaya quinami quinnextililo inminlajtol quinami quimolancuacuetzililo Dios in judíos. Yoje tejchihualosquiaya quinami tequipanujquimes hual amo quilaxlahuilo.

<sup>5</sup> Ma yoje, amo tiquinmacahuiltije pa se nadita pa yehuanten tejchihualtilosquiaya len techyantiloaya pa ticchihualosquiaya. Yojque amo mocahuas pa cayas ca amhuanten ilanextilisli melahuac in lamachilitlisli cuali jan quinami antimitzlamachiltije.

<sup>6</sup> Ma yoje, ma annimitzili in hual quichihuaje yehuanten hual nesiloaya cate huejueyenten ca in laneltocaniymes. Huan mas que cataloaya huejueyenten, amo niquitaya inon quinami len hual monotza. Dios amo quita se quinami tehuanten tiqitalo in se. Huan yehuanten hual quinmitaloaya quinami huejueyenten ca in laneltocaniymes amo nechnahuatc pa nicnextisquiaya oc se lanextilisli pa in lanextilisli hual itequi nicnextiaya.

<sup>7</sup> Amo nechilije nindeno quinami inon. Quitaje quinami Dios nechlajtultic jan nehual san pa nilaicanas niclamachiltis in lamachilitlisli cuali capa yehuanten hual amo judíos. Jan yoje cataya quinami Dios quilajtultic Pedro pa laicanas quilamachiltis ilamachilitlisli cuali Jesús ca in judíos.

<sup>8</sup> Quitaloaya quinami Dios huil tequipanuaya lajtic capa Pedro pa yoje yes lanahuatini pa in judíos. Noje quitaloaya quinami huil tequipanuaya lajtic capa nehual pa nives lanahuatini pa yehuanten hual amo judíos.

<sup>9</sup> Huan yoje, quiman quimatije pampa Dios nejchihuilic ilachihualisli cuali pa nives lanahuatini, cuaquin Jacobo huan Cefas huan Juan, yehuanten hual moxtin quinmitaloaya quinami huejueyenten ca in laneltocaniymes pampa quinpalehuiloaya, yehuanten techmacaje inminmajmajuan cuali Bernabé

huan nehual pa lanextilisi pampa cataloaya ca se laijnamiqulislisi, pa yojque Bernabé huan nehual tiajtiasi tilamachiltisi capa yehuanten hual amo judíos. Huan yehuanten, Jacobo huan Cefas huan Juan yajtiahuilosquiaya lamachiltilo capa in judíos.

<sup>10</sup> San techilije pa tiquijnamictiasi tiquinpalehuisi yehuanten hual amo quipialo míac calica yulisi, huan inon nimotolintiahuiaya pa nichchías.

*Pablo cajua Pedro nepa Antioquía*

<sup>11</sup> Ma yoje, cataya se tonali hualac Cefas pa Antioquía capa ticataloaya Bernabé huan nehual ca in laneltocanijmes pa Antioquía. Huan niquixcomacac Cefas pampa yihual quichíac len hual amo cataya quinami technextilía Dios ilajtol.

<sup>12</sup> Niquixcomacac pampa lacualoaya ca in laneltocanijmes hual amo judíos. Cuaquín hualaje sequin laneltocanijmes judíos hual chantije pa Jerusalén, yehuanten quintilanic Jacobo. Ajsije yehuanten, pehuaya mocahua pa lacuas Cefas ca in laneltocanijmes hual amo judíos. Quema, moquixtiaya pa capa yehuanten pampa momajtiaya da cuajnesi cajualosquiaya in laneltocanijmes judíos hual Jacobo quintilanic.

<sup>13</sup> Huan yojque, in oc sequin laneltocanijmes judíos hual cataloaya nepa ca tehuanten, pehuaje lachihuaje quinami Cefas. Yoje, amo lachihualoaya quinami Dios technextilía pa ticchihuasi, mas que quimatiloaya pampa amo ticpialo pa ticneltocasi in lajtomes hual quinnextililo quinami in judíos quimolancuacuetzililo Dios. Huan quema, yihual Bernabé pehuac moquixtic pa capa in laneltocanijmes hual amo judíos. Lajtuaya ca ilanextilisi Dios pa iyolo huan ma yoje lachihuaya quinami in oc sequin laneltocanijmes judíos.

<sup>14</sup> Huan nehual niquitac quinami amo quichijtataloaya quinami quijtúa ilanextilisi melahuac in lamachiltislisi cuali. Pampín inminyampa moxtin, nicnotzac Cefas, niquilic: “Tehual tijudío. Ma yoje tiyuli quinami se hual amo judío, amo tiyuli quinami se judío. ¿Leca ticnequi tiquinchihualtía yehuanten hual amo judíos pa mochihuasi quinami judíos?”

*In judíos moquixtililo pin polehulislisi san pan ipampa inminlaneltocalislisi quinami moxtin hual amo judíos*

<sup>15</sup> Tehuanten tilacatiye judíos, amo tilacatiye lacames laijlaculi quinami yehuanten hual amo judíos.

<sup>16</sup> Ma yoje, tiajsije ticmatije pampa Dios amo quijtúa pampa se yajmo unca laijlaculi jan pampa in se yuli quichijtica quinami quijtúa in lajtol hual quinnextilía quinami quimolancuacuetzililo Dios in judíos. No, Dios quijtúa se yajmo unca laijlaculi pampa in se axan quilalic ilaneltocalislisi ca Cristo Jesús. Huan tehuanten in laneltocanijmes judíos, ticneltocaje Cristo Jesús pa yojque Dios techitas quinami lacames hual yajmo ticate laijlaculi. Amo techita yojque pampa tiyulilo ticchijticate quinami quijtúa in lajtol hual in judíos quichihualo. Unca yoje, pampa Dios quijtúa amo unca se hual yihual quita quinami yajmo unca laijlaculi jan pampa yuli quichijtica quinami quijtúa inminlajtol in judíos.

<sup>17</sup> Tiquitalo pampa tilacames laijlaculi. Pampín tictemulo pa Dios techitas lacames hual yajmo ticate laijlaculi quiman ticlaililo tolaneltocalislisi ca Cristo. Cuaquín ¿huil tiquijtusisi pampa Cristo tejchihualtic laijlaculislisi pampa quijtúa yajmo ticpialo pa ticneltocasi len quijtúa inminlajtol in judíos pa yoje Dios techitas cuali? ¡Ma camo quiman tiquijtucan len quinami inon!

<sup>18</sup> Yoje, sinda yajmo niclalis nolaneltocalisli ca inminlajtol in judíos pa nechquixtilis nolaijlaculisli, cuaquinon, yojque nijquixtiliaya inminlajtol in judíos ichicahualisli. Huan sinda nipehuaya niclali nolaneltocalisli ca inminlajtol oc sejsa, cuaquinon yojque nicmacaya oc sejsa in lajtol ichicahualisli huan yojque nimonextiaya quinami se hual quichía laijlaculisli.

<sup>19</sup> Niajsic nicmatic yoje pan ipampa quinami inminlajtol in judíos amo quipía lahuelilitlisli pa nechquixtilis nolaijlaculisli. Huan pampa inon nimocahuac pa niclalisquiaya nolaneltocalisli ca inminlajtol in judíos. Axan unca quinami nipolehuic, yoje in lajtol yajmo huil nechlaijlacultía. Yoje nicchíac pa huil niyulis pa Dios pan ipampa Dios iyulilislí.

<sup>20</sup> Quema, unca quinami ca Cristo nimiquic pin cuahuil capa yihual miquic. Huan unca quinami nehual yajmo niyultica, pampa unca yihual Cristo hual yultica laijtic capa nehual. Huan in yulilislí hual axcan nicpía pa nocuerpo unca Cristo iyulilislí, pampa niyuli niclalijtica nolaneltocalisli ca Dios iXolol hual nechlasojlac huan motemacac pa miquis mas que in miqulislí nechahuiluc nehual.

<sup>21</sup> Ca inon nolanextilislí amo niquijlacujtica yoje in cuali hual tejchi-huilía Dios calica techquixtilía tolaijlaculisli. Sinda ticpialoaya pa ticchi-hualosquiaya quinami quijtúa inminlajtol in judíos pa yoje Dios techitas lacames hual amo ticate laijlaculi, cuaquín amo quiapiaya pa miquisquiaya Cristo, jan lapiç (de in balde) miquic.

### 3

#### *Inminlajtol in judíos o in laneltocalisli lalalili ca Cristo*

<sup>1</sup> ¡Ah, amhuanten de Galacia! ¿Amo huil anlajnamiquía cuali? Unca quinami se laxuxani anmijchihuilic len pa yoje anmoquixtis pan iojli Cristo. Annimitznextilic quinami Cristo miquic pin cuahuil pa yojque yihual anmitzquixtis pin ipolehuilislí anmolaijlaculisli, huan cataya quinami anquitac lajcuifuli inminlaixpan anmoixtololojmes.

<sup>2</sup> In san nicnequi nicmati, nicnequi pa amhuanten annechnextilis: ¿Anmitzmacac Dios in Espíritu Santo pampa anquichíac len quijtúa in lajtol hual quimaxtilo in judíos? O ¿anmitzmacac pampa anquicaquic Cristo ilamachilitislí cuali huan anquilalic anmolaneltocalisli ca in?

<sup>3</sup> ¿Amo anquipía nadita lajmatilislí? ¿Nía nicpía pa niquijtus pampa amo anlajnamiquía cuali? Xiquitacan. Anpehuac anyulic pan ipampa in Espíritu Santo in tonali hual anquilalic anmolaneltocalisli ca Cristo. Axcan ¿anquijtúa monequi pa anquichías len hual quijtúa in lajtol hual quimaxtilo in judíos pa anajsís anyes quinami Dios quinequi, huan inon pan ipampa in lajtol? ¿Anquijtúa axan in Espíritu Santo amo quipía lahuelilitlisli pa anmitzpilis chipahuac anmoyolo pa yojque Dios anmitzitas cuali?

<sup>4</sup> ¿Yec jan lapiç (de in balde) in miac lacocoltilislí hual anpanuc? Nicchixtica da amo yec jan lapiç.

<sup>5</sup> Cataya Dios hual anmitzmacac ca mochi iyolo in Espíritu Santo, anmitzalilijtica laijtic capa anmoyolo. Huan yihual Dios anmitzhuelilitic pa anquinchías miac hual quinextía ilahuelilitlisli hué. Axan, ¿anquijtúa pampa Dios anmijchihuilic mochi inon pampa anquichíac len quijtúa in lajtol hual in judíos quimaxtilo? O ¿anmijchihuilic pampa anquilalic anmolaneltocalisli ca ilamachilitislí cuali? Quema, cataya pampa anquilalic anmolaneltocalisli ca ilamachilitislí cuali.

<sup>6</sup> Unca jan quinami Abraham quineltocac Dios huan pampín Dios quitac yihual se lalac hual amo yec laijlaculi.

<sup>7</sup> Yojque, anquimati pampa jan yehuanten san hual quineltocono in Tata, Dios quinmita quinami lacames hual amo cate laijlaculi, jan quinami Dios quitac Abraham. Yojque huil tiquijtulo pampa tehuanten imiahuimes Abraham pampa ticheltocono in Tata quinami quineltocono Abraham.

<sup>8</sup> Huan Dios ilajtol lajcuiluli niman pa yina techilía quinami Dios quilalic se tonali pa yihual quinmitas yehuanten hual amo judíos quinami lacames hual amo cate laijlaculi. Inon Dios quilic quiman ayamo yec lajcuiluli ilajtol, pampa timomaxtilo quinami quilic Abraham in lamachilitisli cuali hual yahuiaya quichihuili, quilic: “Tehual, Abraham, tichneltocono nehual, pampín nimitzita quinami se hual amo unca laijlaculi, huan pan ipampa tehual molaneltoconalisli, nía nichía pa moxtin yehuanten pin lalticpan huil canasi in cuali hual niquinmacas.” Yoje Dios quilic Abraham.

<sup>9</sup> Yoje, pampa quineltocono Dios in Tata, quinami quichíac Abraham, pampín Dios quinchihuiliía niman cuali.

<sup>10</sup> Ma yoje, cate yehuanten hual quijtulo Dios quinmitas amo quipixticate laijlaculisli pampa quilalije pa quichihualosquiaya len quijtúa in lajtol hual quimaxtilo in judíos. Huan yehuanten yalo panulo lacocoltilisli pan ipampa Dios icualanilisli, pampa yoje unca lajcuiluli pa ilajtol Dios, quijtúa: “Dios quijtúa pampa elehuis aquí yes amo yultía quichijtica mochi hual unca lajcuiluli pin amal capa quipía lajcuiluli in lajtol.”

<sup>11</sup> Huan neli unca pampa aquí hual quineltocono in lajtol hual quimaxtilo in judíos, yihual Dios amo quita quinami se hual amo unca laijlaculi, pampa yojque ilajtol Dios quijtúa: “Aquí hual Dios quita quinami se hual amo unca laijlaculi unca in se hual quilalía ilaneltoconalisli ca in Tata, huan pampa inon yihual yulis.”

<sup>12</sup> Huan ilajtol Dios hual quimaxtilo in judíos amo quijtúa pampa Dios techita quinami amo ticate laijlaculi sinda ticlalilo tolaneltoconalisli ca in Tata. Pampa no, jan quijtúa inon: “Aquí hual quichía mochi hual quijtúa ilajtol Dios, yihual yulis pampa inon.”

<sup>13</sup> Cristo techmacahuac pa como techpiasquiaya quinami laipili ilajtol Dios hual quimaxtilo in judíos. In lajtol quijtúa pampa aquí yes amo quineltocono mochi in lajtol, yihual mocahua amo cuali huan miquis panujtica lacocoltilisli hual amo quiman lamis. Cristo miquic panujtataya lacocoltilisli mía. Yojque techquixtic pin ipolehuilisli in amo cuali capa timocahualoaya tehuanten pan ipampa ilajtol Dios hual quimaxtilo in judíos. Cristo miquic pa yoje amo ticpialosquiaya pa timiquisi ej'elehuis pampa ticchihuaje laijlaculisli. Unca pampa Dios ilajtol lajcuiluli quijtúa: “Dios quijtuc pampa elehuis aquí yes miqui pilujtica pan se cuahuil.”

<sup>14</sup> Huan Cristo yec lapiluli pan in cuahuil pa yojque yehuanten hual amo judíos quipiasli in paquilisli hual noje quipíac Abraham. Huan yehuanten quipiasli san pan ipampa Jesucristo. Noje Cristo yec lapiluli pan in cuahuil pa yojque Dios techlalilis lajtic toyolo in Espíritu Santo. Dios neli techilic yahuiaya quinlalili in Espíritu Santo yehuanten hual quilalilo inminaneltoconalisli ca in Tata Jesucristo.

*Ilajtol Dios hual quimaxtilo in judíos amo unca quinami in hual Dios axan techilía*

<sup>15</sup> Nocnían, nía annimitzilía se lanextilisli. Unca quinami quichihualo se testamento o lajtulisli. Sinda moxtin panulo se lajtulisli ca se testamento, ctaquín amaqi huil quita quinami se amal hual amo monotza nindeno. Huan amaqi quilalilis oc se lajtol, pampa quichihuaje cuali ca lajcuilulisli huan temulol hual lacames quitaje quiman quichihuaje.

<sup>16</sup> Huan Dios neli quilic Abraham pampa yahuiaya quinmaca innojen hual quilic. Huan noje quilic, quil: “Nía annimitzmaca tehual huan momiahuil innojen.” Dios amo quilic, quil: “Nía annimitzmaca tehual huan momiahuimes”, yoje quinami yeje míac. No, quinami yec se san imiahuil, quil quilic: “Huan nía nicmaca momiahuil”, quil quilic. Huan Abraham imiahuil unca Cristo.

<sup>17</sup> Axcan, ma annimitzili len quinequi quijtúa inon: In lajtulisli Dios quilalic pan ipampa ilahuelilitlisli. Huan quiman panuje cuatro cientos treinta xixihuimes, Dios quimacac in judíos in lajtol. Ma yoje, amaqui huil quixitinía in lajtulisli o testamento pa yajmo quipixtías lahuelilitlisli. Amo huil quichihuiliaya pa como panus len Dios neli quilic Abraham.

<sup>18</sup> Axan, sinda techmacaya Dios yulilisli niman cuali hual iyaxca, huan sinda techmacaya pampa ticneltocaloaya ilajtol Dios hual quimaxtilo in judíos, cuaquinon inon hual iyaxca yajmo tiahuiloaya ticpialo quinami yihual neli techilic pampa yahuiaya techmaca. Ma yoje, Dios neli quilic Abraham pampa yahuiaya quimaca in hual iyaxca Dios san pan ipampa in cuali hual tejchihuilia.

<sup>19</sup> Axan, ¿leca quimacac Dios ilajtol hual quimaxtilo in judíos? ¿Len monotza in lajtol? Dios quilalilic pa ilajtulisli pa yoje ticmatisi quinami míac ticchihualo laijlaculisli, quinequi quijtúa, pampa amo ticneltocaticate Dios ilajtol. Quema, Dios quilalilic pa ilajtulisli in lajtol hual quimaxtilo in judíos pa cayas ca yehuanten pa mochi xixihuil pa quiman yahuiaya huala pan laticpan imiahuil Abraham, nicnequi niqijjtúa, pa quiman hualaya Cristo. Yihual Cristo in se hual Dios neli quilic pampa cataya iyaxca Cristo pa techueliltis pa ticpiasi inon hual iyaxca Dios. Yihual Dios quintilanic ilanahuatinijmes in cielo pa quihualicasi ilajtol pan laticpan, huan totajtzitzián canaje pan ipampa Moisés. Yoje, Cristo unca quinami Moisés, pampa cataya lalalili lajco capa ome pa techpalehuis pa timochihuasi ca se lajtulisli.

<sup>20</sup> Ma yoje, tiqitalo neli quinami ajsic ilajtulisli in lajtol capa totajtzitzián. Amo ajsic pan ipampa se san, ajsic pan inminpampa ilanahuatinijmes in cielo huan Moisés. Huan Dios, yihual se san huan yec yihual ihuán hual neli quilic Abraham pampa yahuiaya quimaca imiahuil Abraham inon hual iyaxca Dios.

### *¿Len techmacac ilajtol Dios hual quimaxtilo in judíos?*

<sup>21</sup> Axcan, ¿anquijjtúa ilajtol Dios hual quimaxtilo in judíos quijlacuc len Dios neli quilic Abraham pampa yahuiaya quimaca imiahuil? ¿Ma como quiman tiqijjtucan yojque! Sinda Dios quimacaya se lajtol hual huil quinyuliltiaya lacames, cuaquinon neli pan ipampa in lajtol Dios techitaya quinami lacames hual amo ticate laijlaculi sinda ticneltocaloaya in lajtol.

<sup>22</sup> Ticmatilo Dios ilajtol lajcuiluli quijtúa pampa moxtin yehuanten pin laticpan cate laijlaculi. Amo quiman huil moquixtilo pin ichicahualisli inminlajlaculisli hual quinpilla quinami latzacuali pa se calijtic. Yoje, quiman quilalilo inminlaneltocalisli ca Jesucristo, cuaquinon yihual quinmacahua pa yajmo quinpiaya latzacuali inminlajlaculisli. Quinmacahua huan quinmaca inon hual iyaxca Dios. In unca hual Dios neli quinmilia yehuanten hual quineltocalo Cristo.

<sup>23</sup> Huan pa míac xixihuil quiman ayamo hualac Jesucristo pa huil ticlalilo tolaneltocalisli ca yihual, ilajtol Dios hual quimaxtilo in judíos cataya quinami se hual technapachiaya, techpiaya quinami ticayaje latzacuali. Quema, momatiaya yoje in lajtol ca tehuanten. Cuaquinon ajsic in tonali



hual Dios technextilic quinami ticate laquixtili pin polehuilisi pampa ticlalilo tolaneltocalisli ca Jesucristo.

<sup>24</sup> Yoje, in lajtol mochíac quinami se hual quinmiztía xolomes, quinlanel-tocaltíia inmintahtzin. Pampa inon innojen xolomes quichialo ca mochi inminyolo in tonali quiman yesi lamacahuali pa yajmo quinmiztías in se hual quinmiztía. Huan yoje ilajtol Dios hual quimaxtilo in judíos tejchihuilla tehuanten pa ticchiasi in tonali ca mochi toyolo quiman tiyesi lamacahuali pa yajmo tejtzacuas in lajtol. Quema, in lajtol technextilic quinami amo huil ticneltocalo tehuanten tohuían in lajtol. Technextilic quinami monequi pa techpalehuis Cristo, pa yoje Dios techitas quinami lacames hual amo cate laijlaculi pampa ticlalije tolaneltocalisli ca Cristo.

<sup>25</sup> Yojque axan ticate lamacahuali pa yajmo huelitis capa tehuanten ilajtol Dios hual quimaxtilo in judíos. Unca quinami cate lamacahuali in xolomes pa yajmo huelitis capa yehuanten yihual hual quinmiztía. ¿Leca tiquijitulo inon? Unca pampa axan ajsic in tonali quiman huil ticlalilo tolaneltocalisli ca Cristo huan yajmo ca ilajtol Dios hual quimaxtilo in judíos.

<sup>26</sup> Axcan, unca Dios hual anmitzítia pampa anmoxtin anunca Dios ixolomes pampa anquilalic anmolaneltocalisli ca Cristo Jesús.

<sup>27</sup> Inon unca pampa anmoxtin hual ancataya lacuayatequili anlanextilic pampa anmomati quinami yehuanten hual iyaxca Cristo. Axan anmochíac quinami yihual, anquipixtica iyulilisi huan ilanextilisi huan ilajtol laijtic capa anmoyolo.

<sup>28</sup> Axan amo anmitzita Dios quinami amhuanten judíos o griegos, huan yoje monequi pa camo annoifas yoje amhuanten. Dios amo anmitzita quinami lacames hual quinmocuhuilic oc se pa quitequipanuilisi o quinami se hual amo quiman quimocuhuilic oc se. Huan amo anmitzita quinami lalac o sihual. No, axan anmitzita Dios jan se ilanechiculisi míac, se quinami in oc se, san pampa anmochíac se ca yihual pampa anquilalic laneltocalisli ca yihual. Pampín, ximoitacan amhuanten quinami Dios anmitzita.

<sup>29</sup> Huan amhuanten hual anquineltoca Cristo, yoje anunca imiahuimes Abraham axan, quinami moijtúa pan ipampa in Espiritu. Anunca imiahuimes pampa anquilalic anmolaneltocalisli ca Dios jan quinami quichíac Abraham. Anquipía inon hual iyaxca Dios hual yihual neli quilic Abraham pampa yahuiaya quimaca imiahuil.

## 4

<sup>1</sup> Ma annimitzili len nicnequi niquijtúa. Quiman yihual hual yahui quipía inon hual iyaxca itajtzin huan ayamo ajsi yes lalac, yoje yihual unca quinami se tequipanujquil hual iteco quimocuhuilic. Amo unca iyaxca pa lajanis nindeno inahuac in hual iyaxca itajtzin, mas que yihual in xolol unca iteco mochi.

<sup>2</sup> No, quiscaltilo yehuanten hual quinmiztialo in xolomes, huan quinmitil-ijtilo in laicananijmes in hual iyaxca itajtzin in xolol. Huan quiman ajsic in tonali hual quilalic itajtzin, cuaquinon quipías ixolol in hual iyaxca itajtzin.

<sup>3</sup> Yoje tehuanten noje ticataloaya quinami xolomes, amo ticmatiloaya nindeno quinami unca in hual iyaxca Dios hual ticpialo quiman ticlalilo tolaneltocalisli ca Jesucristo. Ticataloaya quinami tequipanujquimes lacuhuali. Tiquinneltocaloaya in lajtomes hual technextililoaya yehuanten pin lalticpan, jan innojen san hual amo quipialo nindeno pa quitas ca iyolo se. Yehuanten quijitulo pa inminyolo pampa sinda quinneltocas se innojen lajtomes, yoje unca quinami ajsic quipaquiltis Dios.



<sup>4</sup> Ma yoje, ajsic in tonali hual Dios quilalic, cuaquinon Dios quitilanic ixolol, yihual lacatic pan ipampa se sihual. Yoje, quema, mochíac lacal quinami tehuanten, huan yojqe quipiaya pa yulis quichijtica len quijtúa ilajtol Dios hual quimaxtilo in judíos, yoje quinami moxtin in oc sequin judíos.

<sup>5</sup> Mochíac lacal pa yoje huil laxlahuis pa quinmacahuas yehuanten hual cataloaya quinami tequipanujquimes lacuhuali hual quipialoaya pa quichihualosquiaya in hual quijtúa inminlajtol in judíos. Quema, Cristo quinmacahuac pa yoje Dios quinmitas yehuanten quinami amo laijlaculi. Huan Dios ixolol quichíac inon pa yoje Dios quinmanasquiaya quinami ixolomes noje quinami Cristo unca ixolol.

<sup>6</sup> Axan, pampa anunca Dios ixolomes, yoje Dios anmitztilanilic iEspíritu ixolol pa calaquis laijtic anmoyolo huan anmitzhueliltía pa anquinotzas Dios anquilijtica: “¡Abba!” hual quinequi quijtúa: “¡Tata!”

<sup>7</sup> Huan yoje, yajmo tiunca quinami tequipanujquil hual tequipanúa amo ca laxlahuilisli. Axan tiunca ixolol. Huan pampa tiunca ixolol, cuaquín noje tiunca hual tía ticpía inon hual iyaxca toTajtzin Dios pan ipampa yihual Dios.

*Pablo momajtía pampa amo lajtulo pa inminyolo quinami Dios quinequi innojen laneltocanjmes pa Galacia*

<sup>8</sup> Ma yoje, innojen tonaljmes hual panuje quiman amo anquiximatini Dios, nepa ancataya quinami tequipanujquimes hual amo canaje laxlahuilisli. Anquintequipanuillini yehuanten hual amo yeje dioses, amo quipixtataloaya ilahuelhiltisli hual dioses quipialo.

<sup>9</sup> Axcan, anquiximati Dios, o ma niquijtu, Dios axcan anmitziximati, anmitzmoyaxcajtlic. Axan ¿quinami anmocuetica oc sejpa pa anquichías len quijtúa in lajtomes hual Dios quinmilic Moisés? Innojen amo quipialo chicahualisli pa anmitzpalehuis anquitequipanuillis Dios ca anmoyolo. Huan amo huil quipantía nindeno pan inon hual iyaxca Dios hual yihual anmitzmaca. Nesi quinami anquinequi anmochía oc sejpa tequipanujquimes lacuhuali pa anquías pa anquichías inon hual quijtulo in lajtomes hual quinneltocalo in judíos.

<sup>10</sup> Ma annimitzili len niquijtutica: Anquijtúa pampa monequi pa anquinchías fiestas (ilhuimes) pan tonaljmes huan meslimes huan xixihuimes, pampa anquijtúa cuajnesi inon anmitzpalehuis pa Dios anmitzitas lacames hual amo cate laijlaculi.

<sup>11</sup> Annimitzpilía míac lamajtilisli pampa anquichijtica inon. Niquijtutica cuajnesi nitequipanuc jan lapic (de in balde) quiman annimitzlamachiltic Dios ilajtol.

<sup>12</sup> Annimitzyantía, nocnán, ximochihuacan quinami nehual, pampa nehual noje nimochías quinami amhuanten. Nicnequi pa anyes lamacahuali pa como anquitocas in lajtol hual Dios quinmacac in judíos. Amhuanten amo annejchiuic len amo cuali.

<sup>13</sup> Huan anquimati cataya pampa nicataya cocoxqui niajsic capa amhuanten pa nipehuas annimitzlamachiltis ilamachiltisli cuali toTata.

<sup>14</sup> Huan in tonali niajsic, mas que annehitaya cocoxqui huan pampín anquinequic annejxixicuc huan annehijyac, ma yoje amo anquichíac yojqe. Annechnamiquic quinami niyec ilanahuatini Dios. Quema, annehnamiquic quinami nehual niyec yihual Cristo Jesús.

<sup>15</sup> Axan, ¿capa unca anmopaquilisli hual anquipiac pampa annimitzlamachiltic ilajtol Dios? Nesi quinami yajmo anquipía. Huan neli annimitzilia,

nicmati sinda amhuanten huil anquichihuaya, cuaquín anmoquixtiliaya anmoixtololojmes pa annehmacasquiaya, pampa anquipiaya niman míac paquilisli pampa ticataloaya capa amhuanten.

<sup>16</sup> Axan, ¿nimochíac quinami anmolacocolini pampa annimitzilía len unca melahuac? No, niqújtúa niunca anmolasojlí pampa annimitzilía inon.

<sup>17</sup> Nesilo quinami anmitzlasojlalo míac innojen lacames huan anmitzmaxtíticate in lamaxtilisli amo cuali. Inon amo unca cuali, pampa yojque quinequilo anmijzacuililo pa como anquicaquis in lamachitilislí cuali, pa yojque anquinlasojlas míac yehuanten pan ipampa inminlamaxtilisli.

<sup>18</sup> Huan unca cuali sinda lacames lanextilijtiasi mojmosta quinami anmitzlasojlalo. Ma yoje unca cuali san sinda anmitzlasojlalo pampa quinequilo anmijchihuilis cuali. Yoje nicnequi annimijchihuilía huan inon amo san pin tonalijmes hual niunca ca amhuanten. Noje nicnequi annimijchihuilía pin tonalijmes hual amo niunca ca amhuanten.

<sup>19</sup> Noxolomes de noyolo, inon hual anquichía nechcocoltía noyolo oc sejpa. Unca quinami nicataya sihual hual quinectica quilacatiltía ixolol. Quema, nechcocujtías mojmosta. Huan jan quiman niqúitas neli pampa anquilalijtica mochi anmolaneltoalisli ca Cristo san, huan quiman niqúitas neli pampa Cristo yultica laijtic capa amhuanten, san cuaquinon yajmo nechcocus.

<sup>20</sup> ¡Nicnequisquiaya míac pa huil nicayas ca amhuanten axcan huan pa nicpalas in quinami annimitzijcuiluilijtica innojen lajtomes, pampa laijtic noyolo amo nicmati quinami monequi pa nilajtus anmonahuac amhuanten!

### *In lanextilislí hual technextilía Agar huan Sara*

<sup>21</sup> Xiquitacan, amhuanten hual anquijtúa monequi pa ticneltocasi ilajtol Dios hual quimaxtilo in judíos pa yojque Dios techitas quinami lacames hual amo cate laijlaculi, xiquitacan: ¿Anquimati neli len quinequi quijtúa in lajtol?

<sup>22</sup> Ma annimitzilí in hual quipanuc Abraham. Unca lajcuililí pin iamal ilajtol Dios. In Abraham quínpiaya ome xolomes lacames: se lacatic ca in sihual tequipanujquil hual mocuhuilic Abraham, yihual amo isihua. Huan in oc se lacatic ca Abraham isihua hual amo quiman yec tequipanujquil lacuhuali.

<sup>23</sup> Lacatic in xolol ca in sihual tequipanujquil jan quinami lacatilo mochi xolomes. Ma yoje, pa Abraham isihua hual amo quiman yec tequipanujquil lacatic ixolol quinami Dios neli quilic Abraham pampa yahuiaya lacati.

<sup>24</sup> Huan neli unca inon hual panuc ca in ome ixolomes Abraham, huan noje quinequi quijtúa oc se lajtulisli. Quema, inon hual quipanuc innojen ome sihuames unca quinami in ome lajtulisli hual Dios quinchíac ca lacames. Dios quichíac in se lajtulisli pani in loma (tepel) itoca Sinaí. Yehuanten hual quilalilo laneltocalislí ca in lajtulisli cate quinami tequipanujquimes hual quipialo pa quineltocasi ilajtol Dios hual quimaxtilo in judíos. Yehuanten quinami in sihual huan ixolol hual yeje itequipanujquimes Abraham hual amo quinlaxlahuilo. In sihual motocaya Agar.

<sup>25</sup> Huan pin lali itoca Arabia unca in loma (tepel) itoca Sinaí hual noje quitocayaltílo Agar. In lajtulisli hual nepa yec latemacali unca se lajtulisli pa yehuanten hual cate quinami tequipanujquimes hual amo quinlaxlahuilo. Huan quinami Agar yec tequipanujquil quinami inon huan yec inantzín se tequipanujquil quinami yihual, yojque unca in cali Jerusalén axan ca yehuanten in judíos, in cali Jerusalén huelitía capa yehuanten. Cate quinami tequipanujquimes hual amo quinlaxlahuilo. Quipialo pa quineltocasi mochi

ilajtol in lajtulisli. Yojque Jerusalén unca quinami inminantzin in tequipanujquimes hual amo quinlaxlahuilo.

<sup>26</sup> Ma yoje, unca oc se Jerusalén hual unca pin cielo (ilhuicac). In oc se Jerusalén unca quinami isihua Abraham hual amo yec tequipanujquil. Tehuanten hual ticneltocalo in lajtulisli hual Dios quichíac ca Abraham, axan ticpialo in oc se Jerusalén quinami tonantzin hual amo tequipanujquil lailpili. Pampín tehuanten amo titequipanujquimes lailpili.

<sup>27</sup> Huan in Jerusalén pin cielo unca quinami tonantzin pampa yojque unca lajcuiluli Dios ilajtol, quijtúa:

Xicpía paquilisli tehual hual amo huil tiqinpía xolomes.

Quema, xipehua xitzajtzi ca paquilisli tehual hual amo ticmati len ticocu quiman quilacatlíca se xolol,

pampa cate niman míac ixolomes yihual hual amo huil quiapiaya se xolol, huan amo yoje míac cate ixolomes in se hual quiapiaya ilahuical.

<sup>28</sup> Huan amhuanten, nocnían, anunca quinami Isaac, yihual yec inminxolol Abraham huan isihua hual amo yec tequipanujquil. Quema, amhuanten imiahumes Abraham pampa amhuanten anunca quinami Abraham, anquilalic anmolaneltocalisli ca in hual Dios neli anmitzilic.

<sup>29</sup> Ma yoje, quinami panuc pa yina, ixolol in sihual tequipanujquil hual amo quilaxlahuiloaya qitojtocani ixolol in sihual hual amo yec tequipanujquil. Huan yojque panujtica axcan. Yehuanten lacatilo jan quinami moxtin lacatilo huan quineltocalo in lajtulisli hual unca pa yehuanten hual cate quinami tequipanujquimes hual amo quinlaxlahuilo. Yoje quitojtocalo pa quinchihuilisli amo cuali yehuanten hual lacatilo noje pan ipampa in Espíritu Santo, yehuanten hual quineltocalo in lajtulisli hual Dios neli quilic.

<sup>30</sup> Huan ¿len quijtúa Dios ilajtol lajcuiluli inahuac inon? Quijtúa: “Xijquixti pa quiahuac in sihual tequipanujquil huan ixolol hual amo quilaxlahuilo, pampa ixolol in tequipanujquil lailpili amo quiman moxiluilisli hual iyaxca itajtzin ca ixolol in sihual hual amo unca tequipanujquil.”

<sup>31</sup> Yoje, nocnían, tehuanten amo ticate quinami ixolomes in sihual tequipanujquil hual amo quilaxlahuilo. Tehuanten quinami ixolomes in sihual hual amo yec tequipanujquil.

## 5

*Xiyultiacan chichahuac pampa anunca lamacahuali, yajmo monequi pa anquineltocas inminlajtol in judíos*

<sup>1</sup> Cristo amo quinequi pa tiyesi quinami tequipanujquimes hual amo quilaxlahuilo hual quipialo pa quichihuasi in hual quijtúa ilajtol in lajtulisli hual quimaxtilo in judíos. Pampín yihual techmacahuac pa yajmo techanasquiaya in lajtulisli. Yoje, amo ximomacahuiltecan pa anquineltocas oc sejpa se lamaxtilisli amo cuali hual unca quinami se cual lamamani etic hual quilalililo inminpan in tequipanujquimes hual amo quilaxlahuilo. Quema, in lamaxtilisli anmijchihuilis yoje.

<sup>2</sup> Axcan, nehual, Pablo, annimitzilíca sinda anquinmacahuiltíca pa anmitztequisi ca in lanextilisli pa anmocuilacli huan yoje anquijtúa Dios anmitzitas quinami lacames hual amo cate laijlaculi, cuaquin Cristo amo anmijchihuilíca len cuali.

<sup>3</sup> Huan oc sejpa niquilíca neli, mochi lacal hual quinequi pa quitequisi pa icuilaxli, cuaquinon yoje quipías pa yulis quichijtica mochi in hual quijtúa in lajtol hual quimaxtilo in judíos.

<sup>4</sup> Quema, yajmo anquipía nindeno pa anquitas ca Cristo sinda pan ipampa in lajtol anquitemus pa Dios anmitzitas lacames hual amo cate laijlaculi. Sinda yoje anquichía, cuaquín anquicajcahuac in cuali hual tejchihuilia Dios calica yihual anmitzita amo anquipixtica laijlaculisli.

<sup>5</sup> Ma camo ye yoje, pampa tehuanten ticchixticate pa toyolo in hual neli tialo ticanalo. Dios techmacas in pampa techita ixolomes hual amo quipialo laijlaculisli. Ticlailo tolaneltocalisli ca inon pan ipampa in Espíritu Santo hual technextilic mochi in.

<sup>6</sup> Sinda se quilalía ilaneltocalisli ca Cristo Jesús, amo monotza nindeno sinda unca latequili icuilaxli o amo unca latequili icuilaxli. Inon hual quema quimonotzilía se unca inon, da se quilalía ilaneltocalisli ca Cristo huan pampín quinlasojla oc sequin, huan yuli quinchihuilijtica cuali.

<sup>7</sup> Anpahuac anquitequipanuilic Cristo cuali, nesic quinami anmotoliniaya pa anyulis quinami Cristo quinequi. ¿Aqui anmihtzacuilic huan pampín anmocahuac pa anquineltoacasquiaya in lamaxtilisli hual unca melahuac? Amo unca nindeno hual quipía lahuelilitilisli pa anmijchihualtilis inon.

<sup>8</sup> In oc se lamaxtilisli hual anquineltoacas quijtúa monequi pa anquineltoacas Moisés ilajtol hual quimaxtilo in judíos. Ma yoje, Dios amo anmitzilic inon. Yihual anmitznotzac pa anquineltoacas Cristo san.

<sup>9</sup> Amo xiquilcahuacan in quinami quijtulo: “Se nadita laxocoyajquil quiteposahualtia mochi in textli.” In quinequi quijtúa se nadita in lamaxtilisli amo cuali mosemanas ca moxtin in laneltocanijmes huan miac quineltoacas.

<sup>10</sup> Nehual amo nicmahuilia anmonahuac amhuanten, nocnían, huan Cristo nechmaca mosehuilisli pa noyolo pampa anquijtus jan yoje inahuac in lamaxtilisli amo cuali. Huan aquí hual anmitzlapolutitica anmitzmacatica tequil ca in hual anmitzmaxtitica, yihual panus lacocoltilisli aquí yes hual unca.

<sup>11</sup> Huan nehual, nocnían, sinda ayamo nimocahuaya pa niqinnextilia lacames pampa monequi pa yes latequili inmincuilaxli, cuaquín ¿leca nechtojtocaloaya in judíos? Unca pampa amo niqinmaxtitica lacames yoje. Sinda quema niqinmaxtiaya yojque, cuaquín amo cualaniloaya. Amo cualaniloaya pampa sinda niqinmaxtiaya lacames yoje, cuaquín yajmo niqinmaxtiaya pampa san Cristo huil tejchipahuiliaya mochi tolaijlaculisli pan ipampa quinami yihual miquic pan in cuahuil. Huan in lamaxtilisli yehuanten amo quixtocalo quicaquilo.

<sup>12</sup> Yehuanten hual anmitzmacalo tequil ca inminlamaxtilisli, nicnequisquiaya yehuanten mocotonililosquiaya mochi, huan amo jan inmincuilaxli san, pampa inminlamaxtilisli unca quinami inminlamaxtilisli lacames hual amo quineltoocalo Dios.

<sup>13</sup> Yoje nilajcuilujtica, nocnían, pampa Dios anmitznotzac pa anquineltoacas Cristo. Anmitznotzac pa yojque amo quiman anyesquiaya quinami tequipanujquimes hual amo quinlaxlahuilo, hual quipialo pa quineltoacas ilajtol Dios hual quimaxtilo in judíos. Ma yoje, mas que anuncia lamacahuali pa yajmo monequi pa quineltoacas in lajtol, amo quiman xiquijtucan pampa inon anmitzmacahuilia pa anquichías len amo cuali hual cuajnesi quinequis anmijchihualtis anmocuerpo. No, unca inon hual yes cuali pa anquichías: Ximotequipanuilican se huan oc se ca lasojlalisli.

<sup>14</sup> Xicchihuacan yojque pampa yoje anquichías Dios ilajtol sinda anquichías ja in san hual unca: “Ticlasojlas yihual hual moita ca tehual jan quinami timolasojlas tehual.”

<sup>15</sup> Ma yoje, sinda anmoana pampa amo anunca ca se lajtulisli, cuaquín anunca quinami yulijquimes hual mocuajcualo huan quintolulo in lajcomes. Ximoiztiacan amhuanten pa como anmochías laneltocanjmes hual yajmo molasojlalo huan yajmo quinequilo monechiculo pan ipampa in Espiritu Santo pa quimolancuacuetzilisi in Tata huan quitequipanuilisi.

*Tocuerpos quinequilo tejchihualtilo len amo quinequi in Espiritu Santo*

<sup>16</sup> Huan annimitzilia, xiyulican ca in Espiritu Santo huelitijtica pa anmoyolo. Yojque amo anmoitas anquichijtica in amo cuali hual quinequilo anmocuerpos pa anquichías.

<sup>17</sup> Monequi pa anyulis yojque pampa inequilisli tocuerpo moquetza ipan in Espiritu Santo, huan inequilisli in Espiritu Santo moquetza ipan inequilisli tocuerpo. In omenten moquetzalo inminpan in se ca in oc se, pa yojque amo anyulis anquichijtica len cuajnesi anquinequi anquichía.

<sup>18</sup> Huan sinda anmitzlaicana in Espiritu Santo huan anquineltoca, cuaquín ilajtol Dios hual quimaxtilo in judíos amo huil anmitzmotexpahuilis ca nindeno.

<sup>19</sup> Axan, momati cuali len quinequi tejchihualtia tocuerpo sinda ticmacahuiltilo. Techyantia pa timonilusi se ca oc se mas que amo timonamic-tije, techyantia pa ticchihuasi len yes quinami inon, techyantia pa como tipinahuali pa ticchihuasi len yes amo cuali hual tocuerpo techyantia pa ticchihuasi.

<sup>20</sup> Tocuerpo quinequi pa tiquinmolancuacuetzilisi inminlaixpan monos, quinequi pa tilaxuxasi, amo mocahua pa quinequis pa tiquinocolisi oc sequin. Tocuerpo techyantia pa como ticayasi ca se lajtulisli ca oc sequin. Amo mocahua pa quinequis pa tejchahuatilisli pampa ticnequilo ticpialo len pa tehuanten tohuian. Techyantia pa ticualantiquisasi quijquiman. Techyantia pa ticnequisi ticpiasi mochi quinami ticnequilo pa yoje ticayasi in hue huan pa oc sequin cayasi tijtipichin. Quinequi pa como cayasi ca se lajtulisli capa tocnian monechiculo. Quinequi pa tehuanten timoxilusi pa yajmo ticayasi ca se ilanechiculisli tocnian pa yojque huil ticchihuasi oc se lanechiculisli capa quipiasi oc se lajtulisli huan lamaxtilisli.

<sup>21</sup> Techyantia pa como tiquinxicusi oc sequin pampa quipialo len ticnequilo o pampa cate huejué. Techyantia pa tilamictisi, quinequi pa tilahuanasi, quinequi pa timoitasi pin fiestas (ilhuimes) capa unca miac lahuanalisli. Quema, quinequi pa ticchihuasi innojen huan mochi oc sequin lachihualisli quinami innojen. Huan mas que ayamo anquichia innojen, jan quinami annimitzilic quiman nicataya nepa, axan annimitzilia pampa aquinojen yulilo quichijticate len quinami innojen, yehuanten amo quipiasi in hual unca iyaxca Dios. Quinequi quijtua, amo quiman huil cayasi ca Dios capa huelitia.

<sup>22</sup> Ma yoje, sinda tiyulilo ticneltocaticate in Espiritu Santo, cuaquinon yihual techmaca pa ticpiasi miac lasojlalisli huan pa ticpiasi miac paquilisli huan pa ticpiasi mosehuilisli pa toyolo. Techmaca pa huil timopepenialtisi amo ticualanticate sinda tejchihuililo amo cuali, techmaca pa huil tilaquetzasi huan tilajtusi cuali ca oc sequin huan pa huil tiquinchihuilisi cuali oc sequin, techmaca pa ticmatisi ticmacasi len cuali oc sequin, techmaca pa huil ticchihuasi len tiquinmililo neli pampa tialo ticchihualo.

<sup>23</sup> Techmaca pa como ticnequisi timolacuepilisli. Techmaca pa como ticmacahuiltisi pa tejchihualtitias tolanequilisli, huan pa como huelitis pa tehuanten in hual ticnequilo. Technextilia pa como timoanasi ca oc sequin

pa ticanasi len, mas que unca toyaxca. Huan techmaca pa ticmatisi timotzacuillis pa ticchihuasi len amo unca quinami Cristo quinequi. Amo unca se ilajtol Dios hual quinmotexpahuilia lacames hual yulilo quichijtcate yoje.

<sup>24</sup> Huan yehuanten hual cate ilacames Jesucristo quisulahuaje ichicahualisli inmincuervo hual itequi quinequisquiaya quinchihualti len amo cuali. Unca quinami cate lasaluli inmincuervo huan ilanequilisli amo cuali inmincuervo pan icuahuil Cristo capa miquic. Unca quinami miquic inmincuervo, quinami Cristo miquic pin cuahuil.

<sup>25</sup> Techyuliltic in Espiritu Santo. Pampa inon, noje ma tiyulican ticneltocate in Espiritu Santo pa techlaicanas ca mochi hual ticchihualo.

<sup>26</sup> Ma camo timochihuacan lacames hual quitemulo in quinami tiquinchihuilisli lacames pa techitasi hueyenten sinda amo timonozticate pa techitasi yoje. Ma camo tictemucan quinami tiquincualantisi oc sequin pa yoje yehuanten quitemusi pa moxtin quijtusi lajtomes huejué pa yehuanten nojen. Huan ma camo ticualanicán pampa oc sequin quipialo len amo ticpialo tehuanten. Ma camo ticualanicán sinda quijtulo lajtomes huejué pa oc sequin huan amo quijtulo len hué pa tehuanten.

## 6

### *Ximopalehuican se huan oc se*

<sup>1</sup> Nocnían, sinda jan ancajsis se quichijtica len hual amo unca quinami quinequi Cristo, cuaquinon amhuanten hual anquimati anquineltoca in Espiritu Santo, xicpalehuican in se pa canas oc seppa Cristo iojli. Xicpalehuican amo ca cualanalisli anquinectica pa yihual panus lacocoltilisli pampa quichíac inon. Monequi pa anquijnamiquis cuali pa anmoitas amhuanten nojen pa camo anmitztilanilis anmoyolo Satanás pa anquicuilmatis pan Cristo iojli.

<sup>2</sup> Ximopalehuican se huan oc se ca mochi hual anmitzpanúa, sinda anpanúa len lacocoltilisli o sinda Satanás anmitztilanilia anmoyolo, o len yes quiman monequi pa anquipias lapalehuilisli. Yojque anquichias in hual quijtúa Cristo ilajtol.

<sup>3</sup> Sinda unca se hual moita quinami se hué hual quijtúa pampa amo monequi pa anquipalehuis, huan ma yoje yihual neli amo monotza nindeno, cuaquin yihual ihuían mocuajcuamantica.

<sup>4</sup> Yoje mochi sejsa ma yultía molachilijtica quinami yihual ihuían yuli. Huan ma molachili pa quijnamiquis innojen hual quinchía. Cuaquinon sinda laijtic iyolo moitas ca paquilisli, quipias yihual ihuían len calica moixtocas. Amo quinequis moitas niman cuali huan amo quinmitas amo yoje cuali oc sequin.

<sup>5</sup> Monequi pa se molachilis pa quijnamiquis quinami yuli, pampa mochi sejsa quipias pa quinanquilis iyampa Dios quinami yuli.

<sup>6</sup> Huan yehuanten hual cate monextilinjmes o cate lanextili pa quimatisi Dios ilajtol, ma quinxiluilican ca mochi in cuali hual quipialo ca yehuanten hual quinnextililo ilajtol Dios.

<sup>7</sup> Amo ximocuajcuamanacan. Dios amo lamacahuiltía pa lacames quixixicusi ilajtol. Quinami quijtulo, len yes quitoca se lalac, cuaquin inon noje quipixca. In quinequi quijtúa len quichía se lalac, yoje yahui mocuepa cana quinami len quichíac.

<sup>8</sup> Unca yoje, pampa sinda se lalac yuli quichijtica in hual icuerpo quichihualtia, yoje yahui mochía se lalac laijlaculi. Huan sinda se lalac yuli

quichijtica in hual in Espíritu Santo laijtíc capa yihual quinequi pa quichías, cuaquin pan ipampa in Espíritu Santo quipías yulilisli hual amo quiman lamis.

<sup>9</sup>Huan ma camo tisiahuican pa camo tiyultiasi ticchijtcate in cuali, pampa quiman Dios quita pampa ajsic in tonali cuali pa techmacas, cuaquinon techmacas in hual yihual quipía pa tehuanten, sinda amo ticchihuasi tipichin tolaneltocalisli.

<sup>10</sup>Pampa inon, quiman yes tiqitalo quinami huil, ma ticchihuilican cuali moxtin. Huan ca míac lanequilisli, ma tiquinchihuilican cuali yehuanten hual cate Dios ixolomes, yehuanten hual quilalilo inminlaneltocalisli ca Cristo.

### *Quinmaca lajtol huan quinchicahua*

<sup>11</sup>Xiquitacan quichi huejué cate in lajcuilulisli calica annimitzijcuiluilitica ca nehual nomajma.

<sup>12</sup>Innojen lacames hual anmitzililo monequi pa anquipías latequili anmocuilaxli san quinequilo pa in judíos quinmitasi cuali pampa quinmaxtiticate yehuanten hual amo judíos pa quineltocasi ilajtol Dios hual quimaxtilo in judíos. Pampa inon quichihualo pa yojque in judíos amo quitojtocasi. Quitojtocaloaya sinda yehuanten lamaxtiloaya quinami Cristo miquic pin cuahuil huan san pampa inon ticayasi laquixtili pin polehuilisli sinda ticlalilo tolaneltocalisli ca yihual san.

<sup>13</sup>Quema, lamaxtilo yojque jan pa camo cayasi latojtocali, pampa yehuanten hual quipialo latequili inmincuilaxli amo quineltocalo in lajtol hual quimaxtilo in judíos, san quinequilo pa amhuanten anquipías latequili anmocuilaxli pa yojque huil lajtulo moixtocaticate inminlaixpan in judíos quinami anunca míac lacames hual yehuanten quinchihualtije in hual quijtúa ilajtol in judíos.

<sup>14</sup>Ma yoje, pa nehual, ma camo quiman ye pa nilajtus nimoixtocatica ipampa nindeno, jan ma nilajtu niquixtocatica quinami toTata Jesucristo miquic pin cuahuil pa nehual. Quema, pan ipampa Jesucristo imiquilisli pin cuahuil, niquita quinami noje pilujtica pa in cuahuil mochi pin lalticpan hual amo unca ca se lajtulisli ca Dios. Unca quinami miquic mochi in pin lalticpan. Huan yoje yajmo huil nejchihualtilía noyolo pa camo niyulis ca se lajtulisli ca Dios. Huan nehual noje niquinami nipilujtica pan in cuahuil, niquinami nimiquic noje. Pampín, quinami se mijquil, amo niquijnamiquía quinami inon hual unca pin lalticpan quinequi nechquixtía pa Cristo iojli.

<sup>15</sup>Unca yoje, pampa sinda se quipía latequili icuilaxli o sinda amo quipía latequili, inon amo monotza nindeno. In hual neli monotza unca sinda Dios quichía yancuic se pan ipampa quinami quilalía in se ilaneltocalisli ca Jesús. Yojque Dios quitas yihual quinami se hual amo unca lajtlaculi.

<sup>16</sup>Huan yehuanten hual yulilo quichijtcate mochi hual unca ca se lajtulisli ca in lamaxtilisli, ma Dios quinmaca imosehuilisli pa inminyolo huan iicnililisli, huan noje ma quinmaca innojen yehuanten hual neli cate iisraelitos Dios.

<sup>17</sup>Pa axcan huan pa quiman, ma camo nechmacatía tequil amaqui hual quijjutica da amo nicpía lahueliltilisli pa niyes ilanahuatini Jesucristo, pampa cate pan nocuerpo huajuahuastic hual nechcahuilije in sahuames. Niquinpía innojen huajuahuastic pampa yehuanten nechcoltije quiman niclamachiltiaya ilamachiltilisli cuali Cristo. Innojen cate lanextilisli hual lanextililo pampa niunca se ilanahuatini Jesucristo.

<sup>18</sup> Nocián, ma caya ca amhuanten in cuali hual san huil tejchihuilía toTata Jesucristo. Yoje anmoyolo yes ca se lajtulisli ca in Espíritu Santo hual unca lajtíc capa amhuanten. Yoje ma ye.



## **In amal hual in lanahuatini Pablo quinmijcuiluilic in laneltocanijmes pin caltilan Efeso**

### *Pablo quinmijcuiluilía in laneltocanijmes pa Efeso*

<sup>1</sup> Nehual niPablo, niunca ilanahuatini Jesucristo pampa yoje quinequi Dios. Annimitzjcuiluilijtica amhuanten hual Dios ilacames, amhuanten hual anuncia pin caltilan Efeso. Amhuanten hual amo anmocahua pa anquineltocas Jesucristo, anmoajxiltía pa anmoyolo ca Cristo Jesús.

<sup>2</sup> Ma Dios toTajtzin huan in Tata Jesucristo anmijchihuilian míac lachihualisli cuali. Huan ma anmitzmacacan míac mosehuilisli pa anmoyolo.

### *Pan ipampa Cristo quipialo latuchihualisli pa inminyolo*

<sup>3</sup> Ma moxtin laqueztian hué inahuac in Dios hual yihual iTajtzin toTata Jesucristo. Yihual techmacac huan tejchihuilic mochi hual unca cuali, mochi hual huil ticpialo pan ipampa toyolo. Techajsi mochi inon hual unca pa tehuanten pin cielo (ilhuicac) pan ipampa Cristo. Unca pampa techita Dios axan jan quinami tehuanten ticate ca Cristo pa in cielo (ilhuicac).

<sup>4</sup> Unca yoje ca tehuanten jan quinami Dios techlalic pa tiyesi ilacames iyaxca, tehuanten hual timoajxiltilo ca yihual ca toyolo. Dios quilalic pa tejchihuilis inon quiman ayamo quinchíac in cielo huan in lalticpan. Techlalic pa tiyesi ilacames pa tiyulisli chipahuac amo ticpixticate se laijlaculisli pa yoje amo quipiasquiaya pa techmotexpahuilis.

<sup>5</sup> Huan pampa yihual Dios techlasojla, yihual quilalic pa tiyelosquiaya ixolomes yihual Dios pan ipampa Jesucristo. Dios quichíac inon pampa quinequic tejchihuilic cuali.

<sup>6</sup> Quichíac pa yoje moxtin lajtutiasi ca lajtomes huejué inahuac yihual pampa tejchihuilía míac cuali hual lanextilía quinami unca niman hué ilahuelilitlisli. Quema, tejchihuilic in lachihualisli hué pan ipampa Jesucristo hual yihual quilasojla míac.

<sup>7</sup> Pan ipampa Cristo, yoje quipujpuhuac Dios mochi tolaijlaculisli. Axan ticate lamacahuali pa camo tiqutiasi ilacocoltlisli Dios hual techpanusquiaya pampa tiyeje laijlaculi. Cristo quilaxlahuic pa inon ca iesli hual toyahuic in tonali hual miqic.

<sup>8</sup> In lapujpuhualisli unca pan ipampa in niman míac cuali hual Dios quipía pa tehuanten pa tejchihuilis. In cuali tejchihuilic niman míac, techmacatica mochi lajmatilisli huan lahuelitlisli pa titequipanusli ca in lajmatilisli.

<sup>9</sup> Yojque techmachiltic in hual yihual quilalic pa panus, in hual yihual quinequi pa mochías. Amaqui huil quimatiaya inon pa yina huan pa mochi xixihuimes hual ajsitihualaje pa axcan. Ma yoje, techlamachiltía axcan jan quinami cuali quinequic quichíac. Quilalic pa tejchihuilisquiaya in cuali pan ipampa Cristo.

<sup>10</sup> Quilalic quinami yahuiaya quichía inon quiman ajsisquiaya in tonali hual yihual quilalic. Quilalic pa axcan Cristo quipías lahuelitlisli pan mochi hual unca pin cielo (ilhuicac) huan pan lalticpan. Yoje quilalic pa mochihuasi se san ca Cristo.

<sup>11</sup> Huan noje, pampa ticate se ca Cristo, ticanaloaya in hual unca pin cielo hual iyaxca. Dios quichijtía huan yoje se tonali laquisas mochi quinami

quinequi. Inon panuc quinami yihual Dios lajtuc laijt ic yolo. Pampa inon yihual quilalic pa ticpiasi inon hual iyaxca.

<sup>12</sup> Quichíac inon pa yojque tilaquetzalosquiaya ca lajtomes huejué pa yihual hual laixpela niman míac ca chichahualisli hué, pampa tehuanten ticate aquinojen hual pa yina ticchialoaya in tonali hual nesis Cristo nican pan lalticpan.

<sup>13</sup> Huan yoje, unca pan ipampa Cristo amhuanten anquipíac in Espíritu Santo hual Cristo neli techilic pampa yahuiaya techtilanilía. Inon lanextilía quinami amhuanten anuncia iyaxca Jesucristo. Ancanac in Espíritu Santo pampa anquilalic mochi anmolanellocalisli pa in lamachilitisli cuali hual anmitzilía quinami anmitzquixtia pin ipolehuilisli anmolajlaculisli. Quema, inon in lajtol melahuac hual anquicaquic.

<sup>14</sup> Huan pampa anquipía in Espíritu Santo pan anmoyolo, yoje in unca quinami anquipixtica nadita inon hual iyaxca Dios. Huan anquipías mochi inon quiman ajsis in tonali hual Dios quilalic pa anquipías. Noje anquipías inon hual iyaxca Dios pa quiman Dios laquisas techquixtilis mochi in amo cuali laijt toyolo. In amo cuali quinequi huelitía ca toyolo tehuanten hual Dios techanac pa tiyesi iyaxca. Yihual láxlahuic pa tehuanten. Huan pampa inon, moxtin laquetzasi ca lajtomes huejué pa yihual hual laixpela niman míac ca chichahualisli hué.

*Pablo quilajlanía Dios pa quimacas lajmatilisli in laneltocanjmes*

<sup>15</sup> Yoje, in tonali hual nicmatic quinami anquilalic mochi anmolanellocalisli ca in Tata Jesús, huan nicmatic quinami anquinnequi moxtin ixolomes Dios, cuaquinon nicsehuic.

<sup>16</sup> Huan amo nimocahuaya pa nicsehuisquiaya Dios pa amhuanten. An-nimitzijnamiquía ilaixpan Dios quiman yes niclajlantica.

<sup>17</sup> Inon nicchía pa yojque iDios toTata Jesucristo, in Dios hual unca to-Tajtzin hual laixpela niman míac ca ichichahualisli hué anmitzmacas seje ca moxtin se yolo hual quimati, se yolo hual anmitznextilis innojen calica anquiximatis Dios mochi quinami unca.

<sup>18</sup> Niclajlanis Dios pa yihual anmitzmachiltis cuali laijt anmoyolo, pa yojque anquimatis len unca inon hual anquichixtica pa anquipías hual yihual yahui anmitzmaca, yihual hual anmitznotzac pa anquinellocasquiaya. Niclajlanía pa anmitzmachiltis quinami unca hué in hual iyaxca huan niman cualtichin hual yihual yahui quinxiluilía ca yehuante hual iyaxca.

<sup>19</sup> Huan niclajlanía pa yihual anmitzmachiltis quinami niman hué unca ichichahualisli hual amo quiman lami, ichichahualisli amo huil tiquijitulo quinami unca hué. Tehuante ticpialo in chichahualisli tequipanujtica laijt tehuante.

<sup>20</sup> Huan noje ca inon, in chichahualisli unca in hual Dios quitequipanuc pan in tonali hual quiyuliltic Cristo hual quimictije huan quilalpachuje ca in mijquimes. Quiyuliltic, cuaquinon quilalic ca yihual pa ima cuali nepa pin cielo capa unca Dios. Axan huan yihual huelitijticate.

<sup>21</sup> Quema, Dios quichihuilic Jesús pa yihual yes niman hué. Amo quiman ajsisi yesi yoje hué moxtin oc sequin hual huelitilo o hual quipialo lahueliltisli o quipialo chichahualisli pa huelitisi o hual cate in tecojuan niman huejué. Quema, Dios quilalic pa itoca Cristo yes niman hué. Amo quiman ajsisi yesi yoje hué mochi in oc sequin inmintocajmes hual cate pin lalticpan, quema, huan inmintocajmes hual cayasi pan tonali quiman lamis in lalticpan.

<sup>22</sup> Dios quilalic pa yes yoje niman hué, pa yojque Cristo quipías lahuelilitlisli pan yehuanten. Huan Dios quilalic pa yes inminteco moxtin hual quineltocalo.

<sup>23</sup> Cristo huan yehuanten hual quineltocalo cate quinami se cuerpo. Cristo unca quinami itzontecon in cuerpo, hual unca icali Dios. Huil tiquijtulo yehuanten cate quinami mochi hual unca ca in cuerpo. Huan yehuanten in laneltocanjmes huan Cristo cate jan se. Unca quinami tiquijtuloaya yehuanten in laneltocanjmes motemtilto ca Cristo huan yoje mochihualo jan se ca Cristo. Unca quinami yihual quitemiltia ca yihual ihuían mochi capa yes pin cielo (ilhuicac) huan pan lalticpan.

## 2

### *Timoquixtilisi pin polehuilisi pan ipampa in cuali hual Dios tejchihuilá*

<sup>1</sup> Huan amhuanten Dios anmitzitaya quinami anyeje mijquimes pan ipampa quinami anpolehuiaya anquichijtataya inon hual amo cuali. Inon anquichihuaya in tonaljmes hual ayamo ancanaya Dios iojli.

<sup>2</sup> Pa yina anyulini anquichijtataya in amo cuali, in laijlaculisli. Yoje anyulini pampa yoje yulilo yehuanten hual amo Dios ixolomes. Yehuanten yulilo quinami Satanás quinnextilía pa yulisi. Yihual Satanás inminhué in iyecames ej'elehuis hual cate huefitijtcate pin iyecal. Yihual quinchihualtía amo cuali yehuanten hual amo quinequilo quineltocalo Dios.

<sup>3</sup> Timoxtin noje tiyulinijme yoje pa yina tiquinchijtataloaya innojen hual tocuerpo (tonacayo) quinequiaya pa ticchihualosquiaya. Quema, ticchi-huanijme len yec tiquijtunijme pa laijtic toyolo. Huan pan ipampa in hual ticchihuanijme, yoje tiyeje hual tiahuloaya tipanulo lacocoltilisli. Dios yahuiaya techcocolti, jan quinami yahui quincocoltía in oc sequin hual amo quineltocalo.

<sup>4</sup> Ma yoje, Dios laicnilía niman míac, huan technequic niman míac ca lasojlalisli hué.

<sup>5</sup> Pampin, techyulitic timoxtin pan ipampa Cristo, mas que tiyeje quinami mijquimes pampa amo ticanaloaya Dios iojli. ¡Xiquijnamiquican, pan ipampa Dios ilachihualisli niman hué, anunca laquixtili pin ipolehuilisi anmolajlaculisli!

<sup>6</sup> Techyulitic huan unca quinami techquixtic pa capa cate in mijquimes, quinami quiquixtic Cristo. Unca quinami techlalic ca yihual capa unca pin cielo (ilhuicac). Quema, inon Dios tejchihuilic pan ipampa Cristo Jesús.

<sup>7</sup> Inon tejchihuilic Dios pa yoje quinnextilis yehuanten hual yulisi pa mochi in xixihuimes hual ajsitihualasi quinami unca niman hué ilachihualisli cuali calica tejchihuilic tehuanten yoje niman cuali pan ipampa Cristo Jesús.

<sup>8</sup> Pan ipampa Dios ilachihualisli cuali, amhuanten anunca laquixtili pa ipolehuilisi anmolajlaculisli. Huan anmijchihuilic in lachihualisli hué pan ipampa quinami anquialic mochi anmolaneltocalisli ca Cristo Jesús. Amo unca pan anmopampa nindeno. Unca pampa Dios anmitzmacac anmolaneltocalisli pa anquilalis ca yihual.

<sup>9</sup> Amo anunca laquixtili pin ipolehuilisi anmolajlaculisli pan ipampa in hual anquichía amhuanten. Sinda yoje cataya, cuajnesi payasquiaya se hual laquetzasquiaya hué inahuac quinami moquixtic pin polehuilisi.

<sup>10</sup> Unca pampa tehuanten ticate iyaxca Dios hual yihual tejchíac yancuic. Tejchíac yancuic pan ipampa Cristo Jesús pa yoje tiyulisi ticchijtcate in hual unca cuali. Huan Dios pa yina quilalic pa cayalosquiaya innojen cuajcuali

pa tiyulisi tiquinchijiticate tehuanten hual axan ticneltocalo Cristo, pampa yihual tejchihuilic pa huil tiquinchihualosquiaya.

*Ticpialo mosehuilisi pa toyolo pan ipampa Cristo*

11 Yoje, xiquijnamiquican inon. Amhuanten hual amo judíos, yoje anlacatic. Huan yehuanten in judíos hual quipialo latequili inmincuilaxli cate jan lacames san hual quinchihuililo je lanextilisi hual lanextilía quinami yehuanten cate Dios ilacames. Huan yehuanten anmitztenehuanijme quijutataloaya pampa amhuanten lacames hual amo anquiapiaya latequili anmocuilaxli, huan pampín amhuanten amo Dios ilacames, yoje quijtunijme.

12 Huan pa innojen tonalijmes, amhuanten anmocahuani laijcuanili pa camo huil cayasi ca Cristo. Anmocahuani latzacuali pa camo anquiapiasquiaya inminyaxca ilacames Israel. Amo anquimatini huan amo anquipiani nindeno anmoyaxca ca in lajtulisi hual Dios quinchíac ca in israelitos. Pa in lajtulisi Dios lajtuc neli inahuac in cuali hual yahuiaya quinchihuilic in judíos, lajtuc pa in tonalijmes quiman ayamo quinchihuilic. Huan amhuanten hual amo judíos, pan innojen tonalijmes ayamo anquineltocaya pampa Cristo anmitzquixtía pa ipolehuilisi anmolajlaculisi. Pampín amo anquipiani nindeno cuali pa anquichiasquiaya pa anmitzpanusquiaya, amo anquipiani Dios.

13 Axcan pan ipampa Cristo Jesús, anunca la'ajxiltili ca Dios toTajtzin. Inon unca pan ipampa iesli Cristo hual tuyahuic in tonali hual miquic, mas que pa yina pa innojen tonalijmes ancataní huejca, Dios amo cataya ca amhuanten.

14 Pampín, yihual Cristo unca tomosehuilisi pa tehuanten hual judíos huan yehuanten hual amo judíos. Tejchihuilic inon pa axcan timochihuasi se san, tehuanten hual pa yina tiyeje ome. Pa yina cayani len hual tejtzacuilini pa camo tiyelosquiaya se san. Catani quinami se pader (tepandi) hual tejtzacuilini in judíos huan yehuanten hual amo judíos pa camo tiyelosquiaya se. Huan axcan, unca quinami Cristo Jesús quixitinic in pader hual amo techmacahuilini pa timoitalosquiaya cuali.

15 Quema, pampa miquic Cristo, quichíac pa ilajtol Dios hual quimaxtilo in judíos yajmo huil tejtzacuilisi tehuanten in judíos pa camo tiyesi se san ca yehuanten hual amo judíos. Pa yina catanijme ome in judíos huan yehuanten hual amo judíos. Axcan, sinda quineltoalo pampa Cristo quinquixtía pin ipolehuilisi inminlajlaculisi, cuaquinon yoje quinchía Dios pa in ome yesi se yancuic san hual mocahualo jan sejpa ca mosehuilisi yehuanten nojen.

16 Huan quichíac pa yesi in ome jan sejpa ca mosehuilisi ca Dios. Tejchihuilic pan ipampa quinami Cristo miquic pa icuerpo pin cuahuil, yoje tejchijitca tehuanten quinami se cuerpo pampa ticate se ca yihual. Quinchihuilic pa in judíos yajmo quinmiztiasi amo cuali yehuanten hual amo judíos. Huan noje quichíac yoje pa yajmo timolalisi ipan Dios quinami lacocolinijmes.

17 In tonalijmes hual cataya Cristo pan lalticpan, quinmilic in lamachtilisli cuali yehuanten in amo judíos hual cayanijme huejca capa amo huil ajsiloaya ca Dios, noje quinmilic in judíos hual amo catanijme huejca. Quichíac pa yesquiaya mosehuilisi ca Dios huan ca amhuanten huan tehuanten.

18 Unca pan ipampa in hual tejchihuilic Cristo. Inon techmaca in judíos huan yehuanten hual amo judíos pa yes toyaxca pa huil timoajxiltisi capa unca Dios toTajtzin, mochi sejse ticpixticate in se Espíritu Santo.

19 Pampa inon, amhuanten hual anunca judíos yajmo anquinami lacames hual chantilo pa oc se lali huan amo quipialo inminyaxca yehuanten hual chantilo pa inminlali. Yajmo anquinami yehuanten hual lacatije pa oc se lali

huan jan quipialo sequin innojen hual inminyaxca yehuanten hual chantilo pa inminlali. Axcan amhuanten anquinami yehuanten hual chantilo capa Dios unca, amhuanten ixolomes Dios, unca quinami anchanti pa ichan.

<sup>20</sup> Huan Dios ichan unca quinami lachihuali ca tehuanten hual ticlalilo tolaneltochalisi ca Cristo. Huan se cali quipía ilalastili. Noje Dios icali quipía ilalastili. Unca inminlamaxtilisli in lanahuatinijmes huan ilajtunijmes hual unca quinami ilalastili icali Dios. Huan Cristo Jesús, yihual quinami in tixcali hual quipehualtia ilalastili in cali. Cate lalalili mochi oc sequin itixcalimes in lalastili quitocaticate in tixcali hual unca quinami Cristo.

<sup>21</sup> Quema, pan ipampa Cristo Jesús, moxtin in laneltocanjimes huil tiquitulo yehuanten quinami len yes calica se quichía se cali, quilalía se adobe jan yoje ca oc se adobe, huan yoje mopantía in cali, mochijtica hué. Huan jan yoje in laneltocanjimes momiactilo pan ipampa Cristo Jesús huan mochihualo quinami se cali hual yes pa Dios san capa huil chanti pampa unca quinami ichan lasojli huan chipahuac. Unca Cristo hual quichíac in cali. Quichíac pa quipías míac lasojlalisi huan chipahualisi.

<sup>22</sup> Huan amhuanten nojen Dios anmitztequipanujtica. Unca quinami yihual anmijchijtica se cali, pa yojque yihual Dios chantis ca amhuanten pan ipampa in Espíritu Santo.

### 3

*Dios quilic Pablo pa quinlamachiltis in lamachiltisli cuali ca yehuanten hual amo judíos*

<sup>1</sup> Pampa inon, niunca lailpili huan latzacuali pin calijtic pampa annimitzlamachiltisli ilajtol Cristo Jesús amhuanten hual amo judíos.

<sup>2</sup> Neli niquijtúa anquicaquiaya quinami Dios nechlajtultic pa nicchías in tequipanulisli. In tequipanulisli unca pa niclamachiltis ilachihualisli cuali jan pa yojque amhuanten hual amo judíos anquimatis inon.

<sup>3</sup> Ma yoje, se lalac amo huil quimati inon pan ipampa ilajmatilisli yihual, jan Dios huil techlamachiltía. Huan Dios nechlamachiltisli nehual inon jan quinami amo quipía míac annimitzijcuiluilic pin amal ca naditas lajtomes. Nechlamachiltisli Dios pan ipampa quinami nechlacaquiltic yihual.

<sup>4</sup> Capa yes anunca anmomaxtitica, huil anquimatis lajtic amhuanten anmayolo pampa neli nejchíac nehual Dios pa nicmatis len quinequi quijtúa lamachiltisli Cristo hual jan Dios san huil technextilía.

<sup>5</sup> Inon Dios amo quilamachiltiaya lacames huan imiahuimes hual yulinijme pa yina. Ma yoje, axcan ca lajtomes hual moxtin quimatilo, Dios quinnextisli inon ilanahuatinijmes huan ilajtunijmes huan quinlalic pa quitequipanulisli yojque yihual san.

<sup>6</sup> Quinnextisli pan ipampa in Espíritu Santo quinami yehuanten hual amo judíos cate quinami icuerpo (inacayo) Jesús yoje ca moxtin in laneltocanjimes. Huan quipialo inminlajco inon hual unca iyaxca Dios. Inon unca hual Cristo quilic neli pampa yahuiaya quinmaca yehuanten hual quineltocalo. Quema, mochi inon quipialo yehuanten hual amo judíos jan quinami quipialo in judíos hual quilalilo mochi inminlaneltocalisli ca Cristo. Quipialo pampa cate jan se ca Cristo pan ipampa ilamachiltisli cuali.

<sup>7</sup> Huan nimochihuaya se lamachiltini pa in lamachiltisli cuali. Dios, pan ipampa quinami nejchihuic cuali, nechmacac in lahueliltisli yojque quinami nechueliltia ichichualisli hué.

<sup>8</sup> Nehual niunca aquí hual amo nimonotza ca Dios ilacames. Amo unca oc se hual amo monotza quinami nehual amo nimonotza. Ma yoje, nejchihuilic cuali Dios pa niquinmacas yehuanten hual amo judíos in lamachiltisli cuali hual techilía mochi in niman míac hual quipía Cristo pa tejaxiluilis tehuanten. Huan amo huil ticmatilo mochi hual quipía, pampa amo huil cajsí inon hual tiqúitulo pa laijtic toyolo.

<sup>9</sup> Nejchihuilic in cuali pa nicchías pa quimatisi moxtin quinami Dios quilalic pa se tonali moxtin huil quipiasí yulilisi hual san Dios huil quinmaca pan ipampa Cristo Jesús. Amo quimacahuiltic Dios pa lacames quimatisi inon quiman quinchíac pan ipampa Jesucristo. Mocahuaya lalati pa Dios iyolo pa mochi xixihuimes hual panujtihualaje. Axan techmachiltic.

<sup>10</sup> Axan Dios quinequí pa quimatisi in iyjecames hual huelitilo pin cielo in niman míac lajmatilisi hual Dios san quipía. Huan quinequí pa quimatisi pan inminpampa yehuanten hual quinnotzac pa yesi ilacames.

<sup>11</sup> Dios quilalic pa panus inon quiman ayamo quipehualtic mochi, huan quichíac pan ipampa Cristo Jesús toTata.

<sup>12</sup> Pan ipampa yihual huan pan ipampa quinami ticlalilo tolaneltocalisi ca yihual, tehuanten huil timoajxilito ca Dios. Amo unca nindeno hual tejtzacuilis huan ticmatilo yihual amo quiman techtojpehuas pa timijcuanisi ca yihual.

<sup>13</sup> Pampín, annimitztemachía pa camo anmomacahuiltis pa anquipolus anmoyolo in lacocoltilisi hual nipanujtica pa amhuanten. Cayas len hual yes niman cuali pa amhuanten huan anmijchihuilis len hué pampa nipanujtica inon.

### *Cristo ilasojlalisi*

<sup>14</sup> Ca inon hual nilamic niqúijcuiluc, annimitzilic quinami anmijchihuilia cuali Dios. Pampín nicmolancuacuetzilía iTajtzin toTata Cristo Jesús. Huan niclajlanía Dios pa amhuanten.

<sup>15</sup> Yihual inminTajtzin moxtin pin cielo (ilhuicac) huan pan lalticpan hual quineltocalo. Huan yehuanten ixolomes motocayaltilo ca yihual itoca jan quinami mochi ixolomes se lalac motocayaltilo quinami itoca inmintajtzin.

<sup>16</sup> Nicmolancuacuetzilía toTajtzin hual quipía niman míac ilaixpelalisli cualtichin pa tejaxiluilis pan tehuanten. Pampín nictemachía pa yihual anmitzmacas míac chicahualisi pan ipampa iEspíritu pa yojque anmochicahualtis pa anmoyolo amhuanten.

<sup>17</sup> Huan niclajlanía pa yoje Cristo chantis pa anmoyolo pan ipampa quinami anquineltoaca, pampa yihual anmijchihuilis cuali quinami neli quilia. Sinda unca Cristo pa anmoyolo, cuaquín unca quinami se cuahuil quinpía ilalhuayojmes pin lali, huan amo quiman anmocahuas pa anquinlasojlas oc sequin.

<sup>18</sup> Pampa in, noje nictemachía Dios pa anmijchihuilis mochi inon pa yoje huil anquimatis quinami Cristo anmitzlasojla míac amhuanten huan moxtin in oc sequin ilacames Dios. Ilasojlalisi Cristo ajsi capa yehuanten huan imihuimes hual yulilo pan lalticpan pa mochi xixihuimes hual huejcahua caya in lalticpan. Ajsi capa se quiman lacatic huan huejcahua caya pa quiman miquis. Ajsi capa yehuanten hual niman huejué huan capa yehuanten hual niman tijtipichin huan yehuanten hual ej'elehuis. Monequí pa anquimatis quinami ilasojlalisi unca quinami niman palahuac huan niman huejcanic huan niman cuajtic huan niman huejcalan.

<sup>19</sup> Noje nictemachía Dios pa anmitzmachiltis quinami unca niman hué ilasojlalisli hual amo huil tiqijtulo quinami unca hué. Inon nictemachía pa yoje ancayas tentica ca Dios pa anmoyolo.

<sup>20</sup> Dios ilahuelilitisli unca lajitic tehuanten huan techuelilitica pa tiyesi quinami yihual Dios quinequi pa tiyesi. Yoje, quinami unca ilahuelilitisli, Dios huil quichía niman míac. Quema, mochi hual huil tictemachilo pa quichías amo quiman quilamilis in hual huil quichía. Huan mochi hual huil tiqijtulo lajitic toyolo pa quichías amo quiman huil quilamilis in hual huil quichía.

<sup>21</sup> Pampa inon, ma laquetzacan ca lajtomes huejué pa yihual moxtin ixolomes hual monechiculo pa quimolancuacuetzilisi capa cayasi pin lalticpan. Mochihuaje se san ca Cristo. ¡Ma camo quiman mocahuacan pa laquetzasi ca lajtomes huejué pa yihual pa mochi tonalijmes hual huejcahuas in lalticpan, ma camo quiman lamilo in lajtomes huejué! Yoje ma ye.

## 4

### *In Espiritu Santo tejchía se san ca Cristo*

<sup>1</sup> Nehual, cuaquín, hual niunca quinami lailpili huan niunca latzacuali pa caljitic pampa nictequipanuilía in Tata, axan annimitzyantía pa anyulis quinami cana cuali pa yulisi yehuanten hual quinnotzac Dios pa cayasi ca yihual huelitjicate.

<sup>2</sup> Pa anyulis quinami inon, monequi pa anmoitas quinami lacames huan sihuames tijtipichin hual amo anmonotza pa Dios anmitzilis lajtomes huejué huan cuajcuali. Monequi pa anyes lacames hual amo anmocualantiquisa quiman yes quichihualo laijlaculisli oc sequin. Huan sinda Dios quimacahuilía pa anmitzpanus in amo cuali, monequi pa anmopepenialtis in amo cuali amo ca cualanilisli. Monequi pa anmopepenialtis in amo cuali hual cuajnesi anmijchihuilisi oc sequin, huan pa camo anmocahuas pa anmolasojlás mas que sequin ca amhuanten hual quineltoalo in Tata anmijchihuililo niman amo cuali.

<sup>3</sup> Monequi pa anyes lacames hual mojmosta anmotolinía pa anmocahuas ca jan se lajtulisli pa anmoyolo hual unca ilajtulisli in Espiritu Santo. Huan in lajtulisli yahui caya huan amo yahui mopala ca amhuanten pan ipampa in mosehuilisli pa anmoyolo.

<sup>4</sup> Monequi pa anyultías anquipixtica se lajtulisli, pampa quipía Dios jan se lanechiculisli ca laneltocanjmes san. Cate quinami icuerpo (inacayo). Huan unca se Espiritu san hual quiyulitía icuerpo lachihuali ca in laneltocanjmes, yehuanten Dios iyaxca. Huan quinami unca se lanechiculisli huan se Espiritu, jan yoje Cristo anmitznotzac pa anyulis anquichixtica jan se lachialisli pa anmoyolo. Inon unca in tonali quiman nesis Cristo oc seppa. Unca quinami ancayas pan tonali hual anmijchías Dios pa ancayas quinami Cristo.

<sup>5</sup> Huan ticpialo se toTata san huan se lamaxtilisli san capa ticlaililo mochi tolaneltoocalisli hual pan ipampa inon tehuanten ticate Dios ixolomes. Huan unca se lacuayatequilisli calica ticate quinami layapali pa toyolo ca temulol pa yoje momatis pampa ticate Dios ixolomes.

<sup>6</sup> Huan unca se Dios, yihual toTajtzin timoxtin. Huelitía ca mochi lahuelilitisli pan moxtin, moita quinami tequipanúa pan ipampa mochi hual quichíac, huan yuli pa lajitic toyolo timoxtin.

<sup>7</sup> Huan techmacac Cristo mochi sejse lahuelilitisli pan ipampa in cuali hual tejchihuilía. Techlamachihuilía quinami yihual quita cuali.



<sup>8</sup> Yoje quijtúa Dios ilajtol:

Quiman lejcuc pa in cielo (ilhuicac), cataya quinami yihual quinlaicantataya mochi in míac ilacocolinjmes lailpili.

Huan quinlaicantataya latomali yehuanten hual ilacocolinjmes quipiani-jme lailpili,

huan quinmacac len cuali lacames hual yeje iyaxca.

<sup>9</sup> Axan, cuaquín, quijtúa ilajtol Dios pampa lejcuc Cristo. Yoje, sinda “lejcuc”, quinequi quijtúa pampa yihual quipiaya pa quipehualtic temujtataya pa temuán (temuayan) pan lalticpan.

<sup>10</sup> Huan in se hual temuc noje unca yihual hual lejcuc huejca pa pani mochi in cielo (ilhuicac). Inon quinequi quijtúa pampa yihual monotza pa mopilis mochi tolasojlalisli axan. Yoje yihual cayas mochi capa yes pin cielo huan pin lalticpan.

<sup>11</sup> Axan, cuaquín, nican unca len cuali yihual quinmacac lacames. Quilalic pa sequin yesi lanahuatinijmes hual yihual quinlalic pa yihual ihuían. Yehuanten quitaje quiman pehuaya yuli oc seppa. Quicaquije ilamachiltlisli cuali Cristo. Quipiaje lahuelilitlisli yoje quinami huil quichihuaje in hual quinmahuisultiaya ca lamajtilisli lacames. Inon quipiaje pan ipampa Dios ilahuelilitlisli. Huan Cristo noje quinlalic sequin pa yesi lajtunijmes. Yehuanten quinmaca Dios ilajtomes pa quijtusi quijquiman. Quinlalic sequin pa yesi lamachiltinijmes hual yehuanten nejnentinemilo quinmilijtcate oc sequin in lamachiltlisli cuali. Huan quinlalic sequin pa mochahuasi se nican, se nepa pa laixnamiquilo ca Dios ixolomes pa como moxilusi huan pa como moixpolujtiasi huan noje pa quinmaxtisi ilajtol Dios.

<sup>12</sup> Cristo quinmacac pa quipiasi in lahuelilitlisli pa yoje Dios ixolomes yesi lachijchihuali pa motequipanuilisi se huan oc se huan pa quitequipanuilisi Dios, quinami monequi pa quichihuasi yehuanten hual quimatilo cuali Dios ilajtol. Huan yoje moxtin ixolomes Dios hual tiquijtulo cate Cristo icuerpo quipiasi míac chicahualisli pa inminyolo huan yultiasi momiactiticate pan inminpampa míac lacames huan sihuames hual quilalilo mochi inminlanel-tocalisli ca Jesucristo.

<sup>13</sup> Yoje yultialo pa yoje timoxtin tiajsisi capa ticayasi ca se lajtulisli pampa ticlalilo mochi tofaneltocalisli ca Dios ixolol huan tiquiximatilo yihual. Yoje mochi sejse ca tehuanten in laneltocanijmes tiyesi quinami se lalal hual quimati, tiquijtuticate laijtuc toyolo huan timochijtcate quinami Dios quita pampa monequi pa mochías se lalal hual quimati. Yoje tiajsisi tiyesi mochi quinami Cristo.

<sup>14</sup> Cuaquín yajmo ticayasi quinami xolomes hual amo quineltocalo se lamaxtilisli san. Mopalalo pa quineltocasi se lamaxtilisli quinami mopala in al pani in al huejcalan majcoctica ca in ijyecal. Cate lacames hual amo mochahualo ca in lamaxtilisli melahuac. Quincuajcuamanalo oc sequin ca oc se lamaxtilisli. Quimatilo míac pa lamaxtisi ca len yes lajtulisli o lachihualisli pa lacuajcuamanasi. Yoje moixpolusi pan Dios iojli. Ma yoje, tehuanten amo ticayasi lacuajcuamanali yoje.

<sup>15</sup> Yes cuali pa timochihuasi lacames huan sihuames hual ca mochi lachihualisli timoscaltilo pa tiyesi quinami Cristo, tiyulticate melahuac huan timolasojlaticate. Tiyesi quinami Cristo hual yihual quinami itzontecon in cuerpo. In cuerpo tiquijtulo unca moxtin yehuanten hual quilalilo mochi inminlaneltocalisli ca Cristo.

<sup>16</sup> Huan pan ipampa Cristo, moxtin yehuanten hual cate icuerpo mopalehuilo. Mochi sejse ca ixolomes unca quinami lasaluli ca in oc sequin quinami



ilalhuames icuerpo se. Pan ipampa inon, mochi sejse hual quilalía ilanelto-calisli ca Cristo, ca yihual Cristo quitilania ichicahualisli pa yoje momiactisi yehuanten hual cate Cristo icuerpo. Sinda quichía mochi sejse itequipanulisi hual Dios quimacac, cuaquinon momiactisi Cristo ilacames. Yoje icuerpo hual cate ilacames ajsisi pa yesi mochi quinami yihual quinequi. Mochi sejse ca yehuanten quinlasojlas moxtin in oc sequin.

### *Cristo techmaca yulilisli yancuic*

<sup>17</sup> Inon niquilía, huan neli niquijtúa niunca iyaxca in Tata. Monequi pa yajmo anyulis quinami nililo yehuanten in amo judíos hual amo quinelto-calisto. Yulilo quinecticate huan quijtuticate lajitic inminyolo len molaxpololtía.

<sup>18</sup> Yulilo quinami cate pan laticumac. Amo quimatilo nindeno pampa cate latzacuali amo quipixticate Dios iyulilisli yancuic. Inon Dios jan quimaca se hual quinelto-calisto Jesucristo. Unca pampa amo unca lanequilisli ca yehuanten pa quimatisi Dios ilajtol. In lajmatilisli yajmo huil calaquía pan inminyolo pampa amo quimacahuiltilo pa calaquis.

<sup>19</sup> Yoje yajmo monextilo nindeno quiman yes quinequi quinnextilía inmin-lajmatilisli calica quimatilo len unca cuali huan amo cuali. Motemacalo pa yulis quichijticate niman miac hual amo cana cuali. Quichihualo len niman amo cuali hual quinpinahualtilo aquinojen quinmitalo quichijticate yoje. Huan amo quiman quinequilo motzacuililo pa camo quichihuasi mochi hual inmincuerpo quinyantía pa quichihuasi hual amo cuali.

<sup>20</sup> Ma yoje, amhuanten amo yojque ancanac pa anyulis pan tonali hual anquiximatic Cristo huan anpehuac anyulic quinami quinequi yihual.

<sup>21</sup> Niquijtúa pampa anquicaquic Cristo ilajtol melahuac huan ancataya lanextili quinami monequi pa anyulis anquiximatic Cristo pa anmoyolo.

<sup>22</sup> Ancataya lanextili pa yajmo anyulis quinami anyulini pin tonalijmes hual ayamo anquiximatic Cristo. Axan, xiyultiacan yoje. Yajmo anunca lacames quinami anyec pa yina. Pa in tonalijmes hual ayamo anquiximatic Cristo, anyulini anmoijlacujtataya pan ipampa quiman anquinequini anquichía in hual amo cuali huan anquinequini anquipía in hual amo cuali pa amhuanten. Sinda jan anquiplasquiaya inon, anquijtuni, cuaquín anmocahuasquiaya ca paquilisli. Yoje anmocajuamanani.

<sup>23</sup> Axcan, yes cuali pa anquijnamiquis quinami ancataya layancuili pa anmoyolo. Ximopalacan axan pa yajmo anlajtus quinami anlajtuni amo cuali ca lajitic anmoyolo.

<sup>24</sup> Quema, Dios anmijchíac lacames huan sihuames yajyancuic pa anyes quinami yihual. Anmijchíac pa anyes lacames huan sihuames hual quimatilo quichihualo inon hual pa moxtin unca cuali, anyultica chipahuac pa yoje anyes jan pa yihual san.

<sup>25</sup> Pampín, yajmo xislacatican. Mochi sejse capa amhuanten ma camo mocahua pa quilis hual unca melahuac ca aqui yes moitilía ca yihual. Mochi sejse ca tehuanten timoixnamiquililo ca mochi oc sequin, jan quinami ilajlajco se icuerpo moixnamiquilo ca in oc sequin ilajlajco.

<sup>26</sup> Sinda ancualani, amo xicchihuacan laijlaculisli quiman ancualani. Ma camo calaquí in tonali sinda ayamo anmocahuac pa ancualanisquiaya.

<sup>27</sup> Amo xijcahuilican in lahuejuecaltini Satanás nindeno calica yihual huil anmijchihualtis in hual amo cuali quiman yes ancualantica.

<sup>28</sup> Achi hual laixtequini, ma yajmo laixtequi. Axan, yes cuali pa tequipanus chicahuac quichijtica in cuali ca imajmajuan pa yojque huil quinmacas len yehuanten hual amo quipialo nindeno.

<sup>29</sup> Sinda anquijtua laijtic anmoyolo lajtol laijlaculi, cuaquin amo ximomacahuiltican pa anquijtus. Axan, sinda anquijtua laijtic anmoyolo len cuali pa anquijtus hual quinpalehuis oc sequin pa yulisi quinami quinequi Cristo, cuaquin xiquijtucan in lajtol hual cana cuali. Yoje quinpalehuis yehuanten hual quicaquilo.

<sup>30</sup> Amo xicnotia iEspiritu Santo Dios. Ca in Espiritu Santo momati pampa amhuanten anunca iyaxca Dios pampa yihual unca laijtic amhuanten. Unca quinami yihual anmitzypilic anmoyolo ca itemulol Dios. Momatis pampa anunca Dios ilacames in tonali quiman Dios lamis anmitzquixtilis anmolaijlaculisli.

<sup>31</sup> Amo ximomacahuiltican pa anyes lacames hual anyuli anquijtutica laijtic anmoyolo len amo cuali hual anquinequisquiaya anquinchihuili oc sequin.

<sup>32</sup> Ximochihuacan lacames hual anlajtua cuali ca oc sequin huan anquinmicnilia. Xiyen (Xiyecan) lacames hual anquimati anquipujpua inminlaijlaculisli sequin ca oc sequin jan quinami Dios quipujpuac anmolaijlaculisli pan ipampa Cristo.

## 5

### *Quinami monequi pa yulisi Dios ixolomes*

<sup>1</sup> Yoje, ximochihuacan lacames hual mochihualo quinami Dios, jan quinami xolomes hual Dios quinlasojla miac.

<sup>2</sup> Huan xiyulican anquinlasojlatica oc sequin quinami Cristo anmitzlasojlac. Motemacac pa miquis pa amhuanten hual anquiapiaya pa anmiquisquiaya pampa anyec laijlaculi. Motemacac ca Dios quinami se huendi lamictili pa anmijchiphauilis anmolaijlaculisli. Mochiac se huendi lamictili calica Dios mocahuac lapaquiltili. Quema, mocahuac ca paquilisli ca inon hual quichiac Cristo.

<sup>3</sup> Ma yoje, ma camo panu ca amhuanten inon quinami lacames quichihualo len unca amo cuali ca sihuames huan quinami sihuames quichihualo hual amo cuali ca lacames. Quema, ma camo quiman molaquetzilian pan amhuanten, huan ma camo panu capa amhuanten innojen lachihualisli hual lapinahualtilo. Ma camo molaquetzilian capa amhuanten quinami quinequilo canalo niman miac. No, pampa amo cana cuali pa Dios ilacames molaquetzilisi pa quichihuasi len quinami innojen.

<sup>4</sup> Noje ma camo quijtucan huan ma camo quichihuacan in hual lapinahualtia, huan ma camo laquetzacan ca lajtomes quinami quijtulo yehuanten hual amo laijnamiquilo cuali. Inon amo lapalehuia nindeno pa quimaxtis oc sequin. Huan ma camo lajtucan quihuitzquilticcate in hual unca cuali, pampa ca inon noje mopinajtilo. Pa Dios ixolomes amo cana cuali pa quichihuasi yoje. Yes cuali pa laquetzasi quisejticate Dios.

<sup>5</sup> Xicchihuacan yoje, nicnequi niquijtua, xiyultiacan quinami monequi pa yulisi lacames hual cate layancuili pa inminyolo. Monequi pa neli anquimatis inon: Se hual yuli monilujtica ca oc se sihual o lalcal calica amo monamictic o yuli quichijtica hual amo unca ca se lajtulisli ca in hual Dios quilalic, amo yahui quipia nindeno hual iyaxca Cristo capa huelitica Cristo. Cristo noje unca Dios. Huan se hual yuli lapinahualtitica amo quipias in hual iyaxca Cristo. Amo cayas se hual quipias in hual iyaxca Cristo sinda yuli quinectica niman miac pa yihual ihuan. Aqui hual yuli quichijtica yoje neli amo quinequi pa huelitis Dios capa yihual. San quinequi yuli quipixtica miac

huan quimacahuiltía pa innojen míac hual quinnequi huelitía ca yihual. In unca jan quinami quimolancuacuetzilía se in monos.

<sup>6</sup> Ma camo anmitzcuaajcuamana amaqui ca lajtomes amo mejmelahuac, anmitzilijtica pampa huil anyuli anquichijtica len yes amo cuali hual anquinequi anquichía, pampa yehuanten quichihualo innojen hual nilamic annimitzilic. Dios cualani ca yehuanten pampa amo quineltocalo. Pampín yalo panulo in lacocoltilisli pan ipampa Dios icualanlisli, polehuisi huan amo quiman quisasi.

<sup>7</sup> Pampa inon, amo xicpiacan nindeno ca quinami yulilo yehuanten.

<sup>8</sup> Pa yina mas que anyulini quinami capa laticumac amo ancantataya Dios iojli, axan unca quinami anyultica pan lahuilisli, pampa anquitac Dios iojli. Xiyulican axan quinami monequi pa yulisi yehuanten hual quipialo Dios ilahuilisli laijtic inminyolo.

<sup>9</sup> Momatis quinami anquipía lahuilisli pa anmoyolo pan ipampa quinami anyuli anquichijtica in hual unca cuali huan ca laijnamiqulislisli cuali huan melahuac.

<sup>10</sup> Xiyulican anquijttutica laijtic anmoyolo quinami quinequi Dios pa anyulis anlachijtica huan cuaquín xicchihuacan yoje.

<sup>11</sup> Amo xiyultiacan anquipilijtica paquilisli anquichijtica in hual moi-jlacúa. Inon unca quinami quichihualo yehuanten hual quipialo laticumac inminyolo. Yes cuali pa anquinnexilisli yehuanten quinami inon hual quichijticate quinmijlacus huan amo quiman huil mochijchiuasi.

<sup>12</sup> Quema, pampa quipinahualtía se quiman laquetza san nadita inminahuac innojen hual quinchijtialo capa amaqui quinmita huan amaqui quimati.

<sup>13</sup> Dios ixolomes hual quipialo ilahuilisli pa inminyolo quimatisi quinami amo cana cuali innojen hual quichijtialo. Mochi huil momati pan ipampa Dios ilahuilisli.

<sup>14</sup> Yoje moita jan quinami unca, sinda unca amo cuali o sinda unca cuali. Pampín, tiqulililo se hual quimahuilía quineltoca Cristo, tiqulililo: Xicmati pampa tiunca capa tia tipolehuía tehual hual tiyuli quinami ticox-tica.

Dios mitzita quinami timiquic pampa tiunca laijlaculi.

Ma yoje, axan xicpala moyolo pa tipehuas tiyulis pa moyolo, huan yoje Cristo mitzlahuis mo'ojli.

<sup>15</sup> Pampín, xiquiztiacan quinami anyuli, nocnían hual anquineltoaca. Amo xiyulican quinami yehuanten hual amo laijnamiquilo. Xiyulican quinami aquinojen laijnamiquilo quipixticate Dios ilajmatilisli.

<sup>16</sup> Xitequipanucan cuali pin tonalijmes hual anmitzcahuililo, pa yoje anyulis pa anquichías in hual Dios quinequi. Xicchihuacan yoje pampa tiyulticate pin tonalijmes capa lacames quichihualo míac hual elehuis.

<sup>17</sup> Pampa inon, amo xiyén oc sejpa lacames hual amo laijnamiquilo. Axan yes cuali pa anquimatis in hual in Tata quinequi pa anquichías.

<sup>18</sup> Huan amo xilahuanacan. Amo anquitas paquilisli yoje. San anmoijlacus huan yoje se tonali yajmo huil anyes laquixtili pa ipolehuilisli anmolai-jlaculisli. Amo quiman lamis in polehuilisli. Xicayacan anquimacahuiltitica pa in Espiritu Santo anmitzmoyaxcajtulis, yoje neli anquitas paquilisli.

<sup>19</sup> Xilaqueztian se ca oz se anmoilijtica ca salmos huan himnos huan alabanzas pa anmoyolo. Xijcantaruilican (xijcuiquilian) in Tata anquijitica lajtomes cuajcualfichin pa anmoyolo.

<sup>20</sup> Quiman anquichijtica yoje, xicsehuican Dios toTajtzin mojmosta pa mochi ilaicnililisi huan ilatuchihualisli. Huan quiman yes anquisehuía Dios, xicsehuican pan ipampa itoca Jesucristo toTata. Pan ipampa yihual ticpialo inon hual toyaxca hual techmacahuiltía pa ticalaquisi iyampa Dios.

*Quinami monequi pa tiyulisi pa tochan*

<sup>21</sup> Mochi sejse ca amhuanten ma moita tipichin ca moxtin in oc sequin. Ma ye yoje, pa yoje pan tonali hual monequi pa anquinpalehuis oc sequin, cuaquin huil anquintequipanuilis anmocnían laneltocanijmes. Xiyén (xiyecan) yoje anmoxtin pampa anquimati anmomajtía ilaixpan Cristo huan yihual techilía chicahuac pa tiyulisi yoje.

<sup>22</sup> In sihuames quipialo pa moitasi tipichin inminlaixpan inminlahuicalhuan, jan quinami quilalilo pa quimacahuiltisi pa in Tata Cristo quinmilis in hual quipiasi pa quichihuasi.

<sup>23</sup> Monequi pa quichihuasi yoje pampa unca iyaxca se lahuical pa laicanas, jan quinami unca Cristo iyaxca pa laicanas capa moxtin in laneltocanijmes hual cate quinami icuerpo (inacayo). Yihual quinmiztía huan quinmacatía in hual monequi pa quipiasi. Huan yihual quinpalehuía huan quinnapatía.

<sup>24</sup> Ma yoje, quinami moxtin in laneltocanijmes momacahuiltilo pa quinalaicas Cristo, jan yoje in sihuames noje ma momacahuiltican pa quinalaicanasi inminlahuicalhuan ca mochi.

<sup>25</sup> Lacames, xiquinlasojlaca anmosihuahuan jan quinami Cristo techlasojla tehuanten in laneltocanijmes, huan pampín motemacac pa timoxtin tehuanten.

<sup>26</sup> Inon quichiác pa yoje techlalis pa tiyesi san se, cuali huan chipahuac pa yihual san. Quema, tejchipahuilic timoxtin Cristo tolaijlaculisli tehuanten. Unca quinami yihual techaltilic tolaijlaculisli quiman ticyolcuutilije ticlaliytataloaya mochi tolaneltocalisli ca ilajtol.

<sup>27</sup> Yoje quinchipahuilic Cristo ilacames pa mohualiquilisquiaya se lanechiculisli ca lacames. Quinequic pa yelosquiaya cualtichin pan ipampa ilaixpelalisli jan quinami unca se sidual lalaquentili pan tonali hual monamicitía. Quinequi pa camo quipialosquiaya nindeno hual unca laijlaculi huan len yes hual Dios amo quitasquiaya cuali. Quema, quinequiaya Cristo pa yesi lacames hual quinlalic pa yesi iyaxca pa yuilosquiaya yojque chipahuac huan pa camo quinmotexpahuilisquiaya nindeno.

<sup>28</sup> Yojque quinlasojla Cristo ilacames hual cate quinami icuerpo. Huan jan yoje monequi pa ilacames noje quinlasojlasi inminsihuahuan jan quinami se lalac quilasojla icuerpo yihual. Aquí hual quilasojla isihua molasojla yihual noje.

<sup>29</sup> Amo quiman cataya se hual quixijxicuhuaya icuerpo (inacayo) yihual. Mochi sejse quiztía icuerpo, quilacualitica huan moutzcutica pa huil mocahuas ca paquilisli. Huan jan yoje quinmiztía Cristo ilacames.

<sup>30</sup> Unca pampa timoxtin ticate quinami ilajquitos icuerpo Cristo, ticate quinami lachihuali ca inacal huan iumimes.

<sup>31</sup> Huan Dios ilajtol quijtúa, quil: “Pampa inon se lalac quicajcahuas itajtzin huan inantzin huan mocajtías inahuac isihua. Huan in omenten Dios quinmita quinami jan se san.”

<sup>32</sup> In unca se lamaxtilisli niman hué hual tiquitalo pa Dios ilajtol. Unca se lamaxtilisli hual amo ticmatilo cuali len quinequi quijtúa. Dios techmaxtía yoje pampa Cristo huan ilacames hual quinnotzac cate se san ca yihual.

<sup>33</sup> Ma yoje, ca monamictilisli pin lacames huan inminsihuahuan, quinequi Dios pa ticmatisi pampa mochi sejse lalac quipía pa quilasojla isihua

quinami molasojla yihual noje. Huan isihua ma quilasojla ilahuical ca lamajtilisli.

## 6

<sup>1</sup> Amhuanten in xolomes, xiquinneltocacan anmotajtzitzían. Anquinel-toca in Tata, pampín cuali unca pa anquinneltocas anmotajtzitzían.

<sup>2</sup> Dios ilajtol quijttúa, quil: “Xiquinlasojla ca lamajtilisli motajtzin huan monantzin.” In lajtol unca in lapehualtilisli pin majlacli lajtomes capa neli techilía Dios pampa yahui tejchihuilia cuali sinda ticneltocalo in lajtol.

<sup>3</sup> Quema, pampa in lajtol lami ca in lajtomes, quijttúa, quil: “Xicchia, pa yoje tiyulis cuali huan pa tiyulis míac tonalijmes pan in lalticpan.”

<sup>4</sup> Huan amhuanten inmintajtzitzían amo xiquinchihuilian anmoxolomes yoje hual amo melahuac huan yoje anquincualantía. Monequi pa anquinscaltis anquinlasojlatica huan anquinlaneltocaltitica. Huan xiquinnextilican pa quimatisi len quinequi quijttúa Dios ilajtol. Ca mochi, xiquinnextilican quinami monequi pa quichihuasi cuali sinda inon hual quichijtcate amo cana cuali. Xicchihuacan yoje pan ipampa Dios ilajmatilisli hual unca laijtc amoyolo.

<sup>5</sup> Amhuanten in tequipanujquimes hual amo quinlaxlahuilo, xiquinneltocacan anmotecojuan nican pan lalticpan. Xicmatican ximomajtican inmin-laixpan pa anquintequipanuilis cuali, jan anquinctica pa anmotequipanulisi yes lachihuali cuali. Yoje monequi pa quichihuasi Cristo ilacames. Pampín, xiquintequipanuilican quinami anquitequipanuilía Cristo.

<sup>6</sup> Amo xitequipanucan jan pa anmotecojuan anmitzitasi antequipanujtica cuali, yoje pa anmitzitas cuali. Noje xitequipanucan cuali pan tonalijmes hual amo anmitziztcate. Xitequipanucan quinami monequi tequipanulo Cristo itequipanujquimes. Monequi pa quichihuasi ca mochi inminyolo quinami Dios quinequi.

<sup>7</sup> Xiquintequipanuilican anmotecojuan yoje, anquinctica anquinchihuilia cuali. Xiquintequipanuilican quinami anquitequipanuilíaya in Tata huan amo quinami anquintequipanuilíaya jan lacames san.

<sup>8</sup> Anquimati pampa len yes cuali hual quichía mochi sejse, yoje in Tata quicuepillis sinda in se unca tequipanujquil hual iteco mocuhuilic, o sinda in se amo unca tequipanujquil lacuhuali.

<sup>9</sup> Huan amhuanten in tecojuan xiquinchihuilian jan yoje ca anmotequipanujquimes huan ximocahuacan pa anquintzajtzilis ancualantica, anquinmilitica len amo cuali anyahui anquinchihuilia pa anquincocoltis. Anquimati quinami inminTeco huan anmoTeco unca pin cielo (ilhuicac), yihual in Tata Jesús. Huan anmitziztica amhuanten in tecojuan jan quinami quinmiztica anmotequipanujquimes. Huan mas que amhuanten anunca in tecojuan, ma yoje amo anmitzita niman cuali huan yehuanten amo yoje cuali.

### *Quinami moanalo Dios ilacames pan ipampa in Espiritu*

<sup>10</sup> Pa niclamis in amal, nocnían, ma annimitzili inon: Anyultica ca in Tata quinami se san. Pampín, xicanacan in Tata ichichualisli niman hué pa amoyolo.

<sup>11</sup> Dios quipía míac pa amhuanten hual anmitzpalehuis pa anmitzhueliltis anmoanas ca in lili. Yihual in lili motolinía pa anmitzcuajcuamanas pa yoje anmijcuanis pa iojli Cristo. Inon hual Dios quipía pa amhuanten quitzacuilis amoyolo pa camo moitas pin polehuilisli. Anmijzacuilía quinami in

tzotzomajli lachihuali ca teposli calica molaquentilo in guaches. Huan anmijtzacuilia quinami in teposli calica mopalehuilo sinda moanticate.

<sup>12</sup> Xicmatican pampa tehuanten amo timoanticate ca lacames lachihuali ca nacal huan esli quinami tehuanten. No, timoanticate ca miac ijyecames hual quinequilo techlamasi. Quipialo in ijyecames miac lahuelilitisli, mas que sequin inminlahuelilitisli unca hue huan oc sequin inminlahuelilitisli amo yoje hue. Yulilo nepa pin cielo itzindan capa unca Dios, huan huelitilo ca chicahualisli pa mochi in laticpan. Huelitilo capa moxtin in lacames hual cate laticumac pa inminyolo pampa cate laijcuanili pa camo cayasi capa unca Dios.

<sup>13</sup> Pampa inon, xicanacan mochi hual Dios quipia pa anmitzmacas pa anmitzpalehuis, cate innojen calica anmoanas. Yoje huil anmoqueztias anquisulajtica Satanás huan moxtin ijyecames pin tonali amo cuali quiman yes molasalo anmopan. Huan in tonali hual anlaquisas ca mochi hual Dios anmitzpalehuic pa anquichiasquiaya, cuaquin huil anmocahuas anmoqueztica inminlaixpan anmolacocolinjmes lastulahuali.

<sup>14</sup> Ximoqueztician lachijchihuali cuaquin, pa anmoanas. Axan, ximopehualtican pa anyes lacames mejmelahuac, mojmosta anquichijtica huan anquijtutica in hual unca melahuac. Xiyulican mojmosta melahuac. Yoje pa anmoyolo amo anquitas polehuilisli pan tonali hual anmoanas ca Satanás huan ijyecames. Sinda anyulis yoje, anyes quinami se guache hual mochijchia ca icuejtiloni pa icuerpo pa yoje itzotzomajli amo nadita quitzacuas pan tonali hual quipias pa moanas. Mochijchia noje se guache molaquentitica ca teposli pa camo huil quichihuala polehuilisli nindeno iyolo.

<sup>15</sup> Ximochijchihuacan pa ancayas lachijchihuali pa anyas ca capic yes pa anquinmils lacames in lamachilitisli cuali hual quinmaca mosehuilisli pa inminyolo. Yoje anyes quinami guaches hual quinpialo icxihuajmes lachijchihuali ca lacsames pa huil yasi ca capic yes.

<sup>16</sup> Ca mochi inon, monotza miac pa anmotzacuilis pa camo anquitas polehuilisli pa anmoyolo. Huil anmotzacuilis pan ipampa quinami anquineltoca Cristo ca mochi anmoyolo. Inon unca quinami in teposli hual in guaches quipialo pa inminmajmajuan. Ca inon quintzacualo pa camo cajsisi inmincuervo in lamulalisli huan teposlimes calica moanaló. Huan jan yoje anmolaneltocalisli hual anquilalia ca Cristo anmitzpalehuis pa anmonapatis pa camo anmitzajsis mochi hual Satanás anmijchihualia. Anmijchihualia pa anmocahuas pa anquineltocas Cristo. Unca quinami Satanás anmitzmulatica ca lamulalisli milinticate.

<sup>17</sup> Huan xiclalican pa anmotzontecon in lajtol melahuac calica anmitzquixtic Cristo pin ipolehuilisli anmolajlaculisli pa yoje amo anyes lapoluli. In lajtol melahuac unca quinami se lasehualoni (sombbrero) lachihuali ca teposli pa anmotzontecon calica se guache motzacuilia pa camo quitecuasi pa itzontecon. Xicmatican cuali ilajtol Dios. In unca quinami se teposli latequi hual in Espiritu Santo quipia calica anmitzhuelitia pa anquitequipanus pan tonalijmes hual anmoantica ca Satanás huan in oc sequin ijyecames.

<sup>18</sup> Pa huil anquitequipanus mochi inon hual anmitzmaca Dios pa anmitzpalehuis, monequi pa anquilajlanis Dios cajcapa yes anmoita, anquimacahuiltitica in Espiritu Santo pa moyaxcajtis ca anmoyolo. Yoje yihual quilajlanis Dios pa amhuanten. Amo ximocahuacan pa anquilajlanis Dios pa mochi hual amhuanten anquinequi. In lajljanilisli amo ximocahuacan pa anquichias ca mochi anmoyolo. Ximoiztiacan pa camo anmitztilanilis anmoyolo Satanás pa anmijchihualtis len amo cuali. Anyes quinami guaches

hual mocahualo ejsaticate, laizticate, pa camo anmitzajsis se lacocolini pa anmoyolo. Yojque xiclajlanican Dios pa len yes monequi pa quipiasi ilacames.

<sup>19</sup> Huan xiclajlanican pa nehual, pa Dios nechmacas lajtol pa niquinmilis oc sequin in lamachiltisli cuali. Amaqui huil quimati len quinequi qui-jtúa sinda Dios amo quipalehuía. Axan yihual quinpalejtica lacames pa quimatisi. Pampín, xiclajlanican pa camo nimomajtis niquinnahuatilis in lamachiltisli cuali.

<sup>20</sup> Niunca se hual nicnahuatía inon, mas que niunca latzacuali pa calijtic. Xiclajlanican Dios pa nehual niquinlaquetzlis ca in lamachiltisli cuali, jan quinami nicpías pa niquinmilis, amo nimomajtitica.

### *Pablo quinchicahua*

<sup>21</sup> Pa anquimatis in hual nechpanujtica huan in hual nicchijtica, tocní Tíquico anmitzmachiltis mochi. Yihual tocní hual ticlasojlalo huan yihual se itequipanujquil toTata. Yihual ticmatilo pampa yuli quichijtía in hual quipía pa quichías. Yuli ca in Tata huelitijtica pa iyolo.

<sup>22</sup> Pampa inon, nictilanic pa yas ca amhuanten, pa anquimatis quinami unca ca tehuanten huan pa annijchicahuatilis anmoyolo.

<sup>23</sup> Ma quipiacan mosehuilisli huan mochi hual cuali tocnían. Ma molasojlalan quinami monequi pa molasojlasi yehuanten hual quilalilo mochi inminlaneltocalisli ca Cristo. Quipialo in mosehuilisli huan in lasojlalisli pampa Dios toTajtzin huan in Tata Jesucristo quinmacalo.

<sup>24</sup> Ma mocahua Dios ilachihualisli cuali ca moxtin hual quilasojlalo toTata Jesucristo ca lasojlalisli hual amo quiman lamis huan amo quiman mopala. Yoj ma ye.

## Filipenses: In amal hual in lanahuatini Pablo quinmijcuiluic laneltocanijmes pin caltilan Filipos

### *Pablo quinmijcuiluila capa unca latzacuali calijtic*

<sup>1</sup> Tehuanten Pablo huan Timoteo hual ticpialo Cristo Jesús quinami toTeco antimitzjicuiluiliticate (antimitzscribiruiliticate) amhuanten hual umpa anchantitica pa Filipos. Amhuanten anunca Dios ilacames pan ipampa inon hual Cristo anmijchiuilic. Antimitzjicuiluiliticate amhuanten noje in hueyenten hual anquinmiztia in oc sequin laneltocanijmes huan amhuanten hual anquinpalehua.

<sup>2</sup> Ma Dios toTajtzin hual iTajtzin toTata Jesucristo anmijchiuili cuali huan ma anmitzmaca mosehuilisli pa anmoyolo.

### *Quinami Pablo quilajlaniaya Dios pa yehuanten hual quineltocaloaya pa Filipos*

<sup>3</sup> Nicsehua noDios mochi quijquiman annimitzijnamiquia.

<sup>4</sup> Mojmosta nicsehua quiman niclajlania, nicsehua Dios pa amhuanten.

<sup>5</sup> Quema, ca paquilisli nilaquetza ca Dios pampa antequipanuc ca nehual pa yoje oc sequin lacames quimatisi in lamachtilisli cuali. Amo anmocahuac anquichijtiac yojque quiman anpehuac anquineltoac in lamachtilisli cuali. Huan yoje anquichijtia axcan.

<sup>6</sup> Huan amo nicmahuilia inahuac inon hual Dios anmijchiuilitica. Nicnequi niqijtua, yahui anmijchiuilia mochi hual pehuac anmijchiuilic pa anmoyolo. Huan laquisas pa in tonali quiman Cristo Jesús hualas oc sejpa pa huelitis nican pan lalticpan.

<sup>7</sup> Huan jan unca cuali pa nehual nicchixtias inon hual nicmati pampa anpanus anmoxtin, pampa mojmosta annimitzpia amhuanten nocnian pa noyolo. Inon unca pampa anquipia in cuali hual Dios anmitzmaca jan quinami nehual noje nicpia. Quema, niqijnamiquia inon capa yes, ma caya quiman niunca latzacuali calijtic, ma caya quiman niqinnextilijtica lacames pampa in lamachtilisli cuali hual niqinmilijtica neli unca Dios ilamachtilisli cuali. Pampin amo lamis cayas yojque.

<sup>8</sup> Inon annimitzilia pampa Dios quimati neli quinami annimitznequi anmoxtin ca in lasojlalisli hual Cristo Jesús nechmaca pa amhuanten.

<sup>9</sup> Huan niclajlania Dios pa yihual anmitzmachiltis quinami huil anlalojlas miac. Ma yoje, niclajlania pa anmitzmachiltis pa anlalojlas ca lajmatilisli hual yoje cayas ca se lajtulisli ca Dios ilamaxtilisli.

<sup>10</sup> Niclajlania inon pa yoje neli anquimatis len unca in niman cuali pa anquichias amhuanten. Monequi pa anquimatis inon pa yojque ancayas amo anquipixtica len lajlaculisli calica se quinequi anmitzmotexpahuilia pa mochi in tonalijmes quiman ticchixticate in tonali hual mocuepas Cristo.

<sup>11</sup> Quema, niclajlania Dios pa anmitzhueliltis Jesucristo pa anyultias anquichijtica in miac hual cuali hual Dios quinequi pa anquichias. Yojque moxtin laquetzasi ca lajtimes huejué pa yihual ilahueliltisli hue huan ilaixpelalisli cualtichin.

*Pa nehual amo unca yuilisli sinda Cristo amo unca ca nehual*



<sup>12</sup> Huan nocnían, nicnequi pa anquimatis inon: Inon hual nechpanuc neli quinpalehuic yehuanten nican pa quimatisi míac oc sequin in lamachiltlisli cuali.

<sup>13</sup> Quema, niunca latzacuali pa calijtic huan moxtin in guaches hual quiztialo in hué César quimatilo quinami niunca latzacuali calijtic pampa niquinlaquetzilía lacames ilamachiltlisli cuali Cristo. Huan noje quimatilo inon moxtin in oc sequin hual nican cate.

<sup>14</sup> Huan in míac ca tocnían hual cate iyaxca toTata yajmo momajtilo míac quiman quinlaquetzilijticate Dios ilajtol. Quema, amo momajtilo pa quinlaquetzilisi ilajtol Dios mas que niunca latzacuali pa calijtic.

<sup>15</sup> Huan neli, sequin quinlaquetzililo ilajtol Cristo pampa mocualanililo nonahuac nehual huan quinequilo molalilo nopan quinami nolacocolini-jmes. Huan oc sequin quilamachiltlo ilajtol Cristo pampa cuajcuali inmínyolo huan quinequilo pa oc sequin quimatisi ilajtol yihual.

<sup>16</sup> Ca níquic, sequin quilamachiltlo ilajtol Dios pampa quilasojlalo Jesucristo huan ilajtol huan yehuanten hual iyaxca. Quimatilo pampa niunca nican latzacuali pin calijtic pampa nilanextilijtinemiaya quinami in lamachiltlisli cuali neli unca ilajtol Dios.

<sup>17</sup> Huan ca ompic, in oc sequin quilamachiltlo ilajtol Cristo pampa quinequilo mochihualo huejueyenten, inminlaicananijmes yehuanten hual iyaxca Dios. Amo quilamachiltlo ilajtol Cristo ca inmínyolo melahuac. Quema, quijtulo laijtic pa inmínyolo pampa yalo nechlalililo oc sequin lacocoltilisli pa nipanun nican pin calijtic capa niunca latzacuali.

<sup>18</sup> Ma yojque. Ma quinlaquetzilican ilajtol Cristo pa yojque míac lacames mochihuasi ilanechiculisli inminlamaxtilisli. Ma quinlaquetzilican ilajtol yihual pampa quinequilo pa lacames quimatisi ilajtol Cristo. Cate ca mochi innojen lachihualisli quilamachiltlo yehuanten ilajtol. Ca inon nicpía paquilisli. Huan amo in san.

<sup>19</sup> Noje nicpías paquilisli pampa nicmati inon hual nechpanujtica quisas cuali pa yojque nehual nicayas lamacahuali.

Huan inon cayas pampa anquilajlantica Dios pa nehual, huan noje pampa nechpalehuía in iEspíritu Jesucristo.

<sup>20</sup> Quema, inon quisas cuali pa nehual yojque quinami nicchixtica ca míac lanequilisli pa panus. Quisas cuali yojque quinami niquijtúa neli pa noyolo huan nicchixtica da amo nicchía nindeno hual pampa inon nipinahuas. Huan noje quinami nicchixtica axan, nicnequi pa camo nimomajtis nadita pa niquijtus ilajtol Cristo jan quinami mojmosta nicchíac. Inon nicnequi pa yoje nicchihuilis hué Cristo pan ipampa nocuerpo, ma ye sinda niyulis, ma ye sinda nimiquis. Yoje nicnequi pa moitas quinami Cristo unca niman hué huan amo unca nindeno hual ajsis yes hué quinami yihual.

<sup>21</sup> Unca pampa pa nehual sinda niyuli, Cristo monotza mochi, niyuli jan pa yihual san. Huan sinda nimiquis, nicanas mochi pampa nicayas capa yihual unca.

<sup>22</sup> Huan sinda niyuli, yojque huil nicchía míac hual cuali pan ipampa quinami nictequipanuilía. Pampín, amo nicmati len yesquiaya in cuali pa nicchías.

<sup>23</sup> Unca etiuxtica, pampa nimoita lajco pin ome lachihualisli. Pan se lachihualisli, nimiquisquiaya pa yoje nicayasquiaya ca Cristo pampa inon yesquiaya niman cuali pa nehual. Amo ajsisquiaya caya yoje cuali sinda nimocahua niyultica.

<sup>24</sup> Ma yoje, pa amhuanten, monequi míac pa nimocahuas nican niyultica pa yojque annimitzpalehuis.

<sup>25</sup> Huan nicmati pa noyolo pampa amo nía nimiQUI. Nicmati pampa nimocahuas niyultica ca anmoxtin pa yojque anquipixtías mÍac paquilisli pan ipampa quinami anquilalía anmolaneltocalisli ca Jesucristo.

<sup>26</sup> Quema, nimocahuas niyultica ca amhuanten pa yojque anlaquetzas ca lajtomes niman hué pa Cristo Jesús ipampa inon hual nejchihuilis. Nechmacahuiltis pa nicayas oc sejsa ca amhuanten.

<sup>27</sup> Jan xiquitaca pa yoje quinami anyulis yes quinami monequi pa yulis se hual quipía ilaneltocalisli pa ilamachiltisli cuali Cristo. Xiyulican yojque. Cuaquinon sinda nihualas annimitzitas o sinda amo nihualas, ma yojque nijcaquis quijtusi pampa anmocajtica jan se pa anmoyolo pan ipampa in Espíritu Santo. Huan nijcaquis quijtusi quinami ca se laijnamiquilisli anmoxtin anmotolintica pa anquinnextilis yehuanten hual molalilo ipan Dios pampa unca melahuac ilamachiltisli cuali capa ticlalilo tolaneltocalisli.

<sup>28</sup> Huan amo ximomajtican nindeno pampa molalilo anmopan pa anmijchihuilis tetzcuinuc yehuanten. Sinda amo anmomajtía inminlaixpan yehuanten, cuaquinon pampa inon quimatisi yehuanten anmolacocolinjmes pampa Dios anmitzpalejtica pa camo anmomajtis. Huan quimatisi pampa yahui quinmijlacúa yehuanten. Ma yoje, inon noje quinmachiltis pampa yihual Dios yahui anmitzquixtilía pin ipolehuilisli anmolaijlaculisli.

<sup>29</sup> Inon unca pampa Dios anmijchihuilic cuali pa yojque anquilalis anmolaneltocalisli ca Cristo. Huan amo jan in san. Yihual noje anmijchihuilía cuali quiman anmitzmacahuiltía pa anpanus lacocoltilisli pa Cristo.

<sup>30</sup> Anquitac inon hual nejchihuilije in tonalijmes hual nicataya nepa pa Filipos. Nipanuc mÍac lacocoltilisli hual nejchihuilije yehuanten, huan axcan anquimati quinami nipanujtica lacocoltilisli nican pin calijtic capa niunca latzacuali. Huan yoje anpanujtica lacocoltilisli amhuanten noje pampa anmijchihuilijticate inon yehuanten in lacocolinjmes hual molalilo ipan Dios.

## 2

### *Cristo mochíac tipichín mas que yihual unca niman hué*

<sup>1</sup> Cristo anmijchicahualtilía anmoyolo, anmitzlahualtic pan ipampa quinami anmitzlasojla. Anquipía in Espíritu Santo pampa yihual yuli ca laijtic amhuanten mochi sejsé. Axan anquimati quinami yihual anmitznequi huan anmitzicnilía huan pampa inon anquimati anlaicnilía huan anlalaso-  
jla.

<sup>2</sup> Yoje pampa anquipía mochi inon pan ipampa Cristo, xijchihuilican pa nicayas ca niman mÍac paquilisli. Nicnequi niquijtúa, ximochihuacan se san ca quinami anlajtúa laijtic anmoyolo. Xicpiacan in lasojlalisli se pa oc se huan pa toTata. Xiyén (Xiyecan) ca mochi anmoyolo ca se lajtulisli se ca oc se.

<sup>3</sup> Amo xilajtucan laijtic anmoyolo quinami anquichías len pa yoje san amhuanten ancanas in hual anquinequi. Amo xicchiacan pa anmitzlasojlas lacames pampa quixtocalo in hual anquichijtica, yoje quinami amhuanten ancataya hueyenten. Yes niman cuali pa anmoitas amhuanten quinami tijtipichin, huan pa anquijtus laijtic pa anmoyolo pampa oc sequin cate cuali huan amhuanten amo yoje cuali quinami yehuanten.

<sup>4</sup> Mochi sejsé ca amhuanten ma camo quitemu quinami quipías in hual cuajnesi unca iyaxca pa quipías. Yes cuali pa quitemus mochi sejsé quinami quinpalehuic oc sequin pa quipiasi innojen hual unca inminyaxca pa quipi-  
asi.

<sup>5</sup> Ma laijnamiquican moxtin ca amhuanten yoje quinami Cristo noje laijnamiquic quiman hualaya pin lalticpan.

<sup>6</sup> Yihual amo mocahua pa yes jan quinami Dios unca. Ma yoje, amo quijtuya lajtic pa iyolo pampa quipiaya pa nesisquiaya quinami Dios pan ipampa mochi lanextilisli pa yoje lacames quitalosquiaya jan quinami Dios.

<sup>7</sup> Amo quichíac yoje. San mocahuac pa quitequipanus ilahuelilitlisli huan mocahuac pa nesisquiaya ca mochi ilaixpelalisli cualtichin calica lacames quiximatilosquiaya quinami Dios. Cuaquinon, pan lalticpan hualac nestataya quinami se hual quitequipanuilla oc sequin. Quema, lacatic pan ipampa se sihual quinami tehuanten, yoje mochijtataya lacal.

<sup>8</sup> Huan nepa capa moitaya nestataya quinami lacal, mochihuaya quinami lacal tipichin, amo quinami se lacal hué hual moixtoca. Huan quineltocaya mochi hual Dios quiliaya, quineltocac quiman Dios quilic pa motemacas pa miguis. Quema, quinmacahuilic pa quimictisi pan se cuaquil.

<sup>9</sup> Pampa inon, Dios noje quichíac pa yes niman hué, huan quitocayaltic ca se itoca hual lanextilia pampa yihual quiplia niman miac lahuelilitlisli. Moxtin oc sequin amo quiman ajsisi quiplasi lahuelilitlisli yoje hué.

<sup>10</sup> Dios quitocayaltic yoje quinami yihual motoca, pa yoje yihual hual itoca Jesús quimolancuacuetzilisi moxtin pin cielo huan pan in lalticpan huan itzindan in lalticpan.

<sup>11</sup> Huan moxtin quijtusi quineltocaticate ca mochi inminyolo pampa Jesucristo unca in Tata, Yojque quijtuticate miac lajtomes huejué huan cuaqcualtichin pa Dios toTajtzin.

### *In laneltocanjmes lahuilo pin lalticpan*

<sup>12</sup> yojque, amhuanten hual annimitzlasojla, amo anmocahuac pa anquineltocasquiaya Dios ilajtol hual annimitzilic. Axcan, jan quinami anquichíac nepa quiman nicataya ca amhuanten, ximoiztiacan miac pa anquichijτίας yojque quiman amo niunca ca amhuanten. Huan yojque ximotolintiacan pa anajsis anyes jan quinami Dios quinequi pa ajsisi yesi ixolomes. Huan nepa capa anquichijtia yojque, ximomajitiacan pa camo anquichías len amo cuali pa camo anquicualantis Dios.

<sup>13</sup> Xiquijnamiquican pampa Dios unca lajtic pa anmoyolo amhuanten pa anmitznequiltis pa anquichías in hual cuali pa amhuanten. Inon unca itequipanulisli hual quilalic pa mochías.

<sup>14</sup> Xicchihuacan mochi hual Dios quinequi pa anquichías, huan amo xicualantiacan anmolaxilijtica lajtomes pampa anquiplia pa anquichías inon.

<sup>15</sup> yojque amo anmitzmotexpahuilisi inminyampa Dios huan lacames huan ancayas chipahuac pa anmoyolo. Neli anyes ixolomes Dios huan yihual amo anmitzlalilis len calica anmitzmotexpahuilisi amhuanten, mas que anunca ca lacames pin lalticpan hual amo yulilo melahuac. Yulilo ca oc se lamaxtilisli, amo quinami Dios quinlalilic pa yulisi. Dios anmitzalic ca yehuanten pin lalticpan pa yoje anyes quinami tixuxlimes pa anquinlahuis lacames lajtic pa inminyolo pa quimatisi ilajtol Dios.

<sup>16</sup> Inon amhuanten amo anmocahuas pa anquineltocas. Huan amo anmocahuas pa anquinlaquetzilis ilajtol Dios calica yihual quinyulitía lacames. Pampa in, nilajtus hué huan nilajtus ca paquilisli anmonahuac amhuanten pa in tonali hual hualas Cristo oc sepa. Inon yes pampa nicmatis pa in tonali amo jan lapic (de in balde) nitequipanuaya chichahuac pa yojque anquiplasquiaya ilajtol Dios.

<sup>17</sup> Huan amo inon san. Noje anmotemacac ca Dios quinami se huendi pa anquitequipanulisli pampa anquineltoca Jesucristo. Huan nehual sinda

nechmictisi huan quisas noesli quinami se huendi, yojque yes anmohuendi amhuanten noje. Huan pampa inon nicpiás paquilisli. Noje nehual huan anmoxtin ticpiasi paquilisli.

<sup>18</sup> Jan yojque, xicpiacan paquilisli, noje ca nehual ma ticpiacan paquilisli.

### *Timoteo huan Epafrodito*

<sup>19</sup> Ma yoje, sinda in Tata Jesús quichijchá mochi pa huil nicchías, nichixtica pa camo nihuejcahuas pa annimitztilanilis Timoteo pa yojque nehual noje nicayas lapaquiltili quiman nicmatis quinami anunca huan len anmitzpanujtica.

<sup>20</sup> Annimitztilanilijtica Timoteo, pampa amo nicpiá oc se nican quinami yihual hual laijnamiquía laijtic pa iyolo quinami nehual quiman annimitzijnamiquía amhuanten. Yihual Timoteo neli anmitzijnamiquía ca mochi iyolo jan quinami nehual. Yihual quinequi pa mochi quisas cuali pa amhuanten.

<sup>21</sup> Amo nicnequi nictilani oc se, jan Timoteo san. Moxtin in oc sequin jan quitemulo len pa mopaquiltisi yehuanten san, amo pa quipaquiltisi Cristo Jesús.

<sup>22</sup> Ma yoje, amhuanten anquimati quinami cuali yihual tequipanúa. Nechtequipanuilic quinami se xolol quitequipanuilla itajtzin, pa yoje míac oc sequin lacames quimatisi in lamachiltisli cuali.

<sup>23</sup> Yoje, nichixtica pa nictilani yihual jan axcan, san pa in tonali hual niquitas quinami yahui nechpanúa nican pin calijtic capa niunca latzacuali.

<sup>24</sup> Huan nicmati pa noyolo inon hual in Tata nechnextilic. Nehual amo nihuejcahuas nías ca amhuanten pa annimitzitas.

<sup>25</sup> Ma yoje, niquijtic pampa monequi pa annimitztilanilis Epafrodito. Yihual nocni ilaneltocani Cristo, tictequipanuillo Cristo tiomenten, huan tipanulo lacocoltisli pa Cristo tiomenten quinami guaches. Annechtlanilic pa yihual nechpalehuis pampa monequiaya pa nicpiasquiaya lapalehuilisli.

<sup>26</sup> Annimitztilanilijtica axan jan pampa yihual quimatic quinami anquicac pampa cataya cocoxqui.

<sup>27</sup> Huan neli cataya cocoxqui, ca je tipichin miquiaya. Ma yoje, Dios quicnilic huan quipajtic, huan amo yihual san. Nehual noje nechcicnilic Dios pampa quipajtic Epafrodito pa yoje amo nechcocujtiasquiaya noyolo oc sejpa míac quinami nechcocujtataya quipiaya tonalijmes.

<sup>28</sup> Pampín, niejsehuía míac pa annimitztilanilis, pa yoje pan tonali hual anquitas, cuaquín anquipías paquilisli oc sejpa huan yojque mosehuis noyolo.

<sup>29</sup> Xicnamiquican cuali ca mochi paquilisli, pampa yihual anmocni pan ipampa in Tata. Xicpilican lacames quinami yihual míac lasojlalisli.

<sup>30</sup> Yihual quitequipanuiliaya Cristo huan pampín ca nadita yihual yahuiaya miqui. Quema, yihual molalic capa ca nadita yihual yahuiaya miqui pa yoje huil nejchihuilis mochi hual amhuanten amo huil annejchi-huiliaya.

## 3

### *Quijtúa Pablo quinami se quipías yulilisli hual neli melahuac*

<sup>1</sup> Huan nocnián, unca inon hual mocahua pa annimitzilis: Ma annimtizili xicpiacan paquilisli pampa amhuanten anunca Dios ixolomes. Amo nimomaca tequil pampa annimitzijcuilulía in lajtomes oc sejpa. Huan pa amhuanten yes cuali pampa annimijzacuilis pa camo anquitas polehuilisli.

<sup>2</sup> Ximoiztiacan pa camo anmitzcuaajcuamanas in lamaxtinijmes hual yulilo amo cuali quichijticate quinami pelojmes. Quinectinemilo quipalalo

Dios ilamaxtilisli ca inminlamaxtilisli yehuanten. Quijtulo monequi pa anquipiás latequili anmocuilaxli pa yoje momatis pampa anunca ixolomes Dios, jan quinami latequilo in judíos.

<sup>3</sup> Quema, ximoiztiacan pampa in lamaxtinijmes cate amo cuajcuali. Tehuanten neli ticate Dios ixolomes. Tehuanten ticpialo ilanextilisli Dios pa toyolo. Sinda se quipía in lanextilisli pa icuilaxli san, inon amo monotza pa lanextilis pampa yihual unca se ca Dios ixolomes. Tehuanten ticmolancuacuetzililo Dios pan ipampa in Espíritu Santo huan tiquililo lajtomes huejué Cristo Jesús pampa techquixtilic tolaijlaculisli. Ticmatilo pampa amo monotza nindeno in hual huil ticchihualo tehuanten tohuían, pampa amo techpalehuía nindeno pa timochihuasi ixolomes Dios.

<sup>4</sup> Sinda huil timochihualoaya ixolomes Dios pan ipampa len ticchihualo, cuaquín nehual nicchihuaya inon, sinda nicmatiaya pampa yoje nimochiasquiaya se ca Dios ixolomes. Sinda cataya oc se lalac hual quiqtuaya pampa ca yihual unca iyaxca pa mochías se ca Dios ixolomes pan ipampa ilahuelilitlisli hual canac pan ipampa len quichíac, cuaquín nehual niqiuqtuaya unca noyaxca pa nimochías se ixolol Dios ca lahuelilitlisli hué hual in se ilahuelilitlisli amo quiman ajsis yes yoje hué.

<sup>5</sup> Inon niqiuqtúa, pampa nechlalilije nopan inminlanextilisli in judíos quiman nilacatic huan niyulic chicué tonalijmes. Nilacatic israelito, nehual se imiahuimes Benjamin hual yec se ca in doce (majlacli huan ome) lacames hual quinpehuajtije in israelitos. Quema, nehual niunca se hebreo pampa notajtzitzían yeje mochi hebreos. Huan ilajtol Dios hual in judíos quimaxtilo nicneltocac yojque quinami motolinilo in fariseos pa quineltocasi ca niman míac chicahualisli.

<sup>6</sup> In oc sequin nocnían judíos amo chahuatiloaya inahuac mochi hual quineltocalo in judíos quinami nehual nichahuatiaya. Huan nicnequiaya pa yoje yuhtalosquiaya. Quema, niquintojtocaya pa niquinchiuilis lacocoltilisli yehuanten in judíos hual quilalije inminlaneltocalisli ca Jesucristo. Huan moxtin in fariseos nechitaloaya quinami se hual amo quiptiaya laiylaculisli, pampa nicchihuaya mochi hual quiqtúa in lajtol hual quimaxtilo in judíos. In lajtol quinnextilía quinami yehuanten quipialo pa quitequipanuilisli Dios.

<sup>7</sup> Inon niqiuqtuni cataya lapalehuilisli pa nehual hual nicpiaya pampa nicchihuani mochi hual quiqtúa in lajtol. Axan niquita pampa amo unca tipichin lapalehuilisli pa nehual, pampa nicpiá mochi lapalehuilisli pan ipampa Cristo.

<sup>8</sup> Quema, neli niqiuqtúa noje pampa mochi capa niclalic nolaneltocalisli amo nejchihuilic nadita lapalehuilisli. Unca yojque, pampa axan niquiximati Cristo Jesús noTata huan inon monotza niman míac, amo yoje míac monotza inon hual niqiuqtuni pampa catani lapalehuilisli pa nehual. Huan pampa niclalic nolaneltocalisli ca Cristo, nicpoluc mochi hual nicpiaya.

Ma yoje niquita mochi in hual nicpoluc jan quinami se bagazo palanquil, pa yojque nicpiás Cristo quinami noTeco huan mochi hual quipía pa nechmacas.

<sup>9</sup> Quema, niquita mochi inon hual nicneltocani quimani cuilal pa yojque Dios nechitas san se ca Cristo. Axcan Dios nechitas amo ca laiylaculisli. Inon amo cayas pampa nicchiac in hual quiqtúa in lajtol hual quimaxtilo in judíos. Cayas pampa niclalic nolaneltocalisli ca Cristo. Yojque Dios quiqtúa pampa se amo quipía laiylaculisli pampa in se quilalía ilaneltocalisli ca Cristo.

<sup>10</sup> Huan nicnequi nicpiá Cristo huan nicnequi nicaya san se ca yihual pa

yoje niquiximatis huan pa nicmatis ilahuelilitlisli hué. Quinextilic inon pan tonali hual yulic oc sejpa. Quisac pin mijquimes. Huan nicnequi nicpía Cristo pa nicpías nolaxilulisli ca quinami yihual panuc lacocoltilisli. Nehual nicnequi nimoita quinami se hual miquic ca Cristo pan tonali hual yihual miquic, pa yoje yajmo niyulis quinami niyulini.

<sup>11</sup> Inon nicnequi ma ye quinami yes, pa yoje niajsis niyulis oc sejpa pa nicayas ca Cristo quiman nimiquis.

*Pablo motolinía pa ajsis capa Cristo quinequi pa cayas*

<sup>12</sup> Amo niqijuttica pampa nicajsic mochi hual Cristo quipía pa nehual. Huan amo niqijuttica yihual nejhihuicli pa nives mochi quinami yihual quinequi. Ma yoje, niman nimotolinía pa nimoyaxcajtisli in hual Cristo quipía pa nehual. Nicchá yoje pampa nicmati Cristo Jesús nechmoyaxcajtisli.

<sup>13</sup> Nocnían, niqijtúa laijtic nehual pampa nehual ayamo nicmoyaxcajtisli in hual Cristo nechpíla. Jan in se san nicchá. In hual nechpanuc yajmo nicmacahuilía pa nejzacuilis pa camo niyultías huan pa camo nicchijtías quinami Dios quinequi pa nicchías. Yoje, quinami se hual molalúa ca laluxtilisli, niman nimotolinía ca mochi nolahuelilitlisli pa nicajsis in hual unca nolaixpan, in hual Dios quipía pa nehual.

<sup>14</sup> Quema, niman nilatojtocatía pa niajsis capa Dios quilalic pa niajsis, nicnequi niqijtúa, capa nicajsis in laxlahuilisli. Pa inon pan ipampa Cristo Jesús, Dios nechnotzac pa nicanas iojli hual nehuica pa in cielo (ilhuicac). In laxlahuilisli unca noyulilisli yanucic hual nicpía pan ipampa Cristo.

<sup>15</sup> Yoje, tehuanten hual huil tilajnamiquilo cuali inahuac in hual unca iyaxca Dios, ma ticmatican laijtic pa toyolo pampa ayamo tiajsije tiyeje quinami Dios quinequi. Huan sinda sequin ca amhuanten anquijtúa ca oc se laijnamiquilisli, cuaquinon Dios noje anmitzmachiltis quinami amo unca melahuac in hual anquijuttica pa anmoyolo.

<sup>16</sup> Jan ximoiztiacan pa anmocajtías mojmosta pa iojli Dios. Huan ximoiztiacan pa camo anmocajtías pa anquineltocas mochi hual anmonextilic quinami monequi pa anyulis pan Dios iojli, hual anquimati axan.

<sup>17</sup> Nocnían, xicayacan quinami nehual, xiyulitiacan quinami nehual niyuli. Xiquitacan yehuanten hual yulilo yoje huan xiyulican quinami yehuanten, jan quinami antechitac tehuanten tiyuliloaya.

<sup>18</sup> Nicpía pa annimitzijnamiquiltis inon. Unca pampa míac annimitzilic sejpa huan oc sejpa quinami cate míac hual quijtulo pampa cate Dios ixolomes. Ma yoje, yulilo quinami ilacocolinijmes Cristo. Amo quineltocalo in lajto hual quinnextilic quinami Cristo miquic pin cuahuil pa yehuanten. Huan axan nichoca annimitzilijtica inon.

<sup>19</sup> Yehuanten moijlacusi, pampa inon panusi lacocoltilisli. Amo quimolan-cuacuetzililo Dios, jan quijtulo pa inminyolo quinami quinmacasi paquilisli inmincueros. Moixtocalo ca mochi hual quichihualo hual lapinajtilo. Jan quijnamiquilo san len huil canaló nican pan lalticpan.

<sup>20</sup> Ma yoje, tehuanten tolali capa ticpialo in hual toyaxca neli unca pin cielo (ilhuicac), ticate ichantinijmes in cielo. Ticchixticate pa hualas quistica pa nepa toTata Jesucristo hual techquixtilis pa mochi in polehuilisli hual tipanulo nican.

<sup>21</sup> Yihual techpatilis tocuerpos hual nican pin lalticpan mococulo huan palanilo huan miquilo. Techpatilis pa mochihuasi tocuerpos yajyanucic quinami yihual icuerpo. Yajmo miquisi, san quipiasí laixpelalisli huan

chicahualisli cualtichin. Inon Cristo tejchihuilis pan ipampa ilahuelilitlisli calica huil quinneltocaltis mochi pa yihual.

## 4

### *Amo ximocahuacan pa anquipias paquilisli pan ipampa in Tata*

<sup>1</sup> Yoje, nocnían, xicayacan melahuac pan iojli in Tata, yoje ca ilahuelilitlisli. Annimitzlasojla, nicnequi annimitzita míac. Annechmaca míac paquilisli. Huan pampa amhuanten anquineltoca Cristo, pampa in nicmati amo jan lapic (amo de in balde) annimitzlaquetziliz Dios ilajtól. Yoje, amhuanten hual annimitzlasojla, anunca quinami se laxlahuilisli pa nehual, quinami in hual cajsí se hual cajsic laicanac ca se laluxtilisli.

<sup>2</sup> Amhuanten, Evodia huan Síntique, annimitzlaflanía ca mochi noyolo, xicayacan ca se lajtulisli quinami anquitequipanuilia in Tata.

<sup>3</sup> Quema, huan nimitzlaflanía tehual nocni lasojli hual titequipanulo tiomenten, xiquinpalehui in ome sihuames. Yehuanten teguipanuje chicahuac ca nehual pa quilamachiltisi in lamachilitlisli cuali. Jan yoje quichihuaje Clemente huan in oc sequin hual titequipanuje timoxtin. Dios quinmiximati huan quinpía inmintocajmes lajcuiluli pa iamal capa cate inmintocajmes yehuanten hual quipialo iyulilislí yancuic hual yihual quinmacac.

<sup>4</sup> Xicpiacan paquilisli mojmosta pampa anquipía in Tata pa anmoyolo. Niqijtus oc sejpa: ¡Xicpiacan paquilisli!

<sup>5</sup> Xiyulican mojmosta xiquinpalejtican moxtin. Huan amo ximotemachilijtiacan innojen hual anquijtúa cate anmoyaxca pa anquinpías. Yoje moxtin quimatisi quinami anyuli cuali. Xicchihuacan yoje pampa amo huejcahuas pa hualas in Tata.

<sup>6</sup> Amo xicmacahuiltican nindeno pa anmitzquixtilis anmosehuilisli pa anmoyolo. Xiclaquetzilian Dios mochi len yes hual anmitzpanus, pampa inon yes cuali pa amhuanten. Xiclaflanican chicahuac huan xicsehuican, yoje xiclamachiltican Dios len monequi pa anquipias.

<sup>7</sup> Huan anquipias mosehuilisli pa anmoyolo hual Dios anmitzmacas. Amo huil ticmatilo quinami Dios techlalilía imosehuilisli pa toyolo. Ma yoje, anmitzquixtilía mochi hual anmitzmajtía, anmitztilijtica anmoyolo huan mochi hual anquijtuc laijtic pa anmoyolo pa yojque ancayas se san ca Cristo Jesús.

### *Xiquijnamiquican len unca cuali*

<sup>8</sup> Axcán nocnían, jan in mocahua pa annimitzilis: Len yes hual unca neli huan len yes hual monotza pa quilasojlasi lacames huan len yes hual unca melahuac, huan len yes hual unca chipahuac, huan len yes hual unca cualtichin huan len yes hual moxtin quijtulo unca cuali, quema, sinda anquimati len yes hual unca niman cuali huan sinda anquimati len yes hual monotza pa lacames laquetzasi hué inahuac inon, cuaquín xiquijnamiquican mochi inon pa anmitzpalehuis pa anyulis cuali.

<sup>9</sup> Anmonextilic míac pan nopampa nehual, anquinmanac míac pan nopampa, anquicaquic míac pan nopampa huan anquimati míac pan nopampa. Pampín, xiyulican xicchijtican yoje quinami annimitznextilic. Huan cayas ca amhuanten Dios hual techmaca mosehuilisli pa toyolo.

### *In laneltocanjmes de Filipos quimacaje míac Pablo*

<sup>10</sup> In Tata nechmacac niman míac paquilisli pampa oc sejpa anpehuac anquijtuc laijtic pa anmoyolo quinami huil annechpalehuis. Neli, amo



quiman annehchilcahuaya. Ma yoje, amo anmitzajsiaya tonali capa huil annehcpalehuisquiaya.

<sup>11</sup> Amo annimitzilijtica inon pampa monequi pa nicpías len. In unca pampa nimonextilic pa nimocahuas ca paquilisli ca len yes nicpía o amo nicpía.

<sup>12</sup> Nicmati niyuli ca paquilisli, sinda nicpía nadita, huan sinda amo nicpía nindeno. Huan nicmati niyuli ca paquilisli sinda nicpía míac. Sinda nicpía miactzindi o nadita, nicpía paquilisli. Quema, mochi tonali quijquiman huan cajcapa nimoitac, nimonextilic len Dios san quipíac pa nechnextilis. Nicmati nipachihuía huan nicmati nimayana. Nicmati nicpía míac huan nicmati amo nicpía míac.

<sup>13</sup> Huil nicchía mochi hual Dios nechmaca pa nicchías, huan nicchía pan ipampa Cristo hual nejchicahualtía.

<sup>14</sup> Ma yoje, ma annimitzili niquta niman cuali inon hual annejchihuilic quiman ca nehual ancanaya len lacocotlisli quinami nipanuya. Huan annehcpalehuic ca in hual monequiaya pa nicpíasquiaya.

<sup>15</sup> Amhuanten pa Filipos noje anquimati quinami pan tonali hual nipehuac annimitzilic in lamachiltisli cuali huan cuaquinon pan tonali hual niquisac pin lalticpan Macedonia, amo cataya se ca inminlanechiculisli Cristo ilacames hual quichihuaje se lajtulisli pa nechmacatilosquiaya inon calica nimolacualtis. Ca in lajtulisli, nechmacalosquiaya len monequi pa nimolacualtisquiaya huan yehuanten Dios quinmacasquiaya in cuali hual quipía pa yehuanten. Jan amhuanten pa Filipos san anquichíac se lajtulisli pa annehcpalehuis.

<sup>16</sup> Yoje, quiman nicataya pin caltilan Tesalónica, amhuanten annehchilanilic len pa nimolacualtis sejpa huan oc sejpa.

<sup>17</sup> Amo annimitzilijtica inon pampa nictemujtica pa annehchilanilic oc sejpa huan oc sejpa. Jan nictemúa quinami huil momiactitías in cuajcuali hual anquichía anquiteguipanuilijtica Dios. Yihual moijnamiquiltis ca mochi huan annijchihuilis niman cuali.

<sup>18</sup> Huan nicanac mochi hual annehchilanilic, quema, axcan nicpía míac hual monequiaya pa nicpías. Axcan tentica capa nicajcoquía mochi hual annehchilanilic, pampa nicanac in hual annehchilanilic ca Epafrodito. Pa Dios in unca quinami se huendi hualajuíac. Nicnequi niqijtúa, inon hual annejchihuilic neli unca se huendi pa Dios hual yihual quixtocas quipías, mocahua ca paquilisli ca inon.

<sup>19</sup> Huan noDios anmitzmacas mochi hual monequi pa anquipías pan ipampa Cristo Jesús. Yoje, quinami amo quiman lamis in míac cuali hual Dios quipía, jan yoje amo lamis anmitzmacas. Yoje unca quinami yihual quichía mochi ca ilahueliltilisli hué.

<sup>20</sup> Ma toTajtzin Dios quipía pa mochi tonalijmes mochi tolasojlalisli huan ma quincaqui mochi tolajtomes huejué huan cuajcualtichin pa yihual. Yoje ma ye.

### *Lami iamal ca lapialtisli*

<sup>21</sup> Xiquinchicahuacan moxtin yehuanten ilacames Cristo. Xiquinchicahuacan yoje quinami monequi anquinchicahuas yehuanten hual iyaxca Cristo. Tocnán hual nican cate ca nehual annijchicahualo.

<sup>22</sup> Annijchicahualo moxtin in oc sequin ilacames Cristo. Ca yehuanten annijchicahualo niman míac ilacames Cristo hual chantilo pa ichan César ihué in lali Roma.



<sup>23</sup> Ma caya ca amhuanten anmoyolo in cuali hual san huil anmijchihuilía toTata Jesucristo. Yoje ma ye.

## In amal hual quinmijcuiluilic Pablo in laneltocanjmes hual cataloaya pa colosas, in Colosenses

### *Pablo quinmijcuiluilía in laneltocanjmes pa Colosas*

<sup>1</sup> Nehual Pablo niunca se ilanahuatini Cristo Jesús pampa yojque nechlaj-tultic Dios. Nehual huan tocní Timoteo antimijchicahualo.

<sup>2</sup> Annimitzjcuiluilijtica amhuanten Dios ixolomes hual anquite-quipanuilía nepa pa anmocaltilan Colosas, amhuanten hual amo anmocahua pa anquineltocas Cristo. Ma Dios toTajtzin anmitzmaca ilachihualisli cuali huan imosehulisli pa anmoyolo.

### *Pablo quilajlanía Dios pa in laneltocanjmes*

<sup>3</sup> Amo timocahualo pa ticsehuisi Dios pampa amhuanten anunca tocnían. Dios yihual iTajtzin toTata Cristo Jesús. Ticsehulo quiman yes ticlajlanilo yihual.

<sup>4</sup> Unca pampa ticmatije quinami niman míac anquineltoca Cristo Jesús. Huan ticsehulo pampa ticmatije quinami niman míac anquinlasojla moxtin yehuanten hual cate Dios ixolomes hual quitequipanuילו.

<sup>5</sup> Anquineltoca Cristo Jesús huan anquinlasojla Dios ixolomes pampa anmochixtica pa in tonali quiman anquipias ca yehuanten in hual Dios anmitzpilía pin cielo (ilhuicac) pa anmitzmacas. Anquimatic inon pa innojen tonaljmes quiman anquicaquic Dios ilajtol melahuac hual unca ilamachiltisli cuali.

<sup>6</sup> In lamachiltisli cuali ajsic capa amhuanten, huan yoje pejtica momachiltía pa mochi in lalticpan. Momiactitalo in lacames hual pejtcate yulilo quinami Dios quinequi. Quema, momiactitalo in lacames hual quineltoacicate in lamachiltisli cuali. Unca jan quinami noje panujtica ca amhuanten quiman anquicaquic Dios ilajtol. Umpa anpehuaya anquimati quinami neli Dios quinchihuilía cuali lacames. Huan Dios ilachihualisli cuali unca quinami quinpupjuhua inminlajlaculisli.

<sup>7</sup> Quema, Dios tejchihuilía icuali jan quinami anmitznextilic Epafras hual yihual ticequilo míac. Ca yihual ticequipanuילו Cristo. Ticmatilo quinami cuali tequipanúa Epafras, ticmatilo yihual neli quitequipanuιλijtia cuali Cristo.

<sup>8</sup> Noje yihual techmachiltic quinami anlalasoja mochi sejse ca amhuan-ten, pampa laijtic pa anmoyolo anquipía in Espíritu Santo hual anmitzlaso-jlaltía.

<sup>9</sup> Huan pampa inon, pa in tonali hual ticmatije inon anmonahuac amhuan-ten, yoje tipehualoaya ticlajlanilo Dios huan ticlajlanilo míac mojmosta pa anquimatis mochi hual len quinequi pa anquichías. Ticlajlanilo ca míac lajlanilisli pa anquimatis inon ca in lajmatilisli hual ticpialo tehuanten huan amhuanten pan ipampa toyolo. Huan ticlajlanilo pa anquimatis len quinequi quijtúa mochi pan ipampa in lajmatilisli pa anmoyolo.

<sup>10</sup> Pampín anquimatis anyulis anlanextilijtica pampa anunca lacames hual toTata Cristo huelitijtica pa anmoyolo. Quema, yojque anyulis an-quipaquiltitica toTata ca mochi hual anquichía. Pa anquipaquiltis Dios,

anyulis anquichijtica mochi hual unca cuali. Yojque anyajtías anquimaztica len quinequi Dios pa anquichías.

<sup>11</sup> Huan pa anquichías inon, Dios anmitzhueliltis ca mochi ilahuelilitisli, pampa yihual quipía mochi lahuelilitisli. Yojque ca ilahuelilitisli hual yihual Dios anmitzmaca, amhuanten huil anmopepenialtía mochi amo cuali, amo anquinctica anmolacuepilis sinda anmijchihuילו len amo cuali. Huan yojque ca Dios ilahuelilitisli anquipías paquilisli, mas que anmitzpanus len amo cuali.

<sup>12</sup> Ticlajlanilo Dios pa anyulis mochi tonalijmes anquisejtica toTajtzin hual unca pin cielo. Unca toTajtzin hual tejchíac pa ticayasi lachijchihuali pa ticanasi mochi icuali Dios hual huelitijtica capa tehuanten. In cuali cayas inmínyaxca mochi ixolomes Dios. Capa Dios huelitía unca quinami mochi unca lahuilisli, pampa ticmatilo pa toyolo mochi hual unca melahuac.

<sup>13</sup> Techquixtic toTajtzin pin polehuilisli capa huelitiaya Satanás. Pan ipampa in laijlaculisli, mochi unca laticumac capa quipía Satanás in lahuelilitisli. Techijcuanic Dios pa camo ticayasi nepa, huan techlalic capa huelitijtica iXolol hual toTajtzin quilasoja mías.

<sup>14</sup> Yehuanten quimictije Dios iXolol huan quisac iesli. Unca quinami techcuhuac ca iesli. Yoje techijcuanilía tolaijlaculisli, huan yojque techquixtic pin ilahuelilitisli Satanás. Axcan tolaijlaculisli unca lapujpuhuali.

### *Unca mosehuilisli pa toyolo pan ipampa quinami Cristo miquic*

<sup>15</sup> Amaqui huil quita Dios huan amaqui huil quiximati. Ma yoje technextilic Cristo jan quinami unca Dios, pampa yihual unca quinami Dios. Huan Dios hual unca Cristo iTajtzin quimacac Cristo pa yes iyaxca Cristo pa huelitis pa mochi hual quichíac.

<sup>16</sup> Pan ipampa Cristo Dios quinchíac mochi hual unca pin cielo (ilhuicac) huan pin laticpan. Quinchíac len huil tiquitalo huan len amo huil tiquitalo. Quema, quinchíac mochi hual quipialo lahuelilitisli huan in iyecames hual mochihuanijme amo cuajcuali hual huelitilo yoje huan yoje ca mías ojlimes hual amo moitalo. Mochi innojen quinchíac yihual Cristo pa cayalosquiaya pa yihual. Cristo quinpías pa yehuanten quichihuilisli len quinequi, huan pa yehuanten lanextilisli quinami yihual unca hué.

<sup>17</sup> Huan Cristo yultataya quiman ayamo yec lachihuali nindeno. Yihual quinchihuilia pa camo moca huasi pa yesi mochi innojen hual quinchíac.

<sup>18</sup> Cristo huelitía capa yehuanten hual quineltoalo, jan quinami se itzontecon huelitía pa se icuerpo. Huan yihual in niman hué ca mochi hual huelitilo. Unca iyaxca pa huelitis pa mochi, pampa yihual quipehualtic mochi. Yihual unca in niman hué ca yehuanten hual miquije huan cuaquín yulije oc sejpá. Yojque unca yihual in niman hué ca mochi.

<sup>19</sup> Unca pampa Dios iTajtzin quitac cuali pa yihual iXolol Jesucristo yesquiaya quinami yihual huan pa quipiasquiaya mochi lahuelilitisli quinami yihual.

<sup>20</sup> Quema, Dios quitac cuali pa iXolol Jesucristo quichiasquiaya pa yelosquiaya ca mosehuilisli ca Dios mochi hual cate pin laticpan huan pin cielo. Inon quinequi quijtúa pampa quitac cuali Dios pa iXolol quichiasquiaya pa lacames huan mochi hual cate pin laticpan yajmo yesi Dios ilacocolinjmes. Huan pampa miquic Cristo pin cuahuil huan quisac iesli, yoje quinchihuilic in mosehuilisli.

<sup>21</sup> Huan nepa pa yina huan axan amhuanten amo anquinequini anquiximati Dios. Anquijituni pa anmoyolo quinami Dios ilacocolinjmes pampa amo anmocaajtiahuiaya pa anquichías len niman amo cuali.

<sup>22</sup> Ma yoje, axcan anmijchihuilic Cristo pa anyesquiaya ca mosehuilisi ca yihual. Yoique anmijchihuilic nepa quiman miquic. Huan axan anunca ca mosehuilisi ca yihual. Yoje yajmo anmitzitas laijlaculi mas que anquichíac amo cuali. Axan huil anquitequipanuilía yihual san. Huan anmitzitas quinami lacames hual amaqui huil anmitzmotexpahuilis ca nindenno huan yoje huil anmitztlalis ilaixpan Dios.

<sup>23</sup> In nicmati pampa anyultía anquineltocatica Cristo. Huan sinda amo anmocaahuas pa anquipías mochi anmolaneltocalisli ca yihual, amo anmijcuanis pa iojli Cristo. Nepa anquichixtías in tonali quiman anquipías mochi hual len Dios neli anmitzmacas. Yoje techilía Dios ilamachiltisli cuali hual anquicaquic. In yec lamachilti ca moxtin hual cate pin lalticpan. Huan nehual Pablo nilapalehuía niclamachiltitica inon pampa nechmaca Dios in tequipanulisli.

*Dios quilajtultic Pablo pa quinqtequipanulis in laneltocanjmes capa yes moitililo*

<sup>24</sup> Axan nipanujtica lacocoltilisli pa amhuanten. Pampa in, nicpixtica paquilisli, pampa nipanujtica len lacocoltilisli pan nocuerpo calica niclantía ca in lacocoltilisli hual panuc Cristo pa in laneltocanjmes, yehuanten hual quineltocalo Cristo. Yehuanten cate quinami Cristo icuerpo nican pan lalticpan.

<sup>25</sup> Nehual niquinqtequipanuilía yehuanten in laneltocanjmes pampa nechlajtultic Dios pa yoique nitequipanus pa annimitzpalehuis. Quema, Dios nechlajtultic pa annimitzlamachiltis mochi ilajtol.

<sup>26</sup> Pan tonalijmes mochi pa yina huan in tonalijmes hual ajsitihualaloaya pa axan, Dios amo lamacahuiltiaya pa quimatilosquiaya lacames in hual quipiaya lalatali. Axan unca tolaixpan tehuanten hual ticate ilacames.

<sup>27</sup> Quinnextilijtica inon pampa quinequiaya pa quimatilosquiaya ixolomes quinami unca niman hué huan cualtichin inon hual quipiaya lalatali. Axan Dios quinnextilijtica yehuanten hual amo judíos. Huan inon hual Dios quinnextilijtica unca pampa Cristo yuli laijtic pa amhuanten. Pampa in, anquichixtica pa ajsis in tonali quiman ticpiasi ca yihual mochi in lahueliltisli cualtichin hual yihual quipía pa tejxiluilis.

<sup>28</sup> Mojmosta tilanahuatijticate ca ilajtol Cristo. Tiquinmilijticate moxtin pa lacaquisi pa quimatisi len unca in polehuilisi hual quinpanus yehuanten hual amo quineltocalo. Tiquinnextilijticate mochi seje pa monextilisi niman cuali Cristo ilajtol, pa yoje tiquinlalisi moxtin ilaixpan Dios pa yihual quinmitas jan cuali san, pampa cate ca se lajtulisli ca Cristo.

<sup>29</sup> Huan pa yoje Dios quinmitas jan cuali san yehuanten, nitequipanúa niman chicahuac. Nimotolintica ca mochi ichichahualisli Cristo calica nechtequipanultía ca ilahueliltisli.

## 2

<sup>1</sup> Niquijtúa inon pampa nicnequi pa anquimatis quinami míac nimotolinía niclajlantica Dios pa amhuanten huan yehuanten in laneltocanjmes pin caltilan Laodicea, moxtin hual amo quiman nechitaje pa nechiximatilosquiaya.

<sup>2</sup> Nimotolinía niclajlantica Dios pampa nicnequi pa quipiasi lanequilisli pa quineltocatiasi. Huan quipiasi in lanequilisli sinda cayasi ca jan se lajtulisli.

Yehuanten cayasi jan se sinda molasojlasi pa neli quimatisi mojmosta oc se nadita pa inminyolo len quinequi quijtúa Dios ilajtol. Ma molasojlacan pa yoje quimatisi len quinejquijtu mochi. Yojque quimatisi inon hual Dios amo quimacahuilitiaya pa ticmatilosquiaya niman pa yina huan pa mochi xixihuimes hual ajsitihualaloaya pa axan. Axan Dios techmachiltía. Huan techmachiltía pa ticmatisi Cristo ilamachilitlisli cuali calica tiquiximatilo.

<sup>3</sup> Mochi hual monotza pa ticmatisi unca lalatilí ca Cristo. Yihual quipía la'ajcoquili capa yihual.

<sup>4</sup> Inon annimitzilijtica pa amaqui anmitzcuajcuamanas ca lajtomes cua-jcualtichin hual anmitzyamanilisi anmoyolo pa anquineltocas se lamaxtilisli hual islacati.

<sup>5</sup> Mas que amo niunca nehual umpa ca amhuanten, ma yoje pa noyolo unca jan quinami nicataya umpa. Nicpixtica paquillisli pampa niquita quinami amhuanten anyuli yoje quinami quixtoca Dios. Huan amo anmocahua pa anquineltocas Cristo ca míac chichualisli.

<sup>6</sup> Pampa in, xiyultiacan anquineltocatía Cristo Jesús toTata jan quinami anpehuac anquineltocac pa innojen tonalijmes hual anpehuac anquicaquic ilajtol.

<sup>7</sup> Xicchihuacan yoje, pampa anmonextilic cuali ilamaxtilisli huan anmonextilijtía mojmosta oc se tipichin. Huan mojmosta anquineltoca chichahuac ilamaxtilisli. Xicchihuacan yojque pampa yojque anmitzmaxtic Epafras. Quema, xicmatican niman cuali Cristo ilamaxtilisli huan xicsehuican míac Dios.

### *In yulillisli yancuic hual unca pan ipampa Cristo*

<sup>8</sup> Ximoitilican pa camo anmitzlaneltocaltis se ilamaxtilisli hual nesi cuali huan ma yoje amo unca cuali. Se lamaxtilisli quinami inon amo huil anmitzmaca mindeno cuali pa anmoyolo. Sinda lacames quineltocalo, cuaquin mocuajcuamanalo. Se lamaxtilisli quinami inon unca jan in hual quimaxtilo lacames san. Unca in lamaxtilisli hual quijtulo laijtc pa inminyolo. San quipía nadita ilamaxtilisli Dios huan míac oc se lamaxtilisli hual unca jan ilamaxtilisli in lalticpan san huan amo unca ilamaxtilisli Cristo.

<sup>9</sup> Ximoitilican pa camo anquineltocas se lamaxtilisli hual amo iyaxca Cristo, pampa Cristo quipía mochi hual unca Dios chantitica umpa laijtic icuerpo.

<sup>10</sup> Yoje, antentica ca iyulillisli Cristo. Anquipía mochi hual monequi pa anyulis ca yihual hual huelitía pa mochi in ijyecames hual quipialo lahuelfitlisli.

<sup>11</sup> Anpehuac anquineltocac Cristo huan yoje anmochíac Dios ixolomes pampa Cristo quilalic se lanextilisli pa anmoyolo, jan quinami in judíos mochihualo Dios ilacames quiman quitequilo nadita icuilaxli quinami lanextilisli. Ma yoje, in lanextilisli hual anquipía amo anmijchihuilije lacames ca inminmajmajuan. Cristo anmijchihuiliic pa anyes Dios ixolomes pan ipampa in lanextilisli. Yojque anmitzhuelilitic pa yajmo anyulis anquichijtica innojen amo cuajcuali hual anmoyolo amo mocahuaya pa quichihualtis anmocuerpo.

<sup>12</sup> In tonali hual ancataya lacuayatequili ca in lanextilisli pa anmoyolo unca quinami ancataya lalalpachuli ca Cristo huan cuaquin anyulic oc sejpa ca yihual. Mas que Cristo miquic, quiyulilitic Dios ca ichichualisli. Huan pampa anquimatic inon, yihual anmitzyulilitic yoje ca ichichualisli.

<sup>13</sup> Huan yojque amhuanten anmiquic pa anmoyolo pampa anquichíac laijlaculisli huan amo anyec lacames hual quitocaje Dios. Amo anquipiaya

Cristo ilanextilisli pa anmoyolo. Ma yoje, Dios anmitzylultic yoje yancuic ca Cristo, quipujpuhuac mochi in amo cuali hual ticchiuaje.

14 Yoje, Dios amo techcahua pa timopolusi pampa amo ticneltocaje len quijtúa ilajtol. Unca quinami yihual quijcuanic in amo cuali hual cataya lajcuiluli hual techmotexpahuiliaya tehuanten. In lajcuilulisli quitequihuiaya pa timiquisi. Ma yoje, cataya Cristo hual miquic, amo tehuanten. Unca quinami cataya lasaluli pin cuahuil in lajcuilulisli hual techmotexpahuiliaya tehuanten, jan quinami quisaluje Cristo pin cuahuil. Axcan in lajcuilulisli yajmo huil techmotexpahuilía.

15 Yoique quinquixtilic Cristo in iyjecames amo cuajcuali inminlahueliltlisli calica huelitiloaya. Yihual lanextilic inminlaixpan moxtin pampa yehuante neli amo quipialo lahueliltlisli pa techilisli len ticpialo pa ticchiuasi. Inon quichiac pampa quinsulahuac pa in tonali hual miquic pin cuahuil.

*Xictemucan quinami anquipías innojen hual cate pin cielo (ilhuicac) pa tehuanten*

16 Yoje, amo xicneltocacan amaqui hual anmitzmotexpahuilía pampa anquicua len yes lacuali huan ancuni len yes pa cunis se. Huan amo xicneltocacan sinda anmitzmotexpahuilía pampa amo anquichía fiesta (ilhuil) pan calía yes tonali, quinami in layúa hual nesi in mesli yancuic, huan in tonali hual mosehuilo in judíos.

17 Amo monequi pa anquineltocas in lajtomes pampa quiman Dios quimilic yehuante pa yina pa camo quicuasi len lacuali, huan pa quichihuasi fiesta (ilhuil) pan se tonali o oc se tonali, san cataya pampa yihual quinmaxtiaya nadita quinami Cristo yahuiaya tejchiphuili tolaijlaculisli pin tonalijmes hual yahuiaya caya pan lalticpan. Unca quinami ilasehuán (ilasehuayan) se quinextilía nadita quinami nesi in se. Huan jan yoje Dios ilajtol pa yina quinextiliaya ca se lanextilisli hual amo huil tiquitaloaya niman cuali. Quinextiliaya len Cristo yahuiaya tejchihuili quiman hualac.

18 Amo ximomacahuiltican pa anmitzilis se pampa amo unca anmoyaxca pa anquimolancuacuetzilía Dios pampa anunca tijtipichin, huan yoique, quil, monequi pa anquimolancuacuetzilis Dios pan inminpampa ilanahuatinijmes pin cielo (ilhuicac). Se hual anmitzilis inon anmijchihuilis pa camo ancanas inon hual Dios quipía pa anmitzmacas. In se quijtúa pampa monextilic innojen ilamaxtilisli pan ipampa len quitemiquic, moita in se quinami se hué. Ma yoje, amo cataya Dios hual quilic in hual anmitzilía in se. Jan anmitzilía in hual yihual ihuan quijtuc lajtuc pa iyolo.

19 Se quinami in lalac o sihual amo quitocatica Cristo. Yihual Cristo tiquijtulo unca quinami itzontecon in cuerpo huan in cuerpo unca quinami moxtin hual quinelocalo. Pampín mochi in cuerpo moscaltis hué pan ipampa ichicahualisli Dios sinda mochías ca se lajtulisli ca Cristo hual unca itzontecon in cuerpo. Se ilajlajco icuerpo salijtcate ca ilapantilisli. Huan ilalhuames canal mochi hual monequi pa quipías pan ipampa itzontecon. Huan pa inminyolo in laneltocanijmes yoje canal mochi hual Dios quinequi pa quipiasí. Cristo inmintzontecon quínmaca.

20 Axan anquimati Cristo miquic. Amhuante anquineltoca, huan pampa in, unca quinami anmiquic amhuante ca yihual. Yoje, amo anquipías pa anquichías nindeno hual lacames quijtulo pampa monequi pa quichías se pa yoje quipaquiltis Dios. Axan amo anyultica quinami yehuante pin lalticpan

quijtulo monequi pa yulis se. Amo xiquinneltocacan in lajtomes hual quichi-hualo lacames hual quijtulo quinami monequi pa ticmolancuacuetzilisi Dios.

<sup>21</sup> Nican unca se lanextilisi hual quijtulo: “Sinda se yulisquiaya quinami Dios quinequi pa yulis, cuaquín amo huil quimatoca in, amo huil quilalía in pa inejnepil, amo huil cana in ca imajmajuan.”

<sup>22</sup> Mochi innojen Dios quinchíac pa yoje huil ticchihuasi totequipanulisi huan pa tiquincuasi huan cuaquinon lamilo, yajmo monotzalo len. Amo xiquinneltocacan lajtomes quinami innojen hual amo lapalehuilo nindeno pa se quimolancuacuetzilisi Dios.

<sup>23</sup> Yehuanten hual quinneltocalo lajtomes quinami innojen nesilo quinami lacames hual quimatilo niman cuali quinami Dios quinequi pa tiyulisi. Quijtulo sinda yoje mochihualtilo pa quimolancuacuetzilisi míac, Dios quijts pampa yehuanten niman hué huan oc sequin amo yoje hué. Quijtulo pampa yoje huil quimati se quinami mochias tipichin ilaixpan Dios. Quijtulo sinda se quinneltoca in lajtomes, quicocoltilo icuerpo huan yoje quipaquiltía Dios, huan inon amo unca neli. No, in lajtomes amo monotzalo nindeno, amo quitzacuilía toyolo pa camo quichihualtis tocuerpo in amo cuali hual mojmosta quinectica quichía.

### 3

<sup>1</sup> Cuaquinon, anquimati Dios anmitzyulitic pa anmoyolo ca yulilisi yancuic jan quinami quiyuliltic Cristo. Pampa in, xictemucan pa anquimatis in hual Dios quinequi pa anquimatis, hual unca quinami huelitía. Dios axan quipía Cristo quinami molalijtica pa ima cuali. Yoje lanextilijtica pampa moxtin quipialo pa quimolancuacuetzilisi Cristo jan quinami quimolancuacuetzililo Dios.

<sup>2</sup> Xiquijnamictiacan inahuac len unca pin cielo (ilhuicac), amo xiquijnamictiacan inahuac len unca pin lalticpan.

<sup>3</sup> Ni quijtúa inon pampa anmocahuac pa anyulisquiaya quinami anyulini pa innojen tonalijmes hual ayamo anquineltocaya Cristo. Axan lamic in yulilisi. Ma yoje anquipía yulilisi axan hual inahuac inon ayamo anquimati mochi. Unca jan quinami tehuanten ayamo ticmatilo mochi hual inahuac Cristo, mas que amhuanten anyultica ca Cristo capa unca Dios. Axcán, amo lamis anmoyulilisi, unca quinami len hual unca lalatili.

<sup>4</sup> Ma yoje, pan tonali hual nesis Cristo hual techyuliltic ca iyulilisi, cuaquinon noje ca yihual annesis capa Dios huelitía ca ilaixpelalisi cualtichin. Cuaquín anyes quinami Cristo.

#### *Toyulilisi hual tiyulinijme pa yina huan toyulilisi yancuic*

<sup>5</sup> Yoje, quinami anquitemujtica pa anquimatis quinami huelitía Dios, xicayacan quinami se mijquil hual yajmo quichía len amo cuali. Ximocahuacan pa anquichías len quichijtilo yehuanten pin lalticpan hual amo quinneltocalo Dios. Amo xiquinmanacan oc sequin sihuames o lacames. Amo xicchihuacan len hual lanextilía pampa anlajtutica amo cuali pa anmoyolo, amo xilajnamiquican yoje. Amo ximomacahuiltican pa len anmitznequiltis pa anquipías len amo unca cuali. Huan amo xiyén (xiyecan) lacames o sihuames hual quinectialo pa quipiasi míac huan míac. Yehuanten hual quichihualo inon cate quinami yehuanten hual quimolancuacuetzililo hual len quinequilo, quinami yesquiaya se dios.

<sup>6</sup> Amo xicchihuacan yoje, pampa Dios neli quintojtocas ilaixpan pa yesi lacocoltili yehuanten hual yulilo amo quineltocate. Quincocoltis pampa quinchihualo innojen.

<sup>7</sup> Amhuanten nojen anyulini anquichijtataya innojen pa yina pan tonalimes hual anyulini quinami yulilo yehuanten hual amo quineltocalo toTata.

<sup>8</sup> Huan axcan, amhuanten ximocahuacan noje pa como anquichías mochi innojen, niquijtúa, yajmo xicualanican, yajmo xicualantiquisacan, yajmo xicnequican xiquinchihuilican oc sequin len amo cuali, yajmo xilahuejuecaltican, yajmo xilajtucan ca lajtomes amo cuajcuali, yajmo xilacocolican ca lajtomes quinami innojen. Ma como quisa pa anmocamac nindeno quinami inon.

<sup>9</sup> Amo xislacatican se ca oc se. No, yajmo xicchihuacan innojen, pampa anmoquixtilic in yulilisi hual pa yina catani lajtic anmoyolo hual anmijchihualtiahuini innojen hual amo cuajcuali.

<sup>10</sup> Huan anmolaquitzaic ca in yulilisi yancuic hual anquipía pa anmoyolo, in yulilisi hual anmijchíac lacames yajyancuic. Dios quichíac in local yancuic huan quichijtía pa anajsis anyes quinami yihual pan ipampa in yulilisi yancuic calica neli anquimaztías yihual.

<sup>11</sup> Sinda quipía se local in yulilisi yancuic, cuaquinon Dios amo moijnamiquía nindeno inahuac quinami cataya, ma ye se hual lacatic pa calía yes lali, ma ye quinami nesi icuilaxli, ma ye da quipía latequili icuilaxli quinami in judíos, o da amo quipía latequili quinami yehuanten hual amo judíos. Dios amo moijnamiquía quinami cataloaya, ma ye quinami quinmitalo oc sequin lacames, sinda quinmitalo huejué o tijtipichin, ma yén (yecan) yehuanten hual amo quimatilo o yehuanten hual quimatilo, ma yén hual yulilo quinami in yulijquimes cuajleros o yulilo pan calimes cuajcaltichin, ma yén tequipanujquimes o inmintecojuan. No, Dios jan moijnamiquía sinda Cristo yultica lajtic pa iyolo se. Dios moijnamiquía jan inahuac Cristo san, unca yihual san hual monotza mochi.

<sup>12</sup> Anmoquixtilic anmoyulilisi hual anmijchihualtiaya amo cuali. Axcan anunca amhuanten hual Dios anmitzljaltultic pa anyes ixolomes. Anmitzljaltultic pa anquitequipanuilis yihual san, huan yihual anmitznequi. Yoje, xiquinmicnilican oc sequin, xiquinchihuilican cuali oc sequin. Xiyecan quinami lacames tijtipichin. Amo xilachihualtican pa oc sequin quichijtiasi quinami amhuanten anquinequi. Amo ximolacuepilican, ximopepenialtican in amo cuali quiman oc sequin anmijchihuililo amo cuali.

<sup>13</sup> Ximotzacuilican pa como anquincocolis oc sequin pampa quichihualo lajlaculisli. Huan xicpujpuhuacan quiman yes se ca amhuanten quita len ca oc se ca amhuanten hual quicualantía. Jan quinami Cristo lapujpuhua, jan yojque xicchihuacan amhuanten noje.

<sup>14</sup> Huan mas que anquichía mochi inon, monequi pa anquijnamiquis ca mochi anmochicahualisli pampa anquipía pa anmochías lacames hual quimatilo lalasojlalo. Ximolasojlalan, pampa yojque anmoxtin anyulis jan ca mosehuilisi ca in oc sequin. Inon lanextilis pampa amhuanten anquimati anyuli jan cuali san.

<sup>15</sup> Xiyulican ca mosehuilisi huelitijtica pa anmoyolo. In mosehuilisi anmitzmaca Dios hual anmitznotzac pa jan yoje anyulisquiaya quinami se cuerpo, mas que anunca míac. Huan xiyén (xiyecan) lacames hual quimatilo yulilo quisejticate Dios.

<sup>16</sup> Ma cajxilti pa mochi anmoyolo Cristo ilamaxtilisi. In anmitzmaca niman míac lajmatilisi pa anquimatis len unca neli huan melahuac. Ma



quinmactican mochi sejse ca míac lajmatilisli. Ximonequiltican pa anmoxmactis ca míac lajmatilisli. Inon huil anquichía pan ipampa salmos hual cate alabanzas laquixtili pa Dios ilajtol pa tiquinlalilisi latzotzonalisli. Noje huil anquichía pan impampa alabanzas huan cantaditas (cuicames) hual anmitzmaca in Espíritu Santo calica anquinmilis lajtomos huejué pa Dios. Xijcantaruilican (xijcuiquilican) Dios anquisejtica pa anmoyolo.

<sup>17</sup> Huan len yes anquijtúa, len yes anquichía, xicchihuacan mochi anquijnamictica pampa yihual huelitijtica pa amhuanten. Pampa inon anquinotzas ca itoca pa yihual cayas ca amhuanten pa anmitzpalehuis. Xicchihuacan yoje anquisejtica Dios toTajtzin. Unca anmoyaxca pa anquichías inon pan ipampa Cristo.

*Monequi pa in laneltocanjmes yulisi quinchijtcate innojen pa inmincaltlan huan pa inminchan*

<sup>18</sup> Amhuanten sihuames xilamacahuiltican pa anmitzlaicanasi anmoluahualhuan. Unca cuali pa yojque anquichías, pampa anunca iyaxca in Tata Jesucristo.

<sup>19</sup> Huan amhuanten inminlahuicalhuan yehuanten, xiquinlasojlacan anmosihuahuan, huan amo xiyén (xiyecan) cualancudos ca yehuanten.

<sup>20</sup> Amhuanten in xolomes xiquinneltocacan anmotajtzitzían huan anmonantzitzían. Yoje anquipaquilía míac in Tata Dios huan yojque anlanextilía quinami anunca Dios ixolomes.

<sup>21</sup> Amhuanten inmintajtzitzían huan inminantzitzían, amo xiquinmajajuatiacan anmoxolomes, pa camo cuajnesi momajtisi o pinahuasi pa quichihuasi len quinchihuilis cuali.

<sup>22</sup> Amhuanten tequipanujquimes anquinpía anmotecojuan nican pin lalticpan. Xicchihuacan mochi hual anmitzilisi pa anquichías. Amo xicchihuacan jan capa anmitzita anquitequipanujtica, quinami jan anquinpaquilíaya lacames san. Xiquinneltocatiacan ca mochi anmoyolo, pa yojque anlanextilía quinami anquipilía lasojlalisli ca toTata.

<sup>23</sup> Huan len yes anquichía, xicchihuacan ca mochi anmoyolo quinami anquitequipanuiljtica in Tata, huan amo jan lacames san.

<sup>24</sup> Yojque xicchihuacan amhuanten, pampa anquimati anyahui ancana mochi hual quipía in Tata pa anmitzmacas. In monequi pa anquichías pampa anquitequipanuilía toTata Cristo.

<sup>25</sup> Yojque xicchihuacan pampa aqui hual quichihuilía len amo cuali, yihual panus lacocoltilisli pampa quichihuilic inon, pampa Dios quita se jan quinami quita oc se, ma ye aqui yes.

## 4

<sup>1</sup> Amhuanten tecojuan, xiquinchihuilican cuali anmotequipanujquimes. Quinami anquichihuilía se, yoje xicchihuilican in oc se. Yoje xicchihuilican, pampa noje anquimati anquipía anmoteco pin cielo.

<sup>2</sup> Amo ximocahuacan pa anquilajlanis Dios. Xiclajlantiacan quiman yes tiquijnamiquía. Huan quiman anquilajlanía, amo xilatzehuican. Xiquijtutiacan pa anmoyolo in hual anquiljtica, huan amo ximocahuacan pa anquisehuis Dios.

<sup>3</sup> Huan quiman yes anquilajlantica, xiclajlanicpan pa tehuanten noje, pa yojque Dios techajxiltis capa huil tiquinlaquetzilisi ilamaxtilisli Cristo. Pa yina Dios ilacames amo quimatinijme cuali len quinequiaya quiytu Dios ilajtol quiman momaxtinijme len quiytuc inahuac Cristo. Axan ticmatilo

tehuanten. Huan axan niunca latzacuali pa calijtic pampa niquinlaquetzili-jitinemiaya ilamachiltisli Cristo.

<sup>4</sup> Ma yoje, nicnequi pa Dios nechpalehuis pa niquinlaquetzilis pa yoje niquinmilis moxtin ilamaxtilisli Cristo ca lajtol calica amo moixpolulo yehuanten hual quicaquilo, quinami monequi pa nicchías. Pampa in, xiclajlanican Dios pa nechpalehuis.

<sup>5</sup> Ma anmitznextili anmolajmatilisli quinami anyulis cuali quiman anunca capa yehuanten hual amo quineltocalo Cristo. Xiquintequipanucan cuali mochi tonalijmes hual Dios anmitzmacas pa anyulis.

<sup>6</sup> Xilajtutican yoje pa anquinmixtocaltis lacames Dios ilajtol. Yoje anyes quinami in istal hual quixtocaltilía se lacuali. Sinda anlajtúa yoje, cuaquinon anquimatis jan quinami monequi pa anquinnanquilis moxtin.

### *Quinchicahua pampa yahui quilamía iamal*

<sup>7</sup> Anmitzilis Tíquico mochi hual nechpanujtica huan quinami niunca. Yihual se tocní hual ticlasojlalo míac, huan ticmatilo quinami yihual huil lapalehuía. Huan yihual titequipanuילו in Tata Jesús.

<sup>8</sup> Annimitztilanilijtica pa yoje yihual quimatis quinami anunca huan len anmitzpanujtica, jan quinami yihual anmitzmachiltis quinami nehual nipanujtica huan yoje ca in anmitzlacahuáltis.

<sup>9</sup> Yasi huan Onésimo hual unca se tocní hual ticlasojlalo, huan ticmatilo yihual amo mocahua pa quitequipanuίlis toTata. Yihual se tocní hual lacatic pa anmocaltilan Colosas. Yehuanten Tíquico huan Onésimo anmitzlamachiltisli mochi hual panujtica nican.

<sup>10</sup> Aristarco anmitzpialtía, ca yihual ticate latzacuali pa calijtic nican. Anmitzpialtía noje Marcos hual unca icni Bernabé, icni pa oc se cali. Anmitztilanilije lajtol pa anquimatis quinami anquichihuίlis Marcos, sinda umpa huala, xicmosehuiltican.

<sup>11</sup> Noje anmitzpialtía Jesús hual noje itoca Justo. In yeyenten cate judíos, quipialo ilanextilisli in latequilisli pa inmincuilaxli. Jan yehuanten san cate in judíos hual ca nehual huan nolajlasojli tequipanujquimes titequipanulo pa ilahuelilitisli Dios. Yehuanten nechlacahuáltilo míac.

<sup>12</sup> Anmitzpialtía Epafras, yihual lacatic pa anmolali huan quitequipanuίlía Jesucristo. Yihual quilajlantía Dios míac ca mochi iyolo, pa yoje amo quiman anmocahuas pa anyulis anquineltocatica Cristo, quinami lacames hual moscaltije ca lajmatilisli. Yoje quimatilo cuali mochi in hual quinequi Dios pa quichihuasi.

<sup>13</sup> Inon niquijtúa inahuac Epafras pampa annimitzilía neli yihual tequipanúa niman míac pa amhuanten huan pa yehuanten hual quineltocalo Cristo pin caltilan Laodicea huan pin caltilan Hierapolis.

<sup>14</sup> Anmitzpialtía Lucas, yihual in lapajtini hual ticlasojlalo, noje anmitzpialtía Demas.

<sup>15</sup> Xiquinpialtican tocnían hual quineltocalo Cristo hual cate pa Laodicea. Xiquinpialtican Nifas huan yehuanten hual quineltocalo hual monchiculo pa ichan pa quimolancuacuetzilisli Dios.

<sup>16</sup> Huan quiman anlamic anquinmomaxtilic in amal anmoyampa anmoxtin, cuaquinon xiclajtultican se pa yihual quinmomaxtilis in amal inminyampa yehuanten pa Laodicea hual quineltocalo toTata. Huan amhuanten jan yoje ximomaxtilican in amal hual niquintilanilic yehuanten pa Laodicea.

<sup>17</sup> Huan xiquilican Arquivo pa moiztías pa lamis quichías mochi in tequipanuίlisli hual quimacac in Tata pa quichías.

<sup>18</sup> Nehual niPablo annimitzpialtitica annimitzijcuiluilijtica nican ca nehual nomajma. Yoje anquimatis pampa mochi in amal unca hual annimitztilanilijtica. Xiquijnamiquican quinami nehual niunca latzacuali pin calijtic. Ma caya ca amhuanten in cuali hual san Dios huil anmijchihuilía. Yoje ma ye.

## In amal calica Pablo in lanahuatini quipehualtic ilajcuilulisi pa in laneltocaniymes pa Tesalónica

### *Quimpialtía Pablo*

<sup>1</sup> Tehuanten Pablo huan Silvano huan Timoteo antimitzizcuilulilo amhuanten in laneltocaniymes hual anmonechicúa pin caltilan Tesalónica, amhuanten hual anquineltoaca Dios toTajtzin huan in Tata Jesucristo. Ma Dios anmitzmaca ilachihualisli cuali hual amo quiman lami, ilachihualisli cuali hual amo timonotzalo pa ticpiasqui. Huan ma anmitzmaca mochi hual unca cuali pa amhuanten axcan huan pa mochi tonaliymes hual ancayas ca imosehuilisi pa anmoyolo.

*Oc sequin lajtulo hué inahuac quinami quineltocalo Cristo yehuanten pa Tesalónica*

<sup>2</sup> Amo timocahualo pa ticsehuisi Dios pa amhuanten anmoxtin. Quema, antimitziznamiquilo quiman yes ticlajlanilo Dios.

<sup>3</sup> Amo quiman timocahualo pa tiqijnamiquisi quinami anquinextilía quinami niman cuali anquineltoaca Cristo pan ipampa anmotequipanulisli. Amo timocahualo pa tiqijnamiquisi quinami antequipanúa míac huan pampín ansiahui míac. Inon anquichía pampa anquinlasojla míac in oc sequin. Huan amo timocahualo pa tiqijnamiquisi quinami amo anmocahua pa anquichías in tonali hual mocuepas toTata Jesucristo pa anmitzanas. Inon anquichía pampa anquixitca laneltocalisli ilaixpan Dios toTajtzin.

<sup>4</sup> Amhuanten anunca tocnian hual Dios amo mocahua pa anmitzlasojlas. Huan ticmatilo pampa yihual anmijchipahuilic anmoyolo pa anyes san ixolomes yihual.

<sup>5</sup> Inon ticmatilo, pampa tolamachiltisli cuali amo antimitzlamachiltije ca lajtol san. No, quiman antimitzlamachiltije, nepa cataya in Espíritu Santo pa anmitznextilis Dios iojli. Huan in Espíritu Santo neli techmachiltic pampa yihual cataya nepa tequipanujtataya ca ilahueliltisli. Huan ticmatiloaya neli pampa tolajtomes yeje melahuac. Inon ticmatilo, jan quinami amhuanten anquimati len pa lacames timonextililoaya anmolaijpan, pa antimijchihuililosquiaya cuali.

<sup>6</sup> Huan amhuanten anpehuaya anquinchihuili cuali oc sequin quinami tehuanten tiquinchihuililoaya huan quinami quinchihuilini in Tata Jesús. Quema, ancanac Dios ilajtol huan pampín anmijchihuilije innojen lacames nepa míac hual cataya amo cuali. Ma yoje, anmocahuac ca paquilisi ca in hual anmitzmacac in Espíritu Santo.

<sup>7</sup> Huan yoje anmochiác laneltocaniymes cuajcuali. Pampín moxtin in oc sequin laneltocaniymes pin lalticpan Macedonia huan pin lalticpan Acaya quinequiloaya mochihualo quinami amhuanten.

<sup>8</sup> Inon unca pampa niman míac mocaqui ilajtol in Tata capa anunca. Mocaqui pan ipampa quinami anyultica. Pampín amo yehuanten san pa Macedonia huan Acaya momachiltije inahuac inon. Noje laquetzalo moilijiticate quinami anquineltoaca Jesucristo pa mochi in oc sequin lalimes. Pampín amo monequi pa antimitzilisi nindeno, pampa anquimati anquineltoaca cuali.

<sup>9</sup> Unca pampa yehuanten techmachtililo len panuc quiman tpehualoaya antimitzlamachtililo in lamachtilisli cuali pa in tonalijmes hual antimitzpaxaluililoaya. Techmachtililo quinami anmocahuac pa anquinmolan-cuacuetzilisquiaya in monos huan anpehuac anquitequipanuulic in Dios hual yultica, yihual in Dios hual neli unca.

<sup>10</sup> Noje techmachtililo quinami amo anmocahua pa anquichixtías mojmosta Dios iXolol hual yahui huala quistica pin cielo (ilhuicac). Yihual miquic huan Dios quiyuliltic oc sejpa. Quema, yihual Jesús hual techquixtilis pin ipolehuilisli icualanilisli Dios. Inon icualanilisli calica yihual quincoltis yehuanten pin lalticpan pan tonali hual yihual hualas.

## 2

<sup>1</sup> Amhuanten neli anquimati, tocnán, pampa in tonalijmes hual antimitzpaxaluilije, amo jan lapic (de in balde) cataya.

<sup>2</sup> Quinami anquimati, mas que tilamije tipanuje lacocoltisli nepa quiman ticataloaya pin caltilan Filipos capa tejchiuilic len niman amo cuali, ma yoje, Dios techpalehuic pa como timomajtisi. Ticmatiloaya yihual techpalehuisquiaya pa antimitzzililosquiaya ilamachtilisli cuali. Huan cataloaya míac hual motoliniloaya pa tejtzacuililosquiaya pa como antimitzzililosquiaya in lamachtilisli cuali.

<sup>3</sup> Neli cataya pampa quiman antimitzzililoaya tolajtol pa antimitzlanelto-caltisi, amo timoixpoluloaya ca nindeno hual antimitzzililoaya. Noje amo tiyuliloaya amo cuali. Huan amo ticnequiloaya, no, amo tiquijtuje pa toyolo pa antimitzcayahuualosquiaya.

<sup>4</sup> Jan quinami Dios techitac cuali pa yihual techtilanis pa ticlamachtilisi in lamachtilisli cuali, yojque tilajtulo. Amo tilajtulo pa tiquinpaquiltisi lacames. San ticnequilo ticpaquiltulo Dios hual quimati mochi hual tiquijtulo pa toyolo.

<sup>5</sup> Huan amo quiman antimitzzilije se lajtol calica ticnequiloaya antechixto-caltisquiaya. Inon anquimati. Huan amo antimitzzilije in lamachtilisli cuali pa yoje huil antimitzanilosquiaya len hual anmoyaxca amhuanten, Dios neli quimati inon.

<sup>6</sup> Amo tictemuloaya quinami tiquinchihuililosquiaya pa amhuanten huan oc sequin lacames anquijtusquiaya lajtomes cuajcuali tonahuac tehuanten.

<sup>7</sup> Huan amo antimitzzyantiloaya pa antechlasojlasquiaya mas que unca toyaxca pa antechlasojlas. Quema, inon unca inminyaxca moxtin ilanahu-atinijmes Cristo. Ma yoje, tehuanten timochihualoaya quinami amhuan-ten innojen tonalijmes hual ticataloaya nepa. Antimijchihuililoaya cuali quinami mojmosta quinchihuilía cuali ixolomes inminantzin.

<sup>8</sup> Quema, yoje ticnequiloaya pa ticayasi ca amhuanten. Pampín ticataloaya ca paquilisli pa antimitzzililosquiaya in lamachtilisli cuali. Huan amo in san. Noje ticnequiloaya antimixxiluililo ca mochi toyolo mochi hual ticpialo calica huil antimijchihuililosquiaya cuali. Inon cataya pampa antimitzlaso-jlaloaya niman míac.

<sup>9</sup> Neli unca, nocnán, anquijnamiquía quinami titequipanujtiahuililoaya mojmosta huan lamiaya tochicahualisli. Quema, mojmosta tisiahuiloaya míac. Yihualitonali, pa semilhuil huan pa layúa, titequipanuloaya pa timolacualtilosquiaya. Yojque ticchihualoaya pa como anquipiasquiaya pa antechlualtisquiaya nindeno. Huan pa innojen tonalijmes antimitzmachtililoaya Dios ilamachtilisli cuali.

<sup>10</sup> Amhuanten neli anquimati huan Dios noje neli quimati quinami tilachihualoaya cuali anmolaixpan. Jo quema, tiyuliloaya quinami huil

ticpaquiltiloaya Dios. Mojmosta ticchihualoaya len quijtúa Dios ilajtol. Amo quiman ticchihualoaya nindeno calica huil techmotexpahuילוaya Dios huan lacames.

<sup>11</sup> Huan quinami anquimati inon, ticataloaya ca mochi seje capa amhuan-ten quinami se itajtzin ca ixolomes. Antimijchicahualtitinemiloaya huan antimitzpalejtinemiloaya pa anyulisquiaya quinami Dios quinequi.

<sup>12</sup> Noje antimitzmacaloaya lajtol pa anlachihuasquiaya quinami monequi pa lachihuasi Dios ixolomes, pampa yihual anmitznotzac pa anhuelitis ca yihual huan pa anquipías anmolajco ilaixpelalisli cualtichin.

<sup>13</sup> Innojen tonalijmes hual anquicaquic in lamachiltisli cuali hual unca Dios ilajtol, amo anquineltocac quinami cataya jan inminlajtol lacames san. Anquineltocac quinami cataya ilajtol Dios. Huan neli unca ilajtol Dios. Pampin noje amo timocahualo pa ticsehuisi Dios. Huan in lajtol, tocnían, anmitzneltocaltic Dios.

<sup>14</sup> Unca pampa anmochiác quinami in laneltocanjmes pin lalticpan Judea, yehuanten hual monechiculo nepa pa miác caltilan pa quimolancuacuetzilisi Cristo Jesús. Amhuanen anpanuc lacocoltilisli hual anmijchihuilije yehuanten hual lacatije pa anmolali. Huan in laneltocanjmes de Judea panuje lacocoltilisli hual quinchihuilije yehuanten in judíos hual lacatije pa inminlali huan amo quíneltocalo Cristo.

<sup>15</sup> Quema, in judíos quimictije in Tata Jesús huan quinmictije Dios ilajtunijmes. Huan techtojtocaje pa tejchihuilisli amo cuali. Amo quipaquiltilo Dios, molalilo inminpan moxtin.

<sup>16</sup> In judíos tejtzacuililo pa como tiquinmilisi in lamachiltisli cuali yehuanten hual amo judíos. Amo quinequilo pa yehuanten yesi laquixtili pin ipolehuilisli inminlajlaculisli. Yoje in judíos amo mocahualo pa quichihuasi inminlajlaculisli, quichihualo miác quinami huil, amo quijtulo "Inon san". Axan ajsic pan yehuanten icualanilisli Dios, mas que huejcahuaya quinmasi. Axan quipanusli inminlacocoltilisli.

### *Pablo quinequi quinpaxaluilía oc sejpa yehuanten pa Tesalónica*

<sup>17</sup> Ma yoje, tehuanten, tocnían, nican pa nadita tonalijmes ticataloaya laxiluli pa camo huil antimitzitasi. Timoitaloaya quinami icnomes. Ticataloaya laxiluli pa camo ticayasi ca amhuanen, huan ma yoje, toyolo mojmosta cataya ca amhuanen. Huan timotolinije ca miác chicahualisli pa antimitzpaxaluillosquiaya, pampa ticnequiloaya miác.

<sup>18</sup> Quema, ticnequiloaya tihualalo ca amhuanen, nehual Pablo nicnequiaya nihuala sejpa huan oc sejpa. Ma yoje, tejtzacuilic Satanás.

<sup>19</sup> Huan ¿leca ticnequiloaya tihualalo? Ma antimitzilican leca. Hualas toTata Jesús huan ticayasi iyampa, cuaquinon ¿aquinojen ticchiasi tiquinmitasi? Huan ¿ca aquinojen ticayasi ca niman miác paquilisli? Huan ¿pa aquinojen tiquijtusli lajtomes huejué umpa pampa yesi quinami laxlahuilisli pa tehuanten? Amhuanen anyes.

<sup>20</sup> Quema, tilaixpelasi chicahuac iyampa Jesucristo huan ticayasi ca niman miác paquilisli pampa noje ancayás nepa amhuanen.

## 3

<sup>1</sup> Yojque, ajsic se tonali hual yajmo huil timopepenialtiloaya amo ticmaztataloaya quinami ancataya. Yoje techanac cuali pa tiyelosquiaya lacajcahuali pin caltilan Atenas tohuían.

<sup>2</sup> Nican cataya tocní Timoteo, huan antimitztilanilije. Yihual noje itequipanujquil Dios hual quilamachiltía Cristo ilamachiltisli cuali. Antimitztilanilije pa anmitzitas huan pa anmitzpalehuis anquineltocas Cristo chichahuac. Ticnequiloaya pa yihual anmijchicahualtilisquiaya anmolanel-localisli

<sup>3</sup> huan ticnequiloaya pa camo anmomajtsquiaya pampa anpanujtataya in lacocoltilisli. Timomajtije pampa inon hual anpanujtica cuajnesi anmijchihuilisquiaya pa yajmo anquineltocasquiaya Cristo. Huan amo ticnequiloaya pa inon anmitzpanusquiaya amo jan se ca amhuanten. Amhuanten anquimati pampa timoxtin ticpialo pa tipanusi lacocoltilisli.

<sup>4</sup> Innojen tonalijmes hual ticataloaya ca amhuanten, amo timocahualoaya pa antimitzzililosquiaya pampa amhuanten anyahuaya anpanu lacocoltilisli huan jan yoje anquimati pampa neli anpanuc lacocoltilisli.

<sup>5</sup> Pampín nehual noje yajmo huil nimopepenialtiaya amo nicmaztataya quinami ancataya, huan nictilaníc Timoteo pa yihual nechlamachiltisquiaya quinami anquineltocatía Cristo. Nimomajtiaya cuajnesi anmitztilanilic Satanás anmoyolo pa yajmo anquineltocasquiaya. Yoje jan lapic (de in balde) cayasquiaya totequipanulisli in tonalijmes hual antimitzlamachiltije ilajtol Dios. Axan, ticmatilo pampa amo cataya yoje.

<sup>6</sup> Jan quipía se nadita mocuepac ca tehuanten Timoteo, techilic quinami unca cuali ca amhuanten nepa Tesalónica. Quitac quinami amo anmocahua pa anquineltocas Cristo huan quinami anmolasoja amhuanten. Techilic noje quinami antechijnamiquía huan quinami anquinequi míac antechita, jan quinami tehuanten ticnequilo míac antimitztilo noje.

<sup>7</sup> Pampín, tocnán, mas que unca míac hual monequi pa ticpiasi huan míac amo cuali hual tipanulo pampa lacames quinequilo tejtzacuililo pa calijtic, ma yoje ticanaje lachicahualtilisli yancuic. Unca pampa timomachiltije quinami anquineltoca in Tata Jesucristo.

<sup>8</sup> Axcan tiyulticate ca niman míac paquilisli pampa ticmatilo quinami amo anquimacahuiltía nindeno pa anmijtzacuillis pa camo anquineltocatías Cristo.

<sup>9</sup> ¡Quinami míac ticate ca paquilisli ilaixpan Dios pampa amhuanten anquichía yoje! Amo ticmatilo quinami huil ticsehuilo Dios pampa amhuanten anyuli anquichijica len Dios quinequi. Quema, amo ticmatilo oc sequin lajtomes calica ticsehuilo.

<sup>10</sup> Yihualitonali, pa semilhuil huan pa layúa ticlajlanilo Dios míac pa techmacahuiltis pa antimitzpaxalullisli pa ticayasi ca amhuanten. Noje ticnequilo antimitzmaxtilo mochi in oc sequin lamaxtilisli hual ayamo anquimati, innojen oc sequin ilajtomes Dios hual monequi pa anquineltocas.

<sup>11</sup> Axcan, ma quiquixtican yihual toTajtzin Dios huan toTata Jesucristo mochi inon hual tejtzacuilía pa camo tihualasi capa amhuanten.

<sup>12</sup> Huan amhuanten, ma anmitzlasojlaltitía in Tata niman míac pa yoje aj-sis anmolasojlalisli capa moxtin. Ma mochi sejse ca amhuanten quinlasojla moxtin in oc sequin ca amhuanten hual quineltocalo toTata. Noje ma quinlasojla moxtin in oc sequin lacames pin lalticpan hual amo quineltocalo. Unca yoje quinami tehuanten antimitzlasojlalo amhuanten.

<sup>13</sup> Sinda yoje anlalasoja, cuaquín anmijchicahualtilía Dios anmoyolo pa anquinequis anyulis quinami Dios quinequi. Yoje amo cayas len pa anmoyolo calica yihual anmitzmotexpahuilis pan tonali hual anmoitas iyampa Dios. Huan anmoitas iyampa Dios pa in tonali hual nesis toTata Jesús pa cayas ca tehuanten. Yihual nesis ca moxtin yehuante hual cataloaya lachipahuali pa inminyolo pa yoje yesi iyaxca ilacames. Yoje ma ye.

## 4

*In yuilisli hual quipaquiltía Dios*

<sup>1</sup> Axan, tocnán, ma antimitzilican oc se lajtol. Antimitzililo antimitzyantiticate pa anquichijtías mochi tonali miac hual mojmosta momiactis pa lanextilis pampa anyultica quinami Dios quinequi. Quema, in Tata Jesús quinequi pa antimitzilisi inon. Xicchihuacan jan yoje quinami antimitzilije. Monequi pa anyulis yoje pa anquipaquiltis Dios, huan axcan ticmatilo pampa jan yoje anyultica.

<sup>2</sup> Ticmatilo inon pampa anquimati in lajtol hual antimitzilije pa anquichías quiman ticataloaya ca amhuanten. In lajtol techmacac in Tata Jesús.

<sup>3</sup> Techmacac in lajtol pampa Dios quinequi pa mocajtías chipahuac amoyolo pa anyes san ilacames itequipanujquimes. Pampín monequi pa camo monilus se ca se sihual o ca se lacal sinda ayamo monamictic ca in se. Huan sinda monamictic se, monequi pa monilus jan ca isihua o ca ilahuical san.

<sup>4</sup> Ma quimati mochi sejse ca amhuanten quinami monequi pa quinel-tocaltis icuerpo (inacayo) pa yoje quimatisi moxtin pampa yihual quite-quipanuilía Dios. Ma quimati quinami quipía icuerpo pa yes pa san Dios quitequipanus.

<sup>5</sup> Amo xicmacahuiltican pa anmocuerpo anmijchihualtis len amo cuali hual cuajnesi anquinequi anquichía. Jan yoje quichihualo yehuanten hual amo quiximatilo Dios.

<sup>6</sup> Ma camo quihuitzquili icni, amo jan se ca amhuanten. Huan ma camo quicajcayahua icni pan ipampa inon hual antimitzilijtcate. In Tata quillacuepilis mochi sejse pa mochi hual quichihuilic se icni, jan quinami neli antimitzilije noje in tonalijmes hual ticataloaya ca amhuanten.

<sup>7</sup> Unca pampa amo technotzac Dios pa timochualosquiaya ca toyolo laijlaculi. Technotzac pa ticayasi mochi tonali chipahuac pa toyolo pa tictequipanuilisi.

<sup>8</sup> Pampín, sinda se amo quinequi quineltoaca inon hual antimitznextilijtcate, cuaquín ma quimati yihual pampa amo cataloaya lacames hual quilije inon. Cataya Dios hual quilic, quema, Dios hual quimaca in Espíritu Santo. Yihual unca pa amoyolo axan. In Espíritu anmitznextilía quiman amo anquineltoacata Dios.

<sup>9</sup> Axan, amo monequi pa tehuanten antimitzjicuiluilisi len lajtol inahuac quinami monequi pa anquinlasojlas anmocnán, hual cate yehuanten hual quineltoalo Cristo. Anmoxtin Dios anmitzmaxtía quinami anmolasoilas se huan oc sequin.

<sup>10</sup> Pampín, anquinlasojla moxtin tocnán hual cate pa mochi in lalticpan Macedonia. Ma yoje, antimitzyantilo, tocnán, ma momiactitía mochi tonali anmolasojlalisli se ca oc sequin.

<sup>11</sup> Huan antimitzyantilo pa anmotolinis pa anyulis cuali huan ca mosehuilisi pa anmoyolo, amo antzajtzinemi huan ancualantinemi. Antimitzyantilo pa antequipanus mochi sejse capa hual iyaxca yihual huan amo capa hual iyaxca oc se. Huan antimitzyantilo pa antequipanus ca anmomajjuan amhuanten, jan quinami antimitzilije chicahuac.

<sup>12</sup> Xicchihuacan yojque pa anyulis quinami quitasi cuali yehuanten hual amo quineltoalo Cristo. Huan yojque amo monequis pa anmitzlacualtisi oc sequin.

*Pablo lajtúa inahuac in tonali quiman mocuepas Jesucristo*



<sup>13</sup> Axan ticnequilo, tocnían, pa anquimatis len quinpanuc yehuanten hual cochije, ticnequilo tiquijtulo yehuanten tocnían hual miquije. Dios yahui quinhuálica ca Jesús yehuanten hual polehuije. Quinhualicas pan ipampa Jesús ilahuelilitisli. Amo ticnequilo pa anmitzcocus anmoyolo quinami quincocúa inminyolo yehuanten hual amo quichixticate Cristo.

<sup>14</sup> Neli ticneltocalo pampa Jesús miquic huan yulic oc sejpa. Pampín, jan yoje yehuanten hual quineltoconijme Jesús huan miquije, yehuanten Jesús quinyuliltis oc sejpa.

<sup>15</sup> Inon ticmatilo pampa techilic Dios huan antimitzililo len techilic, unca inon: Tehuanten hual ayamo timiquije pan tonali hual hualas in Tata, tehuanten hual Dios techmacahuiltía pa ticayasi tiyulticate pa in tonali, yihual tialo ticnamiquilo. Ma yoje amo quiman ticnamiquisi tiquinlaicanticate yehuanten hual miquije.

<sup>16</sup> Unca pampa yihual in Tata temujtihualas, tzajtzitihualas huan lanoztihualas. Mocaquis ilajtol se ca in lanahuatinijmes huejué pin cielo, huan mocaquis ilancaquetzaloni Dios. Cuaquinon quipehualtisi inminmoquetzalisi yehuanten hual miquije quineltocatataloaya Cristo.

<sup>17</sup> Cuaquinon, tehuanten hual tiyulticate, tehuanten hual ticayasi timocajticate tiyulticate pan lalticpan, timonechicusí ca yehuanten huan tiyesi la'ajcoquili pin mextemimes pa ticnamiquisi in Tata pin iyjecal. Huan yojqe ticayasi ca in Tata, amo quiman timoxilusi nepa capa yihual unca.

<sup>18</sup> Pampín, ximolacahualtican huan ximochicahualtican ca in lajtomes.

## 5

<sup>1</sup> Amo monequi, tocnían, pa antimitzijcuiluilisi lajtol calica antimitzilisi quichi xixihuimes huejcahuas in lalticpan huan quiman hualas Cristo oc sejpa.

<sup>2</sup> Amhuanten anquimati cuali pampa in tonali quiman hualas in Tata yes quinami quiman hualas se laxtequini pa layúa. Amaqui quimati quiman yahui huala.

<sup>3</sup> Quiman laqueztiyasi quinami amo unca nindeno hual quinmajtía, huan quinami amo unca nindeno hual quichihuilía xitinilisi, cuaquin quinmajsi-tiquisas in xitinilisi quinami se laxitinijcal. Yes quinami icocolisli se sihual hual yahui quilacatiltía ixolol. Huan amo cayas quinami moquixtisi.

<sup>4</sup> Ma yoje, amhuanten, tocnían, amo anunca quinami yehuanten hual cate capa laticumac amo quimazticate len yahui panúa. Anquimati pampa Cristo yahui mocuepa huan ca amhuanten amo cayas quinami quiman huala se laxtequini.

<sup>5</sup> Inon antimitzililo pampa anmoxtin anunca lacames hual anquipía Dios ilahuilisli pa anmoyolo, amhuanten iyaxca Cristo. Capa yihual unca, nepa amo quiman mocaahuas pa yes lahuilisi. Tehuanten huan amhuanten amo ticate inminyaxca yehuanten hual quipialo laticumactilisli pa inminyolo.

<sup>6</sup> Pampín, ma como tiyulican quinami cuajnesi tiquijtulo pampa amo monequi pa ticchixtiyasi in tonali, quinami yehuanten hual coxticáte amo quichixtialo. Yoje unca quinami quijtulo pa inminyolo yehuanten hual amo quineltoocalo Cristo. Pa tehuanten, yes cuali pa tiyulisi quinami lacames hual mochixticate pa panus in hual ticmatilo pampa yahui panúa. Huan ma tiyéñ (tiyecan) lacames hual mojmosta tilajnamiquilo pa toyolo ca mochi tolajnamiquilisi.

<sup>7</sup> Unca pa layúa quiman cochilo in cochinjmes, huan pa layúa lahuanalo in lahuanquimes.

<sup>8</sup> Ma yoje, tehuanten tiyulilo quinami amo mocahua pa yes semilhuil. Ticchixticate in tonali quiman mocuepas Cristo. Pampín, ma tiyén (tiyecan) hual amo timocahualo pa tilajtusi pa lajitic toyolo ca mochi tolaijnamiquilisli. Ma timochihuacan quinami in guaches hual mochijchihualo pa moanasi. Molaquentilo ca tzotzomajli lachihuali ca teposli pa inminlaixpan huan lapachutilisli lachihuali ca teposli pa inmintzontecon. Pa tehuanten hual ticneltocalo Cristo, tolaneltocalisli huan tolasojlalisli cate quinami in tzotzomajli lachihuali ca teposli hual quipialo pan inminlaixpan. Huan pampa ticchixticate pa Jesús techquixtis pin polehuilisli, inon unca quinami timonapatiloaya ca in lapachutilisli lachihuali ca teposli pan totzontecon.

<sup>9</sup> Yoje ticayasi laquixtili pin polehuilisli pampa Dios amo quilalic pa tiqitasi icualanilisli tehuanten hual ticneltocalo Cristo. Dios quilalic pa tiyelosquiaya laquixtili pin ipolehuilisli tolaijculisli. Quilalic pa tiyési laquixtili pan ipampa toTata Jesucristo.

<sup>10</sup> Yihual miquic pampa tiyeje lacames laijlaculi. Pampín sinda tiyulilo o sinda timiquilo, ma yojque timoxtin tiyulisi ca yihual quiman hualas.

<sup>11</sup> Pampín, ximochicahualtitiacan se ca innojen oc sequin ca amhuanten, huan ximopalejtian se ca oc sequin pa yoje mochi sejse ca amhuanten quimatisi ilamaxtilisli Jesús. Xicchihuacan jan quinami ticmatilo pampa yoje anquichijtica.

### *Pablo quinmaca lajtol in laneltocanijmes*

<sup>12</sup> Huan tocnían, ma antimitzilican pa anquinmiximatis cuali yehuanten hual tequipanulo ca amhuanten, yehuanten hual anmitzlaicanalo pan iojli in Tata. Yehuanten anmitznextililo quinami monequi pa anyulis quinami Dios quinequi.

<sup>13</sup> Xiquinmiztiacan ca lamajtilisli pampa quichihualo in tequipanulisli. Xiyulican jan sepa ca mosehuilisli ca amhuanten.

<sup>14</sup> Huan tocnían, antimitzyantilo, xiquinmilican yehuanten hual amo quinequilo tequipanulo pa tequipanusi quinami Dios quinequi. Xiquinchicahualtican yehuanten hual amo quipialo inminyolo chichahuac. Xiquinpalehuacan yehuanten hual amo quipialo chichahuac. Amo xicualanican ca yehuanten hual amo cate ca se lajtulisli ca amhuanten. Amo xicualanican ca yehuanten hual huejcahualo monextililo yulilo quinami Dios quinequi. Yihual quita cuali pa anquinmitas quinami lacames hual amo huil monextililo jan axcan.

<sup>15</sup> Ximolachilican pa camo anmolacuepilis, no, amo jan se ca amhuanten. Dios quita cuali pa camo anmocahuas pa anquichihuilis len cuali amhuanten huan moxtin oc sequin.

<sup>16</sup> Xicayacan mojmosta ca niman míac paquilisli.

<sup>17</sup> Huan amo ximocahuacan pa anquilajlanis Dios.

<sup>18</sup> Xicsehuican Dios pa mochi hual anmitzpanúa, pampa inon unca len Dios quinequi pa amhuanten. Yihual technextilic melahuac len quinequi pa amhuanten. Technextilic pan ipampa mochi in hual Cristo Jesús quichíac huan technextilic.

<sup>19</sup> Amo xictzacuilican in Espíritu Santo pa camo quijtus o quichías len yes hual yihual quimacatiquisa aquí yes pa quijtus o pa quichías. Sinda anquichihuaya inon, yoje unca quinami anquisehuiaya in Espíritu Santo jan quinami anquisehuiaya se tixuxli.

<sup>20</sup> Huan amo xicixjxicucan len quijtulo yehuanten hual quipixtiquisalo se ilajtol Dios.

<sup>21</sup> Xictemucan quinami anquimatis neli sinda unca yoje in hual quijtulo. Cuaquinon xicneltocacan ca mochi anmoyolo inon hual neli anquimati unca cuali.

<sup>22</sup> Ximijcuanican pa camo anmoitas inahuac mochi in hual nesi amo cuali, ximolachilican pa camo anquichías.

<sup>23</sup> Dios quipía mochi hual unca cuali pa anmitzmacas ca mosehuilisli. Pampín, ma anmijchipahuili mochi anmoyolo pa anquitequipanuillis, anquipixtica mochi hual quinequi pa anquipías. Yoje anmijchihuilia pa anyes jan iyaxca san. Huan ma mocahua anmoyolo huan anmoyulilisli huan anmocuerpo (anmonacayo) ca nindeno hual amo unca cuali, pa yoje amo cayas len calica Dios anmitzmotexpahuillis pa in tonali hual hualas oc seppa toTata Jesucristo.

<sup>24</sup> Yihual Dios hual anmitznotza pa anquineltocas Cristo, yihual amo mocahuas pa quichías inon hual quijtúa pampa yahui quichía.

<sup>25</sup> Tocrían, xiclajlanican Dios pa tehuanen mojmosta.

<sup>26</sup> Xiquinpialtican moxtin tocrían ca latenamiqulisli hual yoje ca tehuanen lanextilia quinami tiquinlasojlalo moxtin hual ilacames Cristo.

<sup>27</sup> Annimitzilía chicahuac ilaixpan toTata pa anquinmomaxtilis moxtin tocrían in amal nican.

<sup>28</sup> Ma caya ca amhuanen in cuali hual san toTata Jesucristo huil tejchi-huilia.

## In oc se amal hual Pablo in lanahuatini quinmijcuiluilic in laneltocanjmes pa Tesalónica

*Pablo huan yehuanten ca yihual quinmijcuiluilía in laneltocanjmes pa Tesalónica*

<sup>1</sup> Tehuanten Pablo huan Silvano huan Timoteo antimitzjcuiluililo amhuanten pa Tesalónica, amhuanten hual anquineltoca Dios toTajtzin huan in Tata Jesucristo.

<sup>2</sup> Ma Dios toTajtzin huan in Tata Jesucristo anmijchiuilican inminlachi-hualisli cuali calica anmitzquixtía pin ipolehuilislí anmolajlaculisli. Huan ma anmitzmacacan axan huan mojmosta mosehuilislí huan mochi in cuali hual unca ca yehuanten pa anmitzmacasi pampa anmitzlasojlalo.

*Dios quinmilis lacames laijlaculi pampa lamisi polehuisi pan tonali hual mocuepas Cristo*

<sup>3</sup> Tocnían, monequi pa ticsehuisi Dios mojmosta pampa anunca tocnían, jan quinami unca cuali pa yojque ticchihuasi. Unca cuali pampa anquineltoca Cristo míac, huan momiacía anmolaneltocalislí. Huan mochi sejse ca amhuanten anyuli anquinlasojlatica míac. Huan anmolasojlalislí momiacía pa moxtin in oc sequin ca amhuanten mojmosta.

<sup>4</sup> Pampín, tehuanten, pan tonaliymes hual ticcate capa monechicujticate ilaixpan Dios oc sequin laneltocanjmes, amo quiman tiquilcahualo pa tilajtusi ca míac lanequilislí quinami amo anmocahua pa anmopepenialtis mochi in amo cuali hual anmijchiuilijticate. Tilajtulo noje quinami amo quiman anmocahua pa anquineltocas Jesucristo, mas que anmitztojtocalo pa anmitzcolcoltisi. Quema, anmitzpanujtica míac amo cuali hual anmijchiuililo. Huan amhuanten anmopepenialtía pa anpanus mochi inon amo anquinlacuepilijtica.

<sup>5</sup> Pampín, ticmatilo Dios quinchihuilía moxtin hual mohuiquilía pa canasi. Anpanujtica lacocoltili pampa anquixtoca quinami Dios huelitía. Pampín Dios quijttúa pampa anmonotza pa anyulis capa yihual huelitía.

<sup>6</sup> Huan ticmatilo pampa Dios quita cuali pa quinlacuepilis yehuanten jan quinami yehuanten anmijchiuililo.

<sup>7</sup> Amhuanten hual anmijchiuililo amo cuali, Dios quita cuali pa anmitzmacas mosehuilislí pa anmoyolo ca tehuanten noje quiman nesis quistica pin cielo (ilhuicac) in Tata Jesús. Yihual hualas ca ilanahuatinijmes pin cielo hual quipialo ichicahualislí, milintihualasi quinami tixuxli.

<sup>8</sup> Huan quinmacas lacocoltilislí yehuanten hual amo quiximatilo Dios, quema, yehuanten hual amo quineltocalo ilamachiltislí cuali toTata Jesús.

<sup>9</sup> Yehuanten cate hual yalo panulo lacocoltilislí hual amo quiman lamis, lacocoltilislí hual amo lamis quinmijlacus. Cayasi laijcuanilí pa ilaixpan Dios huan ilaixpelalislí chichahuac ilahueliltislí, amo huil mocuepasí ca yihual.

<sup>10</sup> Quema, in panus pa in tonali quiman hualas Jesús. Cuaquinon quipiasí Jesucristo ilaixpelalislí chichahuac yehuanten hual quinlajtultic pa yesi ilacames chijchipahuac pa inminyolo. Yehuanten momahuisultisi quiman quitasi moxtin yehuanten hual quineltocalo Jesús. Huan yoje anquichías

amhuanten noje pa Tesalónica pampa anquineltocac in hual antimitzilije quinami unca in Tata Jesús.

<sup>11</sup> Yoje, pampa ticmatilo inon, tehuanten noje amo timocahualo pa ticla-jlanisi Dios pa amhuanten. Yihual anmitznotzac pa anquineltocasquiaya il-amachitilisli cuali. Pampín ticla-jlanilo pa anmitzitas quinami lacames hual monotzaloya pa yihual anmitznotzasquiaya. Noje ticla-jlanilo Dios pa yihual lamis quichías ca ilahuelitilisli mochi hual anquinequi anquichía hual unca cuali. Anmolaneltocalisli anmitznexilis len monequi pa anquichías. Pampín ticla-jlanilo pa yihual anmitzpalehuis pa anlamis anquichías in hual anquichía amhuanten.

<sup>12</sup> Cuaquín, quiman oc sequin quitasi mochi in cuali hual anquichía, noje ticla-jlanilo Dios pa yehuanten noje quitasi ca amhuanten mochi hual huil quimatilo inahuac toTata Jesús. Noje ticla-jlanilo Dios pa itoca Jesús mochías hué huan cualtichin ca amhuanten anmoyolo. Huan ticla-jlanilo pa anmochías hué pampa anyultica inahuac yihual. Huan anquipia mochi inon san pampa anmijchiuilic Dios in cuali hual amo quiman lamis.

## 2

### *In lacal mochi amo cuali*

<sup>1</sup> Axcán, tocnán, ma antimitzilican quinami panus in tonali quiman hualas toTata Jesucristo. Inon cayas quiman ticayasi lanechiculi pa ticnamiquisi.

<sup>2</sup> Antimitzililo inon amalá anmomacajsiquias sinda cuajnesi anmitzililo len yes lajtol sequin lacames. No, yajmo ximomajtitiacan sinda anmitzililo pampa lamis ajsic in tonali hual mocuepac pan lalticpan in Tata. Amo xiquinneltocacan sinda cuajnesi anmitzililo pampa tiqullije inon tehuanten pan ipampa se ijyecal o lajtol o se amal hual quijtúa pampa tehuanten tiqijcuiluje.

<sup>3</sup> Amo ximomacahuiltican pa amaqui anmitzcuaajcuamanas nindeno, pampa san ajsis in tonali quiman ajsije in tonalijmes capa quicahuasi ilamaxtilisli Cristo in míac ca yehuanten hual quijtulo pampa quineltocalo Cristo. Panus inon, cuaquinon nesis se lacal hual amo quineltocas Dios ilajtomes huan amo quinneltocas inminlajtomes lacames. Yihual yes se lacal hual Dios yahui quijcuanía pa yajmo cayas capa unca Dios.

<sup>4</sup> In lacal molalis pa mochías ilacocolini in niman hué, hual unca Dios. Cayas in lacocolini hué pa mochi innojen hual lacames quinmolancuacuetzililo quinami inmindioses. Quema, yoje quichías, molalis pa huelitis pa calijtic Dios itiopan hué. Lacuaajcuamanas, lamachiltitica pampa yihual Dios.

<sup>5</sup> ¿Amo anquijnamiquía quinami annimitziliaya innojen lajtomes quiman ayamo nimohuicac capa amhuanten?

<sup>6</sup> Huan axan anquimati aqui quitzacuilijtica pa ayamo nesis in lacal elehuis hual amo laneltocas. Ma yoje, yihual in lacal niman elehuis, quema, nesis pan tonali hual Dios quilalic.

<sup>7</sup> Ticmatilo pampa cate lacames hual yultialo amo quinneltocaticate Dios ilajtomes. Amo ticmatilo leca unca yoje. San ticmatilo pampa unca se hual quintzacuilijtica yehuanten hual molalilo ipan mochi. Quintzacuilijtica pa yoje ayamo huelitisi pa mochi lalticpan. Yihual quintzacuilijτίας huan cayas laijcuanili pa yajmo yes pin lalticpan quiman lamis ca ilatzacuilisli hual Dios quilalilic.

<sup>8</sup> Cuaquinon nesis in lalac hual amo laneltoca, yihual quinlaicanas moxtin hual molalilo ipan Dios. Ma yoje, in Tata Jesús quimictitiquisas in lalac hual amo laneltoca. Quimictis ca iijyul icamac, quisulahuas. Huan lamis mochi ilahuelilitlisli in lalac hual amo laneltoca. Jesús quisulahuas jan ajnaxcan quiman in lalac quitas Jesús ilaixpelalisli pa in tonali hual mocuepas Jesús pin lalticpan.

<sup>9</sup> Ma yoje, pa in tonaliymes hual ayamo hualas Jesús, in lalac hual amo laneltoca yahui huelitía pan lalticpan. Satanás quimacas lahuelilitlisli pa huelitis. Quimacas mochi lahuelilitlisli pa quichías mochi islacatilisli hual quinmahuisultis lacames ca lamajtilisli.

<sup>10</sup> In lalac quipías mochi lahuelilitlisli pa quincuaajcuamanas yehuanten ca mochi lachihualisli hual amo cuali. Huan Satanás quinextilis in lalac quinami quichías inon. Yoje quincuaajcuamanas, huan yehuanten polejtiasi pampa amo quinequiloaya quicaquilo Jesús ilajtol pa quineltocalosquiaya in hual melahuac. Yoje sinda quineltocaloaya, cuaquín cataloaya laquixtili pin ipolehuilisli inminlajlaculisli.

<sup>11</sup> Pampín Dios quinchihuilis len hual quinlaneltocaltis in islacatilisli. Quijtusi pa inminyolo pampa in lalac hual amo laneltoca unca Dios. Quema, yihual in lalac quinmilis pampa yihual unca Dios.

<sup>12</sup> Pampa inon, Dios yahui quinmaca lacocoltilisli moxtin yehuanten, huan amo quiman moquixtisi capa unca inon. Quimacas lacocoltilisli pampa amo quineltocalo ilajtol Jesús hual unca melahuac, huan amo mocahualo pa quixtocasi quichihuasi len amo cuali.

### *Dios quinlajtultic pa quinquixtis pin polehuilisli in laneltocaniymes*

<sup>13</sup> Ma yoje, amhuanten, tocnían, Dios anmitzlasojla, huan mojmosta ticate ticsejticate Dios pampa amhuanten anunca tocnían. Anmitzljajtultic pan tonaliymes quiman ayamo quipehualtic in lalticpan. Anmitzljajtultic pa anmitzmacas inon hual iyaxca hual unca pa Dios ixolomes. Inon anmijchihuilis pampa anmitztlalilic in Espíritu Santo pa anyulis yoje chipahuac pa anmoyolo, huan pampa anquineltocac Jesús ilajtol hual mochi unca melahuac.

<sup>14</sup> Cataya pampa inon Dios anmitznotzac pan ipampa in lamachilitlisli cuali hual antimitzlamachiltije. Anmitznotzac Dios pa anquiasquiaya anmolajco ilaixpelalisli cualtichin toTata Jesucristo hual cayas anmoyaxca.

<sup>15</sup> Yojqque, tocnían, amo quiman ximocahuacan pa anquineltocas ca mochi amochicahualisli mochi in lajtomes hual antimitznextilije pan ipampa tolahtol o pan ipampa in hual antimitzjicuiluilije.

<sup>16</sup> Yihual toTata Jesucristo huan Dios toTajtzin techlasojlalo huan amo quiman mocahualo pa techlacahualtisi. Yoje ma tejchihuilican noje pa ticchiasi ca míac lanequilisli in niman cuali hual quipialo pa techmacasi tehuanten. Inon yalo techmacalo pan ipampa inminlachihualisli cuali hual amo quiman lami.

<sup>17</sup> Ma anmitzlacahualtican anmoyolo, ma anmijchicahualtican pa yoje huil anquichías pa mochi tonaliymes míac hual cuali, huan pa mochi tonaliymes huil anquijtus in hual unca cuali.

## 3

### *Xiclajlanican Dios pa tehuanten*

<sup>1</sup> Axcán, tocnían, ma antimitzilican inon pa tilaquisasi ca in amal. Xiclajlanican Dios pa tehuanten, pa camo ticayasi latzacuali pa camo tiejsehuisi ticuicasi ilajtol in Tata ca capic yes. Quema, pampa ticnecticate pa oc sequin

lacames quitasi quinami Dios ilajtol quipía lahueliltilisli hué. Inon quitasi jan quinami amhuanten anquitac ilahueliltilisli hué ilajtol. Anmitzhueliltic ilajtol pa anyulis quinami quinequi toTata.

<sup>2</sup>Noje xiclajlanican Dios pa yihual techquixtis pa camo timiquisi quiman yes ticayasi capa lacames ej'elehuis hual amo mocahualo pa quichihuasi len amo unca cuali. Amhuanten anquimati pampa amo cate miac hual quineltocalo Jesucristo.

<sup>3</sup>Ma yoje, mojmosta huil ticmatilo pa toyolo pampa in Tata quipía mochi chicahualisli. Ticmatilo pampa yihual anmijchicahualtis huan anmitznap-atis pa camo anmitzmatocas Satanás.

<sup>4</sup>Huan amo inon san. In Tata techmachiltía quinami anquineltoca cuali amhuanten. Pampín ticmatilo pampa anquichijtica huan anquichijtías len yes antimitzililo.

<sup>5</sup>Huan in Tata hual unca pa anmoyolo ma anmitzlaicana pa anquillasojlas Dios huan pa anquimatis anmopepenialtis ca chicahualisli mochi hual anmijchihuulilo yehuanten hual molalilo anmopan. Yojque Cristo mopepenialtic ca chicahualisli mochi hual quichihuilije yehuanten hual molalije ipan.

### *Monequi pa tequipanusi pa molacualtisi*

<sup>6</sup>Antimitzililo, tocnían, quinami quijtúa in lamaxtilisli huan ilahueliltilisli toTata Jesucristo, antimitzililo pa anmijcuanis pa capa amo ancayas ca aqui yes ca tocnían hual mojmosta amo quinequi tequipanúa. Yihual hual amo quinequi tequipanúa amo yultica yoje quinami antimitznextilije.

<sup>7</sup>Inon antimitzililo pampa amhuanten anquimati quinami anquipía pa anquichías mochi quinami tehuanten ticchihuanijme. Amo tilatzejtinemijme nepa in tonalijmes hual ticatanijme ca amhuanten.

<sup>8</sup>Amo tijcuanijme ilacualisli amaqui sinda amo ticlaxlahuije. Quema, ca miac tequipanulisli chicahuac titequipanunijme yihualitonali pa layúa huan pa semilhuil pa timolacualtilosquiaya. Amo ticnequiloaya pa anquiasquiaya pa antechlualtis, amo jan se ca amhuanten.

<sup>9</sup>Amo cataya pampa amo unca toyaxca pa antimitzililosquiaya pa antechlualtis. No, cataya pampa ticnequiloaya pa anquitasquiaya quinami tehuanten ticchihualoaya, cuaquinon anquichiasquiaya quinami tehuan-ten.

<sup>10</sup>Huan noje innojen tonalijmes hual ticataloaya ca amhuanten, inon antimitzilinijme: Sinda amo quinequi tequipanúa se, ma camo lacua.

<sup>11</sup>Antimitzililo innojen lajtomes pampa techlamachiltilo cate sequin ca amhuanten hual amo yulticate cuali quinami monequi pa yulisi. Amo quinequilo tequipanulo huan mojmosta calpanujtinemilo quinmacatine-milo tequil oc sequin.

<sup>12</sup>Pampín, yehuanten hual cate quinami innojen, tiqinmililo huan tiqinyantilo ca ilahueliltilisli ilamaxtilisli in Tata Jesucristo pa tequipanusi yehuanten pa molacualtisi. Yojque mosehuisi pa inminchan, yajmo calpanujtinemisi pa quicuasi len amo inminyaxca. Yojque quicuasi inon hual inminyaxca.

<sup>13</sup>Huan amhuanten, tocnían, amo xisiahuican pa anquichías len unca cuali.

<sup>14</sup>Sinda unca se capa amhuanten hual amo quinequi quineltoca tolajtol hual tiqijcuilulo pa in amal, cuaquín ximomachiltican pa anquimatis aqui unca in se, huan amo ximomacahuiltican pa anquichías nindeno ca yihual, pa yojque yihual pinahuas.

<sup>15</sup> Ma yoje, amo xiquijtucan pampa yihual se tolacocolini tehuanten. Dios quita cuali pa anquilaquetzilis pa quimatis quinami monequi pa yihual quineltoacas len Dios quilía. Pampín, xiclaquetzilican quinami anquinlaquetzilía moxtin tocnán.

*Laquisa quijcuilúa ca latuchihualisli*

<sup>16</sup> Axcan yihual in Tata hual quimaca mosehuilisli huan quipía mochi hual unca cuali pa tehuanten, ma anmitzmaca mochi inon pan mochi tonalijmes huan ca mochi lachihualisli. Ma caya ca amhuanten anmoxtin in Tata.

<sup>17</sup> Nehual Pablo annimitzpialtía, huan niquijcuilujtica in nolapialtisli ca nehual nomajma. Yojque anquimatis pampa nehual neli nictilanía in amal, yojque nilajcuilúa.

<sup>18</sup> Ma caya ca amhuanten anmoxtin in cuali hual san toTata Jesucristo huil tejchihuilía.



## In amal calica Pablo in lanahuatini pehuac quiman quijcuilulic Timoteo

### *Lapialtilisli*

<sup>1</sup> Nehual Pablo ilanahuatini Cristo Jesús pampa Dios huan Jesucristo nechilije pa niyes ilanahuatini. Dios techquixtía capa timoitalo pin pole-huilisli. Huan Jesucristo tejchihuilía pa ticchiasi ticneltoaticate mochi hual yihual neli techilic pampa yahuiaya techmaca.

<sup>2</sup> Nimitzijcuilulijtica tehual, Timoteo, tehual neli tinoxolol. Nimitzi-cuilulijtica pampa jan quinami nimitzilic Dios ilajtol, yoje tiyuli ticnel-toatica Dios huan Jesucristo ixolol. Ma Dios toTajtzin huan Jesucristo toTata mitzmacacan inminlachihualisli cuali huan inminlaicnilisli huan inminmosehuilisli pa moyolo.

### *Quimaca lajtol hual quijtúa quinami monequi quinchihuilis lamaxtinijmes hual islacatilo*

<sup>3</sup> San quinami nimitzyantic quiman niyahuiaya nicana ojli pa in lalticpan Macedonia, yoje oc seppa nimitzyantía pa timocahuas nepa pin caltilan Efeso. Nicnequi pa tiquinmilis chicahuac sequin lacames nepa pa camo lamaxtisi ca oc se lamaxtilisli. Ma lamaxtican san yoje quinami niqunnex-tilic.

<sup>4</sup> Ma camo molalican pa lamaxtisi quinquihuilijtcate lapuhualisli hual amo quipialo quinami lamisi. In lapuhualisli amo cate melahuac, san cate lapuhualisli hual quijtulo quinami yulinijme lacames huan inminsi-huahuan huan inminxolomes huan inmiahuimes hual inminahuac yehuan-ten timomaxtilo san quinami itocalo pa ilajtol Dios. Ma yoje, Dios amo techilic oc se lajtol, san quinami itocanjime yehuanten. Huan sinda lacames lamaxtilo quinquihuilijtcate lapuhualisli quinami innojen, yoje quichi-hualo pa lacames pehuasi molaxilisi lajtomes ca yehuanten. Huan sinda molaxililo lajtomes ca yehuanten, yoje yajmo momachitilo quinami Dios quinequi pa quinmaxtisi yehuanten hual quineltoalo Dios ilajtol. Dios quinequi pa quinmaxtisi cuali ilajtol Dios pa yehuanten quineltoasi niman cuali.

<sup>5</sup> Nicnequi pa tiquinmilis chicahuac pa lamaxtisi cuali pa yoje moxtin ajsisi quimatisi quinami quipialo pa lalasojlasi quinami Dios lalasojla. Quinequi quijtúa, quipialo pa lalasojlasi ca inminyolo chipahuac. Quipialo pa lalasojlasi quimazticate laijtic inminyolo pampa quichijtcate in cuali hual Dios quinequi. Quipialo pa lalasojlasi quineltoaticate Dios huan amo lacuajcuamanticate quinami lalasojlalo.

<sup>6</sup> Innojen sequin lacames yajmo lamaxtilo yoje cuali. Pehuaje lamaxtije ca lajtomes hual amo quipalehuilo in laneltocanjimes.

<sup>7</sup> Yehuanten quinequilo mías pa quimaxtisi in lajtol hual Moisés quijtuc pa yina, mas que amo quimatilo len quinequilo quijtulo in lajtomes hual quijtuticate. Noje amo quimatilo in hual quijtulo niman chicahuac pampa quema, quimatilo.

<sup>8</sup> Ticmatilo in lajtol unca cuali sinda se quimaxtía cuali.

<sup>9</sup> Monequi pa anquimatis pampa in lajtol Dios amo quinlalilic yehuan-ten hual yulilo quichijtcate inon hual cuali. Quinlalilic yehuanten hual amo quinequilo quineltoalo in lajtol. Quinlalilic yehuanten hual amo quimacahuiltilo pa Dios huelitis pan yehuanten. Quinlalilic yehuanten hual

amo quilasojlalo Dios huan quichihualo laijlaculisli. Quinlalilic yehuanten hual quinhuitzquililo mochi Dios ilamaxtilisli huan quixijxiculo. Quinlalilic yehuanten hual quinmictilo inmintajtzitzían o inminnantzitzían. Quinlalilic yehuanten hual quinmictilo oc sequin.

<sup>10</sup> In lajtol Dios quinlalilic yehuanten hual quinmanalo sihuames o lacames mas que amo monamictije ca yehuanten, quinlalilic yehuanten hual motecaló lacames ca lacames o sihuames ca sihuames quinami se lalac moteca ca se sihual. Quinlalilic in lacames amo cuajcuali hual quinqutzquilo lacames pa quinhucasi huan amo quinmacahualo. Quinlalilic yehuanten hual islacatilo huan quijtulo ilaixpan Dios len amo unca melahuac. Huan quinlalilic yehuanten hual quichihualo mochi oc sequin lachihualisli hual amo cate quinami quijtúa Dios ilamaxtilisli hual techyuliltía cuali.

<sup>11</sup> Huan in lamaxtilisli unca ca se lajtulisli ca in lamachiltisli cuali hual technextilia Dios ilahueliltisli hué ca ilaixpelalisli cualtichin. In unca Dios ilamachiltisli cuali hual tiquiqtulo unca niman hué. Pan ipampa inon yihual techquixiltía tolaijlaculisli pa camo tipolehuisi. Huan Dios hual latuchía nechnotzac pa niclamachiltisquiaya in lamachiltisli cuali.

### *Pablo quisehuía Dios pampa quicnilic*

<sup>12</sup> Nicsehuía Cristo Jesús toTata hual nechmacac lahueliltisli huan nechitac nehual quinami se hual yuli quichijtica quinami quinequi. Huan pampa inon nechlajtultic pa nitequipanulis quinami nicchijtica.

<sup>13</sup> Quema, nechlajtutic pa nicchías inon, mas que pa yina nicuejuecaltini yihual huan niquintojtocani pa niquinchihuilisquiaya tetzcuinuc yehuanten hual quineltocaloaya yihual. Niquinhuitequini huan niquinchihuilini niman amo cuali. Ma yoje, Dios nechicnilic pampa amo nicmatini da nicchijtataya len niman amo cuali pampa ayamo nicneltocani Cristo.

<sup>14</sup> Huan toTata nechmacac niman míac lachihualisli cuali. Pampín unca pa noyolo míac laneltocalisli huan lasojlalisli. Unca nepa pampa Cristo Jesús unca pa noyolo.

<sup>15</sup> Moxtin huil quilalilo mochi laneltocalisli ca in hual niquiqtutica. Unca cuali pa se quineltocas ca mochi iyolo inon: Neli Cristo Jesús hualac pan lalticpan pa quinqixtis pin inminpohuilisli yehuanten hual quichihualo laijlaculisli. Huan ca yehuanten amo unca oc se lalac niman laijlaculi quinami nehual.

<sup>16</sup> Cataya pampa inon Dios nechicnilic pa yoje Cristo lanextilis quinami amo mocahua pa laicnilis niman míac, mas que nehual niyec yoje niman amo cuali pa moxtin hual quichihualo laijlaculisli, huan nihuejcahuaya pa nicpalasquiaya noyolo. Yoje, axcan huan pa mosta, moxtin hual yalo cayalo quineltocaticate Jesucristo pa quipiasi yulilisli hual amo quiman lamis, yoje yehuanten yalo nechijnamiquilo nehual huan quijtusi pampa sinda Cristo nechicnilic, cuaquinon quinmicnilis yehuanten noje.

<sup>17</sup> Yihual in hué hual amo mocahua pa huelitis. Yihual amo quiman miquis, yihual amo huil tiqitalo, jan yihual san unca Dios. Pampín ma quilasojlalan ca mochi lamajtilisli. Huan pa mochi tonalijmes ma camo lami pa lajtusi hué pa yihual ca mochi lajtomes huejué. Yoje ma ye.

<sup>18</sup> Inon nimitzilía pa ticchías, Timoteo noxól. Unca ca se lajtulisli ca in hual pa yina quiqtuje monahuac tehual yehuanten hual quiqtutataloaya Dios ilajtol in tonali hual ticmatije pampa Dios mitzljajtultic. Huan ilajtol Dios hual quiqtuje monahuac tehual mitzpalehuis pa timoanas pa ticsulahuas mochi hual amo cuali.

<sup>19</sup> Huan quiman yes timoana, amo ximocahua pa ticneltocas chichahuac Dios ilajtol melahuac. Huan amo ximocahua pa ticneltocas in lajmatilisli laijtic moyolo hual Dios mitzmaca. Ca in lajmatilisli ticmatis len unca cuali huan len amo unca cuali. In lajmatilisli sequin yajmo quitequipanulo huan pampín in lajmatilisli yajmo quipalehuá inminlaneltocalisli pampa yajmo quineltocalo ilajtol Dios. Huan quiman yes da se yajmo quineltoca Dios ilajtol, cuaquin panúa lacocoltilisli. Cayas quinami panúa se hual unca pa se barco hual xitintica. Yoje yajmo huil moquixtía pa camo polehuisi.

<sup>20</sup> Yojque cate Himeneo huan Alejandro, huan yehuanten niquinquinaxtic pa camo cayasi capa in laneltocanjmes. Niquincahuac pa quitocasi Satanás, pa yojque yesi lacocoltili, pa yojque yajmo quihuejuecaltisi in Tata.

## 2

### *Pablo quijtúa quinami monequi pa ticlajlanisi Dios*

<sup>1</sup> Axan, ma nimitzili ilapehualtilisli mochi in lajtulisli hual nicpía pa nimitzilil. Nimitzyantía pa tiquinmilis moxtin pa quilajlanisi Dios pa quinmacas inon hual monequi pa quipiasi. Huan ma lajtucan ca Dios inahuac mochi. Ma quilajlanican yoje pa moxtin lacames.

<sup>2</sup> Ma quilajlanican pa in hueyeyenten huan pa moxtin hual huelitilo. Xiquinmili pa moxtin quilajlanisi Dios pa yoje tiyulisi jan cuali. Ma quilajlanican pa techpalehuis pa tiyulisi ticpixticate mosehuilisli pa toifenco huan mosehuilisli pa laijtic toyolo. Ma quilajlanican Dios pa techpalehuis pa yoje tiyulisi timomajticate ilaixpan Dios huan pa techitasi oc sequin lacames ca lasojlalisli.

<sup>3</sup> Dios hual techquixtía pa camo tipolehuisi quita cualtichin huan quixtoca sinda yoje ticlajlanilo.

<sup>4</sup> Yihual quinequi pa moxtin moquixtisi pin inminpolehuilisli huan quinequi pa lamisi quimatisi pampa Dios ilajtol unca melahuac.

<sup>5</sup> Quema, pampa jan unca se Dios san, huan jan unca se san hual molalía lajco capa Dios huan lacames. Yoje quipaquiltía Dios pa yoje quinmacahuiltis lacames pa moajxiltisi capa yihual. Dios unca laijcuanili pa camo cayas ca lacames pampa cate laijlaculi. Huan in lalacal Cristo Jesús, yihual in lalacal hual molalía nepa.

<sup>6</sup> Yihual motemacac pa quimictisi pa yoje panus ca yihual in lacocoltilisli hual cataya pa tehuanten pampa tiyeje laijlaculi. Yojque yihual laxlahuic pa quiquixtilis moxtin pin inminpolehuilisli. Inon Jesucristo quilamachiltic pan tonali hual Dios quilalic.

<sup>7</sup> Pampa inon, yihual nechlajtultic pa nehual niyes lamachiltini huan lanahuatini. Niquijtutica inon hual melahuac, amo nislacatijtica. Yihual nechlajtultic pa niyes lamaxtini capa yehuanten hual amo judíos, pa yoje yehuanten pan ipampa nolamaxtilisli quineltocasi Dios ilajtol hual unca melahuac.

<sup>8</sup> Yoje, pa mochi lali capa lacames hual quineltocalo toTata monechiculo pa quimolancuacuetzilisi, nicnequi pa quilajlanisi toTata quinmajcocticate inminmajmajuan, amo quipixticate laijlaculisli hual Dios ayamo quinpujpuhuac. Huan nicnequi pa quilajlanisi amo cualanticate ca inmicnían. Huan ma camo cayacan quijtuticate ca laijtic inminyolo quinami quinchihuilisi amo cuali oc sequin.

<sup>9</sup> Huan in sihuames jan yoje, ma mochijchihuacan molaquentiticate yoje pa nesisli cuali. Ma pinahuacan pa molaquentisi yoje amo cuali, ma molaquentican quinami lanextía pampa quipialo lajmatilisli. Ma camo

quitemucan quinami huil cayasi cualtichin quinami quilpilo inmintzondi pa nesis ipati. Ma camo molalilican len lachihuali ca oro o maquisli hual ipatilo.

<sup>10</sup>No, cate cualtichin pa inminyolo in sihuames sinda yulilo quinchihuiljticate cuali oc sequin. Pampín, sinda in sihuames quijtulo pampa momajtilo iyampa Dios, cuaquín ma mochihuacan cualtichin yoje pan ipampa quinami quinchihuililo cuali oc sequin.

<sup>11</sup>Ma yulican sihuames monextiljticate ilajtol Dios. Ma yoje, ma camo lajtucan ca in lahuellitlisli hual quipialo in lacames. Ma molalican pa inminyolo pa quineltocasi len Dios ilajtol quijtúa inminahuac sihuames. Ma yulican monextiljticate ca mosehuilislí.

<sup>12</sup>Amo nicmacahuilítia pa se sihual lamaxtis capa moxtin monechiculo, huan amo nicmacahuilítia pa quipías lahuellitlisli pa huelitisi capa in lacames. Nicnequi pa monextilis ca mosehuilislí ca lacames hual quipialo lahuellitlisli pa quimaxtisi Dios ilajtol.

<sup>13</sup>Nicnequi pa yes yoje, pampa Dios quichíac Adán, cuaquín quichíac Eva.

<sup>14</sup>Huan amo cataya lacuajcuamanali Adán. Cataya in sihual hual, quema, cataya lacuajcuamanali huan yoje quichíac lajlaculisli, moquixtic pan iojli Dios.

<sup>15</sup>Ma yoje, ca sihuames quisas cuali huan yulisi ca paquilisli monamicjticate huan quinmizticate inminxolomes. Cayas yoje ca yehuanten sinda yulilo quineltocaticate in Tata huan yulilo quipixticate Dios ilasojlalislí. Noje cayas yoje ca yehuanten sinda yulilo moxilujticate pa camo quichihuasi nindeno hual amo cuali huan yulilo quichijticate mochi ca lajmatilislí.

### 3

#### *Quijtúa quinami monequi lachihualo hual huelitilo capa in laneltocanjmes*

<sup>1</sup>Ma quimatican pampa unca melahuac in lajtulisli hual quijtúa yoje: Sinda se lalac quinequi mochía se hual quinmiztía in laneltocanjmes, cuaquín yihual quinequi quichía tequipanulisli hual Dios quita niman cuali.

<sup>2</sup>Pampín, monequi pa yihual yulis niman cuali pa yoje Dios amo quitas nindeno quinami yuli hual amo quixtoca. Monequi pa quipías jan se isihua san huan monequi pa camo canas oc se sihual sinda ayamo polehuic isihua. Sinda polehuis, cuaquín huil monamicjtis oc sejpá. Monequi pa yulis ca lajmatilislí, quixtica cuali mochi hual quichía. Monequi pa quimatis motzacuilis pa camo quichías len sinda ayamo quijtuyaya míac pa iyolo inahuac inon. Monequi pa yes lalac hual quimati laijnamiquía cuali pa lajitic iyolo huan quichijtía cuali. Monequi pa quimatis quinchihuilis cuali oc sequin hual amo quinmiximati. Monequi pa quimatis lamaxtis.

<sup>3</sup>Monequi pa camo lahuanas. Ma camo ye cualancudo hual quinequis moanas ca oc se. Cayas cuali pa yes lalac hual quimati yuli cuali, hual amo cualani sinda quitas len hual amo cana quinami san yihual quinequi. Ma camo ye lalac hual quinequi quinlaxilía lajtomes, huan ma camo quixtoca quipía míac tomin.

<sup>4</sup>Ma quimati huelitía pa ichan ca lajmatilislí cuali. Ma quimati quinneltocaltí cuali ixolomes yoje pa quinequis quineltocasi inmintajtzin in xolomes.

<sup>5</sup>Quema, pampa sinda se lalac amo quimati huelitía cuali pa ichan, cuaquín ¿quinami quimatis huelitis cuali ca in laneltocanjmes? Amo huil.

<sup>6</sup>Se hual quinmiztía in laneltocanjmes ma camo ye lalac hual jan quipía je nadita pehuac quineltocac Jesucristo, yojque pa camo pehuas moixtocas huan moitas quinami se hué. Yojque yajmo huil quitas len unca cuali pa

quichías. Yojque ca nadita cuajnesi yes lapoluli quinami Dios quimacahuac pa mopolus in lili.

<sup>7</sup> Quema, monequi pa yihual hual laitzica yes lalacal hual quitasi cuali yehuanten hual amo quineltocalo Cristo. Unca pampa sinda yehuanten quimatilo da amo yuli cuali, yehuanten huan Satanás quihuejuecaltisi, huan Satanás quimoyaxcajtílis.

### *Quijtúa Pablo quinami monequi lachihualo in lapalehuinijmes*

<sup>8</sup> Huan jan yoje in lapalehuinijmes monequi pa yesi lacames hual yulilo yoje pa moxtin quinmitas ca lamajtilisli. Monequi pa camo lacuajcuamanasi, monequi pa camo quixtocasi cunisi míac hual lalahuanaltía. Monequi pa camo yesi lacames hual yulilo quitemujticate quinami yoje cuali o yoje amo cuali huil canasi míac tomin.

<sup>9</sup> Monequi pa se lapalehuini quipías lachipahuali in lajmatilisli pa iyolo hual in Espíritu Santo quichipahuilía. Huan ca in lajmatilisli yulis quineltocatica Jesucristo ca se lajtulisli ca mochi hual Dios technextilic quinami unca yihual Dios.

<sup>10</sup> Ma yoje, quiman ayamo mochihuaje lapalehuinijmes, monequi pa moxtin in oc sequin quimatisi pampa neli yulilo yoje cuali. Pampín ma quinlajlanican in laneltocanijmes quinami yulilo yehuanten. Yoje quimatisi sinda cayasi sequin hual quinequilosquiaya quinmotexpahuililo.

<sup>11</sup> Huan quinami in lacames, noje in sihuames lapalehuinijmes quipialo pa yulisi yoje pa moxtin quinmitasi ca lamajtilisli. Ma camo yén (yecan) sihuames hual quixtocalo laqueztinemilo len amo cuali inminahuac oc sequin. Ma yén (yecan) sihuames hual quimatilo yulilo ca lajmatilisli quizticate mochi hual quichihualo. Huan ma yecan sihuames hual oc sequin quimatilo pampa mochi hual quichihualo unca melahuac.

<sup>12</sup> Huan in lapalehuinijmes, ma quipía se lalacal jan se isihua san. Huan ma quimatican quinneltocaltican cuali inminxolomes, ma quimatican huelitican cuali pa inminchan yehuanten nojen.

<sup>13</sup> Nicmati pampa monequi pa yesi yojque in lapalehuinijmes. Yojque moxtin in laneltocanijmes laquetzasi ca lajtomes huejué pa yehuanten hual latequipanuililo cuali. Noje quimatisi lajtusi cuali pampa quineltocalo Jesucristo cuali huan pampa yihual quinchihuilía cuali yehuanten.

### *Mochi hual unca melahuac inahuac Dios technextilía pan ipampa quinami ticmolancuacuetzililo*

<sup>14</sup> Innojen lajtomes nimitzjcuilulijtica, Timoteo, mas que nichixtica pa camo nihuejcahuas nihualas ca tehual.

<sup>15</sup> Huan sinda nihuejcahuas nihualas, nimitzjcuilulijtica innojen lajtomes pa ticmatis quinami monequi pa yulis lachijtica se capa yes quin-tequipanuilijtica yehuanten hual quineltocalo toTata. Yehuanten cate ixolomes in Dios hual yultica. Moxtin yehuanten moitalo pa mochi ilanechiculisli Dios cajcapa cate laneltocanijmes. Quinapatililo ilajtol melahuac pa camo quixitinilo yehuanten hual quinequilo quixitinilo. Noje yehuanten cate quinami in cuajmaxalimes hual quipalejticate se cali, pampa quipalehuilo pa ilajtol yajtías momaztica pin lalticpan.

<sup>16</sup> Timoxtin in laneltocanijmes neli tiquijtulo ca se lajtulisli pampa unca niman hué in lajtol inahuac Cristo huan quinami ticmolancuacuetzililo. Pa yina amo ticmatiloaya aquí unca huan axan ticmatilo. Unca quinami quijtulo innojen lajtomes:

Yihual Cristo hual huan Dios catanijme, mochíac lalacal.

Monextic pan ipampa in Espíritu pampa yihual unca quinami Dios, amo quipixtica laijlaculisli.

Quitajque Dios ilanahuatinijmes hual cate ca yihual pin cielo, quitaje quiman yulic oc sejpá.

Lacames quilamachiltijque quinami yulini yihual capa yehuanten pa in lalimes pin lalticpan.

Lacames pin lalticpan quilalilijque inminlaneltocalisli.

Yec la'ajcoquili pa in cielo ca ilahueliltilisli hué huan cahuanilisli cualtichin pa cayas oc sejpá ca Dios.

## 4

### *Yehuanten hual yajmo quinellocasi*

<sup>1</sup> Ma yoje, quijtúa in Espíritu Santo inon ca lajtol melahuac. Quijtúa pampa quiman ajsilo in xixihuimes quiman yahui lami mochi inon hual Dios quichíac, cuaquín sequin mocahuasi pa quinellocasi toTata. Pehuasi quinellocasi ijyecames hual quinequisi quinlaicanasi pa quincuaajcuaamanasi, huan yojque pehuasi quinellocasi inminlamaxtilisli ijyecames ej'elehuis.

<sup>2</sup> Quema, in ijyecames amo cuajcuali quilalilo inminlamaxtilisli pa inminyolo lacames hual islacatilo. Mas que quinequilo nesilo quinami lacames melahuac, inminlamaxtilisli amo unca melahuac. San momachiltía pan ipampa len quijtulo islacatijcate yehuanten hual yajmo quinequilo quinellocalo ilajmatilisli pa inminyolo hual quinnextilía len unca cuali huan amo cuali. Yajmo quimatilo nindeno pa inminyolo ilajmatilisli. Unca quinami se domutzo capa yec lachichinuli se, yajmo lamatilo nindeno pampa in domutzo quintzacuilia.

<sup>3</sup> Ca inminlamaxtilisli, quinmaxtilo lacames pampa amo unca cuali pa monamictis se. Quinmililo pa camo quicuasi in lacualisli o oc se lacualisli, mas que Dios quinchíac innojen pa quincualosquiaya lacames hual neli quimatilo pampa ilajtol unca melahuac. Quema, quinchíac pa quincualosquiaya quisejtataloaya yihual pampa quinmacac.

<sup>4</sup> Mochi in hual Dios quichíac hual huil tijcualo, inon unca niman cuali pa quicuas se. Amo unca nindeno hual monequi pa se quilasas pa camo quicuas yihual sinda cana pa quicuas quisejtica Dios.

<sup>5</sup> Ticsehulo Dios pampa yojque yihual techtuchihuilía in hual tijcualo. Techtuchihuilía pan ipampa ilajtol huan pan ipampa quinami ticlajlanilo Dios. Pampín, ca in hual tijcualo unca quinami tehuanten ticmahuisujticate ca lamajtilisli.

### *Se hual quitequipanuilía cuali Jesucristo*

<sup>6</sup> Xiquinmili inon yehuanten tocnán. Sinda yoje ticchía, cuaquín tities se ilapalehuini niman cuali Cristo Jesús. Yoje moyolo mochicahuatis pan ipampa ilajtomes Jesucristo hual ticnellocasi, mochicahuatis pan ipampa in lamaxtilisli niman cuali hual tehual ticnellocatiahuiaya.

<sup>7</sup> Pa tities lapalehuini niman cuali pa Jesucristo, amo quiman xiquincaqui huan amo quiman xilaqueztinemi innojen miac lapuhualisli hual amo quijtulo nindeno pa quinextilis se quinami yulis pa in Tata. Cate lapuhualisli quinami quinpuhuililo ilamantzitas hual san quicaquilo yehuanten hual amo laijnamiquilo cuali. Ximonextilijtía ca mochi mochicahuatisli pa tiyulis quinami Dios quinequi pa tiyulis.

<sup>8</sup> Sinda se monextilía pa mochías chichahuac icuerpo (inacayo), cuaquín in quichihuilis len lapalehuilisli pa nadita. Ma yoje, sinda se monextilía ca mochi ichicahuatisli pa yulis quinami Dios quinequi pa yulis, cuaquín inon

quipalehuis pa mochi. Unca pampa Dios techilía neli sinda timonextilisi yoje, cuaquinon tiyulisi cuali ca mochi hual yihual quinequi techmaca nican quiman ticate pan laticpan huan nepa quiman ticayasi ca yihual capa huelitjtica.

<sup>9</sup> Huil ticlalilo mochi laneltocalisli ca in lajtulisli, monequi pa moxtin quineltocasi.

<sup>10</sup> Yoje, pa quineltocasi inon, titequipanulo chicahuac. Huan timoanalo pa ticsulahuasi Satanás pa ticlamachiltisi Dios ilajtol, pampa ticlalije tolaneltocalisli ca Dios hual yultica. Yihual quinquixtía moxtin lacames pin miac polehuilisli. Huan ma yoje, yehuanten hual quineltocalo quimatilo pampa yihual quinquixtía pa camo polehuisi. Inon unca ipolehuilisli inminlajlaculisli huan unca polehuilisli niman hué.

<sup>11</sup> Xiquinmili chicahuac in laneltocanijmes innojen lajtomes hual axan nimitzilic, xiquinmaxti.

<sup>12</sup> Amo xicmacahuilti amaqui pa mijxixicus pampa tehual tilacal yancuic. Monequi pa timochías se lanextilini hual quinextilía quinami Dios quinequi pa yulisi yehuanten hual quineltocalo. Ximochía lanextilini pan ipampa quinami tilajtúa huan quinami tiyuli huan quinami tilalasojla huan quinami tilaneltoca. Huan ximochía lanextilini pan ipampa quinami timocahua ca se lajtulisli san ca Dios ilajtol.

<sup>13</sup> Quiman ticchixtica pa nihualas, xiquinlachili cuali quinami quichihualo quiman monechiculo in laneltocanijmes. Xiquita pa cayas se ca mochi sejse lanechiculisli hual quinmomaxtilis ilajtol Dios. Xiquita pa cayas se cajcapa monechiculo hual quimati quinchicahualtía in laneltocanijmes pa camo quineltocasi lamaxtilisli hual amo melahuac. Xiquita pa cayasi ca yehuanten hual quimatilo quinnextililo ilajtol Dios.

<sup>14</sup> Huan tehual ximoiztía pa camo timocahuas pa titequipanus in lahuelilitisli hual Dios mitzmacac pan ipampa in cuali hual san yihual huil tejchihuilia, ma camo mochías tipichin. In lahuelilitisli mitzmacac pan ipampa in lajtulisli hual quijtuloaya yehuanten hual lajtuloaya pan ipampa in Espíritu Santo. Cataya quiman inminhuyeyenten in laneltocanijmes mitzlalilije inminmajmjuan mopan tehual.

<sup>15</sup> Xiquijnamiqui mojmosta innojen lajtomes hual nimitzijcuiluilijtica pa ticchías. Ximomaca ca mochi moyolo pa tiquinneltocas innojen lajtomes, pa yoje moxtin quitasi pampa tehual tiajsi ticmati tiyultía quinami yuliaya toTata.

<sup>16</sup> Ximolachili pa tiyulis cuali, ximolachilijtía quinami tilamaxtía. Xiyuli huan xilamaxti cuali ca mochi moyolo. Sinda ticchías yoje, cuaquin timoquixtis pa camo tipolehuis tehual huan tiquinquixtis pa camo polehuisi yehuanten hual mitzcaquisli.

## 5

*Yoje monequi pa yulis lachijtica se quiman yes moita ca in laneltocanijmes*

<sup>1</sup> Amo xicajua se abuelito ca cualanilisli. Quema, xiquihuica ca anmohuían pa tiqulis len quichijtica hual amo cuali. Xiquili in quinami yihual motajtzin tehual. Xiquinchihuili in lacames yajyancuic quinami yehuanten cataloaya mocnían.

<sup>2</sup> Xiquinchihuili in ilamantzitas quinami ticchihuilisquiaya monantzin huan xiquinchihuili in sihuames yajyancuic quinami cataloaya mocnían sihuames. Huan ximoiztía pa ticneltocas mochi ilajtol Dios hual technextilía

inon hual cana cuali pa quichihuasi lacames huan sihuames quiman yes tilaqueztica ca in sihuames yajyancuic.

<sup>3</sup> In sihuames inminhuían xiquinmita ca lasojlalisli yehuanten hual amo huil molacualtilo.

<sup>4</sup> Ma yoje, sinda se sihual ihuían quinpía ixolomes o ixohuiyojmes, cuaquín ma lapehualtican pa quimatisi ixolomes o ixohuiyojmes quinami monequi pa quinchihuilisi cuali inminnantzitzían, quinami Dios quinequi pa quinchihuilisi. Ma quinlachilican, pampa Dios quita cuali inon.

<sup>5</sup> Huan in sihual hual mocahua ihuían, amo quipixtica aqui quilachilía, cuaquín yihual quichixtica pa Dios quipalehuis. Yoje yuli quilajlantica Dios pa quilachilis, lajtúa ca Dios yihualitonali, pa semilhuil huan pa layúa.

<sup>6</sup> Huan in sihual ihuían hual yuli quilantica míac tomin pa yihual ihuían, yoje yihual, mas que yultica ca icuerpo (inacayo), unca quinami miquic ca iyolo.

<sup>7</sup> Monequi pa tiquinmilis pa noje quinneltocasi innojen lajtomes. Yoje amaqui huil quinhuejuecaltis inahuac quinami yulilo.

<sup>8</sup> Sinda unca se hual amo quinequi quinlachilía icnían, quema, huan amo in san, sinda se amo quinequi quinlachilía yehuanten pa íchan, yoje yihual quinami quijytutica pampa yajmo quinneltoca Jesucristo. Neli amo unca yoje elehuis se hual amo quiman quilalic ilaneltocalisli ca Jesucristo.

<sup>9</sup> Laneltocanijmes quipialo pa quinlachilisi in sihuames inminhuían hual quintequipanuulilo in laneltocanijmes. Ma yoje, quiman quijcuilulo itoca se sihual ihuían pan amal ca in oc sequin sihuames inminhuían pa quintequipanuulisi in laneltocanijmes, cuaquín ma ye se sihual ihuían hual ajsic quinpíac sesenta xixihuimes huan axan moviejojtítia. Ma ye se sihual ihuían hual yuliaya ca se ilahuical san.

<sup>10</sup> Monequi pa yes se sihual ihuían hual quinchihuilijtinemini cuali, hual moxtin quimatilo quinami quichijtinemini cuali huan yoje quijytulo. Monequi pa yes se sihual ihuían hual quinscaltic xolomes. Monequi pa yes sihual ihuían hual quimati quinmosehuiltía yehuanten hual ajsilo pa íchan huan quintequipanuulía, quema, quinpactica inmicxihuajmes in laneltocanijmes quiman ajsilo. Monequi pa yes sihual ihuían hual quimati quinpalehuía yehuanten hual panujticate icnotilisli o lacocoltilisli. Monequi pa yes sihual ihuían hual yulini quimaztataya míac lachihuaya cuali.

<sup>11</sup> Sihuames yajyancuic hual inminhuían, amo xiquijcuilu inmintocajmes pan amal pa latequipanuulisi, pampa lamatisi lanequilisli pa se lalac. Cuaquín yajmo quinequisi quitequipanuulisi Cristo pan ipampa quinami quintequipanuulilo in laneltocanijmes. Quinequisi monamictisi oc sejpa.

<sup>12</sup> Yoje Dios quinmotexpahuilis pampa amo quinequisi lamisi quichihuasi inon hual neli quiliye yahuiloaya pehualo quichihualo. Quiliye pampa quinequiloaya quitequipanuulilo Cristo pan ipampa quinami quintequipanuulilo in laneltocanijmes.

<sup>13</sup> Huan amo inon san. Yehuanten mochihualo latzejquimes, paxalujtinemilo pa se cali huan pa oc se cali. Huan amo jan mochihualo latzejquimes san. Noje pehuasi latenehuasi, pehuasi quinequisi quimatisi innojen hual amo quinpialo nindeno pa quitasi, quijytuticate len amo cuali pa quijytusi.

<sup>14</sup> Pampín, nicnequi pa monamictisi oc sejpa in sihuames yajyancuic hual inminhuían, pa quinpíasí xolomes, huan pa quiztinemisi inminchan. Yoje, se hual amo quinequi quinneltoca toTata amo huil quinmotexpahuilis. Monequi pa molachilisi pa camo quinpanus inon.



<sup>15</sup> Unca pampa axcan cate sequin sihuames inminhuían hual moquixtije pa iojli Cristo huan canaje iojli Satanás.

<sup>16</sup> Huan sinda unca se sihual hual quineltoaca Cristo huan yihual quinpía sihuames inminhuían chantiticate pa ichan, monequi pa in sihual quinpalehuis in sihuames inminhuían. Ma camo momacacan tequil in laneltocaniymes ca innojen sihuames inminhuían umpa pa yoje in laneltocaniymes huil quinlachilisi sihuames inminhuían hual quema, amo quipialo aqui quinlachilis.

<sup>17</sup> Cate abuelojmes ca in laneltocaniymes hual huelitilo niman cuali. Ma quijtucan moxtin pa inmnyolo pampa innojen abuelojmes monotzalo pa quinlasojlasi moxtin ca lamajtilisli pampa cate abuelojmes huan noje monotzalo pa moxtin quinmacasi lasojlalisli pampa huelitilo. Quema, monotzalo pa quipiasi miac lasojlalisli, huan amo san in lasojlalisli hual monotzalo yehuanten hual jan abuelojmes san. Ma yoje, in abuelojmes hual tequipanulo chicahuac pa quilamachiltisi ilajtol Dios huan quimaxtilo, yehuanten monotzalo niman miac pa oc sequin quinlasojlasi ca lamajtilisli.

<sup>18</sup> Monotzalo quipialo lasojlalisli pampa ilajtol Dios lajcuiluli quijtúa yoje, quil: “Amo xiquilpi pa itzontecon pa camo huil lacuas se buey hual quitelicsa in trigo.” Huan noje: “In tequipanujquil monotza cana ilaxlahuilisli.”

<sup>19</sup> Amo xilajlani quinami quichíac laijlaculisli se hual moviejotitc sinda jan se san quimotexpahuilía. Sinda ome o ye quimotexpahuililo, cuaquín xilajlani.

<sup>20</sup> Yehuanten hual quichihualo len amo cuali xiquinmajua inmnyampa moxtin, pa noje in oc sequin momajtisi pa quichihuasi len amo cuali.

<sup>21</sup> Nechizticate Dios huan Cristo Jesús huan inminlanahuatinijmes pin cielo (ilhuicac) hual quinlajtultije pa quinqtequipanuilisli, nechizticate quiman nimitzjicuilulía pa tiquinneltocas in lajtomes. Xiquinneltoca, amo ximomacahuiltili pa ticchías quinami ticnequi quiman yes monequi pa tiqulis se pampa quichíac laijlaculisli. Xiquili quinami unca melahuac. Huan sinda monequi pa tiqulis se pampa quipía laijlaculisli, cuaquín amo xiquita cuali se quiman tiquita amo cuali in oc se hual noje quipía laijlaculisli.

<sup>22</sup> Amo xicnequi xiejsehui pa ticlalilis momajmajuan pan se lalac. Nicnequi niquijtúa, amo xiejsehui pa ticmonextilis ca se lajtulisli ca se hual cuajnesi mitzilis pampa in Tata quinoztac pa quitequipanuilis yoje capa quipías lahuelilitilisli quinami in abuelojmes. Monequi pa ticchixtías pa quiman ticmatis pa moyolo yihual yuli quinami nimitzic monequi pa yulisi in abuelojmes. Yoje amo timoitas ticpixtica len ca oc se ilaijlaculisli. Ximopili ca se lajtulisli ca mochi ilajtol Dios pa camo timoitas ca laijlaculisli.

<sup>23</sup> Yajmo xicuni jan al san. Xicuni nadita iayo uva coc pa pajtis moyolo, pampa miac tonalijmes mitzcocúa.

<sup>24</sup> Xicmati cuali pa moyolo quinami yulilo in lacames hual tia tiquinlajtultía. Sequin lacames inminlaijlaculisli quimatilo moxtin in laneltocaniymes, quimatilo cuali da quichihuaje laijlaculisli. Pampín jan ajnaxcan yesi latexpahuili huan yoje amo monequi pa quilajlanisi inahuac inon. Oc sequin lacames inminlaijlaculisli amo quimatisi jan ajnaxcan. Ma yoje, quiman quilajlanilo, cuaquín quimatisi cuali huan noje yesi latexpahuili.

<sup>25</sup> Huan jan yoje, ca sequin lacames quimatilo moxtin quinami quichihualo cuali. Ca oc sequin lacames amo quimatilo quinami quichihualo cuali. Ma yoje, quimatisi cuali se tonali, amo huil mocahua lalatili quinami quichihualo cuali.

## 6

<sup>1</sup> Moxtin hual cate tequipanujquimes hual amo quilaxlahuilo, ma quinmitacan inminte-cojuan quinami lacames hual monotzalo pa quintequipanuilisi quimazticate momajtilo inminlaixpan yehuanten, pa yoje inminte-cojuan amo quihuejuecaltisi Dios huan ilamaxtilisli.

<sup>2</sup> Huan yehuanten hual quipialo inminte-cojuan hual quineltocalo Jesucristo, ma camo quinxixicucan inminte-cojuan pampa axcan yehuanten inmiciñan. Ma quintequipanuilican niman cuali. Unca pampa inminte-cojuan axan cate laneltocanjimes huan pampa inon, inminte-cojuan cayasi lapalehuili niman cuali pampa in tequipanujquimes quintequipanuililo cuali. Axan yehuanten cate inmiciñan laneltocanjimes hual quinlasojlalo. Xiquinmaxtitía innojen lajtomes, noje xiquinyantitía pa yulisi quinchijticate innojen.

### *In hual neli ipati*

Xiquinmaxtitía innojen, noje xiquinyantitía innojen lajtomes hual nía annimitzilía:

<sup>3</sup> Cuajnesi unca se hual lamaxtia ca oc se lamaxtilisli. Amo quipala ilamaxtilisli pa pehuas lamaxtis ca ilajtomes cuajcuali toTata Jesucristo. Amo quinequi lamaxtia ca in lamaxtilisli hual unca ca se lajtulisli ca quinami Dios quinequi.

<sup>4</sup> Cuaquín xiquinmaxtitía pampa in lamaxtini lajtúa pa iyolo quinami yihual unca se lamaxtini niman hué. Moita quinami yihual se hual neli quimati míac. Ma yoje, amo quimati nindeno. Yihual quinami se hual yajmo laijnamiquía cuali, pampa mojmosta quixtoca lajlanía quinami se hual amo laijnamiquía cuali. Quitemúa quinami huil quinlaxilis lajtomes ca oc sequin pampa quinequi pa se lajtol quinequi quijtúa in hual yihual quinequi. Lacames quinami yihual mochihuasi hual quipilijtiasi laxiculisli oc sequin lacames. Pampín mocualantilo ca yehuanten pampa amo mochihuasi ca se lajtulisli. Lahuejuecaltilo huan quijtulo lajitic inminyolo o ca lajtol chicahuac pampa amo cate cuali yehuanten hual amo cate ca se lajtulisli ca yehuanten. Cuajnesi quinequilo quinchihuililo amo cuali.

<sup>5</sup> Huan yoje quintocasi quinlaxilijticate lajtomes cualanticate. Yehuanten lacames hual amo quimatilo laijnamiquilo cuali, yajmo lajtulo ca lajtol melahuac. Quijtulo pampa huil mochihuasi quinami huejueyenten huan huil canasi míac sinda monextisi quinami lacames hual yulilo quichijticate quinami Dios quinequi.

<sup>6</sup> Huan neli se quipias míac sinda yuli quichijtica quinami Dios quinequi. Yoje mocahua ca paquilisli pa iyolo ca len Dios quimaca, amo quinequi quijnamiquía len yes hual amo quipía.

<sup>7</sup> Quiman tilacatiye, amo ticualicaje nindeno pin lalticpan. Huan amo huil tiquihuicalo nindeno ca tehuanten quiman timiquisi.

<sup>8</sup> Ma yoje, sinda ticpialo len pa tijcuasi huan totzotzomajli huan capa tichantilo, cuaquín ticayasi ca paquilisli ca inon.

<sup>9</sup> Yehuanten hual quinequilo mochihualo lacames huan sihuames hual quipialo míac tomin, cuaquín ca in lanequilisli Satanás quintilanilía inminyolo. Unca quinami se laquitzquiloni hual quilalic Satanás pa quinquitzquisquiaya pa yojque quinmoyaxcajtilis yehuanten. Cuaquín pehuasi quinequisi niman míac hual quinequilo yehuanten hual amo laijnamiquilo cuali. Huan yojque quinmijlacultilo inmincuerpo huan inminyolo. Lanequilisli amo cuali quinami inon quinmijlacúa lacames, quinpolehuiltis, unca quinami in lanequilisli quinmijlacúa yehuanten.

<sup>10</sup> Quema, pampa sinda se yuli quinectica quipía míac tomin, cuaquin yihual yahui mocahua capa moitas quinchijtica míac inon hual amo cuali. Pampín yihual panus lacocoltilisli. Huan sequin lacames moquixtije pan iojli Jesucristo, amo quijnamicticate in hual quichijtcate pampa yulilo quinecticate canaló tomin. Pampa inon panulo míac lacocoltilisli pa inminy-olo.

### *Ximoana cuali pa in hual ticneltocalo*

<sup>11</sup> Axan, tehual, tilacal hual tictequipanuilijtica Dios. Pampín, amo ximomacahuiltil pa tiquinchías innojen. Ximomajti pa tiquijtus pa moyolo pa tiquinchías innojen hual axan nimitzilic. Huan ca mochi moyolo, xictemu quinami timochías ca se lajtulisli ca mochi ilajtol Dios. Ximotolini pa ticneltocas niman cuali Dios ilajtol huan pa tilalasojlás míac. Huan ximotolini pa timopepenialtis quiman yes mijchihuillilo len amo cuali. Huan ximopepenialti cuali ca lacames. Amo xicualani ca yehuanten sinda amo quimaitlo cuali len ticnequi tiquijtúa.

<sup>12</sup> Ximoantía ca in moanalísli cuali, in quinequi quijtúa, ximoana pa ticsulahuas mochi hual tejtzacuilla pa camo ticneltocasi cuali Jesucristo. Xicneltoca ca mochi moyolo, pampa axan ticpia yulilisli calica Dios mitzmacas mochi hual quinequi pa ticpiás, yulilisli hual amo quiman lamis. Dios mitznótzac pa mitzmacas in yulilisli quiman tiquilic pampa ticneltocac Dios ilajtol. In in lajtulisli cualtichin, inon tiquilic neli inminlaixpan míac lacames hual huil quijtulo neli pampa mitzcaquije.

<sup>13-14</sup> Unca Dios hual quimaca yulilisli pa moxtin. Unca Jesucristo hual quilic neli in lajtulisli cualtichin in tonali quiman quilic neli Dios ilajtol ilaixpan Poncio Pilato. Yoje, inminyampa Dios huan Jesucristo, nimitzilía chicahuac pa camo quiman timocahuas pa ticchías in hual nimitzilic pa ticchías, huan pa ticchías yoje cuali pa camo huil mitzmotexpahuilis amaqui. Quema, xicchía yoje quiman ticchixtica pa hualas toTata Jesucristo.

<sup>15</sup> Huan in tonali hual panus inon hual Dios quilalic, cuaquin yihual Dios quinextis Cristo. Quema, jan yihual Dios san hual moxtin laquetzalo niman hué inahuac yihual, san unca iyaxca pa huelitis pin cielo huan pan lalticpan. Yihual in niman hué, inminhué moxtin in huejueyenten, yihual inminTata moxtin oc sequin hual huelitilo.

<sup>16</sup> Jan yihual san amo quiman mocahua yuli. Amo quiman pehuac, amo quiman lamis. Yihual chanti capa lahui niman chicahuac huan pampín amaqui huil moajxiltía capa yihual. Amo quiman cataya se pin lalticpan hual quitac, amo unca se hual huil quita. In Dios ma quilasojlacan niman míac huan ma quipía chicahualisli hué hual amo quiman lami. Yoje ma ye.

<sup>17</sup> Yehuanten hual quipialo míac tomin nican pan lalticpan, ma quijnamiguican inmintomin amo huil huejcahuas pa quiman. Pampín, xiquinmili chicahuac pa camo moitasi quinami huejueyenten. Xiquinmili pa camo quijtusi pa inminyolo pampa mochi inminlapalehuilisli unca pan ipampa inmintomin. Xiquinmili pa quilalilisi inminlaneltocalisli ca Dios. Yihual techmaca mochi pa ticayasi ca paquilisli, yihual amo tzutzucal.

<sup>18</sup> Xiquinmili chicahuac pa quichihuasi in hual cuali. Quema, xiquinmili pa yulisli quichihuilijtcate niman míac hual cuali. Xiquinmili pa camo quiman huejcahuasi pa quinxiluilisli in hual inminyaxca ca yehuanten nojen huan oc sequin hual amo quipialo.

<sup>19</sup> Sinda yojque quichihuasi, cuaquin Dios quinlaxlahuis ca míac hual ipati nepa pin cielo (ilhuicac). Cayas quinami yehuanten moajcoquilisli pin cielo

len hual ipati niman míac. Inon neli quinmachiltis pa inminyolo pampa neli quipialo len hual amo quiman xitinis hual ca inon quilalilo mochi inminlaneltocalisli. Cayas pa yehuanten pin tonalijmes hual hualalo. Yoje huil canasi in yulilisli hual unca yulilisli melahuac hual amo quiman lamís.

*Laqusa ca in amal quilijtica Timoteo len monequi quichía*

<sup>20</sup> O Timoteo, Dios mitztlalilic pa ticmaxtis mochi ilamaxtilisli Jesucristo. Ximoiztía míac pa camo quiman timocahuas pa ticmaxtis in lamaxtilisli. Yoje yehuanten hual mitztocasi pa lamaxtisi nepa capa tehual tilamaxtic noje quipiasi mochi in lamaxtilisli inahuac Jesucristo. Huan amo quiman xijcaqui innojen lamaxtilisli hual amo unca ca se lajtulisli ca Dios. Amo monotzalo yehuanten inminlajtomes hual quinmaxtilo. Quijtulo pampa inminlajmatilisli unca hual Dios quinmaca huan unca in lajmatilisli hué. Ma yoje, inminlajmatilisli amo lajmatilisli, jan islacatilisli san. Monextía amo ca se lajtulisli ca Cristo ilajmatilisli melahuac.

<sup>21</sup> Huan cate sequin hual quineltocaje in lajmatilisli amo melahuac huan pampín mijcuantinemije pan iojli Cristo. In cuali hual san Dios huil tejchi-huilía ma caya ca tehual.

## In oc se amal hual Pablo in lanahuatini quijcuiluilic Timoteo

<sup>1</sup> Nehual Pablo, ilanahuatini Cristo Jesús. Nilanahuatini pampa Dios vojque quinequi. Nimochíac ilanahuatini pan ipampa in lajtulisli melahuac hual neli nechilic Dios inahuac in yulilislí hual ticpialo pan ipampa Cristo Jesús. Inon unca pampa Dios techita quinami ticate capa cataya Cristo pan tonali quiman miqúic huan yulic oc sejpa huan lejcuc pin cielo.

<sup>2</sup> Nimitzicuiluilijtica tehual, Timoteo, noxolol hual nimitzlasojla míac. Dios toTajtzin huan Cristo Jesús toTata ma mitzmacac inminlachihualisli cuali huan inmicnililislí huan inminmosehuilislí pa moyolo.

### *Quijtúa melahuac ilahueliltislí Cristo*

<sup>3</sup> Nicsehuía Dios hual nictequipanuilía ca in ilajmatilislí noyolo, quinami quitequipanuilinijme notajtzitzían. Quema, nicsehuía Dios jan quinami niquixtoca mojmosta nimitzijnamiquía quiman yes niclajlanía Dios pa tehual. Yihualitonali, pa semilhuil huan pa layúa niclajlanía Dios pa tehual.

<sup>4</sup> Nicnequi míac nimitzita quiman nimoijnamiqúiltía quinami tijchoquilic. Yoje, pa in tonali nimitzitas oc sejpa, nicayas niman ca paquilislí.

<sup>5</sup> Axan niunca laijnamiqúiltíli quinami ticneltoca chichahuac toTata. Yoje unca laneltocalislí quinami in hual pehuaya caya pa mochan quiman pehuaya quineltoca moabuelita Loida huan cuaquín quineltocaya monantzin Eunice. Huan nicmati pa noyolo tehual noje ticpía in laneltocalislí quinami yehuanten.

<sup>6</sup> Pampa inon, nimitzijnamiquiltía pa timoejsehuiltis pa tictequipanuilis toTata niman cuali ca in chichahualisli hual Dios mitzmacac pin tonali nimitzlalilic nomajmajuan mopan. Quema, ximoijsehuilti quinami tiqúijsehuiltisquiaya pa milinis se tixuxli.

<sup>7</sup> Ximochihualti inon, pampa Dios amo techmacac yolo hual momajtía. No, in toyolo hual techmacac quipía chichahualisli huan lasojlalisli. Huan techmaca lahueliltislí pa timosulahuasi quiman yes ticnequilo ticchihualo len amo cuali. Huan techmaca chichahualisli pa ticchihuasi len Dios quinequi pa ticchihuasi.

<sup>8</sup> Pampa inon, amo xipinahua ca ilamachiltislí cuali toTata. Huan amo xipinahua ca nehual, mas que niunca latzacuali pa calijtic. Quinmacahuiltic Dios pa nejtzacuasi pa yoje nictequipanuilis toTata nican. Pampín, amo xipinahua nonahuac nehual. Quema, huan nehual ma tipanucan lacocoltilislí. In tehpanujtica pampa ticneltocalo in lamachiltislí cuali. Ma tipanucan lacocoltilislí, pampa ticpialo Dios ichichahualisli calica huil tipanusi.

<sup>9</sup> Yihual techquixtic pa camo tipolehuisi, huan tejchiphauilic huan technotzac pa tictequipanuilisi yihual san. Yoje tiquitasi quinami Dios amo mocahua quichía cuali. Pampa inon monequi pa tiyulisi ticchijticate cuali quinami yihual. Dios amo technotzac pampa techitaya lacames hual ticmatiloaya ticchihualo cuali. Technotzac pampa yihual quipiaya pa techilis len, huan quinequiaya lanextili quinami yihual lachihuilía cuali. Huan Dios techitaya pa tejchihuilis tehuanten ilachihualisli cuali pan ipampa Cristo Jesús nepa capa ayamo quipehualtic in lalticpan.

<sup>10</sup> Axcan ticmatilo ilachihualisli cuali pampa hualac Cristo Jesús hual techquixtía pa camo tipolehuisi. Hualac pan lalticpan huan technextilic ilachihualisli cuali Dios. Cristo Jesús quinchíac ome lachihualisli quiman

hualac pan lalticpan: Miquic huan yulic oc sejsa. Yoje yajmo timomajtilo quiman ticpialo pa timiquisi. Noje Cristo technextilic cuali pampa huil ticpiasi yulilisi hual amo quiman lamis sinda ticneltocalo in lamachiltilisi cuali.

<sup>11</sup> Huan nehual Dios nechlajultic pa niyes lamachiltini pa in lamachiltilisi cuali, huan pa niyes lanahuatini pa in, huan pa niyes lamaxtini pa in.

<sup>12</sup> Pampa inon, noje nipanujtica innojen lacocoltilisi. Ma yoje, amo nipinahua, pampa niquiximati Dios, hual ca yihual niclalic nolaneltocalisi. Neli nicmati yihual huil nechpía pa como nimoitas pin polehuilisi pan in tonali hual mocuepas Cristo. Hualas pa nechanas pa yoje amo quiman nilamis nicayas ca yihual. Inon nicmati neli pampa niclajlanic Dios pa yihual nejchihuilisi inon.

<sup>13</sup> Xiquijnamiqui mojmota quinami tichcaquic nilamaxtic, huan tehual xiyuli huan xilamaxti jan quinami quijtulo nolajtulisi, pampa nolajtomes cate ca se lajtulisi ca ilajtol Dios. Quema, xicchia yoje ca in laneltocalisi huan lasojlalisli hual ticpía pampa mitzmacac Cristo Jesús.

<sup>14</sup> Dios mitzmacac in tequipanulisi pa timoanas ca molamaxtilisi pa yoje tiquinsulahuas moxtin hual quijtulo pampa amo unca melahuac ilamachiltilisi cualtichin Cristo. Ximoana pan ipampa in Espíritu Santo hual ticpialo lajtic tehuanten.

<sup>15</sup> Ticmati pampa moxtin yehuanten in laneltocanijmes nepa pin lalticpan Asia amo quinequije nechpalehuije. Ome ca yehuanten cate Figelo huan Hermógenes.

<sup>16</sup> Ma quinmicnili in Tata yehuanten pa ichan Onesíforo, pampa yihual Onesíforo nejchihuilic mía pa nimoitasquiaya ca paquilisi sejsa huan oc sejsa. Huan yihual amo pinahuaya pampa niunca latzacuali pin calijtic huan ni'ilpitica ca teposli.

<sup>17</sup> No, quiman ajsic nican pin caltilan hué Roma, nechtemuc ca mochi iyolo huan nechitac.

<sup>18</sup> Yojque quiman Onesíforo moitas iyampa Dios, ma Dios quicnili quiman quilisi len yahui cana pa ilaxlahuilisi. Huan tehual, Timoteo, ticmati niman cuali quinami cuali Onesíforo nechpalejtiahuiaya nepa pin caltilan Efeso.

## 2

### *Se iguache cuali Jesucristo*

<sup>1</sup> Tehual, noxolol, ximochicahualti ca in lachihualisi cuali hual mijchi-huilic Cristo Jesús.

<sup>2</sup> Mochi tonali quiman ticataloaya pin mía lacames hual quimatiloaya pampa unca neli in hual nimitzmaxtini, nepa timonextilic mía. Yoje, xiquinmaxti oc sequin lacames in hual timonextilic. Ma yén (yecan) lacames hual neli quineltocalo toTata, lacames hual huil quinmaxtisi oc sequin.

<sup>3</sup> Tictequipanuilijtica Cristo Jesús. Pampín, xipanú lacocoltilisi quinami se guache panúa lacocoltilisi quiman quitequipanuilijtica ilaicnani pin moanalisi.

<sup>4</sup> Se guache amo momacahuiltía pa quipías tequipanulisi quinami yehuanten hual amo guaches. No, se guache quipía pa quichías quinami quinequi in laicanani hual quilaquehuac.

<sup>5</sup> Huan jan yoje, sinda se unca pan se laluxtilisi, amo canas in lalxlahuilisi sinda amo canas quinami quijtua ilajtol in laluxtilisi.

<sup>6</sup> Huan sinda se lalac tequipanuc mía pa laquis in hual quitocac, unca iyaxca pa quipehualtis ilapixcalisi ilaquilyo in hual quitocac.

<sup>7</sup> Xiclali in pa motzontecon len niquijtúa, pampa mitzmaca in Tata lajmatilisi ca mochi.

<sup>8</sup> Xiquijnamictía Jesucristo hual miquic huan cuaquín yulic oc sejpa huan axan amo quiman miquis. Yihual imíahuil in hué David huan amo quiman lamis huelitís. Inon unca quinami quijtúa ilamachiltilisi cuali Cristo Jesús hual niclamachiltía.

<sup>9</sup> Pampa inon nipanúa inon, nipanúa lacocoltilisi huan pampín nejtza-cuaje pa calijtic mas que amo nicchihuaya len amo cuali. Ma yoje, mas que nehual niunca latzacuali, amo unca latzacuali Dios ilajtol.

<sup>10</sup> Pampa inon nimopepenialtía amo nicualantica pampa nejchihuilijtcate mochi innojen amo cuali. Nimopepenialtía pa yojque quinpanus cuali yehuanten hual Dios quinlajtultic pa yesi ilacames. Nimopepenialtítica amo nicualantica ca mochi inon pa yoje yesi laquixtili pa camo polehuisi. Inon quinpanus pan ipampa ichicahualisi Cristo Jesús, huan quipiasí lahueliltilisi hué huan laixpelalisi cualtichin hual amo quiman lamis.

<sup>11</sup> Huil ticlalililo mochi laneltocalisi ca in lajtulisi hual quijtúa yoje: Sinda ca Cristo timiquije, noje ca yihual tiyulisi.

<sup>12</sup> Sinda timopepenialtilo amo ticalanticate ca in amo cuali hual tejchi-huililo, cuaquín noje ca yihual tihuelitisi.

Sinda tiquijtulo pampa amo tiquiximatilo Cristo, cuaquín yihual noje quijtus pampa amo techiximati tehuanten.

<sup>13</sup> Sinda amo tilamisi ticchihuasi in hual tiquilije Cristo neli pampa tiyahuiloaya ticchihualo, ma yojque yihual neli lamis quichías len yes yihual quilic pampa yahuiaya quichía, pampa yihual amo huil momacahuiltía pa islacatis inahuac nindeno hual yahui quichía.

### *Se tequipanujquil hual Dios quixtoca*

<sup>14</sup> Xiquinmijnamiquiltitía laneltocanijmes ca innojen lajtomes, nicnequi niquijtúa, innojen lacames hual tiquinmilic pa yesi lamaxtinijmes pa Dios ilajtol. Xiquinmili chichahuac ilaixpan Dios pa camo quinlaxililo lajtómes ca amhuanten, pampa yehuanten hual quicaquilo lamilo molapolultilo.

<sup>15</sup> Ximotolini ca mochi moyolo pa tiyulis jan yoje quinami Dios quita cuali. Xictequipanuili cuali Dios pa yojque amo tipinahuas quiman Dios mitzajlanis pa mitzmacas molaxlahuilisi. Huan amo tipinahuas sinda tictequipanus cuali Dios ilajtol melahuac.

<sup>16</sup> Huan ximijcuani pa camo ticayas ca yehuanten hual lamaxtilo ca se lamaxtilisi hual amo monotza huan amo unca quinami quijtúa Dios ilamaxtilisi. Quijtulo pampa quimaxtilo ilajtol Dios huan amo quijtulo melahuac, amo unca quinami quijtúa ilajtol. Yehuanten cate hual quimaxtilo inminlamaxtilisi lacames hual amo huil laijnamiquilo cuali. Yultialo quijttucate huan quichijtcate len amo unca quinami quijtúa Dios ilamaxtilisi.

<sup>17</sup> Huan yehuanten inminlamaxtilisi quinmijlacus in oc sequin laneltocanijmes, mocahuasi pa quineltocasi cuali Cristo. Inminlamaxtilisi unca quinami se sahual hual moscaltitía hué pan se icuerpo (inacayo), quilantía. Óme lacames hual quimaxtilo yoje cate innojen Himeneo huan Fileto.

<sup>18</sup> Yehuanten moquixtije pa iojli Cristo capa quita se mochi imelahualisi in lamachiltilisi cuali. In omenten quijtulo pampa axan panuc in tonali quiman Dios tehyulilic, quijtulo pampa quinyulilic jan toyolo san pan tonali quiman ticneltocaje Jesucristo. Quijtulo pampa quiman timiquisi, cuaquín tocueros (tonacayo) amo yulisi oc sejpa. Huan yoje quinmijlaculo sequin hual quineltocalo ilajtol Dios. Quinmijlaculo pampa quinlaneltocaltilo yoje hual amo quinami Dios ilajtol quimaxtía.

<sup>19</sup> Ma yojque, Dios ilajtol mocahua melahuac. Pa tehuanten unca quinami se cali ilalastili hual amo quiman mopoluá, mocahua itzindan in cali. Huan mas que sequin mocahualo pa quineltocasi quinami quijtúa Dios ilajtol, yehuanten hual neli quineltocalo Cristo mocahualo pa iojli, pampa yehuanten neli cate Dios ilacames. Momatis pampa yehuanten Dios ilacames jan quinami se amal layapali ca se temulol momatis pampa yes iyaxca se caltilan pan ipampa ilayapalisli in caltilan. Huan Dios ilayapalisli pa ilacames unca ilajtol hual yoje quijtúa: “In Tata quinmiximati yehuanten hual iyaxca”, huan “Moxtin yehuanten hual quijtulo neli pampa yehuanten cate Dios ilacames, ma yajmo yulican quichijtcate in hual Dios amo quinequi.”

<sup>20</sup> Calijtic se cali hué amo cate san hual lachihuali ca oro huan ca plata. Noje cate innojen lachihuali ca cuahuil huan ca lali. Sequin quinquipanulo pa tequipanulisli hual monotza miac. Oc sequin quinquipanulo pa tequipanulisli hual quixixiculo. In cali ca mochi innojen calijtic huil tiquijtulo unca quinami icali Dios nican pan lalticpan. Unca yehuanten hual monechiculo pa quimolancuacuetzilisi, quijtulo pampa mochihuaje ilacames Dios. Ma yoje, sequin ca yehuanten amo neli quineltocalo Cristo. Pampin Dios quinlasas pa quiahuac quinami quinlasalo innojen hual yajmo cate cuali pin cali hué. In oc sequin hual neli quineltocalo Cristo cate quinami innojen lachihuali ca oro huan plata.

<sup>21</sup> Yoje, sinda se lalac mochipahuilá pa yajmo quichías in hual Dios quixixicúa, yoje mochías se hual huil quichía in hual Dios quita quinami len hual monotza. Dios quichipahuilá iyolo pa yes iyaxca Dios hual huil quitequipanúa miac pa itequipanulisli. Yihual cayas lachijchihuali pa huil quichías len yes itequipanulisli cuali Dios.

<sup>22</sup> Tehual tilalac yancuic. Cate lachihualisli amo cuajcuali hual quinchihualo yehuanten hual amo lajnamiquilo cuali hual quitlanililo inminyolo in lacames yajyancuic pa quinchihuasi. Amo yoje miac quitlanililo inminyolo lacames amo yajyancuic. Tehual amo xicnequi xiquinchía innojen, ximomajti pa camo tiquinchías. Xicnequi ca mochi moyolo pa ticpiás moyolo ca se lajtulisli ca Dios ilajtol. Huan xicnequi ca mochi moyolo pa ticpiás mosehuilisli pa moyolo ca moxtin in laneltocanjmes. Yehuanten cate hual quilajlanilo Dios huan lajtulo hué inahuac yihual pampa quipialo inminyolo chipahuac.

<sup>23</sup> Amo quiman xicpiá nindeno pa tiquijtus quiman yes mitzlaquetzililo inahuac in hual quichihualo lacames hual amo quimatilo lajnamiquilo cuali huan ma yoje quixtocalo laquetzalo inminahuac innojen. Ticmatic quinami quisalo lalasalajtomes quiman yes lajtulo yoje.

<sup>24</sup> Huan monequi pa camo quilaxilis lajtomes se itequipanujquil Dios. Quema, monequi pa monextis cuali ca moxtin, amo quiman cualantía. Monequi pa quimatis lamaxtis, monequi pa quimatis mopepenialtis amo cualantica quiman yes quichihuililo len amo cuali.

<sup>25</sup> Monequi pa quinnexilis len unca cuali yehuanten hual molalilo ipan. Monequi pa quichías yoje amo ca cualanilisli o la'ajualisli, mojmosta quichixtica pa cuajnesi Dios quinpatilis inminyolo. Yoje pehuasi lajnamiquisi pa inminyolo quinami Dios quinequi. Huan quinequisi quijtusi pampa Dios ilajtol unca melahuac.

<sup>26</sup> Yoje mochihuasi lacames hual quimatilo moquixtilisi ilaquitzilioni in lili. In laquitzilioni unca in lamaxtilisi amo cuali. Pan ipampa ilamaxtilisi in lili, yihual in lili quinquitzquic pa yoje quichihuililosquiaya inon hual yihual quinequi.



## 3

*Pablo quijtúa quinami cayasi yehuanten pin tonalijmes quiman pehuas lamis mochi*

<sup>1</sup> Jan xicmati inon, Timoteo. Quiman ajsitihualalo in tonalijmes hual pehuas lamis mochi, cuaquín cayasi tonalijmes capa lacames panusi míac lacocoltilisli.

<sup>2</sup> Innojen panusi pampa mochihuasi niman ej'elehuis. Jan yehuanten san monequisi, mochi sejse ihuían. Quinequisi míac pa monechiculisli míac tomin, quimiactiticate mojmosta. Moixtocasi, quinmitasi tijtipichin oc sequin, lahuejuecaltisi, amo quinneltocasi inmintajtzitzían, amo quinequisi lasehuis, huan quixixicusli mochi hual unca iyaxca Dios.

<sup>3</sup> Amo quimatisi lalasojlasi, amo quiman quinequisi mochihuasi jan sejpa ca mosehuilisli ca oc sequin. Quincocolisli oc sequin, amo quimatisi motzacuilisli pa camo quichihuasi amo cuali, yesi quinami yulijquimes pin cuajlan hual amo mocahuasi pa quinequisi quichihuilisli lacocoltilisli oc sequin, molalisli ipan mochi hual unca cuali.

<sup>4</sup> Quintemacasi inmicián huan yehuanten hual quinmiximatilo ca yehuanten hual molalilo inminpan, ejsehuisi pa quichihuasi len amo cuali, amo quinequisi pa amaqui quinmilis quinami monequi pa yulisi, pampa quijtusi yehuanten inminhuían quimatilo mochi. Quixtocasi mopaquiltisi, amo quixtocasi quipaquiltisi Dios.

<sup>5</sup> Nesisi quinami lacames hual quimolancuacuetzililo Dios pampa yasi pa in tiopan huan quitzajtzilisli Dios. Ma yoje, neli quijtusi pampa Dios amo quipía lahuelilitisli pa techpalehuis.

Amo ximomacahuiltía pa tiquinnequis lacames quinami innojen, ximijcuaní pa camo ticayas ca yehuanten.

<sup>6</sup> Ca in lacames cate yehuanten hual calpanulo pa se cali huan oc se cali, motolinilo pa quinmaxtisi in sihuames hual amo quimatilo. Quinmaxtisi ca inminlamaxtilisli amo cuali. Huan in sihuames quineltovalo pampa amo quimatilo laijnamiquilo cuali. Quipialo míac laijlaculisli in sihuames huan pampa inon momajtilo huan ma yoje quixtovalo in lamaxtilisli amo cuali. Yulilo quinecticate quichihualo míac hual amo monotza, huan yulilo quinecticate quipialo míac hual amo unca cuali.

<sup>7</sup> Huan yoje yulilo monextilijticate len amo monotza hual quinnextililo innojen lamaxtinijmes amo cuajcuali. Ma yoje, in sihuames amo quiman ajsisi quimatisi len quinequi quijtúa Dios ilajtol melahuac.

<sup>8</sup> Innojen lacames hual lamaxtilo ca in lamaxtilisli amo cuali cate jan quinami Janes huan Jambres. Yehuanten lacames hual moquetzaje ipan Moisés. Jan yoje in lacames hual quimaxtilo in hual amo monotza noje moquetzalo ipan Dios ilajtol melahuac. Yehuanten lacames hual amo huil laijnamiquilo cuali. Amo monotza nindeno inminlamaxtilisli pampa amo unca quinami quijtúa Dios ilajtol melahuac. Yoje, Dios quinmilic pampa amo quiman lamisi inminpolehuilisli.

<sup>9</sup> Huan mas que lamaxtitiasi, ma yojque amo cayasi míac hual quineltovali inminlamaxtilisli, pampa moxtin quimatisi pampa unca inminlamaxtilisli lacames hual amo quimatilo laijnamiquilo, jan quinami quimatije quinami catani yoje in hual quimaxtinijme in ome lacames Janes huan Jambres.

*Pablo quinmaca Timoteo itequipanulisli jan oc sejpa san*

<sup>10</sup> Ma yoje, tehual amo tiquinami yehuanten, pampa pa mochi tonali tichlasojlaya huan ticnequiaya ticmatí mochi inon hual nicmaxtiaya, huan

ticnequiaya ticmati quinami niyuliaya, huan quinami nicnequiaya pa moxtin quimatisi Dios ilajtol, huan quinami nicneltocaya Jesucristo, huan quinami nimochicahuaitiaya ca yehuanten hual moquetzaloaya nopan, huan quinami nilalasojlaya, huan quinami nipanuaya lacocoltlisli quiman yes nechtojtocaloaya pa nejhihuillilosquiaya amo cuali.

<sup>11</sup> Ticmati quinami nechtojtocaloaya huan quinami nipanuaya lacocoltlisli quinami nechpanuc pa Antioquia huan Iconio huan Listra. Ticmati quinami niyec latojtocali miac nepa, nechcocoltloaya niman chicahuac. Ma yoje, mochi inon amo nejsulahuac, nechquixtic in Tata, amo nipolehuic.

<sup>12</sup> Huan moxtin hual quinequilo yulilo quinami Dios quinequi pa yulisi quineltoaticate Cristo Jesús, yehuanten hual amo quineltoocalo Cristo quitojtocasi pa quinchihuillisi mochi amo cuali huan tetzcuinuc.

<sup>13</sup> Lacames ej'elehuis mochijtiasi niman ej'elehuis quinami huil mojmosta, huan mochijtiasi lacuajcuamananjmes. Yehuanten yulisi lacuajcuamantinemisi huan yesi lacuajcuamanali.

<sup>14</sup> Ma yoje, tehual, xiyultia tiquinneltocatica innojen lamaxtilisli hual timonextilic hual ticmati pampa cate mejmelahuac. Titechijnamiquia tehuanten hual timitzmaxtije innojen.

<sup>15</sup> Huan ticmati pampa quiman tiyec xolotzindi huan pa axan ticmatic ilajtol Dios hual unca lajcuiluli. Ilajtol Dios lajcuiluli huil mitzmaca lajmatilisli pa tiyes laquixtili pa camo tiquitas polehuillisi pampa ticneltoaca Cristo Jesús.

<sup>16</sup> Mochi ilajtol Dios hual unca lajcuiluli Dios quinmilic ilajtunijmes pan ipampa iijyul iEspíritu pa yoje yehuanten quijcuilulosquiaya. Huan ilajtol lajcuiluli monotza pa se quitequipanus quiman se quinmaxtica oc sequin, monotza pa quitequipanus pa la'ajuas ca lasojlalisli quiman yes se quinequi quineltoaca lamaxtilisli hual amo melahuac. Ca ilajtol Dios quinextilis cuali quinami se lamaxtilisli amo unca quinami Dios ilamaxtilisli. Dios ilajtol lajcuiluli noje monotza pa quitequipanus se pa quinextilis oc se quinami canas oc seppa iojli Cristo sinda moquixtic pa iojli. Huan monotza pa quitequipanus se pa quinmaxti quinami Dios quinequi pa tiyulisi.

<sup>17</sup> Yojque, quiman quinmaxtilo Dios ilajtol lajcuiluli moxtin ilanelto-canijmes Dios, mochi sejse quipias lahueliltisli pa quichias in hual Dios quinequi pa quichias. Huil quichias mochi tequipanulisli cuali, pampa Dios quihueliltia pa quichias.

## 4

<sup>1-2</sup> Jesucristo toDios yahui nesi nican pan lalticpan pa huelitis huan pa quinmilis yehuanten hual yulilo huan hual miquije inon hual quinchihuillisi hual cuali huan amo cuali quiman yuliloaya pan lalticpan. Pampin, ilaixpan yihual nimitzyantia niman chicahuac pa ticlamachiltis ilajtol Cristo Jesús inminlaixpan lacames. Ximochijchia pa ticlamachiltis ilajtol Dios capa yes timoitas, xiclamachilti quiman yes tiquijtua unca tonali cuali pa ticlamachiltis, o quiman yes tiquijtua da amo unca tonali cuali. Xiquinmili oc sequin quiman quichijticate laijlaculisli. Xiquinmajmajua, xiquinhuica pa tehual mohuan pa tiquinyantis ca lasojlalisli pa quichihuasi cuali. Xiquinchihuili mochi inon timochicahuaitilijtica pa camo ticalanis ca yehuanten quiman yes huejchhuasi pa pehuasi quichihuasi cuali. Huan xiquinmaxti yoje mochi quinami huil tiquijnamiquia Dios ilamaxtilisli.

<sup>3</sup> Yoje xicchia pampa ajsisi tonalijmes quiman lacames amo yalo quinequilo quicaquilo in lamaxtilisli melahuac inahuac Dios ilajtol hual quinyuliltia inminyolo. Yehuanten quinmanasi miac oc sequin

lamaxtinijmes hual quinmaxtisi quinami quixtocalo pa cayasi lamaxtili. Quixtocasi quicaquisi lamaxtilisli hual amo unca quinami quijtúa ilajtol Dios.

<sup>4</sup> Huan yojque mocahuasi pa quicaquisi Dios ilajtol melahuac, huan pehuasi quicaquisi inminlapuhualisli yehuanten hual amo laijnamiquilo cuali. Pehuasi quinneltocasi quinami cataya len melahuac inon hual in lamaxtinijmes ejelehuis quijtulo quiman yes lamaxtilo.

<sup>5</sup> Tehual, xilajnamiqui cuali mochi, ximopepenialti pa huil tipanus lacocoltisli. Xitequipanu mojmosta quinami se hual quilamachilitinemi ilamachiltisli cuali toTata. Xicchia mochi pa tilaquisas ticchias motequipanulisli pa toTata.

<sup>6</sup> Nimitzilia inon, pampa nehual niquinami se huendi hual cuni se, huan axan unca quinami nechtuyajtcate. Nicnequi niquijtúa, ajsi in tonali quiman nia nimiqui, yalo nechmictilo.

<sup>7</sup> Amo quiman nimocahuaya pa nimotolinis pa niclamachilitinemisquiaya ilajtol Dios pa miac caltilan cajcapa pin lalticpan. Unca quinami nimoanac cuali ca mochi hual quinequiaya latzacuali pa camo mosemanas ilajtol Dios. Axan unca quinami nilaquisac nimolaluc pa se laluxtilisli hual niquinlaquixtic in oc sequin pampa nilamic nicchias in hual Dios nechilic pa nicchias. Amo quiman nimocahuac pa nicneltocasquiaya Cristo Jesús.

<sup>8</sup> Pa in tonali hual yahui huala, nepa yahui nejchihuilia Dios in hual yes niman cuali. Yahui lamachiltia pampa amo quita nindeno ca nehual hual amo quixtoca. Yoje quipia se laxlahuilisli pa nehual hual nechajcoquilijtica nepa pin cielo (ilhuicac). Huan in Tata quimati cuali quinami monequi pa quinchihuilis yehuanten pa quinami yuliloaya pan lalticpan. Yoje, yihual nechmacas in laxlahuilisli pan in tonali quiman nechlajlanis quinami niyuliaya. Huan amo san nehual nechmacas. Noje quinmacas laxlahuilisli quinami inon moxtin hual quinequilo mojmosta pa ajsis in tonali quiman yihual hualas oc sejpa.

*Pablo quinahuatia pa hualas ca yihual Timoteo*

<sup>9-10</sup> Xiejselui pa tihualas ca nehual, pampa nechcajcahuac Demas. Yihual quixtocaya miac in yulilisli hual ticpialo axcan pan lalticpan, huan amo yoje miac quixtocaya in yulilisli hual ticpiasi pan tonali hual hualas Cristo. Demas uyac pa Tesalónica. Uyac Crescente pa in lalticpan Galacia, uyac Tito pa Dalmacia.

<sup>11</sup> Jan Lucas huan nehual ticate san. Xicana Marcos huan xicualica ca tehual quiman tihualas, pampa yihual nechpalehuis miac ca notequipanulisli pa in Tata.

<sup>12</sup> Tiquico nictilanic pa Efeso.

<sup>13</sup> In laquen hual nijcahuac pin caltilan Troas pa ichan Carpo, inon xicualica quiman tihualas. Xiquinhualica noje in amames, huan xiquiztia pa tiquinhualicas in cuilaxlimes hual quipialo lajcuilulisli pani yehuanten, innojen niqinpiasquiaya pampa miac nechmonotzililo.

<sup>14</sup> Alejandro in teposlero nejchihuilic miac amo cuali. Quilacepilis in Tata quinami yihual nejchihuilic.

<sup>15</sup> Tehual noje ximoiztia tiquitas, pampa yihual amo mocahua pa molalis topan pampa quicocolia in hual ticmaxtilo.

<sup>16</sup> Quiman nicpehualtiaya pa nimonapatis inminyampa yehuanten hual nechmotexpahuililoaya, amaqui cataya nepa pa nechpalehuisquiaya, moxtin nechcajcahuaje. Ma camo quinmotexpahuili Dios pampa quichihuaje yoje.

<sup>17</sup> Ma yoje, moquetzac ca nonahuac in Tata huan nejchicahualtic. Yojque cataya lamachilti mochi ilamachiltisli toTata, pa quicaquilosquiaya moxtin yehuanten hual amo judíos. Huan yojque nicataya laquixtili pa camo nipolehuis. Cataya quinami in Tata nechquixtic pa icamac se león.

<sup>18</sup> Quema, nechquixtis in Tata pa camo nimoitas pa mochi polehuilisli huan in amo cuali hual quinequilo nejchihuillilo. Nechquixtis huan nechhuicas pa nicayas ca yihual capa huelitijtica. ¡Yihual quipías in chicahualisli hué huan in laixpelalisli cualtichin pa mochi tonalijmes, huan amo quiman lamis! Yojque ma ye.

*Pablo quichicahua Timoteo huan quimaca latuchihualisli*

<sup>19</sup> Xiquinchicahua Prisca huan Aquila huan yehuanten pa ichan Onesíforo.

<sup>20</sup> Erasto mocahuaya pa Corinto, huan Trófimo nijcahuac cocoxqui nepa Mileto.

<sup>21</sup> Xiejsehui pa tiajsis nican quiman ayamo ajsilo in tonalijmes hual sehuatíalo. Mijchicahualo Eubulo huan Pudente huan Lino huan Claudia huan moxtin tocnían.

<sup>22</sup> Ma caya pa moyolo in Tata. In cuali hual jan yihual san huil tejchihuillía ma caya ca amhuanten.

## In amal hual Pablo in lanahuatini quijcuiluilic Tito

### *Quiipaltía Tito*

<sup>1</sup> Nehual Pablo niunca itequipanujquil Dios. Huan niunca ilanahuatini Jesucristo. Yihual nechlajultic pa niyes ilanahuatini pampa yec yihual hual nechipahuilic nechquixtilijtataya nolajlaculisli, jan quinami quinchihuilía moxtin hual Dios quinlajultic. Inon nicneltoca. Yehuanten huan nehual ticmatilo pampa inon unca melahuac huan unca jan quinami Dios quinequi pa tiyulisi.

<sup>2</sup> Tiyulilo yojque pampa neli ticchialo ticmazticate pampa huala in tonali quiman tialo tiyulilo ca in yulilisi hual amo quiman lamis. Huan Dios hual amo quiman lacuajcuamana, yihual neli quilic pampa techmaca in yulilisi hual amo quiman lamis. Inon neli quilic quiman ayamo pehuac in laticpan.

<sup>3</sup> Pa in tonali hual yihual quilalic, techcaquiltic ilajtol in yulilisi. Techcaquiltic pan ipampa lamachiltisli, huan nechnahuatic pa niclamachiltis ilajtol.

<sup>4</sup> Huan nimitzjcuiluilijtica (nimitzescribiruilijtica) tehual, Tito, neli unca quinami tehual noxolo yoje quinami tiomenten ticneltocalo toTata. Ma Dios toTajtzin huan Cristo Jesús hual techquixtia pa como tipolehuisi mitzmacacan in cuali hual san yehuanten huil tejchihuilía. Huan ma mitzmacacan noje inminmosehuilisi pa moyolo.

### *Itequipanulisli Tito pa Creta*

<sup>5</sup> Nimitzcahuac pa Creta pampa nicnequi pa ticmelahuas mochi nepa hual mocahua pa mochijchías. Nicnequi pa tiquinlajultis abuelojmes pa yehuanten huelitisi capa Dios ilacames pa mochi sejse caltilan capa cate laneltocanijmes. Xicchia inon jan quinami nimitznextilic.

<sup>6</sup> Huil ticlajultis se lalac pa yes abuelo sinda amaqui amo quiman quimotexpahuilic. Monequi pa quipías jan se isihua san. Sinda quinpía xolomes, monequi pa yehuanten quinellocasi Jesucristo, monequi pa yulisi cuali pa yojque amaqui huil quinmotexpahuilis. Huan monequi pa ixolomes quimatis quinellocasi inmintajtzin.

<sup>7</sup> Quema, pampa yihual hual quinlachilía yehuanten in laneltocanijmes unca quinami Dios itequipanujquil hué. Quipía pa yes se lalac hual amaqui quimotexpahuilía. Ma como ye se hual quitejtemúa pa mochi cayas quinami yihual quinequi. Ma como ye se hual quinequi cualani jan ajnaxcan, o se hual quinequi lahuana, o se hual quixtoca latecua, o se hual quixtoca lacajcayahua pa momiactilis itomin.

<sup>8</sup> Ma ye lalac hual quinequi quinnamiquía ca lasojlalisli lacames pa ichan. Ma ye lalac hual quixtoca quichía len unca cuali huan melahuac ca moxtin. Ma ye lalac hual quimatis quitequipanuilis Dios quinami monequi pa quichihuilis. Monequi pa quimatis motzacuilis pa como quichías len amo unca cuali.

<sup>9</sup> Quema, monequi pa yes yojque, monequi pa como mocahuas pa quinellocas ilajtol Dios. Ca ilajtol Dios huil ticlalililo mochi tolanellocalisli. Ilajtol unca quinami quijtúa in lamaxtilisi hual ticmatilo ca Dios ilajtol lajcuiluli. Monequi pa in lalac yes yojque pa yes lahuelilti pa quinchicahuatis oc sequin quiman quinmaxtia ca in lamaxtilisi cuali. Noje pan ipampa in lamaxtilisi cuali, huil quinmelahuas yehuanten hual amo lamaxtilo

quinami quijtúa ilajtol Dios. Huil quinnexilis quinami amo unca melahuac in hual quimaxtificate.

<sup>10</sup> Monequi pa cayasi abuelojmes cuajcuali quinami innojen, pampa cate míac lacames nepa pa Creta hual amo quimatilo momajtilo. Lajtulo quinami hual amo laijnamiquilo cuali huan lacuajcuanalano. Yehuanten in lacames niman amo cuajcuali cate laneltocanijmes judíos hual lamaxtilo. Yehuanten quinequilo pa moxtin yesi latequili pa icuilaxli.

<sup>11</sup> Monequi pa yes latzacuali inmincamac, pampa yehuanten lacames hual quinchihuililo pa moquixtisi pa iojli Cristo lacames ca moxtin inminsihuahuan huan inminxolomes. Inon quichihualo pan ipampa in amo cuali hual quimmaxtilo. Huan lamaxtilo pa vojque canasi míac tomin huan amo pinahualo quinami quichihualo inon.

<sup>12</sup> Cataya se lalac pa Creta hual yec se ca inminlajtunijmes, yihual lajtuni quinlatenejtataya in lacames creteños, quijtuni: “Yehuanten in creteños yulilo mojmosta islacatijticate, quinchihuililo lacocoltilisli oc sequin quinami yulijquimes pa cuajlan, latzehuilo huan quixtocalo lacualo niman míac.”

<sup>13</sup> Huan inon hual quijtuc quinami cate in creteños unca melahuac. Pampa inon, xiquinmajmajua ca lajtol chicahuac sejpa huan oc sejpa pa yoje yehuanten quineltocasi toTata jan quinami quijtúa pa ilajtol quinami monequi pa ticneltocasi.

<sup>14</sup> Ma quineltocacan vojque, ma camo quinneltocacan innojen lapuhualisli hual amo Dios ilajtol. Innojen lapuhualisli quinquihuililo yehuanten hual amo laijnamiquilo cuali, cate lapuhualisli hual quinchijchihualo in judíos. Ma camo quinneltocacan in lajtomes hual amo monotzalo pa lanexilisli quinami monequi pa quimolancuacuetzilisi Dios. In lajtomes quinchijchihualo lacames hual amo quixtocalo quicaquilo len unca melahuac.

<sup>15</sup> Yehuanten hual mochi tonali quipialo inminyolo chipahuac quinmitalo mochi chijchipahuac. Ma nimitzili se lanexilisli: Quinmitalo chipahuac innojen hual quicuasi, quitalo chipahuac ilamaxtilisli Dios ilajtol. Huan yehuanten hual amo quipialo chipahuac inminyolo, huan yehuanten hual amo quineltocalo Cristo, amo quitalo chipahuac nindeno. Amo laijnamiquilo chipahuac huan amo unca chipahuac ilajmatilisli inminyolo.

<sup>16</sup> Quijquijtulo pampa quiximatilo Dios. Ma yoje, pampa inon hual quichihualo, yoje momati pampa amo neli quiximatilo Dios. Inon momati pampa yehuanten lachihualo tetzcuinuc. Amo lachihualo quinami Dios quijtúa huan amo monotzalo pa quichihuasi se tequipanulisli cuali.

## 2

### *In lamaxtilisli hual amo quijlacúa*

<sup>1</sup> Axan, tehual, amo ximocahua pa tiquijts in hual unca quinami monequi pa yes lamaxtilisli cuali.

<sup>2</sup> Xiquinyanti in abuelojmes pa yesi lacames hual quimatilo motzacuililo pa camo quichihuasi inon hual amo cuali. Xiquinyanti pa yesi lacames hual moxtin quinequilo quimatilo momajtilo inminlaixpan yehuanten, pa yesi lacames hual quimatilo lajtulo ca laijnamiquilisli. Xiquinyanti pa yesi lacames hual quimatilo quineltocalo Dios quinami quijtúa ilajtol. Xiquinyanti pa yesi lacames hual quimatilo lalasojlalo huan moepenialtilo quiman panusi lacocoltilisli, vojque ca se lajtulisli ca ilajtol Dios.

<sup>3</sup> Xiquinyanti jan yoje in ilamantzitas pa yulisi nesticate pa moxtin quitasi quinami cuali quitequipanuilijticate Dios. Ma camo yén (yecan) latenehuanijmes, ma camo quinequican cunican míac iayo uva coc hual lalahuanaltía. Ma yén (yecan) lamaxtinijmes hual quimatilo quimaxtilo len unca niman cuali.

<sup>4</sup> Sinda yoje cate in ilamantzitas, huil quinnextilisi sihuames yajyancuic quinami quinchihuilisi cuali ca lasojlalislí inminlahuicalhuan, huan pa quinchihuilisi cuali ca lasojlalislí inminxolomes.

<sup>5</sup> Huil quinnextilisi sihuames yajyancuic quinami huil moiztiasi cuali, huil quinnextilisi quinami motzacuilisi pa camo quijtusi laijtc inminyolo quinequisi oc sequin lacames. In ilamantzitas huil quinnextilisi sihuames yajyancuic quinami quipiasí pa quichihuasi cuali in tequipanulisli pa inminchan. Huil quinnextilisi quinami mochihuasi sihuames hual quinequilo quimatilo quinneltocalo inminlahuicalhuan. Sinda yojque quichihualo sihuames yajyancuic, yoje yehuanten hual amo quineltoalo Cristo amo huil quijtusi nindeno amo cuali inahuac ilajtol Dios.

<sup>6</sup> Jan yojque, xiquinmili lacames yajyancuic pa quinequisi quimatisi moiztiasi cuali inahuac mochi.

<sup>7</sup> Tehual mohúan, ximonexti quinami se lanextilislí cuali pan ipampa molachihualislí cuali. Capa yes tilamaxtía, ma ye lamaxtilislí hual huil quimatisi len quinequi quijtúa, lamaxtilislí hual amo quipía se islatatilisli. Xiye se lamaxtini hual moxtin quimatisi momajtsi moyampa.

<sup>8</sup> Huan molajtulisli ma ye ca lajmatilislí cuali quiman yes tilajtus, pa yojque amaqui huil quijtúa nindeno amo cuali calica huil techtenehua. Yojque, aquí hual unca tolacocolini pinahuas pampa amo quipías nindeno amo cuali calica techtenehuas.

<sup>9</sup> Xiquinyanti tequipanujquimes hual amo quilaxlahuilo pa quichihuasi quinami quinmilisi inmintecojuan huan pa camo monanquilisli.

<sup>10</sup> Ma camo quinxitequilian inmintecojuan. Ma yulican pa yojque inmintecojuan huil quimatisi pa inminyolo pampa amo quiman quincaycayahuilo inmintequipanujquimes. Ma ye yojque pa yojque pan ipampa mochi hual quichihualo in tequipanujquimes huil quinnextilía niman cualtichin ilamaxtilislí Dios hual techquixtía pa camo tipolehuisi.

<sup>11</sup> Unca ca tehuanten in cuali hual san Dios huil tejchihuilía nican pan lalticpan. Unca ilachihualislí cuali calica Dios huil quinquixtía lacames pa camo polehuisi. Quema, nesic ca moxtin.

<sup>12</sup> Axcan nican pan lalticpan Dios ilachihualislí cuali technextilía quinami monequi pa tictequipanultisi tochicahualislí huan tolanequilisli pa ticchihuasi len unca cuali. Huan technextilía quinami timosulahuasi quiman ticnequilo ticchihualo len amo cuali. Ilachihualislí cuali Dios technextilía quinami ticchihuilisi cuali oc sequin, amo tiquizticate se cuali huan oc se amo yoje cuali. Huan ilachihualislí cuali Dios technextilía quinami monequi pa ticmolancuacuetzilisi Dios.

<sup>13</sup> Dios ilachihualislí cuali technextilía pa ticchiasí inon hual techmaca niman míac paquilislí. Nicnequi niqijtúa, ticchixticate in tonali quiman nesís toDios hué, yihual in Tata Cristo Jesús hual techquixtía pa camo tipolehuisi. Yihual hualas ca hueliltilislí hué huan laixpelalislí cualtichin.

<sup>14</sup> Yihual motemacac pa miquis pa tehuanten pa yihual yojque laxlahuis pa techquixtis pa camo tipolehuisi pampa tijeje laijlaculí. Yojque yajmo tiyulilosquiaya quinami yehuanten hual amo quineltoalo ilajtol Dios.

Quema, Cristo yojque techanac pampa quinequiaya quinpía lacames ca inminyolo chijchihuac. Quinequiaya pa yehuanten yesi iyaxca san, lacames hual quixtocalo míac quichihualo tequipanulisli cuali.

<sup>15</sup> Xiyultía tiquinmilijtica innojen lajtomes. Xiquinyanti huan xiquinma-jua ca lasojlalisli sinda monequi, xicchia in ca mochi mohuelilitlisli. Amo xicmacahuilti amaqui pa mijixicus.

### 3

#### *Innojen cate hual quipiasi pa quichihuasi laneltocanjmes*

<sup>1</sup> Xiquinmijnamiqulti in laneltocanjmes pa molalisli pa quinneltocasi yehuanten hual huelitilo capa in laneltocanjmes, yehuanten hual quipialo huelilitlisli. Quema, ma quinneltocacan, ma mochijchihuacan pa huil quichihuasi mochi tequipanulisli o lachihualisli hual cate cuali.

<sup>2</sup> Ma como quihuejuecaltican amaqui. Ma como yén (yecan) lacames hual quimatilo cualanilo pa molaxilisli lajtomes. Ma yecan lacames hual quipialo lanequilisli pa quinpalehuisi oc sequin yoje quinami unca cuali, huan ca lasojlalisli. Ma yecan lacames hual quimatilo quinchihuililo cuali moxtin lacames huan ma como quijttucan amo cuali pa inminyolo inminahuac yehuanten huan ma como cualantiquisacan ca yehuanten.

<sup>3</sup> Monequi pa tiyesi yoje pampa tehuanten noje quimaniyan amo ticmatiloaya tilaneltocalo. Ticataloaya lacuajcuamanali amo ticmazzataloaya in ojli melahuac. Amo huil tictzacualoaya tocuero (tonacayo) pa como ticchihualosquiaya mochi in amo cuali hual tocuero (tonacayo) mojmosta quinequiaya pa ticchihualosquiaya. Tiyeje quinami ticpianijme pa tiquin-tequipanulisli tocuero. Tiyulinijme ticnectataloaya ticchihualo len yes calica ticayalosquiaya ca paquilisli. Tiyulinijme tiqintenejtataloaya pa toyolo moxtin oc sequin. Timocualanilinjme ca oc sequin, amaqui huil techpilini lasojlalisli. Tehuanten amo huil tiqitanijme se huan oc se, amo tiqinmixtocanjme.

<sup>4</sup> Ma yoje, quiman yec lamachilti pin lalticpan pampa Dios quinlasojla lacames, in Dios hual techquixtía pa como techajsis mochi hual techijlacúa, quema, quiman yec lamachilti pampa yihual quixtoca quinchihuila cuali lacames, cuaquín Dios, quema, techquixtic pa como techajsisquiaya inon.

<sup>5</sup> Huan amo techquixtilic inon hual techijlacúa pampa tehuanten tiquinchiuaje innojen hual cate quinami yihual quijttúa, in hual yihual quita cuali. Pampa no, techquixtilic in laijlaculisli pampa quinequi techicnilic. Tejchihuac, unca quinami yihual techaltic toyolo. Axcan ticate yajyancuic quinami se hual lamac lacatic. Tejchiac yajyancuic pan ipampa in Espíritu Santo.

<sup>6</sup> Dios techmacac in Espíritu Santo pa yihual in Espíritu Santo techueliltis pa ticchihuasi mochi in míac hual yihual quipía pa ticchihuasi. Huan Dios techlalilic in Espíritu Santo laijtic tehuanten pan ipampa Jesucristo hual techquixtic pa como tipolehuisi.

<sup>7</sup> Dios tejchihuilic in lachihualisli cuali pa yojque neli ticchiasi in hual iyaxca hual quipía pa techmacas tehuanten. In hual iyaxca unca in yulilisli hual amo quiman lamis. Huan in hual iyaxca ticpialo axcan pampa Dios techiztica cuali quinami lacames hual amo quipialo laijlaculisli, techiztica yojque pan ipampa in cuali hual san yihual huil quinchihuila lacames.

<sup>8</sup> Inon unca se lajtulisli capa huil ticlalilo mochi laneltocalisli. Huan nicnequi pa tiqinmilis innojen pampa ticmati pa moyolo pampa unca melahuac. Yojque yehuanten hual amo quiman mocahuilo quinneltocaticate



Dios amo mocahualo pa quijnamiquisi innojen hual cuajcuali hual huil quinchihuasi. Cuaquinon quiman quijnamiquilo innojen, ma molalican pa quinchihuasi. Innojen lajtomes hual nimitzilic cate niman cuajcuali huan quinchihuililo cuali moxtin.

<sup>9</sup> Ma yoje, amo xicpía nindeno pa tiquitas huan pa tilajlanis inahuac innojen lapuhualisli hual quichihualo sequin lacames. Yehuanten momaxtilo pa ilajtol Dios jan quinami itocaloaya san lacames hual yulinijme pa yina. Cuaquín quinchihualo lapuhualisli, quijtulo unca quinami yulinijme innojen lacames. Huan innojen lapuhualisli jan islacatilisli san. Inon unca hual quichihualo yehuanten hual amo laijnamiquilo cuali. Huan amo xiquinlaxili lajtomes ca oc sequin quiman quijtulo quinami monequi pa quinmolancuacuetzilisi Dios. Cate lajtomes san hual quinchijchihualo lacames hual amo neli quineltoalo Dios. Amo xicpía nindeno pa tiquijtus ca inon, pampa mochi inon amo quipalehuá amaqui se nadita pa quitequipanuilis Dios.

<sup>10</sup> Xijquixti capa amhuanten se hual yultía quineltoatica huan quimaxtitica se lamaxtilisli hual amo unca yoje quinami quijtúa ilajtol Dios. Quema, sinda yuli quichijtía yojque mas que tiquilic sejpa huan oc sejpa pa mocahuas quimaxtitica inon pampa amo unca quinami quijtúa Dios ilajtol, cuaquinon xijquixti. Amo xicmacahuilti pa mocahuas ca in laneltocanijmes.

<sup>11</sup> Xicchía yojque pampa ticmati in se amo yultica melahuac. Se quinami yihual quichijtica laijlaculisli, huan quimati pampa quichijtica laijlaculisli, yojque moiylacúa.

#### *Pablo quilía Tito in hual monequi quichía*

<sup>12</sup> Quiman nictilanis Artemas pa yas ca tehual, o cuajnesi nictilanis Tíquico, tehual ximotolini pa tiejsehuis tihualas ca nehual pa Nicópolis, pampa nimolalic pa nipanus umpa in tonalijmes quiman sehuatías.

<sup>13</sup> Xicchía mochi hual huil tehual pa tiquinpalehuis Zenas in licenciado huan Apolos pa canasi inminojli, pa quiipiási mochi hual monequi pa quipixtiasi.

<sup>14</sup> Huan noje, ma molalican pa monextilisli tocnían pa quichihuasi in hual unca cuali. Ma quitemucan mochi quinami huil lapalehuisi quiman monequi pa oc sequin laneltocanijmes quiipiási len. Yojque monotzalo inminyulilisli sinda yulilo quichijticate inon.

#### *Pablo quichicahua Tito huan quituchía*

<sup>15</sup> Mijchicahualo moxtin yehuanten hual cate ca nehual. Xiquinchicahua yehuanten hual techlasojlalo pampa timoxtin, tehuanten huan yehuanten ticneltoalo in se ilamaxtilisli toTata.

Ma caya ca anmoxtin in cuali hual san toTata huil tejchihuilía.

## In amal hual Pablo in lanahuatini quijcuiluilic Filemón

### *Quipialtía Filemón*

<sup>1</sup> Nehual Pablo niunca latzacuali calijtic, nejtzacuaje nican pampa nictequipanuilía Cristo Jesús. Huan tocní Timoteo timitzijcuiluilijticcate in amal, lasojli Filemón, tehual hual titequipanúa ca tehuanten.

<sup>2</sup> Noje in amal antimitzijcuiluilijticcate amhuanten in laneltocanijmes hual anmonechicúa pa mochan, lasojli Filemón. Huan noje antimitzijcuiluilijticcate tocní sihual Apia huan tocní Arquipo, yihual quinami iguache in Tata jan quinami tehuanten.

<sup>3</sup> Ma Dios toTajtzin huan in Tata Jesucristo anmitzpiacan ca in cuali hual san yehuanten quipialo pa tehuanten. Huan ma anmitzpiacan ca inminhosehuilisi pa anmoyolo.

### *Pablo quijtúa quinami lalasojla huan laneltoca Filemón*

<sup>4</sup> Nicsehuía noDios mojmosta quiman yes nimitzijnamiquía pa mochi tonalijmes quiman niclajlanía Dios.

<sup>5</sup> Unca pampa nechlamachiltilo quinami amo timocahua pa ticlasojlas in Tata Jesús huan quinami ticlalía molaneltocalisli ca yihual. Noje nechlamachiltilo quinami tiquinlasojla yehuanten hual Dios quinlajultic pa yesi iyaxca.

<sup>6</sup> Nictemachía Dios pa yihual mitzhuelilitis pa tictemus quinami tiquinlamachilitis oc sequin quinami ticneltoca Jesucristo, pa yoje yehuanteñ noje quinequisi quinellocasi. Yoje ajsisi quimatasi len quinequi quijtúa mochi innojen cuajcuali hual ticpialo pampa tehuanten timochihuaje ilacames Cristo.

<sup>7</sup> Niunca ca niman miac paquilisli huan nimomaca chicahualisli pampa nicmati quinami tilalasojla, Nito, pampa tehual niman miac tiquinmaca chicahualisli pan inminyolo yehuanteñ hual Dios quinlajultic pa yesi ilacames.

### *Pablo quitemachía Filemón se lachihualisli cuali*

<sup>8</sup> Yoje, mas que nicpía nolahuellitilisli pampa nehual niunca ilanahuatini Cristo huan pampa inon huil nicana eslito pa nimitzilis len monequi pa ticchías, ma yojqe, amo nicchías inon.

<sup>9-10</sup> San nimitzljalanía pa tijchihuilis inon pampa timolasojlalo. Nehual niPablo niabuelito hual axan noje niunca latzacuali pin calijtic pampa nicneltoca Cristo Jesús, nía nimitzyantía ca in lasojlalisli pa tijchihuilis in lachihualisli cuali pa in Onésimo. Yihual unca quinami noxolol. Unca quinami lacatic ca nehual nican pin calijtic capa niunca latzacuali, pampa quinellocac ilajtol Dios hual niclamachilitic. Huan yojqe yihual lacatic ca Dios.

<sup>11</sup> Pa yina, amo mijchihuilic lapalehuilisli. Ma yoje, axcan mijchihuilía lapalehuilisli tehual huan jan yojqe nejchihuilía lapalehuilisli nehual noje.

<sup>12</sup> Axcan yihual nictilanía ca tehual oc sejsa, quema, yihual, hual niclasojla niman miac.

<sup>13</sup> Huan nehual nicnectataya pa mojmosta huil nicpiasquiaya nican ca nehual. Yojqe yihual nechtequipanuilis pa in tonalijmes quiman nimoitas

latzacuali calijtic nican, pampa niclamachiltía ilajtol Dios. Niqijituc sinda nechtequipanuiliaya, cuaquín cataya quinami tehual tichtequipanuiliaya.

<sup>14</sup> Ma yoje, amo nicnequiaya nicchía nindeno sinda ayamo nicmatiaya da tehual tichmacahuiltisquiaya pa nicpiasquiaya yihual nican ca nehual. Yojque amo tijchihuiliaya nehual in lachihualisli cuali pampa ticpiaya pa tijchihuilisquiaya. Yesquiaya pampa ticnequiaya tijchihuili.

<sup>15</sup> Inon nimitzilía pampa cuajnesi cataya pampa inon yihual yec lahuicali pa camo cayasquiaya pa mochan se nadita. Niqijitúa, amo ticpiaya pa se nadita pa yojque ticpiasquiaya oc sejpa. Huan quiman cayasquiaya ca tehual oc sejpa, cuaquín amo quiman tilamisquiaya ticpía.

<sup>16</sup> Niqijitúa, yajmo ticpiás quinami tequipanujquil pampa yihual axcan unca len niman cuali pa tehual. Amo yesquiaya yoje cuali pa tehual sinda jan mocahuaya se tequipanujquil san. Axcan ticpiás Onésimo quinami mocni hual ticlasojla, quinami nehual axcan nicpía quinami nolasojli nocni. Unca pampa yihual nicnextilic iojli Cristo. Ma yoje, yihual Onésimo axan unca niman míac molasojli, pampa amo jan unca lalac san pa tehual. Noje yihual mocni pampa yoje quichíac in Tata.

<sup>17</sup> Pampín, sinda tichita nehual quinami mocni tequipanujquil pa in itequipanulisli in Tata, cuaquín xicnamiqui Onésimo ca lanequilisli quiman ajsis pa mochan, jan quinami tichnamiquisquiaya nehual.

<sup>18</sup> Huan sinda yihual mitzcaycayahuac o sinda yihual mitzhuiquilía len, xichcahuili pa niclaxlahuis.

<sup>19</sup> Nehual Pablo niqijcuilujtica inon ca nehual nomajma, nimitzlxlahuis. Inon nimitzilía san pa camo nimitzijnamiquiltis pampa tehual tichuiquilía nehual moyulilisli. Cataya pan nopampa nehual ticanac iojli Cristo.

<sup>20</sup> Quema, Nito, ma nicpía se lachihualisli cuali pan mopampa tehual. Inon nicpiás quiman niqitas quinami ticneltocas toTata, niqijitúa, quiman ticnamiquía Onésimo quinami mocni. Yojque tichmacas paquilisli pa noyolo pampa yoje ticneltoca Cristo.

<sup>21</sup> Nicmati pa noyolo pampa tehual tía ticneltoca in Tata. Yojque, nimitzi-cuiluilía pampa nicmati tehual tijchihuilis niman míac, huan amo san inon hual nimitzilic pa ticchías.

<sup>22</sup> Noje nimitzilía pa ticchijchías se calijtic pa nehual, pampa nicchixtica da yalo nechmacahualo. Quema, niquisas nican pampa amhuanten anquila-jlantica Dios pa nejchihuilis in cuali hual san yihual huil tejchihuilia. Yojque huil annimitzpxaulisli.

### *Quinchicahua huan quinmaca latuchihualisli*

<sup>23</sup> Mijchicahua Epafra, yihual huan nehual ticcate latzacuali pin calijtic pampa yihual noje quilamachiltiaya ilajtol Cristo Jesús.

<sup>24</sup> Mijchicahualo Marcos huan Aristarco huan Demas huan Lucas, ca nehual tequipanulo yehuanten.

<sup>25</sup> Ma caya ca amhuanten anmoyolo in cuali hual san Jesucristo huil tejchihuilia.

## In amal hual se lanahuatini quinmijcuilulic laneltocanjmes Hebreos

### *Dios axan techlaquetzilia pan ipampa iXolol*

<sup>1</sup> Pa innojen tonalijmes hual panujque niman de pa yina, Dios quinmilic totajtztizian ilajtol pan ipampa ilajtunijmes. Quinmilic je tipichin nican huan je tipichin nepa miac tonalijmes, nican se tonali, nepa se tonali, huan ca miac lachihualisli, se lachihualisli nican huan se lachihualisli nepa.

<sup>2</sup> Axcan, pa innojen tonalijmes hual techhuicasqui pa in tonali quiman lamis in lalticpan, techilic ilajtol pan ipampa se hual lajtua pa iyolo quinami se xolol lajtua quinami itajtzin lajtua pa iyolo. Quema, unca iXolol hual Dios quilalic pa quipias quinami se xolol quipias in hual iyaxca itajtzin. Quipias mochi hual unca pin cielo (ilhuicac) huan pan lalticpan. Huan Dios quinchiac mochi hual unca, quinchiac pa huejcahuas pa quiman ajsis in tonali hual yihual quilalic. Quinchiac pan ipampa iXolol.

<sup>3</sup> iXolol Dios quinextia mochi in cuali de Dios huan ichicahualisli hue, quinami se espejo quicuepa in quinami nesi se sinda moquetza ilaixpan in espejo. Quema, Dios iXolol unca jan quinami unca Dios. Yihual iXolol Dios lajtuc huan mochi mochiac pampa ilajtol quipia lahueliltisli. Jan yojque ca ilajtol chicahuac quipalehuia pa mocahuas mochi hual quinchiac. Huan quinaman panujque niman miac xixihuimes, Dios iXolol lamic quichiac inon quinami moxtin huil yelosquiaya lachipahuali pa yajmo cayasi laijlaculi. Cuaquinon molalic huan canac lahueliltisli pa huelitis nepa pin cielo niman pa pani pa mochi. Axcan nepa unca huelitjtica capa unca imajma cuali Dios in niman hue.

### *Dios iXolol unca niman hue, amo yoje huejue cate lanahuatinijmes pin cielo*

<sup>4</sup> Mochihuaya niman hue Dios iXolol. Amo cate yoje huejue in lanahuatinijmes pin cielo (ilhuicac) pampa quitocayaltijque Dios iXolol ca se itoca hue huan niman cuali. Amo yoje cuali motocalo in lanahuatinijmes pin cielo.

<sup>5</sup> Ticmatilo yihual itoca unca yoje niman hue pampa Dios amo quiman quilic se lanahuatini pin cielo inon hual quilic iXolol, quil:

Tehual tinoXolol, axan nimitzljaltultic pa tiyes noXolol.

Huan Dios amo quiman quilic se lanahuatini pin cielo inon hual quilic iXolol, quil:

Nehual niyes ca yihual quinami iTajtzin, huan yihual yes pa nehual quinami noXolol.

<sup>6</sup> Huan amo inon san. Quiman quilaicanac capa yehuanten pin lalticpan yihual hual quipias canas mochi in lasojlalisli hual quimonotzilia se xolol hual quipehualtic in xolomes hual lacatilo ca inmintajtzin. Dios quijtua, quil: Ma quimolancuacuetzilian moxtin ilanahuatinijmes Dios hual cate pin cielo.

<sup>7</sup> Huan unca inon hual quijtua innahuac ilanahuatinijmes pin cielo, quil:

Quinchihuilia ilanahuatinijmes pin cielo pa yesqui quinami iyyecames.

Quema, yehuanten ilanahuatinijmes pin cielo hual quitequipanuililo,

quinchihuilia pa yesqui quinami tixuxlimes milinticate.

Quichihualo jan ajnaxcan len yihual quinequi.

<sup>8</sup> Ma yoje, inon unca len quijtua yihual hual unca iXolol, quil:

Unca tehual moyaxca pa tihuelitis, O Dios, mitzhuejcahuilis, amo quiman tilamis tihuelitis.

Huan yojque quinami tihuelitía unca melahuac huan tihuelitía quinami quinmahuilúa moxtin, tiquixtoca pa moxtin yulisqui cuali huan melahuac.

<sup>9</sup> Tiquita amo cuali sinda amo yulilo quinami quijtúa molajtol.

Pampa in, O Dios, tehual moDios mijchihuilic pa ticpías in paquilisli huan pa cahuanis moixco ca paquilisli, quinami cahuanía se iixco sinda unca laxahuilili ca chahuac.

Quema, mitzmaca míac paquilisli hual yihual quipía pa tehual.

Amo yojque míac quinmacac yehuanten monahuac hual huelitilo.

<sup>10</sup> Huan noje quilía in Xolol, quil:

Ipehuayan mochi (Quiman pehuaya mochi), tehual ticchihuac in lalticpan ca momajmajuan, Tata, huan in cielos (ilhuicac) tiquinchiác ca momajmajuan.

<sup>11</sup> Yehuanten in cielos huan in lalticpan moijlacusqui.

Ma yoje, tehual tihuejcahuas, amo quiman tipolehuis.

Yehuanten mochi viejojtisqui (mochihuasqui cacaxli) quinami se tzotzomajli.

<sup>12</sup> Quema, quinami se laquen hual quicuipachúa pa quilasas sinda yajmo quinequi,

tehual yojque ticchías ca in cielos quiman yajmo monotzalo.

Quinami se tzotzomajli, cayasqui lapatili.

Huan tehual, amo quiman timocahuas pa tipes jan yoje quinami tiunca, huan amo quiman lamisqui moxixihuimes quiman tiyulis, amo quiman lamis moyulilisli.

<sup>13</sup> Huan amo inon san. Amo quiman quilic se lanahuatini pin cielo inon hual quilic iXolol, quil:

Ximolali pa noma cuali capa tihuelitis ca nehual.

Nepa xicaya pa quiman nilamis niquinsulahuas moxtin molacocolinijmes pa cayasqui inmintzindan mocxihuajmes.

<sup>14</sup> ¿Pa len, cuaquín, monotzalo in lanahuatinijmes pin cielo? Yehuanten cate ijyecames cuajcuali hual quichihualo in hual Dios quinmilía pa quichihuasqui. Quintilanía pa quinchihuilisqui len monequi pa yehuanten hual quineltocalo Cristo. Yehuanten Dios ilácames, huan yalo quipialo in hual Dios yahui quinmaca, iyulilisli calica yesqui lamacahuali pa yajmo quinmajsis in amo cuali huan in miquilisli.

## 2

### *Monequi pa se moiztías mojmosta quinami quineltoca in Tata*

<sup>1</sup> Pampa inon ticpialo pa timomachilitiasqui míac in lajtomes hual tijcaquijque techilijque Dios iXolol. Ma como caya in pa tehuanten cuajnesi timijcuanisqui pa yajmo tictocasqui iojli Cristo hual unca ilajtol yihual techilijque. Yojque tiyelosquiaya quinami se canóa hual lanilúa huan amo ajsitía in xalipan capa quinequi.

<sup>2</sup> Quema, ximomachilitiayan, pampa Dios ilajtulisli hual ilanahuatinijmes pin cielo (ilhuicac) quihualiquilijque Moisés quisaya neli capa unca Dios. Huan sinda cataya se o oc sequin hual amo quichíac jan quinami quijtuc huan amo quineltocac, cuaquín yihual quixitinilijque, huan cataya laxitinilisli hual cahuiluaya.

<sup>3</sup> Huan jan yoje, tehuanten amo timoquixtisqui pa camo tiquitasqui laxitinilisi sinda amo timomachiltitiasqui quinami Dios quitilanic ixolol pa techquixtisquiaya pin polehuilisi. ¡Inon techmonotzilía niman míac! Pehualoaya quicaquilo lacames in lamachiltitilisi cuali quiman in Tata quinmachiltiaya, huan yehuanten technextililoaya tehuanten quinami unca melahuac.

<sup>4</sup> Dios noje quinpalehuic pa technextililosquiaya pampa unca melahuac, pampa quinchíac míac hual quinlachiatic ca lamajtilisi lacames quiman quitajque. Huan quinchíac innojen hual pa quimaniyan ilajtunijmes quijtujque pampa yahuiloya panulo. Quema, míac quichíac hual pampa innojen molachialtiloaya lacames ca lamajtilisi. Huan amo inon san. Noje in Espíritu Santo quinmacac míac ca se huan oc se lahuelilitilisi yehuanten hual quineltocalo Jesucristo, quinami quimacahuiltilic Dios mochi sejse.

*Dios ixolol Jesucristo unca quinami icnían*

<sup>5</sup> Yojque, Dios amo quilalic pa in lanahuatinijmes pin cielo (ilhuicac) huelitilosquiaya pin lalticpan yancuic hual yahui ye se tonali, hual inahuac inon tilaqueztcate.

<sup>6</sup> Pa se íamal ilajtol Dios unca lajcuiluli (laescribiruli) inon hual quijtúa neli, quil:

¿Len monotzalo lacames pa tiquinmijnamiquis yehuanten?

¿Len monotzalo pa tiquinchiuilis cuali?

<sup>7</sup> Ticlalic pa nadita pa camo ajsisqui yesqui yojque huejué quinami in lanahuatinijmes pin cielo.

Huan tiquinchiuilic pa quimatisqui momajtisqui inminlaixpan lacames mochi hual ticchíac.

Quema, ticlalic pa mochi hual ticchíac quinchihuilisquiaya lacames niman míac lasojlalisli.

<sup>8</sup> Tiquinmacac pa quipiasqui lahuelilitilisi pa mochi hual ticchíac. Yojque, quiman quimacac pa lacames quipialosquiaya lahuelilitilisi ca mochi, cuaquín inon quinequi quijtúa pampa amo unca lahuelilitilisi nindenno hual amo unca inminyaxca lacames. Quinequi quijtúa pampa pa lacames unca inminyaxca pa huelitisqui pa mochi hual Dios quichíac, mas que ayamo tiquitalo lacames quipixtcate lahuelilitilisi pa mochi.

<sup>9</sup> Ma yoje, tiquitalo Jesucristo hual Dios quichihuilic pa camo yesquiaya yojque hué quinami in lanahuatinijmes pin cielo (ilhuicac) pa nadita nican pan lalticpan. Inon cataya pampa Dios quinequiaya quinchihuilis cuali lacames, huan pampa inon, quilalic pa Cristo huil panusquiaya miqulilisi pa moxtin, quema, mochi sejse ca yehuanten. Yojque ticmatilo Dios quijtuc pampa monequi pa moxtin quilasojlasi Cristo. Tiquitalo quipixtica lahuelilitilisi axcan pa mochi hual Dios quichíac. Tiquitalo Cristo yojque pampa yihual panuc in miqulilisi pa timoxtin.

<sup>10</sup> Canaya cuali pa Dios quichihuasquiaya yoje, pampa pa yihual cate mochi hual quichíac. Noje pan ipampa yihual cate mochi hual quichíac. Huan canaya cuali pa yihual laquisas quichihuas pa Cristo yes mochi quinami monequiaya pa yihual yes pan ipampa in miqulilisi hual quiapiaya pa panusquiaya. Yoje Cristo huil yes in se hual quichíac in ojli hual canasqui in míac Dios íxolomes pa moquixtisqui pin ipolehuilisi inminlajlaculisi. Yojque Dios quinmanaya míac lacames hual yihual quinlajultic pa yesqui ixolomes, pa yojque quinpiás capa yihual unca, yehuanten quipixtcate len lajco ichicahualisli cualtichin.

<sup>11</sup> Huan axcan, quema, in se Jesucristo quinquixtic yehuanten in lacames pin lalticpan pa yesqui Dios ixolomes. Axcan yihual unca se san ca yehuanten moxtin ixolomes Dios, yehuanten hual cate laquixtili pa yesqui Dios ixolomes. Quema, moxtin quisajque capa Dios.

<sup>12</sup> Pampa inon Jesucristo amo pinahua quijtúa pampa tehuanten ticate icnían. Quema, huan quilía Dios iTajtzin, quil: Nehual nilamachiltis monahuac tehual quiman niunca ca nocnían. Niquincantarus (niquincuicas) lajtomes huejué monahuac tehual quiman niunca ca nocnían hual monechiculo pampa mitzneltocalo.

<sup>13</sup> Huan amo inon san. Quijtúa, quil: Niclalis nolaneltocalisli ca yihual Dios. Huan noje ca inon, quijtúa, quil: Xiquita, nican ticate nehual huan ixolotzitzindis Dios hual yihual nechmacac pa niquinmiztías.

<sup>14</sup> Yojque, in xolotzitzindis cate tehuanten hual ticneltocalo Jesucristo, huan ticate lacames huan sihuames ca nacal huan esli quinami moxtin. Huan jan yoje, Jesucristo lacatic ca nacal huan esli quinami tehuanten. Lacatic pa yoje huil miquis quinami mochi lalac. Huan quiman miquic, cataya pa yoje huil quisulahuac in se hual quipía lahueliltisli capa unca miqulislisli. Yihual unca in lili Satanás.

<sup>15</sup> Jesucristo noje lacatic quinami lacames pa yoje quinchihuisquiaya lacames pa yajmo momajtisqui miquisqui. Yehuanten in lacames hual pa mochi inminyulislisli yultiahuloaya momajtitataloaya pampa yahuiloaya miquilo. Amo huil mocahualoaya pa momajtilisquiaya. Cataloaya quinami tequipanujquimes lachihualtili, amo huil mocahualo quintequipanuililo inmintecojuan.

<sup>16</sup> Neli unca pampa Cristo amo mochíac quinami in lanahuatinijmes pin cielo pa yojque quinpalehuisquiaya. Yihual mochíac quinami Abraham imiahuimes pa quinpalehuisquiaya.

<sup>17</sup> Yojque, quiپیaya pa mochihuasquiaya mochi quinami cate in lacames hual yihual quijtúa pampa yehuanten icnían. Yojque mochihuaya se tiopista hué pa quinpalehuisquiaya yehuanten hual Dios ixolomes. Quinpalehuisquiaya ilaixpan Dios pan ipampa quinami quinquixtilisquiaya inmin-laijlaculisli. Yojque yihual yesquiaya tiopista hué hual quimatiaya laicnili. Yesquiaya tiopista hual yehuanten huil quimatiloaya pampa yihual huil quinpalehuía.

<sup>18</sup> Huan amo san inon, yihual huil quinpalehuía aquinojen yesqui hual Satanás quintilanilía inminyolo pa quichihuasqui len amo cuali, pampa yihual ihuían panuc lacocoltisli huan Satanás quitilanilic yihual iyolo pampa quinequiaya quichihualti in hual amo unca cuali.

### 3

#### *Jesucristo techmonotzilía míac, amo yojque míac techmonotzilía Moisés*

<sup>1</sup> Cuaquinon, nocnían hual Dios anmitzajtultic pa anyes jan iyaxca san, Dios pin cielo (ilhuicac) anmitznotzac mochi sejse pa anyes iyaxca. Huan anquineltocac, jan quinami moxtin in oc sequin hual neli cate ixolomes. Axcan, xiquijnamiquican yihual hual Dios quitilanic pa lajtus ca ilahueliltisli huan pa yes tiopista hué pa tehuanten. Yihual in tiopista hué pa techpalehuis quiman ticmolancuacuetzilisi yihual hual ticmatilo unca toDios. Huan tiquijtulo neli pampa inon hual ticneltocalo unca yojque.

<sup>2</sup> Huan Jesucristo quichíac mochi hual Dios quilic pa quichihuasquiaya quiman quilajtultic pa yesquiaya ilanahuatini huan itiopista hué. Quema, Jesucristo quichíac mochi jan quinami Moisés quichíac mochi umpa. Cataya quiman Dios quichíac pa Moisés yes lanahuatini pa moxtin yehuanten ilacames Dios hual yeje in israelitos.

<sup>3</sup> Ma yoje in lalac Jesucristo monotza pa quinmilisi niman míac lajtomes huejué huan cuajcuali hual Moisés amo quiman ajsis monotzas. Unca jan quinami yihual hual quichía se cali monotza pa canas niman míac lasojlalisli hual amo ajsis quipías in cali.

<sup>4</sup> Axcán, sinda unca se cali, neli ticmatilo pampa cataya se hual quichíac. Huan amo inon san. Dios unca yihual hual quichíac mochi.

<sup>5</sup> Moisés quichíac mochi hual Dios quilic pa quichías. Catani pin tonalijmes hual Moisés yulini quinami Dios itequipanujquil capa moxtin ilacames Dios. Huan Dios quilajtultic Moisés nepa pa quijtus neli innojen hual Dios quilic pa quijtus.

<sup>6</sup> Jan yojque Cristo quichíac mochi hual Dios quilic pin tonalijmes quiman yihual Cristo iXolol Dios cataya capa Dios ilacames. Huan yehuanten ticate Dios ixolomes, sinda yehuanten amo timocahuasqui pa ticlalisqui tolanelto-calislí pa in hual Dios techilía neli pampa yahui techmaca. Huan ma camo timocahuacan pa tiquinmilisqui lacames ca lajtomes huejué in hual Dios tejchihuilía yehuanten. Quema, ma ticchijtiacan inon pa quiman laquisas totequipanulisli pa Dios. Ma camo quiman timocahuacan pa ticchiasqui ca paquilisli huan yojque se tonali ticpiasqui inon hual yahui techmaca.

*Dios ixolomes calaquisqui capa amo lamisqui mosehuisqui*

<sup>7</sup> Pampa inon, jan quinami quijtúa in Espíritu Santo pa Dios ilajtol lajcuiluli, quil:

Sinda anquicaqui ilajtol Dios axan,

<sup>8</sup> xicnequican pa anquineltocas in hual anmitzilijtica.

Amo xicayacán quinami yehuanten quiman catanijme pin lali capa amaqui chantini, nepa quiman Dios quinlalilic in hual quimacahuilic pa quimatisqui sinda neli quineltocaloaya.

Nepa yehuanten molalijque ipan yihual, quinami icocolinijmes.

<sup>9-10</sup> Anmotajtzitzian pa cuarenta xixihuil quitaloaya quinami nehual nicpía chichahualislí hué,

huan motoliniloaya pa nechlalililosquiaya len calica quijtuloaya nicpi-asquiaya niqinnnextili nolahuelfiltisli.

Yojque, nicualanic ca yehuanten hual yulinijme nepa, huan niquilitic:

“Yehuanten amo mocahuasqui pa quicuilmatisqui no'ojli, quema, yehuanten amo quixtocalo no'ojlimes.”

<sup>11</sup> Yojque, nicualanic huan niquiqtuc ca lajtol hual amo mopalac:

“Amo quiman ajsisqui capa yulisqui ca nomosehuilislí.”

<sup>12</sup> Ximoiztiacan, nocnían, pa camo yes ca amhuanten se hual quipía iyolo amo cuali, quinequi quijtúa, se hual amo quinequi quilalía ilanelto-calislí ca Dios, huan yojque mocahuas pa quineltocas Dios hual amo lami yuli. Ximolachilican, pampa Dios yuli huan quichía in hual quijtúa pampa yahui quichía.

<sup>13</sup> Quema, ximochicahualtitiacan se huan oc se mojmosta quiman huecachua in tonali hual tiqijitulo unca axcán. Xicchijtiacan yojque pa yoje amaqui capa amhuanten lacuilmatis pa iyolo. Pampa in yajmo mocahuas pan Dios iojli, unca lacuajcuamanali pan ipampa ilaíjlaculisli.



<sup>14</sup> Monequi pa timochicahualtisqui, pampa timochihuaque se san ca Cristo pa toyolo. Yojque timoxiluililo ca Cristo mochi hual iyaxca. Ma yoje, inon cayas san sinda ca mochi tochicahualisli tiyultialo ticlallilijcate ca Cristo tolaneltoalisli. Ticmatijque pampa ilamachilitlisli yihual yec melahuac quiman tipehuajque ticneltocajque.

<sup>15</sup> Yojque moijtúa:

Sinda anquicaqui ilajtol axcan,

amo xiyén (xiyecan) quinami yehuanten hual amo quinequinijme nechcaquilo napa quiman nechcualantijque.

*Dios ixolomes quipiasi yulisi quilalijcate ilaneltoalisli ca Jesucristo*

<sup>16</sup> Yojque ¿aquinojen yehuanten hual quicaquijque, huan jan yojque quicualantijque? Quema, catanijme moxtin yehuanten hual quisajque quicajtataloaya Egipto ca Moisés quinlaicantataya.

<sup>17</sup> Huan ¿ca aquinojen cualanini Dios pa cuarenta xixihuil? Cualanini ca yehuanten hual quichihuanijme laijlaculisli, huan pampa in yehuanten polehuijque napa pin lali capa amaqui chantini.

<sup>18</sup> Huan ¿aquinojen cataloaya yehuanten hual Dios quijtuc ca lajtol hual amo mopalac pampa amo quiman calaquilosquiaya capa yulilosquiaya ca imosehuilisli? Catanijme yehuanten hual amo quinelto canijme.

<sup>19</sup> Yojque tiqitalo pampa amo huil calaquinijme pampa amo quinelto canijme pampa Dios huil quinchihuiliaya inon hual quijtuc.

## 4

<sup>1</sup> Yojque, ma timomajtican pa camo yes cuajnesi se ca amhuanten quijtúa laijtic yihual pampa amo quinelto ca inon. Yojque nesis yes se hual amo ajsis canas Dios imosehuilisli hual yihual Dios neli quijtuc pampa unca pa tehuanten.

<sup>2</sup> Unca pampa noje tehuanten tijcaquijque Dios ilajtol cuali jan quinami yehuanten hual quicaquijque Moisés quiman quinmilini Dios ilajtol. Ma yoje, in lanahuatilisli hual yehuanten quicaquijque amo quinpalehuic, pampa yehuanten hual quicaquijque amo quicaquijque quinelto caticate.

<sup>3</sup> Axan, tehuanten hual ticneltocajque ilajtol tiajsijque capa tiqitalo imosehuilisli.

Ma yoje, quinami quijtuc inminahuac yehuanten, unca lajcuiluli pa Dios ilajtol, quil:

Quinami nicualanini ca yehuanten, ni quijtuc ca lajtol hual amo mopalac pampa amo ajsisqui capa yulisqui ca nomosehuilisli pa yehuanten. Huan amo ajsijque capa huil yulilosquiaya ca imosehuilisli, mas que cataya pa yehuanten, pampa mochi hual Dios quichíac cataya lachihuali quiman lamíc quinchíac in cielo huan in lalticpan.

<sup>4</sup> Inon ticmatilo, pampa ilajtol lajcuiluli pa se iamames quijtúa, quil: Huan mosehuic Dios pa in tonali chicome, mosehuic pan tonali hual lamíc quichíac mochi hual quichijtataya.

<sup>5</sup> Ma yoje, mas que Dios mosehuic, monequi pa annimitzilis oc sejpa quinami yihual quijtúa pa oc se iamal, quil: Amo ajsisqui capa yulisqui ca nomosehuilisli nehual.

<sup>6</sup> Yehuanten hual quicaquijque Dios ilajtol cuali amo ajsijque capa huil yulilosquiaya ca imosehuilisli, pampa amo quinelto cajque Dios ilajtol. Yojque, quinami quincahuililo tonalijmes pa huil ajsisqui lacames capa yulisqui ca imosehuilisli Dios, ma quinelto cacan ilajtol.

<sup>7</sup> Unca pampa axan, oc sejpa Dios quilalía se tonali pa yojque lacames huil yulisqui ca imosehuilisli. Huan in tonali amo mocahuas yes axcan in tonali.

Quema, Dios quijtuc inon pan ipampa David. Quijtuc quiman panujque míac xixihuimes pejtataloaya ca in tonalijmes quiman yulini Moisés pa quiman yulini David. Quijtuc inon hual axcan oc sepa niquijcuiluc pa in amal, quil: Axan, sinda anquicaqui ilajtlo,

amo xiyén quinami yehuanten hual amo quinequinijme nechcaquilo.

<sup>8</sup> Josué quinlaicanac in israelitos pa in lali Canaan. Ma yoje, sinda cataya pa in lali capa in israelitos yahuiloaya yulilo ca Dios imosehuilisli, cuaquinon David amo quijtuaya inahuac oc se imosehuilisli Dios hual ajsisquiaya quiman panujque míac xixihuil pejtataloaya ca quiman Josué ajsijque huan in israelitos pin lali Canaan.

<sup>9</sup> Huan yojque, mas que ayamo ajsic, ticmatilo pampa cayas pa Dios ixolomes mosehuilisli hual amo quiman lamis. In mosehuilisli yes quinami Dios imosehuilisli quiman laquisac quinchíac in cielos (ilhuicac) huan in lalticpan.

<sup>10</sup> Inon niquijtúa, pampa quiman aqui yes ajsic capa yulis ca Dios imosehuilisli, cuaquin mosehuis pa yajmo tequipanus, noje quinami Dios mosehuic pa yajmo tequipanus quiman lamis quinchíac in cielo huan in lalticpan.

<sup>11</sup> Yojque, ma timotolinican pa tiajsisqui capa tiyulisqui ca imosehuilisli Dios, pa yojque amo mochías laijlaculi se ca tehuanten pampa amo ticnel-tocaloaya jan quinami amo quineltocanjme yehuanten hual yulinijme pa yina.

<sup>12</sup> Unca pampa yuli Dios ilajtlo quinami Dios yuli, huan yojque ilajtlo quipía chichualisli míac, huil ajsi pa capa unca in niman laijtlic pa toyolo, techmachiltitica leca ticnequilo ticchihualo len yes ticchihualo. Quema, Dios ilajtlo calaquía toyolo pa lanextilis mochi hual unca pa toyolo huan pa quinextilis len unca pa se iyulilisli huan iyolo. Unca quinami se machete latentili ca pani huan ca itzindan huil latequi pa quinextis mochi laijtic in hual quitectica. Quema, quinextía in tuétano huan mochi ilancuitas pa iumimes se.

<sup>13</sup> Huan ilaixpan Dios amo unca len lalatili pan mochi hual yihual quichíac. Mochi moita inminlaixpan yihual iixtololojmes quinami neli unca, amo unca lalatili jan nadita. Huan timoxtin ticpiasi pa tiquitasqui ca yihual.

### *Jesús yihual in tiopista niman hué*

<sup>14</sup> Yojque, quinami ticpialo se tiopista hué hual quipanahuic in cielos (ilhuicac) huan ajsic capa unca Dios, nicnequi niquijtúa, yihual Jesús ixolol Dios, ma camo quiman timocahuacan ticlalican tolaneltocalisli ca yihual. Inon unca tolaneltocalisli hual tiquijtulo neli pampa ticpialo.

<sup>15</sup> Inon niquijtúa pampa ticpialo Jesucristo, yihual se tiopista hué hual huil quimati quinami tehuanten amo ticpialo chichualisli. Yihual ihuían panuc mochi lacocoltilisli jan quinami tehuanten. Ma yoje amo quiman quichíac laijlaculisli.

<sup>16</sup> Yojque, ma camo timomajtican ticlajlanican Dios timoajxiltiticate pa laijtlic toyolo ca capic yihual unca huelitijtica capa quichihuilia cuali. Ma ticchihuacan yojque pa yihual techicnilis mas que ticchihuaje laijlaculisli, huan pa yihual tejchihuilis cuali pa techpalehuis quiman yes monequi pa ticpiasqui in cuali hual yihual tejchihuilia.

## 5

<sup>1</sup> Momati pampa mochi tiopista hué unca lajtultili capa cate lacames. Huan unca lajtultili pa quichías in hual monequi pa quinmoitaltilis lacames

ca mosehuilisi ca Dios. Quipía in tiopista pa quinlalilis ilaixpan Dios huendis huan huendis lajlachichinuli pa quinpupjuhuas lacames inminlajlaculisli.

<sup>2</sup> Se tiopista hué quimati laquetza cuali ca yehuanten hual amo quimatilo huan pampín seppa huan oc seppa quicuilmartillo Dios iojli. Quimati quinchihuilía yojque pampa quimati quinami unca ca yehuanten hual amo quipialo chichahualisli, pampa in tiopista hué noje amo quipía chichahualisli pampa unca quinami yehuanten.

<sup>3</sup> Pampa inon, quipía pa quilalis huendi pa yihual ihuían ilajlaculisli huan noje pa inminlajlaculisli yehuanten.

<sup>4</sup> Huan se lalac amo quiman molajtultía pa yes tiopista, pampa amo unca iyaxca pa quichías inon. Quema, quipía in lasojli tequipanulisli san sinda yihual Dios quilajtultía pa yes tiopista. Jan yojque Dios quilajtultic Aaron pa quinpehualtis in tiopistas huejué pa yehuanten in israelitos.

<sup>5</sup> Huan yojque Cristo noje amo mochihuilic hué pa molajtultisquiaya pa yesquiaya tiopista hué. Cataya Dios in Tajtzin hual quichihuilic hué, quilic pa yesquiaya tiopista hué, pampa quilic:

Tehual tinoXolol, unca moyaxca pa ticpías mochi lasojlalisli, nimijchihuilic noXolol axcan.

<sup>6</sup> Huan jan yojque quiqtúa noje pa oc se lajtol lajcuiluli, quil:

Tehual titiopista huan amo timocahuas tiyes tiopista.

Tiunca tiopista san quinami yec tiopista Melquisedec.

<sup>7</sup> Yojque, Jesucristo, quiman cayani pan lalticpan, quitzajtzilic Dios huan quilajlanic ca lajtol chichahuac, quicocojtataya iyolo huan chocatataya. Quilajlanic yihual Dios hual huil quiyuliltía se hual miquic. Huan Dios quicaquic, pampa Cristo yulini quimaztataya momajtía ilaixpan Dios.

<sup>8</sup> Huan mas que yihual iXolol Dios, yihual monextilic yulic quineltocatica Dios ca mochi in lacocoltisli hual panuc.

<sup>9</sup> Huan yojque yec lajtultili pa yes in se lalac san hual huil quinquixtic pa camo polehuisqui mas que quichihuajque lajlaculisli yehuanten hual quineltocalo.

<sup>10</sup> Quema, Dios quilajtultic pa yes tiopista hué pa quitequipanulis Dios quinami quitequipanulini Melquisedec.

### *Unca polehuilisi pa se sinda mocahua quineltoca Cristo*

<sup>11</sup> Inahuac in Melquisedec ticpialo míac pa antimitzilisqui huan unca etic pa antimitznextilisqui, pampa anmochíac lacames hual amo anquimati cuali len quinequi quiqtúa se lamaxtilisli.

<sup>12</sup> Niquitúa inon, pampa mas que axan quipía míac quiman anpehuac anquineltocac Jesucristo, ma yoje, ayamo anquimati len pa huil anquinmaxtis oc sequin Dios ilajtol. Quema, quiman anpehuac anquineltocac pa quiman anajsic pa axan, monequi pa se anmitzmaxtis oc seppa in lajtomes niman tijtipichin inahuac Dios ilajtol. Unca quinami xolotzindis quinequilo jan leche san, amo huil quicualo in hual monequi pa quicuasqui ca inminlames.

<sup>13</sup> Huan yojque unca se sinda amo quimati len quinequilo quiqtulo innojen lajtomes niman huejué inahuac Dios ilamaxtilisli. Quiqtulo innojen lajtomes quinami Dios quinmana lacames pa yesqui iyaxca. Unca pampa axan Dios quinmita yehuanten lacames hual amo quipialo lajlaculisli. Sinda amo quimati se inon, cuaquín yojque in se unca quinami se xolol hual jan huil cuni leche, pampa in se amo quimati jan quinami se xolotzindi amo quimati.

<sup>14</sup> Se hual quimati niman cuali Dios ilajtol unca lalac laiscaltili, yihual quinami se lalac hual moscaltic. Huan pampa quimaztía cuali ilajtol Dios,

quimati yuli quimaztica len unca cuali huan len unca amo cuali. Tiquijtulo yihual quinami se hual huil lacua chichahuac.

## 6

<sup>1</sup> Yojque, ma camo tipehuacan oc sejpa pa timomachiltisqui in lamaxtilisli tipichin inahuac Jesucristo quinami ticchihuaque quiman tipehuajque ticneltocajque. Huan ma timomachiltican lamaxtilisli chichahuac inahuac yihual, ma tiyén (tiyecan) quinami lacames hual quimatilo. Ma camo timolaquetzilican inahuac in lamaxtilisli oc sejpa hual mochi sejse quicaqui quiman pehua quineltoca Jesucristo. Nicnequi niqijtúa, ma camo timomachiltican oc sejpa ca in lamaxtilisli hual unca quinami monequi pa se quipalas iyolo. Quipalas iyolo pa yajmo yulis quinchijtica lachihualisli hual lamilo quixilujticate se pa camo cayas capa Dios pan tonali hual miquis. Ma camo timomachiltican oc sejpa in lamaxtilisli quinami monequi pa se quilalis ilaneltocalisli ca Dios.

<sup>2</sup> Huan ma camo timomachiltican oc sejpa in lamaxtilisli inminahuac in míac lacuayatequilisli huan lapacalisli, huan inon quiman quinlalililo inminmajmajuan inminpan oc sequin. Quinlalililo pa canasqui len pan ipampa in Espíritu Santo. Ma camo timomachiltican oc sejpa in lamaxtilisli hual techilía pampa tiyulisqui oc sejpa quiman timiquilo, huan in lamaxtilisli hual techilía pampa cayas in tonali quiman Dios quintojtocas pa polehuilisli lacames capa amo quiman moquixtis.

<sup>3</sup> Ticchihuasqui inon sinda Dios techmacahuiltía, nicnequi niqijtúa, tipehuasqui tilamaxtisqui ca lamaxtilisli chichahuac.

<sup>4</sup> Inon niqijtúa, pampa amo quiman huil quinpalehuilo yehuanten pa quipalasqui inminyolo oc sejpa pa pehuasqui lajtusqui pa inminyolo quinami Dios sinda Dios quinlahuic sejpa inminyolo ca ilajtol calica yojque quipalac inminyolo. Yehuanten canajque in hual Dios quinmac hual unca iyaxca in cielo. Yulijque pa se nadita quimazticate inon. Quimatic len inahuac in Espíritu Santo.

<sup>5</sup> Ajsijque quimatijque quinami unca cuali len Dios quijtúa. Yulijque pa nadita quimazticate ilahuelilitilisli Dios hual momatis pin tonalijmes hual ajsitihualalo.

<sup>6</sup> Cuaquinon, sinda yajmo quinequilo cantialo iojli Jesucristo, amo huil quipalehuilo pa quipalasqui inminyolo oc sejpa pa lajtusqui laijtic inminyolo quinami Dios. Sinda lacames yajmo quinequilo quineltocalo Jesucristo ilamaxtilisli, yojque lanextilijticate quinami yehuanten moijlacutilo jan yoje quinami yehuanten hual quipilujque Jesucristo pin cuahuil. Quema, yojque quichihualo pa Cristo nesis quinami se elehuis hual amo monotza pa quineltoacasqui.

<sup>7</sup> Nican unca se lanextilisli pa anquimatis len inon quinequi quijtúa: In lali hual techunía in quiahuil hual míac huetzi ipan, yojque quimaca mochi pacholimes pa quipixcasqui itecojuan in lali hual quixahualo huan quitocalo. Huan yojque Dios quichihuilía in lali niman cuali.

<sup>8</sup> Ma yoje, sinda jan quimaca huizli huan pacholimes hual quipialo isacayo hual latzopinilo, cuaquín in lali amo monotza nindeno. Ca nadita Dios yahui quijtúa pampa mocahuas laijlaculi, huan lamis moitas lachichinuli. Huan jan yoje yes ca yehuanten hual quimatilo cuali ilajtol Dios huan ma yoje amo yulilo quinami quinequi.

*Inon hual ticchixticate techpalehuía pa como tijcahuasqui Dios iojli*

<sup>9</sup> Mas que tilajtulo yojque, lasojli nocnían, neli ticmatilo pa toyolo axcan pampa amo anyultica yojque anquicuilmajtica Dios iojli. Neli tiquijtulo

lajitic toyolo pampa anyultica quinami yihual quinequi. Huan anquipías iyulilisli pampa yihual anmijchihuilic cuali pa anyes laquixtili pin polehuilisli.

<sup>10</sup> Dios quimati quinchihuilía moxtin quinami yulilo huan amo quilcahua quinami anyuli anquichihuilijtica mías hual cuali huan quinami anlanextilía quinami anquimati anquinlasojla yehuanten hual motocayaltilo ca Dios itoca. Huan yojque anlanextilía quinami anquilasojla Dios pan ipampa quinami anquinpalehuiaya yehuanten hual iyaxca Dios, huan amo anmocahua anquinpalehuía.

<sup>11</sup> Ticnequilo mías pa mochi sejse ca amhuanten lanextilis yojque quinami anquinetica niman mías pa anquimatis mochi hual quimaxtia Jesucristo hual aqui anquichixtica. Ticnequilo pa anlanextilis quinami anquipía in mías lanequilisli.

<sup>12</sup> Xicnequican mías inon, pa yojque amo amochías latzejquimes huan pa anyulis yojque quinami monequi pa anyulis amhuanten hual anquimati Dios ilajtol melahuac. Quema, xiyulican yojque quinami yulilo yehuanten hual quipiasqui in hual Dios neli quinmilit pampa yahuiyoaya quipialo. Huan quipiasqui pampa quineltoaló inon hual Dios quinmiliaya. Quichialo mías tonalijmes amo quipolujticate inminyolo, huan cuaquín canasqui.

<sup>13</sup> Pa yina Dios neli quilic Abraham in hual yahuiaya quichihuii. Yojque quilic ca yihual Dios itoca, ca lajtol hual amo mopalac. Amo cataya oc se hual quipiaya itoca niman hué quinami Dios itoca calica huil quijtuaya Dios inon ca lajtol hual amo mopala.

<sup>14</sup> Huan quilic: “Nimijchihuilis niman mías cuali huan nimitzmacas niman mías momiahuimes hual momiactisqui huan quitemiltisqui in lali.” Huan quiman Dios quijtuc inon ca lajtol hual amo mopalac, lanextilic pampa inon hual quijtuaya yahuiaya panu.

<sup>15</sup> Huan yojque Abraham amo quipoluc iyolo pa innojen mías xixihuimes quiman quichixtataya. Huan umpa Dios quimacac in hual quilic neli yahuiaya quimaca.

<sup>16</sup> Lacames neli quijtulo ca lajtol hual amo mopala ca itoca se hual unca niman hué, pampa yehuanten inmintocajmes amo quiman ajsilo yelo yojque hué. Quijtulo ca se itoca hual quipía lahuellitilisli pa quinchihualtis len quijtulo ca lajtol hual amo mopala. Huan ca mochi lacames hual quinlasalo lajtomes, san ca se lajtulisli ca lajtol hual amo mopala huil quinlamía pa yajmo quinlasalo lajtomes. Unca pampa in hual quijtúa mocahua melahuac pan ipampa in lajtol hual amo mopala.

<sup>17</sup> Cate mías innojen hual Dios quinequi tejchihuilía. Quinequi pa ticmatisqui innojen hual yihual quinequi tejchihuilía. Huan innojen hual tejchihuilis, amo quiman quipalás. Pampa inon, quinextic pampa unca neli pan ipampa se lajtol hual amo mopala.

<sup>18</sup> Yojque, nican cate omenten hual amo quiman mopalásqui. In hual Dios neli quilic mocahua quinami quilic. In lajtol calica Dios quijtuc inon amo mopalás pampa Dios amo huil islacati. Ticchiasqui ticmazticate pa toyolo unca neli in hual Dios quijtuc pampa se tonali yahui techmaca tehuanten. Huan ticholujque pa toyolo capa unca Dios pa yihual techpías huan techquixtilis mochi hual techijlacúa. Yojque timochicahualtilo pa toyolo pa ticchiasqui inon hual neli techilic pampa ticpíasqui.

<sup>19</sup> Huan inon hual ticchialo ticmatilo ca mochi toyolo pampa unca melahuac. Huan amo quiman mijcuanis, amo unca nindeno hual quipalás. Quinami in teposli etic hual quipía se barco pa camo mijcuanis capa unca

lasaluli, yojque inon hual ticchixticate techpíla toyulilislí capa amo huil mijcuanis, pa camo tiasqui tictemusqui nindeno capa ticlalisqui tolanelto-calislí. Inon unca hual ticchialo: Ticayasqui se tonali ca Dios pin niman lasojlí calijtic pin cielo (ilhuicac). Unca quinami in niman lasojlí calijtic itepotzcon in tzotzomajli telahuac hual pilujtica lajco pin lasojlí calijtic huan in niman lasojlí calijtic pin tiopan pa Jerusalén.

<sup>20</sup> Huan nepa pin niman lasojlí calijtic pin cielo calaquic Jesucristo quiman ayamo ticalaquijque tehuanten. Techlaicantiahuiaya quiman calaquic nepa. Huan noje ticalaquisqui tehuanten se tonali. Yojque quichíac pampa mochíac tiopista hué pa tehuanten. Yihual se tiopista quinami yec in tiopista itoca Melquisedec.

## 7

### *Jesucristo, yihual tiopista quinami yojque yec tiopista Melquisedec*

<sup>1</sup> In Melquisedec yec hué hual huelitiaya pa Salem huan yec itiopista Dios in niman hué. Yihual Melquisedec quinami quic Abraham in tonali hual Abraham mocuetataya quiman quinsulahuac in huejueyenten hual quiquitzquijque icni Lot. Huan Melquisedec quinoztac Dios pa quichihuilisquiaya cuali Abraham.

<sup>2</sup> Noje pa yihual Melquisedec, Abraham quimacac len hual quinmanilic in huejueyenten amo cuajcuali. Quinxiluc diez lajlajco ca mochi hual quinmanilic huan quiquixtilic se lajco pa quimacasquiaya Melquisedec. Axan, ¿len quinequi quijtúa in quinami itoca Melquisedec? Pehua quinequi quijtúa “hué hual quichía mochi melahuac”. Huan noje yec hué hual huelitiaya pa Salem hual quinequi quijtúa “hué hual huelitía ca mosehuilislí pa moxtin”.

<sup>3</sup> Ilajto Dios amo techilía aquí yeje itajtzin huan inantzín, amo techilía aquinojen yeje iabuelojmes huan imiahuimes. Amo techilía quiman pehuac o lacatic huan quiman lamic o miquic. Yojque, ilajtol Dios techilía san quinami Melquisedec yec lanextilislí pa quinami unca iXolol Dios hual amo pehuac huan amo lamis. Huan yojque Dios iXolol quinami Melquisedec amo mocahuas yec tiopista.

<sup>4</sup> Axcan, ¡xiquitacan quinami unca niman hué in Melquisedec! Abraham yec inmintajtzin yehuanten hual quipehualtijque in judíos. Yehuanten Dios ilacames hual cate nican pan lalticpan. Ma yoje Abraham quimacac in Melquisedec se lajco ca innojen diez lajlajco hual yeje mochi innojen hual quinmanilic in huejueyenten hual quinsulahuac.

<sup>5</sup> Huan Abraham quinpiac ixohuiyojmes hual lacatijque quiman panujque xixihuil. Se ca yehuanten itocaya Leví. Huan sequin ca imiahuimes Leví Dios quinmacac pa yes inminyaxca pa yesqui tiopistas pa Dios ixolomes in israelitos, jan sequin imiahuimes Leví san. Huan in lajtol quilía pa in tiopistas imiahuimes Leví canasqui se lajco hual quiquixtililo mochi diez ilajlajco mochi tomin hual quipialo inmicnían, mas que inmicnían noje yeje inminmiahuimes innojen oc sequin ixohuiyojmes Abraham.

<sup>6</sup> Huan in Melquisedec amo yec Abraham imiahuil quinami yehuanten. Ma yoje, Abraham quimacac se ilajco in diez ilajlajco inon hual quipiaya Abraham, huan yihual quituchíac Abraham. Quema, quilajlanic Dios pa quichihuilisquiaya cuali Abraham, mas que Dios quilic neli Abraham pampa yahuiaya quichihuilí miac lachihualislí niman cuali. Yoje pan ipampa Abraham, moxtin in lacames pin lalticpan quipialosquiaya miac cuali hual quinmaca Dios.

<sup>7</sup> Axcan, pa in se hual niman hué unca iyaxca pa quilis latuchihualisli in se hual unca tipichin. Amaqui huil quijtúa amo unca yojque.

<sup>8</sup> Huan axcan capa cate in tiopistas hual cate imiahuimes Leví, yehuanten canal in se ilajco innojen diez lajlajco. Huan yehuanten cate lacames hual miquisqui. Pa yina capa cataya Melquisedec, yihual Abraham quimacac se ilajco mochi innojen diez, huan ilajtol Dios neli quijtúa san pampa yuli Melquisedec.

<sup>9</sup> Huan mas que yehuanten imiahuimes Leví hual mochi tonali canal in se ilajco mochi diez ilajlajco in hual quipialo inmicnían, ma yoje huil tiquijtulo pampa unca quinami yehuanten noje quilaxlahuilijque Melquisedec in se ilajco in diez lajlajco. Quilaxlahuilijque pan ipampa Abraham.

<sup>10</sup> Unca pampa cataloaya lajitic Abraham, ayamo lacatijque imiahuimes Abraham pan tonali hual Melquisedec quinamiquic Abraham mocuetataya quiman lamic quinsulahuac innojen huejueyenten.

<sup>11</sup> In ilajtol Moisés hual quijtúa quinami tequipanulo tiopistas, inon yec in lajtol hual niman miac monozaya. Unca pampa in israelitos quicaquijque in lajtol pan ipampa Moisés pa yojque cayalosquiaya tiopistas pa quitequipanuililosquiaya Dios pa yehuanten in israelitos. In tiopistas yeje imiahuimes Aarón hual yec imiahuil Leví. Sinda in tiopistas huil quichihuililoaya in israelitos quinami Dios quinequiaya, cuaquinon amo monequiaya pa cayasquiaya oc se tiopista hual amo cataya imiahuil Aarón. Amo monequiaya pa cayasquiaya oc se tiopista hual yesquiaya quinami Melquisedec.

<sup>12</sup> Huan sinda quipalalo in lajtol hual quijtúa quinami unca inmintequipanulisli in tiopistas, cuaquinon monequi pa mopalas mochi in lajtol.

<sup>13</sup> Monequi pa yes yojque pampa tiquijtuticate quinami unca Jesucristo totiopista. Huan yihual amo unca imiahuil Leví. Unca imiahuil Judá hual yec icni Leví. Huan pa Judá imiahuimes amo quiman cataya inminyaxca pa quitequipanuililosquiaya Dios pan lasojli calijtic capa quichihuililo huendi pa Dios pin tiopan hué. Jan cataya inminyaxca san sequin imiahuimes Leví.

<sup>14</sup> Huan moxtin quimatilo quinami toTata Jesucristo unca imiahuil Judá. Pa ilajtol Moisés amo quijtúa nindeno hual quimacahuilitia pa yehuanten imiahuimes Judá huil mochihualo tiopistas.

<sup>15</sup> Huan inon huil momati niman cuali quiman ajsi mochía tiopista oc se lacal hual unca quinami in tiopista Melquisedec.

<sup>16</sup> Inon quinequi quijtúa pampa unca se tiopista hual amo mochíac tiopista yojque quinami quijtúa in lajtol hual Dios quimacac Moisés. In lajtol quijtúa se tiopista quipías yes se imiahuil Aarón. Aarón quinpehualtic innojen tiopistas hual cate Leví imiahuimes. Ma yoje, in tiopista hual unca quinami Melquisedec unca se tiopista hual amo quiman lami huan, pampa quipía in lahuelilitlisli pa camo quiman lamis, cuaquín yoje unca iyaxca pa yes tiopista.

<sup>17</sup> Unca pampa Dios quijtúa pa ilajtol lajcuiluli, quil: Tehual, titiopista huan amo quiman timocahuas tiyes tiopista yojque quinami Melquisedec yec tiopista.

<sup>18</sup> Yojque tiquitalo quinami in se lajtulisli hual cataya pa yina yajmo monequi pa yes laneltocali, pampa amo quipía chicalhualisli pa quinchihuilis lacames in hual monequi pa yojque yelosquiaya laquixtili pin ipolehuilisli inminlajlaculisli. Pampín yajmo monotza in lajtulisli.

<sup>19</sup> Cataya pampa in lajtol hual Dios quimacac Moisés amo ajsiaya quinpahui Dios ilacames pa mochihualosquiaya quinami Dios quinequi. Pampa



inon, Dios techualiquilic len niman cuali hual in lajtulisli hual quimacac Moisés amo quiman ajsiaya caya yojque cuali. Inon ticchialo ticmazticate chicahuac pa toyolo pampa tiajsisqui timochihuasqui quinami Dios queinequi. Pampa inon, axcan huil timoajxilito ca Dios.

<sup>20</sup> Huan pa Jesucristo, mochíac iyaxca inon pa yes tiopista pan ipampa quinami Dios quijtuc ca lajtol hual amo mopala, quijtuc pa yojque yesquiaya.

<sup>21</sup> Huan amo cataya lajtol hual amo mopalaya pa yehuanten hual mochihualoaya tiopistas quinami quijtúa in lajtol hual Moisés techmaxtic. Ma yoje, ca Jesucristo, Dios ilajtol quijtúa, quil:

Axcan quijtuc chicahuac in Tata huan amo quipalas len quijtuc, quilic: "Tehual tiunca tiopista huan amo timocahuas yes tiopista yojque quinami yec tiopista Melquisedec."

<sup>22</sup> Pan ipampa inon, Jesucristo mochía se hual technextilía quinami Dios axcan quilalic se lajtulisli niman cuali pa tehuanten, amo quinami in se lajtulisli pa yina.

<sup>23</sup> Huan amo inon san. Cate míac in oc sequin tiopistas hual yeje tiopistas pan ipampa Moisés ilajtol. Amo huil mocahualo tequipanujticate quinami tiopistas, pampa quipiasqui pa miquisqui quinami timoxtin.

<sup>24</sup> Amo unca yoje ca Jesús. Yihual mocahua tequipanujtica quinami tiopista pampa yihual mocahua yultica, yihual amo lami.

<sup>25</sup> Pampa inon huil quinquixtía pin ipolehuilisli inminlajlaculisli yehuanten hual hualalo moajxiltiticate ca Dios pampa yihual quinpalehuía pa moajxiltisqui. Inon unca pampa Jesucristo amo mocahuas yulis pa quilajlanis Dios pa yihual Dios quinchihuilis cuali huan pa quinmacas mochi len monequi pa quipiasqui yehuanten hual quineltocalo.

<sup>26</sup> Se tiopista hué jan quinami Jesucristo neli unca in tiopista hual monequiaya pa ticpialosquiaya, pampa yihual unca mochi chipahuac pa iyolo ca Dios. Yihual amo quipía nindeno calica se quimotexpahuilía ca laijlaculisli. Amo caniltic nindeno pa iyolo hual amo cuali. Yihual mijcuanía pa camo quichías lacames inminlajlaculisli, amo quiman yuliaya yojque. Huan Dios quilalic pa capa unca pa pani mochi in cielos. Yihual unca inminhué moxtin in huejueyenten pa yojque huelitis pan mochi hual Dios quichíac.

<sup>27</sup> Huan amo monequi pa quimacas mojmosta huendi pa yihual ilajlaculisli huan cuaquín pa quimacas huendi pa inminlajlaculisli in oc sequin lacames. In oc sequin tiopistas, quema, quipialo pa quichihuasqui yojque huendi mojmosta. Amo unca yojque ca tiopista hué Jesucristo hual quichíac se huendi san pa in tonali hual motemacac yihual ihuán pa yes huendi. Huan in huendi mocahua cuali, amo quiman lamis ilahuelilitlisli.

<sup>28</sup> Unca yojque, pampa quinami quijtúa Dios ilajtol hual Moisés quimaxtic, quinlajtultiloaya pa yesqui tiopistas lacames hual cate laijlaculi quinami moxtin, huan amo cate chijchicahuac. Ma yoje, quiman quipiajque in lajtol míac xixihuimes, Dios lajtuc ca lajtol hual amo mopala huan quilajtultic iXolol pa yes tiopista. Yihual Dios quihueliltic pa mocahuas in se tiopista niman hué, se tiopista hual amo quiman lamis.

## 8

### *Jesús technextilic quinami ticajsilo Dios ilajtulisli yancuic*

<sup>1</sup> Axan, inon unca in niman hué hual tilajtuticate, nicnequi niqijtúa, unca in niman cuali pa anquimatis pampa ticpialo se tiopista hué hual unca quinami axcan annimitzilic. Yihual unca pa in cielo inahuac Dios toTajtzin Hué. Huan yihual huelitijticate, pa imajma cuali toTajtzin molalijtica.



<sup>2</sup> Yihual Cristo quipía itequipanulisli pa tehuanten nepa pin niman lasojli tiopán Dios. In unca pin lasojli tiopán melahuac hual jan moita pin cielo (ilhuicac) san. In Tata quichíac in lasojli tiopán, amo cataloaya lacames hual quichihuaique.

<sup>3</sup> Axcan, ma tiqijtucan len inminahuac tiopistas huejué. Mochi tiopista hué unca lajtultili pa quinlalisqui huendis huan innojen hual quimacasqui lacames ilaixpan Dios. Pampín, monequi pa in tiopista hué, Jesucristo, quipías len pa quilalis ilaixpan Dios quinami huendi.

<sup>4</sup> Sinda cataya nican pan lalticpan, amo huil yesquiaya tiopista, pampa cate tiopistas hual quinlalilo huendis ilaixpan Dios, quinami quinmilía in lajtól hual Dios quimacac Moisés.

<sup>5</sup> Huan in lasojli tiopán capa quitequipanuililo Dios in tiopistas nican pan lalticpan jan technextilía quinami ilanextilisli in lasojli tiopán melahuac hual unca pin cielo. Ticmatilo inon, pampa quiman Moisés yahuiaya pehua quichía in lasojli tiopán lachihuali ca tzotzomajli telahuac, Dios quilic ca lajtól chichahuac, quil: “Xiquita cuali pa ticchías mochi quinami tiqitac nepa quiman nimitznextilic pan in loma hué (tepel).”

<sup>6</sup> Quinami unca inmintequipanulisli in tiopistas, Cristo tequipanúa quinami tiopista hué niman cuali. Amo quiman cataya yoje cuali inmintequipanulisli in tiopistas hual tequipanulo quinami quijtúa in lajtulisli pa yina. Unca yojque pampa Cristo unca se hual latequihuía quinami quijtúa se lajtulisli hual unca niman cuali, amo jan yoje cuali quinami cataya in lajtulisli hual catani pa yina. In ilajtulisli Cristo mochíac pan ipampa lajtomes mejmelahuac hual cataloaya niman cuali.

<sup>7</sup> Axcan, sinda in lajtulisli calica pehuac Dios ilajtól quiapiaya mochi hual monequiaya, cuaquinon amo monequiaya pa cayas oc se lajtulisli hual axan unca.

<sup>8</sup> Ticmatilo monequiaya pa cayas se lajtulisli yancuic pampa Dios amo quitac mochi cuali ca in lajtulisli hual catani pa yina, pampa quijtúa, quil: Quijtúa in Tata: Ajsitihualasqui tonalijmes quiman nicchías lajtulisli yancuic ca yehuanten hual cate Israel huan yehuanten hual cate Judá.

<sup>9</sup> Amo yes quinami in lajtulisli hual nicchíac ca inmintaajtitzian pa yina, pa in tonali hual cataya quinami niqinquitzilic inminmajmajuan pa niqinlaicanac pa quiahuac in lali Egipto.

Nicchías se lajtulisli yancuic ca yehuanten pampa amo yultiahuiloaya quineltocatataloaya nolajtulisli calica nipehuac niqinnextilic no'ojli. Huan pampín nehual niqincajcahuac, quijtúa in Tata.

<sup>10</sup> Axan inon unca in lajtulisli hual nía nicchía ca yehuanten hual cate Israel quiman ajsisqui innojen tonalijmes, quijtúa in Tata:

Niclalilis nolajtomes lajitic inmintzontecon huan yes quinami niqinmijcuilulijtica nolajtomes pan inminyolo, huan niyes yehuanten inminDios, huan yehuanten yesqui nehual nola-cames.

<sup>11</sup> Huan yehuanten amo quipiasqui quinmaxtisqui mochi sejse icni, quijtu-tica, quil, xiquiximati in Tata, pampa moxtin nechiximatisqui, yehuanten hual niman tijtipichin, quema, huan yehuanten hual niman huejué.

<sup>12</sup> Cayas yojque pampa nehual niqinmicnilis mas que yehuanten quichihualoaya laijlaculisli, yuliloaya quichijtataloaya in amo cuali. Cuaquinon yajmo niqijnamiquis inminlajlaculisli.

<sup>13</sup> Yojque, pampa yahuiaya quinmaca se lajtulisli yancuic, inon quinequi quijtúa pampa in lajtulisli calica pehuac Dios axcan mochijtía quinami cacaxli. Huan quinami mochijtía cacaxli, yojque amo yahui huejcahua pa yes, yahui ajsi in tonali quiman yajmo cayas.

## 9

### *In lasojli tiopan pan lalticpan huan in hual unca pa in cielo (ilhuicac)*

<sup>1</sup> Axcan, in lajtulisli calica pehuac Dios ilajtulisli ca tehuanten noje quip-  
iaya lamaxtilisli hual unca quinami monequiaya pa lacames quimolan-  
cuacuetzilisqui Dios. Huan quijtuc mochi quinami yesquiaya lachihuali in  
lasojli tiopan capa quimolancuacuetzililo.

<sup>2</sup> Yojque quichihuaque se cali ca tzotzomajli huan cuilaxli tejtela huac.  
Huan calijtic in lajco capa calaquinijme hual itocani in lasojli tiopan cat-  
aloaya in tapalcal lachihuali ca oro pa lahuilisli huan inon capa in tiopistas  
quinlalinijme jan yoje in panes quinami huendi pa Dios.

<sup>3</sup> Huan itepotzcon in tzotzomajli telahuac hual pilujtataya huan quixiluj-  
tataya lajco pin cali calijtic cataya oc se lajco calijtic hual motocani in niman  
lasojli calijtic.

<sup>4</sup> Nepa catanijme in xicali lachihuali ca oro calica lapopochuinijme pin  
niman lasojli calijtic huan in latzacuali itocani iarca in lajtulisli. In catani  
lapachuli ca oro pa mochi iquiahuac. Lajtic in arca cataya se texcumil  
lachihuali ca oro quipixtataya nadita maná hual unca in hual Dios pin  
cielo quitlanic pa quicualosquiaya in israelitos quiman cataloaya capa  
amo cataya len pa quicualosquiaya. Noje cataloaya icuajtzindi Aarón hual  
xuchuhuic huan in tixcalimes pajpalahuac capa quijcuiluc Dios ilajtomes in  
lajtulisli.

<sup>5</sup> Pa pani in arca cataloaya in querubines cuajcualtichin ca cahuanilisli  
hual quipialoaya lapalahuali inminastacapajmes pa pani pa yojque quiza-  
cualosquiaya in latzacualoni hual quitzacuaya in arca pa pani. Huan in  
latzacualoni motocani in capa Dios laicnilia, capa quinpupjuhuani inminlai-  
jlaculisli. Ma yoje, amo tialo tilajtulo innahuac innojen sejse ca sejse axcan.

<sup>6</sup> Quiman catani lachihuali in cali huan mochi hual quipiaya pa asoy  
calijtic, cuaquinon in tiopistas calaquinijme mojmosta calijtic pin lasojli  
calijtic quichijtataloaya len monequini pa quimolancuacuetzililosquiaya  
Dios.

<sup>7</sup> Huan pin niman lasojli calijtic jan calaquini in tiopista hué san. Huan  
calaquini pa jan se tonali san pa sejse xihuil. Huan quipiani pa quihuicas-  
quiaya esli ca yihual quiman calaquini. Quihuicani in esli quinami huendi  
pa yihual ilaijlaculisli huan cuaquinon calaquini ca esli quinami huendi pa  
in oc sequin israelitos inminlajlaculisli. Cataya pa inminlajlaculisli hual  
amo quimatijnijme quiman quichihuanijme.

<sup>8</sup> Yojque in Espiritu Santo technextilia quinami Dios ayamo techlapulic  
ojli calica ticalaquilosquiaya pin niman lasojli calijtic, in quinequi quijtúa  
noje in tiopan pin cielo capa unca Dios. Dios amo techlapulic ojli pa  
in niman lasojli tiopan pa in cielo (ilhuicac) pa tiajsisqui nepa mojmosta  
quiman mocahuani moqueztataya in lasojli tiopan pan lalticpan. In lasojli  
calijtic catani pa molancuacuetzalisli pa quiahuac in niman lasojli icalijtic  
in tiopan.

<sup>9</sup> Huan quinami Dios ayamo techlapulic ojli pa in niman lasojli tiopan  
pin cielo (ilhuicac), inon technextilia quinami pa yina amo catani quinami  
se ajsisquiaya capa unca Dios. Cataya pampa in calijtic capa calaquinijme  
in cali lachihuali ca tzotzomajli pan lalticpan quitzacuilini se pa camo

calaquisquiaya capa Dios. Quinami quijtuni in lajtulisli calica pehuac Dios quinnotzac ilacames, quipianijme pa quinlalillosquiaya ilaixpan Dios huendis huan innojen oc sequin hual quimacanjime. Ma yoje, innojen amo huil quimachilitini se pa iyolo pampa Dios quiztataya chipahuac pa iyolo quiman quimolancuacuetzilini quinami quijtúa in lajtulisli calica Dios pehuac quinnextilic iojli. Nicnequi niquijtúa, se ilajmatilisli inahuac inon hual unca cuali o amo cuali amo mocahuani pa quimotexpahuilis inahuac ilajlaculisli.

<sup>10</sup> Quiman quimolancuacuetzilinjime Dios quinami quijtuaya in lajtulisli hual cataya pa yina, yojque jan quinnextilini yehuanten len momacahuilitini pa quicualosquiaya huan cunilosquiaya. Huan quinextilini quinami mopacalosquiaya huan quinmaxtini oc sequin lajtomes. Innojen lajtomes cataloaya quinami mochipahuililosquiaya inmincuerpos pa quichihualosquiaya quinami monequiaya pa quimolancuacuetzilisqui Dios. Quipianijme pa quichijtihualalosquiaya quinami quijtuloaya in lajtomes, huan yojque se tonali ajsilosquiaya in tonalijmes quiman cayasquiaya in lajtulisli yancuic.

<sup>11</sup> Cuaquinon, Cristo nescic pa yes totiopista hué pa techpalehuis ca innojen cuali hual Dios techmaca pan ipampa in lajtulisli yancuic. Yihual amo panuc pa in cali lachihuali ca tzotzomajli telahuac pa ajsisquiaya pa in niman lasojli tiopan pan lalticpan. Yoje unca quinami quichihuanijme pa yina in tiopistas. Yihual panuc ca capic cataya se cali niman hué huan niman cuali, quinami Dios quineguic. Inon unca se cali hual amo quichihuaque lacames. In cali amo unca lachihuali ca len hual moita pan lalticpan.

<sup>12</sup> Quema, yihual panuc pa calaquis jan sejpa san pin niman lasojli tiopan, quinequi quijtúa, pa in cielo (ilhuicac) capa unca Dios. Huan amo quihuicac ca yihual inminesli chivos huan toros, quinami quihuicanijme ca yehuanten in tiopistas pa yina. Yihual calaquic pan ipampa iesli yihual ihuían. Huan yojque neli techmacahuac, yojque techquixtilic tolajlaculisli ilaixpan Dios. Yajmo monequi pa quichías oc sejpa.

<sup>13</sup> Huan neli in tiopistas cajuichunijme yehuanten israelitos ca inminesli chivos huan toros huan itinexli se sihuacuacua becerra yancuic lachichinuli. Quinchihuilinijme yojque yehuanten quiman moitanijme amo chijchiphuac huan yojque amo huil quilalilinijme inminhuendis ilaixpan Dios. Huan quiman cajuichunijme yojque, cuaquinon mocahuaniijme cuali pa huil quilalillosquiaya huendis. Yojque, sinda cajuichunijme yojque huan mocahuaniijme cuali pan ipampa in esli,

<sup>14</sup> axcan ¡quinami amo anmijchiphauilis anmoyolo Cristo iesli! Iesli quipía niman miac chicahualisli hué. Inminesli innojen toros huan chivos amo quiman huil quipía chicahualisli yoje hué. Quema, anmolajmatilisli inahuac in hual unca cuali huan amo cuali yajmo anmitzmotexpahuilis anmoyolo inahuac len yes anquichíac hual anmijxilusquiaya ca capic amo quiman huil anmocuepas ca Dios. Huan axan huil anquitequipanuilla in Dios hual amo quiman lami, amo anquimahuilijtica nindeno. Unca pampa Cristo motemacac quinami huendi pa Dios, se huendi hual amo quipiaya len hual amo cuali. Motemacac quinami huendi pan ipampa in Espíritu Santo hual amo quiman lami.

<sup>15</sup> Yojque, yihual Cristo moquetza lajco pin lacames huan Dios pa quin-palehuis yojque quinami quijtúa in lajtulisli yancuic. Yojque yehuanten hual Dios quinnotzac pa yesqui ixolomes huil canaló inon hual unca iyaxca Dios, inon hual amo quiman lamis, inon hual Dios quijtuc neli pampa yahuiaya quinmaca. Quinmacas inon pampa unca Cristo hual miquic, huan pampa in,

imiquilisli quinmacahua. Quinquixtilic in laijlaculisli hual quichihuaque quiman quipianijme pa quineltocasqui in lajtulisli calica Dios quipehualtic.

16 Axcán, sinda unca se lajcuilulisli hual quijcuilúa se pa yoje momatis aquí canas inon hual iyaxca quiman miquis, yojque monequi pa momatis neli pampa miquic aquí hual quijcuiluc in lajcuilulisli.

17 Unca pampa jan mochías cuali se lajcuilulisli quiman miqui aquí yes hual quilajcuilultic.

18 Pampín, in lajtulisli calica Dios quipehualtic, inon quiyancuilijque ca inminesli yulijquimes hual miquijque.

19 In tonali quiman Moisés quinmilic moxtin in israelitos mochi in lajtol, canac inminesli becerros huan chivos huan al huan se borrego itojmiyo layapali chichiltic huan se cuajtzindi de hísopo huan cajuichuc in amal capa cataya lajcuiluli in lajtol huan cajuichuc moxtin in israelitos.

20 Huan quijjutuc: “In unca in esli calica Dios quichía cuali in lajtulisli hual quijjutuc chicahuac pa anquineltocas.”

21 Huan jan yoje cajuichuc ca in esli in cali lachihuali ca tzotzomajli huan cuilaxli tejtelahuac. Huan cajuichuc mochi innojen hual cataloaya calijtic calica quitequipanuulinijme Dios.

22 Huan neli, quinami quijtúa in lajtol, in niman míac ca mochi innojen cataloaya lachipahuali ca esli. Dios amo quipujpuhua ilajlaculisli amaquí sinda amo unca ilatuyahuilisli esli.

### *Cristo motemacac pa miquis pa yihual techquixtilis tolajlaculisli*

23 Yojque, monequiaya pa mochipahuilisqui ca innojen lachihualisli calica quitequipanuulijque Dios. Quema, innojen lachihualisli pan lalticpan cataloaya lachihuali quinami nesilo innojen hual cate pa in cielo (ilhuicac). Ma yoje, innojen hual cate pin cielo, monequi pa mochipahuilisqui ca huendis niman cuali, amo ca huendis quinami quinmacalo pan in lalticpan.

24 Huan inon unca len panuc. Dios quimacac se huendi niman cuali. Cristo amo calaquic pa in lasojli tiopan hual lacames quichihuaque hual unca quinami ilanextilisli in lasojli tiopan melahuac pa in cielo (ilhuicac). Calaquic pa in cielo, axcán unca nepa pa nesis iyampa Dios pa huil techpalehuis.

25 Huan amo quipía pa motemacas míac quinami huendi, sejpa huan oc sejpa. Inon unca quinami in tiopista hué pan lalticpan calaquini mochi xihuil pin niman lasojli icalijtic in tiopan, quihuicatataya esli hual amo iyaxca.

26 Sinda yojque quiapiaya pa quichiasquiaya Cristo, cuaquín quiapiaya pa panus miquilisli míac, sejpa huan oc sejpa quiman pehuac in lalticpan huan in cielos. Quinami unca axcán, yihual nesis jan sejpa san quiman lanticate in tonalijmes pan in lalticpan hual axcán unca. Nesis pa quinquixtilis lacames inminlajlaculisli pan ipampa quinami motemacac pa miquis.

27 Dios quinlalilic lacames pa quipiasqui pa miquisqui sejpa huan cuaquinon nesisqui iyampa pa yihual quinlaxlahuis quinami quinmahuilúa pa quinami yuliloaya pan lalticpan.

28 Huan jan quinami Dios yojque quilalic, jan yojque Cristo hual cataya latemacali quinami huendi jan sejpa san pa panus miquilisli pa inminlajlaculisli míac, axcán yahui nesi oc sejpa, huan inon amo pa motemacas quinami huendi pa laijlaculisli. Yihual nesis pa quinmanas ca yihual yehuanten hual ca míac lanequilisli quichixticate.

## 10

<sup>1</sup> Monequi pa anquimatis inon: In lajtol hual Dios quimacac Moisés calica Dios pehuac ilanextilisli techiliaya quinami quipiasqui pa yulisqui yehuanten hual iyaxca. San technextiliaya nadita innojen cuali hual Dios quinmaca lacames quiman hualasquiaya in lamachiltisli cuali capa yehuanten. In lajtol calica quipehualtic inon amo technextilia quinami neli cate mochi innojen. Huan pampa inon in lajtol amo quiman huil quinchia cuali quinami Dios quinequi pa yesi yehuanten hual moajxilito ca Dios huan quinhuacalo in huendis mochi xixihuil, sepa huan oc sepa.

<sup>2</sup> Sinda in lajtol huil quinchihuiaya pa yelosquiaya cuali lacames, cuaquin ¿amo mocahualoaya pa quinhuacalosalosquiaya huendis? Quema, neli unca inon. Sinda yehuanten hual moajxilito ca Dios cataloaya lachipahuali yojque, cuaquinon yajmo lamatiloaya quinami quinmotex-pahuiliaya inminlajlaculisli hual quinchihualoaya.

<sup>3</sup> No, ca in huendis hual quinhuacalaloaya mochi xixihuil, quinmoij-namiquiltia inminlajlaculisli.

<sup>4</sup> Unca yojque pampa inminesli de toros huan chivos amo quiman huil quinquixtilia lacames inminlajlaculisli.

<sup>5</sup> Pampa inon, quiman hualac Cristo pan laticpan, quilic Dios, quil: Huendis ca esli huan huendis hual quincualo amo tiquinnequic, Oh Dios. Ma yoje, tinejchiuilic se cuerpo.

<sup>6</sup> Huendis noje hual quichichinulo pa quinquixtilisqui lajlaculisli, ca innojen amo timopaquiltia,

huan amo timopaquiltia ca huendis hual cate yulijquimes lachichinuli.

<sup>7</sup> Cuaquinon niqulic:

“Xiquita, nihualaya pa nicchihuas quinami tehual ticnequi, oh Dios.

Unca lajcuiluli pin iamal molajtol in hual niahuiaya nicchia.”

<sup>8</sup> Quiman quijtuc inon hual lamic moijcuiluc, amo quinnequic huan amo mopaquiltic ca huendis ca inminesli huan huendis hual quicualo, huan huendis hual cate yulijquimes hual quichichinulo, huan huendis pa lajlaculisli. Yojque laquezataya inminahuac huendis hual quinmacalo Dios quinami quijtua ilajtol in lajtulisli. In lajtulisli cataya inon calica Dios pehuac monextilic ca yehuanten hual quinlajtultic.

<sup>9</sup> Huan umpa quijtuc: “Xiquita, nihualaya pa nicchihuas quinami tehual ticnequi.” Huan quiman quijtuc yojque, inon quinequi quijtua pampa lamiaya ca in lajtulisli calica pehuac pa yojque pehuasquiaya quilali in lajtulisli yancuic.

<sup>10</sup> Pan ipampa quinami Cristo quichiac inon hual Dios quinequic, niqijtua, quiman motemacac icuerpo jan sepa san pa yes huendi hual amo quiman quipias mocuepas yes huendi, yojque yihual tejchiac lacames chijchipahuac huan iyaxca Dios san.

<sup>11</sup> Mochi tiopista quipias pa mocahuas moqueztica mojmosta quiman quitequipanulia Dios ca innojen huendis hual quinlalia sepa huan oc sepa miac ilaixpan Dios. Huan innojen huendis amo quiman huil quinquixtilia lacames inminlajlaculisli.

<sup>12</sup> Ma yoje, quiman Cristo quitemacac se huendi san pa yehuanten inminlajlaculisli, se huendi hual yes cuali huan amo quiman moijlacus, yojque molalic inahuac ima cuali Dios. Inon quinequi quijtua yihual quilamic itequipanulisli, yajmo quipiaya quichia nindeno.

<sup>13</sup> Nepa yahui mocahua pa in tonali hual moitasqui mochi ilacocolinijmes lasulahuali, quinami cayalosquiaya itzindan icxihujmes.

14 Pan ipampa jan se huendi san, yihual quinchíac niman cuali yehuanten hual quinlajtultic pa yesqui iyaxca. Yojque Dios huil quinhuicas yehuanten pa cayasqui ca yihual.

15 Huan in Espíritu Santo noje techilía neli in lajtulisli yancuic, pampa pa ilajtol Dios quijtúa quil:

16 Inon unca in lajtulisli hual niclalis pa yehuanten quiman panusqui innojen tonalijmes, quijtúa in Tata:

Niclalis nolajtomes pa yehuanten inminyolo huan pa inminlajnamiquilisli. Yes quinami niqunmijcuiluilis laijtíc yehuanten pan inminyolo.

17 Huan cuaquinon quijtúa, quil:

Huan yajmo quiman niqunmijnamiquis inminlajlaculisli, huan amo quijnamiquisqui quinami amo nechnehtocanijme.

18 Yojque pan ipampa in lajtomes, quinami in Espíritu Santo techmaxtía, axcan ticmatilo pampa quiman quinpanuc inon quinami in Tata quinpujpuhuac inminlajlaculisli, yojque yajmo monequi pa yesqui huendis pa ilapujpuhualisli tolaijlaculisli.

### *Monequi pa timoajxiltisqui ca Dios*

19 Pampa inon, nocnían, ticmatilo pa toyolo pampa huil ticalaquisqui pin niman lasojli tiopan hual unca icielo Dios, huan inon pan ipampa iesli Cristo hual toyahuic quiman miquic.

20 Ticalaquisqui ca in ojli hual quiyancuilic, in ojli hual techmaca yulilisli. Yihual techlapulic in ojli pan ipampa icuerpo (inacayo) quiman miquic. Pan lalticpan huil calaquini in tiopista hué in niman lasojli icalijtíc in cali lachihuali ca tzotzomajli san pan ipampa in tzotzomajli telahuac pilujtataya hual quitzacuaya in niman lasojli calijtíc. Jan yojque pin cielo pin niman lasojli calijtíc capa unca Dios, san huil ticalaquisqui pan ipampa icuerpo Cristo totiopista niman hué. Yihual quichía quinami in tzotzomajli telahuac.

21 Yojque, ticpialo se tiopista hué hual huelitía capa moxtin yehuanten hual cate ixolomes Dios.

22 Pampa in, ma timoajxiltican ca Dios ticpixticate toyolo melahuac ca mochi toyolo ticneltocaticate Cristo. Ticpiajqque toyolo lachipahuali quinami cataya lajuichuli, pa yoje tolajmatilisli inahuac len unca cuali huan amo cuali amo techmotexpahuilis nindeno. Huan yojque toyolo cate chipahuac. Huan tocuerpos ticpiajqque quinami la'altili ca al chipahuac. Yojque ticatloaya lachipahuali, techquixtilic mochi laijlaculisli hual ticchihuaque ca tocuerpos.

23 Ma camo tijcajcahuacan inon hual ticneltocalo. Ma camo ticmahuilican inon, ma camo tiquijtucan pa toyolo pampa amo unca melahuac. Huil ticlalililo mochi laneltocalisli ca yihual hual techilic neli pampa yahuiaya tejchihuili quinami techilic.

24 Huan ma tiquijnamiquican quinami huil timonejnequiltisqui se huan oc se pa timolasojlasqui huan pa tiquinchihuilisqui cuali oc sequin.

25 Huan ma camo timocahuacan pa timonechicusqui pa tijcaquisqui Dios ilajtol. Sequin yajmo monechiculo míac. Tehuanten ma timochicahuaitcan timoxtin pa ticchihuasqui len Dios quinequi. Huan amo inon san, pampa anquita ajsitihuala in tonali quiman Dios quinmilis lacames inon hual yihual quinchihuilis, quinlaxlajtica pa quinami yuliloaya pan lalticpan.

26 Monequi pa tiyulisqui yojque. Ticmatijque Dios ilajtol melahuac huan sinda tiyulilo ticchijticate laijlaculisli pampa ticnequilo timolalilo quinami Dios icocolinijmes, cuaquinon yajmo unca huendi pa laijlaculisli.

27 Quema, neli ja in san techcahuilis: Dios yahui techtojtoca yihual iyampa huan ticchiasqui inon huan timomajtisi míac, pampa Dios yahui quincocoltía

icocolinijmes ca niman míac cualanilisli huan yehuanten polehuisqui pan ipampa in cualanilisli calica Dios quincocoltis quinami ca tixuxli.

<sup>28</sup> Anquimati quinami cataya pa yina sinda se lalac quixixxicuc in lajtol hual Moisés quimaxtic. Sinda quixixxicuc quinami quijtuaya in lajtol amo quipiaya lahuelilitisli, cuaquin in se quipiaya pa miquis sinda cataloaya ome, ye lacames hual quijfuloaya ca lajtol hual amo mopala pampa quimatiloaya in se yojque quixixxicuc in lajtol. Huan amo quicnlijque.

<sup>29</sup> Huan sinda cataya yojque ca se hual quixixxicuc in lajtol hual Moisés quinmaxtic, cuaquinon Dios quicojocoltis niman chichahuac se hual quixixxicúa iXolol Dios, amo san quinami quichihuilinijme se hual quixixxicuc ilajtol Moisés. Unca quinami yihual in se quitelicsac itzindan icxihujajmes iXolol Dios. Unca quinami quijtutica pampa quiman techtoyahuilic Cristo iesli calica quichiac cuali in lajtulisli yancuic, yojque cataya jan quinami miqui oc se lalac. Huan ca iesli Cristo, Dios quilajtultic in lalac pa quitequipanuulis yihual Dios san. Unca quinami in se quijtutica Cristo iesli unca quinami laijlaculi, yojque quihuejuecaltitica in Espiritu Santo hual tejchihuilia in cuali hual Dios techmaca.

<sup>30</sup> Tehuanten tiquiximatilo Dios huan ticmatilo quinami yihual quijtuc: “Unca noyaxca nehual pa nimolacuepilis. Nehual niclaxlahuis nolacocolinijmes ca lacocoltisli.” Huan noje quijtúa Dios ilajtol, quil: “In Tata quincocoltis ixolomes quiman quichihualo laijlaculisli.”

<sup>31</sup> ¡Momajtis míac se sinda quipías pa moitas iyampa in Dios hual yuli quiman in Dios yahui lacocoltía!

<sup>32</sup> Ma yoje, amhuanten amo ximocahuacan pa anquijnamiquis in tonalijmes pa yina quiman anquilalic anmolaneltocalisli ca Cristo huan Dios anmitzlahuilic anmoyolo. Anmochicahuatic pa anpanus niman míac lacocoltisli huan amo anmolacuepilig.

<sup>33</sup> Sejpa huan oc sejpa lacames anmitzpinahualtijque inminyampa moxtin, anmitzhuejuecaltitataloaya huan anmitzcocoltitataloaya. Huan sejpa huan oc sejpa ancataloaya inminahuac yehuanten hual in lacames amo cuajcuali yojque quinchihuilijtataloaya.

<sup>34</sup> Inon niqijtúa, pampa anquinmicnilic yehuanten in laneltocanijmes hual cataloaya latzacuali pin calijtic huan anquinpalehuic. Huan anpanuc ca paquilisli in amo cuali quiman Dios ilacocolinijmes anmitzixtequijijque inon hual anmoyaxca. Inon anpanuc pampa amhuanten anquimati pampa anquipía len pin cielo hual unca niman cuali, amo quinami innojen hual anquipía nican pan lalticpan. Inon hual anquipía pin cielo amo quiman mocahua pa huejcahuas.

<sup>35</sup> Yojque, amo xijcajtiquisacan inon hual anquimatis pa anmoyolo, inon hual anquipía pampa anquilalic anmolaneltocalisli ca Dios. Anquipías laxlahuilisli hué hual Dios anmitzmacas pan ipampa in chichualisli pa anmoyolo.

<sup>36</sup> Unca pampa monequi pa anpanus in amo cuali hual anmijchihuililo mas que anmitzcocúa. Monequi pa anquipanus pa yoje huil anquichías len Dios quinequi huan pa huil anquipías in hual yihual quijtuc neli pampa yahui anmitzmaca.

<sup>37</sup> Dios ilajtol quijtúa, quil:

Jan nadita san huan yihual hual hualas, hualas huan amo huejcahuas pa hualas.

<sup>38</sup> Huan yihual hual nehual Dios niqijtuc neli pampa amo quipía laijlaculisli, yihual yulis pan ipampa ilaneltocalisli hual quilalic ca in Tata.



Huan sinda se, aqui yes, yajmo quilalis ilaneltocalisli ca nehual, cuaquinon amo nicayas lapaquiltili ca yihual.

<sup>39</sup> Ma yoje, tehuanten amo ticate hual timomajtilo pa tiyultiasqui ticlalicite tolaneltocalisli ca Cristo. Sinda ticataloaya yojque, cuaquín tipolehuiloaya huan tilamiloaya laxiluli pa camo ticayasi ilaixpan Dios. No, tehuanten ticate hual ticneltocatialo huan timopililo tiyulticate pa camo tipolehuisqui.

## 11

### *Quinami yes sinda se quilalía ilaneltocalisli ca Dios huan iXolol Dios*

<sup>1</sup> Axcan, in laneltocalisli unca inon hual ticmati pa toyolo, in hual ticchixticate pa panus o pa ticanasqui. Huan noje in laneltocalisli unca inon hual ticmatilo unca neli mas que amo tiqitalo.

<sup>2</sup> Dios lajtúa niman cuali inminahuac yehuanten hual yulinijme pa yina huan yojque quineltocanjme.

<sup>3</sup> Huan pan ipampa quinami ticneltocalo Dios, yojque ticmatilo pampa Dios quinchíac mochi huan quinlalic pa yesqui huan pa panusqui huan pa nejnemisqui jan quinami tiqitalo quichihualo axcan, mas que in hual tiqitalo yihual quichíac ca in hual amo moita.

<sup>4</sup> Huan pampa yoje quineltocani Abel, quihualicac se huendi hual Dios quitac cuali, amo cataya quinami in huendi hual quihualicac icni Cain pa quilalis ilaixpan Dios. Huan pan ipampa Abel ihuendi, yojque Dios technextilía neli quinami yihual quixtocac len Abel quimacac huan quijtuc pampa Abel unca cuali huan amo quipía laijlaculisli. Huan yojque, pan ipampa quinami Abel quilalic ilaneltocalisli ca Dios, yojque yihual Abel ayamo mocahua pa techilis tehuanten pa ticlalisqui tolaneltocalisli ca Dios. Quema, techilijtica Abel inon mas que yihual miquic, pampa timomaxtilo inon pa Dios ilajtol.

<sup>5</sup> Huan pampa Enoc quilalic ilaneltocalisli pan Dios, cataya laijcuanili pa camo quipanus pa miquis. Yojque yajmo moitilic pampa Dios quijcuanic, yajmo nestic pin laticipan pa cayas capa unca Dios. Yojque quipanus Enoc, pampa pin tonalijmes quiman Dios ayamo quiquixtic pa yajmo cayasquiaya pin laticipan, momatini neli pampa yihual quipaquiltini Dios.

<sup>6</sup> Huan sinda se amo quilalía ilaneltocalisli ca Dios, cuaquinon in se amo quiman huil quipaquiltía Dios. Yojque, aqui yes quinequi moajxiltía ca Dios, monequi pa quineltocas pampa Dios unca, huan quimaca mochi len cuajcuali yehuanten hual quitemulo pa quiximatisqui ca mochi inminyolo.

<sup>7</sup> Quilalic Noé ilaneltocalisli ca Dios quiman Dios quilic pampa cayasquiaya polehuilisli hual ayamo quitac Noé. Pampín quineltocac huan quichíac in cali itoca arca pa yojque yihual huan yehuanten pa ichan cayalosquiaya laquixtili pa camo polehuilosquiaya. Huan pampa yihual quichijchíac in arca, yojque yihual quinmotexpahuilic inminlajlaculisli moxtin in oc sequin pin laticipan. Yojque polehuijque pampa amo quineltocaloaya. Huan yihual Noé canac inon hual iyaxca Dios pampa quimacac Dios. Unca pampa inon hual unca iyaxca Dios noje unca pa yehuanten hual Dios amo quinmitilía laijlaculisli.

<sup>8</sup> Pampa quilalic Abraham ilaneltocalisli ca Dios, cuaquín quiman Dios quinoztac, yihual quineltocac huan quisac huan quicahuac ilali. Quisac pa yasquiaya ca capic cataya se lali hual yihual yahuiaya cana quinami len hual yec iyaxca Dios. Yahuiaya cana quiman panujque míac xixihuil. Quema, quisac Abraham umpa, amo quimaztataya ca capic yahuiaya.



<sup>9</sup> Pampa quilalic ilaneltocalisli ca Dios, Abraham pehuac chantic pin lali hual Dios quilic neli pampa yahuiaya quimaca. Chantini nepa quinami se hual amo chantitica pa ilali iyaxca. Huan Isaac huan Jacob chantinijme pin calimes lachihuali ca tzotzomajli telahuac. Yehuanten noje yahuiyoaya quipialo in lali ca Abraham quinami len hual iyaxca Dios. Cataya pampa Dios neli quinmilic yehuanten pampa yahuiaya quinmaca in lali.

<sup>10</sup> Abraham neli quichixtaya pa ajsis in tonali quiman huil chantisquiaya pa se caltilan hual amo mocahuas yes. In caltilan Dios quilalic pa quichías huan cuaquinon quichíac.

<sup>11</sup> Pampa quilalic Sara ilaneltocalisli ca Dios, canac chicahualisli pa quipías se xolol, mas que ca yihual panujque in xixihuimes quiman sihuames huil quinpialo xolomes. Yihual huil quipíac in xolol pampa quimatic Dios quichihuilía yojque quinami neli quilía.

<sup>12</sup> Yojque, tiqitalo se lacal Abraham hual cayani quinami se hual miquic, pampa se lacal hual yulic cien xixihuil quinami yihual amo huil quinlacatiltía xolomes, jan quinami amo huil se mijquil. Quema, in se lacal quinpiaya niman míac xolomes, amo huil quinpuhua se, quinami amo huil quinpuhua se in luceros (silalimes) pin cielo o in xali pan xalipan.

<sup>13</sup> Innojen moxtin miquijque quipixtataloaya inminlaneltocalisli ca Dios, mas que amo canajque inon hual Dios quinmilic neli pampa yahuiaya quinmaca. Ma yojque cataya quinami quiztataloaya huejca len Dios quinmilic neli huan laquetzaloaya inahuac in ca paquilisli quinami quipialtitataloaya se hual quilasojlaloaya. Moitaloaya quinami yehuanten yeje lacames chantitataloaya amo pa inminchan. Catanijme quinami yultataloaya pa se lali hual amo inminyaxca quiman cataloaya nican pan lalticpan.

<sup>14</sup> Huan lacames hual lajtulo yojque quijtulo ca lajtol melahuac pampa quitemulo se lali hual yes inminyaxca capa huil chantisqui.

<sup>15</sup> Neli unca pampa sinda Abraham huan ixolol huan ixohuiyojmes quijnamiquinijme quinami yulinijme pa in lali capa cataloaya quiman ayamo quisajque, cuaquín huil mocuepanijme pa yulilosquiaya nepa.

<sup>16</sup> Ma yojque, quinami cataya, quipianijme niman míac lanequilisli pa quipialosquiaya se lali niman cuali. Quinequi quijtúa in lali pin cielo capa yahuiyoaya chantilo. Yojque, Dios amo pinahua pampa yehuanten quilijque yihual unca inminDios. Inon ticmatilo, pampa yihual Dios quinchijchihuilic se cali nepa capa yehuatenn yulisqui.

<sup>17</sup> Pampa Abraham quilalic ilaneltocalisli ca Dios, quitemacac ixolol Isaac quinami huendi quiman Dios quilic pa quichías yojque. Inon quilic Dios pa quimatis da quineltocasquiaya Abraham mochi hual Dios quilic. Quema, Abraham yahuiaya quilalili Isaac quinami huendi lamictili pa Dios.

<sup>18</sup> Huan yahuiaya quichía inon mas que Dios quilic Abraham pampa imiahuimes yahuiyoaya lacatilo pan ipampa Isaac, yihual ihuían.

<sup>19</sup> Ma yoje, yihual quineltocac Dios huil quinyuliltía yehuanten hual miquijque. Yojque, cataya quinami neli Abraham mocuepac quipíac yultaya oc seija Isaac, pampa cataya quinami miquic.

<sup>20</sup> Pampa quilalic Isaac ilaneltocalisli ca Dios, quinotzac Dios pa quituchi-huas Jacob huan Esaú ca in hual yahuiaya quinpanu pin tonalijmes hual yahuiyoaya ajsilo.

<sup>21</sup> Huan pampa quilalic Jacob ilaneltocalisli ca Dios, cuaquín pan tonali hual yahuiaya miquí, quinotzac Dios pa quintuchihuas in omenten ixolomes José, mopalejtataya ca icuajtonteloni quiman mopachuc pa quimolan-cuacuetzilis Dios.

<sup>22</sup> Pampa quilalic José ilaneltocalisli ca Dios, cuaquín pan tonali hual yahuiaya lami, yihual quinmilic icnían israelitos quinami yahuiyoaya quisalo in lali Egipto, huan pampa in quinmilic pa quinhuicalosquiaya iumimes ca yehuanten pa quinlalpachulosquiaya pin lali Israel.

<sup>23</sup> Pampa itajtzin huan inantzin Moisés quilalijque inminlaneltocalisli ca Dios, cuaquín pan tonali hual lacatic Moisés, quilatijque pa ye mesli, pampa quitanijme quinami yec se xolol cualtichin pan ipampa in cuali hual Dios quichihuilic. Huan amo momajtijque pampa in hué Faraón quilic pa yesqui lamictili mochi inminxolomes lacames yehuanten in israelitos.

<sup>24</sup> Pampa quilalic Moisés ilaneltocalisli ca Dios, quiman mochíac hué, amo quinequic pa quiximatilosquiaya quinami ixolol ixolol sihual in hué Faraón nepa Egipto.

<sup>25</sup> Molalilic pa panus lacocoltilisli ca Dios ilacames. Amo quinequic canac paquilisli pan ipampa in laijlaculisli hual techpaquiltía pa jan se tipichin san nican pan lalticpan.

<sup>26</sup> Moisés quimatini lacames quihuejuecaltilosquiaya pampa catani se ca Cristo ilacames. Ma yojque quixijxicuni inminlahuejuecaltilisli, pampa ca Cristo Moisés quimatini yihual yahui ni cana niman míac. Amo quiman canasquiaya yoje míac se hual moyaxcajtiaya ca mochi hual ipatiaya pin lali Egipto. Moisés quijtuni yojque, pampa quijnamiquini inon hual Dios yahuiaya quimaca quiman yahuiaya caya ca yihual.

<sup>27</sup> Pampa quilalic Moisés ilaneltocalisli ca Dios, quisac quicahuac in lali Egipto. Quicahuac amo momajtitataya mas que in hué Faraón yahuiaya cualani. Moisés quinequiaya panu lacocoltilisli quinami se hual quiztataya toTata hual amaqui ca in lacames nican huil quita.

<sup>28</sup> Pampa quilalic ilaneltocalisli ca Dios, quichíac Moisés jan quinami quilic Dios inahuac in fiesta (ilhuil) itoca pascua. Quinpehualtic yehuanten in israelitos pa quichihualosquiaya quinami quijtúa in lajtol hual quinmiliaya quinami quichihualosquiaya in fiesta, quinmajuichuc iesli in borreguito pa pani in ilalapujquimes inminalimes, pa yoje in lanahuatini hual quisac pin cielo amo quinmictisquiaya in xolomes hual quipehualtijque inminlalachatilitilisli mochi sejse lacal israelito ca isihua. Dios quitilanic in lanahuatini pa quinmictis san innojen xolomes hual quipehualtijque inminlalachatilitilisli yehuanten egipcios hual ilali unca Egipto.

<sup>29</sup> Huan pampa quilalijque yehuanten in israelitos inminlaneltocalisli ca Dios, quipanahuijque in Al Huejcalan Chichiltic quinami cataloaya pan lali huaqui. Ma yojque, quiman in guaches egipcios motoliniloaya pa quipanahuilosquiaya, yehuanten moactotijque.

<sup>30</sup> Pampa yehuanten in israelitos quilalijque inminlaneltocalisli ca Dios, huetzijque in cali cuajcuajtíc (tepandí) hual quiyahualunijme itenco in caltilan itoca Jérico huan quitzacuac in caltilan pa camo huil calaquilosquiaya. Ma yoje, huetzijque quiman lamijque quinyahualujtinemiloaya in guaches israelitos pa chicome tonalijmes.

<sup>31</sup> Pampa quilalic ilaneltocalisli ca Dios in sihual Rahab hual quiyiaya icali capá calaquinijme lacames ca yihual, yihual quinnamiquic cuali in ome guaches israelitos hual ajsijque pa quitemulosquiaya quinami quinsulahualosquiaya yehuanten pa Jérico. Huan pampa in, amo cataya lamictili ca mochi in oc sequin pa Jérico hual amo quineltocaloaya Dios.

<sup>32</sup> Huan ¿quinami huil annimitzlaquetzilis inminahuac oc sequin? Pampa monequiaya pa nihuejcahuas míac pa huil annimitzlaquetziliztías quinami

quichihuanijme Gedeón huan Barac huan Sansón huan Jefté huan David huan Samuel huan Dios ilajtunijmes.

<sup>33</sup> Pan ipampa quinami quilalijque inminlaneltocalisli ca Dios, quinsulahuajque huejueyenten ca inminlacames. Huelitijque quinchihuilitat-alooaya mochi sejse pa panus lacocoltilisli quiman quichihuac in amo cuali o pa quipías in hual iyaxca quinami quiituaya in lajtol. Dios quinmacac pa quipialosquiaya in hual yihual quinmilic neli pampa yahuiaya quinmaca. Quintzacuilijque leones pa camo quinmictilosquiaya.

<sup>34</sup> Quinsehuijque tixuxlimes hueyotes. Moquixtilijtaijque yehuanten hual yahuilooaya quinmictilo. Mochihualooaya chichahuac mas que amo quipialooaya chichualisli. Quinsulahuajque ca míac chichualisli míac guaches capa moanaloaya. Quincholultijque inminguaches inminlacocolinijmes.

<sup>35</sup> Cataloaya sihuames hual mocuepajque quinpiyajque yulticate oc sejpa inminxolomes hual miquijque. Huan cataloaya sequin ca ilacames Dios hual cataloaya latilanili pa yesi lamictili yulito pampa amo quinequijque pa yajmo quilalilosquiaya inminlaneltocalisli ca Dios pa yoje quinmacahualosquiaya yehuanten hual quinmictitataloaya. No, innojen ilacames Dios panujque mochi in lacocoltilisli pa yoje huil yulisqui oc sejpa ca yulilisli niman cuali capa unca Dios.

<sup>36</sup> Oc sequin ca Dios ilacames quicocuhuaya inminyolo niman míac pampa quinhuitzquillijque yehuanten hual amo quineltocaloaya Dios, huan pampa quinhuitequijque chichahuac. Huan amo inon san. Quinmilpijque ca teposli huan quintzacuajque pin calijtic.

<sup>37</sup> Cataloaya sequin hual quinmictijque ca tixcalazos. Sequin quintzontequijque ca ome lajcomes ca lacotonijquimes. Panujque lacocoltilisli calica lacames quincocoltijque niman chichahuac pa quinchihuilitosquiaya pa yajmo quineltocalosquiaya Dios. Lacames quinmictijque ca teposlimes calica moanalo guaches. Quipialoaya pa chantilosquiaya pa mochi cajcapa, molaquentitataloaya ca inmincuilaxlimes borregos huan chivos. Pan míac tonalijmes amo quipialoaya len quicualo huan len cunilo. Lacames hual amo quineltocaloaya Dios quincocoltiloaya, míac quinchihuilitoaya tetzcuinuc.

<sup>38</sup> Amo mocaquiloaya pa in lacames ej'elehuis yulilosquiaya pin lalticpan ca Dios ilajtunijmes, amo monotzaloaya pa quipialosquiaya len cuali hual Dios huil quinmacasquiaya. Huan yehuanten Dios ilajtunijmes quipialoaya pa yulilosquiaya nejnentataloaya cajcapa. Amo quipialoaya capa chantilosquiaya. Moitililoaya pan lalimes capa amantilosquiaya pa mochi cajcapa, molaquentitataloaya ca inmincuilaxlimes borregos huan chivos. Pan míac tonalijmes amo quipialoaya len quicualo huan len cunilo. Lacames hual amo quineltocaloaya Dios quincocoltiloaya, míac quinchihuilitoaya tetzcuinuc.

<sup>39</sup> Huan yehuanten amo canajque in hual Dios quinmilic neli pampa yahuilooaya canaló. Amo canajque mas que Dios technextilía pa ilajtol quinami mopaquiltía pampa yehuanten yojque quilalijque ca yihual inminlaneltocalisli.

<sup>40</sup> No, amo canajque len Dios quinmilic neli yahuiaya quinmaca, pampa niman pa yina, yihual quilalic pa techmacas tehuanten len niman cuali pa yojque quiman ticayasqui lanechiculi ca yehuanten, Dios lamis tejchihuilis tehuanten huan yehuanten in hual monequi pa tiajsisqui tyesqui cuali quinami quinequi yihual huan amo pa ajsisqui yesqui quinami Dios quinequi jan yehuanten san.

<sup>1</sup> Yojque, ticmatilo techyahualujtcate yojque míac ilacames Dios hual techmachilito pan ipampa Dios ilajtol quinami yulinijme quilalilijtataloaya inminlaneltocalisli ca yihual. Pampa inon, ma tiquijcuanican mochi hual tejtzacuilla pa como tiyulisqui quinami Dios quinequi. Nicnequi niquijtua, ma timijcuanilican in laijlaculisli hual amo quiman huejcahua pa techtilanilis toyolo pa timoijlacusqui. Mas que techcocúa toyolo huan tocuerpo míac, ma tipanucan mochi in amo cuali hual tejchihuילו lacames pampa tictequipanuililo Dios. Unca quinami timolalujtcate pan se laluxtilisli pan se ojli hual Dios techlalilic.

<sup>2</sup> Quema, ma timolalucan quinami tiquiztcate Jesús. Yihual tejchihuilic in ojli hual techhuica ca Dios. Huan quíamic jan quinami monequiaya pa yoje yes se ojli cuali capa ticlalilosquiaya tolaneltocalisli ca yihual. Mas que quicocoltijque pa yojque miquic pan in cuahuil, ma yoje yihual panuc inon huan amo quixijxicuc, amo quimonotzilic quinami quipinahualtijque pa yoje miquisquiaya, pampa yihual quimatiaya Dios yahuiaya quimaca míac paquillisli pan ipampa inon hual tejchihuilic pin cuahuil. Huan axan yehuatica pa ima cuali Dios pin cielo (ilhuicac) quipalejtica pa huelitis.

<sup>3</sup> Xiquijnamiquican yihual quinami momacahuilic panuc in amo cuali hual quichihuilijque lacames laijlaculi, ¡len amo quilijque huan quichihuilijque cualantataloaya ca yihual huan ilajtomes! Sinda anquijnamiquía inon, cuaquinon in anmitzpalehuis pa como ansiahuis. Huan anmitzpalehuis pa como anquipolus anmolanequilisli pa anmoyolo pa anquitequipanuilis.

<sup>4</sup> Anmotolinía pa anmotzaculis pa como anquichías laijlaculisli. Ma yojque, xiquijnamiquican pampa ayamo anquiplaya pa anajsis anmiquis pampa inon.

<sup>5</sup> Huan ¿cuajnesi anquilcahuac Dios ilajtol lajcuiluli calica anmijchicahualtia anmitznoztica quinami ixolomes? Quijtúa, quil:

Noxól, amo xiquita quinami len tipichin quiman yes in Tata mitzmactis chichahuac quinami monequi pa tiyulis, huan amo xicpolu moyolo quiman yes mitzajuas huan mitzcocoltis.

<sup>6</sup> Unca pampa in Tata quinextilia chichahuac quinami monequi pa yulis mochi sejse hual quilasoja.

Huan quiman monequi, yihual quinmajua ca lacocoltisli mochi se hual cana quinami ixolol, inon quichía pampa quilasoja.

<sup>7</sup> Anquipía pa anmoepenialtis in la'ajualisli huan lacocoltisli sinda in Tata anmitznextilia chichahuac quinami monequi pa anyulis. Yojque yihual Dios anmijchihuilijtica quinami ixolomes. Anquimati pampa amo unca se itajtzin hual amo quinextilia chichahuac ixolol pa quimatis quinami monequi pa yulis.

<sup>8</sup> Huan sinda anuncia lacames hual toTajtzin amo quiman anmitznextilia chichahuac quinami monequi pa anyulis, cuaquinon anuncia quinami xolomes hual lacatijque pan ipampa se lacal hual amo monamictia ca in sihual inminnantzin, yihual in lacal amo quinnequi in xolomes. Moxtin hual ixolomes Dios panulo len calica Dios quinnextilia chichahuac quinami monequi pa yulisqui.

<sup>9</sup> Huan amo inon san. Noje tiquinpialo nican pan lalticpan totajtzitzian hual technextilinijme chichahuac quinami monequi pa tiyulisqui, huan ticmatinijme timomajtilo inminlaixpan. Monequi pa timolalisqui ca niman miac lanequilisli pa ticmacahuiltsiqui pa Dios huelitis pa tehuanten. Yihual unca itajtzin toyolo, huan yojque tiyulisqui cuali.

<sup>10</sup> Quema, unca niman cuali pa yojque ticchihuasqui, pampa totajtzitzian nican pan lalticpan technextililoaya chichahuac quinami quinequiloaya pa

tiyulilosquiaya pa je tipichin. Inon tejchihuילוaya yojque san quinami yehuanten quitaloaya cuali. Huan quiman Dios technextilía chicahuac quinami monequi pa tiyulisqui, inon quichía pa tejchihuilis cuali pa yoje tñajsisqui tñyesqui chipahuac quinami Dios, jan quinami monequi pa yesqui ilacames.

<sup>11</sup> Pa nadita techcocoltía quiman yes ticate lanextili quinami monequi pa tiyulisqui. Amo tiquixtocalo quiman yes techpanúa yojque. Ma yoje, quiman panulo yehuanten hual yojque cate lanextili, cuaquín quimatilo yulilo yojque cuali quinami monequi pa yulisqui Dios ilacames, huan pampín yulilo ca mosehuilisli pa inminyolo.

### *Moitas pa polehuilisli se hual amo quinequi quineltoca Dios ilajto*

<sup>12</sup> Yojque, mochi sejse ximochichauhtican pa huil anquichías len Dios quilalic pa amhuanten. Xicayacan chicahuac quiman yes anpanujtica lacocoltilisli o len etic. Yes quinami anquinchichauhtitica anmomajmajuan huan anmolancuajmes.

<sup>13</sup> Huan xinejnemican melahuac pan iojli Dios pa yoje huil anquinpalehuis yehuanten hual nejnemilo chirengojtialo pa iojli Dios, quinequi quijtúa yehuanten hual amo quimatilo cuali len quinequi quijtúa Dios ilamaxtilisli. Huan pampín quinequilo mijcuanilo pa camo mocahuas pin ojli, quinami se hual nejnemi chirengo huetzi huan mococoltía. Yes cuali sinda anquinpalehuis pa mocahuasqui cuali pan iojli Dios, cuaquinon yesqui yojque quinami hual chirengojtiahuloaya huan cuaquín pajtijque.

<sup>14</sup> Ximotolinican pa anyulis ca mosehuilisli ca moxtin, huan ximotolinican pa anyulis chipahuac pa anmoyolo anquitequipanuilijtica in Tata. Sinda amo yuli se yojque, cuaquín amo quitas in Tata pa huil yulis ca yihual.

<sup>15</sup> Ximoiztiacan pa camo cayas cuajnesi capa amhuanten se hual yajmo ajsis canas in cuali hual Dios quichihuila pa quipalehuis. Huan sinda capa amhuanten cayas se hual quichías amo cuali, mas que yihual se san, ma yoje yihual anmitzmaxtía se ojli amo cuali. Pampín miac ca amhuanten pehuasqui quichihuasqui amo cuali. Se hual quichía inon unca quinami se lalhuayol chichic hual moscaltía huan quisemana pajli amo cuali pa mochi cajcapa.

<sup>16</sup> Ma camo caya se capa amhuanten hual quinmana sihuames, huan se hual quijtúa pampa jan monotza san inon hual huil ticanalo nican pan laticpan, huan quijtúa pampa amo monotza nindeno hual unca iyaxca Dios. Cataya yojque Esaú. Yihual quinamacac hual cataya iyaxca pa quipías, pampa yihual yec icni hué ca innojen ome ixolomes Isaac. Quema, quinamacac pa len quinequiaya quicua san.

<sup>17</sup> Ma camo caya se capa amhuanten quinami yihual. Anquimati quinami quiman panujque tonalijmes, quinequiaya cana in hual iyaxca itajtzin hual itajtzin quilajlanisquiaya Dios pa quimacasquiaya pa yes iyaxca Esaú, huan itajtzin yajmo quinequic. Yojque, pampa quinamacac Esaú in hual iyaxca, yajmo quicahuilic quinami yihual quipalásquiaya iyolo mas que yihual quitemuc chocatataya quinami huil canasquiaya oc sejpa.

<sup>18</sup> Xiyultiacan anquilalijtica anmolaneltoocalisli ca in Tata san, pampa amo anmoajxiltic ca Dios quinami yehuanten in israelitos pa yina. Yehuanten moajxiltijque ca len hual huil quimatoca se. Teta cataya tixuxli hué milintataya, cataya laticumactilisli hual niman nezahuac, huan cataya malacal ijyecal ijyecatataya.

<sup>19</sup> Noje cataya ixahuanilisli se lancaquetzaloni latzotzontataya. Huan moqaquic se lajtól quijtutataya lajtomes chijchicahuac. Quiman quinqaqui-que, quitemachijque ca mochi inminyolo pa Dios yajmo quiman quinnotza-squiaya ca ilajtomes.

<sup>20</sup> Cataya pampa amo huil canajque chichahualisli pa quicaquisqui in hual quijtuc Dios ilajtól quiman quinmilic, quil: “Sinda quimatoca in loma (tepel) san se yulijquil, anquipiás pa anquimictis ca tixcalazos.”

<sup>21</sup> Quema, in hual quiztataloaya quinmajtic niman míac huan pampa in, yihual Moisés quijtuc, quil: “Nicmacajsijtica míac huan niyuyucatica.”

<sup>22</sup> Amhuanten amo anmoajxiltic ca in iloma hué Dios quinami yehuanten. Anmoajxiltic ca Dios hual yuli. Yihual nepa pa in loma Sión pin cielo capa unca Dios icaltilan hué. Anhualac ca capic cate míac ilanahuatinijmes pin cielo, ilanahuatinijmes hual amo huil quimpuhua se quichi cate. Yehuanten monechicujticate ca paquilisli hué quimolancuacuetzilijticate Dios.

<sup>23</sup> Quema, anmoajxiltic ca Dios, anhualajtataya ca ilanechiculisli yehuan-ten ixolomes Dios hual mocuhuilic pa quinmacas len niman huejué hual inminyaxca. Dios quipía lajcuiluli inmintocajmes pin cielo. Anmoajxiltic ca Dios hual unca in se hual unca iyaxca pa quinchihuilis moxtin quinami quinmahuilúa pa quinami yulinijme pan lalticpan. Huan anmoajxiltic ca inminyolojmes lacames hual yulijque quichijtataloaya quinami quijtúa Dios ilajtomes. Cate lacames hual axcan cate cuali jan quinami Dios quinequi.

<sup>24</sup> Huan anmoajxiltic ca Jesús. Pan ipampa yihual unca Dios ilajtulisli yancuic pa lacames. Quema, tiajsijque ca capic unca iesli la’ajuichuli pa quinchipahuilis inminyolo lacames. Huan Jesucristo iesli technextilía lejlen niman cuajcuali. Amo huil ajsisi cayasí yojque cuajcuali innojen hual technextilía Abel iesli.

<sup>25</sup> Ximoiztiacan pa anquicaquis cuali aqui anmitzilijtica mochi inon. Xijcaquican, pampa sinda amo moquixtilijque pin polehuilisli quiman amo quinequijque quicaquijque yihual hual quinnotzac nican pan lalticpan, cuaquion neli unca tehuanten amo timoquixtilisqui pin polehuilisli sinda amo ticnequilo tijcaquilo yihual hual technotza hual unca pin cielo (il-huicac).

<sup>26</sup> Pa yina quiman lajtuc Dios pin loma (tepel) Sinaí, quitzejtzelum in lali ca ilajtól. Huan axcan quijtuc neli, quil: “Ajsis oc se tonali quiman nictzejtzelum in cielos noje, amo jan in lalticpan san.”

<sup>27</sup> In lajtomes “Ajsis oc se tonali” technextilía pampa yahui quijcuanía mochi hual huil cayas latzejtzeluli. In quinequi quijtúa mochi hual yihual Dios quichíac. Inon yahui quichía pa yojte mocahuas san in hual amo huil yes latzejtzeluli pa quixitinis.

<sup>28</sup> Pampa in, ma ticsehuican Dios pampa tialo ticpialo len lahueliltisli huan cali capa tichantisqui hual amo huil yes latzejtzeluli, amo quiman xitinis, inon Dios techmacas. Huan ma ticmolancuacuetzilican yihual ca in lasojlalisli huan momajtilisli hual yihual quita ca paquilisli.

<sup>29</sup> Unca pampa toDios unca quinami se tixuxli hual quichichinúa mochi pa yajmo moitas.

## 13

### *Inon unca quinami se quipaquiltía Dios*

<sup>1</sup> Xiyultiacan anmolasojlatica quinami monequi molasojlalo lacames in-micnían.

<sup>2</sup> Amo xiquilcahuacan pa anquinmanas pa anmochan yehuanten hual ajsilo ca amhuanten, pampa yojque sequin quinmanajque ilanahuatinijmes in cielo huan amo quimatijque pampa yeje ilanahuatinijmes in cielo.

<sup>3</sup> Xiquinmijnamiquican tocnian hual cate latzacuali pin calijtic. Xiquinmijnamiquican quinami ancataya latzacuali pin calijtic ca yehuanten. Xiquinmijnamiquican hual aquinojen quintojtocaticate pa quinchihuilisqui miac tetzcuinuc yehuanten hual amo ilacames Dios, pampa amhuanten noje anunca pa anmocuerpo huan inon cuajnesi anmitzpanus jan quinami quinpanujtica yehuanten.

<sup>4</sup> Ma lajtucan pa inmnyolo moxtin ca lasojlalisli inahuac monamictilisli, huan ma mocahua ilapexli se jan pa yihual huan in oc se san calica monamictic. Ma camo quiman monilucan ca oc se quiman yulticate in omenten, pampa Dios quintilanis pa panusqui lacocoltilisli yehuanten hual monamictijque huan ma yoje monilulo ca oc se. Huan yojque Dios quinchihuilis yehuanten hual amo monamictilo huan ma yoje monilulo.

<sup>5</sup> Xiyén (Xiyecan) lacames hual amo anyuli anquinctica miac tomin, huan xicayacan ca paquilisli ca in hual anquipia, pampa Dios quijtuc, quil: “Amo quiman nimijcuanis pa camo nicayas ca amhuanten, huan amo quiman annimitzcajcahuas.”

<sup>6</sup> Yojque, huil tiquijtulo ticmazticate pa toyolo inon:

In Tata unca hual nechpalehuia; amo nimomajtis.

¿Len amo cuali huil nejchihuililo lacames?

Amo nimomajtis inahuac len huil nejchihuilis se lalac aqui yes.

<sup>7</sup> Xiquinmijnamiquican yehuanten hual anmitzlaicanalo pan iojli Dios, yehuanten hual anmitzilijque ilajtol Dios. Xiquinmijnamiquican in cuali hual anquipia pampa yehuanten yulijque anmitznextilijticate Dios ilajtol. Huan xiyultiacan anquineltoatica in Tata quinami quichihualo yehuanten.

<sup>8</sup> Jesucristo yec yalhua jan quinami unca axcan huan amo mocahuas pa yes jan yojque.

<sup>9</sup> Amo xilamacahuiltican pa anmitzlaicanasqui pa anmijcuanis pan in Tata iojli yehuanten hual quimaxtilo oc se huan oc se lamaxtilisli hual amo cate jan quinami Cristo ilamaxtilisli. Inon tiquijtulo pampa san monequi pa se mochicahualtilis iyolo pan ipampa Dios in cuali hual tejchihuilia. Ma camo quijtu se pa iyolo pampa huil mochicahualtilia iyolo pan ipampa len quicua. Yehuanten hual quilalilo inminlaneltoalisli ca in lamaxtilisli, Dios amo quinmaca len cuali jan pampa yulilo quichijticate quinami quijtua se lamaxtilisli quinami inon.

<sup>10</sup> Pa in tiopistas judios cate inmnyaxca pa quipiasqui mochi sejse ilajco in huendi hual unca pani capa quilalilo ilaixpan Dios pin lasojli calijtic. Tehuanten ticpialo quinami huendi hual amo unca inmnyaxca pa quipiasqui inminlajco yehuanten hual quimolancuacuetzililo Dios quinami in judios o aquinojen yesqui hual amo quimolancuacuetzililo Cristo.

<sup>11</sup> In yulijquimes mijquimes inminesli in tiopista hue quihualiac pin lasojli calijtic quinami huendi pa laijlaculisli. Cuaquin yihual quinchichinaya innojen mijquimes pa iquiahuac in lajcotiyan capa chantitataloaya yehuanten in israelitos.

<sup>12</sup> Huan jan yojque Jesús panuc lacocoltilisli pa quiahuac Jerusalén pa yoje quinchipahuilis lacames inmnyolo pan ipampa yihual iesli. Yoje Dios huil quinmana lacames pa yesqui iyaxca.

<sup>13</sup> Pampa inon ma tiacan ca yihual pa quiahuac in caltilan, nicnequi niqijtua, ma tiacan ca yihual timijcuanticate pa camo tiquintocasi moxtin hual quimaxtilo len yes hual amo unca quinami Cristo ilamaxtilisli. Quema,



ma tiacan ca yihual ca chicahualisli pa toyolo pa timopepenialtisqui lahuejuecaltisli pa yihual.

<sup>14</sup> Ticchihualo yojque pampa nican pan lalticpan amo ticpialo tochan hual amo mocahua pa huejcahuas. Tictemulo ticchixticate caltlan hual yes tochan, in hual yahui caya capa tichantisqui.

<sup>15</sup> Pan ipampa Cristo, ma ticualicacan huendi pa pani, nepa capa Dios unca. In huendi unca tolajtomes hual tiquinlaquetzililo oc sequin pa quimatisqui quinami Dios unca niman hué.

<sup>16</sup> Amo ximocahuacan pa anquijnamiquis anquinchihuilis cuali oc sequin. Huan amo ximocahuacan pa anquinxiluils len anquipia ca oc sequin hual monequi pa quipiasqui. Inon caté quinami huendis hual quipaquiltilo Dios.

<sup>17</sup> Xiquinneltocacan yehuanten hual anmitzlaicanalo pan Dios iojli, huan xiclalican pa anquichías quinami anmitznextililo, pampa anmitzlachilijiticate anmoyulilisi quinami quichihualo lacames hual quipiasqui quinanzulisqui Dios quinami anmitziztiajqque. Xiyulican xicchiytiacan yojque quinami lacames hual quinhueliltisqui pa quinanzulisqui Dios ca paquiltisli huan amo ca inminyolo quincocujtica. Sinda yojque quincocuhuaya inminyolo, cuaquín inon amo anmitzpalehuiaya amhuanten.

<sup>18</sup> Xiclaflanican Dios pa tehuanten, pampa tolajmatilisli pa toyolo calica ticmatilo len unca cuali huan len amo unca cuali techilia pampa tiyulticate cuali. Ticnequilo ticchihualo mochi cuali yojque quinami monequi pa lacames quichihuasqui.

<sup>19</sup> Annimitzyantía pa anquilajlanis Dios pa nehual pa yoje amo nihuejcahuas míac tonalijmes pa nihualas nicayas ca amhuanten, pa huil anechpías ca amhuanten.

### *Latuchihualisli huan lapialtilisli pa quilamis in amal*

<sup>20</sup> Huan axcan, in Dios hual quimaca mosehuilsli pa toyolo ma caya ca amhuanten. Yihual in Dios hual quiyuliltic toTeco Jesús capa cataya mictataya pin mijquimes. Yihual Jesús unca in hué hual quinmiztia Dios iborregos, quinequi quijtúa yehuanten ilacames Dios. Yihual in laitani, pan ipampa iesli quichiac in lajtulisli hual techquixtis pin toplehuilsli. In lajtulisli axcan unca huan amo quiman lamis huejcahuas.

<sup>21</sup> Quema, ma anmitzmaca in Dios mochi hual unca cuali hual anmitzhueliltis pa anquichías mochi hual yihual quinequi. Inon anquichías san sinda yihual Dios quitequipanultía laijtíc amhuanten inon hual quipaquiltía. Inon quichías pan ipampa Jesucristo. ¡Pa yihual ma caya chicahualisli niman hué huan cualtichin pa xixihuimes hual amo quiman lamisqui! Yojque ma ye.

<sup>22</sup> Nocnían, annimitzilijtica pa anmoyolo, xiquijnamiquican ca mochi lanequilsli in hual annimitzjcuiluilic pa annimitznextilisquiaya. Neli amo annimitzjcuiluilic se amal niman huejcanic.

<sup>23</sup> Xicmatican pampa tocní Timoteo cataya lamacahuai. Sinda amo huejcahuas pa hualas ca niquic, cuaquín huan yihual antimitzitasqui antimitzpaxaluilijiticate.

<sup>24</sup> Xiquinpialtican moxtin yehuanten hual anmitzlaicanalo amhuanten pan iojli Dios, huan xiquinpialtican moxtin ilacames Dios. Yehuanten pin lali Italia anmitzpialtilo.

<sup>25</sup> Ma caya ca amhuanten in cuali hual san Dios tejchihuilía. Yoque ma ye.



## In amal hual quijcuiluc Santiago

*Santiago quinmijcuilulía in laneltocanjmes hual chantilo cajcapa pa mochi in lalticpan*

<sup>1</sup> Nehual Santiago niunca se itequipanujquil Dios huan in Tata Jesucristo. Annimitzpialtía amhuanten in laneltocanjmes hual anunca ca inminmi-ahuimes in lacames hual quinpehualtije in israelitos. Huan noje anunca lasemanali anchantitica capa yehuanten hual amo israelitos.

*In lajmatilisli hual techajxiltíla Dios*

<sup>2</sup> Nocnían, xiquitacan mochi quinami paquilisli sinda anmitzajsis in tonali hual anpanus lacocoltilisli hual anmitzajsilo quijquiman.

<sup>3</sup> Anquimati pampa inon unca quinami Dios monextilía huan anmitznex-tilía quinami anquineltocatica yihual. Yoje anmonextilía anmopepenialtía pa camo anmochahuas pa anquineltocas.

<sup>4</sup> Huan ximopepenialtitiacan pa yoje anajsis anyes lacames hual quiyasi mochi laneltocalisli huan lajmatilisli. Yoje anquipías mochi in hual monequi pa anquipías pa anyulis quinami quinequi Cristo.

<sup>5</sup> Huan sinda se ca amhuanten amo quipía míac lajmatilisli, ma quilajlani Dios hual quixtoca quimaca míac yehuanten hual quilajlanilo, huan amo quinmajua quiman quimacatica. Quema, Dios quimacas.

<sup>6</sup> Ma yoje, sinda se quilajlanis Dios pa len, ma quilajlani quineltocatica pampa Dios yahui quimaca. Ma camo quimahuili nindeno. Yihual hual quimahuilía unca quinami in al pin al huejcalan hual in iyecal quihuicatica huan quihualicatica. In se quijtus, quil: “Cuajnési Dios nechmacas”, cuaquín quijtus, quil: “Cuajnési amo nechmacas.”

<sup>7</sup> Pampa in, ma camo quijtu pa iyolo in se pampa yahui cana len hual Dios quimacas.

<sup>8</sup> Quema, in se unca quinami quipía ome lajtulisli hual in se amo quijtúa quinami in oc se. Amo huil molalía pa quichijtías len pa laquisas quichías, amo mochahua pa quipalas ilaijnamiquilisli.

<sup>9</sup> Axan, ma moixtoca se tocní hual amo quipía len calica moixtocas. Quema, ma moixtoca pampa Dios quichíac hué, ma moixtoca pampa Dios quimacac inon hual quipía.

<sup>10</sup> Huan ma moixtoca se tocní hual quipía míac tomin pampa quimati amo quipía quinami moixtocas pan ipampa in míac hual quipía. Quimati pampa in míac hual quipía unca quinami xuchimes huan sacal hual pilinilo.

<sup>11</sup> Quisa in tonali huan pehua tona, quihuactía in sacal huan huetzilo ixuchimes, huan umpa lami quinami cataloaya cualtichin. Yojqe cate yihual hual quipía míac. Noje capa yuli quichijtica itequipanulisli, ajsis se tonali huan yajmo nesis. Huan ma moixtoca se tocní hual quipía míac hual yehuanten pin lalticpan amo moixtocalosquiaya sinda quipialoaya inon. Niquijtúa, ma moixtoca pampa quipía innojen hual Dios quita ipati hual yehuanten pin lalticpan quixixiculo. Se tocní hual quipía míac tomin quimati yihual unca quinami ixuchimes in sacal hual pilinilo, quimati pampa yihual miquis.

*Tipanulo len amo cuali huan unca latilanili toyolo pa tejchihualtis amo cuali*

12 Ma quipía paquilisli in se hual panúa lacocoltilisli huan amo quimacahuiltía pa quisulahuas. Se tonali quisas pa in lacocoltilisli calica Dios quichihuilía pa quimatis sinda neli quineltoca. Cuaquinon cayas iyaxca pa yulis quipixtica ca Dios yulilisli hual amo quiman lamis. Dios quijtúa neli pampa quimacas inon yehuanten hual quilasojlalo.

13 Ma yoje, quiman yes unca latilanili se iyolo pa quichías len amo cuali, ma camo quijtu, quil: “Dios nechtilanilijtica noyolo.” Dios amo quinami inon, amo quiman quitilanilis Dios se iyolo pa quichías laijlaculisli. Amo unca nindeno hual huil quitilanilis Dios iyolo pa quichías len amo cuali.

14 Se quipía latilanili iyolo pa quichías len amo cuali sinda quimacahuiltía pa quisulahuas iyolo in hual quinequi quichía.

15 Hualquinon, in amo cuali hual quinequi quichía se mochía laijlaculisli. Quinequis quichihuas oc seppa huan oc seppa míac huan cuaquinon amo huil quijtúa pa iyolo oc se lachihualisli. Unca quinami quiman pilhuatica se sihual, in xolol mochijtía hué huan cuaquinon quilacatiltis in sihual. Yoje unca ca in laijlaculisli hual se quinequi quichía. Quinectía quichía huan quiman lamis quichías, unca quinami yihual quipilhuatica (quichijtica pa lacatis) laijlaculisli. Cuaquinon in laijlaculisli moyaxcajtília in se huan umpa quisulahuas. Yojque moxilus pa camo cayas ca Dios huan amo quiman mocuepas ca Dios pan ipampa miqulilisli.

16 Amo ximocuajcuanacan, lasojli nocnían. Dios amo quiman quitilanilia se iyolo pa quichías laijlaculisli.

17 Yihual quichijchíac mochi in lahuilisli hual techmaca in tonali huan in luceros (silalimes) huan in lahuilisli hual ticpialo laijtic tehuanten toyolo. Huan yihual quitemuhuilo pa tehuanten mochi innojen cuali hual amo quipialo len hual amo cuali, mochi innojen hual quinequi techmaca. Huan yihual Dios amo quinami in tonali huan in silalimes. Yihual ilahuilisli amo quiman mopala quinami in tonali mopala sinda quitzacuilis in mextemil.

18 Dios quichíac quinami quinequiaya, tejchihuilic pa tiyesi ixolomes. Inon tejchihuilic pan ipampa quinami tijcaquijque ilajtol hual unca melahuac. Yojque Dios tejchihuilíaya pa tiyesi in niman cuali ca mochi hual yihual quinchíac.

### *In se tequipanulisli pa Dios hual unca melahuac*

19 Xicmatican inon, lasojli nocnían. Ma ejsehuican moxtin pa lacaquisi, ma camo ejsehuican pa lajtus, mas que quimatilo. Huan ma camo ejsehuican pa cualanisi.

20 Lacames hual cualanilo amo quichihualo len quipaquilito Dios sinda cualantiquisalo.

21 Yoje, ximocahuacan pa camo anquinequis anquichías in míac amo cuali hual anmoyolo quinequi anmijchihualtía. Monequi pa anyes quinami lacames hual amo quimatilo míac. Xicneltocacan Dios ilajtol hual yihual cajxiltía pa anmoyolo. In lajtol huil anmitzquixtía pa camo anpolehuis pampa anquichíac laijlaculisli.

22 Huan xicchihuacan len quijtúa ilajtol Dios. Amo jan xijcaquican san, pampa yojque anmocuajcuanana amhuanten, anquilcahua len anquicaqui.

23 Sinda quicaqui se in lajtol huan amo quichihua len quijtúa, cuaquín yihual unca quinami se lacal hual moita pan se espejo. Quita pa iixco ixurupupus huan idomutzitos.

<sup>24</sup> Moita huan mohuica, huan jan ajnaxcan quilcahua in xurupupus huan domutzitos pan iixco.

<sup>25</sup> Ma yoje, aqui hual momaxtía huan quicaqui in lajtol hual quimaca Dios huan Jesucristo huan quijnamichtía pa quineltocas, yojque yihual quimati in lajtol quijtúa mochi hual unca cuali. Huan sinda quimacahuiltía pa calaquis pa iyolo pa yoje yihual quichías len quilia, cuaquin yoje in lajtol quimacahua pa quinequis quichías len quipaquiltía Dios. Huan in se quipías paquilisli ca mochi hual quichías, pampa quineltoca ca mochi iyolo.

<sup>26</sup> Cuajnesi se quijtúa pa iyolo pampa momajtía ilaixpan Dios pan ipampa quinami laquetza ca Dios ilajtomes huan momaxtía huan quichía oc sequin lachihualisli hual lacames quichihualo pa quimolancuacuetzilisi Dios. Ma yoje, sinda amo quimati motzauilia pa como quijtus len amo cuali, ca in mocuajcuamantica pa iyolo yihual. Mochi inon hual quichía amo quimonotzilía nindeno, pampa amo quipaquiltía Dios.

<sup>27</sup> Jan pan ipampa inon huil ticmatilo sinda se neli quimati momajtía ilaixpan Dios toTajtzin: In se quinpalehuía in icnomes huan in sihuames hual inminhuían quiman panujticate in amo cuali. Noje quimacahuiltía Dios pa quichipahuilis iyolo mojmosta pa quiquixtilis mochi in amo cuali hual quichía yultica nican pin lalticpan. Yoje Dios amo quitilis nindeno amo cuali sinda se yoje yuli momajtitica ilaixpan Dios. Quema, Dios quitas chipahuac quinami quitequipanuilis in se.

## 2

### *Monequi pa como tiqitasi cuali se tocní huan oc se tocní amo yoje cuali*

<sup>1</sup> Nocnían, anquineltocha toTata Jesucristo hual quipía ichicahualisli hual laixpela quinami Dios. Pampa in, amo xiquinchihuilican sequin cuali huan oc sequin amo yoje cuali.

<sup>2</sup> Nican unca se lanextilisli. Cuajnesi calaquis pa anmitzpaxaluilis capa anmonechicujtica se hué local hual quipía se anillo lachihuali ca oro pa ixerixa huan molaquentitica ca se tzotzomajli cualtichin. Huan cuajnesi calaquis se dangochito noje pa anmitzpaxaluilis.

<sup>3</sup> Cuaquinon, anquitas cuali in hué lalaquentili cualtichin huan anquilis: “Ximosehui, ximolali pa in icpali cualtichin”, huan anquilis in dangochito: “Ximoquetza o ximolali nepa pan lali.”

<sup>4</sup> Cuaquin sinda anquichía yojque, anquichijtica amo cuali pa amhuanten nojen. Unca pampa anmochijtica quinami cataya anmoyaxca pa anquixtocas o amo anquixtocas quinami nesilo lacames huan amo anquijnamiquía quinami Dios quinmita.

<sup>5</sup> Xichcaquican, lasojli nocnían, ma annimitzljajlani inon: ¿Amo quinlajtultic Dios yehuanten pin lalticpan hual amo quipialo míac hual quimatilo cuali quinami quilalilo inminlanéltocalisli ca Dios? ¿Amo quinlajtultic pa huelitis ca yihual? In unca iyaxca Dios hual yihual neli quilia yahui quinmaca aquinojen hual quilasojlalo.

<sup>6</sup> Huan amhuanten anquixijxicúa in local hual amo quipía míac tomin. ¿Amo cate lacames hual quipialo míac tomin yehuanten hual anmitzcaj-cayahua huan anmijchihuilia míac amo cuali? ¿Amo cate yehuanten hual anmitzhuilantialo inminlaxpan in la'ajuaniymes?

<sup>7</sup> ¿Amo cate yehuanten hual quihuejuecaltilo itoca lasojli Jesucristo hual ca itoca timotocalo tehuanten?

<sup>8</sup> Sinda neli anyuli anquichijtica quinami quijtúa ilajtol in hué Jesucristo, in lajtol lajcuiluli hual quijtúa: “Ticlasojlas yihual hual moita monahuac jan quinami timolasojla tehual”, cuaquín anquichía cuali.

<sup>9</sup> Ma yoje, sinda anquita cuali se hual quipía míac tomin huan amo anquita yoje se hual amo quipía míac, cuaquín yoje anquichijtica laijlaculisli. In lajtol quinextía quinami amhuanten anunca lacames laijlaculi.

<sup>10</sup> In unca pampa aqui hual quineltocha mochi in lajtol, huan ma yoje quichía len tipichin amo cuali hual in lajtol quijtúa pa camo quichías, cuaquinon yihual amo quineltoctica mochi in lajtol. Huan pampa in, Dios quimotexpahuilis pampa amo quichíac len quijtúa in lajtol.

<sup>11</sup> Dios quijtc, quil: “Amo ticanas sihual hual amo mosihua.” Huan noje quijtc, quil: “Amo tiquinmictis lacames.” Axcán, sinda amo ticana sihual hual amo mosihua huan ma yoje ticmictía se, cuaquín tiunca laijlaculi, amo ticneltoctica in lajtol.

<sup>12</sup> Yoje, xilajtucan huan xilachihuacan quinami yehuanten hual quimatilo, pampa se tonali Dios yahui anmitzmotexpahuilía. Huan in lajtol calica anmitzmotexpahuilis unca in lajtol hual anmitznequiltis anquichías len quipaquiltía Dios.

<sup>13</sup> Quiman Dios quimotexpahuilía se, yihual amo quicnilis sinda in se amo laicniliaya pin tonalijmes hual yuliaya pan lalticpan. Sinda laicnilía se quiman yultica pan lalticpan, cuaquín Dios amo quimotexpahuilía pampa Dios quimati laicnilía.

### *Laneltochalisli huan lachihualisli*

<sup>14</sup> Nocnían, ¿len monotza sinda quijtúa se, quil: “Nicneltocha Jesucristo”, huan ma yoje amo quichía len unca cuali? Amo monotza nindeno. ¿Cuajnesi huil moquixtilis pa camo polehuis sinda unca yoje laijlaculi jan pampa quijtúa yihual quineltocha Cristo san? No, amo huil.

<sup>15</sup> Cuajnesi ajsis capa amhuanten se tocní local o sihual dangochito, monectica pa quipías len quicuas pa in tonali.

<sup>16</sup> Cuaquinon se ca amhuanten quilis, quil: “Xía, xicana len calica timolaquentis cuali huan xipachihui”, huan ma yoje amo quimaca innojen hual monequi pa quipías. Axcán, ¿len monotza in?

<sup>17</sup> Yoje, sinda se quijtúa pampa quineltocha Cristo, huan ma yoje, amo quinchihuilía cuali oc sequin, cuaquín polehuic ilaneltochalisli.

<sup>18</sup> Axcán cuajnesi se yahui quijtúa, quil: “Tehual tiquijtúa ticneltocha Cristo huan nehual niquinchihuilía cuali oc sequin. Xichnextili quinami ticneltocha Cristo mas que amo tiquinchihuilía cuali oc sequin, huan nehual nimitznextilis quinami nicneltocha Cristo pan ipampa in cuali hual niquinchihuilía oc sequin.”

<sup>19</sup> Ticneltocha pampa unca jan se Dios san. Ticchía cuali. Huan yoje quineltochalo in iyecames e'elehuis huan yuyucalo pampa momajtilo.

<sup>20</sup> Tehual hual tilajtúa quinami se hual amo laijnamiquía, ¿ticnequi pa nimitznextilis quinami mocuajcuamantica se hual quijtúa pampa quineltocha Cristo huan ma yoje amo lachihuilía cuali? Cuaquín nimitznextilis.

<sup>21</sup> Dios canac Abraham, quijtc pampa amo cataya laijlaculi pampa Abraham quichíac quinami yihual Dios quinequic pa quichiasquiaya. Catani quiman Abraham quilalic quinami huendi ixolol Isaac pani capa quilalilo huendi.

<sup>22</sup> Tiquita quinami Abraham ilaneltocalisli quichihualtic in hual Dios quilic. Yoje Abraham quinextilic quinami neli yihual quineltocac Dios pan ipampa inon hual quichíac.

<sup>23</sup> Huan yoje lamíc mochíac Dios ilajtol lajcuiluli, quijtúa, quil: “Abraham quineltocac Dios. Pampa in, Dios quitac Abraham quinami se lalac hual amo quipiaya laijlaculisli.” Huan Abraham yoje yec latocayaltili quinami ilasojli Dios.

<sup>24</sup> Yoje, anquimati pampa Dios quita cuali se quiman quita in hual in se quichía pampa quineltoca Dios, huan amo jan sinda quijtúa pampa quineltoca Dios unca yultica.

<sup>25</sup> Huan noje Dios quitac Rahab quinami se hual amo laijlaculi. Yihual Rahab yec in sihual hual quinmacahuiltini pa lacames calaquilosquiaya pa ichan. Mas que Rahab yec sihual hual yojque quichihuani, ma yoje Dios quitac cuali. Cataya pampa yihual quinlatic in guaches israelitos pa ichan pa camo quinmitalosquiaya yehuanten pa icaltilan hual quintemuloaya. Cuaquinon quintilanic in guaches israelitos pa oc se ojli pa moquixtitiasi pa camo quinmitalosquiaya.

<sup>26</sup> Yoje, amo monotza pa se quijtúa pampa yihual quineltoca pampa Dios yuli huan ma yoje amo quinchihuilía cuali oc sequin. Unca quinami polehuic ilaneltocalisli, quinami unca se icuerpo hual yajmo quipía yulilisi.

### 3

#### *Tonejnepil*

<sup>1</sup> Nocnían, ma camo yén (yecan) míac lamaxtinijmes ca amhuanten, pampa anquimati tehuanten in lamaxtinijmes Dios techmotexpahuilis niman chicahuac sinda amo tilamaxtilo cuali.

<sup>2</sup> Timoxtin timoixpoloúa míac, sejpa huan oc sejpa. Huan sinda unca se hual amo moixpolúa pan ipampa in hual quijtúa, cuaquín in se quimati mochihualtía len cuali.

<sup>3</sup> Ticlalilo se teposli lajtíc icamac se caballo. In techneltocaltilía in caballo, yojque ticmalinililo mochi icuerpo in caballo.

<sup>4</sup> Xiquinmitacan in barcos huejué. Quinpitza in iyyecal chicahuac huan quitojpehua. Ma yoje quimalina in barco in laicanani ca je cuahuil palahuac huan tipichin, quimalina ca capic in laicanani quinequi pa yas.

<sup>5</sup> Yoje noje unca inejnepil se. Unca len tipichin pa se icuerpo (inacayo), huan lajtúa hué inminahuac innojen huejué hual quichía in se. ¡Xiquitacan quinami se tixuxli tipichin quimilinaltía se cuajlan hué!

<sup>6</sup> Huan inon hual quijtúa se inejnepil unca quinami tixuxli. Quema, inminejnepil lacames quipehualtía mochi in laijlaculisli pin lalticpan. Dios quilalic tonejnepil pa innojen hual quichihualo tocuerpo. Huan pan ipampa len quijtúa inejnepil se, mochi in se moijlacúa. Quema, pan ipampa len quijtúa se inejnepil, iyulilisi se unca quinami lalalaltili ca tixuxli hual amo huil quisehuía. Unca quinami quilalaltía inejnepil ca itixuxli in coyunqui capa cate in mijquimes, capa amo mocahua pa lalas. Satanás huelitía pan se inejnepil.

<sup>7</sup> Huil quinsehuiltilo lacames mochi yulijquimes huan tutomes huan yulijquimes hual mohuilanalo.

<sup>8</sup> Ma yoje, se inejnepil amaqui huil quisehuiltía. Unca len amo cuali hual amo quiman mosehuía. Unca quinami tentica ca pajli hual lamictía.

<sup>9</sup> Ca tonejnepil tilaquetzalo cuali inahuac Dios toTata. Noje ca tonejnepil tiquinhuejuecaltilo lacames hual Dios quinchíac chicuenta nesi yihual.

<sup>10</sup> Quisa pa quiahuac se icamac latuchihualisli huan lahuejuecaltisli. Nocnían, inon amo cana cuali sinda unca yoje, monequi pa camo cayas yoje.

<sup>11</sup> ¿Cuajnesi quisa al tzopelic huan al ca istal pan se ixtololon al?

<sup>12</sup> Xiquitacan, nocnían, se amacuál amo huil quilalía laquilyo quinami xocotilan, huan se pacholi hual laqui uvas amo huil quilalía higos. Huan noje se ixtololon al amo huil quimaca al ca istal huan al tzopelic.

### *In lajmatilisli hual neli unca*

<sup>13</sup> Sinda unca ca amhuanten se hual quimati huan quipía míac lajmatilisli, ma quinextili inon pan ipampa quinami yuli lachijtica cuali. Ma camo lajtúa hué pa iyolo moilijtica quichi hué unca ilajmatilisli huan ma camo quiitu pampa yihual niman cuali huan oc sequin amo yoje cuali quinami yihual.

<sup>14</sup> Huan sinda mojmosta ancualani pampa oc sequin cate lachijtcate capa anquinequi anquichía pa yoje moxtin anmitzitas quinami se hué, cuaquín amo ximoixtocacan pampa anquipía lajmatilisli. Sinda anquichía yoje, cuaquín anislacati huan amo anlachía inon hual unca melahuac.

<sup>15</sup> In lajmatilisli hual anquijtúa pampa anquipía, in amo ilajmatilisli in cielo (ilhuicac) hual temúa pan lalticpan pa Dios ilacames. No, in unca inminlajmatilisli lacames san hual jan quimatilo len quipalehuía quiman yulticate nican pan lalticpan. In lajmatilisli amo quinmacac in Espíritu Santo. Quema, quinmacaje ijyecames amo cuajcuali.

<sup>16</sup> Capa yesi yehuanten hual cualanilo pampa quinequilo lachihualo capa oc sequin cate lachijtcate, nepa moitas lapolulisli huan mochi lachihualisli amo cuajcuali hual huil moita pin lalticpan.

<sup>17</sup> Amo unca yoje ilajmatilisli Dios pin cielo hual quintilanilía yehuanten nican pan lalticpan. Sinda anquimatis mochi oc se lajtol, ma yoje, nicnequi niman míac pa anquimatis cuali inon: Amo quipía nindeno amo cuali ilajmatilisli in cielo. Yulilo chipahuac yehuanten hual quipialo in lajmatilisli. Se hual quipía ilajmatilisli in cielo (ilhuicac) amo mocualantiquisa, quinlasojla huan quinchihuilía cuali moxtin, quema, noje yehuanten hual niman tijtipichin. Huan yihual quinequi quicaqui in cuali hual quijtulo oc sequin. Huan ilajmatilisli in cielo hual Dios quimaca tejchihuilía pa tiquinmicnilisi huan pa tiquinpalehuisi aquinojen panujtcate lacocoltisli o len yes amo cuali. In lajmatilisli hual Dios quimaca tejchihuilía pa tiquinchihuilisi cuali mochi oc sequin hual amo quipialo len monequi pa quipiasi pa inminyolo huan inmincueros. Huan huil ticmatilo pampa in lajmatilisli technequiltía pa tiquinchihuilisi cuali in oc sequin. Amo techmacahuiltía pa tiyulisi tiquin-cuajcuamanticate oc sequin pa camo quimatisi quinami tilaijnamiquilo pa toyolo.

<sup>18</sup> Yehuanten hual quinequilo mosehuilisli pa inminyolo huan pa inminchan yulilo mopalejtcate se huan oc se pa momiactis inminmosehuilisli. Yojque yulisi quichijtcate len unca cuali huan melahuac.

## 4

### *Monequi pa camo ticlasojlalo quinami yehuanten pin lalticpan yulilo quichijtcate*

<sup>1</sup> ¿Leca anmoana huan leca anlaquetza ancualantica amhuanten se ca oc sequin? ¿Amo unca pampa inon? Anquinequi anyuli ancantía míac hual ipati pa amhuanten, míac hual huil anquicuhua pin lalticpan. Pampa in, anmoana pampa anmocuerpo quinequi quipía len hual Dios amo quixtoaca.

<sup>2</sup> Anquinequi chicahuac len huan amo anquipía. Pampa in, anlamicítia huan anquinequi anmoyaxcajtía ca inon huan inon huan amo huil ancana len anquinequi. Yojque anmoantía huan anmocualanilía. Amo ancana in hual anquinequi pampa amo anquilajlanía Dios.

<sup>3</sup> Huan sinda anquilajlanía Dios, amo ancana pampa anmolajlanilía innojen hual Dios amo quinequi pa anquipías. Anquinequi innojen jan pampa anquinectica anquipía len anmocuerpo quinectica hual amo unca cuali pa amhuanten.

<sup>4</sup> Huan yojque iyajmo anquipaquiltía Dios! Neli anquimati pampa anquixtoca anquichía quinami yehuanten hual amo quineltocalo Dios. Yoje anmolajlítica pa anquichías quinami Dios ilacocolinjmes. Pampa in, aqui quilalis pa yulis quinami yehuanten pin lalticpan, yihual mochías se ilacocolini Dios.

<sup>5</sup> O ¿cuajnesi anquijtúa ilajtol Dios lajcuiluli amo quijtúa mochi hual quinequiaya quijtu quiman quijtuc: “Dios amo quinequi quimacahuiltía pa se iyecal yulis pa tocuerpo quiman unca nepa in Espíritu Santo lajitic ca tocuerpo”? Dios quinequi in espíritu hual quilalic pa chantis lajitic tocuerpo, huan amo quita cuali sinda amo ticmacahuiltilo pa yes mochi iyaxca pa quitequehuis.

<sup>6</sup> Ma yoje, mas que yojque unca, Dios quimaca mochi tonali míac lapalehuilislí huan lachihualislí cuali pa huil ticneltocasi. Pampa in, ilajtol quijtúa, quil: “Dios molalía pa quintzacuilis yehuanten hual quixixiculo len yihual quinequi quinchihuilía. Ma yoje, quimaca ilapalehuilislí huan quinchihuilía cuali yehuanten hual quimatilo pampa monequi pa quinpalehuis.”

<sup>7</sup> Pampa in, amo xicxixicucan Dios. Xicneltocacan pa ancanas ilachihualislí cuali. Xiclalican pa anmotzontecan pa camo anquichías quinami quinequi in lili, huan yihual cholus anmitzcajtiquisa.

<sup>8</sup> Ximoajxiltican ca Dios, huan Dios moajxiltis ca amhuanten. Ximochipahuilican anmoyulislí, amhuanten hual anquichía lajlaculisli. Ximochipahuilican anmoyolo, amhuanten hual anmotolinía pa anquitocas Dios huan noje pa anquitocas quinami yulilo yehuanten pin lalticpan.

<sup>9</sup> Ma anmitzcocu míac anmoyolo huan xichocacan. Xicpalacan anmohuitzquilislí ca icnotilislí pa anmoyolo. Huan xicpalacan anmopaquilislí ca míac lacocoltilislí pa anmoyolo.

<sup>10</sup> Xipehuacan ximoitacan tijtipichin ilaixpan in Tata, huan in Tata anmichías hué ilaixpan yihual.

### *Monequi pa se amo quinequi quimaca ojli icni hual quineltoca in Tata*

<sup>11</sup> Nocnían, amo xiquintenehuacan se ca oc se. Aqui hual quitenehua icni huan quinequi quimaca ojli icni, yihual quitenehua in lajtol hual quijtúa pampa ticpialo pa tiquinlasojlasi tocnían. Quema, huan yoje yihual quijtutica in lajtol amo unca cuali, huan amo quinequi quichía quinami quijtúa in lajtol. Sinda yoje tilajtulo inahuac in lajtol, cuaquín amo ticchijtica quinami quijtúa in lajtol. Timochijtica quinami se hual quijtúa yihual quipía lahueliltilislí pa quijtus quinami monequi panu mochi. Yojque timoyaxcajtía ca len hual amo moyaxca, in san iyaxca Dios.

<sup>12</sup> Unca jan se san hual quimaca in lajtol, in lajtol hual amo quiman lamis huejcahuas. Huan unca jan se san hual quipía lahueliltilislí pa quijtus quinami monequi pa panus mochi. Huan yihual hual quimaca in lajtol huan quipía in lahueliltilislí unca Dios. Yihual huil laquixtía pa camo polehuisi huan huil latilanía pa capa amo sehuis in tixuxli. Axcan, ¿aqui tehual hual

ticnequi ticana lahueliltilisli pa tiqulis se hual unca monahuac len monequi quipanus pampa quichíac laijlaculisli?

*Amo ticmatilo len yahui panu mosta*

<sup>13</sup> Axan, xiquitacan, amhuanten hual anquijtúa, quil: “Axan o mosta tiasi pa in caltilan umpa, tipanusi se xihuil nepa. Tilanamacasi huan tilacuhuasi, huan pampa inon ticanasi míac tomin.”

<sup>14</sup> Yojque anquijtúa, huan amo anquimati len yahui panu mosta. ¿Len unca anmoyulilisli? Unca quinami in pogli hual quisa pin al posuntica, nesi jan se nadita, cuaquín jan ajnaxcan yajmo nesi.

<sup>15</sup> Yesquiaya cuali pa anquijtus, quil: “Sinda in Tata quinequi, cuaquín tiyulisi huan ticchihuasi inon nican huan nepa.”

<sup>16</sup> Huan amo anquijtúa inon, jan anlajtúa anmoixtocatica pampa anquijtúa pa anmoyolo da huil anquinchia innojen. Amo unca cuali pa anlajtus anmoixtocatica yoje, unca niman amo cuali.

<sup>17</sup> Yoje, aqui yes hual quimati quichía len cuali, huan ma yoje amo quichía, cuaquín pa yihual unca laijlaculisli.

## 5

*Quimaca lajtol in lacames hual quipialo míac*

<sup>1</sup> Axan, xiquitacan, amhuanten hual anquipía míac, xipehuacan xichocacan huan xitzajtzican, pampa anyahui anpanu lacocolisli!

<sup>2</sup> In míac hual anquipiaya la'ajcoquili moiylacuc, amo unca cuali pa nindenno. Anmonahuajmes cuajcualtichin axan quicoyunijque in oculimes. Quema, innojen hual anmoyaxca hual ipatiloaya amo monotzalo nindenno ilaxpan Dios.

<sup>3</sup> Anmotomin lachihuali ca oro huan plata yajmo monotza len. Inon anmitznexilis amhuanten quinami Dios anmitzita. Anquijtuaya pampa anmotomin anmitzpalehuiaya ca mochi, huan anquixijxicuc ilapalehuilisli Dios. Yojque anpolehuis quinami anmotomin polehuic. Anpolehuis huan nesis quinami anmijchichinúa se tixuxli, pampa anquimatis anmotomin yajmo anmitzpalehuis. Anmoajcoquiloc lacocoltilisli pa quiman lamis in lalticpan pampa anquichíac in laijlaculisli.

<sup>4</sup> Dios quimati pampa amo anquinlaxlahuiaya anmotequipanujquimes. Unca quinami inmintomin anmitzmotexpahuilic. Anmitzlapixquilije pan anmocuaajmilimes, huan amhuanten anquinaicayahuac. Axan inmintzajzilisli in lapixcanijmes ajsic ca Dios, quicaqui Dios iTata ilanechiculisli in lanahuatinijmes pin cielo hual cate Dios iguaches.

<sup>5</sup> Anyuliaya pan in lalticpan anmocuhuilijtica len yes pa anmopaquiltis, mochi innojen cuajcualtichin hual amo monequiaya pa anquipiasquiaya. Anquichihuaya len yec anquinequiaya pa anmopaquiltisquiaya. Anunca quinami bueyes hual motomahualtilo huan cuaquinon ajsi in tonali quiman quinmictilo. Yojque ca amhuanten, anquijtuaya pa anmoyolo san quinami huil anmopaquiltiaya, huan axan ajsitica in tonali quiman Dios anmitzcoltía pampa anquichíac in laijlaculisli.

<sup>6</sup> Quema, amhuanten hual anquipía míac anquinmotexpahuilic lacames hual amo quichihualoaya len laijlaculisli. Cuaquín anquinmictic huan yehuanten amo quichihuaje nindenno pa monapatije.

*Dios ilacames quipialo pa mopepenialtisi in amo cuali hual quinchihuililo lacames, huan monequi pa yulisi quilajlanticate Dios*



7 Pampa inon, nocnían, amo xiquinlacuepilican. Ximochiacan huan ximopepenialtican in amo cuali hual anmijchihuililo. Yoje xiyultiacan anquichixtica pa ajsis in tonali quiman hualas in Tata. Xiquitacan. Iteco in lali quipía pa quichías pa ajsis in tonali quiman huil quitequis in cualtichin laquilyo hual quitocac. Amo huil quejsehuiltía. Ma yoje, amo mocahua pa quichías pa yucsis in laquilyo. Quiahui ipan míac sejpa huan oc sejpa, cuaquinon huil quitequi.

8 Amhuanten noje, amo ximocahuacan pa anquichías ca mosehuilisi. Xicanacan chichahualisi pa anmoyolo, pampa amo huejcahua pa hualas in Tata.

9 Amo ximotexpahuilijtinemican sequin ca oc sequin, yoje pa como anmitzmotexpahuilis Dios. Xiquitacan. Dios quipía lahueliltilisli pa latilanis pa quisas capa yihual huan canas ca yihual aqui yes, huan amo huejcahuas pa cayas ca tehuanten.

10 Xijcaquican se lanextilisli, nocnían. Dios ilajtunijmes quijtunijme ca lahueliltilisli Dios ilajtol huan panunijme míac amo cuali hual quinchihuilinijme lacames ej'elehuis. Ma yoje, mopepenialtinijme ca mochi inon.

11 Xiquitacan. Tiquijtulo yehuanten quipianijme paquilisli pampa quipianijme in cuali hual san Dios huil quinchihuilía. Cataya pampa mopepenialtinijme ca mochi in amo cuali hual oc sequin quichihuilinijme quiman quitojtocanijme. Anquimati quinami Job quipanuc in míac lacocoltilisli hual in lili quichihuilini huan anquimati noje quinami in Tata quichíac pa mochi quisac cuali pa yihual. Quema, in Tata quimati laicnília huan quimati quinami lapalehuía.

12 Axan, nocnían, mas que amo anmotzacuilisli pa como anquijtus mochi oc se lajtulisli, ma yoje, ximotzacuilican pa como anquijtus lajtol hual amo huil mopala. Amo xiquijtucan innojen lajtomes pan ipampa in cielo, amo xiquijtucan innojen lajtomes pan ipampa in lalticpan, amo xiquijtucan in lajtomes hual amo mopalasi, niquijtúa, amo xiquinmijtucan lajtomes hual amo mopalalo pan ipampa len yes oc se lajtulisli hual amo mopala. San quiman anquijtúa: "Quema", ma ye quema. Quiman anquijtúa: "Amo", ma ye amo, in san. Yoje xiquijtucan pa como anmitzmotexpahuilis Dios.

### *Xicneltocacan Dios quiman anquilajlanía*

13 Unca se ca amhuanten hual quicocúa iyolo, ma quilajlani Dios. Unca se ca amhuanten hual quipía paquilisli, ma quicantaruli (quicuiquili) Dios.

14 Unca se cocoxqui ca amhuanten, ma quinnotza pa hualasi inminlaicananijmes in laneltocanijmes. Ma quilajlanican Dios pa yihual, ma quixahuilican ca chahuac, quinozticate Dios ca ilahueliltilisli itoca in Tata Jesucristo.

15 Huan pampa quilajlanilo quineltocaticate Dios, yes laquixtili in cocoxqui pa como polehuis ipampa icocolisli. Huan moqueztinemis pampa in Tata quipajtic. Huan sinda quichíac laijlaculisli, Dios quipujpuhuas.

16 Pampa in, xicyolcuitican anmolajlaculisli se ca oc se, huan xiclaulanican Dios se pa oc se, pa yojque Dios anmitzquixtilis pa yajmo panus mochi in amo cuali hual anmitzpanujtica. Se lalac hual quiyolcuitic ilajlaculisli ca Dios, Dios quipujpuhuas. Yoje, quiman in se quilajlanía Dios ca mochi iyolo, cuaquin Dios quichihuilis míac hual cuali.

17 Dios ilajtuni Elías yec se lalac jan quinami tehuanten. Lajtuni pa iyolo quinami tehuanten huan yulini lachijtica quinami tehuanten. Ma yoje, quilajlanic Dios ca mochi iyolo pa como quiahuis, huan amo quiahuiaya pa ye xixihuil huan chicuase mesli.

<sup>18</sup> Oc se jpa quijlanic Dios, huan in cielo quimacac quiahuil huan in lalticpan mopixuc, pehuac quialic ilaquilyo.

<sup>19</sup> Nocnían, sinda se ca amhuanten quicahua Dios iojli, in quinequi quijtúa sinda mocahua pa quineltocas Dios ilajtol melahuac, cuaquín, xicmatican inon:

<sup>20</sup> Sinda oc se tocni quichihuilis pa in se mocuepas quineltocas ilajtol Dios, cuaquinon yihual yoje quiquixtilic se yulilisi pa camo polehuis. Noje yihual quichihuilic pa Dios yajmo quijnamiquis ilajlaculisli hual cataloaya míac.

## In amal calica pehuac ilajcuilulisli San Pedro in lanahuatini

*Pedro quinmijcuiluila laneltocanjmes hual chantilo cajcapa pa miac lalimes*

<sup>1</sup> Nehual Pedro ilanahuatini Jesucristo annimitzjcuilulijtica in amal amhuanten hual anchantitica pa quiahuac anmolali. Axan anchantitica capa chantilo yehuanten hual amo quineltocalo Dios. Amhuanten in israelitos hual anunca tocnian anchantitica lasemanali cajcapa pin lalticpan Ponto huan pa Galacia huan pa Capadocia huan pa Asia huan pa Bitinia.

<sup>2</sup> Quema, annimitzjcuilulijtica amhuanten hual Dios toTajtzin anmitzljaltutic huan quilallic pa anquineltocas Jesucristo quiman ayamo anlatic. Anmitzljaltutic pan ipampa in Espiritu Santo hual anmijxiluc pa camo ancayas ca yehuanten hual amo quineltocalo Dios pa yoje huil anquiteguipanulis. Anmijxiluc pa anquineltocas Jesucristo huan Dios ilajtol lajcuiluli, huan anmijchipahuilic ca iesli Jesucristo. Unca quinami anmitzajuichuc ca iesli pa yojqe anmijchipahuas. Ma Dios anmijchihuili miac cuali huan ma anmitzmaca miac imosehuilisli pa anmoyolo.

*Yulilisli hual techlachiáltia pa len niman cuali pa tehuanten*

<sup>3</sup> Ma lajtucan cuali moxtin pa Dios, yihual iTajtzin toTata Jesucristo. Dios laicnilia miac. Pampin techicnilia miac, techmaca yulilisli yancuic. Tejchia ixolomes, huan yoje ticchialo in tonali quiman neli ticayasi ca Dios. Inon ticchixicate pampa Jesucristo yulic oc sejpa, quisac capa cataloaya in mijquimes.

<sup>4</sup> Yoje quiman ticayasi ca Dios, techmacas in hual iyaxca yihual, inon hual amo quiman mopolus. Unca niman cuali, amo quiman lamis. Dios anmitzajcoquilijtica in hual iyaxca pin cielo (ilhuicac).

<sup>5</sup> Anmitzlachilijtica pampa yahui anmitzmaca len hual anmitzquixtis capa anunca ca mochi polehuilisli huan yajmo quiman anquitas polehuilisli. Unca len hual anmitzmacas niman miac paquilisli huan amo quiman lamis. Huan inon unca lachijchihuali pa Dios anmitznextilis pin tonali quiman lamis toyulilisli quinami ticmatilo axan nican pan lalticpan. Yoje yajmo timoitasi pin polehuilisli.

<sup>6</sup> Pampa in, anquipiac miac paquilisli, mas que pa je nadita axan, anquipia pa anpanus miac lacocoltilisli hual anmitzcoquia anmoyolo.

<sup>7</sup> Anpanua inon pa yoje Dios anmitznextilis quinami anquineltoca. Huan yoje quinami anquineltoca, Dios quita quinami niman cuali. Amo yoje cuali quita oro, pampa oro amo huejcahuas mas que quichipahualo pin tixuxli. Ma yoje, anmolaneltocalis huejcahuas. Huan quiman Dios monextilia ca inon quinami anquineltoca Cristo, cuaquin pan tonali hual nesis Jesucristo oc sejpa pin cielo temujtihuala, Dios anmitzilis lajtomes huejué. Inon cayas pampa anquisac cuali ca in hual monextilic quinami cuali anquineltoca. Quema, Dios anmijxilulis anmolajco ilaixpelalisli cualtichin huan anmolajco ilahuelilitisli.

<sup>8</sup> Amo quiman anquitas Jesucristo. Ma yoje anquilasoja, huan anquineltoca mas que axan amo anquiztica. Pampin anquipia paquilisli hue hual amo anquinpia lajtomes pa anquinlaquetzilis oc sequin inon. In paquilisli quisa pin cielo quihualitica niman miac laixpelalisli hual unca iyaxca Dios.

<sup>9</sup> Quema, anquípia in paquilisli pampa anyahui ancaya laquixtili pa camo anpolehuis, pa ancayas mojmosta ca Jesucristo. Huan amo quiman lamis pampa anquineltoaca.

<sup>10</sup> Dios ilajtunijmes amo mocahuanijme pa quitemulosquiaya ca mochi inminyolo pa quimatisi len quinequi quijtúa inon quinami Dios yahuiaya anmitzquixti pa camo anpolehuis mas que anquichíac laijlaculisli. Yehuanten lajtunijme pa yina inahuac in cuali hual san Dios huil quinchihuilía lacames, inon hual yahuiaya anmijchihuili amhuanten.

<sup>11</sup> Quitemunijme quinami huil quimatilosquiaya jan quiman Dios yahuiaya anmitznextili in cuali. Quitemunijme quinami huil quimatilosquiaya len yahuiaya panu pa tolali quiman Dios yahuiaya anmitznextili in cuali. Cataya iEspíritu Cristo ca yehuanten ilajtunijmes Dios. Quinnextiliaya len yahuiaya panu. Quinmiliaya neli pampa Cristo yahuiaya panu lacocoltilisli huan cuaquinon Cristo yahuiaya cana chichahualisli hué ca laixpelalisli cualtichin hual Dios quimacasquiaya.

<sup>12</sup> Huan iEspíritu Cristo quinnextilic Dios ilajtunijmes pampa amo quinmijcuilujtataloaya innojen lajtomes pa yehuanten inminhuían, pampa no, quinmijcuilujtataloaya pa amhuanten nojen. Quema, yehuanten anmitztequipanuililoaya yoje. Axan, anquimati inon hual yehuanten quijculuje. Anmitzlamachiltije yehuanten hual anmitzilije Dios ilamachiltisli cuali. Anmitzilije pan ipampa in Espíritu Santo hual Dios quintilanilic hual cataya capa yihual pin cielo. Inon hual quijcuilunijme Dios ilajtunijmes anmitzpanuc amhuanten. Huan Dios ilanahuatinijmes pin cielo (ilhuicac) quinequilo mía pa quimatisi mochi inon.

### *Dios technotza pa tiyulisi chipahuac mojmosta*

<sup>13</sup> Pampa in, quiman anmoquixtilis mochi quinami anlajtúa pa anmoyolo, mochi in hual anmijzacuilía pa camo anlajtus cuali pa anmoyolo, cuaquín xiyén (xiyecan) lacames hual huil anlajtúa pa anmoyolo ca lajmatilisli. Xicchician san in cuali hual Dios tejchihuilía. Yihual anmitzquixtis pa camo anpolehuis quiman hualas Cristo oc sejpa. Quema, in cuali hual anmijchihuilía axan anquixtica. Pampa in, amo ximocahuacan xicchixtiacan in lachihualisli cuali, amo xicmahuilican pampa inon amo unca melahuac.

<sup>14</sup> Amhuanten anunca Dios ixolomes. Xicneltocacan, amo ximomacahuiltican pa anquinequis anquichías len amo cuali, quinami anquinequini anquichía quiman amo anquimatic quinami Dios unca.

<sup>15</sup> Axan, xiyecan quinami Jesucristo hual anmitznotzac. Yihual mocahuas laxiluli pa camo cayas inahuac mochi hual amo cuali. Pampa in, amhuanten noje ximoxilucan pa camo anquichías nindeno amo cuali ca mochi anmolachihualisli.

<sup>16</sup> Quema, pampa unca lajcuiluli pa Dios ilajtol, quil: “Ximoxilucan pa camo anquichías nindeno hual amo cuali, pampa nehual Dios nimoxilúa pa camo cayas ca nehual nindeno hual amo cuali.”

<sup>17</sup> Huan sinda anquinotza Dios pa anmitzpalehuis, anquilijtica “toTajtzin”, cuaquín xiyulican anmomajtítica pa mochi tonali anmocahuas anyultica nican pan lalticpan. ToTajtzin quilis len lacocoltilisli quipías pa panus mochi sejse. Cayas quinami cahuilúa sinda yuliaya quichijtica amo cuali. Amo quita se cuali huan oc se amo cuali sinda in omenten yuliloaya quichijticate jan yoje amo cuali.

<sup>18</sup> Anquimati Dios laxlahuic pa anmitzmacahuas pa yajmo anyulis quinami anyulini. Anyulini yoje quinami anmitznextilije pa anyulis anmotajtztizían huan inminlanextilisli amo anmitzpalehuic. Dios amo laxlahuic

ca tomin lachihuali ca plata huan oro huan len quinami innojen hual mopolulo huan moijlaculo.

<sup>19</sup> No, laxlahuic ca esli hual yihual quita niman cuali. In esli yec iesli Jesucristo. Yec quinami iesli se borreguito cualtichin, chipahuac, amo quipixtica nindeno hual amo cuali, se borreguito hual quilalilo pa huendi pa quinextilis quinami iesli Cristo quiquixtilia laijlaculisli.

<sup>20</sup> Dios neli quilalic pa anmitzmacahuas pan ipampa iesli Jesucristo. Inon quilalic quiman ayamo quinchíac in cielo huan in lalticpan. Huan Dios anmitztilanilic Jesucristo nican pan lalticpan pin tonalijmes quiman lantica inon hual quichíac. Anmitztilanilic pampa anmitzlasojla.

<sup>21</sup> Cristo anmitznextilic quinami unca Dios huan pampín anquineltoca Dios. Unca Dios hual quiyuliltic Jesucristo quiman miquic. Huan quimacac chicahualisli hué ca laixpelalisli cualtichin hual san yihual huil quipía. Yoje, amhuanten amo anmocahua pa anquineltocas Dios huan amo anmocahua pa anquichías in tonali quiman anquitas.

<sup>22</sup> Huan anquichipahuac anmoyulilislí pampa anquineltocac Dios ilajtol melahuac. Pampín neli anquinmixtoca míac anmocnían, amo anlacuajcuamantica. Huan axcan xiquinlasojlaca anmocnían ca mochi anmoyolo. Xicchihuacan míac pa anquinnextilis quinami anquinlasojla.

<sup>23</sup> Huil anquichía yoje pampa Dios anmitzlatiltic yanquic. Huan Dios ilajtol unca quinami latocli, ma yoje amo latocli hual moijlacúa. No, ilajtol unca quinami latocli hual amo quiman moijlacúa. Huan anlaticac pan ipampa in latocli, ilajtol in Dios hual yuli huan mocahua mojmosta ca amhuanten.

<sup>24</sup> Moijlaculo inmincuerpos lacames huan yulijquimes, pampa Dios ilajtol lajcuiluli quijtúa, quil: Mochi inmincuerpos cate quinami sacal, amo huejcahualo, huan ichicahualisli huan in hual unca cualtichin ca yehuanten cate quinami in sacal ixuchil.

Pilinía in sacal huan huetzi ixuchil.

<sup>25</sup> Ma yoje, ilajtol Dios amo quiman mocahuas pa yes.

Huan in lajtol unca in lamachiltisli cuali hual anmitznextilía quinami anmoquixtilis pa camo anpolehuis pampa anquichíac laijlaculisli. In lajtol hual anmitzlamachiltije.

## 2

<sup>1</sup> Pampa inon, ximocahuacan pa camo anquichías in amo cuali, amo xilacuajcuamanacan. Amo ximochihuacan quinami amo anunca pa yoje lacames anmitzitasi cuali. Amo xicualanican quiman anquita in hual oc sequin quipialo huan amhuanten amo anquipía, amo xilahuejuecaltican.

<sup>2</sup> Xiyén (Xiyecan) quinami xolomes hual quipía nadita lacatije. Yehuanten quinequilo leche ca lanequilisli chicahuac pa yoje huil moscaltisi. Yoje, amhuanten xicnequican míac ilajtol Dios hual amo anmitzcuajcuamana. Ilajtol Dios unca pa amhuanten quinami leche unca pa in xolomes. Yoje, pan ipampa ilajtol Dios anquimaztías míac quinami yihual anmitzquixtía pa camo anpolehuis.

<sup>3</sup> Quema, pampa anquimati in Tata Jesucristo unca niman cuali, jan quinami anquimati len tijcuas unca cuali quiman anquilalía pa anmocamac.

*Cristo unca quinami se tixcali yultica*

<sup>4</sup> Huan anhualac amhuanten ca in Tata Jesucristo mas que in oc sequin amo quinequije hualaje ca yihual. Ma yoje, Dios quilajtultic huan quilasojla

in Tata Jesucristo. Yihual unca quinami se tixcali calica quichihualo se cali, mas que yihual unca quinami se tixcali hual yuli. Yihual yultica oc sejpá huan quimaca yulilisi oc sequin.

<sup>5</sup> Amhuanten nojen ancanac iyulilisi. Axcán anyultica pan ipampa yihual. Anunca quinami tixcalimes calica quichihualo cali. Ca in Tata huan ca amhuanten Dios quichíac len quinami se tiopan capa chantilo toyolo. Ca in Tata Jesucristo anunca quinami tixcalimes hual yulticate. Huan yoje tehuanten titiopistas hual Dios techlajtultic pa tictequipanuilisi. Tictequipanuililo ticmacaticate Dios quinami huendis hual toyolo quimacalo quiman ticlajlanilo. Noje tiquinchihuililo oc sequin innojen cuajcuali huan tiqijtulo quinami Dios unca hué. Huan cana cuali Dios mochi in tohuendi pampa ticneltocalo Jesucristo.

<sup>6</sup> Pampa inon, Dios ilajtol quipía lajcuiluli inon, quil: Xiquita, niclalic pa Sión capa nichanti se lalac hual niquita quinami se tixcali hual niclajtultic.

In tixcali ipati míac, huan unca in tixcali calica nipehuas nicchías nocali. Huan aquí quilalis ilaneltocalisli ca in tixcali amo quiman pinahuas pampa yoje quichíac.

<sup>7</sup> Pampa in, Dios anmitzlasojla míac pampa anquilalía anmolaneltocalisli ca Jesucristo. Yehuanten hual amo quineltocalo Jesucristo cate quinami in lacames hual yahuiloaya quichihualo in cali huan amo quinequiloaya quichihualo ca se tixcali hual quinequiaya iteco in cali. Pampa in, Dios ilajtol quijtúa, quil:

Iteco in cali canac in tixcali hual amo quinequiloaya canaló yehuanten hual quichihualoaya in cali.

Quilalic capa quipiaje pa pehualosquiaya quichihualo in cali.

<sup>8</sup> Huan noje quijtúa ilajtol Dios, quil:

Mocualantije ca yihual hual unca in tixcali calica nicchía nocali, unca quinami momañajtije ca in tixcali.

Amo quixtocaje ilajtol, amo quinequiye quimatije len quinequiaya quijtu, unca quinami huetzije quiman momañajtije.

Quema, molalije pa camo quicaquisi ilajtol, amo quinequiye quineltocaje. Huan quilalic Dios pa quinpanus yoje.

### *Moxtin hual cate iyaxca Dios cate huejueyenten huan tiopistas*

<sup>9</sup> Amhuanten anunca se lanechiculisli hual Dios quilajtultic pa anyes amo quinami oc sequin lacames. Amhuanten anunca tiopistas quinami huejueyenten, anunca lacames huan sihuames hual Dios moxiluilic pa quitequipanuilisi yihual. Quema, anunca lacames huan sihuames hual Dios quinpía pa anmoxtin anyes pa yihual. Dios anmitzpía pa amhuanten anlamachiltis pampa unca niman cuali mochi hual Dios quichía. Cataya yihual Dios hual anmitznotzac pa anquisas capa laticumac pa yoje ancalaquis pin lahuilisi, in lahuilisi hual anmitzmahuisultía ca niman míac momajtilisi.

<sup>10</sup> Pa yina anyec lacames hual anmijxixicunijme, axcán anunca ixolomes Dios. Pa yina amaquí anmitzicnilini. Axcán Dios anmitzicnilía.

### *Anyuli pa anquitequipanuilis Dios*

<sup>11</sup> Lasojli nocnían, anchantitica capa yehuanten hual amo quineltocalo Dios, huan anmocajtica pa inminlali. Annimitzilía, ca mochi noyolo, ximijcuanican pa camo ancayas capa mochi hual anmitztilanilía anmoyolo pa anquichías len amo cuali hual anmocuerpo (anmonacayo) anmijchihualtía. In amo cuali hual quinequi quichía se icuerpo amo mocahua pa quicocoltis iyulilisi.

<sup>12</sup> Huan annimitzilía pa anyultías cuali mojmosta. Yoje yehuanten capa anchantitica quitasi pampa unca cuali quinami anyuli. Huan anmitzcocolilo, quijuticate pampa amhuanten anquichijtica amo cuali. Ma yoje quitasi in cuali hual anquichijtica. Yoje quilisi Dios lajtomes huejué pan in tonali quiman Dios hualas pa quinlajlanis quinami yuliloaya quiman cataloaya pan lalticpan.

<sup>13</sup> Xiclalican pa anmoyolo pa anquineltocas mochi in lajtomes hual quichihualo in huejueyenten, pampa in Tata quixtoca pa anquichías yoje. Xicneltocacan in hué pampa yihual unca in niman hué.

<sup>14</sup> Xicneltocacan in la'ajuani hual in hué quilalía pa quinmacas lacocoltilisli yehuanten hual quichihualo len amo unca cuali, huan pa laquetzas cuali inahuac yehuanten hual quichihualo cuali.

<sup>15</sup> Yoje quinequi Dios, pampa sinda anquichía len cuali, yehuanten hual amo laijnamiquilo cuali huan yehuanten hual quimatilo amo huil quijtulo nindeno amo cuali amonahuac amhuanten.

<sup>16</sup> Amhuanten anunca lamacahuali, yajmo anunca Satanás itequipanujquimes laipili pa yihual anmijchihualtís. Xiyulican quinami lacames lamacahuali. Ma yoje, jan pampa anunca lamacahuali, amo xiquijtucan pampa huil anquichía len amo cuali. Amo anunca lamacahuali pa anyulis anquichijtica yoje. Ancataya lamacahuali pa anyulis quinami Dios itequipanujquimes.

<sup>17</sup> Xiquinlasojlacan moxtin, xiquinlasojlacan anmocnían hual quineltoalo Jesucristo, xicmatican ximomajtican ilaixpan Dios, xicmatican ximomajtican ilaixpan in hué.

### *In lanextilisli hual quijtúa quinami Cristo panuaya lacocoltilisli*

<sup>18</sup> Amhuanten hual anunca tequipanujquimes hual amo anmitzlahuilo, xiclalican pa anmoyolo pa anquineltocas anmotecojuan. Xiclalican pa anquineltocas ca mochi anmomaajtilisli. Huan amo xicayacan yoje jan ca in tecojuan san hual cate cuali ca amhuanten huan amo anmitztequipanutilo chicahuac. Quema, xicayacan yoje ca in tecojuan hual cualancudos.

<sup>19</sup> Sinda anpanúa lacocoltilisli pan ipampa amo cuali hual amo anquichíac, Dios quita cuali sinda anmopepenialtía pa anpanus inon pampa anquimati anunca Dios ixolomes. Inon anquimati pan ipampa anmolajmatilisli pa anmoyolo.

<sup>20</sup> ¿Quinami anmitzpalehuía amhuanten sinda anmopepenialtía pa anpanus lacocoltilisli quiman anquichía laijlaculisli? Amo anmitzpalehuis. Ma yoje, sinda anquichía cuali huan pampa in anmitzcocoltisi huan anmopepenialtía pa anquipanús, cuaquín inon Dios quita cuali.

<sup>21</sup> Unca pampa anmitznotzac Dios pa anyulis anquichijtías yoje, jan quinami quichíac Cristo. Yihual panuc lacocoltilisli pa amhuanten, yoje anmitzcahuilic se lanextilisli pa amhuanten ancanas in ojli hual canac yihual.

<sup>22</sup> Cristo amo quiman quichíac laijlaculisli huan amo quiman mocaquic quistica pa icamac se lajtol hual lacuajcuamanaya.

<sup>23</sup> Quiman yehuanten quihuejuecaltije Cristo, yihual amo quinhuejuecaltic yehuanten. Panuc lacocoltilisli, yihual amo quinmilic, quil: "Nehual nimolacuepilis ca amhuanten." No, yihual quilalic pa imajmajuan Dios inon hual panujtataya pampa Dios quimati quinchihuilí yehuanten quinami quinmahuilúa. Yihual quilía ca melahualisli len monequi quipanusi pampa quichihuae laijlaculisli.

<sup>24</sup> Jesucristo canac ilacocoltilisli tolaijlaculisli, canac pan yihual icuerpo (inacayo) iyaxca. Yoje quihuicac tolaijlaculisli pin cuahuil capa miquic, quinami quihuicalo se huendi pa capa quilalilo huendis. Quema, yihual miquic pin cuahuil pa yoje tehuanten iyulisi ticchijtcate cuali, pampa axan yajmo tiyulisi ticchijtcate laiijlaculisli. Quinchihuaaje sahuames capa quihuitequije Cristo. Huan pampa yoje mopepenialtic yihual, tehuanten ticate laquixtili pa camo tipolehuisi pampa ticchihuaaje in laiijlaculisli. Unca quinami techpajtic tolaijlaculisli.

<sup>25</sup> Quema, amhuanten ancatani quinami borregos hual mopolujtine-miloaya. Axcan anmocuepac ca yihual hual anmitzlachilia. Yihual unca anmolachiani amhuanten, yihual Jesucristo.

### 3

#### *Yoje monequi pa yulisi yehuanten hual monamictilo*

<sup>1</sup> Noje amhuanten sihuames, ximomacahuiltican pa anquineltoacas anmolahuicalhuan pa quipiasi in lahuellitilisi hual unca inmínyaxca. Xicchihua-can inon pampa sinda sequin amo quinelto calo Dios ilajtol, cuajnesi quinel-tocasi quiman quitasi quinami cuali anyuli amhuanten inminsihuahuan mas que amhuanten amo anquinmilía Dios ilajtol.

<sup>2</sup> Quema, cuajnesi anquinneltocaltis quiman quitasi quinami cuali amhuanten sihuames anyuli inminlaixpan huan quinami anquimati anmo-majtia inmínyampa.

<sup>3</sup> Amo monequi pa anquijtus pa anmoyolo mojmosta quinami amochi-jchihuilis cualtichin. Ma annimitznexstili len nicnequi niqijtua: Amo xic-chijchihuacan anmotzondi lailpili pa yoje nesis ipati. Huan amo xiclalican miac anillos huan zarcillos huan collares huan maquislimes huan miac hual unca lachihuali ca oro. Huan amo ximolaquentican ca tzotzomajli calica anquinmaltitinemis moxtin.

<sup>4</sup> Xiyulican cuali pa anmoyolo hual unca lalatili. Se hual quipía iyolo quinami inon quipía len cualtichin hual amo quiman lamis. Huan pa ilajnamiquilisli amo jan ajnaxcan mocualantía. Dios quita niman cuali se hual quipía yoje iyolo.

<sup>5</sup> Yoje yulinijme in sihuames pa yina, yehuanten hual Dios quinlajtultic pa quitequipanuilisi. Quimatiniijme pa inmínyolo pampa Dios yahuiaya lami quichía inon hual quijtuc, huan yoje mochihuaniijme cuali pa inmíny-olo. Quimacahuiltiniijme pa quinlaicanalosquiaya inminlahuicalhuan huan quimatiniijme momajtilo inmínyampa yehuanten.

<sup>6</sup> Sara quimatini momajti iyampa ilahuical Abraham, quinotzani “notata”. Huan anmochía quinami Sara ixolomes sihuames sinda anquichía cuali quinami yihual quichihuani. Yoje amo monequi pa anmomajtis quiman anmijchihuilisi len amo cuali.

<sup>7</sup> Huan jan yoje, amhuanten in lacames, xichantican cuali ca anmosi-huahuan. Xiyulican anquinlasojlatica pampa yehuanten amo chijchicahuac quinami amhuanten. Huan monequi pa anquinchihuilis cuali quinami an-mitznexstilia anmolajmatilisli hual Dios anmitzmaca pa anmoyolo. Quema, xiyulican anquinlasojlatica yehuanten pampa yehuanten yalo quipialo in hual iyaxca Dios jan quinami amhuanten. Quema, anmoxtin anquipía in cuali hual san Dios huil anmijchihuilía hual unca yulilisli hual amo quiman lamis. Huan yojque, sinda anyuli anquinpixtica lasojlalisli pa anmosihuahuan, cuaquin amo cayas nindeno hual anmijtzacuilis quiman yes anquilajlantica Dios.



*Yehuanten hual panulo lacocoltilisli pampa quichihualo len unca cuali*

<sup>8</sup> Ma annimitzili jan oc se lajtol. Xicayacan anmoxtin ca se lajtulisli san. Quema, quiman oc sequin quipialo paquilisli, cuaquín xicipiacan paquilisli ca yehuanten. Sinda chocaticate pampa quincocúa inmínyolo, cuaquín xiquinchoquilcan, xicchihuacan quinami yehuanten. Xiquinlasojlcan anmocnían, xilainilican míac, huan ximoítacan quinami lacames huan sihuames tijtipichin.

<sup>9</sup> Amo ximolacuepilcan len amo cuali, huan amo xilacocolican quiman anmitzcocolilo. Dios quinequi pa anlajtus cuali inminahuac yehuanten. Xicchihuacan yoje, pampa Dios anmitznotzac pa anyulis anquichijtica yoje. Sinda anyuli anquichijtía inon, cuaquín anquipias in hual iyaxca Dios toTatzin, anmijchihuilis cuali.

<sup>10</sup> Quema, pampa yoje quijtúa Dios ilajtol, quil:

Yihual hual quinequi quipía yulilisli hual amo quiman lamis, huan quinequi quinmita tonalijmes cuajcuali nican pan lalticpan, monequi pa camo quimacahuiltis inejnepil pa quijtus len amo cuali.

Ma camo lacuajcuamana pan ipampa len quijtúa.

<sup>11</sup> Ma mocahua pa quichías len amo cuali, ma quichía len cuali.

Ma quitemu quinami huil yulis ca mosehuilisli pa iyolo, ma motolini pa yulis yoje.

<sup>12</sup> Pampa mojmosta quiztica Dios aquinojen quichijtcate len cuali, huan yihual quincacuí quiman quilajlanticate.

Ma yoje, aquinojen quichihualo amo cuali in Tata quinmixcomaca amo quinmiztica cuali.

<sup>13</sup> Ma annimitzljalan inon: ¿Aqui yahui anmijchihuilía amo cuali pampa mojmosta anyuli anquichijtica cuali ca mochi anmochicahuilisli? Amaqui yahui anmijchihuilía amo cuali hual amo quiman lamis.

<sup>14</sup> Ma yoje, sinda cuajnesi anpanuaya lacocoltilisli pampa anquichijtica cuali, cuaquín Dios anmijchihuilis cuali. Pampa in, xicipiacan paquilisli sinda anpanúa lacocoltilisli. Amo ximomajtcán inminlaixpan yehuanten pampa huil anmijchihuilisli len tetzcuinuc.

<sup>15</sup> Monequi pa anlajtus pa anmoyolo quinami Dios quilajtultic in Tata Cristo pa yes iteco anmoyolo. Ximochijchihuacan mojmosta pa huil anmonapatis ca yehuanten hual anmitzljalanilo leca anquichixtica pa anmitzquixtis Cristo pa camo anpolehuis.

<sup>16</sup> Ma yoje, ximonapatican ca lajtol cuali, amo xiquinmajucan. Xilaquetzac anmomajtitica ilaixpan Dios quiman anquinlaquetzilijtica quinami Cristo techpalehuía. Xicipixtiacan cuali anmolajmatilisli pa anmoyolo hual Dios anmitzmaca pa anquimatis len unca cuali. Huan sinda mocahuas cuali anmolajmatilisli, cuaquinon pinahuasi yehuanten hual anmitzcocolilo huan laquetzalo amo cuali inahuac quinami cuali anyuli anquinelcaticata Cristo.

<sup>17</sup> Sinda quinequi Dios pa se panus lacocoltilisli pampa quichijtica cuali, inon unca niman cuali. Amo quiman yesquiaya cuali sinda quipanúa lacocoltilisli pampa quichíac amo cuali.

<sup>18</sup> Yoje, Cristo miquic sejpa, yihual hual amo quiman quichíac len amo cuali. Miquic pa yehuanten hual quichihualo mochi amo cuali. Inon Cristo quichíac pa techuicas ca Dios. Cristo in lalac yec lamictili huan miquic yoje icuerpo. Ma yoje, pa iyolo yec layuliltili huan axan yihual yajmo quiman miquis. Huan pa iyolo yajmo quiman yes laijcuanili pa camo cayas ca Dios.

<sup>19</sup> Quiman miquic, Cristo noje uyac pan ipampa iyolo capa cataloaya latzacuali in ijyecames amo cuajcuali, cataloaya pin calijtic lachihuali pa yehuanten. Nepa yihual quinnahuatlic ilajtol.

<sup>20</sup> Yehuanten in ijyecames molaliloaya ipan Dios, amo quineltoaloaya. Huan yihual Dios mopepenialtiaya ca inminlaijlaculisli, quinnacahuultiaya yehuanten pa yultiasi amo quineltoacicate pan tonalijmes quiman quichijtataya Noé in arca. Cuaquin quintzacuac pa calijtic moxtin pa inminpolehuilisli. Ma yoje, pan ipampa in arca Dios quinquixtic pin ipolehuilisli in al jan se quesqui san, jan ocho (chicué) lacames huan sihuames.

<sup>21</sup> Huan in al tehuanten huil tiquijtulo unca quinami in al quiman lacuayatequilo. Ca ilacuayatequilisli Jesús anmonextilia pampa aunca iyaxca huan yoje aunca laquixtili pin polehuilisli. In lacuayatequilisli amo unca pa anmijchipahuilis anmocuerpo. In lacuayatequilisli, quema, lanextia pampa neli anquilijtica Dios quinami anquinequi anyuli cuali quinami anmitznextilia anmolajmatilisli hual Dios quilalic pa amhuanten anmoyolo. Huan inon huil anquichia pampa Jesucristo yulic oc sejsa, quistataya capa cataloaya in mijquimes.

<sup>22</sup> Yihual uyac pin cielo, nepa huan Dios huelitijtcate. Yihual monotza pa quipias mochi tolasojlalislisli. Huan moxtin in lanahuatinijmes pin cielo, moxtin hual quipialo lahuelitilisli huan moxtin hual quipialo chichualisli pa huelitisi quipiasi pa quineltoasi.

## 4

### *Dios techueliltic pa tictequipanuilisi*

<sup>1</sup> Cristo panuc lacocoltilisli quiman yec lalac nican pan lalticpan. Pampa in, amhuanten noje xilajtucan pa anmoyolo quinami Cristo huan yojque ximochicahualtican pa anpanus lacocoltilisli. Aqui hual panuc lacocoltilisli pa icuerpo yajmo quipia laijlaculisli huelitijtica pa icuerpo.

<sup>2</sup> Yoje, yajmo anyulis anquinctica anquichia len quinequilo quichihualo yehuanten hual amo quineltoalo Jesucristo. Axan anyuli quinami Dios quinequi, pa mochi tonalijmes hual anmitzcahuilia pa anyulis pan in lalticpan.

<sup>3</sup> Quema, pampa anyuliaya miac tonalijmes quiman anquichihuani amo cuali quinami quinequilo yehuanten hual amo quineltoalo Dios. Axcan, anlamic ca in. Amhuanten yajmo xiyulican anquinctinemi ancana sihuames o lacames. Amo xicnectinemican ancana len hual amo anmoyaxca. Amo xilahuanacan, amo xinejntinemican antzajztinemi pin lajcotiyan quinami lahuanquimes. Amo xiacan pin fiestas (ilhuimes) pa anlacas miac huan pa anlaunis huan cuaquin anlahuana. Amo xicunican len pa anlahuanas huan amo xiacan capa quinmolancuacuetzililo inminlaixpan monos. Nepa quichihualo len niman amo cuali, pampa inon amo unca quinami quijtua Dios ilajtol.

<sup>4</sup> Yajmo anquichias yojque. Huan yehuanten anmitzitalo ca lapolulisli pampa amhuanten yajmo anquinequi anquichia quinami anquinequini. Yajmo anejsehuia ca yehuanten pa anquichias len niman amo cuali quinami yehuanten. Huan pampa in anmitzhuejuecaltilo.

<sup>5</sup> Ma yoje, pampa inon, yehuanten quipiasi pa quinanquilisi Dios pa inminlaijlaculisli. Dios unca lalalili mojmota pa quinnmilis in lacocoltilisli hual quipialo pa panusi yehuanten hual yulticate huan hual micticate.

<sup>6</sup> Pampa inon, quinlamachiltije in lamachiltisli cuali ca yehuanten hual mictataloaya, pa yoje quinami quimatoca inminyolo huil yuli quinami yuli

Dios, mas que pin lalticpan yelosquiaya latilanili pa panusi lacocoltilisli jan quinami moxtin lacames.

<sup>7</sup> Ajsitihuala in tonali quiman mochi lamis. Pampa in, xicmatican quinami monequi pa anhuelitis mochi sejse pa yihual ihuían. Xilajnamiquican cuali pa anquimatis quinami Dios quinequi pa anquilajlanis.

<sup>8</sup> Ma yoje, mochi innojen lajtomes amo monotzalo yoje míac quinami monotza inon: Monequi pa anyulis anmolasojlatica se huan oc se ca mochi anmochicahualisli, pampa aqui hual lalasojla quipujpuhua míac inminlajlaculisli. Noje Dios quipujpuhua míac ilajlajlaculisli yihual hual quinlasojla oc sequin.

<sup>9</sup> Huan anmocnían hual quineltoalo Cristo, xiquinnamiquican ca paquilisli quiman hualalo pa anmochan. Amo xiquijtutinemican pampa yehuanten anmitzmacalo tequil.

<sup>10</sup> Mochi sejse ca amhuanten canac len ilahueliltilisli Dios. Xictequipanucan in lahueliltilisli pa anmopalehuis se huan oc se capa amhuanten. Quema, Dios tejchihuilia niman míac cuali, huan Dios techmaca in lajtol pa titequipanusi cuali mochi in cuali hual tejchihuilic.

<sup>11</sup> Yoje, sinda Dios quimacac lahueliltilisli se pa lajtus cuali, ma yén (yecan) ilajtomes yihual quinami Dios ilajtol. Sinda se latequipanuilia, ma latequipanuili quinami quipía chichahualisli hual Dios temaca. Huan mochi hual anquichía, xicchihuacan yoje pa moxtin quitasi pampa Dios quipía chichahualisli hué. Inon quitasi pan ipampa quinami Jesucristo unca capa amhuanten. Ma camo mocahua pa quipías Dios ichichahualisli hué huan ilahueliltilisli pa huelitis. Yoje ma ye.

### *Quinami in laneltocanjmes panulo lacocoltilisli*

<sup>12</sup> Lasojli nocnían, sinda anmitzajsis tonaljmes quiman anpanúa lacocoltilisli, amo xiquijtucan pa anmoyolo pampa amo monequi pa anmitzpanus len quinami inon sinda anmococúa quinami anmitzcocoltisquiaya tixuxli. In unca se lanextilisli hual Dios anmitztilanilic pa quimatis sinda neli anquineltoaca. Pampa in, amo xiquijtucan quinami catayá len hual amo anquimati leca anmitzpanujtica.

<sup>13</sup> Yes cuali pa anquipías paquilisli pampa anpanujtica in nadita o míac lacocoltilisli hual unca quinami Cristo quipanuc. Yoje, anquipías niman míac paquilisli noje quiman hualas Cristo oc sejpa pan lalticpan ca mochi ichichahualisli huan laixpelalisli hué.

<sup>14</sup> Sinda anunca lahuejuecaltili pampa anquineltoaca Cristo, yoje anquipixtica paquilisli. Anquipía mochi hual anquinequi pa anmoyolo, pampa Dios iEspíritu huan ilaixpelalisli huan ichichahualisli mosejtica pa anmoyolo.

<sup>15</sup> Ma yoje, ximoiztiacan pa camo quiman cayas se ca amhuanten lamictini o laxtequini o se hual quichía len yes hual unca elehuis. Huan ma camo caya se ca amhuanten hual latilantinemi capa amo unca iyaxca pa latilanis. Sinda se panúa lacocoltilisli pampa quichía len quinami innojen, cuaquín cahuilúa pa panus lacocoltilisli.

<sup>16</sup> Ma yoje, sinda se panúa lacocoltilisli pampa quineltoaca Cristo, ma camo pinahua. Cayasquiaya niman cuali pa yoje quichihuilis pa Dios yes laitali niman hué huan caultichin pampa in se quineltoaca Jesucristo huan yuli quinami Cristo quinequi.

<sup>17</sup> Monequi pa anquichihuilis pa Dios yes laitali hué pampa ajsije tonaljmes quiman Dios pehua quinchihuilia len quinmahuilúa yehuanten hual

quinlajtultic pa yihual ihuán. Huan sinda Dios pehua ca tehuanten pa tejchihuilis quinami techahuilúa, cuaquín ¿len quinpanus yehuanten hual amo quineltocalo Dios ilamachilitlisli cuali quiman Dios quinchihuilis quinami quinmahuilúa? Yihual quincocoltis niman chichahuac.

<sup>18</sup> Huan sinda ca nadita amo yesquiaya laquixtili pin polehuilisli yehuanten hual yulilo quichijtcate quinami Dios quinequi, cuaquín ¿len quipanus se hual amo quixtoca ilajtol Dios huan mojmosta yuli quichijtica len amo cuali?

<sup>19</sup> Pampa in, yehuanten hual panulo lacocoltisli pampa Dios quinequi pa yoje yes, monequi pa yehuanten motemacasi ca Dios hual quinchíac. Quema, ma motemacacan ca Dios pa yihual quinlachilis huan yehuanten ma yultiacan quichijtcate len unca cuali. Dios, quema, quichijtías in hual quijtúa pampa yahui quichía.

## 5

### *Quimaca lajtol in laneltocanjmes*

<sup>1</sup> In abuelojmes ca amhuanten, annimitzilía inon: Nehual niabuelito quinami amhuanten, huan niquitac Cristo quiman panuaya lacocoltisli. Huan pampa in, nicmati neli pampa panuc lacocoltisli huan inon niqijtúa neli. Noje nicpía se nadita ichichahualisli hué Cristo huan ilaixpelalisli cualtichin Cristo. Yihual amo huejcahuas nesis nican pan lalticpan. Pampín, annimitzilía ca mochi noyolo inon:

<sup>2</sup> Xiquinlachilican in laneltocanjmes capa amhuanten quinami anquinlachilisquiaya se lanechiculisli borregos, pampa neli yehuanten in laneltocanjmes cate quinami Dios iborregos. Xiquinlachilican ca lanequilisli. Amo xiquitacan pa anmoyolo quinami Dios anmitzejsehuiltitica pa anquinlachilis. Huan amo xiquinlachilican jan pa anmonechicuhuilis tomin ca se lanechiculisli amo cuali. San xiquinlachilican ca mochi anmoyolo.

<sup>3</sup> Huan xiquinlachilican in laneltocanjmes, amo quinami ancataya tecojuan cualancudos huan chijchicahuac. Dios amo anmitzljajtultic pa anquinlachilis yoje quinami huejueyenten. Inon hual cuali pa anquichías: Monequi pa anmochías mochi seje ca amhuanten se lanextilisli cuali pa in laneltocanjmes pa yoje yehuanten quinequisi yulisi quinami amhuanten.

<sup>4</sup> Huan in tonali hual nesis Jesucristo in laitani niman hué, yihual anmijchihuilis miac hual hué huan anmitzmacas paquilisli hual amo quiman lamis. Anlaixpelas ca ilaixpelalisli cualtichin.

<sup>5</sup> Huan jan yoje, amhuanten in lacames yajyancuic, xiclalican pa anquinneltocas in abuelojmes. Huan anmoxtin abuelojmes huan lacames yajyancuic, ximochihuacan quinami tijtipichin anmolaixpan se huan oc se. Xicchihuacan yojque pampa Dios ilajtol quijtúa inon, quil:

Dios molalía inminpan yehuanten hual moixtocalo, huan quinchihuilía cuali yehuanten hual moitalo tijtipichin.

<sup>6</sup> Xicmacahuiltican Dios pa yihual anmijchías amhuanten tijtipichin pan ipampa ichichahualisli hué. Yoje yihual anmijchías hué quiman ajsis in tonali hual yihual quilalic pa anmijchías hué.

<sup>7</sup> Huan axan quiman anquixitica in tonali, xiclaflanican Dios pa anmitzquixtilis mochi hual anmitzmaca etialisli pa anmoyolo, pampa yihual anmitzijnamiquía amhuanten ca miac lasojlalisli pa iyolo.

<sup>8</sup> Xilajtucan cuali pa anmoyolo huan ximolachilijtinemican. Anmola-cocolini in lili anmitznapachijtinemi quinami se León soluntinemi hual

quitemujtica aqui yes pa quicuas. In quinequi quijtúa in lili quinequi pa anmoquixtis capa Cristo iojli pa huil anmitzquitizquis pa anmitzneltoctalis quinami yihual in lili quinequi.

<sup>9</sup> Xiclalican ca chicahualisli pa anmoyolo pa anquixcomacas, xicneltoacan Dios ca mochi anmochicahualisli. Anquimati pampa anmocnían pa mochi in lalticpan quipias pa mopepenialtisi pa panusi in lacocoltilisli hual anquipanujtica amhuanten.

<sup>10</sup> Ma yoje, Dios hual quichihuilía cuali pa quinpalehuis moxtin quiman yes monequi pa yesi lapalehuili, yihual anmitznotzac pa anquineltocas Cristo. Anmitznotzac pa anquipías nadita ichicahualisli hué huan ilaixpelalisli cualtichin. Inon anquipías quiman anlamic anpanuc lacocoltilisli nican pan lalticpan pa je nadita. Cuaquinon yihual Dios lamis quichías mochi hual yahui anmijchihuilía. Anmijchihuilis pa camo anmijcuanis capa yihual iojli. Anmitzmacas chicahualisli huan anmijchihuilis pa anquilalis anmolaneltoctalisli niman míac ca ilajtol.

<sup>11</sup> Yihual ma quipía in chicahualisli pa camo quiman lamis huelitis. Yoje ma ye.

#### *Lami in amal ca lapialtilisli*

<sup>12</sup> Pan ipampa Silvano annimitzizcuiluilic in amal amo ca míac lajtomes. Yihual Silvano se toctni hual neli quineltoca toTata, inon niquijtúa neli. Ca in amal nicnequic annimijchicahualtic pa anquineltocas in hual annim-itzilic huan pa anmopepenialtis pa anpanus mochi in lacocoltilisli hual anmitzpanúa. Huan neli annimitzilía pampa in hual annimitzizcuiluilic unca melahuac, amhuanten anquipías anmolajco ichicahualisli Dios huan ilaixpelalisli cualtichin. Inon in cuali hual anmijchihuilía. Pampa in, xiajtiacan anquineltocatica.

<sup>13</sup> Anmijchicahualo in laneltocanijmes hual cate nican pa Babilón. Noje anmijchicahua Marcos hual unca quinami se noxolol.

<sup>14</sup> Ximopialtican amhuanten se huan oc se, ximotenamiquican ca se latenamiquilisi hual lanextía quinami anmolasoja se huan oc se quinami icnían.

Ma quipiacan mosehuilisli pa inminyolo moxtin hual quineltocalo Cristo huan moxtin hual iyaxca Cristo. Yoje ma ye.

## In oc se amal hual quijcuiluc San Pedro in lanahuatini

### *Pedro quinmijcuiluilta in laneltocanjmes*

<sup>1</sup> Nehual Simón Pedro itequipanujquil huan ilanahuatini Jesucristo animitzjcuiluilijtica amhuan ten hual Dios anmitzmacac laneltocalisli calica anquipía mochi in cuali hual Dios quinequi pa anquipías. Huan anmolaneltocalisli ancanac quiman anquicaquic in lamaxtilisli jan yoje quinami ticanaje tolaneltocalisli hual techmacaje toDios huan Jesucristo hual techquixtic pa camo tipolehuisi. Pampín amhuan ten huan tehuanten tmoitalo jan yoje ilaixpan Dios. Yihual techmacac in laneltocalisli pampa yihual amo quita se lacal hué huan oc se lacal amo yoje hué quiman quinmaca laneltocalisli.

<sup>2</sup> Ma Dios huan Jesús toTata anmijchihuilican cuali. Huan ma anmitzmacacan mosehuilisli pa anmoyolo niman míac pan ipampa quinami anquimiximati.

### *Se laneltocani quipías pa quinnexilis oc sequin quinami Dios motequihuía pa mochías niman cuali se laneltocani*

<sup>3</sup> Pan ipampa ichicahualisli hual jan yihual quipía, Dios techmacac mochi hual unca ca in yulilisli hual tejchihuilía toyolo, in yulilisli hual amo quiman lamis. Noje techmacac mochi hual technexilía quinami ticpiasi pa tiyulisli tipcaquiltiticate Dios. Huan in mochi ticpialo pan ipampa quinami tiquiximatilo Jesucristo hual technotzac pa tiyesi iyaxca. Technotzac pan ipampa in cuali niman hué hual san Dios huil tejchihuilía. Technotzac noje pan ipampa ichicahualisli cuali calica yihual quichía mochi cuali.

<sup>4</sup> Pan ipampa innojen, Dios techilic neli pampa tejchihuilía míac hual unca hué huan techmonotzilía niman míac. Pan ininipampa innojen lajtomes hual techilic neli, amhuan ten huil anajsis anquipías in hual anmijchihuilía quinami Dios. Huil anmoquixtilis mochi in amo cuali pin lalticpan hual quijlacúa anmoyolo, in amo cuali hual anquinequi anquichía nican pan lalticpan.

<sup>5</sup> Huan pampa anquinpía innojen, ximotolinican ca mochi anmoyolo pa anquiscaltis anmolaneltocalisli. Amo ximomajtican pa anquichías in hual anquimati Dios quinequi pa anquichías. Huan xiquiscaltican anmochicahualisli ca lajmatilisli.

<sup>6</sup> Huan xiquiscaltican anmolajmatilisli ca quinami anmotzacuilis pa camo anquichías in hual amo cuali. Huan xiquiscaltican in quinami anmotzacuilis pa camo anquichías in hual amo cuali ca quinami anyuli anquitocatica Cristo huan quinami anyuli anmochijtica lacames hual oc sequin quimatilo pampa amo quiman anquicajuamana. Huan xiquiscaltican inon ca quinami anquitequipanuilía Dios.

<sup>7</sup> Huan xiquiscaltican in quinami anquitequipanuilía Dios ca quinami anquinlasojla anmocnían. Huan xiquiscaltican in quinami anquinlasojla anmocnían ca quinami anquinlasojla moxtin oc sequin.

<sup>8</sup> Quema, xicchihuacan yojque, pampa sinda mojmosta anyuli anquichitica quinami innojen hual nilamic annimitzilic, cuaquín anquiximatis cuali toTata Jesucristo huan anquimatis quinami niman cuali huil anquitequipanuilis pa anquinmanas oc sequin pa quilalisi laneltocalisli ca yihual.

<sup>9</sup> Aquí hual amo quimati yuli quichijtica innojen hual annimitzilic, yoje yihual unca quinami se pachacal huan quilcahuac quinami in Tata quichipahuilic iyolo ilajlaculisli hual quichihuani quiman ayamo quimati-aya inahuac Jesucristo.

<sup>10</sup> Pampa in, nocnían, ximotolintiacan míac mochi tonali pa anyulis quinami annimitzilic. Yojque anajsis anquimatis neli quinami in Tata annitiznotzac pa annitizlajtultic pa anyes iyaxca. Jo quema, pampa sinda anyuli quinami quijtulo innojen lajtomes hual annimitzijcuiluilic, cuaquín amo quiman anmijcuanis pan iojli Dios.

<sup>11</sup> Yoje Dios anmitzmacas pa yes anmoyaxca pa ancalaquis capa toTata Jesucristo hual techquixtic pa camo tipolehuisi. Ancalaquis pa anmocahuas capa yihual huelitía sinda anquineltochas in hual annitizijcuiluilic.

<sup>12</sup> Pampa in, nía niclalia pa annitizijnamiquiltis innojen mas que axan anquinmati. Huan neli amo anmocahuas pa anquineltochas Dios ilajtol lajcuiluli hual unca melahuac, ilajtol hual unca ca amhuanten.

<sup>13</sup> Niquijtúa unca cuali pa annimijchicahualtis pa anmoyolo pa anquij-namiquis mochi inon quiman niyultica.

<sup>14</sup> Annitizilía inon pampa nicmati amo huejcahuas ajsis in tonali quiman nimiquis, jan quinami neli nechnextilic toTata Jesucristo.

<sup>15</sup> Ma yoje, nimotolinis pa nijcahuas ca amhuanten se lajcuilulisli calica itequi amhuanten huil anquinmijnamiquis mochi innojen quiman yajmo niunca.

### *Yehuanten hual quitaje quinami Cristo unca hué*

<sup>16</sup> Quiman antimitzlamachiltije ichicahualisli hué toTata Jesucristo huan quiman yihual yahui huala pan lalticpan oc sejsa, amo antimitzpuhuililoaya jan lajtomes san hual tiqunchijchihuaje pa antimitzcuajcuananasi. No, tehuanten tiquitaje ca toixtololojmes quinami unca niman hué Jesucristo.

<sup>17</sup> Cataya quiman Dios toTajtzin technextilic yihual quimacatica Jesucristo laixpelalisli cualtichin, technextilic quinami quilasojsa nepa pa in tonali quiman yihual Dios laquetzac ca yihual. Tijcaquije laquetzac pin cielo capa yihual unca ca chicahualisli hué huan laixpelalisli cualtichin. Quema, Dios quilic in lajtomes iyampa Jesucristo, quil: "In se unca noXolol hual niclasojsa, ca yihual nicpía niman míac paquilisli."

<sup>18</sup> Huan in lajtol tehuanten tijcaquije hualajtataya pin cielo quiman ticataloaya ca Jesucristo nepa pani pin loma (tepel) hual Dios quilalic pa panusquiaya in jan nepa pani in loma san.

<sup>19</sup> Huan ticpialo len hual unca niman melahuac, amo ajsi monotza yoje míac inon hual tiquitaje. Unca inon hual quijcuiluje Dios ilajtunijmes. Huan anquichías cuali sinda anquijnamiquis in lajtomes quinami cate se lahuilisli laixpelatica pan capa laticumac. Quema, xiquinmijnamiquican innojen quiman anquichías pa hualas Cristo oc sejsa pan lalticpan. Ajsis in tonali, cuaquín anquimatis pampa Cristo ilaixpelalisli yahui anmijtzacuilia pa yajmo anquimahuilis pa anmoyolo sinda in lajtomes cate melahuac ó amo cate melahuac. Unca quinami quiman nesi in lucero (silalin) laxpoyahuero, cuaquinon ticmatilo pampa yahui lanesi.

<sup>20</sup> Huan xicmatican inon hual monotza niman míac. Amo ajsi monotza yoje míac mochi oc se lajtol: Amo quiman unca se ilanahuatilisli Dios hual aqi yes huil quimati len quinequi quijtúa pan ipampa ilajmatilisli ihuían.

<sup>21</sup> Inon unca pampa amo unca se ilajtuni Dios hual quijtuc ilajtomes Dios jan pampa yihual ihuían quinequiaya quinmijtu. San Dios ilajtunijmes quinmijtuje ilajtomes Dios. Huan san quinmijtuje quiman in Espíritu Santo

quinlaliliaya ilajtomes pa inminyolo in lajtunijmes. Dios quinlajtultic ilajtunijmes pa quijtulosquiaya.

## 2

### *Yehuanten hual quimaxtilo islacatilisi (Judas 4-13)*

<sup>1</sup> Ma yoje, pa yina ca yehuanten catanijme lajtunijmes hual islacatinijme, quijtunijme pampa Dios quintilanic. Jan yoje cayasi ca amhuanten lamaxtinijmes quinami yehuanten. Hualasi ca amhuanten quipixticate lamaxtilisli hual amo unca quinami quijtúa Dios ilajtol. Ca in lamaxtilisli hualasi ca amhuanten huan amo anquimatis len yalo quichihualo, cayasi quinami lacochehuanijmes. Huan sinda quineltoaca se inminlamaxtilisli, yihual yoje moxilus capa Dios huan cayas laijlaculi. Innojen lamaxtinijmes quijtusi pampa amo unca neli toTeco Jesucristo quincuhuac quiman miquic pan cuahuil. Pampín moijlacusi huan amo huejcahuas quiman inon quinpanus. Moxilusi capa Dios huan amo quiman huil mocuepasi.

<sup>2</sup> Huan míac quichihuasi quinami innojen lamaxtinijmes lamaxtilo. Yulisi quichijtiasi in hual niman elehuis huan amo pinahuasi. Pampa inon yehuanten hual amo quineltoacalo Dios quihuejuecaltisi Dios iojli pampa amo yulilo cuali innojen lamaxtinijmes huan yehuanten hual quineltoacalo inminlamaxtilisli.

<sup>3</sup> Anmitzcuaajcuamanasi huan anmitzcajcayahuasi pa yehuanten anmitzanilisi anmotomin. Pa yina lamaxtiti hualaloaya lacames quinami yehuanten huan axcan noje lamaxtilo. Huan Dios hual quijnamiquía mochi hual quichihualo, quilalic pa yehuanten yasi capa panusi lacocoltilisli. Dios amo quiman cochi, huan yehuanten Dios quinxilus ilaixpan yihual ca capic amo quiman mocuepasi ca yihual.

<sup>4</sup> Inon ticmatilo, pampa Dios quintilanic pa panusi lacocoltilisli in lanahutinijmes pin cielo hual quichihuaje laijlaculisli. Quinlasac pa mocahuasi capa huejcalan huan capa laticumac. Nepa quincahuac, amo quinmacahuas. Nepa quinchiasi in tonali quiman Dios quinmilis pampa quipiasi moxilusi pa yajmo cayasi capa yihual pa panusi lacocoltilisli huan amo quiman mocuepasi.

<sup>5</sup> Huan Dios amo quinquixtic pa camo polehuisi yehuanten hual yulinijme pa yina. Jan quinquixtic Noé huan oc sequin siete (chicome) san pa camo polehuisi. Noé lamachiltitinemini quinami Dios quijtúa monequi pa lacames yulisi quinami quijtúa ilajtol. Ma yoje, amo quinequiloaya quicaquilo Noé. Cuaquín Dios catotctic mochi in lalticpan ca al huan yojqe miquije moxtin hual amo momajtinijme ilaixpan Dios.

<sup>6</sup> Huan Dios quinchichinuc in caltilan Sodoma huan in caltilan Gomorra huan mochihuaje tinexli. Inon quichíac pa yelosquiaya innojen caltilan se lanextilisli, pa yoje yehuanten hual amo quimatilo momajtilo ilaixpan Dios quimatisi len yahui quinpanúa.

<sup>7</sup> Huan Dios quiquixtic Lot pin polehuilisli quiman Dios yahuiaya quinchichinu Sodoma huan Gomorra. Lot yec lalac hual yulini quinami quinequi Dios. Huan quicocuni iyolo Lot quiman quitani quinami yulinijme amo cuali in lacames nepa, amo quineltocanijme Dios ilajtol.

<sup>8</sup> Quema, pampa quiman chantini in lalac cuali ca yehuanten, nepa quitani huan quicaquini míac amo cuali hual quichihuanijme. Pampa in, quicocuni mojmosta iyolo cuali.

<sup>9</sup> Ticmatilo pampa quichíac mochi inon in Tata. Pampa in, ticmatilo yihual quimati quinami quiquixtía pa camo polehuis se hual panujtica lacocoltilisli.



Noje quimati quinami quinpixtía pa in lacocoltilisli yehuanten hual amo quimatilo momajtilo ilaixpan Dios. Yojque quinpías pa quiman ajsis in tonali quiman quintojtocas ilaixpan yihual ca capic yesi lacocoltili huan amo huil mocuepasi.

<sup>10</sup> Huan niman neli unca pampa Dios quincocoltis yehuanten hual itequi quinequilo quichihualo niman amo cuali. Quinequilo quichihualo len quinequilo inmincuerpos (inminacayo) pa quichihuasi, noje quixixiculo in Tata ilahuelilitlisli. Innojen lamaxtinijmes amo pinahualo. Amo quimatilo momajtilo. Quinhuejuecaltilo yehuanten hual quipialo chichahualisli huan laixpelalisli cualtichin.

<sup>11</sup> Dios ilanahuatinijmes pin cielo quipialo niman míac chichahualisli huan lahuelilitlisli. Inon amo quiman ajsisi quipiasi innojen lamaxtinijmes ej'elehuis hual amo momajtilo quinhuejuecaltilo. Ma yoje, in Tata Dios ilanahuatinijmes pin cielo momajtilo quinhuejuecaltilo ca laxixiculisli iyampa in Tata Dios yehuanten hual quipialo lahuelilitlisli elehuis.

<sup>12</sup> Amo yoje innojen lamaxtinijmes amo cuajcuali. Cate quinami yulijquimes hual amo huil laijnamiquilo. Huan quinami cate in yulijquimes, innojen lamaxtinijmes lacatije pa yesi laquitzquili huan lamictili. Quinhuejuecaltilo inahuac len amo quimatilo nindeno. Pampa in, polehuisi quinami yulijquimes quiman Dios quintojtocas ilaixpan yihual ca capic yesi lacocoltili, capa amo huil mocuepasi.

<sup>13</sup> Panusi lacocoltilisli hual yes inminlaxlahuilisli pa in amo cuali hual yehuanten quichihuaje. Pa semilhuil quixtocalo lahuanalo huan quichihualo mochi amo cuali. Yoje quichihualo quiman lacualo huan launilo ca amhuanten, pampa lahuanalo huan quichihualo mochi capa amhuanten hual amo cana cuali. Quixtocalo míac quichihualo quinami inmincuerpos quinequilo pa quichihuasi.

<sup>14</sup> Innojen lamaxtinijmes quitalo se sihual huan janajnaxcan quinequilo motecalo ca yihual sinda huil. Itequi quinequilo quichihualo laijlaculisli huan amo quiman quijtulo pa inminyolo pampa yalo lamilo ca inon. Yehuanten quinmaxtilo oc sequin hual amo quimatilo míac Dios ilajtol huan amo quinmahuililo sinda inon hual quinmaxtilo unca melahuac o amo melahuac. Yojque pehualo quichihualo laijlaculisli quinami innojen lamaxtinijmes amo cuajcuali. Ma yoje, innojen lamaxtinijmes quipialo inminyolo lamaxtili cuali pa lacajcayahuasi pa canasi míac tomin pa yehuanten inminhuían. Yehuanten, lacames ej'elehuis hual Dios quinmajmajua pa quintojtocas pa como quiman mocuepasi ca yihual.

<sup>15</sup> Quicajcahuaje Dios iojli melahuac, mopoluje pa ojlimes amo cuajcuali. Canaje iojli Balaam ixolol Bosor. Mas que yec ilajtuni Dios, in Balaam quixtocac canac míac tomin pan ipampa quinami quichíac innojen lachihualisli amo cuajcuali.

<sup>16</sup> Ma yoje, Balaam cataya la'ajuali pan ipampa iburra. In burras amo huil lajtulo. Ma yoje Dios quinotzaltic iburra Balaam quinami lacames. Yoje in burra quitzacuic Balaam pa como quichiasquiaya in hual yahuiaya quichía. Cataya pampa Balaam amo quinequiaya laijnamiqui cuali.

<sup>17</sup> Innojen lamaxtinijmes amo cuajcuali amo anmitzpalehuilo nindeno. Cate quinami se iixtololon al hual huaqui, cate quinami ayahuimes huan mextemimes hual quinhuica in iyecal huan amo quipialo quiahuil. Quema, pa in lamaxtinijmes amo cuajcuali, Dios quipia capa yahui quintzacua, capa niman laticumac. Huan yehuanten cayasi panujticate lacocoltilisli hual amo quiman lamis.

<sup>18</sup> Unca pampa laquetzalo m'ac ca lajtomes hual amo monotzalo, moix-tocaticate pampa huil quinmaxtilo lacames ca inminlamaxtilisli hual amo melahuac. Huan yojque quincuajcuamanalo lacames pa quichihuasi mochi hual quinmilacua. Innojen lacames yulinijme quichijitcate amo cuali quinami moxtin hual amo yulilo quinami quijtulo Dios ilajtomes. Cuaquinon pehualoaya mocahualo pa yulisi yoje. Cuaquinon quiman panuc nadifa pehualoaya yulilo cuali. Cuaquin ajsiloaya in lamaxtinijmes amo cuajcuali huan pehualoaya quinlaquetzililo, huan yoje in lacames cataloaya lacuajcuamanali huan pehualoaya yulilo amo cuali oc sejpa.

<sup>19</sup> Innojen lamaxtinijmes quinmililo pampa yehuanten huil yulilo yojque. Quinmililo pampa tehuanten ticate lamacahuali pa camo ticneltocasi Dios ilajtol, yajmo titequipanujquimes hual ticpiasi pa ticneltocasi ilajtol. Ma yoje, innojen lamaxtinijmes yulilo quichijtinemilo amo cuali huan yojque yehuanten cate quinami tequipanujquimes hual quipiasi pa quichihuasi in amo cuali. Se moch'ia yoje pampa quisulahua len yes hual yuli quichijitca.

<sup>20</sup> Sinda lacames pehualo quineltocalo toTata Jesucristo hual techquixtia pa camo tipolehuisi huan yajmo quichijtinemilo in amo cuali hual quinhucas pa polehuisi, yoje moquixtilije ipucmilisli in lalticpan. Ma yoje, sinda pehualo quichijtinemilo oc sejpa quinami quichihuaniyme, cuaquin niman moijlacusi. Yojque mosulahuasi pan ipampa in hual mocahuaje pa quichihualosquiaya quiman pehuaje quineltocaje Cristo. Cuaquinon moitasi polejticate quinami yoje amo polejtataloaya quiman ayamo pehuaje quineltocaje Cristo.

<sup>21</sup> Cataya cuali pa yehuanten sinda amo quiman quimatiloaya Jesucristo ojli cuali. Axan quimatiloaya huan ma yoje moquixtijte pa camo mocahuasquiaya pa ojli, amo quinequije quineltocaje ilajtol hual yihual quin-xtilic.

<sup>22</sup> Yoje quinpanuc yehuanten quinami quijtulo lacames, quil: "In pelo mocuepa quicua len quijsolac, huan in coyamil (cuchi) la'altili mocuepa maltia pin sucuil." Yojque in lacames canaloya in ojli cuali, moquixtijte, canaje oc sejpa in ojli amo cuali.

### 3

#### *In tonali quiman hualas oc sejpa in Tata*

<sup>1</sup> Ome amames ca in amal annimitzjcuiluilic, lasojli nocn'ian. Huan ca in ome amames nicchicahualtitica anmolajmatilisli chipahuac ca Dios ilajtol hual unca pa anmoyolo. Nicchicahualtitica pan ipampa quinami annimitzjnamiquiltitica.

<sup>2</sup> Inon nicch'ia pa yojque anquijnamiquis len quijtuje pa yina Dios ilaj-tunijmes hual yihual molajtulitlic pa quijtusi ilajtomes. Huan annimitzi-jnamiquiltitica pa anquijnamiquis len quijtuc in Tata hual techquixtic pa camo tipolehuisi, in hual anmolanhuatiniymes anmitzmajtije.

<sup>3</sup> Monequi pa camo quiman anquilcahuas inon: Pin tonalijmes quiman yahui lami mochi, hualasi lahuitzquilinijmes. Lahuitzquilinjemisi huan yulisi quichijitcate len yes elehuis hual quinequilo quichihualo.

<sup>4</sup> Quijtusi, quil: "Axcan, ¿capa unca in Tata? Yihual quinmilic totajtzit'ian pampa yahuiaya huala oc sejpa. Huan quiman polehuije totajtzit'ian, amo hualac oc sejpa. Mochi nejnentia quinami nejnentiahuiaya pa yina, jan yoje quinami nejnentiahuiaya pin tonalijmes quiman pehuac in lalticpan."

<sup>5</sup> Yoje quijtusi yehuanten, pampa amo quinequisi quijnamiquisi len panuc pa yina. Pa yina cataloaya in cielos (ilhuicac) huan in lalticpan. Dios pan

ipampa ilajtomes quinchíac. In lalticpan majcoquic quistataya pin al pan ipampa in al, Dios quixiluc in al pa nesis in lalticpan.

<sup>6</sup> Huan pan ipampa al Dios quixitinic in lalticpan. Huan yehuanten hual cataloaya pa yina quinmatoctic.

<sup>7</sup> Axan, ajsithualas in tonali hual Dios quinxitinis huan quintilanis pa panusi lacocoltilisli yehuanten hual amo quimatilo momajtilo ilaixpan yihual. Cuaquín pa in tonali Dios pan ipampa ilajtol yahui quinxitinía ca tixuxli in cielos huan in lalticpan hual cate axan. Yihual quinmajcoctica pa quinxitinis yoje.

<sup>8</sup> Ma yoje, amhuanten, lasojli nocnían, monequi pa annoijnamiquiltis inon quinami in Tata quita se tonali. Ca yihual se tonali unca quinami mil xixihuimes huan ca yihual mil xixihuimes cate quinami se tonali.

<sup>9</sup> Dios in Tata amo huejcahua pa quichías len techilic neli pampa yahuiaya quichía, mas que sequin quijtulo yihual huejcajtica pa quichías. Dios motzacuilía pa camo hualas pa quintojtocas ilaixpan yihual ca capic amo huil mocepasi. Amo quinequi pa se polehuis. Quinequi pa moxtin ajsisi quipalasi inminyolo pa lajtusi pa inminyolo quinami yihual.

<sup>10</sup> In tonali hual hualas in Tata ajsis quinami ajsi se laxtequini, in quinequi quijtúa amaqui quimati quiman yahui ajsi in tonali. Pan in tonali moxilusi in cielos ca se comunilisli hué, yajmo nesis huan molalaltisi in tonali huan in mesli huan in luceros (silalimes) ca lalalisli niman totonqui. Yoje xitinsi atiaxticate. Huan in lalticpan huan mochi pin lalticpan hual quichihuaje in lacames yajmo nesis.

<sup>11</sup> Yoje, pampa ticmatilo mochi innojen yalo xitnilo, ¡len amo monequi pa anyes lacames niman cuali pa jan anyulis san pa anquitequipanuilis Dios ca mochi anmoyolo!

<sup>12</sup> Monequi pa anquichixtías pa ajsis in tonali quiman Dios in Tata nesis. Huan xicchihuacan mochi len huil anquichía pa anquejsehuiltis pa ajsis in tonali. Inon huil anquichía pan ipampa quinami anyulis cuali quinami Dios quinequi. Pa in tonali nesis Dios huan pampa in, molalaltisi in cielos huan xitinsi, huan atiasi mochi in hual Dios quinchíac pin cielo huan pan lalticpan ca lalalisli niman totonqui.

<sup>13</sup> Ma yoje, tehuanten ticchixticate cielos huan lalticpan yajyancuic, quinami Dios neli quijtuc pampa yahuiaya quinchía. Pin lalticpan huan cielos yajyancuic amo cayas lajllaculisli, moxtin lachihuasi cuali quinami Dios quinequi.

<sup>14</sup> Pampa in, lasojli nocnían, sinda anquichixtía in tonali quiman Dios quintojtocas ilaixpan yihual moxtin hual amo quimatilo momajtilo ilaixpan, ximotolinican pa annoitas ilaixpan Dios amo anquipixtica nindeno ca amhuanten hual Dios amo quixtoca. Ximotolinican pa anquipías Dios imosehuilisli pa anmoyolo.

<sup>15</sup> Huan xiquijnamiquican inon quinami Dios huejcahua pa cualanis ca tehuanten pampa quinequi techquixtía pa camo tipolehuisi pampa ticchi-huaje lajllaculisli. Jan yoje anmitzjcuiluilic noje tocní lasojli Pablo ca in lajmatilisli hual quimacac Dios.

<sup>16</sup> Yoje laquetza noje pa mochi iamames innahuac innojen hual nilamic annimitzilic. Pa iamames Pablo cate sequin lajtomes hual amo huil quimati se jan ajnaxcan len quinequilo quijtulo. Huan cate lacames hual amo quixtocalo huan amo quinequilo quimatilo len quinequi quijtúa in hual quijcuilic Pablo. Pampín quijtulo pampa quinequilo quijtulo oc se lamaxtilisli pa inon hual Pablo quinequiaya quijtu. Huan quichihualo jan yoje ca oc sequin ilajtomes lajcuiluli hual Dios ilajtunijmes quijcuiluje. Ma

yoje, Dios quintojtocas ilaixpan yihual pa panusi lacocoltilisli pampa yulilo laijlaculi. Quintojtocas ilaixpan yihual pan in tonali quiman hualas. Huan yoje yehuanten cayasi laxitinili.

<sup>17</sup> Anquimatic inon quiman anpehuac anquineltocac Cristo. Pampa inon, lasojli nocnían, ximolachilican pa como anmomacahuiltis pa anmoquixtis pan Dios iojli. Ximocahuacan pani iojli. Huan ximolachilican pa como anpehuas anquineltocas inon hual quinequisi anmitzmaxtisi yehuanten hual amo quimatilo momajtilo quixijxiculo ilajtol Dios. Yehuanten quimaxtilo in hual amo cuali. Xiyultiacan anquineltocatica ca chicahualisli Dios ilajtol.

<sup>18</sup> Huan ximochicahualtitiacan míac ca in cuali hual Dios ihuían huil anmijchihuilía. Ximochicahualtitiacan míac pa anquiximatis niman cuali toTata Jesucristo hual techquixtía pa como tipolehuisi. Ma quipía yihual in laixpelalisli cualtichin huan niman hué axcan huan mojmosta pa quiman ajsis in tonali hual amo quiman lamis. Yoje ma ye.

## In amal calica pehuac ilajcuilulisli San Juan in lanahuatini

### *In lajtol hual layuliltía*

<sup>1</sup> Jesucristo yec quiman ayamo pehuani mochi. Tijcaquije, tiquitaje ca toixtololojmes len quichíac. Tiquitaje yihual, ticmatocaje ca tomajmajuan, quema, yihual hual tictocayaltilo “In lajtol hual layuliltía”.

<sup>2</sup> Noje tictocayaltilo “In yulilisli”. Huan in yulilisli Dios technextilic, pampa yihual mochiac lacal. Huan tiquitaje in lacal huan neli antimitzililo inon. Axcan antimitzmachiltililo in yulilisli. In yulilisli amo quiman lamis, itequi yulilo huan Dios toTajtzin. Huan in yulilisli hual itoca Jesucristo monextic ca tehuanten.

<sup>3</sup> Quema, tiquitaje huan tijcaquije, huan antimitzmachiltilijtcate yihual amhuanten pa yoje anyes se ca tehuanten, anquipixtica amhuanten noje anmolajco iyaxca in cuali hual Dios techmaca, jan quinami tehuanten ticpialo tolajco iyaxca in cuali hual Dios techmaca. Huan neli ticate se ca Dios toTajtzin huan ca ixolol Jesucristo.

<sup>4</sup> Innojen lajtomes antimitzijcuilulijtcate pa ancayas ca niman míac paquilisli quinami Dios quinequi pa ancayas.

### *Dios unca lahuilisli*

<sup>5</sup> Huan inon unca in lamachiltisli hual tijcaquije Cristo techliaya. Huan oc seppa inon antimitzmachiltiticate. Dios unca lahuilisli. Ticnequilo tiqijtulo, Dios quichía mochi hual unca cuali. Quema, mochi hual cuali moita ca yihual. Huan ca yihual amo unca laticumac nindeno, ticnequilo tiqijtulo, amo unca laijlaculisli capa yihual, amo unca nindeno capa yihual hual amo ca se lajtulisli ca yihual.

<sup>6</sup> Sinda tiqijtulo pampa tehuanten ticate se ca Dios huan ma yoje tiyulilo amo cuali quinami yehuanten hual yulilo quinami cate capa laticumac, cuaquín tislacatilo. Huan moxtin quimatilo pampa amo tiqijtulo melahuac, amo tiyulilo melahuac.

<sup>7</sup> Sinda ticlalisi pa ticchihuasi in hual Dios quinequi, quinequi quijtúa, sinda tiyulilo ca lahuilisli lajitic tehuanten, in lahuilisli unca iyaxca Dios. Dios chanti ca ilahuilisli, quinequi quijtúa, Dios amo mocahua pa quichías cuali, quinami yihual quipía mochi hual cuali. Yoje, ticpialo paquilisli quiman ticate se ca oc se, ticpialo in cuali calica Dios techtuchía. Huan iesli Jesucristo ixolol Dios tejchihuailía mochi laijlaculisli.

<sup>8</sup> Sinda tiqijtulo amo ticpialo laijlaculisli, cuaquín timocaujcuamanalo. Amo unca melahuac lajitic tehuanten, Cristo huan ilamaxtilisli melahuac amo unca lajitic tehuanten.

<sup>9</sup> Sinda ticyolcuitililo Dios tolaijlaculisli, yihual quipujpuhuas tolaijlaculisli huan tejchihuailis mochi in amo cuali hual tiquinchiuililo lacames huan Dios. Ticmatilo Dios quipujpuhuas tolaijlaculisli, pampa yihual amo mocahua pa quichías quinami quijtúa. Huan quipujpuhua tolaijlaculisli pampa yihual quimati quichihuailía se jan quinami quichihuailía oc se pampa quineltovalo Jesucristo.

<sup>10</sup> Sinda tiqijtulo amo ticchihuaje laijlaculisli, yojque tiqijtulo pampa islacati Dios, huan ilajtol amo unca lajitic tehuanten.

## 2

*Cristo lajtúa ca Dios pa tehuanten*

<sup>1</sup> Nitos, annimitzjicuilulijtica innojen pa camo anquichías laijlaculisli. Ma yoje, sinda se quichía laijlaculisli, cuaquín tehuanten ticpialo se lapalehuini hual lajtus pa tehuanten iyampa toTajtzin Dios. In lapalehuini unca Jesucristo, yihual hual amo quiman quipía laijlaculisli. Itequi quichía in hual Dios quinequi, huil calaqui capa Dios unca.

<sup>2</sup> Huan Jesucristo unca in huendi calica yihual quipaquiltic Dios pa mosehuis pa yajmo cualanis pampa ticchihuaje laijlaculisli. Huan Cristo amo mochíac huendi pa jan tehuanten tolaijlaculisli san. Noje mochíac huendi pa inminlaijlaculisli moxtin in oc sequin lacames pin lalticpan.

<sup>3</sup> Huan yojque ticmatilo pampa tiqiximatilo Cristo: Sinda ticchihualo len yihual techilía, cuaquín tiqiximatilo.

<sup>4</sup> Yihual hual quijtúa, quil: “Niquiximati”, huan ma yoje amo quichía in hual quilía Cristo, cuaquín yihual islacati, amo lajtúa melahuac laijtic iyolo.

<sup>5</sup> Yihual hual quichía len quijtúa Dios ilajtol, cuaquinon neli in se quimati quilasoja Dios pan ipampa mochi in hual quichía. Yojque ticmatilo pampa tiyulticate ca toyolo ca se lajtulisli ca Dios.

<sup>6</sup> Yihual hual quijtúa pampa yultía ca se lajtulisli ca Dios quipía pa yulis jan yoje quinami yulini Cristo nican pan lalticpan.

*Se lajtol yancuic*

<sup>7</sup> Lasojli nitos, amo annimitzjicuilulijtica se lajtol yancuic. Niquijcuilúa se lajtol hual anquipixtataya quiman anpehuaya anquicaqui Dios ilajtol huan axan anquipía. In lajtol laviejojtili unca in lajtol hual anquicauc.

<sup>8</sup> Ma yoje, unca se lajtol yancuic hual annimitzjicuilulijtica, huan in lajtol unca melahuac, pampa Jesucristo quijtuc huan quichías in hual quijtúa in lajtol. Noje unca melahuac in lajtol yancuic, pampa monequi pa anquichías amhuanten in hual quijtúa. Monequi pa anquichías pampa axan mijcuan-ticate tolaixpan tehuanten huan panujticate in tonalijmes capa laticumac, quinequi quijtúa, panujticate in tonalijmes quiman yehuanten pin lalticpan amo quimatilo in hual amo unca ca se lajtulisli ca Dios. Laixpelatica ilahuilisi in hual melahuac, quinequi quijtúa, axan ajsitica in tonali quiman ilajtol Dios quinexilijtica in hual unca ca se lajtulisli ca Dios.

<sup>9</sup> Yihual hual quijtúa pampa quipía ilahuilisi Dios laijtic capa yihual, huan ma yoje amo quilasoja icni, cuaquín yihual amo unca ca se lajtulisli ca Dios. Yihual unca quinami quipía laticumactilisli laijtic capa yihual pa yina huan axcan.

<sup>10</sup> Yihual hual quilasoja amo quiman quichías nindeno hual quitzacuilis oc se pa camo quineltoacas Cristo.

<sup>11</sup> Yihual yultica pin laticumactilisli hual niman amo quinequi icni. Huan amo mocahua pa yulis quichijtica len hual lanexilía pampa ilajtol Dios amo huelitía pa iyolo. Quema, in se amo quimati pampa quichijtica laijlaculisli, huan amo quimati len yahui quipanúa pampa quichijtica laijlaculisli. Yihual quixtoca yuli ca iyolo laticumac huan yojque amo huil quimati len Dios quinequi pa quichías.

<sup>12</sup> Amhuanten hual anpehuac anquineltoaca Cristo jan je nadita san, jan quipía se ome tonalijmes quiman anpehuac anquineltoac Cristo, annimitz-jicuilulijtica, pampa Dios quinpujpuhuac anmolaijlaculisli pan ipampa in hual Cristo tejchihuilic quiman miquic pa tehuanten huan yulic oc sejpá.

<sup>13</sup> Amhuanten hual anquineltoaca Cristo axan quipía míac tonalijmes, anunca quinami inmintajtzitzian in laneltocanijmes, annimitzjiculuilijtica pampa anquiximati yihual Cristo hual yultataya quiman ayamo pehuac in lalticpan huan axan yultía. Amhuanten hual anquineltoaca Cristo ayamo pa míac tonalijmes, anunca quinami lacames yajyancuic, annimitzjiculuilijtica pampa anquisulahuac Satanás.

Amhuanten hual jan anpehuac anquineltoac Cristo, anunca quinami xolomes, annimitzjiculuilijtica pampa axan anquiximati yihual toTajtzin.

<sup>14</sup> Amhuanten hual anquineltoaca Cristo pa míac tonalijmes annimitzjiculuilic pampa anquiximatic Cristo quiman anpehuac anquineltoac. Amhuanten hual anquineltoaca Cristo ayamo pa míac tonalijmes annimitzjiculuilic pampa anquipía chichahualisli huan anquipía ilajtol Dios itequi pa anmoyolo, huan anquisulahuac Satanás.

<sup>15</sup> Amo xicnequican in lalticpan capa yulilo lacames quichijtcate inon hual Dios amo quixtoaca. Huan amo xiyulican anquinnectica innojen hual quinmanalo lacames pin lalticpan. Sinda se quinequi yuli quinami yulilo yehuanten pin lalticpan hual amo quineltoalo Dios, cuaquín yihual amo quinequi Dios.

<sup>16</sup> Yehuanten pin lalticpan hual amo quineltoalo Dios san quinequilo innojen: Quinequilo quipialo in hual amo cuajcuali hual inmincuerpo quinchihualtilo pa quinequisi. Quinequilo canal len quitalo inmixtololomes. Quinequilo moixtoalo pampa quipialo mochi hual huil canal pin lalticpan. Huan in lanequilisli amo quinmacac toTajtzin. Quinmacac Satanás hual huelitía pin lalticpan.

<sup>17</sup> Huan in lalticpan yahui lantica ca mochi innojen amo cuajcuali hual lacames quinequilo quichihualo. Ma yoje, yihual amo mocahua pa yulis hual yuli quichijtica in hual Dios quinequi.

### *In islacatilisli hual neli unca*

<sup>18</sup> Nitos, axcan ticcate pin tonalijmes quiman yahui lami in lalticpan. Anquicaquic anmitzilije pampa yahui huala in hué hual unca Cristo ilacocolini niman hué. Huan anquimati pampa axcan cate míac hual cate ilacocolinijmes Cristo. Pampa inon, ticmatilo pampa axan cate in tonalijmes quiman yahui lami in lalticpan.

<sup>19</sup> Yehuanten Cristo ilacocolinijmes mijcuanije capa tehuanten, amo quineltoacanijme Cristo quinami tehuanten. Sinda quineltoaloaya Cristo quinami tehuanten, cuaquín mocahualoaya ca tehuanten. Mijcuanije capa tehuanten pa yojqe Dios lanextilisquiaya yehuanten moxtin amo quineltoaloaya Dios quinami tehuanten neli ticneltoalo.

<sup>20</sup> Amhuanten anquipía ilaxahuilisli in Espíritu Santo. In quinequi quijtúa anquipía in Espíritu Santo laijtic anmoyolo, huan pampa in anmoxtin anquimati Dios ilajtol melahuac.

<sup>21</sup> Amo annimitzjiculuilic pampa amo anquimati Dios ilajtol melahuac. Annimitzjiculuilic pampa quema, anquimati ilajtol melahuac, huan pampa anquimati mochi islacatilisli amo unca Dios ilajtol melahuac.

<sup>22</sup> Axcan, ¿aqui unca yihual hual quijtúa in islacatilisli? Annimitzilía. Unca yihual hual quijtúa Jesús amo unca in Cristo hual Dios quitilanic pan lalticpan. Quema, yihual unca Cristo ilacocolini, yihual hual quijtúa Dios amo unca iTajtzin Jesús huan Jesús amo unca iXolol Dios.

<sup>23</sup> Mochi sejse hual quijtúa Jesucristo amo unca iXolol Dios noje amo quipía Dios quinami iTajtzin. Yihual hual quijtúa inminyampa lacames pampa Cristo unca iXolol Dios noje quipía Dios quinami iTajtzin.

<sup>24</sup> Huan amhuanten, ma mocahua ca amhuanten ilajtol Dios hual anquicaquic quiman anpehuac anquineltoac Cristo. Sinda mocahua lajtíc anmoyolo in lajtol hual anquicaquic quiman anpehuac anquineltoac Cristo, cuaquín amhuanten anyultía ca se lajtulisli ca iXolol Dios huan toTajtzin.

<sup>25</sup> Huan inon unca hual Cristo techilic neli pampa yahuiaya techmaca. Yihual techmaca yulilisi hual amo quiman lamis, tiyultiasi mojmosta ca se lajtulisli ca yihual.

<sup>26</sup> Innojen lajtomes annimitzijcuiluilijtica pa anquimatis aquinojen cate yehuanten hual motolinilo pa anmitzlaicanasi pa camo anquitocas Cristo iojli.

<sup>27</sup> Ma yoje, amhuanten anquipía in laxahuilisi, quinequi quijtúa in lajmatilisli hual Cristo anmitzmacac hual mocahua yultica pa laijtíc capa anmoyolo. Pampa in, amo monequi pa se anmitzmaxtis quinami anquimatis da ilamaxtilisi se unca jan quinami ilamaxtilisi Cristo. Unca pampa ilaxahuilisi, quinequi quijtúa, ilajmatilisli hual Cristo anmitzmacac, inon anmitzmaxtía mochi. Unca melahuac, amo unca islacatilisli. Yoje, xiyultiacan ca se lajtulisli ca yihual, jan quinami yihual anmitzmaxtic.

<sup>28</sup> Huan axcan, Nitos, xiyultiacan ca se lajtulisli ca yihual, pa yoje quiman yihual hualas oc sejpa, amo timomajtisi pa tiquitasi. Huan amo tipinahuasi iyampa yihual quiman nesi capa tehuanten.

<sup>29</sup> Sinda anquimati pampa Jesucristo amo quipía len amo cuali huan amo quichía len amo cuali, cuaquinon anquimati pampa lacatic pa iyolo quipixtica Dios pa iTajtzin aqui yes hual yuli quichijtica in hual unca cuali.

### 3

#### *Dios ixolomes*

<sup>1</sup> Xiquitacan, ¡len amo techlachialtía ca lamajtilisi inon quinami Dios toTajtzin techlasojla! ¡Techoyaltía ixolomes, huan neli ticate ixolomes! Pampa in, yehuanten pin lalticpan hual amo quineltoalo Dios amo quimatilo nindeno inahuac in hual ticpialo pampa ticate Dios ixolomes. Quema, inon yehuanten amo quimatilo pampa amo quimatije Dios quitlanic Jesucristo pin lalticpan.

<sup>2</sup> Lasojli nitos, axcan ticate ixolomes Dios. Huan ayamo tiquitalo mochi quinami ticayasi. Ma yoje, ticmatilo pampa quiman nesis Cristo, cuaquín tiyesi quinami yihual Cristo, pampa tiquitasi quinami yihual unca.

<sup>3</sup> Aquinojen yesi hual yojque quichixticate Cristo pa mochihuasi quinami yihual mocahualo pa quichihuasi mochi hual amo cuali. Huan amo mocahualo pa quilajlanisi Cristo mochi tonali pa yihual quinquixtilis mochi laijlaculisli. Yehuanten quinectialo pa mochihuasi quinami Cristo hual amo quipía nindeno amo cuali.

<sup>4</sup> Moxtin hual quichihualo laijlaculisli noje amo quicaquilo Dios ilajtol. Laijlaculisli unca mochi lachihualisi hual amo unca quinami quijtúa Dios ilajtol.

<sup>5</sup> Anquimati pampa hualac Cristo pin lalticpan pa quiquixtilis in laijlaculisli. Huan yihual amo quipía laijlaculisli nindeno.

<sup>6</sup> Mochi hual yultialo ca se lajtulisli ca yihual amo yultialo quichijticate laijlaculisli. Moxtin hual yultialo quichijticate laijlaculisli amo quiman quimatije pampa quipialo pa quineltoac Cristo. Huan noje amo quiman quiximatije Cristo pa inminyolo.



<sup>7</sup> Nitos, ma camo anmitzcuaquamana amaqui. Aquí yes hual yultía quichijtica in hual cuali unca ca se lajtulisli ca Dios huan ilajtomes, jan quinami unca Jesucristo.

<sup>8</sup> Aquí yes hual yultía quichijtica laijlaculisli unca iyaxca in lili, pampa quiman pehuac in lalticpan pa axan, in lili quichía laijlaculisli. Pampa inon hualac pan lalticpan iXolol Dios pa quilamis mochi inon hual quichíac in lili.

<sup>9</sup> Moxtin hual quipialo Dios quinami inminTajtzin, quinequi quijtua, moxtin hual quipialo in yulilislí yancuic hual Dios quinmaca, yoje yehuanten amo yultialo quichijtcate laijlaculisli. Unca pampa iyulilislí Dios mocahua ca yehuanten laijtic. Yojqe amo huil yultialo quichijtcate laijlaculisli, pampa yehuanten lacatije pa inminyolo quipixtcate Dios pa inminTajtzin.

<sup>10</sup> Ca inon anquimatis yehuanten hual cate ixolomes Dios huan yehuanten hual cate ixolomes in lili. Moxtin hual amo yultialo quichijtcate len cuali quinami Dios quinequi amo cate iyaxca Dios, huan jan yojqe cate moxtin hual amo quinlasojlalo inmicnían, yehuanten amo cate iyaxca Dios.

### *Ma timolasojlaca se huan oc se*

<sup>11</sup> Inon ticmatilo, pampa quiman anpehuac anquineltoac Cristo, noje anquicaquic in lanahuatilisli hual techilic pa timolasojlasi mochi sejse, huan pa tiquinlasojlasi oc sequin.

<sup>12</sup> Monequi pa camo tiyesi quinami Caín hual yec iyaxca in lili, huan yihual Caín quimictic icni. Huan ¿leca quimictic? Quimictic pampa yihual Caín yultiahuiaya quichijtataya in hual amo cuali, huan icni quichihuaya in hual cuali.

<sup>13</sup> Amo ximoitacan ca lapolulisli, nocnían, sinda anmitzcocolilo yehuanten pin lalticpan hual amo quineltoac Dios.

<sup>14</sup> Tehuanten ticmatilo pampa yajmo ticate pin polehuilislí capa timoxilusi ca capic amo quiman timocuepasi pa Dios. Unca pampa ticpialo Dios iyulilislí hual yihual quinmaca yehuanten hual quineltoac Cristo. Inon ticmatilo pampa tiquinlasojlalo tocnían. Yihual hual amo lalasoja mocahua pin polehuilislí capa moxilusi ca capic amo quiman mocuepas capa Dios. Inon unca miqulislí pa iyolo.

<sup>15</sup> Moxtin hual amo quinmitalo cuali huan quincocolilo inmicnían cate lamictinijmes. Huan anquimati da amo unca se lamictini hual quipía Dios iyulilislí hual amo quiman lamis. In yulilislí amo unca laijtic capa yihual.

<sup>16</sup> Pampa inon ticmatilo Jesucristo techlasojla, pampa motemacac pa miquis pa tehuanten. Yoje, monequi pa timotemacasi pa timiquisi pa tocnían.

<sup>17</sup> Cuajnesi unca se hual quipía mía hual cana pin lalticpan calica molacualtis huan calica molaquentis. Huan cuajnesi quita icni hual monequi pa quipías len huan ma yoje amo quinequi quimaca nindeno pa quipalehuis. Axcan, ¿anquijtua yihual quimati quilasoja icni ca Dios ilasojlalisli? No, amo quilasoja.

<sup>18</sup> Nitos, ma camo tiquijtucan san pampa tilasojlalo, ma camo tiquilican san. Quema, ma tilasojlaca neli pan ipampa in cuali hual tiquinchihuililo oc sequin.

### *Quinami ticmatisi pampa cayas cuali ca tehuanten quiman tiqitasi Dios*

<sup>19</sup> Sinda tiyulilo yojqe tiquinlasojlaticate oc sequin, tiquinchihuilijtcate cuali, cuaquanon ticmatisi pampa tiyulticcate ca se lajtulisli ca Dios ilajtol melahuac. Huan yoje, iyampa Dios neli huil timoilisi pa toyolo pampa ticate ca se lajtulisli ca Dios ilajtol.

<sup>20</sup> Quema, pampa sinda tiqijtulo pa toyolo pampa cuajnesi ticchihuaje laijlaculisli, cuaquín Dios unca niman hué huan toyolo niman tipichin, huan yihual quimatis sinda ticchihuaje laijlaculisli o da amo ticchihuaje.

<sup>21</sup> Lasojli nitos, sinda amo techilía toyolo pampa ticpialo laijlaculisli, cuaquín ticmatilo pa toyolo pampa Dios techita cuali.

<sup>22</sup> Yojque, len yes timotemachililo pa Dios techmacas, yihual techmaca. Techmaca pampa ticchihualo in hual yihual techilía, ticchihualo in hual quipaquiltia.

<sup>23</sup> Huan inon unca hual techilía pa ticchihuasi. Techilía pa ticneltocasi iXolol Jesucristo hual yihual quitilanic pin lalticpan. Noje techilía pa tiyultiasi timolasojlaticate tehuanten se huan oc se, jan quinami yihual techilía.

<sup>24</sup> Huan yihual hual quineltoca mochi hual techilía amo mocahua pa yultias ca se lajtulisli ca Dios, huan Dios unca ca se lajtulisli ca yihual. Dios techmaca iEspíritu huan pampa inon ticmatilo yihual amo mocahua pa yulis ca tehuanten laijtic toyolo.

## 4

### *Dios iEspíritu huan iespíritu hual unca ilacocolini Cristo*

<sup>1</sup> Lasojli nocnían, amo xicayacan anquineltoacate moxtin hual quijtulo pampa quipialo in Espíritu Santo quiman anmitzlaquetzilijtcate len yehuanten quijtulo unca Dios ilajtol. Quema, ximonextilican ca Dios ilajmatilisli pa yojque anquimatis sinda neli quijtuticcate Dios ilajtol. Ximonextilican yojque, pampa cate míac hual mosemantiaje pin lalticpan, quinlaquetzilijtcate inminlajtomes ijyecames ej'elehuis. Quijtulo pampa laquetztcate pan ipampa in Espíritu Santo mas que cate lajtunijmes hual islacatilo.

<sup>2</sup> Nican unca quinami anquimatis sinda in Espíritu Santo neli quimacac in lajtol hual anmitzilijtica se: Mochi seje hual quijtúa pampa laquetzica pan ipampa Dios iEspíritu huan quijtúa neli pampa Dios quitilanic Jesucristo pa hualac quinami lalac pa in lalticpan, neli quijtuticcate Dios ilajtol.

<sup>3</sup> Huan mochi seje hual pa iyolo amo quijtúa neli pampa Dios quitilanic Jesucristo pa hualac pin lalticpan quinami lalac, cuaquín in se amo unca iyaxca Dios. Inon ilamaxtilisli in lili, in ijyecal elehuis hual unca ilacocolini Cristo. Anquicaquini pampa in ijyecal elehuis ca ilamaxtilisli yahuiaya huala pin lalticpan, huan axcan unca pin lalticpan.

<sup>4</sup> Amhuanten, Nitos, anquipía Dios ilamaxtilisli pa anmoyolo. Anunca iyaxca Dios huan amo anquimacahuilic pa anmitzcuaajcuamanalosquiaya yehuanten hual quipialo ilamaxtilisli elehuis ilacocolini Cristo. Amo anmitzcuaajcuamanaje pampa in Espíritu Santo hual unca laijtic anmoyolo quipía niman míac chicahualisli hual amo quipialo yehuanten hual quipialo ilamaxtilisli ilacocolini Cristo.

<sup>5</sup> Yehuanten cate lacames pin lalticpan hual amo quineltocalo Dios. Pampa in, laquetzalo ca inminlamaxtilisli yehuanten pin lalticpan. Huan yehuanten pin lalticpan quinequilo quicaquilo yehuanten.

<sup>6</sup> Tehuanten ticpialo Dios ilamaxtilisli pa toyolo, tehuanten ticate iyaxca Dios. Yihual hual quiximatijtia Dios quicaqui ilajtol Dios hual tiqijtulo, huan quineltoca. Yihual hual amo unca iyaxca Dios amo quineltoca ilajtol Dios hual tiqijtulo. Yojque ticmatilo da quipialo in Espíritu Santo ca Dios ilamaxtilisli melahuac, o da quipialo ijyecal ilacocolini Cristo ca ilamaxtilisli hual lacuaajcuamana.

### *Dios unca lasojlalisli*

<sup>7</sup> Lasojli nocnían, ma timolasojlaca tehuanten se huan oc se, pampa Dios techmaca in lasojlalisli. Mochi seise ca moxtin pin lalticpan hual lasasoja quipía Dios quinami iTajtzin huan mojmosta moscaltía quinami yihual quiximati Dios.

<sup>8</sup> Yihual hual amo lalasoja amo quiman pehuac quiximatic Dios, pampa Dios quimati lalasoja, huan amo mocahua pa lalasojas.

<sup>9</sup> Tehuanten Dios yojque technextilic quinami techlasoja: Quitilanic iXolol Jesucristo, in se ixolol san hual quiplaya, amo oc se quinami yihual. Quitilanic pin lalticpan pa ticpiasi yulilislí hual amo quiman lamis huan in yulilislí unca pan ipampa Jesucristo. Quema, yihual quipía lahuellitilislí pa techyulitlis ca in yulilislí hual amo quiman lamis.

<sup>10</sup> Techlasoja Dios yoje: Amo ticataloaya tehuanten hual ticlasojlaje Dios. Unca Dios hual techlasojlac tehuanten. Huan yihual quitilanic iXolol pa miquis pampa tiyeje laijlaculi. Miqic pa yoje quipaquiltis Dios pa yihual yajmo cualanis ca tehuanten pampa tiyeje laijlaculi.

<sup>11</sup> Lasojli nocnían, sinda Dios techlasojlac yojque, cuaquín tehuanten noje ticpialo pa timolasojlasi tehuanten se huan oc se.

<sup>12</sup> Amo quiman cataya se lalac hual quitac Dios. Ma yoje, sinda timolasojlalo tehuanten se huan oc se, cuaquín Dios amo quiman mocahua pa techitas cuali. Yihual unca pa laijtic toyolo. Yoje tejchihuilía pa tilalasojlasi cuali quinami yihual quinequi pa tilalasojlasi ca mochi in chicahualislí hual yihual techmaca.

<sup>13</sup> Yoje quinami nía annimitzilía, ticmatilo pampa tiyultialo ca se lajtulislí ca Dios huan Dios mojmosta unca ca se lajtulislí ca tehuanten. Ticmatilo inon pampa yihual techmacac laijtic tehuanten iEspíritu Santo.

<sup>14</sup> Huan tehuanten tiquitaje Jesucristo hual unca Dios iXolol. Huan tiqijtulo neli pampa toTajtzin Dios quitilanic iXolol pa yihual quinquixtilis pa ipolehuilislí inminlajlaculislí yehuante pin lalticpan.

<sup>15</sup> Yihual hual quijtúa inminlaixpan moxtin pampa Jesucristo yihual Dios iXolol, cuaquín Dios quiztías cuali yihual, huan yihual yulis ca se lajtulislí ca Dios.

<sup>16</sup> Tehuante ticmatilo huan ticneltocalo in lasojlalisli hual Dios quipía pa tehuante. Dios quimati lalasoja huan amo mocahua pa lalasojas. Yihual hual yultía lalasojlatica yuli ca se lajtulislí laijtic Dios huan Dios yuli ca se lajtulislí laijtic yihual.

<sup>17</sup> Huan jan quinami Cristo unca, yojque tehuante ticate noje quinami yihual nican pan in lalticpan. Pampa in, tilalasojlalo cuali quinami Dios quinequi pa tilalasojlasi, pa yojque amo timomajtisi pan tonali quiman Dios quinmilis yehuante pin lalticpan sinda cayasi ca yihual o sinda quitojto-cas ilaixpan yihual ca capic unca polehuilislí hual amo quiman lamis.

<sup>18</sup> Yehuante hual lalasojlalo amo momajtilo. Sinda tilalasojlalo quinami Dios quinequi, cuaquín yojque unca laquixtili mochi momajtilislí hual unca laijtic tehuante. Sinda se momajtía, unca pampa quimati yihual quipías pa panus lacocoltislí. In in lacocoltislí hual cahuilía se hual yuli quichijtica laijlaculislí. Huan yihual hual momajtía ayamo ajsic quimatic lalasojlac quinami Dios quinequi pa lalasojas.

<sup>19</sup> Tehuante ticlasojlalo Jesucristo pampa yihual techlasojlac quiman tehuante ayamo tiquiximatije.

<sup>20</sup> Sinda se quijtúa: “Niclasojla Dios”, huan ma yoje quicocolía huan amo quita cuali icni, cuaquín islacati. Yihual hual amo quilasojla icni hual quitac, cuaquín neli unca yihual amo huil quilasojla Dios hual amo quiman quitac.

<sup>21</sup> Huan inon unca hual techilic chicahuac Dios: Yihual hual quilasojla Dios noje quipía pa quilasojlas icni.

## 5

### *Ticsulahualo mochi hual unca pin lalticpan*

<sup>1</sup> Mochi sejse hual quineltoca pampa Jesucristo unca in Cristo hual Dios quitilanic, yihual quipía Dios pa iTajtzin. Lacatic pan ipampa Dios. Huan yehuanten quipialo Dios quinami inminTajtzin. Mochi sejse hual quilasojla iTajtzin Dios noje quilasojla mochi sejse hual lacati quipixtica Dios pa iTajtzin.

<sup>2</sup> Nía annimitzilía quinami ticmatilo pampa tiquinlasojlalo Dios ixolomes. Sinda ticlasojlalo Dios huan ticchihualo in hual techilía, cuaquín ticmatilo pampa tiquinlasojlalo Dios ixolomes.

<sup>3</sup> Yojque ticlasojlalo Dios sinda ticneltocalo mochi hual techilía. Huan in hual techilía Dios amo techlamilía tochicahualisli pa ticchihuasi.

<sup>4</sup> Unca pampa mochi sejse hual lacatic quipixtica Dios pa iTajtzin quisulahua móchi lacocolini pin lalticpan hual molalilo ipan pa quitzacuilisi pa camo quineltocas in Tata. Huan yojque unca quinami ticsulahualo: Sinda amo timocahualo pa ticneltocasi Jesucristo ca mochi toyolo, yihual techpalehuis pa tiquinsulahuasi.

<sup>5</sup> Huan ¿aqui yihual hual quisulahua in lili hual huelitía pin lalticpan? Unca yihual hual quineltoca pampa Jesucristo unca Dios iXolol.

### *In ilajtulisli melahuac Dios iXolol*

<sup>6</sup> Jesucristo unca yihual hual hualac pin lalticpan huan monextilic pampa yihual unca Dios iXolol pan tonali hual yec lacuayatequili pin al. Noje monextilic pampa yihual unca Dios iXolol quiman quisac iesli capa miquic. Yojque amo yec lacuayatequili san, yihual yec lacuayatequili huan lamictili. Huan in Espiritu Santo unca hual quijtúa neli pampa unca yojque, pampa in Espiritu Santo amo quiman islacati.

<sup>7</sup> Ticmatilo inon unca melahuac pampa cate ye hual techmacalo lajtol melahuac pampa Jesucristo unca Dios iXolol, cate iTajtzin huan yihual Jesucristo huan in Espiritu Santo, in yeyenten quijtulo yojque.

<sup>8</sup> Noje ticmatilo Jesucristo unca iXolol Dios pampa cate ye pa in lalticpan hual mochi tonali techmacaticate lamaxtilisli melahuac pa ticmatisi inon. Se unca in Espiritu Santo. Yihual techmachiltía pa toyolo pampa unca neli. Oc se unca in al quiman Jesucristo yec lacuayatequili ca al, moxtin hual cataloaya nepa quimatije yihual yec Dios iXolol. In oc se unca iesli, pampa Cristo miquic huan toyahuic iesli, huan cataloaya míac hual quitaje inon. Yojque in yeyenten techmaxtilo neli se lajtol san, techmaxtilo neli pampa Jesucristo yihual Dios iXolol.

<sup>9</sup> Sinda lacames techililo neli len, huan tiquinneltocalo, neli unca ticneltocasi Dios sinda yihual techilila neli len lajtol. Unca pampa in hual Dios techilía unca niman neli. Amo ajsis yes yoje neli inon hual lacames techililo. Huan Dios techilic neli huan techilijtica neli pampa Jesucristo unca iXolol.

<sup>10</sup> Yihual hual quineltoca ca mochi iyolo Dios iXolol yoje quipía in lajtol melahuac laijtic yihual iyolo. Aqui yes hual amo quineltoca Dios, yoje yihual quichijtica pa Dios nesi quinami se hual islacati, pampa amo quineltoca in hual Dios quijtuc neli inahuac iXolol.

<sup>11</sup> Huan in lajtol melahuac unca inon: Dios techmacac yulilisi hual amo quiman lamis huan ticpialo in yulilisi pan ipampa iXolol.

<sup>12</sup> Aqúi hual quipía iXolol Dios pa laijtic iyolo noje quipía in yulilisi. Huan aqúi yes hual amo quipía iXolol Dios pa laijtic iyolo yihual amo quipía in yulilisi.

*Yahui laquisa ca in amal*

<sup>13</sup> Annimitzizcuiluilic in amal amhuanten hual anquineltoca Dios iXolol pa vojque anquimatis pampa anquipía in yulilisi hual amo quiman lamis.

<sup>14</sup> Ticmatilo pa toyolo Dios tejchihuilía cuali, pampa ticmatilo sinda tictemachilo len hual unca yoje quinami quinequi, cuaquín yihual techcaqui.

<sup>15</sup> Huan vojque, quinami ticmatilo Dios techcaqui quiman tictemachilo, noje ticmatilo pampa axan ticanaje in hual tictemachije.

<sup>16</sup> Sinda se quita icni quichijtica laijlaculisi hual amo quihuica pa miquis, monequi pa quitemachilis Dios huan Dios quimacas icni yulilisi, sinda quichijtica laijlaculisi hual amo quihuicas pa miquis. Unca laijlaculisi hual quihuicas se pa miquis, huan amo annimitzilijtica pampa monequi pa quitemachilis Dios sinda quichíac se in laijlaculisi.

<sup>17</sup> Mochi in amo cuali unca laijlaculisi huan unca laijlaculisi hual amo quihuica se pa miquis.

<sup>18</sup> Ticmatilo pampa yihual hual quipía Dios quinami iTajtzin amo yuli quichijtica laijlaculisi, pampa Dios iXolol quipixtía huan in lili amo quimatoa.

<sup>19</sup> Ticmatilo pampa ticate ilacames Dios huan moxtin in oc sequin pin lalticpan mocahualo ca in lili huelitijtica pan yehuanten.

<sup>20</sup> Ma yoje, amo ticmatilo jan inon san. Noje ticmatilo pampa hualac Dios iXolol, huan techmacac lajmatilisi pa tiquiximatisi Dios. Yihual amo quiman mocahua pa techilis in hual unca melahuac. Huan ticate ca se lajtulisi ca yihual hual mojmosta quijtúa len unca melahuac, pampa ticate ca se lajtulisi ca iXolol Jesucristo. Yihual unca in Dios hual quijtúa inon hual melahuac huan quipía yulilisi hual amo quiman lamis pa quinmacas yehuanten hual quineltocalo.

<sup>21</sup> Nitos, ximoiztiacan, ximopilian pa como anquinmolancuacuetzilijtime-nis inminlaixpan oc sequin dioses o monos, ximijcuanican capa innojen. Amo quiman xicneltocacan se lajtol hual amo unca ca se lajtulisi ca Dios. Yoje ma ye.

## In amal ome hual quijsuiluc in lanahuatini San Juan

<sup>1</sup> Nehual in abuelito hual niquinlaicana yehuanten hual quinelto calo to Tata Jesucristo. Annimitzpialtía amhuanten, tehual, to cni sihual. Dios mitzljaltultic pa tiyes ixolol. Annimitzljaltultic tehual huan moxolomes. Amhuanten neli annimitzlasojla. Huan amo jan nehual san annimitzlasojla. Noje moxtin hual quimatilo Dios ilajtol melahuac, yehuanten noje anmitzlasojlalo.

<sup>2</sup> Quema, antimitzlasojlalo pampa Dios ilajtol neli ticpialo pa toyolo. In lajtol amo quiman mocahuas pa cayas ca tehuanten.

<sup>3</sup> Cayas ca tehuanten in cuali hual tejchihuilia Dios to Tajtzin huan Jesucristo ixolol Dios to Tajtzin. Noje cayas ca tehuanten inmicnilisli huan inminmosehuilisli pa toyolo. Pampín, tiyulisli ticnelto caticate Dios ilajtol neli, huan tiyulisli tilalasojlaticate.

<sup>4</sup> Nicpiaya niman míac paquilisli pampa nicmatic quinami sequin ca moxolomes yulilo quipixticaté Dios ilajtol neli pa inminyolo. Yulilo jan quinami to Tajtzin quinmilia.

<sup>5</sup> Huan axcan, to cni sihual, amo nimitzijcuiluilijtica se lajtol yancuic pa ticnelto cas. Jan unca in lajtol san quinami techilic Dios hual tijcaquije quiman tipehuaje ticnelto caje Jesucristo huan axan ticpixtialo. Huan nimitzilía ca noyolo, ma timolasojlacan tehuanten se huan oc sequin.

<sup>6</sup> Huan inon unca in lasojlalisli, sinda tiyulilo ticchijticate mochi hual techilia Dios. Quema, in unca in lajtol pa ticnelto casi, jan quinami anquicaquic quiman anpehuac anquineltocac: Dios annimitzilía pa anyulis amolasojlatica anmoxtin se huan oc se.

### *Lacuajcuamananijmes*

<sup>7</sup> Nimitzilía inon pampa cate míac hual quisaje lacuajcuamantinemilo, mosemantinemilo capa moxtin pin lalticpan. Yehuanten amo quijtulo neli pampa Jesucristo cataya ca Dios quiman ayamo pehuac in lalticpan, quijtulo pampa yihual amo lacatic quinami xolol pin lalticpan huan mochíac lalac. Se hual yojque quijtúa unca lacuajcuamanani huan molalilia quinami ilacocolini Cristo.

<sup>8</sup> Ximolachilijtiacan pa camo moijlacus in hual anquichíac pa in Tata. Ximolachilijtiacan pa ancanas mochi hual Dios quinequi annitzmaca.

<sup>9</sup> Sinda mochi seje quinequi yultía quinelto catica oc se lamaxtilisli huan amo quinequi yultía quinelto catica Cristo ilamaxtilisli, cuaquín yihual amo quinelto ca Dios, amo quiximati Dios pa iyolo. Sinda se yultía quinelto catica Cristo ilamaxtilisli, cuaquín yihual quinneltoca to Tajtzin huan ixolol, quinmiximati pa iyolo.

<sup>10</sup> Sinda hualas aquí yes ca amhuanten huan amo lamaxtía ca Cristo ilamaxtilisli, cuaquín amo xicajxiltican pan anmochan, huan jan yoje amo xicpialtican.

<sup>11</sup> Annimitzilía inon pampa aquí quipialtía yihual yojque quipalejtica in se ca ilamaxtilisli hual niman amo cuali.

### *Yahui laquisa ca iamal*

<sup>12</sup> Nicpiaya míac pa annimitzilis. Ma yoje, amo nicnequi annimitzilía ca amal huan lajcuilulisli. Yes cuali pa nilachixtías pa huil nihualas ca

amhuanten pa tilaquetzasi tehuanten, pa yojque timoxtin ticpiasi mochi in paquilisli hual Dios quinequi pa ticpiasi.

<sup>13</sup> Mitzpialtilo ixolomes mocni sihual, mocni hual Dios quilajtultic pa yes ixolol. Yoje ma ye.

## In amal ye hual quijsuiluc in lanahuatini San Juan

### *Lajtúa cuali de Gayo*

<sup>1</sup> Nehual in abuelito hual niqunlaicana moxtin hual quineltoalo toTata Jesucristo, nimitzpialtitica tehual, Gayo, hual moxtin mitzlasojlalo huan nehual neli nimitzlasojla.

<sup>2</sup> Lasojli nocni, nicnequi pa mochi yas cuali ca tehual huan pa mojmosta ticayas cuali, jan quinami yahui ca moyulilisi hual amo mocahua pa cayas cuali.

<sup>3</sup> Nimitzilía inon, pampa nicpiaya míac paquilisli in tonali hual ajsije nican sequin tocnían huan neli nechlaquetzilije in quinami tiyultica ca se lajtulisli ca Dios ilajtol melahuac, quinami neli tiyultica.

<sup>4</sup> Amo unca nindeno hual nechmacas paquilisli hué quinami inon pa quiman nechmachiltilo pampa nocnían yulticate quinami techilía Dios ilajtol.

<sup>5</sup> Lasojli nocni, ticchijtica in hual lanextía quinami neli ticneltoca ilajtol Dios quiman tiqunpalehuía tocnían hual amo tiqunmiximatiaya.

<sup>6</sup> Quema, yehuanten laquetzaloaya neli quinami tiqunlasojlaya. Quijtuje inon inminyampa moxtin in laneltocanjmes nican. Ma nimitztemachi pa tiqunchihuilis cuali quiman yes timochicahuas ca yehuanten quiman quisasi nepa mochan. Xiquinmaca mochi hual monequi pa quipiasí, pampa yehuanten Dios quintilaníc. Pampa inon, xiquinchihuii yojque quinami ticchihuilisquiaya yihual Dios.

<sup>7</sup> Quema, xiquinchihuii yojque, pampa yehuanten canaje ojli pa quimachiltisi ilajtol Dios capa yehuanten hual amo quineltoalo Dios. Canaje ojli huan amo quiman quintemachije yehuanten hual amo quineltoalo Dios pa quinpalehuisi.

<sup>8</sup> Yoje, monequi pa tehuanten tiqunlacualtisi yehuanten tocnían hual yulilo lachijtcate yojque. Yojque tehuanten timochihualo teguipanuyquimes ca yehuanten, tiqunpalejtcate pa quimachiltinemisi ilajtol Dios.

### *In lacal Diótfrefes yuli lachijtica amo cuali*

<sup>9</sup> Niqunmijcuiluilic se amal yehuanten in laneltocanjmes nepa. Ma yoje, in Diótfrefes mojmosta quinequi mochía hué ca moxtin in laneltocanjmes. Amo quinequi techneltoca quiman ticlajlanilo len.

<sup>10</sup> Pampa in, pa in tonali nihualas niclajnamiquiltis mochi hual yihual quichijtica. Amo mocahua pa latenejtinemis tonahuac tehuanten huan amo mocahua pa quinmilis oc sequin pampa ticchihualo laijlaculisli. Yoje yihual islatatijtinemi, huan techuejuecaltitinemi ca lajtomes amo cuajcuali. Huan ca in amo mocahua. Noje amo quinequi quinnamiquía tocnían quiman paxalulo nepa, huan ¡len amo quintzacuilía yehuanten hual quema, quinequilo quinmajxiltilo! Quinquixtia capa in laneltocanjmes, amo quinmacahuilía pa monechicusi ca yehuanten.

<sup>11</sup> Lasojli nocni, amo xichía quinami yehuanten hual yulilo quichijtcate len unca amo cuali. Xiyuli ticchijtica quinami yehuanten hual yulilo quichijtcate cuali. Aquí hual mojmosta yuli quichijtica cuali unca ixolol Dios. Aquí hual yuli quichijtica amo cuali amo quiximati Dios.

### *Quijtúa quinami yuli quichijtica cuali Demétrio*



<sup>12</sup> Moxtin quijtulo quinami yuli quichijtica cuali Demétrio huan moxtin quimatilo pampa unca neli inon hual quijtulo quinami yuli yihual. Huan tehuanten noje tiqijitulo neli pampa yihual yuli quichijtica cuali, huan tehual ticmati in hual tiqijitulo tehuanten unca melahuac.

*Laquisa lajcuilúa ca in lajtomes*

<sup>13</sup> Nicpiaya míac pa nimitzilisquiaya. Ma yoje, amo nicnequi nicchía ca in liculi huan lajcuiluloni.

<sup>14</sup> Unca pampa nicchixtica pa quiman timoitasi, cuaquinon tilaquetzasi tiomenten.

<sup>15</sup> Ma Dios mitzpía ca mosehuilisli pan moyolo. Yehuanten in lajlasojli hual cate nican anmijchicahualo. Xiquinchicahua ca itoca mochi sejse tolajlasojli hual nepa cate.

## In amal hual quijcuiluc in lanahuatini San Judas

*Judas quinmijcuiluilia yehuanten hual Dios quinnotzac pa yesi ilacames*

<sup>1</sup> Nehual Judas itequipanujquil Jesucristo huan icni Jacobo, annimitz-ijcuiluilijtica amhuanten hual Dios toTajtzin anmitznotzac. Amhuanten anmitzljaltultic toTajtzin pa anyes iyaxca. Yihual anmitzanac huan anmitzpixtica pa Jesucristo.

<sup>2</sup> Ma Dios anmitzmaca miac ilaicnilisli huan miac imosehuilisli pa anmoy-olo huan miac ilasojlalisli.

*Quijtua pampa cate yehuanten hual quimaxtilo islacatilisli*  
(2 Pedro 2:1-17)

<sup>3</sup> Lasojli nocnian, nicnequiaya miac annimitzijcuiluili pa annimitzmaxtilisquiaya in hual timoxtin ticneltocalo, nicnequi niqijtua, in quinami Jesucristo techquixtic pa ipolehuilisli tolajljalculisli. Ma yoje, niqitac pampa monequi miac pa annimitzilis pa anquinapatis Dios ilamaxtilisli hual ticneltocalo. Dios quimacac in lamaxtilisli jan sepa san pa como mocahuas pa cayas ca tehuanten hual yihual techlajtultic pa tiyesi ixolomes.

<sup>4</sup> Quema, xicnapatican Dios ilamaxtilisli, pampa cate sequin lamaxtinijmes hual nesije capa amhuanten. Pa yina Dios quimatic pampa hualalosquiaya yehuanten. Techcahuilic ilajtol lajcuiluli hual quijtua pampa Dios quilalic pa yesi latojtocali pa in lacocoltilisli hual yahui quinpanua yehuanten hual amo quineltocalo. Quema, yehuanten amo quimatilo momajtilo ilaixpan Dios, huan islacatilo. Quijtulo Dios tejchihuilic cuali huan pampa in, quil, huil ticchihualo len yes ticnequilo ticchihualo ca tocuero. Quema, quijtulo pampa huil ticchihualo mochi laijljalculisli. Yoje, ca inminlamaxtilisli, yehuanten quimaxtilo pampa amo unca neli in hual Dios quijtua quinami unca Jesucristo. Quimaxtilo pampa amo unca neli pampa jan Jesucristo san unca toTeco huan toTata.

<sup>5</sup> Axan, nicnequi annimitzijnamiquiltia inon, mas que ancataya lamachiltili pa anquimatis mochi inon. Nicnequi pa como anmocahuas pa anquijnamiquis. Annimitzijnamiquiltia pampa quiman toTata quinquixtic totajtzizian pin polehuilisli nepa pin lali Egipto, cuaquin quinmictic yehuanten hual amo quineltocanjime.

<sup>6</sup> Noje annimitzijnamiquiltia in hual quinchihuilic ilanahuatinijmes pin cielo. Sequin pehuaje quitocaje oc se lajtulisli pa in hual Dios quilalic pa quinhueliltis. Quinequiloaya len hual amo inminyaxca. Yoje, quicajcahuaje inminchan pin cielo (ilhuicac). Axan Dios quinpia latzacuali, amo quiman quinmacahuas, mocahuasi pan laticumac, quichixticate pa quiman ajsis in hue tonali hual Dios quinmixcomacas ca in amo cuali hual quichihualoaya. Cuaquin quintojtocas pa yajmo cayasi iyampa.

<sup>7</sup> Noje nicnequi annimitzijnamiquiltia quinami quixitinic in caltilan Sodoma huan in caltilan Gomorra huan in oc sequin caltilan itejtenco. Yehuanten pa innojen caltilan catanijme yojque quinami in lanahuatinijmes amo cuajcuali pin cielo, monilunijme ca lacames huan sihuames, se ca miac oc sequin. Noje yehuanten amo quiman mocahuanijme pa monilusi quinami Dios techilic pa como quiman quichihuasi lacames. Yehuanten cate lanextilisli pa tehuanten, pa como tiyulisi yoje. Dios quinlamic innojen caltilan ca tixuxli huan noje quinlamic in lacames hual nepa chantinijme.

<sup>8</sup> Huan innojen lamaxtinijmes amo cuajcuali hual cate capa amhuanten ma yoje quichihualo quinami in lacames hual chantinijme pa innojen caltilan. Quichihualo noje quinami in lanahuatinijmes ej'elehuis nepa pin cielo. In lamaxtinijmes lajtemiquilo huan quiman ejsalo, quijtulo Dios quinmilic pan ipampa in lajtemiquilisli pampa unca cuali quichihualo in amo cuali. Quijtulo pan ipampa in lajtemiquilisli Dios quinmilic pampa quinmacahuilitia pa quichihuasi ca inmincuerpo len Dios techilia pa camo quiman ticchihuasi. Noje quijtulo pan ipampa in lajtemiquilisli Dios quinmilic pampa quinmacahuilitia pa camo quinelto casi ilahuelilitilisli aqui yes huelitijtica. Huan quijtulo pan ipampa in lajtemiquilisli unca inminyaxca quinhuejuecaltisi moxtin hual cate huejué.

<sup>9</sup> Ma yoje, ma annimitzili in hual quilic Miguel. Yihual ilaicanani moxtin ilanahuatinijmes Dios hual cate pin cielo. Se tonali huan in lili molaxilitataloaya lajtomes pa quimatisi aqui cataya iyaxca pa quihuicas imijquil Moisés. Huan Miguel quimatiaya momajti ilaixpan in lili huan pampa in momajtic Miguel pa quixcomacas in lili ca lahuejuecaltilisli pampa lajtuaya elehuis. Jan quilic, quil: "Ma mitzajua in Tata."

<sup>10</sup> Ma yoje, amo cate quinami Miguel innojen lamaxtinijmes ej'elehuis, pampa yehuanten quihuejuecaltilo len yes hual amo quiximatilo. Huan ca inmincuerpos yehuanten quichihualo quinami quichihualo in yulijquimes, in yulijquimes hual amo quimatilo laijnamiquilo. Huan yojque moijlaculo yehuanten hual cate quinami innojen lamaxtinijmes ej'elehuis.

<sup>11</sup> ¡Ah, yehuanten, quinami yalo panulo lacocoltilisli! pampa yulilo quinami Cain, canaje iojli. Noje cate quinami Balaam. Yihual quinnexilic Dios ilacames pa quichihuasi len amo cuali, huan oc se lalul quilaxlajtataya Balaam pa quinchiuilis inon. Huan innojen lamaxtinijmes ej'elehuis noje cate quinami Coré hual quixcomacac Moisés huan Aarón, mochíac inminlacolini. Quinhuejuecaltic, huan pampa in, miquic huan noje miquije moxtin hual quitocaje.

<sup>12</sup> Quema, innojen lamaxtinijmes amo cuajcuali anmitztlalilo pan polehuilisli. Cate quinami tetilan itzindan in al huejcalan hual amo moifililo. Motecualo in barcos ca innojen tixcalimes, moxtinilo. Huan nepa ca amhuanten cate in lamaxtinijmes ej'elehuis quiman anlacaujtica pa anquimolancuacuetzilis toTajtzin. Amo momajtilo ilaixpan Dios. Lacualo huan launilo míac, quitemujticate quinami canaló míac pa yehuanten san. Amo anmitzpalehuilo nindeno. Yehuanten cate quinami mextemimes hual amo temacalo quiahuil, san quinhuicatía in ijyecal. Cate quinami cuahuimes hual amo quipialo ilaquilyo. Noje huaquije pampa cate quinami lacapunali, yajmo quiman laquilo. Mas que unca in mesli pa quipialo ilaquilyo, amo quipialo. Innojen cuahuimes cate quinami miquije sejpa huan oc sejpa. Miquije pampa amo quipialo ilaquilyo huan noje miquije pampa cate quinami lacapunali. Amo quiman ajsisi oc sejpa pa in tonali quiman quimacalo laquilyo. Huan yojque mochahuasi innojen lamaxtinijmes. Miquije pa inminyolo pampa amo quiman quinelto caje Dios, huan in tonali hual miquilo inmincuerpos, cuaquinon moxilulo capa unca Dios huan amo quiman huil mocuepasi.

<sup>13</sup> Quema, yehuanten lamaxtinijmes cate quinami in al huejcalan quiman majcoctica. Amo mosehuía, quiquixtitica posunquil hual unca yojque quinami inminlachihualisli huan inminlajtomes inminlamaxtilisli hual quisalo pa inmincamac in lamaxtinijmes ej'elehuis. Mochi inon hual quichihualo unca pinahualisli niman elehuis. Quema, innojen lamaxtinijmes cate quinami luceros (silalimes) hual amo cate san sejpa, amo mochahuilo pa mopalasi capa cate pin cielo (ilhuicac). Huan in luceros mopolusi huan

yajmo quiman moitasi. Cayasi capa laticumactía niman míac. Yoje quinami in luceros, innojen lamaxtinijmes ej'elehuis amo mocahuasi pa cayasi capa niman laticumac, capa amo quiman quisasi. Ca ompic Dios quintlanis.

<sup>14</sup> Adán quipiaya ixohuiyo hual quipiaya ixohuiyo hual quipiaya ixohuiyo hual motocani Enoc. Huan in Enoc yec Dios ilajtuni huan quijtuc in hual yahuiaya quinpanu innojen lamaxtinijmes amo cuajcuali, quijtuc, quil: "Xiquitacan. Quinlajtultic in Tata miles huan miles hual yihual quinmochipahuilic huan quinlajtultic pa yesi iyaxca pa quitequipanuilisí yihual san. Niqitac hualac ca yehuanten.

<sup>15</sup> Hualaje pa quinpolehuiltisi huan pa quintlanisi capa yesi lacocoltili moxtin yehuanten ej'elehuis, moxtin hual amo momajtilo ilaixpan Dios. Quinmixcomacaje ca mochi inminlachihualisli hual lanextililo quinami amo quimatilo momajtilo ilaixpan Dios. Noje in Tata huan yehuanten hual iyaxca quinmilije pampa quichihuae laijlaculisli pan mochi in míac tonalijmes quiman quicocolije Dios ca lajtomes chijchicahuac."

<sup>16</sup> Quijtuya Enoc inon pa yehuanten hual amo mocahualo pa quixtocasi in hual elehuis. Mojmosta quijtulo laijtic inminyolo pampa amo quixtocalo quinami Dios huelitía. Yultialo quinecticate quichihualo o quipialo len amo unca cuali. Amo mocahualo pa quixtocasi laquetzasi ca lajtomes chijchicahuac quicocolijtcate mochi hual Dios quichía. Quinlaquetzililo cuali ca oc sequin quinmilijtcate in hual quinpaquiltis. Huan quichihualo inon san pa yehuanten quinchihuilisli in hual quinequilo innojen lamaxtinijmes ej'elehuis. O quichihualo pa yoje innojen lamaxtinijmes huil quinquixtilisli len yes quinequilo.

<sup>17</sup> Ma yoje, amhuanten, lasojli nocnían, amo ximocahuacan pa anquinamiquis quinami pa yina laquetzaloaya ilanahuatinijmes toTata Jesucristo, quijtuloaya in hual yahuiaya panu.

<sup>18</sup> Anmitzililoaya: Ajsisi tonalijmes quiman yahui lami in lalticpan hual tiquiximatilo. Cuaquín cayasi lacames hual quihuitzquilisli mochi hual quillía Dios. Mojmosta yultiasí quichijtcate mochi tetzcuinuc hual quinequilo quichihualo, amo momajtcate ilaixpan Dios.

<sup>19</sup> Cate yehuanten innojen lamaxtinijmes ej'elehuis hual quijtulo inminlamaxtilisli unca cuali, huan quijtulo pampa in, yehuanten cuali. Huan oc sequin hual quineltocalo Jesucristo amo ajsilo cayalo cuali quinami yehuanten, quil. Ma yoje, lacuajcuamanticate, yojque anmitzjcuaniilo capa cate in oc sequin laneltocanijmes. Quijtulo, quil, jan yehuanten san yulilo quichijtcate quinami Dios quinequi. Quijtulo, quil, moxtin in oc sequin laneltocanijmes yulticate quinami yulilo yehuanten pin lalticpan hual amo quimatilo Dios ilajtol. Huan neli cate yehuanten in lamaxtinijmes ej'elehuis hual yulilo quinami yehuanten pin lalticpan, pampa noje quinami yehuanten, amo quipialo Dios iEspíritu.

<sup>20</sup> Ma yoje, amhuanten, lasojli nocnían, ximochicahualtican quinami anquineltocatica Jesucristo. Unca Dios hual anmitzmaca anmolaneltocalisli. Mochi lajtomes cate melahuac, amo unca oc se laneltocalisli, jan inon san hual Dios quimaca. Huan xiclaianican Dios anquimacahuiltitica pa anmitzpalehuis in Espíritu Santo.

<sup>21</sup> Ximopixtiacan huan xiquijnamiquican mochi tonali quinami Dios anmitzlasojla. Xiyultiacan anquichixtica toTata Jesucristo ilaicnilisli pa quiman hualas oc sejpa huan techuicas capa ticayasi ca toyulilisli hual amo quiman lamis.

<sup>22</sup> Ximotolinican pa anquinsulahuas yehuanten hual momahuilijtcate pampa quinmaxtijé in lamaxtilisli amo cuali innojen lamaxtinijmes ej'elehuis, xiquinsulahuacan pa camo quineltocatisi.

<sup>23</sup> Xiquinquixtican pin polehuilisli yehuanten hual pehuaje quineltocape in lamaxtilisli elehuis. Xiquinquixtican quinami anquinqixtitiqtis-  
guiaya se pin tixuxli pa camo miquis lachichinuli. Quema, xiquinmicnlican,  
huan amhuanten ximomajtican pa camo anmitzjilacus in lamaxtilisli ele-  
huis hual quinchihuilic yehuanten pa quichihuasi laijlaculisli. Xijcocolican  
inminlajilaculisli, xiquitacan quinami cataya se tzotzomajli pucmic hual  
anmitzjijaltía. Quema, xiquiztiacan yoje pa camo anmoaniltis ca inminlai-  
jilaculisli.

*Lami ca lajtomes huejué pa Dios*

<sup>24</sup> Axcán, ma tiquilican lajtomes huejué yihual hual huil techpías pa  
camo tihuetzisi pan iojli. Huil techuicas pa timoquetzasi iyampa yihual  
tiquizticate ilaixpelalisli niman cualtichin huan ichicahualisli hué. Tiquitasi  
amo ticpixticate laijlaculisli nindeno. Huan tiquitasi ticpixticate niman míac  
paquilisli.

<sup>25</sup> Quema, pa yihual in Dios hual unca se san, hual techquixtic pin pole-  
huilisli pan ipampa toTata Jesucristo, ma quipía mochi laixpelalisli niman  
cualtichin. Ma techcaqui tiquilijticate lajtomes huejué. Ma caya pa yihual  
chicahualisli hué huan lahueliltisli. Ma quipía mochi innojen quiman  
pehuaya mochi huan axcan huan pa mochi tonalijmes hual ajsitihualasi.  
Yoje ma ye.

## Jesucristo quinextilía San Juan len cataya lalatili hual yahui panúa, in Apocalipsis

### *Jesucristo iApocalipsis*

<sup>1</sup> Pan in amal niqijitúa inon hual Jesucristo nechnextilic. Nechnextilic innojen inahuac yihual hual Dios techlatilic tehuanten quiman pehuac mochi pa yina. Axcan Jesucristo technextilía. Dios quimacac in lajtomes pa yihual Cristo quinmilis huan pa quinnextilis itequipanujquimes len quiptías pa panus huan amo huejcahuas pa panus. Huan Cristo quimachiltic in lajtomes pan ipampa ilanahuatini pin cielo (ilhuicac) hual yihual nechtilanilic nehual itequipanujquil Juan.

<sup>2</sup> Huan nehual Juan niqijitúa neli pampa in amal unca ilajtol Dios huan niqijitúa neli pampa Jesucristo quijtúa neli innojen lajtomes hual nican cate lajcuiluli. Unca melahuac. Quema, mochi hual nehual Juan niquitac unca lajcuiluli nican. Huan Jesucristo quijtúa neli pampa unca melahuac.

<sup>3</sup> Quiptías niman mías paquilisli hual aquí momaxtía in amal huan hual aquí quicaqui momaxtía in amal. In amal unca Dios ilajtulisi, huan quiptías paquilisli hual aquinojen quineltocasi in hual unca lajcuiluli nican, pampa ajstihuala in tonali quiman panusi innojen.

### *Juan quinmijcuilulía in chicome lanechiculisli capa monechiculo laneltocanjmes*

<sup>4</sup> Nehual, Juan, in amal annimitzicuilulijtica amhuanten hual Dios ilacames pa innojen siete (chicome) caltilan hual cate pin lalticpan Asia. Ca yacacan ca amhuanten in cuali hual Dios tejchihulía huan imosehuilisli pa anmoyolo. Dios toTajtzin unca huan cataya huan hualas. Huan ma annitmacacan in cuali lachihualisi huan mosehuilisli pa anmoyolo innojen chicome Espíritus hual cate iyampa yihual yehuatica pan iicpali hual laixpela chicahuac capa huelitía.

<sup>5</sup> Huan ma annitmacaca innojen Jesucristo hual huil ticlalilo mochi tolaneltotalisli ca mochi hual quijtúa. Quema, miquic pampa quijtuc len melahuac. Yihual in se hual quipehualtic in oc se yulilisli pa lacames. Yihual yulic oc seija ca iyulilisli in cielo, in yulilisli hual quiptía in lahuelilitilisli hual unca quinami itajtzin se quimaca ixolol hual ca yihual pehuac inminlacatilisli moxtin ixolomes. Yihual Jesucristo noje huelitía pan in huejueyenten hual cate pan in lalticpan. Yihual techlasojla huan pan ipampa iesli yihual techmacahuac pa camo tipanusi in lacocoltilisli hual cayasquiaya pampa techihuaje laijlaculisli.

<sup>6</sup> Techmacac noje lahuelilitilisli pa tihuelitisi quinami huejueyenten, pa tictequipanuilisi Dios quinami itiopistas, yihual Dios iTajtzin Jesucristo. Huan Jesucristo, ixolol Dios, ¡ma quijtucan lajtulisli hué pa yihual ca mochi momajtilisi, ma camo mocahua pa huelitis! Yoje ma ye.

<sup>7</sup> ¡Xiquitacan, yihual huala ca in mextemimes! Huan moxtin quitasi, quema, huan yehuanten hual quipanahuije ca teposil latentili. Huan moxtin in mías lacames pin lalticpan, quincoc inminyolo pampa quitasi yihual huan momajtisi huan chocasi quiman quitasi. Quema, yoje cayas.

<sup>8</sup> “Nehual niunca quinami in Alfa huan in Omega, in A huan in Z. Nicnequi niqijitúa, niunca hual aquí quipehualtic mochi, huan niunca hual aquí

quilamis mochi”, quijtúa in Tata Dios, yihual hual aqui unca huan hual aqui cataya huan hual aqui hualas, yihual hual aqui quipía mochi chicahualisli.

*Juan quita in Cristo laixpelatica niman cualtichin*

<sup>9</sup> Nehual, Juan, niunca anmocni, huan nicpía nolajco quinami amhuanten anquipia anmolajco ca len yes cocolisli hual tipanulo, huan anmolajco ilahuelilitlisli Dios huan anmolajco in hual ticpialo pa timopepenialtisi pa tipanusí in amo cuali hual tejchihuililo pampa ticpialo Jesús pa toyolo. Nícataya pin lali hual unca lajco pin al huejcalan, in lali itoca Patmos. Nechtlanije nepa Dios ilacocolinijmes pampa níquinmachiltiaya lacames ilajtol Dios, níquinlaquetzilijtataya neli lajtomes inahuac Jesucristo.

<sup>10</sup> Niajsic nicayac ca in Espíritu Santo nechueliltijtataya ca ichicahualisli. Cataya pan in tonali hual tictocayaltilo itonali in Tata. Huan pa notepotzcon níjaquic se lajtol hué nechnotzac, cataya quinami latzotzona se lancaquetzaloni.

<sup>11</sup> Quijtuc:

—Niunca hual nicpehualtic mochi huan hual niclamis mochi, quinami in letras A huan Z. Inon hual tiquita, xiquijcuilu pan se amal huan xiquintilanili in chicome lanechiculisli capa cate Dios ilacames pa innojen chicome caltilan hual cate Efeso huan Esmirna huan Pérgamo huan Tiatira huan Sardis huan Filadelfia huan Laodicea. Cate pin lalticpan de Asia.

<sup>12</sup> Jan axcan nimomalinac pa níquitasquiaya aquí laqueztataya ca nehual ca in lajtol. Huan quiman nimomalinac, níquinmitac majlaclihuanome (doce) tapalcames milintataloaya. Cataloaya lachihuali ca oro.

<sup>13</sup> Lajco pin tapalcames níquitac se hual nesíaya quinami ilacal in cielo, lalaquentili ca se nahuas huejcanic hual ajsic pa icxihuajmes. Quipiaya se lacuejtiloni custic quinami oro ílpitataya itzindan itzicalan.

<sup>14</sup> Nesiaya itzontecon huan itzondi iztatataya quinami itojmiyo de borrego, iztatataya quinami in tisihuil. Huan iixtololjmes cataloaya quinami se tixuxli milintica.

<sup>15</sup> Huan icxihuajmes cataloaya quinami teposli cahuantica quinami jan axcan quisaje pan se tixuxli niman totonqui. Huan ilajtol cataya quinami xahuani in al huejcalan quiman moajcoctica.

<sup>16</sup> Pa ima cuali quínpiaya chicome luceros (silalimes), huan quistataya pa icamac se teposli latentili calica moanaló guaches. Huil latequiaya ca pani huan ca itzindan. Huan nesíaya iixco quinami in tonali quiman laixpela ca mochi ilaixpelalisli.

<sup>17</sup> Quiman níquitac, níhuetzic inminlaixpan quinami nícataya se mijquil. Ma yoje, quilalic nopan ima cuali huan nechilic:

—Amo ximomajti. Nehual niunca hual quipehualtic mochi huan hual quilamis mochi.

<sup>18</sup> Nehual in hual yultica. Nímiquic huan xiquita, niyultica huan amo quiman nilamis. Huan quinami se hual quínpiá lalapuhualonijmes noje quipía lahuéilitlisli pa quínlapus lalapujquimes, nehual noje nicpía lahuéilitlisli pa níquijtus pa míquisi lacames huan pa yasi ca capic cate in mijquimes o pa camo míquisi pa cayasi ca in mijquimes.

<sup>19</sup> Axcan, xiquijcuilu inon hual tiquitac huan hual tía tiquita inahuac len unca axan huan len neli yahui panúa quiman lamisi innojen hual tía tiquita.

<sup>20</sup> Nímitzilis len quínequi mitznextilía innojen chicome luceros pa noma cuali hual tíquinmíztica, huan in chicome tapalcames lachihuali ca oro hual lajtcate. Pa yina huan axan ayamo químatije nindeno inahuac inon yehuanten pin lalticpan. Innojen chicome luceros cate in lanahuatinijmes hual quilachililo in chicome lanechiculisli capa cate Dios ilacames pa innojen

chicome caltilan. Huan in chicome tapalcames hual lajticate cate in chicome lanechiculisli capa monechiculo Dios ilacames.

## 2

### *In lanahuatilisli pa in lanechiculisli pa Efeso*

<sup>1</sup> Xiquijcuiluli inminlanahuatini ilacames Dios hual cate pin caltilan Efeso, xiquili: “Yoje mitzilía Cristo hual mojmosta quinpixtía in chicome luceros pa ima cuali huan nejnemía lajco capa cate in chicome tapalcames lachihuali ca oro, mitzilía:

<sup>2</sup> Nicmati mochi inon quinami tichtequipanuilia. Titequipanuc chichahuac huan timopepenialtic amo tisajtataya pa ticmaxtis melahuac nolamaxtilisli cuali. Huan nicmati quinami amo huil timopepenialtia pa lacames amo cuajcuali cayasi ca amhuanten. Huan tiquinchiuilic lajlanilisli pa timonextilis sinda yehuanten neli cate ilanahuatinijmes Dios hual yoje quijtulo, huan anquimatic pampa islacatilo.

<sup>3</sup> Nicmati quinami timochicahualtia pa tipanus in amo cuali hual mijchi-huililo, huan amo timopolúa. Quema, timochicahualtic pa tipanus inon pampa ticpia notoca. Titequipanuc chichahuac pa nehual.

<sup>4</sup> Ma yoje, nicpia pa nimitzilis pampa niquita len amo cuali ca tehual. Yajmo tichlasoja huan amo tiquinlasoja oc sequin quinami tilasojlani quiman tipehuac tichtequipanuilic.

<sup>5</sup> Pampín, xiquijnamiqui quinami ticataya pa yina huan xiquinchihuacan innojen cuajcuali hual tipehuac ticchia quiman timochiac noyaxca. Huan sinda amo ticchias yojque, nihualas ca amhuanten huan nimitzijcuanilis motapalcal capa unca. Nicnequi niqijtúa, nolacames hual chantilo pan Efeso yajmo quinclauilisli oc sequin pa quinpalehuisi lacames pa canasi no'ojli. Yoje cayas sinda amo ticpalas moyolo.

<sup>6</sup> Ma yoje unca inon hual ticchia cuali: Tiquincocolia in hual quichihualo yehuanten hual quitocalo len quimaxtilo in nicolaifas. Nehual noje amo niquixtoca inminlamaxtilisli.

<sup>7</sup> Aqi quipia inacas pa quicaqui len quinmilia iEspíritu Santo Cristo yehuanten hual cate lanechiculisli Dios ilacames. Yihual hual quisulahua len yes quinequi quijcuani pan no'ojli, nicmacas pa yes iyaxca pa quicuas ilaquilyo in cuahuil hual quiyuliltia nolacames. In cuahuil unca pa Paraiso, ilajcotiyan ilaquilyo Dios. Nicyuliltis pa quipias mochi in cuali capa Dios huelitia.”

### *Len quijcuiluc pa in laneltocanijmes pa Esmirna*

<sup>8</sup> Huan xiquijcuiluli in ilanahuatini Dios ilacames hual cate pa Esmirna, xiquili: “In hual quijtúa yihual hual quipehualtic mochi huan quilamis mochi, yihual hual miqic huan yulic oc sepa:

<sup>9</sup> Nicmati mochi in cocolisli hual ticpanujta huan quinami amo ticpia miac tomin, mas que neli ticpia miac hual ipati lajtic moyolo. Huan nicmati quinami mitzhuejuecaltilo yehuanten hual quijtulo cate judios huan ma yoje, pa inminyolo amo neli yehuanten judios. No, yehuanten cate ilacames Satanás, yehuanten monechiculo pa quichihualo len quinequi Satanás.

<sup>10</sup> Amo ximomajtitia quiman tia tipanua lacocoltilisli pa nadita axan. Xiquita. Nadita axan yahui quinlasa in lili sequin ca amhuanten pan calijtic pa motolinis anmijchiuilisli pa yajmo anquineltochas Dios, quinequi pa anmijcuanis pan Dios iojli. Huan pa majlacli tonalijmes anpanus miac



amo cuali. Ximopepenialti pa tipanus mochi inon huan sinda ticpías timiquis, ma yoje ximopepenialti pa timiquis. Sinda yoje ticchía, cuaquín nimitzamacas noyulilislí hual unca nolaxlahuilislí hual niquinmacas hual aquinojen mopepenialtilo pa panusi mochi.

<sup>11</sup> Aquí quipía inacas pa lacaquis, ma quicaqui len quinmilía in Espíritu Santo innojen inminlanechiculisli Dios ilacames. Yihual hual lasulahua amo quipanus in miqulislí hual amo quiman lamis.”

*Len quijcuiluc pa in laneltocanjmes pa Pérgamo*

<sup>12</sup> Huan xiquijcuilulí ilanahuatini de Dios ilacames hual cate pa Pérgamo, xiquilí: “Innojen cate ilajtomes yihual hual quiman lajtúa, huil laxitinía quinami iteposli se guache hual unca latequiltíli huan latequi ca pani huan ca itzindan:

<sup>13</sup> Nicmati capa anchanti, unca capa Satanás quipía iicpali capa huelitía. Nicmati mochi hual ticchías. Amo quiman timocahuac pa tichnelto-casquiaya nehual, huan amo quiman timocahuac pa tichnelto-casquiaya mas que tiunca capa chanti Satanás. Quema, tiyultiahuiaya ticlalij-tataya molanelto-calislí ca nehual quiman quimictije Antipas hual yec note-quipanujquil hual amo quiman mocahuaya pa quichías in hual nicnequiaya.

<sup>14</sup> Ma yoje, niquta nadita pan tehual hual amo niquixtoca. Cate sequin capa amhuanten hual quineltocalo ilamaxtilislí Balaam. Yihual quinextilic in hué Balak quinami huil quinnequiltic pa quichihualosquiaya laijlac-ulisli yehuanten in israelitos. Quinyantic pa quicualosquiaya nacal hual quilaliloaya inminlaixpan monos hual ilacames Balak quinmolancuacuet-zilinijme. Huan quinyantic pa quichihualosquiaya amo cuali in lacames ca sihuames hual amo inminsihuahuan.

<sup>15</sup> Noje cate ca amhuanten sequin hual quitocalo inminlamaxtilislí in nicolaítas.

<sup>16</sup> Pampa in, xicpala moyolo pa tilajnamiquis quinami Dios. Huan sinda amo, cuaquinon nihualas ca tehual jan axcan huan nimoanas ca yehuanten quinami ca inminteposli guaches hual quisa pa nocamac, hual unca nolaj-tomes.

<sup>17</sup> Aquí huil lacaqui, ma quicaqui len quinmilía in Espíritu Santo in miac inminlanechiculisli Dios ilacames. Aquí quinsulahua yehuanten hual quimaxtilo len amo cuali, yoje yihual nicmacas len lalatili pa quicuas hual quichicahualtis iyolo. In pa quicuas unca quinami maná hual quistihuala pin cielo. Huan nicmacas se tixcali iztac hual quipía lajcuilulí ipan itoca yancuic, huan in itoca amaqui quimatis, san yihual hual nictocayaltic ca itoca.”

*Len quijcuilulic ilanahuatini in laneltocanjmes pin caltilan Tiatira*

<sup>18</sup> Huan xiquijcuilulí ilanahuatini ilacames Dios hual cate pa Tiatira, xiquilí: “Yoje quijtúa iXolol Dios hual quinpía iixtololojmes chicuenta se tixuxli milintica huan quinpía icxihuajmes cahuanticate quinami se teposli latotonili pan se tixuxli:

<sup>19</sup> Nicmati mochi in hual ticchía, quinami tilalasojla huan quinami tich-neltoca huan quinami tichtequipanulí huan quinami timopepenialtía pa tipanus mochi hual mitzajsilo mitzlacocolitica huan amo timocualanilía. Huan nicmati quinami in tequipanulislí hual tijchihuic axan unca miac, amo yoje miac cataya in tequipanulislí hual tipehuac tijchihuic.

<sup>20</sup> Ma yoje, niquta inon ca tehual hual amo niquixtoca. Ticmacahuilítia pa in sihual hual unca quinami Jezabel quipías lahueliltilislí ca Dios ite-quipanujquimes. Yihual motocayaltía ilajtuní sihual Dios huan quinmaxtía

quincuaajcuamantica notequipanujquimes pa quichihuasi len amo cuali lacames ca sihuames. Quinmaxtía pa quicuasi lacuali hual quilalilo quinami huendi inminlaixpan monos.

<sup>21</sup> Nicmacac míac tonalijmes pa quipalasquiaya iyolo. Ma yoje, amo quinequi quipala pa como quichías in amo cuali ca lacames.

<sup>22</sup> Xiquita. Nicchihuilis pa huetzis cocoxqui pan se lapexli huan niquinchi-huilis pa panusi míac cocolisli yehuanten hual yulilo yoje quinami yihual quinnextilía. Quema, yoje niquinchiuilis sinda amo mocahualo pa quichihuasi quinami yihual quichía.

<sup>23</sup> Huan niquinmictis ixolomes, niqijtúa, yehuanten hual yulilo quinami yihual quinnextilía. Huan moxtin inminlanechiculisli nolacames quimatise nehuall niunca hual aqui nilatejtemúa pa lajtic inminyolo lacames huan pa lajtic inmintzontecon. Niquinmacas mochi sejse ca amhuanten len yes quinmahuilúa pa quipiasi.

<sup>24</sup> Huan moxtin in oc sequin ca amhuanten nolaneltocanijmes hual cate pan Tiatira amo yulilo quinami quinextilía ilamaxtilisli Jezabel. Yehuanten amo monextilije in lamaxtilisli hual quijtulo sequin pampa moitalo pin ihuejcalan niman lajtic iyolo Satanás. Axcan niquinmilía yehuanten inon: Amo nía niquinlalilía oc se etialisli, san inon:

<sup>25</sup> Ma yultiacan quineltocaticate in lamaxtilisli hual anquimati, ja in san. Huan xiyultiacan yoje pa quiman nihuas.

<sup>26</sup> Yehuanten hual quinsulahualo yehuanten hual lamaxtilo len amo cuali huan yultialo quichijticate len niqixtoca pa quiman lamis in lalticpan, cuaquín niquinmacas lahueliltilisli pa huelitisi pan yehuanten pin mochi lalimes.

<sup>27</sup> Huelitisi quinami lachianijmes ca lahueliltilisli chicahuac. Huelitisi ca teposlimes pijpitzahuac. Amaqui huil quinmixcomacas pa quintzaculis. Yesi quinami quiman se quilapanas se tapalcal ca se teposli pitzahuac, quinsulahuasi moxtin.

<sup>28</sup> Jan quinami nehuall nicanac ilahueliltilisli notajtzin, yojque yehuanten canasi lahueliltilisli. Huan niquinmacas laixpelalisli cualtichin hual unca iyaxca in cielo (ilhuicac), quinami quipía in lucerota (silalin hué) hual quisa cualcan.

<sup>29</sup> Yihual hual aqui huil lacaqui, ma quicaqui len quinmilía in Espíritu Santo innojen inminlanechiculisli Dios ilacames.”

### 3

#### *Quijcuilúila se amal in laneltocanijmes pin caltilan Sardis*

<sup>1</sup> Xiquijcuilúila ilanahuatini ilacames Dios hual cate pin Sardis, xiquili: “In lajtomes cate iyaxca aqui hual quinpía in chicome (siete) iljyecames Cuajcuali Dios, hual quinequi quijtúa mochi iEspíritu Dios, huan quinpía in chicome luceros (silalimes), quilla: Nicmati mochi in hual ticchía. Lacames quijtulo pampa tiyultica pa moyolo. Ma yoje, neli timictica pa moyolo.

<sup>2</sup> Xiejsa huan xiquinchicahualli innojen hual ayamo mocahuaje quipiaje Dios iyulilislí, pampa ca nadita yalo miqúilo. Ticpía pa ticchías yojque, pampa niquitac quinami tehual amo tiajsic ticchiac quinami nolacames quipialo pa quichihuasi iyampa noDios.

<sup>3</sup> Xicaya tiqijnamictía len ticpiac. Cataya Dios ilajtol melahuac. Xicaya tiqijnamictía len tijcaquic. Xicaya ticneltocatia inon huan xicpala moyolo pa laijnamiquis quinami Dios. Sinda amo ticnequi tilachixtia, cuaquín

nihualas ca tehual quinami huala se laxtequini, niqijtúa, amo ticmatis len tonali nihualas ca tehual.

<sup>4</sup> Ma yoje nepa Sardis ticpía se ome lacames hual amo quiman quinmop-ucmilic inmintoztomajli, nicnequi niqijtúa, yulilo chipahuac pa inminyolo. Huan yehuanten yulisi ca nehual lalaquentili ca tzotzomajli iztatica, pampa quinmahuilúa.

<sup>5</sup> Aquí hual quisulahua in amo cuali yes lalaquentili yojque ca tzotzomajli iztatica. Huan amo nicchías pa yajmo nesis itoca pan noamal hual quinpía inmintocajmes moxtin hual yulisi ca nehual. Niquilis neli inminlaixpan noTajtzin huan ilanahuatinijmes pin cielo pampa niquiximati in se quinami noyaxca.

<sup>6</sup> Moxtin hual huil lacaqui, ma quicaquican len quinmilía in Espíritu Santo in míac inminlanechiculisli in laneltocanjmes.”

*Quinmaca lajtol in laneltocanjmes pa in caltilan Filadelfia*

<sup>7</sup> Xiquijcuiluli ilanahuatini ilacames Dios hual cate pa Filadelfia, xiquili: “Innojen lajtomes cate ilajtomes in se hual unca niman cuali huan chipahuac huan pampa inon amaqui huil ajsi ihuán capa yihual. Jan yihual san in local hual unca melahuac. Yihual quipía ilapuhualoni David, quinequi quijtúa, san yihual quipía lahuelilitlisli pa quilapulis se in cielo pa calaquís. Quema, yihual huil lalapúa huan amaqui huil latzacua. Huan yihual huil latzacua huan amaqui huil lalapúa:

<sup>8</sup> Nicmati mochi hual ticchía. Xiquita. Nimitzlalilic moixpan se lalapujquil lapujtica hual amaqui huil quitzacuas. Cayas pa tiquinnexilis lacames no’ojli. Nicmati ticpía jan nadita chichahualisli. Ma yoje tiyultía ticchijtica quinami quijtúa nolajtol huan amo quiman tiquijtuc da amo tiunca noyaxca nehual.

<sup>9</sup> Xiquita. Nicchihuilis pa panus inon: Cate yehuanten hual ilacames Satanás mas que quijtulo pampa yehuanten judíos, huan amo quijtulo neli, islatatilo. Xiquita. Niqinmolancuacuetzaltisli inminlaixpan mocxihujmes, huan quimatisi pampa nehual, quema, nimitzlasojlac.

<sup>10</sup> Amo timocahua pa ticneltocas nolajtol hual quinmilía lacames pa mopepenialtisi pa panusi in amo cuali hual quinchihuililo lacames. Pampa in, quiman ajsis in tonali quiman moxtin hual yulisi pan in lalticpan yalo panulo míac lacocoltisli, nimitzlachilis pa camo anmitzpanus inon.

<sup>11</sup> Amo nihuejcahuas nihualas. Xicneltocatía mojmosta ca mochi moyolo len ticmati inahuac nolajtol, pa yojque amaqui mitzanilis in hual moyaxca pa huil tihuelitis capa Dios huelitía.

<sup>12</sup> Aquí hual lasulahua nicchías pa yes quinami se cuajmaxali pa ilasojli tiopan noDios. Quinequi quijtúa, yihual amo mocahuas pa cayas capa unca Dios huan amo quiman mijcuanis. Quinami se cuajmaxali amo mijcuanía, amo mijcuanis capa yihual. Huan niqijcuilus ipan, quijtus itoca noDios huan noje itoca icaltilan noDios hual unca in Jerusalén yancuic hual temujtuhualas, quisas pa in cielo capa unca noDios. Huan aquí hual lasulahua quipías lajcuiluli ipan yihual notoca yancuic.

<sup>13</sup> Moxtin hual huil lacaquilo ma quicaquican len quinmilía in Espíritu Santo in míac inminlanechiculisli Dios ilacames.”

*Quimaca lajtol ilanechiculisli in laneltocanjmes hual cate pin caltilan Laodicea*

<sup>14</sup> Xiquijcuiluli ilanahuatini ilacames Dios hual cate pa Laodicea, xiquili: “Yojque quijtúa yihual hual amo quiman mocahua pa quichías quinami

quijtúa ilajtulisli Dios. Yihual quijtúa len melahuac inahuac mochi hual cataya huan mochi hual unca huan mochi hual cayas. Moxtin huil quilalilo mochi inminlaneltocalisli ca len quichía huan quijtúa. Cataya yihual hual quipehualtic mochi hual unca pin cielo huan pan in lalticpan, mochi hual Dios quinequic pa cayas.

<sup>15</sup> Nicmati mochi hual ticchía. Amo tiunca iztic, amo tiunca totonqui, san tiunca totonquito. Quinequi quijtúa, tehual amo tiyuli quinami yehuanten hual quinequilo nechmolancuacuetzililo, huan amo tichtequipanuilla ca mochi anmoyolo, jan tichtequipanuilla nadita san. ¡Niquequisquiaya pa ticayasquiaya iztic o totonqui!

<sup>16</sup> Axan, pampa tiunca yojque, nimitzquixtis capa nehual, quinami se hual quichijcha pa icamac len al hual unca san totonquito.

<sup>17</sup> Tiquijtúa pampa ticpía mías huan ticpía mochi hual ticnequi, amo monequi pa ticpiás nindeno. Ma yoje, neli amo timonextilia quinami pa moyolo amo ticpía len. Huan monequi pa Dios mitzicnilis. Quicocúa iyolo pampa tehual tiunca yoje. Huan noje pa moyolo amo huil lachía, tiunca quinami pachacal huan yoje amo ticpía mías pa moyolo, amo ticpía mías laneltocalisli calica quinami timocuejts pa moyolo, tiunca quinami se nacatil pa moyolo.

<sup>18</sup> Nimitzilia, xichcaqui nehual. Xichtemachi pa timocuhuilis len yes hual mitzpalehuía pa moyolo. Yes quinami oro chipahuac hual unca lachipahuili pin tixuxli. Jan yojque neli timonechicuhuilis mías pa moyolo. Huan ximocuhuili tzotzomajli iztac huan chipahuac hual nicpía pa amhuanten. In tzotzomajli amo quipialo len amo cuali. Yojque amo tinesis quinami se nacatil hual pinahua noyampa. Huan xichmoanili nehual colirio pa timoxahuilis inmixtololojmes anmoyolo pa pajtsi, pa yoje oc sejpa huil tilachías pan ipampa anmoyolo.

<sup>19</sup> Nehual mojmosta niqunnextilijtica quinami monequi pa yulisi yehuanten hual niquinlasojla. Huan niquinmaca lacocoltilisli pa monextilisi inon. Pampa in, yojque nía nimijchihuilla tehual sinda amo ticpalas quinami tiyultica huan quinami amo tichtequipanuilis ca mochi moyolo.

<sup>20</sup> Xiquita. Unca quinami nimoqueztica ilaixpan in lalapujquil huan nilanoztica mojmosta. Sinda se nechcaquis nicnoztica huan nechlapulis in lalapujquil, nicalaquis huan nicayas ca yihual huan tilaqueztiasi quinami lasojlimes. Yihual cayas ca nehual huan nehual nicayas ca yihual.

<sup>21</sup> Aquí hual lasulahua, yihual nicmacahuiltis pa molalis ca nehual capa nihuelitía. Jan yojque nimolalic inahuac noTajtzin capa yihual huelitía quiman nehual niquinsulahuac nolacocolinijmes.

<sup>22</sup> Aquí hual huil lacaquilo, ma quicaqui len quinmilía in Espíritu Santo in mías inminlanechiculisli Dios ilacames.”

## 4

### *Juan quita quinami quimolancuacuetzililo Dios pin cielo*

<sup>1</sup> Quiman panuc inon, nilachíac huan ¡xiquitacan! Cataya se lalapujquil lapujtataya pin cielo. Huan nijcaquic in lajtol hual nipehuac nijcaquic xahuantataya quinami se lancaquetzaloni. Huan nechnotzac, nechilic:

—Xilejcu ca nican huan nimitznextilis len yahui panúa quiman lamisi panusi innojen hual panujticate axan innojen tonalijmes.

<sup>2</sup> Jan ajnaxcan in Espíritu Santo nechanac huan pan ipampa yihual ni-moitac pin cielo (ilhuicac). Nepa niquitac quinami se iicpali se hué capa molalía pa huelitis, huan cataya se yehuatataya ipan.

<sup>3</sup> Huan yihual hual nepa yehuatataya lapelaniaya quinami lapelanía se maquisli lachihuali ca diamante o rubí. Huan quiyahualujtataya pa icpali se cosamalol xuxuctic quinami se esmeralda.

<sup>4</sup> Huan quiyahualujtataloaya in icpali hual laixpelaya oc sequin veinticuatro (sempuhuali huan nahui) icpalimes huan yehuatataloaya veinticuatro abuelojmes inminpan. Moxtin cataloaya lalaquentili ca tzotzomajli iztaticate huan quinpioaloaya yahuali lachihuali ca oro pa inmintzontecon.

<sup>5</sup> Huan quisac pin icpali lapelanilisli huan comunilisli huan in comunilisli xahuaniaya ca xahuanilisli hué. Huan ilaixpan in icpali hual laixpelaya cataloaya chicome (siete) tixuxlimes milintataloaya pa in hachones. In hachones milintataloaya monextilo Dios ichicahualisli hué huan cate In chicome Dios iljyecames (iEspíritus) Cuajcuali.

<sup>6</sup> Huan lapalahuali ilaixpan in icpali hual laixpelaya cataya quinami se al hué lanesca quinami se vidrio.

Huan lajco pa mochi huan yahualujticate in icpali moquezatataloaya nahui yulijquimes huan ca mochi inminlaixpan huan inmintepotzcon quinpioaloaya miac inmixtololojmes.

<sup>7</sup> Se ca innojen yulijquimes nesiaya quinami se león, oc se nesiaya quinami se buey yancuic. Oc se quipiaya iixco quinami se lacal, huan oc se nesiaya quinami se cuaujli (águila) hual quinpalajtataya inastacapajmes pa palanisquiaya.

<sup>8</sup> Mochi sejse innojen yulijquimes quinpioaloaya chicuase inastacapajmes. Ca lajco pa mochi sejse inastacapajmes huan pa itenco huan pa itzindan cataloaya miac inmixtololojmes. Yihualitonali pa semilhuil huan pa layúa amo mocahualoaya pa quijtusi:

Niman cuali huan chipahuac in Tata, huan pampa in, amo huil ajsi ca yihual nindeno hual amo unca cuali huan chipahuac,  
niman cuali huan chipahuac huan amo huil ajsi ca yihual nindeno hual amo unca cuali huan chipahuac,  
niman cuali huan chipahuac huan amo huil ajsi ca yihual nindeno hual amo unca cuali huan chipahuac.

Yojque unca toTata Dios hual quipía mochi chicahualisli, yihual yec huan yihual unca huan yihual yes.

<sup>9-10</sup> Huan innojen yulijquimes, quiman yes quililo innojen lajtomes huejué huan quijtuloaya ca momajtilisli huan quisehuiloaya in se hual mocahua yultica, cuaquín molasaloaya in veinticuatro abuelojmes pa quimolancuacuetzilisi in se hual mocahua yultica. Huan moquixtililoaya inminyahuilimes lachihuali ca oro hual quinextiloaya pampa unca inminyaxca pa huelitisi, quinlasalo ilaixpan in icpali hual laixpela huan quililo:

<sup>11</sup> ToTata, tehual toDios, unca moyaxca pa mitzilisi innojen lajtomes huejué huan unca moyaxca pa moxtin quimatisi momajtisi molaixpan tehual.

Huan unca moyaxca pa ticpías mochi lahueliiltisli, pampa tehual tiquinchíac mochi.

Mochi innojen cayaje, quema, cataloaya lachihuali pampa ticnequiaya yojque.

<sup>1</sup> Huan niquitac quinami yihual hual yehuatataya pan in icpali hual laixpelaya quiapiaya se amal lacololuli pa ima cuali. Huan in amal cataya lajcuiluli ca pani huan ca itzندان huan cataya latzacuali ca chicome latzacualonijmes lachihuali ca cera.

<sup>2</sup> Huan niquitac se ilanahuatini in cielo (ilhuicac) hual quiapiaya míac chicahualisli huan ca lajtol chicahuac tzajtziaya in lajlanilisli, quijtuc:

—¿Aqui quipía lahuelilitlisli pa quincepehuas in latzacualonijmes pin amal lacololuli pa quipalahuas in amal?

<sup>3</sup> Huan amo moitilic se pa mochi in cielo (ilhuicac) huan pan laticpan huan amo cataya se capa in mijquimes hual quiapiaya lahuelilitlisli pa quipalahuasquiaya in amal pa quitasquiaya huan momaxtisquiaya.

<sup>4</sup> Huan nichocac míac pampa amo moitilic jan se san hual quiapiaya lahuelilitlisli pa quipalahuasquiaya in amal pa quitasquiaya huan pa momaxtisquiaya.

<sup>5</sup> Cuaquinon se ca in abuelojmes nechilic:

—Yajmo xichoca. Xiquita, in local hual tictocayaltilo inminLeón inminlacames imiahuimes Judá, yihual lasulahuac. Yihual imiahuil David in hué, huan yihual quinsulahuac ilacocolinijmes hual cate miqulisli huan laijlaculisli. Axan huil ca mochi lahuelilitlisli quincepehuas in latzacualonijmes pa quipalahuas in amal.

<sup>6</sup> Cuaquinon nilachíac huan niquitac se Borreguito moquezataya inminlaixpan innojen veinticuatro abuelojmes huan inminlaixpan in icpali hual laixpelaya huan inminlaixpan innojen yulijquimes. Huan in Borreguito quinpiaya pa icuerpo (inacayo) domutzojmés hual nesiloaya capa quitzopinije icocolinijmes pa quimictisi. Huan in Borreguito quinpiaya chicome icuacuas huan chicome iixtololojmes. Innojen iixtololojmes quinequilo quijtulo pampa iEspíritu Santo Dios unca quinami chicome ijyecames (espíritus) cuajcuali hual cate latilanili pa mochi in laticpan huan quimatilo mochi inahuac Dios.

<sup>7</sup> Huan uyac canac in amal hual cataya pa ima cuali yihual hual yehuatataya pani in icpali hual laixpelaya.

<sup>8</sup> Huan quiman canac in amal, molasaje ilaixpan in Borreguito in nahuenten yulijquimes huan in sempuhualihuanahui (veinticuatro) abuelojmes. Mochi sejse ca yehuanten quinpialoaya se arpa huan se tapalquita lachihuali ca oro tentataya ca ajuialisli. In ajuialisli quinequi quijtúa inminlajlanilisli Dios ilacames.

<sup>9</sup> Huan quicantaruililoaya (quicuiquililoaya) se cantadita (cuical) yancuic, quijtuaya:

Unca tehual moyaxca pa ticpías lahuelilitlisli pa ticanas in amal pa tiquincapehuas ilatzacualonijmes pa quipalahuas, pampa ticataya lamictili. Huan pan ipampa quinami tictoyahuac moesli tiquinlaxlahuilic in lacames pa huil yesi Dios ilacames.

Yehuanten chantilo pan mochi lalimes huan cate ca mochi cuilaxli huan lajtulo len yes lajtol huan cate len yesi lacames hual pan yehuanten huelitilo in huejueyenten pin laticpan.

<sup>10</sup> Huan tiqinnechicuc pa yesi se lalacera hual pan yehuanten Dios huelitía quinami inminhué.

Huan yehuanten yesi itiopistas toDios, huan huelitisi pan laticpan.

<sup>11</sup> Cuaquinon nilachíac huan nijcaquic inminlajtlo niman míac millones ilanahuatinijmes in cielo (ilhuicac) hual quinyahualujtataloaya in icpali hual laixpelaya huan innojen yulijquimes huan in abuelojmes.

<sup>12</sup> Huan ca lajtol chicahuac quijtuje:

Unca iyaxca in Borreguito hual cataya lamictili pa yes in niman hué pa yojque quipías in lahuellitilisi.

Amo quiman huil cayas yoje hué mochi hual ipati huan mochi hual laxlahuilo niman míac pa quipiasi.

Unca iyaxca pa yes in niman hué pa yoje quijtusi pampa yihual quipía mochi lajmatilisi huan chichahualisi.

Huan unca yihual iyaxca pa yes in niman hué pa yoje moxtin quimatasi momajtisi ilaixpan yihual.

Huan unca iyaxca pa lacames quilisi lajtomes huejué, huan pa moxtin lajtusi niman cuali inahuac yihual.

<sup>13</sup> Cuaquinon niquinaquic moxtin hual Dios quinchíac pin cielo huan pan lalticpan huan yehuanten itzindan in lali hual miquije huan yehuanten hual yulilo pin al huejcalan, quema, moxtin hual cate capa yes, quijtuloaya:

In latuchihualisi huan in lasojlalisli ca momajtilisi huan in laixpelalisli cuajcualtichin huan mochi lahuellitilisi ma yén (yecan) iyaxca yihual hual yehuatica pani in icpali hual laixpela,

huan iyaxca in Borreguito.

Quema, ma camo quiman mocahua pa yes inminyaxca.

<sup>14</sup> Huan in nahuenten yulijquimes amo mocahualoaya quijtutataloaya:

—¡Yoje ma ye!

Huan in veinticuatro abuelojmes molasaje pan lali huan quinmolan-cuacuetzililoaya mopachujtataloaya.

## 6

### *In chicome latzacualonijmes lachihuali ca cera*

<sup>1</sup> Cuaquinon niqitaya quiman quicapehuac in Borreguito se in chicome latzacualonijmes lachihuali ca cera, huan nijcaquic se yulijquil ca in nahui yulijquimes lajtuc ca ilajtol quinami comuniaya, quijtuc:

—¡Xiajtía!

<sup>2</sup> Huan nilachíac huan ¡xiqitacan! Cataya se caballo iztac huan yihual hual yehuatataya ipan quipiaya se arco. Huan quimacaje se yahuali lachihuali ca teposli quinami quinpialo in hueyenten, in yahuali unca pa se lasulahuani. Huan quisac quinami se lasulahuani huan yahuiaya lasulahuac míac oc seija.

<sup>3</sup> Quiman quicapehuac in Borreguito oc se latzacualoni, nijcaquic lajtuc oc se in nahui yulijquimes quijtuc:

—¡Xiajtía!

<sup>4</sup> Huan quisac oc se caballo chichiltic cahuanic. Huan yihual hual yehuatataya ipan cataya lamacahuiltili pa quichihuasquiaya pa yajmo yes mosehuilisi pan in lalticpan, pa yojque lacames momictilosquiaya. Huan quimacaje se teposli hué calica guaches moanalo, huan in quinequi quijtúa pampa cayas moanalisi ca lacames.

<sup>5</sup> Quiman quicapehuac oc se latzacualoni, axan cataya ye latzacualonijmes lacapehuali, nijcaquic lajtuc oc se in nahui yulijquimes, quijtuc:

—¡Xiajtía!

Huan nilachíac huan ¡xiqitacan! Quisac se caballo liltic, huan yihual hual yehuatataya ipan quipiaya se romana pa ima.

<sup>6</sup> Huan nijcaquic len mocaquic quinami se lajtoc, mocaquic lajco pin nahui yulijquimes, quijtuaya:

—Ma laxlahui se mochi itomin hual cana tequipanujtica se tonali pa mocuhuilis se lamachihualoni trigo hual quilamachihuililo yehuanten hual

quipialo lahuelilitlisli. Huan ma laxlahui jan yoje pa ye lamachihualoni-jmes cebada hual quilamachihuililo. Huan amo xiquinmijlacu ichahuac in cuahuilera hual laquilo olivos huan iayo uva coc hual laquilo in uvatilan.

<sup>7</sup> Huan quiman quicapehuac in oc se latzacualoni lachihuali ca cera, axan cataloaya nahui latzacualonijmes lacapehuali, nijcaquic lajtuc in lajtol hual cataya capa in nahui yulijquimes, ca in se laquisac lajtuc in yulijquimes, quijtuc:

—¡Xiajtía!

<sup>8</sup> Huan nilachíac huan ¡xiquitacan! Quistíac se caballo hual nesci quinami se iixco hual mictica, huan yihual hual yehuatataya ipan motocaya Miquilisli. Huan quitocaya Miquilisli in huejcalan capa cate in mijquimes. Huan quimacaje lahuelilitlisli pa quinmanas moxtin hual miquilo. Yehuanten quinmictisi se lalca ca mochi nahui lacames pin lalticpan. Quinmictisi pan ipampa moanalisi huan pan ipampa lamictilisli huan pan ipampa mayandi huan pan ipampa cocolisli huan pan inminpampa in yulijquimes hual moitalo pin cuajlan hual cate pin lalticpan.

<sup>9</sup> Quicapehuac oc se latzacualoni, axan cataloaya macuili latzacualoni-jmes lacapehuali. Huan niquinmitac itzindan capa quilalilo in huendis pin cielo huan nepa cataloaya amo ca inmincuerpos (inminacayo) yehuanten hual cataloaya lamictili pampa quinlamachilitije lacames ilajtol Dios huan quinlaquetzilije neli in hual in Tata quinmilic.

<sup>10</sup> Tzajtziye ca lajtol chicahuac, quijtuje:

—Tata, tehual toTeco, timoxilúa pa camo ticayas capa mochi hual amo cuali huan elehuis, amaqui huil cayas chipahuac quinami tehual. Tehual ticchá melahuac quinami tiquijtúa. Axan, ¿pa quichi tonalijmes tihuejcahuas pa timotexpahuilis huan titechlacuepilis ca yehuanten hual chantilo pan lalticpan?

<sup>11</sup> Cuaquinon mochi sejse ca yehuanten quimacaje se nahuas iztac. Huan quinmilije pa mosehuisi oc se nadita pa quichiasi pa quiman cayalosquiaya lamictili in oc sequin ca moxtin inmicnian tequipanujquimes. Yahuiloaya cayalo lamictili quinami yehuanten cataloaya lamictili.

<sup>12</sup> Quicapehuac in Borreguito oc se latzacualoni, ca in cataloaya chicuase hual cataloaya lacapehuali. Huan nilachíac huan cataya se laulinilisli niman chicahuac. Huan mochíac liltic in tonali quinami tzotzomajli huahuastic calica mocuejtilo quiman miqui se. Huan mochi in mesli nesiaya quinami esli.

<sup>13</sup> Huetziye in luceros (silalimes) pin cielo pan in lalticpan. Huetziye quinami huetzi ilaquilyo hual yucsi pa tonalco, ilaquilyo se amacuál tipichin quiman huala se ijyecalazo hual quitzejtzelúa.

<sup>14</sup> Tzayanic in cielo huan mocololuc quinami se amal. Mochi loma (tepel) huan mochi lali hual cataya lajco pin al huejcalan mijcuanije capa cataloaya.

<sup>15</sup> Cuaquinon in huejueyenten pin lalticpan hual huelitiloaya huan in huejué inminlaicananijmes guaches huan yehuanten hual quipialo míac tomin huan in lacames chijchicahuac huan moxtin hual yeje tequipanujquimes hual amo quilaxlahuilo huan hual yeje tequipanujquimes hual quilaxlahuilo, moxtin molatije pin cuevas (ostumes) huan pin teles (temes) pin lomas (tepemes).

<sup>16</sup> Quinnotzaloya in lomas huan in teles, quinmililoaya:

—Xihuetzican topan huan xitechlatilican yihual hual yehuatica pan in icpali hual laixpela, yihual techiztica. Xitechlatilican pa camo techitas in Borreguito hual cualantica, huan yahui techtilanía capa ticocu.



17 Unca pampa axan ajsic in tonali hué quiman cualanilo niman míac, huan amaqui huil mopepenialtía pa moquixtis pa camo quitas icualanilisli.

## 7

*Quinxilulo míac inminmiahuimes in doce ixolomes Israel hual mochihuaje doce calimes israelitos*

<sup>1</sup> Panuc inon, huan niquinmitac nahui ilanahuatinijmes in cielo moquezataloaya capa huil quipialoaya lahuelilitisli pan mochi in lalticpan. Quintzacuiljtataloaya in ijyecames pa camo ijyecas se ijyecal pan lalticpan huan pan al huejcalan huan pa camo ijyecas pan cuahuimes.

<sup>2</sup> Cuaquion niquitac oc se ilanahuatini in cielo lejuc capa quisa in tonali. Quiplaya in lanextilisli calica Dios hual yultica quinlalilisli pan yehuanten hual iyaxca. Huan lanotzac ca lajtol chicahuac in lanahuatini. Quinnotzac in nahui ilanahuatinijmes in cielo hual quipiaje lahuelilitisli pa quixitinisli in lalticpan huan in al huejcalan, quinmíllic:

<sup>3</sup> —Ayamo xiquinxitinicán in lalticpan huan in al huejcalan huan in cuahuimes pampa monequi pa tiquinlalisisli ilanextilisli Dios pa pani inmixco itequipanujquimes Dios.

<sup>4</sup> Huan nijcaquic quichi quinlalilije in lanextilisli. Cataloaya ciento cuarenta y cuatro mil, cataloaya inminmiahuimes in doce ixolomes Israel hual lacatije ca innojen doce calimes hual quinpehualtije innojen doce ixolomes Israel.

<sup>5</sup> Cataloaya doce mil imiahuimes Judá huan doce mil imiahuimes Rubén huan doce mil imiahuimes Gad,

<sup>6</sup> huan doce mil imiahuimes Aser huan doce mil imiahuimes Neftalí huan doce mil imiahuimes Manases,

<sup>7</sup> huan doce mil imiahuimes Simeón huan doce mil imiahuimes Leví huan doce mil imiahuimes Isacar,

<sup>8</sup> huan doce mil imiahuimes Zabulón huan doce mil imiahuimes José huan doce mil imiahuimes Benjamín.

*Se lanechiculisli niman hué hual cate lacames lalaquentili ca tzotzomajli iztac*

<sup>9</sup> Panuc inon, huan nilachíac huan ¡xiquitacan! Cataloaya lacames huan sihuames, se lanechiculisli niman hué. Amaqui huil quinpuhuaya pampa cataloaya niman míac. Lacatije pa mochi lalimes pin lalticpan. Quema, yeje inmicnían yehuanten hual lacatije pa mochi cali, yeje yehuanten hual yuliloaya pin mochi lalimes pin lalticpan huan yeje yehuanten hual lajtuloaya mochi lajtomes hual lajtulo lacames pin lalticpan. Huan moquezataloaya ilaixpan in icpali hual laixpelaya huan ilaixpan in Borreguito. Cataloaya lalaquentili ca nahuajmes ij'iztac, huan quinpialoaya pa inminmajmajuan iitzmolinquijmes isacayo palma.

<sup>10</sup> Huan tzajtziloaya ca lajtol chicahuac, quijtutataya:

¡Ticate laquixtili pin ipolehuilisli tolaijlaculisli!

Inon tejchihuiliqje in Borreguito huan toDios hual yehuatica pani iicpali hual laixpela.

<sup>11</sup> Huan moxtin in lanahuatinijmes pin cielo moquezaje quiyahualujtataloaya in icpali hual laixpelaya huan quinyahualujtataloaya in veinticuatro abuelojmes huan in nahui yulijquimes. Huan molasaje pan lali ca inmixco pan lali huan quimolancuacuetzililoaya Dios.

<sup>12</sup> Quijtutataloaya:

¡Yoje ma ye! Ma camo mocahua pa cayas pa toDios latuchihualisli huan laixpelalisli cualtichin huan lajmatilisli huan lasehuilisli,

huan mojmosta ma caya lasojlalisli ca momajtilisli huan lahueliltilisli huan chichahualisli. Yoje ma ye.

<sup>13</sup> Cuaquinon se abuelo ca in abuelojmes nechnotzac huan nechilic:

—¿Tiquinmiximati yehuanten lalaquentili ca inminahuajmes ij'iztac, huan ticmatl capa quistihualaje?

<sup>14</sup> Niquilic:

—Tata, tehual ticmatl, xichili.

Huan nechilic:

—Yehuanten in lacames hual quipía se nadita panuloaya niman míac lacocoltilisli. Huan axan quisaje umpa huan quinpacaje inminahuajmes huan mochihuaje ij'iztac pan ipampa iesli in Borreguito.

<sup>15</sup> Pampa in, axcan cate ilaixpan Dios iicpali hual laixpela, huan quite-quipanuililo yihualitonali pa semilhuil huan pa layúa calijtic itiofan. Quin-napatis yihual hual yehuatica pani in icpali hual laixpela, pampa yihual amo quiman mocahuas pa cayas ca yehuanten.

<sup>16</sup> Yajmo quiman mayanasi, yajmo quiman amiquisi, yajmo quinchichinus in tonali, huan yajmo quinmacas tequil quiman quichía tona.

<sup>17</sup> Yoje cayas pampa ca yehuanten cayas in Borreguito hual yes inminlachiani. Huan yihual quinlaicanas capa cate iixtololojmes al. Huan Dios quinchipahuilis mochi ichoquis inmixtololojmes.

## 8

*Quicapehua oc se latzacualoni lachihuali ca cera, axan cate chicome hual cate lacapehuali, huan nesi in lapopochuiloni lachihuali ca oro*

<sup>1</sup> Quicapehuac in Borreguito in latzacualoni, ca in lamije in latzacualonijmes. Cuaquinon mocahuac mochi pin cielo, amo xahuanic pa se lajco hora.

<sup>2</sup> Cuaquinon niquinmitac in chicome ilanahuatinijmes in cielo hual moquetzalo ilaixpan Dios. Huan quinmacaje chicome lancaquetzalonijmes.

<sup>3</sup> Umpa hualac oc se ilanahuatini in cielo, moquetzac pa capa quichichinulo huendi. Huan in lanahuatini quipiaya se lapopochuiloni. Quimacaje míac ajualisli pa yoje ipogli in lapopochuilisli lejcusquiaya ca inminlajlanilisli Dios ilacames. Huan inminlajlanilisli huan ipogli in lapopochuilisli monechicuje pani inon lachihuali ca oro capa quilalilo huendi. Cataya ilaixpan in icpali hual laixpelaya.

<sup>4</sup> Huan lejcuc ipogli in lapopochuili ca inminlajlanilisli Dios ilacames, lejcuc ilaixpan Dios capa cataya pa ima in ilanahuatini in cielo.

<sup>5</sup> Cuaquinon canac in lanahuatini in lapopochuiloni. Quitemiltic ca tichuandi hual cataya capa quilalilo huendi huan quilasac innojen tichuandi pan laticpan. Huan mocaquic comunilisli, xahuanyilisli chichahuac, huan cataloaya míac lapelanilisli huan se laulinilisli.

*Tzotzonaloni in lancaquetzalonijmes*

<sup>6</sup> Axcan mochijchihuaje in chicome ilanahuatinijmes in cielo ca inminlancaquetzalonijmes pa quinpitzasi.

<sup>7</sup> Quipitzac in se lanahuatini ilancaquetzaloni. Cuaquinon cataloaya tsihuil huan tixuxli laniluli ca esli hual huetzije pan laticpan. Yoje, se ilajco mochi ye ilajlajco in laticpan chichinahuic. Huan ca mochi ye cuahuimes, cataya se cuahuil ca innojen hual chichinahuic, huan mochi in sacal xuxuctic chichinahuic.

<sup>8</sup> Oc se lanahuatini quipitzac ilancaquetzaloni huan cataya lalasal pin al huejcalan len quinamí se loma hué (tepel) milintataya.

<sup>9</sup> Cuaquín ca mochi ye ilajlajco in al huejcalan, cataya se ilajco hual mochíac esli, huan ca mochi ye michimes pin al huejcalan, cataya se michin hual miquic, huan ca mochi ye barcos, cataya se hual xitinic.

<sup>10</sup> Oc se ilanahuatini in cielo quipitzac ilancaquetzaloni. Cuaquín quisti-hualaya pin cielo, huetzic se lucero (silalin) hué milintataya quinami milini se ocolcuahuil. Huan ca mochi yeyenten atencojmes huejué huan ca mochi yeyenten iixtololojmes al, huetzic in lucero pan se.

<sup>11</sup> Itoca in lucero Chichialisli. Ca mochi ye ilajlajco in alimes, cataya se ilajco in alimes hual mochíac chichic. Huan miquije miac quiman cunije in al pampa quichichialtic in al in lucero.

<sup>12</sup> Quipitzac oc se lanahuatini ilancaquetzaloni huan ca mochi ye ilajlajco ilahuilisi in tonali, cataya se ilajco hual yajmo lahuic. Huan ca mochi ye ilajlajco ilahuilisi in mesli, cataya se ilajco hual yajmo lahuic. Huan ca ye ilajlajco inminlahuilisi in luceros, cataya se ilajco hual yajmo lahuije. Yoje pa semilhuil huan yoje pa layúa, ca mochi ye ilajlajco ilahuilisi, se ilajco yajmo lahuiaya.

<sup>13</sup> Cuaquinon nilachíac huan nijcaquic se lanapatini (cuaujli) chocatataya ca chocalisli chicahuac quiman palantataya pa pani pin cielo, quijtuaya:

—¡Ay, ay, ay! ¡Yalo mococulo miac yehuanten hual chantilo pan in lalticpan!  
¡Yalo panulo niman miac lacocoltilisli pampa in oc sequin ye ilanahuatini-  
jmes in cielo mochijchijticate pa quinpitzasi inminlancaquetzalonijses!

## 9

<sup>1</sup> Cuaquinon oc se in chicome ilanahuatinijmes in cielo quipitzac ilancaquetzaloni, huan niqitac se lucero hual quistihualac pin cielo huan huetzic pan in lalticpan. Huan nepa pin cielo quimacaje in lapuhualoni pa quilapus in coyunquil hual ajsi pa in huejcalan hual amo quiman cajsi itzindan.

<sup>2</sup> Quilapus in coyunquil hual huejcalan hual amo quiman huil cajsi itzindan, huan pin coyunquil quisac len hual nesiaya quinami pogli, cataya quinami ipogli se tixuxtilan hué. In quinami pogli quilaticumactic in tonali. Yajmo huil moitac in tonali huan ilahuilisi pan ipampa in quinami pogli hual quisac pin coyunquil.

<sup>3</sup> Cuaquinon quisaloaya pin pogli chapulimes huan yehuanten temuje pani in lalticpan. Quipialoaya lahueliltisli pa latzopinisi ca pajli hual quinami quipialo culomes pan lalticpan.

<sup>4</sup> Quinmilije pa como quicocoltisi in sacal pan lalticpan o len pacholi xuxuctic o len cuahuil. Jan cataloaya lamacahuiltili pa quincocoltisi lacames hual amo quipialoaya Dios ilanextilisli pani inmixco.

<sup>5</sup> Momacahuiltiloaya in chapulimes pa quincocoltisi lacames pa macuili mesli. Ma yoje, amo cataloaya lamacahuiltili pa quinmictisi. Huan inminlacocoltilisli cataya quinami ilacocoltilisli se culol quiman quitzopinía se.

<sup>6</sup> Pa in tonalijmes lacames quitemusí quinami huil miqusi huan amo huil quitasi. Quinequisi miac pa miqusi huan in miqulisli quinami cholus pa como huil miqusi.

<sup>7</sup> Nesiloaya in chapulimes quinami caballos hual cate lachijchihuali pa yasi moanasi. Quimpialoaya pan inmintzontecon len nesiloaya quinami yahualimes lachihuali ca oro. Yeje inmixco quinami inmixco lacames.

<sup>8</sup> Inmintzondi cataya quinami itzondi sihuames huan inminlames cataloaya quinami leones inminlames.

<sup>9</sup> Quipialoaya inminxiniyul quinami teposli hual in guaches quilalilo pan inminlaixpan. Huan caquitzitiahuiloaya inminastacapajmes. Cataya

quinami icapanalisli huan ixahuanlisli m'iac layahualulonijmes hual quin-tilanaló caballos quiman molalulo pa moanasi.

<sup>10</sup> Quimpialoaya inminlamili (inmincolas, inmincuilapili) quinami culomes, huan inmintzopinilonijmes inminlamili cataloaya capa quipialoaya inminlahuelilitlisli pa quincocoltisi lacames pa macuili mesli.

<sup>11</sup> Huan quipialo in chapulimes se hué hual unca in lanahuatini hual quip'ia lahuelilitlisli pin huejcalan hual amo quiman huil cajsí se itzindan. In lanahuatini itoca ca in lajtól hebreo unca Abadón huan ca in lajtól griego itoca Apolýón.

<sup>12</sup> Axan panuc in se cocolisli. Oc sequin ome cocolisli amo huejcahuasi pa ajsitihualasi.

<sup>13</sup> Cuaquinon oc se ilanahuatini in cielo quipitzac ilancaquetzaloni, ca in cataloaya chicuase lanahuatinijmes hual quinpitzaje inminlancaquetzaloniijmes. Huan quiman in lanahuatini quipitzac, cuaquín nijcaquic se lajtól lajtutataya capa in nahui icuacuas inon lachihuali ca oro capa quilalilo in huendis.

<sup>14</sup> In lajtól quiliaya in lanahuatini hual lamíc quipitzac ilancaquetzaloni, quilic:

—Xiquinmacahua in nahui lanahuatinijmes hual cate lailpili pa in atenco hué itoca Eufrates.

<sup>15</sup> Yojque cataloaya lamacahuali in nahui lanahuatinijmes. Cataloaya ilpitataloaya pa mocahualosquiaya nepa pa quiman ajsisquiaya in ihora itonali imesli in xihuil quiman yelosquiaya lamacahuali pa quinmictisi se lalac ca mochi ye lacames pin lalticpan.

<sup>16</sup> Nijcaquic quichi cataloaya in guaches ca inmincaballos hual yahuilloaya quinmictilo. Cataloaya dos cientos millones guaches.

<sup>17</sup> Huan cataya quinami inon niquinmitac in caballos, quinami toTata nechlachialtic. In guaches hual quinmaxactataloaya in caballos quinpialoaya teposli itzindan inminhuaajcomes pa quintzacuilisli pa camo yesi lacocoltili. Huan in teposli nesic quinami tixuxli chichiltic huan azul, quinami se tixcali zafiro huan custic quinami azufre. Huan inmintzontecon in caballos nesiloaya quinami inmintzontecon leones. Huan quisaje pa inmincamac tixuxli huan pogli huan azufre.

<sup>18</sup> Se lalac ca mochi ye lacames miquije pan ipampa innojen ye hual quisaloaya pa inmincamac in caballos: in tixuxli huan in pogli huan in azufre hual tzojyac.

<sup>19</sup> Cataya pampa in caballos inminlahuelilitlisli pa lamictis cataya ca inmincamac huan ca inminlamili. Cataloaya quinami cuhuames inminlamili (inmincolas). Huan inminlamili quinpialoaya inmintzontecon calica quincocoltiloaya lacames quinami cuhuames lacocoltilo.

<sup>20</sup> Ma yoje, in lacames hual mocahuaje yultataloaya pampa amo miquije pan ipampa mochi in lacocoltilisli, yehuanten amo quipalaje inminyolo pa yajmo quichihualosquiaya in amo cuali. Huan amo quipalaje inminyolo pa mocahualosquiaya pa quinmolancuacuetzililosquiaya ijyecames ej'elehuís huan monos lachihuali ca oro huan ca plata huan ca bronce huan ca tixcali huan ca cuahuil. Yehuanten in monos hual amo huil lachialo huan amo huil lacaquilo huan amo huil nejnemilo.

<sup>21</sup> Huan amo quipalaje inminyolo pa yajmo quinmictilosquiaya lacames huan amo quipalaje inminyolo pa yajmo quichihualosquiaya laxuxalisli huan pa yajmo quichihualosquiaya amo cuali lacames ca sihuames hual amo inminsihuahuan, huan pa yajmo laixtequilosquiaya.

## 10

### *In ilanahuatini in cielo hual quipiaya in amatzindi*

<sup>1</sup> Cuaquinon niquitac oc se ilanahuatini in cielo niman chicahuac quishualaya pin cielo huan temuc. Quiyahualujtataya se mextemil, cataya se cosamalol ca pani itzontecón, huan iixco nesci quinami in tonali, huan icxihuañmes nesiloaya quinami cuajmaxali milintataloaya.

<sup>2</sup> Quipiaya se amatzindi lapalahuali pa ima. Quilalic icxían cuali pani in al huejcalan huan icxían amo cuali pani in lali.

<sup>3</sup> Huan lanotzac ca lajtól chicahuac, cataya quinami tzajtzi se león. Quiman tzajtzi, comunije chicome comunilisi.

<sup>4</sup> Huan quiman comunije in chicome comunilisi, niahuiaya niqijcuilu len quijtuje. Huan jan axcan nijcaquic se lajtól pin cielo quijtu:

—Amo xicmacahuiltili pa lacames quimatasi len quijtuje in chicome comunilisi, amo xiquijcuilu.

<sup>5</sup> Huan cajcoquic pa in cielo ima in ilanahuatini in cielo hual niquitac moquezataya pani in al huejcalan huan pani in lali.

<sup>6</sup> Huan quijtu ca lajtól hual amo mopala, quijtu ca itoca yihual hual amo mocahua pa yulis, yihual hual quinchíac in cielo huan mochi hual unca pin cielo. Huan quinchíac in lalticpan huan mochi hual unca pin lalticpan. Huan quinchíac in al huejcalan huan mochi hual unca pin al huejcalan. Quema, quijtu ca lajtól hual amo mopala, quil:

—Yihual Dios yajmo yahuiaya huejchua.

<sup>7</sup> Axcan pan innojen tonalijmes quiman quipitzas ilancaquetzaloni in lanahuatini hual quilamis in lapitzalisli, mochi inon inahuac Dios huan ilajtól lamis mochías. Lamis mochías mochi inon hual ayamo quimatiloaya lacames, mochi inon hual Dios quinmachiltic ilajtunijmes hual quitequipanuilinijme pa yina.

<sup>8</sup> Cuaquinon, in lajtól hual nijcaquic pin cielo nechnotzac oc sejpa, nechilic:

—Xíca xicana in amatzindi hual quipalajtica pa ima in ilanahuatini in cielo hual moqueztica ipan in al huejcalan huan ipan in lali.

<sup>9</sup> Cuaquinon níac ca in ilanahuatini in cielo huan niquilic pa nechmacasquiaya in amatzindi. Huan nechilic:

—Xicana huan xijcua. Cayas chichic pa moyolo, huan cayas tzopelic quinami néculi laijtic mocamac.

<sup>10</sup> Cuaquinon nicanac in amatzindi hual quipiaya pa ima in lanahuatini huan nijcuac. Cataya tzopelic quinami néculi pa nocamac, huan quiman nilamic nijcuac cataya chichic pa noyolo.

<sup>11</sup> Huan nechilic:

—Ticpías pa ticlamachiltis oc sejpa len Dios quijtuá. Ticlamachiltis inminyampa míac lacames hual chantilo cajcapa pin lalticpan. Ticlamachiltis pa inminlalimes lacames. Huan ticlamachiltis capa cate yehuanten hual lajtulo míac oc sequin inminlajtomes. Huan ticlamachiltis inminyampa huejueyenten.

## 11

### *In omenten hual quijtulo mochi melahuac inahuac Dios*

<sup>1</sup> Cuaquinon nechmacaje se lamachihualoni calica niahuiaya nilamachía. Cataya quinami icuahuil se ilachiani borregos. Huan nechilije:

—Ximoquetza huan xiclamachía itiopan Dios huan inon capa quilalilo huendis huan xiquinpuhua yehuanten hual quimolancuacuetzililo.

<sup>2</sup> Amo xiclamachía in lajcotiyan pa quiahuac in tiopan. Xijcahua in, pampa temacac Dios yehuanten hual chantilo pin lalimes, quitelicsasi pani icaltlan Dios hual unca Jerusalén. Quitelicsasi pa cuarenta y dos (ompuhual-ihuanome) mesli (meses).

<sup>3</sup> Huan yehuanten in omenten hual quijtulo neli nolajtol niquinmacas lahuelilitlisli pa lajtusi pa nehual pa mil doscientos sesenta tonalijmes. Cayasi lacuejtli ca tzotzomajli huahuastic calica molaquentilo lacames quiman miqi se.

<sup>4</sup> Yehuanten omenten quintocaytilo in ome cuahuimes hual ilaquilyo cate olivos huan in ome tapalcames cuajcujtic pa lahuilislí hual moquetzicate ilaixpan in Tata hual huelitía pin lalticpan.

<sup>5</sup> Huan sinda se quinequis quincocoltis in omenten, quisas tixuxli pa inmincamac huan quichichinus moxtin inminlacocolinijmes. Quema, sinda se quinequis quinchihuilis amo cuali, yoje yes lamictili, amo huil moquixtis pa camo polehuisi.

<sup>6</sup> Quipialo in omenten lahuelilitlisli pa quitzacuas in cielo (ilhuicac) pa camo quiahuis pin tonalijmes quiman lajtutiasí pa Dios. Huan quiपालो lahuelilitlisli pa quinpalasi in alimes pa mochihuasi esli. Huan quiपालो lahuelilitlisli pa quinlalilisi pan lalticpan mochi cocolislí. Quiman yes quinequis quichihuasi yojque, cuaquín huil quichihuasi.

<sup>7</sup> Huan pan tonali hual laquisalo lajtulo pa Dios, cuaquín in yulijquil temajquil hual lejcus pa quisas pa quiahuac in huejcalan capa amo quiman huil cajsí se itzindan, yihual moanas ca in omenten huan quinsulahuas, quinmictis.

<sup>8</sup> Huan inminmijquimes innojen omenten mocahuasi lasticate pa iojli in caltilan hué capa quipiluje pin cuahuil inminTata. In caltilan quitocaytilo Sodoma huan Egipto pampa inminyolo yehuanten hual chantilo pa in caltilan cate quinami inminyolojmes yehuanten hual yulinijme pa yina pin caltilan Sodoma huan pin lali Egipto.

<sup>9</sup> Pa ye huan lajco tonalijmes lacames hual chantilo pa mochi lalimes huan lajtulo mochi lajtomes quinmitasi innojen mijquimes huan amo lamacahuiltilo pa yesi lalalpachuli.

<sup>10</sup> Huan yehuanten hual chantilo pan lalticpan quipiasí míac paquilislí huan laquetzasi huan yulisi ca niman míac paquilislí, momacasi len ipati. Quichihuasi yoje pampa in omenten ilajtunijmes Dios quincocoltije yehuanten hual chantilo pin lalticpan.

<sup>11</sup> Ma yoje, quiman panusi in ye huan lajco tonalijmes, calaquis lajtic yehuanten se iijyul Dios iyulislí, huan moquetzasi pa inmicxihuajmes. Huan momajtitiquisasi niman míac yehuanten hual quinmitalo.

<sup>12</sup> Cuaquinon quicaquisi se lajtol chichahuac hual lajtúa pin cielo quinmilitica:

—¡Xilejcucan ca niqic!

Huan lejculo pa in cielo pa se mextemil ca inmincocolinijmes quinmizticate.

<sup>13</sup> Huan pa in nadita laulinic niman chichahuac huan huetzic se cali hual cataya ca mochi diez calimes pin caltilan. Huan chicome mil lacames hual moxtin quinmiximatije quinami motocaloaya miqijje pan ipampa in laulinislí. Huan in oc sequin hual mocahualoaya yulticate momajtiloaya niman míac huan quijtuloaya lajtomes huejué ca in Dios hual unca pin cielo.

<sup>14</sup> Yoje panuje omenten ca in yeyenten lacocoltislí. Xiquitacan. Amo huejcahuas ajsis in oc se lacocoltislí huan ca inon cayasi in yeyenten lacocoltislí.

*Cate ca in lancaquetzaloni chicome hual quipitzaje*

<sup>15</sup> Cuaquinon quipitzac in lanahuatini ilancaquetzaloni huan ca in lamije lancaquetzaje in chicome ilanahuatinijmes in cielo. Quipitzac huan moquije lajtomes chijchicahuac pin cielo hual quijtuloaya:

Capa huelitilo yehuanten pin lalticpan axan mochíac capa huelitilo toTata huan iCristo hual quilajtultic pa yes in hué.

Huan yihual amo quiman mocahuas pa huelitis.

<sup>16</sup> Huan molasaje pa inmixco pa quimolancuacuetzililosquiaya Dios in veinticuatro abuelojmes hual yehuatataloaya pani inmicpalimes hual laixpelaloaya.

<sup>17</sup> Quijtutataloaya:

Timijsehuilo tehual toTata Dios hual ticpía mochi chicahualisli, tehual hual tiunca huan ticataya huan ticayas.

Timijsehuilo pampa ticanac mochicahualisli hué huan tipehuac tihuelitic.

<sup>18</sup> Yehuanten pin lalimes cualaniloaya chicahuac.

Ma yoje, tehual tihualac ca mocualanilisli pa tiquintilanis capa yesi lacoccoltili.

Huan noje ajsic in tonali pa quiman tehual tiquintilanis huejca pa camo cayasi ca tehual yehuanten hual miquije, tiquintilanis ca capic amo quiman huil mocuepasi.

Huan ajsic in tonali pa quiman tiquinmacas laxlahuilisli motequipanujquimes, yehuanten molajtunijmes huan molacames huan yehuanten hual quimatilo momajtilo molaixpan tehual,

in lacames huejué huan in lacames tijtipichin.

Huan ajsic in tonali pa tehual tiquintilanis capa cayasi lacoccoltili yehuanten hual quijlacuje in lalticpan.

Tiquintilanis capa amo quiman huil mocuepasi.

<sup>19</sup> Cuaquinon Dios quilapuc itiopan pin cielo (ilhuicac). Huan in latzacuali capa cajcoquia ilajtulisli lajcuiluli moitac calijtic itiopan pin cielo. Huan lapelantataya huan cataloaya xahuanilisli chicahuac huan míac comunilisli huan se laulinilisli. Huan noje huetziaya tisihuil etic.

## 12

*In sihual huan in xolol lalac huan in cuhual*

<sup>1</sup> Cuaquinon nestic pin cielo len lanextilisli hué calica Dios quinlachiatic lacames ca lamajtilisli ilachihualisli hué. Inon hual nestic yec se sihual lalaquentili ca in tonali huan ca in mesli itzindan icxihuajmes. Huan pani itzontecon quiapiaya se yahuali lachihuali ca teposli ca doce luceros (silalimes).

<sup>2</sup> Yihual yahuiaya quilacatilti huan tzajtziaya ca in cocolisli pampa yahuiaya lacati ixolol.

<sup>3</sup> Umpa nestic pin cielo oc se len hué hual quinlachiatic lacames ca lamajtilisli. Xiquitacan, moitaya se cuhual hué huan chichiltic, quinpiaya chicome (siete) itzontecon huan majlacli (diez) icuacuas huan quinpiaya chicome yahualimes lachihuali ca teposli pani pa itzontecojmes.

<sup>4</sup> Huan ca ilamili quinmixpanac se lajco in silalimes (luceros) pa latzindan pin lalticpan. Yojqe mocahuaje pin ilhuicac (in cielo) san omenten lajlajco ca mochi in silalimes hual nepa catanijme. Huan moquetzac in cuhual niman hué ilaixpan in sihual hual ixolol jan axcan yahuiaya lacati. Yahuiaya quitolu in cuhual in xolol quiman lacatisquiaya.

<sup>5</sup> Cuaquín quilacatiltic in sihual se xolol lalac huan in xolol lalac unca Cristo hual yahui huelitia melahuac huan chicahuac pa mochi in lalimes

ca inminlacames pin lalticpan. Huan ixolol in sihual cataya la'ajcoquili pa cayas ca Dios pa huelitisi huan yihual capa unca iicpali hual laixpela capa huelitía.

<sup>6</sup> Cuaquín choluc in sihual ca capic amaqi chantiaya. Nepa unca se lajcotiyan hual quichijchiuilic Dios capa yihual quipixtías in sihual pa mil doscientos sesenta tonalijmes.

<sup>7</sup> Panuc inon, cataya moanalisi pin cielo. Miguel in lanahuatini niman hué quinlaicanaya ilanahuatinijmes pin cielo huan moanaloaya ca in cuhual hué. Huan moanaje in cuhual huan ilanahuatinijmes ca Miguel huan ilanahuatinijmes pin cielo.

<sup>8</sup> Huan cataloaya lasulahuali in cuhual huan ilanahuatinijmes, yajmo cataya capa mocahuasi yehuanten pin cielo.

<sup>9</sup> Cuaquín quilasaje pa latzindan in cuhual, in cuhual hual yulic pa yina huan yuli axan, unca latocayaltili in lili huan Satanás. Yihual quincuajcua-mana moxtin yehuanten pin lalticpan. Quilasaje pa latzindan pin lalticpan huan quinlasaje ilanahuatinijmes noje ca yihual pa latzindan pin lalticpan.

<sup>10</sup> Cuaquinon nijcaquic pin cielo se lajtol chicahuac quijtuaya:

—Axan ajsic in tonali quiman moxtin yehuanten hual iyaxca Dios cate mochi lamacahuali pa yoje Satanás yajmo huelitis ca ichicahualisli pan yehuanten. Axan ajsic in tonali quiman Dios huelitía ca ichicahualisli. Quema, ajsic in tonali quiman Cristo huelitis ca ilahueliltisli. In unca pampa unca lalasal pa latzindan in se hual quinmotexpahuilijtica tocnán yihualitonali pa semilhuil huan pa layúa iyampa Dios.

<sup>11</sup> Huan tocnán quisulahuaje in Satanás pan ipampa iesli in Borreguito hual toyahuic quiman miquic. Quema, quisulahuaje Satanás pan ipampa quinami lamachiltije quinami Cristo in Borreguito quinquixtilic pin ipole-huilisli inminlajlaculisli. Quisulahuaje pampa amo mocahuaje pa quijtusi ilamaxtilisli in Borreguito, mas que yahuilooaya yelo lamictili.

<sup>12</sup> ¡Xicipacan míac paquilisli amhuanten in cielos huan moxtin hual chantilo nepa! Huan ¡axcan anyahui anpanúa niman míac lacocoltilisli amhuanten pan in lalticpan huan pin al huejcalan, pampa axan temuc ca amhuanten in lili cualantica chicahuac pampa quimati quinami quicahuilía jan nadita san pa yihual huelitis!

<sup>13</sup> Huan quiman quitac in cuhual Satanás quinami yihual cataya lalasal pa latzindan pin lalticpan, cuaquín quitojtocac in sihual hual quilacatiltic in xolol lalac.

<sup>14</sup> Ma yoje, Dios quimacac in sihual ome inastacapajmes in lanapatini hué (cuaujli) pa huil palantiasquiaya cholujtataya ilaixpan in cuhual pa yoje ajsisquiaya capa amaqi chantiaya. Nepa Dios quipixtías pa ye huan lajco xixihuil.

<sup>15</sup> In cuhual mjsolac al pa icamac pa itepotzcon in sihual pa catocitiasquiaya ca in míac al.

<sup>16</sup> Huan in lalticpan quipalejtihualaya in sihual, tzayanic huan molapuc huan quitoluc in al hual mjsolac in cuhual pa icamac.

<sup>17</sup> Pampa in, cualanic in cuhual ca in sihual huan mohuicac pa moanas ca yehuanten ixolomes in sihual hual quicahuilije. Yehuanten cate aquino-jen hual quichihualo quinami quilia Dios ilajtol, huan lajtulo neli in hual melahuac inahuac Jesús. Huan in cuhual moquetzac pani ixalipan in al huejcalan.



## 13

*In ome yulijquimes temajquimes*

<sup>1</sup> Huan niqitac se yulijquil temajquil majcoctataya pin al huejcalan. Quimpiaya majlacli (diez) icuacuas huan chicome (siete) itzontecon. Huan quimpiaya majlacli yahualimes lachihuali ca teposli pani icuacuas. Cataya pan innojen siete itzontecon se itoca hual quihuejuecaltic Dios.

<sup>2</sup> Huan in yulijquil temajquil hual niqitac yec quinami se tecuani, icxi-huajmes quinami icxihuajmes se oso. Huan icamac cataya quinami icamac se león tzondiudo. Huan in cuhual temacac ichicahualisli huan iicpali capa huelitía huan quimacac lahuelilitisli hué in yulijquil temajquil.

<sup>3</sup> Se itzontecon nesiaya quinami quipiaya se latzontequilisli calica cataya lamictili, huan ma yoje, in latzontequilisli calica miquic itzontecon cataya lapajtli. Huan moxtin yehuanten pin lalticpan quitocaloaya in yulijquil temajquil quiztataloaya yihual ca lamajtilisli.

<sup>4</sup> Lacames quimolancuacuetzililoaya in cuhual hué pampa yihual quimacac ilahuelilitisli in yulijquil temajquil. Huan quimolancuacuetzililoaya in yulijquil temajquil, quijtuloaya:

—Amo unca oc se quinami in yulijquil temajquil. Amaqui huil moana ca yihual huan quisulahua.

<sup>5</sup> Huan canac in yulijquil temajquil lahuelilitisli pa quijtus lajtomes huejué pa yihual ihuán huan lajtomes hual quihuejuecaltic Dios. Huan cataya lamacahuilti pa quipiasquiaya lahuelilitisli pa cuarenta y dos (ompuhualihuanome) mesli (meses).

<sup>6</sup> Huan yoje quichihuc. Quilapuc icamac pa quijtusquiaya lahuejuecaltisli inahuc Dios, quinhuejuecaltic itoca huan capa chanti, huan quinhuejuecaltic yehuanten hual chantilo pin cielo.

<sup>7</sup> Noje cataya lamacahuilti pa moanas ca yehuanten hual iyaxca Dios huan pa quinsulahuas. Huan cataya lamacahuilti pa quipías lahuelilitisli ca mochi lacames hual amo cate miac huan ca mochi lacames hual cate miac. Huan cataya lamacahuilti pa huelitis pan mochi lacames hual lajtulo len yes lajto, huan pa quipías lahuelilitisli pan mochi inminlalimes lacames.

<sup>8</sup> Huan moxtin hual chantilo pan lalticpan quimolancuacuetzilisi in yulijquil temajquil, quema, mochi lalac hual amo quipía lajcuiluli itoca pa iamal in Borreguito hual cataya lamictili. Nepa cate lajcuiluli inmintocajmes yehuanten hual in Borreguito quinyulitic. Cataloaya lajcuiluli nepa quiman yihual ayamo quichíac in lalticpan huan in cielo.

<sup>9</sup> Aqi hual huil lacaqui, ma quicaqui inon.

<sup>10</sup> Aquinojen hual cate Dios ilacames hual quipialo pa cayasi laquitzquili pa cayasi latzacuali pa calijtic, cuaquín pa calijtic yas. Aqi hual quinmictía oc sequin, yihual quipías pa yes lamictili. Pampín, ma mochijchihuacan, pampa nican quipialo pa mopepenialtisi pa panusi inon. Huan noje nican monequi pa camo mocahuasi pa quilalisi inminlaneltoalisli ca Dios ilajto.

<sup>11</sup> Cuaquín niqitac oc se yulijquil temajquil hual quisac pa lajtic itzindan in lalticpan. Quimpiaya ome icuacuas quinami se borreguito, huan lajtuc quinami se cuhual.

<sup>12</sup> Canac mochi in lahuelilitisli hual quipíac in yulijquil hual quisac pin al huejcalan. Quema, in yulijquil hual quisac pin al huejcalan quimacahuiltic in yulijquil hual nesi quinami borreguito pa tequipanús ca ilahuelilitisli. Cuaquín in hual nesi quinami borreguito quimolancuacuetzaltic moxtin pin lalticpan in yulijquil temajquil hual quisac pin al huejcalan. In yulijquil

unca hual itzontequilisli cataya lapajtili, in latzontequilisli calica cataya lamictili itzontecon.

<sup>13</sup> Huan in oc se yulijquil temajquil quinchíac míac huejué hual quinmiltisi ca lamajtilisli in lacames. Quema, quihuetziltiaya tixuxli pin cielo, hueztihualac pan in lalticpan ca in lacames lachixticate.

<sup>14</sup> Huan pan inminpampa innojen, in lacames míac moitaloaya momajti-tataloaya. In oc se yulijquil temajquil cataya lamacahuitili pa quinchías. Quinchihuaya mochi ca ipalehuilisli in yulijquil temajquil hual quisac pin al huejcalan. Yoje quincuaajcuamanaya lacames pan in lalticpan. Quema, quinmiliaya pa quichihuasi se mono quinami in yulijquil hual quisac pin al huejcalan, quinmiliaya pa quimolancuacuetzilisi. Yoje quimahuisuloaya ca lamajtilisli in yulijquil hual cataya latzontequili pa miquis ca se teposli calica moanalo guaches, huan ma yoje yulic oc sejpa.

<sup>15</sup> Huan in oc se yulijquil temajquil cataya lamacahuitili pa quimacas ijyul in mono chicuenta in yulijquil temajquil pa yoje lajtus in mono. Huan cataya lamacahuitili pa latilanis pa yesi lamictili moxtin hual amo quinequiloaya quimolancuacuetzililo in mono.

<sup>16</sup> Huan amo inon san. Quinchihuiliaya pa quipias se lanextilisli pa ima cuali o pa itzontecon pa pani inmixtololojmes moxtin lacames huejué huan tijtipichin, hual quipialo míac o amo quipialo míac, tequipanujquimes hual itecojuan amo quilaxlahuilo huan tequipanujquimes hual quilaxlahuilo.

<sup>17</sup> Yojque amo quimacahuiltisi pa lacuhas huan lanamacas se sinda amo quipías in lanextilisli. In lanextilisli unca itoca in yulijquil temajquil o inúmero de itoca.

<sup>18</sup> Monequi pa se quipías lajmatilisli pa quimatis len quinequi quijtúa inon. Sinda se quipía lajmatilisli ma quilamachía inúmero in yulijquil temajquil pampa unca se número hual lacames quimatilo. Unca seiscientos sesenta y seis (setzondimajlaclihuanypuhualichicuase).

## 14

### *Inmncantadita (inmincuical) in 144,000*

<sup>1</sup> Cuaquinon nilachíac huan ¡xiquitacan! Pani in loma (tepetzindi) Sión moquezataya in Borreguito, in hual neli unca in Cristo. Huan ca yihual cataloaya ciento cuarenta y cuatro mil lacames hual quipialoaya lajcuiluli pa inmintzontecon pa pani inmixtololojmes itoca in Borreguito huan itoca iTajtzin.

<sup>2</sup> Huan nijcaquic se lajtol pin cielo, xahuanic quinami míac alimes huan quinami comunilisli chichahuac. Huan noje cataya in lajtol quinami inminlatzotzonalisli lacames hual quintzotzonticate inminarpas.

<sup>3</sup> Huan cantaruloaya (cuicaloaya) se cantadita (cuical) yancuic inminlaixpan in icpali hual laixpelaya huan in nahuenten yulijquimes huan in veinticuatro abuelojmes. Amaqui huil monextilic quicantaruc (quicuicac) in cantadita sinda amo yec se ca in ciento cuarenta y cuatro mil lacames. In Borreguito laxlahuic pa yesi iyaxca, quinquixtic capa moxtin hual cate pin lalticpan.

<sup>4</sup> Yehuanten cate lacames hual amo moijlacuje ca sihuames pampa amo quiman moniluje ca sihuames. Yehuanten cate hual aquinojen quitocalo in Borreguito ca cajcapic yes yahuis. Yehuanten Cristo quincuhuac capa yes yehuanten cate pin lalticpan. Cate mochi pa Dios huan pa in Borreguito. Cate quinami cataya jan pa Dios san in miahuimes hual canaje yehuanten in israelitos pa yina quiman quipehualtinijme in lapixcalisli.

<sup>5</sup> Huan amo quiman huil quijtúa se pampa yehuanten islatatije pampa ca yehuanten amo quita Dios nindeno hual amo unca cuali.

*Ilanahuatilisli in ye ilanahuatiniymes in cielo*

<sup>6</sup> Cuaquinon niqitac oc se ilanahuatini in cielo palantataya lajco pin cielo quinnahuatijtataya yehuanten hual chantilo pan lalticpan in lamachilitlisli cuali hual amo quiman mocahuas pa cayas. Quinnahuatijtataya pa mochi inminlalimes lacames huan mochi yehuanten hual amo cate miac, huan lacames hual lajtulo mochi lajtomes, quema, moxtin lacames.

<sup>7</sup> Quijtuaya ca lajtol chicahuac:

–Ximomajtan ilaixpan Dios ca lasojlalisli, huan xiquilican lajtomes huejué, pampa ajsic in tonali quiman yihual quintilanis pa yajmo cayasi ca yihual yehuanten hual amo quineltoalo. Quema, ximolancuacuetzilican yihual hual quinchíac in cielo huan in lalticpan huan in al huejcalan huan innojen iixtololojmes in alimes.

<sup>8</sup> Quitocaya in ilanahuatini in cielo oc se ilanahuatini in cielo, quijtuaya:

–Yajmo huelitía Babilon, in caltilan hué. Moijlacuc, axan moijlacuc. Yehuanten pin Babilón hual huelitije quinchihualtije moxtin lacames pin lalimes pin lalticpan, quinchihualtije amo cuali lacames ca sihuames hual amo inminsihuahuan, quinchihua je quinami lahuanquimes hual amo quimatije len quichihualoaya, quinequi quijtúa, quinmolancuacuetzaltilic oc sequin dioses.

<sup>9-10</sup> Huan oc se ilanahuatini in cielo quitocac in ilanahuatini in cielo huan quijtuaya ca lajtol chicahuac:

–Sinda se quimolancuacuetzilis in yulijquil temajquil huan imono, huan quipías ilanextilisli pa itzontecon pa pani iixtololojmes o pa ima, cuaquín yihual mococus miac pan ipampa Dios icualanilisli. Cayas quinami Dios quitoyahuilis pajli chichic huan tetzahuac pa quicuniltis ca itapalquita Dios, hual quinequi quijtúa yihual panus icualanilisli. Huan cayas lacocoltili ca tixuxli huan azufre inminlaixpan Dios ilanahuatiniymes chijchipahuac pin cielo huan ilaixpan in Borreguito.

<sup>11</sup> Huan amo mocahuas pa moajcoquis ipogli inminlacocoltilisli hual chichinahuá. Amo mosehuisi yihualitonali pa semilhuil huan pa layúa yehuanten hual quimolancuacuetzililo in yulijquil temajquil huan imono. Yehuanten cate hual quipialo in ilanextilisli itoca in yulijquil temajquil.

<sup>12</sup> Nican cate lajtomes hual quinmililo Dios ilacames pa mopepenialtisi pa panusi lacocoltilisli. Yehuanten cate hual aquinojen yulilo quichijticate quinami quijtúa Dios ilajtol huan yulilo quialaljticate inminlaneltocalisli ca Jesús.

<sup>13</sup> Huan nijcaquic se lajtol pin cielo nechiliaya:

–Xiquijcuilu inon: “Axcán huan pa mochi tonali quipias paquilisli yehuanten hual miqusi ca inminyulilisli inahuac in Tata.” Quema, quijtúa in Espíritu, yoje mosehuisi, pampa lamije quichihua je inmintequipanulisli. Huan quintocas pa cayas ca yehuanten pin cielo ilaxlahuilisli inmintequipanulisli.

*In lapixcalisli pan in lalticpan*

<sup>14</sup> Cuaquinon nilachíac huan ¡xiquitacan! Cataya se mextemil iztatataya huan se quinami ilacal in cielo yehuatataya pani in mextemil, quipiaya pa itzontecon se yahuali lachihuali ca oro huan pa ima quipiaya se teposli latequi calica yahuiaya lapixca.

<sup>15</sup> Huan quisac pin tiopan pin cielo oc se ilanahuatini in cielo huan quinotzac ca lajtol chicahuac yihual hual yehuatataya pani in mextemil, quilic:

—Xicxilani moma ca in teposli pa tilatequis, pampa ajsic in tonali pa tilatequis. Axan chicahuayac pa tilapixcas in lalticpan.

<sup>16</sup> Cuaquín yihual hual yehuatataya pani in mextemil quitemuhuic iteposli latequi pa latzindan pan lalticpan huan yoje quitequic ilapixcalisli pin lalticpan.

<sup>17</sup> Cuaquinon quisac pin tiopan pin cielo oc se lanahuatini huan yihual noje quiapiaya se teposli latequi.

<sup>18</sup> Huan quisac capa quilalilo in huendis oc se ilanahuatini in cielo, yihual in lanahuatini hual quipía lahuelilitisli ca tixuxli. Quinotzac ca lajtol chicahuac yihual hual quiapiaya in teposli latequi, quilic:

—Xicxilani momajma ca in teposli latequi, xiquinpejpena inminmajmitas ilaquilyo in uvatilan pin lalticpan, pampa chicahuayaje in uvatilan.

<sup>19</sup> Cuaquín quitemuhuic in lanahuatini iteposli latequi pin lalticpan huan quipejpenac ilapixcalisli in uvas pan lalticpan, huan quinlasac mochi in majmitas pin capa quintelicsalo in uvas pa quisas iayo. In quinequi quijtúa iayo uvas unca quinami esli. Huan quisas iesli yehuanten hual quichihualo amo cuali pampa Dios cualantica ca yehuanten. Quintilanís capa yesi lacocotili.

<sup>20</sup> Capa quintelicsalo in uvas cataya pa quiahuac in caltilan Jerusalén. Huan quisac iesli in uvas capa quitelicsaloaya. Moajcoquic huan ajsitihualac in esli pa pani, ajsic pa inminlatilanalónijmes in caballos huan totocac huejca pa quinami trescientos kilómetros.

## 15

*In lanahuatinijmes pin cielo ca in chicome cocolisli calica Dios laquisa ca icualanilisli*

<sup>1</sup> Cuaquinon niquitac oc se lanextilisli hué pin cielo hual quinlachiatic lacames ca lamajtilisli pampa quinextiaya Dios ichichualisli. Niquinmitac chicome ilanahuatinijmes in cielo hual quipialoaya lahuelilitisli pa quincoltisi yehuanten pin lalticpan ca chicome cojcocolisli calica laquisas Dios ca icualanilisli.

<sup>2</sup> Huan niquitac len hual nesci quinami se al huejcalan lachihuali amo ca al, nesiaya quinami lachihuali ca len hual lanescas. Huan in quinami se al huejcalan nesiaya quinami quiapiaya tixuxli laniluli ca in hual lanescas. Huan inahuac in quinami al huejcalan hual lanescatataya niquinmitac moquezataloaya yehuanten hual quisulahuaje in yulijquil temajquil. Quisulahuaje pan ipampa quinami amo quimolancuacuetzilije imono huan amo quimacahuiltije pa quilalilosquiaya inúmero itoca. Quimpialoaya pa inminmajma-juan iarpas Dios.

<sup>3</sup> Huan quicantarujtataloaya (quicuicatataloaya) se icantadita (icuical) calica quinmilije lajtomes huejué in Borreguito Cristo hual quinquixtic pin polehuilisli. Inon quinami icantadita Moisés hual quicantaruc (quicuicac) quiman quinquixtic Dios ilacames pin ipolehuilisli in Al Huejcalan Chichiltic. Huan ca in cantadita (cuical) quicantaruililoaya:

Techlachiaticlo ca lamajtilisli innojen huejué hual tiquinchía, toTata Dios, tehual hual ticpía mochi chicahualisli, tehual ticchía len unca cuali pa moxtin hual quinmahuilúa, huan ticchía mochi hual melahuac.

Tehual inminhué mochi de quiman pehuac huan pa quiman lamis.

<sup>4</sup> Amaqui unca hual amo momajtis molaixpan tehual huan amaqui unca hual amo mitzilis lajtulisli huejué pampa motoca, oh Tata, unca niman hué,

pampa tehual mohuían tiunca mochi cuali huan chipahuac, timoiycuanilía pa camo ticayas capa unca laijlaculisli.

Moxtin lacames pin mochi lalimes mitzmolancuacuetzilizihualasi,

pampa tehual tiquinnextilic quinami tehual ticchá mochi hual unca cuali.

Huan ticmelahua mochi quiman tiquintilanía pa yajmo cayasi ca tehual moxtin hual quichihualo amo cuali.

<sup>5</sup> Huan quiman lamíc inon, nilachíac huan axan niquitac lalapuli itiopan Dios nepa pin cielo. Quema, niquitac pa calijtic pa in niman lasojli calijtic.

<sup>6</sup> Huan quisaje pin tiopan in chicome (siete) lanahuatinijmes hual quipialoaya in lahuellitlisli pa quincocoltisi in lacames pin lalticpan ca in chicome lacocoltilisli. Quisaje lalaquentili ca nahuajmes lachihuali ca ichcal iztatataya, chipahuac huan laixpelatataya. Quimpialoaya lacuejtilonijmes lachihuali ca oro laipili pa itzindan inmintzicalan.

<sup>7</sup> Huan se ca in nahuenten yulijquimes quinmacac in chicome lanahuatinijmes chicome tapalquitas lachihuali ca oro tentataloaya ca inon calica yahuiaya lami icualanilisli hué Dios hual amo quiman mocahua pa yulis.

<sup>8</sup> Huan tentataya ca pogli in tiopan, in pogli cataya Dios ichicahualisli hual laixpela huan ilahuellitlisli. Huan amaqui huil calaquiaya in tiopan, monequiaya pa quichías pa lamisi in chicome lacocoltilisli hual quintilanisi pan lalticpan in chicome lanahuatinijmes.

## 16

### *In tapalquitas tenticate ca lacocoltilisli pa in lacames ej'elehuis*

<sup>1</sup> Cuaquinon nijcaquic lajtol chichahuac lanoztataya pin tiopan. Quinmiliaya in chicome ilanahuatinijmes in cielo:

—Xiacan huan xiquintoyahuacan pani in lalticpan in chicome tapalquitas hual quincocoltisi in lacames pin lalticpan ca Dios icualanilisli.

<sup>2</sup> Cuaquin uyac in se lanahuatini huan quitoyahuac itapalquita pani pin lalticpan. Nestiquisaje sahuames pan inmincueros (inminacayo) yehuanten hual quipialoaya inminpan ilanextilisli in yulijquil temajquil huan yehuanten hual quimolancuacuetzilije imono. Posahualoaya huan xopuniloaya niman míac innojen sahuames. Amo quinequiloaya pajtilo.

<sup>3</sup> Oc se lanahuatini quitoyahuac itapalquita pani in al huejcalan huan in al mochíac quinami iesli se lalacal mijquil. Huan miquije mochi hual yultataloaya pin al huejcalan.

<sup>4</sup> Quitoyahuac oc se lanahuatini itapalquito pani in atencojmes huejué huan pani in ixtololojmes alimes, huan mochihuaje esli.

<sup>5</sup> Umpa, nijcaquic ilanahuatini in al, quijtuc:

—Tehual, Dios, ticcháac quinami quinmahuiluc pampa tiquincocoltitica yoje. Tehual tiunca huan ticataya niman cuali huan chipahuac huan timoiycuanilía mochi hual laijlaculi.

<sup>6</sup> Pampín, ticchá quinami quinmahuilúa. Tiquinmacac in lacames esli pa cunisi, pampa yehuanten quintoyahuilic inminesli molacames huan mola-jtunijmes. Quema, quinmahuilúa pa quinpanusi yehuanten in lacocoltilisli pa cunisi esli.

<sup>7</sup> Huan noje nijcaquic tzajtzc inon capa quilalilo huendis, quijtuc:

—Quema, Tata Dios, tehual ticpía mochi chicahualisli, innojen hual tiquinchía pa tiquinlalilis in lacocoltilisli, unca melahuac huan unca quinami quinmahuiluaya.

<sup>8</sup> Oc se lanahuatini quitoyahuac itapalquita pin tonali, huan cataya lamacahuilitli in tonali pa quinchichinus lacames ca itixuxli.

<sup>9</sup> Quinchichinuc lacames ca in totonalisli chicahuac huan yehuanten cajcajuaje tetzcuinuc itoca Dios hual quipía lahuelilitlisli ca in lacocoltilisli. Ma yoje, amo quinpalaje inminyolo pa quimolancuacuetzililosquiaya yihual in niman hué.

<sup>10</sup> Quitoyahuac oc se lanahuatini itapalquita pa capa huelitiaya in yulijquil temajquil. Axan cataloaya macuili lanahuatinijmes hual quintoyahuaje inmintapalquitas. Huan quiman in lanahuatini quitoyahuac, laticumactiác pa mochi lali capa huelitiaya in yulijquil temajquil. Huan lacames quincualcualoaya inminejnepil pampa inon quincocoltiaya yoje míac.

<sup>11</sup> Huan cajcajuaje tetzcuinuc in Dios de in cielo (ilhuicac) pampa yihual quincocoltitataya ca in lacocoltilisli huan in sahuames. Ma yojque amo quipalaje inminyolo pa yajmo quichihualosquiaya amo cuali.

<sup>12</sup> Quitoyahuac oc se lanahuatini itapalquita pani in atenco niman hué hual itoca Eufrates. Axan cate chicuase lanahuatinijmes hual latoyahuac. Huan in atenco hué Eufrates mohuactic. Mohuactic pa yoje mochijchihuasquiaya se ojli pa canalosquiaya in huejueyenten hual hualalosquiaya capa quisa in tonali.

<sup>13</sup> Cuaquinon pa icamac in cuhual hué huan pa icamac in yulijquil temajquil huan pa icamac in se hual unca lajtuni hual islacati niquinmitac qetzataloaya ye ijyecames amo cuajcuali, nesiloaya in ijyecames quinami ranas (cueyames).

<sup>14</sup> Cate Satanás ilanahuatinijmes, quinchihualo len quinlachiailto ca lamajtilisli lacames. Yajtialo pa mochi in laticpan capa cate yehuanten hual huelitilo pan lacames. Yajtialo capa yehuanten pa quinnechicusi ca mochi inminguaches pa moanasi pan in tonali hué quiman Dios hual quipía mochi chicahualisli hualas pa lamis quichías len quinequi quichía.

<sup>15</sup> Huan nican Jesucristo quijtúa: “Xiquitacan, nihualas quinami se laxtequini. Quipías míac paquilisli hual aqui mocahua nejchixtica quinami laejxiltili, huan quinami se lalaquentili pa yojque amo moitas quinami se amo quipixtica itzotzomajli huan yojque nesis nolaixpan quinami se nacatil pinajtica. Quema, ma yuli chipahuac pa camo pinahuas quiman nihualas.” Yojque quijtúa Cristo.

<sup>16</sup> Huan innojen ijyecames ej'elehuis quinnechicuc moxtin in huejueyenten huan inminguaches pan se lajcotiyan hué hual ca lajtol hebreo itoca Armagedón.

<sup>17</sup> Quitoyahuac itapalquita in lanahuatini hual quilamic in latoyahualisli, quitoyahuac pin ijyecal. Cuaquín mocaquic calijtic in tiopan pin cielo se lajtol chicahuac hual quijtuc yihual hual molalijtataya pani in icpali hual laixpela, quijtuc:

—Axcan unca lalamili.

<sup>18</sup> Cuaquinon cataloaya míac lapelanilisli huan míac xahuanilisli chicahuac. Comuniaya míac huan laulinic chicahuac yoje quinami amo quiman panuc quiman cataloaya lacames pan in laticpan, yojque chicahuac cataya in laulinilisli.

<sup>19</sup> Tzayanic ca ye lajcomes in caltilan hué, huan innojen caltilan pin mochi in lalimes huetzije. Huan quijnami quic Dios Babilón pa quichihuilis pa canas mochi in ilacocoltilisli icualanilisli niman chicahuac.

<sup>20</sup> Huan yajmo nesije in lalimes hual cate lajco pin al huejcalan, yajmo moitilije in lomas (tepemes).

<sup>21</sup> Huan pin cielo huetzic míac tisihuil huan mochi sejse in tisihuil cataya etic quinami cincuenta kilos. Huetzije inminpan in lacames. Huan yehuanten cajcajuaje Dios pampa huetzic ilacocoltilisli in tisihuil, pampa cataya se lacocoltilisli niman chicahuac.

## 17

### *Quitlanía in hué sihual lalacero pa panus lacocoltilisli*

<sup>1</sup> Cuaquinon hualac ca nehual se ilanahuatini innojen chicome hual quinpialoaya in chicome tapalquitas huan nechilic:

—Xihuala huan nimitznexilis quinami Dios yahui quitlanía pa ilacocoltilisli in hué sihual lalacero hual yehuatica pani in míac alimes.

<sup>2</sup> Ca in sihual lalacero, moxtin in huejueyenten pin lalticpan quinmolancuacuetzililoaya monos huan amo quimolancuacuetzililoaya Dios. Huan inon Dios quita quinami in laijlaculisli hual quichía se lalac ca se sihual hual amo isihua. In sihual lalacero quintilanilic inminyolo in huejueyenten pa quichihualosquiaya laijlaculisli ca yihual. Unca quinami quiman se sihual lalacero quimaca iayo uva coc se lalac pa lahuanas. Huan yojque yehuanten hual chantilo pan lalticpan cate quinami lahuanticate ca iayo uva coc in sihual.

<sup>3</sup> Huan nilachiaya quinami nechuicac pan ipampa in Espíritu Santo huan tajsije pa se lali capa amaqui chantiaya. Nepa niquitac se sihual yehuataataya ipan se yulijquil temajquil chichiltic hual motocayaltic ca míac itocajmes hual quihuejuecaltilo Dios. Huan quinpiaya in yulijquil temajquil chicome (siete) itzontecon huan majlacli (diez) icuacuas.

<sup>4</sup> Cataya lalaquentili in sihual ca tzotzomajli morado huan chichiltic huan cataya lachijchihuali ca oro huan maquisli lachihuali ca perlas huan oc sequin tixcalitos hual ipatilo míac. Quipiaya pa ima se tapalquita lachihuali ca oro tentataya ca len Dios amo quinequi quita, tentataya ca len niman amo cuali hual quichihualo lacames quiman quintequipanuililo oc sequin dioses.

<sup>5</sup> Huan pa itzontecon pa pani iixtololojmes cataya lajcuiluli se itoca hual amaqui quimati len quinequi quijtúa sinda Dios amo quinextía len quinequi quijtúa. Huan itoca unca: “BABILONIA HUÉ, INMINANTZIN MOXTIN SI-HUAMES LACALEROS HUAN YEHUANTEN HUAL QUINMOLANCUACUETZILILO OC SEQUIN DIOSES PIN LALTICPAN PA QUICHIHUASQUI MOCHI HUAL DIOS AMO QUINEQUI QUITA.”

<sup>6</sup> Huan niquitac in sihual cataya quinami lahuantataya ca inminesli moxtin ilacames Dios huan yehuanten hual miquije pampa quilamachiltiloaya neli ilamaxtilisli Jesús. Niquitac, huan nimomajtic míac.

<sup>7</sup> Ma yoje, nechilic in lanahuatini:

—¿Leca tiquita ca lamajtilisli? Nimitzilis len quinequi mitznextilía inon hual tiquita quichijtica in sihual, inon hual se amo huil quimati ihuán. Huan noje nimitzilis in hual mitzmachiltía in yulijquil temajquil hual quinpiá innojen chicome itzontecon huan majlacli icuacuas, in yulijquil capa yehuatica in sihual.

<sup>8</sup> Huan noje nimitzilis in hual quinequi mitznextilía in yulijquil temajquil hual quinpiá chicome itzontecon huan majlacli icuacuas, in yulijquil capa yehuatica in sihual. Yulini sejpa huan amo unca axan. Ma yoje yahui lejcúa pa quisas pin huejcalan capa se amo quiman huil cajsí itzindan. Inon unca capa mochi hual ej'elehuis hueltililo. Quisas pin huejcalan, cuaquín yahui

mopolúa huan yajmo moitas. Huan moitasi ca lamajtilisli lacames quiman quitalo in yulijquil temajquil, pampa yulini sejpa huan amo unca axan. Ma yoje yahui huala pan in lalticpan. Huan innojen lacames cate yehuanten hual amo quipialo lajcuiluli inmintocajmes pin amal capa moitlilo mochi inmintocajmes yehuanten hual Dios quijtuc pampa yahuilloaya quipialo iyulilisi. Inon quijtuc Dios quiman ayamo quinchíac in lalticpan huan in cielo.

<sup>9</sup> Cuaquín, inon hual axan nía nimitzilía, monequi pa se quipía lajmatilisli pa huil lajnamiquis cuali. Innojen chicome itzontecon cate in chicome lomas (tepemes) capa yehuatica in sihual.

<sup>10</sup> Noje innojen chicome itzontecon cate chicome huejueyenten. Lamije capa huelitiloaya macuili ca innojen huejueyenten. Se ca yehuanten huelitijfica axan. Ayamo pheuac huelitic in oc se. Huan quiman ajsis in tonali pa huelitis, huejcahuas jan se nadita san.

<sup>11</sup> Huan in yulijquil temajquil hual cataya huan amo unca axan, yihual in hué ocho (chicué), mas que yihual noje unca se ca innojen oc sequin chicome huejueyenten. Huan umpa, yihual polehuis pa camo quiman mocuepas.

<sup>12</sup> Huan innojen majlacli (diez) icuacuas hual tiquinmitac cate majlacli huejueyenten hual ayamo quipiaje lahuelitilisli pa huelitisi quinami huejueyenten. Quema, quipiasi lahuelitilisli quinami huejueyenten pa huelitisi se nadita ca in yulijquil temajquil.

<sup>13</sup> In majlacli huejueyenten lajtusi pa inminyolo quinami se san huan quitemacasi inminchicahualisli pa huelitisi huan inminlahuelitilisli quitemacasi in yulijquil temajquil.

<sup>14</sup> Moanasi ca in Borreguito, huan in Borreguito quinsulahuas, pampa yihual unca inminteco moxtin tecojuan huan inminhué moxtin huejueyenten. Huan yehuanten hual cate ca yihual, hual aquinojen yihual quinnotzac pa yesi ilacames, quema, yihual quinlajultic huan yehuanten mocahuasi pa yultiasi yehuanten hual yihual quinlajultic.

<sup>15</sup> Noje ilanahuatini in cielo nechilic:

—In alimes hual tiquinmitac capa yehuatataya in sihual lalacalero, yehuanten cate lacames, quema, míac lacames huan in lalimes capa cate míac lacames huan in lacames hual lajtulo mochi in lajtomes pin lalticpan.

<sup>16</sup> Huan innojen majlacli icuacuas hual tiquinmitac hual cate hueyenten, yehuanten huan in yulijquil temajquil quicocolisi in sihual lalacalero. Huan quinquixtilisi mochi hual quipía, quema, huan itzotzomajli, huan quicahuas quinami nacatil. Quicuasi inacal icuerpo (inacayo) huan quichichinusi ca tixuxli.

<sup>17</sup> Inon quipanus pampa Dios quilalic inon pa inminyolo pa lamisi quichihuasi inon hual Dios quinequi pa quipanus. Yehuanten majlacli (diez) huejueyenten lajtusi pa inminyolo quinami se pa yoje quitemacasi in yulijquil temajquil inminlahuelitilisli calica huelitilo quinami huejueyenten. Huan yoje quilamisi quichihuasi in hual Dios quijtuc.

<sup>18</sup> Huan in sihual hual tiquitac unca in caltilan hué hual huelitía inminpan moxtin in huejueyenten pin lalticpan.

## 18

### *In quinami lamis huetzis Babilonia*

<sup>1</sup> Panuc inon huan cuaquín niquitac oc se ilanahuatini in cielo temujtihualaya umpa, quipixtihualaya lahuelitilisli niman hué. Huan ca ilaixpelalisli cualtichin quilahuic in lalticpan huan laixpelaya chicahuac.

<sup>2</sup> Huan lanotzac ca se lajtol chicahuac, quijtuc:



—Yajmo huelitía Babilonia in caltilan hué, yajmo huelitía. Axan mochíac se lajcotiyan capa chantilo in iyecames amo cuajcuali. Unca capa quipiasi pa chantisi mochi in tutomes cajcatzahuac huan tejtetzcuinuc.

<sup>3</sup> Yajmo huelitía pampa yihual quinmijlacuc mochi lacames pin lalticpan. Unca quinami yihual quinlauniltic ca iayo uva coc hual quinnequiltic pa camo quicaquilosquiaya Dios. Quinnequiltic pa quichihualosquiaya mochi hual amo cuali, quinami yihual quinequiaya. Quema, cataya quinami quiman se lalac quicajcahuas isihua pa canas oc se sihual, yojque in huejueyenten pin lalticpan quinmolancuacuetziliz idioses. Huan yehuanten pin lalticpan hual lacuhualo huan lanamacalo mochihuaje lacames hual quipialo miac. Monechicuhuilije miac tomin pan ipampa quinami lanamacaje huan lacuhuaje yoje amo cuali ca in caltilan quinami monextilije. Cataya pampa pa Babilonia quitaje miac tomin pa yojque mocuhuililosquiaya niman miac hual cualtichin calica mochihuaje niman chijchicahuac pa huelitisi.

<sup>4</sup> Cuaquinon nijcaquic oc se lajtol pin cielo, quijtuaya:

—Xiquisacan nepa, amhuanten nolacames, ma camo caya pa amhuanten ancanas len ca in sihual quiman Dios quitilanis capa yes lacocoltili pampa quichíac miac laijlaculisli.

<sup>5</sup> Quipanus in lacocoltilisli pampa momontuje innojen pan ipampa ilaijlaculisli. Huan axan quijnamiquic Dios mochi in amo cuali hual quichíac in sihual.

<sup>6</sup> Xiclacuepilian amo cuali jan quinami yihual quinchihuilic amo cuali oc sequin. Quema, xiclacuepilian ome ca mochi seje lachihualisli amo cuali hual yihual quichíac. Ma ye quinami se tapalquita ca pajli pa cunis, ome tapalquitas ca mochi se calica yihual quinlauniltic oc sequin. Quema, xicnilu pa cunis pin itapalquita yihual.

<sup>7</sup> Moiliaya lajtoyes huejué inahuac yihual ihuán, huan mahuiltiaya quinami se sihual lalacer. Pampín, jan yojque xicmacacan yoje miac lacocoltilisli huan cocolisli pa iyolo, quinami yihual quinchihuilic oc sequin. Quema, xicchihuilican yojque, pampa laijtic iyolo quijtuc: “Niunca nican niyehuatica quinami se hué sihual, amo niunca nohuán. Amo quiman nicmatis len cocolisli pa noyolo.”

<sup>8</sup> Huan pampa quijtúa yoje, yoje pan jan se tonali san cajsis yihual ilacocoltilisli. Panus cocolisli huan icnotilisli huan mayandi, huan yes lachichinuli ca tixuxli, pampa in Tata Dios hual quitilanis in sihual ilaixpan yihual quipía mochi chichahualisli.

<sup>9</sup> Huan quichoquilisi in huejueyenten pin lalticpan hual in caltilan Babilonia quinnequiltic pa camo quicaquisi Dios huan quinnequiltic pa yulisi amo cuali ca miac tomin quinami yehuanten pin caltilan yulije. Lacames quichihuaje amo cuali quinami lanamacaloaya huan lacuhualoaya ca in caltilan Babilonia. Cataya quinami in amo cuali hual lacames quichihualo ca sihuames hual amo inminsihuahuan. Tzajtzi ca icnotilisli in huejueyenten quiman quitasi in pogli quiman chichinajtías in caltilan.

<sup>10</sup> Moquetzasi huejca pa camo quinmajsis in tixuxli, momajtitiasi pampa quitasi in lacocoltilisli hual quipanujtías, huan quilisi:

—¡Ay! ¡Ay pa tehual, ticaltilan hué, ticpiaya miac lahueliltisli, Babilonia! ¡Huan pan se tonali mitzajsic in lacocoltilisli jan ajnaxcan pampa amo tijcahuaya ticchia in amo cuali!

<sup>11</sup> Huan chocasi in lanamacanijmes pin lalticpan, huan quipiasi icnotilisli pampa in caltilan hué axan moijlacuc huan yojque yajmo quicuhuas amaqui len quipialo pa quinamacasi.

<sup>12</sup> Quipiaje oro huan plata huan maquisli lachihuali ca perlas, tzotzomajli cualtichin, morado, seda, huan tzotzomajli chichiltic huan mochi lachihuali ca cuahuil hual ajuíac, mochi len lachihuali ca marfil huan mochi hual unca lachihuali ca cuahuil hual ipati, huan ca teposli quinami cobre huan ca hierro huan ca mármol,

<sup>13</sup> huan canela huan innojen hual quicualo hual ajuíac (especies), ajuialisli, altzindi hual ajuíac, huan in hual lapopuchuía, huan iayo uva coc huan chahuac huan harina huan trigo huan ganado huan borregos huan caballos huan layahualujquimes huan yehuanten hual latequipanuילו lailpili, quinequi quijtúa, lacames hual pa mochi xixihuales hual yulilo quipialo pa quineltocasi oc se lalac.

<sup>14</sup> Quilisi lacames in caltilan hué, quil:

—¡Non hual ticnequiaya ca mochi moyolo yajmo unca ca tehual, axan uyac! ¡Huan mochi innojen hual cataloaya niman cuali huan cualtichin, axan tiqinpoluc, yajmo quiman tiqinmitas!

<sup>15</sup> Yehuanten hual quinnamacaloaya innojen monechiculije inmintomilaje huan mochihuaje lacames hual quipialo míac. Huan yehuanten moquetzasi huejca capa amo quinmajsi in tixuxli quichichinujtica in caltilan, momajtiticate pampa quipanujtica in lacocotlilisli tetzcuinuc, chocatinemisi huan lajtutinemisi ca icnotilisi.

<sup>16</sup> Quijtusi:

—¡Ay, ay pa in caltilan hué! ¡Mochi ilacames molaquentinijme ca tzotzomajli cualtichin morado huan chichiltic, cataloaya lachijchihuali ca oro huan maquisli huan ca perlas!

<sup>17</sup> ¡Pan se tonali san mochi in hual ipati mojjlacuc!

Moquetzaloaya huejca pa camo calaquisi in caltilan moxtin in laicananijmes huan yehuanten hual quinnejnemiltilo barcos pa se caltilan capa calaquilo barcos pa oc se caltilan pa itenco in al huejcalan. Huan in marineros huan moxtin hual molacuaultilo tequipanujticate pa al huejcalan moquetzaloaya huejca, quiztataloaya in caltilan.

<sup>18</sup> Tzajtziyoaya quiman quitaloaya in pogli hual majcoquiaya capa chichinahuiaya, quijtuloaya:

—Amo quiman cataya se caltilan quinami in caltilan hué.

<sup>19</sup> Huan quilasaje lalpotocli pani inmintzontecon pa lanextilosquiaya quinami quincocuhuaya inminyolo. Chocaloaya huan lajtuloaya ca icnotilisi, tzajztitaloaya huan quijtutataloaya:

—¡Ay, ay pa in caltilan niman hué! ¡Nepa monechiculiloaya lacames míac tomin moxtin pan ipampa in míac tomin hual cataya pin caltilan! Monechiculiloaya niman míac moxtin hual yeje inmintecojuan barcos. Monechiculiloaya míac moxtin hual quinpialoaya barcos. ¡Pan se tonali mojjlacuc in caltilan niman hué! Yojque quijtuje.

<sup>20</sup> Axcan, xicpiacan paquilisli pampa yajmo unca in caltilan niman hué, amhuanten pin cielo, huan amhuanten hual anunca ilacames Dios huan ilanahuatinijmes huan ilajtunijmes. Xicpiacan paquilisli pampa axan quitilanic Dios ca capic yajmo mocuepas yes. Yojque quitilanic Dios pampa anmijchiuilic in niman amo cuali.

<sup>21</sup> Cuaquinon se ilanahuatini in cielo hual quipiaya míac chicahualisli canac se tixcali hué quinami se melal hué huan quilasac pin al huejcalan, huan quijtuc:

—Yoje cayas lalasali ca lacomunaltlilisli in caltilan hué Babilonia huan yajmo moitas.

<sup>22</sup> Huan yajmo mocaquis ca tehual, Babilonia, inminlatzotzonalisli yehuanten hual quintzotzonalo in arpa, huan oc sequin latzotzonquijmes quinami flautas huan lancaquetzalonijmes. Huan yajmo moitas ca tehual se hual quimati quichía len tequipanulisli. Yajmo mocaquis ca tehual ixahuanilisli se hual testica ca melal.

<sup>23</sup> Yajmo lahuis ca tehual se tapalquita pa lahuilisli huan yajmo mocaquis ca tehual inminlajtomes lalal hual yahui monamictía huan sihual hual monamictía. In unca hual tipanus pampa tiyulic ticchijtataya laijlaculisli. Molanamacanjimes yeje in huejueyenten pin lalticpan. Huan tehual, O Babilonia, pan ipampa molaxuxalisli mocuajcuamanaloaya moxtin yehuanten pa mochi in lalimes pin lalticpan.

<sup>24</sup> Huan pin caltilan niman hué moitilic inminesli ilajtunijmes Dios huan inminesli ilacames. Quema, moitilic inminesli moxtin ilacames Dios hual cataloaya lamictili pan in lalticpan.

## 19

<sup>1</sup> Panuc inon huan nijcaquic len xahuaniaya quinami ilajtol chicahuac niman míac lalalera pin cielo, tzajtziyoaya:

¡Aleluya, xiquilican Dios lajtomes huejué!

Unca pan ipampa toDios cate laquixtili pin polehuilisli ilacames.

Huan yihual cahuilía pa quilisli mochi lajtomes huejué huan pa quipías lahuelilitilisli.

<sup>2</sup> Unca pampa yihual quinchihuilía lacames ca lachihualisli melahuac.

Dios quitilanic pa yes lacocoltili in hué sihual lalalero hual quinmijlacuc in lacames pin lalticpan pan ipampa quinami quinnequiltic lacames pa quintequipanuilisli oc sequin dioses.

Ca Dios in unca quinami lacames moaniltilo ca sihuames hual amo inminsihuahuan.

Huan yojque yihual Dios quilacuepelic in sihual pampa yihual quinmictic Dios itequipanujquimes.

<sup>3</sup> Oc sejpa tzajtziye:

—¡Aleluya! Amo quiman mocahuas pa lejcus ipogli.

<sup>4</sup> Huan in veinticuatro abuelojmes huan in nahuenten yulijquimes molasaje pan lali pa quimolancuacuetzilisi Dios hual yehuatataya pani icpali hual laixpelaya, quillije:

—¡Yoje ma ye! ¡Aleluya!

<sup>5</sup> Huan pa in icpali hual laixpelaya mocaquic se lajtol tzajtzitahaya, quiqtuaya:

Xiquilican toDios lajtomes huejué, anmoxtin itequipanujquimes, amhuanten hual anquimati anmomajtía ilaixpan yihual ca lasojlalisi, amhuanten in lacames tijtipichin, huan amhuanten in lacames huejué.

### *In fiesta (ilhuil) hual unca imonamictilisli in Borreguito*

<sup>6</sup> Cuaquinon nijcaquic len quinami inminlajtol niman míac lalalera, xahuaniye quinami míac alimes huan quinami comunilisli niman chicahuac, tzajtzitataloaya:

¡Aleluya! pampa in Tata toDios hual quipía mochi chicahualisli huelitijtica.

<sup>7</sup> Ma ticpiacan paquilisli huan ma titzajtzcian niman míac, ma tiquilican lajtomes huejué inahuac ichicahualisli, pampa ajsic itonalí imonamictilisli in Borreguito, huan isihua calica monamictía huala.

<sup>8</sup> Quimacaje pa yes lalaquentili ca tzotzomajli cualtichin,

hual laixpela huan unca niman chipahuac.

Quijtúa yojque, pampa in lino cualtichin quinequi quijtúa inminlachihualisli cuajcuali hual yulilo quinchijtcate Dios ilacames.

<sup>9</sup> Huan in ilanahuatini in cielo nechilic:

—Xiquijcuilu inon: “Quiyasi paquilisli hual quinnotzalo pa hualasi lacuasi pan tonali capa cayas imonamictilisli in Borreguito.”

Huan nechilic:

—Innojen cate Dios ilajtomes mejmelahuac.

<sup>10</sup> Cuaquinon nimolasac ilaixpan pa icxihuajmes pa nicmolancuacuetzilis. Huan nechilic:

—Amalá tichmolancuacuetzilis. Niunca ca tehual huan anmocnían hual tictequipanuillo Dios huan ticpialo in lajtomes pa neli tiquinmilisli lacames mochi inahuac Jesús. Xicmolancuacuetzili Dios.

Monequi pa Dios ilacames quichihualo yojque, pampa sinda tiqulisi in hual melahuac inahuac Jesús, yoje inon unca len quinequi quijtúa mochi ilajtol Dios, jan in lajtulisli quinextilía lacames inahuac Jesús.

### *Yihual hual cataya ipan in caballo iztatataya*

<sup>11</sup> Cuaquinon niqitac lapujtataya in cielo, huan ¡xiquitacan! Cataya se caballo iztatataya. Huan yihual hual yehuatataya ipan itoca in Se Hual Amo Mocahua pa Quichías Jan Quinami Quijtúa, huan noje itoca Melahuac. Huan yihual quinchihuilía moxtin melahuac quinami quinmahuilúa. Huan quichía moanalisli hual yes melahuac.

<sup>12</sup> Cate iixtololajmes quinami se tixuxli milintica. Huan pani itzontecon quinpía mías teposyahualimes hual laixpelalo. Huan quipía se itoca lajcululi hual oc se amo quimati, san yihual quimati.

<sup>13</sup> Cataya lalaquentili ca se nahuas layapali ca esli. Huan itoca calica quitocayaltilo unca ILAJTOL DIOS.

<sup>14</sup> Huan Dios ilanahuatinijmes hual cate iguaches in cielo quitocaloaya yehuatataloaya inminpan caballos ij'iztatataloaya. Cataloaya lalaquentili ca tzotzomajli iztatataya huan niman chipahuac.

<sup>15</sup> Pa icamac yihual hual quinlaicanaya quisaya se teposli hual latequi ca pani huan ca itzindan, se teposli calica moanalo. Ca inon yihual moañas ca in mías lacames pa inminlalimes, huan huelitis chicahuac pan yehuanten quinami ca se pitzahuac lachihuali ca teposli. Quema, unca quinami yihual quitelicas capa unca lamontuli iuvas Dios pa quisas iayo in uvas quinami esli. In quinequi quijtúa, yihual quichías inon hual Dios hual quipía mochi chicahualisli quinequi quinchihuilí pa yoje quilamis icualanilisli niman chicahuac.

<sup>16</sup> Pani inahuas huan ipan icxían pa pani quipiaya lajcululi se itocajmes: “INMINHUÉ IN HUEJUEYENTEN HUAN INMINTECO IN TECOJUAN”.

<sup>17</sup> Cuaquinon niqitac se ilanahuatini in cielo moquezataya pin tonali, huan ca lajtol chicahuac quinnotzac mochi in tutomes hual palanilo lajco pin cielo, quinmilic:

—Xihualacan ximonechicucan pa anquicuas Dios ilacualisli hue.

<sup>18</sup> Ximonechicucan pa anquicuas inminacal inmincuerpos (inminacayo) laicananijmes huan lacames chijchicahuac, huan inminacal caballos huan hual aquí yehuaticate inminpan, huan inminacal moxtin lacames tequipanujquimes hual amo quinlaxlahuilo huan tequipanujquimes hual quinlaxlahuilo huan lacames tijtipichin huan huejué.

<sup>19</sup> Huan niquinmitac in yulijquil temajquil huan in huejueyenten pin lalticpan ca inminguaches monechicujtataloaya pa moanasi ca yihual hual yehuatataya pani in caballo iztatataya huan ca iguaches in cielo.

<sup>20</sup> Huan quiquitziye in yulijquil temajquil huan noje ca yihual quiquitziye in lajtuni hual islacatiaya. In lajtuni yec hual aqui quinchihuaya innojen lanextilisli hual quinlachialtiaya ca lamajtilisli yehuanten hual quipiaje ilanextilisli in yulijquil temajquil pani inmincuerpos. Noje quinmolancuacuetzaltiliaya imono. Inon quichíac in lajtuni hual islacatiaya, quichíac pan ipampa ilahueliltilisli in yulijquil temajquil. In omenten, in lajtuni huan in yulijquil temajquil cayaje lalasalí yultataloaya pin coyunquil capa unca tixuxli hual chichinahuía ca azufre.

<sup>21</sup> Huan inminguaches in omenten cayaje lamictili ca in teposli hual latequi calica moanaló. In teposli unca iyaxca yihual hual yehuatataya pani in caballo, in teposli hual quísa icamac. Huan mochi in tutomes pachihuije ca inminacal.

## 20

### *In mil xixihüimes*

<sup>1</sup> Cuaquinon, níquitac temujtihualaya se ilanahuatini in cielo, quipixtataya pa ima ilalapuloni in huejcalan hual amo químan huil cajsí itzindan, huan noje quipiaya se lapantini hué.

<sup>2</sup> Huan quiquitziye in cuhual, yihual unca in cuhual hual viejojtíc, yihual in lili huan Satanás. Quilpic pa mocahuas lailpili pa mil xixihuil.

<sup>3</sup> Quilasac pin huejcalan, huan quitzacuac huan quichihuilic pa camo huil molapus, pa yojque pa innojen mil xixihuil yajmo quincuaicuanasquiaya in lacames capa yulilo pa inminlalimes. Químan lamisi in mil xixihüimes, monequis pa yes lamacahuali pa se nadita.

<sup>4</sup> Cuaquinon niquinmitac icpalimes quinami innojen capa lacames huejué huelitilo, huan yehuatataloaya inminpan yehuanten hual cataya inminyaxca pa quinchihuilisli lacames quinami quínmahuiluaya. Noje níquinmitac moxtin yehuanten amo ca inmincuerpos hual Dios ilacocolinjmes quincotonilije inminquixlan pampa quijtuloaya neli Jesús ilamachiltilisli cuali huan quinlaquetzililoaya lacames ilajtomes Dios. Amo químan quimolancuacuetzilije in yulijquil temajquil huan amo quipiaje ilanextilisli pa inmintzontecon pa pani inmixtololojmes o inminmajmajuan. Yulije oc seppa huan huelitiloaya ca Cristo pa mil xixihuil.

<sup>5</sup> Ayamo yulije oc seppa in oc sequin mijquimes. Químan lamisi in mil xixihuil, cuaquinon yulisi oc seppa. Ma yojé, yehuanten hual yulisi oc seppa pa huelitisi ca Cristo cayasi ilapehualtilisli in mijquimes hual yulisi oc seppa.

<sup>6</sup> Quipias paquilisli hual aquí Cristo quiyuliltis ca in lapehualtilisli químan yulilo oc seppa yehuanten hual miquije. Yihual unca se ca in lacames hual iyaxca Dios san. Ca yehuanten in oc se miquilisli amo quipias chichualisli pa quinmictis oc seppa. Yehuanten yesi inmintiopistas Dios huan Cristo, huan huelitisi ca yihual ca mil xixihuil.

<sup>7</sup> Huan químan lamisi in mil xixihuil, cayas lamacahuali Satanás capa unca lailpili.

<sup>8</sup> Quísa pa quincuaicuanas in lacames pa mochi in lalimes pin lalticpan, in quínequi quijtúa Gog huan Magog. Huan Satanás quínechicus pa moanasi. Cayasi quinami in xali pan ixalipan in al huejcalan, pampa yehuanten cayasi niman míac.

<sup>9</sup> Huan nejnemisi mosemantiasi pa mochi in lali. Quiyahualusi ilacames Dios hual cayasi pa mochi itenco ilasojli caltilan Dios, in caltilan hual

Dios quinequi m'ac. Cuaquinon temujtiquisas tixuxli capa in cielo huan quinlamis quinchichinus moxtin hual quinlaicanas Satanás.

<sup>10</sup>Huan in lili Satanás hual quincuaajcuamanac cayas lalasalí pin coyunquil capa unca tixuxli huan azufre, nepa cate in yulijquil temajquil huan in lajtuni hual islacatiaya. Huan in yeyenten amo mocahuasi pa cayasi lacocoltili yihualitonali pa semilhuil huan pa layúa pa quiman.

*Dios quintilanía ilaixpan yihual yehuanten hual amo quineltocalo*

<sup>11</sup>Cuaquinon niquitac se icpali hué hual laixpelaya, iztatataya, huan niquitac yihual hual yehuatataya ipan. Ilaixpan yihual choluje in lalticpan huan in cielo (ilhuicac), huan yajmo cataya capa moitalosquiaya yehuanten.

<sup>12</sup>Huan niqinmitac in mijquimes tijtipichin huan in mijquimes hual cataloaya huejueyenten nepa moquezataloaya ilaixpan in icpali hué. Huan cataloaya lapalahuali in amames. Noje cataya lapalahuali oc se amal hual unca iamal yulilisi. Huan cayaje latilanili iyampa Dios in mijquimes pa quicaquisi in hual cataya lajcuiluli inminahuac yehuanten pin amames. Cataya lajcuiluli mochi hual quichihualoaya quiman yuliloaya pan lalticpan.

<sup>13</sup>Huan quitemacac in al huejcalan in mijquimes hual moitilije pin al. Quitemacac in ilajcotiyan huejcalan in mijquimes huan quitemacac miqulisi in mijquimes hual moitaje ca innojen. Huan moxtin yehuanten Dios quintilaní pa quiahuac iyampa yihual quinami quinmahuiluc pampa quichihuanijme mochi laijlaculisi quiman yulinijme pan lalticpan.

<sup>14</sup>Cuaquinon miqulisi huan in lajcotiyan huejcalan capa cataloaya mijquimes cataloaya lalasalí pin coyunquil hual chichinahuía ca tixuxli hual amo quiman sehuis. Inon unca in oc se miqulisi, in coyunquil ca tixuxli.

<sup>15</sup>Huan sinda se itoca amo cataya lajcuiluli pin iamal yulilisi, cuaquin yihual cataya lalasalí pin coyunquil capa in tixuxli.

## 21

*Cielo (ilhuicac) yancuic huan lalticpan yancuic*

<sup>1</sup>Cuaquinon niqinmitac se cielo yancuic huan se lalticpan yancuic, pampa in cielo (ilhuicac) huan in lalticpan hual tiquiximatilo yajmo cataloaya, huan yajmo cataya in al huejcalan.

<sup>2</sup>Huan nehual, Juan, niquitac Dios icaltilan lasojli, cuali huan chipahuac, in Jerusalén yancuic, temujtihuialaya capa in cielo capa unca Dios. Cataya lachijchihuali cualtichin quinami se sihual hual yahui monamictía ca ilhuical.

<sup>3</sup>Huan nijcaquic se lajtol hué lajtutataya pin cielo, quijtuaya:

—Xiquitacan. Axan unca ca lacames capa chanti Dios. Yihual chantis ca yehuanten huan yehuanten yesi ilacames. Huan yihual Dios cayas ca yehuanten huan yes inminDios.

<sup>4</sup>Yihual quinhuactilis mochi ichoquis pa inmixtololojmes, huan yajmo yes miqulisi, yajmo cayas ilacocolisi inminyolo lacames, huan yajmo cayas chocalisi huan lacocoltilisi huan cocolisi, pampa yajmo cayasi innojen hual tiquinpanulo nican pan lalticpan.

<sup>5</sup>Huan yihual hual yehuatataya pani in icpali hual laixpelaya quijtu:

—Xiquitacan. Niqinchiytica mochi yajyancuic.

Noje nechilic:

—Xiquijcuilu inon, pampa huil ticlalia mochi molaneltocalisi ca in lajtomes pampa neli cate huan mejmelahuac.

<sup>6</sup>Huan nechilic:

—Axcan lamíc mochíac mochi. Nehual niquinami Alfa huan Omega, in A huan in Z. Niunca in pehualisli huan in lamilisli. Yehuanten hual amiquilo pa inminyolo niquinmacas in al huan amo quipiasí pa quilaxlahuisi. In al quimaca yulilisli huan quisa pin ixtololon al capa nehual niunca.

<sup>7</sup> Huan mas que panúa lacocoltilisli pampa quichihuililo nolacocolinijmes, yihual hual lasulahua quipías ca nehual inon hual noyaxca. Huan niyes iDios huan yihual yes noxolöl.

<sup>8</sup> Huan yehuanten hual momajtilo pa yultiasí nechnehtocaticate pampa quinchihuililo lacocoltilisli nolacocolinijmes, cuaquín quipiasí inminyaxca pin coyunquíl hual chichinahuía ca tixuxli huan azufre. Inon unca in oc se miquilisli. Huan jan yojque quinpanus yehuanten hual amo quinelcalo ilajtol Dios huan yehuanten hual yulilo quichijtcate mochi hual Dios amo quinequi, huan yehuanten in lamictinijmes huan yehuanten hual quichihualo amo cuali lacames ca sihuames huan yehuanten in laxuxanijmes huan yehuanten hual quinmolancuacuetzililo monos huan yehuanten hual yulilo islatijtcate. Quema, yehuanten noje quipiasí pa panus in oc se miquilisli pin coyunquíl hual chichinahuía ca tixuxli huan azufre.

### *In Jerusalén yancuic*

<sup>9</sup> Cuaquinon hualac se lanahuatini hual cataya ca in oc sequin chícua se ilanahuatinijmes in cielo hual quinpialoaya in chicome (siete) tapalquitas tentataloaya ca in chicome lacocoltilisli, calica Dios lamíc ca icualanilisli. Laquetzac ca nehual huan nechilic:

—Xihuala, huan nimitznexilis in sidual yancuic, isihua in Borreguito.

<sup>10</sup> Huan pan ipampa in Espíritu Santo, nechhuicatíac ca se loma (tepel) hué huan cuajtc, huan nechnextilic Dios icaltilan lasojli, cuali huan chipahuac, itoca Jerusalén. Huan quisac pin cielo capa unca Dios, temujtihualaya.

<sup>11</sup> Quipixtihualaya ilaixpelalisli cualtichin hual iyaxca Dios, laixpelaya quinami se maquisli cualtichin hual unca se maquisli quinami in jaspe, lanescataya.

<sup>12</sup> Quipiaya calimes huejcanic (tepandi) hual quitzacuaya in caltilan. Cataya hué huan cuajtc ca doce lalapujquimes huan inminpan in lalapujquimes cataya lajcuiluli inmintocajmes in doce inminlanechiculisli inminmiahuimes ixolomes Israel.

<sup>13</sup> Pa capa quisa in tonali cataloaya ye lalapujquimes, pa in sur cataloaya ye lalapujquimes, huan capa calaquía in tonali cataloaya ye lalapujquimes huan pa in norte cataloaya ye lalapujquimes.

<sup>14</sup> Huan quinpiaya doce lalastili innojen hual quitzacuaya in caltilan. Huan inminpan cataloaya lajcuiluli quinami motocalo yehuanten doce ilanahuatinijmes in Borreguito.

<sup>15</sup> Huan yihual hual laquetzaya ca nehual quipiaya se pitzahuac lachihuali ca oro pa lalamachiasquiaya. Yahuiaya quilamachía in caltilan huan ilalapujquimes huan innojen hual quitzacuaya.

<sup>16</sup> In caltilan cataya lachihuali quinami se tixcali cuadrada. Cataya huejcanic jan quinami cataya palahuac. Quilamachíac in caltilan ca ipitzahuac huan cataya 2.200 kilómetros. Cataya yoje huejcanic huan palahuac huan cuajtc.

<sup>17</sup> Huan innojen hual quitzacuaya in caltilan quinlamachíac, huan cataloaya sesenta y cuatro metros telahuac. In ilanahuatini in cielo quilamachihua ca in lamachihuilisli calica tehuanten in lacames ticlamachihualo.

<sup>18</sup> In caltilan cataya lachihuali ca oro, lanescataya quinami vidrio.

<sup>19</sup> Innojen hual quitzacuaya in caltilan cataya de jaspe huan in doce itixcalimes ilastili cataloaya lachijchihuali ca doce tixcalimes hual ipatilo miac. In se yec jaspe, in oc se yec zafiro, in oc se yec ágata, huan in oc se yec esmeralda.

<sup>20</sup> Huan in oc se yec ónice, huan in oc se yec cornalina huan in oc se yec crisólito huan in oc se yec berilo, huan in oc se yec topacio, huan in oc se yec crisopraso, huan in oc se yec jacinto, huan lamic ca se hual yec amatista.

<sup>21</sup> Mochi sejse innojen doce lalapujquimes yec se perla, huan in ojli hué yec lachihuali ca oro, lanescatataya quinami vidrio.

<sup>22</sup> Amo niquitac tiopan pin caltilan pampa nepa pa mochi cajcapa quinmolancuacuetzililo in Dios hual quipía mochi chicahualisli huan in Borreguito.

<sup>23</sup> Amo monequiaya pa quilahuisi in tonali huan in mesli, pampa quilahuía Dios huan in Borreguito inminlaixpelalisli cualtichin.

<sup>24</sup> Huan ilaixpelalisli in caltilan quinlahuisi in lalimes huan inminlacames nejnemisi pin ilahuilisli in caltilan pin lalticpan yancuic. Huan yehuanten hual huelitilo pin lalticpan quihualicasi pa in caltilan lajtic mochi hual inminyaxca hual tiqitalo cualtichin, pampa quimatisi quinami mochi unca iyaxca Dios.

<sup>25</sup> Ilalapujquimes amo quiman cayasi latzacuali, pampa amo motzacualo pin semilhuil huan nepa amo layuajtía.

<sup>26</sup> Huan quinhuicasi pa in caltilan in hual ipati huan inminlaixpelalisli cualtichin huan inminlasojlalisli inminlacames in lalimes pan lalticpan yancuic.

<sup>27</sup> Amo calaquis nepa nindeno hual amo unca chipahuac, huan amo calaquis se hual islacati. Jan yehuanten san calaquisi hual quinpialo inmintocajmes lajcuiluli pin iamal yulilisli, yehuanten hual cate iyaxca in Borreguito.

## 22

<sup>1</sup> Cuaquinon nechnextilic in atenco hué capa unca in al hual layuliltía, lanescatataya quinami vidrio, huan totoca quistataya capa inminicpali Dios huan in Borreguito.

<sup>2</sup> Totocatataya lajco pin iojli in caltilan. Noje pa se itenco huan oc se itenco in atenco hué nepa cataya in cuahuil hual layuliltía, huan quiapiaya ilaquilyo. Laqui mochi doce mesli pan xihuil huan mochi sejse mesli quiapiaya ilaquilyo. Huan isacayo unca pa quinpajtis in lacames inminlalimes.

<sup>3</sup> Yajmo cayas len hual Dios cajcajuac pa quijlacusquiaya. Huan pin caltilan cayas inmicpali Dios huan in Borreguito, huan inmintequipanujquimes quinmolancuacuetzilisi.

<sup>4</sup> Quitasi iixco huan quipiasi itoca pan inmintzontecon pa pani inmixtololojmes.

<sup>5</sup> Huan yajmo cayas layúa. Yajmo monequis pa cayas ilahuilisli se tapalquita pa lahuilisli, huan ilahuilisli in tonali, pampa inminlahuilisli yes in Tata Dios. Huan amo quiman mocahuasi pa huelitisi ca Dios in Tajtzin.

### *Jesucristo amo huejcahuas pa hualas oc sepa*

<sup>6</sup> Huan nechilic:

—Ca innojen lajtomes huil quilalía se mochi ilaneltocalisli pampa cate melahuac. Huan in Tata, yihual in Dios hual quinmaca ilajtomes pa inminyolo ilajtunijmes Dios, yihual quitilanic ilanahuatini pin cielo pa quinnextilis itequipanujquimes len quipía pa panus, huan amo huejcahuas.



<sup>7</sup> Huan xiquitacan, yihual in Tata anmitztilanilía in lajtol, quijtúa: “Amo nihuejcahuas pa nihualas.” Yoje quijtúa.

¡Quipiás paquilisli hual aquí quilalis ilaneltocalisli ca Dios ilajtomes lajcululi pa in amal!

<sup>8</sup> Nehual nijuan, nehual hual aquí niquincaquic huan niquinmitac innojen. Huan químan niquincaquic huan niquinmitac, nimolasac pa nicmolancuacuetzilisquiaya nepa pa icxihuajmes in lanahuatini hual nechnextilic inon.

<sup>9</sup> Huan yihual nechilic:

—Amalá tichmolancuacuetzili. Nehual niunca itequipanujquil Dios. Nehual nictequipanuilía ca tehual huan mocnían hual cate ilajtunijmes Dios huan yehuanten hual quineltocalo in hual quijtúa in amal. Xicmolancuacuetzili Dios.

<sup>10</sup> Huan noje nechilic:

—Amo xiquintzacuili in lacames pa camo quimatisi ilajtol Dios hual unca lajcululi pa in amal, pampa ajsitihualalo in tonalijmes químan panusi innojen.

<sup>11</sup> Sinda yihual hual yultía quichijtica in amo cuali quinequi yultía quichijtica yojque, cuaquín ma yultía quichijtica yojque. Huan sinda se quinequi yuli tetzcuinuc, cuaquín ma yultía tetzcuinuc. Huan sinda se quinequi yultía quichijtica len unca quinami Dios quinequi, ma yultía yojque. Huan yihual hual quinequi yultía jan pa Dios san ca iyolo chipahuac, ma yultía yojque.

<sup>12</sup> 'Quema, xiquitacan. Amo nihuejcahuas nihualas. Nicualicas in laxlahuilisli huan niqinxiluilis yehuanten hual niqinlajtultic. Moxtin inminlaxlahuilisli niclamachihuilis se huan oc se. In lamachihuilisli cayas pa in hual quichihuaje químan yuliloaya pan laticpan.

<sup>13</sup> Nehual in Alfa huan in Omega, quinequi quijtúa in pehualisli huan in lamilisli. Nicpehualtía huan niclamía.

<sup>14</sup> Quipiasi paquilisli yehuanten hual quinpacalo inminahuas, quinequi quijtúa, yehuanten hual mochipahuilisi pa inminyolo. Sinda quichihualo yojque, cuaquín cayas iyaxca pa quicuasi ilaquilyo in cuahuil hual layuliltía. Yojque huil calaquisi ilalapujquimes Jerusalén in yancuic.

<sup>15</sup> Pa quiahuac in lalapujquimes cate in lacames ej'elehuis huan in laxuxanijmes huan yehuanten hual quichihualo amo cuali ca sihuames. Nepa noje cate lamictinijmes huan yehuanten hual quinmolancuacuetzililo in monos huan moxtin hual quixtocalo islacatilo huan lacuajcuamanalo huan yulilo quichijticcate yojque.

<sup>16</sup> —Nehual Jesús annimitztilanilic nolanahuatini amhuanten pa anmitzilis in lajtol neli nonahuac nehual, pa yojque in míac inminlanechiculisli nolacames neli quimatisi. Nehual niquinami se pacholi hual ixuac ca ilalhuayol se cuahuil hual huaquic, nehual imiahuil in hué David. Nehual in lucero (silalin) laxpoyahuero hual laixpela chicahuac.

<sup>17</sup> Quijtulo in Espiritu Santo huan isihua in Borreguito:

—Xihuala.

Huan yihual hual quicaqui, ma quijtu:

—Xihuala.

Huan yihual hual amictica pa iyolo ma huala huan yihual hual quinequi, ma cuni in al hual layuliltía, amo quipia pa laxlahuis.

<sup>18</sup> Moxtin, mochi sejse hual quicaquilo in lajtomes pa in amal, ma quimati pampa in unca ilajtol Dios. Huan niquinmilía moxtin in lajtol: Sinda se quinpalas in lajtomes huan quipantis oc sequin lajtomes ca in lajtomes hual

nican cate lajcuiluli, cuaquín Dios quipantis ca yihual in m'iac lacocoltilisli hual cate lajcuiluli pa in amal.

<sup>19</sup> Huan sinda unca se hual quinquixtis ilajtomes ilajtol Dios hual cate lajcuiluli pa in amal, cuaquín Dios quiquixtilis in hual iyaxca ca in cuahuil hual ilaquilyo layuliltía, huan quiquixtilis in hual iyaxca pa calaquis pin caltilan cuali huan niman chipahuac, Dios icaltlan lasojli. Quema, quiquixtilis ilajco innojen hual unca lajcuiluli pin amal nican.

<sup>20</sup> Yihual hual quijtúa neli innojen quijtúa:

—Neli amo nihuejcahuas pa nihualas.

Yoje ma ye. ¡Xihuala, toTata Jesús!

<sup>21</sup> Ma caya ca anmoxtin Dios ilacames in cuali hual tejchihuilía in Tata Jesús. Yoje ma ye.